

Wængongui nänö
Apänegainö



New Testament in Waorani (EC:auc:Waorani)

Wængongü nänö Apænegainö

New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
9bedab5a-39ff-5163-a35b-8056cbbe8690

Contents

Määteo	1
Mäadoco	61
Odoca	96
Wäö	158
Näni Cægainö	203
Odömanoidi	262
1 Coodintoidi	290
2 Coodintoidi	317
Gadataidi	334
Epetoidi	344
Pidipenteidi	354
Codotenteidi	361
1 Tetadönitenteidi	367
2 Tetadönitenteidi	373
1 Tīmoteo	376
2 Tīmoteo	384
Tito	390
Pidemöö	394
Ebedeoidi	396
Tantiago	418
1 Pegodo	425
2 Pegodo	433
1 Wäö	438
2 Wäö	445
3 Wäö	446
Codaa	447
Nänö Odömongainö	450

**Itota Codito ingantedö ante
Mäateo
nänö watapæ ante
yewæmongainta**

*Itota Codito wæmæidi
(Odoca 3.23-38)*

¹ Nē Ponguingä, ante dodäni nāni nē angaingä iñömö Itota Codito inongä ingampa. Tömengä iñömö Abadäo wodi pæingä nē ingaingä inte Awënë Dabii wodi pæingä mönönö inongä ingacäimpa. Tömengä wæmæidi iimaï emongadänimpa, ante yewæmonte ongompa.

² Abadäo wodi wengä Itæca eñagacäimpa. Ayæ wææ Itæca wodi wengä Aacobo eñagacäimpa.

Ayæ wææ Aacobo wodi wënäni Oodaa nāni caipæ eñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöö eñagacäimpa.

Ayæ wææ Etedöö wodi wengä Adäma eñagacäimpa.

⁴ Ayæ wææ Adäma wodi wengä Äminadabo eñagacäimpa.

Ayæ wææ Äminadabo wodi wengä Näatöö eñagacäimpa.

Ayæ wææ Näatöö wodi wengä Tädämöö eñagacäimpa.

⁵ Ayæ wææ Tädämöö wodi pæte Adacaba ingante möninqe Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte eñagacäimpa.

⁶ Ayæ wææ Yæte wodi wengä Dabii eñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogængä iningä ingante möninqe Tadömöö ingante tapæigacäimpa.

⁷ Ayæ wææ Tadömöö wodi wengä Doboäo eñagacäimpa.

Ayæ wææ Doboäo wodi wengä Abiya eñagacäimpa.

Ayæ wææ Abiya wodi wengä Ata eñagacäimpa.

⁸ Ayæ wææ Ata wodi wengä Ootapato eñagacäimpa.

Ayæ wææ Ootapato wodi wengä Oodäo eñagacäimpa.

Ayæ wææ Oodäo wodi wengä Otiya eñagacäimpa.

⁹ Ayæ wææ Otiya wodi wengä Ootäo eñagacäimpa.

Ayæ wææ Ootäo wodi wengä Acadæ eñagacäimpa.

Ayæ wææ Acadæ wodi wengä Etequiya eñagacäimpa.

¹⁰ Ayæ wææ Etequiya wodi wengä Mänatee eñagacäimpa.

Ayæ wææ Mänatee wodi wengä Ämöö eñagacäimpa.

Ayæ wææ Ämöö wodi wengä Ootiya eñagacäimpa.

¹¹ Ininque Ootiya wodi quëwengäñedë idægoidi inänite babidöniadi ponte ö æd gobæ wabæca mäodäni gogadänimpa.

Ayæ wææ Babidöniabæ nāni goyedë Ootiya wodi wënäni Eecöniya nāni caipæ eñagadänimpa.

¹² Mänii Babidöniabæ ö ænte godäni ate ayæ wææ Eecöniya wodi wengä Tadatiedo eñagacäimpa.

Ayæ wææ Tadatiedo wodi wengä Dodob- abedo eñagacäimpa.

¹³ Ayæ wææ Dodobabedo wodi wengä Abiodo eñagacäimpa.

Ayæ wææ Abiodo wodi wengä Ediaquimö eñagacäimpa.

Ayæ wææ Ediaquimö wodi wengä Atodo eñagacäimpa.

¹⁴ Ayæ wææ Atodo wodi wengä Tadoco eñagacäimpa.

Ayæ wææ Tadoco wodi wengä Aquii eñagacäimpa.

Ayæ wææ Aquii wodi wengä Ediodo eñagacäimpa.

¹⁵ Ayæ wææ Ediodo wodi wengä Edeadado eñagacäimpa.

Ayæ wææ Edeadado wodi wengä Mäatäo eñagacäimpa.

Ayæ wææ Mäatäo wodi wengä Aacobo eñagacäimpa.

¹⁶ Ayæ wææ Ootee wodi ingante Aacobo tapæigacäimpa.

Ayæ Ootee wodi eñate pæte wææ Itota badä inguingä ingante Mäadiya ingante mongacäimpa.

Mäadiya ingante mongä ate tömengä wæætë Itota ingante mangacäimpa. Tömengä iñömö Awënë bacæcäimpa, ante cædinque Wængongui oginguipæ gao cæcä ate edæ, Codito, ante nänö nē pemongaingä ingacäimpa.

¹⁷ Mänömai i incæ Abadäo wodi pæināni wææ nänömoidi wææ, önonpo tipæmpoga wææ mempoga go mempoga mänimpoga nāni yebæñedë ate Abadäo wodi pæingä Dabii eñagacäimpa. Ayæ wææ Awënë Dabii wodi pæināni wææ nänömoidi wææ, önonpo tipæmpoga wææ mempoga go

mempoga mänimpoga nāni yebæñedē ate Oodeoidi inānite wabæca Babidōniabæ ænte gogadānimpā. Ayæ Babidōniabæ ænte godāni ate tōmēnāni pæināni wææ nānōmoidi wææ, ōnompō tipæmpoga wææ mempoga go mempoga mänimpoga nāni yebæñedē ate mōnō Codito nānō ponguinque ēñagacāimpā.

*Itota Codito ēñacampā
(Odoca 2.1-7)*

¹⁸ Itota Codito iīmaī ēñagacāimpā. Wāānā Māadiya wodi nānō baquecāñedē Ootee wodi tōmengā ingante do, Monguimo, angā ēñēningā inte ayæ mōnāmaī iñongante Wængonguī Tæiyæ Waēmō Ōnōwoca angā ēñēninge do yædēmadā bacā adānitapā. ¹⁹ Yædēmadā ingā adinque Ootee cōwē nō cædongā inte, Piinte ānāni wæcæ wæ, ante wædinque, Awēmō pango cæcæboimpā, ante pōnēngantapā.

²⁰ Ante ōnōwēnenque pōnēninque mōwocodē wīimōñongā Wængonguī tōmengā anquedo ingante da pōnongā pōninque anquedo iñōmō iīmaī angantapā. “Ootee, Awēñē Dabii pæiimi iñōmi inte bitō nānōogængā Māadiya ingante guīñēnāmaī æncæbiimpā. Tōmengā iñōmō Wængonguī Tæiyæ Waēmō Ōnōwoca angā ēñēnte beyænque ēnengā adinque bitō iñōmō tōmengā ingante ee moncæbiimpā. ²¹ Tōmengā Wēñængā onguīñængā ingante mancæcāimpā. Mangā pæcā ate tōmengā iñōmō, Botō guīdēmini mini wæquinque wēnæ wēnæ cæminīpā, ante adinque botō æmo beyænque quēwencæminīpā, ante cæcæcāimpā cæbii. Bitō tōmengā ēmōwo ante, Nē Ængā inongā ingampā, ante Itota pemoncæbiimpā,” ante anquedo Wængonguī nānō nē da pōnōningā ponte Ootee ingante angacāimpā.

²² Iñinque Wængonguī beyæ nē apænegaingā iīmaī ante nānō yewæmongainō bai ante iinque batimpā.

²³ “Baquecā incæ yædēmadā badinque Wēñængā onguīñængā ingante mancæcāimpā. Mangā ēñacā adinque tōmengā ēmōwo, Æmānoedo, ante godō pemoncædānimpā.”

Ante nāni yewæmongainō bai cædinque tōmengā ēmōwo, “Wængonguī mōnō weca quēwengampā,” ante, Æmānoedo, ante pemonte inongāimpā.

²⁴ Ootee māniū wīimonte nāni ōmæmongā ate Wængonguī nānō da pōnōningā anquedo nānō āmaī ēñēnte cædinque oncōñē ænte gocā incæte guæa mōnāmaī ingadāimpā. ²⁵ Edæ bamoncadengā ēñacā ate, Itota, ante pemonte ate tōmēna māniñedē ate guæa mon-gadāimpā.

2

Nē ēñēnāni Itota weca ēñacæ pōnānīpā

¹ Itota Bedēē nāni quēwēñōmō ēñacā ate māniñedē edæ Edode Oodeabæ awēñē od-eye nānō iñedē edæ nē nō ēñēnāni gobæ nænque tamōnō quēwēñāni inte Eedotadēē pongadānimpā. ² Ponte āninque,

—Oode Awēñē Odeye iñōmō ñōwocā ēñadingā iñōmō æyōmōnō owocāā, ante ēñencæte ante wæmōnīpā. Edæ nænque tamōnō quēwēñōmōni Awēñē nēmō ta ñongæ adinque mōnitō tōmengā weca ædæ wææninque edæ, Bitō Wængonguī imidō anguēñē, ante watapæ apæñecæ pōmōni imōnīpā, ānānitapā.

³ Ayæ, Wacā Awēñē Odeye ēñacampā, ante dededāni ēñēnte wædinque māniōmæ tōmāmæ awēñē odeye Edode wæætē pūinte bayongā Eedotadēē quēwēñāni tōmānāni tōmengā tōnō godongāmæ guīñēnte wædānitapā. ⁴ Iñinque, Wængonguī quī, ante nē godōnāni ñæñæñāni tōnō Wængonguī nānō wææ angainō ante nē odōmōnāni tōnō tōmānāni inānite Edode āñecā godongāmæ pōnānitapā. Pōnāni ate tōmengā, Codito nāni angaingā iñōmō æyōmōnō ēñaquingāā, ante æbānō yewæmonte ōñō aminii. ⁵ Åñongante, —Oodeabæ iñōmō Bedēē nāni quēwēñōmō māniñōmō ēñacæcāimpā, ante Wængonguī beyæ nē apæñecā incæ iīmaī ante yewæmongacāimpā, ante apænedānitapā.

⁶ “Oodabæ awēñē gobedōnadodoidi tæiyæñāni iñōnāni mīnitō adobæca Oodabæ quēwēninque Bedēē iñōmō mīni quēwencabo iñōmō mēa pōni iñinque incæte edæ wīi ōnōmīninque incæminīpā.

Iñæmpā Wēñængā adocanque ēñate pædinque nē Awēñē bate taodinque nē aacā bai inongā inte botō guīdēnāni idægoīdi inānite aacæcāimpā.”

Ante yewæmongā amōnīpā.

⁷ Ante apænedāni ēñēnte wædinque Edode wæætē nē nō ēñēnāni inānite awēmō āñete pōnāni ate, Nēmō æyedēnō mā pōni tamō amīnitawo. Åñongante tōmēnāni, Māniñedē tamō atamōnīpā, ante apænedāni.

⁸ Èñēninque Edode iñōmō,

—Mīnitō wæætē Bedēē iñōmō māo nē ēñadingā ingante diqui diqui mīnte aedāni. Tōmengā ingante adinque wæætē adodō pōninque apænemīni ēñēmoedāni. Edæ mīnitō gote æbānō wēñæ ingante apænemīni bai botō adobai edæ gote ædæ wææninque edæ, Wængonguī Awēñē imidō anguēñē, ante watapæ apæñecæte ante āmopa, ante Edode ōnonque ante pōnēninque apænegacāimpā.

⁹ Angā ēñēninque nēmō nē adīnāni iñōmō Bedēē taadō gote æmō ayōnāni edæ ado nēmō tōmēnāni nænque tamōnō quēwēninque nāni adīmō incæ wo go adinque edæ tē wocæ goyōñānite nēmō

Wēñæ owoyomō oncōmanca tæcædæca inō næ gongæ adānitapa. ¹⁰ Adinque tōmēnāni edæ, Mōnō acæ pōnongā iñōmō ongongampa, ante pōnēninque watapæ togadānimpā. ¹¹ Mānii nāni adincōnē go guite ayōnāni Wēñængā iñōmō wānā Māadiya tōnō ongongā adinque tōmēnāni Wēñængā weca ædæ wææninque, Bitō Wængongui Awēnē imidō anguēnē, ante watapæ apænedānitapa. Ayæ tōmēnāni nāni ænte pōnincoo wi æmpodique oodo tōnō ogui waa qui tōnō ti nā ōni pæqui tōnō, Bitō qui impa, ante pædæ godōnāni ængacāimpā. ¹² Idæwaa adinque tōmēnāni mōwocodē wīlmōñōnānite wacā ponte apænecantapa. Minitō awēnē Edode weca ocæ ēmænte godāmai iedāni, angā ēñēninque tōmēnāni wæætē yaatænque godinque tōmēnāni ōmæ wadæ gogadānimpā.

Ooteidi Equitobæ wodii winōnānīpa

¹³ Godāni iñinque edæ Ootee wīlmōñongā Wængongui anquedo ingante da pōnongā ponte apænedinque, “Edode do Wēñængā ingante wænoncæte ante diqui mincæcāimpā cæbii. Ængæ gantite Wēñængā nāna badancaya inate ō ænte Equitobæ wodii goe. Ayæ gote quēwēñōmini botō āmo ate pōedāni,” angā.

¹⁴ Ēñēninque Ootee tōmengā nānō wīlmōōnæ ayaōnæñēña incæ ængæ gantidique Wēñængā nāna badancaya inate ō æninque edæ Equitobæ gocantapa. ¹⁵ Godinque Ootee nāni wencabo iñōmō Edode nānō wænguinganca quēwencæ gogadānimpā. Go quēwēnāni iñinque mōnō Awēnē Wængongui iīmai ante nānō apænegainō ante iñique batimpā. “Botō Wēñængā Equitobæ quēwēñongante āñebo pongantapa,” ante Wængongui beyæ nē apæncæ nānō yewæmongainō bai edæ do iñique batimpā.

Wēñæñāni inānite Edode angā wæñōnāni wænānīpa

¹⁶ Edode guiquēnē, Nēmō nē nō ēñēnāni botō āninō ante ēñēnāmai inte dæ godānīpa, ante adinque edæ ængui bacantapa. Ængui badinque tōmengā, Wēñæñāni inānite māo wænōedāni, angantapa. Āninque tōmengā, Mēa wadepo iñonte nēmō ta atamōnīpa, ante nē ēñēnāni nāni ānimpoga ante pōnēninque, Mēa wadepo ēñadīnāni tōnō ayæ ēñadināni tōnō Bedēē quēwēnāni incæ Bedēē eyequei quēwēnāni incæ onguīñæñānique inānite māo wænōedāni, angantapa. Īninque nē wænōnāni wæætē awēnē nānō adinānique inānite capo ado tedæ wænōnāni wængadānimpā. ¹⁷ Wæñāni wædāni iñinque Wængongui beyæ nē apænegainō Eedēmiya wodi iīmai ante nānō angainō bai edæ iñique batimpā.

¹⁸ “Nāmaa nāni quēwēñōmō nē Ca ca wæwēnā nānā Ca ca wæpāmo ēñēnānitapa.

Wānā nē Yæ yæ ānōnā inte, Daquedā iñōmō, Botō wēñæñāni, ante wædā ēñēnānitapa.

Dæ ānāni pōnente wædinque wānā ædō cæte piyæñē cæquināa,”

ante Eedēmiya wodi yewæmongacāimpā.

¹⁹ Ayæ ate awēnē Edode wængā iñinque Ootee iñōmō Equitobæ ayæ quēwēninque wīlmōñongā Wængongui anquedo ponte a ongōninque tōmengā ingante apænecantapa. ²⁰ “Ootee ēñēmi. Wēñængā ingante wænoncæ ānōnāni incæ dobæ wæñānīpa cæbii. Ængæ gantite Wēñængā nāna badancaya inate Idægobæ adodō ænte gocæbiimpā,” angā.

²¹ Ēñēninque Ootee iñōmō edæ ængæ gantidique nāna badancaya inate Idægobæ adodō ænte gocantapa. ²² Māniñedē wæmpo Edode wængā iñinque, Wæætē tōmengā wengā Adoquedao Oodeabæ awēnē odeye bacantapa, ante tededāni ēñente wædinque Ootee iñōmō, Botō Oodeabæ ædō cæte wæætē goquimoo, ante guīfente wæcantapa. Wæætē tōmengā mōwocodē wīlmōñongā wacā angā ēñēninque Oodeabæ wodo tebæ godinque Gadideabæ gocantapa. ²³ Godinque Ootee nāni wencabo Nāatadeta

ponte quēwēnānitapa. Īninque, Nāatadēnō ingampa, ante pemoncædānīpa, ante Wængongui beyæ nē apænegainō nānō angainō bai cædinque wadāni nōwo mōnō Codito ingante, Nāatadēnō, ante pemonte bai apænegadānīpa.

3

Wāō ōnōmæca ponte apæncæ ēñēnānīpa (Māadoco 1.1-8; Odoca 3.1-9, 15-17; Wāō 1.19-28)

¹ Māniñedē Wāō mōnō nē æpæñē guidōnongā inte Oodeabæ ōnōmæca ponte apæncæ ēñēngadānīpa. ² Ponte apænedinque tōmengā, “Ōnædē Awēnē incæ inguipoga tōmāmæ Awēnē Odeye bacæcāimpā cæminii. Minitō wænæ wænæ cædinō ante, Ancaa wæwente awædō, ante iñipo cæedāni,” ante Wāō apæncæ ēñēnānitapa.

³ Mānōmainō ante nē apæncæ ingantedō ante Wængongui beyæ nē apænegainō Itaiya wodi iīmai ante do yewæmongacāimpā.

“Ōnōmæca iñōmō adocanque ogæ tedete aa pecæcāimpā.

‘Awēnē nānō ponguinō ante munitō tee moncate bai cæedāni.

Taadō tōinō pīnonte bai cædinque munitō wænæ wænæ mini cædinō ante

edæ wido cædāni, ante aa pecā ēñengæimpa,”

⁴ Ante Itaiya wodi nānō nē angaingā inte Wāō ñōwo pongantapa. Tōmengā weocoo ante cāmeyo ocaguincoo nonte badonte wēñate mongæninque pacadeyænta ante æmontai badonte encadeyænongæimpa. Tōmengā cænguī ante ñāwāique cæninque tōmengā bequī ante guīñēmænque ade bete quēwēnongæimpa. ⁵ Quēwēñongā, Eedotadēē quēwēnāni tōnō Oodeabæ tōmāo quēwēnāni tōnō Oododānonga biyōnæ tōmāo quēwēnāni tōnō tōmengā weca tate bee tēninque ānānitapa. ⁶ Bitō āmai nāwangā wēnæ wēnæ cæte quēwēmōni inte wæmōnīpa, ante wædāni ēñēninque Wāō Oododānō æpæñē guidongā guīdānitapa.

⁷ Ayæ Paditeoidi tōnō Tadoteoidi guīquēñē Wāō nānō guīdōñōmō pōnāni adinque tōmengā ayæ wæwætē tōmēnāni inānite angantapa. “Tæntæ pæīmīni bai inōmīni inte mīnitō iñōmō ēñēnāmai cæte quēwēmīnīpa. Oo pōnī wænonmpadāni, ante æcānō wææ angā ēñēninque wodii wīnonte pōmīnī. ⁸ Iñæmpa Wængonguī Awēñē gāmænō mīnitō dicæ ocæ ēmænte poncæ cæmīniyaa. Nō cæte pōmīni ininque mīnitō nē ocæ ēmænte pōnāni nāni waa cædō bai adobai waa cædāni. ⁹ Ayæ nāmā wææ āninque, Mōnitō adomōnique docā Abadāō wodi pæīmōni inte mōni quēwenguinque imōnīpa,” ante mīni tedewēnō ante pōñēnāmai inguēñē quēwēmīnī. Iñæmpa Wængonguī, Botō pæīñāni bacædānimpa, angā bai dicacoo incæ dobæ tōmengā pæīñāni bai bacædōnimpa. ¹⁰ Edæ awæ yecæte ante awænca nāni mæ yequinca eyewa pōnī næñāni bai Wængonguī nānō panguinca næænte bai do edæ a ongongampa. Tōmengā wainca ante a ongōñongā òmæcawæ bai wīi pōnente cædāni adinque awæncaca wægo yete godō gongapamō iya tante bai cæcæcāimpa, ante āmo ēñēmalmīnīpa.”

¹¹ Ayæ, “Mīnitō wēnæ wēnæ mīni cædinō ante wido cæcæmīnīpa, ante cædinque botō mīnitō imīnite æpæñē guīdōmo guīmīnīpa. Incæte botō mānōmai cæbo ante wacā ayæ poncæcāimpa. Tōmengā iñōmō tæī ēmongā ēwocadongā iñongante botō wæwætē wædāmo inōmo inte tōmengā awæncata incæ ædō cæte godō ænte næñæmāimoo. Tōmengā da pōnongā pōninque Wængonguī Tæiyæ Wæmō Ònōwoca incæ pō guīdinque mīnitō mīmō mēnongacæcāimpa. Ayæ mīnitō wēnæ wēnæ cædinō ante gonga tante bai tōmengā cæcæcāimpa. ¹² Waocā, Todigo tōmēmō wati wati tæñōninque botō tæñōniñōmō ònōmancaque baquinque botō apænte æninque waiña tōmāmō oncōñē da wencæboimpa, ante timpodæ næænte wo

ææntodō wo ææntodō cædinque ontapocoo wææincoo wadæ ñēmænte wo ēwengampa. Waocā mānōmai wo ēwencæte ante timpodæ næængā bai mōnō nē Ponguingā iñōmō adobai oo pōnī apænte ancæcāimpa. Todigo waiñacooque oncōñē da wente nē mangā bai tōmengā adobai nē wæmō ināni inānite apænte ængā ate tōmēnāni tōmengā nempo guīcædānimpa. Wæwætē wadæ ñēmænte wo ēwente bai cædinque tōmengā nē ontapocoo wææincoo bai ināni inānite cōwē bæcōyōmō iya tangā gonte wæcædānimpa,” ante Wāō apænegacāimpa.

Itota æpæñē guicampa

(Māadoco 1.9-11; Odoco 3.21-22)

¹³ Wāō ayæ apæneyongā Itota iñōmō Gadideabæ quēwēninque, Wāō botō imote æpæñē guidongā guīcæboimpa, ante cædinque Oododānonga pongantapa. ¹⁴ Ponte, Guīdōmi guīboe, āñongante Wāō wæwætē wææ āninque,

—Botō wæmō imopa diyæ bitō imite guīdōmo guīquīmīi. Bitō wæwætē botō imote guīdōmi guībo bai waa incædōnimpa.

¹⁵ Ante wæyongante Itota wæwætē,

—Cōwē ee cæbi, āmopa. Wængonguī nānō ānō ante tōmānō ēñente nō cæmō inguēñēmō imopaa.

Ante apæñecā ēñēninque Wāō Ao ante ee guidongā guīgacāimpa. ¹⁶ Guīite æpæ do tao gongænte æmō ayongā iñontobæ ònæ incæ wēā godōmonte bayō Wængonguī Ònōwoca incæ equemō wææ bai tōmengā wææ pō guīcā acantapa. ¹⁷ Wææ guīcā ayongā edæ òñædē inō apæñedinque, “Māningā iñōmō botō Wēñængā ingongā inte botō nē waadecā ingampa. Tōmengā ingante adinque botō watapæ tobopa,” ante òñædē inō apæñecā ēñengacāimpa.

4

Itota incæ wēnæ wēnæ cæcæcāimpa, ante wēnæ cæcampa

(Māadoco 1.12-13; Odoco 4.1-13)

¹ Ayæ māniñedē edæ, Itota iñōmō wēnæ angā ēñente æbānō cæqingāā, ante Wængonguī Ònōwoca incæ Itota ingante òñōmæca mæicā æigacāimpa.

² Æi quēwēninque tōmengā wantæpiyæ coadenta eōnæ mānimpoōnæ itædē woyowotæ cænāmai quēwēninque gue ænente wægacāimpa. ³ Gue ænente wæyongā wēnæ awēñē, Wēnæ wēnæ cæe, ante nē ānewengā ingongā inte Itota weca pōninque,

—Bitō Wængonguī Wēmi imitawo. Nāwangā ī ininque dica incæ pāō āmi ba cæmāimpa.

⁴ Āñongante Itota iñōmō,

—“Cænguinque cænte ædō cæte quēwengūī. Wængonguī nānō apæñedō tōmāne ēñente cædinque waocā cænguī cænte bai quēwencæcāimpa.” Mānōmāinō ante

Wængongui beyæ yewæmonte ongö apa änewëë, äninque Baa angantapa.

⁵ Wënæ awënë ayæ Itota ingante Eedotadëë tæiyæ waëmö nāni quëwëñömö ænte mäocä gocantapa. Ayæ Wængongui oncö ñænænconga wænömënæca ænte mäi gönongä næ gongængantapa. ⁶ Næ gongæñongante wënæ awënë wæætë,

—Bitö Wængongui Wëmi ïmitawo. Nāwangä ï ïninque bitö to wæibi ate dodāni ïmalnö ante nāni yewæmongainö bai ïinque ba abaimpa.

“Bitö beyæ ante cædinque Wængongui tömengä anquedoidi ïnānite angä pönninque,

tömëñāni bitö ïmite wææ aate ïñæ æmpodāni ate

bitö dicaa tee tewardāmai incæbiimpa,” ante yewæmonte ongompa cæbii.

⁷ Äñongante Itota,

—Ïñæmpa godömenque ante yewæmongatimpa.

“Bitö Awënë bitö Wængongui ïñongante bitö wæætë edæ, ‘Ëñëñāmai cæbo incæte mönö Awënë Wængongui æbānö cæquingäa,’ ante acæte ante cædāmai incæbiimpa,” ante adobai wææ yewæmonte ongö apa änewëë, ante Itota angantapa.

⁸ Ayæ wæætë wënæ awënë Itota ingante æibæ pöni onquiyaboga mäicä æicantapa. Æi ongöñongä wënæ awënë ïñömö awënë odeye ömæcoo inguipoga tömäo ongöñömæcoo adoyömö a ongonte bai ado tedæ odömönninque awënë odeyeidi waa pöni nāni ëmönö adobai odömongä acantapa. ⁹ Itota ingante apænedinque wënæ awënë,

—Bitö botö weca ædæ wææñinque, Tatānabi bitö Wængongui Awënë bai ïnömi ïmpa, ante watapæ apænebi ëñëmoë. Mänömainö ante apænebi ëñëninque botö wæætë, Mänïömæ tömäo ongöñömæ pönömo æninque bitö tömäx Awënë babaïmpa, ante wënæ incæ änewengantapa.

¹⁰ Änewëñongante Itota wæætë,

—“Bitö Awënë Wængongui weca ædæ wææñinque tömengä ingante, Bitö Wængongui ïmidö anguënë, ante watapæ apæñecæbiimpa. Ayæ tömengä adocanque ingante næ cæbi incæbiimpa,” ante Wængongui beyæ yewæmongatimpa cæbii. Botö weca ongönāmai gobāwe, angantapa. ¹¹ Angä go ate Wængongui tömengä anquedoidi pönninque Itota beyæ pönö waa cægadānimpa.

Gadideabæ ponte Itota mä apæñecampa (Māadoco 1.14-15; Odoca 4.14-15)

¹² Ayæ quëwëñongä, Wäö ingante dobæ tee mönedānipa, ante tededāni ëñente wædinque, Itota wæætë Gadideabæ wadæ gogacäimpa. ¹³ Wadæ godinque tömengä Nāatadeta ponte wodo pænta

godinque godömenque go gäwapæ yæwedeca Tabodöoidi tönö Nempatadiidi nāni owogaimæ ïñömö pönninque edæ Capënaömö nāni quëwëñömö ponte quëwengantapa.

¹⁴ Itota mäniñömö ponte quëwengä ïninque Itaiya wodi Wængongui beyæ næ apæñecä nänö angainö bai mäniñedë ïinque batimpa.

¹⁵ “Tabodöömæ tönö Nempatadiibæ ingaiñömö,

Gäwapæno gämænö godö,

Oododänö æmæmäa ïñömö,

Gadideabæ ïñömö wii oodeoidi wadāni nāni quëwëñömö impa.

¹⁶ Në ëñëñāmai ïnāni wëmö ïñömö contayönāni,

tömëñāni weca ñäö guinæ tamö bai adānitapa.

Tömëñāni nāni wænguimämo oo ïñonte wëmö ïñömö contayönāni,

mönö Codito ñäö ëmongä inte do pongä adānitapa.”

Ante Itaiya wodi nänö yewæmongainö bai ante cædinque Itota mäniñömö ponte apæñecä ëñëñānitapa.

¹⁷ Itota mäniñedë ïmai ante mä apæñecä ëñëñānitapa. “Öönædë Awënë incæ inguipoga tömäx Awënë Odeye oo bacæcäimpa cæminii. Minitö wënæ wënæ cædinö ante, Ancaa wæwente awædö, ante pönente ñimpo cædäni,” ante cöwë apæñecä ëñengadānimpa.

Në gæyæ dadöwëñāni ïnānite Itota aa pecampa

(Māadoco 1.16-20; Odoca 5.1-11)

¹⁸ Ayæ mänii pönninque Itota gäwapæ Gadideapæ yæwedeca gote cægonte ayongä Timönö Pegodo nāni änogä tönö Æntade nāna caya ïnate acantapa. Në gæyæ dadöwëña ïnöna inte tömëna ñöwo dicamöñæ æpænë wo guitodonte dadöwëñöna Itota gote acantapa. ¹⁹ Tömëna ïnate Itota,

—Ïñāna, botö miñæ edæ tee empo pöeda, ämopa. Në dadonte ænte pömina inte botö weca pöñömināte botö pönö cæbo ate minatö wæætë næ apæñemina badinque woadāni ïnānite næ ænte pömina bacæmināimpa, angantapa.

²⁰ Angä ëñëninque tömëna dicamöñæ do ëmö cæte godinque Itota miñæ edæ tee empo wadæ godatapa.

²¹ Mäniñömö ongonte wadæ godinque Itota wada ïnate Tebedeo wëna Tantiago tönö Wäö nāna caya ïnate acantapa. Tömëna mëmpo tönö wipodë ongonte dicamöñæ tadömoncöna adinque Itota tömëna ïnate, Botö miñæ pöeda, angä. ²² Ëñëninque tömëna Ao äninque Tebedeo wëna Tantiago tönö Wäö wæmpocä ingante wæætë, Mæmpo ëñëmi, änatapa. Në cædāni tönö wipodë owote

cæyöminite mönatō bitō imite emō cæte god-
inque Itota miñæ gomōnapa, āninque ado-
daque wadæ gogadaimpa.

*Tæiyēnāni inānite Itota odōmonte
apæneccā ēñēnānīpa
(Odoca 6.17-19)*

²³ Ayæ Gadideabæ tōmāmæ godinque
Itota iñōmō Wængongui apæneccā nāni
ēñente yewæmongainta ate odōmōincōnē go
guite odōmonte apænegacāimpa. Öönædē
Awēnē incæ inguipoga tōmāmæ Awēnē
oo badinque waa cæte aacæcāimpa, ante
apæneccā ēñengadāimpa. Ayæ waodāni
wēnæ wēnæ inte nāni wæwēnō ante ayæ
quiēmē beyæ wæncæ cæte wædāni incæ
Itota tōmēnāni nāni wædō ante pōnō cæcā
ate tōmānāni waa badānīta. ²⁴ Adinque,
Itota mǎnōmaī cæcampa, ante Tidiabæ
tōmāmæ gode ānāni ēñēninque waodāni
pōninque nē wēnæ wēnæ inte wæwēnāni
inānite tōmengā weca cæte pōnānīta.
Ayæ nantate wæwēnāni tōnō wēnæ inte
quēwēnāni inānite ænte pōninque dowænte
ināni tōnō cōmāināni inānite tōmengā weca
ænte pōnāni adinque tōmengā godō cæcā ate
nē wēnæ wēnæ inānāni inte tōmānāni waa
bagadānīpa.

²⁵ Ayæ Gadideabæ quēwēnāni tōnō
Decapodibæ quēwēnāni pōñōnāni wadāni
Eedotadēē quēwēnāni tōnō Oodeabæ
quēwēnāni ayæ Oododānō æmæmāa
quēwēnāni tæiyæñāni pōninque tōmengā
miñæ tee empote gogadānīpa.

5

Itota ānanquidi cæite apæneccā ēñēnānīpa

¹ Tæiyæñāni pōnāni adinque Itota iñōmō
ānanquidi æi tæ contayongā tōmengā miñæ
nē godāni pōnāni. ² Ate tōmengā iñæ ænete
nangui tedete iūmaī ante odōmonte apæneccā
ēñengadānīpa.

*Waocā iūmaī cæite watapæ tote
quēwencæcāimpa, ante
(Odoca 6.20-23)*

³ “Waodāni, Botō waēmō ewocabopa diyæ
öönædē Awēnē weca go guiquimoo, ante
nē wædāni iñōmō tōmēnāni nāni watapæ to-
quinque edæ öönædē Awēnē Odeye nempo
tōmēnāni quēwenguinō do ēadānīpa,” angan-
tapa.

⁴ “Nē wæwente quēwēnāni iñōmō
tōmēnāni nāni watapæ toquinque
wædānīpa. Edæ Wængongui tōmēnāni inānite
waadete godō cæcā ate tōmēnāni wampo
pōnencædānīpa.”

⁵ “Nē gānē pōnente ædæmō cæte
quēwēnāni iñōmō tōmēnāni nāni watapæ to-
quinque edæ inguipoga tōmāmæ æninque
awēnēidi bai bacædānīpa.”

⁶ “Wængongui nō pōni nānō entawēnō
bai adobai entawencæboimpa, ante æcānō
cængui cæñente bai wæda, æcānō tepæ
gæwænte bai wæda tōmēnāni iñōmō nāni
watapæ toquinque wædānīpa. Edæ
tōmēnāni tōmo cænte bai Wængongui nānō
nō entawēnō ænte ædæmō entawente
tocædānīpa,” ante Itota apænecantapa.

⁷ “Wadāni quēwencædānīpa, ante
nē godō waadete waa cædāni iñōmō
tōmēnāni nāni watapæ toquinque
cædānīpa. Edæ mǎnōmaī nē cædāni inānite
wadāni wæætē, Quēwencæminīpa, ante
næmæ apænedinque godō waadete waa
cæcædānīpa.”

⁸ “Mimō ñāō bai nē entawēnāni iñōmō
tōmēnāni nāni watapæ toquinque edæ
Wængongui ingante do acædānīpa,” ante
apænecantapa.

⁹ “Guēadō guēa pīināmaī iedāni, ante nē
wææ wææ ānāni iñōmō tōmēnāni nāni
watapæ toquinque edæ wææ ānānīpa.
Tōmēnāni inānite wadāni edæ, Minitō
Wængongui wēñæmīni imīnīpa, ante do
apænedāni ēñente tocædānīpa.”

¹⁰ “Nō cædāni beyænque wadāni pīinte
pānāni nē wæwēnāni iñōmō edæ tōmēnāni
nāni watapæ toquinque wæwēnānīpa.
Tōmēnāni öönædē Awēnē Odeye nempo nāni
quēwenguinō edæ do ēadānīpa.”

¹¹ “Wadāni botō beyæ pīinīnque mīnitō
imīnite babæ ante ānānitawo. Minitō imīnite
edæ togænte pānānitawo. Īninque edæ
mīni watapæ toquinque impa. Ayæ, Nē
wīwa cæmīni imīnīpa, ante wadāni pīinte
ānewēnāni wæmīni Īninque edæ mīni watapæ
toquinque impa. ¹² Edæ, Öönædē mönō
ænguīnō ante nangui ongōmpa, ante
pōnēninque mīnitō ñōwo wadāni nāni pīinte
cæyedē incæ watapæ toedāni. Edæ mīnitō
imīnite pīinte pānāni bai mīnitō ayæ dæ
āñedē Wængongui beyæ nē apænegaināni
inānite adobai pīinte pangadānīpa, ante
toquēnē wæwēmīnīi,” ante Itota odōmonte
apænegacāimpa.

*Cati bai imīnīpa. Ñāō bai imīnīpa, ante
(Māadoco 9.50; Odoca 14.34-35)*

¹³ Godōmenque apænedinque Itota,
“Minitō iñōmō inguipoga quēwēnāni beyæ
cati quimonte cæi bai inte ongōmīnīpa.
Īninque mīnitō cati bai yæpæ emonte bai
inōmīni inte wæætē edæ nongæmonte bai
badāmaī iedāni. Cati iñōmō yæpæ emōnāmaī
nongæmonte ba adinque edæ æbānō cæte
wæætē yæpæ waa emonguīi. Waa impa
cænguīnāni anguēnē. Īñæmpa wido cæte
nāni pīnā gāwate cægonguinque babaimpa,”
ante odōmonte apænecantapa.

¹⁴ Ayæ, “Ñāō bai emōmīni inte mīnitō
iñōmō edæ inguipoga quēwēnāni beyæ tica
ēnente bai cædinque, Edonque acædānīpa,

ante cæmīni īmīnīpa. Änanquidi tæiyænāni mæñonte quëwēnāni īnīnque edæ ædō cæte wē womonte inguūi. Edæ edonque abaimpa. ¹⁵ Waocā ædō cæte tī wodōnote godō cængænē boo cæcaquingāā anguēnē. Edæ, Mōnō quëwēncabo edonque acæīmpa, ante cædinque waocā tī wodōnodinque wænōmēnæcapaa cō cæcā ate edonque bæcco aquīnāni. ¹⁶ Mīnitō guiquēnē, Wadāni mōnō waa cædinō adinque mōnō Mæmpo öönædē nē quëwengā ñāō bai tōmengā nānō ēmōnō ante waa ate apænecædānīmpa, ante cædinque cōwē ñāō bai pōnēnīnque waa cæte quëwēdāni,” ante Itota odōmonte apænecantapa.

Wængonguī nānō wææ angainō ante

¹⁷ Ayæ īīmai ante godōmenque odōmonte apænecantapa. “Wængonguī, īīmai cæedāni, ante Mōitee wodi ingante angā ēñēnīnque tōmengā nānō wææ yewæmōngainō ante ayæ Wængonguī beyæ nē apænēdāni nāni yewæmōngainō ante mīnitō, Mānīnō ante Itota wido cæcæte ante pongampa, ante ædō cæte pōnēmīnīi. Īñæmpa wīi wido cæcæte ante pōnīmo inte botō tōmēnāni nāni angainō bai līnque cæbo bacæīmpa, ante pōmo īmopa. ¹⁸ Edæ nāwangā āmopa. Inguipoga tōnō öönæ līnque baganca Wængonguī, īīmai cæedāni, ante nānō wææ angainō īñonte adodeque pōnī wē womonte badāmai ingæīmpa. Edæ guiyā tænoncāi incæ picæ yewæmōnī incæ adodeque cōwē wadæ cædāmai īñonte tōmengā nānō angainō bai tōmānō adodō līnque cæte bacæīmpa. ¹⁹ Īnīnque Wængonguī nānō wææ angainō ante æcānō adodeque pōnī ante ēñēnāmai cæda īñōmō tōmengā īñōmō edæ öönædē Awēnē Odeye nempo quëwengā incæte önonganque pōnī inguingānō anguēnē. Ayæ adobai Wængonguī nānō wææ angainō adodeque pōnī ante odōmōnīnque, Mānīne ante ēñēnāmai cæedāni, ante æcānō odōmonte apænēda tōmengā īñōmō öönædē Awēnē Odeye nempo quëwengā incæte önonganque inguingānō anguēnē. Wæætē mānīnō Wængonguī nānō wææ angainō ante nē ēñente cædinque æcānō adodō ante odōmonte apænēda guiquēnē tōmengā wæætē öönædē Awēnē Odeye nempo quëwēnīnque ñænængā pōnī inguingānō anguēnē. ²⁰ Incæte mīnitō īmīnīte īīmai āmopa. Īīmai cæedāni, ante nāni wææ yewæmōngainō ate nē odōmōnāni nāni cægancaque nō cæmīni incæte Paditeoidi nāni cægancaque nō cæmīni incæte mīnitō wīi godōmenque nō cæmīni īnīnque mīnitō edæ öönædē Awēnē Odeye nempo ædō cæte guīte quëwēmaīmīnīi,” ante Itota odōmonte apænecantapa.

Pīnte nāni ānō ante Itota odōmonte apænecantapa
(*Odoca 12.57-59*)

²¹ Mānōmāinō ante apænēdinque Itota godōmenque odōmonte apænecantapa. “Mōitee wodi īñōmō, ‘Wacā ingante godō wænōnāmai īe. Nē wænongā nānō apænte pante wæquinque impa,’ ante dodāni īnānīte tōmengā nānō wææ angainō ante mīnitō īñōmō do ēñēnīnque Ao āmīnitawo. ²² Botō īñōmō edæ godōmenque ante nō āmopa. Nāni caipæ īñōnāni æcānō tōmengā tōnīñacā ingante pīina īñōmō tōmengā nānō apænte pante wæquinque cæcampa. Ayæ tōmengā tōnīñacā ingante æcānō, Ēñēnāmai īmīpa, āna edæ tōmengā ingante nē Apænte nāni Āncabo weca nānō pangūinque ænte gōnoncædānīmpa. Edæ wacā ingante æcānō, Bitō mīmō ömædēmi inte wīi ēñencædō, ante nē āna īñōmō tōmengā tadōmengadænguipo gonga bæcoyōmō nānō wido cæquinque angampa tōō,” ante Itota apænecacāīmpa.

²³ Ayæ, “Mānōmai beyæ bitō, Wængonguī quī, ante nāni iya tāimoga godoncæte ante tæcæ cædinque, Æ, botō tōnīñacā ingante edæ wēnæ wēnæ cæbo pīingampa, ante pōnēmi īnīnque, ²⁴ bitō godonguīncōo nāni iya tāimoga gāānē ñōnōnīnque bitō tōnīñacā weca tāno gote nō apænēyōmi minatō guēa piyænē cæmīna ate bitō īñōmō adodō ponte godōe,” angantapa.

²⁵ Ayæ, “Bitō imite nē pīinte cæcā īñōmō nē apænte angūināni weca gōnoncæte ante æte idōmæ goyongā bitō tōmengā ingante waa apænēbi ēñēnīnque tōmengā wæætē piyænē cædinque ee abaingampa. Edæ taadō godinque guēa waa apænēdinque piyænē cædāmai īmīna īnīnque tōmengā īñōmō nē awēnē apænte angūingā weca æte māocā gobāīmpa. Ayæ awēnē nē apænte angā ingante pædæ godongā ænīnque tōmengā bitō imite wæætē wææ wānongā ingante angā ēñēnīnque tōmengā wæætē bitō imite bæi ongonte do tee mōnebaingampa. ²⁶ Tee mōnecā īnīnque edæ bitō godonte æinta tōmanta pōnī pædæ godonte tabāīmpa, ante āmo ēñēmaīmīpa,” ante Itota apænecacāīmpa.

Nāni godō towēmāmo ante Itota odōmonte apænecantapa

²⁷ Ayæ apænēdinque, “Mōitee wodi, ‘Bitō nānōogængā īnāmai īñongante bitō godō mōnāmai incæbiimpā,’ ante nānō wææ angainō ante ēñēnīnque mīnitō Ao āmīnitawo. ²⁸ Botō godōmenque apænēdinque nō āmopa. Onquiyængā ingante wīwa tōinente adingā īñōmō tōmengā nānōogængā īnāmai īñongante do godō monte bai mīmō dobæ wentamō entawengampa.”

²⁹ Ayæ, “Bitō tōmēmō īnō incæ adinque wēnæ wēnæ tōinente babi īnīnque tōmēmi

adimō incæ o togæmonte bai cædinque wænæ wænæ bitō cædinō ante wido cæbi waa imaimpa. Wæætē bitō wænæ wænæ adimō wido cædāmaī ininque bitō baō tōmāo tadōmengadænguipo wido cæte baquinō anguēnē. ³⁰ Adobai bitō ōnompoca tōmēmæ īnō incæ wænæ wænæ cædimi inte tōmēmi cædimpo incæ aa wi æmpote bai cædinque bitō wænæ wænæ cædinō ante wido cæbi waa imaimpa. Edæ a wi æmpote wido cædāmaī īmi ininque bitō baō tōmāo tadōmengadænguipo wido cæte baquinō anguēnē,” ante Itota apænegacāimpa.

Nāni pāmænte wædō ante Itota odōmonte apænegacampa
(Máateo 19.9; Máadoco 10.11-12; Odoca 16.18)

³¹ Godōmenque odōmonte apænedinque Itota, “Ayæ, ‘Onquiyængā ingante æcānō pāmæinēna tōmengā īñōmō yewæmōinta ænte yewæmōninque, Bitō imite æmæwo pāmæmopa, ante yewæmonte onquiyængā ingante godongā æncæcāimpa,’ ante dodāni nāni angaiñō ante do ēñēninge Ao āmīnitawo. ³² Botō edæ wadō ante īmaī ante nō āmopa. Onquiyængā awēmō todāmaī ee quēwēñongante tōmengā nānōogængā godō pāmængā īninque onquiyængā nē towengā nānō baquinque wacā ingante godō mōwengampa. Ayæ onquiyængā pāmænte goyongā wacā onguīñængā tōmengā ingante godō mōninque adobai nē towengā bacampa, ante apænebo ēñēmaimīnīpa,” ante Itota apænegacāimpa.

Cōwē baquinō anguēnē, ante nāni ānewēñō ante

³³ “Ayæ wæætē edæ, ‘Botō Wængonguī cōwē quēwengā bai botō ānō cōwē baquinō anguēnē, ante āmi īninque Wængonguī ēñengā beyænque bitō āniñō ante cōwē cædinque bitō wadō cædāmaī incæbiimpa,’ ante Mōitee wodi dodāni īnānite angacāimpa. Mīnitō īñōmō tōmengā nānō wææ angaiñō ante ēñēninque Ao āmīnitawo. ³⁴ Botō wadō ante nō āmo ēñēdāni. Edæ māniñō, Botō ānō nōingā baquinō anguēnē, ante ānāmaī iedāni. Ayæ māniñō ancæte ante mīnitō Wængonguī ēmōwo ante apænedāmaī īmīni incæte mīnitō, Ōōnæ tæī ongō bai impa, ante apænedāmaī iedāni. Īñæmpa, Ōōnæ, ante āmīni īninque mīnitō Wængonguī ōōnædē waa pōni nānō contayōmō ante apænebaīmīni apa ānewēmīnīi. ³⁵ Ayæ Wængonguī ēmōwo ante ānāmaī īninque mīnitō, Īmæca cōwē ongō bai botō ānō cōwē baquinō anguēnē, ante adobai apænedāmaī iedāni. Īñæmpa, Īmæca, āmīni īninque mīnitō Wængonguī pī cæwate nānō ongōñōmō ante apænebaīmīni apa ānewēmīnīi. Ayæ, Eedotadēē cōwē ongō bai botō ānō cōwē baquinō anguēnē, ante

apænedāmaī iedāni. Īñæmpa Eedotadēē īñōmō mōnō Tæiyæ Awēnē Odeye ongongā apa ānewēmīnīi. ³⁶ Ayæ adobai, Botō ānō nōingā baquinō anguēnē, ancæte ante bitō, Tōmēmo ocabo tæī ongō bai impa, ante mīni ānewēñō ante ānāmaī īe. Īñæmpa bitō ocaguī wentamō encabi īninque bitō ædō cæte adoguinque pōni godō cæbi nāāmænta baquīi. Ayæ nāāmænta encabi īninque bitō ædō cæte adoguinque pōni godō cæbi wentamō baquīi anguēnē. ³⁷ Īninque mīnitō Ao ānēmīni inte ‘Ao’ āninque māninque ædāni. Ayæ edæ Baa āinenta wædinque ‘Baa’ āninque edæ māninque ædāni. Godōmenque āninque mīnitō edæ nē wiwa cædongā angā beyænque āmīnīpa tōō,” ante Itota odōmonte apænegacāimpa.

Nāemæ wænæ wænæ nāni cædō ante
(Odoca 6.29-30)

³⁸ Ayæ godōmenque odōmonte apænedinque Itota, “Īmaī ante dodāni nāni angaiñō ante ēñēninque Ao āmīnitawo. ‘Bitō godō cæbi beyæ wacā awinca tæigæmongā bacā īninque tōmengā nāemæ cæcā beyænque bitō awinca adobai tæigæmōmi bacæbiimpa. Ayæ bitō godō cæbi beyæ wacā бага tā tobæ gogacā īninque tōmengā nāemæ cæcā beyænque bitō бага adobai tā tobæ gogacæbiimpa.’ ³⁹ Botō wæætē wadō ante nō āmo ēñēdāni. Nē wiwa pōnō cæcā ingante nāemæ cædāmaī iedāni. Edæ wacā bitō tōmempaga īnō pōnō tamongā wædimi inte bitō wæætē æmæmpaga īnō dadi ēmæmonte ee ongōmi wæætē tamongæ. ⁴⁰ Ayæ wacā, Bitō imite nē apænte angā weca ænte godinque botō bitō weocoo æncæboimpa, ante cæyongā bitō mānincooque tōmengā ingante pædæ godōninque wacoo bitō yabæ mongæncoo tōnō ee abi ō æncæcāimpa. ⁴¹ Ayæ wacā bitō imite, Bado, māninganca mongænte māobi goboe, angā ēñēninque bitō tōmengā nānō āninganca māobi goyongante ayæ adoganca godōmenque mongænte māobi gocæe. ⁴² Ayæ nē, Pōnōmi æmoe, angā ingante godōmi ængæe. Ayæ wacā, Bitō quīnca pōnōmi ænte cæte ate wæætē pōnōmo æe, ante nē angā ingante bitō pæ gompodāmaī incæbiimpa,” ante Itota apænegacāimpa.

Nē pīnte ānāni inānite waadete cæedāni, ante

(Odoca 6.27-28, 32-36)

⁴³ Ayæ apænedinque Itota, “Mīnitō dodāni nāni angaiñō ante do ēñēninque edæ Ao āmīnitawo. Tōmēnāni īñōmō, ‘Bitō guīdengā ingante waadete cæe,’ āninque edæ, ‘Nē pīngā ingante nāemæ pīnte cæe,’ ante wææ ānānitapa. ⁴⁴ Botō īñōmō edæ wadō ante nō āmo ēñēdāni. Mīnitō imīnite nē pīnte cædāni inānite mīnitō wæætē

waadete cædæni. Ayæ munitō iminite nē togænte pānāni beyæ ante Wængongui ingante apæneedāni. ⁴⁵ Mānōmai cædinque munitō mōnō Mæmpo oōnædē nē quēwengā wēñæmīni bacæminīpa. Edæ nē wiwa cædāni beyæ incæ nē waa cædāni beyæ incæ Mæmpo Wængongui angā nænque tamōpa. Ayæ nē nō cædāni beyæ incæ nē nō cædāmai ināni beyæ incæ Wængongui angā cōōnæ cæpa. ⁴⁶ Munitō guiquēnē munitō iminite nē waadedānique inānite waadete pōnēmīni ininque munitō mīni cædinō beyæ ante dicæ paga ænguimīniyaa. Inæmpa odōmāno awēnē beyæ nē æwēnāni incæ munitō waadete pōnenganca adoganca cædinque tōmēnāni inānite nē waadete pōnēnānique inānite waadete pōnēnānipa tōō. Bitō godōmenque cæbitawogaa. ⁴⁷ Ayæ munitō tōniñadānique inānite waadete apænedinque munitō dicæ godōmenque cæminīyaa. Inæmpa wadāni nē, Nāmā cæte quēwenguimo, ante nē ēñēnāmai cædāni incæ mīni cædō bai adoganca cædāni apa quēwēmīni. ⁴⁸ Mōnō Mæmpo oōnædē quēwengā nē nō waa cædongā ingā bai munitō adobai cædinque picæmīni badinque nō waa cæte quēwēdāni,” ante Itota odōmonte apænegacāimpa.

6

Æbānō cæte waa cæquī, ante Itota apænegacampa

¹ Itota ayæ godōmenque iimāi ante odōmonte apænegacāimpa. “Munitō edæ, Wængongui nānō ānō ēñente nō cæbote, ante cæmīnitawo. Ininque munitō, Waodāni botō imote waa acædānīpa, ante ānāmai inte wīi waodāni ayōnāni cædinque waa cædāni. Edæ, Waodāni botō imote waa acædānīpa, ante pōnēninque cæmīni ininque mōnō Mæmpo oōnædē nē quēwengā iñōmō munitō cædi beyæ wæætē pōnōnāmai imaingampa,” angantapa.

² Ayæ, “Wadāni nē wadō ante wadō cædāni guiquēnē, Ōmaadāni inte nē wædāni quī, ante pædæ godoncæte ante cædinque, Botō æbānō waa pōni cæboo, ante tōmānāni ponte waa acædānīpa, ante pōnente todompeta nāni ancadeca we we oōnānipa. Tōmēnāni munitō odōmōincōnē go guīte ongōninque ayæ taadō gote cægōninque, Botō waa pōni cæbo aedāni, ante yedæ ānāni ēñente godongāmæ pōnāni ante tōmēnāni tōmānāni ayōnāni godōnānipa. Bitō iñōmō tōmēnāni nāni, Pōnō waa acædānīpa, wædō bai wædāmai inte edæ pæ wēēnete godōe. Tōmēnāni waodānique godō waa adāni ænīnque mānīnque ænānīpa. Wængongui guiquēnē waa adāmai incæcāimpa. Nāwangā āmopa. ³ Bitō iñōmō, Ōmaadāni inte nē wædāni quī, ante godoncæte ante cædinque

bitō guidengā eyequei pōni ongongā incæ adāmai incæcāimpa, ante wææ cæe. ⁴ Mānōmai wææ cædinque awēmō godōmi æncædānīpa. Mānōmai cæbi adinque bitō Mæmpo nē wēmō iñōmō nē acā inongā inte awēmō bitō godōni ante wæætē eyepæ pōnongā æncæbiīpa,” ante Itota angacāimpa.

Wængongui ingante æbānō apænequī, ante Itota apænegā

(Odoca 11.2-4)

⁵ Ayæ godōmenque apænedinque, Itota, “Wadāni Wængongui ingante apænedinque nāmanque ante nāni cæbai munitō iñōmō wīi adobainō ante Wængongui ingante apæneedāni. Mānīnāni guiquēnē, Botō apænebo adinque waodāni pōnō waa acædānīpa, ante pōnēwēninque munitō odōmōincōnē go guidinque næ gongæninque Wængongui ingante apænedānīpa. Ayæ tōmēnāni nāni quēwēñōmō ñænquedæmpo iñōmō gote næ gongæninque Wængongui ingante apænedānīpa. Nāwangā āmopa. Tōmēnāni waodānique godō waa adāni ænīnque mānīnque ænānīpa. Wængongui guiquēnē waa adāmai incæcāimpa. ⁶ Bitō iñōmō tōmēmi oncōnē guīte odemō tee mōnedinque mōnō Mæmpo nē awēmō quēwengā ingante apænee. Mānōmai cæbi adinque bitō Mæmpo wēmō iñōmō nē acā inongā inte awēmō bitō cædinō ante wæætē eyepæ pōnongā æncæbiīpa,” ante Itota odōmonte apænegacantapa.

⁷ Ayæ, “Nāmā cæte quēwenguimo, ante nē ānāni ōnonque nāni tedewēnō bai tededāmai inte munitō nō cædinque Wængongui ingante apæneedāni. Tōmēnāni iñōmō, Wantæpiyæ tedebo beyænque Wængongui ēñencæcāimpa, ante babæ ante pōnēninque ōnōneque tedewēnānīpa cæmīnī. ⁸ Munitō iñōmō edæ tōmēnāni ōnōneque tedete nāni cædō bai edæ cædāmai iedāni. Inæmpa mōnō Mæmpo ingante apænedāmai iñōmonte tōmēngā mōnō anguīnō ante wēēñēdē do ēñengā apa tedewēmīni. ⁹ Ininque edæ iimāi ante Wængongui ingante apæneedāni. ‘Munitō Mæmpo nē oōnædē quēwēñōmi inte ēñēmi.

Bitō emōwo Tæiyæ Waēmō emōmi adinque mōnitō bitō emōwo ante waa adinque apænemōnīpa.

¹⁰ Bitō oōnædē Awēnē nē ingaimi inte inguipoga Awēnē Odeyebi edæ bitō baquinque quingæ pōe.

Oōnædē owodāni ēñente cædāni bai inguipoga adobai bitō ānō ante edæ ēñente cæte bacæīpa.

¹¹ Mōnitō imōnite bitō, Cænguī, ante iimō iñō iimō iñō bitō pōnōni ñwoōnæ incæ eyepæ pōnōmi ænte cæmōnie.

¹² Mōnitō imōnite nē waa cæquēnēnāni inte pōnō wēnæ wēnæ cædāni adinque mōnitō godō ñimpo cæmōni quēwēnāni bai bitō nē panguēnēmi incæ adobaī cædinque

mōnitō nē waa cæquēnēmōni inte wēnæ wēnæ cæmōni adinque pōnō ñimpo cæbi quēwēmōnie.

¹³ Ayæ mōnitō wēnæ wēnæ cæinente wædō ante bitō pōnō wææ cæbi ate mōnitō taadō oda cædāmai inte wēnæ wēnæ cædāmai incæmōnīmpa.

Edæ nē wiwa cædongā nempo ongonte wæyōmōnite bitō gā nepoempote æmi quēwæcæmōnie, æmōnīpa.

Tōmēmīque edæ Awēnē Odeye tæi piñæmi iñōmi mōnitō bitō nempo ongōmōnīpa. Nāmā ñāō bai entawēmi inte bitō cōwē tæi ãmōmi iñōmi iñīpa.

Amēē, ante, Nāwangā impa, ante apænemōnīpa.

Mānōmaiñō ante Wængonguī ingante apæneedāni, ante Itota odomonte apænegacāimpa.

¹⁴ Ayæ godōmenque odōmonte apænedinque Itota iūmaiñō ante apænegacāimpa. “Mīnitō imīnite wēnæ wēnæ cæyōnānite mīnitō godō ñimpo cæmīni iñinque mōnō Mæmpo nē oōnædē quēwengā adobaī mīnitō wēnæ wēnæ cædinō ante pōnō ñimpo cæcā quēwēmaiñīpa. ¹⁵ Wæætē mīnitō waodāni nāni wēnæ wēnæ cædinō ante ñimpo cædāmai imīni adinque edæ mōnō Mæmpo adobaī mīnitō wēnæ wēnæ cædinō ante ñimpo cædāmai inte pōnō piincæcāimpa,” ante Itota apænegacāimpa.

Wængonguī beyæ ante cæbānō cænāmai i, ante

¹⁶ Ayæ odōmonte apænecantapa. “Wadō ante nē wadō cædāni guiquēnē iūmai ante mā pōnēninque cædānīpa. Wængonguī beyæ ante ee ate cænāmai inte botō wæwente bai ãmōmo adinque wadāni botō imote waa acædānīpa, ante awinca nāmōnānīpa. Mīnitō iñōmō Wængonguī beyæ ante cædinque ee ate cænāmai imīni iñinque tōmēnāni nāni cæbai cædāmai iedāni. Wæætē nāmōnāmai inte Wængonguī beyænque ante cænāmai iedāni. Nāwangā mīnitō imīnite æmopa. Tōmēnāni waodānīque godō waa adāni æninque māninque ænānīpa. Wængonguī guiquēnē waa adāmai incæcāimpa. ¹⁷ Bitō guiquēnē Wængonguī beyænque ante ee ate cænāmai inte cæbi iñinque awinca ñā mēmōnte ayæ ocabo òni pæcate cæe. ¹⁸ Bitō ee ate cænāmai imīni iñinque, Waodāni edonque acædānīmpa, ante ānāmai inte wæætē, Mæmpoque acæcāimpa, ante mānōmai cæe. Bitō mānōmai cæbi adinque mōnō Mæmpo nē wēmō iñōmō quēwengā iñongā inte wēmō iñōmō edonque

adinque awēmō bitō cædinō ante wæætē eyepæ pōnongā æncæbiimpa,” ante Itota apænegacāimpa.

Öōnædē mīni waa pōni manguincoo ante (Odoca 12.33-34)

¹⁹ Godōmenque odōmonte apænedinque Itota, “Tōmēmo māincoo, ante mancæte ante wædinque mīnitō inguipogaque cayæ cænte to tamonte iñōmō cabo tē gæte da wēnāmai iedāni. Edæ nē ò ænāni bæ tate nāni ò ænguīnque inguipogaque da wēmīni apa quēwēmīni. ²⁰ Öōnædē ongoncoo guiquēnē to tamōnāmai impa. Cayæ guidāmai i iñinque māincoo wodāmai ongōmpa. Ayæ nē ò ænguīnāni adobaī māniñōmō bæ tate guidāmai iñāni iñinque māincoo cōwē wē wodōnāmai ee ongōmpa. Iñinque, Waadete mīni cædincoo cabo tē gæte bai cædinque mīnitō oōnædē waa pōni incoo mīni ænte manguinque ñōwo iñōmō waodāni iñānite waadedinque ee cædāni. ²¹ Edæ waa pōni mīnitō māincoo ongōñōmō mīnitō māniñōmō adoyōmō quēwæcæte ante wæmīni imīnīpa, ante adinque botō mānōmaiñō ante apænetabopa,” ante Itota odōmonte apænecantapa.

Awinca wainca mōnō ãmōnō ante (Odoca 11.34-36)

²² Ayæ odōmonte apænedinque, “Baonga quēwēninque mōnō edonque adinque cæcæimpa, ante mōnō awinca ãmōmōmpa. Iñinque awinca wainca ãmōnte edonque ate bai bitō mīmōno adobaī ñāō entawēninque, Nō cæbote, ante pōnēmi iñinque bitō baonga nō cæte quēwēmaiñīpa. ²³ Wæætē edæ awinca wīi wainca ãmōninque adāmai inte bai wentamō entawēmi iñinque bitō, Wīwa cæbote, ante mīmōno pōnēñōmite bitō baonga wiwa cæbaimīpa. Edæ mīmō ñāō entawēñōmi wentamō ba iñinque bitō quēwenguīmāmo mæ māmōnte bai baquinō anguēnē,” ante Itota apænecantapa.

Wængonguī beyæ cædinque māincoo beyæ cæqui (Odoca 16.13)

²⁴ Ante apænedinque Itota ayæ odōmonte apænecantapa. “Mēnaa awēnēna bayōnate waocā iñōmō mēnaa awēnēna nāna ānō ante ædō cæte ãente cæquingāā. Iñæmpa adocanque ingante piīninque tōmēngā wacā ingante waadebaingampa. Wæætē iingā miñæ tee empo godinque tōmēngā māningā ingante edæ wiwa adinque ãmō cæte gob-aingampa. Mīnitō adobaī Wængonguī beyæ ante nē cæmīni inte ædō cæte māincoo beyæ ante cæte quēwenguīmīni,” ante Itota angacāimpa.

Mæmpo Wængonguī mōnō īmonte aa-campa, ante
(*Odoca 12.22-31*)

²⁵ Ānīnque, Itota ayæ godongāmæ odōmonte apænedinque, “Mānōmaī beyæ botō mīnitō īmīnite īmaī āmopa, angantapa. Mīnitō inguipogaque mīni quēwenguīmāmo ante wædāmaī iedāni. Cænguī bequī ante ayæ weocoo ante wædāmaī iedāni. Cænguī cænte beyænque mōnō dicæ quēwēmongaa. Weocooque mōnō mongæñō beyænque dicæ quēwēmongaa. Mōnō quēwēmāmo īñōmō godōmenque impa. ²⁶ Ayamōidi awæñæca nē cæwodāni īnānite amīnitawo. Tōmēnāni dicæ tōmēmō mīnte pæ æte tā pete daga wente mānāniyaa. Incæte mōnō Mæmpo oōnædē quēwēnongā inte wæætē tōmēnāni īnānite eyepæ godongā cænāni aedāni. Mīnitō guiquēnē ayamōidi īnāmaī īñōmīnite Wængonguī mīnitō īmīnite godōmenque waa adinque eyepæ pōnongā cænte apa wæwēmīni. ²⁷ Edæ Wængonguī nānō anganca quēwenguēnēmīni inte mīnitō, Wantæ īño incæ godōmenque quēwēmote, ante wæwēmīni incæte edæ ædō cæte nāmā cædinque godōmenque wantæpiyæ quēwenguīmīni.”

²⁸ Ānīnque Itota godōmenque odōmonte apænecantapa. “Īnīnque mīnitō, Weocoo quīncōodō wēñaquīl, ante pōnente quīnante wæwēmīni. Īñæmpa ongaicoo ōmædē pæ īñōmō weocoo ante daque daque dadāmaī inte wodonte tīnāmaī tōmenque pæ aedāni. ²⁹ Incæte Awēnē Tadōmōō wodi wæmoncoo pōnī ēñagaingā incæ wīl ongai bai ēñagacāmpa. Ongai īñōmō godōmenque wæmō pōnī ēnodānīpa. ³⁰ Gaguīmæ īñōmō īlīmō ate edæ gongapamō guitodonte tanguinque pæ incæte ñōwoōnæ Wængonguī pōnongā wæmō wēñate ēnopa. Īnīnque, Wæmō ēnodō nē pōnongā inte Wængonguī mōnō īmonte godōmenque eyepæ pōnī pōnongā ænte wēñacæimpā, ante pōnēmīniyaa. ³¹ Īnīnque mīnitō, ‘Quīmōnō impa cænguīmōō,’ ante, ‘Quīmæñō impa bequīmōō,’ ante ayæ, ‘Quīncōodō impa wēñaquīmōō,’ ante pōnēninque guīñente wæwēnāmaī iedāni. ³² Mānīnō ante wadāni nē ēñēnāmaī īnāni nāni cabo nāni cabo wædāni incæte mīnitō guiquēnē, Mōnō æñīnente wædō ante mōnō Mæmpo īñōmō edæ do ēñengampa, ante pōnēninque edæ guīñente wædāmaī incæmīnīpa. ³³ Wæætē edæ, Wængonguī Awēnē Odeye nempo quēwencæboimpā, ante nanguī cædinque mīnitō, Tōmēngā nō cæte nānō waa quēwēnō bai adobai nō cæte waa quēwencæboimpā, ante adobai nanguī cæedāni. Mānōmaī quēwencæte ante tāno wæmīni adinque Mæmpo Wængonguī mānīnō ante do edæ eyepæ pōnī pōnongā æñōmīni mānīncōoque

mīni wædō ante adobai eyepæ pōnongā æncæmīnīpa. ³⁴ Mānōmaī ī īnīnque, īlīmō ate æbānō cæquīl, ante guīñente wædāmaī iedāni. Edæ īlīmō ate mānīnō ante pōnēninque eyepæ pōnente inguimpā. Īnīnque mīnitō, Ñōwoōnæque æbānō cæquīl, ante guīñente pōnēninque māninganca pōnente quēwēedāni,” ante Itota odōmonte apænegacāimpā.

7

Wadāni īnānite apænte ānāmaī iedāni, ante
(*Odoca 6.37-38, 41-42*)

¹ Mānōmaīnō ante odōmonte apænedinque Itota godōmenque apænegacāimpā. “Mīnitō wacā ingante, Wēnæ wēnæ īmīpa, ante apænte ānāmaī iedāni. Edæ mīni apænte wæquinque mīnitō wadāni īnānite apænte āmīnīpa. ² Mīnitō wadāni īnānite tee mante godōmīni nāni ænganca wæætē adoganca pōñōnāni æncæmīnīpa. Ayæ mīni apænte anganca adoganca apænte ānāni wæcæmīnīpa. ³ Bitō tōñīñacā wædænque wēnæ wēnæ cæcā īñongante bitō guiquēnē nanguī bitō wēnæ wēnæ cædinō ante pōnēnāmaī inte quīnante tōmēngā ingante pīnte ānewēmī. Tōmēngā edæ awīnca guiyā mæ owo ēmongā bai entawente wæyongante bitō wæætē awæmpa wææ ēmongā bai wææ entawēmi inte ædō cæte ate bai tōmēngā ingante apænte āmī. ⁴ Edæ tōmēmī awīnca awæmpa wææ ēmonte bai bitō wēnæ wēnæ adīmō ēmōmi inte bitō tōñīñacā ingante, ‘Biwī, bitō awīnca guiyangā mæ owo bai ate æ wīmōmoe,’ ante edæ abīpa diyæ æ wīmonguīmī. ⁵ Īñæmpa wadō tedete wadō cædōmi inte bitō edæ tōmēmī awīnca awæ wææ ongompa tāno wido cæte ate edonque adinque bitō tōñīñacā awīnca guiyā mæ owodō æmoncæbiimpā.”

⁶ Ānīnque Itota godōmenque apænedinque, “Guīntaidi īnānite, Tōmēnāni cænguī, ante tæiyæ wæmō cænguī godōnānitawoo. Edæ godōnāmaī īnāni bai mīnitō adobai Wængonguī nānō tæiyæ wæmō apænedō ante nē Baa ānāni īnānite apænedāmaī iedāni. Ayæ odæ wængāñāidi weca wadāni wamoncoo waa pōnī ēmoncoo wææntodōnāmaī īnāni bai mīnitō adobai Wængonguī beyæ waa pōnī nāni apænegainō ante nē ēñente cædāmaī īnāni īnānite apænedāmaī iedāni. Edæ odæ wængānā pīnā gāwa baō wānā ñænte bai cædinque tōmēnāni ēñēnāmaī inte cædinque dadi ēmænte tōmēmīni baō wangō pocænte bai pīlīmānīnīpa, ante mīnitō apænedāmaī ñīne cæedāni,” ante Itota apænegacāimpā.

Pōnōmi æmoe, ante mōnō angēimpā, ante
(*Odoca 11.9-13; 6.31*)

7 Ayæ apænedinque Itota, “Pönömi æmoe, ante në angä bai cædinque minitö müni ænguino ante Wængongui ingante apæneedäni. Æyömönö ii, ante në diqui diqui mingä bai cædinque minitö, Æbänö ii, ante ædæmö eñencæte ante Wængongui ingante wede pönente apæneedäni. Odemö mönitö beyæ wi ænecæimpa, ante aa pecä bai cædinque minitö, Æbänö cæquimoo, ante eñencæte ante Wængongui ingante nangui apæneedäni. 8 Edæ, Pönömi æmoe, ante në änäni iñömö edæ do ænänipa. Në diqui diqui müni adobai do adänipa. Ayæ odemö ponte në aa pedäni tömönäni näni guiquinque edæ do wi ænete bai bæcæimpa.”

9 Ayæ, “Bitö waobi inömi inte eñëmi. Bitö wëñängä cænguï ante päö angä eñëninque bitö dicæ dicaque pædæ godömiyaa. 10 Gæyæ angä iñinque bitö tæntæ incæ dicæ pædæ godömiyaa. 11 Müni waocabo në wüwa cædömini incæ, Quinö waa i, ante eñëninque minitö wëñænäni inänite waëmoncooque godömini ænänipa. Iñinque mönö Mæmpo öönædë në quëwängä iñömö në änäni inänite waëmoncooque ante godömenque pönongampa,” ante Itota odömonte apænecantapa.

12 Ayæ, “Minitö, Waodäni botö imote waa cædäni æninque waa tobaimopa, ante wæmñitawo. Iñinque müni ante wædö bai ante minitö tömönäni inänite adobai waa cædäni. Mäninonque ante wææ ancæte ante dodäni, Iimäi cædäni, ante wææ angadänimpa. Ayæ Wængongui beyæ në apænedäni adodö ante ancæte ante yewæmongadänimpa. Iñinque botö änö bai cædinque minitö tömönäni näni angainö bai do edæ cæbaiminipa,” ante Itota odömoncæte ante apænecantapa.

*Odemö guiyänemö ante
(Odoca 13.24)*

13 Itota godömenque odömoncæte ante iimäi apænecantapa. “Minitö guiyänemö guidinque quëwenguino taadonque pöedäni. Wænguinö godö guiquinemö guiquenë yabæ inö nænænemö ongö adinque tæiyænäni önonque pö guite edæ tömönäni näni wænguinque nænænnonque godänipa. 14 Wæætë wædænque inäni guiquenë diqui minte guiyänemö adinque quëwenguino guiyänö guite pönänipa,” ante Itota apænecantapa.

*Awæ æbänö iwæ, ante tömenca bete
eñengæimpa, ante*

(Odoca 6.43-44)

15 Itota ayæ godömenque odömonte apænecantapa. “Pancadäniya, Wængongui beyæ në apænemöni imönipa, ante në babæ apænedäni iñönänite minitö gomö ate

tömönäni inänite eñëñämäi iedäni. Tömönäni iñömö edæ mëñeidi bai inäni incæ obega æmontai bai wëñate bai babæ cædänipa. Obega ee quëwänäni bai ee cæmöni imönipa, ante edæ babæ ante pönäni tamëñedäni. 16 Edæ tömenca adinque minitö, Awæ æbänö iwæ, ante tä pete bete do eñëmüni bai, Iñäni ædänidö inäni, ante eñencæte ante tömönäni näni cædinö adinque edæ do eñencæmünimpa.”

“Yowemö æncæte ante waodäni dicæ daa mongæwäa tä pete ænäniyaa. Iigowæñeca æncæte ante waodäni dicæ wæntowäa edæ tä pete ænäniyaa. 17 Waiwæ tömawæ wainca incapa. Baawæ wæætë baaca incapa. 18 Waincawæ incæ ædö cæte baaca incaquü. Wæætë wüwa iwæ incæ ædö cæte wainca incaquü. 19 Awæ quiwæmenque wainca incadämäi i iñinque mäniwæ tömewæ mä yete gongapamö guitodönäni gonguinque ñongæmpa. Tömönäni adobai näni gonte wæquinque babæ cædänipa. 20 Iñinque, Awæ æbänö iwæ, ante tömenca adinque do eñëñäni bai waocä nänö cædö ante adinque, Tömengä æbänö ingäa, ante edæ do eñencæmünimpa,” ante Itota apænegacäimpa.

*Wü tömönäni öönædë guiquinäni, ante
(Odoca 13.25-27)*

21 Ayæ godömenque odömonte apænedinque Itota iimäi apænecantapa. “Botö imote, ‘Awënë, bitö botö Awënë impa,’ ante në tededäni näni tededö beyænque ædö cæte öönædë Awënë Odeye ömæ guiquinänii. Wæætë mönö Mæmpo öönædë quëwängä nänö änö bai në cædingä iñömö tömenganque guicæcäimpa. 22 Iñinque bayonte pancadäniya botö imote, ‘Awënë, Awënë,’ äninque, ‘Bitö beyæ apænegamöni ae, ancædänimpa. Ayæ, Bitö emöwo apænedinque wënæ inte wido cægamöni ae. Bitö emöwo apænedinque mönitö, Ate pönencædänimpa, ante bamönengæ cædinque nangui waa cægamöni ae,’ ancædänimpa. 23 Eñëninque botö wæætë, ‘Iñæmpa botö minitö iminute cöwë adämäi inte tæcæ abopa. Në eñëñämäi cædimüni inte botö weca ongönämäi gobæwedäni,’ ancæboimpa,” ante Itota apænegacäimpa.

Në mænöna inate ante

(Mäadoco 1.22; Odoca 6.47-49)

24 Ayæ wæætë odömoninque Itota iimäi apænecantapa. “Iñinque edæ botö apænëbo eñëninque në eñente cædäni iñömö tömönäni waocä në eñengä inte nänö nö eñente cæi bai cædänipa. Në eñengä iñömö tæëmoncaa mænongampa. 25 Tæëmoncaa mænongä ate cöönæ nangui cæ ate æpæ eyede äninque pö tapæmpa. Ayæ woboyæ nangui pæmænte pö incæte oncö tæëmoncaa mænonte ongö iñinque ædö

cæte cabænte bobænte guiquii. Nē ēñente cædāni iñōmō māniñōmō mænongå bai inte todānipa. ²⁶ Wæætē botō apænebo ēñēninque nē ēñēnāmai cædāni guiquēnē tōmēnāni iñōmō waocā ocāi ōmæcacā nānō ēñēnāmai cæi bai cædānipa. Nē ōmæcacā iñōmō ēmōnaiya aquii iñōmō mænongåmpa. ²⁷ Aquii iñōmō mænongå ate cōōnæ nangui cæ ate æpæ eyede ante tapæmpa. Ayæ woboyæ nangui pæmænte pō adinque mānincō ōñonte ætæwo goquinque edæ do acapowate bogocæ tæ go wææmpa. Nē ēñēnāmai cædāni iñōmō māniñōmō mænongå bai inte wædānipa,” ante Itota odōmonte apænegacāimpa.

²⁸ Māninganca ante iñque apænecā ēñēninque tōmānāni, Quinō bai angā, ante guñente wædinque, ²⁹ Wii mōnō imonte nē odōmōnāni nāni odōmōnō bai tōmengā iñōmō nē angā inte bai edæ godōmenque nōingā ante odōmongā ēñēmōmpa, ante tedegadānimpa.

8

Nē baadingā ingante Itota wadæ caa-campa

(Māadoco 1.40-45; Odoca 5.12-16)

¹ Māniī ānanquidi ongōninque iñque apænete wæængā adinque tæiyænāni tōmengā miñæ wæængadānimpa. ² Tōmengā miñæ tee empote wææ goyōnāni wacā baate ēñawengā inongā inte eyepæ pō bee tēninque Itota ōnōwa gāānē ædæ wææninque apænecantapa.

—Awēnē, Bitō Ao āmi inte wadæ caabi iñique botō waintai baabaimopa.

³ Āñongante Itota pædæ wææmpo gampo caadinque,

—Ao āmopa. Bitō waintai baacæbiimpa.

Angā iñique ñōmæintai nānō ēñadintai dæ baadinque tōmengā waintai edæ do baacantapa. ⁴ Itota edæ tōmengā ingante,

—Botō æbānō cæboo, ante wadāni iñānite māo apænedāmai imāwe. Wæætē, Nāwangā impa, ante acædānimpa, ante cædinque bitō, Wængongui qui, ante nē godongā weca tōingā godinque waintai bitō baadintai odōmōmi acæcāimpa. Ayæ Mōitee wodi wææ ante nānō angaincōo bai ænte pōninque bitō waintai bitō baadi beyæ ante edæ, Wængongui qui, āninque nē godongā ingante pædæ godōmi æncæcāimpa, ante Itota angacāimpa.

Capitāo ingante nē cæcā ingante Itota cæcā waa bacampa

(Odoca 7.1-10)

⁵ Māniī pōninque Capēnāōmō pō guiyongā odōmāno tontadoidi awēnē capitāo incæ, Itota pōnō cæcæcāimpa, ante apænecæte ante pongantapa. ⁶ Pōninque tōmengā,

—Awēnē, botimote nē cæcā iñōmō cōmāingā badinque nangui pōni nantate oncōnē ōñongampa cæbii.

⁷ Ante āñongante Itota,

—Gote cæbo waa bacā ae.

⁸ Angā ēñēninque,

—Awēnē ēñēmi. Botō waēmō imopa diyæ bitō botō oncōnē pō guiquimii. Edæ bitō adoyōmō ongōninque āmi iñique botō imote nē cæcā waa bacæcāimpa. ⁹ Bitō iñōmō Awēnē Wængongui ingante nē ēñente cædōmi imi bai botō adobai wacā awēnē ingante nē ēñente cæbo imopa. Iñique botō awēnē ēabo inte botō awēnē beyænque āmo ēñēninque tontadoidi wæætē guñente wædinque botō ānō ante ēñente cædānipa. Iñique adocanque ingante botō, Goe, āmo ēñēninque edæ do gocampa. Wacā ingante, Pōe, āmo ēñente pongampa. Ayæ botō imote nē cæcā ingante, Cæe, āmo ēñēninque edæ do cæcampa.

¹⁰ Ante tontado capitāo nangui ēñengā inte apænecā ēñente wædinque Itota wæætē tōmengā miñæ tee empo pōnāni iñānite apænedinque,

—Minitō imiñite nāwangā āmopa. Mōnō idægocabo iñōmonte māningā wede pōnengā ingā bai adocanque incæ edæ dæ angā awædō, angantapa. ¹¹ Incæte iīmāinō ante apænebo ēñēdāni. Mōnō wæmæidi Abadāo wodi Itæca wodi Acacōbo wodi ōōnædē Awēnē Odeye ææmæe ponte waa beyōnāni edæ nænque tamōnō gāmæñō quēwēnāni tōnō nænque guidō gāmæñō quēwēnāni iñōmō idægoidi ināmai iñāni incæ tæiyænāni adoyōmō pōninque mōnō wæmæidi tōnō godongāmæ becædānimpa. ¹² Wæætē Wængongui Awēnē Odeye ōmæ nē guiquēnēnāni guiquēnē tōmēnāni wēmō iñōmō, nāni guingo imonte Yæ yæ wæyōmō māniñōmō guitodonte wæquīnānidō angūēnē.

¹³ Āninque Itota wæætē tontado capitāo ingante,

—Ñowo wadæ goe. Bitō pōnēnō bai do bacæiimpa.

Ante āñongā adoyedē Itota nānō āniñedē incæ awēnē ingā nē cæcā do waa bagacāimpa.

Pegodo nānōogængā badā ingante Itota cæcā waa bacā

(Māadoco 1.29-31; Odoca 4.38-39)

¹⁴ Ayæ Itota māniñōmō pōninque Pegodo oncōnē pō guite ayongā Pegodo nānōogængā wānā daicawo gawænte mōimoga ōñongā acantapa. ¹⁵ Adinque tōmengā ōnompo pædæ wææmpote bæi ongongå ate onquiyængā wæætē gancæ badinque ængæ gantidinque Itota beyæ pōnō cæcantapa.

Nantate wæwēnāni inānite Itota cæcā waa badānīpa

(*Māadoco 1.32-34; Odoca 4.40-41*)

¹⁶ Māniōnæ gāwadedæcæ ba īninque wēnæ tōnō quēwēnāni tæiyæsnāni inānite ænte pōnāni adinque adodecæte āninque Itota wēnæ inte wido cæcantapa. Ayæ quiēmē quiēmē nantate wæwēnāni inānite, Waa baedāni, angā waa badānitapa. ¹⁷ Itota mānōmāi cæcā īninque Wængonguī beyæ nē apænegæ Itaiya wodi do īimāi ante nānō angainō bai īnque batimpa. “Mōnō nantate wæwēmāmo o æninque mōnō daicawoidi teēmente gote māo wido cæte bai cædinque tōmengā teēmente wængā beyænque quēwēmō īmōmpa,” ante Itaiya nānō angainō bai Itota cægacāimpa.

Itota miñæ nē goinēna

(*Odoca 9.57-62*)

¹⁸ Itota īñōmō, Tæiyæsnāni godāmæ gongæsnāni awædō, ante pōnēninque tōmengā miñæ nē godāni inānite, Gāwapæ æmæ wedeca mantamini taobodāni. ¹⁹ Āninque ayæ ongōñongante wacā tōmēnāni nāni wææ yewæmongainō ante nē adingā inte nē odōmongā īnongā inte Itota weca pōninque,

—Awēnē nē Odōmōmi ēñēmi. Bitō ædōmē goyōmite botō bitō miñæ pō gocæboimpa.

²⁰ Angā ēñēninque Itota wæætē edæ,

—Babæ guintaidi īñōmō ontatodē monguī ēadāni inānīpa. Ayamōidi ongonta ēadāni inānīpa. Botō Waobo ēñagaimo guiquēnē monguī ōmaabo īmo apa poncæ āmii, ante Itota wææ apænegacāimpa.

²¹ Ayæ wacā tōmengā ēmiñængā incæ tōmengā ingante,

—Awēnē ēñēmi. Botō tāno gote botō wæmpo wængā ate daga wente ate pōmoe.

²² Āñongante Itota wæætē,

—Īñæmpa nē wæwocadāni incæ tōmēnāni guidēnāni wæsnāni ate ee abi daga wencædānīpa. Bitō wæætē botō miñæ ee pō, angacāimpa.

Itota angā ēñente woboyæ æpæcæ næ gongæmpa

(*Māadoco 4.35-41; Odoca 8.22-25*)

²³ Māniū tao gocæte ante wipodē guiiyongā tōmengā miñæ nē godāni godongāmæ guidinque tōmengā tōnō tao godānitapa.

²⁴ Tao wogaa goyōnāni woboyæ īñontobæ nanguī pōni pæmæninque æpæcæ mængonta mængonta pōninque gao gao goyonte wipo fīnæ fīnæ æi guidentapa. Itota īñōmō mō fīngantapa. ²⁵ Mō fīngā adinque tōmengā tōnō godāni īñōmō tōmengā weca gote, Ōmæmoncæcāimpa, ante tao cædinque,

—Awēnē, bete wæncæ cæmōmpa cæbii.

²⁶ Ante āñōnāni,

—Mīni pōnēgade, quimæ guīñēwēmīni.

Āninque tōmengā ængæ gantidnque, Woboyæ pæmæsnāmai īmāwe. Gāwapæ incæ cædāmai næ gongæmāwe, angā ēñente woboyæ pæmæsnāmai īñō gāwapæ incæ næ gongæninque fīncæ fīncæ gongæmæninpa. ²⁷ Āñongā tōmēnāni ancai guīñēninque nāmāneque tededinque,

—Æcāmē inte angā ēñente woboyæ incæ æpæcæ incæ gongæmpa, ante guīñente wægadānīpa.

Guedatabæ īñōmō wēncæ inte nē ēnemōda

(*Māadoco 5.1-20; Odoca 8.26-39*)

²⁸ Māniū æmæmāa tao ti wæænte Guedatabæ pōñongā wēnæ inte quēwēna īñōmō wao wodido quēwente pōninque Itota ingante māmō bee tēnatapa. Tōmēna īñōmō, Waodāni taadō godāmai incædānīpa, ante wææ cæcæte ante nē piinte cædōna inte edæ, ²⁹ pō bee tēninque ogæ tededatapa.

—Bitō Wængonguī Wēmi inōmi incæ quimæ mōnatō weca pōwē. Īnque bayedē mōna pante wæquēnēnō ante pōnēninque bitō fīwo do pancæte ante pōmitawo, ante wædatapa.

³⁰ Ante āñōnate odæ wængānāidi nanguī ināni a ongonte cæsnāni adinque, ³¹ wēnæidi guiquēnē Itota ingante āninque,

—Bitō cōwē wido cæcæte ante pōnēmi īninque edæ odæ wængānāidi baōnē āmi gobaimōnīpa.

³² Ante ancaa tedete āna ēñēninque Itota,

—Gobæwedāni, angā.

Ēñēninque tōmēnāni tao godinque odæ wængānāidi baōnē guiiyōnāni odæncato wæætē ontadāa wææsnōmēmō īñōmō gāwapæno pogodo wæi guiite becadote capo wængadānīpa.

³³ Becadote wæsnāni adinque odæ wængānāidi nē aadināni guiquēnē pogodo wodiū winonte tōmēnāni quēwēñōmō māo, Itota mānōmāi cæcā wæmōnīpa, ante tededānitapa. Ayæ, Wēnæidi tōnō nē quēwēnāna inate Itota mānōmāi cæcampa, ante wæmōnīpa, ante apænedāni. ³⁴ Ēñēninque tōmānāni Itota ingante bee tencæte ante tōmēnāni nāni quēwēñōmō tate pōnānitapa. Tōmengā ingante adinque, Mōnitō ōmæ īñōmō quēwēnāmai gobāwe, ante nanguī angadānīpa.

9

Nē cōmāingā ingante Itota angā dao gōcampa

(*Māadoco 2.1-12; Odoca 5.17-26*)

¹ Māniū ante ānāni ēñēninque Itota wadæ godinque wipodē go guidinque imæmāa tate tōmengā quēwēñōmō pongacāimpa.

² Pongā adinque wadāni nē cōmāingā mōimpataa ōñōngante edæ æmatæ æmatæ bæi ongōninque tōmengā ingante næænte

pönánitapa. Næænte pönáni adinque, Nè næænte pönináni tönö nè cömängä wede pönente pönánipa, ante adinque Itota iñömö nè cömängä ingante,

—Botó wëmi ëñëmi. Wënæ wënæ bitó cædimämo ante ñowo ñimpo cætimpa.

³ Ante apænecä ëñëninque edæ nè wææ odömönáni guiquënë pancadäniya nämäneque pönente tededinque, “Ingä iñömö Wængongui ingampa diyæ mänömai cæqingä. Edæ babæ ancædö.” ⁴ Ante pönëñönáni Itota tömënäni nani pönëwëno ante önowëninque do ëñëninque edæ,

—Minitö mimöno quimæ wiwa ante pönëwëminii. ⁵ “Në cömängä nänö wënæ wënæ cædimämo ante do ñimpo cætimpa,” ante botó Wængongui bai ämo ëñëninque minitö guiquënë, Wængongui ingampa diyæ mänömai cæqingä, ante pönëminipa. Ayæ wæætë, “Ængæ gantidindque dao dao gocæcäimpa,” ante botó Wængongui bai cæbo adinque minitö edæ, Wængongui ingampa diyæ mänömai cæqingä, ante adobai pönëminii imäminipa, ante awædö. Iñæmpa mänömainö ante pönëminii inique minitö edæ æbänö cæquënëmo imo äminii.

⁶ Incæte waodäni nani wënæ wënæ cædimämo ante botó Waobo ëñagaïmo inte inguipoga quëwëninque nè ämo inte ñimpo cæbo quëwënanipa, ante minitö edæ ëñencæminimpa, ante botó iïmai cæbopa.

Äninque edæ nè cömängä ingante edæ,

—Ængæ gantidindque bitö möimkata topo cædinque ænte tömëmi oncönë næænte goe.

⁷ Angä ëñëninque cömängä iningä incæ edæ ængæ gantidindque tömängä oncönë wadæ gocantapa. ⁸ Dao dao gocä ate wædinque godongämæ ongönäni iñömö, Æbänö cæcäi, ante ëñënämai inte guifente wædinque, Wængongui pönö cæcä beyænque waocä ñowo nè angä badinque mänömai cæcä amönipa, ante pönëninque, Wængongui bitö ñäo bai ëmömi inte tæi piñænte cæbi amönipa, ante watapæ apænegadänimpa.

Máateo ingante Itota angä tee empote gocampa

(Máadoco 2.13-17; Odoca 5.27-32)

⁹ Itota edæ mäninö godömenque gocæ cæte ayongä adocanque Máateo iñömö, Odömäno awënë quí bacæimpa, ante godonte æinta nani æincönë ongonte cæcä adinque Itota guimö adinque Máateo ingante angantapa.

—Botó miñæ pöe, angä.

Ëñëninque Máateo edæ do ængæ gantidindque Itota miñæ tee empote wadæ gocantapa.

¹⁰ Ayæ ate Itota tömängä miñæ nè godäni tönö Máateo oncönë go guite cængöñönäni odömäno awënë beyæ nè æwënanii tönö nè ëñënämai cædäni tönö nangui inäni ponte

godongämæ cænänitapa. ¹¹ Adinque Paditeidi guiquënë tömängä miñæ nè godäni inänite äninque,

—Minitö Awënë nè Odömängä iñömö odömäno awënë beyæ nè æwënanii tönö nè ëñënämai cædäni tönö quimæ godongämæ cæwengä.

¹² Änäni ëñëninque Itota,

—Në waa ingä guiquënë, Cæbi waa baboe, änämai ingampa. Nè wënæ wënæ inte wæcä guiquënë dotodo ingante, Cæbi waa baboe, ante do aa pecampa. ¹³ Pancadäniya, Nämä incæ nõ entawëmo imopa, ante nè änäni inänite adinque botó nè dotodo bai adobai inömo inte tömënäni inänite aa pedämai incæboimpa. Wadäni guiquënë, Nämä wënæ wënæ cæbo imopa, ante nè änäni guiquënë, Wængongui gämænö poncädänimpa, ante botó tömënäni inänite aa pecä quëwënoimpa. “Baö, Wængongui quí baquimpa, ante nè iya tänäni inänite wii ainëwædö, wæætë godö waadete waa cædäni inänite ainëmo imopa,” ante Wængongui angä apa quëwënanii. Nöwo edæ godinque Wængongui nänö äno æbänö ante angä ëñente pömæwedäni, ante Itota apænecäimpa.

Ee ate cænämai ingæimpa, ante nè änäni (Máadoco 2.18-22; Odoca 5.33-39)

¹⁴ Mäniñedë Wäo miñæ nè godäni pöninque Itota ingante äninque,

—Paditeidi tönö Wäo miñæ möni gocabo tönö mönitonque Wængongui beyæ ante ee ate wii cæmönipa. Bitö miñæ nè godäni guiquënë quinante Wængongui beyæ ante cædämai inte edæ do cænänii.

¹⁵ Änäni ëñëninque Itota wæætë,

—Onguifængä nè monguingä nänö wente ænte nè pönäni bai inönäni inte botó miñæ nè godäni iñömö ædö cæte wæwente bai cænämai inguinäni. Wæætë ayæ ate guiquënë, Monguingä, nani nè änogä bai iñömote wadäni ponte botó imote ö ænte gocädänimpa. Mänömai cædäni ate botó miñæ nè godäni iñömö mäniñedë ate wæætë cænämai inte wæcädänimpa, ante apænëdinque Itota godömenque iïmai ante apænecäimpa.

¹⁶ “Waocä dicæ müincoo æninque pedæncocga pönö tadömonguingä. Mänömai cæcä inique edæ müincoo incæ dobæ gäni tamonte guipite ate godömenque wänä tente baquënë. Minitö, Awente bai cænämai inte waa quëwengæimpa, ante müni änewëno guiquënë pedæncoc bai inte ëwenguincoo bai ënepa. Codito nempo watapæ quëwengæimpa, ante botó apænëdö guiquënë müincoo bai inte quëwenguine ënepa. Inique ëwenguine tönö quëwenguine edæ ædö cæte adoyömo ëñente cæquii. ¹⁷ Ayæ adobai yowepæ biñömæ nani ämæ müimæ æninque waodäni

ædö cæte picæ æmontaicadedē godö pe ñiñænguñānii. Edæ picæ æmontaicadedē pe ñiñæñāni iñinque yedæ æninque ætæwo goquino anguēnē. Wæætē edæ æmontai miincadedē pe ñiñænte ate yedæ æninque tæi æbæñāmai ee ongōñö edæ miimæ tönö æmontaicaade adobai ee ongongæimpa, apa quēwēmīni,” ante Itota apænegacāimpa.

Gaido wēñængä beyæ cæcæ goyongante

onquiyængä Itota weocoo gampocampa (Mäadoco 5.21-43; Odoco 8.40-56)

¹⁸ Tömēnāni inānite tæcæ apæneyongä wacä tōmēnāni odömōincö awēnē inongä inte Itota weca ponte ædæ wææninque apænegantapa.

–Botö wēñængä baquēcä iñōmō edæ dobæ wæncæ cæcampa cæbii. Bitö ponte tōmēngä ingante gampobi ate quēwencæcāimpa.

¹⁹ Angä eñēninque Itota iñōmō ængæ gantindingue tōmēngä tönö goyōna tōmēngä miñæ nē godāni godongāmæ godānitapa.

²⁰ Idōmæ goyōnāni edæ wacä onquiyængä wantæpiyæ dote wadepo cōwē wepæ wantæ bidāmai wææ wæwēningä iñōmō ñōwo Itota önōñabæ inö pōninque tōmēngä weocoo yæwedecooque gampocantapa. ²¹ “Tōmēngä weocooque gampote waa bawēnemote,” ante onquiyængä nāmā pōnēninque gampocantapa. ²² Gampocä ate Itota dadi emæmonte adinque,

–Onquiyæmi, wæwēnāmai iē. Bitö wede pōnēnō beyæ edæ wantæ bawēnemīpa.

Ante āñongä do edæ wantæ bawēnengacāimpa

²³ Itota mǎnii godinque awēnē oncōnē go guite ayongä nē öōña bai öönāni tönö nangui ināni cægonte Yæ yæ wædāni inānite adinque, ²⁴ tōmēnāni inānite,

–Gä goedāni, āninque, iñæmpa iñōmō wēñængä wodi wii æmæwo wængampa. Önonque edæ mö ñongampa.

Angä eñēninque tōmēnāni, Angantedö amini, ante tōmēngä ingante badete todānitapa. ²⁵ Ayæ mǎnii angä taodāni adinque Itota pō guidingue wēñængä baquēcä wodi ingante pædæ wææmpo bæi ongonte tōö æmængä ate wēñængä ængæ ganticantapa. ²⁶ Mǎnōmai cæcä adinque nē adāni iñōmō gode ä gode ä cædāni ate mǎniñōmō quēwēnāni tōmānāni eñengadānimpa.

Babetamōna inate Itota gampomongä waa adapa

²⁷ Itota wadæ gote godōmenque goyongä babetamōna tee empo ponte aa pedinque,

–Awēnē Dabii pæimi inōmi inte mōnatö imōnate pōnō waadete waa cæbi æmōnæ, ante ancaä aa pedatapa.

²⁸ Aa peyōna tōmēngä edæ oncōnē go guicä adinque adoyōmō pō guiddatapa. Guidda adinque Itota tōmēna inate,

–Mina ānō ante nō waa cæquimo, ante pōnēmīna.

Åñongante,

–Ao. Awēnē, bitö ānō bai cæcæbiimpa, ante pōnēmōnapa.

²⁹ Apænedä eñēninque Itota pædæ gopo gampomōninque,

–Nē pōnēmīna inīmīna inte mīna pōnenganca do waa bacæmīnaimpa.

³⁰ Ante āñongä edæ tōmēna awinca wi æmonte bai adatapa. Itota iñōmō edæ,

–Botö cædinö ante apænedāmai inguēnē quēwēmīnaa. Edæ pæ wēēneyōmīna eñēnāmai incædānimpa, ante nangui angantapa.

³¹ Iñinque wadæ godinque Itota nānō āniñö ante wii eñente cædinque tōmēna, Itota mǎnōmai cæcä waa bamontamōnapa, ante tōmāmæ mǎo apænedä eñengadānimpa.

Wēnæ inte wido cæyongä babetadecä iñingä tedecampa

³² Wadæ goyōna edæ wēnæ tönö cæcä inte babetadecä inongä ingante Itota weca ænte pōnāni. ³³ Adinque wēnæ ingante Itota wido cæyongä babetadecä iñingä iñōmō edæ do tedecä adinque tōmānāni ancai guñēninque,

–Itota nānō cædö bai mōnō idægocabo adocanque incæ dicæ cæcä atamongaa, ante wædānitapa.

³⁴ Paditeoidi guiquēnē,

–Wēnæidi awēnē tönö cædingä inte tōmēngä wido cæcä apa ānewēnāni, ante piingadānimpa.

Itota waodāni inānite waadete waa acampa

³⁵ Itota iñōmō nangui nāni quēwēñōmō ayæ wædæncque nāni quēwēñōmō wayōmō wayōmō godinque Wængongui angä nāni eñente yewæmongainta ate odömōincōnē go guii go guii cædinque odōmongä adānitapa. Ayæ, Mōnō Awēnē Odeye inguipoga oo ponguino anguēnē, ante nānō waa pōni āniñö ante apænecä eñēnānitapa. Ayæ quēmē daicawo cæpāmo adinque quēmē wæncæ cæte wæwēnō adinque tōmēngä godö cæcä waa badānitapa. ³⁶ Cæningancoo bai waodāni incæ bacoo ināni iñōnāni nē aadingä dæ angä bai inānipa, ante acantapa. Mǎnōmai ināni inte babæidi wiñaaate wædāni bai ængæ gantidāmai ināni bai waodāni incæ wæwēñōnāni Itota tōmēnāni tönö godongāmæ wæwente bai pōnengantapa. ³⁷ Ayæ tōmēngä miñæ nē godāni inānite apænedinque,

Tōmēmoncoo bacoo bai ināni iñōnānite tä pete ināni bai nē gode ānāni iñōmō mēnāniya pōni inānipa cæmīni. ³⁸ Tōmēmoncodē gæquī angä Awēnē iñongante munitö tōmēngä

ingante apænedinque, Tömëmoncodë nê gœquinãni da godömi gote gæte bai ãfete poncædãnimpa, ante Wængongui ingante apæneedãni, ante Itota apænegacãimpa.

10

Itota angã ate dote ganca inãni nê gode ãnãni badãnipa

(Máadoco 3.13-19; Odoca 6.12-16)

¹ Ayæ ate tömengã miñæ nê godãni önonmpo tipæmpoga go mënãniya mänimpodãni iñönãnite Itota ãñecã pönãni ate tömengã, Botö pönö cæbo ate minitö nê ãmini badinque wænæidi në wentamö ewocadãni inãnite wido cæcæminimpa, angantapa. Ayæ, Quiëmë daicawo gawænãni incæ quiëmë beyæ wæncæ cæte wæwænãni incæ minitö eyepæ inte godö cæmini ate nê wæwænãni waa bacædãnimpa, ante pönö cægacãimpa.

² Itota nãnö nê da godöninãni önonmpo tipæmpoga go mënãniya mänimpodãni inãnipa, ante adinque, Dote, ante nãni gocabo inãnipa, ante tededãnipa. Tömënãni iimaï emönãni inãnipa. Tãnoda Timönö Pegodo mönö ãnogã tönö Æntate nãna caya inapa. Ayæ Tebedeo wëna Tantiago tönö Wãö nãna caya inapa. ³ Pedipe tönö Batodömëë mënãna inapa. Odömãno awënë beyæ nê æwëningã Máateo tönö Tömato mënãna inapa. Adepeo wengã Tantiago tönö Tadeo inapa. ⁴ Wacã, Mönö ömæ ingæimpa, ante nê nanguï cædingã incæ wacã Timönö ingampa. Ayæ Itota ingante odömönte nê godonguingã Codaa Icadote mönö ãnogã ingacãimpa. Mänimpodãni Itota miñæ nãni, Dote, ante gocabo inãnipa.

Wængongui Awënë ingantedö ante apæneedãni, ante Itota angã godãnipa

(Máadoco 6.7-13; Odoca 9.1-6)

⁵ Ininque Itota miñæ nãni, Dote, ante gocabo iñönãnite tömengã, “Minitö idægoidi inãmaï inãni taadó godãmaï inte edæ Tãmadiadi nãni quëwëñömö go guiddãmaï iedãni, ante da godongantapa. ⁶ Edæ cæningãidi obegaidi gueogæ gote bai inönãni inte mönö idægocabo taadó oda cædinque tömënãni nãni wë wom-önte wænguinö godãnipa, ante adinque minitö tömënãni weca gote cæedãni. ⁷ Godinque minitö, Öönædë Awënë Odeye oo poncæcãimpa cæminii, ante mao apænemini ëñencædãnimpa. ⁸ Ayæ quiëmë beyæ nantate wæwænãni adinque godö cæmini ate waa bacædãnimpa. Do wænünãni inãnite godö cæmini ate ñãni ömæmoncædãnimpa. Baate inãni inãnite godö wadæ caamini waintai baacædãnimpa. Wënæidi inte godö wido cæedãni. Botö önonque ãnãmaï inte pönö cæbo ænünini inte minitö botö cæbo bai adobaï cædinque wadãni inãnite ãnãmaï

inte önonque godö cæmini æncædãnimpa,” ante Itota angantapa.

⁹ Ayæ, “Minitö gocæ cædinque, Godonte æinta, ante tiguítamö incæ oodo incæ padata incæ edæ wente æincadedë da wente ænãmaï iedãni. ¹⁰ Edæ wadãni beyænque nê cæcã iñömö tömengã eyepæ ænte quëwencæcãimpa cæminii. Mäincoo da wenguincade ænãmaï inte goedãni, Weocoo münii ëñacooque ëñate awæncata münii ewataque ewate ongonto münii nææntoque næænte goedãni,” angantapa.

¹¹ Ayæ apænedinque Itota tömengã miñæ nê godãni inãnite angantapa. “Nanguï pönö nãni quëwëñömö incæ wædænque inãni nãni quëwëñömö incæ minitö mäniñömö go guiddinque waocã nê nö cæcã ingante ante digui minte adinque mäningã oncönë go guite owodinque wayömö münii go quëwenganca mänincönenque quëwëedãni.

¹² Mänincönë go guiddinque, Iñãnãni, waa quëwëedãni, æedãni. ¹³ Ayæ äninque, Minitö weca æbãno pö guite quëwenguimönii, ãñömünii Ao ãnãni ate minitö tömënãni weca go guite gånë pönëninque ee quëwëedãni. Wæætë nö cædãmaï inãni adinque minitö edæ ee quëwëñãmaï edæ wadæ gomünii wæcædãnimpa. ¹⁴ Edæ, Pöedãni, ãnãmaï inãni adinque ayæ minitö apænemini ëñenãmaï inãni ininque minitö wæætë tömënãni oncodo tao godinque, Minitö quëwëñömö nãwate awædö, ante odömoncæte ante cædinque önöwa wadæ wadæ cæwate wadæ goedãni. ¹⁵ Edæ nãwangã ämpa. Botö apænte angüönæ iñonte Todömã iñömö quëwengainãni tönö Gömoda iñömö quëwengainãni tönö nanguï pante wæwëñönãni minitö imünite nê Baa ãnãni guiquënë godömenque pante edæ wæwencædãnimpa,” ante Itota tömënãni inãnite da godongã godãnitapa.

Togænte pancædãnimpa, ante

¹⁶ Ayæ äninque Itota, “Cöwã æedãni, angantapa. Minitö iñömö nê cæningãidi bai iñöminite botö iñömö mëñe bai inãni weca da godömo godinque minitö tæntæ nãmã wææ cæcæte ante nãnö ëñente cæbaï adobaï ëñente cæedãni. Wæætë edæ equemö nãnö ee cæbaï minitö adobaï piñãmaï inte ee cæte quëwëedãni. ¹⁷ Ayæ edæ minitö imünite bæi ongöninque waodãni tömënãni nê apænte ãnãni weca mao pædæ godönãni æncædãnimpa. Ayæ godömenque tömënãni odömöincönë mao ænte godinque minitö imünite tæi tæi pancædãnimpa cæminii. Ininque minitö edæ, Æbãno cæquinãni, ante do ëñëmünii inte edæ nãmã wææ æaedãni. ¹⁸ Ayæ, Awënëidi tönö nê ëñenãmaï inãni adobaï ëñencædãnimpa, ante cædinque botö ämo ëñëninque minitö imünite mao pancabaa awënëidi gobedönadodoidi weca ayæ tömãmæ awënëidi odeyeidi weca

gönönäni gongæninque minito botó beyæ apænegæminimpa. ¹⁹ Mäniñedē tōmēnāni nāni ænte māo gōnōñedē, Quinō bai apænequimoo, ante guiñēnete wædāmai iedāni. Mäniñedē edæ quinō bai apænequii, ante do eñencæminimpa. ²⁰ Iñæmpa wii nāmā pōnēninque apænequimīni wæætē mōnō Wæmpo Ōnōwoca incæ apæneecā eñēninque apænequimīni iminipa,” ante Itota apænegacäimpa.

²¹ Ayæ godōmenque apænedinque Itota, “Mäniñedē edæ nāna caya iñōnate adocanque nāemæ pīininque, Wænoncæ, āninque tōmengā tōniñacā ingante da godongā gocæcäimpa. Nāna wencaya iñōnate mæmpocā iñōmō nāemæ pīininque, Wænoncæ, āninque tōmengā wengā ingante da godongā gocæcäimpa. Ayæ wēñænāni incæ wæmpoda inate nāemæ pīininque māo apænedāni eñēninque wadāni tōmēnāni wæmpoda inate māmō wæñōnāni wæncædaimpa. ²² Ayæ, Coditoidi iminipææ, ante tōmānāni botó emōwo beyænque minito iminite nangui pīincædānimpā. Pīināni wæwēmīni incæ æcānō iimæca iinque baganca wæntædāmai inte botó emōwo beyæ piinte badāmai ingāā tōmengā ingante botó æmo beyænque quēwencæcäimpa. ²³ Mäniñedē ate waodāni togænte pancæte ante mīni quēwēñōmō pōnāni ate wædinque minito iñōmō wayōmō wadāni nāni quēwēñōmō wodii winōedāni, āmopa. Edæ nāwangā āmopa. Edæ mōnō Idægobæ wayōmō wayōmō wodii winōninque pancayōmonga goyōmīni botó Waobo eñagaimo inte edæ do poncæboimpa,” ante Itota apænegacäimpa.

²⁴ Ayæ, “Nē odōmongā ingante piinte cæyōnāni tōmengā miñæ nē gocā ingante edæ ædō cæte piinte cædāmai inguināni. ²⁵ Awēnē nē odōmongā wæwente quēwēñōngā tōmengā miñæ nē gocā guiquēnē ædō cæte wæwēñāmai quēwenguingāā. Edæ nē cæcā tōmengā awēnē bai bacā iinque idæwaa edæ imairopa. Botó oncō eacā bai nē Awēnē imo iñōmote wadāni, Wēnæ awēnē Beedeboobi imidō anguēnē, ante pīināni incæ minito botó tōnō mīni quēwencabo iñōmīnite wadāni godōmenque wēnæ wēnæ ante pīincædānimpā,” ante Itota apæneecā eñengadānimpā.

*Guiñēnāmai iedāni, ante
(Odoca 12.2-7)*

²⁶ Ayæ apænedinque, “Incæte tōmēnāni inānite guiñēnāmai iedāni. Iñæmpa, Adāmai incædānimpā, ante quiēmē wē womonte i incæ iincayæ ate tōmāā wi ænete bayonte edonque pōni bacæimpa. Ayæ quiēmē awēmō cæte i incæ iincayæ ate edonque pōni acædānimpā. ²⁷ Botó

wēmō iñōmō minito iminite apænebo eñente ate minito botó apænedō ante ñāo apāiyōmō apæneecæminimpa. Ayæ godō wæntæ botó āninō eñente ate minito æibæ oncōmanca æidinque ogæ tedete apænemīni eñencædānimpā. ²⁸ Ayæ nē baonque wæñōnāni inte ōnōwoca wæñōnāmai ināni inānite adinque minito tōmēnāni inānite guiñēnāmai iedāni. Wæætē edæ baō tōnō ōnōwoca tadōmengadænguipo nē ōmæe ewēnongā ingante guiquēnē minito tōmengā ingante guiñente wædāni.”

²⁹ Āninque, Itota godōmenque apæneecantapa. “Waocā ayamōidi ōnompō æmæmpoque mānimpodāni beyæ tigitamō adotamonque ante pædæ godongā amūnitawo. Incæte minito Mæmpo ānāmai iñōnte ayamō adocanque incæ yæipodē wæñēnāmai ingampa. ³⁰ Mōnō ocagui incæ æpoguino encamōō, ante Mæmpo Wængongui do eñēninque mōnō imonte aacampa. ³¹ Edæ, Ayamōidi bacoō pōni iinque ōnonque inānipa, ante nē āningā inte mōnō Mæmpo iñōmō minito iminite wæætē waa acā apa guiñēwēmīni,” ante Itota apænegacäimpa.

*Waodāni eñēñōnāni mōnō Itota ingante
Ao angæimpa, ante
(Odoca 12.8-9)*

³² Godōmenque apænedinque Itota, “Æcānō waodāni eñēñōnāni botó imote Ao āninque, Bitō botó Awēnē inōmi imipa, ante āna tōmengā oōnædē æiyongante botó tōmengā ingante wæætē edæ Ao āninque, Bitō iñōmō botó miñæ nē gogalmi inōmi imipa, ante botó Mæmpo eñēñōngā ancæboimpa. ³³ Wæætē waodāni eñēñōnāni botó imote nē Baa angaingā ingante guiquēnē botó Mæmpo oōnædē nē quēwengā eñēñōngā botó tōmengā ingante adobāi edæ Baa ancæboimpa,” ante Itota apænegacäimpa.

*Botó beyænque guēa pīincædānimpā,
angampa
(Odoca 12.51-53, 14.26-27)*

³⁴ Ayæ apænedinque Itota, “Inguipoga quēwēnāni piyænē cæte wæætēdō wæætē cædāmai inte quēwencædānimpā, ante cæcæte ante Itota imæca pongaingā ingampa, ante minito pōnēmīnitawo. Iñæmpa yaēmē nææante bai pōmo imopa. ³⁵ Botó apænedō beyæ onguiñæna nāna wæmpocaya incæ nāemæ pīincædānimpā, ante pōmo imopa. Onquiyæna adobāi nāna badancaya incæ nāemæ pīincædānimpā. Nāna wæntecaya incæ nāemæ waadedāmai inte pīincædānimpā, ante pōmopa. Mānōmai cæbo imopa, ante pōnēmīniyaa. ³⁶ Iinque, botó ānō beyæ nāni owocabo incæ nāemæ waadedāmai pīincædānimpā,” ante apænegacäimpa.

³⁷ Ayæ apænedinque Itota iīmai apænecantapa. “Edæ æcānō mæmpo tōnō wāānā inate ædæmō waadedinque botō imote wæætē pōnōmenque waadedā iīfōmō tōmengā iīfōmō botō nē ēmiīfængā ædō cæte baquingāā. Adobai wēñængā ingante ædæmō waadedinque botō imote pōnōmenque nē waadecā iīfōmō tōmengā wæætē botō nē ēmiīfængā ædō cæte baquingāā. ³⁸ Ayæ æcānō botō miīfæ pōinēna tōmengā iīfōmō edæ, Awæ botō wænguiwæ, ante næænte ponte bai cædinque, Wænōnāni wæmo incæte Itota miīfæ cōwē gocæboimpa, ante poncæcāimpa. Wæætē æcānō mænōmai cædāmai ina guiquēnē tōmengā ædō cæte botō nē ēmiīfængā inguingāā. ³⁹ Æcānō nāmanque pōnente, Imæcaque waa quēwenguīmo, ante ānaa tōmengā iīfōmō quēwēnāmai incæcāimpa. Wæætē edæ, Wæmo incæ wæwēmo incæ botō oōnædē Awēnē angā ēñente cōwē cæcæboimpa, ante æcānō āna guiquēnē tōmengā iīfōmō edæ cōwē quēwencæcāimpa,” ante Itota apænegacāimpa.

*Nē pōnengā nānō waa cædinō beyæ eyepæ æncæcāimpa
(Māadoco 9.41)*

⁴⁰ Ayæ apænedinque, “Mīnitō imīnite Ao āninque waocā botō imote do edæ Ao āningā ingampa. Ayæ botō imote Ao āninque botō imote nē da pōnongaingā ingante do edæ Ao āningā ingampa. ⁴¹ Wængongui beyæ nē apænecā ingante bitō, Wængongui beyæ nē apænebi inte pōe, āmi īninque Wængongui beyæ nē apænecā nānō paga ænganca bitō adopo æncæbiimpa. Ayæ nē nō cæcā ingante, Bitō nē nō cæbi inte pōe, āmi īninque nē nō cæcā nānō paga ænganca bitō adopo æncæbiimpa. ⁴² Nāwangā āmopa. Bitō Itota miīfæ nē gobi inte æpæ becæbiimpa, ante bitō guiyangā ingante pædæ godōmi ængā īninque bitō godōni beyæ eyepæ æncæbiimpa,” ante apænedinque Itota tōmēnāni īnānite da godongā gogadānimpā.

11

*Wāō tōmengā miīfæ nē goda inate da pōnongā pōnapa
(Odoca 7.18-35)*

¹ Ayæ tōmengā miīfæ nāni, Dote, ante gocabo īnānite iīnque apænedinque Itota wadæ godinque tōmēnāni nāni quēwēfōmō odōmoncæte ante ayæ, Æñencædānimpā, ante apænecæte ante wayōmō wayōmō gocantapa.

² Māniñedē edæ Wāō iīfōmō tee mōnete ongōñongante wadāni tōmengā weca pōninque, Mōnō Codito iīmai cæcampa, ante tededāni ēñente wædinque Wāō wæætē tōmengā miīfæ goda inate Itota weca da

godongā godatapa. ³ Īninque Wāō beyæ ancæte ante pōninque tōmēna iīmaiñō ante Itota ingante apænedatapa.

–Bitō iīfōmō dodāni nāni, Nē Ponguingā, ante nē angaimi adobi imitawo. Wæætē tōmēnāni nāni nē angaimi īnāmai īmi īninque bitō wæætē, Wacā ponguingā, ante wānō cōedāni, āmitawoo. Æbānō mōnitō cæquīmōnii, ante ēñencæte ante wæmōnīpa.

⁴ Ante āñōnate Itota wæætē, “Mīnatō ponte ēñēfōmīna botō æbānō apænebo ēñēmīnatawo, ante ayæ, Botō æbānō cæbo amīnatawo, ante mīnatō wæætē Wāō weca gote māo apænemīna ēñengæda. ⁵ Botō godō cæbo ate babetamō īnīnāni incæ waa bamonte adāni amīnāpa. Cōmante īnīnāni incæ waa bate dao dao godāni amīnāpa. Baate īnīnāni incæ æmōntai wæmōntai baadāni amīnāpa. Babetamonca nāni iīfōnānite botō godō cæmōmo ate onōmonca waa bamoncate ēñēnāni amīnāpa. Do æmæwo wænte oñōnāni iīfōnānite botō godō cæbo ate nāni omæmōnāni amīnāpa. Ōmaadāni inte wæyōnānite botō Wængongui waa pōni nānō pōnō cægainō ante apænebo ēñente todāni amīnāpa. ⁶ Ayæ, Botō beyæ waocā wīl piunte wadæ gocā iīfōmō tōmengā watapæ nānō quēwenguinque edæ oda cædāmai incæcāimpa, ante apænebo ēñēninque mīnatō Wāō ingante māo adodō ante apænemīna ēñengæda,” ante Itota angantapa.

⁷ Angā ēñēninque Wāō beyæ nē ānīna wadæ goyōna edæ Itota wæætē tōmānāni īnānite, Wāō æbānō ingāā, ante apænecantapa. “Mīnitō guiquēnē quīnō acæte ante onōmæca gomīnitapa. Cæwīpa woboyæ pæmænte ate æmæñō ædæ æmæñō ædæ gobaingā ingante mīnitō dicæ acæ gomīnitawogaa. ⁸ Īninque edæ quingānō ingante acæte ante gomīnitapa. Waocā weocoo wæmoncoo mongænongā ingante mīnitō dicæ acæ gomīnitawogaa. Īñæmpa wæmoncoo mongængā iīfōmō awēnē oncōnē quēwengā apa quēwēnāni. ⁹ Īninque edæ quīnante gomīnitawo. Mīnitō mīni nē go acæ cædongā iīfōmō edæ Wængongui beyæ nē apænecā ingantawo. Nāwangā impa. Wængongui beyæ nē apænecā Wāō ingampa. Incæte tōmengā wīl Wængongui beyæ nē apænegaināni bai īnongā inte godōmenque nangui cæcā ingampa, ante apænebo ēñēmaiīnīpa. ¹⁰ Wængongui iīmai angampa, ante yewæmongatimpā.

‘Botō beyæ nē apænecā ingante da pōnōmo pōninque tōmengā taadō tāno beyænte bai cæcæcāimpa.

Tōmengā bitō Codito īmi beyæ ante taadō waa pīnonte bai waa cæcæcāimpa.’

Mānōmaiñō ante dodāni adocā Wāō ingant-edō ante pōnēninque yewæmongadānimpā.

11 Nōwo iñōmō āmo ēñēedāni. Īmæca mīni ēñagincabo iñōmīnite æpæne mōnō nē guidōnongā Wāō adocanque ñæcnængā iñongante wacā tōmengā bai edæ dæ angampa. Incæte oōnæde Awēne Odeye nempo quēwēnāni iñōnāni adocanque guiyangā pōni ingā incæte Wāō pōnōmenque wædangā ingampa,” ante Itota apænecantapa. ¹² Ayæ ĩmai ante godōmenque apænecantapa. “Wāō tāno nānō apænedōñedē ayæ godōmenque ñōwo ganca tæi piñænāni pogodo pōninque, Oōnæde Awēne Odeye nempo mōnō wāānē guicæimpa, ante tee tate guite bai cædinque, Mōnō Awēne incæcæimpa, ante edæ o ænte bai cædānipa. ¹³ Edæ Wængonguī beyæ nē apænegaināni tōnō, ĩmai cæedāni, ante nē wææ angaingā tōnō tōmēnāni tōmānāni edæ, Awēne poncæcæimpa, ante cōwē Wāō nānō ponganca apænegadānimpā. ¹⁴ Īninqe, Ediya wodi ayæ poncæcæimpa, ante nāni nē ānongā Wāō iñōmō adocā ingampa, ante pōnēmīniyaa. ¹⁵ Ēamonca ongonte ēñēedāni,” angantapa.

¹⁶ Godōmenque apænedinque Itota ĩmai angantapa. “Inguipogaque ante nē quēwēnāni iñōmō quingāmē bai inānipa. Quiēmē bai edæ quēwēnānipa. Wēñænāni mōnō godonte æiñōmō tæ contate owempodāni nāni owempodō bai edæ adobai cædānipa, ante awædō. Wēñænāni nāni owempote cæcabo incæ ææmæ cæte bai owempote cædinque wadāni inānite aa pedānipa. ¹⁷ Mīnitō beyæ oōña we we oōñōmōni mīnitō wæætē edæ āwadāmai ĩmīnitapa tōō,” ante owempod- inque wēñænāni piinte tedewēnānipa. Ayæ wæætē, Waocā do wængā ate nāni wæbai ante wēñænāni nāni owempote cæcabo iñōmō, ‘Mōnitō Ca ca wæyōmōni mīnitō wæætē edæ wædāmai ĩmīni wæmōnipa,’ ante piininque aa pedāni bai ñōwodāni iñōmō edæ adobai piinte tedewēnāni inānipa. ¹⁸ ĩmai edæ impa. Wēñænāni nāni wædō bai Wāō iñōmō cængui cænāmai tepæ bedāmai ponte quēwēñongante ñōwodāni guiquēnē, Wēnæ tōnō Wāō quēwengampa, ante piinānipa. ¹⁹ Ayæ wæætē botō Waobo ēñagaimo inte edæ ponte nē cænte bete quēwēmo adinque botō ĩmotedō ante mīnitō iñōmō, Cæowæobi inte cæmipa. Beowæobi inte bebipa, ante badete tomīnipa. Ayæ godōmenque, Odōmāno awēnē beyæ nē æwēnāni tōnō nē ēñēnāmai cædāni iñōnānite bitō tōmēnāni æmigo ĩpipææ, ante botō ĩmote piininque mīnitō wēñænāni nāni piinte aa pedō bai ānewēmīnipa tōō. Incæte, Nē nō ēñēnāni iñōmō nō cædānipa, ante adinque, Nāwangā nō ēñēnānipa, ante mōnō ēñengæimpa,” ante Itota apænegacæimpa.

Nē ēñēnāmai cædāni inānite Itota piingampa (Odoca 10.13-15)

²⁰ Ayæ, Mīnitō quēwēñōmō botō bamōnengæ nanguī cæbo adīmīni incæ mīnitō wēnæ wēnæ mīni cædinō ante, Ancaa wæwente awædō, ante dicæ wæmīnitawogaa, ante piininque Itota wayōmō wayōmō tōmengā nānō nanguī cædiñōmō quēwēnāni inānite ĩmaiñō ante mā piingantapa. ²¹ ‘Codatiñōmō quēwēmīni ēñēedāni. Betaida iñōmō quēwēmīni ēñēedāni. Mīnitō mīni wæwenguinque ēñēnāmai cæte quēwēmīnidō anguēnē. Edæ botō mīnitō weca tæi piñænte botō cædi bai Tido nāni quēwengaiñōmō Tidōō nāni quēwengaiñōmō adobai cæbo bai māñiñōmō quēwengaināni iñōmō tōmēnāni dobæ wēnæ wēnæ nāni cægainō ante ñimpo cædinque weocoo gōmæ ēmoncoo wēñadinque gōnai ōni pæcate Ca ca wæcægadānimpā. ²² Īninqe mīnitō ĩmīnite āmopa. Wængonguī nānō apænte anguīōnæ ĩnque bayonte Tido iñōmō quēwengaināni tōnō Tidōō iñōmō quēwengaināni inānite nanguī pangā wæwēnāni incæte tōmengā mīnitō ĩmīnite godōmenque pangā wæwæncæmīnimpā. ²³ Ayæ Capēnaōmō iñōmō quēwēmīni ēñēedāni. Mīnitō ĩmīnite Wængonguī dicæ oōnæde wo ææntodongā æi gote toquimīniyaa. ĩñæmpa tadōmengadænguipo wææntodongā guī wæcæmīnimpā. Edæ botō mīnitō weca tæi piñænte botō cædi bai Todōmā nāni quēwengaiñōmō adobai cæbo bai tōmēnāni nāni quēwengaiñōmō edæ godōmenque ñōwo ganca edæ mæ ongoncædōnimpā. ²⁴ Īninqe edæ āmo ēñēedāni. Wængonguī nānō apænte anguīōnæ ĩnque bayonte Todōmā quēwengaināni inānite nanguī pangā wædāni incæte mīnitō ĩmīnite godōmenque pangā wæcæmīnimpā,” ante Itota tōmēnāni inānite piingacæimpa.

Botō weca pō guēmæedāni, angampa (Odoca 10.21-22)

²⁵ Ayæ māñiñedē Wængonguī ingante apænedinque Itota, “Mæmpo ēñēmi. Wadāni nāmā ocāi encadāni tōnō nanguī adinque nē ēñēnāni tōnō māñiñō bitō ēñengainō ante ēñēnāmai incædānimpā, ante cædinque bitō cægainō ante wē wodonte bai pæ wēnegabiimpā. Wæætē edæ wēñænāni nāni pōnēnō bai nē pōnēnāni inānite wæætē bitō edonque odōmōmi adinque do ēñēnānipa. Bitō oōnæde Awēne ingaimi inte inguipoga Awēnē adobi ĩnōmi inte edæ mānōmai cæbipa, ante adinque botō bitō ĩmite waa ate pōnēninque apænebopa. ²⁶ Mæmpo, bitō tōmēmi ānō bai cædinque waa cæbi adinque botō Ao āmopa,” ante Wængonguī ingante waa apænecantapa.

²⁷ Wængonguī ingante ĩnque apænedinque Itota godongāmæ ongōnāni inānite wæætē

apæneantapa. “Botö Mæmpo nö eñengä inte põno odömonga beyænque botö iñömö tömänö ante nê eñemo imopa. Ayæ, Botö tömengä Wëñæmo iñömote botö Mæmpoque botö imote nê againgä iñongante wadäni adämaï inänipa. Wæætê edæ Mæmpocä ingante botö tömengä Wëñæmo inömo inte adoboque nê agaïmo imopa. Ìninqe, Botö abo bai iñänique adobai ate bai põnencädänimpa, ante cædinque botö mïnitö iñinite odömömo adinque mïnitö adobai Mæmpocä ingante nê ate bai põnemini bamnipa.”

²⁸ “Teëmê mongænte bai nangæ batawëmini ininque mïnitö botö weca põmini ate botö wæætê teëmê mongænte mïni wæwënö ante ö æmo ate mïnitö wæætê gancæ põnente guëmancæmïnimpa. ²⁹ Edæ botö mümöno gänê põnëniñque nämä beyænque änämaï quëwëmo adinque mïnitö botö weca põmini ininque botö mïnitö tönö iñacabo cæcæboimpa. Edæ wagadada awæmpaa goti wïmoncate äämencaque goda bai möna guëa cæcaya bayömöna botö nö eñënömo inte põno odömönte apænebo eñëniñque mïnitö önöwoca wampo põnente guëmancæmïnimpa. ³⁰ Edæ botö tönö äämencaque bai cædinque bitö iñömö oo wïmoncadimpa mongænte bai edæ do cæcæbiimpa. Botö mongæncoo wodæi iñonte bitö wæætê edæ wodæi mongænte gote bai nangæ badämaï incæbiimpa,” ante Itota iñinque apænegacäimpa.

12

Guëmanguïönæ iñonte tömëmö tä pete ænänipa

(Mäadoco 2.23-28; Odoca 6.1-5)

¹ Mäniñedê guëmanguïönæ iñonte Itota tömëmoncodê tæcæguedencodê gocantapa. Goyongä tömengä miñæ nê godäni guiquënë gæwænte wædinque tömëmö tä pe tä pe æninque tæcæ cænæ cædäni. ² Adinque Paditeoidi guiquënë Itota ingante wæætê,

–Bitö miñæ nê godäni æbänö cædäni, ante cöwä aquënë. Ìñæmpa, Guëmanguïönæ iñonte mäniñö bai cædämaï iedäni, ante dodäni näni wææ angäinö ante eñënämaï inte iñäni iñömö do cædänipa töö.

³ Ante püñönänite Itota,

–Mïnitö iñæmpa docä Dabii wodi tönö godongämæ godäni tönö gæwænte wædäni ininque tömengä æbänö cægacäi ante yewæmonte ongö incæte mïnitö iñömö adämaï inte bai änewëmini awædö.

⁴ Tömengä iñömö Wængongui oncönê go guicantapa. Mänincönê, Wængongui qui, ante nê godönänique cængui impa, ante wææ näni angäinö bai cædinque tömënanï, Wængongui qui, ante päö ñoncæ ñoncæ cædönänimpa. Incæte mäniñö päö wii Dabiidi

cængui iñi incæ Dabii do cængantapa. Ayæ tömengä tönö cægönäni adobai godongämæ cængadänimpa. ⁵ Ayæ, Wængongui qui, ante nê godönäni iñömö Wængongui oncönê ñænæncönê iñömö önonæque näni cæbai guëmanguïönæ iñonte adobai cædäni incæte wentamö entwænëmaï önonque cæcædänimpa, ante Möitee wodi wææ yewæmongacäimpa. Mïnitö iñömö mäniñö ante adämaï inte bai änewëminipa töö, angantapa.

⁶ “Ayæ apænebo eñëedäni. Mïnitö, Wængongui oncö ñænæncö waa põni ongoncompa, ante ayömini edæ botö ñöwo mïnitö weca nê ongömo guiquënë wii Wængongui oncö bai ongömo inte wii önömoque ongömpa. Wæætê edæ nämä nö cædömo inte botö iñömö edæ godömenque waa põni ongömo apa quëwëmini. ⁷ Incæte, Wængongui iñäniñö ante apæneantapa. ‘Wængongui qui, äninque mïni iya tånö ante põnömenque waa adinque botö nê waadete mïni godö waa cædö ante godömenque waa abopa,’ ante Wængongui angampa. Ìninque mïnitö iñömö Wængongui näno angäinö ante eñëmini inte bai iñäni wentamö mongæñämaï iñönänite, Mïni pante wæquinque mänömaï cæmïnipa, ante apænte püñämaï incædöminimpa. ⁸ Botö iñömö Waobo nê eñagäimo iñömö Tæiyæ Awënë inömo imopa. Ìninque botö nê guëmanguïönæ Awënë inömo inte edæ, Guëmanguïönæ iñonte edæ æbänö cæquü, ante adobo nê Ämo imopa,” ante Itota apænegacäimpa.

Ni cömampoingä

(Mäadoco 3.1-6; Odoca 6.6-11)

⁹ Äninque wadæ godinque Itota iñömö Wængongui angä näni eñente yewæmongainta ate oodeoidi näni odömöincönê go guigacäimpa. ¹⁰ Mäniñömö ni cömampoingä a ongongä adinque Paditeoidi guiquënë, Itota wapiticæ cæcä ininque mönö mäo pünte angäimpa, ante nê änäni inte tömengä ingante änänitapa.

–Guëmanguïönæ iñonte wacä waa bacæcäimpa, ante cædäni, ante Wængongui wææ angantawo.

¹¹ Ante Itota ingante äñönänite tömengä wæætê,

–Guëmanguïönæ iñonte waocä tömengä cæningä ontatodê goyæ guii adinque mïni waocabo iñini incæ æcämê pædæ guipote æñämaï imaingä. ¹² Cæningä önonganque iñongante waocä iñömö waëmö põni ingampa, ante adinque guëmanguïönæ i incæte waodäni beyæ cöwê waa cæcæimpa, ante ämo eñëmaimïnipa.

¹³ Äninque ni cömampoingä ingante wæætê,

–Pædæ pompobi, angä.

Ēñēninque tōmengā pædæ gopodinque æmæmpo bai waa emocā bacantapa. ¹⁴ Adinque edæ Paditeoidi guiquēnē wadæ godinque, Æbānō cæte tōmengā ingante wænōmō wænguingā, ante godongāmæ pōñēninque tedegadānimpā.

Codito cæbānō cæquingā, ante Itaiya nānō apænegainō

¹⁵ Tōmēnāni, Wængongæimpa, ante pōnente tededāni wædinque Itota iñōmō wadæ gocantapa. Wadæ goyongā tæiyæñāni tee empo godāni ate wædinque tōmengā godō cæcā ate nē wænæ wænæ inte wæwēnīnāni tōmānāni waa badānitapa. ¹⁶ Ayæ nē waa badīnāni inānite, Minitō, Botō æbodō imo, ante māo apænedāmai iedāni, ante wææ angantapa. ¹⁷ Īninque Itaiya wodi Wængongui beyæ nē apænecā iimainō ante nānō yewæmongainō bai iinque cætimpā.

¹⁸ “Wængongui iimai ante apænecampa. Botō imote nē cæquingā incæcāimpa, ante botō nē apænte ænongā iñōmō a ongongā aedāni.

Adocā botō nē waadedongā iñongante botō tōmengā ingante adinque watapæ tobopa.

Botō Ōnōwoca ingante da pōnōmo ænte ēwocadinque botō imo nē cæcā iñōmō,

Botō nō cæte apænte ancæboimpa, ante tōmengā oodeoidi ināmai ināni inānite māo apænecæcāimpa.

¹⁹ Incæte tōmengā wīl wæætedō wææte pīncæcāimpa. Ogæ tededāmai incæcāimpa.

Waadāni taadō godinque tōmengā dicæ Yæ yæ ante tedecā ēñēnāniyaa.

²⁰ Cæwipa bede næænimpā wā tadāmai ināni bai waocā wæwengā iñongante tōmengā adobai nē wæwengā ingante wido cædāmai ingampa.

Ayæ gongapæncade cōmencagui mīni tente tēēmāmoque go adinque pī ongōmōnāmai ināni bai tōmengā adobai waocā wæntæye bayongante tōmengā ingante godō pīnāmai ingampa.

Adocā botō imote nē cædongā ingaingā inte tōmengā nē Awēnē nānō baganca cōwē nōingā ante apænte āninque cōwē waa cæcæcāimpa.

²¹ Ayæ botō imote nē cædongā nē Awēnē bacā adinque wadāni oodeoidi ināmai ināni incæ, Tōmengā emōwo beyænque mōnō quēwengæimpa, ante pōnencædānimpā,”

ante Itaiya wodi Wængongui beyæ nānō yewæmongainō bai Itota mōnō Codito nōwo ponte waa cæcā ingampa.

Wænæ tōnō cæcā iimaingampa, ante wapiticæ ānānīpa

(Māadoco 3.20-30; Odoca 11.14-23, 12.10)

²² Māniñedē wacā wænæ tōnō quēwēnongā inte babetamongā babetadecā badingā iñongante wadāni tōmengā ingante ænte māmōnāni pongā adinque Itota godō cæcā ate tōmengā awinca adinque nē tedecā bacantapa. ²³ Cæcā waa bacā adinque tōmānāni, Æbānō cæcā, ante guñente wædinque, “Awēnē Dabii wodi pæingā wabānō iimaingampa,” ante pōnente wægadānimpā.

²⁴ Mānōmainō ante wædāni ēñēninque Paditeoidi guiquēnē, “Īnæmpa wænæidi awēnē Beedeboo tōnō nē cæcā inongā inte Itota wænæidi inānite wido cæbaingampa,” ante tedewēnānitapa.

²⁵ Wapiticæ tōmēnāni pōnēnō ante ēñente wædinque Itota tōmēnāni inānite, “Awēnē odeye nempo quēwēnāni iñōmō nāemæ wæætedō wææte cædāni iinque awēnē odeye nānō omædempote wæquinque tōmēnāni nāmā ēwente cæbainānīpa. Ayæ adocōnē owocabo incæ adoyōmō godongāmæ quēwēnīnāni incæ nāemæ wæætedō wææte cædāni iinque tōmēnāni oncō woquinque nāwæ gobainānīpa. ²⁶ Ayæ Tatāna nempo quēwēnāni iñōmō edæ nāemæ pīlinque wæætedō wææte cædinque tōmengā ingante wido cædāni iinque Tatāna dicæ tōmēnāni awēnē odeye iimaingā. ²⁷ Minitō, Beedeboo tōnō cædinque Itota wænæidi inānite wido cæcampa, ante tedewēminīpa. Mānīnō mīni ānewēnō nāwangā i bai mīnitō mīñæ nē godāni guiquēnē æcānō tōnō cæte wido cædāni. Īninque mīnitō mīñæ nē godāni incæ mīni ānewēnō beyænque ante nāemæ pīlinque mīnitō imīnite wææte apænte āninque pīncædānimpā anguēnē. ²⁸ Botō iñōmō Wængongui Ōnōwoca tōnō cæte wænæidi inānite wido cæbo apa ānewēminī. Mānōmai i iinque botō Wængongui Awēnē Odeye inōmo inte mīnitō weca do pōmo aedāni,” ante Itota apænegacāimpa.

²⁹ Ayæ apænedinque tōmengā, “Nē tæi pīñængā ingante wīl goto wīninque waocā ædō cæte tōmengā oncōnē guite māincoo o ænguingā. Edæ nē ēacā ingante bæi ongonte goto winte ate pō guite o ænāni bai botō iñōmō wænæ inte nē bæi ongonte wido cæbo imopa,” angantapa.

³⁰ Ayæ, “Botō tōnō æcānō wīl godongāmæ cæcā iñōmō tōmengā iñōmō edæ Baa ante botō imote pīnte cæcā ingampa. Ayæ botō, Waodāni botō mīñæ poncædānimpā, ante cæyōmo waocā botō tōnō wīl cæcā iñōmō tōmengā wææte botō mīñæ poncæ cæyōnānite tatodongā wadæ godānīpa,” ante apænecantapa.

³¹ Ayæ, “Īninque apænebo ēñēedāni, angantapa. Mīni waocabo wænæ wænæ cæmīni incæ Mæmpo Wængongui ingantedō ante babæ ante godō wīwa āmīni incæte

Wængongui wæætē tōmānō beyæ pōnō
 űimpo cæcā beyænque quēwencæmīnīpa.
 Wæætē edæ Wængongui Ōnōwoca ingante
 babæ ante godō wīwa āmīni ĩnīnque
 Wængongui mānīnō ante cōwē űimpo
 cædāmai incæcāimpa. ³² Ayæ botō Waobo
 ēñagaīmo ĩñōmote botō ĩmotedō ante waocā
 pīīnīnque adodeque angā incæte Wængongui
 godō űimpo cæcā ate quēwencæcāimpa.
 Wæætē botō Tæiyæ Waēmō Ōnōwoca
 ingantedō ante æcānō pīīnīnque babæ
 āna guiquēnē tōmengā inguipoga nānō
 quēwengāñedē incæ wænte ate nānō goyedē
 incæ Wængongui tōmengā nānō wēnæ
 wēnæ ānīnō ante cōwē űimpo cædāmai
 incæcāimpa,” ante Itota apænegacāimpa.

*Awæ æbānō ĩwæ, ante tōmenca bete
 ēñengæimpa, ante
 (Odoca 6.43-45)*

³³ Ayæ waomō mōnō cædinō ante awæ
 incate bai impa, ante odōmoncæte ante Itota
 ĩmai ante apænegacāimpa. “Awæ æbānō
 ĩwæ, ante ēñencæte ante mōnō tōmenca
 tā pete bete ēñengæimpa. Awæ waiwæ
 ĩwæ ĩnīnque tōmenca wainca incaquiwæ
 impa. Wæætē awæ baawæ ĩwæ ĩnīnque
 edæ tōmenca baaca incaquiwæ ĩwæmpa, ante
 ēñengæimpa. ³⁴ Mīmōnē mōnō pōnēmāmo
 eyede tate bai tao godedīnque mōnō
 mānīmāmoque ante pōnēnīnque tedemompa.
 ĩnīnque mīnitō tæntæ pæīmīni bai ĩmīni
 ĩñōmō wīwa cæte quēwēmīni inte mīnitō
 ædō cæte waa ante apænequīmīni. ³⁵ Ayæ
 waa pōnī mānīcoo da wente ate tadonte
 ænāni bai cædinque nē waa cæcā ĩñōmō
 mīmōnē waa pōnī nānō entawēnīnō ante
 pōnēnīnque waa pōnī tedete waa cæcampa.
 Nē wīwa cæcā guiquēnē mīmōnē wīwa nānō
 entawēnīnō ante pōnēnīnque wīwa tedete
 wēnæ wēnæ cæcampa.”

³⁶ “Edæ apænebo ēñēdāni. Wængongui
 tōmengā nānō apænte anguiōnæ ĩñonte,
 Mānīne quīnante ōnonque tedebitawo, ante
 angā ēñēnīnque mīni waocabo edonque
 apænequēñēmīni ĩmīnīpa. ³⁷ ĩnīnque mīni
 tedepāmo tōmāmāmo ante Wængongui
 apænte ānīnque edæ pancamīniya ĩmīnite
 űimpo cædinque edæ pancamīniya
 ĩmīnite, Mīni panguīnque tedewēmīnīpa,
 ancæcāimpa,” ante Itota apænegacāimpa.

*Mā cæte odōmōmi amōnie, ante ānānīpa
 (Mādaco 8.11-12; Odoca 11.29-32)*

³⁸ Apænecā ēñēnīnque nē odōmōnāni
 tōnō Paditeoidi pancadāniya Itota ingante
 apænedīnque,

—Awēnē nē Odōmōmi ēñēmi. Pōnencædānīmpa
 ante mā cæte bitō odōmōnō ante mōnitō
 aīnente wæmōnīpa.

³⁹ Āñōnāni Itota wæætē,

—Mīni nē wīwa cæcabo inte Wængongui
 ingante ēmō cæte pangote bai mīni wadæ
 godincabo ĩñōmō mīnitō, Mā cæte odōmōmi
 adīnque pōnēmāimōnīpa, ante ancaa āmīni
 awædō. Nāwangā āmo ēñēdāni. Nōwomīni
 ĩmīnite mā cæte odōmōnāmai ingæimpa.
 Cōnāo wodi beyæ nānō cægāinō ante
 edæ mānīnque mīni aquīnque cæcæimpa
 ānewēmīni. ⁴⁰ Mēōnaa go adoōnæque
 ĩñonte gæyæ cæncadē Cōnāo wodi nānō
 ongongai bai edæ botō adobai Waobo
 ēñagaīmo inte edæ mēōnaa go adoōnæque
 adopoōnæ wao wodido ongongæboimpa.
⁴¹ Cōnāo wodi Wængongui beyæ apænecā
 ēñēnīnque Nīnebaidi wēnæ wēnæ nāni
 cægāinō ante űimpo cædinque Wængongui
 gāmæñō pongadānīmpa. Cōnāo wodi
 wædangā ĩñongante botō nē ñænæmo
 inte nō ante apænebo ēñēnīnque mīnitō
 wæætē ēñēnāmai ĩmīnīpa. ĩnīnque Nīnebaidi
 Wængongui gāmæñō nē pongāināni incæ
 Wængongui nē apænte angā weca pōnīnque
 mīni ñōwo quēwencabo tōnō godongāmæ
 gongænte ongōnīnque, Mīni panguīnque
 ēñēnāmai ingamīnīmpa tōō, ante apænte
 pīīnānīnō anguēñē.

⁴² “Ayæ adobai betamonca gāmæñō ōmæ
 awēnē onquiyaŋgā ĩñōmō awēnē Tadōmōō
 wodi nanguī ēñente nānō apænedō ante
 ēñencæte ante doōnæ quēwēnīnque pon-
 gacāimpa. Tadōmōō wædænque ēñengā
 ĩñongante botō godōmenque nanguī ēñēmo
 inte mīnitō weca ongōñōmote mīnitō
 ĩñæmpa wīi ēñēmīnīpa tōō. ĩnīnque
 mānīngā onquiyaŋgā incæ Wængongui nē
 apænte angā weca pōnīnque mīni ñōwo
 quēwencabo tōnō godongāmæ ongōnīnque,
 Mīni panguīnque ēñēnāmai ingamīnīmpa
 tōō, ante apænte pīīncæcāimpa,” ante Itota
 apænegacāimpa.

*Wēnæ waodē owote godīngā inte adodō
 pongampa, ante
 (Odoca 11.24-26)*

⁴³ Ayæ apænedīnque Itota ĩmai ante
 apænecantapa. “Waocā baōnē owote ate
 tao godīnque wēnæ ĩñōmō edæ, Quīngānō
 baōnē go guīdīnque edæ guēmante
 quēwenguīmoō, ante dīqui dīqui mīnte
 ayongā ōñōmæca to amīnte ĩ ate wædīnque
 edæ, ⁴⁴ ‘Botō tao godīncōnē adodō go
 guīte quēwencæboimpa,’ ante pōnēnīnque
 adodō pongampa. Ponte ayongā waocā
 ōnonganque bayongante wacā ōñōwoca
 tōmengāa owodāmai ingā adīnque wēnæ
 wæætē, Æ waocā botō owodīncō bai ĩnongā
 inte ñōwo ōnonconque bai wadæ ñēmænte
 mānīcoo cabo tē gæte bai ōmæwocacā
 ingā abopa. ⁴⁵ Ante adīnque tōmengā
 wæætē godīnque wēnæīdi godōmenque
 wīwa cædāni tiæte ganca mānīmpodāni
 ĩnānīte ænte pongampa. Tōmēnāni

tömänäni waocä baönë godongämæ pö guite owodäni ate waocä iñomö wënæ yewæninque godömenque wæwengampa. Nöwomini guiquenë wîwa mîni cæcabo adobaî bate wæwencæminimpa,” ante Itota apænecäimpa.

*Itota badä tönö tömengä biwüdi
(Mäadoco 3.31-35; Odoca 8.19-21)*

⁴⁶ Itota oncönë a ongöninque nanguî inäni inänite apæneyongä tömengä nänö biwüdi tönö tömengä wäänä tömengä ingante bee tente apænecæte ante oncodö ponte a ongönäni. ⁴⁷ Adinque wacä añecæ ponte apænecantapa.

–Bitö badä bitö biwüdi bitö imite apænecæte ante oncodö ponte yabæque ongönänipa cæbii.

⁴⁸ Añongante Itota wæætë,

–Botö badä ædänö inää ante ämoo. Ayæ botö biwüdi ædänidö inänii ante ämoo, ante pönëminii.

⁴⁹ Äninque, Itota tömengä miñæ në godäni gämæñö oo cæmöninque,

–Iñäni iñomö botö badäidi botö biwüdi inönäni inänipa, ante mänömaïñö ämo abaïminipa. ⁵⁰ Mönö Mæmpo öönædë në quëwengä nänö äñö bai ëñente æcänö cæte quëwëna mäningä edæ botö biwi ingampa. Mäningä botö biwinque ingampa. Mäninä botö badä inampa, ante pönencæboimpa, ante Itota apænecäimpa.

13

Waocä nänö quiyadö ante odömonte apænecampa

(Mäadoco 4.1-9; Odoca 8.4-8)

¹ Mänionæ edæ Itota oncodö tao godinque gäwapæ wedeca godinque tæ contagacäimpa. ² Tömengä nänö tæ contate ongönömö nanguî inäni tömäo goto ponte ongönäni adinque tömengä wæætë wipodë go guite tæ contate wäi wocænte owoyongä tömënäni ayæ gäwapæ yæwedecaque ömaaque ongönänitapa. ³ Ayæ ömaaque ongönäni inänite apænedinque tömengä, Wængonguî Awënë nempo quëwëninque æbänö cæquî, ante ëñencæminimpa, ante botö imæca quëwëñäni nänî cædönö ante odömonte apænëbo ëñëedäni.

Äninque Itota nanguî apænecantapa. “Waocä në quiyacä iñomö quiyacæ gocampa. ⁴ Gote quiyayongä pancamonga taadö iñomö wææmompä. Taadö wæænte eyepodimö öñönte ayamöidi pöninque dobæ ade cænänipa. ⁵ Pancamonga guiquenë dicamontaa onguipoi woyedömö iñomö eyepote wææmpä. Onguipoi woyedömö öñomö inte præquinämäi quingæ tä bocate prædinque æmonga æipa. ⁶ Edæ guingo icate æmæwo näñe wæmpä. Iñinque

oguimento yæyæmë guiwadämaï inte cöñe bawadämaï iñonte nænque ti näwäñö wänä cacadinque edæ guingo icate näñe wæmpä. ⁷ Pancamonga guiquenë ömentacodë nänö eyepodimö iñomö præquinämäi tä bocate gä æiyonte ömentacoo pö incootonque ganta cæca ate näñe wæmpä. Wampo incapa præquî. ⁸ Waëmonguipoga quiyadimö guiquenë tä bocate waa prædinque tömëmö nanguî pönî incapa. Incate pancawæncaa tiëë ganca, pancawæncaa tetenta ganca, pancawæncaa todëinta ganca mänimpomö incapa. Quiyacä nänö quiyadö ante edæ botö mäninque ante apænëbopa. ⁹ Eämonca ongonte ëñëedäni,” ante Itota apænecäimpa.

Önömoncaque ëñente pönëñämäi inänipa, ante

(Mäadoco 4.10-12; Odoca 8.9-10)

¹⁰ Ayæ tömengä miñæ në godäni tömengä weca ponte apænedinque, Itota ëñëmi. Bitö tömënäni inänite inguipoga quëwëñäni nänî cæinö ante odömöninque quinnante mäninque ante odömonte apænëbitawo.

¹¹ Añönänite Itota, “Öönædë Awënë Odeye nempo æbänö quëwenguî, ante mîni waocabo wëëñëdë mîni ëñëñämäi ingainö ante botö ñowo mînitö iminite pönö edonque apænëbo ate mînitö adomînique në ëñëminî bamînipä. Wæætë tömënäni inänite guiquenë botö mäñinö ante godö apænëdämaï imopa. ¹² Edæ në ëcäcä ingante godönäni nänö godömenque æi bai botö në ëñengä ingante godö apænëbo ate tömengä godömenque waa pönî ëñente bacæcäimpa. Wæætë në ömæpocä inongä ingante wædænque nänö ëadi incæ ö æñnäi bai në ëñëñämäi ingä guiquenë adobaï wædænque nänö ëñëñö incæ ö ænte bai ewente bai baquîñö angüenë. ¹³ Incæte edæ awincaque adinque në adämaï inäni inte tömënäni önömoncaque ëñëninque në ëñëñämäi inäni inte pönëñämäi inänipa. Iñinque botö, Wængonguî Awënë nempo æbänö quëwenguî, ante ëñëñämäi incædänimpa, ante cædinque imæca quëwëñäni nänî cæinonque ante odömonte apænëbopa, angantapa. ¹⁴ Edæ Wængonguî beyæ apænëdinque Itaiya wodi iimäi ante nänö yewæmongainö bai ñowo quëwëñäni incæ iñinque cædänipa.

‘Näwängä ëñencæte ante cædinque mînitö önömoncaque ëñëninque pönëñämäi imîni inte ëñëñämäi incæminimpa.

Näwängä cæte ante cædinque mînitö awincaque adinque wæætë pönëñämäi imîni inte adämaï incæminimpa.

¹⁵ Mäninäni, Wîi ainëwædö, ante awinca mönæ guimonte bai cædinque,

Önömonca wîi ëñëñëwædö, ante tee mömoncate bai cædinque,

Mimönë wii pönëinewædö, ante mimö ömædë inäni inäni.

Wii mänömai i bai tömëni awinca adinque önömonca ëñëninque mimönë pönencædönänimpa. Ayæ tömëni nani waa baquinque edæ dadi emæninque botö gämænö poncædönänimpa. 24 Ante Itaiya wodi nänö angainö bai iinque cætimpa,” ante Itota apænecäimpa.

16 Ante Itota tömengä miñæ nê godäni inäni apænecantapa. “Minitö guiquenê awinca do adinque önömonca do ëñëninque mini toquinque impa. 17 Näwangä ämopa. Wængongui beyæ nê apænecainäni tönö nê nö cægainäni tönö ñowo mini adö ante nangui ainente wædäni incæte adämi ingadänimpa. Ayæ mini ñowo ëñënö ante nangui ëñëinente wædäni incæte ëñënamai ingadänimpa,” ante Itota apænecäimpa.

Quiyacä nänö cædö ante pönente iimäi impa

(Máadoco 4.13-20; Odoca 8.11-15)

18 Itota ayæ tömëni inäni godömenque apænecantapa. “Mänii quiyacä nänö quiyainö ante apænedinque botö, Wængongui Awënë ingante æbänö ëñënguü, ante odömoncæte ante apæneyömo minitö ëamonca ongonte ëñëdäni, angantapa. 19 Awënë Wængongui Odeye nempo æbänö cæte quëwenguü, ante mönö apænedö ante önömoncaque ëñëninque waocä mimöno pönënamai ingä ininque tömengä mimöno nänö ëñëninö incæ wënæ nê wiwa cæcä inongä inte pö ö ængampa. Mäningä nê pönënamai ingä iñömö taadö wedeca eyepodimö bai ingampa. 20 Woyedömö dicamontaa eyepodimö bai ingä guiquenê tömengä Wængongui nänö apænedö ëñëninque quingæ Ao ante watapæ tocampa. 21 Ayæ ate adocä incæ tömëdö woyedömö bai oguimento yæyæmë guiwadämai bai ingä inte wantæ iñö quëwengampa. Wængongui nänö apænedö beyæ piñäni beyongä tömengä ingante wënæ wënæ cæcæte ante togëñäni ate wædinque tömengä guifente wædinque edæ emö cæte gocampa,” angantapa.

22 Ayæ, “Ömentacodë wæante pædimö bai ingä guiquenê tömengä ëñëninque godömenque quëwëfongä inguipoga quëwente quiemë beyænque mönö wæpämö pöninque ayæ, Mäincoo beyænque toquimo, ante nani oda cæte wæwëmämö pöninque ömentacoo ñancate cæ bai cæyonte Wængongui nänö apænedinö incæ incadämai bai bapa. 23 Onguipoga wainguipoga quiyadimö bai ingä guiquenê tömengä Wængongui nänö apænedö ëñente wede pönëninque edæ tömëwæ incate bai Wængongui beyæ nangui cæcampa. Pancadäniya edæ tië ganca incate bai nangui cædänipa. Wädäni guiquenê tetenta

ganca incate bai cædänipa. Ayæ wädäni todëinta ganca incate bai cædänipa,” ante Itota apænecä ëñënanitapa.

Wäimö tönö ömentacoo quiyate pæmö ante oqömongampa

24 Ayæ wæætë inguipoga quëwëni nani cæinö ante odömoninque Itota godömenque apænecäimpa. “Öönædë Awënë Odeye iñömö gönea tömëmö wäimö nê quiyacä bai ingampa. 25 Tömengä quiyate gocä ate waodäni mö ñöñöni wacä nê piinte cædongä inte wæætë tömengä nänö quiyadiñömö awëmö ponte, Ömentacoo pæcæimpa, ante adoyömö pönö ni quiyate wadæ gocä. 26 Ate wäimö tänä nä bocate waiwæ pædinque tömëmö incayö adoyömö tæcæguedë ömentacoo pæ. 27 Adinque nê cædäni guiquenê nê ëacä weca pöninque, ‘Awënë, bitö gönea quiyadiñömö tömëmö wäimö minämai imitawo. Ädönö ponte ömentacoo adoyömö pæ, ante wæmönipa.’ 28 Ante äñönäni, ‘Wa. Mönö piinte ängongä cæbaingampa. Wabänö ii.’ Ante pönëfongä tömëni, ‘Ininque bitö ämi godinque abæ wiquimöni, ämitawo.’ 29 Änäni ëñëninque nê ëacä wæætë edæ, ‘Iñæmpa mänömai cæmini ininque waiwæ tönö ömentacoo guëa abæ wite babäimpa. 30 Ininque minitö ñowo edæ ömæ widämai inte to amiña peganca ee amini guëa pæcæimpa. Amiñayedë edæ nê pedäni inäni te botö, Ömentacoo täno tæ gæte topo cæte iya täninque tömëmö wäimö guiquenê tä pete mämö ñönödäni, ancæboimpa,’ ante nê ëacä apænecampa.” Mänömainö ante odömoncæte ante Itota apænecäimpa.

Möotatamö guidimö ante odömonte apænecampa

(Máadoco 4.30-32; Odoca 13.18-19)

31 Ayæ wæætë inguipoga mönö adö ante odömoninque Itota godömenque apænedinque, “Waocä möotatamö tömëmö ænte mäo tömëmoncodë quiyacä bocate pæ aminitawo. Mänimö guidimö inte ñænæ pæ bai Wængongui Awënë Odeye nempo mini quëwencabo iñömö adobai yebænte pæpa. 32 Edæ möotatamö mini ænte quiyamö guidimö pönö i bai wamö mini quiyamö adomonque incæ adobai guiyamö pönö i iñömö edæ dæ ampa. Incæte möotatamö iñömö tä bocate pædinque möotatawæ edæ ocäñequi doyæ pæwæ bapa. Wii tömää ocäñequi mini quiyadiwæ bai edæ ocäa inämai inte möotatawæ iñömö edæ ñænæ awæ i adinque ayamöidi ponte awëñemæ ongönänipa. Möotatamö guidimö incæ mänömai pæ bai Wængongui Awënë nempo quëwëni iñömö wædænque inäni incæ nangui yebænguänäni inäni,” ante odömoninque Itota apænecäimpa.

Päo yedæ æmpoqui da wenguï ante odõmonte apænecä

(*Odoca 13.20-21*)

³³ Ayæ wæætë inguipoga quëwënäni nãni cæinõ ante odõmõninque Itota godõmenque iimã ante apænecantapa. "Päo yedæ æmpocæimpa, ante onquiyængä ñænængade tee manguincade ænte tee mäningue ædina nãni ämõ ænte mempoga go adopoque da wëningue ayæ yedæ æmpoqui ænte pönõ da wëningue wempo wempo ædæmõ cædengä ate pãomo yedæ æmpote tõmão nãamænta bapa. Yedæ æmpote ate pãomo tõmão nãamænta ba bai õõnædë Awënë Odeye nempo mïni quëwencabo iñõmõ tõmãmïni nõ ëñente bamïnipa," ante odõmõninque Itota apænecacæimpa.

Inguipoga nãni cæi bai impa, ante Itota odõmongampa

(*Mäadoco 4.33-34*)

³⁴ Nanguï inãni mäniñõmõ ongõnãni iñõnãnite Itota inguipoga quëwënäni nãni cæinõ ante odõmõninque mäningue ante tõmënãni inãnite apænecantapa. ³⁵ Edæ Wængonguï beyæ nê apænecacæimpa. "Wængonguï æbãno cæcää, ante botõ inguipoga quëwënäni nãni cæinõ ante odõmõninque botõ iñæ ænete apænecæboimpa.

"Wængonguï æbãno cæcää, ante botõ inguipoga quëwënäni nãni cæinõ ante odõmõninque botõ iñæ ænete apænecæboimpa.

Wængonguï nãno badongaiñedë ayæ godõmenque ñõwo ganca nãno wë wodonte ëñengainõ ante botõ ñõwo apænecæboimpa,"

ante docä nãno angainõ bai ñõwo iñõmõ iñque cæquinque Itota odõmonte apænecacæimpa.

Õmentacoo ante iimã ante impa

³⁶ Ayæ nanguï inãni inãnite ëmõ cæte godingue Itota oncõnë põ guicä adingue tõmengä miñæ nê godäni guiquënë tõmengä ingante mãmõ änãnitapa. Gõnea õmentacoo quiyadincoo ante apænecacæimpa bitõ æbãno ante odõmoncæte ante apænecæimpa. Edæ edonque apænecæimpa.

³⁷ Äñõnãnite tõmengä, "Tõmëmõ waimõ nê quiyadingä botõ äningä iñõmõ botõ Waobo ëñagalmo inte mäningä bai imopa.

³⁸ Gõnea botõ äniñõmõ bai iñguipo impa. Tõmëmõ waimõ botõ änimõ bai inãni guiquënë Awënë Odeye ingante nãni ëñencabo inãnipa. Õmentacoo botõ änincoo bai inãni guiquënë wënæ inte nê ëñënãni iñõnãni ³⁹ nê piinte quiyacä botõ äningä bai iñõmõ edæ wënæidi awënë ingampa. Amiña bai guiquënë inguipoga iñque bayedë ingæimpa. Ayæ amiña tä pete bai cædäni guiquënë Wængonguï anquedoidi inãnipa."

⁴⁰ "Iñique edæ nãni amiña bayedë õmentacoo tã gæte topo cæte nãni iya täi

bai edæ adobai iñque bayedë baquinõ anguenë. ⁴¹ Mäniñedë edæ Waobo ëñagalmo inte botõ anquedoidi inãnite ämo põningue tõmënãni gõnea iñõmõ õmentacoo tã gæte bai cæcædänimpa. Botõ nempo quëwënãni pancadãniya oda cæte ëñënãmai cædäni. Iñique, Oda cæcædänimpa, ante nê cædäni tõnõ nê ëñënãmai cædäni tõnõ tõmãnãni inãnite botõ anquedoidi iñõmõ abæ wite bai tã gæte mäo, ⁴² gongapamõ nãni ämogate Ca ca wæyõmõ wido cæcædänimpa. ⁴³ Mäniñedë edæ nê nõ entawëmïni guiquënë mõnõ Mæmpo Awënë Odeye iñongä tõmengä nempo nê quëwëmïni iñõmõ edæ nænque tamõ guinæ gongæ bai adobai guinæ edæ gongæncæmïnimpa. Ëamonca ongonte ëñëedäni," ante Itota angacæimpa.

Waëmoncoo wë wodonte mäincoo, ante

⁴⁴ Godõmenque odõmõninque Itota iimainõ ante apænecantapa. "Õõnædë Awënë Odeye nempo mïni quëwencabo iñõmõ waëmoncoo onguipodë ææ wote nãni wë wodonte mäincoo bai impa. Waocä gote mäincoo adinque adodõ ææ wote æninque wayõmõ wë wodongampa. Wodonte ate tõmengä watapæ todinque tõmengä ëadincoo tõmancoo godonte eyepæ æninque tõmengä waëmoncoo nãno wë wodõnimæ æncæte ante õmæ nê ëadingä weca do godingue mänimæ tõmãmæ beyæ ante edæ eyepæ prædæ godõninque ængampa. Waocä mänoimã tõmengä ëadincoo tõmancoo nãno godõni bai cædinque õõnædë Awënë Odeye iñõmõ, Botõ nempo quëwencæmïnimpa, ante tõmengä Wëñængä ingante eyepæ godõninque inguipoga tõmãno quëwënãni inãnite ængacæimpa," ante Itota apænecacæimpa.

Wamõ adomonque põni waëmõ imõ ante

⁴⁵ Ayæ godõmenque, "Õõnædë Awënë Odeye nempo guicæte ante cæcä iñõmõ wamoncoo pededamõ nãni ämoncoo godonte æncæte ante nê diqui diqui mingä bai ingampa. ⁴⁶ Iñique wamõ pededamõ nãno æinënimõ adomonque waëmõ põni i ate tæcæ adinque waocä wadæ gote tõmengä nãno ëadincoo tõmancoo godonte eyepæ æninque wæætë mänimõ wamõ incæ godonte ængampa," ante Itota odõmonte apænecacæimpa.

Dicamõñæ ante odõmonte Itota apænecampa

⁴⁷ "Ayæ wæætë edæ, Õõnædë Awënë Odeye iñõmõ edæ dicamõñæ gäwapæ nãni dadõi bai tõmää gæyæidi ænte bai cæcampa. ⁴⁸ Dicamõñæ eyede dadõninque yæwedeca wëä manta cõnõninque tæ contate apænte adinque, Nãwaaquingä i, adinque õ æ otodë da wëningue, Baacä i, adinque wido cædäni bai Wængonguï Awënë

adobai cæquiringänö angüenë. ⁴⁹ Edæ iinque bayedë Wængongui anquedoidi põninque në nõ cædäni inänite apænte æninque në wiwa cædäni inänite adinque nänënë gönongä ⁵⁰ ongöñönänite gongapamö edæ guitodongä guicædänimpa. Tömënanäni edæ mänifñömö guiite ongöninque ämogate wædinque Ca ca wæcædänimpa,” ante Itota odömönte apænegacäimpa.

Waëmoncoo incæ müncoo tönö pedæncoo ante

⁵¹ Mäninö ante iinque odömönte apænedinque Itota tömënanäni inänite,

—Botö odömönte apænedö tömänö ante edonque ëñëminitawo.

Äñongante,

—Ao ëñentamönipa.

⁵² Ante apænedänäni ëñëninque tömengä apænegacäimpa.

—Iinque æcänö, Öönædë Awënë Odeye æbänö cæcää, ante ædæmö ëñëninque në odömönte apænedä i tömengä iñömö waëmoncoo në da wente mangä bai adobai inongä inte Wængongui nänö änö ante entawengä ingampa. Ayæ edæ në ëacä nänö da wënicade wi ænedinque müncoo tönö pedæncoo tadonte odömongä bai në odömönte apænegä iñömö adobai cæcampa. Edæ doyedë nänö ëñënö incæ ñowo nänö ëñënö incæ mümönë waa põni nänö entawënö ante edonque odömönte apænegacäimpa, ante Itota mäninque ante idæwaa apænegacäimpa.

Näatadeta iñömö ponte Itota apænegacäimpa (Mäadoco 6.1-6; Odoca 4.16-30)

⁵³ Wængongui Awënë æbänö cæcää, ante odömöncæte ante imæca quëwënäni nänä cæinö ante nänö odömöninö tömänö ante iinque apænedinque Itota wadæ gocantapa.

⁵⁴ Tömengä nänö pægaiñömö ponte tömënanäni odömöncönë põ guidinque mänifñömö quëwënäni inänite odömönte apænegacäimpa. Ëñëninque tömënanäni ancai guifñëninque,

—Iingä iñæmpa, æbänö cæte nangui ëñengä ingää, änänitapa. Tömengä edæ æbänö cæte tæi piñæninque bamönengæ cæcää, ante ëñencæte ante wæmönipa.

⁵⁵ Iingä iñæmpa awæmpa në timöwengä wengä imaingä inte bamönengæ mänömai cæcampa, ante awædö. Tömengä wäänä emöwo Mäadiya ingampa, ante awædö. Tömengä biwliidi önönäninque Tantiago tönö Ootee, Timönö tönö Codaa inämai inänitawogaa. ⁵⁶ Tömengä biwinqueidi mönitö tönö tömänäni ongönäni aedäni. Iinque tömengä wæætë æbänö cæte nangui ëñengä badinque edæ nangui cæcää.

⁵⁷ Ante põnente wædinque tömënanäni tömengä beyæ ante piñte badänitapa. Piñte

badäni adinque Itota tömënanäni inänite angantapa.

—Iñæmpa Wængongui beyæ në apænegacä iñömö tömengä tömämæ gote apæneyongante tömengä ingante waa adänipa. Wæætë tömengä nänö pægaiñömö põninque oncönë põ guite apæneyongä edæ mänifñömonque tömengä ingante wiwa adänipa töö, ante apænegacäimpa.

⁵⁸ Incæte, Pönënamäi iñönänite botö ædö cæte nangui mä cæquimoo, ante põnente wædinque tömengä tömënanäni weca edæ wædænque põni cægacäimpa.

14

Wäo æpænë në guidöngä wængampa (Mäadoco 6.14-29; Odoca 9.7-9)

¹ Tömënanäni mänifñedë, Itota æbänö cæcää, ante mäo änäni ëñëninque pancabaa awënë Edode do ëñengacäimpa. ² Tömengä iñömö tömengä ingante në cædäni inänite apænegacäimpa. “Wäo wodi æpænë në guidöngä incæ iingä Itota iñömö adocä inte a ongongä awædö. Tömengä do wænte ñäni ömæmöninque pongampa töö. Mäninö beyænque tömengä tæi piñænite entawëngä inte në nangui cæcä ingampa,” ante awædö, angantapa.

³ Wäo wodi iñömö iimäi wængacäimpa. Do iñedë awënë Edode iñömö tömengä biwi Pedipe manguiwëningä Ædodiya ingante ö ænte möningä inongäimpa. Mäningä Ædodiya Wäo ingante piingä beyænque Edode iñömö Wäo ingante bæi ongonde goti winte tee mönedongäimpa. ⁴ Edæ Wäo iñömö nänö caate wænguinque Edode ingante iimäinö ante do wæde äningä inongäimpa. “Edode ëñëmi, bitö Wængongui nänö angainö bai ëñënamäi inte edæ mäningä onquiyengä ingante manguiwëmpa töö,” ante cöwë wææ äningä inongäimpa.

⁵ Angä ëñente piñinque Edode, Wäo ingante botö æbänö cæte wænonguimo, ante cædongäimpa. Incæte tömänäni, Wængongui beyæ në apænedongä Wäo ingampa, ante tededäni ëñëningä inte Edode, Botö imote piñänäni wææc wæ, ante guifñente wædinque Wäo ingante wænönämäi inte ata cæpodongäimpa.

⁶ Incæte Edode nänö ëñagäionæ iinque bayö wadäni ponte godongämæ bete ayönäni edæ Ædodiya wengä baquécä tode pete äwacä adinque Edode wæætë nangui todongäimpa. ⁷ Iinque tömengä, Wængongui ayongä näwangä ämopa, ante baquécä ingante änogäimpa. Waa põni bitö tode pete äwadi beyæ bitö quimë ante æinente ämi adinque botö bitö änö ante cöwë põnomo æncæbiimpa, änogäimpa. ⁸ Angä ëñëninque baquécä wæætë wäänä weca gote, Æbänö anguimoo, ante äñongä wäänä guiquëné,

Īimaī äe, angä eññenique baquecä wæætē Edode ingante,

–Īimaī pönö cæbi æmoe. Wäö æpænē guidönongä ingante wangö tamencate tömengä ocabo ĩni coyomēnætaca cō cæte ænte māmō pædæ pönömi æmoe.

⁹ Angä eñente wædinque awēnē odeye ĩñömö, Æ eñente awædö. Quinö ñöwo cæquimoo, ante nangui wædongäimpa. Incæte godongämæ becönäni eññönänite, Wængongui ayongä cōwē godoncaëboimpa, ante nē äningä inte nē wængongä ingante tömengä, Baquecä nänö äninö bai cæedäni, ängongäimpa. ¹⁰ Angä eññenique nē wængongä tee möneincönē go guiddinque edæ Wäö ingante mäo bæi ongöninque wangö tomencadongäimpa. ¹¹ Ayæ Wäö ocabo ĩni coyomēnætaca cō cædinque baquecä weca ænte māmō pædæ pönönäni æninque baquecä wæætē wäänä ĩnante godongä æñönäimpa.

¹² Ayæ Wäö wodi tömengä miñæ nē godinäni pöninque tömengä baö ĩni ænte mäo daga wëninque wæætē Itota weca pöninque, Wäö wodi mänömaī wængä wæmönipa, ante tömengä ingante apænegadänimpa.

5.000 ganca ĩnani ĩnänite Itota godongä cænänipa

(Mäadoco 6.30-44; Odoca 9.10-17; Wäö 6.1-14)

¹³ Wäö wodi do wængäimpa, ante apænedäni eñente wædinque Itota wæætē edæ, Önömæca gocæboimpa, ante wipodē guii contate wogaa gocantapa. Gocä ate, Mänññömö gocaæ cæcampa, ante tededäni eññenique tæiyæñäni tömēnāni nāni quëwëñömö wacönē ta wacönē ta ömaaque oo pänta täno gote mäæ ongönänitapa. ¹⁴ Itota ĩñömö wipodē wogaa pō ti wæænte ayongä nangui ĩnāni dobæ ponte mäæ ongönäni adinque, Æbänö cæte quëwenguināni, ante tömēnāni tönö godongämæ wæte bai pönengantapa. Ayæ daicawo gawæñäni ĩnänite godö cæcä ate waa badänitapa. ¹⁵ Gäwadecæ bayö tömengä miñæ nē godäni tömengä weca pöninque,

–Ñöwo wëmö bacæ cæpa cæbii, äñänitapa. Ayæ, Önömæca incæ cængui dæ ä adinque bitö godongämæ ongönäni ĩnänite ämi waodäni quëwëñömö gote cængui godonte ænte cæncædänimpa.

¹⁶ Äññönänite Itota,

–Goquinäni, ante quĩnante äminii. Minitö wæætē godöminii cæncædänimpa, ämopa.

¹⁷ Äñongante,

–Īñæmpa päö önonpo æmæmpoque gæyæ mäa pönö ĩ. Cængui nææmönipa diyæ godömöni cænguināni.

¹⁸ Ante wææ äññönäni Itota ĩñömö,

–Mänimpodänique nææmīni incæ ænte māmö pædæ pönöminii æmoedäni, angantapa.

¹⁹ Ayæ godongämæ mäæ ongönäni ĩnänite angä gaguimäa tæ contadäni ate tömengä päö önonpo æmæmpoque gæyæ mäa æninque öönædē ĩnö æmö adinque, Wængongui, bitö waa pönömi ænte cæmönipa. Ante apænedinque päö pä æ pä æ cædinque tömengä miñæ nē godäni ĩnänite pædæ pönongä æninque tömēnāni wæætē godömenque tömānāni ĩnänite di mäñæ di mäñæ cædäni ænte cænänitapa. ²⁰ Mänömaī pönö cæcä æninque tömānāni tömo pönö cænänitapa. Cænte ate edæ tömēnāni ao mäæ ao mäæ nāni ñönöni ee öñoncoo pædæ wææmpo ö æ da da wente æninque tömengä miñæ nē godäni ĩñömö otodē önonpo tipæmpoga go mentodēa cængui eyedē da wēnāni contagatimpa. ²¹ Nē cænāni ĩñömö edæ onguññænänique incæ tincö müido ganca mänimpodäni ĩñönäni onquiyæñäni tönö nāni wencabo tönö godömenque nangui ĩnāni inte cængadänimpa.

Itota æpæ yædopæno dao dao gocampa (Mäadoco 6.45-52; Wäö 6.16-21)

²² Tömānāni ĩnque cænāni ate Itota tömengä miñæ nē godänique ĩnänite do angantapa. Minitö täno wipodē guii contate æmæ wedeca tao goyöminii botö wæætē godongämæ ongönäni ĩnänite ämo godäni ate ayæ poncæboimpa. ²³ Angä Ao ante tao goyönäni tömengä wæætē wadäni ĩnänite, Nöwo goedäni, angä wadæ godänitapa. Ayæ tömengä Wængongui ingante apænecæte ante änanquidi æicantapa. Æite apænedinque wëmö bayö tömengä adocanque a on-gongacäimpa. ²⁴ Tömengä miñæ nē godäni guiquēnē taocæte ante cædinque edæ tæcætibæ wiyate cæwoyönäni edæ woboyæ päæmænte nangui pönö edæ æpæ incæ incæ cæte mängonta mängonta cæyonte wipo wäi wocæntapa. ²⁵ Ayæ tawadiya nänö peyedē bayonte edæ Itota ĩñömö æpæ yædopænoque edæ dao dao pongä adänitapa. ²⁶ Yædopæno edæ dao dao pongä gomö adinque tömengä miñæ nē godäni edæ ancai guññenique,

–Quiēmē ĩmaī. Waocä wænte babæningä wabänö cængongä, ante Yæ ante guññente wædänitapa.

²⁷ Ante wæyönäni edæ Itota ĩñömö,

–Ee piyænē cæte guññenāmaī iedäni. Botö ĩmo apa guññewëminii.

²⁸ Ante äñongä, Pegodo guiquēnē,

–Awēnē, bitö ĩmitawo. Nö nö ĩmi inte bitö æpæ yædopæ bitö weca ämi pömoe.

²⁹ Angä eññenique,

–Pöe.

Äñongä Pegodo wipodē ongöninque edæ ti wææninque yædopæno edæ dao dao

gote Itota weca tæcæ obo ponte ayongä,
³⁰ woboyæ nanguï nanguï pæmæ ate
 wædinqe ancai guiñëningue æpænë tæi
 guidingue Yæ wæcantapa.

—Awënë, æpæ bete wæncæbointaye.

³¹ Ante wæcä adinqe Itota tömengä
 ingante edæ quingæ pædæ gopo töö
 æmæninque,

—Îñæmpa botonque iñömote pönëningue
 pöe, antabopa. Quinante wapiticæ edæ
 pönëmitapa, angantapa.

³² Ayæ wipodë guida ate woboyæ
 iñontobæ næ pæmæñamäi gongæ.

³³ Adinqe wipodë ongönäni wæætë Itota
 weca ædæ wæænte apænedinqe,

—Näwängä bitö Wængongui Wëñæmi
 inömi ïmipa, ante watapæ apænedänitapa.

*Caate wædäni inänite Itota cæcä waa
 badänipa*

(Máadoco 6.53-56)

³⁴ Ayæ æmæmäa taodinqe tömënäni
 Guënetadete bæ ti wæænänitapa. ³⁵ Ti

wæænäni adinqe mänïömæ quëwënäni
 guiquënë, Tömengä Itota ingampa, ante
 do adinqe tömämæ mäo gode ä gode
 ä cædäni ëñëningue wënæ wënæ inäni
 inänite tömännäni inänite tömengä weca ænte
 mämönäni pönänitapa. ³⁶ Itota ingante, Bitö
 weocoo ämi yæwedecooque gampote waa
 bacädänimpa. Änäni wædinqe tömengä
 Ao angä ëñëningue nê gampo gampo
 cædäni iñömö tömännäni edæ waa inäni
 bagadänimpa.

15

*Mimöno tao godi beyænque waocä wen-
 tamö ewocacampa*

(Máadoco 7.1-23)

¹ Dodäni näni wææ angainta ate nê
 odömönäni tönö Paditeoidi pancadäniya
 Eedotadëë quëwëningue mänïfëdë Itota
 weca pöninqe iïmäi änanitapa.

² —Bitö miñæ nê godäni iñömö dodäni
 näni angainö ante quinante ëñënamäi inte
 wapiticæ cædäni wæmönipa. Tömënäni
 iñæmpa mempodämäi inte wentamö
 nampote cænguï cænäni awædö.

³ Ante piñäni wædinqe Itota wæætë,

—Minitö guiquënë dodäni näni an-
 gainonque ante ëñente cæcæte ante cædinqe
 Wængongui nänö wææ angainö ante
 edæ quinante ëñente cædämäi iïmii.

⁴ Wængongui, “Bitö wæmpo ingante bitö
 badä inante waadedinqe waa cæe,”
 angacäimpa. Ayæ, “Wæmpocä ingante
 wäänä inante nê piñte wiwa angä in-
 gante wænömäni wæncæcäimpa,” ante
 wææ angacäimpa. ⁵ Minitö guiquënë
 iïmäi änewëningue edæ wææ cæminipa.
 Waocä mæmpocä ingante waa cæquënegä
 iñongante wäänä inante adobaï waa

cæquënegä iñongante minitö wæætë
 wææ äninque, Waocä wæmpocä ingante
 wäänä inante iïmäinö ante apæncæcäimpa,
 änewëminipa. Wæætë edæ “Mæmpo, bitö
 qui, ante, Badä, minö qui, ante botö pönömo
 mîna ænguëñenö incæ ñowo wæætë edæ,
 Wængongui qui, ante do edæ godonte impa.”

⁶ Ante apænedinqe waocä wæmpoda
 inate wiï godonguënegä ingampa, ante
 minitö iñömö edæ wææ änewëminä awædö.
 Îñæmpa mänömainö ante wææ änewëningue
 minitö edæ dodäni näni angainonque ante
 cæcæte ante cædinqe Wængongui nänö
 wææ angainö ante edæ, Önöneque impa,
 ante bai cæminipa töö. ⁷ Minitö waa cæminä
 inte bai nê änewëminä iñöminite edæ ämo
 ëñëdäni. Mîni cædö ante Wængongui iïmäi
 ante apæncampa, ante Itaiya wodi nöingä
 ante yewæmongacäimpa.

⁸ “Îñäni iñömö botö imote önöneque waa
 apænete bai tededäni incæte,

tömënäni mîmöno æmæ pönente edæ gobæ
 ongonte bai inäni awædö.

⁹ Ayæ botö weca ædæ wæænte waa ate
 bai tededinqe tömënäni, Wængongui
 imidö anguënë, ante önöneque
 tedewëningue önonque edæ cædänipa.

Waodänique näni wææ änonö ante odömönte
 apænedänipa töö.”

Ante Wængongui piingampa, ante
 yewæmongacäimpa.

¹⁰ Mänömainö ante apænete ate Itota
 wæætë nanguï ongönäni inänite aa pecä
 pönäni adinqe apænegacäimpa.

—Botö apænebo ëñëningue ocaidë
 pönente ædæmö ëñëdäni, angantapa.

¹¹ Önönë guidi beyænque waocä mîmö
 wentamö entawënamäi ingampa. Wæætë
 mîmönë wiwa pönëningue nänö önöne
 tao gode beyænque tömengä wentamö
 mongængampa, ante apænebo ëñëdäni.

¹² Ante apæncä ate tömengä miñæ nê
 godäni iñömö tömengä weca ponte änanitapa.

—Bitö mänömainö ante apænebi
 ëñëningue Paditeoidi iñömö guingo imonte
 piñäni apa änewëë.

¹³ Äñönäni tömengä,

—Awæ botö Mæmpo mînamäi iwæ to wite
 bai wido cæte bacäimpa. Paditeoidi iñömö
 wiï botö Mæmpo quinäni inönäni inte adobaï
 edæ wido cæte wæcädänimpa.

¹⁴ Edæ babetamönäni bai ëñënamäi
 inäni inte tömënäni iñömö wadäni adobaï
 babetamönäni bai inäni inänite nê ænte
 mäodäni inäni apa cæminä. Tömënäni
 inänite gomö aedäni. Edæ babetamongä
 ingante wacä adobaï babetamongä inongä
 ingante ænte mäocä gocä ininqe tömëna
 nänä babetamoncaya guëa ontatodë
 mongæcadæ guibainapa.

¹⁵ Ante apæncä ëñëningue Pegodo,

—Mänömainö ante odömönte apænedinque bitö æbänö ante odömoncæte ante apænebitapa, ante apænebi ëñëmönie.

¹⁶ Äñongante Itota,

—Minitö incæ ocäi ömæcadäni bai inöminä inte ëñënamäi iminitawo. ¹⁷ Edæ quincoomë önöne guiddincoo incæ cæcadë guite ate goiwaa ogä mente wido cæte ba apa änewëminii. ¹⁸ Wæætë önöne waocä nänö tedewënö guiquënë mímönë nänö wiwa pönënö beyænque tao godepa. Ìninqu waocä önöwoca mäninö beyænque wentamö ewocacampa. ¹⁹ Edæ waocä mímönë nänö entawente taodinö beyæ wiwa ante pönengampa. Mímönë nänö piinte pönënö beyænque waocä godö wængongampa. Mímönë towëinente tömengä nänöogængä inämaï iñongante godö mongampa. Ayæ æcämenque iñongante mímönë towëinente beyænque waocä godö mongampa. Mímönö æinente wædinque wacä qui awëmö ængampa. Mímönë wiwa pönëninque wacä ingante godö babæ wapiticæ apænegacampa. Ayæ wacä ingante piinte tedecampa. ²⁰ Ìninqu mímönö tao godi beyænque waocä wentamö ewocacampa. Wæætë mempodämaï inte nänö cænö beyæ waocä wentamö ewocadämaï ingampa, ante edæ Itota apænegacäimpa.

Onquiyængä oodeocä inämaï inte wede pönente angampa

(Mäadoco 7.24-30)

²¹ Mäniñömö quëwente wadæ godinque Itota Tido nani quëwëñömö Tidö nani quëwëñömö eyequei pongacäimpa. ²² Mäniñömö ponte quëwëñongä onquiyængä Cänäamæ në ëñate pædingä inte adoyömö quëwente tadinque tömengä weca pöninque aa pecantapa.

—Awënë bitö Awënë Dabii wodi pæimi inömi inte ëñëmi. Botö beyæ pönö waadete waa cæe. Botö wëñængä onquiyængä wënæ inte quëwente wæwengampa cæbii.

²³ Ante mänömaï aa pecä wædinque Itota pæ wëëncantapa. Pæ wëëncä adinque tömengä miñæ në godäni quieuënë tömengä weca pöninque wææ apæñënitapa.

—Mönö miñæ tee empote Yæ yæ në änewënongå ingante ämi gocæe.

²⁴ Ante wææ änäni ëñëninque Itota wæætë,

—Cænänäni obegaidi gueogæ gote wæwënanäni bai möni idægocabo adobai inte wë wömönte wädäni adinque Mæmpo Wængongui, Tömënaninque inänite cæquimi goquimi, äninque botö imote da pönongä wii pontawoo.

²⁵ Angä ëñëninque onquiyængä iñömö wæætë Itota önöwa gäänë ædæ wææñinque apæñecantapa.

—Awënë, botö beyæ cæbi waa bacæe, angantapa.

²⁶ Äñongante Itota wæætë,

—Wënanäni cængui inguënë waocä dicæ quintamöidi cængui ante wææntodonguingä. Bitö edæ wabi iñömite botö bitö beyæ ædö cæte cæquimoo.

²⁷ Angä ëñente wædinque,

—Awënë iñæmpa në ëadäni nani cænte eyepodimö wæænte æñömengadæmpa inö öñöñö quintamöidi ade cæmpa.

²⁸ Äñongante Itota,

—Onquiyæmi ëñëmi. Bitö nangui pönëniimi iñömite bitö änö ante do cæte impa.

Ante tæcæ apæneyongä tömengä wengä edæ do adoyedë edæ waa bagacäimpa.

Caate wädäni inänite Itota cæcä waa badäni

²⁹ Mäniñömö quëwëninque wadæ godinque Itota Gadideapæ ömaaque pö änanquidi æi tæ contacantapa. ³⁰ Tæ contate ongöñongä nangui inäni godongämæ pöninque wënæ wënæ inte wädäni inänite ænte pönänitapa. Pæ opa pæ opa godäni tönö tente tobænte wädäni inänite babetamö inäni tönö babetade inäni inänite Itota weca ænte mämö ñö cædänitapa. Ñö cædäni ongöñönänite Itota tömänäni inänite godö cæcä ate waa badänitapa. ³¹ Godongämæ ongönäni guiquënë, Itota godö cæcä ate babetade inänäni incæ tededäni ëñëmönipa, ante guifente wædänitapa. Tente tobænte wædinäni incæ waa badäni amönipa. Pæ opa pæ opa godäni inänäni incæ waa bate godäni amönipa. Babetamö inänäni incæ waa adäni wæmönipa, ante guifente wædinque edæ Wængongui ingante apænedinque, Möni idægocabo Wængongui inömi inte edæ bitö adobique ñäö bai ëmömi inte edæ tæi piñænte cæbi amönipa, ante watapæ apænegadänimpa.

4.000 ganca inäni inänite Itota godongä cænänipa

(Mäadoco 8.1-10)

³² Mäniñedë Itota tömengä miñæ në godäni inänite aa pecä pönäni ate apæñecantapa.

—Ìinäni botö weca ongönäni iñömö mëönaa go adoönæque iñonte botö weca ongöñönäni tömënanäni cængui ömæpodäni badäni ate wædinque botö tömënanäni tönö godongämæ wæte bai pönëmopa. Cænämaï inte gue ænente wæyönänite botö, Oncönë goedäni, ämo gote bai tömënanäni edæ idömæ godinque nangæ badinque edæ bocæ bocæ cæte wæcædönänimpa.

³³ Angä wædinque tömengä miñæ në godäni wæætë,

—Ënodäni inäniyaa. Önömæca incæ päö impa æninque godömöni cænguinänii.

³⁴ Ante wæyönänite Itota,
—Minitó päö æpodó nææmîni.

Åñongante,

—Päö ðonmpo æmæmpoque go mæa gæyæ guiyä pönî mæa pönî mæa ongompa, ante edæ apænedänitapa.

³⁵ Itota iñömö godongämæ ongönäni nangui inäni iñönänite angä tæ contadänitapa.

³⁶ Ìninqe päö ðonmpo æmæmpoque go mæa tönö gæyæ tönö nani næænincoo pædæ godönäni æninqe tömengä Wængongui ingante, Bitö waa pönömi cæncæmönimpa, ante apænedinque pä æninqe tömengä miñæ nê godäni inänite pædæ pönongä æninqe tömönäni wæætê wadäni inänite pædæ pædæ godönäni ænänitapa.

³⁷ Æninqe tömönäni godongämæ cæninqe tömo pönî cænänitapa. Idæwaa cænäni ate tömönäni pä ænte nani cænte ðönönî ee ðönconco wente æninqe Itota miñæ nê godäni otodê pönö da wënänitapa. Ìninqe ðonmpo æmæmpoque go mentodæa cængui eyede contagatimpa. ³⁸ Nê cænänäni iñömö onguñænänique coatodo müdo ganca iñönäni onquiyænäni tönö nani wencabo tönö tömönäni æpodänimê godömenque nanguï pönî inönänimpa. ³⁹ Ìninqe cænäni ate Itota iñömö, Goedäni, angä godäni ate tömengä wipodê guii contate Ìmæmäa Mäagadabæ pongacäimpa.

16

Mä cæte odömömi amönie, änänipa
(Mäadoco 8.11-13; Odoca 12.54-56)

¹ Itota pongä adinque Paditeoidi tönö Tadoteoidi iñömö, Mönö ämö êñëninque tömengä oda cæbaingampa, ante cædinque Itota ingante apænedinque, Bitö, Pönencædänimpa, ante ðönædê mä cæi bai cæbi amönie. ² Änäni êñëninque tömengä wæætê,

—Minitó iñæmpa gæwadecæ iñonte æmö adinque, “Baänæ watamö bacæ wiñadæ pönî gongæmpa,” ante do êñëminipa. ³ Ayæ ñäö bayö edæ, “Cönæ cæcæ guinæ wepæ bai gongæmpa,” äninque minitö, Öönæ æbänö êönæpa, ante adinque do edæ êñëminipa. Ìninqe, Wængongui quinö cæcæ cæcampa, ante quinante wii êñëminî. ⁴ Ñöwomîni iñömö edæ nê wiwa cæmîni inte minitö Wængongui ingante pangocæte bai emö cæte gomîni iminipa. Edæ, Mä cæte odömömi adinque pönëmaimönipa, ante ancaa ämîni awædö. Incæte Cönäö wodi mä pönî nänö cægälnö ante adinque minitö pönenguënemîni iñöminite mäninque mîni aquinque ante odömönte ingæimpa.

Äninqe Itota tömönäni inänite emö cæte wadæ edæ gogacäimpa.

Wapiticæ nani apænedö yedæ æmpoquï bai impa, ante

(Mäadoco 8.14-21)

⁵ Tömengä miñæ nê godäni guiquênê tao gocæ cædinque päö wii pönente æñämai inte æmæmäa tao ti wæænänitapa. ⁶ Itota iñömö mäniï päö tömönäni nani æñämai inö ante wii tededinque wadö ante pönente iïmai apænecantapa.

—Päö yedæ æmpoquï, ante Paditeoidi tönö Tadoteoidi nani da wente cæi ate gomö aedäni.

⁷ Angä êñente wædinque tömengä nänö nê emiñænäni wæætê nani caboque tededinque,

—Päö ænte pönämai imöimpa, ante Itota wabänö mänömai beyæ ämaingampa.

⁸ Ante nämæneque tededäni wædinque Itota iñömö,

—Mîni pönëegade. Päö æñämai inte mîni pöninö ante quimæ tedewëminî.

⁹ Awincaque adinque adämai imînitawo. Edæ päö ðonmpo æmæmpoque æninqe botö godömo æninqe tinco müdo ganca inäni nani cænîno ante awincaque adimîni inte minitö mümöno pönënamä imîni awædö. Ayæ cænte ate nani wææntodönincoo wente ænte mîni contadinö iñömö cængui æpotodönö ongotawo, ante pönëminiyaa.

¹⁰ Ayæ ate botö ðonmpo æmæmpoque go mæa botö ænte godömo æninqe coatodo müdo ganca inäni nani cænîno ante adinque minitö iñömö edæ êñënamä imînitawo. Ayæ edæ ñænæ otodê mîni wente ænte contadinö cængui æpotodönö ongotawo, ante pönëminiyaa. ¹¹ Mänîno ñöwo botö, Gomö aedäni, ante wææ æninqe botö wii päonque ante apænetabopa, ante quinante wii êñëminî. Incæte botö, Päö yedæ æmpoquï, ante Paditeoidi tönö Tadoteoidi nani da wente cæi ate gomö aedäni, ante wææ ämpa.

¹² Angä êñente pönente wædinque tömönäni, Gomö aedäni, ante apænedinque Itota wii ðonque päö da wente cæinque ante wææ angampa. Wæætê edæ Tadoteoidi tönö Paditeoidi wapiticæ ante nani odömönte apænedö ante tömengä, Gomö aedäni, ante wææ angampa, ante do êñënanitapa.

Bitö Coditobi inömi imipa, ante Pegodo angampa

(Mäadoco 8.27-30; Odoca 9.18-21)

¹³ Mänîï Ìmæmäa tate ate Tetadea Pidipobæ eyequei pöninque tömengä miñæ nê godäni inänite apænedinque Itota,

—Botö Waobo êñägäimo iñömöte wadäni botö imotedö ante tededinque, Æbodö imoo, ante apænedäni êñëminî.

¹⁴ Åñongante tömönäni wæætê apænedänitapa.

–Bitö imitedö ante apænedinque pancadaniya, Æpænê nê guidongaingä Wäo wodi incæ Itota adocä imaingampa, ante tededäniya. Wadäni guiquênê, Ediya wodi incæ Itota inongä imaingampa, ante apænedäniya. Wadäni guiquênê, Eedëmiya wodi ingampa, ante apænedäniya. Ayæ, Wii Eedëmiya ingä ininque Itota Wængongui beyæ nê apænegainäni iñönänite adocä imaingä ingampa, ante tededäniya.

¹⁵ Ante tömengä miñæ nê godäni apænedäni êñëninque Itota wæætê,
–Minitö diyæ, Æbodö imoo, ante pönëminii.

¹⁶ Äñongante Timönö Pegodo wæætê,
–Wængongui nê quëwengä Wëmi ingaimi inte bitö iñömö Coditobi inömi imipa.

¹⁷ Ante apænegä êñëninque Itota iñömö,
–Timönö bitö Öönata wëmi inömi inte êñëmi. Wii waocä apænegä beyæ bitö mänömainö ante êñëmitapa. Wæætê bitö nangui toquinque edæ botö Mæmpo öönædê nê quëwengä incæ bitö imite pönö odömönte apænegä êñëmitapa. ¹⁸ Ayæ edæ iñäi ante bitö imite ämpa. Bitö dicamö bai inömi imipa, ante pönëninque botö bitö êmowo ante Pegodo pönö pemömo êmömipa. Incæte dicabo tæimö i bai bitö nö äninö iñömö edæ tæine i iñonte botö mänimoga tæi mænonte bai pönö badömo ate minitö mini pönencabo bacæminimipa. Ininque minitö, Itota nê Codito ingampa, ante mini pönencabo iñömö tæi êmömüni badinque mänimoga tæi ongote bai wede pönëñömünite nê tæi piñænäni tadömengadænguipo owote ta pönäni incæ ædö cæte godömenque mämö bæ taquänäni. ¹⁹ Edæ öönædê Awënë Odeye nempo guiquinque ante odemö wi ænequi bai botö bitö imite pönömö æncæbiimipa. Æmi ate bitö nê ämi badimi inte inguipoga bitö wææ änö incæ öönædê dobæ wææ angainö inte ongongæimipa. Ayæ bitö quëwë inguipoga ñimpo cæbi i iñonte mänüi adobai öönædê dobæ ñimpo cæte ongongæimipa.

²⁰ Ante iinque apænedinque Itota tömengä miñæ nê godäni inänite iñainö ante wææ angantapa. Minitö iñömö botö imotedö ante apænedinque, Codito inongä ingampa, ante gode änamai inte edæ pæ wëneedäni, angacäimipa.

Itota, iñäi cædäni wæncæboimpa, ante apænegacäimipa

(Mäadoco 8.31-9.1; Odoca 9.22-27)

²¹ Ayæ Itota mäniñedê mä odömöninque tömengä miñæ nê godäni inänite apænedinque, Botö cöwë Eedotadêë goquênëmo imopa, angantapa. Gobo ate odoeidi nê aadäni nani Picæncabo tönö, Wængongui qui, ante nê godönäni ñænænäni tönö nê odömönäni tönö

godongämæ cædinque botö imote wënæ wënæ cædäni wæwæncæboimpa. Ayæ botö imote godömenque wænönäni wæncæboimpa. Incæte Wængongui angä beyænque botö mëöna go adoönæque iñonte edæ ñäni ömæmonte quëwæncæboimpa, ante apænegacäimipa. ²² Mänömainö ante apænegä êñëñönäni Pegodo guiquênê Itota ingante nänênê mäo godinque Itota ingante piingantapa.

–Awënë, quimæ wæncæ änewëë. Wængongui pönö wææ aacä beyæ bitö caate wædämai incæbiimipa.

²³ Ante wææ äñongante Itota dadi êmæninque Pegodo ingante näëmæ piiniquë,

–Bitö Tatänabi bai inömi inte edæ botö weca ongönämai wadæ gobäwe, angantapa. Bitö wii Wængongui nänö pönëno ante pönëmi inte wæætê edæ waodänique nani pönëwënö bai pönëninque mänömainö ante bitö botö imote ægodawaqui ñonote bai cædinque wææ änewëmi awædö, angacäimipa.

²⁴ Ayæ tömengä miñæ nê godäni inänite apænegacäimipa.

–Æcänö botö miñæ pöinëna ina tömengä iñömö nämä beyæ ante pönënamai inte edæ botö miñæ tee empote poncæcäimipa. Nämä nänö wænguiwæ mongante ponte bai cædinque tömengä, Botö wæmo incæ caate wæbo incæ Itota ingante cöwë tee empote gocæboimpa, ante poncæcäimipa. ²⁵ Edæ æcänö, Nämä wææ gompodinque quëwæncæboimpa, ante cædinque botö miñæ pönämai ingä guiquênê tömengä iñömö edæ quëwënämai incæcäimipa. Wæætê edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquênê tömengä wæætê quëwæncæcäimipa. ²⁶ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba iinque edæ tömengä nänö ömæwocate wæquinque æmaingampa. Inæmpa eyepæ godongampa diyæ önöwoca wæætê æmaingää.

²⁷ Ante Itota iñömö, “Edæ botö Waobo êñagaïmo inte botö Wæmpo ñäö tömäo guinæ gongæñonte botö edæ botö anquedoidi tönö edæ godongämæ poncæboimpa. Ayæ pömo ate botö tömämini minitö cægai ganca ante eyepæ pædæ pönömö æncæminimipa. ²⁸ Edæ näwangä ämpa. Minitö iñömö ongömini pancaminiya iñömö ayæ wænämai mümini quëwëñömüni botö Waobo êñagaïmo inte Awënë Odeye bate ponte a ongömo adinque minitö botö nempo quëwæncæminimipa,” ante Itota apænegacäimipa.

17

Itota waēmō pōni nāō bai ēmongā bacā adānīpa

(*Māadoco 9.2-13; Odoca 9.28-36*)

¹ Mānīnō ante apæneca ate Itota ōnompō æmæmpoque go adoōnæque iŋonte Pegodo ingante ayæ Tantiago tōnō Wāō nāna caya inate mānimpodāni inānite ānanquidi mæicā adodānique æigadānīpa. ² Æite ongōñōnāni edæ Itota awinca tōmēnāni ayōnāni edæ wīl cōwē nānō ēmōnō bai waēmō pōni nāō bai edæ ēmongā bamongā adānitapa. Edæ nænque tī nāwante nāō bai bate ēmongā iŋinque tōmēngā weocoo nāāmænta nāō incōo ēñacā adānitapa. ³ Ayæ ayōnāni edæ doyedē pōni nē æigaina iŋōmō Mōitee wodi tōnō Ediya wodi incæ iŋontobæ a ongōnīnque Itota tōnō godongāmæ tedeğōnāni. ⁴ Adinque edæ Pegodo guiquēnē Itota ingante apæneçantapa.

—Awēnē ēñēmi. Iŋōmō mōnō waa pōni ongonte awædō. Bitō Ao āmi iŋinque botō oncontaicoo mentaiya go adotaique mænōnīnque bitō oncontai ante adotaique Mōitee oncontai ante adotaique Ediya oncontai ante adotaique mænōmāimōpa.

⁵ Ante ayæ tedepongā boguimāmo waēmō pōni ocabogadāni obo wææniŋque guinæ gongæ ayōnāni boguimāmodē ōnōnepāmoque apæneçantapa.

—Iŋgā iŋōmō botō Wēngā iŋongā inte botō nē waadegaingā iŋongā ingampa. Tōmēngā ingante adinque botō watapæ tobopa. Mīnitō tōmēngā pōnō apæneca ēñēdāni.

⁶ Angā wædinque tōmēngā mīñæ nē æidāni iŋōmō ancai guīñēnīnque do do wāate bai cædinque guidōmēmæ tæ go wæænānitapa. ⁷ Go wæænāni adinque Itota tōmēnāni weca ponte godō gampodinque,

—Guīñēnāmai inte ængæ gantiedāni, angantapa.

⁸ Ayæ æmō ayōnāni Itotaque adocanque onongā agadānīpa.

⁹ Ayæ ānanquidi iŋō wææ pōñōnāni Itota tōmēnāni inānite angantapa.

—Mīnitō mā pōni botō ēmōnō wīlmonite bai mīni adīnō ante gode ānāmai pæ wēneyōmīni botō iŋōmō Waobo nē ēñagaīmo inte edæ wænte ate nāni ōmæmoncæboimpa. Nāni ōmæmōmo ate mīnitō edæ māñīfēdē ate apæneccæmīnīpa.

¹⁰ Angā ēñente wædinque tōmēngā tōnō nē æidānāni tōmēngā ingante ānānitapa.

—Mānōmai i iŋinque, Ediya wodi tāno poncæcāimpa, ante nē odōmōnāni iŋæmpa quīnante apænedāni.

¹¹ Āñōnāni Itota wæætē,

—Ediya wodi nāni ānongā iŋōmō tāno pongā ingampa. Nāwangā impa. Pōnīnque tōmēngā, Doyedē ingāi bai nōwo wæætē adobai bacæimpa, ante badongampa.

¹² Botō wæætē iŋimānō ante apænebo ēñēdāni. Nōwocā mōnō Ediya iŋongā inte do pongāimpa ante aquēnē. Do pōningā ingante edæ awincaque adinque, Æcānō ingāā, ante ēñēnāmai inte cædāni guiquēnē quiēmē nāni cæinēnō incæ edæ do cædānīpa. Ayæ adobai, Tōmēngā ingante nāni cædi bai botō Waobo ēñagaīmo iŋōmote botō imote adobai wēnæ wēnæ cædāni wæcæboimpa, ante apænebo ēñēdāni.

¹³ Ante apæneca ēñēnīnque tōmēngā tōnō nē æidānāni iŋōmō edæ, Apæne mōnō guidōningā Wāō ingantedō ante apæneçantapa, ante tæcæ ēñēnāni inte wægadānīpa.

Itota wēnæ ingante angā go ate wēñængā waa bacampa

(*Māadoco 9.14-29; Odoca 9.37-43*)

¹⁴ Mānīl ānanquidi æidānāni inte adodō wææniŋque nangui pōni ināni weca pōnāni adinque wacā onguīñængā Itota weca ponte da guicapodinque angantapa.

¹⁵ —Awēnē ēñēmi. Botō wēngā onguīñængā ingante waadete waa cæe āmōpa. Tōmēngā iŋōmō edæ anca quidi quidi dowænte wæwēniŋque wantæ wantæ iŋō gongapamō tæ wææ tæ wææ cæcampa. Ayæ apæne tæi guī tæi guī cæcampa. ¹⁶ Ante wædinque, Botō wēngā ingante pōnō cæmīni waa bacæcāimpa, ante botō bitō mīñæ nē godāni weca ænte pōmo adinque tōmēnāni ædō cæte cæquīnāni.

¹⁷ Āñongante Itota tōmēnāni inānite,

—Nōwōmīni mīni ædæmō cædāmai incabo mīni pōñēgade impa, angantapa. Mīnitō weca æpogadō quēwēmoī. Wapiticæ cæmīni iŋōmīnīte æpogadō piyænē cæte wæwēmoī. Edæ wēñængā ingante iŋōmō botō weca ænte mānōmīni pongædāni, angantapa.

¹⁸ Ayæ wēnæ ingante piīnīnque Itota, Tao gobāwe, angā tao gocā ate wēñængā iŋōmō dobæ waa bacantapa.

¹⁹ Ayæ æte tōmēngā mīñæ nē godāni adodānique Itota weca pōnīnque tōmēngā ingante,

—Mōnitō guiquēnē bitō bai wido cæcæ cædinque edæ quīnante wido cædāmai intamōnīi.

²⁰ Ante wæyōnānīte,

—Wedē pōñēmīnīpa diyæ wido cæquīmīnīi. Edæ mīni pōñēnō mōotatamō bai guiyā pōni ēwocamīni iŋinque mīnitō ānanquidi iŋōmō ongonquidi adinque, Nānēnē gobāwe, ante āmīni bai edæ ānanquidi incæ do gā gote wayōmō gongæncædōnīpa. Edæ quiēmē cæcæte ante āmīni iŋinque tōmānō edæ do cæte babaimpa, ante nāwangā apænebo ēñēdāni. ²¹ Incæte mānīl wēnæ inte wido cæcæte ante cædinque cænguī wantæpiyæ cænāmai inte Wængonguī ingante apænete

ate edæ wido cæqui impa, ante Itota apæneceā ēñēnānitapa.

Wænōnāni wæncæboimpa, ante Itota adodō ante apæneceā

(Māadoco 9.30-32; Odoca 9.43-45)

²² Mānī Gadideabæ pōnīnque godongāmæ goyōnānite Itota īmāinō ante apæneceantapa. Adocanque, Waocā nē ēñagaingā īñōmō æyōmōnō ongongāā, ante godō odōmōnīnque botō īmote waodāni nempo pædæ godongā æncædānīmpa. ²³ Nē ænāni wæætē botō īmote wænōnāni nāñe wæncæboimpa. Ayæ mēōnaa go adoōnæque īñōnte edæ Wængonguī angā beyænque botō edæ fāni ōmæmonte quēwæncæboimpa.

Itota mānōmāinō ante apæneceā ēñēnīnque tōmēngā mīñæ nē godāni wæætē edæ nan-guī wæwente bagadānīmpa.

Wængonguī oncō beyæ, ante Itota eyepæ godongampa

²⁴ Mānī pōnīnque tōmēnāni Itota tōnō godongāmæ Capēnaōmō nāni quēwēñōmō pōñōnāni wadāni guīquēñe Wængonguī oncō beyæ ante tiguītamō didacōma nāni ānontamō mentamonga ante nē ānōnāni inte Pegodo weca ponte ānānitapa.

—Mīnitō Awēñe nē Odōmongā guīquēñe Wængonguī oncō beyæ ante didacōma tiguītamō cōwē pōñōnāmai ingantawo.

²⁵ Āñōnānite Pegodo,

—Cōwē nē pōnongā ingampa.

Ānīnque oncōnē pō wāānē guīyongante Itota tāno apæneceantapa.

—Tīmōnō, æbānō ante pōñēmīi, angan-tapa. Īmæca nē quēwēmō mōnō eyepæ ænte quēwēngāīmpa, ante Īmæca awēñe odeyēidi īñōmō edæ tōmēnāni nempo nē quēwēñāni īnānite, Pōnōmīni æmoedāni, ānānitawo. Wæætē edæ wadāni īnānite ānānitawo. Ēdānidō īnānite ānāni, ante pōñēmīi, ante Pegodo ingante Itota angantapa.

²⁶ Āñongante Pegodo,

—Wadāni īnānite ānānīpa.

Ante apæneyongā Itota wæætē edæ,

—Mānōmai ī īnīnque edæ mōnō Awēñe Wængonguī nempo nē quēwēñōmō inte wīi godonguēñēmō īmōpa. ²⁷ Incæte wīi pīinte bacædānīmpa, ante botō īmai āmōpa. Nē gāwapāa māo dadonte wēā tadōñōmī gæyæ tānocā tacā æe. Ānīnque gæyæ ōñōneca wī ænete ayōmī adotamonīnque incæ coatodo didacōma ēmontamō incæ edæ gæyæ ōñōne ongontamō adīnque bitō tadonte æncæbiīmpa. Mānīntamō ænte māo bitō beyæ botō beyæ eyepæ godōmī æncædānīmpa, angā gote Pegodo cægacāīmpa.

18

Æcānō ñæcængā inte nē angā inguingāā, ante tededānīpa

(Māadoco 9.33-37; Odoca 9.46-48)

¹ Māñīñedē Itota mīñæ nē godāni tōmēngā weca ponte apænedīnque,

—Bitō ōñnædē Awēñe Odeye īnīnque bayōmī æcānō bitō nempo quēwēñīnque ñæñængā pōñī īnongā inte nē angā inguingāā, ānānitapa.

² Itota īñōmō wēñængā guīyangā ingante edæ aa pecā pongā ate tōmēngā ingante tæcæguedē goncædīnque tōmēnāni īnānite wæætē apæneceantapa.

³ —Nāwangā āmo ēñēdāni. Mīnitō ōñnædē Awēñe Odeye nempo guīcæte ante wapitīcæ mīni pōñewēñō wido cædīnque wēñæñāni nāni pīyæñe cæte pōñēñō baī pōñēdāni. Māñōmai cædāmai īmīni īnīnque Awēñe Odeye nempo cōwē guīdāmai inte wæbāīmīnīpa. ⁴ Incæte īngā wēñængā, Ōñōmoque īmōpa, ante pōnēngā baī æcānō adobāinō ante pōñente quēwēna guīquēñe tōmēngā īñōmō edæ ōñnædē Awēñe Odeye nempo quēwēñīnque ñæñængā pōñī inte edæ nē angā ingampa. ⁵ Ayæ æcānō botō ēmōwo apænedīnque māñīngā baī wēñængā ingante, Pōe, ante godō waa cæcā īñōmō tōmēngā īñōmō edæ botō īmote edæ do, Pōe, ante pōñō waa cæcā ingampa, ante Itota apænegacāīmpa.

Wacā oda cæcæcāīmpa, ante nāni wæcquinque cædānīpa

(Māadoco 9.42-48; Odoca 17.1-2)

⁶ Itota ayæ apæneceantapa. “Wadāni godō cædāni beyæ botō īmote nē pōñēñāni incæ pancadānīya edæ dobæ oda cæte wēnæ wēnæ cædānīpa. Īnīnque, Wēñængā adocanque guīyangā pōñī īngā incæ oda cædāmai incæcāīmpa, ante wæcæ cæcæte ante cædīnque nē godō cæcæ cædīngā ingante īmai cædāni īnīnque tōmēngā toquēnēngā īmaingampa. Waodāni nāni dacæ godō dacæ godō cæcquinca ñæñæncæ ænīnque tōmēngā ōñōmenca æ wēmencadīnque tōmēngā ingante tæcætībæ wido cædāni īnīnque tōmēngā edæ, Wēnæ wēnæ cædāmai inte becadote wæmo beyænque Wængonguī botō īmote wīi godōmenque pangampa, ante wædīnque waa toquēnēngā īmaingampa. ⁷ Quīēmē beyæ oda cædīnque īngūipoga quēwēñāni nāni wæcquinque wēnæ wēnæ cædānīpa. Nē pōñēñāni incæ pancadānīya wīi ēñēnte do oda cædānīpa. Cōwē māñōmai īmpa. Incæte, Oda cæcæcāīmpa, ante nē cæcā īñōmō edæ tōmēngā nanguī nāno caate wæcquinque cæcampa,” ante apænegacāīmpa.

⁸ Ayæ, “Bitō ōñompoca cædīnque wēnæ wēnæ cæbi īnīnque ōñompo aa wī æpote wido cæte baī cædīnque wēnæ wēnæ bitō

cædinō ante wido cæbāwe. Bitō ōnōwa wæpiticæ godinque wēnæ wēnæ cæbi īninque bitō ōnōwa aa wi æwate wido cæte bai cædinque wēnæ wēnæ bitō cædinō ante wido cæbāwe. Īnæmpa inguipoga quēwēninque bitō æmæmpoque empobi incæte æmæntique entibi incæte bitō ōōnædē æidinque cōwē wænāmaī quēwēmi īninque waa īmaīmpa. Edæ tipæmpoga empobi inte tipæntiya entibi inte edæ bitō gonga cōwē bæcote wæwenguiñōmō wīl æmæwo wido cæte wæquimīdō anguēnē. ⁹ Ayæ bitō awinca wiwa adinque wēnæ wēnæ cæbi īninque bitō awinca oo togæmonte wido cæte bai cædinque wēnæ wēnæ bitō cædinō ante wido cæbāwe. Īnæmpa inguipoga quēwēninque bitō æmæmonque ēmōmi inte bitō godōmenque quēwēmi īninque waa īmaīmpa. Edæ wīl tipæmonga ēmōmi inte edæ bitō tadōmengadænguipo gonga cōwē bæcote wæwenguiñōmō wīl wido cæte wæquimīdō anguēnē,” ante Itota angacāīmpa.

Bodego wē womonte ba, ante odōmonte apæncampa

(*Odoca 15.3-7*)

¹⁰ Ayæ, “Īngā guiyangā īñōmō ōnonganque ingampa, ante mīnitō adocanque ingante incæ piinte adāmaī īmæwedāni. Īnæmpa tōmēnāni īnānite nē aadāni anquedoidi incæ ōōnædē quēwēninque botō Mæmpo nē ōōnædē quēwengā awinca cōwē adānīpā cæmīni. ¹¹ Edæ botō Waobo ēñagāīmo inte edæ wē womōnāni īnānite diqui mīnte æncæte ante pōmo īmopa,” ante Itota apæncantapa.

¹² Ayæ, “Æbānō ante pōnēmīni edæ. Waocā obegaidi tiēē ganca ēacā ongōñōnāni adocanque pangocæte nānēnē gocā adinque nē ēacā īñōmō nōobenta i nōebe ganca īnāni ānāmæñē ongōñōnānite ēmō cæte diqui mīncæ wīl goqingā, ante pōnēmīni. Cōwē edæ diqui diqui mīncæ gocæcāīmpa. ¹³ Godinque nē pangocæ godingā ingante ēadente acā īninque nē ēacā waa tobaingampa. Edæ pangocæ godāmaī īnāni nōobenta i nōebe ganca īnāni īnānite adinque cōwē tocā īngā inte tōmengā tæcæ nānō adingā beyæ godōmenque tocampa. ¹⁴ Mīnitō Mæmpo ōōnædē nē quēwengā adobaingā, Guiyangā wē womonte wænāmaī incæcāīmpa, ante cōwē diqui diqui mingampa,” ante Itota odōmonte apænegacāīmpa.

Nē wēnæ wēnæ cæcā ingante piñāmaī inte waadecēīmpa

(*Odoca 17.3*)

¹⁵ Godōmenque odōmōninque Itota apæncantapa. “Bitō tōñīñacā bitō īmite wēnæ wēnæ cæcā wædinque bitō tōmengā weca gote āmi adomīnaque nānēnē gote

ongōeda. Ongōñōmīnate bitō tōmengā ingante, Mānōmaī cæbitapa, ante āmi ēñengāe. Mānōmaī āmi ēñengā īninque tōmengā waadete babaiingampa,” ante apænegacāīmpa. ¹⁶ Ayæ godōmenque apæncantapa. “Wæxētē tōmengā ēñēnāmaī inte waadedāmaī ingā īninque bitō Wængonguī angā ēñente nāni yewæmongainō bai cæe. Waocā æbānō cæcāā, ante adinque waoda mēnaa īna incæ mēnaa go adocanque īnāni incæ adoyōmō ante apænedāni īninque tōmēnāni nāni apænedō beyænque ante mōnō, Nō impa, ante ēñengæcāīmpa, ante Wængonguī beyæ yewæmongatīmpa. Īninque bitō, Mōnō adoyōmō ante apænegacāīmpa, ante waoda mēnaa īnate āmi incæ adocanque ingante āmi incæ æcāmēnque bitō tōnō godā tōmengā adoyōmō ante nōinō ante apænegacāīmpa.

¹⁷ Ayæ apænemīni ate nē wēnæ wēnæ cædingā cōwē ēñēnāmaī ingā ate wædinque bitō īñōmō, Itota nē Codito ingampa, ante mīni pōnencabo weca gote apænebi ēñenguiñāni. Ayæ tōmēnāni wææ ānāni ate tōmengā godōmenque ēñēnāmaī ingā īninque tōmengā, Nāmā cæte quēwengūmo, ante nē ēñēnāmaī cædāni bai ingampa. Ayæ, Odōmāno awēnē beyæ nē æwengā bai ingampa cæbii. Tōmengā ēñēnāmaī cæcāinō anguēnē, ante bitō edæ tōmengā ingante gomō ae,” ante Itota angantapa.

¹⁸ Ayæ apænedinque, “Nāwangā āmopa. Mīnitō inguipoga nē āmīni inte apænte āmīni īninque mīni apænte ānīnō incæ ōōnædē do bæ apænte ante impa. Ayæ inguipoga mīnitō apænte āninque ñimpo cæmīni īninque mīni cædō bai ōōnædē adobai do ñimpo cæte ingæīmpa.”

¹⁹ Ante apænedinque Itota ayæ apænedinque, “Mīnitō īmīnite īmaī āmopa, angantapa. Inguipoga mēmīnaa guēa adoyōmō pōnente apæneyōmīna botō Mæmpo ōōnædē nē quēwengā īñōmō mīna āmaī ante tōmānō cæcæcāīmpa. ²⁰ Edæ mēmīnaa īmīna incæ mēmīnaa go adocanque īmīni incæ æpōmīnimē īnōmīni incæ mīnitō adoyōmō ponte botō ēmōwo apænete ongōñōmīni edæ botō adoyōmō mīnitō tōnō godongāmæ ongoncæboīmpa,” ante Itota apænegacāīmpa.

²¹ Ayæ ate Pegodo tōmengā weca ponte āninque,

–Awēnē, botō tōñīñacā botō īmote wēnæ wēnæ cæcā adinque botō tōmengā ingante æpogadō godō ñimpo cæbo ee goqingāā. Edæ ōnompō æmæmpoque go mempoga mānimpoga ñimpo cæbo ee goqingā, āmii.

²² Āñongante Itota,

–Īnæmpa, wīl ōnompō æmæmpoque go mempogaque anguīi. Edæ godōmenque bitō ānimpoga piñāmaī inte ñimpo cæbi

ate wæætē adopoga wæætē adopoga ayæ cōwē tetenta ganca wæætē wæætē ñimpo cædinque coatodo tiento nõobenta ganca mänimpoga piñnāmaī inte ñimpo cæbi goquingā. Mānōmaī ante Itota tōmengā miññæ nē godāni inānite, Cōwē piñnāmaī inte ñimpo cæquimīni, angacāimpa.

Nē cædongā nānō waadedāmaī cædō ante odōmongampa

²³ Itota ayæ apænecantapa. “Māninō beyæ bitō ānō bai cædāni wædinque imæca awēnē odeye nānō apænte āmaī oōnædē Awēnē Odeye incæ tōmengā ingante nē ēñēmiñi imīnite æbānō apænte angampa, ante odōmōmo aquimīni, angantapa.

²⁴ Imæca awēnē iñōmō, Botō imote nē cædāni incæ botō imote debe ināni inte eyepæ pōnōnāni æncæboimpa, ante cæyongā adocanque tadento ñæñængæde nāni godonte æinta incæ diete miido ganca nānō pōnongā æni beyæ wæætē pōnōnāmaī debe ingā adinque tōmengā ingante ænte māmōnāni pongampa. ²⁵ Pongā adinque tōmengā awēnē iñōmō, Ōmæpocā inte tōmengā ædō cæte pōnongā ænguimoo, ante pōnente wædinque iimaī angantapa. Wacā ingante nē cædāni tōmengā nāni wencabo bacædānimpā, ante cædinque botō nē pōnōnāmaī ingā nāna gæncaya nāni wencabo tōmānāni inānite bæi ongonde wacā ingante godonte eyepæ ænguimoo, angā. ²⁶ Eñente wædinque edæ nē cæcā iñōmō tōmengā weca ædæ wææñinque edæ, ‘Awēnē, waadete cædinque ee abi adinque botō ayæ ate botō debe inganca tōmanta pōnōmo æncæbiimpā.’ ²⁷ Ante wæcā ēñēninque awēnē iñōmō nē cæcā ingante guæa wæte bai pōñēninque, Tōmāā edæ godonte impā, āninque godō ñimpo cæcā abæ tawænte gocantapa.

²⁸ “Incæte tōmengā tōnō wadāni nāni godongāmæ cæcabo iñōnāni wacā guiquēnē adocā ingante tiēē tigitamō ganca nānō pōnongā æni beyæ wæætē pōnōnāmaī debe inongāimpa. Adinque nē abæ tawænte godingā incæ tōmengā ingante debe ingā ingante godō yao ongonde ñimāmencate cædinque, ‘Do bitō æninta pōnōmi æmo tōō.’ ²⁹ Ante piñgā wædinque tōmengā tōnō nē cæcā inte nē debe ingā wæætē nē āningā weca da guicapodinique, ‘Bitō waadete cædinque ee abi ininque botō ayæ ate pōnōmo æncæbiimpā.’ ³⁰ Ante wæyongā edæ Baa āninque tōmengā, Tōmanta edæ cōwē pōnōmi æmo ate tabaimpā, āninque edæ tee mōnecā ongongantapa.”

³¹ “Adinque edæ tōmēna tōnō nē cædāni guiquēnē, Mānōmaī cæcā, ante wædinque piñninque awēnē weca gote, Mānōmaī cæcampa, ante wæmōnīpa. ³² Ānāni ēñēninque wēnæ wēnæ nē cædingā ingante āñecā pongā ate tōmengā ingante awēnē,

‘Botō imo nē cædāmi inte nē wēnæ wēnæ cæbitapa tōō. Iñæmpa bitō nangui āmi beyænque botō edæ, Tōmanta edæ godonte impā, ante ñimpo cæbo abæ tawænte gobitapa. ³³ Īninque botō guæa wæte pōnente cæbo bai bitō tōnō nē cæcā ingante bitō adobai guæa wæte pōñēmi bai waa incædōnimpā.’ ³⁴ Āninque awēnē āingā badinique, Tōmengā tōmanta nānō æninta botō imote adodō nānō pōnonguiganca botō, Tōmengā ingante ænte pancæminimpā, āmopa. Āninque tōmengā ingante tee mōnete oncōnē nē pānāni inānite pædæ godongā æñānipa.” ³⁵ Māninque ante odōmōnte apænēdinque Itota godōmenque apænecantapa.

–Edæ miñi waocabo iñōmīnite mīnitō wacā nānō wēnæ wēnæ cædinō ante godō ñimpo cædāmaī imīni adinque awēnē nānō apænte ānō bai botō Mæmpo oōnædē nē quēwengā iñōmō adobai mīnitō wēnæ wēnæ cædinō ante ñimpo cædāmaī inte tōmānō ancæcāimpa, ante apænecāimpa.

19

Nānōogængā ingante nāni pāmæñō ante (Māadoco 10.1-12; Odoca 16.18)

¹ Māniū Gadideabæ quēwente iinque apænete ate Itota Oododānō æmæmāa godinique Oodeabæ pongacāimpa. ² Pongā adinique nangui ināni tee empo goyōnāni tōmengā gampocā waa badānitapa.

³ Paditeoidi guiquēnē, Godō āmō ēñēninque Itota wabānō adodeque oda cædete wæcā tocæi, ante pōñēwēnāni inte tōmengā weca pōninque ānānitapa.

–Wængongui æbānō ante wææ angacāi. Wacā tōmengā nānōogængā ingante quiēmē beyænque pāmængā ininque edæ nō cæte intawo.

⁴ Ante āñōnāni Itota,

–Mīnitō iñæmpa Wængongui beyæ ante nāni yewæmōinta adāmaī inte āmīnitawo. Wēēnēñedē edæ waocā ingante nē Badongaingā iñōmō, “Onquiñængā ingampa, ante ayæ, Onquiyængā ingampa, ante badongacāimpa,” ante yewæmongatimpā. ⁵ Ayæ, “Mānōmaī beyæ waocā mæmpocā ingante ēmō cæte wāānā inante ēmō cæte godinique onquiyængā ingante, Botō nānōogængā, ante æmæwo moncæcāimpa. Īninque mēnaa ināna incæ tōmēna nāna gæncaya badinique adocanque bai bacædāimpa,” ante yewæmongatimpā. ⁶ Īninque tōmēna nāna gæncaya adocanque bai badinique nāñēnē mēnaa ināmaī inapa. Mānōmaī beyæ Wængongui, Adocanque bai inapa, ante nāna gæncaya nānō nē badongaina iñōnate waocā wæætē pango cædāmaī incæcāimpa.

⁷ Āñongante tōmēnāni wæætē,

—Ínínque, *Æmæwo* pāmæmo go-
quimi, ante *yewæmónínque* máninta bitō
yewæmóninta onquiyængā ingante godōmi
ængā ate bitō ðnonque pāmæncæbiimpa, ante
Mōitee wodi quínante wææ angacāi, ante
ēñencæte ante mōnitō wæmōnipa.

⁸ *Ānāni* ēñēnínque Itota edæ,

—*Īñæmpa*, *Mimō* ðmædēmini inōmini inte
mīnitō wēnæ wēnæ cæinēmini ĩminipa, ante
wædinque edæ Mōitee, *Nānōogængā* ingante
pāmænguīmi, ante *yewæmongacāimpa*.
Wēēñēdē ĩñōmō edæ wīi mānōmai
ingatimpa. ⁹ *Wæætē* onquiyængā wacā
ingante godō todāmai ĩñongante tōmengā
ingante nē pāmæningā ĩñōmō tōmengā
dobæ nānō towenguinque edæ wacā
onquiyængā ingante godō mongampa.
Ayæ onquiyængā pāmænte goyongā
wacā onguīñængā tōmengā ingante godō
mōnínque adobai nē towengā bacampa,
ante āmo pōnēmaimīnipa.

¹⁰ *Angā* ēñēnínque tōmengā mīñæ nē
godāni guiquēnē,

—*Īñæmpa* nāna gæncaya ĩna inte
pāmæñāmai ingæimpa, ante bitō ānō bai
nō ĩnínque edæ waocā wēmō cæcā bai waa
ĩmampa, ante pōnente wæmōnipa.

¹¹ Ante wæyōnānite Itota,

—*Wēmō* cæcā, ante mīni ānō bai ante
waocā ædō cæte cæqingāā. *Wængonguī*
nānō ānīnānique mānīnō ante Ao ante
mōnāmai ĩnānīpa. ¹² *Edæ* ædānidō mōnāmai
inguīnāni, ante pancadāniya guiquēnē
wāānā cæncadē ēñayedē edæ ongænca
babetamiñænāni ēñagāināni inte mōnāmai
ĩnāni. Pancadāniya wæætē woadāni cædāni
beyænque babetamiñænāni badínque
mōnāmai ĩnānīpa. *Ayæ* pancadāniya
guiquēnē ðōnædē *Awēnē* *Odeye* nempo
beyæ ante nāmā pōnēnínque Ao ante
edæ mōnāmai ĩnānīpa. *Edæ* æcānō
botō ānō ēñente Ao āna, tōmenganque
mānōmai cæcæcāimpa, ante Itota ððomōngā
ēñengadānīpa.

Wēñænāni ĩnānite *gampo* cæcadinque waa
apæñecampa

(*Māadoco 10.13-16; Odoca 18.15-17*)

¹³ *Ayæ* ate, *Wēñænāni* ĩnānite Itota
pōnō *gampo* cæcadinque tōmēnāni beyæ
Wængonguī ingante apæñecæcāimpa, ante
cædinque wadāni tōmengā weca ænte pō
ænte pō cædāni adínque tōmengā mīñæ
nē godāni guiquēnē, *Ænte* pōnāmai ĩedāni,
ānínque *Baa Baa* ānāni. ¹⁴ *Ate* wædinque Itota
ĩñōmō edæ,

—*Wēñænāni* ĩnānite ee amīni poncædānīpa.
Edæ mānīnāni nāni pōnēnō bai adobai
pōnēnāni inte edæ ðōnædē *Awēnē* *Odeye*
nempo do quēwēnāni ĩnānīpa. *Īnínque* mīnitō
ĩñōmō wēñænāni ĩnānite *Baa* ānāmai ĩedāni.

¹⁵ *Ānínque* wēñænāni ĩnānite pædæ gopo
gampo cæcadinque wadæ gogacāimpa.

Māincoo nē *nanguī* ēcā *Itota* *weca* *ponte*
apæñecampa

(*Māadoco 10.17-31; Odoca 18.18-30*)

¹⁶ *Ayæ* wacā Itota *weca* pōnínque,

—*Awēnē* nē *Odōmōmi* apæñebi ēñēmoe,
angantapa. Botō æbānō waa cæbo ĩnínque
cōwē wæñāmai wantæpiyæ quēwēmaimoo.

¹⁷ Ante āñongā Itota edæ,

—*Wængonguī* adocanque nē waa cæcā
ingā incæte bitō botō ĩmonte ānínque, *Æbānō*
waa cæquīmo, āmii. *Incæte*, *Quēwenguīmo*,
ante wæbi ĩnínque bitō, *Īmai* cædāni, ante
Wængonguī nānō wææ angāinō ante ēñente
cæe.

¹⁸ *Angā* wædinque,

—*Ædedō* ante āmii.

Āñongante Itota wæætē,

—*Īmai*. “*Wacā* ingante godō wæñōnāmai.
Bitō nānōogængā ĩnāmai ĩñongante godō
mōnāmai. *Wacā* quī awēmō æñāmai. *Wacā*
æbānō cæcāā, ante godō babæ wapiticæ
ānāmai. ¹⁹ *Wæmpocā* ingante wāānā ĩnante
waa adínque godō waa cæe. *Ayæ*, *Nāmā*
ante bitō waadete cæbi bai wadāni ĩnānite
adobai godō waadete cæe.”

²⁰ *Angā* ēñēnínque edēningā ĩñōmō,

—Botō mānīnō bitō ānō bai do cæte
pægāimo inte botō quīnō edæ godōmenque
cæquīmo.

²¹ Āñongante Itota wæætē,

—Bitō, *Ædæmō* nō cæbo bacæboimpa,
āmi ĩnínque edæ ðōnædē bitō waēmoncoo
ænguinque edæ ñōwo godínque ĩmæca bitō
mānīncoo tōmancoo godonte ænínque bitō
æñinta wæætē ðmæpodāni inte wædāni
ĩnānite tōmanta godōmi æncædānīpa. *Ayæ*
edæ botō ĩmote tee empote pōe.

²² *Angā* ēñēnínque edēningā ĩñōmō edæ,
Botō māincoo, ante nānō nanguī ēcāco
ante pōnente wæwente wædinque wadæ
gogacāimpa.

²³ *Gocā* ĩnínque edæ Itota tōmengā mīñæ nē
godāni ĩnānite apæñedinque,

—*Nāwangā* āmo ēñēdāni, angantapa.

Āñædē *Awēnē* *Odeye* nempo guīte
quēwencæte ante cædinque woadāni
ðmæpodāni inte botō mīñæ pōnānīpa.
Māincoo nanguī ēcā guiquēnē æbānō
cæte ðmæpocā inte botō mīñæ *ponte*
guīte quēwenguingāā, angantapa. ²⁴ *Ayæ*
cāmeyo ĩñōmō guiyangā ingampa diyæ
daagō guiyampite pædæ tacāā. *Cāmeyo*
ñænængade ĩngōngā inte pædæ tadāmai ingā
bai nē ēcā adobai ingampa. Tōmengā nāmā
ayongā ĩñōmō guiyangā ĩngōngā inte edæ æbānō
cæte *Wængonguī* *Awēnē* *Odeye* nempo do
wāānē guīte quēwenguingāā.

²⁵ Ante apæñecā wædinque tōmengā mīñæ
nē godāni wæætē ancaī guīñēnínque,

—Īñæmpa mänōmaī ī ĩninqe æcānō wäänē guuite quēwenguingāā, ānānitapa.

²⁶ Itota tōmēnāni ĩnānite cōwā adinqe apæñecantapa.

—Waomīnique incæ nāmā mīni cædō beyæñque ædō cæte quēwēmaīmīni. Wæætē Wængonguinque nāmā tōmānō do cæcā ingampa.

²⁷ Angā ēñente wædinque Pegodo guiquēñē,

—Mōnitō ĩñōmō edæ mōni ēadincoo owæ caate bitō mīñæ òmæpomōni inte pōmōni abipa. Òmæpomōni ĩmōni inte edæ quīnō ænguīmōni.

²⁸ Āñongante Itota wæætē tōmēnāni ĩnānite angantapa.

—Nāwangā āmopa. Botō badōmo ate tōmancoo mūincooque ĩnque bayonte botō Waobo ēñagaīmo ĩñōmō edæ tōmēmo ñāō ēmōnō ēmōninqe edæ pō tæ contacæboimpa. ĩninqe mīnitō botō ĩmote nē tee empogaimīni inte māññedē ate tōmēmīni tæ contaimpaa tipæmpoga go memppaa pō tæ contadinque awēñēidi badinqe edæ idægoidi tipæmpoga go mencabodāniya ĩnānite apænte ancæmīnimpa.

²⁹ “Ayæ godōmenque āmopa. Mīnitō nāwangā oncodō tao godinqe mīnitō tōññadāni ĩnānite ēmō cæte godinqe badā ĩnante næmpocā ingante wēnāni ĩnānite botō ēmōwo beyæñque ēmō cæte pōmīnitapa. ĩninqe ĩmaī ante nāwangā āmopa. Æcānō botō beyæñque mänōmaī cædinque tōmengā nānō ēadī òmæ ēmō cæte goda ĩñōmō tōmengā nānō ēmō cæte godincoo baī adopocoo æncæcāimpa. Wīī adopogaque edæ æninqe tōmengā wæætē edæ godōmenque adopocoo adopocoo æninqe tiēē ganca māñimppoga æncæcāimpa. Ayæ botō pōnō cæbo æninqe tōmengā cōwē wantæpiyæ wēnāmaī quēwēncæcāimpa. ³⁰ Incæte edæ tāno yæcado ongōñināni pancadāniya wæætē yæmīñæ gote ongōñāni bacædānimpa. Ayæ yæmīñæ ongōñināni inte wæætē yæcado ponte ongoncædānimpa,” ante Itota apænegacāimpa.

20

Nē cædāni cæbānō cædāni, ante odōmonte apæñecampa

¹ Itota ayæ edæ, Òñædē Awēñē Odeye nempo æbānō quēwēñāni, ante odōmoncæte ante ĩmaī apænegacāimpa. “Waocā nē òmæ ēacā nānō cæbaī Òñædē Awēñē Odeye incæ adobaī cæcampa. Nē ēacā ñāō bayō oncodō taodinque, Æcānō ñōwoñæ botō yowementacodē cæquīnaa. ² Ante adinqe tōmengā beyæ nē cæcædāni ĩnānite, Mīnitō tōmāā itædē cæmīni ate botō adocanque ingante deēnadio tigitamō adotamonque pōnōninqe wacā ingante

wacā ingante adotamonque pōnōmo æncæmīnimpa, āñongante Ao ante yowementacodē cæcæ godānipa. ³ Gote cæyōnāni tōmantadæ æññonte nē ēacā tōmēnāni nāni godonte æññōmō gote ayongā wadāni ònonque cædāmaī a ongōñāni. ⁴ Adinqe tōmengā, ‘Mīnitō adobaī gote cæmīni ate eyepæ godōmo æncæmīnimpa.’ Angā ēñēninqe Ao ante godānipa. ⁵ Ayæ tæcæbæcā ĩññonte adobaī tōmengā wadāni ĩnānite angā godāni ate wæætē ædæ wæicā ĩññonte adobaī taodinque wadāni ĩnānite angā godāni. ⁶ Ate edæ awæncabo wæyongante edæ adocā tao ayongā wadāni ònonque a ongōñāni adinqe tōmengā tōmēnāni ĩnānite, ‘Quīnante tōmāā itædē edæ cædāmaī a ongōmīni.’ ⁷ Ante āñongā, ‘Īñæmpa mōnitō ĩmōnē, Cæedāni, āñānipa cæquīmōni. Āñāni ēñēninqe, ‘Mīnitō adobaī edæ botō yowementacodē gote cæedāni,’ angā godānitapa,” ante Itota odōmonte apæñecantapa.

⁸ Ayæ, “Gāwædecæ pōni bayonte nē ēacā ĩñōmō tōmengā beyæ nē apæñecā ingante āninqe, ‘Botō beyæ nē cædāni ĩnānite aa pebi pōnāni ate bitō tōmēnāni nāni cædī beyæ godōmi eyepæ æncædānimpa. Awæncabo wæyongā ñōwo pōni gote cædināni ĩnānite edæ tāno godōmi æñāni ate wæætē wēñē gote cædināni ĩnānite edæ ayæ ate godōmi æncædānimpa.’ ⁹ Angā ēñente aa peyongā awæncabo wæyongā gote cædināni inte tāno pōnāni ate deēnadio tigitamō adotamonque adotamonque godongā æñāni. ¹⁰ Ate adinqe tāno gote cædināni guiquēñē, Mōnō godōmenque ænguī impa, ante pōñēñōñāni tōmengā godongā æninqe edæ deēnadio tigitamō incæ adotamonque adotamonque adopo adopo æñānipa. ¹¹ Æninqe tōmēnāni nē ēacā ingante piinte tededinqe, ¹² ‘Mōnitō tōmāā itædē nāwancate cæmōni incæ ĩñæmpa cæbii. Ayæ pōnāni guiquēñē wantæ ĩñō adoque ooda ganca cædāni incæ mōnitō baī adopo godōmi æñāni wæmōnipa tōō.’ ¹³ Ante piññōñāni nē ēacā wæætē adocanque ingante apænedinqe, ‘Īñæmpa botō bitō ĩmite wēñæ wēñæ cæbogaa. Edæ, Deēnadio tigitamō adotamonque pōnōmo æncæbiimpa, āñōmo Ao āñāmaī ĩmitawoo. ¹⁴ Bado, bitō quī incæ ænte goe. Edæ bitō æni baī ayæ ponte cædingā ingante adopo godonguēñēmo intabopa. ¹⁵ Edæ botō ēadincoo incæ, Æcānō ingante godonguīmo, ante pōnente wædinque ædō cæte tōmēmo incæ āñāmaī inguīmo. Botō nē waa cæbo ĩñōmote bitō guiquēñē edæ piinte abi awædō,’ ante nē ēacā angampa.”

¹⁶ Māninganca ante odōmonte apænedinqe Itota ĩñōmō, “Māñōmaī cædāni ĩninqe botō, Tāno yæcado ongōñināni inte wæætē

yæmiñæ gote ongoncædänimpa, antabopa. Ayæ, Yæmiñæ ongonināni inte wæætē yæcado ponte ongoncædänimpa, ante apænetaþopa,” ante apænecacäimpa.

Itota, Wæncæboimpa, ante wæætē adodō ante apænecä

(*Mäadoco 10.32-34; Odoca 18.31-34*)

¹⁷ Mänüi godinque Eedotadēē gocæ cædinque tömengä miñæ, Dote, ante nāni gocabo inānite Itota nānēnē ænte mäodinque idömæ goyönāni apænecantapa.

¹⁸ –Nōwo iñömō edæ mōnō Eedotadēē iñömō æicæimpa. Æi gote ongömō ate adocanque, Waocä nē ēñagaingä æyömönō ongongä, ante wadāni inānite godō odömongä bæi ongonguināni. Ayæ, Wængongui qui, ante nē godönāni ñænænāni tönō nē odömonāni nempo tömengä botō imote pædæ godongä æninque tömēnāni wæætē botō imote apænte æninque, Cōwē wæncæcäimpa, ancædänimpa. ¹⁹ Ayæ edæ, Awæ ñænquedimæ cædinque tömengä ingante timpote wænödæni, ante tömēnāni oodeoidi ināmai ināni nempo botō imote wæætē mäo godönāni æncædänimpa. Æninque tömēnāni wæætē botō imotedō ante badete todirque ayæ tæi tæi pāninque awāa timpodāni wæncæboimpa. Nāñe wæmo ate Wængongui angä beyænque botō mēönaa go adoönæque iñonte ñāni ömæmoncæboimpa, ante Itota apænecacäimpa.

Tantiago tönō Wäö badä, Botō ämai ante cæe, angampa

(*Mäadoco 10.35-45*)

²⁰ Tebedeo wēna Wäö tönō Tantiago iñōna tömēna badä iñömō tömēnā wēna tönō Itota weca ponte ædæ wææninque edæ, Botō ämai ante cæe, ante apænecä. ²¹ Eñēninque Itota,

–Mīnō quīnō apænecæte ante pömü.

Äñongante,

–Bitō Tæiyæ Awēnē Odeye bate tæ contadinque edæ botō wēñæna inate ämi ate adocanque bitō tömēmæmi inō adocanque dipæmæmi inō tæ contaquīna ämopa, angantapa.

²² Eñēninque Itota wæætē,

–Iñæmpa adāmai inte mīnitō ämīni awædō. Botō nantate wæwenguimæ bai becabo bai mīnatō edæ adotaca becate bai Ao ante botō beyæ nantate wæwenguimīnaa. Edæ æpænē guite bai botō wænguimæ bai guñēnāmai imīnapa diyæ botō beyæ wænguimīnaa.

Äñongante,

–Ao ante guñēnāmai cæcæmönaimpa, änatapa.

²³ Itota wæætē,

–Botō nanguī caate wæwēmo bai mīnatō adotaca bete bai änanque bai caate

wæcæminaimpa. Nāwangä impa. Incæte æcänō botō tömēmæ inō æcänō botō dipæmæ inō tæ contaquīna botō edæ pönō änāmai imopa. Wæætē botō Mæmpo do, Mäninaque mänimpaa tæ contaquīna, ante nē badongaingä inte tömengä adocanque godō angä contaquīna, ante Itota apænecacäimpa.

²⁴ Mänömainō ante tededapa töō, ante eñēninque wadāni diete ganca tömengä miñæ nē godāni guiquēnē iñāna nāna caya inate edæ pīinānitapa. ²⁵ Pīināni iñinque Itota aa pecä pönāni ate tömēnāni inānite iñmai apænecantapa.

–Oodeoidi ināmai ināni awēnēidi æbänō cædänipa, ante do eñēmīnipa. Tömēnāni iñömō nāmā beyænque ante cædinque nanguī piinte änāni wædinque tömēnāni nempo quēwēnāni wæætē do eñente cædänipa. Ayæ tömēnāni weca nē ñænænāni inönāni iñömō, Tömēmoque ämo eñente cædäni, ante piinte änāni wædänipa. ²⁶ Mīnitō guiquēnē tömēnāni nāmā beyænque ante nanguī änāni bai wīi adobaī cæquēnēmīni imīnipa. Wæætē mīni cabo iñömīni adocanque ñænængä pönī ingä bacæte ante cædinque tömengä wæætē edæ mīnitō beyæ nē cæcä baquēnengä ingampa. ²⁷ Ayæ yæcado ongöinente wæcä iñömō tömengä yæcado ongoncæte ante cædinque wæætē edæ yæmiñæ pönī gote tömānāni inānite nē cæcä badinque tömengä nāmā beyæ ante cædāmai inguēnengä ingampa. ²⁸ Edæ Waobo eñagaīmo inte adobaī, Botō beyæ pönō cæcædänimpa, ante wīi pōmo imopa. Wæætē wadāni beyæ godō cæcæte ante pōmoimpa. Ayæ edæ nanguī ināni tee mönete bai wæwēñönāni botō wæætē, Tömēnāni wibænete tacædänimpa, ante tömēmo wepæ incæ godoncæte ante pōmo imopa, ante Itota apænecacäimpa.

Babetamöna iñönote Itota gampomongä waa bamönapa

(*Mäadoco 10.46-52; Odoca 18.35-43*)

²⁹ Itota mäninō godinque Eedicoo nāni quēwēñömō ponte tayönāni tömengä miñæ nanguī ināni tee empote godänitapa. ³⁰ Goyönāni onguñæna babetamöna iñömō taadō wedeca tæ contate a ongöñōna, Itota pongampa, änāni eñēninque aa pedatapa.

–Awēnē, bitō Dabii wodi pæimi inōmi inte mönatō imönate pönō waadete waa cæe.

³¹ Ante äñōna godongämæ godāni guiquēnē, Apocænē inguēnē quēwēnaa, änāni incæ godömenque yedæ aa pedinque,

–Awēnē, bitō Dabii wodi pæimi inōmi inte mönatō imönate pönō waadete waa cæe, änatapa.

³² Itota iñömō næ gongæninque äñecä pōna adinque,

–Mīnatō imīnate quīnō cæbo ämīnaa.

³³ Angä eñēninque,

—Awënë gampomömi awinca wi ænete bai aquimöna, ante wæmöna.

³⁴ Äñöna Itota tömëna godongämæ wæte bai pönëninque edæ pædæ gopo gampomon-gantapa. Gampomongä ate tömëna waa ada badinque Itota miñæ do godatapa.

21

Itota Eedotadëë iñömö pongampa

(Mäadoco 11.1-11; Odoco 19.28-40; Wäö 12.12-19)

¹ Mänii gote Eedotadëë obo pöninque Odi-bowæñquidi ontacamö goimö Betapaguee nani quëwëñömö ganca pöñöñäni Itota tömengä miñæ nê goda mënaa inate da godöñinque angantapa. ² Tömëna inate,

—Mänii nani quëwëñömö ongö amina. Tömëñömö go guite ayömïna bodo on-quiyæ nana wencaya ñäni ñæi a ongö acämïnaimpa. Nani ñæi a ongö adinque minatö mänina inate ñi cæyænte botö weca ænte pöda. ³ Ayæ minatö iminate wææ äñäni ëñëninque minatö wæætë edæ, Awënë nänö ænguënenö ante ænte gomönpa, ante apæneeda. Ayæ, Tömengä ñinque cæte ate do da pönongä æncämïnaimpa, ante apæneeda, angantapa.

⁴ Do iñömö Wængongui beyæ nê apæneecä iimainö ante nänö apænegainö ante edæ ñinque baccæimpa, ante mänömai cætimpä.

⁵ “Tiño iñömö quëwëñäni inänite iimäi äedäni,

Badogaa, minitö Awënë Odeye ñöwo minitö weca pongä aedäni.

Edæ monö mäincoo mongæwënongå bodo wengäa tæ contate monö Awënë pongampa.

Tömengä gänë pönengä inte bodoga contate pongä aedäni, ante ancämïnaimpa.”

Ante docä nänö apænegainö ante ñöwo ñinque cætimpä.

⁶ Mänömainö ante angä ëñente godinque tömengä miñæ nê goda iñömö Itota nänö äñinö bai do cædinque, ⁷ bodo nana wencaya inate toi toi ænte pöñinque tömëna we-coo yabæcooque æidämæ wo cæyabæda ate Itota wæñömëñæca inö æi yiyæ tæ contacantapa. ⁸ Adinque edæ nangui inäni, Itota nänö ponguinö, ante tömëñäni wecoo yabæcooque ñö cædinque bee podöwayönäni wadäni guiquëñë gönea gote yæpæma öñabo tapænte mämö bee bee podöwadäni ate tömengä podöwainonque gocantapa. ⁹ Gocä adinque täno godäni tönö ayæ pönäni tönö godongämæ godinque nangui inäni yedæ äñinque,

—Bitö Awënë Dabii wodi pæimi inömi inte pömi adinque, Möni quëwënguinque impa, ante, Badogaa, ante tomönipa. Awënë Wængongui ëmowo beyænque pömi ñinque bitö toquinque edæ Wængongui bitö imite

waa cæcæcäimpa. Ayæ öönædë iñömö adobai, Badogaa, möni quëwënguinque, ante ingæimpa.

¹⁰ Ante mänii cædinque pöñöñäni, Itota Eedotadëë pongä adinque mäniiñömö quëwëñäni ancai guiñëninque,

—Mäningä æcänö ingäa.

¹¹ Ante wæyönäni godongämæ pönäni iñömö,

—Itota ingampa. Tömengä iñömö Wængongui beyæ nê apæneecä inongä inte Gadideabæ Näatadeta quëwente pongä ingampa, ante apænegadänimpa.

Wængongui oncö tæiyæ wæmö baccæimpa, ante cæcä

(Mäadoco 11.15-19; Odoco 19.45-48; Wäö 2.13-22)

¹² Itota iñömö Wængongui oncö ñænæncönë yabæcönë pö guidinque mäniiñömö mäincoo mänäni tönö wadäni nê godonte æñäni tönö ongönäni adinque tömengä tömänäni inänite, Oncodo taoedäni, äñinque da tadongä oncodo tao godänitapa. Ayæ campio ante nani godonte æimpa tönö equemö godoncæte ante nê mänäni nani cönöimpa tönö bæ tacä tömampaa guidömëmæ tæ go wææntapa. ¹³ Ayæ tömëñäni inänite angantapa.

—Wængongui beyæ iimainö ante yewæmongatimpä. “Waodäni botö oncönë pö guidinque botö imote apæneecädänimpa,” ante Wængongui angä incæte minitö wënæ wënæ cæmïni beyænque Wængongui oncö incæ nê awëmö ö æñäni nani womöincönë bai wentamö bapa töö.

¹⁴ Äñinque Itota ayæ Wængongui oncö ñænæncönë yabæcönë ongöñongä pæ opa pæ opa godäni tönö babetamönäni tömengä weca pönäni adinque tömengä godö cæcä ate waa badänitapa. ¹⁵ Mänömai mä cæcä waa badäni ate wædinque, Wængongui quï, ante nê godönäni ñænæñäni tönö nê odömönäni guiquëñë piinte badänitapa. Ayæ wëñænäni Wængongui oncö ñænæncö yabæque ongöñinque yedæ äñinque, “Badogaa, Awënë Dabii pæimi inömi adinque möni quëwënguinque impa,” ante Yæ äñänitapa. Äñäni ëñëninque nê godönäni ñænæñäni tönö nê odömönäni ængui badinque ¹⁶ Itota ingante äñänitapa.

—Wëñænäni æbänö äñäni ëñëñämai imitawo.

Äñönäni Itota,

Do ëñëmopa. Ñænampa minitö guiquëñë Wængongui beyæ ante iimainö ante yewæmonte ongö adämai inte änewëmïnitawo.

“Bitö tæcæ ëñädäni tönö goömæ nê gänäni inänite apænebi ëñente, tömëñäni Ao ante nö pönï tededinque,

Wængongui tæiyæ waēmō ingānō, ante wat-apæ apænedānīpa.”

Mānōmāinō ante yewæmonte i apa ānewēmīnīi.

¹⁷ Ānīnque Itota edæ tōmēnāni inānite ēmō cæte wadæ godīnque Betānia nāni quēwēñmō gote mongacāimpa.

Iigowæ ōmæcawæ i adīnque Itota pūngampa

(*Māadoco 11.12-14, 20-26*)

¹⁸ Nāō bayō Eedotadēē nāni quēwēnō gāmēnō adodō pōnīnque Itota gæwæante wæcantapa. ¹⁹ Gomō adīnque iigowæ a ongō ponte ayongā ōñaboque ēmæ adīnque,

—Ōmæcabi īmi cōwē incadāmaī incæbiimpa.

Āñongā iigowæ incæ guīñē wænīmpa.

²⁰ Guīñē wæ adīnque tōmēngā mīñæ nē godāni īñōmō,

—Quīmæ iigowæ īñontobæ guīñē wæ amō.

²¹ Ante wæyōnāni Itota īñōmō edæ,

—Nāwangā ante mīnitō īmīnite apænebopa. Wīī æmæ pōnēmīni inte wede pōnēmīni īnīnque mīnitō iigowæ inte botō cæbaī adobaī do cæbaīmīni. Ayæ godōmenque cædīnque mīnitō ānanquidi ongō ate, “Ānanquidi ēñēmi, ānīnque, Bitō cabænte wo gote gāwapænē guīie,” ante āmīni īnīnque edæ mīnitō ānīnō baī do babāimpa. ²² Wængongui ingante wede pōnēmīni īnīnque quīēmē incæ ante tōmēngā ingante apænemīni incæ mīni ānīnō tōmānō æncæmīnīmpa, ante apænegacāimpa.

Awēñē īmīpa, ante æcānō ānaī, ante Itota ingante ānānīpa

(*Māadoco 11.27-33; Odoco 20.1-8*)

²³ Itota ayæ Wængongui oncō ñænæncōnē yabæcōnē pō guīdīnque odōmonte apænegā ēñēñōnāni, Wængongui quī, ante nē godōnāni ñænæñāni tōnō oodeoidi inānite nē aadāni, Nāni Picæncabo, nāni ānāni tōnō tōmēngā weca pōnīnque ānānīta.

—Æcānō nē angā inte bitō īmite angā cæbīi.

Īñæmpa, Nē āmi bacæbiimpa, ante æcānō pōnō āna ēñente nē āmi inte baī cæbīi, ante ēñencæte ante wæmōnīpa.

²⁴ Ānāni ēñēnīnque,

—Mīni āmaī botō adodeque āmo ēñēnīnque mīnitō tāno apænemīni ēñente ate māñīñedē ate botō wæætē, Æcānō nē āna inte pōnō angā cæboo, ante apænebo ēñēmaīmīnīpa. ²⁵ Wāō wodi ingante guīquēñē, Bitō æpænē guidoncæbiimpa, ante æcānō āna ēñente guīdongāi, ante pōnēmīnīi. Wængongui ōōnædē apænegā ēñente cæcantawo. Wæætē edæ waodānīque ānāni ēñente cæcantawo. Ædō ante pōnēmīnīi.

Itota angā ēñēnīnque tōmēnāni nāmāneque wæætēdō wæætē tedecōnīnque, “Wa, æbānō angūī, ante wædānīta.

Īñæmpa, Wængongui angā ēñēnīnque Wāō cægacāimpa, āmō baī Itota wæætē mōnō īmonte, “Quīnante pōnēnāmaī īmīnitawo, ancædongāimpa,” ante wædānīta. ²⁶ Wæætē edæ, “Waodāni tōmānāni, Wængongui beyæ nē apænegā Wāō wodi ingacāimpa, ante pōnēnānīpa, ante pōnente wædīnque Itota ingante nē ānāni īñōmō, Wadāni pūīnāni wæcæ wæ, ānīnque, Waodānīque ānāni ēñente Wāō cægacāimpa, ante mōnō ædō cæte angūī.”

²⁷ Ante pōnēnīnque tōmēnāni Itota ingante edæ,

—Wa, ēñēnāmaī īmōnīpa.

Ante wæyōnāni Itota edæ,

Īnīnque botō adobaī, Æcānō nē angā inte pōnō angā cæboo, ante mīni ānīnō ante apænedāmaī incæboimpa, angacāimpa.

Mæmpocā wēna æbānō cæda, ante odōmōngampa

²⁸ Itota odōmoncæte ante apænedīnque,

—Mīnitō guīquēñē odōmonte tedebō ate āmo ēñente apænemīni ēñēmoedāni. Īmaī impa. Waocā tōmēngā wēna mēnaa īñōna adocanque weca godīnque mæmpocā īñōmō, “Botō wēmi, bitō ñōwoōnæ yowementacodē cæte pōe.” ²⁹ Āñongā edæ, “Wīī goīnēmo,” angampa. Wæætē edæ ayæ ate pōnecōnīnque edæ, Botō ædō cæte Baa ānīnque quēwēmo, ante pōnēnīnque edæ mæmpocā nānō ānīnō ante ēñēnīnque edæ cæcæ gocampa. ³⁰ Ayæ ate mæmpocā wæætē wacā wēngā weca adobaī māo āñongā tōmēngā edæ, “Bitō mæmpobi āmi ēñente gocæboimpa,” ante apænegā incæte edæ godāmaī ingampa. Mānīnque ante tedebō. ³¹ Nōwo mīnitō īmīnite āmopa, Mæmpocā nānō ānō baī æcānō cæcāi, ante pōnēmīni.

Āñongante,

—Tānocā.

Ante apæneyōnāni Itota tōmēnāni inānite wæætē,

—Nāwangā āmopa. Mīnitō Awēñē Wængongui Odeye nempo pō guīdāmaī īñōmīnīte odōmāno awēñē beyæ nē æwēnāni tōnō onquīyænāni māincoo beyæ ante nē towente quēwēnāni tōnō tāno ponte do guīcædānīmpa. ³² Edæ Wāō wodi mīnitō weca ponte nō cæte tōinō ante odōmōñongante mīnitō īñōmō pōnēmīnīta. Ayæ godōmenque awēñē beyæ nē æwēnāni incæ māincoo beyæ ante nē towente quēwēnāni tōnō incæ do pōnēnānīpa. Ayæ mīnitō mānōmaī cædāni adīmīni incæte wæætē wēnæ wēnæ mīni cædīnō ante wædāmaī inte wīī pōnēmīnīta tōō, ante Itota apænegacāimpa.

Nē aadāni inguēnēnāni incæ wīwa cædānīpa, ante

(Māadoco 12.1-12; Odoca 20.9-19)

³³ Ayæ godōmenque apænedinque Itota, “Wængonguī Awēnē æbānō cæcāā, ante eñencæmīnīpa, ante botō imæca quēwēnāni nāni cæinō ante odōmonte apænebo eñēdāni. Edæ iūmai impa. Ōmæ ēacā yowementacodē da da māo da caate wææ cædinque, Tōmēmō ænte pinā pinā gāwate wæ yopænte tōmēmæ ænguīñōmō ante cædinque ææ wote badongantapa. Ayæ, Yowementacodē awēmō guīdāmai incædānīpa, ante cædinque æi wæñōmēnæca gomō aquīñōmō mæñongā ate nē ēacā iñōmō wabæca gocæ cædinque wadāni ōmæ wite nē aate tā pedāni iñānite apænecantapa. Botō yowementacodē incæ mīnitō ōmæ wite aaedāni. Aayōmīnite botō, Mīnitō quī, ante pancamonga pōnōmo æncæmīnīpa, angā Ao āñōnāni wadæ gocantapa. ³⁴ Ayæ yowedepo wodo bayonte tōmengā ingante nē cædāni iñānite, Mīnitō yowementacodē nē aadāni weca godinque botō yowemō incæ pancamonga āmīni æninque botō weca wæætē māmōmīni æmoedāni, angā godānitapa. ³⁵ Angā godinque pōnāni adinque yowementacodē nē aadāni guīquēnē nē æncæ pōnāni iñānite bæi ongōninque adocanque ingante nanguī tæi tæi pāninque wacā ingante godōmenque wæñōnāni wængā ate ayæ wacā ingante dicaca tacadāni. ³⁶ Adinque māo apænedāni wædinque nē ēacā iñōmō wæætē godōmenque nanguī nāni da godongā gote pōnāni adinque nē aadāni guīquēnē adobaī cædāni wædānitapa.”

³⁷ Ayæ godōmenque odōmōninque Itota apænecantapa. “Iñinque nē ēacā iñōmō, ‘Tōmēmō wengā ingante da godōmo gocā adinque tōmēnāni guīñente wædinque ee abainānīpa,’ āninque tōmengā ingante da godongā tōmengā pōnī gocantapa. ³⁸ Yowementacodē nē aadāni guīquēnē gomō ayōnāni nē ēacā wengā dicæ pongā adinque, ‘Tōmengā ingampa. Wæmpocā māincoo iñi edæ iñgā iñōmō nē ænguīngā ingampa cæmōō. Mōnō edæ māo wæñōmō wængā ate edæ mōnō quī babaimpa.’ ³⁹ Ānewēninque tōmēnāni nē ēacā wengā ingante edæ bæi ongonte yowementacodē wææ cæte iñōmō yabæque edæ, Ōmæ, ante wæñōnāni wængantapa.”

⁴⁰ Ante māninganca odōmonte apænedinque Itota iñōmō tōmengā ingante nē ānināni iñānite angantapa. “Iñinque mīnitō iñōmō, Nē ēacā pōninque edæ yowementacodē nē aaquēnēnāni iñānite æbānō cæquīngāā, ante pōnēmīni.”

⁴¹ Ante āñongante tōmēnāni wæætē,

—Ōmæ, ante nē wæñōnāni iñānite tōmengā nāemæ edæ, Ōmæ, ante wæñongā wæncædānīpa. Ayæ wæætē, Ēdānidō nō cædinque yowedepo iñō yowedepo iñō tā pete pōnōnāni ænguīmo, ante adinque awēnē, Mīnitō wæætē aacæmīnīpa, angā Ao ante aacædānīpa, ante apænedānitapa.

⁴² Itota ayæ tōmēnāni iñānite,

—Wængonguī angā eñente nāni yewæmongaintaa æbānō ongō ante mīnitō adāmai inte āmīni awædō, angantapa.

“Dica ænte adinque, Wēnæ wēnæ inca, ante nē mæñōnāni nāni wīdo cædinca iñcæ gomonga wæmonca inca iñinque tāno nāni ñōnōninca bæbængapa do bacapa.

Wængonguī Awēnē incæ mænōmai cæcā adinque

mōnō waocabo guīñente wædinque waa amompa,”

Ante yewæmonte impa abaīmīnīpa.

⁴³ Māninō mīni eñēnāmai iñō beyæ mīnitō Awēnē Wængonguī Odeye nempō quēwente mīni cæquēnēnō incæ ō ænte bai cæcā wæcæmīnīpa. Ayæ wæætē wadāni iñānite tōmēmō wainca incate bai nō cædāni iñānite godō angā eñēninque tōmēnāni wæætē tōmengā nempō quēwente waa cæcædānīpa. ⁴⁴ Botō iñōmō mānū dica wæmonca bai iñōmo inte āmo eñēninque nē wæcā iñōmō tōmengā iñōmō mānincaā tæ go wææninque wædænque tobænte wæcā bai iñongā inte botō ōnōwa gāānē ædæ wææncæcāimpa. Wæætē æcānō ingante Wængonguī piinte mānincaā tacacā ina tōmengā guīquēnē quīēmē bai yaintai bai goquīnō anguēnē, ante pōnēmīniyaa.

⁴⁵ Ante nē aaquēnēnāni nāni cæinō ante odōmōninque Itota apænecā eñente wædinque, Wængonguī quī, ante nē godōnāni ñænænāni tōnō Paditeoidi iñōmō, Iñæmpa mōnō imonte piinte angā awædō, ante pōnente wædinque, ⁴⁶ Quīnō cæte tōmengā ingante bæi ongonte ō ænguī, ante cōwā adānitapa. Incæte, Waodāni tōmānāni, Wængonguī beyæ nē apænecā Itota iñongā ingampa, ante pōnēnānīpa, ante wædinque, Pīnāni wæcæ wæ, āninque edæ iñmopo cægadānīpa.

22

Monguīmæno ante odōmonte apænecampa (Odoca 14.15-24)

¹ Wængonguī Awēnē æbānō cæquīngāā, ante eñencæmīnīpa, ante imæca awēnē nānō cæinō ante Itota tōmānāni iñānite wæætē odōmonte apænegacāimpa.

² “Inguipoga awēnē odeye tōmengā wēñæ beyæ monguīmæno ante nānō cæbai ōnōædē Awēnē Odeye iñōmō adobaī cæcampa. ³ Inguipoga awēnē iñōmō tōmengā ingante nē cædāni iñānite, Wēnē botō

ánináni inánite wente ænte pœdáni. Angá tē tē wente ænāni ēñēninque edæ, Wīl pōinēwædō, ānāni. ⁴ Ēñente wædinque awēnē wæætē wadāni tōmengā ingante nē cædāni inánite da godōninque, 'Wēēnē botō ānināni weca godinque botō beyæ īimainō ante apænemīni ēñencædānimpā. Botō wengā monguimæno ante wagadaidi onguīñænāni tōnō cænināni oguīmo pōni ināni inánite do wæñōninque botō ææmænoca do eyepæ cæbopa. Botō wengā monguimæno pō beedāni, ante mæmpocā angampa, ante edæ botō beyæ apæneedāni.' ⁵ Angā ēñēninque gote apæneyōnāni tōmēnāni ēñēnāmai inte ōnonque wadæ godinque pancadāniya gōnea ante goyōnāni wadāni godonte æncæte ante godānitapa. ⁶ Wadāni ayæ ongōnāni guiquēnē ēñēnāmai inte awēnē nānō da godonte nē cædāni inánite piinte wēnæ wēnæ cædāni wæyōnāni māo wæñōnāni wæñānitapa."

⁷ "Mānōmai cædāni ate wædinque awēnē odeye īñōmō āngā badinque tōmengā tontadoidi inánite angā ēñēninque nē wæñōnināni inánite māo capo wæñōnāni. Wæñāni adinque godōmenque onconcoo tōmēnāni nāni éadincoo iya tānāni. ⁸ Īninque edæ awēnē wæætē tōmengā ingante nē cædāni inánite, 'Monguimæno do eyepæ cæte ongō incæte botō nē ānināni waa cædānīpa diyæ āmo bequīnāni. ⁹ Īninque mīnitō wæætē edæ iyænompoga iyænompoga māo godinque æcāmenque ingante bee tēninque tōmēnāni tōmānāni inánite āmīni ææmæno pō becædānīpa.' ¹⁰ Angā ēñente cædinque nē cædāni taadonque pō bee bee tēninque waa cædāni incæ wīwa cædāni incæ tōmānāni inánite āfete ænte māmōnāni pō monguimæno oncōnē pō guīdinque eyede goto gongænte bedānitapa."

¹¹ Ayæ, "Awēnē odeye īñōmō ēñacæ pō bedāni inánite acæ guīyongā edæ adocanque monguimæno bequī weocoo awēnē odeye nānō pōñōnincoo incæ wēñadāmai inte ōnoncooque ee mongængā. ¹² Adinque, 'Æmigo, bitō ædō cæte monguimæno weocoo wēñadāmai inte ōnoncooque ee mongænte guībii,' ante āñongā edæ pæ wēnecā. ¹³ Adinque awēnē odeye īñōmō nē aadāni inánite āninque, 'Nē monguimæno weocoo wēñadāmai ingā ingante mīnitō goti wimpote wææ goti wēwate edæ wēmō īñōmō nāni guingo imonte Yæ yæ ante wæyōmō māo wido cædāni,' ante awēnē odeye angampa. ¹⁴ Mānōmai nāni cædō bai adobai impa. Edæ nanguī ināni inánite Wængonguī, Pœdāni, angā incæte edæ wædænque ināni inánite apænte Ao ante ængampa," ante Itota apænegacāimpā.

Tæiyæ Awēnē nānō āntamō ante ted-edānīpa

(Māadoco 12.13-17; Odoca 20.20-26)

¹⁵ Itota mānōmai apænecā ēñente wædinque Paditeoidi wadæ godinque godongāmæ ponēē cōninque, Mōnō piinte apænte anguinque ante quīnō cæmō ate Itota adodeque wapiticæ tededinque oda cæquingā. ¹⁶ Ante pōnēninque tōmēnāni nē ēmīñænāni tōnō Edodeidi inánite da godōnāni godinque Itota weca pōninque,

—Awēnē nē Odōmōmi ēñēmi. Bitō nō pōnente cæbi īmīpa, ante do ēñēmōnīpa. Ayæ bitō ayōmi mōnitō tōmāmōni ōnōmōniqwe imōni adinque bitō, Waodāni æbānō anguināni, ante ayæ, Æbānō cæquīnāni, ante wædāmai inōmi inte edæ Wængonguī taadō ante guīñēnāmai inte nō odōmote apænebīpa. ¹⁷ Īninque bitō æbānō pōnēmī. Odōmāno gobiedōno beyæ ante tæiyæ awēnē Tetædo tīguitamō nānō ānintamō ante æbānō wææ yewæmonte ī, ante ēñencæte ante wæmōnīpa edæ. Godonte edæ waa cæte intawo. Wæætē wēnæ wēnæ cæte intawo, ante apænebi ēñencæmōnīpa.

¹⁸ Āñōnāni Itota īñōmō tōmēnāni do, Cæmō wapiticæ tedecæcāimpā, ante nāni āñinō ante do ēñēninque tōmēnāni inánite wæætē edæ,

—Mīni wadō tedete wadō cæcabo īñōmō edæ quīnante botō īmote, Æbānō cæmō oda cæquingā, ante cæmīni. ¹⁹ Tetædo tīguitamō nānō ānintamō odōmōmīni aquīmo.

Āñongā deñadīo tīguitamō adotamonque ænte pōnāni. ²⁰ Adinque tōmēnāni inánite Itota,

—Ēcānō awīnca bai yewæmonte badonte ī. Edæ æcānō ēmōwo ante yewæmonte ī.

²¹ Āñongante,

—Awēnē Tetædo awīnca bai yewæmonte badonte impa. Adocā ēmōwo ante yewæmonte ongō amōnīpa.

Ānāni ēñēninque Itota īñōmō edæ,

—Awēnē Tetædo quī ī īninque edæ Tetædo ingante godongæimpā. Wæætē Awēnē Wængonguī quī ī īninque Wængonguī ingante godonguī ī apa ānewēmīni.

²² Ante Itota nānō āñinō ēñente beyæ, Quīēmē bai angā, ante ancai guīñente wædinque wadæ gogadānīpa.

Ædō cæte nāni ōmæmonguū, ante wædānīpa

(Māadoco 12.18-27; Odoca 20.27-40)

²³ Māñōnæ adōonæ īñonte Tadoteoidi nē, Waocā wæninque nāni ōmæmōnāmai æmæwo wængampa, ante nē ānewēnāni inte Itota weca pōninque, īimainō ante ēñencæte ante wæmōnīpa, āñānitapa.

²⁴ —Awēnē nē Odōmōmi ēñēmi. Mōitee wodi mōnō beyæ ante wææ yewæmōninque

īīmaī ante yewæmongacāimpa. Waocā mōninque wēñæ tapæidāmaī inte wængā ate tōmengā tōniñacā wæætē owæmpoingā ingante mōninque wēñæ tapæidinque, Botō tōniñacā wodi wengā ingampa, ante pæpogacæcāimpa, ante yewæmongacāimpa.²⁵ Nōwo iñōmō mōni cabo iñōmōnite adodāni nāni caipæ ōnompō æmæmpoque go mēnaa ināni iñōnāni bamoncadengā mōninque wēñæ tapæidāmaī manguiwēninque edæ nāne wængā ate ayæmengā wæætē owæmpodingā ingante mongā.²⁶ Īninque ayæmengā incæ adobaī wēñæ ōmæpocā nāne wængantapa. Ayæ wææ wacā ayæmengā adocā ingante monte ate wēñæ adobaī tapæidāmaī inte edæ nāne wængantapa. Ayæ wææ wacā adobaingā, ayæ wææ wacā tapæidāmaī inte nāne, ayæ wææ wacā, ayæ wææ ayæmengā pōni adocā ingante mōninque wēñæ tapæidāmaī inte nāne wængantapa.²⁷ Onquiyængā guiquēnē owæmpote wædinque tōmengā pōni nāne wængantapa.²⁸ Īninque, Mōnō nāni ōmæmonguiōnæ, ante mīni äōnæ iñonte māningā owæmpoingā iñōmō æcānō nānōogængā baquingāā. Edæ tōmengā ingante iñōmō edæ tōmānāni manguiwengadānimpa.²⁹ Äñōnānite Itota wæætē,

—Mīnitō iñæmpa. Wængongui angā ēñente nāni yewæmōinta adāmaī inte baī ämīni awædō. Wængongui adocanque tæī piñængā inte edæ tōmāā cæcampa, ante pōnēnāmaī inte edæ oda cæte ämīni awædō.³⁰ Edæ Wængongui anquedoidi ōñædē cōwē owodāni baī inōnāni inte waodāni nāni ōmæmōninque godō nāñōnāmaī ināni inte edæ mōnāmaī inguinānidō anguēnē.³¹ Wæætē do wængānāni nāni nāni ōmæmonguinō ante ēñencæminimpa, ante Wængongui beyæ yewæmonte ongō adāmaī imīnitawo.³² “Botō iñōmō Abadāō Wængonguimo ingaimo inte ayæ Itæca Wængonguimo ingaimo inte botō Aacobo Wængonguimo adobo imo anguēnē,” angacāimpa. Ante nē angaingā inte edæ æmæwo wæñināni tōmēnāni Wængonguingā ædō cæte inguingāā. Wæætē edæ mīi quēwēnānique tōmēnāni Wængongui inongā ingampa. Īninque edæ nē wænte godināni incæ ayæ mīināni quēwēnāni inānipa, ante pōnenguēnē änewēmīni.

³³ Ante apænecā ēñēninque godongāmæ ēñēngōnāni guiquēnē, Æbānō cæte Itota waa pōni odōmonte apænecā ēñēmōnii, ante wægadānimpa.

Wængongui nānō wæce angaine mēnea tæīneda pōni ēnepa
(Māadoco 12.28-34)

³⁴ Tadoteoidi guiquēnē, Ædō cæte gomonga anguiī, ante edæ pæ

wēenedānitapa. Mānōmaī Itota nānō nō äñinō beyæ pæ wēenedānipa, ante tededāni ēñēninque Paditeoidi wæætē godongāmæ pōnānitapa.³⁵ Itota æbānō cæte wapiticæ ämaingāā, ante pōñēñōnāni adocanque idægoidi nāni wææ angainō ante nē ate ēñēnongā iñōmō Itota ingante angantapa.

³⁶ —Awēnē nē Odōmōmi ēñēmi. Wængongui, Īīmaī cæedāni, ante nānō wææ angainecoo ante pōñēninque æedō tæīne pōni i iñonte mōnō nanguī ēñente waa cæquīī.

³⁷ Äñongante Itota iñōmō,

—Īīmaīnō ante nānō wææ angaine iñōmō edæ tæīne pōni iñonte mōnō nanguī ēñente waa cæcæimpa. “Wængongui mōnō Awēnē ingante bitō mīmō entawente waadedinque bitō ocai encabi inte nō pōñēninque bitō ōñōwoca ēwocabi inte edæ tōmengā ingante ædæmō waa waadete pōnēe.”³⁸ Māñine nānō wææ angainō waa pōni i Īninque māñine tāno waa cæquī impa.³⁹ Ayæ wæde nānō angainō adobaī nanguī waa ēñente cæquī impa. “Bitō nāmā bitō waadete waa cædō baī adobaī pōñēninque wadāni inānite adobaī waa waadete cæe.”⁴⁰ Īīmaī cæedāni, ante Mōitee wodi nānō wææ angainō ayæ Wængongui beyæ nē apænedāni nāni angainō cæcæte ante cædinque edæ māñine Wængongui mēnea nānō wææ angaine ēñente cæte beyence edæ tōmānō edæ do eyepæ cæte impa, ante Itota apænegacāimpa.

Codito æcānō pæingā inongā ingāā, ante apænecampa

(Māadoco 12.35-37; Odoca 20.41-44)

⁴¹ Māñii Paditeoidi adoyōmō ponte ayæ ongōñōnāni Itota tōmēnāni inānite angantapa.⁴² Itota iñōmō tōmēnāni inānite,

—Codito iñōmō æcānō ingāā, ante pōñēmīni. Æcānō Wengā inongā ingāā, ante pōñēmīni.

Ante äñongante Paditeoidi wæætē,

—Awēnē Dabii pæingā inongā ingampa.

⁴³ Äñōnānite Itota edæ,

—Awēnē Dabii pæingā inongā iñongante edæ Dabii tōmē edæ Codito ingantedō äninque quīnante, Awēnē Īmipa, angacāimpa.

⁴⁴ “Awēnē Wængongui incæ botō Awēnē ingante apænedinque,

Botō tōmēmæ inō tæ contayōmi, bitō imite nē piñāni inānite bæ tabo ate bitō ōñōwa gāānē ongōñōnānite bitō pinā gāwacæbiimpa, angacāimpa.”

Ante Wængongui Ōñōwoca apænecā ēñēninque Dabii wodi yewæmongacāimpa.

⁴⁵ Codito nē Awēnē ingampa, ante awēnē Dabii wodi nānō nē angaingā inongā inte edæ adocā Codito iñōmō ædō cæte nāēmæ Awēnē Dabii wodi pæingā inguingāā, ante pōnenguēnē änewēmīni.

⁴⁶ Ante añongä edæ tömånäni, Mönö ædö cæte wæætë anguii, åninqe eñenåmai inte edæ pæ wëenegadånipa. Ayæ iincayæ ate, Apænebi eñemõni, ante ædö cæte anguii, ante edæ tömånäni guifente wædinque ånåmai ingadånipa.

23

Paditeoidi tönö nê odömönäni inånite Itota piinte angü

(Máadoco 12.38-40; Odoca 11.37-54, 20.45-47)

¹ Pæ wëenedåni adinqe tömengä miñæ nê godåni godongåmæ ongönåni nangui inåni tönö ongõfõnånite Itota tömånäni inånite apænegacåimpa.

² “Nê odömönåni tönö Paditeoidi iñomö Mõite wodi nånö angainö ante nê eñenåni inte nê nõ odõmõte apænedåni inånipa. ³ Månõmai inåni adinqe munitö iñomö tömånäni ånino ante tömånö ante cõwë eñente cæedåni. Wæætë tömånäni nåni cæi bai cædåmai iedåni. Edæ, iimåi cæedåni iimåi cæedåni, ante nåni ånõ ante tömånäni nånå incæ eñenåmai cædånipa. ⁴ Edæ mæncoo teemenco mo paate wadåni õnoncapæ cõ cædancapænåni bai cædinque tömånäni, Wadåni guemancædånipa, ante cædåmai inåni inte õnopogonca adopogoncaque incæ gä ænancapænåmai inånipa.”

⁵ “Quiëmë cædåni incæ tömånäni cõwë, Wadåni botö imote waa acædånipa, ante cædånipa. Wadåni, Bitö Wængongui beyæ nåni yewæmongainta nangui abi imipa, ante pönëninque mõnitö imõnite waa acædånipa, ante babæ cædinque mæninta æmontaicade ñænæ põni badõnte munitö õnoncaipoga wo cæte encapodånipa. Ayæ, Bitö Wængongui ingante nangui apænebi imipa, ante pönencædånipa, ante cædinque tömånäni weocoo ñå cæwate ñå cæwate doyæ guënë ewa badõninque doyæ põni wëñate mongænånipa. ⁶ Ayæ ææmæ becæ godinque tömånäni, Botö tåno bete tocæboimpa, ante waëmompaa põni tæ contate bete todånipa. Ayæ Wængongui angä nåni eñente yewæmongainta ate odõmõincõnë pö guidinque tömånäni nånique ante pönëninque waëmompaa põni tæ contate todånipa. ⁷ Ayæ woadåni nåni godõte æiñomö wainö pancadë goyõnåni wadåni pö bee tëninque, Nê odõmõni, bitö imite waa amõnipa, ante apænedåni eñëninque edæ nê odömönåni iñomö nangui todånipa,” ante Itota apænecantapa.

⁸ Ayæ apænedinque, “Minitö guiquënë munitö Awënë nê Odõmongä adocanque põni iñongä muni caipæ iñomõnite wadåni, Awënë nê odõmõni imipa, ante ånåmai incædånipa, ante wææ cæedåni. ⁹ Ayæ mõnõ Mæmpo adocanque põni õõnædë

quëwengä ingä adinqe munitö waocä ingantedö ante apænedinque, Mönö mæmpo ingampa, ante ånåmai iedåni. ¹⁰ Ayæ, Mönö Awënë nê Odõmongä iñomö adocanque põni Codito iñongä ingampa, ante eñemõni iñomõnite wadåni, Nê åmi imipa, ante ånåmai incædånipa, ante wææ cæedåni. ¹¹ Ayæ edæ muni cabo iñomõnite wacä beyæ wacä nê godö cæcä iñomö ñænængä põni ingä incæcåimpa. ¹² Edæ nånå ængö cæte bai cædinque æcånö, Botö botö, åna tömengä iñomö edæ wææntodõte bai õnonque bacæcåimpa. Wæætë æcånö, Botö botö, ånåmai inte, Õnõmoque imopa, åna iñomö edæ tömengä ingante ængö cæte bai cædåni adinqe wadåni tömengä ingante waa acædånipa,” ante Itota tömengä miñæ nê godåni inånite apænegacåimpa.

¹³ Ayæ nê odömönåni tönö Paditeoidi inånite Itota piinte angantapa. “Minitö iñomö muni pante wæquinque edæ wadö tedete wadö cæmuni iminipa. Wadåni õõnædë Awënë Odeye nempo guidåmai incædånipa, ante munitö odemö tee mõnete bai wææ cæminipa. Tõmëmini guidåmai imuni inte munitö wadåni guicæ cæyõnånite edæ tömånäni nåni guidåmai wæquinque edæ wææ cæminipa. ¹⁴ Nê odõmõni tönö Paditeoidi imuni muni wadö tedete wadö cædincabo inte muni wæquinque impa. Owæmpõnåni oncö õ æmini incæte munitö, Wantæpiyæ botö tedebõ beyænque wadåni botö imote waa acædånipa, ante Wængongui ingante wantæpiyæ nê tedemini inte godõmënque muni panguinque ingæimpa,” ante Itota angacåimpa.

¹⁵ Ayæ apænedinque, “Nê odõmõni tönö Paditeoidi imuni muni wadö tedete wadö cædincabo inte muni wæquinque. Edæ, Adocanque incæ mõnitö emiñængä bacæcåimpa, ante munitö æpæ tömämæ wogaa gote diqui diqui müninque inguipoga taadö tömånö gote diqui diqui minte ayõmini adocanque Ao angä adinqe munitö tömengä ingante godö odõmõni. Eñëninque tömengä guiquënë munitö wënæ wënæ goquinö godõmënque godinque gomonga nê wënæ wënæ cæcä badinque tadõngadænguipo nånö gomonga panguinque munitö miñæ tee empote gocampa töö.”

¹⁶ Ayæ, “Babetamõni muni wæquinque babæ ante mæmõni ate edæ oda cæte godånipa. Iñempa iimåi ånewëminipa. Botö ånõ nõingä baquinö angüënë, ancæte ante æcånö, Wængongui tæiyæ waëmõ oncö tæi ongö bai impa, åna tömengä õnonque tedete apænecampa, ante ånewëminipa. Wæætë edæ, Wængongui tæiyæ waëmõ oncö odo mæ ongö bai impa, ante æcånö åna guiquënë tömengä nõ angä inte cæcæcåimpa, ante munitö iñomö babæ wapiticæ åminipa.

17 Mini babetamö incabo mimö ömædê incædö. Edæ Wængongui tæiyæ waëmö oncönê oodo öñö adinque, Oodo incæ godömenque waa pönî impa, ante babæ ante pönëminipa. Ìñæmpa oodo æninque, Wængongui oncö waëmö ëmounginta, ante ænte badönäni beyæneque oodo tæiyæ waëmö bapa, ante pönëminiyaa."

18 "Ayæ edæ minitö babæ apænedinque, 'Botö äno nöingä baquïnö anguënê, ancæte ante waocä, Wængongui qui, ante baö nani iya täimpaa tæi ongö bai impa, ante æcänö äna önonque tedecampa. Wæætê mäninö ancæte ante, Baö iya täimpaa nani iya tanguingä bai impa, ante æcänö äna ìñömö tömengä nö ante cæcæcäimpa,' ante minitö babæ wapiticæ äminipa. 19 Mini babetamö incabo äminî ëñëmoedäni. Ædö waa intawo. Nani iya täimpaa incædö tæiyæ waëmö intawo. Wæætê edæ baö nani iya tanguingä incæ tæiyæ waëmö intawo. Æbänö ante pönëmini. Ìñæmpa baö æninque, Wængongui qui, ante iya tänäni beyæneque baö näwäaquiringä bacampa, ante pönëminiyaa. 20 Ìninqe, Botö äno nöingä baquïnö anguënê, ancæte ante waocä, Nani iya täimpaa tæi ongö bai impa, ante æcänö äna tömengä, Iya täimpaa tönö baö nani iya tanguingä tönö tömää beyæ, ante bai dobæ angampa. 21 Ayæ æcänö, Wængongui tæiyæ waëmö oncö beyæneque ante näwangä baquïnö anguënê, äna tömengä Wængongui oncö beyæ ayæ mänincönê nê owocä beyæ adobai dobæ angampa. 22 Ayæ æcänö, Öönædê beyæneque näwangä baquïnö anguënê, äna tömengä edæ Wængongui nänö contaimpaa beyæ ayæ contaimpaa nê Contacä beyæ adobai dobæ angampa," ante apænegacäimpa.

23 Ayæ apænedinque Itota, "Nê odömömini tönö Paditeoidi incæ mîni wadö tedete wadö cædincabo inte mîni wæquinque impa. Tömëmini mîni minte pædimö tönö guimö ogui wayabo tönö tömëmö mîni tä pete ænimö tê gæte diete ganca mîni cabo tê gædincoo ñö cædinque adocooque æninque, Wængongui qui, ante godöninque waa cæminipa. Incæte edæ Wængongui, Nö cæedäni, ante nänö äno ante, Godö waadete waa cæedäni, ante nänö äno ante, Wede pönente cæedäni, ante nänö äno ante minitö mîni wæquinque ëñente cædämai ìminipa. Ìmai täno waa cæquënëminî inte minitö mänincoo ayæ godömenque Wængongui ingante godömini inguënëminî ìminipa. 24 Babetamömini babæ ante mäomîni ate edæ oda cæte godänipa. Minitö, Diète ganca minitö mänincoo ongö adinque adocooque cöwê godongui ì, äninque owætaca bequïñömö guincawæ owoyö tæ wedote bai cæminipa. Wæætê

edæ Wængongui nänö äno bai cædämai inte minitö edæ cämeyo ñæñængade pönî owoyö önonque ade bete bai pönënamai inte cæminipa, ante awædö," ante Itota apænegacäimpa.

25 Ayæ nê odömönäni tönö Paditeoidi ìnänite godömenque äninque tömengä, "Mîni wadö tedete wadö cæcabo inte mîni wæquinque impa. Owæta tönö cængæ yabætaque ñongate bai minitö wadäni ayönäni nê waa cæminî inte wæætê edæ cæncadenta ìnö wentaga engate bai cæminipa. Mîni wacä qui ö æinënö ayæ nämanque ante mîni towönö beyæ owæta cæncadenta ìnö opogö tagate eyede bai impa diyæ. 26 Bitö Paditeobi babetamömi ëñëmi. Cæncadenta ìnö täno ñä mënongabi ìninqe yabæta ìnö ñongate wainta baquïnö anguënê," angacäimpa.

27 Ayæ, "Nê odömömini tönö Paditeoidi incæ mîni wadö tedete wadö cædincabo inte mîni wæquinque impa. Minitö wao wodido bai yabæque waëmö paate bai ìñonte cæncadê ìnö wao bayetoca ñömænte öö wayömö bai entawëminî ìminipææ. 28 Ìninqe wadäni yabæque adinque, Minitö nö entawëminî ìminipa, ante pönëñönäni minitö wiwa mîni pönönö beyæ wadö tededinque wadö cædinque edæ mimö wentamö entawëminipa," ante Itota pïngacäimpa.

29 Tömënanî ìnänite ayæ pïinque, "Nê odömömini tönö Paditeoidi incæ mîni wadö tedete wadö cædincabo inte mîni wæquinque. Edæ Wængongui beyæ nê apænegainäni wodido, ante minitö do mænönominipa. Ayæ, Nê nö cægainäni wodido, ante mænöninque minitö oncontai waëmö pönî paadomînipa. 30 Ayæ, 'Mæmæidi nani quëwëngaiñedê quëwëmönî bai mönitö tömënanî tönö, Wængongui beyæ nê apænedönäni ìnänite mäo wænönämai inte ee quëwëncædömönimpa,' ante äminipa. 31 Mänömainö ante apænedinque minitö, Wængongui beyæ nê apænegainäni ìnänite nê wænongainäni pæimönî ìmönipa, ante nämä incæ edonque pönî apænte äminipa. 32 Edæ minitö wæmæidi nê wænongainäni inte nani pe ñiñængaimämo wiñ eyepê inte bai cædinque minitö ñöwo godömenque eyede pe ñiñænte bai capo wænömæwedäni," ante Itota badete bai angacäimpa.

33 Ayæ äninque, "Mîni tæntæcabo pæimîni bai ìminî ëñëedäni. Mîni obecabo pæimîni bai ìminî ëñëedäni. Minitö tadömengadënguipo mîni pante wæquënënö ante æbänö cæte aamö cæte edæ tabäminiyaa. 34 Ìninqe Wængongui beyæ nê apænedäni tönö nê nö ëñënanî tönö nê odömönäni ìnänite botö ñöwo minitö weca da pönömo pönänipa. Adinque minitö ìñömö edæ pancadäniya ìnänite wænöminî

wæncædānimpā. Pancadāniya īnānite mīnitō awāa timpōmīni wæncædānimpā. Ayæ pancadāniya īnānite mīnitō odōmōincōnē bæi ongōninque tæi tæi pāmīni caate wædinque tōmēnāni wayōmō quēwēnāni weca wayōmō quēwēnāni weca wōdii goyōnāni tōmānitō tee empo tee empo togænte goquūmīni, ante awædō. ³⁵ Mānōmai wēnæ wēnæ cæyōmīni edæ ñōwōmīni beyænque tōmāā inguipoga wepæ aa bedinque nāate baquūmīnidō anguēnē. Edæ Adāō wōdi wengā Abedo nē nō cægaingā wepæ tōnō ayæ quēwente nē ēñente cædāni īnānite godō wænōnāni wængānāni tōnō tōmēnāni tōmānāni wepæ beyæ mīnitō nāate wæcæmīnimpā. Ayæ mīnitō Wængonguī oncō ñænæncō boyæ iya tāimpā gāānē ongōninque Bedequiya wengā Tacadiya ingante godō wænōmīni wængā īninque tōmengā wepæ nāate wæmīnīpā. ³⁶ Ñōwōmīni mīni wepæ nāate wæquinque tōmanguipo aa betinō anguēnē, ante āmo ēñēedāni,” ante Itota tōmēnāni īnānite idæwaa pūinte apænægacāimpā.

Eedotadēē quēwēnāni beyæ ante Itota wæcampā

(Odoca 13.34-35)

³⁷ Ayæ Eedotadēē īñōmō quēwēnāni beyæ ante pōnēninque Itota, “Eedotadēē quēwēmīni ēñēedāni, angantapa. Wængonguī beyæ nē apænēdāni īnānite mīni wængōngāncabo inte ayæ Wængonguī nānō dā pōnōnāni īnānite dicaca tacamīni īñōmīnite botō īñōmō mīnitō īmīnite waadete pōnō cæinente nanguī wæbopa. Tawadiya wæmōnāā īñōmō, Botō wēnāni, ante gompodinque tæcæēnēmæ wēā pōnō ō ænā bai botō adobai, Botō wēnāni pōedāni, ante æpogadō āñōmote mīnitō, Wīi pōinente awædō, ante Baa āmīni wætābopa. ³⁸ Ñōwo īñōmō edæ mīni quēwēñōmō ōnonconcooque baconcoo tamēñedāni. ³⁹ Ñōwo īñōmō edæ botō dæ āñōmo mīnitō, ‘Awēnē Wængonguī ēmōwo beyænque pōninque bitō toquinque edæ waa cæcæbiimpā,’ ante mīni anguinganca mīnitō edæ botō imote adāmai incæmīnimpā ante āmo ēñēedāni,” ante Itota apænægacāimpā.

24

Wængonguī oncō ñænæncō bæ tate bacæimpā, ante

(Māadoco 13.1-2; Odoca 21.5-6)

¹ Itota Wængonguī oncō ñænæncō on-codo tao gocantapa. Wadæ gōcæ cæyongā tōmengā mīñæ nē godāni īñōmō, Wængonguī oncō ñænæncō æbānō waa pōni mænonte īi, ante odōmoncæte ante tōmengā weca pōnāni. ² Ate wædinque Itota wæætē,

—Mīnitō guiquēnē mānincoo tōmancoo edæ waa amīnitawo. Nāwangā ante mīnitō īmīnite apænēbopa. Mānincoo mīni acōo incæ tōmanca bæ tadāni wæænca

adinque panguūmæ panguūmæ godinque dica adocaque pōni incæ wænōmēnæca ongōnāmai ingæimpā, ante apænægacāimpā.

Oo īnque bacæimpā, ante æbānō ate ēñenguī, ante

(Māadoco 13.3-23; Odoca 21.7-24, 17.22-24)

³ Mānīi taodinque Odiwōwænquidi pō æite tæ contate ongōñongā tōmengā mīñæ nē godāni adodānique tōmengā weca ponte apænēdānitapa.

—Bitō ānō ante æyedēnō īnque baquū, ante ēñencæte ante wæmōnīpā. Edæ bitō ponque æyedēnō ponguūmīi, ante ayæ mōnō inguipoga quēwēnō æyedēnō æmæwo īnque baquū, ante ēñencæte ante wæmōnīpā. Īnque, Æbānō mā odōmonte bai ba adinque edæ, Oo pōni impā, ante wædinque ēñenguūmōni, ante ēñencæte ante wæmōnīpā.

⁴ Āñōnāni Itota,

—Wapiticæ odōmōñōnāni mīnitō wæætē, Mōnō oda cædāmai ingæimpā, ante nāmā wææ aquēnē quēwēmīni. Edæ īimai baquū ī ataquēdāni. ⁵ Edæ wadāni nanguī īnāni botō ēmōwo ante babæ tedete pōninque, “Botō Codito īnōmo īmopa,” ante apænēdinque wapiticæ māodāni godinque edæ nanguī īnāni tōmēnāni mīñæ oda cæte wapiticæ gōcædānimpā. ⁶ Edæ, Wabæca awēnē tōnō pō bee tēninque wæætēdō wæætē cædapa, ante tededāni ēñencæmīnimpā. Ayæ wayōmō nāni guēadō guēa cæte wænōnō ante tededāni incæte edæ guīñente wædāmai ledāni. Edæ mānīnō botō ānīnō bai cōwē bacæimpā. Ba incæte mōnō inguipoga quēwēnō īñōmō māñīñedē wīi æmæwo īnque bacæimpā.

⁷ Adobæca quēwēnāni īñōnānite wabæca quēwēnāni ponte bee tēninque guēadō guēa cæquīnāni īnānīpā. Adobæca awēnē odeye nempo quēwēñōnānite wabæca awēnē odeye tōmengā nānō ēnempodāni māmō bee tēninque guēadō guēa cæte wænōnte wænguīnāni īnānīpā. Ayæ waodāni nāni cæinente wænguinque cænguī incæ tōmāā capo wængæimpā. Ayæ wayōmō wayōmō gōinque pō wæcædānimpā. ⁸ Incæte māñīi nāni wæwēnō ba īnque edæ ōnonque mā pōni nāni wæwenguī inguīnō anguēnē.

⁹ Mānōmānō ante Itota godōmenque apænægacāimpā. “Māñīñedē edæ mīnitō īmīnite mīni wæquinque ō ænte māō godōnāni wæyōmīni godōmenque wænōnāni wæncæmīnimpā. Ayæ māñīñedē botō ēmōwo apænēmīni beyæ tōmāmæ quēwēnāni mīnitō īmīnite pūincædānimpā. ¹⁰ Ayæ adoyedē mīni pōnencabo incæ pancadāniya guingo imonte bai badinque edæ pōnēnāmai inte Baa anguīnāni. Ayæ mīni cabo incæ nāēmæ pūinque pancadāniya,

Nänö wænguinque, ante wacä ingante näemæ godoncædänimpa. ¹¹ Ayæ nê babæ ante apænedäni ponte, Wængongui beyæ nê apænemöni imönipa, ante odömönäni adinque pancadäniya edæ oda cæte wadö pönente baquinäni inänipa. ¹² Ayæ êñênämai inte nâni cæpâmo godömenque yebænte bai nanguï ba ate wædinque nê pönëninäni inte wodo tömänäni edæ Baa äninque waadedämai bacædänimpa. ¹³ Edæ æcänö iimæca iinque baganca wæntædämai inte botö emöwo beyæ piinte badämai inaa tömengä edæ botö æmo beyænque cöwê wænämäi quëwencæimpa. ¹⁴ Ayæ edæ, Awenê Odeye nempo watapæ quëwengæimpa, ante mini pönencabo tömämæ quëwënäni inänite mao apænemini êñencædänimpa. Mänömai apænedinque iinque cæmini ate mæniñedê ate edæ iinque baquinö anguënê,” ante Itota tömengä miñæ nê godäni inänite apænegacäimpa.

¹⁵ Ayæ apænedinque Itota, “Iinque, Wængongui beyæ nê apænegaingä Daäniedo wodi, Nömæi bai öo wadö nâni wo ewenguiämö incæ Wængongui oncö tæiyæ wæmoncönê ænte mämö cö cæquinänidö anguënê, angacäimpa. Daäniedo nänö yewæmongainta adinque nê adingä iñömö tömengä do êñëmaingampa. Iincayæ ate mænömai cö cædäni ongö adinque, ¹⁶ mæniñedê Oodeabæ quëwëmini iñömö edæ änanquidi do wodii winönte æibæwedäni. ¹⁷ Ayæ oncömanca ongömini iinque mæincoo æncæte ante oncönê wæi guidämai inte oncömancaque oncömancaque wodii winömæwedäni. ¹⁸ Ayæ tömëmoncodê cæmini iinque yacoo æncæte ante oncönê ocæ emænämai inte godömenque wodii winömæwedäni. ¹⁹ Mæniönæ iinque bayedê nê yædemadä inäni tönö goömæ nê gänönäni tönö tömënäni nâni wæquimämo baquinö anguënê. ²⁰ Ayæ munitö mini wodii winonguiönæ ante pönëninque edæ Wængongui ingante, Wii edæ cöönædepo bacæimpa, ante ayæ, Guëmanguiönæ iñonte badämai ingæimpa, ante æedäni. ²¹ Edæ mæniñedê woadäni nanguï nâni wæwëmämo nâni angä baquinö anguënê. Edæ Wængongui nänö badongaiñedê mænömai nâni wæwëmämo bai dæ äñonte ayæ godömenque ñöwo ganca dæ änompä. Ayæ godömenque iinque baganca mænömai nâni wæwenguiämö bai dæ anguinö anguënê. ²² Edæ wantæpiyæ nâni wæwengui impa, ante adinque Wængongui, Mänimpoönæque edæ wæwencædänimpa, ante pönömenque ante änämai ingä bai quingänö quëwenguënê dæ ancædönänimpa. Incæte, Nê quëwenguinäni botö angainäni wii wantæpiyæ wæwencædänimpa, ante cædinque Wængongui dobæ pönömenque

äninque, Idæwaa impa, ancæcäimpa,” ante Itota apænegacäimpa.

²³ Ayæ, Iinque bayonte æbänö inguii, ante apænedinque Itota godömenque iimäi ante apænegacäimpa. “Mæniñedê wadäni munitö iminite, Iñömö mönö Codito ponte ongongä tamëñedäni,” ante ayæ, ‘Wayömö ponte a ongongä atamönipa,’ ante tededäni êñëninque munitö iñömö edæ êñënämai imæwedäni. ²⁴ Wadäni mæniñedê ponte a ongöninque nämä incæ ante, Tömëmo Codito inömo imopa, ante babæ ante tedequinäni. Ayæ, Wængongui beyæ nê apænebo inömo imopa, ante babæ ante tedequinäni. Tömënäni, Wængongui nänö apænte ængainäni incæ æmæwo oda cædinque wapiticæ gocædänimpa, ante cædinque bamöngæ bai cædinque öönædê cæi bai cædinque nö öömönte bai cæquinäni inänipa. Incæte Wængongui nê apænte ængaingä inte edæ ee aqingä diyæ æmæwo oda cædinque wapiticæ goquinäni. ²⁵ Edæ iinque badämai iñonte botö ñöwo do apænebo êñëedäni. ²⁶ Iinque, pönente quëwëñömini wadäni, ‘Cöwä æedäni, önomæca mæ ongongampa,’ ante änäni êñëninque munitö acæ taodämai iedäni. Ayæ, ‘Oncö guimongacönê a ongongä apa quëwëedäni,’ ante änäni incæte pönënamäi iedäni. ²⁷ Edæ nænque tamönö gämæñö nâininque guidö gämæñö quingæ gote bai edæ tömänäni edonque ayönäni botö Waobo êñagaïmo inte botö ponque poncæboimpa. ²⁸ Edæ abadædi ñömæingäa weö pönäni bai munitö tömämäni adoyedê iñontobæ botö weca ponguimäni iminipa,” ante Itota apænegacäimpa.

Wacä êñagaïgä iimäi pöninque cæcæcäimpa, ante

(Mäadoco 13.24-37; Odoca 21.25-33, 17.26-30, 34-36)

²⁹ Ayæ godömenque apænedinque Itota, “Mänii nâni wæwëmämo nâni angä iinque go ate nænque iñontobæ wëmö badinque apäicä apädämai ingæimpa. Nëmöncoo öönædê inö wææ tæ wææninque waa tæ waa tæ wæængæimpa. Öönædê tæi ongongaincoo incæ wanca wanca cæte bai wapiticæ goquinö anguënê. ³⁰ Mæniñedê ate botö Waobo nê êñagaïmo inte oo pönömo öönædê ate bai ba adinque wabæca nâni cabo wabæca nâni cabo tömämæ quëwënäni Ca ca wæcædänimpa. Wæyönäni botö Waobo nê êñagaïmo inte boguimancodê mämö pöninque botö tæi pönii piñæmo inte ñäo apaite bai wæmö emonte wææmo acædänimpa. ³¹ Mæniñedê todompeta mönö ancadeca yedæ ænete bai we ööñonte botö anquedoidi inänite da godömo godinque tömënäni boguimä æmæñö betamonca æmæñö betamonca

nänö pö goinö godinque öönædê tömæne godinque edæ Wængongui nänö apænte ængainäni inänite æñete poncædänimpa,” ante Itota apænegantapa.

³² Ayæ, “Wængongui Awënë æyedënö ponguingää, ante botö iigowæ æbänö iwæ ante odömonte apænebo æñeedäni. Tömewæ müwæ badinque iigowæ wayabo tänä nä boca adinque minitö, Öñabo nänö bocaïnepo inte nænque näwatedæ baquinque bocapa, ante pönëninque edæ do æñëminipa. ³³ Ayæ adobaï mäninö botö apænedinö bai edæ do ba adinque minitö, Waocä nê ëñagaingä inömö edæ do odemö pöni ongöninque edæ oo poncæcäimpa, ante æñencæminimpa. ³⁴ Näwangä ämopa. Nöwomini ayæ mümini quëwëninque wænte godämai inömini mäninö botö apænedinö bai tömänö edæ do ñinque baquinö anguëñê. ³⁵ Öönædê ongöñömö inguipoga tönö wo ewente bai dæ ba incæte botö angainonque guiquënë edæ dæ badämai inte edæ cöwê tæi ongongæimpa,” angantapa.

³⁶ Ayæ, “Mänionæ æyedënö i, ante, Mäninepo ædepodö i, ante æñencæte ante mini wædinö ante æcämenque incæ æñënamäi ingampa. Tömänäni æñënamäi inönäni edæ Wængongui anquedoidi incæ æñënamäi inänipa. Wæmpocä Wëmo incæ æñënamäi inömotê Wæmpocä inömö tömengä adocanque incæ edæ nê ëñengä ingampa,” ante Itota apænegacäimpa.

³⁷ Ayæ godömenque iïmai ante apænegantapa. “Waobo nê ëñagaïmo inte botö ponguiönæ ñinque bayedê guiquënë Nöwee wodi Docä nani angaingä nänö quëwëñedê dodäni nani quëwengai bai adobaï edæ quëwenguinäni inänipa. ³⁸ Mäninêdê æpæ ayæ änämai inêdê nê quëwengainäni inömö önonque cænte bete, Monguingä, ante godonte ate möninque tömënäni Docä Nöwee oncö bai wipo mænonte nänö guiquiönæ ñinque baganca quëwencægadänimpa. ³⁹ Tömënäni inänite æpæ ænte gocæ cæganca tömënäni, Æpæ anguimpa, ante æñënamäi nani quëwengai bai adobaï æñënamäi cæyönäni botö Waobo ëñagaïmö inte adobaï edæ inontobæ poncæboimpa. ⁴⁰ Mäninêdê waoda tömëmoncodê guëa cæyöna adocanque ingante ö ænäni goyongä adocanque wæætê a ongoncæcäimpa. ⁴¹ Ayæ onquiyæna guëa apo cæyöna adocanque ingante ö ænäni goyongä adocanque wæætê a ongoncæcäimpa,” ante Itota odömonte apænegantapa.

⁴² Ayæ, “Awënë æyedënö ponguingää, ante æñënamäi imini inte minitö mümini inte edæ cöwä aquënë quëwëñäni. ⁴³ Nê awëmö ængä æyedënö ponguingää, ante æñente bai nê ëcäcä inömö, Bæ tate guiddämai

incæcäimpa, ante wææ wänoncædongäimpa, ante æñente quëwëdäni. ⁴⁴ Wao Wëmo ëñagaïmo inte botö adobaï minitö æñënamäi inömini do inontobæ ponguïmo imo ante minitö botö ponguïno ante wänö cöedäni,” ante Itota angacäimpa.

Awënë quincöo ante nê ædæmö aacä (Odoca 12.41-48)

⁴⁵ Ayæ Itota iïmai apænegantapa. “Inguipoga awënë inömö, Æcänö nê ëñengä inongä inte botö quincöo ante ædæmö aacä inguingää, äninque, Mänömai inte cæcä ingante adinque botö ämo ate tömengä nê angä badinque botö oncönê quëwëñäni inänite ædæmö adinque cængui eyepæ inönte godongä cæncædänimpa, angampa. ⁴⁶ Ante awënë wayömö gote ponte ayongä, Nê cæcä botö äno ante æñente cæcampa, ante adinque awënë wæætê tömengä ingante godö waa cæcä tömengä ingante godö waa cæcä ate nê waa cæcä inömö edæ waa tocæcäimpa. ⁴⁷ Minitö iminite näwangä ante apænebopa. Nê æñente cædingä ingante awënë, Bitö botö mänincöo tömancöo edæ nê aabi bacæbiimpa, ancæcäimpa.”

⁴⁸ “Wæætê edæ tömengä ingante nê cæcä incæ wënæ wënæ cæcä inongä inte mümöno pönëwëninque, Botö awënë wabänö wantæpiyæ pönämai imaingampa, ante pönengä ñinque æbänö babai. ⁴⁹ Tömengä edæ wadäni nani cæcabo inönänite näëmæ püinque tæi tæi pangä ñinque ayæ nê ti nämæ bete quidi quidi dowænte badäni tönö godongämæ cænte becä. ⁵⁰ ñinque tömengä, Æönædö ponguingää, ante wædämai inongante, Æyedënö ponguingää, ante æñënamäi inongante edæ awënë inontobæ pongä wæbaingampa. ⁵¹ Pöninque awënë inömö æñënamäi cædingä ingante baö wido wido todinque tömengä ingantedö äninque, Nê wadö tedete wadö cædinäni nani panguinö gote tömënäni tönö godongämæ ongonte wæcæcäimpa. Ante cædinque awënë tömënäni nani guingo imonte Ca ca wæyömö wido cæcä wæcæcäimpa,” ante Itota apænegacäimpa.

25

Baquedäni nani cæinö ante odömongampa

¹ Mäninganca apænedinque Itota ayæ godömenque odömonte apænegacäimpa. “Mäninêdê öönædê Awënë Odeye nempo quëwëñäni inömö baquedäni diete ganca nani cæi bai adobaï cæcædänimpa. Baquedäni inömö, Edëningä ñwoönæ monguingä, ante tica ëñëncæde æninque tömengä ingante beë tencæte ante tao godänipa. ² Baquedäni incæ tömënäni tincö ganca inäni nê æñëñäni inönäni edæ adoganca tincö ganca inäni nê æñënamäi inäni inänipa. ³ Nê æñënamäi

ināni guiquēnē tōmēnāni tica ēnēincade æninque gongapæncade ænāmaī goyōnāni, ⁴ nē ēñēnāni guiquēnē gongapæncadedē godō pe ññānte gongapæ eyepæ ænte godānīpa. ⁵ Mānōmaī ænte gote ayōnāni nē monguingā wantæpiyæ pōnāmaī dæ angā adinque tōmēnāni tōmānāni edæ mōinente ædo ædo cædinque mō ññānīpa.”

⁶ “Mō ññōñāni ayaōnæñēña pōni bayonte edæ, ‘Nē monguingā pongā ataqueedāni. Tao bee tenguēnē quēwēminii.’ ⁷ Ante aa pedāni ēñēninque edæ baquedāni tōmānāni ængæ gantidnque, Tica ēnēincade waēmō tī wodōnote bacæiṃpa, ante wadæ wadæ cædānīpa. ⁸ Cæyōnāni nē ēñēnāmaī ināni guiquēnē nē ēñēnāni inānite, ‘Mōnitō tica ēnēincade edæ wodo mōnæ ēmōmpa cæminii. Mīnitō næænimæ incæ pancapā pōnōmīni æncæmōnīmpa.’ ⁹ Åññōnāni, ‘Inæmpa, mōnitō beyæ mīnitō beyæ adobaī wīi eyepæ imaiṃpa, ante awædō. Edæ godoncæte ante nē mānāni weca gote godonte æedāni.’ ¹⁰ Ånāni ēñente godonte æncæ goyōnāni edæ nē monguingā do pongā adinque nē ēñente eyepæ næænināni iñōmō monguingā tōnō godongāmæ monguimæno oncōnē becæ guiidāni ininque edæ odemō tee mōnete intapa. ¹¹ Ayæ ate edæ wadāni gongapæ eyepæ ænte pōññāni do tee mōnete i adinque tōmēnāni, ‘Awēnē, awēnē ēñēni. Odemō wi ænebi guimōnie.’ ¹² Ante wæyōnāni awēnē wæætē, ‘Mīnitō imīnite nāwangā āmōpa. Mīnitō æminidō imīni, ante botō cōwē adāmaī imōpa,’ angampā.” Māninque ante odōmoncæte ante Itota iūmaī angantapa.

¹³ “Mīnitō guiquēnē, Åēnædō i, æyedēnō i, ante ēñēnāmaī imīni inte edæ wānō conte quēwēedāni,” angacāiṃpa.

Tadento nāni godonte æinta ante odōmōngampā

(Odoca 19.11-27)

¹⁴ Ayæ æbānō baquīi, ante odōmoncæte ante Itota, Waocā nē ēacā nānō cæi baī bacæiṃpa, ante apænegacāiṃpa. “Nē ēacā wayōmō gocæte ante cædinque tōmengā ingante nē cædāni inānite āñete māmongā pōññōnānite, Botō ēadinta incæ pōnōmō æninque mīnitō nē aamīni badinque botō beyæ godonte æncæmīnīmpa. ¹⁵ Åninque nē ēacā iñōmō, Nē cædāni æbānō nangui cædinque aaquīnāni, ante adinque tadento ñæñængade nāni godonte æinta incæ adocanque ingante ōnōmpo æmæmpoque mānīmpota pædæ pōññōninque wacā ingante tadento mentaa mānīmpota pædæ pōññōninque wacā ingante tadento adotaque pædæ pōnōngampā. Ayæ wadæ gocā.

¹⁶ Ininque tadento ōnōmpo æmæmpoque mānīmpota nē æningā iñōmō do godinque godonte æ godonte æ cædinque ōnōmpo

æmæmpota tōmengā nānō ænīmpota adopota æñongā edæ tadento ōnōmpo tipæmpoga bapa. ¹⁷ Ayæ tadento mentaa nē æningā adobaī godonte æ godonte æ cædinque mentaa nānō ænīnta adopota wæætē æñongā edæ tadento mēa go mēa bapa. ¹⁸ Wæætē adotaque nē æningā guiquēnē tōmengā wadæ godinque onguipodē ææ wodinque awēnē godonte æinta æninque tee moncate wē wodongampā,” angantapa.

¹⁹ Ayæ, “Wantæpiyæ ate tōmēnāni awēnē adodō pōninque, Botō qui eyepæ æncæboiṃpa, ante cædinque tōmēnāni nāni ænte aadinta ante cōwā acantapa. ²⁰ Ōnōmpo æmæmpoque tadento nē æningā iñōmō edæ æmæmpota adopota nānō godonte ænīnta ænte pōninque awēnē ingante, ‘Awēnē, bitō botō imote, Aacæbiṃpa, ante tadento ōnōmpo æmæmpoque mānīmpota pædæ pōññōmi æntabōpa. Åninque botō godonte ænte godonte ænte edæ nangui cædinque edæ mānīmpota adopota æmæmpota dobæ æmōi ae.’ ²¹ Angā wædinque tōmengā awēnē iñōmō, ‘Badogaa. Botō imote nē cæbi inōmi inte bitō ædæmō aabi inte ñōwo waa cæbi æmōpa. Bitō wædænque æninque cōwē ædæmō aabi adinque botō ñōwo nangui pōni botō ēadincōo pōññōmō æninque bitō wæætē edæ nē aabi bacæbiṃpa. Botō bitō awēnē inōmo inte watapæ tote quēwēmo iñōmote bitō edæ āāñōmonque baī bitō watapæ tote quēwenguinque pōe,’ angantapa.”

²² “Ayæ mēa tadento nē æningā adobaī pōninque, ‘Awēnē, bitō botō imote, Aacæbiṃpa, ante tadento mentaa mānīmpota pædæ pōññōmi æninque botō godonte ænte godonte ænte edæ nangui cædinque edæ mentaa mānīmpota adopota dobæ æmōi ae.’ ²³ Angā wædinque tōmengā awēnē iñōmō, ‘Badogaa. Botō imote nē cæbi inōmi inte bitō ædæmō aabi inte ñōwo waa cæbi æmōpa. Bitō wædænque æninque cōwē ædæmō aabi adinque botō ñōwo nangui pōni botō ēadincōo pōññōmō æninque bitō wæætē edæ nē aabi bacæbiṃpa. Botō bitō awēnē inōmo inte watapæ tote quēwēmo iñōmote bitō edæ āāñōmonque baī bitō watapæ tote quēwenguinque pōe,’ angantapa.”

²⁴ “Ayæ ate edæ adotaque nē æningā wæætē pōninque, ‘Awēnē, bitō nē waad- edāmaī cædōmi inte bitō wīi gadiñōmō wayōmō incæ edæ do wogaabīpa. Ayæ bitō wīi miñōmō wayōmō incæ edæ do tā pete gæte baī æmīpa, angantapa. ²⁵ Ininque botō edæ ancaī guñēnte wædinque edæ tao godinque onguipodē ææ wote bitō tadento daga wēninque edæ wē wodontabōpa. Bado, bitō qui incæ edæ do æmīpa,’ angantapa.”

²⁶ “Angä eñente wædinque tōmengä awënë wæætē, ‘Botō imote nē cæbi inōmi inte bitō wīwa pōnēmi inte wæntæye cæbi abopa. Botō æbānō gadāmaī iñōmō do wogaabopa, ante bitō edæ do eñēmitapa. Botō mināmaī iñōmō do tā pete gæbopa, ante bitō āninō edæ do eñēnīmi inte cæbitapa tōō. ²⁷ Iñinque māninō ante do eñēnīmi inte bitō edæ padata botō godonte æinta æninque edæ nē godonte ænāni weca godonte ænguēnēmi imitapa tōō. Mānōmaī cæbi bai botō ocæ ēmænte pōninque edæ botō qui do æninque wadāni nāni guidōninta tōnō edæ do æncædōmoimpa tōō.’ ²⁸ Āninque tōmengä ingante nē cædāni inānite awënë angantapa. ‘Minitō ñōwo iingā tadento adotaque tōmengä nānō nææñinta o æninque edæ tadento ōnompō tipæmpoga nē næængä ingante pædæ godōmīni æncæcāimpa. ²⁹ Edæ nē ēadāni inānite tōmānāni inānite godōmenque godonte ingæimpa. Iñinque tōmēnāni qui nanguī ēacædānīmpa. Wæætē edæ ēadāmaī inte ōmæpocā ingā guiquēnē tōmengä nānō ēadīncoo wædænque pōni i incæte edæ o ænte dæ ba wæcæcāimpa. ³⁰ Ayæ edæ māningā botō imote nē cædingā incæ wæntæye inongā inte cædāmaī iñongante minitō wēmō iñōmō nāni guingo imonte Ca ca wæwēñōmō tōmengä ingante edæ guitodonte wido cæmīni wæcæcāimpa,’ ante tōmengä awënë angampa.”

Tōmāmæ quēwēnāni inānite apænte angæimpa, ante

³¹ Itota mānōmaīnō ante odōmonte apænedinque godōmenque apænegacāimpa. “Botō anquedoidi tōnō godongāmæ pōninque botō Waobo nē eñagaimo inte ñāō apāite bai nē ēmōmo inte poncæboimpa. Māniñedē botō pōñedē botō Awënë tæ containpaa tæ contadinque edæ ōñædē waa pōni ongōnāni bai waa pōni ongoncæboimpa. ³² Māniñedē tōmāmæ quēwēnāni botō weca godongāmæ ponte a ongoncædānīmpa. Ayæ nē aacā tōmengä cæñināni inānite apænte adinque bodegoidi æmæñō cōnōninque cabodaidi æmæñō nānō cōnōnō bai cædinque botō iñōmō edæ imæca quēwēnāni tōmānāni inānite apænte adinque pancadāniya inānite æmæñō gōnōninque wadāni inānite æmæñō gōnōmo ongoncædānīmpa. ³³ Obegaidi bai nē eñente cædāni inānite botō tōmēmæ inō gōnōninque wæætē cabodaidi bai nē eñēnāmaī cædāni inānite botō dipæmæ inō gōnoncæboimpa.”

³⁴ “Gōnōninque botō Awënë Odeyebo inōmo inte botō tōmēmæ inō nē ongōnāni inānite ancæboimpa. ‘Botō Mæmpo nānō nē waademīni inte pōedāni. Tōmengä inguipoga nānō badongaiñedē āninque, Awënë Odeye nempo minī quēwenguīnō

impa, ante do badongacāimpa. Iñinque Awënë Odeye nempo minī quēwenguēñēnō ñōwo ænte quēwēedāni. ³⁵ Edæ botō gue ænente wæyōmo minitō cænguī nē pōnōmīni cængaboimpa. Tepæ gæwænte wæbo adinque minitō nē pōnōmīni begaboimpa. Botō Wabo imo inte cowodē bai pōmo adinque minitō, Pō guī, āmīni eñēninque minitō weca guīte eñagaboimpa. ³⁶ Ayæ ōmaabo inte wæyōmo minitō pōnōmīni wēñagaboimpa. Wēnæ wēnæ inte wæyōmo minitō ponte nē waadete cægaimīni imīnīpa. Tee mōnete oncōnē ongte wæwēñōmote botō weca eñacæ nē pongaimīni inōmīni inte minitō ñōwo wæætē edæ botō nempo guīte quēwēncæmīnīmpa,’ ancæboimpa.”

³⁷ “Āmo eñēninque edæ nē nō cædāni guiquēnē, ‘Awënë iñæmpa æyedēnō bitō gue ænente wæyōmi dicæ pōnōmōni cæmitawogaa, ancædānīmpa. Ayæ tepæ gæwæñōmi dicæ pōnōmōni hebitawogaa. ³⁸ Āyedēnō wacā incæ pōmi adinque mōnitō dicæ, Pō guī, antamōniyaa. Ayæ ōmaabi adinque dicæ pōnōmōni wēñabitawogaa. ³⁹ Ayæ wēnæ wēnæ inte wæyōmi incæ tee mōnete wæyōmi incæ mōnitō dicæ acæ pontamōniyaa.’ ⁴⁰ Ante wæyōnāni botō Awënë Odeyebo inōmo inte edæ tōmēnāni inānite, ‘Iñæmpa botō tōniñadāni iñōnānite adocanque ōnonganque iñongante minitō waa cægaimīni inte edæ botō imote do waa cæte imīnīpa āmo eñēedāni,’ ante tōmēnāni inānite ancæboimpa,’ angantapa.

⁴¹ “Ayæ botō dipæmæ inō nē ongōnāni inānite botō nē Awënë inōmo inte ancæboimpa. ‘Minitō nē tente wæquēnēmīni guiquēnē ñōwo edæ gā gobæwedāni. Edæ Wængonguī do badōninque, Wēnæ tōnō tōmengä anquedoidi nānō nē ēmiñæñāni tōnō wantæpiyæ cōwē wæñāmaī nāni bæcote wæquīñōmō, ante nānō badongaiñōmō minitō māniñōmō edæ gote guībæwedāni,’ ante edæ ancæboimpa. ⁴² ‘Edæ botō gue ænente wæbo adinque minitō edæ dicæ pōnōmīni cæntabogaa. Gæwænte wæyōmo minitō dicæ pōnōmīni betabogaa. ⁴³ Ayæ Wabo imo inte cowodē bai pōmo adinque minitō dicæ, Pō guī, āmīnitawogaa. Ōmaabo inte wæyōmo weocoo dicæ pōnōmīni wēñatabogaa. Wēnæ wēnæ inte wæbo incæ tee mōnete wæbo incæ minitō iñōmō edæ dicæ eñacæ pōmīnitawogaa,’ ancæboimpa.”

⁴⁴ “Āmo eñente wædinque nē eñēnāmaī ināni iñōmō, ‘Awënë eñēmi. Bitō æyedēnō gue ænente tepæ gæwænte wæbitawo. Ayæ wabi bai inte æyedēnō pōmi atamōniyaa. Weocoo ōmaabi inte wæbi adinque, daicawo gawæmi adinque, tee mōnete wæbi adinque mōnitō bitō beyæ dicæ cædāmaī intamōniyaa.’ ⁴⁵ Āñōnāni botō iñōmō edæ tōmēnāni inānite, ‘Iñæmpa

wacä ingante önonganque iñongante munitö cædämaï ingaimini inte botö imote edæ mäninö do cædämaï ingaminimpa. Ämo eñëmaïminipa, ante piincæboimpa. ⁴⁶ Ìninque tömënäni nani tente wæwenguinö incæ æmæwo wadæ gocædänimpa. Wæætë nê nõ cædäni guiquëhê cöwê wæxnämaï nani quëwenguinö æmæwo gocædänimpa, ante Itota apænegacäimpa.

26

Itota ingante bæi ongongcäimpa, ante cædänipa

(Mäadoco 14.1-2; Odoco 22.1-2; Wäö 11.45-53)

¹ Ayæ mäninö tömänö ìinque apænete ate Itota tömengä miñæ nê godäni inänite apænecantapa.

² —Mëönaa go ate wodo pænta gogaiönæ bai Patowa mönö ææmæ cænguionæ impa, ante do eñëminipa. Mänionæ iñonte botö Waobo eñagaïmo iñomote botö imote bæi ongöningue edæ, Awæ ñænquedimæ cæte ìingä ingante töö godöningue daagö tim-pote wææ tiwadinque edæ sænö gö cæte wæxnöedäni, ante botö imote pædæ godönäni æncædänimpa, ante apænegacäimpa.

³ Mäniñedë, Wængongui qui, ante nê godongä ñænængä pöni Caiapato oncönë godongämæ pöningue wadäni nê godönäni ñænænäni tönö oodeoidi inänite nê aadäni nani Picæncabo iñömö, ⁴ adoyömö pönëningue, Mönö æbänö babæ cæte Itota ingante awëmö bæi ongonte ænte wæxnguii, ⁵ ante pönënanäni incæte,

—Ìñæmpa ææmæntedæ iñonte wæxnömö bai tömänäni ængui bate Yæ yæ ante piinte cæcædönänimpa, ante pönente wædinque mönö ædö cæte mäniñedë cæqui, ante wægadänimpa.

Itota ocaboga onquiyængä ogui wapæ gao cæcacampa

(Mäadoco 14.3-9; Wäö 12.1-8)

⁶ Itota mäniñedë Betänia godingue nê baadingä Timönö oncönë guii eñadinque cæncongantapa. ⁷ Cæncöñongä wacä onquiyængä iñömö tömengä weca pö guidingue ogui wapæ nani nangui godonte ænimæ dica adabatodo waincadedë pe ñiñænte nänö mänimæ incæ ñowo ænte nämö Itota ocaboga edæ gao cæcacantapa. ⁸ Mänömaï cæcä adingue Itota miñæ nani gocabo iñömö piiniquë,

—Ìñæmpa önonque gao guërente bai cæcampa töö, änänitapa. ⁹ Edæ iimæ iñömö nangui pöni æninta beyæ godonte ænguëñëmæ imæmpa. Godonte ænte bai ömæpodäni inänite wæætë godonguënë apa.

¹⁰ Ante piinäni wædinque Itota iñömö,

—Quimæ piüwëminii. Ìingä onquiyængä iñömö botö imote waa pöni cæcä apa quëwëminii. ¹¹ Ìñæmpa ömæpodäni ante mïni äninäni munitö weca cöwë quëwëñönäni botö wæætë munitö weca wii wantæpiyæ quëwencæboimpa. ¹² Mänimæ ogui wapæ botonga gadongadingue tömengä botö baö daga wenguinque eyepæ iñonte edæ öni paacantapa. ¹³ Minitö iminite näwangä ante apænebopa. Waa pöni botö apænedö apænedingue tömäme æyömömë apænedäni eñënäni mäningä onquiyængä nänö cædinö ante adobai tededäni eñente pönecædänimpa, ante Itota apænegacäimpa.

Itota ingante Codaa odömönte godonccæte ante cæcampa

(Mäadoco 14.10-11; Odoco 22.3-6)

¹⁴ Ayæ mäniñedë nani, Dote, äincabo iñönäni adocanque Codaa Icadote nani änogä iñömö, Wængongui qui, ante nê godönäni ñænænäni weca gocantapa. ¹⁵ Godingue apænecantapa.

—Botö, Itota æyömönö ongongä, ante pönö odömömo ate munitö bæi ongonte æmïni ìinque æpotadö, Eyepæ i, ante pönömïni æmaïmo.

Angä eñëningue tömënäni padata tiguitamö incæ todëinta ganca tee mampote tömengä ingante pædæ godönäni. ¹⁶ Æningä inte tömengä cöwê cöwä adinque, Æbänö cæte Itota ingante odömönte pædæ godömo ate ænguünäni, ante pönente cægacäimpa.

Päö tönö owæta Itota pædæ pönongä cænte bedänipa

(Mäadoco 14.12-25; Odoco 22.7-23; Wäö 13.21-30; 1 Coodintoidi 11.23-26)

¹⁷ Mäniñedë oodeoidi päö yedæ æmpoqui ömæmö i nani ææmæ cæte cænguionæ tæcæ ba adingue Itota miñæ nê godäni iñömö, Wodo pænta gogaiönæ bai Patowa mönö ææmæ cænguionæ impa, ante pönente wædinque tömengä weca ponte änänitapa.

—Æyömönö bitö beyæ Patowa ææmæ ante cæmöni ate cænguimii.

¹⁸ Äñönäni tömengä nänö emiñæna mënaa ìinate äninque,

—Minatö waodäni nani quëwëñömö godingue onguiñængä botö nê äningä ingante bee tëningue minatö iimainö ante apænemina eñengæda. “Mönö Awënë iimäi angampa. Botö wænguionæ oo pöni bapa cæbii. Botö nê emiñænanäni tönö botö bitö oncönë Patowa ææmæ ponte cæncæmönimpa, angampa,” ante ämina eñengæda, angä.

¹⁹ Eñente wædinque tömëna Itota nänö änö bai cædinque, Patowa ææmæ cænguï impa, ante cædatapa.

²⁰ Gáwadecæ bayö Itota tönö, Dote, nani äincabo ponte godongämæ cæncæte ante ongönänitapa. ²¹ Cæncöñönäni Itota,

—Nāwangä ante apænebo eñēdäni. Mini cabo incæ adocanque, Æncædänimpa, ante botö imote odömonte pædæ godonguingä ingampa.

²² Ante apænebo eñēninque tömēnāni wæwente bayönäni adocanque adocanque, —Awēnē, botö imotedö ante dicæ apænebitawogaa.

²³ Ante tedehyönäni Itota wæætē, —Botö tönö guëa adotaca nē müi cædingä iñömö tömengä botö imote nē odömonte pædæ godonguingä ingampa. ²⁴ Edæ dodäni Wængongui beyæ nani yewæmongainö bai cædinque botö Waobo eñagaïmo inte cöwē wænte goquēnēmo imodö anguēnē. Ìninque edæ botö imo nē odömonte godonguingä iñömö tömengä nänö wæquinque ingæïmpa. Māningä wii eñate bai waa toquēnengä incædongäïmpa.

²⁵ Ante apænebo wædinque Codaa iñömö Itota ingante nē odömonte godonguingä iñömö edæ,

—Awēnē nē Odömömi eñēmi, botö imotedö ante ämitawogaa.

Ante äñongante edæ Itota, —Tömēmi nāmā incæ, Botö imotedö, ante do te debi ïmpa.

²⁶ Ante apænebo ayæ cæncöñönäni Itota päö bæi ongonde æninque Wængongui ingante waa ate apænedinque päö pä æninque tömengä miñæ nē godäni inänite pædæ godö pædæ godö cæcantapa.

—Botö baö bai ïmpa, ante pædæ pönömo æninque munitö Ao ante cædäni.

²⁷ Äninque ayæ bequimæ owætaca bæi ongonde æninque Wængongui ingante waa ate pönente apænedinque pædæ godöninque,

—Botö wepæ bai ïmpa, ante pædæ pönömo æninque tömämüni Ao äninque godongämæ intaca beedäni, angantapa.

²⁸ Botö wepæ ïimæ bai ïmpa. Wængongui do apænedinque, Botö pönö cæbo ate munitö Ao ämini Ìninque mönö godongämæ waa cæte quëwengæïmpa, angacäïmpa. Nöwo adobai müne äninque apænebopa. Botö wepæ ante Ao ante æmini inte mönö godongämæ waa cæte quëwengæïmpa. Edæ nangui imüni müni wēnæ wēnæ cædinö beyæ ante nā mēnongaquimæ ïmpa. ²⁹ Nāwangä ämopa. Botö Mæmpo Awēnē Odeye iñongä botö tömengä nempo quëwēninque munitö tönö godongämæ müimæ botö beganca mämimæ yowepæ nöwo æmæwö hebo tamēñedäni, ante Itota apænegacäïmpa.

Dicæ abogaa, ante Pegodo anguingä, ante apænebo

(Mäadoco 14.26-31; Odoca 22.31-34; Wäö 13.36-38)

³⁰ Ayæ Wængongui ingante ämotamüni ante tao godinque Odibowænquidi godänitapa. ³¹ Goyönänite Itota apænebo cantapa.

—Wængongui beyæ yewæmöninque, “Nē aadingä ingante tacabo dæ wængä Ìninque edæ cæningäidi obegaidi panguimæ goquimpa,” ante nani yewæmonte angainö bai cædinque munitö tömämüni ñöwoönæ woyowotæ incæ botö dæ ämo beyæ guingo imonte badinque edæ panguimæ goquimüni imüni. ³² Panguimæ gomüni incæte botö edæ ñäni ömæmonte ate Gadideabæ täno gote a ongöñömo munitö ayæ pödäni.

³³ Angä wædinque Pegodo guiquēnē,

—Ïñæmpa dæ ämi beyæ tömähäni guingo imonte badinque panguimæ godäni incæte edæ botö guiquēnē cöwē panguimæ godämaï incæboïmpa.

³⁴ Äñongante Itota wæætē,

—Bitö imite nāwangä ante apænebo eñē. Nöwoönæ woyowotæ incæ tawadiya pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque angümü ïmpa.

³⁵ Angä eñente wædinque,

—Ïñæmpa bitö tönö guëa wæmo incæte botö cöwē, Dicæ abogaa, ante edæ änamäï incæboïmpa.

Äñongä tömengä miñæ nē godäni tömähäni adodö ante angadänimpa.

Guetämüni iñömö Itota Wængongui ingante apænebo

(Mäadoco 14.32-42; Odoca 22.39-46)

³⁶ Mänüi godinque Itota yabæ incæ Guetämüni nani äñömö tömengä miñæ nē godäni tönö gocantapa. Mänüñömö pöninque tömengä tömähäni inänite,

—Tæ contate ongöñömini botö godömenque godinque Wængongui ingante apænete pömoedäni.

³⁷ Äninque Pegodo tönö Tebedeo wēna inate ænte mäocä goyönäni Itota iñömö nangui wæwente badinque ancai guñēninque, ³⁸ tömähäni inänite,

—Botö wængüimämo pönö anguēnē, ante botö önowoca incæ pæmænte wæte wængui wæ, ante wæbo tamēñedäni. Munitö guiquēnē ämonca godongämæ wææ aacöedäni.

³⁹ Äninque Itota wædænque godömenque godinque guidömämæ ñongænte Wængongui ingante apænebo cantapa. “Botö Mæmpo, bitö Ao äninque edæ ti nā wængüimæ bai ö ænte bai cædinque botö imote edæ, Wænämäï incæbiimpa, ämi Ìninque botö edæ waa to-bäimopa. Incæte botö äñönö bai wii cædinque wæætē tömēmi äñönö bai cæe,” ämopa.

⁴⁰ Ante apænebo ate tömengä miñæ nē godäni weca adodö ponte ayongä tömähäni

mō ñōnāni adinque tōmengä Pegodo ingante,

—Botō tōnō wānō conguēnēmīni incæ mīnitō adoque ooda incæ wīl aacōmīnii. ⁴¹ Mīmōno waa cæinēmōnīpa, ante ēwocayōmīni baō aquīlīñō ēñamīni inte wæntæye bamīnīpa. Ìnīnque edæ wānō cōnīnque nāmā beyænque ante Wængonguī ingante apænedīnque edæ, Wīl wēnæ wēnæ cæinēmōni bacæmōnīmpa, ante apæneedāni.

⁴² Änīnque Itota adodō wadæ gote wæætē apænedīnque, “Botō Mæmpo, botō bedāmaī ññōmote bitō ò ænāmā ñni ñnīnque botō cōwē bitō āmaī becæboīmpa.”

⁴³ Ante Wængonguī ingante apænete ate ponte ayongante mōwo mōinente æmō cæte wædinque mō ññōnāni. ⁴⁴ Adinque edæ tōmengä wæætē adodō godīnque ññowo mempoga go adopoque nānō apænedīnō ante adodō ante Wængonguī ingante ñnīnque apæncantapa. ⁴⁵ Ayæ tōmengä mīñæ nē godāni weca wæætē adodō pōnīnque,

—Ìñæmpa cōwē mōmīni edæ cōwē guēmāmīni awædō. Aquēnē quēwēedāni. Botō Waobo ēñagāimo inte botō wæwengūiōnæ do bayonte edæ botō ñmote nē wēnæ wēnæ cædāni ññānīte nē godō odōmonguīgä ññōmō do godongāi ataque-edāni. ⁴⁶ Ængæ gantite mōnō gocæīmpa. Botō ñmo nē odōmōnte godonguīgä obo pōni pongä tamēñedāni, angacāīmpa.

Itota ingante bæi ongonte ænānīpa
(Mäadoco 14.43-50; Odoca 22.47-53; Wäo 18.2-11)

⁴⁷ Ayæ apæneyongä edæ Codaa wodi tōmēnāni nāni, Dote, ante gocabo adocabo ñnīgä incæ ññowo pongantapa. Wængonguī quī, ante nē godōñāni ññænænāni tōñō oodeoidi ññānīte nē aadāni nāni Picæncabo tōñō da pōññōnāni pōnīnque wadāni tæiyænāni adobāi yaēmē nææñnīnque canta nææññāni inte Codaa mīñæ pōññānitapa. ⁴⁸ Doyedē ññōmō nē odōmōnte godoncæ cæcä Codaa ññōmō tōmengä mīñæ poncæ cædāni ññānīte ññāmā ante wēñēñedē apænedīngä ñnongāīmpa. “Botō odōmōnte quēē bemōmo adinque mīnitō wæætē, Tōmengä ingampa, ante adinque tōmengä ingante edæ bæi ongonte ò æedāni.”

⁴⁹ Ante do äningä inte Codaa ññowo ññōmō Itota weca pōnīnque,

—Awēnē nē Odōmōmi ñni, bitō ñni.
Änīnque edæ waa cæte bæi quēē bemon-gantapa. ⁵⁰ Adinque Itota wæætē,
—Botō mīñæ nē godīmi ēñēmī. Māñinō ante bitō ponque pō cæbāwe.

Äñongä wadāni tōmengä weca pōnīnque pædæ gopo bæi ongonte Itota ingante æññānitapa.

⁵¹ Wængonguī quī, ante nē godongä ññænængä pōni ingante nē cæcä māñññōmō ponte a ongongä adinque Itota tōñō pōñnīgä adocanque pædæ guīipote yaēmē o togænte æñnīnque māñnīgä nē cæcä ingante tæi pānīnque ññōmonca wangō tamoncacantapa. ⁵² Adinque Itota ññōmō tōmengä ingante,

—Yaēmē adodō mīni tīe, ämopa. Edæ yaēmē nē o togænte nææññāni tōmāññāni ññānīte yaēmēnca adobāi tacadāni wæncædānīmpa. ⁵³ Ìñæmpa æbāñō ante pōññēmi edæ. Wængonguī anquedoidi adocobodānīnque tei mīdo ganca ññōñānīte botō Mæmpo ingante apænebo bæi tōmengä do angä ñnīnque anquedoidi nāni cabo nāni cabo incæ ññonmpo tīpæmpoga go menca-bodāñīya botō beyæ ponte cæbāññānīpa, ante pōññēmiyaa. ⁵⁴ Incæte botō Codito ññōmo inte botō Mæmpo ingante māññōmāi apænebo ēñente cæcä bæi dodāni, Codito ññāmā wæncæcāīmpa, ante Wængonguī angä ēñente nāni yewæmongainō ante ædō cæte ñnīnque bacædōñīmpa, ante awædō, ante apænegacāīmpa.

⁵⁵ Ayæ wæætē ññowo pōññāni ññānīte Itota apæncantapa.

—Mīnitō ññæmpa, Bitō nē ò æññīmi ññīpa, ante bæi cædinque botō ñmote canta tōñō yaēmē næænte ò æncæte ante pōmīni awædō. Botō Wængonguī oncō yabæcōñē ññō ññō ññō ññō apæñecōññōmo mīnitō botō ñmote yao ongōññāmāi ee amīnitapa tō. ⁵⁶ Incæte mīnitō Wængonguī beyæ nē apænedāni nāni yewæmongainō bæi ññowo ñnīnque baquinque cæmīni abopa.

Ante apæñecä ēññēnīnque tōmengä emīñængä nē godīñāni tōmāññāni edæ nāwæ pangūimæ cæte wodi ññonogadāñīmpa.

Nē Apænte nāni Äñoncabo weca Itota on-gongampa

(Mäadoco 14.53-65; Odoca 22.54-55, 63-71; Wäo 18.12-14, 19-24)

⁵⁷ Ayæ Itota ingante nē yao ongonte æññāni guīquēñē, tōmengä ingante māo godīnque edæ, Wængonguī quī, ante nē godongä ññænængä pōni ñnongä Calapato weca ænte godāñīnque. Māñññōmō do pōñnīnque nē wææ ante odōmōññāni tōñō oodeoidi ññānīte nē aadāni nāni Picæncabo tōñō do a ongōññānīmpa. Māñññōmō Itota ingante ænte māñññōññāni pongacāīmpa. ⁵⁸ Pegodo guīquēñē tōmengä mīñæ ayæ ayæ godīnque, Wængonguī quī, ante nē godongä ññænængä pōni ñnongä oncō yacōmoyæ ññōmō pō guīdīnque, Itota ingante æbāñō cæquīññāni, ante wææ wāññōññāni weca pōñnīnque tæ contate waa acongantapa.

⁵⁹ Wængonguī quī, ante nē godōññāni ññænænāni tōñō nē Apænte nāni Äñoncabo tōmāññāni, Mōñō apænte ante wæññōmō

wæncæāimpa, ante cædinque, Itota nānō wænguinque wēnæ wēnæ cæcā ingampa, ante æcānō babæ ante anguingāā, ante diqui diqui minōnāimpa. ⁶⁰ Incæte nanguī ināni ponte babæ apænedāni incæte, Æcānō eyepæ babæ ānaa, ante eadæ dæ angā wædānitapa. Ayæ ate mēnaa nē babæ wapiticæ ānōna inte awēnēidi weca pō guite, ⁶¹ apænedinque,

—Īngā, “Wængonguī tæiyæ waēmō oncō ongō incæte botō ĩñōmō tæī piñæmo ĩnōmo inte godō cæbo bai wo tænguimæ wææmāimpa. Ayæ mēōnaa go adoōnæque ĩñonte botō wæætē do mænōmāimopa,” angā ēñentamōnapa tōō. ⁶² Ante apæneda ēñēninque nē godongā ñænængā pōni ĩnongā incæ ængæ gantidinque Itota ingante,

—Īñæmpa pæ wēēnebii. Tōmēna bitō ĩmitedō ante godō āninque nāna ānīnō ante bitō æbānō āmii.

⁶³ Āñongā Itota cōwē ānāmāi eadæ pæ wēēnecā. Adinque nē godongā ñænængā pōni ĩnongā wæætē,

—Wængonguī nē Quēwengā inte tōmengā nānō ēñēñongā eadæ nāwangā ante apænebi ēñēmōnii, āmopa. Mōnō Codito ĩñōmō Wængonguī Wengā ĩnongā ingampa. Bitō ĩñæmpa māñimīdō ĩnōmi ĩmitawo.

⁶⁴ Mānōmāi angā ēñēninque Itota wæætē,

—Tōmēmi bitō ānīnō bai māñimīdō ĩnōmo ĩmopa. Incæte botō godōmenque apænebo ēñēdāni. Īncayæ ate botō ĩñōmō eadæ Waobo ēñagaīmo inte eadæ Wængonguī nē Tæī Piñængā ingā tōmēmængā ĩnō tæ con-tabo adinque mīnitō ayæ ate botō oōnædē boguimancodē pōmo acæmīnīmpa.

⁶⁵ Ante apænecā ēñente wædinque nē godongā ñænængā pōni ĩnongā piinte bad-inque, Ēñente awædō, ante bai cædinque eadæ nāmā weocoo wānā ñænte,

—Wængonguī ingampa mānōmāi cæquingāā. Eadæ tōmengā nāmā incæ babæ ante nē wēnæ wēnæ apænecā ĩninque idæwaa. Wacā tōmengā ingantedō, Wēnæ wēnæ cæcā atabopa, ante nē ancæcāimpa, ante ñōwo diqui diqui mīnāmāi ingæimpa. Tōmengā nāmā Wængonguī Wengā inte bai babæ ante nānō ānewēñīnō ante do ēñēmīni inte mīnitō, ⁶⁶ eadæ æbānō ante pōnēmīni.

Ante āñongā nē apænte ānāni guiquēnē,

—Nānō wænguinque ānewengampa tōō.

⁶⁷ Ante apænte āninque eadæ pancadāniya Itota tōmengā awinca towæ tånōmōninque tæi tæi pānānitapa. Wadāni guiquēnē tōmengā ingante tamōninque,

⁶⁸ tōmengā ingante,

—Bitō Codito ĩmitawo. Æcānō bitō ĩmite awēmō nē pānaa, ante Wængonguī beyænque apænedinque apænebi ēñēmōnii, ante badete togadānīmpa.

Pegodo incæ, Dicæ abogaa, angampa
(Māadoco 14.66-72; Odoca 22.56-62; Wāō 18.15-18, 25-27)

⁶⁹ Ayæ Pegodo guiquēnē māñī wæipodē yacōmōñāa contate ongōñongā onquiyængā nē cæcā ĩñōmō tōmengā weca ponte apænedinque,

—Māningā Gadideabæ quēwēningā Itota tōnō bitō guēa cægōmitapa tōō.

⁷⁰ Ante apæneyongā tōmānāni nāni ayōmō Pegodo,

—Dicæ. Bitō ānō ante æbānō āmii, ante dicæ ēñēmogaa.

⁷¹ Ante āninque Pegodo yademō gāānē tao gote ongongā adinque wacā onquiyængā wæætē godongāmæ ongōnāni ĩnānite apænedinque,

—Māningā adobāi Itota Nāatadeta quēwēnongā tōnō nē cægōningā ingā aedāni.

⁷² Ante apæneyongā Pegodo wæætē,

—Wængonguī ēñēñongā botō nāwangā āmo ēñēdāni. Īngā onquiyængā nānō nē āningā ingante botō dicæ abogaa, angantapa.

⁷³ Ayæ wantæ ate māñīñōmō ongōnāni Pegodo weca pōninque,

—Īñæmpa Itota tōmengā tedecā bai adode nē tedebi inte bitō tōmengā mīñæ mīni nē gocabo adobi ĩmpa tōō.

⁷⁴ Āñōnāni eadæ Pegodo wæætē, Wængonguī ēñēñongā apænedinque botō nōingā āmopa, ante Wængonguī ēmōwo ante babæ tedewēninque tōmēnāni ĩnānite,

—Mīni nē angā ingante dicæ abogaa.

Mānōmāi ante tæcæ ānewēñongā eadæ tawadiya dobæ petapa. ⁷⁵ Pæ wædinque tōmengā, Æ Itota nānō ānīnō bai ĩmpa, ante wæcantapa. Itota, “Tawadiya pedāmāi ĩñonte bitō botō ĩmotedō ante wadō ante apænedinque, Dicæ abogaa, ante eadæ mempoga go adopoque anguīmi ĩmpa,” angantapa. Ante Pegodo, Nōwo nānō pequinque do pecampa, ante wædinque oncodo taote eadæ guingo imonte wædinque eadæ Ca ca wægacāimpa.

27

Itota ingante Pidato weca cænte māo gōñōnāniya

(Māadoco 15.1; Odoca 23.1-2; Wāō 18.28-32)

¹ Ayæ ñāō bayonte, Wængonguī quī, ante nē godōnāni ñænænāni tōnō ood-eoidi ĩnānite nē aadāni nāni Picæncabo tōnō apænte āninque eadæ, Itota ingante wæñongæimpa, ante godongāmæ Ao angadānīmpa. ² Āninque tōmengā ingante yao ongonte goti winte æninque eadæ odōmānoidi beyæ Oodeabæ awēnē gob-edōnadodo Pidato ingante māo gōñōnāni ængacāimpa.

Codaa wodi iimaï cædinque wængampa

³ Ayæ, Itota ingante wænongæimpa, ännäni eñente wædinque Codaa tömengä ingante nê godöningä guiquënë, Æ tömengä nänö wænguinquemê cæboinö ante pönëmogaa, ante guingo imonte wæcantapa. Ayæ, Wængongui qui, ante nê godönäni ñænænäni tönö nê aadäni näni Picæncabo adodö æncædänimpa, ante todëinta padatamö tömënäni näni pönontamö adodö pædæ godoncæte ante gocantapa.

⁴ Ayæ tömënäni inänite,

–Inæmpa cæboo. Edæ Itota wënæ wënæ cædämaï iningä inongante botö nê godönimo inte wiwa cæbo imo ante awædö.

Ante äñongante tömënäni guiquënë,

–Tömëmi wënæ wënæ cædimi inte wentamö bitö entawënö adinque mönitö ædö cæte wæquimöni. Tömëmi edæ nê cædimi inte edæ abaimipa töö.

⁵ Ännäni wædinque edæ tiguitamö incæ Wængongui tæiyæ waemö oncönê wo wææntodöninge Codaa oncodö tao godinque edæ nämä önömenca wëä æi goti guemencate dobæ wængacäimpa.

⁶ Mäninta wo wææntodongä ate wædinque, Wængongui qui, ante nê godönäni ñænænäni incæ tiguitamö yao yao ongonte æninque,

–Wepæ nädantamö adinque Wængongui Baa ancæcäimpa, ante pönente wædinque mönö, Wængongui qui, ante ædö cæte godonguimö.

⁷ Ante godongämæ pönencöninge tömënäni, Oodeoidi inämaï inäni wodido bacæimpa, ante ömæ nê dai bædongä eadiömæ incæ mänii tiguitamö godonte ængadänimpa. ⁸ Ininque wepæ nädantamö godonte näni ænimæ ante, Wepænguipo impa, ante näni pemönimæ inömö nïwo ganca impa. ⁹ Ininque do inömö Eedëmiya wodi Wængongui beyæ iimaï ante nänö apænegainö bai inque batimpa. “Idægoidi, Tömängä beyæ mänimpotamö godonte ængæimpa, ante näni änimpotamö incæ todëinta tiguitamö padatamö æninque, ¹⁰ tömënäni Wængongui botö imote nänö äninö bai eñente cædinque edæ dai bædongä eadiömæ godonte ænänitapa,” ante Eedëmiya nänö angainö bai do inque batimpa.

Pidato weca Itota ongongampa

(Mäadoco 15.2-5; Odoca 23.3-5; Wäö 18.33-38)

¹¹ Itota inömö awënë gobedönadodo Pidato weca a ongöñongante awënë gobedönadodo inömö tömengä ingante,

–Bitö oodeoidi Awënë Odeyebi imitawo.

Äñongante,

–Bitö tömëmi änö bai botö mänimodö imopa, Itota angantapa.

¹² Ayæ, Wængongui qui, ante nê godönäni ñænænäni tönö nê aadäni näni Picæncabo guiquënë Itota ingante äninque, Wënæ wënæ cæbipa töö, ante äñönäni tömengä edæ pæ wëenecä. ¹³ Ate wædinque Pidato wæætê,

–Bitö æpogadö wënæ wënæ cæbi imipa, ante nangui ännäni eñënamäi inte bitö ædö cæte edæ pæ wëenebii.

¹⁴ Äñongante Itota inömö tömënäni näni äninö ante adodeque ante apænedämaï ingä adinque awënë gobedönadodo wæætê, Quiëmê bai pæ wëenecä awædö, ante wægcäimpa.

Itota wæncæcäimpa, ännäni

(Mäadoco 15.6-20; Odoca 23.13-25; Wäö 18.38-19.16)

¹⁵ Mänimæ awënë gobedönadodo mänifedê wadepo inö wadepo inö cöwê iimaï cædongäimpa. Oodeoidi ææmæ näni cæyedê gobedönadodo inömö, Nê tee mönete ongönäni inänite adinque mönitö æcänö ingante ämini inimo cæbo goquingä, ante äñongä ännäni eñëninque tömengä tömënäni näni äningä adocanque ingante inimo cæcä godongäimpa. ¹⁶ Mänifedê adocanque wënæ wënæ nänö cædinö beyæ tee mönete a ongongampa, ante tömänäni do eñënonänimpa. Mäningä emöwo Badabato inongäimpa. ¹⁷ Ininque nangui inäni godongämæ pönäni ate Pidato tömënäni inänite edæ,

–Æcänö ingante mönitö beyæ inimo cæbo abæ tawænte gocä ænguimäni. Badabato ingante inimo cæbo gocä ænguimäni. Wæætê edæ Itota Codito mini ängongä ingante inimo cæbo gocä ænguimäni, angacäimpa.

¹⁸ Edæ do inömö, Itota gomonga cæcä ate wædinque tömënäni tömengä ingante pïinte adönänimpa. Mäninö beyæque tömënäni Itota ingante bæi ongonte botö nempo æte mämö pædæ pönönänitapa, ante Pidato do eñengantapa.

¹⁹ Ayæ odömänoidi näni apænte anguimpaa ayæ ongöñongä Pidato nänöögängä inömö wacä ingante da pönongä pöninge Pidato ingante nänöögängä beyæ apænecantapa. “Botö nïwoönæ möwocodê wïlmöninge mäningä nê nö cædongä beyæ nangui wogæi wogæi cæwënte wæbopa cæbii. Bitö tömengä ingante gampodämaï inte gomö aquënë quëwêë, ämopa,” ante bitö nänöögängä angampa, angantapa.

²⁰ Ängä eñente wæyongä, Wængongui qui, ante nê godönäni ñænænäni tönö nê aadäni näni Picæncabo näni äincabo guiquënë wadäni nê godongämæ ongönäni inänite ännitapa. Mönitö Pidato ingante iimaï äedäni. Badabato ingante inimo cæbi gocæ. Itota ingante wæætê ämi wænönäni wængæ, ante äedäni, ännitapa. Awënëidi incæ mänömaï ännäni eñëninque godongämæ

ongönäni Ao änänitapa. ²¹ Awënë Pidato iñömö tömënäni Inänite äninque,

—Mënaa ongöna iñömate minitö æcänö ingante ämïni ñimpo cæbo goquingäa.

Äñongante,

—Badabato ingante ämönipa.

²² Änäni wædinque Pidato wæætë,

—Ininque Itota Codito mïni änongå ingante æbänö cæquimoo, ante ämïni.

Äñongante tömänäni edæ,

—Awæ ñænquedimæ ämi cæte gönonte wæñönäni wængæe töö.

²³ Änäni ëñëninque Pidato ayæ,

—Iñæmpa quïnö wënæ wënæ cæcantawo.

Äñongä tömënäni godömenque yedæ äninque adodö,

—Ämi awäa timpote wæñönäni wængæe.

²⁴ Ante ancaa änewëñönäni Pidato iñömö, Tæcæ wæætedö wæætë änäni inte tömënäni wënæ wënæ cædäni wæquï wæ, ante guïñente wædinque ayæ, Ædö cæte botö godömenque cæquimoo, ante pönente wædinque edæ æpæ pi ñiñænte tömënäni ayönäni önonpo mempodinque tömënäni inänite angantapa.

—Tömengä wënæ wënæ cædämaï iñongante botö, Wæñongæimpa, änämaï imo inte tömengä wepæ näadämaï imo aedäni. Wæætë minitö guiquënë, Wæncæcäimpa, ante nê änimïni inte edæ näate bacæminipa, ante adinque botö mempobo aedäni.

²⁵ Angä ëñëninque tömänäni Ao äninque edæ,

—Möni äñinö beyænque mönitö incæ mönitö wënäni incæ tömengä wepæ beyæ näate bai bacæmönipa töö.

²⁶ Änäni ate awënë gobedönadodo Pidato tömënäni näni äñinö ante ëñente cædinque edæ Badabato ingante ñimpo cædinque tömënäni nempo pædæ godongä ænänitapa. Wæætë edæ Itota ingante edæ Pidato angä æmontai badöimenca tæi tæi pänäni ate tömengä ingante ñænque quepote awäa näni gönonguinque edæ da godongä ænte godänitapa.

²⁷ Awënë gobedönadodo näni wææ wänönäni guiquënë Itota ingante ænte godinque awënë gobedönadodo oncönë Podætodio näni ancönë mangui guiyongä tontadoidi bacabo Itota weca godongämæ äñete pönänitapa. ²⁸ Pöninque tömënäni, Awënë imi inte awënë wecoo wëñacæbiimpa, ante bai cædinque badete todinque Itota wecoo gä tadongadinque wæætë opatawæ ëmoncoo pönö da wëñadinque, ²⁹ daa mongæmenca bai æninque que cædinque, Awënë poganta wencacæbiimpa, ante bai cædinque pönö daga wencadänitapa. Ayæ cæwipa ænte

mämö pædæ pönonte änäni æninque tömengä tömëmæmpoca pæ mangä adinque tömënäni da guicapodinque tömengä ingante,

—Badogaa, bitö oodeo awënë odeyebi imipææ, ante badete togadänimpa.

³⁰ Ayæ tömengäa towæ towæ tånongadinque cæwipa æninque tæi tæi ancaa pancadänitapa. ³¹ Ayæ ñinque badete todinque tömënäni opatawæ ëmoncoo gä tadongadinque tömengä nämä wecoo daga wëñadänitapa. Ayæ edæ tömengä ingante awæ timpote wæñoncæte ante töö æmænte ænte tao mäodäni gogacäimpa.

Itota ingante awäa timpodäni wængampa (Mäadoco 15.21-32; Odoca 23.26-43; Wäö 19.17-27)

³² Ænte mäo godinque tömënäni Tidëne quëwengä Timönö ingante bee tëninque tömengä ingante edæ, Bitö ægodöe, Itota ingante möni timpöquiwæ ænte mongænte goe, änäni mongænte gocantapa.

³³ Mänü Itota ingante ænte mäo godinque Godogota näni äñömö mönö tededö “Ocatainö” iñömö mäniñömö pönänitapa.

³⁴ Mäniñömö pönäni ate wadäni, Nantate beyæ becæcäimpa, ante cædinque yowepæ biñömæ näni ämæ tönö moncapæ adoyömö wempo cædëninque pædæ pönö cæyönäni tömengä önonque yædæ bedinque edæ Baa angantapa.

³⁵ Ayæ Itota ingante awæ ñænquedimæ näni ænte pöniwäa töö godöninque pönö timpodinque wææ tüwadinque ængæ gantidënanitapa. Ængæ gantidënanäni ate wægöñongä tömënäni wæætë tömengä wecoo ñi ante, Æcänö quınca nö ta adinque tömengä mänincoo æncæcäimpa, ante wææntodöninque adocooque adocooque ænänitapa. Mänömaï cæyönäni Wængongui beyæ näni apænëgainö bai ñinque cætimpa. “Botö wecoo ñi ö æninque tömënäni näni caboque wacä ingä wacä ingä nënempodänitapa. Ayæ, Æcänö quınca nö ta adinque tömengä mänincoo æncæcäimpa, ante cædänitapa.” ³⁶ Tömënäni tæ contadinque tömengä ingante wææ aadänitapa. ³⁷ Ayæ, Itota nê wænguënegä ingampa, ante quïnante äñäni, ante edonque acæimpa, ante cædinque tömënäni, “Ingä Itota iñömö oodeoidi Awënë Odeye ñongä ingampa,” ante yewæmöninque edæ awæmpaa tömengä ocaboca ñö tee tinte wo cædänitapa.

³⁸ Ayæ wada nê ö ænte quëwëñina ñate adoyedë tömengä tönö adocanque tömëmæ ñö adocanque dipæmæ ñö godö timpote ængæ gantidëdäni wægongadäimpa. ³⁹ Ayæ

wodo pänta nē godāni guiquēnē Itota ingante godō wēnæ wēnæ ante badete tod-inque pica pica cædinque,⁴⁰ tōmēngā ingante wapiticæ apænedinque,

—Bitō iñæmpa Wængonguī tæiyæ waēmō oncō incæ bæ tate wo ewēninque edæ mēōnaa go adoōnæque iñonte do mænoncæ åmitawo. Månōmai cæcæ ånimi inte bitō tōmēmi edæ nāmā incæ cæte quēwēmāwe. Bitō nō Wængonguī Wēmi İmi İninque edæ o togæmpote o togæwate wææe, åmōnipa tōō.

⁴¹ Åñōnāni edæ, Wængonguī quī, ante nē godōnāni nænænāni guiquēnē nē odōmōnāni tōnō ayæ oodeoidi inānite nē aadāni nāni Picæncabo tōnō adobai iūmai ante edæ badete todānitapa.

⁴² —Tōmēngā, Wadāni quēwencædānimpa, ante waa cæcantawoo. Nōwo iñæmpa ædō cæte nāmā waa cæte quēwenguingā. Idægoidi awēnē odeye ingampa diyæ ti wæænte goquingā. Edæ ti wæænte gocā adinque mōnitō wæætē edæ, Nāwangā impa, ante pōnēmai wædō. ⁴³ Ayæ nāmā ingantedō åninque tōmēngā edæ, Botō Wængonguī Wēmo inōmo İmopa, ante angāmææ. Tōmēngā, Wængonguī cōwē pōnō cæcæcāimpa, ante wede pōngæ iñongante Wængonguī wæætē tōmēngā ingante edæ waa acampa diyæ iñimpo cæcā goquingā, ante badete todānitapa. ⁴⁴ Ayæ nē ō æna guiquēnē tōmēngā tōnō godongāmæ timpote wægōna İninque Itota ingante piinte adobai wēnæ wēnæ ante badete togadāimpa.

Itota wængampa

(*Måadoco 15.33-41; Odoca 23.44-49; Wåö 19.28-30*)

⁴⁵ Tæcæbæcā pōni bayō tōmāmæ iñontobæ wēmō badinque ayæ ayaōnā wæiganca mæ māmante bai İnimpa. ⁴⁶ Ayæ edæ ayaōnā wæiyonte Itota nanguī pōni yedæ åninque, “Edii, Edii, nēma tabatāni,” åninque mōnō tededō, “Botō Wængonguīñaa, botō Wængonguīñaa, ædō cæte botō İmo emō cæte gobiyaa.”

⁴⁷ Ante wæcā eñēninque godāmæ ongōnāni guiquēnē,

—Æ. Ediya ingante aa pecā apa.

⁴⁸ Åñōnāni adocanque do pogodo gote õnætāmō ænte pōninque biimōmæ bai õnōmænque ænte aa bedōninque næænte, Cæwipaca pædæ ææñōmo becæcāimpa, ante cæyongā, ⁴⁹ wadāni guiquēnē,

—Ee aquēnē. Ediya edæ ponte wabānō cæcā quēwenguingā abaimpa, angadānimpa.

⁵⁰ Itota iñōmō wæætē ogæ tededinque do wængacāimpa. ⁵¹ İninque edæ Wængonguī oncō tæiyæ wæmōncōnē weocoo odemō nāni wææ wodōincoo adoyedē õnōnæca inō tæcæguedē pōni tænguimæ wæantapa. Ayæ goinque bayonte dica incæ tæ gāmæntapa. ⁵² Ayæ wao wodido incæ wi

ænote bayonte edæ Wængonguī quīnāni do wængaināni incæ pancadāniya fñāni õmæmōninque ⁵³ tōmēnāni wodido abæ tawænte godānitapa. Edæ nōwo iñōmō, Itota fñāni õmæmōngā ate tōmēnāni nē fñāni õmæmōnināni inte Eedotadēē nāni wæmō quēwēñōmō ponte a ongōñōnāni nanguī ināni agadānimpa.

⁵⁴ Māniū goinque do pō adinque ayæ, Æbānō cætimpa, ante tōmānō adinque edæ tontado capitāō tōnō wææ wānōnāni tōnō ancai guīñēninque,

—Nāwangā impa. İngā iñōmō Wængonguī Wengā ingainō ante pōnenguēnē, angadānimpa.

⁵⁵ Do iñōmō Itota Gadideabæ quēwente pōñongante onquiyæñāni nanguī ināni tee empote pōninque tōmēngā beyæ nē cædināni inte nōwo adodāni adoyōmō pō gongæninque pōmō adānitapa. ⁵⁶ Måadiya Måagadadēnā tōnō wacā Måadiya İnatapa. İñā iñōmō Tantiago tōnō Ootee badā İnantapa. Ayæ Tebedeo wēna tōmēna badā tōnō wadāni adobai Itota wæññongante gobæ agadānimpa.

Itota wodi baō iñi māo daga wēnānipa

(*Måadoco 15.42-47; Odoca 23.50-56; Wåö 19.38-42*)

⁵⁷ Ayæ gāwadecæ bayonte Ootee nē nanguī eacā incæ Itota miñæ nē gocā do badingā inte Adimatea iñōmō pægaingā inte pongā ingantapa. ⁵⁸ Tōmēngā iñōmō nōwo Pidato weca godinque, Itota wodi baō iñi pōnōmi æmoe, angantapa. Pidato Ao åninque nē cædāni inānite, Tōmēngā baō ee amīni æncæcāimpa, angantapa. ⁵⁹ Itota wodi baō iñi gāmiyate pædæ wææñonte ænte godinque waēmō weocoo nincoo nāni ancoo wīni wīni caadinque, ⁶⁰ Ootee, Botō wodido baquimpa, ante dicamontaa nānō wodintatodē müintatodē māo guidō fñō cædinque daga wengantapa. Ayæ dicabo da pæñæ pōnō tee mōnodinque wadæ gogacāimpa. ⁶¹ İūmai cæyongā Måadiya Måagadadēnā tōnō wacā Måadiya tōnō Itota wodido obo contate acōnatapa.

Itota wodido iñōmō wææ wænōnāni a ongōnāni

⁶² Ayæ guēmanguīōnæ bacæ cæpa, ante nāni tåno cæōnæ İinque cædāni ate iimō ate, Wængonguī quī, ante nē godōnāni nænænāni tōnō Paditeoidi guiquēnē Pidato weca ponte ⁶³ tōmēngā ingante åninque,

—Awēnē eñēmi. Måningā nē babæ åningā iñōmō tōmēngā mīngā iñedē apænedinque, Mēōnaa go adoōnæque iñonte botō fñāni õmæmoncæboimpa, ante nānō åninō ante pōnente wæmōnipa. ⁶⁴ Ayæ tōmēngā miñæ nē godīnāni incæ tōmēngā baō iñi awēmō ō æmāināni ante edæ wæmōnipa.

Ænāni iinque tōmēnāni, “Dobæ ñāni òmæmongāimpa,” ante godōmenque babæ ānāni edæ wēnæ wēnæ babaimpa cæbii. Nōwo wææ wānōnāni Inānite āmi godinque tōmēnāni māningā nānō wodintatodē tæēmō tee mōnodinque mēōnaa go adoōnæque ganca wææ wānonte acædānimpā. Edæ wīi godōmenque wēnæ wēnæ bacæimpā, ante cæcæbiimpā, āmōnimpā.

⁶⁵ Āñōnāni Pidato wæætē,

—Bado, wææ wānōnāni mæ ongōnānimpā. Mīnitō tōmēnāni Inānite ænte māomīni goyōnāni mīnitō wæætē mīni ēñēnīnō bai do cædinque tæēmō tee mōnote cæedāni.

⁶⁶ Angā ēñēnte godinque tæēmō mōnodinque Itota nānō wodintatodē dai tee bædodānitapā. Ayæ, Awēnē ēmōwo adinque wi ænodāmaī incædānimpā, ante dai bæyōmō aquīfēdē ongontoca da guidonte awēnē ēmōwo adimpca yewæmonte bai bagatimpā. Ayæ wææ wānōnāni Inānite ænte mǎo gō cædāni wææ wānongadānimpā.

28

Itota do wæningā inte ñāni òmæmonte quēwengampā

(Māadoco 16.1-8; Odoca 24.1-12; Wāō 20.1-10)

¹ Mānīi guēmanguiōnæ iinque go ate wacā tēmāna baquinque ñāō ba iinque Māadiya Māagadadēnā tōnō wacā Māadiya iñōmō Itota wodido acæte ante gogadōwimpā. ² Awēnē Wængongui anquedo do wææ pōninque edæ dicabo wēā godō oo wi ænocantapā. Ayæ goinque nangui ocæ ocæ cætimpā. Anquedo iñōmō dicaboga tæ contacantapā. ³ Tōmēngā awinca nāinte cæ bai ēmōnongā inte tōmēngā weocoo nāmænta pōni ēmoncōo mongænte a ongōngā. ⁴ Adinque edæ nē wææ wānōnāni guiquēnē ancaī guīñēnte wædinque do do wāte bai badinque æmæwo wænte bai òñōnānitapā. ⁵ Mānīi onquiyæna pōñōnate Wængongui anquedo iñōmō,

—Guīñēnāmaī ieda. Itota nāni awāa tim-podāni wæningā ingante mīnatō diqui diqui mīminapā, ante edæ do ēñēmopā. ⁶ Iñōmō edæ dæ angampā. Tōmēngā nānō ānīnō bai cædinque do edæ ñāni òmæmōninque tao gocāimpā. Pō guīite aeda. Iintatodē nānō òñōntatodē iñōmō edæ ònontatoque impā. ⁷ Ayæ nē adīmīna inte edæ quingæ pogodo gote tōmēngā mīñæ nē godīnāni Inānite gode ante apænedinque, “Itota dobæ ñāni òmæmongāimpā ataqeedāni, āeda.” Ayæ iñōmō tōmēngā Gadideabæ tāno godinque a ongōñongā mīnitō gote aedāni, ante mīnatō gode ante apænedā ēñēedāni. Bado, āmo ēñēmīnapā edæ.

⁸ Angā ēñēninque tōmēngā wodido abæ tawænte wadæ godinque tōmēna, Ancaī

guīñēnte wæte todadō, āninque watapæ todinque Itota mīñæ nē godīnāni Inānite gode ancæ pogodo godatapā. ⁹ Goyōna edæ Itota incæ iñōntobæ mǎo bee tēninque edæ, Mīnatō, angā ēñēninque edæ iñāna tōmēngā weca pōninque ònōwaca ædæ wæante mō ongōwate, Wængongui Awēnē imidō anguēnē, ante watapæ apæneyōna, ¹⁰ Itota iñōmō edæ,

—Guīñēnāmaī ieda, angantapā. Ayæ, Mīnatō botō biwīdi Inānite gode āninque iīmaī āeda. Mīnitō Gadideabæ godinque botō imote acæmīnimpā, ante tōmēnāni Inānite āeda, ante Itota angacāimpā.

Nē wææ wānōnīnāni babæ ante apænedānimpā

¹¹ Onquiyæna gode ancæ goyōna Itota wodido nē wææ wānōnīnāni pancadāniya wæætē tōmēnāni nāni quēwēñōmō godinque, Wængongui quī, ante nē godōnāni ñænænāni Inānite apænedinque, iīmaī cætimpā, ante tōmānō ante apænedānitapā. ¹² Apænedāni ēñēninque edæ nē godōnāni ñænænāni guiquēnē nē aadāni nāni Picæcabo tōnō pōnē cōninque godongāmæ Ao āninque tontadoidi nē wææ wānōnāni iñōnānite tīguitamō padatamō bacoo godōninque, ¹³ tōmēnāni Inānite iīmaī angadānimpā.

—Wadāni Itota wodi baō ante wæyōnāni edæ mīnitō ònonque, Mō cōñōmōni tōmēngā mīñæ nē godīnāni awēmō ponte ò ænānitapā, ante babæ apænecæmīnimpā. ¹⁴ Ayæ mānīnō āñōmīni awēnē gob-edōnadodo ēñēninque, Quīmæ mōwēmīnīi, ante pīngā adinque edæ mōnitō wæætē wææ cædinque tōmēngā ingante āmōni ēñēninque tōmēngā pānāmaī ñimpō cæyōngā mīnitō guīñēnte wædāmaī incæmīnimpā.

¹⁵ Āninque nē godōnāni ñænænāni iñōmō nē wææ wānōnīnāni Inānite nangui tīguitamō godōnāni ænānitapā. Mānintamō æninque awēnēidi babæ nāni ānīnō bai adodō ante apænedinque, Tōmēngā mīñæ nē godāni ò ænānitapā, ante babæ wapiticæ apænegadānimpā. Iinque tōmēnāni nāni babæ apænedō ēñēninque edæ oodeoidi gode ante tēdedinque godōmenque ñōwo ganca ayæ wapiticæ ante tēdedānimpā.

Itota, Apænecæ goedāni, angampā

(Māadoco 16.14-18; Odoca 24.36-49; Wāō 20.19-23)

¹⁶ Ōnompō æmæmpoque go adodāninque Itota mīñæ nāni godincabo guiquēnē mānīi Itota nānō ānō bai cædinque Gadideabæ godinque ānanquidi æyōnāni ¹⁷ Itota a ongōngā adinque tōmēngā weca ædæ wæante, Wængongui Awēnē imidō anguēnē, ante watapæ apæneyōnāni pancadāniya guiquēnē, Wabānō i, ante pōñēnāmaī ingadānimpā.

¹⁸ Itota iñömö tömënäni weca pönömenque pöninque,

—Wængongui pönö cæcä beyænque botö iñömö öönædë Tæiyæ Awënë inömo inte inguipoga adobaï nê Tæiyæ Awënë badinque nämä tæï piñæmo inte nê ämo imopa. ¹⁹ Ante wædinque munitö guiquënë inguipoga tömämæ quëwënäni weca godinque, Itota miñæ gocædänimpa, ante apænemini ëñente botö miñæ nê godäni bacædänimpa. Ayæ mönö Mæmpo ëmowo apænedinque, ayæ Wængongui Wëmo iñömote botö ëmowo apænedinque, ayæ Wængongui Tæiyæ Waëmö Önöwoca ëmowo apænedinque munitö tömämæ quëwënäni inänite æpænë guidömini guicædänimpa. ²⁰ Ayæ botö munitö iminite botö äninö ante, Tömänö ante adodö cæedäni, ante odömömini ëñente cæcædänimpa. Ayæ botö edæ ñowo incæ ayæ inguipoga inque baganca cöwë munitö tönö ongonte godongämæ cæcæboimpa. Näwangä inguinö anguënë, ante Itota angacäimpa.

Itota Codito ingantedö ante Mäadoco nänö watapæ ante yewæmongainta

*Wäö önömæca ponte apæneçä ëñëñänipa
(Mäateo 3.1-12; Odoca 3.1-9, 15-17; Wäö*

1.19-28)

¹ Ponguingä, ante nani Codito angaingä inongä inte Wængongui Wengä Itota ingantedö ante botö Mäadocobo watapæ ante yewæmömopa.

² Doyedë iñömö Wængongui beyæ apænedinque, Codito ingante Wængongui iimaï angäimpa, ante Itaiya wodi yewæmongacäimpa.

“Taadö bitö goquino waa wëwaquingä, ante bai cædinque botö,

Botö beyæ nê gode änongä ingante da godömo täno beyænte gocä ate bitö ayæ gocæbiimpa, ämopa.

³ Önömæca iñömö adocanque ogæ tedete aa pecæcäimpa.

Tömengä iñömö, ‘Awënë nänö ponguino ante minitö tee moncate bai cædinque, taadö töinö pinonte bai cæedäni,’ ante aa pecä ëñengäimpa.”

⁴ Ante Itaiya wodi nänö nê angaingä inongä inte Wäö ñowo önömæca pöningue æpænë guidongantapa. Mänömaï cædinque tömengä mäniñömö pönäni inänite apænedinque, Minitö, Idæwaa wënæ wënæ cæte awædö, ante ocæ ëmænte Wængongui gämænö pöningue æpænë guicæminimpa. Mänömaï cæmini adinque Wængongui minitö cædinö ante nê panguënegä incæte piinämaï inte ñimpo cæcæcäimpa. ⁵ Ante Wäö mänömaï apæneyongante Oodeabæ tömäo quëwënäni Eedotadëë quëwënäni tömänäni tömengä weca pö pö bee tente ëñëningue, Näwangä ämipa. Bitö ä bai ëñëñämaï cæte quëwëmöni inte idæwaa wënæ wënæ cæte awædö, ante wædäni ëñëningue Wäö Oododänö æpænë guidongä guidänitapa.

⁶ Wäö iñömö weocoo ante cämeyo ocaguincoo nonte badöincoo mongæante adobai pacadeyænta ante æmontai badonte encadeyænongäimpa. Tömengä cængui ante ñawäique cænte tömengä bequï ante guïñëmænque ade bete nê quëwënongäimpa.

⁷ Iimaï ante apæneçä ëñëñänitapa. “Iincayæ ate nê Ponguingä guiquënë tömengä tæï ëmongä ewocadongä inte nanguï cæcä ingampa. Botö guiquënë wædämo pöni inömo inte tömengä awæncata eyepæ imopa godö ñi cæquimoo. ⁸ Botö önonque æpænë guidömo guimimipa. Tömengä wæætë da pönongä ate Wængongui Tæiyæ Waëmö

Önöwoca pö guicä ewocæminimpa,” ante Wäö mäniñedë apænegacäimpa.

*Itota æpænë guicampa
(Mäateo 3.13-17; Odoca 3.21-22)*

⁹ Iinque Gadideabæ Näatadeta quëwente Itota mäniñedë pongä adinque Wäö Oododänö æpænë tömengä ingante guidongä guicantapa. ¹⁰ Iinque æpænë guidingä inte do ää ta gongæningue Itota æmö ayongä öönæ gä godonte bayö equemö wææ bai Wængongui Tæiyæ Waëmö Önöwoca incæ tömengä wææ guicä acantapa. ¹¹ Ayæ ëñëñongante, “Bitö botö Wëmi inömi inte nê botö waadebi imipa, ate tobopa,” ante öönædë inö apæneçä ëñengacäimpa.

Itota incæ wënæ wënæ cæcæcäimpa, ante wënæ cæcampa

(Mäateo 4.1-11; Odoca 4.1-13)

¹² Mäniñedë Itota ingante Wængongui Önöwoca incæ, Æibawë, äningue önömæca mæicä æicantapa. ¹³ Æi quëwëningue wantæpiyæ cöadanta öönæ önömæca quëwëñongante wënæ awënë Tatäna pöningue, Wënæ wënæ cæcæcäimpa, ante Itota ingante cædongäimpa. Ayæ Itota mänömaï babædi quëwëñömö quëwëñongante Wængongui tömengä anquedoidi inänite da pönongä pöningue tömëñäni tömengä beyæ pönö waa cægadänimpa.

Itota Gadideabæ pöningue tæcæ mä cæcampa

(Mäateo 4.12-17; Odoca 4.14-15)

¹⁴ Mänömaï cæte ate ayæ awënë odeye Edode dobæ Wäö ingante tee möneçä ate mäniñedë Gadideabæ pöningue Itota mä Wængongui nänö waa pöni cægainö ante iimaï ante apænegacäimpa. ¹⁵ “Ponguingä, ante dodäni nani angaiñedë botö Wængongui Awënë Odeyebö inömo inte ñowo iinque bayedö do pömopa, ante apænebo ëñëedäni. Minitö wënæ wënæ mimi cædimämo wido cædinque waa pöni botö apænedinö mimi ëñëno ante pönëedäni,” ante Itota angacäimpa.

Nê gæyæ dadöwënäni inänite Itota aa pecampa

(Mäateo 4.18-22; Odoca 5.1-11)

¹⁶ Ayæ mäniï pöningue Itota gäwapæ Gadideapæ yæwedeca gote cængote ayongä Timönö tönö Äntade tömengä töniñacä inate acantapa. Nê gæyæ dadöwëna inöna inte tömëna dicamönæ æpænë wo guidotonte dadöwëna acantapa. ¹⁷ Tömëna inate Itota,

–Iñäna, botö miñæ edæ tee empo pöda, ämopa. Nê dadonte ænte pömäna inte botö weca pöñöminate botö pönö cæbo ate minatö wæætë nê apænemäna badingue waodäni inänite nê ænte pömäna bacæminaimpa,

angantapa. ¹⁸ Angä eñëninque tömëna dicamöññæ do ëmō cæte godinque Itota miññæ edæ tee empo wadæ godatapa.

¹⁹ Itota iññomō godōmenque gote ayongä Tebedeo wëna Tantiago tönō Wäö adobaï wipodë dicamöññæ tadōmoncōna acantapa. ²⁰ Adinque Itota do, Botō miññæ pōeda, angä eñëninque tömëna Ao äninque wæmpocä ingante wæætë, Mæmpo eñëmi, änatapa. Bitō nempo wipo ëmō cæte gomōnapa, äninque adodaque wæmpocä ingante ëmō cæte Itota miññæ wadæ godatapa.

*Itota angä eñente wënæ ince tao gopa
(Odoca 4.31-37)*

²¹ Ayæ tömënanī quëwëñomō Capënaömö mämongä pönänitapa. Oodeoidi guëmanguïönæ bayonte Itota iññomō Wængonguï apæñecä nāni eñente yewæwongainta ate nāni odömöincönë do pō guïdinque odōmonte apæñecä eñënanitapa. ²² Eñëñönāni tömengä nāmā tæï piñëninque nē angä inongä inte nō odōmonte apæñecä eñente wædinque tömënanī, Wadāni nē wææ odömōnāni guiquëñë mänōmaï odōmonte apænedāni eñëmongaa. Itotaque nāmā nē eñente entawënongä inte nō pōni odōmonte apæñecä eñëmōnīpa, ante wædänitapa. ²³ Ayæ wënæ wentamō ëwocacä inte nē quëwengä mäniñhedë tömënanī odömöincönë a ongōninque iññontobæ yedæ ante apæñecantapa.

²⁴ –Bitō Itota Nāatadeta quëwëñimi inte quīnante mönatō weca pōmii. Mönatō imōnate edæ æmæwō wido cæcæte ante wabānō pōmitawo. Bitō æmōmidō imii, ante botō do atabopa. Bitō Wængonguï Tæiyæ Waëmō Wëmi inōmi imīpa, ante edæ do eñëmopa.

²⁵ Ante tedeyongante Itota tömengä ingante wææ äninque,

–Apocæñë quëwenguëñë tedewëë. Waocä baönë quëwëñomi inte edæ tao gobāwe.

²⁶ Angä eñëninque wënæ nē wentamō ëwocacä iññomō waocä ingante quidi quidi mäo tæ gotodō go wææñongante, Yæ yæ, äninque dobæ tao gotapa.

²⁷ Itota angä wënæ tao gocä adinque tömänāni guīñente wædinque nāni caboque wæætëdō wæætë tededinque,

–Iñgä iññomō quīnō baï ante cæcä. Tömengä nē angä inongä inte edæ mä pōni odōmonte apæñecampa. Edæ wënæidi nē wentamō ëwocadāni inänite tömengä angä eñente cædänīpa, ante awædō.

²⁸ Ante pönente wædinque tömënanī, Itota mänōmaï cæcampa, ante tededinque Gadideabæ tömäo quëwëñāni inänite tömengä gode ä gode ä cædāni do eñengadänīpa.

Pegodo nänöogæ wäänä ingante Itota cæcä gancæ bacä

(Mäateo 8.14-15; Odoca 4.38-39)

²⁹ Mänii Itota oodeoidi odömöincönë ongōninque iñque odōmonte apæñecä ate tömënanī tao godinque Tantiago tönō Wäö miññæ godinque Timönō tönō Æntade oncönë go guïdänitapa. ³⁰ Go guiyönānite wadāni, Timönō nänöogængä wäänä daicawo gawænte möimoga öñongampa, änanī. ³¹ Eñente wædinque Itota tömengä weca go gongæñinque pædæ wææmpote bæi ongonte töö æmængä ate tömengä ængæ ganticantapa. Ayæ gancæ badinque tömengä wæætë tömënanī beyæ cæcantapa.

Daicawo gawænāni inänite Itota cæcä waa badänīpa

(Mäateo 8.16-17; Odoca 4.40-41)

³² Mänionæ gawadecæ pōni nænque wëmō bayō wadāni daicawo gawænāni inänite wënæ inte quëwëñāni inänite tömänāni inänite Itota weca ænte pönänitapa. ³³ Ayæ mäniññomō quëwëñāni tömänāni adoyōmō pōninque odemō goto gongæñänitapa. ³⁴ Ayæ quīëmë beyæ wënæ ænte wædāni adinque Itota nanguï ināni inänite godō cæcä waa badänitapa. Ayæ wënæidi nanguï ināni inänite wido cædinque Itota, Botō æbodō imoo, ante nē adimīni inte tededāmaï imæwedāni, ante tömënanī inänite wææ angacäimpa.

Itota oodeoidi odömöincönë go guïdinque apæñecampa

(Odoca 4.42-44)

³⁵ Ayæ tæcæcæ oque pönente wëmō iññonte ængæ gantidinque Itota oncodo tao gote gomonga önömæca godinque Wængonguï ingante apæñecantapa. ³⁶ Apæneyongante Timönöidi, Ædönō gocäi, ante tee empo tee empo gote, ³⁷ adinque,

–Dæ ämi wædinque tömänāni bitō imite ante diqu diqu minänīpa cæbii.

³⁸ Ante äñönānite Itota wæætë,

–Mönō wayōmō gocäimpa. Eyequëi nāni quëwëñomō nāni quëwëñomō mäo botō apænebo eñencædänīpa, ante cæcæte ante tate pontabopa.

³⁹ Ante nē äningä inte Gadideabæ tömäo godinque oodeoidi odömöincönë go guï go guï cædinque Wængonguï nänō apænedō ante Itota apæñecä eñengadänīpa. Ayæ wënæidi inänite wido cæcä gogadänīpa.

Në baadingä ingante Itota wadæ caacampa

(Mäateo 8.1-4; Odoca 5.12-16)

⁴⁰ Ayæ wacä cōwë baate eñawengä inongä inte Itota weca ponte da guicapodinque,

–Bitō Ao ämi inte wadæ caabi iññinque botō do waintai baabaimpa.

41 Añongante Itota tōmengā tōnō guēa wæwente bai nanguī pōnengā inte pædæ wææmpo gampo caadinque,

—Ao âmopa. Bitō waintai baacæbiimpa.

42 Angā ïninqe ñmōæintai nānō ēñadintai dæ baadinque tōmengā waintai edæ do baacantapa. 43 Itota edæ tōmengā ingante do da godōninque nanguī angantapa.

44 —Ēñēmi. Botō æbānō cæboo, ante edæ wadāni inānite māo apænedāmai ïmāwe. Wæætē, Nāwangā impa, ante acædānimpā, ante cædinque bitō, Wængonguī quī, ante nē godongā weca tōingā godinque waintai bitō baadintai odōmōmi ædæmō acæcāimpā. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængonguī quī, āninque nē godongā ingante pædæ godōmi æncæcāimpā, ante Itota nē baadingā ingante nanguī angantapa.

45 Angā incæte nē baadingā wæætē wadæ godinque ēñēnāmai inte gode ā gode ā cædinque edæ, Itota wadæ caacā waintai baaboī aedāni, ante māo tedecā ēñēnānitapa. Mānōmai ēñēnāmai cæcā beyænque Itota, Tōmēnāni weca ñōwo ædō cæte edonque goquīmoo, ante wædinque nānēnē gote ònōmæca gomonga cægongantapa. Incæte tōmengā weca æmænō quēwēnāni æmænō quēwēnāni cōwē pō pō cægadānimpā.

2

Nē cōmāingā ingante Itota angā dao dao gocampa

(Māateo 9.1-8; Odoca 5.17-26)

1 Ayæ tæðnæ quēwēninque ocæ ēmænte Capēnaōmō pongā adinque wadāni, Itota oncōnē ponte ongongampā. 2 Ante tededāni wædinque nanguī ināni acæ pōnāni oncōnē eyede pōni guīdinque odemō incæ tōmāo wææ ongōnānitapa. Mānōmai tōmāo goto ongōnāni inānite tōmengā Wængonguī nānō apænedō ante apænecā. 3 Ēñēñōnāni wadāni tōnō godongāmæ pōninque mengāa go mengāa ināni incæ cōmāingā nānō mōimpataa æmætæð æmætæð bæi ongonte næænte pōnānitapa.

4 Ponte ayōnāni wadāni Itota weca eyede pōni goto ongōnāni adinque nē ænte māmō pōnināni ïñōmō, Ædō cæte guīquī. Ante wædinque oncōmāa ïnō æidāmæ mæi æidinque Itota ònōnæca ïnō epæ cædāni ompite gongæñō tōmēnāni cōmāingā mōimpataa bæi ongōninque tōmengā ingante Itota weca edæ pædæ wæænōnāni. 5 Wæænte ongongā adinque, Tōmēnāni æbānō wede pōnente cædānimpā, ante adinque Itota cōmāingā ingante,

—Botō wēmi wædāmai ïe. Wēnæ wēnæ bitō cædimāmo ante bitō ñōwo ñimpo cæte quēwencæbiimpa.

6 Ante apænecā ēñēninque nē wææ odōmōnāni guīquēnē pancadāniya godāmæ tæ contate ongōninque nāmāneque pōnente tededinque, 7 “Quīmæ anewēē. ïngā ïñōmō Wængonguī ingampa diyæ mānōmai cæquiringā. Edæ babæ ancædō. Waomō wēnæ wēnæ mōnō cædimāmo ante Wængonguinque nē ñimpo cæcā ingampa.”

8 Ante mīmōnoque pōñēñōnāni Itota tōmēnāni nāni pōñēwēnō ante ònōwēnenque do ēñente bai pōñēninque edæ,

—Mīnitō quīmæ mānōmāinō ante pōñēwēminī.

9 “Botō nē cōmāingā nānō wēnæ wēnæ cædimāmo ante ñimpo cæbo quēwencæcāimpā,” ante botō Wængonguī bai āmo ēñēninque mīnitō guīquēnē, Wængonguī ingampa diyæ mānōmai cæquiringā, ante pōñēminīpa. Wæætē edæ, “Ængæ gantidinque mōimpata æninque dao dao gocæcāimpā,” ante botō Wængonguī bai āmo ïninqe mīnitō adobai, Wængonguī ingampa diyæ mānōmai cæquiringā, ante pōñēminī ïmaimīnīpa, ante awædō. ïñæmpa mānōmāinō ante pōñēminī ïninqe mīnitō edæ æbānō cæquēnēmo ïmo āmīnī. 10 Incæte botō Waobo ēñagaīmo inte inguipoga quēwēninque waomīni mīni wēnæ wēnæ cædimāmo ante nē āmo inte ñimpo cæbopa, ante mīnitō edæ ēñencæmīnimpā, ante botō ïmai cæbopa.

Äninque edæ nē cōmāingā ingante edæ,

11 —Bitō ïmite āmo ēñē. Ængæ gantidinque bitō mōimpata topo cæte æninque edæ tōmēni oncōnē næænte goe.

12 Angā ēñēninque cōmāingā ïningā incæ edæ tōmānāni ayōnāni ængæ gantidinque mōimpata topo cæte nææ nææ tao gocā adānitapa. Dao dao gocā adinque tōmēnāni, Æbānō cæcāi, ante ēñēnāmai inte guīñēnte wædinque,

—Wēēñēdē mānōmai cædāni atamōniyaa. Nōwo ïñōmō mā pōni cæcā amōnīpa, ante pōñēninque, Wængonguī bitō ñāo ēmōmi inte waa pōni cæbi amōnīpa, ante watapæ apænegadānimpā.

Debii ingante Itota angā tee empote gocampa

(Māateo 9.9-13; Odoca 5.27-32)

13 Itota wæætē adodō gāwapæ wedeca gocantapa. Ayæ nanguī ināni adoyōmō pō pō cædāni adinque tōmengā tōmēnāni inānite odōmōnte apænecā ēñēnānitapa. 14 Ayæ godōmenque cægonte ayongā Adepeo wengā Debii ïñōmō, Odōmāno awēnē quī bacæimpā, ante godonte æinta nāni æincōnē awēnē beyæ æncæte ante ongongā adinque Itota tōmengā ingante,

—Botō miñæ pōe.

Angā ēñēninque Debii edæ ængæ gantidinque tōmengā miñæ wædæ edæ gocantapa.

¹⁵ Ayæ ate Itotaidi Debii oncönë pö guite cængöñönäni odömāno awënë beyæ nē æwënëni tönö nē ëñënëmaï cædāni tönö nangui ināni adoyömö pö guite godongāmæ cænānitapa. Edæ tæiyæñāni tömengä miñæ nē godāni inönānimpa. ¹⁶ Paditeoidi inönāni inte nē odömönāni guiquënë ponte ayönāni nē ëñënëmaï ināni tönö awënë beyæ nē æwënëni tönö Itota godongāmæ cængä adinque tömēnāni tömengä miñæ nē godāni inānite änānitapa.

–Odömāno awënë beyæ nē æwënëni tönö wadāni nē ëñënëmaï cædāni tönö Itota quimæ godongāmæ cæwængä.

¹⁷ Äñönāni Itota wæætë tömēnāni inānite, –Nē waa ingä guiquënë, Cæbi waa baboe, änāmaï ingampa. Nē wënë wënë ingä guiquënë dotodo ingante do, Cæbi waa baboe, ante aa pecampa. Pancadāniya, Nämä incæ nō entawēmo imopa, ante nē änāni inānite adinque botö nē dotodo bai adobāi inōmo inte tömēnāni inānite aa pedāmaï incæboimpa. Wadāni guiquënë, Nämä wënë wënë cæbo imopa, ante nē änāni guiquënë, Wængongui gāmænö poncædānimpa, ante botö tömēnāni inānite aa pecæ pontabopa, ante Itota apænegacäimpa.

Et ate cænāmaï ingæimpa, ante nē änāni (Mäateo 9.14-17; Odoca 5.33-39)

¹⁸ Wäo miñæ nē godāni tönö Paditeoidi tönö mǎniñedë Wængongui beyæ ante ee ate cænāmaï inönānimpa. Ininque wadāni Itota weca pöningue änānitapa.

–Wäo miñæ nē godāni tönö Paditeoidi miñæ nē godāni tönö tömēnānique, Wængongui beyæ, ante ee ate cænāmaï inānipa. Bitö miñæ nē godāni guiquënë quinate Wængongui beyæ ante cædāmaï ināni inte do cænānii.

¹⁹ Änāni ëñëningue Itota wæætë, –Onguiñængä nē monguingä nāno wente ænte nē pönāni bai inönāni inte botö miñæ nē godāni inōmō ædö cæte wæwente bai cænāmaï inguināni. Edæ botö tönö watapæ quëwënëni inte tömēnāni ædö cæte wæwente bai cænāmaï inguināni. ²⁰ Wæætë ayæ ate guiquënë, Monguingä, nāni nē ängongä bai inōmote wadāni ponte botö imote bæi ongöningue ö ænte gocædānimpa. Mänōmaï cædāni ate botö miñæ nē godāni inōmō mǎniñedë ate wæætë cænāmaï inte wæcædānimpa, ante apænedingue Itota godömenque iūmaï ante apænegacäimpa.

²¹ “Waoçä dicæ miñcoo æninque pedæncoga pönö tadömonguingä. Mänōmaï cæcä ininque edæ miñcoo incæ dobæ gäänë tamonte guipite ate godömenque wänä tente baquënë. Minitö, Awente bai cænāmaï inte waa quëwængæimpa, ante miñi änewëno guiquënë pedæncoco bai inte

ëwenguine ënepa. Codito nempo watapæ quëwængæimpa, ante botö apænëdö guiquënë miñcoo bai inte quëwenguine ënepa. Ininque ëwenguine tönö quëwenguine ædö cæte adoyömö ëñente cæquii. ²² Ayæ adobai yowepæ biñomæ miimæ æninque waoçä ædö cæte picæ æmontaicadedë godö pe ñiñænguingä. Edæ picæ æmontaicadedë pe ñiñængä ininque yedæ ææninque ætæwo goquino anguënë. Wæætë edæ æmontai miñcadedë pe ñiñænte ate yedæ ææninque tæi æbænāmaï ee ongongui apa quëwëmini,” ante Itota apænegacäimpa.

Guëmanguiönæ iñonte tömëmö tä pete cænānipa

(Mäateo 12.1-8; Odoca 6.1-5)

²³ Ayæ ate guëmanguiönæ iñonte Itota tömëmoncodë tæcæguedencodë gocantapa. Goyongä tömengä miñæ nē godāni tömëmö inca tæcæ tä pe tä pe ænte idömæ godāni. ²⁴ Adinque Paditeoidi guiquënë Itota ingante äninque,

–Bitö miñæ nē godāni æbänö cædāni, ante cöwä aquënë. Inæmpa, Guëmanguiönæ iñonte mǎniñö bai cædāmaï iedāni, ante dodāni nāni wææ angainö ante ëñënëmaï inte ināni ëñënëmaï inte quimæ cædāni.

²⁵ Ante piñönānite Itota,

–Docä Dabii wodi tömengä nāno nē emiñænāni tönö ömæpodāni pöni inte gæwænte wædinque æbänö cægadāni, ante yewæmonte öñö incæ minitö inæmpa adāmaï inte ämini awædö. ²⁶ Wængongui qui, ante nē godönānique cængui impa, ante wææ nāni angainö bai cædinque dodāni päö, Wængongui qui, ante ñoncæ ñoncæ cædönānimpa. Incæte Abiatade wodi nē godongä ñænængä pöni inongä nāno godöñedë mǎniñedë Dabii wodi Wængongui oncönë go guidinque mǎniñi päö do ænte cæninque tömengä miñæ nē godāni inānite godömenque godongä cænānitapa, ante yewæmonte öñö apa änewëminii.

²⁷ Ante apænëdingue Itota ayæ,

–Wængongui quinate, Guëmanguiönæ, ante badongacäi, ante pönëmini. Guëmancædānimpa, ante cædinque Wængongui waoçä beyæncæ ante, Minitö guëmanguiönæ, ante badongacäimpa, ante pönëngüenëmini iminipa. Ädānidö mǎniönæ iñonte cædāmaï ināni, ante pönëningue Wængongui dicæ mǎniönæ beyæncæ ante woadāni inānite badongantawogaa. Ädö cæte mänömainö ante pönëwëminii. ²⁸ Ininque botö Waobo nē ëñagäimo inōmō Tæiyæ Awënë inōmo inte edæ guëmanguiönæ Awënë inōmo imopa. Ayæ, Guëmanguiönæ iñonte edæ æbänö cæquii, ante adobo nē Ämo ingäimo imopa, ante Itota apænegacäimpa.

3

Ni cōmampoinḡä

(Mäateo 12.9-14; Odoca 6.6-11)

¹ Iincayæ ate Itota wæætē ood-eoidi Wængongui apæneca nāni ēñente yewæmongainta ate nāni odōmōincōnē go guicantapa. Māniñōmō onguifñengā nī cōmampote wædongā inte a on-gongantapa. ² Māniñedē Paditeoidi pancadāniya, Itota wapiticæ cæcā iinque mōnō wæætē piinte angæimpa, ante nē ānewēnāni inte cædōnānimpa. Nōwo iñōmō tōmēnāni, Guēmanguiōnæ i incæte Itota nī cōmampoinḡä ingante, Waa bacæcāimpa, ante cæcā iinque mōnō māo piinte angæimpa, ante babæ cæcæte ante cōwā adānitapa. ³ Ante cōwā ayōnāni nī cōmampoinḡä ingante Itota,

—Bitō ængæ gantidinqe tæcæguedē pō næ gongæe.

⁴ Āninqe wæætē nē piinte ancædāni inānite āninqe,

—Guēmanguiōnæ iñonte mōnō æbānō cæquēnēmō imōō, ante wææ angatīi. Mōnō edæ waa cæquēnēmō imopma, ante pōnēmīnitawo. Wæætē edæ, Wēnæ wēnæ cæquēnēmō imopma, ante pōnēmīnitawo. Quēwencædānimpa, ante mōnō waa cæquēnēmō imopma, ante pōnēmīnitawo. Wæætē, Wæncædānimpa, ante mōnō wæñonguēnēmō imopma, ante pōnēmīnitawo. Mānōmai ante Itota angā iinque tōmēnāni edæ pæ wēēnedānitapa.

⁵ Adinqe tōmēngā ængui badinqe tōmēnāni inānite æmætæ gomō æmætæ gomō adinqe edæ, Mīmō ōmædēināni incædō, ante wædinque nī cōmampoinḡä ingante,

—Pædæ pompobi, angā ēñēninqe pædæ pompodinqe nē cōmampodingā incæ ædæmō waa empocā bapocantapa.

⁶ Adinqe edæ Paditeoidi guiquēnē wadæ tao godinqe Edodeidi tōnō bee tēninqe, Mōnō æbānō cæte Itota ingante wæñōmō wænguingā, ante godongāmæ pōnēninqe tedegadānimpa.

Gāwapæ wedeca nanguī ināni pōnānipa

⁷ Itota iñōmō tōmēngā nānō nē ēmiñænāni tōnō wadæ tao godinqe gāwapæ wedeca godāni adinqe Gadideabæ quēwēnāni nanguī ināni tee empote godānitapa.

⁸ Iinque wadāni Oodeabæ, Eedotadēē, Idōmeabæ, Oododānō æmæmāa, Tido eyequei, Tidō eyequei māniñōmō quēwente tededinqe, Itota mānōmai cæcampa, ante tededāni ēñente wædinque bacoo ināni māniōmæ tōmāo quēwēnāni inte tōmēngā weca pōnānitapa. ⁹ Adinqe Itota, Goto gongænāni wæcæ wæ, ante pōnēninqe tōmēngā miñæ cōwē nē godāni inānite, Wipo

ænte pōmīni ate botō wipodē wāi wocente owocæboimpa, angantapa. ¹⁰ Wēēnē iñōmō, Itota nanguī ināni inānite gampocā waa badānipa, ante nē adināni inte tōmēnāni ñōwo, Mōnō gampo cæte waa bacæimpa, ante cædinque goto gongænāni wædinque mānōmaiñō ante ānongāimpa.

¹¹ Ayæ Itota ingante adinqe wēnæidi nē wentamō ēwocadāni incæ tōmēngā ōnōwa gāānē ædæ wææninque,

—Bitō Wængongui Wēmi inōmi imipa tōō, ante Yæ ānānitapa. ¹² Ēñente wædinque Itota wæætē, Botō æbodō imoo, ante cōwē ānāmai inguēnē quēwēmīni, angacāimpa.

Itota angā ate dote ganca ināni nē gode ānāni badānipa

(Mäateo 10.1-4; Odoca 6.12-16)

¹³ Ayæ ānanquidi æidinqe Itota, Iñāni inānite āmo poncædānimpa, ante aa pecā tōmēngā weca pōnānitapa. ¹⁴ Pōnāni ate tōmēngā dote ganca ināni mānimpodāni inānite, Minitō botō miñæ quēwēñōmīnite botō wadāni weca da godōmo gote apænemīni ēñencædānimpa, āninqe, Botō beyæ nē gode āmīni incæmīnimpa, angacāimpa. ¹⁵ Ayæ pōnō apænebo ēñēninqe mīnitō tæi ēmōmīni inte wēnæidi inānite nē āmīni badinqe wido cæcæmīnimpa. ¹⁶ Tōmēngā dote ganca nānō apænte ænāni iñōmō iūmai ēmōnōnānimpa. Tānocā Timōnō ēmongā incæte Itota wawo Pegodo pemongacāimpa. ¹⁷ Tebedeo wodi wēna Tantiago tōnō Wāō nāna caya nē yedæ tededā ina adinqe Itota, “Detæbo nānōmoda bai inapa,” ante, Mæmæ beyæ, ante Boānede pemongacāimpa. ¹⁸ Ayæ Æntade, Pedipe tōnō Batodōmēē, Mäateo tōnō Tōmato, Adepeo wengā Tantiago tōnō Tadeo inānitapa. Ayæ, Mōnō ōmæ ingæimpa, ante nanguī cædongā inte wacā Timōnō ingantapa. ¹⁹ Ayæ Itota ingante odōmonte nē godonguingā Codaa Icadiote nāni ānongā ingacāimpa. Mānimpodāni inānite Itota angā nē gode ānāni bagadānimpa.

Wēnæ tōnō cæcā iūmaingampa, ante wapiticæ ānānipa

(Mäateo 12.22-32; Odoca 11.14-23, 12.10)

²⁰ Ayæ ate Itota oncōnē pongacāimpa. Pongā adinqe bacoo ināni wæætē pō pō goto gongænāni adinqe wadāni guiquēnē, Itotaidi quīdō cænguiñāni, ante wædōnānimpa. ²¹ Ayæ, Quimæ. Ocai edæ ōmædæcacā pōnente bai cæcāmææ, ante pōnente tededōnānimpa. Mānōmaiñō ante tededāni ēñēninqe Itota guidēnāni guiquēnē tōmēngā ingante bæi ongonde æncæte ante wadæ pōnānimpa.

²² Ayæ nē wææ odōmōnāni guiquēnē Eedotadēē quēwente pōninqe, “Iñæmpa wēnæ awēnē Beedeboo tōnō quēwengā inte Itota

māningä tönö cædinque wënæidi inānite wido cæcä İmaingampa,” ante tedewënāni.

²³ Ĕñente wædinque Itota aa pecä pönāni ate, “Tatāna mīni ānongä İñömö nāmā incæ ædö cæte wido cæquiringā, ante Ĕñencæmīnīmpa, ante botö, Inguipoga æbānö cædāni, ante odömömo bædāni. ²⁴ Awënë odeye nempo quëwënāni İñömö pīlnāni badinque nāemæ wæætedö wææte cædāni İninque awënë odeye nānö ömædepote wæquinque tømënāni nāmā ĩwente cædānīpa. ²⁵ Ayæ adocönë owocabo incæ adoyömö godongāmæ quëwënīnāni incæ nāemæ wæætedö wææte cædāni İninque tømënāni oncö woquinque nāwæ gobainānīpa. ²⁶ Ayæ Tatāna nempo quëwënāni İñömö edæ nāemæ pīinte badinque wæætedö wææte cædinque tømengä ingante wido cædāni İninque Tatāna dicæ tømënāni awënë İmaingā,” ante Itota odömönte apænecantapa.

²⁷ Ayæ, “Në tæi pīñengä ingante wīi goto wīninque waocä ædö cæte tømengä oncönë guite mīnīncö ö ænguingā. Edæ në ĩcä ingante bæi ongönte goto winte ate pö guite ö ænāni bai botö İñömö wënæ inte në bæi ongönte wido cæbo İmopa,” angantapa.

²⁸ Ayæ, “Nāwangä apænëbo ĩñeedāni, angantapa. Mīni waocabo wënæ wënæ cæmīni incæ wadāni inānite godö babæ ānewēmīni incæte edæ Wængonguī wææte tømānö ante pönö űimpo cæcä beyænque quëwencæmīnīmpa. ²⁹ Wææte Wængonguī Tæiyæ Wæmö Öñowoca ingante waocä godö babæ ante wënæ wënæ apænecä İninque tømengä æmæwo wentamö mongængä bagingä İninque cöwë wantæpiyæ wentamö mongæncæcäimpa. Mānōmāi beyæ Wængonguī űowopāmo İñönte űimpo cædāmāi inte İncayæ pōmāmo İñönte adobai űimpo cædāmāi inte cöwë pancæcäimpa,” ante Itota apænecäimpa.

³⁰ Āninque, Mīnitö botö İmote, Bitö wënæ në wentamö ĩwocacä tönö quëwente cæbāimīpa, āmīnitawoo. İñæmpa, Wængonguī Tæiyæ Wæmö Öñowoca tönö quëwente cæbo apa ānewēmīni, ante Itota apænecäimpa.

*Itota badä tönö tømengä biwīdi
(Mäateo 12.46-50; Odoca 8.19-21)*

³¹ Ayæ Itota wānā tømengä biwīdi tönö mānī nāni ponque pö do pöninque yabæque ayæ ongöninque, Guīi āñete tæ. ³² Ānāni ĩñente āñecæte ante ponte apænecä ĩñëninque wadāni Itota weca contate ongönāni Itota ingante wææte apænedinque,

–Bitö badä bitö biwīdi tönö bitö İmite ante oncodo ponte yabæque ongönānīpa cæbīi.

³³ Ante āñönānite,

–Botö badä ædānö İnāā ante ämoo, ante pönēmīni. Ayæ botö biwīdi ædānidö İnāni ante ämoo, ante pönēmīni.

³⁴ Āninque godāmæ contate ongönāni İnānite adinque,

–İnāni İñömö edæ botö badāidi botö biwīdi İñönāni İnānīpa, ante mānōmāinö ämo abāimīnīpa. ³⁵ Edæ Wængonguī nānö ānö bai ĩñente æcānö cæte quëwëna māningä botö biwī ingampa. Māningä botö biwīnque ingampa. Mānīnā botö badä İnampa, ämo abāimīnīpa, ante Itota apænecäimpa.

4

Waocä nānö quiyadö ante odömönte apænecampa

(Mäateo 13.1-9; Odoca 8.4-8)

¹ Wææte gāwapæ yæwedeca goto odömöncæ cæyongä nangui İnāni tømāo goto ponte ongönāni adinque Itota wipodë go guite tæ contate wāi wocænte woyongä tømënāni ayæ gāwapæ yæwedecaque ömaaque ongönānitapa. ² İninque tømënāni inānite nangui pönī odömöninque Itota, Wængonguī Awënë nempo quëwëninque æbānö cæquīi, ante ĩñencæmīnīmpa, ante botö İmæca quëwënāni nāni cæinö ante odömönte apænëbo ĩñeedāni.

Āninque İmāi ante odömönte apænecä ĩñengadānīpa. ³ “Apænëbo ĩñeedāni. Waocä në quiyadongä İñömö quiyacæ gocampa. ⁴ Gote quiyayongä pancamonga taadö İñömö eyepote wææmōmpa. Taadö wæænte eyepodimö öñöñönte ayamōidi pöninque dobæ ade cænānīpa. ⁵ Pancamonga guiquënë dicamentaa onguipoi woyedömö İñömö eyepote wææmpa. Onguipoi woyedömö öñömö inte pæquīnāmāi quingæ tā bocate pædinque æmonga æipa. ⁶ İninque oguimento yæyæmë guiwadāmāi inte cöñe bawadāmāi İñönte nænque tī nāwāñö wānā cacadinque edæ guingo icate nāñe wæmpa. ⁷ Pancamonga guiquënë ömentacodë nānö eyepodimö İñömö pæquīnāmāi tā bocate gä æiyönte ömentacoo pö İncootonque ganta cæca ate nāñe wæmpa. Wampo incapa pæquīi. ⁸ Wæmōnguiyoga quiyadimö guiquënë tā bocate waa pædinque tømëmö nangui pönī godömenque incapa. Pancawænca edæ todëinta ganca, pancawænca teitenta ganca, pancawænca tië ganca mānīmpomö incapa. Quiyacä nānö quiyadö ante edæ botö māninque ante apænëbopa.”

⁹ Mānōmāi İmpa, ante İnque apænëbopa. Ĕamōnca ongönte edæ ĩñeedāni, ante Itota apænecäimpa.

Öñömoncaque ĩñente pönënāmāi İnānīpa, ante

(Mäateo 13.10-17; Odoca 8.9-10)

¹⁰ Ayæ ate nangui ongöninani dæ godäni ate Itotadi adodänique ongöñönäni edæ, Dote, ante nani gocabo tönö wadäni tömengä miñæ godäni tönö tömengä weca ponte äñanita. Itota eñëmi. Bitö mäninö ante apænedinque æbänö ante odömoncæte ante apænebitawo. ¹¹ Äñönänite, “Wængongui Awënë Odeye iñömö æbänö awëmö cæcää, ante mini waocabo wëñëñedë eñëñamaï iñinö incæte ñöwo edonque pönö apænebo ate minitö adomînique në eñëmini bamînipa. Gobæ ongönäni inänite apænedinque, Inguipoga quëwënäni nani cæi bai impa, ante botö pancaa ante odömonte apænebo eñëñanipa. ¹² Dodäni Wængongui beyæ apænedinque iimainö ante yewæmongadänimpa. Wængongui nänö në ñimpo cæquëñänäni inämaï inäni inte tömëñäni iñömö awincaque adinque wii ædæmö adäni inte önömoncaque eñëninque ædæmö eñëñamaï inäni inte edæ ocæ emænte pönämaï incädänimpa, ante yewæmongadänimpa. Mänömaï iñque bacæimpa, ante beyæñque botö tömëñäni inänite wii edonque apænebopa,” ante Itota apænecantapa.

Quiyacä nänö cæinö ante pönente iimainö ante eñëgcæimpa

(Mäteo 13.18-23; Odoca 8.11-15)

¹³ Itota ayæ tömëñäni inänite godömenque apænecantapa. “Botö mäninö ingui-poga nani cæinö ante do odömonte apænebo eñëninque minitö eñëñamaï imînitawo. Iñinque ñöwo godömenque odömonte apænebo incæte minitö ædö cæte godömenque eñënguimîni.”

¹⁴ “Iimäi impa. Në apæneca iñömö tömëmö quiyate bai cædinque Wængongui tömengä nänö apænedö ante apænecampa. ¹⁵ Pancadäniya guiquëñë taadö eyepote wæænîmö bai inäni inte Wængongui nänö apænedö ante eñëninque mîmöno pönëñamaï iñönänite ayamö ade cængä bai Tatäna incæ ponte ö ængampa. ¹⁶ Wadäni guiquëñë dicamontaa woyedömö iñömö eyepote wæænîmö bai inäni inte tömëñäni Wængongui nänö apænedö eñëninque quingæ Ao ante watapæ todänipa.”

¹⁷ “Ayæ ate adodäni wantæ iñö quëwëñönänite wadäni Wængongui nänö apænedö beyæ piñäni wædänipa. Ayæ wadäni wënæ wënæ cæcæte ante togænte pänäni wædänipa. Iñinque ogüimento yæyæmë guiwadämaï näñe wænte bai inäni inte tömëñäni guifente wædinque emö cæte godänipa. ¹⁸ Ayæ wadäni guiquëñë ömentacodë eyepote wæænîmö bai inänäni inte Wængongui nänö apænedö eñëñönäni, ¹⁹ ingui-poga quëwente quïëmë beyænque mönö wæpämö pompa. Ayæ, Mäincoo beyænque toquïmo, ante nani oda cæte

wæwëmämö pöninque wacoo wacoo nani æinënö pöninque edæ ömentacoo ñancate cæ bai cæyonte Wængongui nänö apænedinö incæ incädämaï bai bapa. ²⁰ Ongui-poga waingui-poga quiyadimö bai inäni guiquëñë tömëñäni Wængongui apænedinö eñente Ao äninque wede pönëñäni inte tömëwæ incate bai Wængongui beyæ nangui cædänipa. Pancadäniya todëinta ganca incate bai nangui cæyönäni, pancadäniya godömenque teitenta ganca incate bai cædänipa. Pancadäniya nangui pönî tiëë ganca incate bai cædänipa,” ante Itota apæneca eñëñanitapa.

Gongapæncade ante odömonte apænecampa (Odoca 8.16-18)

²¹ Ayæ tömëñäni inänite Itota iimäi odömoninque apænecantapa. “Waomîni gongapæncade ti wodönodinque dicæ owætadë boo cæcaminiyaa. Dicæ möimoga æñömengadæ inö mäo concæminiyaa. Wæætë edæ wænömëñæcapaa concæmîni ñäö bæco amînipa. ²² Quinö ante wë wodonte bai i iñömö mäninö ante iñcayæ ate tadonte edonque ate bai eñënginque ñöwo wë wodonte impa. Quinö bee ocate bai i iñömö mäninö iñcayæ ate wi æncate edonque aquinque ñöwo bee ocate impa. ²³ Êamonca ongonte eñënguëñë cæmîni,” angantapa.

²⁴ Ayæ tömëñäni inänite godömenque apænedinque Itota, “Önömonca eñëninque eñënguëñë cæmîni. Minitö mini tee mante godöncade incæ adocadeca tee mäninque Wængongui minitö imînite adodö pönöninque godömenque ayæ pönongä æncæmînimpa. ²⁵ Edæ në eacä ingante godönäni ængä bai në eñëngä ingante godö apænebo eñente entawëninque tömengä godömenque eñente bacæcæimpa. Në eädämaï ingä guiquëñë tömengä wædænque pönî nänö mäincoo iñonte mänincoo tömancoo ö ænäni wæcä bai në eñëñamaï ingä adobaï tömengä wædænque pönî nänö eñente entawëñö iñonte ö ænte bai cæbo dæ ba ate wæcæcæimpa.” Mänömaïno ante Itota tömengä emîñæñäni inänite odömonte apæneca eñëñanitapa.

Guiyamö pæpa, ante odömonte apænecä

²⁶ Ñöwo iñömö öömaque ongönäni inänite godömenque odömoninque Itota iimäi ante apænegacæimpa. “Waocä quiyacä ate awëmö pæ bai inte Wængongui Awënë Odeye pönö cæcä ate tömengä nempo në quëwënäni awëmö yebæninque bacoo pönî badänipa. Apænebo eñëedäni. Waocä gönea quiyate ate, ²⁷ woyowotæ mö ñöninque baänæ ñäni ömæmönongä iimö iñö iimö iñö tömëmö nänö quiyadimö incæ awëmö tä bocate pæpa. Waocä iñömö, Æbämë cæte tä bocate pæpa, ante acantawogaa. ²⁸ Edæ

onguipo beyænque tömengä nänö quiyadimö incæ tä bocate pædinque æmonga æi cænguimæ baate ate ayæ cænguï yagapa. ²⁹ Yaga adinque, Amiñate cænguï bapa, ante edæ pete ængampa,” ante odömonte Itota apænegacäimpa.

Möotatomö guidimö ante odömonte apænegacäimpa

(*Mäateo 13.31-32; Odoca 13.18-19*)

³⁰ Ayæ godömenque apænedinque Itota, “Wængonguï Awënë Odeye nempo æbänö quëwëñäni, ante mönö quinö odömonte ate ëñenguï. Edæ, Inguipoga quinö pæte yebænte bai i adinque, Mäninäni adobai yebænänipa, ante ëñengæimpa. ³¹ Iimai impa. Möotatomö mini ænte quiyamö guidimö pöni i bai wamö mini quiyamö adomonque incæ adobai guiyamö pöni i iñömö edæ dæ ampa. ³² Incæte möotatomö iñömö tä bocate pædinque möotatawæ edæ ocäñequi doyæ pæwæ bapa. Wüi tömää ocäñequi mini quiyadiwæ bai edæ ocäa inämai ænte möotatawæ iñömö edæ ñænæ awæ impa. Adinque tömëwæ ibæñömö ayamöidi gänë iñömö ponte ongönänipa. Möotatomö guidimö incæ mänömai pæ bai Wængonguï Awënë nempo quëwëñäni iñömö wædænque inänäni incæ nangui yebænguïñäni inänipa,” ante Itota odömonte apænegacäimpa.

Inguipoga näni cæi bai impa, ante Itota odömongampa

(*Mäateo 13.34-35*)

³³ Ayæ Itota, Wængonguï Awënë nempo quëwëñäni æbänö cæquï, ante ëñencädänimpa, ante imæca quëwëñäni näni cæinö ænte godömenque nangui pöni odöminque godongämæ ongönäni näni ëñenganca apænedinque idæwaa. ³⁴ Mäninonque bai odömonte apænedinque tömëñäni inänite cöwë godömenque apænedämai inongäimpa. Incæte tömengä miñæ në godäni adodänique ongöñönänite Itota edonque pöni, Mänömai impa, ante tömänö ænte apænegacäimpa.

Itota angä ëñente woboyæ æpæ næ gongæmpa

(*Mäateo 8.23-27; Odoca 8.22-25*)

³⁵ Mänionæ gäwadecæ bayonte Itota tömengä ëmiñænäni inänite,

–Gäwapæ æmæmäa taocæimpa.

³⁶ Äninque ömaa ongönäni inänite ëmö cæte taocæ cædinque tömengä nänö apænedimpodë adopodë ayæ contayongante mantadäni taocantapa. Adinque wadäni wapodë godongämæ taodänitapa. ³⁷ Tao wogaa goyönäni woboyæ iñontobæ nangui pöni pæmæninque æpæ mængonta mængonta pöninque gao gao wipodë äñëñö, ³⁸ Itota yæmiñæmpo bee podoncate mö

ñongantapa. Ömæmoncæcäimpa, ante tao cædinque,

–Awënë, bete wæncæ cæmompamö mö ñömi.

³⁹ Änäni ëñëñinque ñäni ömæmonte ængæ gantidinque,

–Woboyæ, pæmænänimai imæwe. Gäwapæ incæ cædämai næ gongæmäwe.

Ante äñongä woboyæ pæmænänimai iñö gäwapæ incæ næ gongæñinque ñancæ ñancæ gongæmænimpa. ⁴⁰ Ayæ tömëñäni inänite,

–Mini pönëgade, quimæ guñëwëminii.

⁴¹ Äñongä tömëñäni ancai guñëñinque nämäneque tededinque,

–Æcämë inte angä ëñente woboyæ incæ æpæ incæ gongæmpa, ante guñente wægadänimpa.

5

Wëncæ wentamö ewocacä tönö në quëwengä (Mäateo 8.28-34; Odoca 8.26-39)

¹ Äninque Itotaidi mänii æmæmäa tao godinque Guedatabæ pö ti wæñänitapa.

² Itota mänömai pöninque gäwapæ tao ti wæængä adinque onguñængä wënæ wentamö ewocacä tönö në quëwengä inongä ænte edæ waodänido quëwente tao bee tengantapa. ³ Tömengä waodänido cöwë në quëwengä ingante ædö cæte goto winguñänii. Daagömenca incæ tææmö impa goto winguñänii.

⁴ Eno pönö goto wimænte wææ ëno pönö goto wiwate bacæcäimpa, ante anca cæyönäni tömengä daagömë wangö ñæ wangö ñæ cædongäimpa. Æcämënque incæ tæi piñængä ænte tömengä ingante ænguingä. Edæ dæ äñongäimpa. ⁵ Itädë incæ woyowotæ incæ tömengä änanquidi æite wææ waodänido pö änanquidi æite wææ ocæ ëmænte pö pö cæte Yæ yæ äninque dicaca nämä incæ äwænonga äwænonga cæte wencata bai ëñate quëwëñongäimpa. ⁶ Äninque Itota go dibæ pongä adinque tömengä quingæ pogodo godinque Itota weca ædæ wææninque, ⁷ ogæ tededinque,

–Itota ëñëmi, bitö në Äibæ Quëwengä Wængonguï Wëmi inömi incæ quimæ botö weca pöwë. Edæ, Ämogate wæcæcäimpa, ænte botö imote cædämai imæwe, ænte nangui angantapa.

⁸ Edæ tömengä tæcæ pö bee tëñongante wënæ ingante Itota iimai ænte äningä inongäimpa.

–Wentamö në wentamö ewocabi ænte ämo ëñë. Bitö waocä baonga guidëmi ænte ñöwo tao gobæwe, ænte Itota täno angä ëñente wædingä ænte wënæ ñöwo, Cædämai imæwe, angantapa.

⁹ Äninque Itota,

–Bitö æmömido imii.

Äñongante,

—Tontadoidi tæiyænāni adinque, Deguiōnō, ānānīpa. Mōnitō adobaī tæiyæ pōni imōnīpa, ante botō ēmōwo adobaī Deguiōnō ēmōmopa.

¹⁰ Ante apænedinque ayæ, Mōnitō imōnite wabæca wido cædāmaī incæbiimpa, ante ancaā angantapa. ¹¹ Māniñōmō odæ wængānāidi nanguī ināni eyequeī ānanquidi a cængōnāni adinque, ¹² wænæidi incæ Itota ingante,

—Īi odæ wængānāidi weca āmi godinque tōmēnāni baōnē guiite quēwēmōnie.

¹³ Ante tedete āñōnānīte Itota Ao angā ēñente wædinque wænæidi wentamō ēwocadāni iñōmō tao gote odæ wængānāidi baōnē go guidiānitapa. Īninque odæncato dote mlido ganca ināni incæ ontacamō cægōninque tōmāne to wæi gāwapæno pogodo wæi guiite becadote capo wænānitapa.

¹⁴ Becadote wænāni adinque odæ wængānāidi nē aadināni guiquēnē pogodo wodii winonte tōmēnāni quēwēñōmō māo bee tente apænedinque idōmæ māo gode ā gode ā cæte, Itota mānōmaī cæcā wæmōnīpa, ante apænedāni ēñēninque wadāni, Ēbānō cæcāi, ante acæte ante pōnānitapa. ¹⁵ Itota weca ponte ayōnāni wænæidi tōnō nē quēwēningā incæ ñōwo ōnonganque bate weocoo ēñacā inte tæ contate ongongā adinque tōmēnāni, Mōnō Deguiōnō ēnemopā āningā ingampa, ante guiñente wægadānīmpa. ¹⁶ Nē adināni guiquēnē ñōwo pōnāni inānite apænedinque, Wænæ ēnemopā ĩningā ingante Itota æbānō cæcāi, odæ wængānāidi inānite Itota æbānō cæcāi, ante apænedāni. ¹⁷ Ēñēninque tōmēnāni wæætē Itota ingante, Mōnitō weca quēwēñāmaī gobāwe, ānāni.

¹⁸ Ēñente wædinque wipodē go guicæ cæyongante wænæidi inte quēwēningā iñōmō, Bitō miñæ māobi goboe. ¹⁹ Āñongante Baa āninque Itota,

—Tōmēmi oncōnē gote, Wængonguī Awēnē wænæidi inānite wido cæcā ōnōmoque baboi amīnīpa, ante bitō guidiēnāni inānite māo apænebi ēñencædānīmpa. Ayæ, Botō wæwente quēwēñōmote tōmēngā guēa wæwente bai pōnente pōnō cæcā waa batabopa, ante apænebi ēñencædānīmpa.

²⁰ Itota angā ēñēninque wadæ godinque tōmēngā Decapodibæ māo, Itota waa cæcā waa batabopa, ante apæneca. Ēñente wædinque tōmānāni, Ē æbānō cæte mānōmaī waa bacāi, ante guiñente wægadānīmpa.

Gaido wēñængā beyæ cæcæ goyongante onquiyængā Itota weocoo gampocampa (Māateo 9.18-26; Odoco 8.40-56)

²¹ Mānū wipodē guiite tōmēngā ĩmæmāa ta ti wæængā ate nanguī ināni acæte ante

pō goto goto godāmæ gongæñānitapa. Itota ayæ gāwapæ wedeca ongongantapa. ²² Ayæ ongōñongā wacā oodeoidi odōmōincō awēnē inongā inte tōmēngā ēmōwo Gaido iñōmō Itota ingante adinque pōninque tōmēngā ōnōwaca gāānē ædæ wææñinque, ²³ tōmēngā ingante,

—Botō wēñængā baquēcā iñōmō edæ do bæ wæncæ cæcampa cæbii. Bitō ponte tōmēngā ingante gampobi waa bate quēwēncæcāimpa, ante nanguī angantapa.

²⁴ Gaido mānōmaī angā ēñēninque Itota wæætē tōmēngā miñæ gocantapa. Idōmæ goyongante nanguī ināni bee tente goto goto pōnāni. ²⁵ Īninque godāmæ ongōnāni tōnō onquiyængā adocanque wantæpiyæ dote wadepo iñonte wepæ wantæ bidāmaī cōwē wææ wæwēningā inte adobaī ponte tōmēnāni miñæ gocantapa. ²⁶ Doyedē iñōmō onquiyængā waa bawēnencæte ante cædinque tōmēngā quincōo tōmancoo eyepote pædæ godongā æninque dotodoidi tæiyænāni cædāni caate wæcā incæte tōmēngā waa bawēñāmaī inte godōmenque wænæ wænæ bate wædongāimpa.

²⁷ Mānōmaī quēwente wæyongante wadāni, Itota mānōmaī cæcampa, ante tededāni ēñente wædinque tōmēngā ñōwo goto pōnāni tōnō pōninque Itota ōnōñabæca inō ponte weocooque godō gampocantapa. ²⁸ Edæ, “Tōmēngā weocooque gampote waa bawēñemote,” ante pōnēningā inte, ²⁹ tōmēngā godō gampoyongā wepæ nānō gowete wæwēnimæ wantæ bi ate tōmēngā, Wantæ biwēñemopa, ante ōnōwēnenque pōnengantapa. ³⁰ Itota iñōmō, Ē, tæi piñante botō entawēnō incæ edæ wacā beyæ cæquinque do gotimpa, ante wæwēnente awædō, āninque goto gongæñāni tæcæguedē næ gongæñinque dadī ēmænte cōwā adinque,

—Botō weocoo æcānō pōnō gampodaī, angantapa.

³¹ Āñongante tōmēngā nānō nē ēmiñæñāni guiquēnē,

—Ēnodāni pōnānīpa aquīmii. Ēcānō gampodaī, ante āmii.

³² Wææ ānāni incæte tōmēngā, Ēcānō botō imote wede pōnēninque gampodaī, ante godōmenque tōmāo cōwā cōwā acantapa.

³³ Ayongante onquiyængā guiquēnē, Wampo bawēñemopa, ante pōnēningā inte nanguī guiñēninque do do wāate wædinque Itota weca ponte ædæ wææncate tōmānō ante tōingā apæneca ēñengantapa. ³⁴ Apæneca ēñēninque Itota wæætē,

—Onquiyæmi ēñēmi. Bitō wede pōnēnō beyæ edæ wampo bawēñemīpa. Ñōwo edæ wædāmaī inte waa godinque nō bawēnente quēwēe, angantapa.

³⁵ Ante tæcæ apæneyongä oodeoidi odömöincö awënë Gaido oncönë quëwënanäi mänifedë pöninque edæ Gaido ingante apænedänitapa.

—Bitö wengä iñömö ñöwo æmæwo wængampa cæbii. Nöwo Awënë në Odömöngä ingante quïnante godömenque anguii.

³⁶ Ante ponte äñönänite Itota tömënanäi æbänö tededäni ante ëñënamäi inte bai cædinque oodeoidi odömöincö awënë Gaido ingante apænedinque,

—Guiñënamäi inte önonque wede pönëe, angantapa.

³⁷ Ayæ godongämæ ongönäni inänite, Ee ongoedäni, äninque Pegodo ingante, Tantiago tönö Wäö näna caya inate mänimpodänique inänite ænte gocantapa.

³⁸ Tömënanäi tönö godinque Itota tömënanäi odömöincö awënë oncönë ponte ayongä mänincönë waodäni nangui cægöninque edæ Ca ca wædinque ogæ tedete Yæ yæ änanäi acantapa. ³⁹ Adinque Itota oncönë guidinque,

—Quimæ ogæ tedete cægöwëminii. Quimæ Ca ca wæminii. Iñæmpa iñömö wëñængä wodi edæ wii æmæwo wængantapa. Edæ mö ñongampa.

⁴⁰ Ante apænecä ëñëninque tömënanäi, Angantedö amini, ante tömengä ingante badete todänitapa. Itota wæætë edæ, Gä goedäni, angä oncodö tao godänitapa. Ininque wëñængä wæmpo tönö wäänä inate Itota tömengä miñæ në pöninäni tönö mänimpodänique inänite ænte manguiçä wëñængä wodi nänö öñoncönë wäänë guidänitapa. ⁴¹ Wëñængä wodi ingante Itota pædæ wææmpo bæi ongonte töö æmæninque,

—Tadita cömi, äninque mönö tededö, “Wëñæmi onquiyæmi ængæ gantibi,” angantapa.

⁴² Angä ëñëninque wëñængä baqueçä dote wadepo ëñadingä inte dobæ ængæ gantite dao dao gocä. Adinque tömänäni ançai guñente wædänitapa. ⁴³ Itota wæætë, Botö æbänö çæboo, ante minitö mäo apænedämäi iedäni. Äninque edæ wëñængä beyæ cængui angä godöna cængantapa.

6

Näatadeta iñömö ponte Itota apænecampa (Mäateo 13.53-58; Odoca 4.16-30)

¹ Itota wadæ godinque tömengä miñæ në godäni tönö tömengä nänö pægaiñömö pongadänimpa. ² Ayæ, Guëmanguionæ impa, äninque Itota tömënanäi odömöincönë go guidinque tæcæ odömonte apænecä ëñëninque mänifömmö ongönäni nangui Inäni guñente wædinque näni caboque tededänitapa.

—Iñgä iñæmpa ædö çæte nangui ëñente apænecä. Æbänö çæquii, ante æcänö

tömengä ingante godö odömöngä adinque tömengä mänömai bamönengæ çæcää, ante ëñencæte ante wæmönipa. ³ Iñgä iñæmpa mönö awæmpa në tímöwengä imaingä inte bamönengæ mänömai çæcampa, ante awædö. Edæ Mäadiya wengä inongä inte tömengä iñömö öñönänique mëmö ingampa. Tantiago tönö Ootee, Codaa tönö Timönö tömënanäi mëmö inämai ingantawogaa. Tömengä biwingueidi inçæ mönitö tönö wii ongönäni atamö.

Ante pönente wædinque tömengä beyæ ante piinte badänitapa. ⁴ Ininque piinte badäni adinque Itota wæætë angantapa.

—Iñæmpa, Wængongui beyæ në apænecä inte tömämæ gote apæneyongante tömengä ingante waa adänipa. Wæætë tömengä nänö pægaiñömö ponte apæneyongante mänifömmö wæætë wiwa adänipa. Tömengä nänö guidënanäi tönö tömengä oncönë owodäni tönö mänimpodänique tömengä ingante wiwa adänipa töö.

⁵ Äninque Itota adopoque adopoque gampocä waa badänitapa. Mänömai wædænque cædinque tömengä, Ædö çæte gomonga çæquimoo. ⁶ Äninque, Mïni pönëegade. Quïnante pönënamäi imini, ante wægacäimpa.

Wængongui Awënë ingantedö ante apæneedäni, ante Itota angä godänipa (Mäateo 10.5-15; Odoca 9.1-6)

Ayæ wayömmö näni quëwëñömö wayömmö näni quëwëñömö mäo odömöninque Itota apænecä ëñengadänimpa. ⁷ Ayæ, Dote inäni, näni äñönäni inänite aa pecä pönäni ininque, Nöwo minitö æmæñö mëmïnaa æmæñö mëmïnaa goyöminite botö pönö çæbo ate minitö awënëidi bai badinque edæ wënæidi wentamö ewocadäni inänite në ämini inçæminimpa, ante da godongä godänitapa. ⁸ Ayæ, Iimäi çæedäni, angantapa. Minitö taadö godinque ongontoque mïni nææntoque næænte goedäni. Cængui inçæ mäinçoo da wenguinçade inçæ æñämäi inte godinque tiguitamö önoncamonçadedë da wënämäi inte ömæpomini goedäni. ⁹ Awæncata mïni ewataque ewate weocoo mïni ëñacooque ëñadinque wacoo æñämäi goedäni, angantapa. ¹⁰ Ayæ godömenque äninque Itota,

—Godinque æcönëno täno go guimïni owodinque minitö wayömmö mïni go quëwenguinganca mänincönenque go guii go guii cædinque quëwëedäni. ¹¹ Äyömmö më goyöminite wadäni, Pöedäni, änamäi inte minitö apænedö ante wii ëñënanäi wædinque minitö wæætë tömënanäi inänite ëmö çæte iimainö ante goedäni. Minitö iñæmpa, Pöedäni, änamäi imini adinque mönitö gomöni tamëñedäni, ante odömonçæte ante

mīnitō ōnōwa wadæ wadæ cæwadinque wadæ goedāni.

¹² Ānīnque Itota tōmengā ēmiñænāni inānite, Nōwo goedāni, ānīnque da godongā godānitapa. Godīnque tōmēnāni wabæca quēwēnāni inānite māo, Mīnitō wēnæ wēnæ mīni cædinō ante wæwente pōnēnīnque ñimpo cædāni, ante māo apænedāni ēñēnānitapa. ¹³ Wēnæidi nanguī ināni inānite wido cædānitapa. Ayæ waodāni nanguī ināni wēnæ wēnæ inte wædāni inōnānite oginguipæ ōni ōni paadāni ate waa bagadānimpa.

*Wāo cæpænē nē guidōnongā wængampa
(Māateo 14.1-12; Odoca 9.7-9)*

¹⁴ Itota ēmōwo ante apænedāni ēñēnīnque tōmāmæ quēwēnāni do ēñēnīnque gode ā gode ā cæte tedehyōnāni Edode pancabaa awēnē odeye incæ, Itota æbānō cæcā, ante ēñēngacāimpa. Īnīnque tōmengā inōmō, –Æpænē nē guidōnongā Wāo wodi dobæ wænte ñāni ōmæmōningā inte inngā Itota inōmō imaingampa. Mānīnō beyænque tōmengā tæi pīñænte entawēnongā inte nē nanguī cæcā ingampa, ante pōnēmopa, angantapa.

¹⁵ Ayæ wadāni,

–Ediya wodi imaingampa.

Ante tedehyōnāni wadāni wæætē,

–Wængonguī beyæ nē apænegaināni bai tōmengā adocā imaingampa.

¹⁶ Ante tededāni ēñēnīnque Edode inōmō,

–Botō nē wangō tamencadongā Wāo wodi adocā incæ edæ ñāni ōmæmonte a ongōmaingampa, ante wædongāimpa.

¹⁷ Wāo wodi inōmō iimāi wængacāimpa.

Do inēdē awēnē Edode nānō tōniñacā Pedipe ayæ mīngā inngā Pedipe manguiwēningā Ædodiya ingante Edode inōmō, Botō nānōgængā bacæcāimpa, ante ō ænte mongā. Īnīnque tōmengā adocā Wāo wodi ingante bæi ongonte goti winte tee mōnedongāimpa. ¹⁸ Edæ Wāo inōmō nānō caate wænguinque Edode ingante iimainō ante do wææ āningā inongāimpa. “Edode ēñēmi, Wængonguī nānō angainō bai ēñēnāmāi inte bitō tōniñacā nānōgængā ingante edæ manguiwēmipa tō.”

¹⁹ Ante wææ angā ēñēnīnque Ædodiya guiquēnē Wāo nānō ānīnō beyæ cōwē pīnīnque tōmengā ingante wænoncæ cæcā incæte ædō cæte tōmengā ingante wænonguingā. ²⁰ Edæ, Wāo tæiyæ waēmō onguīñængā inte nē nō cæcā ingampa, ante do ēñēnongā inte Edode inōmō Wāo ingante edæ guīñēnte wædongā inongāimpa. Īnīnque tōmengā ingante edæ wææ gompodongāimpa. Ayæ Wāo apæncæcā ēñēnīnque Edode, Angā ēñēnte æbānō cæquimoo, ante nanguī wæcā incæte tōmengā ingante ēñēnīnque todongāimpa.

²¹ Īncayæ ate Edode nānō ēñagāiōnæ iinque bayonte Ædodiya, Æōnædō wænonguimoo, ante nānō ānīōnæ eyepæ batimpa. Edode inōmō, Mānīōnæ bai ēñagaboimpa, ante ææmæ cædinque wente ængā ate tōmengā mīñæ awēnēidi tōnō tontadoidi awēnēidi tōnō Gadideabæ quēwēnāni awēnēidi tōnō tōmānāni becæ pōnānitapa. ²² Ponte bete cængōñōnāni Ædodiya wengā baquēcā incæ tæcæguedē pō gongænte tode pete āwacā adinque awēnē odeye Edode tōnō godongāmæ ongōnāni nanguī todōnānimpa. Īnīnque baquēcā ingante Edode ānongāimpa,

–Waa pōni bitō tode pete āwadi beyænque bitō quīēmē ante æinente āmi ate botō ēñēnte da pōnōmo æe.

²³ Ānīnque ayæ godōmenque ānīnque, Wængonguī ēñēñongā nōngā āmopa, ānongāimpa. Quiēmē impa bitō æinēmi botō tōmāā edæ do godōmo æncæbiimpa. Edæ bitō æinente āmi Īnīnque botō awēnē odeyebo inōmo inte botō ēnempodō incæ edæ tæcæcā pā cæte pōnōmo æmāimipa. ²⁴ Angā ēñēnīnque taodīnque,

–Badā ēñēmi, quīnō anguimoo.

Āñongante wāānā edæ do,

–Botō iimāi āmopa, ānantapa. Wāo æpænē nē guidongā ocabo wangō tomencate pædæ pōnōmi æmoe, ancæbiimpa, āmopa.

²⁵ Ānā ēñēnīnque awēnē weca do ponte guīdīnque baquēcā wæætē,

–Wāo æpænē nē guidongā ingante wangō tomencate tōmengā ocabo inī coyomēnætaca cō cæte do pōnōmi æmoe.

²⁶ Angā ēñēnte wædinque awēnē odeye inōmō, Æ ēñēnte awædō. Quīnō ñōwo cæquimoo, ante nanguī wædongāimpa. Incæte tōmengā, Botō ināmpa godongāmæ becōnāni ēñēñōnānite, Wængonguī ayongā cōwē godoncæboimpa, ante nē ānimo inte edæ ædō cæte ñōwo Baa anguimoo. ²⁷ Ante pōnente wædinque tōmengā nānō ānīnō, Cōwē godonguī impa, ante pōnēnīnque Edode wæætē nē wænongā ingante, Bitō godinque wangō tomencate ænte māmōmi ængæ. ²⁸ Angā ēñēnīnque nē wænongā wæætē tee mōnincōnē gote guīdīnque Wāo ingante wangō tomencacā wængantapa. Ayæ Wāo ocamō inī coyomēnætaca cō cædinque baquēcā weca ænte māmō pædæ pōnongā ænīnque baquēcā wæætē wāānā inante godongā ænōnāimpa.

²⁹ Mānōmāi wængāimpa, ante gode ānāni ēñēnte wædinque Wāo wodi tōmengā mīñæ nē godīnāni incæ pōnīnque tōmengā baō inī ænte māo daga wengadānimpa.

5.000 ganca ināni inānite Itota godongā cæñānīpa

(Māateo 14.13-21; Odoca 9.10-17; Wāo 6.1-14)

³⁰ Mänü Itota në nänö da godöninäni iñömö ocæ émænte ponte godämæ gongænte, Mänömai cætamonipa. Mänömai odömönte apænemöni ëñënanitapa. ³¹ Ante apænedänitapa. Ayæ, wadäni nangui owentæde pänta owentæde pänta wææ cægönäni adinque tömënanäni ædö cæte cæguinänii. Cænguï incæ ædö cæte cænguïnänii. Adinque Itota,

—Minitö adomînique botö miñæ önömæca gote wædænque guëmædäni, angantapa. ³² Angä Ao ante tömënanäni adodänique Itota miñæ wadæ godinque önömæca gocæte ante wipodê wææ contate wogaa godänitapa. ³³ Goyönänite wadäni guiquënë, Itotaidi incæ godänipa, ante adinque wacönê ta wacönê ta godinque tæiyænäni tee ta tee ta go ömaaque oo pänta pogodo gote do edæ pönnique a ongönänitapa. ³⁴ Ayæ wipodê wogaa mämö tæcæ æænoncadoyönäni Itota iñömö ti wæænte ayongä nangui inäni do ponte a ongönäni acantapa. Tömënanäni në aacä dæ äñongä obe-gaidi quëwenguïnämai inäni inte adodänique ongönäni bai inäni inte wæwënanäni, ante pönente tömëngä tömënanäni tönö godongämæ wæwente bai pönengantapa. Ìninqe nangui odömönte apænecä ëñënanitapa. ³⁵ Ayæ gäwædecæ bayö Itota miñæ në godäni tömëngä weca ponte äninque,

—Nöwo wëmö bacæ cæpa cæbii, änanitapa. Ayæ, Önömæca incæ cænguï dæ ampa. ³⁶ Ìnänäni inänite ämi idömæ owodäni weca godinque ayæ nangui inäni nani quëwëñömö godinque cænguï godonte cænguïnänie.

³⁷ Äñönänite Itota wæætê,
Minitö wæætê godömîni cæncædänimpa, ämopa.

Äñongante,
—Æ, ënodäni inäniyaa. Ìñæmpa ocho apäicä cæte beyæ paga æinta æninque mänimpota päö ante godonte æninque edæ wii eyepæ imaimpa. Mönitö wadæ gote mänimpota beyæ päö godonte æninque iñömö godongämæ ongönäni inänite godömöni cænguïnänii, ämitawoo.

³⁸ Ante wæyönänite Itota,
—Päö æpodö nææmîni. Acæ goedäni.
Angä ate pönnique,
—Päö önompö æmæmpoque gæyæ mëa pöni mæ ongompa.

³⁹ Ante apænedäni ëñëninque Itota godongämæ mæ ongönäni inänite, Nöwo mîni cabo mîni cabo gaguimäa tæ contaedäni. ⁴⁰ Angä ëñëninque pancadäniya tië ganca nani cabo nänënë pancadäniya tincoenta ganca nani cabo nänënë tömänäni nani cabo nani cabo tæ contadänitapa. ⁴¹ Tæ contadäni ate päö önompö æmæmpoque gæyæ mëa æninque öönæde inö æmö

adinque, Wængongui, bitö waa pönömi ænte cæmönipa, ante apænedinque päö pä æ cædinque tömëngä, Nanguï inäni cænguï ante ænte mäo cö cædäni, ante tömëngä miñæ në godäni inänite pædæ pönongä æninque mäo cö cædänitapa. Ayæ gæyæ mëa ñonte adobai æninque tömëngä tömänäni inänite di mæñæ di mæñæ cæcä æninque cænänitapa. ⁴² Æninque tömänäni tömo pöni cænäni, ⁴³ ate edæ tömëngä ëmiñænäni päö tönö gæyæ nani ao mænte ñönöni ee öñoncoo pædæ wææmpo ö æ da da wente æninque otodê önompö tipæmpoga go mentodëa cænguï eyede da wënäni contagatimpa. ⁴⁴ Në cænäni iñömö onguïñænäni edæ tinco müdo ganca mänimpodäni nangui inäni nani wencabo cængadänimpa.

Itota yædopæ dao dao gocampa
(Mäteo 14.22; Wäö 6.16-21)

⁴⁵ Itota ayæ do tömëngä nänö në ëmiñænäni inänite, Ægodödäni. Minitö täno wipodê guite æmæ wedeca Betaida tao goyömîni botö wæætê wadäni në cænänäni inänite ämo godäni ate pömoedäni. ⁴⁶ Angä Ao ante tao goyönäni tömëngä wadäni inänite wæætê angä godäni ate adocanque ongote Wængongui ingante apænecæte ante änanquidi æicantapa. ⁴⁷ Ayæ wëmö bayö tömënanäni tæcætibæ wogaa goyönäni tömëngä adocanque ömaa ongote ayongä, ⁴⁸ tömëngä nänö ëmiñænäni wiyate taocæ cæyönäni edæ woboyæ nangui pæmænte pönömenque ænte pö ædö cæte goquïnänii. Adinque tawadiya nänö peyedê edæ tæcæpæ pöni i gäwapæ wænömëncæpæ inö edæ Itota iñömö æpæno yædopæ dao dao obo ponte wodo pänta gocæ cæcantapa. ⁴⁹ Yædopæ edæ gocä gomö adinque tömënanäni Yæ äninque, Waocä wænte babæningä wabänö cægongä, ante wædänitapa. ⁵⁰ Edæ tömëngä ingante adinque tömänäni ancai guïñente wædänitapa. Tömëngä iñömö tömënanäni inänite do apænedinque,

—Ee piyænê cæte guïñënanäni iedäni. Botö imo apa guïñëwëmîni.

⁵¹ Äninque wipodê pö guicä ate woboyæ incæ næ gongæ pæmænanäni batapa. Ba adinque tömënanäni godömenque guïñëninque, Quinante mänömai cæ, ante wædänitapa. ⁵² Edæ, Itota æbänö iñontobæ päö nangui pöni pönö badongä, ante në adinäni incæte tömënanäni mîmö ömæde inäni inte bai wii pönente wægadänimpa.

Caate wædäni inänite Itota cæcä waa badänipa

(Mäteo 14.34-36)

⁵³ Ayæ æmæmæa taodinque tömënanäni Guënetadetebe ti wææninque wipo ñä cæmencadänitapa. ⁵⁴ Mänömai ti wæænte ñä cæmencayönäni mänüñömö quëwënanäni

guiquēnē, Tōmengā Itota ingampa, ante do adānīta. ⁵⁵ Ante adinque mānīōmāe tōmāo pogodo godinque wēnā wēnā wāwēnāni Inānite nōnāmpado nō cædinque, Itota æyōmōnō ongongāā, ante ēñēninque tōmēñōmō tōmengā nānō ongōñōmō do ænte pōnānīta. ⁵⁶ Ayæ wadāni nāni nanguī pōni quēwēñōmō incæ wædænque nāni quēwēñōmō incæ idōmæ incæ, Itota ædōmē gocāā, ante adinque wadāni wæncæ cædāni inānite mānīñōmō ænte māmō taadō wedeca nō cædāni òñōnānīta. Ināni wæætē tōmengā ingante, Bitō weocoo yæwedecoque āmi gampote waa bamōnie. Ante wæyōnānite, Ao angā ēñente nē gampo gampo cædānique tōmānāni waa Ināni bagadānīmpa.

7

Mimōno tao godi beyænque waocā wentamō ēwocacampa

(Māateo 15.1-20)

¹ Ayæ Paditeoidi tōnō nē wææ odōmōnāni tōnō pancadāniya Eedotadēē quēwente mānīñedē Itota weca ponte godongāmæ gongæante ayōnāni, ² Itota miñæ nē godāni pancadāniya mēmpodāmai inte wentamō empote cænāni adānīta. ³ Edæ dodāni, Ònompō ædæmō mēmpoīnānique cæncædānīmpa, ante nāni wææ angainō ante Ao āninque, Bapogabo cæte wæcæ wæ, ante Paditeoidi tōnō oodeoidi tōmānāni ancaā mēmpote ate cænōnāni Inānīpa. ⁴ Ayæ, Ædæmō ādānique cænguīnāni Inānīpa, ante pōnēninque oodeoidi nāni godonte æññōmō gote pōninque ædæmō āate ate cænānīpa. Ayæ dodāni godōmenque nanguī nāni wææ angainō ante pōnente Ao ante cædinque tōmēnāni owæta cængæ tīgucade awæmpa tōmancoo ancaā mēnongate quēwēnānīpa. ⁵ Inīnque dodāni nāni wææ angainō ante Ao ante tōmānō ante ēñente cæte quēwēnāni inte Paditeoidi tōnō nē wææ odōmōnāni nōwo iññōmō Itota ingante edæ pūinte āninque, –Bitō miñæ nē godāni iññōmō quīnante dodāni nāni angainō ante ēñēnāmai inte wentamō nampote cænguī cænānīi.

⁶ Ante pūnāni wædinque Itota wæætē, –Mīnitō guiquēnē waa cæmīni inte bai nē ānewēmīni iññōmīnite mīni cædō ante Wængonguī iūmai apænecampa, ante Itaiya wodi nōingā ante yewæmongacāi. “Ināni iññōmō botō imote ònōneque waa apænete bai tēdēdāni incæte, tōmēnāni mīmōno æmæ pōnente edæ gobæ ongonte bai Ināni awædō.

⁷ Ayæ botō imote waa ate bai ædæ wæænte tēdēdinque, Wængonguīmi imidō anguēnē, ante apænēdāni incæte tōmēnāni botō imote ònonquedō ante cædānīpa.

Waodānique nāni wææ ānōnō ante odōmonte apænēdānīpa tōō.”

Ante Wængonguī pūingampa, ante yewæmongacāi. ⁸ Edæ Wængonguī, iūmai cædāni, ante nānō wææ angainō ante Baa ānimīni inte mīnitō waodānique nāni ānewēnō ante Ao ante cæmīnīpa tōō, angantapa.

⁹ Ante apænēdinque Itota godōmenque,

–Mīnitō dodāni nāni angainonque ante ēñente cæcæte ante cædinque Wængonguī nānō wææ angainō ante wido cædinque dicæ waa cæmīniya. ¹⁰ Mōitee wodi, “Bitō Wæmpo ingante bitō badā inante waadedinque waa cæe,” angacāi. Ayæ, “Waocā wæmpocā ingante wāānā inante pūinte wēnæ wēnæ angā inīnque mīnitō tōmengā ingante wæñōmīni wæncæcāi. ¹¹ Incæte mīnitō iūmainō ante wææ cæmīnīpa. Waocā mæmpocā ingante waa cæquēnengā iñngante wāānā inante adobai waa cæquēnengā iñngante mīnitō wæætē wææ āninque, Bitō wæmpocā ingante wāānā inante apænēdinque iūmai ante apænecæbiimpā, ānewēmīnīpa. Bitō, “Mæmpo, bitō quī, ante, Badā, mīnō quī, ante do botō pōnonguēnēnō incæ nōwo wæætē Wængonguī ingante do edæ godonte impa,” ante, Codobānō nāni ānō impa, ante apænecæbiimpā. ¹² Āninque mīnitō Wæmpo beyæ wāānā beyæ nē cæquēnengā ingante wææ āmīni beyæ tōmengā wīl cæcampa. ¹³ Māñōmai cædinque mīnitō dodāni nāni angainō mīni Ao ante æñinonque ante ēñēninque Wængonguī nānō angainō ante edæ, Ònōneque impa, ante bai cæmīnīpa tōō. Ayæ adobai wapiticæ āninque mīnitō wadō wadō cædinque wēnæ wēnæ cæmīnīpa tōō, ante Itota apænecacāi.

¹⁴ Ayæ nanguī Ināni Inānite Itota aa pecā pōñōnānite apænecantapa.

–Mīnitō tōmāmīni imīnite apænēbo ēñēninque ocaidē pōnente ædæmō ēñēdāni. ¹⁵ Quincoomē yabæque ongoncoo incæ waocā ònōnē guidi beyænque tōmengā mīmō dicæ wentamō entawenguingā. Wæætē mīmōnē wīwa pōnēninque nānō tao godincoo beyænque mīmō wentamō mongængampa, ante apænēbo ēñēdāni.

¹⁶ Eamonca ongonte ēñēdāni.

¹⁷ Ante apænēdinque Itota nanguī ongōnāni Inānite ēmō cæte oncōnē gote wāānē guicā ate tōmengā nānō nē ēmīñænāni guiquēnē, Māñōmainō ante odōmonte apænēdinque bitō æbānō ante odōmoncæte ante apænēbitapa, ante ēñencæte ante wæmōnīpa. ¹⁸ Ante wæyōnānite Itota,

–Mīnitō incæ ocāi òmæcadāni bai inōmīni inte ēñēnāmai imīnitawo. Cænguī incæ waocā

mímönë guipa wentamö ewocaquingää.
 19 Edæ wii mímönë guipa. Wæætë cæncadë
 guite goiwaa ogä mente wido cæquinque i
 apa änewëminii.

Mänömainö äninque Itota, Tömää cænguü
 waëmö impa, angacäimpa. 20 Äninque
 godömenque,

—Mímönë wīwa pönëninque nänö tao
 godincoo beyænque waocä wentamö
 ewocacampa. 21 Edæ mímönë nänö
 éntawente taodinö beyænque waocä
 önöwëninque wënæ wënæ ante pönengampa.
 Mímönë towëinente nänö pönëno beyænque
 waocä godö towente quëwengampa.
 Mímönö æinente wædinque wacä qui
 awëmö ængampa. Mímönë nänö piinte
 pönëno beyænque godö wængongampa.
 Nänöogængä inämai iñongante waocä
 mímönë towëinente nänö pönëno beyænque
 godö mongampa. 22 Mímönë nanguü æinente
 wædinque maincooque ante pönëwengampa.
 Mímönë nänö taodi beyæ wacä ingante
 piinte cæcampa. Mímönë pönëwëninque,
 Wacä edæ oda cæcædänimpa, ante babæ
 cæcampa. Wīwa nänö pönëwëno beyænque
 quingämë bai cæte quëwengampa. Mímönë
 nänö piinte adö beyæ waocä, Wacä bai
 ñænæmo pöni bacæboimpa, ante cæcampa,
 ayæ wacä ingante godö wënæ wënæ ante
 babæ angampa. Mímönë nämä ante waa
 ate nänö pönëno beyænque, Tömëmoque
 waëmö imopa, ante nämä waa acampa.
 Mímö ömædengä inte ëñënamäi cæte önonque
 quëwengampa. 23 Mänü wīwa cæpämö
 tömämö mímönë nänö pönëno beyænque
 waocä wentamö ewocacampa, ante Itota
 apænegacäimpa.

*Onquiyæ oodeo inämai inte Itota ingante
 pönente angä*

(Máateo 15.21-28)

24 Mänüñömö quëwente godinque Itota
 Tido eyequei gogacäimpa. Ayæ, Awëmö gui-
 ite owoyömo wadäni adämai incædänimpa,
 ante pönëninque oncönë pö wäänë guite
 onongängä incæte ædö cæte wii aquinänii.
 25 Edæ, Itota owocampa, ante do tededäni
 ëñëninque wacä wäänä, Botö wengä on-
 quiyængä iñömö wënæ në wentamö ewocacä
 ingante ënempocampa, ante wædinque Itota
 weca ponte ædæ wæænte apænecantapa.
 26 Itota ëñëmi. Wënæ botö wengä tönö
 në quëwengä ingante wido cæquümi, angan-
 tapa. Mänü onquiyængä Tidopëntiabæ në
 ëñagaingä inte guidiego tededö në tedecä
 inongä. 27 Adinque Itota, Wii oodea on-
 quiyængä inongampa, ante wædinque angan-
 tapa.

—Wënäni cænguü inguënë waocä dicæ
 guintamöidi cænguü ante wææntodonguingää.
 Bitö edæ wabi iñömite botö bitö beyæ ædö
 cæte cæquümo.

28 Äñongante,

—Awënë iñæmpa wënæñäni cænguü
 cæninque eyepodäni wæænte ænömengadæmpa
 inö önöñö guintamöidi ade cæmpa.

29 Ante apæneyongä Itota,

—Bitö nö apænedimi inte waa gocæbiimpa.
 Wënæ bitö wënængä nänö wædö incæ dobæ
 edæ ëmö cæte wadæ gotimpa.

30 Angä ëñëninque oncönë go guite ay-
 ongä tömengä wënængä önonganque bate
 möimoga onongängä agacäimpa.

*Babetamoncacä ingante Itota waa
 cæcampa*

31 Mänü Tido gote quëwëninque Itota
 wadæ godinque Tidö wodo pænta
 gocanque go Gadideapæ wedeca poncæ
 cædinque Decapodibæ yaatænque pongan-
 tapa. 32 Gadideapæ wedeca pongä adinque
 wacä önömonca babetamoncacä inte önöne
 wapiticæ tedecä ingante Itota weca ænte
 pöninque, Gampo cæbi waa babaingampa.
 33 Äñönäni Itota babetamoncacä ingante
 nänëne ænte godinque önömonca pædæ
 guipomoncæcantapa. Ayæ nämä önonpo
 towæ tänompodique wapiticæ tedecä
 ingante godö gampo cæguënwacantapa.
 34 Ayæ öönædë inö æmö adinque öö
 guëmante äninque babetamoncacä ingante,
 “Epata,” äninque mönö tededö, “Önömonca
 wi æmoncabæwe,” angantapa.

35 Äñongä edæ önömonca tee mömoncate
 bai ini wi ænete bai badinque önonguënwæ
 ñimæncæguënwæ gote bai cæguënwædinque
 töö tedecantapa. 36 Itota, Botö cæbo në
 adimüni inte gode änämai iedäni, äninque
 ancaa angä incæte në adinäni iñömö
 godömenque nanguü gode ä gode ä cæte
 tededäni 37 Ëñente wædinque tömänäni
 nanguü guñëninque, “Edæ önömonca
 babetamonca ininäni inänite Itota cæcä
 ate önömonca ëñëñäni badänipa. Önöne
 babetade ininäni inänite cæcä ate önöne
 tededäni badäni atamönipa. Tömää edæ
 waa cæcä ingampa,” ante nanguü tedete
 wægadänimpa.

8

*4.000 ganca inäni inänite Itota godongä
 cænänipa*

(Máateo 15.32-39)

1 Mänüñedë wadäni tæiyæ pönü inäni ponte
 ëñëñönäni tömëñäni cænguü dæ ä adinque
 Itota tömengä miñæ në godäni inänite aa
 pecä pönäni ate,

2 —Inäni botö weca ongönäni iñömö
 mëönaa go adoönæque iñonte botö weca
 ongönönäni tömëñäni cænguü ömæpodäni
 badäni ate wædinque botö tömëñäni tönö
 godongämæ wæte bai nanguü pönëmo imopa.
 3 Cænämäi inte gue ænente wæyönänite

botō, Oncönē goedāni, āmo gote bai tōmēnāni edæ idōmæ godinque tepæ gæwæñinque edæ nangæ badinque bocæ bocæ cæte wæcædonānimpa. Edæ pancadāniya gobæ quēwente pōnāni abopa.

⁴ Ante apænecā ēñente wædinque tōmengā miñæ nē godāni wæætē,

—Īñæmpa ònōmæca incæ pāo impa æninqe godōmōni cænguñāni.

⁵ Ante wæyōnānite Itota,

—Pāo æpodō nææmīni. Āñongante,

—Ōnompō æmæmpoque go mēa mæ on-gompa.

⁶ Ante apæneyōnāni Itota godongāmæ nanguī ongōnāni inānite angā onguipoiya tæ contadānitapa. Ayæ pāo ōnompō æmæmpoque go mēa nāni næænincoo pædæ godōnāni æninqe tōmengā Wængonguī ingante, Bitō waa pōnōmi cæncæmōnimpa, ante apænedinque pā æninqe tōmengā miñæ nē godāni inānite, Pædæ godō pædæ godō cæmīni cæncædānimpa, ante godongā æninqe wadāni inānite godāni ænte cænānitapa. ⁷ Ayæ gæyæ mēa pōni nææñānitapa. Māniī nāni nææñi æninqe Wængonguī ingante apænedinque adobai angā pædæ godō pædæ godō cædāni.

⁸ Æninqe tōmo pōni cænānitapa. Ayæ idæwaa cænāni ate tōmēnāni pā ænte nāni cænte ñōnōni ee ōñoncoo wente æninqe Itota miñæ nē godāni otodē pōnō da wēnānitapa. Īninqe ōnompō æmæmpoque go mentodēa cænguī eyedē contagatimpa. ⁹ Nē cænāni ĩñōmō onguñæñāniqe ante tee mampote coatodo mīdo ganca bai ināni inte ongōnōnānimpa. Īninqe cænāni ate Itota angā wadæ godānitapa. ¹⁰ Godāni ate Itotaidi do wipodē guī contate cæwodinque imæmāa pōninque Dadāmānotabæ pongadānimpa.

Mā cæte odōmōmi amōnie, ante Paditeoidi ānāni

(Māateo 16.1-4; Odoca 12.54-56)

¹¹ Itota pongā adinque Paditeoidi ponte bee tēninqe tōmengā ingante, Æbānō cæbii, æbānō āmii, ante ancaa ānānitapa. Ayæ, Mōnō amō ēñente tōmengā oda cæbaingampa, ante cædinque Itota ingante apænedinque, Bitō, Pōnencædānimpa, ante ōonædē mā cæi bai cæbi amōnie. ¹² Ānāni ēñēninqe Itota, Ancaa ānāni awædō, ante wæwente badinque ōō ōō ante guēmangantapa.

—Īñæmpa ñōwomīni, Mā cæte odōmōmi adinque pōnēmaimōnīpa, ante ancaa āmīni awædō. Nāwangā āmo ēñēedāni. Ñōwomīni imīnite mā cæte odōmōnāmai ingæimpa.

¹³ Ante āninqe tōmēnāni inānite emō cæte godinque wipodē guīte æmæmāa taocæ cæte cæwodinque wadæ gocantapa.

Wapiticæ apænedāni ēñēninqe gomō aedāni, angampa

(Māateo 16.5-12)

¹⁴ Māniī æmæmāa nāni tao gocæ cæyedē tōmengā miñæ nē godāni guiquēnē pāo wīi pōnente ænāmai inte godāni ĩninqe pāo adoque pōni nāni wēēñēdē ñōnōninqe wipodē ōñompa. ¹⁵ Itota ĩñōmō māniī pāo tōmēnāni nāni ænāmai inō ante wīi tededinque wadō ante pōnente apænecantapa.

—Pāo yedæ æmpoquī, ante Paditeoidi tōnō Edode nāni da wente cæi ate gomō aedāni. ¹⁶ Angā ēñente wædinque tōmengā nānō nē emiñæñāni wæætē nāni caboque tededinque, Pāo ænte pōnāmai imōimpa, ante Itota wabānō mānōmai beyæ āmaingampa.

¹⁷ Ante nāmāneque tededāni wædinque Itota wæætē tōmēnāni inānite,

—Pāo ænāmai inte mīni pōninō ante quimæ tedewēmīni. Botō pāo ante dicæ wæbogaa. Nanguī cæbo adīmīni inte mīnitō ayæ ēñēnāmai imīnitawo. Edæ mīmō ōmædēmīni inte tedewēmīni, ante awædō. ¹⁸ Edæ awincaque adinque ayæ adāmai imīnitawoo. Ōñōmoncaque ēñēninqe ēñēnāmai imīnitawoo. Edæ botō æbānō cætabopa, ante adīmīni inte edæ wīi pōnēmīnitawo. ¹⁹ Pāo ōnompō æmæmpoque botō pā ænte godōni incæ tinco mīdo ganca ināni nāni cænte ñōnōni ee ōñōñonte æpotodēnō cænguī wente æmīni.

Āñongante,

—Ōnompō tipæmpoga go mentodēa.

²⁰ Ayæ pāo ōnompō æmæmpoque go mēa guiquēnē coatodo mīdo ganca ināni nāni cænte ñōnōni ee ōñoncoo æpotodēnō cænguī wente æmīni.

Āñongante,

—Ōnompō æmæmpoque go mentodēa.

²¹ Apænedāni ēñēninqe tōmengā edæ,

—Īñæmpa Tadoteoidi tōnō Paditeoidi wapiticæ ante nāni odōmonte apænedō ante botō, Gomō aedāni, ante wææ āmopa, ante mīnitō ayæ ēñēnāmai imīnitawoo, angacāimpa.

Betaida ĩñōmō babetamongā ingante gampomongampa

²² Māniñō godinque Betaida ĩñōmō pōnāni adinque wadāni babetamongā ingante Itota weca ænte pōninque, Gampomonguīmi.

²³ Ānāni ēñēninqe Itota babetamongā ōnompō bæi ongonte tōō æmænte tōmēnāni quēwēñōmō tao yabæque ænte māocā gocantapa. Ayæ godō towæ tånōmonte gampo cæmōninqe, Pancaa tæcæ abi edæ, angantapa. ²⁴ Āñongā edæ tæcæ ĩñæ æmonte,

—Awæ cægonte bai waodāni incæ cægonāni abopa. ²⁵ Itota wæætē godō gampo cæmongā ate babetamongā ĩningā

incæ ñowo cōwā adinque edæ waa bamōninque tōmāo edonque pōni acantapa. 26 Ìninque tōmengā ingante Itota,

–Ìñōmō nāni quēwēñōmō yaatænque wadæ godinque tōmēmi oncōnē goe, angā gogacāimpa.

Bitō Codito ñōmi ñimpa, ante Pegodo angampa

(*Mäateo 16.13-20; Odoca 9.18-21*)

27 Itota ññōmō tōmengā mīñæ nē godāni tōnō wadæ godinque Tetadea Pidipobæ wædænque ñnāni nāni quēwēñōmō wædænque ñnāni nāni quēwēñōmō go go cædānitapa. Idōmæ godinque tōmengā nānō nē emīñænāni ñnānite Itota angantapa.

–Wadāni botō ñmotedō ante tededinque, Æbodō ñmoo, ante apænedāni ēñēmīnii.

28 Æñongante,

–Bitō ñmitedō ante apænedinque pancadāniya, Æpænē nē guidongaingā Wāo wodi incæ Itota adocā ñmaingampa, ante tededāniya. Wadāni guiquēnē, Ediya wodi incæ Itota ñongā ñmaingampa, ante apænedāniya. Wadāni guiquēnē, Wængonguī beyæ nē apænegaināni baī Itota ññōmō adocā ñmaingampa, ante bitō ñmitedō ante tededāniya, ānānitapa.

29 Ante tōmengā mīñæ nē godāni apænedāni ēñēninque Itota,

–Ayæ mīnitō guiquēnē, Æbodō ñmoo, ante ānīnii.

Æñongante Pegodo ññōmō,

–Bitō mōnō Codito ññōmi ñimpa.

30 Angā ēñēninque, Botō ñmotedō ante, Codito ñongā ingampa, ante gode ānāmaī edæ pæ wēēneedāni, āmopa, ante Itota wææ angacāimpa.

Itota, ñmaī cædāni wæncæboimpa, ante apænegacampa

(*Mäateo 16.21-28; Odoca 9.22-27*)

31 Ayæ māññēdē Itota tōmengā mīñæ nē godāni ñnānite ñmaī ante mā odōmonte apænegacāimpa. Botō Waobo ēñagaīmo ñte nangui caate wæquēnēmo ñmopa. Edæ nē aadāni nāni Picæncabo tōnō, Wængonguī qui, ante nē godōnāni ñænænāni tōnō nē odōmōnāni tōnō māññāni ññōmō botō ñmote Baa ānāni wæquēnēmo ñmopa. Ayæ botō ñmote godōmenque wænñōnāni wæncæboimpa. Incæte botō do wænñōnāni wænñimo ñte edæ mēōnaa go adoñnæque ññōnte ñnāni omæmoncæboimpa. 32 Māñmāi ante Itota edonque apænegacantapa. Apænegā ēñēñōnāni Pegodo guiquēnē Itota ingante nānēnē māocā godinque, Quimæ wæncæ ānewēē, wææ ante tæcæ piincæ cæyongante,

33 Itota edæ tōmengā mīñæ nē godāni gāmænō dadi emænte adinque Pegodo ingante nāēmæ piīninque angantapa.

–Bitō Tatānabi baī ññōmi ñte edæ botō weca ongōnāmaī wadæ gobāwe. Wīi Wængonguī nānō āñōnō ante pōñēmi ñte bitō waodānique nāni pōñwēñonque ante pōñēninque māñmāinō ante tedebe awædō, angantapa.

34 Ayæ tōmengā emīñænāni tōnō nangui ongōnāni ñnānite aa pecā pōñāni ate Itota tōmānāni ñnānite apænedinque,

–Æcānō botō mīñæ pōñēna ñna tōmengā nāmā beyænque ante pōñēnāmaī ñte botō mīñæ tee empote poncæcāimpa. Nāmā nānō wænguiwæ ænte mongænte ponte baī cædinque tōmengā, Botō wænguimo incæ caate wæbo incæ Itota ingante cōwē tee empote gocæboimpa, āninque poncæcāimpa.

35 Edæ æcānō, Nāmā wææ gompodinque quēwæncæboimpa, ante cædinque botō mīñæ pōñāmaī ingā guiquēnē tōmengā ññōmō edæ quēwēñāmaī incæcāimpa. Wæætē edæ, Wænñōnāni wæmo incæte botō Itota mīñæ tee empote godinque tōmengā waa pōñi nānō cægāinō ante apænegæboimpa, ante æcānō cæda guiquēnē tōmengā edæ ayæ quēwæncæcāimpa. 36 Edæ waocā inguipoga ongōncōo tōmāncōo ō æncæte ante cædinque nāmā ññōwoca incæ pædæ godongā wē womonte ba ñninque edæ tōmengā nānō omæwocate wæquinque māñcōoque æmaingampa. 37 ññæmpa eyepæ godongampa diyæ ññōwoca wæætē æmaingā. 38 Nōwodāni Wængonguī ingante pāmænte godinque nē ēñēnāmaī cædāni weca quēwēninque mīnitō ññōmō botō Waobo nē ēñagaīmo beyæ ante guingo imonte wæmīnitawo. Botō apænedō beyæ ante guingo imonte wæmīnitawo. ññæmpa botō Mæmpo ññō guinæ gongæññonte anquedoidi tæiyæ wæmō emōñāni tōnō dibæ pōninque botō wæætē botō beyæ ante nē guingo imonte wædingā beyæ ante nāēmæ guingo imonte wæcæboimpa.

9

1 Māñmāinō āninque Itota godōmenque,

–Botō weca ongōmīni pancamīniya ññōmō ñmaī ba acæmīnīmpa, ante nāwāngā āmopa. Mīnitō ayæ wænāmaī mīmīni quēwēñōmīni botō Wængonguī Awēñē Odeye ññōmo ñte tæi piñænīnque Tæiyæ Awēñē babo acæmīnīmpa, ante Itota apænegacāimpa.

Itota wæmō pōñi ññō baī emōngā bacā adāniya

(*Mäateo 17.1-13; Odoca 9.28-36*)

2 Māññō ante apænegā ate Itota ññōmō ññōmpo æmæmpoque go adoñnæque ñninque go ate Pegodo ingante Tantiago tōnō Wāo ñnate māñimpodānique ñnānite ānanquidi mæicā adodānique æibæ æite ongongadānīmpa. Æite ongōññōnāni edæ Itota awinca tōmēñāni ayōñāni edæ wīi cōwē nānō emōñō baī

waemö pöni ñäo bai edæ emongä bamongä adänitapa. ³ Tömengä weocoo ñäo pöni näämænta weocoo eñacä adinque tömënäni, Ædö cæte ñincoo bai näämænta pöni yamonte cæquänäni, ante edæ wæädänitapa. ⁴ Ayæ ayönäni edæ doyedë pöni nê æigälna ññömö Möitee wodi tönö Ediya wodi incæ Itota tönö edæ godongämæ pö gongæninque tedeğöna adänitapa. ⁵ Adinque Pegodo guiquënë Itota ingante,

—Awënë nê Odömömi eñëmi. Ññömö mönö waa pöni ongonde awædö. Bitö ämi ñinque mönitö oncontaicoo mentaiya go adotaique mænöninque bitö oncontai ante adotaique Möitee oncontai ante adotaique Ediya oncontai ante adotaique mænömaimönipa, angantapa.

⁶ Edæ Wäö tönö Tantiago tönö godongämæ guñfente wædinque Pegodo, Æbänö ante tedequimoo, ante eñënamai inte mäninö ante önonque tedecontapa. ⁷ Ayæ edæ boguimämo ocabogadäni obo wææninque ganta owo ñinque önonpæmoque boguimämodë apænecantapa. “Ïngä ññömö botö Wengä botö nê waadecä ingampa cæminii. Tömengä pönö apænecä ate eñëedäni,” ante apænecä eñengadänimpa. ⁸ Eñëninque quingæ gomö gomö ayönäni wada edæ do dæ goda ññönte Itota adocanque ññöw tömënäni weca ongongä agadänimpa.

⁹ Ayæ änanquidi inö wææ pöññönäni Itota tömënäni ñänite angantapa. Mäninö mïni adinö ante mïnitö gode änamai pæ wëneyöminii botö Waobo eñagäboimpe inte edæ wænte ate ñäni ömæmoncæboimpa. Ñäni ömæmömö ate mïnitö edæ mänifedë ate apænecæminimpa. ¹⁰ Ante angä eñëninque tömënäni gode änamai pæ wënedäni incæ nämæneque, Mäninö tömengä nänö ñäni ömæmonguimämo ante æbänö ante apænecä, ante wædönänimpa. ¹¹ Ñinque Itota ingante,

—Mänömai ñ ñinque, Ediya wodi täno poncæcäimpa, ante nê odömönäni ññæmpa quñante apænedäni.

¹² Äññönänte Itota wæætë,

—Ediya wodi näni änogä ññömö täno pongä ingampa. Näwangä impa. Pöninque tömengä, Doyedë ingai bai ññöw wæætë adobai nö pöni bacæimpa, ante badongampa. Ñinque dodäni Waocä nê eñaquingä ingantedö ante yewæmöninque, Nanguï caate wæyongante wadäni piñinque Baa ancædänimpa, ante quñante yewæmongadäni, ante pönëminii. ¹³ Incæte botö ñimainö ante apænebo eñëedäni. Nöwocä mönö Ediya ñnogä inte do pongäimpa ante aquënë. Tömengä pongä adinque wadäni edæ dodäni näni yewæmongainö bai adobai cædinque

quëmë ante näni cæinewëno ante do cæädäni, ante Itota tömengä tönö nê æidinäni ñänite apænegacäimpa.

Itota wënæ ingante angä go ate wëñcängä waa bacampa

(Mäateo 17.14-21; Odoca 9.37-43)

¹⁴ Itotaidi mänii wææninque tömengä nänö nê emiñænäni æidämai ñäni weca ponte ayönäni wadäni nanguï ñäni goto gongænanäni adänitapa. Nê æidämai ñäni tæcæguedë ongöññönänte nê wææ odömönäni guiquënë tömënäni tönö wæætëdö wæætë änanäni adänitapa. ¹⁵ Itota do pongä adinque edæ goto gongæninäni tömänäni guñfente wædinque wadæ pogodo ponte bee téninque, Bitö pömi, änanitapa. ¹⁶ Äññönänte Itota,

—Tömënäni tönö quñö ante apænedinque wæætëdö wæætë äminii.

¹⁷ Äñngante adocanque tæcæguedë ongongä inte wæætë apænedinque,

—Awënë nê Odömömi eñëmi. Botö wengä wënæ habetadecä ingante ewocampa, ante wædinque botö tömengä ingante bitö weca ænte pontaboa. ¹⁸ Äyöömöngä ongöñngante wënæ pö guidinque wëñcängä ingante cöwë gotodongä tæ go wæængampa. Ñinque wëñcängä wodi mäwanta tadedinque wentoquënë wentoquënë angadinque pæ opate bacampa. Mänömai cæcä ate wædinque botö bitö mïñæ nê godäni ñänite, Wënæ inte wido cæedäni, ämo cæquënëñäni incæ ædö cæte cæquänäni.

¹⁹ Ante apæneyongä Itota tömënäni ñänite,

—Nöwöminii mïni pönëegade. Botö mïnitö weca æpogadö quëwëmoi. Pönënamai inte cæyöminite botö æpogadö piyænë cæte wæwëmoi. Edæ wëñcängä ingante botö weca ænte mämöminii pongædäni, angantapa.

²⁰ Änte pönäni ate wënæ incæ Itota ingante adinque do wëñcängä ingante do do wæate bai cædinque wido cæcä tæ go wæængantapa. Ayæ mäwantabo tadedinque бага wentoquënë wentoquënë angadinque edæ pæntæmæ pæntæmæ gocä. ²¹ Adinque wæmpocä ingante Itota,

—Æyedëno mänömai bacäi.

Äñngante,

—Wëñcängäñedë do badingä inte quëwëmpa. ²² Quëwëñngante wëñcängä ingante wantæ wantæ ññö wantæ wantæ ññö, Gongapamö guitodömo gonte wæncæcäimpa, ante wënæ incæ cæcä. Ayæ, Æpænë adobai guitodömo becadote wæncæcäimpa, ante cæcampa cæbii. Näwangä tæi piñæmi ñinque bitö mönatö wæwëno ante pönente cæbäimpa. ²³ Äñngante,

–Bitö guiquenē wabānō wede pōnēmi imitawoo. Edæ wede pōnēñongante edæ waocā beyæ tōmāā do cæte impa.

²⁴ Angā ēñente wædinque wæmpocā iñōmō yedæ āninque,

–Bitō imite pōnēmopa. Edæ botō æmæ pōnēnō ante bitō cæbi ate ædæmō wede pōnente bacæboimpa, ante wæbopa.

²⁵ Ante āñongā nanguī ināni do pogodo pōnāni ate wædinque Itota iñōmō wēnæ nē wentamō ēwocacā ingante piinte āninque,

–Wēnæbi bitō, Babetamonca babetade bacædānimpā, ante nē cæbi inōmi inte ñōwo tao godinque wīi adodō guiquiimi incæbiimpā, angantapa.

²⁶ Ēñente wædinque nanguī Yæ yæ āninque wēñængā ingante wido cæcā do do wāate tæ go wæñninque pæntæmæ pæntæmæ goyongante wēnæ tao gocantapa. Gocā ate wēñængā do wæñnināni bai òñongā ate wædinque pancadāniya, Æmæwo wæmāingampā, ante wædāni. ²⁷ Īninque Itota iñōmō pædæ wæmpo ònompō bæi ongonte ængæ ganticantapa.

²⁸ Itota ayæ wadæ godinque oncōnē pō guiyongante tōmengā nānō nē emiñænāni awēmō āninque,

–Mōnitō guiquenē bitō bai wido cæcæte ante cædinque quīnante wido cædāmai intamōnii.

²⁹ Ante wæyōnānite,

–Wēnæ māningā bai ingante wido cæcæte ante cædinque wantæpiyæ cæñāmai inte Wængongui ingante nanguī apænete ate wido cæcæimpā, ante apæneccā ēñengadānimpā.

Wænōnāni wæncæboimpa, ante Itota adodō ante apæneccā

(Mäateo 17.22-23; Odoca 9.43-45)

³⁰ Ayæ wadæ gote Gadideabæ wodo pænta godinque Itota, Wadāni adāmai iñōnānite ³¹ botō emiñænāni adodānique ongōñōnānite odōmonte apænebo ēñencædānimpā, ante cæcantapa. Ayæ tōmēnāni inānite iūmainō ante awēmō apæneccantapa.

–Adocanque, Waocā nē ēñagāingā æyōmōnō ongongāā, ante godō odōmōninque botō imote waodāni nempo pædæ godongā æncædānimpā. Nē ænāni wæætē botō imote edæ wænōnāni nāñe wæncæboimpa. Incæte mēōnaa go adodōnæque iñonte botō adobo incæ ñāni òmæmoncæboimpa.

³² Ante apæneyongante tōmengā emiñænāni òñōmoncaque ēñēninque ēñēnāmai ināni inte, Æbānō ante tedebii, ante guīñente wædinque ānāmai pæ wēñengadānimpā.

Æcānō ñæncængā inte nē angā inguingāā, ante tededānipa

(Mäateo 18.1-5; Odoca 9.46-48)

³³ Mānii godinque Capēnāomō iñōmō ponte oncōnē guidiinque tōmēnāni inānite Itota,

–Idōmæ pōninque æbānō ante tedeminitawo.

³⁴ Āñongante edæ, Mōnō cabo incæ æcānonque ñæncængā pōni inongā inte nē angā inguingāā, ante tedewēnināni inte guingo imonte wædinque pæ wēñedānitapa.

³⁵ Īninque tæ contadinque Itota iñōmō, Dote, nāni āincabo inānite, Pōedāni, angā pōnāni ate,

–Yæcādo ongōmote, ante nē ānongā iñōmō tōmengā wæætē yæmiñængā pōni gote ongote tōmānāni beyæ nē godō cæcā bate waa tobaingampā.

³⁶ Āninque Itota wēñængā guiyangā ingante æninque tæcæguedē goncæte pæ māninque tōmēnāni inānite wæætē apæneccantapa.

³⁷ –Æcānō botō emōwo apænedinque māningā bai wēñængā ingante, Pōe, ante godō waa cæcā iñōmō tōmengā iñōmō edæ botō imote edæ do, Pōe, ante pōnō waa cæcā ingampā. Ayæ edæ botō imote, Pōe, ante nē waa cæcā iñōmō tōmengā iñōmō wīi botō adoboque imote waa cæcā ingampā. Wæætē botō imote nē da pōnōningā ingante Wængongui ingante adobai edæ, Pōe, ante do waa cæcāmpā, ante Itota apænegacāimpā.

Mōnō imonte æcānō pūñāmai ina mōnō tōnō cæcāmpā

(Mäateo 10.42; Odoca 9.49-50)

³⁸ Itota mānōmai apæneccā ēñēñōnāni Wāo guiquenē,

–Awēñē nē Odōmōmi ēñēmi. Wacā bitō emōwo apænedinque wænæidi inte wido cæcā atamōnipa tōō. Ayæ, Wīi mōnō cabo ingampā, ante adinque mōnitō tōmengā ingante Baa āninque, Cædāmai imāwe, antamōnipa.

³⁹ Ante apæneyongante Itota wæætē,

–Ee amīni cæcædāni. Edæ æcānō botō emōwo apænedinque dōnædē nāni cæi bai mā cæda, tōmengā ædō cæte botō imotedō ante do wēnæ wēnæ anguingāā. ⁴⁰ Edæ mōnō imonte æcānō pūñāmai ina tōmengā mōnō cabo inongā inte bai mōnō tōnō godongāmæ cæcā ingampā tōō. ⁴¹ Nāwangā āmopa. Bitō Codito nānō nē emiñænōmi imi ænte bee, ante wacā mōnitō imīnite æpæ adotacæque pōnongā bemīni ĩninque nē pōnōningā wæætē tōmengā nānō pōnōñinō beyæ eyepæ æncæcāimpā, angacāimpā.

Wacā oda cæcæcāimpā, ante nāni wæquinque cædānipa

(Mäateo 18.6-9; Odoca 17.1-2)

⁴² Mānōmainō apænedinque Itota godōmenque apæneccantapa. “Wadāni godō cædāni beyæ botō imote nē pōnēnāni incæ pancadāniya edæ dobæ oda cæte

wënæ wënæ cædænipa. Ínínque, Wëñængä adocanque guiyangä póni ingä incæ oda cædämaí incæcäimpa, ante wææ cæcæte ante cædinque nè godö cæcæ cædingä ingante ímaí cædäni ínínque tòmengä toquënegä ímaingampa. Waodäni nani dacæ godö dacæ godö cæquinca ñænænca ænínque tòmengä ònomenca æ wëmcadinque tòmengä ingante tæcætibæ wido cædäni ínínque tòmengä edæ, Wënæ wënæ cædämaí inte becadote wæmo beyænque Wængonguí botö ímote wíí godömenque pangampa, ante wædinque waa toquënegä ímaingampa. ⁴³ Bitö ònompoca cædinque wënæ wënæ cæbi ínínque bitö ònompo aa wí æmpote bai wido cæte bai cædinque wënæ wënæ bitö cædinö ante wido cæbæwe. Íñæmpa inguipoga quëwëninque æmæmpoque empobi incæte bitö cöwë bitö wænänamaí quëwënguinque òönædë æibi waa ímaimpa. Edæ wíí tipæmpoga empobi inte edæ bitö gonga cöwë bæcote wæwënguíñömö wíí æmæwo wido cæte wæquímido anguënë. ⁴⁴ Edæ máníñömö tadömengadænguipo íñömö cængota wænänamaí gonga ëmönämaí bæcoquínö anguënë.”

⁴⁵ Ayæ, “Bitö ònówaca wapiticæ godínque ëñënamäi cæbi ínínque ònówa aa wí æwate bai wido cæte bai cædinque wënæ wënæ bitö cædinö ante wido cæbæwe. Íñæmpa inguipoga quëwëninque æmæwaque ëwabi incæte bitö cöwë bitö wænänamaí quëwënguinque òönædë æibi waa ímaimpa. Edæ wíí tipæmpoga ëwabi inte edæ bitö tadömengadænguipo wido cæte wæquímido anguënë. ⁴⁶ Edæ máníñömö tadömengadænguipo íñömö cængota wænänamaí gonga ëmönämaí bæcoquínö anguënë.”

⁴⁷ “Ayæ ægodawate tæ go wæante bai cædinque bitö awinca beyæ ëñënamäi cæbi adínque bitö awinca cäi cæmonte bai cædinque wënæ wënæ bitö cædinö ante wido cæquími, ämo. Edæ bitö, Botö tipæmonga ëmonte incæ tadömengadænguipo wíí goínente awædö, ante pönente wædinque edæ cäi cæmonte awinca æmæmonque ëmöni inte quëwëninque Wængonguí Awënë Odeye weca æite waa tobaimpa. ⁴⁸ Edæ máníñömö tadömengadænguipo íñömö cængota wænänamaí gonga ëmönämaí bæcoquínö anguënë,” ante Itota apænecantapa.

⁴⁹ Ayæ godömenque apænedínque, “Waodäni, Ööingä ñómænämaí ingæimpa, ante cædinque cati ñænæ quimönique gongapamö æñö cæte biyadænipa. Waomíni tómämíni adobäi caate wædinque ædæmö biyate bai badínque ñómænämaí inguímínidö anguënë. ⁵⁰ Cati quimonte cæi íñömö wæme inte gæpæ ëmompä. Incæte

nongæmonte ba adínque mínitö wæætë æbänö nö cæmíni wæætë gæpæ ëmonguí í. Ööingä wæme bacæimpa, ante quimonte cæi wëä wëä pæmönäni bai cædinque mínitö míni caipæ incæ piyæñë cæte wacä ingä wacä ingä waa cæte quëwëedäni,” ante Itota odömonte apænecä ëñëngadänimpa.

10

Nänöogængä ingante nani pämænö ante (Máateo 19.1-12; Odoca 16.18)

¹ Máníí Capënaömö ongöninque wadæ tao iguidínque Oodeabæ ganca Oododänö æmæ wedeca pongantapa. Pongä adínque nanguí inäni wæætë pö pö cædäni adínque Itota cöwë nänö odömöi bai adobäi odömonte apænecä ëñëñaitapa. ² Paditeoidi guiquënë, Godö ämö ëñëninque Itota adodeque oda cædete wæcä tocæi, ante cædinque tòmengä weca pönnique, Itota ëñëmi, änänitapa. Wængonguí æbänö ante wææ angacäi. Waocä tòmengä nänöogængä ingante pämængä ínínque edæ nö cæte intawo.

³ Ante äñönäni tòmengä wæætë,

—Móitee wodi æbänö ante yewæmönínque mínitö ímínite wææ angacäi.

⁴ Angä ëñëninque,

—Æmæwo pämæmo goquími, ante yewæmönínque máninta bitö yewæmöninta onquiyængä ingante godömi ængä ate bitö ònonque pämæncæbiimpa, ante Móitee wodi wææ ante yewæmongacäimpa.

⁵ Ante apænëdäni ëñëninque Itota,

—Íñæmpa, Mímö ömædëmíni íñömíni inte mínitö wënæ wënæ cæinëmíni ímínipa, ante wædinque Móitee wodi, Mänömaí cæedäni, ante yewæmongacäimpa. ⁶ Edæ wëñëñëdë Wængonguí nänö badongäñëdë tòmengä, “Onguínængä ingampa, ayæ, Onquiyængä ingampa, ante badongacäimpa.

⁷ Mänömaí beyæ waocä mæmpocä ingante ëmö cædinque wäänä inante ëmö cæte godínque onquiyængä ingante, Botö nänöogængä, ante æmæwo mongä ate tömëna nana gæncaya íñöna inte mönínque guëa quëwëncædaimpa. ⁸ Ínínque æmæwo mönínque tömëna nana gæncaya incæ adocanque bai bate quëwëncædaimpa,” ante Móitee wodi nänö yewæmongai bai cædinque tömëna nana gæncaya do mönínque nänëñë inämaí adocanque bai do bacäimpa. ⁹ Mänömaí beyæ Wængonguí, Adocanque bai inapa, ante nana gæncaya nänö nè badongäina íñönote waocä wæætë pango cædämaí incæcäimpa.

¹⁰ Angä wædinque Itota tönö oncönë guidínque tòmengä míñæ nè godänique, Æbänö ante ämitawo. Godömenque apænëbi ëñëmönie. ¹¹ Ante äñönänite Itota,

—Æcänö näwä nänöogængä ingante pämwænningue wacä onquiyængä ingante möna tömengä wīwa towengä do badinque näwä nänöogængä ingante wīwa cæcampa. ¹² Onquiyængä guiquenē tömengä nänöogængä ingante pämwænte godinque wacä ingante godö mongä ïnningue tömengä adobaī wīwa towengä bacampa, ante Itota apæneçä eñengadänimpa.

Wëñænäni ïnänite gampo cæcadinque waa apæneçampa

(Mäateo 19.13-15; Odoca 18.15-17)

¹³ Ayæ ate, Wëñænäni ïnänite Itota pönö gampo cæcadinque waadete apæneçæcäimpa, ante cædinque wadäni tömengä weca ænte pö ænte pö cædäni adinque tömengä miñæ nè godäni guiquenē, Ænte pönämaī iedäni, äninque Baa Baa änäni. ¹⁴ Ate wædinque Itota ængui badinque nè Baa äñänäni ïnänite wææ äninque,

—Wëñænäni ïnänite ee amīni poncædänimpa. Edæ mäninäni näni pönönö bai adobaī pönänäni inte edæ Wængongui Awënë Odeye nempo do quëwëñäni ïnänipa. ïnningue mīnitö ïñömö wëñænäni ïnänite Baa äñämaī iedäni. ¹⁵ Edæ näwangä apænebo eñëedäni. Wëñængä do pönengä ïnte Ao angä ingä bai Wængongui Awënë Odeye ingante do pönëningue nè Ao äñäni ïñömö tömëñäningue tömengä nempo guidinque quëwëñäni. Wadäni guiquenē Wængongui Awënë Odeye ingante Baa ante pönëñämaī ïnäni guiquenē tömëñäni ædö cæte tömengä nempo guidinque quëwëñäni, ante Itota apænegacäimpa.

¹⁶ Äninque edæ wëñænäni ïnänite bæi ongonte pæ mäninque, Wængongui mīnitö ïminite waadete pönö cæcæcäimpa, ante Itota gampo cæcacä gampo cæcadinque waa apænegacäimpa.

Mäincoo nangui ëacä Itota weca ponte apæneçampa

(Mäateo 19.16-30; Odoca 18.18-30)

¹⁷ Ayæ godömenque gocæ cæyongä wacä edæ Itota weca pogodo ponte da guicapod-
inque,

—Awënë nè waa Odömömi apænebi eñëmoe. Botö æbänö cædinque cöwë wænämaī wantæpiyæ quëwëmaīmoo.

¹⁸ Äñongante Itota edæ,

—Wængongui adocanque nè waa cæcä ïñongante bitö botö imote, Nè waa cæbi ïmpa, ämii. ¹⁹ ïmaī cæedäni, ante Wængongui nänö wææ angainö ante bitö tömëmi do eñëmipa. “Wacä ingante godö wænönämaī ïe. Bitö nänöogængä ïnämaī ïñongante godö guëa möñämaī ïe. Wacä qui adinque awëmö æñämaī ïe. Wacä wënæ wënæ cæcä atabopa, ante godö babæ wapiticæ äñämaī ïe. Wacä qui æncæte ante cædinque babæ cædämaī

ïe. Wæmpocä ingante wäänä ïnante waa adinque tömëna ïnante godö waadete cæe,” ante wææ yewæmongacäimpa, ante bitö edæ do eñëmipa, angantapa.

²⁰ Ante apæneçä eñëningue nè äningä guiquenē Itota ingante wæætë,

—Awënë nè Odömömi eñëmi. Botö mäninö bitö äñö bai tömännö eñente cædinque pægaboi æe.

²¹ Apæneçä eñëningue Itota tömengä ingante cöwä adinque waadete pönëningue,

—Adodeque ayæ eñente cæquëñëmi ïmpa, ante ämo eñëe. Öönædë bitö waëmoncoo ænguinque edæ ñöwo godinque ïmæca bitö mänincoo tömancoo godonte æninque bitö æninta wæætë ömæpodäni ïnte wædäni ïnänite tömanta godömi æncædänimpa. Ayæ edæ botö imote tee empote pöe.

²² Angä eñëningue, Botö mäincoo nangui ïmpa, ante pönente wædinque nè ëacä ïñömö nangui wæwëningue wadæ gogacäimpa.

²³ Gocä adinque Itota godongämæ adinque tömengä nänö nè emiñænäni ïnänite,

—Wængongui Awënë Odeye nempo guite quëwëncæte ante cædinque woadäni ömæpodäni ïnte botö miñæ pönänipa. Mäincoo nangui ëacä guiquenē æbänö cæte ömæpocä ïnte botö miñæ ponte guite quëwëngängä, angantapa.

²⁴ ïnningue tömengä miñæ nè godäni tömengä nänö apænedö beyæ ante, Æbänö angä, ante guñente wæyönänite Itota wæætë,

—Botö wëmini eñëedäni. Wængongui Awënë Odeye nempo guite quëwëncæte ante cædinque ante waocä mäincoo mangä beyænque eyepæ cæcampa diyæ guiquingä. ²⁵ Edæ cämeyo guiyangä ingampa diyæ daagö guiyampite pædæ tacä. ïnningue, cämeyo ñænængade ïngä ïnte pædæ tadämaī ingä bai nè ëacä adobaī ingampa. Tömengä nämä ayongä ñænængä ïngä ïnte edæ æbänö cæte Wængongui Awënë Odeye nempo do wäänë guite quëwëngängä.

²⁶ Ante apæneçä eñëningue godömenque nangui pönü guñente wædinque tömëñäni nämäneque tædëdinque,

—Ïñæmpa mänömaī ï ïnningue æcänö wäänë guite quëwëngängä.

²⁷ Ante nämäneque tædëdäni ïnänite adinque Itota,

—Waomīningue incæ nämä mīni cædö beyænque ædö cæte quëwëmäimīni. Wængongui guiquenē wīi wao bai cædongä ïnte nämä incæ tömännö do cæcä ingampa.

²⁸ Ante apæneçä ate Pegodo tömengä ingante äninque,

—Mönitö ïñömö möni ëadincö owæ caate bitö miñæ ömæpomöni pömöni æe.

²⁹ Tæcæ āñongante Itota tōmēnāni inānite wæætē,

—Mīnitō botō beyæ ante pōnēninque waa pōni botō apænebodō beyæ ante pōnēninque pōmīnitapa. Ininque edæ botō iīmaī ante nāwangā āmopa. Æcānō māninō beyæ tōmengā oncodo taodinqe tōmengā tōniñadāni inānite emō cædinque mæmpocā tōnō wānā inante emō cæte wēñænāni inānite emō cæte godinque tōmengā gōneacoo emō cæte owæ caate godinque botō miñæ æcānō wadæ pōna iñōmō, ³⁰ tōmengā iñōmō inguiḡpoga quēwēnincoo wēēnē nānō ēadincōo bai adopocoo æninque godōmēnque adopo adopo tiēē ganca mānimōga adopo æncæcāimpa. Ayæ onconcoo æninque tōmengā tōniñadāni tōmengā badāidi tōmengā wēñænāni tiēē ganca bai yebænāni bai æninque, tōmengā gōneacoo wæætē bacoo æncæcāimpa. Incæte tōmengā ingante togænte pancædānimpa. Īncayæ pōmāmo bayonte botō, Bitō quēwēnguimāmo, ante godōmo æninque tōmengā cōwē wantæpiyæ wēñāmaī quēwēncæcāimpa. ³¹ Incæte edæ tāno yæcado ongōnīnāni inte pancadāniya wæætē yæmiñæ gote ongōnāni bacædānimpa. Ayæ yæmiñæ ongōnīnāni inte wæætē yæcado ponte ongōnāni bacædānimpa, ante Itota apænegacāimpa.

Wæncæboimpa, ante Itota wæætē adodō ante apæncampa

(Māateo 20.17-19; Odoca 18.31-34)

³² Māni Eedotadēē ante ñōwo ānāmæñē æiyōnāni Itota incæ tāno beyænte æicā. Ate wædinque tōmengā ēmiñænāni guiquēnē, Tōmengā nānō wæuguinque tāno æicampa, ante wæyōnāni ayæ pōnāni guiquēnē guīñente wædōnānimpa. Itota iñōmō tōmengā miñæ, Dote, ante nāni gocabo inānite nānēnē ænte māocā goyōnāni tōmengā, Botō imote iīmaī cædāni bacæboimpa, ante edonque apæncantapa. ³³ Ēñēñōnānite, “Ñōwo iñōmō mōnō edæ Eedotadēē iñōmō æicæimpa. Māniñōmō æi pō gongæmō ate adocanque, Waocā nē ēñagāingā æyōmōnō ongongāā, ante godō odōmongā bæi ongonguīnāni. Ayæ, Wængonguī quī, ante nē godōnāni ñænænāni tōnō nē odōmōnāni nempo tōmengā botō imote pædæ godongā æninque tōmēnāni wæætē botō imote apænte āninque, Cōwē wæncæcāimpa, āninque oodeoidi ināmaī ināni inānite wæætē pædæ māo godōnāni. ³⁴ Æninque iīnāni wæætē botō imotedō ante badete todinque botonga tawimæ towæ tånongadinque æmontaimenca tæi tæi pānāni āmogate wæyōmote botō imote godōmēnque wæñōnāni wæncæboimpa. Wæætē do wænīmo inte botō mēōnaa go

adōōnæque iñonte ñāni omæmoncæboimpa,” ante Itota wæætē apænegacāimpa.

Tantiago tōnō Wāō, Mōnatō āmaī cæe, ante wæcdapa

(Māateo 20.20-28)

³⁵ Ayæ Tebedeo wēna Santiago tōnō Wāō iñōmō Itota weca pōninque,

—Awēnē nē Odōmōmi ēñēmi. Mōnatō quīēmē āmōna cæbi waa tobaīmōnapa,

³⁶ Āna ēñēninque,

—Mīnatō beyæ quīnō cæbo æmīna.

³⁷ Āñongante,

—Awēnē inōmi inte bitō ñāō emōmāmodē tæ contadinque mōnatō imōnate iīmaī cæcæbiimpa, ante āmōnapa. Adocanque bitō tōmēmæmi inō adocanque dipæmæmi inō āmi tæ contaquīmōna.

³⁸ Ante āna ēñente wædinque Itota wæætē,

—Īñæmpa mīnatō ēñēnāmaī inte mānōmaī āmīna awædō. Edæ botō nantate wæwēnguimæ bai becabo bai mīnatō edæ adobai adotaca becate bai Ao ante botō beyæ nantate wæwēnguimīnaa. Ayæ botō wænguimāmo ante mīnatō adopænē guīite bai adobai Ao ante botō beyæ guīñēnāmaī inte wænguimīnaa.

³⁹ Ante āñongante,

—Ao ante guīñēnāmaī cæcæmōnaimpa.

Ante apæneyōnate Itota,

—Botō nangui caate wæwēmo bai mīnatō adotaca becate bai āanque bai caate wæquīmīna imīnapa. Botō wænguimāmo ante mīnatō adopænē guīite bai adobai wænguimīna imīnapa. Nāwangā impa.

⁴⁰ Incæte botō tōmēmæmo inō botō dipæmæmo inō æcānō tæ contaquīna, ante wīi botō godō āmo imopa. Wæætē, Awēnē contaimpa mānīnaque tæ contaquīna, ante do badongaingā inte Mæmpo Wængonguī iñōmō tōmengā adocanque godō āngā contacædāimpa, ante Itota apænegacāimpa.

⁴¹ Mānōmaīnō ante tededapa tōō, ante ēñēninque wadāni diete ganca tōmengā miñæ nē godāni guiquēnē Santiago tōnō Wāō inate piñānitapa. ⁴² Piñāni ate wædinque Itota aa pecā pōnāni ate tōmēnāni inānite wæætē apæncantapa.

—Mīnitō, Oodeoidi ināmaī ināni æbānō cædānīpa, ante do ēñēmīnīpa. Tōmēnāni nāni, Awēnēidi, ante nē ānōnāni iñōmō nāmā beyænque ante cædinque nangui piinte ānāni wædinque awēnēidi nempo quēwēnāni incæ wæætē do ēñente cædānīpa.

Ayæ tōmēnāni weca nē ñænænāni inōnāni iñōmō, Tōmēmōque āmo ēñente cædāni, ante piinte ānāni wædānīpa. ⁴³ Mīnitō guiquēnē tōmēnāni nāmā beyænque ante nangui ānāni bai wīi adobai cæquēnēmīni imīnīpa. Wæætē mīni cabo iñōmīni adocanque ñænægā pōni ingā bacæte ante cædinque tōmengā tāno edæ mīnitō beyæ nē cæcā baquēnægā

ingampa. ⁴⁴ Ayæ yæcado ongöinente wæcä iñömö tömengä yæcado ongoncæte ante cædinque wæætë edæ yæmiñæ pöni gote tömänäni beyæ nê cæcä badinque tömengä nämä beyæ ante cædämaï inguënegä ingampa. ⁴⁵ Edæ Waobo ëñagaimo inte adobai, Botö beyæ pönö cæcædänimpa, ante wii pömo imopa. Wæætë wadäni beyæ godö cæcæte ante pömoimpa. Ayæ edæ nanguï inäni tee mönete bai wæwëñönäni botö wæætë, Tömënanäni wibænetete tadinque quëwëncædänimpa, ante tömëmo wepæ incæ godoncæte ante pömo imopa, ante Itota apænegacäimpa.

Batimeo babetamongä ingante Itota angä waa bamongä

(Mäateo 20.29-34; Odoca 18.35-43)

⁴⁶ Itota mäninö godinque Eedicoo näni quëwëñömö pongadänimpa. Tömengä nänö nê ëmiñænäni tönö täyæñäni tönö Eedicoo iñömö wodo pänta tayönäni wacä babetamongä Timeo wodi wë Batimeo iñömö taadö wedeca, Pönömi æmoe, ante äncëñongäimpa. ⁴⁷ Ìninqe wadäni, Itota Näatadeta pädingä inte pongampa, ante tededäni ëñëninque tömengä ogæ tedete,
—Itota ëñëmi. Awënë Dabii wodi pæimi inömi inte botö wædö ante pönente cæe.

⁴⁸ Ante tæcæ äñongante godongämæ godäni pancadäniya, Apocænë inguënë quëwëe, ante änanä incæte tömengä godömenque yedæ aa pedinque,

—Awënë Dabii wodi pæimi inömi inte botö wædö ante pönente cæe.

⁴⁹ Äninqe ancaä aa pecä ëñëninque Itota næ gongæninque,
—Babetamongä ingante aa pemini pongädäni.

Angä ëñëninque babetamongä ingante,
—Engæ gantidinque wædämaï imäwe. Bitö ìmite, Pöe, angä apa quëwëe.

⁵⁰ Änäni ëñëninque babetamongä incæ ayacooga gäni tadongate do ængæ gantidinque Itota weca pongä. ⁵¹ Adinque,

—Bitö beyæ quino cæquimoo.

Äñongante babetamongä,
—Awënë nê Odömömi ëñëmi. Cæbi waa bamonte aboe.

⁵² Angä ëñëninque Itota,
—Waa bitö bamonguinque botö imote pönëmitapa. Önonque wadæ gobäwe.

Äñongante tömengä do waa bamonte adinque Itota miñæ taadonque gogacäimpa.

11

Itota Eedotadëe iñömö pongampa

(Mäateo 21.1-11; Odoca 19.28-40; Wäö 12.12-19)

¹ Mänii gote Eedotadëe obo pöninque Odi-bowæñquidi näni anquidi ontacamö goinö

Betapaguee näni quëwëñömö ganca ayæ Betänia näni quëwëñömö ganca pöñönäni Itota tömengä miñæ nê goda ìnate mënaa ìnate da godöninque angantapa. ² Ìimai angantapa.

—Mänii näni quëwëñömö ongö amina. Tömëñömö go guite ayömina bodo wë picængä incæ waocä ingante mongæñämaï ìningä inte nïni ñængä a ongongä acæminai. Adinque ñi cæyænte ænte pöeda. ³ Wacä, Quinante ñi cæyæminaa, ante wææ angä ëñëninque minatö wæætë edæ, Mönö Awënë nänö ænguënenö ante ænte gomönapa. Tömengä ìnque cæte ate adodö do da pönongä æedäni, ante äeda.

⁴ Angä ëñente gote ayöna bodo wë taadö wedeca odemö awäa nänö ñæ a ongö adinque ñi cæyænte ænte gocæte ante cæda.

⁵ Adinque mäninö ongönäni quiquënë,
—Bodo wë quimæ ñi cæyæwëminaa.

⁶ Äñönänite Itota nänö äninö adodö äna ëñëninque, Ao änanä. ⁷ Ëñëninque ñi cæyænte Itota weca töi töi ænte pönatapa. Ænte pöninque tömëna wecoo yabæcooque æidämæ wo cæyabæda ate Itota wæñömëncæ inö æi yiyæ tæ contactantapa. ⁸ Adinque nangui inäni, Itota nänö ponguinö, ante tömënanäni wecoo yabæcooque pönö bee podöwayönäni wadäni guiquënë gönea gote yæpæma öñfabo tapænte mämö bee bee podöwadäni ate tömengä podöwainonque gocantapa. ⁹ Gocä adinque täno godäni tönö ayæ pönäni tönö nangui inäni godongämæ godinque yedæ äninque,

—Möni quëwënguinque impa, ante, Badogaa, ante tomönipa. Awënë Wængongui ëmowo beyænque pömi ìninqe bitö toquinque edæ Wængongui bitö ìmite waa cæcæcäimpa. ¹⁰ Mönö mæmæ Dabii wodi pæimi inömi imipa, ante adinque mönitö, Awënë odeye Dabii wodi nempo näni waa quëwengai bai bitö nempo mönitö waa quëwënguinque impa. Ìninqe, Badogaa, ante yedæ äñömöni æibæ pöni quëwënanä incæ, Badogaa, ancædänimpa.

¹¹ Ante yedæ äñönäni Itota Eedotadëe pö ti wææninque Wængongui oncö ñæñæncönë yabæcönë pö guidinque mäninö ongongoo tömää acantapa. Ayæ, Gäwadecæ pöni ba awædö, ante tömengä ëmiñænäni dote ganca inäni tönö wadæ tao Betänia gogacäimpa.

Iigowæ ömæcawæ i adinque Itota pïngampa

(Mäateo 21.18-19)

¹² Gote Betänia monte baönæ pöñönäni Itota gæwænte wædinque, ¹³ Quinö impa cænguimoo, ante gomö ayongä iigowæ öñabo ëmæ incæ incate bocabai. ante gote ayongä ömæcawæ acantapa.

Önönepoque i beyæ incadāmai intapa.

¹⁴ Ante iigowæ inte apænedinque,

—iigowæ ëñëmi. Incaquināmai inte bitō incaquimi cænguīnāni.

Äñongante tömengä nānō nē ëmiñænāni edæ ëñëe gongænānimpa.

Wængongui oncō tæiyæ wæmō bacæimpa, ante cæcä

(Mäteo 21.12-17; Odoca 19.45-48; Wäo 2.13-22)

¹⁵ Do nāni ponguënēnō Eedotadēē pönānitapa. Itota iñōmō Wængongui oncō ñænæncōnē yabæcōnē pō guiidinque māniñōmō māincoo mānāni tōnō wadāni godonte æncæte ante godongāmæ pönāni tōnō ongōnāni adinque tōmānāni inānite, Oncodo tao goedāni, ante da tadongä tao godānitapa. Ayæ campio ante nāni godonte æimpa tōnō equemō godoncæte ante nē mānāni nāni cōnōimpa tōnō bæ tacä tōmampaa guidōmēmæ tæ pō wææntapa.

¹⁶ Ayæ wadāni māincoo mongænte yacōnenque gocæte ante cæyōnānite Itota, Iincodo mongænte godāmai iedāni, āninque wææ cæcantapa. ¹⁷ Ayæ tōmēnāni inānite angantapa.

—Wængongui beyæ iimāinō ante yewæmongatimpa. “Tōmāmæ quëwēnāni botō oncōnē pō guiidinque botō imote apænecädānimpa,” ante Wængongui angä incæte mīnitō wēnæ wēnæ cæmīni beyænque Wængongui oncō incæ nē awēmō ò ænāni nāni womōincōnē bai wentamō bapa tōō.

¹⁸ Ante odōmonte apæneyongante, Wængongui qui, ante nē godōnāni ñænæñāni tōnō nē wææ ante odōmōnāni tōnō ëñëe gōnānitapa. Wadāni önōnānique guiquēnē, Itota quinante waa pōni apænecä ëñēmōni, ante wædāni. Adinque awēñēidi wæætē, Itota beyænque pīlāni wæcæ wæ, ante pōnēninque Itota ingante guīñente wædinque, Quīnō cæmō wæmaingāā, ante wænoncæte ante pōnente cægadānimpa. ¹⁹ Gäwadecæ bayonte Itotaidi iñōmō oncodo tao godinque godōmenque yabæque tao gogadānimpa.

Iigowæ òmæcawæ do guīñē wæ adānipa
(Mäteo 21.20-22)

²⁰ Baānæ ate iimō nāni pōniñō adodō ponte ayōnāni iigowæ yæwaguinto ætæwowate tömewæ æi ayawæ edæ dobæ guingo iwate wænimpa, ante adānitapa.

²¹ Adinque Pegodo, Itota iimō nānō āni bai impa, ante pōnēninque,

—Awēñē Nē Odōmōmi cōwā ae. Bitō piinte āniwæ inte iigowæ edæ dobæ guīñē wæ атаque.

²² Äñongante tōmēnāni inānite Itota wæætē,

—Wængongui ingante wede pōnēmæwedāni, angantapa. ²³ Ii ānanquidi iñōmō ongō iñonte waocä, “Änanquidi ëñëmi, āninque, Bitō cabænte wo gote gāwapænē guie,” angä ëñëninque ānanquidi tömē gāwapæno do wo gote guiqui i, ante pōnēmīnitawo. Edæ nāwangä ante mīnitō imīnite apænebopa. Æcāmenque incæ edæ æmæ pōnēnāmai inte, Botō ānō bai do bacæimpa, ante wede pōnēninque āna iñinque tömengä nānō āniñō bai do æmaingampa. ²⁴ Mānōmai beyæ botō mīnitō imīnite apænebopa. Mīnitō quiēmē incæ ante Wængongui ingante apænedinque, Tōmengä nāwangä pōnongä æncæboimpa, ante wede pōnente apænemīni iñinque mīnitō āniñō tōmānō edæ do æncæmīnimpa.

²⁵ Ayæ edæ, “Mīnitō, Wiwa cæbo incæte Wængongui öönædē nē quëwēnongä inte botō imote pōnō ñimpo cæcä iñinque botō waa tobaimopa, ante wæmīnitawo. Iñæmpa, Wængongui mānōmainō cæcæcäimpa, ante cædinque mīnitō tömengä ingante apænecæte ante ongōninque tāno pilyænē cæte cæedāni. Wacä wēnæ wēnæ cæcä wædōmīni inte mīnitō wæætē tömengä ingante pōnō ñimpo cæedāni, ante Itota apænecäcäimpa. ²⁶ Wæætē edæ mīnitō pōnō ñimpo cædāmai iñini iñinque mīnitō wēnæ wēnæ cædinō ante mīnitō Mæmpo öönædē nē quëwengä iñongä inte tömengä adobai ñimpo cædāmai iñinaingampa,” ante Itota apænecäcäimpa.

Awēñē imipa, ante æcānō ānai, ante Itota ingante ānānipa

(Mäteo 21.23-27; Odoca 20.1-8)

²⁷ Eedotadēē iñōmō adodō pönānitapa. Itota Wængongui oncō ñænæncōnē yabæcōnē go guiite cægōfōngä, Wængongui qui, ante nē godōnāni ñænæñāni tōnō nē wææ ante odōmōnāni tōnō nē aadāni nāni Picæncabo, nāni ānāni tōnō tömengä weca ponte ānānitapa. ²⁸ Tōmengä ingante,

—Æcānō nē angä inte bitō imite angä cæbii, ānānitapa. Æcānō bitō imite, Nē āmi imipa, pōnō āna æninque bitō nē āmi inte bai edæ mānōmai cæbii. ²⁹ Ante wæyōnānite Itota nāemæ āninque,

—Botō mīnitō ānō bai adodeque āmo ëñëninque mīnitō wæætē apænemīni ëñëmoedāni. Apænemīni ëñente ate, Botō cædinō ante æcānō nē angä inte pōnō āna æninque cæboi, ante botō wæætē apænebo ëñëmaimīnipa.

³⁰ Wäo wodi ingante æcānō, Æpænē guidonguimi, āna ëñëninque tömengä wæætē guidongāi, ante pōnēmīni. Edæ Wængongui angä ëñente cæcantawoo. Wæætē waodānique ānāni ëñente cæcantawoo. Æcānō Wäo ingante ānaa, ante apænemīni ëñëmoedāni. ³¹ Angä ëñente wædinque

tömēnāni, Æbānō anguii, ante wæætēdō wæætē nāmāneque tededinque, “Wængongui angā ēñente Wāō guidongantapa, ante āmō bai Itota wæætē mōnō imonte, ‘Quinante Wāō ingante pōnēnāmai iminitapa,’ ancædongāimpa. ³² Ante pōnente wædinque wæætē, Wængongui beyæ nē apæne cā Wāō wodi inongāimpa, ante tōmānāni pōnēnānīpa. Ante pōnēninque awēnēidi wæætē, Waodānique ānāni ēñente Wāō guidongantapa,” ante mōnō ædō cæte anguii. Edæ piināni wæcæ wæ. ³³ Ante guifñente wædinque Itota ingante edæ,

–Wa. Æñēnāmai imōnīpa.

Ante wæyōnānite Itota wæætē,

–Īninque edæ, Æcānō nē angā inte pōnō āna æninque botō cæboi, ante mīnitō ānō ante botō adobai apænedāmai incæboimpa, ante angacāimpa.

12

Nē aadāni inguēnēnāni incæ wīwa cædānīpa, ante

(Māateo 21.33-46; Odoco 20.9-19)

¹ Ayæ māniñedē Itota, Wængongui æbānō cæcāā, ante ēñencædānīpa, ante imæca quēwēnāni nāni cæinō ante odōmōninque īmai apæne cantapa. “Wao cā yowementacodē mīninque wææ da da mǎo da caadinque, Tōmēmoncoo ænte pinā pinā gāwate tōmēmæ ontatodē wæ yopænte æñōmō, ante ææ wote badongā. Ayæ yowementacodē awēmō guidāmai incædānīpa, ante æi wæñōmēnæca gomō aquifñōmō mæñongā. Ate wabæca gocæ cædinque wadāni ōmæ wite nē aadāni inānite, Botō yowementacodē incæ ōmæ wite aadāni, angantapa. Aayōmīnite botō, Mīnitō qui, ante pancamonga pōnōmo æncæmīnīpa, angā Ao āñōnāni wadæ gocantapa.”

² “Ayæ yowedepo bayonte tōmengā ingante nē cæcā ingante apænedinque, Bitō yowementacodē nē aadāni weca godinque pancamonga āmi æninque botō weca wæætē māmōmi æmoe, angā gocantapa.

³ Angā godinque pongā adinque yowementacodē nē aadāni guiquēnē nē æncæ pōningā ingante bæi ongonte tæi tæi pāninque ōmæpocā da tadōnāni gocantapa. ⁴ Adinque nē ēcā īñōmō wacā ingante tōmengā ingante nē cæcā ingante angā gote pongā adinque yowementacodē nē aadāni adobai tæi tacadāni wæyongante, Guingo imonte wæcæcāimpa, ante tōmengā ingante godō wīwa cædānīpa. ⁵ Ayæ wæætē nē ēcā wacā ingante da godongā godinque yowementacodē pongā adinque nē aadāni wæætē tōmengā ingante wæñōnāni wængantapa. Ayæ wæætē nangui ināni inānite da godongā pōnāni adinque pancadāniya inānite tæi tæi

pāninque pancadāniya inānite wæñōnāni wæñānīta.”

⁶ “Adocanque pōni nē ēcā weca ongōnongāimpa. Māningā īñōmō nē ēcā wengā onguifñangā īñongante nē ēcā tōmengā ingante nangui waadedongāimpa. Īninque nē ēcā īñōmō, ‘Tōmēmo wengā ingante da godōmo gocā adinque tōmēnāni guifñente wædinque ee abainānīpa,’ ante pōnēninque tōmengā ingante da godongā tōmangā pōni gocantapa. ⁷ Gote dicæ pongā adinque tōmēnāni, ‘Tōmengā ingampa. Wæpocā mǎincoo īni edæ īngā īñōmō nē ænguingā ingampa cæmōō. Mōnō edæ mǎo wæñōmō wængā ate edæ mōnō qui babai mpa.’ ⁸ Ānewēninque tōmēnāni nē ēcā wengā ingante edæ bæi ongonte wæñōninque tōmengā baō īni yowementacodē wææ cæte yabæce edæ, Ōmæ, ante wido cædānīta. Māninque apænebopa.”

⁹ Ante tededinque Itota apænegacāimpa. Ayæ māni nē ānīnāni inānite wæætē īmai angantapa. “Īninque yowementacodē nē aaquēnēnāni inānite nē ēcā æbānō cæquingāā, ante pōnēmini. Tōmengā edæ, Ōmæ, ante do pōninque nē aaquēnēnāni inānite godō wæñōninque wadāni inānite yowementacodē godongā æninque aacædānīpa.”

¹⁰ Āninque Itota, “Mīnitō guiquēnē dodāni nāni yewæmongainta adāmai inte botō imote āmīnitawo. Edæ īmai nō ante Wængongui angā ēñente yewæmongadānīpa.

‘Dica ænte adinque, Wēnæ wēnæ inca, ante nē mæñōnāni nāni wido cædinca incæ gomonga wæmonca inca Īninque tāno nāni nōñōnīnca bæbængapa do bacapa.

¹¹ Wængongui Awēnē incæ mānōmai cæcā adinque mōnō waocabo guifñente wædinque waa amompa,’

Ante yewæmonte ī abāimīnīpa.”

¹² Mānōmai apæne cā ēñente wædinque awēnēidi wæætē, Īñæmpa nē aaquēnēnāni nāni cæinō ante odōmonte apænedinque Itota mōnō imonte piinte angā awædō, ante pōnēninque tōmengā ingante bæi ongoncæ cædānīta. Incæte, Wadāni piināni wæcæ wæ, ante wædinque ee adinque bæi ongōnāmai inte tōmēnāni edæ wadæ gogadānīpa.

*Tæiyæ Awēnē nānō āntamō ante ted-
edānīpa*

(Māateo 22.15-22; Odoco 20.20-26)

¹³ Māni awēnēidi incæ ayæ ate Paditeoidi pancadāniya tōnō Edodeidi pancadāniya inānite da godōninque, Mīnitō gote Itota ingante āñōmīni wabānō tōmengā nānō pante wæquinque adodeque wapiticæ bai

tedebaingampa. ¹⁴ Ānāni ēñēninque Itota weca wadæ pōninque,

—Awēnē nē Odōmōmi ēñēmi. Bitō nō pōnente cæbi ĩmipa, ante do ēñēmōnīpa. Ayæ bitō ayōmi mōnitō tōmāmōni ōnōmōninque bai ĩmōni adinque bitō ĩñōmō, Waodāni æbānō anguinānīi, ante ayæ, Æbānō cæquinānīi, ante wædāmaī ĩmi inte Wængonguī taadō ante bitō guññēnāmaī inte nō odōmonte apænebīpa. ĩninque apænebi ēñēmōnie. Odōmāno gobiedōno beyæ ante tæiyæ awēnē Tetædo tīguitamō nānō ānintamō ante æbānō wææ yewæmonte ĩ, ante ēñencæte ante wæmōnīpa.

¹⁵ Godonte edæ waa cæte intawo. Wæætē wēnæ wēnæ cæte intawo. Ante āññōnānite Itota ĩñōmō, Waa cæte bai tedewēnānīpa, ante do ēñente wædingā inte tōmēnāni ĩnānite,

—Botō ĩmotedō ante cædinque, Æbānō cæmō ate oda cæquingāā, ante quīnante cæminīi. Dēēnadio tīguitamō ænte pōmīni aboedāni.

¹⁶ Angā ēñente ænte pōnāni adinque,
—Ecānō awīnca bai yewæmonte badonte ĩ. Ecānō ēmōwo ante yewæmonte ĩ.

Ante āññongante,
—Awēnē Tetædo awīnca bai yewæmonte badonte ĩmpa. Adocā ēmōwo ante yewæmonte ongō amōnīpa.

¹⁷ Ante apænedāni ēñēninque Itota tōmēnāni ĩnānite,

—Awēnē Tetædo quī ĩ ĩninque edæ Tetædo ingante godongæĭmpa. Wæætē Awēnē Wængonguī quī ĩ ĩninque Wængonguī ingante godonguī ĩ apa ānewēmīnīi.

Angā ēñēninque tōmēnāni, Æ, nō pōni ante apænecampa, ante tōmēngā ingante waa adinque guññente wægadānīmpa.

Edō cæte ñāni ōmæmonguū, ante wæedānīpa

(Māateo 22.23-33; Odoca 20.27-40)

¹⁸ Ayæ Tadoteoidi nē, Waocā wæninque ñāni ōmæmōnāmaī æmæwo wængampa, ante nē ānewēnāni inte Itota weca pōninque, Mōni ānō ante āmi ēñēmaīmōnīpa, āninque,

¹⁹ —Awēnē nē Odōmōmi ēñēmi. Mōitee wodi mōnō beyæ ante wææ yewæmōnīnque ĩmaī ante yewæmongacāĭmpa. Waocā mōninque wēñæ tapæidāmaī inte wængā ate tōmēngā tōniñacā wæætē owæmpoingā ingante mōninque wēñæ tapæidinque, Botō tōniñacā wodi wēngā ĩngampa, ante pæpogacæcāĭmpa, ante yewæmongacāĭmpa.

²⁰ ĩninque wadāni ĩmaī cædānitapa, ante apænemōni ēñē. Edæ ōnōmpo æmæmpoque go mēngā nāni caipæ ĩññōnānite bamoncadēngā mōninque wēñæ tapæidāmaī manguiwēninque edæ nāñe wængā. ²¹ Wængā ĩninque wææ ayæmēngā adocā ingante mōninque wēñæ tapæidāmaī nāñe wængā.

Ayæ wææ wacā adobai wēñæ tapæidāmaī nāñe. ²² Ayæ wææ wēñæ tapæidāmaī nāñe, ayæ wææ wēñæ tapæidāmaī nāñe, ayæ wææ wēñæ tapæidāmaī nāñe, ayæ wææ ayæmēngā pōni adocā ingante mōninque wēñæ tapæidāmaī nāñe wængantapa. Onquiyængā guiquēnē ancaā owæmpote wædinque tōmangā pōni nāñe wængantapa. ²³ ĩninque, Mōnō ñāni ōmæmonguīōnæ, ante mīni āōnæ ĩñonte māningā owæmpoingā ĩñōmō æcānō nānōogængā baquingāā. Edæ tōmēngā ingante ĩñōmō edæ tōmānāni manguiwengadānīmpa.”

²⁴ Āññōnānite Itota wæætē,

—Mīnitō ĩñēmpa. Wængonguī angā ēñente nāni yewæmōinta adāmaī inte bai āmīni awædō. Wængonguī adocanque tæĭ piñængā inte edæ tōmāā cæcampa, ante pōnēnāmaī inte edæ oda cæte āmīni awædō.

²⁵ Edæ Wængonguī anquedoidi ōōnædē cōwē owodāni bai ĩnōnāni inte waodāni ñāni ōmæmōninque godō ñāñōnāmaī mōnāmaī ĩnguññānidō anguēnē. ²⁶ Wæætē do wængāñāni nāni ñāni ōmæmonguīnō ante Mōitee wodi ocāñēquīya ante yewæmōninque adotaa æbānō yewæmongacāĭ, ante mīnitō adāmaī inte āmīni awædō. Edæ Mōitee wodi ingante Wængonguī ĩmaī angacāĭmpa.

“Botō ĩñōmō Abadāō Wængonguīmo ĩngāimo inte ayæ Itæca Wængonguīmo ĩngāimo inte botō Aacobo Wængonguīmo adobo ĩmo anguēnē.”

²⁷ Ante nē angaingā inte edæ æmæwo wæñināni tōmēnāni Wængonguī ædō cæte ĩnguññāngā. Wæætē edæ mū quēwēnāninque tōmēnāni Wængonguī ĩngōngā ĩngampa, pōnēngūēñē quēwēmīnīi. Nē wænte godīnāni ĩncæ ayæ mūñāni quēwēnāni ĩnānīpa. Mīnitō edæ wadō ante tededīmīni inte edæ oda cæte wapitīcæ ānewēmīnīpa, angacāĭmpa.

Wængonguī nānō wææ angāine mēnea tæñineda pōni ēnepa

(Māateo 22.34-40)

²⁸ Māñōmaī āññōnānite nō apænecā ēñente wædinque adocanque nē wææ ante odōmōngā ĩñōmō Itota weca pōninque,

—Wængonguī, ĩmaī cæedāni, ante nānō wææ angāinecōo ante pōnēninque ædedō tæñine pōni ĩ ĩñonte mōnō nanguī ēñente waa cæquīī.

²⁹ Āññongante Itota ĩñōmō,

—ĩmaīne ante nānō wææ angāine ĩñōmō edæ tæñine pōni ēne ĩñonte mōnō nanguī ēñente cædinque waa cæcāĭmpa, angantapa.

“Īdægoidi, āmo ēñēedāni. Wængonguī mōnō Awēnē ĩñōmō, tōmēngā adocanque ĩngōngā inte edæ nāwā Awēnē ĩngōngā ĩngampa. ³⁰ Māñōmaī Awēnē Wængonguī ĩngampa, ante adinque bitō mīmō entawente tōmēngā ingante waadedinque ōñōwoca ēwocabi inte ædæmō waadete pōnencæbiĭmpa. Ayæ edæ bitō ocāi encabi

inte nõ pönëningue bitõ baõ tæi piñænte eñabi inte edæ godõ waadete cædinque tõmengä ingante waa waadete pönëe,” ante nänõ yewæmongaine tæine iñonte monõ nangui eñente waa cæcæimpa. ³¹ Ayæ wade nänõ angaine adobaï tæine iñonte monõ eñente waa cæcæimpa. “Nämä bitõ waadete waa cædõ bai adobaï pönëningue bitõ wadäni inänite adobaï waa waadete cæe.” Mäninque. Iïmai cæedäni, ante Wængongui nänõ wææ angainõ ante tæineda bai wade edæ dæ ampa.

³² Ante apænecä eñëningue nê wææ odõmongä iñomõ,

—Awënë nê Odõmõmi näwangä edæ ante apænëbi eñëmopa. Wacä wængongui dæ añongante adocanque monõ Wængongui inongä ingampa, ante nõ ämipa. ³³ Iñinque tõmengä ingante mïmõno entawente waadedinque monõ ocäi encamõ inte nõ pönëningue monõ baõ tæi piñæmõ inte godõ Wængongui ingante waadete cædinque nämä monõ pönëno bai wadäni inänite adobaï waadete godõ waa cæmõ adinque Wængongui waa acampa. Näwangä impa. Baõ bataa iya tante godõmõ incæ, Wængongui qui, ante monõ ancaä godõmõ incæ Wængongui ayongä wædænque waa cæte impa. Wæætë mäninõ bitõ äninõ bai cæmõ adinque Wængongui godõmenque waa acampa.

³⁴ Ante nê wææ odõmongä nõ eñente apænecä wædinque Itota edæ,

—Bitõ Wængongui Awënë Odeye nempo obo põni ongõmi inte guibaimipa, ante awædõ.

Angä eñëningue tõmänäni, Monõ æbänõ godõmenque anguii, Ante guñënete wædinque pæ wëenëgadänimpa.

Codito cæcänõ Pæingä inongä ingää, ante (Mäateo 22.41-46; Odoca 20.41-44)

³⁵ Pæ wëenedäni adinque Itota ayæ Wængongui oncõ ñænæncõ yabæcõnê ongõningue odõmonte apænecantapa.

—Dodäni nani wææ yewæmongainõ ante nê odõmõnani iñomõ monõ Codito ingantedõ ante apænedinque, Awënë Dabii wodi pæingä inongä ingampa, ante quñante änanii, ante pönëmini. ³⁶ Iñæmpa Dabii wodi incæ Wængongui Tæiyæ Waëmõ Önõwoca tõnõ apænedinque,

“Botõ Awënë ingante apænedinque Awënë Wængongui incæ iïmai ante apænëgacäimpa.

Bitõ botõ tõmëmæ inõ tæ contate ongõnõmi, Bitõ ïmite nê piñäni inänite bæ tabo ate, bitõ önõwa gäänë ongõnani inänite pinä gäwacæbiimpa.”

Ante Awënë Dabii wodi incæ yewæmongacäimpa, inentaque ayæ ongõntaque godõnänipa.

³⁷ Codito inongä ingampa, ante awënë Dabii wodi nänõ nê angaingä inongä inte

edæ adocä Codito iñomõ ædõ cæte näëmæ Awënë Dabii wodi pæingä inguingää, ante pönenguënë änewëminii. Mänõmainõ ante Itota odõmonte apænecä eñëningue tæiyænäni godongämæ ongõnani waa eñëngadänimpa.

Nê wææ odõmõnani inänite Itota püingampa (Mäateo 23.1-36; Odoca 11.37-54, 20.45-47)

³⁸ Itota godõmenque iïmai ante odõmonte apænëgacäimpa. “Cædämai, ante wææ ante nani yewæmongainta nê ate odõmõnani inänite mïnitõ gomõ aedäni. Tõmënäni iñomõ doyæncoo waëmoncöo wëñate mongænte todänipa. Waodäni nani godonte æiñomõ cægõñonänite wadäni põ beë téninque tõmënäni inänite, Nê odõmõmi, bitõ ïmite waa amõnipa, ante apænedäni eñëningue edæ nê odõmõnani iñomõ nangui todänipa.

³⁹ Ayæ tõmënäni odõmõincõnê go guiidinque tõmënäni namanque ante pönëningue waëmompaa põni tæ contate todänipa. Ayæ ææmæ becæ godinque tõmënäni, Botõ tãno bete tocæboimpa, ante waëmompaa põni tæ contate bete todänipa. ⁴⁰ Ayæ owæmpoinäni oncõ yo mongænte bai cædinque õ æwënäni inte nê wææ odõmõnani iñomõ, Botõ ïmote waa acædänimpa, ante cædinque Wængongui ingante nõingä apænete bai cædinque babæ cædinque wantæpiyæ tededänipa. Tõmënäni godõmenque nani nangui põni pante wæquinque mänõmai nämä beyænque ante cædänipa, ante adinque mïnitõ iñomõ ee gomõ aedäni,” ante Itota wææ angacäimpa.

Owæmpoingä incæ, Wængongui qui, ante godongampa (Odoca 21.1-4)

⁴¹ Mänïñedë Wængongui oncõ yabæcõnê iñomõ, Wængongui qui, ante nani wënoncadedë da wënonänimpa. Mänincõnê põ guiidinque tõmënäni nani da wënoncade gäänë tæ contadinque Itota a ongõñongä nangui inäni adoyõmõ põningue daga daga wënäni acantapa. Pancadäniya nangui eadäni inte nangui põni da wënäni acantapa. ⁴² Ayæ a ongõñongä owæmpoingä õmæpocä inte õnotamonque incæ mentamonga ænte mämõ daga wengantapa. ⁴³ Adinque Itota tõmengä nänõ nê emiñænäni inänite aa pecä põnani ate,

—Näwangä ante apænëbo eñëedäni. Wadäni tõmänäni wædænque põni godonte bai wii eyepä daga wëñõnani ingä owæmpoingä iñomõ õmæpocä inte wædongä incæte godõmenque nangui godonte bai godongä abopa. ⁴⁴ Edæ mäninäni guiquënë nangui eadäni inõnani inte, Quëwenguinta impa, ante cõ cædinque tõmënäni nani wii inentaque ayæ ongõntaque godõnänipa. Ingä õmæpocä ingä guiquënë tõmengä nänõ quëwenguinta incæ, Wængongui

quĩ bacæĩmpa, ante tõmanta edæ daga wengampa, ante Itota apænegacæĩmpa.

13

Wængonguĩ oncõ ñæncencõ bæ tate bacæĩmpa, ante

(Mäteo 24.1-2; Odoca 21.5-6)

¹ Mänĩ Wængonguĩ oncõ ñæncencõ yabæcõnẽ ongonte iĩnque apænete tao goyongã tõmengã nãnõ nõ emĩñængã adocanque Itota ingante,

—Awënë nõ Odõmõmi eñĩemi, angan-tapa. Dicacoo wainca wænõmënæca wænõmënæca nãni mænongaincacoo waincõ ongõ cõwã ae.

² Æñongante edæ,

—Bitõ guiquënë, ñæncængade nãni mænongaincõ ongõ abii. Mänincoo mĩni acoo incæ tõmanca bæ tadãni wæænca adĩnque panguĩmæ panguĩmæ godĩnque dica adocaque põni incæ wænõmënæca ongõnãmai ingæĩmpa, ante Itota apænegacæĩmpa.

Oo iĩnque bacæĩmpa, ante æbãnõ ate eñĩnguĩ, ante

(Mäteo 24.3-28; Odoca 21.7-24, 17.22-24)

³ Mänĩ taodĩnque Odibowænquidi go æidĩnque tõmënãni Wængonguĩ oncõ ñæncencõ gomõ nãni ayõmõ tæ contay-ongã Pegodo tõnõ Tantiago, Wãõ tõnõ Æntade mænĩpodãni Itota ingante awẽmõ ãnãnitapa. ⁴ Mänĩ bitõ ãnĩnõ ante æyedẽnõ iĩnque baquĩ, ante eñĩncæte ante wæmõnĩpa. Ayæ, iĩmai cæbo ate mĩnitõ, Oo põni ĩmpa, ante eñĩncæmĩnĩmpa, ante Wængonguĩ æbãnõ mã cæquĩngãã, ante apænebi eñĩmaĩmõnĩpa.

⁵ Ante wæyõnãnite Itota, “Wapiticæ odõmõñõnãni mĩnitõ wæætẽ, Mõnõ oda cædãmai ingæĩmpa, ante nãmã wææ aquënë quẽwẽmĩni. Edæ iĩmai baquĩ ĩ ataquedãni. ⁶ Edæ wadãni nangui ñãni babæ tedete põnĩnque botõ emõwo ante, “Botõ mænĩmodõ ñõmõ ĩmpa,” ante apænedĩnque wapiticæ edæ mãodãni godĩnque nangui ñãni tõmënãni mĩñæ oda cæte wapiticæ gocædãnĩmpa,” ante apænecantapa.

⁷ Ayæ, “Wabæca awënë tõnõ põ bee tẽnĩnque wæætẽdõ wæætẽ cædapã, ante tededãni eñĩncæmĩnĩmpa. Ayæ wayõmõ nãni guẽadõ guẽa cæte wænõnõ ante tededãni incæte edæ guĩñente wædãmai ĩedãni. Edæ mãnĩnõ botõ ãnĩnõ bai cõwẽ bacæĩmpa. Ba incæte mõnõ inguĩpoga quẽwẽnõ ĩñõmõ mãnĩñedẽ wĩ æmæwo iĩnque bacæĩmpa. ⁸ Adobæca quẽwẽnãni ĩñõnãnite wabæca quẽwẽnãni ponte bee tẽnĩnque guẽadõ guẽa cæquĩnãni ĩnãnĩpa. Adobæca awënë odeye nempo quẽwẽñõnãnite wabæca

awënë odeye tontadoidi mãmõ bee tẽnĩnque guẽadõ guẽa cæte wænõnte wænguĩnãni ĩnãnĩpa. Ayæ wayõmõ wayõmõ goĩnque põ wæcædãnĩmpa. Ayæ waodãni nãni cæĩnente wænguĩnque cænguĩ incæ tõmãã capo wængæĩmpa. Mänĩ wẽñæ mã nãntate bai wæwente bamĩni incæte mĩni godõmenque wænguĩnque ingæĩmpa.”

⁹ Ante apænedĩnque Itota godõmenque, “Tõmẽmĩni nãmã incæ wææ aedãni. Edæ mĩnitõ ĩmĩnite bæi ongõĩnque edæ nõ apænte ãnãni weca mão pædæ godõnãni æncædãnĩmpa. Ayæ godõmenque tõmënãni odõmõĩncõnẽ mão gõnõnãni gongæñõmĩni mĩnitõ ĩmĩnite tæi tæi pancædãnĩmpa. Ayæ botõ beyænque pancabaa awënëidi gob-edõnadodoidi weca ayæ tõmãmæ awënëidi odeyeyidi weca mão gõnõnãni gongæĩnque mĩnitõ botõ beyæ apænecæmĩnĩmpa. ¹⁰ Edæ iĩnque bayedẽ botõ ãñedẽ ayæ badãmai ĩñonte, Botõ æmo beyænque quẽwẽncæmĩnĩmpa, ante waa põni botõ apænedõ ante tõmãmæ quẽwẽnãni doyedẽ eñĩncædãnĩmpa. ¹¹ ĩnĩnque mãnĩñedẽ mĩnitõ ĩmĩnite nãni bæi ongonte æte goyedẽ, Nẽ apænte ãnãni weca ongõĩnque æbãnõ ante apænequĩmoo, ante wædãmai ĩedãni. Edæ, Æbãnõ waa apænequĩ, ante Wængonguĩ Tæiyæ Waẽmõ Õnõwoca apænecã eñĩnte ate apænecæmĩnĩmpa. Wĩ nãmã põnẽĩnque wæætẽ Wængonguĩ nãnõ apænedõ eñĩnĩnque apænecæmĩnĩmpa.”

¹² “Mãnĩñedẽ edæ nãna caya ĩñõnate adocanque nãemæ pĩĩnĩnque, Wænõncæ, ãnĩnque tõmengã tõnĩñacã ingante da godongã gocæcãĩmpa. Nãna wencaya ĩñõnate mãempocã ĩñõmõ nãemæ pĩĩnĩnque, Wænõncæ, ãnĩnque tõmengã wengã ingante da godongã gocæcãĩmpa. Ayæ wẽñæñãni incæ wæmpoda ĩnate nãemæ pĩĩnĩnque mão apænedãni eñĩnĩnque wadãni tõmënãni wæmpoda ĩnate mãmõ wænõnãni wæncædãĩmpa. ¹³ Ayæ, Coditoidi ĩmĩnĩpææ, ante tõmãnãni botõ emõwo beyænque mĩnitõ ĩmĩnite nangui pĩĩncædãnĩmpa. Pĩĩnãni wæwẽmĩni incæte æcãnõ ĩĩmæca iĩnque baganca wæntædãmai ĩnte botõ emõwo beyæ pĩĩte badãmai ĩnaa botõ tõmengã ingante æmo beyænque quẽwẽncæcãĩmpa,” ante Itota apænecantapa.

¹⁴ Ayæ, “Wadãni põ ñõmæĩ bai õõ wadõ nãni wo ewẽnguĩmãmo incæ tæiyæ wæmõ ĩñõmõ ænte mãmõ cõ cæcædãnĩmpa, ante doyedẽ yewæmongatĩmpa. Docã nãnõ yewæmongainta adĩnque nõ adingã ĩñõmõ tõmengã do eñĩmaĩngampa. ĩncayæ ate cõ cædãni ongõ adĩnque edæ mãnĩñedẽ Oode-abæ quẽwẽmĩni ĩñõmõ ãnanquidi do wodii wĩnõnte æĩbæwedãni. ¹⁵ Ayæ oncõmanca ongõmĩni iĩnque mãĩncoo æncæte ante oncõnõ wæi guĩdãmai ĩnte oncõmancaque

oncömancaque wodii winömäewedäni. ¹⁶ Ayæ në gónea cæmíni ínínque yacoo æncæte ante oncönë ocæ émænämaí inte godómenque wodii winömäewedäni. ¹⁷ Mäníönæ ínínque bayedë yædemädä ináni tönö goómæ në gånönáni tönö tömënáni náni wæquímämo baquínö angüenë. ¹⁸ Ayæ múnitö míni wodii winonguíönæ ante pónëninque edæ Wængonguí ingante, Wíí edæ cöönædepo bacæímpa, ante apæneedäni. ¹⁹ Edæ mäníñedë waodáni nanguí náni wæwëmämö náni angä baquínö angüenë. Edæ Wængonguí nänö badongaiñedë mänömaí náni wæwëmämö baí dæ äñonte ayæ godómenque ñowo ganca dæ änompá. Ayæ godómenque ínínque baganca mänömaí náni wæwënguímämo baí dæ angüinö angüenë.”

²⁰ “Edæ wantæpiyæ náni wæwënguí ímpa, ante adínque Wængonguí, Mänímipoönæque edæ wæwencædänímpa, ante pönómenque ante äñämaí ingä baí quingänö quëwënguënë dæ ancædönänímpa. Incæte Wængonguí, Mänímpodáni inänite apænte æmo beyænque në quëwënguínáni inänípa, ante nänö apænte ængaináni inänite waadete pönëninque dobæ, Mänímipoönæque wæwencædänímpa, ante cædínque pönómenque angacäímpa,” ante Itota apænegacäímpa.

²¹ Ayæ, Ínínque bayonte æbänö inguíí, apænedínque Itota godómenque íímaí ante apænecantapa. “Mäníñedë wadáni múnitö ímínite, ‘Íñömö mönö Codito ponte ongongä tamëñedäni,’ ante ayæ, ‘Wayömö a ongongä atamónípa,’ ante tededäni ëñëninque edæ múnitö íñömö ëñëñämaí ímæwedäni. ²² Wadáni mäníñedë ponte a ongónínque námä incæ ante, Tömémö Codito inómö ímpa, ante babæ ante tedequínáni. Ayæ, Wængonguí beyæ në apænebo inómö ímpa, ante në babæ ante tedequínáni. Tömënáni, Wængonguí nänö apænte ængaináni incæ æmæwo oda cædínque wapiticæ gocædänímpa, ante cædínque bamónengæ baí cædínque öönædë cæí baí cædínque nõ odómonte baí cæquínáni inänípa. Incæte Wængonguí në apænte ængaingä inte edæ ee aqungä diyæ æmæwo oda cædínque wapiticæ goquínánii. ²³ Edæ ínínque badämaí íñonte botö ñowo do apænebo ëñente cæedäni. Oda cædämaí incæboímpa, ante námä wææ aabæwedäni,” ante Itota angacäímpa.

Waobo ëñaqáimo inte botö íímaí ponte cæcæboímpa, ante

(Mäteo 24.29-35, 42, 44; Odoca 21.25-36)

²⁴ Ánínque Itota ayæ godómenque apænedínque, “Mäníí náni wæwëmämö náni angä ínínque go ate nænque íñontobæ wëmö badínque apäicä apäidämaí ingæímpa. ²⁵ Némoncoo öönædë inö wææ tæ wææínínque waa tæ waa tæ wæængæímpa.

Öönædë tæí ongongaincoo incæ wancaë wancaë cæte baí wapiticæ goquínö angüenë. ²⁶ Mäníñedë edæ botö Waobo në ëñaqáimo inte boguimancodë pónínque tæí póní píñæmo ínínque edæ ñäo apáite baí waémö ëmote wææmo acædänímpa. ²⁷ Mänömaí pónínque botö anquedoidi inänite ämo godínque tömënáni æmænö betamonca æmænö betamonca boguímä náni pö goinö godínque inguipoga tömæne godínque öönæ tömæne godínque Wængonguí nänö apænte ængaináni inänite äñete poncædänímpa.”

²⁸ Ante Itota godómenque apænedínque, “Ígowæ æbänö iwæ, ante odómonte apænebo ëñëninque pönëedäni, angantapa. Tömëwæ müiwæ badínque ígowæ wayabo tánä ná boca adínque múnitö, Öñabo nänö bocáinepo inte nænque nãwatedæ baquínque bocapa, ante pönëninque edæ do ëñëmínípa. ²⁹ Ayæ adobaí mänínö botö apænedö baí edæ do ba adínque múnitö, Waocä në ëñaqaingä do odemö póní ongónínque inguipoga oo poncæcäímpa, ante ëñencæmínípa. ³⁰ Nãwangä ämpa. Nõwómíni ayæ müímíni quëwëninque wænte godämaí íñómíni mänínö botö apænedínö baí tömånö edæ do ínínque baquínö angüenë. ³¹ Edæ öönædë ongöñömö inguipoga tönö wo ewente baí dæ ba incæte botö angainonque guiquënë dæ badämaí inte edæ cöwë tæí ongongæímpa,” angacäímpa.

³² Ayæ, “Mäníönæ æyedënö í, ante, Mänínepo ædepodö í, ante ëñencæte ante míni wædínö ante æcämenque incæ ëñëñämaí ingampa. Tömänáni ëñëñämaí íñönáni edæ Wængonguí anquedoidi incæ ëñëñämaí inänípa. Wæmpocä Wëmö incæ ëñëñämaí íñómote Wæmpocä íñömö tömengä adocanque incæ edæ në ëñengä ingampa,” angantapa.

³³ Ánínque ayæ godómenque apænedínque Itota tömënáni inänite íímaí angantapa. “Ínínque, Æyedënö baquíí, ante ëñëñämaí ímíni inte edæ mönämäí müímíni wänö cónínque edæ Wængonguí ingante apæneedäni. ³⁴ Botö ponguínö íñömö waocä ëacä nänö cæí baí ímpa. Íngä waocä íñömö wabæca gocæ cædínque, Botö ímote në cædäni në äñáni badínque botö oncö waa aacædänímpa, ante adocanque ingante, Mänínganca cæe, wacä ingante edæ, Mänínganca cæe, wacä ingante, Mänínganca cæe, ante odómónínque odemö wææ a congä ingante, Cöwä ae, änínque wadæ gocä. ³⁵ Ínínque botö në ëacä baí íñómote múnitö, Mönitö Awënë æyedënö ponguínää, ante ëñëñämaí ímíni inte gãwadedæ ayaönëñëña tawadiya peyedë ñäo ba, æyedëmë poncæcäímpa, ante wadó congüenë cæmíni. ³⁶ Edæ, Wíí mö ñömóni ponguínä ingänö angüenë, ante cædínque

müimäni quëwëmaimäni. ³⁷ Minitö imäite botö äno ante tömänäni inänite adobaï, Wänö conguënë quëwëminii," ante Itota angacäimpa.

14

Itota ingante bæi ongonte ængæimpa, ante cædänipa

(Mäateo 26.1-5; Odoca 22.1-2; Wäö 11.45-53)

¹ Mëönaa go ate wodo pänta gogaïönæ bai Patowa ææmæ baquimpa, ante pönëninque oodeoidi ñowo, Päö yedæ æmpoqui ömæmö ñ mönö cænguiönæ inguimpa, ante cædönänipa. Mäniñedë, Wængongui qui, ante në godönäni ñænænäni tönö në wææ ante odömönäni ññömö, Mönö awëmö cæte Itota ingante bæi ongonte ænte mäo wæñongæimpa, ante cædönänipa. ² Oo pönä impa, ante wædinque awënëidi,

– ññæmpa ææmæntedæ ññonte wæñömö bai tömänäni ængui bate Yæ yæ ante piinte cæcædönänipa, ante adinque mönö ædö cæte mäniñedë cæquü, ante wægadänipa.

Itota ocaboga onquiyængä ogui wapæ gao cæcacampa

(Mäateo 26.6-13; Wäö 12.1-8)

³ Itota ññömö Betänia godinque në baadingä Timönö oncönë go guite ëñacantapa. Guii ëñate cæncönongä onquiyængä adoyömö pö guicantapa. Tömengä ogui wapæ näwä näadodopæ näni änomæ nänö nanguï godonte ænimæ dica adabatodo waincadedë pe ññænte mäningä inte ñowo ænte mämo Itota weca pongantapa. Pöninque tömengä mänincade wencade ao mäsnodinque Itota ocaboga edæ gao cæcacantapa. ⁴ Adinque godongämæ ongönäni pancadäniya ængui badinque näni caboque tededinque,

– ññæmpa ogui wapæ incæ önonque guënte bai cæcampa töö. ⁵ Edæ waocä adoque wadepo cæte beyæ paga æninque todetiento deëñadiota näni æninta ayæ godömenque æninta beyæ godonte ænguëñemæ imæmpa. Godonte ænte bai ömæpodäni inänite wæætë godonguënë apa.

Ante nämäneque tededinque onquiyængä ingante nanguï piinte äñänitapa.

⁶ Itota wæætë,

– Quimæ püwëminii. ñngä onquiyængä ññömö botö imote waa pönä cæcä apa quëwëminii. Ee aquënë quëwëminii. ⁷ Edæ ömæpodäni mini äñänäni munitö weca cöwë quëwëñäni adinque munitö æyedëmë tömëñäni beyæ waa cæñemäni inte edæ do waa cæbaimäni. Botö guiquënë munitö weca wii wantæpiyæ ongoncæboimpa. ⁸ Adinque mänimæ ogui wapæ botonga gadongadinque tömengä edæ botö baö daga wenguinque eyepæ ññonte öni paacantapa.

ñninque tömengä nänö cæganca ante do cæcä apa änewëminii. ⁹ Minitö imäite näwangä ante apænebopa. Tömämæ æyömömë wadäni näni ëñente toquinque botö imotedö ante apænedäni ëñëñänii mäningä onquiyængä nänö cædinö ante adobaï tededäni ëñente pönencædänipa, ante Itota apænegacäimpa.

Itota ingante odömönte godoncæte ante Codaa cæcampa

(Mäateo 26.14-16; Odoca 22.3-6)

¹⁰ Ayæ mäniñedë näni, Dote, äincabo ññönäni adocanque Codaa Icadote näni änogä ññömö, Itota æyömönö ongongä, ante odömönte pædæ pönömo æncæminäni, ante cædinque, Wængongui qui, ante në godönäni ñænænäni weca wadæ gocantapa. ¹¹ Godinque tömengä, ñimai cæcæboimpa, ante apæñecä ëñëñinque awënëidi nanguï todinque Ao äninque, Cæbi ate tiguitamö pönömöni æncæbiimpa, äñäni. Ëñëñinque Codaa Ao äninque, Æbänö cæte godö odömömo ænguñänii, ante cöwä adinque ancaa cægacäimpa.

Awënë Itota päö tönö owæta pönongä cænte bedänipa

(Mäateo 26.17-29; Odoca 22.7-23; Wäö 13.21-30; 1 Coodintoidi 11.23-26)

¹² Oodeoidi päö yedæ æmpoqui ömæmö ñ näni cænguiönæ tæcæ ba ate tömëñäni, Wodo pänta gogaïönæ bai Patowa mönö cænguiönæ impa, ante pönente cædinque, Wængongui qui impa, ante codotedo mäniönæ edæ cöwë wæñönönänipa. Ñninque mäniönæ ñnque ba adinque tömengä nänö në ëmiñænäni Itota ingante äninque,

– Ädönö ämi gote mönitö Patowa ææmæ ante cæmöni ate bitö bete cængulimii.

¹³ Äñäni ëñëñinque Itota tömengä nänö në ëmiñænäni mënaa ñate da godöñinque,

– Mäniñ nanguï näni quëwëñömö gote taadö goyöminate onguñængä incæ cad-abodë æpæ iyænte næænte pö bee tengä adinque minatö tömengä miñæ tee empote goeda. ¹⁴ Tömengä æcönëñö guicä adinque mäniñ öncö në ëacä ingante äninque minatö, "Mönö Awënë në Odömongä inte ñimai angampa. Bitö oncönë guicönë æcönëñö ante, Bitö oncö, ante ämi guidinque botö në ëmiñænäni tönö botö Patowa ææmæ bete cængulimöni, angampa." ¹⁵ Ante äñöminate tömengä æmongapaa mäi odömöñinque ñænæncö awæmpa nänö do cönöncö odömongä adinque minatö mänincöñö mönö beyæ tömää eyepæ cæcæminäimpa.

¹⁶ Angä ëñente tao godinque näni quëwëñömö ponte ayöna, Itota nänö äno bai tömää do cæte ongompä, ante adinque tömëna Patowa ææmæ ante cædatapa.

¹⁷ Gāwadecæ bayonte dote ināni nāni cabo Itota mīñæ godongāmæ pōnānitapa. ¹⁸ Ponte tæ contate cæncōñōnānite Itota,

–Nāwangā ante apænebo ēñēdāni. Mīni cabo incæ adocanque botō tōnō ñōwo godongāmæ cæncongā incæ, Æncædānimpa, ante botō imote odōmonte pædæ godonguingā ingampa.

¹⁹ Ante apænecā ēñēninque, Wæinente awædō, ante pōnēninque tōmengā ingante adocanque adocanque āninque tōmānāni adoyōmō,

–Botō imotedō ante dicæ apænebitawogaa.

²⁰ Āñōnāni Itota wæætē,

–Ōnomp tipæmpoga go mēmīnā iñōmīni adocanque botō tōnō guēa adotaca mī cæte cængā incæ tōmengā nē cæquiringā ingampa. ²¹ Edæ dodāni Wængonguī beyæ ante nāni yewæmōngāi bai cædinque botō Waobo ēñagāimo inte cōwē wænte goquēnēmo imodō anguēnē. Incæte botō imote nē odōmonte godōnongā guiquēnē tōmengā nānō wæquinque cæquiringā ingampa. Māningā wīi ēñate bai waa toquēnengā incædongāimpa. ²² Ayæ tæcæ cæncōñōnāni Itota pāo bæi ongonte æninque Wængonguī ingante waa ate apænedinque pāo pā æninque tōmēnāni inānite pædæ godō pædæ godō cæcantapa.

–Botō baō bai impa, ante pædæ pōnōmo æninque mīnitō Ao ante cæedāni.

²³ Āninque ayæ bequimæ owætaca bæi ongonte æninque Wængonguī ingante waa ate apænedinque pædæ godōninque nēnemocā æninque tōmānāni bedānitapa. ²⁴ Beyōnāni tōmēnāni inānite apænedinque,

–Botō wepæ iimæ bai impa. Wængonguī do apænedinque, Botō pōnō cæbo ate mīnitō Ao āmīni iinque mōnō godongāmæ waa cæte quēwengæimpa, angacāimpa. Ñōwo adobai mīne āninque apænebopa. Botō wepæ ante Ao ante æmīni inte mōnō godongāmæ waa cæte quēwengæimpa. Edæ nangui ināni beyæ gowequimæ impa. ²⁵ Botō iñōmō Awēnē Odeye badinque ocæ ēmænte pōninque mīimæ botō beganca mānimæ yowepæ ñōwo æmæwo bebo tamēñedāni, ante Itota apænegacāimpa.

Pegodo incæ, Dicæ abogaa, apænequiringā ingampa, ante

(Māateo 26.30-35; Odoca 22.31-34; Wāō 13.36-38)

²⁶ Ayæ Wængonguī ingante āmotamīni ante tao godinque Odibowænquidi godānitapa. ²⁷ Goyōnānite Itota iimāi ante apænecantapa.

–Dodāni Wængonguī beyæ yewæmōninque, “Nē aadingā ingante tacabo dæ wængā ate cæningāidi obegāidi wæætē panguimæ goquimpa,” ante nāni yewæmonte angāinō bai cædinque botō dæ āmo beyæ guingo

imonte wædinque tōmāmīni edæ nāwæ goquimīni imīnīpa, ante awædō. ²⁸ Panguimæ gomīni incæte botō edæ ñāni ōmæmonte Gadideabæ tāno gote a ongōñōmo mīnitō ayæ pōedāni.

²⁹ Angā ēñente wædinque Pegodo guiquēnē,

–Iñæmpa dæ āmi beyæ tōmānāni guingo imonte badinque panguimæ godāni incæte edæ botō guiquēnē cōwē panguimæ godāmai incæboimpa.

³⁰ Āñongante,

–Bitō imite nāwangā ante apænebo ēñē. Ñōwoñæ woyowotæ incæ tawadiya mempoga pedāmai iñonte bitō iñōmō botō imotedō ante wadō ante apænedinque, Dicæ abogaa, ante mempoga go adopoque anguimī impa.

³¹ Angā ēñente wædinque Pegodo wæætē,

–Iñæmpa botō bitō tōnō wæmo incæte māninō ante cōwē ānāmai incæboimpa.

Ante nangui āñongā tōmānāni adodō ante apænegadānimpa.

Guetēmāni iñōmō Itota Wængonguī ingante apænecampa

(Māateo 26.36-46; Odoca 22.39-46)

³² Mānīi godinque yabæ incæ Guetēmāni nāni āñōmō pōninque tōmengā mīñæ nē godāni inānite Itota,

–Tæ contate ongōñōmīni botō godōmenque gote Wængonguī ingante apænete pōmoedāni.

³³ Āninque Pegodo Tantiago Wāō mānimpodānique inānite ænte māocā goyōnāni Itota iñōmō nangui wæwente badinque guñente wæcantapa. ³⁴ Ayæ tōmēnāni inānite,

–Botō wæwēmāmo entawēninque pæmænte wæte wængui wædō. Mīnitō guiquēnē tæ contadinque ēamonca wānō cōedāni.

³⁵ Āninque wædæ pō gote ædæ wæænte guidōmēmæ ñongæninque Wængonguī ingante, Bitō Ao āmi botō caate wæquintedæ wīi ba ate waa tobaīmopa. ³⁶ Āninque, “Mæmpo, botō Wæmpo ēñēmi. Bitō tæi piñæmi inōmi impa. Bitō tī nā wænguiimæ bai ō ænte bai cædinque botō imote edæ, Wæñāmai incæbiimpa, āmi iinque botō edæ waa tobaīmopa. Incæte botō ānōnō bai wīi cædinque wæætē tōmēmi ānōnō bai cæe,” āmopa.

³⁷ Āninque tōmēnāni weca adodō ponte ayongā mō ñōnāni adinque tōmengā Pegodo ingante,

–Timōnō edæ mōmitawo. Botō tōnō wānō conguēnēmi incæ bitō adoque oda ganca incæ wīi aacōmīi. ³⁸ Edæ, Mīmōno waa cæinēmōnīpa, ante ewocayōmīni baō aquīñō ēñamīni inte wæntæye bamīnīpa. Iinque

edæ munitō wānō cōninque nāmā beyænque Wængonguī ingante apænedinque edæ, Wīi wēnæ wēnæ cæinēmōni bacæmōnimpa, ante apæneedāni.

³⁹ Āninque Itota wæætē wadæ godinque wēēnē nānō āninō bai apænedinque Wængonguī ingante adodō ante apænecantapa. ⁴⁰ Ayæ adodō ponte ayongā mōwo mōinente ædo ædo cædinque mō nōnāni acantapa. Acampa, ante wædinque tōmēnāni, Æbānō anguimōō, āninque edæ pæ wēēnedānitapa. ⁴¹ Itota wæætē mempoga go adopoque gote apænedinque nōwo adodō pōninque edæ tōmēnāni inānite,

—Ayæ edæ guēmante mō nōmīni. Edæ idæwaa. Nōwo iinque cætimpā. Botō Waobo ēñagāimo inte edæ botō wæwenguiōnæ do edæ ba iinque nē wēnæ wēnæ cædāni nempo nē pædæ godōmoncæ cædingā iñōmō botō imote do odōmonte godongāi ataquedāni. ⁴² Nōwo edæ ængæ gantidinque mōnō gocæimpā. Botō imo nē odōmonte godonguingā iñōmō edæ obo pōni pongā tamēñedāni, angacæimpā.

Itota ingante bæi ongonte cæte godānīpa
(Māateo 26.47-56; Odoca 22.47-53; Wāō 18.2-11)

⁴³ Ayæ apæneyongā edæ Codaa wodi tōmēnāni nāni, Dote, ante gocabo adocabo iinagā incæ nōwo pongantapa. Do iñōmō, Wængonguī quī, ante nē godōnāni nænænāni tōnō nē wææ odōmōnāni tōnō nē aadāni nāni Picæncabo tōnō wadāni inānite, Codaa miñæ goedāni, ante da godōnōnānimpa. Nōwo iñōmō tōmēnāni nāni nē da godōnāni inte tæiyænāni yaēmē nææante canta nææante Codaa miñæ pōnānitapa. ⁴⁴ Doyedē iñōmō nē odōmonte godoncæ cæcā Codaa iñōmō tōmēngā miñæ poncæ cædāni inānite iimāi ante wēēnēñedē apænedingā inongāimpā. “Botō odōmonte queē bemōmo adinque munitō wæætē, Tōmēngā ingampa, ante adinque tōmēngā ingante bæi ongonte æninque wææ cæte māomīni gocæcāimpā.” ⁴⁵ Ante do āningā inte Codaa iñōmō nōwo Itota weca pōninque,

—Awēnē nē Odōmōmi īmi.

Āninque edæ waa cæte bai edæ queē bemongantapa. ⁴⁶ Mānōmāi queē bemonte odōmongā adinque tōmēngā miñæ pōnāni incæ Itota ingante pædæ gopo bæi ongonte ænānitapa.

⁴⁷ Wængonguī quī, ante nē godongā nænængā pōni inongā ingante nē cæcā incæ māniñōmō ponte a onongā adinque Itota gāānē onongā adocanque pædæ guipote yaēmē o togæante æninque māningā nē cæcā ingante tæi pāninque ōnōmonca wangō tamoncacantapa. ⁴⁸ Adinque Itota iñōmō nōwo pōnāni inānite,

—Munitō iñæmpa, Bitō nē ō ænīmi īmpa, ante bai cædinque botō imote canta tōnō yaēmē nææante ō æncæte ante pōmīni awædō. ⁴⁹ Iñæmpa Wængonguī oncō nænæncōnē yabæcōnē iimō iñō iimō iñō apæncōninque botō munitō weca a ongōñōmote munitō edæ bæi ongōnāmāi ee amīnitapa tōō. Incæte Wængonguī angā ēñente nāni yewæmongainō bai iinque baquinque ante cæcæimpā.

⁵⁰ Ante apæneyongante tōmānāni edæ ēmō cæte wodii wīnōnānitapa. ⁵¹ Adocanque edēningā guiquēnē ōmaacā inte yabæcooque nīnocoo nāni ancooque pōnō wīniyate Itota miñæ gocantapa. Tōmēngā ingante yao ongōnānitapa. ⁵² Adinque tōmēngā wæætē gā tadongate weocoo ōmaacā wodii wīnongacæimpā.

Nē Apænte nāni Ānoncabo weca Itota ongongampa

(Māateo 26.57-68; Odoca 22.54-55, 63-71; Wāō 18.12-14, 19-24)

⁵³ Wængonguī quī, ante nē godongā nænængā pōni inongā weca ænte godinque Itota ingante gōnōnāni gongænte ongongantapa. Ayæ, Wængonguī quī, ante nē godōnāni nænænāni tōnō nē aadāni nāni Picæncabo tōnō nē wææ odōmōnāni tōnō tōmānāni pō bee bee bee tente godongāmæ ongōnānitapa. ⁵⁴ Pegodo guiquēnē tōmēngā miñæ ayæ ayæ godinque, Wængonguī quī, ante nē godongā nænængā pōni inongā oncō yacōmoyæ iñōmō wāānē guicantapa. Māniñōmō guidingine tōmēngā wææ wānōnāni tōnō gongapamō tæ contate a ootocongantapa.

⁵⁵ Wængonguī quī, ante nē godōnāni nænænāni tōnō nē Apænte nāni Ānoncabo tōmānāni, Mōnō apænte ante wænōmō wæncæcāimpā, ante cædinque, Itota nānō wænguinque wēnæ wēnæ cæcā ingampa, ante æcānō nē adingā inte godō anguingāā, ante ancaa diqui diqui miñōnāni mānōmāinō ante nē anguēnēngā edæ dæ angantapa. ⁵⁶ Edæ nanguī ināni pōninque babæ apænedinque, Mānōmāi cæcā atamōnīpa, ante apænedāni incæte adoyōmō apænedāmāi ināni inte wapiticā wapiticæ ānānitapa. ⁵⁷ Ayæ ate pancadāniya ængæ gantidinque, Tōmēngā ingante apænte angæimpā, ante cædinque babæ wapiticæ ante āninque,

⁵⁸ —Iingā iimāi ante apænecā ēñentamōnīpa. “Iincō Wængonguī tæiyæ waēmō oncō woadāni ōnompoca nāni mænōnīncō incæte botō cæbo wo tænguimæ wæænguimpa. Ayæ meōnaa go adōōnæque iñōnte wacō wīl ōnompoca mænōnguincō wæætē mænōncæboimpa,” ante apænecā ēñentamōnīpa tōō, ante tededāni.

⁵⁹ Incæte adodeque ante apænedinque adoyōmō āninque tōmēnāni godōmenque

āninque wadō wadō wapiticæ ante apænedānitapa.

⁶⁰ Ēñente wædinque, Wængongui qui, ante nē godongā ñænængā pōni inongā guiquēnē godongāmæ ongōnāni tōnō tæcæguedē dibæ ongonte ængæ gantidique Itota ingante,

–Īñæmpa pæ wēēnebii. Bitō æbānō cæbitapa, ante iñāni nāni āninō ante bitō æbānō āmii.

⁶¹ Ante āñongante edæ Itota cōwē ānāmai pæ wēēnecā. Adinque nē godongā ñænængā pōni inongā wæætē godō āninque,

–Wængongui mōnō Waēmō inongā Wengā mōnō Codito inongā ingampa. Bitō iñæmpa mānimidō inōmi imitawo.

⁶² Āñongante Itota iñōmō,

–Ao. Mānimodō inōmo imopa. Īninque iñcayæ ate botō Waobo ēñagaīmo inte Wængongui nē Tæi Piñængā ingā tōmēmængā inō tæ contabo adinque mīnitō ayæ ate botō oōnædē boguimancodē pōmo acēmīnimpa.

⁶³ Ante apænecā ēñente wædinque nē godongā ñænængā pōni inongā iñōmō piñte badinque, Ēñente awædō, ante bai cædinque edæ nāmā weocoo wānā ñæninque,

–Idæwaa, angantapa. Nōwo wacā ingante, Itota wēnæ wēnæ cæcā atabopa, ante nē āincædongā ingante godōmenque diqui diqui mīnāmai ingæimpa. ⁶⁴ Tōmængā nāmā Wængongui Wengā inte bai babæ godō tedewengampa tōō. Īninque edæ tōmængā babæ nānō ānewēnō ante do ēñēmīni inte edæ æbānō ante pōnēmīni.

Ante āñongante nē apænte ānāni tōmānāni edæ, Nānō pante wænguinque edæ ānewengampa tōō.

⁶⁵ Ante apænte ānāni ate edæ pancadāniya Itota tōmængā towæ tānongadinque tōmængā awinca weocoota pōnō ñāne cæmōninque tæi tæi pāninque tōmængā ingante,

–Æcānō pānaa, ante Wængongui beyænque apænebi ēñēmōnie.

Ante badete toyōnāni wæ wānōnāni guiquēnē tōmængā ingante bæi ongonte tæi tæi pangadānimpa.

Pegodo inccæ, Dicæ abogaa, angampa

(Māateo 26.69-75; Odoca 22.56-62; Wāō 18.15-18, 25-29)

⁶⁶ Ayæ Pegodo guiquēnē yæipodē yacōmōñāa guī contate ongōñongā onquiyængā, Wængongui qui, ante nē godongā ñænængā pōni inongā ingante nē cæcā iñōmō adoyōmō pō guicantapa.

⁶⁷ Ponte ayongā Pegodo gongapamō ootocæ cæcā adinque onquiyængā ædæmō cōwā adinque,

–Māningā Nāatadeta iñōmō quēwēnongā Itota tōnō bitō guēa cægōmitapa tōō.

⁶⁸ Angā ēñente wædinque,

–Dicæ. Bitō ānō ante æbānō āmii, ante dicæ ēñēmogaa.

Āninque tao yabædemō gāānē gongæñongā tawadiya wēēnængā petapa. ⁶⁹ Ayæ wæætē Pegodo ingante adinque onquiyængā iñōmō godongāmæ ongōnāni inānite,

–Māningā adocabodāni iningā inte ongongā ataqueedāni.

⁷⁰ Ante apæneyongā Pegodo wæætē, Dicæ bitō angānō imogaa, angantapa. Ayæ wantæ ate māniñōmō ongōnāni adobai,

–Īñæmpa Gadideabæ quēwēnīmi inte bitō nāwängā Itota tōnō tee empo nē pōmi imipa tōō.

⁷¹ Ānāni ēñente wædinque Pegodo wæætē, Botō Wængongui ēñēñongā nōingā āmopa, ante Wængongui emōwo ante babæ tedewēninque tōmēnāni inānite wæætē,

–Mīni angantedō ingante dicæ abogaa. Dicæ abo ante bai ānewēminipa tōō.

⁷² Ante tæcæ ānewēñongā iñontobæ tawadiya ayængā petapa. Ayængā pe ēñente wædinque Pegodo Itota nānō āninō ante pōnengantapa. Itota do iñōmō, “Tawadiya mempoga pedāmai iñonte bitō botō imotedō ante wadō ante apænedinque, Dicæ abogaa, ante edæ mempoga go adopoque anguīmi imipa,” ānongāimpa. Ante pōnente wædinque Pegodo, Nōwo nānō pequinque do pecampa, ante wædinque Ca ca wægacāimpa.

15

Itota inccæ Pidato weca ongongampa

(Māateo 27.1-2, 11-14; Odoca 23.1-5; Wāō 18.28-38)

¹ Wængongui qui, ante nē godōnāni ñænænāni tōnō nē aadāni nāni Picæncabo tōnō nē wææ odōmōnāni tōnō tōmēnāni iñōmō nē ānāni inōnāni inte oodeoidi nāni nē Apænte Ānoncabo inōnānimpa. Īninque māniñāō bayonte tōmēnāni, Æbānō cæquīi, ante pōnente wædinque godongāmæ pōnēē cōninque Ao āninque Itota ingante goto winte tōō æmænte ænte godinque odōmāno awēnē Pidato wodi nempo māo pædæ godōnāni ængantapa. ² Pidato guiquēnē tōmængā ingante,

–Oodeoidi Awēnē Odeyebi bitō imitawoo. Āñongante,

–Bitō tōmēmi ānō bai botō mānimodō imopa, ante Itota angantapa.

³ Wængongui qui, ante nē godōnāni ñænænāni guiquēnē, Īngā Itota iñōmō wēnæ wēnæ cæcampa, ante wadō wadō ante piñinque Pidato ingante ancaa ānānitapa. ⁴ Ānāni ēñente wædinque Pidato wæætē Itota ingante,

–Īñæmpa pæ wēēnebii. Bitō æpogadō wēnæ wēnæ cæbi imipa, ante nangui ānāni apa quēwēē.

⁵ Āñongante Itota tōmēnāni nāni ānīnō ante cōwē apānedāmai ingā adinque awēnē gobedōnadodo wæætē, Quiēmē bai pæ wēēnecā awædō, ante guiñente wægacāimpa.

Itota wæncæcāimpa, ānānīpa

(*Māateo 27.15-31; Odoco 23.13-25; Wāo 18.38-40, 19.1-16*)

⁶ Mānimæ awēnē gobedōnadodo māniñedē wadepo iñō wadepo iñō cōwē iīmai cædongāimpa. Oodeoidi ææmæ cæyōnānite gobedōnadodo iñōmō, Nē tee mōnete ongōnāni inānite adinque mīnitō æcānō ingante āmīni ñimpo cæbo goquingā, ante ānāni ēñēninque tōmengā tōmēnāni nāni āningā adocanque ingante ñimpo cæcā godongāimpa. ⁷ Doyedē wadāni ængui badinque, Awēnē ingante wido cæcæimpa, ante cædinque wænonte cæyōnāni adocanque Badabato nāni āngongā tōmēnāni tōnō godongāmæ cædongā inongāimpa. Īninque awēnēidi nē wīwa cædāni inānite bæi ongonte goto wināni ongōñōnāni Badabato adobai tōmēnāni tōnō godongāmæ tee mōmænete ongōnongāimpa. ⁸ Īninque ñōwo iñōmō wadāni tæiyæñāni Pidato weca pōninque, Cōwē bitō cædō bai ñōwo adobai mōnitō beyæ cæquīmi ante wæmōnīpa.

⁹ Ānāni ēñēninque Pidato iñōmō,

—Oodeoidi Awēnē Odeye ingante pōnō ñimpo cæbo abæ tawængā ænguimīni. Æbānō cæbo ænguimīni.

¹⁰ Edæ do iñōmō Itota gomonga cæcā ate wædinque, Wængongui qui, ante nē godōnāni ñænænāni incæ tōmengā ingante piinte adōnānīmpa. Māniñō beyænque tōmēnāni Itota ingante bæi ongonte botō nempo ænte māmō pædæ pōnōnānīmpa. Ante pōnente wædinque Pidato, Oodeoidi Awēnē Odeye ingante ñimpo cæbo goquingā, āmīnitawoo, ante ñōwo angantapa. ¹¹ Īninque, Wængongui qui, ante nē godōnāni ñænænāni guiquēnē godongāmæ ongōnāni inānite apænedinque, Mīnitō Pidato ingante iīmai ædāni, ānānitapa. Ānāni ēñēninque oodeoidi wæætē Pidato ingante, Wīi bitō āngāngō ante āmōnīpa. Wæætē Badabato ingante ñimpo cæbi gocæ, ante ānāni. ¹² Ēñēninque Pidato godō āninque,

—Īninque oodeoidi Awēnē Odeye mīni āngongā ingante æbānō cæquīmoo, ante āmīni.

¹³ Āñongante tōmēnāni ogæ tededinque,
—Awæ ñænquedīmæ āmi cæte wæñōnāni wængæ tōō.

¹⁴ Ānāni ēñente wædinque Pidato,

—Īñæmpa quīnō wēnæ wēnæ cæcantawoo.
Āñongante godōmenque yedæ āninque adodō,

—Āmi awāa timpote wæñōnāni wængæ tōō.

¹⁵ Ancaā ānewēñōnāni Pidato iñōmō, Māniñāni piñāmai piyænē cæcædānīmpa, ante cædinque Badabato nāni āningā ingante godō ñimpo cædinque tōmēnāni nempo pædæ godongā ænānitapa. Wæætē edæ Itota ingante edæ Pidato wodi angā æmontai badōimenca tæi tæi pānāni ate ñænque quepote awāa nāni gōnonguinque edæ da godongā ænte godānitapa.

¹⁶ Pædæ godongā ate nē tontadoidi tōmengā ingante tōō æmænte wadæ godinque awēnē gobedōnadodo oncōnē Podætodio nāni ancōnē mangui gui-iyongā tontadoidi bacabo Itota weca godongāmæ āñete pōnānitapa. ¹⁷ Pōninque tōmēnāni, Awēnē ĩmi inte awēnē weocoo wēñacæbiimpā, ante bai cædinque badete todinque Itota ingante wæætē opatawæ ēmoncoo pōnō da wēñadinque daa mongæmenca æninque que cædinque, Awēnē poganta, ante bai pōnō daga wencadānitapa. ¹⁸ Ayæ Yæ yæ āninque,

—Badogaa, bitō oodeo awēnē odeyebi ĩmipææ.

¹⁹ Ante badete todinque cæwipaca ancaā tæi tæi pancadinque tōmengā towæ towæ tånongadinque da guicapote ædæ wææñinque, Bitō Tæiyæ Waēmō Awēnē ĩmi amōnīpa, ante bai badete todānitapa. ²⁰ Ayæ ĩnque badete todinque tōmēnāni opatawæ ēmoncoo gā tadongadinque tōmengā nāmā weocoo da wēñadānitapa. Ayæ edæ tōmengā ingante awæ timpote gōnoncæte ante tōō æmænte ænte tao māodāni gogacāimpa.

Itota ingante awāa timpodāni wængampā

(*Māateo 27.32-44; Odoco 23.26-43; Wāo 19.17-27*)

²¹ Māniñedē Tidēne quēwēnongā Timōnō guiquēñē Adecantodo tōnō Odopo tōmēna wæmpo inongā inte tōmengā yabæque gote pōnongāimpa. Īninque Itota ingante ænte godinque ayōnāni māningā Timōnō ñōwo wodo tebæ gocæ cædinque pongā adānitapa. Īninque tontadoidi, Bitō ægodōe. Itota ingante mōni timpoquiwæ ænte mongænte goe, ānāni ænte mongænte gocantapa.

²² Mānōmai godinque Godogota nāni āñōmō mōnō tededō “Ocatāinō” iñōmō Itota ingante ænte pōnānitapa. ²³ Māniñōmō pōnāni ate wadāni, Nantate beyæ becæcāimpa, ante cædinque biñōmæ nāni wædænque tī nāmæ tōnō mīdapæ nāni āñōmæ adoyōmō wempo cædēninque pædæ pōnō cæyōnāni tōmengā ōnonque yædæ bedinque edæ bedāmai ingantapa. ²⁴ Ayæ tōmengā ingante awæ ñænquedīmæ nāni ænte pōniwāa tōō godōninque pōnō timpodinque wææ tīwadinque ængæ gantidēnānitapa. Ængæ gantidēnāni ate wægōñongā tōmēnāni wæætē tōmengā

weocoo ini ante, Æcänö quınca nö ta ad-
inque tömengä mänincoo æncæcäimpa, ante
wææntodönninque adocooque adocooque
æñänitapa.

²⁵ Edæ nænque tömantadæ æñonte
mäñifedë incæ tömengä ingante
inque timpote edæ ængæ gantidëñäni
wægongacäimpa. ²⁶ Ayæ, Itota wæncæcäimpa,
ante quinante apænte äñänii, ante tömänäni
ponte adinque ëñencädänimpa, ante
yewæmöninque, “Oodeoidi Awënë Odeye
inongä ingampa,” ante yewæmöninque
awæmpaa wo cædänitapa. ²⁷ Ayæ wada në
ö ænte quëwëñina inate adoyedë tömengä
tönö adocanque tömëmæ inö adocanque
dipæmæ inö godö timpote gantidëdäni
wægongadäimpa. ²⁸ Ininque, Në ëñëñämaï
cædäni näni cabo tönö tömengä adocä
ingampa, ante Wængongui angä ëñente näni
yewæmongainö bai ñöwo inque bagatimpa.

²⁹ Ayæ wodo prænta në godäni guiquënë
Itota ingante godö babæ ante badete tod-
inque pica pica cædinque,

–Bitö iñæmpa Wængongui tæiyæ waëmö
oncö incæ bæ tate wo ëwënninque mëönaa go
adoönæque iñonte do mæñonguimi inte edæ,
³⁰ o togæmpote o togæwate ti wæænninque
edæ quëwëmæwe.

³¹ Ayæ, Wængongui quï, ante në godönäni
ñæñænäni tönö në wææ odömönäni adobai
näni cabo nämäneque godongämæ badete
todinque,

–Tömengä, Wadäni quëwencädänimpa,
ante waa cæcantawoo. Ñöwo iñæmpa.
Nämä beyænque eyepæ cæcampa diyæ
quëwenguingää. ³² Idægoidi awënë odeye
ingä ininque tömengä ti wæænte gocä
adinque mönitö wæætë, Tömengä näwä
Codito ingampa, ante pönëmaï wædö.

Ante badete toyönäni në ö æna tömengä
tönö godongämæ timpote wægöna incæ
adobai Itota ingante piinque wënæ wënæ
ante badete togadäimpa.

Itota wængampa

(Mäteo 27.45-56; Odoca 23.44-49; Wäö
19.28-30)

³³ Tæcæbæcä pöni bayö tömämaë iñontobæ
wëmö badinque ayæ ayaönäa wæiganca
mæ mämönte bai inimpa. ³⁴ Ininque
ayaönäa wæiyonte Itota nanguï pöni yedæ
äñinque, “Edoi, Edoi, nëma tabatäni,” äñinque
möñö tededö, “Botö Wængonguiñaa, botö
Wængonguiñaa, ædö cæte botö imote ëmö
cæte gobiayaa.”

³⁵ Ante wæcä ëñënninque godämæ ongönäni
guiquënë,

–Æ. Ediya wodi ingante aa pecä apa.

³⁶ Äñönäni adocanque do pogodo
gote önætämö ænte pönninque biinömæ
bai önömænque æñinque aa bedonte

næænninque edæ, Becæcäimpa, ante
cædinque cæwipaca pædæ ææñongantapa.

–Ee aquënë quëwëedäni. Ediya wabänö
ponte o togænte pædæ wææñongä
abaimpa.

³⁷ Angä ate Itota iñömö wæætë ogæ
äñinque edæ æmäwo guëmäñinque
wængacäimpa. ³⁸ Ininque edæ Wængongui
tæiyæ waëmoncönë weocoo odemö näni
wææ wodöincoo adoyedë önönæca inö
tæcæguedë pöni tænguimæ wææntapa.
³⁹ Mänömaï ogæ äñinque do wængä adinque
tontadoidi awënë capitäo guiquënë,

–Nawangä impa. Ingå iñömö Wængongui
Wengä ingainö ante pönenguënë, an-
gacäimpa.

⁴⁰ Ayæ onquiyænäni Mäadiya Mäagadadënë
näni äñongä, Otite tönö Tantiгомö badä
Mäadiya, Tadömee, mänimpodäni adobai oo
gote gomö a ongönänitapa. ⁴¹ Tömëñäni
iñömö Gadideabæ quëwængäfedë Itota
miñæ gote pönö waa cædinäni inte ñöwo
pö gobæ ongöninque pömö adänitapa.
Itota Eedotadëe pö æñongante wadäni
onquiyænäñinque godongämæ tee empote
pöñinäni inte ñöwo pönninque a ongönänitapa.

Itota wodi baö ini mäo daga wënäñipa

(Mäteo 27.57-61; Odoca 23.50-56; Wäö
19.38-42)

⁴² Oodeoidi näni, Gäwadecæ ba ate
guëmanguilönæ inguimpa, ante näni täno
cæönæ ingatimpa. Ininque gäwadecæ oo ba
ate wædinque, ⁴³ Adimatea iñömö quëwëningä
inte Ootee, Wængongui Awënë Odeye
nempo möñö æyedëñö quëwængæimpa, ante
wänö conte bai quëwëñongäimpa. Tömengä
oodeoidi näni Apænte Äincabo adocä
inongä inte ñæñængä inongäimpa. Tömengä
iñömö Pidato weca ñöwo guñëñämaï pö
guidinque, Itota wodi baö pönömi ænte
wëmoe, angantapa. ⁴⁴ Angä ëñënninque
Pidato, Wa. Wabänö wængäi, ante pönente
wædinque awënë capitäo ingante äñete
pongä adinque, Do wængäi. ⁴⁵ Äñongante
edæ, Dobæ wængäimpa, ante apæñecä
ëñënninque Pidato wæætë Ootee ingante,
Itota wodi baö ini o togænte æmäwe.

⁴⁶ Angä ëñënninque Ootee iñömö edæ
waëmö weocoo nino näni äñoncoo godonte
æñinque Itota wodi baö ini wi æmpote
wææ wi æwadinque pædæ wææñonte
ænte gocantapa. Ayæ mänincoo wini wini
caate dicamontaa wointatodë guidö ñö cæte
daga wënninque dicabo edæ da præñæ pönö
tee mönogacäimpa. ⁴⁷ Mänömaï cæyongante
Mäadiya Mäagadadënë näni äñongä tönö
Otite badä Mäadiya mänimpodaque tömengä
ingante näni da wëñiñömö adatapa.

16

Itota do wæningā inte ñāni òmæmonte quëwëngampa

(Máateo 28.1-10; Odoca 24.1-12; Wäo 20.1-10)

¹ Tömëñāni guëmangulïonæ iinque go ate Māadiya Māagadadēñā ñāni ānongā tōnō Tantiago badā Māadiya tōnō Tadōmee tömëñāni iñōmō, Itota wodi baō òni pæcæimpa, ante cædinque ogui waqui godonte æñānitapa. ² Ænte ate wacā tēmāna baquinque ñāō tæcæ bayonte iñāni do godinque nænque tæcæ mæ awæ nānō tamōñedē Itota wodido pōninque, ³ nāmāneque āñānitapa.

—Dicabo ñāni moncadodina æcānō tæi piñængā inte pōnō da tæñæna ate mōnō guite aqūi. ⁴ Ante wædinque go gongænte pōmo ayōñāni dicabo ñæñængade pōni ñāni ānina incæ dobæ dicabo ñæñængade pōni do da tæñæi a òñō adānitapa. ⁵ Adinque tömëngā wodido wāänē guite ayōñāni edëningā bai ingā doyæncōo nāāmænta ëmoncōo wëñate tömëmæ inō tæ contate a ongongā adinque onquiyæñāni wæætē edæ ancaī guifente wædānitapa. ⁶ Edëningā iñōmō,

—Guifente wædāmaī iedāni. Minitō, Itota Nāatadeta quëwëningā ingante edæ wadāni awæ timpodāni ate nē wæningā ingante edæ diqui diqui mīmīni awædō. Tömëngā edæ dobæ ñāni òmæmonte tao gocāimpa. Iñōmō edæ dæ angampa. Iintodē nānō òñontatodē iñōmō edæ òñontatoque iī ataqueedāni. ⁷ Ayæ Pegodo tōnō tömëngā nānō nē ëmiñæñāniñāni tömāñāni inānite gode ante apænedinque mīnitō nē adīmīni inte iīmāinō ante apæñecæmīnimpa. “Itota iñōmō tāno Gadideabæ godinque a ongōñongante mīnitō adoyōmō godinque tömëngā nānō āninō bai godinque tömëngā ingante acæmīnimpa,” ante gote apænedāni.

⁸ Ante apæñecā ëñëninque, Æbānō ante mānōmaī angāā, ante ancaī guifente do do wāate wædinque onquiyæñāni iñōmō Itota wodido abæ tawæ tao wodi winōñānitapa. Guifente wædōñāni inte tömëñāni wadāni inānite bee tēninque apænedāmaī pæ wëñegadānimpa.

Itota ingante Māadiya Māagadadēñā acampa

(Wäo 20.11-18)

⁹ Itota tömëñāni ñāni guëmāniōnæ go ate iimō baänæque do ñāni òmæmonte pō a ongōñongante Māadiya Māagadadēñā tānocā agacāimpa. Iingā onquiyængā iñōmō wëñëñedē wëñæidi tiæte ganca ināni ënempoyongante Itota wido cædongāimpa. ¹⁰ Nōwo iñōmō Itota miñæ ñāni quëwëñincabo ayæ ca wæwëñōñānite Māadiya Māagadadēñā incæ tömëñāni inānite

māo apæñecantapa. ¹¹ Itota ayæ miingā ingā atabopa, ante apæñecā ëñëninque tömëñāni wīi pōñëñānique ongongadānimpa.

Wada tömëngā nānō nē ëmiñæñāni Itota ingante adapa

(Odoca 24.13-35)

¹² Mānōmaī wīi pōñëñāni ate tömëñāni ñāni Itota miñæ godincabo incæ mēnaa idōmæ gote ayōna Itota incæ wacā bai bate cægongā adatapa. ¹³ Ate wædinque tömëna wadæ godinque Itota miñæ ñāni godincabo wadāni inānite apænedinque, Mānōmaī cægongā atamōñapa, āna ëñëninque edæ cōwë pōñëñāmaī ingadānimpa.

Tömëngā nānō da godōñāni inānite Itota angampa

(Máateo 28.16-20; Odoca 24.36-49; Wäo 20.19-23)

¹⁴ Ayæ ate onte ganca ināni ñāni Itota miñæ godincabo cænte tedete a cōñōñāni Itota pō a ongongā adānitapa. Tömëngā iñōmō, Minitō pōñëegade impa. Wadāni, Itota do edæ ñāni òmæmonte cægongā atamōñapa, ante apænedāni ëñëninque mīnitō mīmō òmædëmīni inte wīi pōñëñāni, ante Itota pīngacāimpa.

¹⁵ Ayæ tömëñāni inānite, “Wængongui nānō badongāñāni inguipoga tömāo quëwëñāni iñōñānite mīnitō botō imotedō ante māo tömāñāni inānite watapæ apæñemīni ëñëncædānimpa. ¹⁶ Edæ æcānō wede pōñëninque æpæñē guida tömëngā botō godō æmo beyænque quëwëncæcāimpa. Wæætē nē pōñëñāmaī ingā guiquënë tömëngā nānō apænte pante wæquinque pōñëñāmaī ingampa. ¹⁷ Botō cæbo ate nē pōñëñāni adobaī edæ iīmāi mā cædāni adinque wadāni do ëñëncædānimpa. Botō ëmōwo apænedinque tömëñāni wëñæidi inānite wido cæcædānimpa. Ayæ wadāni tömëñāni tededō mā tedecædānimpa. ¹⁸ Ayæ tæntæ bæi ongōñāni incæte wænguimæ bedāni incæte wëñæ wëñæ badāmaī incædānimpa. Ayæ caate wædāni inānite gampodāni ate do waa bacædānimpa,” ante Itota apænegacāimpa.

Itota incæ òñædē æicampa

(Odoca 24.50-53)

¹⁹ Iinque tömëñāni inānite apæñecā ëñëñāni ate edæ Wængongui òñædē ængō cæcā æidinque Wængongui tömëngā nānō tömëmæ inō mōnō Awëñē Itota iñōmō tæ contagacāimpa. ²⁰ Iinque tömëngā nānō ëmiñæñāniñāni wæætē edæ tömāmæ wadæ godinque wabæca māo wabæca māo apæñedāni ëñëñānitapa. Mōnō Awëñē incæ cæcā ate tömëñāni mā cædāni adinque nē ëñëñāni wæætē, Nō impa, ante wægadānimpa. Māninque ante yewæmonte impa.

Itota Codito ingantedö ante Odoca nänö watapæ ante yewæmongainta

Odoca imo yewæmömopa, ante

¹ Nöwodäni nangui inäni incæ, Mönitö weca æbänö iinque cægatimpa, ante do yewæmoncæ cædänipa. ² Doyedë quëwënanäni iñömö, Æbänö cægatimpa, ante në agaiñäni inte mäninö ante, Näwangä impa, ante në apænedäni badinque adode beyæ ante në cædäni bagadänimpa. Tömënanäni mönitö imönite adodö ante pönö apænedäni ëñentamönipa. Iinque iñäni apænedäni möni ëñënö bai nöwodäni wæætë edæ adobaï pönï ante yewæmoncæ cædäni iinque botö iñömö edæ, Adobainö ante yewæmoncæboimpa, antabopa. ³ Teopido bitö ñænæmi pönï inömi inte ëñëmi. Botö iñömö, Wëëñëñedë æbänö mä pönï cægatimpa, ante ayæ, Nöwo ganca æbänö cæte i, ante ëñencæte ante nangui cædinque ædæmö ëñënimö inte botö edæ, Bitö Teopidobi acæbiimpa, ante adodö adodö ante yewæmömopa. ⁴ Wadäni odömönte apænedäni ëñëninque bitö wæætë, Nö intawo, ante ëñencæte ante cædinque botö yewæmöninta adinque edæ do ëñencæbiimpa. Mänömainö ante yewæmömö ae.

Wäö ëñaqingä, ante anquedo ponte apæncampa

⁵ Wængongui qui, ante në godönäni pancadäniya Abiyaidi nani cabo iñönänite adocanque Tacadiya ëmongacäimpa. Tömengä iñömö Oodeabæ awëñë odeye Edode wodi nänö ingaiñedë, Wængongui qui, ante në godongä ingacäimpa. Tömengä nänöogængä Aadö wodi pæingä Editabeti ingacäimpa. ⁶ Tömëna iñömö nana gæncaya inöna inte Wængongui ayongante nö cæte quëwëninque Wængongui, Iïmai cædäni, ante nänö wææ angainö ante ëñente quëwëñöñate wadäni, Eñënamäi quëwënapa, ante ædö cæte angünänii. ⁷ Editabeti owæntacä inte wëñæ mänämäi quëwëñongante wëñæ dæ ä wædinque nana gæncaya picænna badinque quëwengadaiimpa.

⁸ Dæ ä wædinque quëwëñöñate Tacadiya wodi tönö godongämæ nani godoncabo nani godöñedë ba iinque tömengä iñömö, Wængongui qui, ante godongantapa. ⁹ Godöñongante tömënanäni, Æcänö nöwo guidinque ogui waqui tanguingäa, ante acæte ante cædänitapa. Tömënanäni cöwë nani cæi bai cædinque tömënanäni ëmowo wataa wataa yewæmöninque adoyömö

da wëninque adotaque tadonte adänitapa. Ayönäni, Tacadiya ëmowo impa, ante adinque änäni ëñëninque tömengä Awëñë Wængongui tæiyæ waëmö oncönë guidinque ogui waqui tangantapa. ¹⁰ Wadäni tömänäni, Nöwo ogui waqui iya tangæiimpa, ante yabæcönë godongämæ pöninque Wængongui ingante apænegadänimpa. ¹¹ Tacadiya iñömö tæcæ tancæ cæyongä Wængongui nänö da pönöngä anquedo tömënanäni nani iya täimpaa gäänë tömëmæ inö pö næ gongænte a ongongä acantapa. ¹² Adinque Tacadiya, Æbänö cæquii, ante ancai guiiñente wæcantapa. ¹³ Wæyongante anquedo guiquënë,

–Tacadiya, guiiñënamäi ie. Bitö Wængongui ingante apænebi ëñëninque tömengä bitö nänö ante do cæcampa. Bitö nänöogængä Editabeti iñömö onguiiñængä ingante mancæcäimpa cæbii. Mangä ëñacä adinque bitö tömengä ëmowo, Wäö, pemoncæbiimpa. ¹⁴ Wëñængä waa pönï ëñacä adinque bitö watapæ tocæbiimpa. Wadäni nangui inäni adobaï wëñængä ëñacä ate tocædänimpa. ¹⁵ Wængongui incæ, Botö ayömo bitö wengä wadäni bai guiyä inämäi ñænængä pönï ingä abopa, angä beyæ wadäni adobaï tömengä beyæ ante adinque tocædänimpa. Yowepæ biinömmæ incæ wapæ incæ tömengä ti nämæ tömmæ bedämäi incæcäimpa. Wäänä cæncadë ayæ ongöñongante Wængongui Tæiyæ Waëmö Öñowoca incæ tömengäa pö guicæcäimpa. ¹⁶ Ayæ bitö wengä picængä badinque mäo apæñecä ëñëninque idægoidi nangui inäni Wængongui gämænö poncædänimpa. ¹⁷ Ayæ Wængongui Öñowoca ingante Ediya wodi nänö ewocagai bai adobaï ewocadinque bitö wengä iñömö adocä nänö tæi piñængä bai adobaï tæi piñængä incæcäimpa. Iinque tömengä iñömö möñö Awëñë nänö ponguinö ante täno beyænte bai cædinque odömongä ate mæmpoidi wëñënanäni inänite pönente waadete cæcædänimpa. Ayæ tömengä apæñecä ëñëninque në ëñënamäi cædäni incæ nö cæte quëwënanäni nani ëñënö bai nö ëñente cæcædänimpa. Mänömai cædinque bitö wengä adocä apæñecä ëñente cædinque wadäni möñö Awëñë nänö ponguinö ante eyepæ pönï cædinque tömengä ingante ante wänö concædänimpa. Mänömainö ante anquedo Tacadiya ingante apæñegacäimpa.

¹⁸ Angä ëñëninque Tacadiya wæætë anquedo ingante apænedinque,

–Iñæmpa botö nänöogæñä picænä inampa. Botö adobaï picæmo imopa. Ædö cæte, Nö impa, ante ëñenguimoo.

¹⁹ Äñongä anquedo wæætë,

–Botö Gabodiedo ingäimo imo apa änewëë. Wængongui weca në ongömo iñömö tömengä iñömö, Botö watapæ

apænedō ante bitō Tacadiya ingante apænete pōe, ante da pōnongā pontabopa. ²⁰ Nōwo iñōmō botō ānō pōnēnāmai īmi inte bitō babetadebi badinque tededāmai iñōmite botō apænedō ante īinque cæbo ba ate tedecæbiimpa, ante anquedo Tacadiya ingante apænecantapa.

²¹ Mānōmai tedeyōna wadāni, Tacadiya taquiringā, ante wānō cōninque, Wængongui tæiyæ waēmō oncōnē guidinque æiquedō taquiringā, ante wægadānimpa. ²² Tōmengā tadinque tededāmai ingantapa. Ayæ godōmenque tededāmai inte ōnompouque oo cæpo oo cæpo cæcā adinque tōmēnāni, Wængongui tæiyæ waēmō oncōnē guite ongōninque Tacadiya wīlmon̄te bai mā pōni adingā inte nōwo edæ babetadecā inte tacampa, ante wædānitapa.

²³ Wængongui beyæ ante cæe, ante nāni īinque ānīōnæ ganca cædinque Tacadiya wodi oncōnē gocantapa. ²⁴ Māniñedē ate tōmengā nānōogængā Editabeti yædēmadā badinque edæ ōnompou æmæmpouque apāicā ganca oncōnē wē womongantapa. ²⁵ Tōmengā iñōmō edæ, “Wēēnēñedē, Owæntabi īmipa, ante pīnāni wæbo adinque Wængongui botō īmote waadete pōnō cædinque nōwo wæætē, Pīnāmai incædānimpa, ante cæcampa,” ante pōnēninque Editabeti togacāimpa.

Itota eñaquingā, ante

²⁶ Editabeti ōnompou æmæmpouque go adoque apāicā yædēmadā nānō iñedē Wængongui tōmengā anquedo Gabodiedo nāni ānongā ingante da pōnongā pōninque Gadideabæ Nāatadeta nāni quēwēñōmō gocantapa. ²⁷ Godinque tōmengā baquēcā Māadiya nāni ānongā weca pongantapa. Tōmengā ingante Awēnē Dabii wodi pæingā Ootee, Monguimo, ante do āningā īnongāimpa. ²⁸ Īniquē anquedo Gabodiedo Māadiya weca pō guidinque tōmengā ingante,

—Wængongui nānō nē waadebi inte eñēe. Wængongui bitō imite waa cæcæcāimpa. Wadāni onquiyæñāni īnānite Wængongui pōnōmenque pōnō waa cædongā inte bitō imite edæ godōmenque waa pōni pōnō cæcā acæimpa. ²⁹ Ante tæcæ apæneyongā tōmengā ancai guīñēninque, Quīnō bai ī ante botō imote apæncēā, ante wæcantapa. ³⁰ Wæyongante anquedo wæætē,

—Māadiya, bitō guīñēnāmai īe. Wængongui incæ edæ bitō imite nanguī waadete pōnō acampa. ³¹ Bitō nōwo edæ yædēmadā badinque bitō wēñængā onguīñængā mancæbiimpa. Tōmengā eñacā ate bitō tōmengā emōwo, Itota ingampa, ante pemoncæbiimpa. ³² Tōmengā iñōmō edæ nanguī tæi pīñænte cæcā incæcāimpa. Īniquē tōmengā ingantedō ante, Æibæ pōni nē

Quēwengā Wengā ingaingā ingampa, ante apænecæimpa. Ayæ Awēnē Wængongui incæ tōmengā ingante apænedinque, Bitō Awēnē bayōmi mæmæ awēnē odeye Dabii wodi nempo dodāni nāni quēwengā bai bitō nempo adobai quēwencædānimpa, ante adocā Itota ingante pōnongā ænte Awēnē Odeye bacæcāimpa. ³³ Īniquē AACoboidi tōmengā nempo quēwēñōnānite tōmengā cōwē tōmēnāni Awēnē Odeye incæcāimpa. Tōmengā nānō Awēnē Odeye inguimāmo iñōmō edæ dæ badāmai ingæimpa, ante Wængongui nānō da pōnōningā Māadiya ingante angantapa.

³⁴ Māadiya wæætē tōmengā ingante,

—Botō iñæmpa onguīñængā tōnō mōnāmai inte wēñæ ædō cæte manguimoo.

³⁵ Ante wæyongante anquedo wæætē edæ,

—Wængongui Tæiyæ Waēmō Ōnōwoca incæ bitō weca poncæcāimpa. Wængongui Æibæ Quēwēnongā tōmengā nānō tæi pīñæno incæ wææ owo bai cæcæcāimpa. Mānōmai beyæ bitō Wēñængā Onguīñængā incæ Tæiyæ Waēmō eñacā ate, Wængongui Wēñængā ingampa, ante pemoncædānimpa. ³⁶ Ayæ godōmenque apænebo eñē. Editabeti bitō guidengā iñōmō picængade pōni iñongante, Owæntacā ingampa, ante tededānitawo. Incæte tōmengā picængadecā incæ dobæ edæ ōnompou æmæmpouque go adoque apāicā yædēmadā inte tōmengā wēñængā edæ onguīñængā ingante eñengampa. ³⁷ Īñæmpa quīēmē ante Wængongui nānō ānōnō ante tōmāā edæ cōwē cæcæcāimpa.

³⁸ Ante anquedo angā eñente wædinque Māadiya,

—Mōnō Awēnē beyæneque nē cæbo īmopa. Bitō ānō bai Ao āmo bacæmpa.

Ante apænecā eñēninque Wængongui nānō da pōnōningā incæ emō cæte wadæ gogacāimpa.

Editabeti weca Māadiya eñacæ gocampa

³⁹ Māniñedē ate Māadiya wodi wadæ godinque ānāmæñē quingæ æidinque Oodeabæ quēwēnāni nāni quēwēñōmō adoyōmonque incæ pōninque, ⁴⁰ Tacadiya oncōnē pō guidinque Editabeti ingante, Waa quēwēmi, angantapa. ⁴¹ Māadiya mānōmai apænecā eñēninque Editabeti wodi wengā cæncadē ongōninque wogæi wogæi tocantapa. Editabeti iñōmō Wængongui Tæiyæ Waēmō Ōnōwoca incæ tōmengāā pō guicā Īniquē ædæmō pōni ewocacā bacantapa. ⁴² Mānōmai badinque adocā ogæ tededinque,

—Mōnō onquiyæncabo iñōmonte bitō adobique bitō waa toquinque ĩmpa, angantapa. Wængongui wamōni imōnite pōnōmenque waadedinque bitō imīnite godōmenque nanguī waadecampa. Bitō

nē ēnēnongā ingante Wængongui nangui waadecā beyæ tōmengā adobai tocæcāimpa. ⁴³ Botō ōnōmoque iñōmote bitō iñōmō mōnō Awēnē badā inōmi inte edæ botō weca quinanca pōmii. ⁴⁴ Tæcæ edæ apænebi ōnōnonca ēñēñōmo botō cæncædē nē ongōnongā incæ wogæi wogæi watapæ tocā ae. ⁴⁵ Mōnō Awēnē bitō imite nānō āninō ante bitō iñōmō, Tōmengā cōwē cæcæcāimpa, ante pōnēninque bitō toquinque edæ nē pōnēmi imitapa.

⁴⁶ Editabeti mānōmaī apæneyongā Māadiya wæætē āmotamīni ante bai iīmaī angacāimpa.

“Botō mīmōno pōnēninque, Mōnō Awēnē iñōmō edæ waa pōni mōnō inongā ingampa, ante watapæ apænebopa.

⁴⁷ Ayæ, Quēwencæbiimpa, ante botō imote nē Āngā iñongante botō Wængongui ingante ante pōnēninque edæ watapæ tote ēwocabopa.

⁴⁸ Botō tōmengā ingante nē cædōmo inte ōnōmoque pōni iñōmote tōmengā wæætē botō imote waa acampa.

Iīncayæ nānōmōidi wææ iīncayæ nānōmōidi wææ ināni tōmānāni botō imotedō ante apænedinque,

Tōmēnā iñōmō Wængongui nānō nē waadedā ingadāimpa, ante apænecædānimpā.

⁴⁹ Wængongui nē Tæi Piñænongā inte botō imote pōnō nangui cæcā beyænque edæ apænecædānimpā.

Tōmengā ēmōwo iñōmō edæ Tæiyæ Waēmō ēmongampa.

⁵⁰ Ayæ iīncayæ nānōmōidi wææ iīncayæ nānōmōidi wææ ināni tōmengā ingante guiñente cæyōnānite tōmengā wæætē waadete pōnō waa cæcæcāimpa.

⁵¹ Tōmengā nē tæi piñænongā inte tōmengā ōnompoca cæte bai nangui cæcantapa.

Ayæ wadāni, Tōmēmoque waēmō imopa, ante ōnōwēninque pōnēnāni inānite tōmengā angā nāwæ godānitapa.

⁵² Ayæ awēnēidi nāni tæ contaimpaa ongōñōnānite tōmengā tōmēnāni inānite wido cæcā godānitapa.

Wæætē ōnōnānique inānite ængō cæcā contadinque tōmēnāni wæætē awēnēidi bai badānitapa.

⁵³ Ayæ gue ænente wædāni iñōnānite tōmengā waa pōni cængui godongā æninque tōmēnāni tōmo pōni cæñānitapa.

Wæætē nangui eadāni tōmēnāni inānite da godongā godinque ōmæpodāni inte godānitapa.

⁵⁴ Mōnō idægocabo iñōmō tōmengā ingante nē cæmō iñōmonte tōmengā mōnō tōnō godongāmæ cæcantapa.

Ayæ, Waadete botō pōnō waa cægainō bai adodō cæcæboimpa, ante pōnēninque tōmengā ñōwo pōnō waadete waa cæcā æmompā.

⁵⁵ Abadāō wodi pæimō iñōmonte tōmengā mōnō mæmæidi inānite nānō angainō bai cædinque,

cōwē ñimpo cædāmaī inte pōnō waadete cæcampa.”

⁵⁶ Ante Māadiya wodi āmotamīni ante bai angantapa. Ayæ Editabeti weca mēa go adoque apāicā quēwente ate ayæ ate tōmengā oncōnē gogacāimpa.

Wāō ēñacampa

⁵⁷ Editabeti wodi guiquēnē oo pōni ēnēninque tōmengā wēñængā onguñængā mangacāimpa. ⁵⁸ Ayæ tōmengā guidēnāni tōnō godongāmæ quēwēnāni iñōmō, Ā mōnō Awēnē wīl piñgā inte Editabeti ingante ædæmō waadete waa cæcampa, ante tæcæ ēñēmōnīpa, āninque Editabeti tōnō godongāmæ togadānimpā. ⁵⁹ Ayæ adoque Wængongui itadē go ate wēñængā ingante æmontaique eō togæncæ cædāni iñōmō godongāmæ pōninque tōmengā wæmpo ēmōwo bai ante, Tacadiya, ante pemoncæ cædānitapa. ⁶⁰ Cæyōnānite wāānā Baa āninque,

—Tōmengā ēmōwo Wāō ēmoncæcāimpa, ante wææ angadāimpa.

⁶¹ Āñongante tōmēnāni wæætē,

—Iñæmpa bitō guidēnāni Wāō ēmōnāmaī. Dæ āmōnānīpa.

⁶² Āninque wæmpocā ingante omō cædinque, Āmongānō ēmonguingā āmii, ante odōmōmi amōnii. ⁶³ Āñōnānite tōmengā tededāmaī inongā inte ōnompocaque odōmongā adinque yewæmōinta æninque pædæ pōnōnāni ate tōmengā iñōmō edæ,

“Tōmengā ēmōwo Wāō ēmoncæcāimpa,” ante yewæmongā adinque tōmānāni edæ guiñente wægadānimpā. ⁶⁴ Yewæmongā ate tōmengā ōnōngūēnēwa ñīmæ cæguēnēwate bai baguēnēwate ate edæ tōmengā ogæ tededinque Wængongui ingante, Waa pōni cæbi abopa, ante watapæ edæ apænecantapa. ⁶⁵ Āninque māñiñōmō godongāmæ quēwēnāni tōnō Oodeabæ ānāmænē quēwēnāni tōnō tōmānāni, Mānōmaī batimpā, ante nangui tededānitapa. ⁶⁶ Tededāni ēñēninque nē ēñēnāni wæætē, “Iñgā wēñængā iñōmō æbānō nānō baquinque edæ pæquingā,” ante tōmānāni godongāmæ wægadānimpā. Edæ tōmengā tōnō Wængongui godongāmæ cæcā ingacāimpa.

Tacadiya āmotamīni ante angampa

⁶⁷ Wēñængā wæmpocā Tacadiya guiquēnē Wængongui Tæiyæ Waēmō Ōnōwoca ingante

ewocadinque Wængongui beyæ apænedinque
 åmotamini ante bai apænecantapa.

68 “Mönö idægocabo Wængongui iñömö
 adocä mönö Awënë iñongante mönö
 tömengä ingante waa ate watapæ
 apænecæimpa.

Tömengä iñömö, Botö quinäni bate abæ
 tawænte bai quëwencæðänimpa, ante
 tömengä do æncæ pongä acæimpa.

69 “Önömocawæ wææ emoncate bai wææ
 gompocæcæimpa,” ante cædinque
 tömengä mönö imonte nê ænguingä
 ingante da pönongä pöningue iñgä
 wæætê ængä beyæque quëwëmompä.

Wængongui ingante nê cægaingä awënë
 odeye Dabii wodi pæringä inongä inte
 tömengä mänömai cæcä beyænque
 quëwëmompä.

70 Wængongui iñömö tömengä beyæ nê
 apænegainäni tæiyæ waëmö in-
 gainäni iñönänite tömënanäni tönö
 apænedinque,

Cöwê cæcæboimpa, ante nänö apænegainö
 bai ñöwo edæ iñque cæcampa.

71 Mönö iñömö nê piinte änäni nempo
 ongöñömönte tömengä,

Piinte cæðänipa, ante adinque mönö imonte
 gä pe æmpote ö ængä beyænque
 quëwëmompä.

72 Mänömai cædinque tömengä mönö
 mæmæidi inänite nänö angainö
 bai cædinque ñöwo waadete pönö
 cæcampa.

Ayæ, Botö pönö cæbo ate mînitö Ao ämini
 iñinque mönö godongämæ wææ cæte
 quëwengæimpa, ante tömengä tæiyæ
 waëmö nänö angainö ante cöwê
 pönënogä inte ñöwo iñque cæcampa.

73 Edæ mæmæ Abadäo wodi ingante, Botö
 nê Quëwëmo ingäimo inte nöingä
 ämopa,

ante Wængongui iñainö ante nänö pönö
 cæquinö ante nö apænegacæimpa.

74 Abadäo ëñëmi. Nê piinte cæðäni nempo
 wæwëñöminite botö gä pe æmpote ö
 æninque

pönö cæbo ate eyepæ badinque mînitö
 wæætê guñënamai inte botö
 Wængongui imo beyæ cæcæminimpa,
 ante Wængongui nê pönö cæqingä
 inte apænegacæimpa.

75 Wængongui iñömö edæ, Mînitö tæiyæ
 waëmö ewocadinque mîni quëwenganca
 botö weca nö pönä cæte quëwencæminimpa,
 ante pönö cæcä ingacæimpa,” ante
 wëñængä mæmpocä Tacadiya wodi
 apænecantapa.

76 Ayæ wëñængä ingante tömengä iñmai
 ante godömenque apænecantapa.

“Botö wëmi bitö imite botö wæætê apænebo
 ëñë, angantapa.

Nê Eibæ Pönä Quëwengä beyæ bitö nê
 apænebi inömi iñipa, ante bitö imitedö
 ante apænecæðänimpa.

Mönö Awënë taadö pinongæimpa, ante bitö
 edæ täno beyænte gotë bai cædinque,

77 mönö Awënë quinäni inänite iñmai ante
 odömönte apænecæbiimpa.

Wënæ wënæ mîni cæðö ante Wængongui
 pönö ñimpo cæcä ate mînitö iñömö
 edæ,

Tömengä ængä beyænque mönö quëwengui
 impä, ante do ëñencæminimpa, ante
 apænebi ëñencæðänimpa.

78 Edæ mönö Wængongui incæ mönö wënæ
 wënæ wæðönö ante waadete pönö
 waa cædinque,

ööñæðê Quëwengä ingante mönö weca da
 pönongä pöningue nænque tæcæ tamö
 bai ëmongä acæimpa.

79 Mänömai cædinque mönö wænguimämo
 beyæ wëmö iñömö awæðö,

ante wæyömonte tömengä ponte a ongongä
 adinque mönö nænque pämo oo tote
 bai quëwëmompä.

Ayæ, Mînitö mîni gänê pönente quëwengüñö
 taadonque poncæminimpa,
 ante tömengä töö æmænte mämongä
 pömompä.”

Mänömainö ante Tacadiya wodi tömengä
 wëñængä ingante apænegacæimpa.
 80 Wëñængä iñömö do pædinque önöwoca
 tæi piñænte ewocagacæimpa. Idægoidi weca
 tömengä nänö ponte a ongonganca önömæca
 quëwengacæimpa.

2

Itota ëñacampa (Mäateo 1.18-25)

1 Wäö idægoidi weca nänö pöñedê
 iñque bayonte awënë Tetædo Agoto
 iñömö, Æponimidö imîni, ante acæte
 ante cædinque odömäno ömæ nê

quëwënanäni inänite edæ, Mînitö emöwo
 tömäimîni yewæmoncæminimpa, an-
 gacæimpa. 2 Tidiabæ awënë Tidënio
 ingäñedê odömäno awënë täno angä.

3 Æñëninque adocanque tömengä mæmæidi
 nänäni quëwengäñömö wacä tömengä
 mæmæidi nänäni quëwengäñömö tömänäni
 yewæmoncæte ante edæ go go
 cægadänimpa.

4 Iñinque Oodeabæ Awënë wodi Dabii
 wodi pæringä inongä inte Ootee iñömö
 Gadideabæ Näatadeta nänäni quëwëñömö
 quëwëninque adobai tömengä mæmæ Dabii
 wodi nänö quëwengäñömö Bedëe iñömö
 gogacæimpa. 5 Edæ Ootee nänöogængä in-
 guingä Mäadiya yæðëmadä iñongante tömëna
 nänä gæncaya ingüina guëa yewæmoncæ go-
 datapa. 6 Bedëe ponte quëwëñöna Wëñængä
 iñömö iñque pædinque 7 bamoncadengä

incæ onguifnægä inte iimaï eñagacäimpa. Mäniñomö mongui incönë iñomö mäniñedë eyede pöni goti ongonäni ate wædinque tömëna wæætë cænënanäni cænguï oncontaidë guiyantaidë go guida ate Wëñængä eñacantapa. Ìninqe guiyantaidë eñacä ate wäänä Wëñængä ingante weocoo wini wini caadinque cænënanäni cænguincadedë ño cædä öñongantapa.

Obegaidi inänite në aadäni inänite anque-doidi apænëdäni

⁸ Idægoidi cænünäni obegaidi nani änonäni iñonänite në aawënäni iñomö eyepancadë adöönæ woyowotæ a cönönänimpa. ⁹ A cönönäni mönö Awënë anquedo ponte a ongöñongä mönö Awënë nänö ñäö emönö beyænque godongämæ guinæ gongæ adinque në aadäni ancai guifnente wædänitapa. ¹⁰ Anquedo iñomö tömënanäni inänite, “Guifnënamäi imæwedäni. Mïni nanguï eñente toquinque ante botö ñöwo watapæ apænëbo eñëedäni. Minitö tönö inguipoga tömäo quëwënäni adobaï adode beyænque watapæ tocæmïnimpa. ¹¹ Mönö Awënë Codito iñomö, Æmo beyænque quëwencæmïnimpa, ante në Ængä baquingä inongä inte do edæ eñacantapa. Edæ mïnitö beyæ ante tömängä ñöwoönæ incæ awënë Dabii wodi nänö quëwengaiñomö eñacantapa. ¹² Nö impa, ante gote acæmïnimpa. Wëñængä ingante wäänä wini wini caadinque edæ cænünäni cænguincadedë ño cædä ate a öñongä adinque mïnitö, Nö impa, ante eñencæmïnimpa.”

¹³ Ante anquedo añongä wadäni nanguï inäni öönädë owodäni incæ iñontobæ tontadoidi ongonäni bai tömängä tönö godongämæ ponte a ongöñinque ämotamïni ante bai äninque Wængongui ingante iimaï ante watapæ apænëdänitapa.

¹⁴ “Wængongui æibæ pöni quëwëñongä inte edæ ñäö apäite bai emongänö anguënë.

Tömängä inguipoga iñomö waadete pönö cæcä beyænque mïni waocabo edæ gänë pönenguimïnidö anguënë.”

¹⁵ Ante ämotamïni ante bai äninque anque-doidi öönädë adodö wadæ æite godäni ate në aawënäni iñomö nani cabo teledinque,

–Mönö Awënë mönö imonte apænecä mönö eñëno ante, Æbänö cæcäi, ante mönö Bedëë gote ædæmö acæimpa. ¹⁶ Äninque pogodo ponte ayönäni Mäadiya tönö Ootee a ongöñöna Wëñængä iñomö cænünäni cænguincadedë a öñongä adänitapa. ¹⁷ Ìninqe adinque wadæ godinque, Wëñængä æbänö ingäa, ante anquedo apænecä nani eñëno ante gode ä gode ä cæte wayömö wayömö quëwënäni inänite tededäni eñënanitapa. ¹⁸ Eñëninque tömänäni wæætë, Në aawënäni æbänö ante apænëdäni, ante guifnente

wædänitapa. ¹⁹ Mäadiya guiquënë, Wëñængä æbänö ingä änanii, ante nänä pönëe congantapa. ²⁰ Në aawënäni guiquënë, Wængongui ñäö apäite bai emönongä inte pönö waa pöni cæcä æmönipa. Edæ anquedo nänö apænëdö bai do cæcä amönipa, ante apænëdinque eyepancadë ocæ emænte gogadänimpa.

Bitö Wengä, ante mæmpoda Wëñængä ingante Wængongui oncönë cæte pönäpa

²¹ Ayæ, Adoque Wængongui itadë go ate æmontaique eö togængæimpa, ante idægoidi cöwë nani cæi bai cædinque Wëñængä ingante eö togænänitapa. Ayæ Mäadiya yædëmadämaï nänö iñedë anquedo nänö pemöninö bai äninque mæmpoda Wëñængä emöwo ante, Itota, pemongadäimpa.

²² Wäänä mänimpoönæ wepæ näate inampa, ante Möitee wodi nänö angaimpoönæ inque go ate tömëna, Wëñængä iñomö Wængongui Awënë qui ingampa, ante mönö godongæimpa, ante tömängä ingante Eedotadëë iñomö ænte gogadäimpa.

²³ Edæ, “Onguifnënanäni bamoncadënanäni tömänäni tæiyæ waëmö bacædänimpa, ante tömënanäni Wængongui Awënë nempo pædæ godongæimpa,” ante Awënë Wængongui nänö angainö ante eñëninque Mäadiya tönö Ootee do cædatapa. ²⁴ Ayæ, Equemöna nana gæncaya, Wængongui qui, ante godongæimpa. Wïi mänömaï cæte tæcæ wengä wengä pæda mënaa inate godongæimpa. Ootee tönö Mäadiya iñomö mänömaï cædinque, Wængongui qui impa, ante mënaa inate ænte pöninque pædæ godöna ængacäimpa.

²⁵ Mäniñedë adocanque edæ tömängä emöwo Timeönö Wængongui beyænque ante nö cædongä inte Eedotadëë iñomö quëwengacäimpa. Idægoidi wampo pönente quëwencædänimpa, ante Wængongui æyedëno ædæmö cæqingäa, ante tömängä wänö cönonte quëwëñongäimpa. Ayæ Wængongui Tæiyæ Waëmö Öñöwoca ingante tömängä cöwë ewocacä inongäimpa.

²⁶ Wængongui Tæiyæ Waëmö Öñöwoca do apænecä eñëninque Timeönö wodi iñomö, Botö ayæ wænämäi mïimö quëwëmoyedë mönö Awënë Codito ingante aquimo imopa, ante do eñëningä inongäimpa. ²⁷ Nöwo iñomö Wængongui Öñöwoca angä eñëninque tömängä Wængongui oncö ñænæncönë yabæcönë pö guicantapa. Mäniñedë Itota mæmpoda iñomö idægoidi wææ ante nani cægainö bai cæcæte ante cædinque Wëñængä Itota ingante ænte pö guida. ²⁸ Adinque Timeönö iñomö edæ Wëñængä ingante bæi ongonde pæ mäninque Wængongui ingante, Tömëmi waa toquinque mönitö imönite pönö cæbipa, ante apænecantapa.

29 "Bitō Tæiyæ Awënë Inōmi inte ēñēmi. Bitō imite nē cæbo iñōmote bitō doyedē, Cæbo acæbiimpa, angabiimpa.

Iñinque bitō ānīnō bai ñōwo edæ iinque cæbi adīmo iñōmote bitō āmi ate wænte goboe.

30 Edæ bitō, Quēwencæmīnīmpa, ante nē Ænguingā ingante ñōwo da pōnōmi ponte ēñacā do abopa.

31 Mānōmaī cædinque bitō, Wadāni nāni cabo wadāni nāni cabo waodāni tōmānāni acædānīmpa,

ante cædinque bitō nē Ænguingā ingante ñōwo da pōnōmi ponte a ongonḡā acæīmpa.

32 Idægoidi Ināmaī Ināni incæ tōmēnāni nāni cabo nāni cabo incæ edonque acædānīmpa, ante cædinque bitō da pōnōmi pōninque tōmēngā ñāō apāite bai a ongonḡā acædānīmpa.

Ayæ mōni idægocabo iñōmōnite bitō, Wēñængā ængā beyænque botō quimīni iñōmō ñāō bai waēmō pōni ēmōninque quēwencæmīnīmpa, ante pōnō cæbi abopa."

33 Ante āmotamīni ante bai Timeōnō wodi, Wēñængā æbānō cæquingā ingāā, ante tedecā ēñēninque Wēñængā mæmpo tōnō tōmēngā badā iñōmō guīñente wædatapa. 34 Timeōnō wæætē, Mīna waa toquinque iingā Wēñængā ingante æmīnāpa, ante apænedinque tōmēngā badā Māadiya ingante iimāi ante godōmenque apænecantapa.

—Picængā badingque iingā Wēñængā cæcā beyænque idægoidi pancadāniya tæ go wæænte bai wæyōnāni pancadāniya wæætē ængæ gantite bai quēwencædānīmpa. Wængongui iñōmō, Wēñængā ingante ate ēñæcædānīmpa, ante odōmōnte cæyongā pancadāniya wæætē adocā ingante godō pīinte tedecædānīmpa. 35 Ante apænedinque Timeōnō iñōmō Māadiya ingante apænecantapa. Mānōmaī bayonte, Nanguī ināni æbānō ante mīmōno pōnēnāni, ante edonque acæīmpa. Bitō iñōmō yaēmē yete bai wæwente ēwocacæbiimpa, ante apænegacāīmpa.

36 Ayæ wadā iñōmō Wængongui beyæ nē apænedā iñōmō tōmēnā ēmōwo Anā adobaī ongōnantapa. Atedoidi nāni cabo iñōnāni adocanque Pānoedo wēnā inōnā inte tōmēnā picængadedā ingadāīmpa. Tōmēngā iñōmō baquēcāñedē mōninque nānōogængā tōnō onompo æmæmpoque go mēa wadepo quēwente ate onguīñængā guiquēnē nāñe wængacāīmpa. 37 Onquiyæñā iñōmō ñōwo otenta i coatodo wadepo nānō ēñagainganca owæmpoinā quēwēnā inte tōmēnā Wængongui oncō ñæñæncōnē yabæcōnenque cōwē quēwēninque taodāmaī

iñōnāīmpa. Itædē woyowotæ tōmēnā cōwē, Wængongui ingampa, ante waa cædinque Wængongui ingante apænecæte ante wantæpiyæ cæñāmaī quēwēnā iñōnāīmpa. 38 Tōmēnā ñōwo eyepæ pōni māmō bee tēninque Itota ingante adinque Wængongui ingante waa ate pōnēninque apænecantapa. Ayæ wadāni, Mōnitō Eedotadēē iñōmō quēwēmōni iñōmōnite Wængongui æyedēnō pōnō cæcā beyæ abæ tawænte quēwenguimōnii, ante nē wānō cōnāni inānite dodā Anā iñōmō Wēñængā ingante do adinā inte, Wēñængā nē Ænguingā inte do ēñate pongā atabopa, ante cōwē apænedā ēñengadānīmpa.

Nāatadeta occē ēmænte godāniya

39 Ayæ māñī, Awënë Wængongui, Iimāi cæedāni, nānō angaiñō ante iinque cæte ate Ootee nāni wencabo Gadideabæ gocæte ante wadæ godinque Nāatadeta tōmēnāni nāna quēwēniñōmō pongadānīmpa.

40 Wēñængā iñōmō edæ picængā pædinque tæi piñængā bacantapa. Ayæ ocāi encacā inte nanguī ēñente bagacāīmpa. Ayæ Wængongui waadete pōnō apænecā ēñente ēwocadinque tōmēngā nē waadete pōnō cæcā ingacāīmpa.

Wængongui oncōnē Itota gote on-gongampa

41 Wodo pænta gogaiñæ bai Patowa mōnō ææmæ cænguīñōnē ñōwo impa, ante pōnēninque idægoidi Patowa ante Eedotadēē godinque ææmæ cædōnānīmpa. Itota mæmpoda adobaī Patowa nāni āmæ cōwē cæyedē wadepo iñō wadepo iñō Eedotadēē goda ingadāīmpa. 42 Iñinque Itota dote wadepo iñōnte Wængongui beyæ ante ææmæ cōwē nāni cædō bai Ootee nāni wencabo do gote cædānitapa. 43 Ææmæ tōmāā iinque cædinque oncōnē poncæte ante taadonque pōninque mæmpoda adāmaī iñōnate Itota guiquēnē Eedotadēē iñōmō ayæ quēwengantapa. 44 Godongāmæ mōnō poncabo tōnō pongā imaingampa, ante pōnēna inte taadō tōmāā itædē pōninque tōmēna guidēnāni weca tōmēna æmigoidi weca diqui diqui mincæ cæyōna, 45 edæ dæ angā. Ate wædinque tōmēngā ingante diqui mincæte ante Eedotadēē adodō occē ēmænte gogadāīmpa.

46 Mēōnaa go adōñæque iñōnte diqui diqui minte ate edæ Wængongui oncō ñæñæ oncōnē yabæcōnē pō guite ayōnate Itota iñōmō nē odōmōnāni weca ēñē cōninque, Æbānō i, Æbānō cæquīi, ante angā adatapa.

47 Tōmēngā apænecā ēñēninque tōmānāni, Æ tōmēngā iñōmō ocāi nē encacā waa ēñængā amōniya, ānānitapa. Ayæ, Itota ingante, Æbānō i, ante ānāni ēñēninque tōmēngā wæætē nō apænecampa, ante wædinque

tömānāni guifente wædānitapa. ⁴⁸ Mæmpoda iñōmō māniñōmō pō guite ayōna Itota mānōmaī cæcā adinque guifente wædatapa. Tömengā badā tömengā ingante,

–Botō Wēmi ēñēmi. Mōnatō imōnate quinante mānōmaī cæbii. Iñæmpa bitō wæmpo tōnō mōnatō bitō imite ante ancaā diqui diqui minte wæwentamōnapa.

⁴⁹ Āñongante tömengā wæætē,

–Mīnatō iñæmpa, Mæmpocā oncōnē Itota ongonguēnengā ingampa, ante ēñēnāmaī imīnatawo. Quinante wayōmō diqui diqui mīmīnatowo.

⁵⁰ Āñongante, Ēbānō ante angāā, ante ædæmō ēñēnāmaī inatapa.

⁵¹ Tömengā wæætē mæmpoda mīñæ gote Nāatadeta pōninque tömēna nāna ānō ante cōwē ēñente cæcantapa. Wāānā guiquēnē tömengā nānō cædinō ante nāmā pōnēē congā ingacāimpa. ⁵² Itota iñōmō edæ nanguī ēñengā bate pædongāimpa. Picængā bayongante Wængonguī tōnō waodāni adobaī tömengā ingante cōwē godōmenque godōmenque waadete adōñānīmpa.

3

Wāō æpænē nē guidongā òñōmæca quēwente apæñecā

(*Māateo 3.1-12; Māadoco 1.1-8; Wāō 1.19-28*)

¹ Tībedio quīte wadepo tömāmæ awēnē nānō inōñedē Pontio Pidato wodi nāni ānongā adoyedē Oodeabæ awēnē iñongante Edode wæætē Gadideabæ awēnē inongāimpa. Adoyedē iñōmō Edode wodi nānō tōniñacā Pedipe Itodeabæ Todacōñitebæ awēnē iñongā Ditāniato wodi adoyedē Abidēniabæ awēnē inongāimpa. ² Mānimpodāni māniñōmæ awēñēidi iñōñāni Ānato wodi tōnō Caiapato wodi adoyedē, Wængonguī quī, ante nē godōna ñæñæna pōni inōna inōnāimpa. Tömēna nāna inōñedē adoyedē edæ Tacadiya wodi wengā Wāō ingante òñōmæca iñōmō ayæ quēwēñongante Wængonguī apænegacāimpa.

³ Wāō wodi iñōmō Oododānonga òmaaque go tömāo cægōninque iūmaī apæñecā ēñēñānitapa. Mīnitō, Idæwaa wēnæ wēnæ cæte awædō, ante ocæ ēmænte Wængonguī gāmæñō pōedāni. Ayæ, Wēnæ wēnæ botō cædinō ante Wængonguī piñāmaī inte pōnō ata cæpocā quēwēmopa, ante edonque acæimpa, ante odōmōninque æpænē guiledāni, ante Wāō angacāimpa.

⁴ Mānōmaī cædinque Wængonguī beyæ nē apænegangā Itaiya wodi iūmaī ante nānō yewæmonte apænegainō baī Wāō adobaī cægacāimpa.

“Adocanque òñōmæca ongōninque iūmaī ante yedæ tedecā ēñencædānīmpa.

‘Awēnē nānō ponguīnō ante tee monte baī cædinque,

taadō tōinō pinonte baī cæedāni.

⁵ Onquiyabo incæ ānanquidi incæ, Mæmō pōni bacæimpa, ante ææ wocæimpa.

Biyōnæ iñōmō tee mōninque mæmō pōni badongæimpa.

Taadō idiquibæ iñonte tōinō piñongæimpa.

Wēnæ wēnæ iñonte wainō pōni taadō badongæimpa.

⁶ Taadō mānōmaī mæmō pōni ba iñinque tömāmæ quēwēñāni incæ, Wængonguī pōnō ængā beyænque mōnō quēwēnguīnō impa, ante edonque acædānīmpa, ancæcāimpa.”

⁷ Ante yewæmonte ongompa cæminii, ante Wāō wodi æpænē guicæte ante pōñāni nanguī ināni iñōñānite iūmaī angantapa. “Mīnitō iñōmō tæntæ pæiñini baī inte nē babæ cæminii iñinque edæ ēñēnguēnē quēwēmīni. Wængonguī nānō piinte panguimāmo ante edæ, Wæñompadāni, ante æcānō āna ēñēninque mīnitō wodi wīnonte pōmīni. ⁸ Wængonguī Awēnē gāmæñō mīnitō ocæ ēmænte poncæ cæminitawo. Nō nō pōmīni iñinque edæ nē ocæ ēmænte pōñāni wainca incate baī waa cædāni baī mīnitō iñōmō edæ adobaī waa cæedāni. Mīnitō nāmāneque pōñēninque, ‘Mōnitō mæmæ Abadāō wodi pæimōni imōni beyænque Wængonguī mōnitō imōnite waa acæcāimpa,’ ante nāmā wææ ancæ cæminitawo. Iñæmpa Wængonguī angā baī Abadāō wodi pæimīni mīni inō baī dicacoo incæ dobæ adobaī bacædōñiī apa ānewēmīni. ⁹ Awæ iñōmō wainca incadāmaī i iñinque edæ do yete gongapamō iya tangæimpa. Awæ yecæte ante awænca eyewa nææñāni baī Wængonguī nānō panguimāmo iñōmō edæ oo pōni pō apa quēwēmīni,” ante Wāō apænegacāimpa. ¹⁰ Angā wædinque godongāmæ ongōñāni pancadāniya wæætē,

Mānōmaī i iñinque æbānō cæquēñēmōni imōnii. ¹¹ Āñōñānite Wāō,

–Weocoo mencooga nē mangā iñōmō weocoo òmaacā ingante adocooque godongā æncæcāimpa. Cænguī nē ēcā adobaī cænguī òmæpocā ingante godongā æncæcāimpa, angantapa. ¹² Ayæ odōmāno awēnē nānō āninta nē æñāni guiquēnē adobaī æpænē guicæte ante pōninque Wāō ingante āñānitapa.

–Nē odōmōmi ēñēmi. Mōnitō iñōmō æbānō cæquēñēmōni imōnii. ¹³ Āñōñānite tömengā wæætē,

–Mīnitō awēnē, Mānimpota, ante nānō ānimpota ante wadāni inānite āmini pædæ pōñōñāni eyepæ æninque mīnitō wæætē, Tōmēmōni quī, ante godōmenque āñāmaī iedāni, angantapa. ¹⁴ Ayæ tontadoidi adobaī tömengā ingante,

—Mönitō guiquēnē æbānō cæquēnēmōni
īmōnii.

Åññōnānīte Wāō wodi iūmaī angantapa.

—Mīnitō wacā tōmengā nānō godonte
æīnta ō æncæte ante pæmēnēnāmaī iedāni.
Ayæ wacā wēnæ wēnæ cædāmaī iñongante
mīnitō, Wēnæ wēnæ cæbitapa, ante babæ
wapiticæ ānāmaī iedāni. Ayæ mīnitō
cædi beyæ mīnitō awēnē eyepæ pōnongā
æninque piyænē cæte godōmenque æīnente
wædāmaī iedāni, angantapa.

¹⁵ Åññongante godongāmæ ongōnāni iñōmō,
Wængonguī doyedē, Codito ponguingā,
ante nānō nē angaingā iñōmō edæ
iingā Wāō wabānō iṃaingampa, ante
ōñōwēnenque pōnēnāni inte edæ, Wāō
æbānō cæquingā, ante acæte ante a
ongōnānitapa. ¹⁶ Wāō wæætē tōmānāni
īnānīte apænedinque, “Botō guiquēnē
nāwangā mīnitō iṃnīte æpænē guidōmo
guiimīnīpa. Iīncayæ ate nē Ponguingā
guiquēnē tōmengā iñōmō nāwangā ñæñængā
pōnī iñongante botō guiquēnē guiyāmo iñōmo
inte tōmengā awēncata incæ ædō cæte ñī
cæquimoo. Tōmengā iñōmō mīnitonga gonga
bæcote bai cædinque Wængonguī Tæiyæ
Wæmō Ōñōwoca ingante edæ da pōnongā
æncæmīnīpa. ¹⁷ Waocā, Todigo tōmēmō
wati wati tæñōninque botō tæñōnīñōmō
ōñōmancaque baquinque botō waiña
tōmāmō oncōnē da wencæboīmpa, ante
tīmpodæ næænte wo ææntodō wo ææntodō
cædinque ontapocoo wææincoo wadæ
ñēmænte wo ēwengampa. Waocā māñōmaī
wo ēwencæte ante tīmpodæ næængā bai
mōñō nē Ponguingā iñōmō adobai oo pōnī
apænte ancæcāīmpa. Edæ wæmō īnāni
īnānīte apænte æninque tōmengā ontapocoo
bai īnāni īnānīte gonga cōwē bæcōyōmō iya
tangā gonte wæcædānīpa.”

¹⁸ Māñōmaīnō āninque Wāō wodi
godōmenque wade wade apænedinque
tōmēnāni īnānīte, Åmo ēñēmaīmīnīpa,
angacāīmpa. Ayæ, Codito ingantedō ante
watapæ apæñecā ēñengadānīpa. ¹⁹ Incæte
tōmengā pancabaa Awēnē Edode ingante,
Bitō tōñīñacā nāñōgængā Ædodiya ingante
mōmīi, ante pīñinque Edode nānō wīwa
cædinō ante tōmānō ante pīngā adinque,
²⁰ Edode wodi guiquēnē godōmenque
wīwa cædinque Wāō ingante tee mōñecā
wægacāīmpa.

Itota cæptēnē guicampa

(Māateo 3.13-17; Māadoco 1.9-11)

²¹ Māñī Wāō tōmānāni īnānīte æpænē
nānō guidōñedē Itota ingante adobai
guidongā guicantapa. Guīite ate
Wængonguī ingante apæneyongā ōñæ wī
ænete bai bayonte edæ ²² Wængonguī Tæiyæ
Wæmō Ōñōwoca equemō wææ contate bai

tōmengāa edonque pōnī wææ guicā ate
ōñædē apænedinque,

—Bitō botō Wēmi botō nē waadebi iṃipa.
Bitō iṃite waa adinque waa tobopa, ante
ōñædē apæñecā ēñengacāīmpa.

Itota nānō mæmæidi

(Māateo 1.1-17)

²³ Todēinta wadepo nānō ēñagāñedē
iñque bayonte Itota māñīñedē tāno cæcā in-
gacāīmpa. Tōmengā ingante nē pæpogadongā
iñōmō Ootee iñongante wadāni, Itota
wæmpocā ingampa, ante pōñēñōnānīpa.

Ootee wodi mæmpo wææ Edii wodi in-
gacāīmpa.

²⁴ Edii wodi mæmpo wææ Māatato,
Māatato wodi mæmpo wææ Debii,
Debii wodi mæmpo wææ Mēedequi,
Mēedequi wodi mæmpo wææ Cāna,
Cāna wodi mæmpo wææ docā Ootee wodi
ingacāīmpa.

²⁵ Māñī docā Ootee wodi mæmpo wææ
Māatatia,

Māatatia wodi mæmpo wææ Åmoto,
Åmoto wodi mæmpo wææ Nāacō,
Nāacō wodi mæmpo wææ Etedi,
Etedi wodi mæmpo wææ Nāgañ ingacāīmpa.

²⁶ Nāgañ wodi mæmpo wææ Māato,
Māato wodi mæmpo wææ docā Māatatia,
docā Māatatia wodi mæmpo wææ Tēmei,
Tēmei wodi mæmpo wææ Ooteco,
Ooteco wodi mæmpo wææ Oodaa in-
gacāīmpa.

²⁷ Oodaa wodi mæmpo wææ Owāna,
Owāna wodi mæmpo wææ Deta,
Deta wodi mæmpo wææ Dodobabedo,
Dodobabedo wodi mæmpo wææ Tadatiedo,
Tadatiedo wodi mæmpo wææ Nēedi in-
gacāīmpa.

²⁸ Nēedi wodi mæmpo wææ docā Mēedequi,
docā Mēedequi wodi mæmpo wææ Adi,
Adi wodi mæmpo wææ Cotāō,
Cotāō wodi mæmpo wææ Edēmadāō,
Edēmadāō wodi mæmpo wææ Ede in-
gacāīmpa.

²⁹ Ede wodi mæmpo wææ Ootowee,
Ootowee wodi mæmpo wææ Ediyedede,
Ediyedede wodi mæmpo wææ Oodīi,
Oodīi wodi mæmpo wææ docā Māatato in-
gacāīmpa.

³⁰ Māñī docā Māatato wodi mæmpo wææ
docā Debii,
māñī docā Debii wodi mæmpo wææ
Tīmeñō,

Tīmeñō wodi mæmpo wææ docā Oodaa,
docā Oodaa wodi mæmpo wææ wacā docā
Ootee,
māñī docā Ootee wodi mæmpo wææ
Ōñāō,
Ōñāō wodi mæmpo wææ Ediyaquimō in-
gacāīmpa.

31 Ediyaquimö wodi mæmpo wææ Mēedeā,
Mēedeā wodi mæmpo wææ Mēna,
Mēna wodi mæmpo wææ Māatata,
Māatata wodi mæmpo wææ Nāatāni in-
gacāimpa.

32 Nāatāni wodi mæmpo wææ Awēnē Dabii,
Awēnē Dabii wodi mæmpo wææ Yæte,
Yæte wodi mæmpo wææ Obedo,
Obedo wodi mæmpo wææ Boodo,
Boodo wodi mæmpo wææ Tāna,
Tāna wodi mæmpo wææ Nāatōō ingacāimpa.

33 Nāatōō wodi mæmpo wææ Āmīnadabo,
Āmīnadabo wodi mæmpo wææ Adāmīi,
Adāmīi wodi mæmpo wææ Adōni,
Adōni wodi mæmpo wææ Etedōō,
Etedōō wodi mæmpo wææ Pade,
Pade wodi mæmpo wææ wacā docā Oodaa
ingacāimpa.

34 Mānīi docā Oodaa wodi mæmpo wææ
Acobo,
Acobo wodi mæmpo wææ Itæca,
Itæca wodi mæmpo wææ Abadāō,
Abadāō wodi mæmpo wææ Tade,
Tade wodi mæmpo wææ Nāacodo in-
gacāimpa.

35 Nāacodo wodi mæmpo wææ Tedogo,
Tedogo wodi mæmpo wææ Dagao,
Dagao wodi mæmpo wææ Pedego,
Pedego wodi mæmpo wææ Eebedo,
Eebedo wodi mæmpo wææ wacā docā Tāna
ingacāimpa.

36 Mānīi Tāna wodi mæmpo wææ Cāināō,
Cāināō wodi mæmpo wææ Adapacadæ,
Adapacadæ wodi mæmpo wææ Temō,
Temō wodi mæmpo wææ Docā Nōwee,
Docā Nōwee wodi mæmpo wææ Nāmecco in-
gacāimpa.

37 Nāmecco wodi mæmpo wææ Māatotadēō,
Māatotadēō wodi mæmpo wææ Ēnoco,
Ēnoco wodi mæmpo wææ Aadedo,
Aadedo wodi mæmpo wææ Māadadede,
Māadadede wodi mæmpo wææ wacā docā
Cāināō ingacāimpa.

38 Docā Cāināō wodi mæmpo wææ Ēnoto,
Ēnoto wodi mæmpo wææ Teto,
Teto wodi mæmpo wææ Adāō,
Adāō wodi ingante nē badongaingā iñōmō
edæ monō Mæmpo Wængonguī inongā
ingacāimpa. Mānināni iñōmō edæ
Itota mæmæidi ingadānimpa.

4

*Itota wēnæ wēnæ cæcæcāimpa, ante wēnæ
cæcampa*

(Māateo 4.1-11; Māadoco 1.12-13)

1 Mānīi Oododānonga quēwēninque
Wængonguī Tæiyæ Waēmō Ōnōwoca ingante
ædæmō ēwocacā inongā inte Itota iñōmō
wadæ gocantapa. Goyongante Wængonguī
Ōnōwoca tōmengā ingante ōnōmæca ænte

māocā gogacāimpa. ² Godinque coadenta
ēōnæ mānimpoōnæ quēwēñongante wēnæ
awēnē pōninque, Wēnæ wēnæ cæe, ante an-
caa cædongāimpa. Itota iñōmō mānimpoōnæ
cænāmai iningā inte edæ iinque bayonte
gæwænte wæcantapa. ³ Adinque wēnæ
awēnē tōmengā ingante,

—Bitō nāwangā Wængonguī Wēmi iñōmi
inte dica incæ pāō āmi ba cæmāimipa.

⁴ Āñongante,

—“Cæntedō quēwengū i. Iñæmpa
Wængonguī nānō apænedō ante tōmānō
ante ēñente quēwengæimpa,” ante
yewæmonte ongō apa, āninque Itota edæ
Baa angacāimpa.

⁵ Ayæ Itota ingante onquiyaboga ænte
mæicā æite ongōñongante wēnæ awēnē
wæætē inguipoga awēnē odeyeidi ōmæ
tōmāo ongōñōmæ adoyōmō a ongonte bai
adotedæ odōmongā acantapa. ⁶ Odōmongā
ayongante Itota ingante āninque wēnæ
awēnē wæætē,

—Awēñeidi waincōnē pōni ongōninque
waēmnoncooga mongæninque tæi
piñæninque tōmēnāni nempo quēwēnāni
inānite nangūi ānāni ēñente do cædānipa,
ante abii. Tōmēnāni waēmō pōni nāni
ēmōmāmo ante æcānō ēmonguingāā, ante,
Tæi piñænte nāni ēnempodō ante æcānō
empoquingāā, ante, botō iñōmō edæ do
ænte ēnempogaimo inte tōmēmoque nē āmo
inte godōmo ænānipa. Īninque bitō imite,
Bado, godōmo æe, āmopa. ⁷ Īninque bitō
mānincoo æncæte ante botō weca ædæ
wææninque, Tatānabi bitō Wængonguī bai
iñōmi impa, āmi adinque botō wæætē,
Bado, bitō tōmāmæ Awēnē babipa, ante
edæ pōnōmo æmāimipa, ante wēnæ awēnē
ānewengantapa.

⁸ Angā ēñēninque Itota,

—Īimai ante yewæmongatimpa. “Awēnē
Wængonguī weca ædæ wæænte tōmengā
ingante apænedinque, Bitō adobique
Wængonguīmi imidō anguēnē, ante wat-
apæ apæncæcæbiimpa. Ayæ, Wængonguī
beyænque cæcæbiimpa,” ante wææ
yewæmonte ongō apa quēwēē, ante Itota
angacāimpa.

⁹ Wēnæ awēnē ayæ Itota ingante Eedo-
tadēē ænte māocā goyongante Wængonguī
oncō ñænæ oncōmāa ænte mæicā æicantapa.
Æite næ gongæñongante wēnæ awēnē
wæætē, Bitō nāwangā Wængonguī Wēmi
imipa, ante acædānimpa, ante bitō to
wæibāwe. ¹⁰ Āninque wēnæ awēnē
godōmenque apænedinque, “Īimai ante do
yewæmonte ongompa,

Bitō imite wææ aacædānimpa, ante cædinque
Wængonguī tōmengā anquedoidi inānite da
pōnongā

¹¹ pōninque bitō imite iñæ æmpodāni Īninque,

bitō dicaa tee tēwadāmaī incæbiimpa,”
ante yewæmongatimpa cæbii.

¹² Āñongā Itota wæætē,

—Īñæmpa ĩmaī ante ingatimpa. “Bitō,
Mōnō Awēnē Wængonguī æbānō cæquingāā,
ante acæte ante cædāmaī incæbiimpa.
Ēñēnāmaī cæbo incæte edæ mōnō Awēnē
Wængonguī botō ĩmote cōwē wææ aaquingā,
ante acæte ante wēnæ wēnæ cædāmaī
incæbiimpa,” ante wææ yewæmonte ongō
apa ānewēē, Itota angacāimpa.

¹³ Ante Itota angā ate wēnæ awēnē incæ,
Itota wēnæ wēnæ cæcæcāimpa, ante nānō
ānewēnō ĩnque cædinque ĩncayæ ate nānō
ponte cæquinque edæ wadæ gogacāimpa.

Gadideabæ godinke Itota tāno cæcampa
(Māateo 4.12-17; Mādoco 1.14-15)

¹⁴ Itota ĩñōmō Wængonguī Ōñowoca nānō
tæī piñænō ēwocadinque Gadideabæ adodō
pongacāimpa. Do pongāimpa, ante adinque
wadāni wayōmō gode ā gode ā cædāni
ēñengadānimpa. ¹⁵ Tōmengā ĩñōmō māñiōmæ
wayōmō wayōmō godinque tōmēnāni nāni
odōmōincōnē go guite go guite cædinque
odōmonte apæncēcā adinque tōmānāni, Waa
pōñi odōmonte apæncēcampa, ante tede-
gadānimpa.

Nātatadeta ĩñōmō ponte Itota apæncēcampa
(Māateo 13.53-58; Mādoco 6.1-6)

¹⁶ Wæætē Nātatadeta tōmengā nānō
pægāñiōmō pōninque tōmēnāni guēmanguiōnæ
ñonte Itota nānō cōwē cæi bai ñowo
cæcantapa. Oodeoidi Wængonguī
apæncēcā nāni ēñente yewæmongainta
ate odōmōincōnē go guidinque tōmengā
māninta ate apæncēcæte ante ængæ ganticā.
¹⁷ Adinque tōmengā ingante Itaiya wodi
Wængonguī beyæ nānō yewæmongainta
pædæ pōñōnāni ængantapa. Æninque,
Māñiñōmō yewæmonte ĩ, ante ñi cæpote
adinque, ĩmaī yewæmonte ongompa, ante
apæncēcanta.

¹⁸ “Wængonguī Awēnē Ōñowoca botonga
pō guicā ate botō tōmengā ingante
ēwocabopa.

Īninque tōmengā botonga gao cæte
bai cædinque tōmengā nānō tæī
piñæmāmo da pōñinque botō ĩmote
angantapa.

Bitō ōmaadāni wæwēnāni ĩnānite Wængonguī
Awēnē waa pōñō cæcæcāimpa, ante
watapæ apænebi ēñencædānimpa, an-
gacāimpa.

Nē tee mōnete bai wædāni ĩnānite bitō,
Wængonguī pōñō wi ænecā beyænque
mīnitō abæ tawænte gocæminimpa,
ante godō apænebi ēñencædānimpa.

Nē babetamōnāni ĩnānite, Mīnitō wæætē
waa acæminimpa, ante bitō godō
cæcæbiimpa.

Piinte cædāni ate wæwente quēwēñōnānite
bitō wæætē gā pe æmpobi abæ
tawænte bai gocædānimpa.

¹⁹ Ayæ, Wængonguī Awēnē nānō waadete
cæquīnepo do batimpa, ante apænebi
ēñencædānimpa, ante Wængonguī botō ĩmote
do da pōñongā pōmo ĩmopa.”

²⁰ Ante Itaiya wodi nānō yewæmongainta
adinque adodō nā nā capodinke
māñiñōmō nē cæcā ingante pædæ
godōinke Itota tæ contacantapa. Māñōmaī
cæcā adinque tōmēnāni nāni odōmōincōnē
nē ongōnāni tōmānāni tōmengā ingante cōwā
adānitapa. ²¹ Ayōñānite,

—Wængonguī botō ĩmotedō ante apæncēcā
ēñēninque nāni yewæmongainō bai
ñowoōnæ ēñēñōmīni edæ do ĩnque ba
amīnīpa.

²² Ante apæncēcā ēñēninque tōmānāni,
Tōmengā nanguī waadete pōñō tedecampa,
ante apænedinke tōmengā ingante waa
adinque guīñente wædānitapa.

—Īngā ĩñæmpa Oote wengā ĩmaingā
inte hamōnengæ māñōmaī cæcampa, ante
awædō, ante nāni caboque tededānitapa.

²³ Māñōmaī ante wæyōñānite Itota
tōmēnāni nāni pōñēnō ante ōñowēnenque
ēñēninque,

—Botō ĩmote apænedinke mīnitō, “Bitō
dotodo bai ĩnōmi inte nāmā incæ cæte
waa babæwe,” ante dodāni nāni angainō bai
ante tedomīni awædō. Ayæ, “Capēnaōmō
ĩñōmō bitō waa cæbi adinque tededāni
ēñēmōnīpa. Māñiñōmō bitō cædinō bai
tōmēmi ēñagāñōmō adobai wīi cæbii,” ante
wæmīni abopa.

²⁴ Āninque Itota godōinke apænedinke,

—Nāwangā āmopa. Wængonguī beyæ nē
apæncēcā ĩñōmō tōmengā quēwēñiñōmō
ponte apæneyongante, Wīi ēñēñē wædō,
ante Baa āñanīpa. ²⁵ Nāwangā edæ āmo
ēñēdāni. Docā Ediya wodi quēwengāñedē
mēa go adoque wadepo ayæ tæcæ wadepo
ñonte tōmēnāni ōmæ tōmāo nāni gæwæwente
wægāimāmo baquinque cōōnæ cædāmaī
ingatimpa. Māñiñedē Idægobæ ĩñōmō
owæmpōñāni nanguī ĩnāni quēwēñōnānite,
²⁶ tōmēnāni weca Ediya ingante da
godōñāmaī inte Wængonguī wæætē edæ,
Bitō Tidōō eyequeī gote Tadedpata ĩñōmō
quēwengā owæmpoingā weca goe, angā
gogacāimpa. ²⁷ Adobai Wængonguī beyæ nē
apænegaingā Editeo wodi quēwengāñedē
Idægobæ æmontai nē baadāni nanguī
ĩnāni ĩñōnānite Wængonguī tōmēnāni ĩnānite
wadæ caadāmaī inte wæætē edæ Tidīabæ
quēwengā Nāāmāō ingante wadæ caacā
wantai baagacāimpa.

²⁸ Ante Itota apæncēcā ēñēninque
māñincōnē ongōnāni tōmānāni piinte āñāni
badānitapa. ²⁹ Āñāni badinke tōmengā

ingante tōmēnāni nāni quēwēñōmō yabæ inō wido cædānitapa. Ayæ tōmēnāni nāni mænonte quēwenquidi tōmāne ænte mǎo godinque tōmēnāni, Bæ tamō guidōmēmæ tæ wææncæcāimpa. ³⁰ Ante cæyōnāni, Itota iñōmō tæcæguedē godinque aamō cæte wadæ gogacāimpa.

Itota angā ēñente wēnæ incæ tao gopa
(Māadoco 1.21-28)

³¹ Wadæ godinque Gadideabæ Capēnaōmō nāni quēwēñōmō pōninque Itota tōmēnāni nāni guēmanguñōnæ bay-
onte tōmēnāni inānite odōmonte apæneccā ēñēnānitapa. ³² Ēñēñōnāni tōmengā nāmā tæi piñæninque nē angā inongā inte nō odōmonte apæneccā ēñente wædinque tōmēnāni, Æ tōmengā iñōmō nō pōni odōmonte apæneccā ēñēmōnīpa, ante wædānitapa.

³³ Māniñedē edæ onguñlængā wēnæ wentamō ēwocacā tōnō nē quēwengā iñōmō tōmēnāni odōmōincōnē a ongōninque iñontobæ yedæ ante aa pecantapa.

³⁴ —Quimæ quēwē. Bitō Itota Nāatadeta quēwēñimi inte quinnante mōnatō weca pōmii. Mōnatō imōnate edæ æmæwo wido cæcæte ante wabānō pōmitawo. Bitō æmōmidō imii, ante botō do atabapo. Bitō Wængongui Tæiyæ Waēmō Wēmi inōmi imīpa, ante edæ do ēñēmopa.

³⁵ Ante tedeyongante Itota wææ āninque, —Apocæñē quēwenguēñē tedewē. Waocā baōnē quēwēñōmi inte edæ tao gobāwe.

Angā ēñēninque wēnæ guiquēñē tōmānāni ayōnāni waocā ingante mǎo tæ gotodō go wææñongante tōmengā baonga wēnæ wēnæ cædāmai inte tao gotapa. ³⁶ Itota angā wēnæ tao gocā adinque tōmānāni guññente wædinque nāmāneque tededinque,

—Tōmengā æbānō cæte nē angā ingā. Īñæmpa nē angā inongā inte tōmengā tæi piñæninque wēnæidi nē wentamō ēwocadāni inānite angā tao godāni awædō.

³⁷ Ante pōnente wædinque tōmēnāni, Itota mānōmai cæcampa, ante tededinque māniōmæ tōmāo gode ā gode ā cædāni ēñengadānimpa.

Pegodo nānōogæ wānā ingante Itota cæcā gancæ bacā

(Māateo 8.14-15; Māadoco 1.29-31)

³⁸ Māni tōmēnāni odōmōincōnē ongonte apænedinque Itota tao godinque Timōnō oncōnē go guicantapa. Go guiyongante wadāni, Timōnō nānōogængā wānā iñōmō nangu daicawo gawænte nangæ bacampa cæbii, ānāni. ³⁹ Ēñēninque Itota tōmengā weca go gongæninque daicawo inte piinte bai āninque, Idæwaa imīpa, angā dæ batapa. Īninque tōmengā gancæ badinque ængæ gan-
tidinque tōmēnāni beyæ cæcantapa.

Nantate wæwēnāni inānite Itota cæcā waa badānīpa

(Māateo 8.16-17; Māadoco 1.32-34)

⁴⁰ Nænque gāwadedæ bayonte nantate wæwēnāni inānite Itota weca ænte pōnāni adinque tōmengā wacā ingante wacā ingante godō gampocā ate tōmēnāni waa badānitapa. ⁴¹ Ayæ waodāni nanguñ ināni baōnē wēnæidi quēwēñōnānite Itota angā ēñēninque tao godinque,

—Bitō Wængongui Wēmi inōmi imīpa, ante Yæ ānānitapa.

Īninque Itota, Botō Codito inōmo imopa, ante do ēñēnānīpa, ante wædinque wēnæidi inānite, Apocæñē imæwedāni, ante edæ wææ angacāimpa.

Itota oodeoidi odōmōincōnē go guite apæneccā

(Māadoco 1.35-39)

⁴² Ayæ baānæ ate Itota wayōmō onōmæca gocantapa. Gocā adinque wadāni tōmengā ingante ante diqui diqui minte tōmengā weca do pōninque, Mōnitō imōnate emō cæte godāmai incæbiimpa, ante wææ cæcæte ante cædānitapa. ⁴³ Ate wædinque tōmengā wææ āninque,

—Botō, Wængongui Awēñē Odeye nempo watapæ quēwenguñō anguēñē, ante cōwē apænequēñēmo imopa. Wængongui, Mānōmañnō ante apæneccæbiimpa, ante botō imote da wēpōngā pōnimo inte botō tōmānāni quēwēñōmō gote apænequēñēmo inte gobōpa.

⁴⁴ Ante Oodeabæ godinque tōmēnāni odōmōincōnē go guii go guii cædinque Itota apæneccā ēñengadānimpa.

5

Gæyæ nanguñ pōni dadōwēnānīpa

(Māateo 4.18-22; Māadoco 1.16-20)

¹ Ayæ Itota Guñetadetepeæ wedeca gote ongōninque Wængongui nānō apænedō ante apæneccantapa. Ēñencæte ante cædinque nanguñ ināni godongāmæ pō goto ongonte ēñēē congadānimpa. ² Apæneccā ēñēñōnāni tōmengā gomō ayongā gæyæ nē dadōwēnāni dicamōñæ yamoncæte ante ti wææninque tōmēnāni nāni ti wææ godimpo mēa wipo gāwapæ wedeca omædempo wāi wocæ acantapa. ³ Adinque Itota adoque wipodē Timōnō wipodē guiddinque tōmengā ingante, Tæcæpæno gāmæñō eyequei wo go wāi wocæe, angā gā go wāi wocængā Īninque Itota tæ contate tōmēnāni inānite odōmonte apæneccā ēñēnānitapa. ⁴ Tōmēnāni inānite ĩnque apænedinque Timōnō ingante,

—Bitō wipo tæcæpæno godōmenque ænte gobi ate mīnitō dicamōñæ wo guitodonte gæyæ dadonte æncæmīnimpa.

⁵ Āñongā Timōnō,

—Awënë eñëmi. Tömää woyowotæ gæyæ dadoncæte ante dicamõñæ ancaa guitodõñõmöni wii datapa. Incæte bitõ ämi beyænque botõ Ao ante cæcæboimpa.

⁶ Ante mao guitodõñõnani gæyæ nangui põni da ate dicamõñæ wodo wægo tengatimpa. ⁷ Ìniquè Timõñõidi wa wipodë ongõnani ponte godongämæ æncæðanimpa, ante õmõ cæðani adinque wa wipo ænte põnani ate gæyæ mæa wipodë eyede põni ñõnõnani ate wipo emä guicæ cætimpä. ⁸ Ìniquè, Itota angä beyænque gæyæ nangui põni æmõnipa, ante adinque Timõñõ Pegodo iñõmõ Itota õnõwa gäänë ædæ wææninque,

—Awënë eñëmi. Botõ wænæ wænæ entawëmo iñõmote bitõ waemõ põni entawëmi inte nänënë goe, angacäimpa.

⁹ Ante guifente wæyongante nè dadõwënani wadani adobaï, Æbänõ cæte nangui põni gæyæ dadonte æmõñõ, ante wæðinque ancaï guifëninque Timõñõ tönõ godongämæ wæðanitapa. ¹⁰ Ayæ Timõñõ tönõ godongämæ gæyæ nè dadõwëna Tebedeo wodi wëna Tantiago tönõ Wäõ adobaï guifente wægadäimpa. Ìniquè Itota iñõmõ Timõñõ ingante,

—Guifënamäi incæbiimpa. Gæyæidi gæte bitõ æmäi bitõ ìncayæ ate waodani inänite gæte bai cæðinque apænebi eñëninque ponte quëwëncæðanimpa.

¹¹ Angä eñëninque wipo emõnaiya ænte mämõ ñä cæcadodinque tõmënani mäincoo tõmancoo edæ emõ cæðinque edæ Itota miñæ wadæ gogadäimpa.

Në cõmångä ingante Itota wadæ caa-campa

(Mäateo 8.1-4; Mäadoco 1.40-45)

¹² ìncayæ ate Itota wadani nani quëwëñõmõ gote quëwëñõngante wacä cõwë baate eñawënongå inte tõmengä weca ponte guidõmëmæ ædæ wææninque angantapa,

—Awënë, bitõ Ao ämi inte wadæ caabi ìniquè botõ waintai baabäimopa.

¹³ Äñongä Itota pædæ wææmpo gampo caadinque,

—Ao ämopa. Bitõ waintai baacæbiimpa.

Ante tæcæ äñongä ñõmæintai nänõ eñadintai edæ dæ baadinque tõmengä waintai do baacantapa. ¹⁴ Ìniquè Itota tõmengä ingante,

—Eñëmi. Bitõ waintai baadimi inte wadani inänite mao apænedämäi ie. Wæætë, Nawangä impa, ante acæðanimpa, ante cæðinque bitõ, Wængongui quï, ante nè godongä weca tõngä godinque waintai bitõ baadintai odõmõmi ædæmõ acæcäimpa. Ayæ Mõitee wodi wææ ante nänõ angaincoo bai ænte põninque bitõ waintai bitõ baadi beyæ ante edæ, Wængongui quï,

äñinque nè godongä ingante pædæ godõmi æncæcäimpa, ante wææ angantapa.

¹⁵ Wææ angä incæte, Itota mänõmäi cæcampa, ante nangui gode ä gode ä cæðani eñëninque nangui inäni Itota apæneçä eñëncæte ante ayæ tõmënani nani caate wæðõ waa bacæte ante goto põ goto põ cægåðanimpa. ¹⁶ Itota iñõmõ wantæ wantæ iñõ õnõmæca nänënë godinque Wængongui ingante wæætë wæætë apænegacäimpa.

Në cõmångä ingante Itota angä dao dao gocampa

(Mäateo 9.1-8; Mäadoco 2.1-12)

¹⁷ Ayæ adobaï iimõ iñõ iimõ iñõ Itota cõwë odõmote apænegacäimpa. Mäniñedë oodeoidi nani wææ angainõ ante nangui adinque nè eñënani iñõmõ nè odõmõnani inõnanimpa. Wadani adobaï, Mõñõ wææ angainõ ante eñente cæcæimpa, ante nangui äñani guiquënë Paditeoidi nani äñani inõnanimpa. Ìniquè Itota mäniñedë odõmote apæneyongä mäninani nè odõmõnani tönõ Paditeoidi iñõmõ Gadide-abæ nani quëwëñõmõ ta pöninque ayæ Eedotadëe iñõmõ ta põninque Itota weca põninque tæ contate a ongõnänitapa. Mäniñedë wadani wa wa badinque wænæ wænæ inte wæðani iñõnänite Itota iñõmõ Awënë Wængongui nänõ tæi piñæñõ entawëninque nangui cæcä waa badõnanimpa. ¹⁸ Ìniquè wadani nè cõmångä nänõ möimpataa æmætæ æmætæ bæi ongonte nææninque, Itota weca ænte mangui ñõ cæcæimpa, ante põnänitapa. ¹⁹ Ponte ayõnani wadani eyede põni goto ongõnani adinque nè ænte mämõ põninani iñõmõ, Ædõ cæte guiqui. Ante wæðinque oncõmäa inõ æidämæ mäi æidinque dai bæte mæñõniñõmõ epæ cæðani ompite gongæñõ tõmënani cõmångä möimpataa bæi ongõninque tõmengä ingante godongämæ ongõnani weca tæcæguedë Itota weca pædæ wææñõnani ongongantapa. ²⁰ Mänõmäi cæðani adinque Itota, Nawangä wede põnente cæðänipa, ante adinque,

—Emigo, wænæ wænæ bitõ cæðimämo ante ñõwo ñimpo cætimpä.

²¹ Äñongä Paditeoidi tönõ nè wææ odõmõnani nämäneque põnente tededinque, “Wænæ wænæ cæðingä ingante æcänõ ñimpo cæquingä. Ìngä iñõmõ Wængongui ingampa diyæ mänõmäi cæquingä. Edæ babæ ancæðõ.”

²² Ante põneñõnani Itota tõmënani nani põnewëñõ ante do eñëninque,

—Minitõ mímõno quimæ wænæ wænæ põnewëminii. ²³ “Në cõmångä nänõ wænæ wænæ cæðimämo ante godõ ñimpo cæbopa,” ante botõ Wængongui bai ämo eñëninque minitõ guiquënë, Wængongui ingampa diyæ mänõmäi cæquingä, ante põnewëminia. Ayæ

wæætē, “Ængæ gantidincque möimpata ænte dao gocæcäimpa,” ante botö Wængongui bai ämo ëñëninque munitö adobai, Wængongui ingampa diyæ mänömaï cæqingäa, ante pönëmini imaiminipa, ante awædö. Ìñæmpa mänömainö ante pönëmini ìnincque munitö edæ æbänö cæquëñemo äminii. ²⁴ Incæte botö Waobo ëñagaimo inte inguipoga quëwëninque waodäni näni wënæ wënæ cædimämo ante në ämo inte pönö ñimpo cæbopa, ante munitö edæ ëñencæminimpa, ante botö iïmai cæbopa.

Äninque në cömäingä ingante edæ,
–Bitö ìmite ämo ëñëe. Ængæ gantidincque bitö möimpata topo cæte æninque tömëmi oncönë nææante goe.

²⁵ Ängä ëñëninque cömäingä ìningä incæ edæ tömänäni ayönäni ængæ gantidincque, Wængongui ñäö bai ëmönongä inte pönö tæi piñænte cæcä æmopa, ante apænedincque tömengä nänö ðñöninta topo cæte tao oncönë ænte gocantapa. ²⁶ Gocä ate wædinque tömänäni, Äbänö cæcäi, ante ëñënämaï inte guïñente wædinque, Wængongui bitö ñäö bai ëmönä inte waa pönä cæbi amönipa, ante watapæ apænegadänimpa. Ayæ,

–Nöwo ìñömö mä pönä cæcä amönipa, ante ancai guïñente wædänitapa.

Debii ingante Itota ängä tee empote go-campa

(Mäateo 9.9-13; Mäadoco 2.13-17)

²⁷ Ayæ ate Itota tao gote ayongä odömäno awënë nänö äninta ante në ængä Debii ingante acantapa. Tömengä ìñömö Awënë nänö æimpa gäänë tæ contate ongonä adincque Itota tömengä ingante,

–Botö miñæ pöe.

²⁸ Ängä ëñëninque do ængæ gantidincque Debii mänincoo tömancoo ëmö cæte Itota miñæ wadæ gogacäimpa.

²⁹ Ayæ ate Debii, Itota beyæ, ante tömengä oncönë ææmæ nanguï pönä cæcantapa. Ìnincque ææmæ becæte ante awënë beyæ në æwënäni nanguï inäni pö tæ contate cæññönäni wadäni adobai pö tæ contate cænäni. ³⁰ Adincque Paditeoidi tönö tömënanäni në odömönäni guiquënë Itota miñæ në godäni inänite piinte äninque,

–Odömäno awënë beyæ në æwënäni tönö wadäni në wënæ wënæ cædäni tönö munitö quimæ godongämæ ponte tæ contate bete cæminii.

³¹ Ante piññönäni Itota wæætë tömënanäni inänite,

–Në waa ingä guiquënë, Cæbi waa baboe, änämaï ìñongante në wënæ wënæ ingä guiquënë dotodo ingante, Cæbi waa baboe, ante do aa pecampa. ³² Pancadäniya, Nämä incæ në nö entawëmo imopa, ante në änäni ìñönänite botö ìñömö edæ në dotodo bai adobai inömo inte tömënanäni inänite aa

pedämaï incæboimpa. Wadäni guiquënë, Nämä wënæ wënæ cæbo imopa, ante në änäni ìñönänite botö, Tömënanäni, Idæwaa wënæ wënæ cæte awædö, ante Wængongui gämæñö poncædänimpa, ante cædinque tömënanäni inänite aa pecæ pongaboimpa, ante Itota apænegacäimpa.

Ee ate cænämaï ingæimpa, ante në änäni (Mäateo 9.14-17; Mäadoco 2.18-22)

³³ Itota ingante iïmai ante ayæ änanitapa. Wäö miñæ në godäni ìñömö, Wængongui beyæ, ante ee ate cænämaï inänipa. Ayæ Paditeoidi miñæ në godäni adobai ee ate cædänipa. Bitö miñæ në godäni guiquënë do cæte bete quëwënanipa töö.

³⁴ Änäni ëñëninque Itota wæætë,

–Onguïñængä në mungingä wente ænte pönäni ìñönänite munitö wæætë, Ee ate cænämaï ìedäni, ante edæ ædö cæte wææ anguiminni. Monguingä nänö wente ænte në pönäni bai ìñönäni inte botö miñæ në godäni ìñömö ædö cæte wæwente bai cænämaï inguïñänii. ³⁵ Wæætë ayæ ate guiquënë, Monguingä, näni në äñongä bai ìñömote wadäni ponte botö ìmote ö ænte gocædänimpa. Mänömaï cædäni ate botö miñæ në godäni ìñömö mäniñedë ate wæætë cænämaï inte wæcædänimpa, ante Itota apænegacäimpa. ³⁶ Ayæ, Wængongui Awënë nempo quëwëninque æbänö cæquïl, ante ëñencædänimpa, ante Itota imæca quëwënanäni näni cæñnö ante odömönte iïmai ante apæñecantapa.

–Müncoo badonte ate waocä dicæ adocoo wänä ñænte pancacooga æninque pedæncocoo pönö tadömonguingäa. Mänömaï cæcä ìnincque edæ müncoo incæ do wänä tente baquënë. Ayæ pedæncocoo ëmönö bai müncoo wii adobai ëmopa. Munitö, Awente bai cænämaï inte mönö quëwengæimpa, ante mini änewëñö guiquënë pedæncocoo bai inte wote baquine ënepa. Wængongui gämæñö pönincque quëwëncæminimpa, ante botö apænedö guiquënë müncoo bai inte quëwëguine ënepa. Ìnincque wote baquine tönö quëwëguine tönö ædö cæte mënea ante ëñente cæquïl. ³⁷ Ayæ adobai yowepæ biñömæ mümæ æninque waocä ædö cæte picæ æmontaicadedë godö pe ñiñænguingäa. Ìñæmpa picæ æmontaicadedë pe ñiñængä ìnincque edæ tæi æbæ æmæwo goquënë. ³⁸ Mümæ wæætë müncadedë pe ñiñængæimpa. Adobai botö odömönö mümæ bai ìñonte dodäni näni odömöwëñö ædö cæte botö odömönö tönö adoyedë ëñente cæquïl. ³⁹ Incæte, “Gönænimæ ìñömö waëmepæ imæmpa,” ante në bedömini inte munitö mümæ ædö cæte quingæ bequiminni, ante Itota angacäimpa.

6

Guëmanguiõnæ iñonte tõmëmõ tã pete ænãnipa

(*Mãateo 12.1-8; Mãadoco 2.23-28*)

¹ Ayæ ate guëmanguiõnæ iñonte Itota tõmëmoncodê tæcæguedencodê gocantapa. Goyongã tõmengã miñæ nè godãni iñõmõ tõmëmõ inca tã pete æninque dacæ dacæ cædinque ade cæ ade cæ godãni. ² Adinque Paditeoidi guiquênê,

—Iñæmpa, Guëmanguiõnæ iñonte máninõ bai cædãmai iedãni, ante dodãni nãni wææ angainõ ante minitõ ãñenãmai inte quimæ cæminii.

³ Ante piññõnãnite Itota,

—Docã Dabii wodi tõmengã nãnõ emiñæñãni tõnõ õmæpodãni inte gæwænte wædinque æbãnõ cægadãni, ante yewæmonte õñõ inca minitõ iñæmpa adãmai inte bai ãmini awædõ. ⁴ Wængongui qui, ante nè godõnãnique cængui impa, ante wææ nãni angainõ bai cædinque dodãni pãõ, Wængongui qui, ante ñoncæ ñoncæ cædõnãnipa. Incæte Dabii wodi Wængongui oncõnê go guiddinque mánii pãõ do ænte cæninque tõmengã miñæ nè godãni inãnite godõmenque godongã cæñãnitapa, ante yewæmonte õñõ apa ãnewëmíni.

⁵ Ante apænedinque Itota tõmënãni inãnite ayæ apænecantapa.

—Botõ iñõmõ Waobo nè ãñagãimo iñõmõ Tæiyæ Awênê inõmo inte edæ guëmanguiõnæ Awênê inõmo ìmpa. Ìniquæ botõ, Guëmanguiõnæ iñonte edæ æbãnõ cæquii, ante adobo nè Åmo ingaimo ìmpa, ante Itota apænegacãimpa.

Ni cõmampoingå

(*Mãateo 12.9-14; Mãadoco 3.1-6*)

⁶ Incayæ ate guëmanguiõnæ adobai waõnæ iñonte Itota oodeoidi odõmõincõnê go guite odõmonte apæneyongã onguinængã õnõmpo tõmëmæ inõ nĩ cõmampote wædongã inte mániiñõmõ a ongongantapa. ⁷ Mániiñedê nè odõmõnãni tõnõ Paditeoidi guiquênê, Itota wapiticæ cæcã ìniquæ mõnõ wæætê piinte angæïmpa, ante nè ãnewënãni inõnãnipa. Nõwo iñõmõ tõmënãni, Nõwoõnæ guëmanguiõnæ ì incæte Itota nĩ cõmampoingå ingante, Waa bacæcãimpa, ante cæcã ìniquæ mõnõ mãõ piinte angæïmpa, ante babæ cæcæte ante cõwã adãnitapa. ⁸ Máninõ, Mõnõ plingæïmpa, ante nãni põnëwënõ ante Itota iñõmõ õnõwënenque edæ do ãñëninque edæ nĩ cõmampoingå ingante,

—Bitõ ængæ gantidinque tæcæguedê põ næ gongæe.

Angã ãñëninque ængæ gantidinque põ næ gongæangantapa. ⁹ Ìniquæ Itota nè piinte ancædãni inãnite,

—Åmo apænemíni ãñëmoedãni. Guëmanguiõnæ iñonte mõnõ æbãnõ cæquênëmõ ìmõõ, ante wææ angatii, ante põnëmíni. Mõnõ waa cæquênëmõ ìmpa, ante põnëmínitawo. Wæætê edæ, Mõnõ wënæ wënæ cæquênëmõ ìmpa, ante põnëmínitawo. Guëmanguiõnæ iñonte edæ, Quëwencædãnipa, ante cæquênëmõ ìmpa, ante põnëmínitawo. Wæætê mõnõ edæ õmææ ãwenguênëmõ ìmpa, ante põnëmínitawo. ¹⁰ Æninque æmæætæ gomõ æmæætæ gomõ edæ tõmãnãni inãnite adinque nĩ cõmampoingå ingante,

—Pædæ pompobi.

Angã ãñente cædinque nè cõmampoingå inca pædæ æmpote edæ ædæmõ waa empocã bapocantapa. ¹¹ Ìniquæ tõmënãni, Guëmanguiõnæ inca mánõmai cæcampa, ante ængui badinque, Itota ingante mõnõ æbãnõ cæquii, ante piiniquæ nãni cabo nãmãneque tedegadãnipa.

Itota angã ate dote ganca inãni nè gode ãnãni badãnipa

(*Mãateo 10.1-4; Mãadoco 3.13-19*)

¹² Mániiñedê Wængongui ingante apænecæte ante Itota ãnanquidi æidinque tõmãã woyowotæ apænee congantapa. ¹³ Nãõ ba adinque tõmengã miñæ nè põninãni inãnite aa pecã põnãni ate tõmengã, Botõ beyæ nè gode ãmini incæminimpa, ante dote ganca inãni mánimpodãni inãnite apænte ængacãimpa. ¹⁴ Tõmengã nãnõ nè da godõnãni baquínãni iñõmõ edæ ìimã ãmõnõnãnipa. Tãnocã Timõnõ ãmongã ingã incæte Itota wawo Pegodo pemongacãimpa. Ìngã Pegodo tõnõ Æntade nãna caya, Tantiago tõnõ Wãõ nãna caya, Pedipe tõnõ Batodõmëê, ¹⁵ Mãateo tõnõ Tõmato, Adepeo wengã Tantiago inõnãnipa. Ayæ, Mõnõ õmæ ingæïmpa, ante nangui cædongã inte wacã Timõnõ ìnongãimpa. ¹⁶ Tantiago wengã Codaa tõnõ Itota ingante odõmonte nè godonguingã ingaingã inte wacã Codaa Icadote nãni ãnongã inatapa. Mánimpodãni inãnite Itota apænte ængacãimpa.

Tæiyæñãni inãnite Itota gampocã waa badãnipa

(*Mãateo 4.23-25*)

¹⁷ Mánimpodãni tõnõ Itota mæmõ iñõmõ wææninque næ gongænte ongongantapa. Mániiñõmõ tõmengã miñæ nè godãni nangui inãni do ponte a ongõnõnãnipa. Ayæ tõmënãni tõnõ wadãni Eedotadëê iñõmõ quëwënãni tõnõ Oodeabæ tõmãõ quëwënãni ayæ Tido eyequei Tidõõ eyequei gawapæ wedeca quëwënãni nangui inãni do ponte a ongõnõnãnipa. Tõmënãni, Itota apænecã ãñengæïmpa, ante ayæ, Wënæ wënæ inte wæwëmõ inte mõnõ waa edæ bacæïmpa, ante põninque a ongõnãnitapa. ¹⁸ Ayæ

wēnædi nē wentamō ēwocadāni tōnō quēwente wæwēnāni mānīfōmō ponte ongōnāni inānite Itota adoyōmō wææ pōninque godō cæcā waa badānitapa. ¹⁹ Ayæ, Itota tæi pīñænte entawengā inte pōnō cæcā ate waa badānīpa, ante adinque tōmānāni tōmengā ingante gampocæte ante cædānitapa.

Mīni toquinque, ante ayæ, Mīni wæquinque, ante
(Māateo 5.1-12)

²⁰ Ayæ Itota tōmengā mīñæ nē godāni inānite gomō adinque apænecā ēñēnānitapa. “Mīnitō, Botō waēmō imopa diyæ Awēnē Odeye nempo guiquimoo, ante nē wæwēmīni īñōmō watapæ mīni toquinque Wængonguī Awēnē Odeye nempo mīni quēwenguīnō edæ do ēamīnīpa,” angantapa.

²¹ “Inguipogaque gæwænte wæmīni inte edæ mīni watapæ toquinque Wængonguī pōnongā tōmo pōni cæncæmīnīpa,” angantapa.

“Mīnitō inguipogaque wæwente quēwēmīni inte edæ mīni watapæ toquinque Wængonguī pōnō waadete cæcæcāimpa,” angantapa.

²² “Botō Waobo ēñagāimo mīñæ gomīni beyænque wadāni mīnitō imīnite badete todinque pīnte adinque wido cædānitawo. Botō beyænque mīnitō ēmōwo ante, Wīwa ēmōwo awædō, ante Baa ānānitawo. Edæ mīni waa toquinque inguipogaque mānōmāi cædānīpa. ²³ Ōōnædē mōnō ænguīnō ante nanguī ongōmpa, ante pōnēninque mīnitō nōwodāni nāni pīnte cæyēdē incæ watapæ toedāni. Īñāni nē pīnte cædāni wæmæidi incæ Wængonguī beyæ nē apæneganāni inānite edæ adobaī pīnte cægadānīpa, ante toquēnē wæwēmīni. ²⁴ Wæætē edæ māincoo nanguī nē ēamīni guiquēnē īncayæ ate mīni wæquinque edæ inguipogaque watapæ quēwēmīnīpa,” ante Itota apænecantapa.

²⁵ “Nē tōmo cæmīni guiquēnē īncayæ ate mīni gæwænte wæquinque edæ inguipogaque tōmo cæmīnīpa,” ante apænecantapa.

“Nē Ca ca tomīni adobaī īncayæ ate Ca ca mīni wæquinque edæ inguipogaque tomīnīpa,” angantapa.

²⁶ “Mīnitō imīnite ante tōmānāni waa apænēdāni īnīnque edæ mīni wæquinque ingæimpa. Īñæmpa īñāni nē waa apænēdāni adodāni mæmæidi adobaī cægadānīpa. Wadāni babæ wapiticæ apænēdāni incæ, Wængonguī beyæ nē apænēbo imopa, ante nē ānewēnāni inānite īñāni mæmæidi īñōmō adobaī waa apænēgadānīpa,” ante Itota apænēgadāimpa.

Nē pīnte cædāni inānite waadete cæcæimpa, ante
(Māateo 5.38-48, 7.12)

²⁷ Ayæ godōmenque apænēdinque Itota, “Mīnitō nē ēñēmīni īñōmīnite āmo ēñēdāni. Mīnitō imīnite nē pīnte cædāni inānite mīnitō wæætē waadete cædāni. Mīnitō imīnite nē pīnte adāni inānite mīnitō wæætē waa cædāni. ²⁸ Wēnæ wēnæ bacæmīnīmpa, ante nē ānāni inānite mīnitō wæætē waa apænēte godō cædāni. Mīnitō imīnite nē wēnæ wēnæ cædāni inānite mīnitō wæætē tōmēnāni beyæ ante Wængonguī ingante apænēdāni. ²⁹ Wacā bitō imite imæmpaga inō tamongā wædīmi inte bitō wæætē æmæmpaga inō dadi ēmæmonte ee ongōmi tamongæ. Ayæ yogui beyæ bitō yabæcoo ō ængā adinque ōnōnancapæncōo tōnō ee abi ō ængæ. ³⁰ Māincoo ante nē angā ingante tōmengā nānō ānoncoo edæ ee godōmi ængæ. Ayæ bitō māincoo nē ō ængā ingante, Wæætē adodō pōnōmi æmoe, ānāmaī incæbiimpa. ³¹ Mīnitō, Wadāni botō imote waa cæcædānīmpa, ante wæmīnitawo. Edæ mānīnō ante mīni wædō baī adobaī wædānīpa, ante pōnēninque mīnitō wæætē wadāni tōmānāni inānite waa cædāni,” ante Itota angacāimpa.

³² Ayæ apænēdinque, “Mīnitō imīnite nē waadedānīque inānite waadete pōnēmīni inte wadāni inānite waadedāmaī imīni adinque edæ Wængonguī dicæ mīnitō imīnite waadete pōnō aquingāa. Īñæmpa nē ēñēnāmaī cædāni incæ nē waadete pōnēnānīque inānite waadete pōnēninque mīnitō cæganca do cædānīpa tōō. ³³ Ayæ adobaī mīnitō imīnite waa cædānīque inānite waa cæmīni inte wadāni inānite waa cædāmaī imīni adinque Wængonguī mīnitō imīnite dicæ waa aquingāa. Īñæmpa mīnitō cædō baī nē ēñēnāmaī cædāni incæ adobaī do cædāni apa cæmīnī. ³⁴ Ayæ, Adodō pōnongā æncæboimpa, ante pōnēwēninque mīnitō nē adodō pōnonguīgā ingante godōmīni inte wadāni inānite godōnāmaī imīni adinque Wængonguī mīnitō imīnite dicæ waa aquingāa. Īñæmpa nē ēñēnāmaī ināni nāni cabo incæ, Adodō pōnongā æncæboimpa, ante pōnēwēninque nē adodō pōnonguiganque ingante godōninque mīnitō cædō baī adobaī cædānīpa tōō.”

³⁵ “Wæætē mīnitō imīnite nē pīñāni inānite waadete pōnēninque waa cædāni. Ayæ tōmēnāni nāni ānō ante, Adodō pōnōmi æmoe, ante ānāmaī inte ee godōmīni æncædānīpa. Mānōmaī waadete cæmīni īnīnque mīnitō īncayæ ate mīni waadete cægāinō beyæ nanguī æmāimīnīpa. Ayæ mōnō Mæmpo Æibæ pōni nē Quēwengā īñongante tōmengā ingante nē waa ate pōnēnāmaī ināni inānite tōmengā godō

waadete cæcampa. Nē wiwa cædāni inānite tōmengā godō waadete cæcampa. Ininque mīnitō tōmengā nānō cæi bai adobaī waadete cæmīni Ininque Mæmpocā waadete nānō entawēnō bai mīnitō adobaī entawēninque tōmengā wēmīni imāimīnīpa.³⁶ Mōnō Mæmpo pōnō waadete nānō waa cægāi bai mīnitō adobaī wadāni inānite godō waadete waa cædāni,” ante Itota angacāimpa.

Wadāni inānite apænte ānāmaī iedāni, ante (Māateo 7.1-5)

³⁷ Ayæ wæætē Itota iīmaī ante apæncantapa. “Wacā ingante apænte ānāmaī imīni Ininque mōnō Mæmpo wæætē mīnitō imīnite apænte ānāmaī incæcāimpa. Ayæ, Wacā nānō tente wæquinque wēnæ wēnæ cæcampa, ante ānāmaī imīni ate mōnō Mæmpo wæætē, Mīni tente wæquinque wēnæ wēnæ cæmīnīpa, ante apænte ānāmaī incæcāimpa. Wacā wēnæ wēnæ cæcā ingante mīnitō fīmpo cæmīni ee gocā ate mōnō Mæmpo adobaī mīnitō imīnite fīmpo cæcā quēwēncæmīnīpa.³⁸ Wadāni inānite ee godōedāni. Mīnitō ee godōmīni ænāni Ininque wadāni wæætē mīnitō imīnite ee pōnōnāni æncæmīnīpa. Nē pōnōnāni iñōmō tōmēnāni nāni tee māincadedē da wēninque da wæænonte wançæ wançæ cædinque eyepote wæænguinque eyede pōni da wēninque mīnitō ænguincadedē pōnō wāne cædāni edæ æncæmīnīpa. Edæ mīnitō tee mante mīni godōincade incæ adocadeca tee mante bai cædinque Wængonguī mīnitō imīnite eyepæ pōnōngā æncæmīnīpa,” ante Itota apænegacāimpa.

³⁹ Ayæ, Wængonguī Awēnē nempo quēwēninque æbānō cæquīl, ante ēñencædānīpa, ante Itota imæca quēwēnāni nāni cæinō ante odōmōninque iīmaī apæncantapa. “Babetamongā ingante wacā babetamongā incæ ædō cæte māo odōmongā goquingā. Inæmpa mānōmaī cædinque nāna babetamoncaya ompite adopiticaē guæa go wææ guilbaīnapa.⁴⁰ Nē odōmonte apæncā iñōmō nē ēñengā inte odōmōñongante tōmengā nānō nē ēmīñengā guiquēnē dicæ godōmenque ēñengā ingā. Incæte inque odōmonte apæncā ēñēninque tōmengā nānō nē ēmīñengā abæ tawæninque wæætē nē odōmongā bai bacæcāimpa,” ante Itota apænegacāimpa.

⁴¹ Ayæ apænedinque, “Bitō tōniñacā wædænque wēnæ wēnæ cæcā iñongante bitō guiquēnē nangūi bitō wēnæ wēnæ cædinō ante wædāmaī inōmi inte tōmengā ingante quīnante piinte ānewēmī. Inæmpa tōmēmi awinca gāānē awæmpa wææ ongompā, ante adāmaī inte bai cæbīpa tōō.⁴² Tōmēmi awinca gāānē awæmpa wææ ongompā,

ante bitō adāmaī inte bitō tōniñacā ingante, ‘Biwi, bitō awinca guiyā mæ owo bai ate æ wimōmoe,’ ante edæ abīpa ænguīmī. Inæmpa bitō nē wadō tedete wadō cædōmi inte edæ tōmēmi awinca gāānē wææ ongompā tāno wido cæte ate edonque adinque bitō tōniñacā awinca guiyā owodō æncæbīmpa,” ante Itota angacāimpa.

Awæ æbānō iwæ, ante tōmenca bete ēñengæimpa, ante

(Māateo 7.17-20, 12.33-35)

⁴³ Ayæ godōmenque apænedinque Itota, “Waincawæ incæ ædō cæte baaca incaquīl. Wæætē wiwa iwæ incæ ædō cæte wainca incaquīl.⁴⁴ Awæ æbānō iwæ, ante ēñencæte ante mōnō tōmenca tā Pete bete ēñengæimpa. Igowæñeca æncæte ante waodāni dicæ daa mongæwāa edæ tā Pete ænāniyaa. Yowemō æncæte ante waodāni dicæ daacamēña tā Pete ænāniyaa.⁴⁵ Mōnō waocabo iñōmō adobaī inōmō inte cæmompā. Mīmōnē mōnō pōnēmāmo eyede tate bai tao godedinque mōnō mānimāmoque ante pōnēninque tedemompā. Waocā nē waa cæcā guiquēnē waa pōni tōmengā nānō pōnēnō ante entawēninque waa tedecampa. Nē wiwa cæcā guiquēnē tōmengā nānō wiwa pōnēnō ante entawēninque wiwa tedecampa,” ante Itota apænegacāimpa.

Nē mænōna ante

(Māateo 7.24-27)

⁴⁶ Ayæ godōmenque apænedinque, “Mīnitō iñōmō botō imote, ‘Awēnē, mōnitō Awēnē imīpa,’ ante tedemīni incæte botō ānō ante quīnante wīl ēñente cæmīnī.⁴⁷ Nōwo iñōmō edæ apænebo ēñēedāni. Botō gāmānō ponte ēñēninque waocā botō ānō ante do ēñente cæcā iñōmō tōmengā iīmaī ingampa.⁴⁸ Waocā adocanque oncō mænnoncæte ante guibæ ææ wodinque dicaboga mænnoncæte ante gōnongā bai nē ēñente cæcā iñōmō adobaī cæcā ingampa. Tōmengā oncō tæi mænnoncæte ongō Ininque æpæ āninque quingæ pō incæte oncō ædō cæte wançæ wançæ cæquīl. Inæmpa tæi mænnoncæte ongompā.⁴⁹ Wæætē waocā guibæ ææ wote gōnōnāmaī yabæque oncō mænongā ate yabæque mænōiñōmō æpæ āninque pō ate oncō dobæ bogo cæte tæ wææninque æmæwo gopa. Botō apænebo ēñēninque waocā nē ēñēnāmaī cæcā iñōmō tōmengā nē yabæque mænongā bai inte ocai incadāmaī inte bai ēñēnāmaī cæcampa,” ante Itota inque apænegacāimpa.

7

Capitāo ingante nē cæcā ingante Itota cæcā waa bacampa (Māateo 8.5-13)

1 Ayæ tömënäni inänite iinque apænedinque Itota Capënaömö nani quëwëñömö gogacäimpa. 2 Mäniñömö quëwëñinque odömäno tontadoidi awënë capitäo ingante nê cæcä iñömö wënæ wënæ badinque æmæwo wæncæ cæcä ingantapa. Awënë capitäo ingante nê cæcä iñongante awënë wæætë tömengä ingante nangui waadecantapa. 3 Iinque, Itota waa cæcä ingampa, ante mämö apænedäni ëñëningä inte tontado capitäo iñömö oodeoidi inänite nê aadäni nani Picæncabo inänite apænedinque, Minitö Itota weca godinque tömengä ingante ämini ëñente pöningque tömengä wæætë botö imote nê cæcä ingante cæcä waa bacæcäimpa. 4 Angä ëñente godinque nê aadäni nani Picæncabo guiquënë Itota weca pöningque tömengä ingante nangui äñanitapa.

—Mönö oodeocabo iñömönte mäningä tontado capitäo iñömö mönö imonte waa cæcampa, ante wædinque bitö tömengä beyæ waa cæcæbiimpa. 5 Tömengä iñömö mönö oodeocabo iñömönte waadete cædinque, Wængongui apæncä nani ëñente yewæmongainta ate munitö odömöincö impa, ante do mænonte pönongä æmompæ cæbii.

6 Änani ëñëninque Itota nê aadäni nani Picæncabo tönö wadæ gocantapa. Oncö obo pöñönänite tontado capitäo iñömö tömengä guidëñäni inänite, Go bee téninque botö beyæ Itota ingante iimaï ante apæneedäni, angantapa. “Awënë ee ongöe. Botö waëmö ïmopa diyæ bitö botö oncönë pö guiquimii, ante capitäo bitö imite angampa,” ante apæneedäni, angä ponte apænedänitapa.

7 Ayæ adobai, “Botö wii waëmö inömo inte edæ bitö weca pönämaï intabopa. Incæte bitö adoyömö ongöningque ämi iinque botö imote nê cæcä waa bacæcäimpa.

8 Bitö iñömö Awënë Wængongui ingante nê ëñente cædömi imi bai botö adobai wacä awënë ingante nê ëñente cæbo ïmopa. Iinque botö awënë ëabo inte botö awënë beyænque ämo ëñëninque tontadoidi wæætë guñente wædinque botö äno ante cædänipa. Iinque adocanque ingante botö, Goe, ämo ëñëninque edæ do gocampa. Wacä ingante, Pöe, ämo ëñëninque edæ do pongampa. Ayæ botö imote nê cæcä ingante, Cæe, ämo ëñëninque edæ do cæcampa.” Mänömainö ante Itota ingante botö beyæ ante apænemini ëñengädäni, ante tontado capitäo iñömö tömengä guidëñäni inänite angä godinque tömënäni wæætë capitäo nänö äno bai ante Itota ingante adodö ante apænedänitapa.

9 Mänömainö ante tontado awënë beyæ apænedäni ëñëninque Itota wæætë, Mäningä tontado awënë iñömö waa pöni ëñengampa,

ante wædinque godongämæ ongönäni inänite,

—Nawangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædö, angantapa.

10 Ayæ nê bee tencæ pöñinäni oncönë wadæ gote ayönäni capitäo ingante nê cæcä iñömö do waa bacä agadänimpa.

Æmæwo wæningä ingante Itota angä nani ömæmongampa

11 Itota iñömö iimö ate Näino nani quëwëñömö gocæte ante goyongante tömengä nänö nê ëmiñëñäni tönö wadäni nangui inäni godongämæ gogadänimpa.

12 Mäniñömö yabædemö obo pöñongä onguiñængä æmæwo wæningä ingante næænte pönänitapa. Tömengä badä owæmpoingä inongä inte tömengä wengä adocanque wængä wædinque pongantapa. Ayæ mäniñömö quëwëñäni nangui inäni wäänä tönö godongämæ pönäni acantapa.

13 Wäänä ingante adinque Itota tömengä tönö guëa wæwente bai pönëninque,

—Wædämaï ie.

14 Äninque do wæningä ingante tömënäni nani daga wenguimpa gäänë ponte gam-pocä ate nê nææñinäni næ gongæñänitapa. Itota iñömö,

—Edëñimi, bitö imite ämopa. Ængæ gantie, angantapa.

15 Ëñëninque nê wæningä incæ ængæ gantidique tæcæ tedecä adinque Itota wäänä ingante pædæ godongä ængantapa. 16 Itota mänömaï cæcä adinque tömänäni nangui guñente wædinque Wængongui ingante wat-apæ apænedinque,

—Wængongui beyæ nê apæncä tæi ëmongä inongä inte mönö weca a ongon-gä amompa, äñanitapa.

Ayæ,

—Wængongui quimö iñömönte Wængongui incæ mönö weca ponte godongämæ cæcampa. Nawangä impa, ante nangui todänitapa.

17 Ayæ Oodeabæ tömäo quëwëñäni inänite wayömö gomonga quëwëñäni inänite mäo gode ä gode ä cæte, Itota æbänö cæcäa, ante apænedäni ëñengädänimpa.

Wäo tömengä miñæ nê goda inate da pönongä pönapa

(Mäateo 11.2-19)

18 Wäo miñæ nê godäni adobai, Itota æbänö cæcä ingää, ante ëñëninque Wäo ingante mämö apænedäni ëñengantapa. Mäninö ante apænedäni ëñente wædinque Wäo iñömö tömengä miñæ nê goda mënaa inate äñecä pönatapa. 19 Pöna adinque Wäo tömëna inate, Minatö mönö Awënë weca godinque botö beyæ ante iimaï ante äeda, angantapa. Awënë ëñëmi. Bitö iñömö

dodāni nāni, Nē Ponguingā, angaiṃi adobi imitawo. Wæætē tōmēnāni nāni nē angaiṃi ināmai imi ininque bitō wæætē, Wacā ponguingā, ante wānō cōedāni, āmitawoo. Æbānō mōnitō cæquimōni, ante botō beyæ ante ēñencæte ante æda. Ante Wāō mēnaa inate Itota weca da godongā godatapa. ²⁰ Godinque Itota weca pōninque iīmai ante apænedatapa.

–Wāō æpænē nē guidōngā iñōmō mōnatō imōnate da pōnōninque bitō imite iīmai angampa. Awēnē ēñēmi. Dodāni nāni, Nē Ponguingā, angaiṃi bitō iñōmō adobi imitawo. Wæætē tōmēnāni nāni angaiṃi ināmai imi ininque bitō wæætē, Wacā ponguingā, ante wānō cōedāni, āmitawoo. Æbānō mōnitō cæquimōni, ante ēñencæte ante Wāō mōnatō imōnate da pōnongā pontamōnāpa, ānatapa.

²¹ Māniñedē incæ daicawo gawænāni tōnō wēnæ wēnæ inte wæwēnāni nanguī ināni inānite Itota godō wā cæcā waa badānitapa. Wēnæidi nē wiwa ewocadāni inānite tōmengā wido cæcā ate waodāni nanguī ināni waa badānitapa. Babetamōnāni nanguī ināni inānite tōmengā gampomongā waa bamōnānitapa. ²² Ininque mānōmai cæcā waa ayōnate ñowo pōna inate Itota,

–Botō godō cæbo ate babetamō inināni incæ do adāni amināpa. Cōmante inināni incæ waa bate dao godāni amināpa. Baate inināni incæ ñowo æmontai waēmōntai baadāni amināpa. Babetamonca ināni iñōnānite botō godō cæbo ate onōmonca ēñēnāni badāni amināpa. Do æmæwo wænte oñōnāni iñōnānite botō godō cæbo ate ñāni omæmonte quēwēnāni amināpa. Ōmaadāni inte wæwēnāni inānite botō Wængonguī Awēnē pōnō waa cæcæcāimpa, ante watapæ apænebo ēñencædānimpa. Ininque mīnatō ponte ēñēñōmīna botō æbānō apænebo ēñēmīnatawo, ante ayæ, Botō æbānō cæbo aminatawo, ante mīnatō ñowo wæætē Wāō weca gote māo apænemīna ēñengæda, angantapa.

²³ Ayæ, “Botō beyæ waocā wīi piinte wadæ gocā iñōmō tōmengā nānō watapæ to-quinque oda cædāmai incæcāimpa, ante Wāō ingante māo apænemīna ēñencæcāimpa,” ante Itota angantapa. ²⁴ Angā ēñēninque Wāō beyæ nē āniina wadæ goda adinque Itota wæætē godongāmæ ongōnāni inānite, Wāō æbānō ingāā, ante apænecantapa. “Mīnitō quiquēnē quīnō acæte ante onōmæca gomīnitapa. Cæwīpa woboyæ pæmænte ate æmæñō ædæ æmæñō ædæ gobaingā ingante mīnitō dicæ acæ gomīnitawogaa.

²⁵ Ininque edæ quingānō ingante acæte ante gomīnitapa. Edæ waocā weocoo waēmōncoo mongænongā ingante mīnitō dicæ acæ gomīnitawogaa. Iñæmpa weocoo

waēmōncoo nē mongænāni iñōmō nāmanque ante pōnente nāni ænte māincoo beyæ ante nē towēnāni inte tōmēnāni iñōmō awēnē oncōnē quēwēnāni apa quēwēnāni.

²⁶ Ininque edæ quīnante gomīnitawo. Mīnitō mīni nē go acæ cædongā iñōmō edæ Wængonguī beyæ nē apænecā ingantawo. Nāwangā impa. Wængonguī beyæ nē apænecā Wāō ingampa. Incæte tōmengā wīi Wængonguī beyæ nē apænegaināni bai inongā inte godōmenque nanguī cæcā ingampa, ante apænebo ēñēmaimīnīpa. ²⁷ Wængonguī iīmai angampa, ante yewæmōngatimpa.

‘Botō beyæ nē apænecā ingante da godōmo godinque tōmengā taadō tāno beyænte bai cæcæcāimpa.

Tōmengā bitō Codito imi beyæ ante taadō waa pinonte bai waa cæcæcāimpa.’

Mānōmaiñō ante dodāni adocā Wāō ingant-
edō ante pōnēninque yewæmōngadānimpa.

²⁸ Ñowo iñōmō āmo ēñēdāni. Imæca mīni ēñagaincabo iñōmīnite æpænē mōnō nē guidōngā Wāō adocanque ñænængā iñongante wacā tōmengā bai edæ dæ angampa. Incæte Wængonguī Awēnē Odeye nempo quēwēnāni iñōnāni adocanque guiyangā pōni ingā incæte Wāō pōnōmenque wædangā ingampa,” ante Itota apænecantapa.

²⁹ Itota mānōmaiñō ante apænecā nē ēñēnāni iñōmō odōmāno awēnē beyæ nē æwēnāni incæ wadāni incæ tōmānāni Wāō nānō nē guidongainānique inōnānimpa. Ininque tōmēnāni, Wængonguī nō cæcā ingampa, ante tōmānāni apænedānitapa. ³⁰ Paditeoidi tōnō idægoidi nāni wææ angaiñō ante nē ate ēñēnāni quiquēnē Wāō nānō guidongaināni ināmai inōnānimpa. Ininque tōmēnāni quiquēnē Wængonguī gāmæñō pōnguēnāni incæte edæ Baa ānānitapa.

³¹ Godōmenque apænedinque Itota iīmai angantapa. “Mānōmai i ininque inguipogaque ante nē quēwēnāni iñōmō quingāmē bai inānīpa. Quiēmē bai edæ quēwēnānīpa. ³² Wēñænāni mōnō godonte æiñōmō tæ contate owempodāni nāni owempodō bai edæ adobai cædānīpa, ante awædō. Wēñænāni nāni owempote cæcabo incæ æmæmæ cæte bai owempote cædinque wadāni inānite aa pedānīpa. ‘Mīnitō beyæ oōña we we oōñōmōni mīnitō wæætē edæ āwadāmai imīnitapa tōō,’ ante owempod-
inque wēñænāni piinte tedewēnānīpa. Ayæ wæætē, Waocā do wængā ate nāni wæbai, ante wēñænāni nāni owempote cæcabo iñōmō, ‘Mōnitō Ca ca wæyōmōni mīnitō wæætē edæ wædāmai imīni wæmōnīpa,’ ante pūinque aa pedāni bai ñowodāni iñōmō edæ adobai piinte tedewēnāni inānīpa.”

³³ “Edæ iūmaī impa. Wēñænāni nāni wædō bai Wāō æpænē mōnō nē guidōnongā iñōmō cænguī cæñāmaī yowepæ biñōmæ nāni wæðænque ti nāmæ bedāmaī ponte quēwēñongante mīnitō guiquēnē, Wēnæ tōnō Wāō quēwengampa, ante pīlminīpa. ³⁴ Ayæ wæætē botō Waobo ēñagaīmo inte tōmāā cænguī cænte yowepæ biñōmæ bete mīnitō weca ponte quēwēñōmote mīnitō guiquēnē, Cæowæobi inte cæmīpa. Beowæobi inte bebīpa, ante badete tomīnīpa. Ayæ godōmenque, Odōmāno awēnē beyæ nē æwēnāni tōnō wadāni nē ēñēnāmaī cædāni iñōnānīte bitō tōmēnāni æmigo īpīpææ, ante botō īmote pīlīnque mīnitō wēñænāni nāni pīlīnte aa pedō bai ānewēmīnīpa tōō. ³⁵ Incæte, Nē nō ēñēnāni iñōmō nō cædānīpa, ante adīnque, Nāwangā nō ēñēnānīpa, ante mōnō ēñengæīmpa,” ante Itota apænegacāīmpa.

Paditeocā Timōnō oncōnē Itota go guīite ēñacampa

³⁶ Ayæ ate adocanque Paditeocā incæ Itota īngante, Botō oncōnē pō cæe, angā Ao ante Paditeocā oncōnē godīnque pō guīite cæ congantapa. ³⁷ Tōmēnāni quēwēñōmō onquīyængā nē wēnæ wēnæ cæte quēwengā īnongāīmpa. Tōmengā iñōmō, Paditeocā oncōnē Itota cæncongampa, ante tēdēdāni ēñēnīnque oguī wapæ dica adabatodo waincadedē pe nūñænte næænte pongantapa. ³⁸ Pō guīdīnque tōmengā Itota ōnōwaca īnō pō næ gongænīnque Ca ca wæcantapa. Ca ca wæyongā Itota ōnōwaca īnō ōmæ petæ petæ wææ aa bee adīnque onquīyængā wæætē tōmengā ocaguīcooca wadæ cæwacantapa. Ayæ quē bewadīnque oguī wapæ gao cæwacantapa. ³⁹ Mānōmaī cæcā adīnque, Pō cæe, nē āningā inte Paditeocā iñōmō nāmāneque pōnēnīnque, “Itota iñōmō Wængonguī beyæ nē apæneccā inte bai tōmengā, Æcānō botō īmote gam-pocāā, ante ayæ, Quiēmē bai onquīyængā īngāā, ante ēñencædongāīmpa. Iñæmpa nē wēnæ wēnæ cædongā īngampa, ante do ēñencædongāīmpa.” ⁴⁰ Ante pōnēñongā Itota wæætē,

—Timōnō, bitō īmite adodeque apænebo ēñēe.

Åñongante Paditeo wæætē,

—Ao, nē Odōmōmi īmi, apænebi ēñēmoe.

⁴¹ Angā īnīnque Itota,

—Onguīñængā adocanque nē godōwengā inte quēwēñongante onguīñæna mēnaa īnante godongā ate debe badapa. Adocanque īngante nanguī quīnīento ēmō godongā ate nanguī debe bayongante wacā īngante wæðænque tīncōenta ēmō godongā ate wæðænque debe bacampa. ⁴² Nē godōningā nānō ānīmpota ōmæpoda inte tōmēna, Ædō cæte wæætē

adodō pōnonguīmōnaa, ante wæyōnate nē godōningā iñōmō edæ, Ōmæpōmīna inte mīnatō ædō cæte adodō pōnōmīna ænguīmoo, ante botō ænāmaī inte nīmpo cæcæboīmpa, angampa. Iñīnque Timōnō bitō īmite āmpa. Mēnaa īnate nīmpo cæte ānāmaī īngā adīnque nē godongā īngante æcānō godōmenque nanguī waadete pōnengūngāā, ante pōnēmīi.

⁴³ Åñongante Timōnō,

—Wa. Godōmenque nanguī ēmō debe īngā iñōmō tōmengā wabānō godōmenque waadete pōnengā īmaīngampa, āmpa.

Angā ēñēnīnque Itota,

—Nāwangā ante pōnēmīpa.

⁴⁴ Ånīnque Itota onquīyængā gāmæñō dadi ēmænte adīnque Timōnō īngante apænedīnque,

—Īngā onquīyængā īngante edæ abi. Bitō bitō oncōnē pō guīyōmote bitō, Mēwaquīmæ, ante bitō dicæ pōnōmīyaa. Tōmengā guīquēnē ōmæ wææmonte aa bewadīnque tōmengā ocaguīnca wadæ cæwacā ae. ⁴⁵ Bitō guīquēnē waadedāmaī inte quēē bemōnāmaī iñōmīte tōmengā iñōmō botō pō guīyēdē tāno quēē bewadīnque cōwē quēē bewacā ae. ⁴⁶ Bitō guīquēnē oguīngūpæ gao cæcadāmaī iñōmīte tōmengā iñōmō oguī wapæ gao cæwacā ae. ⁴⁷ Iñīnque botō, Tōmengā mānōmaī cæcampa, ante odōmōnīnque bitō īmite āmo ēñēe. Edæ tōmengā nanguī wēnæ wēnæ cæcā iñongante Wængonguī godō nīmpo cæcā ate tōmengā wæætē nanguī waadete pōnengampa. Bitō iñōmō edæ wæðænque wēnæ wēnæ cæbi iñōmīte Wængonguī pōnō nīmpo cæcā ate bitō wæætē wæðænque waadete pōnēmī abopa.

⁴⁸ Ånīnque onquīyængā īngante apænedīnque Itota,

—Wēnæ wēnæ bitō cædīnō ante pōnō nīmpo cæbo æe.

⁴⁹ Angā ēñēnīnque wadāni godongāmæ cæ cōnāni guīquēnē godō wæntæ wæntæ ānīnque,

—Īngā iñōmō edæ waocā wēnæ wēnæ nānō cædīnō ante, Pōnō nīmpo cæbo æe, ante nē angā iñōmō edæ æcānō īngāā.

⁵⁰ Ante wædīnque tēdēyōnāni Itota iñōmō onquīyængā īngante,

—Bitō wede pōnēnō beyænque quēwencæbiīmpa. Nōwo edæ wæðāmaī inte goe, angacāīmpa.

8

Itota beyæ, ante onquīyæñāni godongāmæ cædānīpa

¹ Ayæ ate Itota nanguī īnāni nāni quēwēñōmō wayōmō wæðænque īnāni nāni quēwēñōmō wayōmō wayōmō godīnque, Awēnē Wængonguī Odeye nempō watapæ

quëwencæmînimpa, ante waa apænecä ëñengadânimpa. Ayæ tömengä tönö dote ganca inâni mänimpodâni godongämæ godânitapa. ² Ayæ onquiyænâni adobaî Itota miñæ godânitapa. Tömênâni pancadâniya wënæidi nê wiwa ëwocadâni tönö nê quëwengainâni iñônânite wadâni nantate wëwengainâni iñônânite Itota cæcä ate tömänâni do waa badinâni inte ñôwo tömengä miñæ tee empote godâni inônânimpa. Adocanque Mäadiya Mäagadadênâ nâni angaingä tömengä baonga wënæidi tiæte ganca inâni tao godâni ininque tömengä ònonganque badingä inte Itotaidi tönö godinque pönö cæcä inongäimpa. ³ Wacä onquiyængä Wäönâ nânogængä Tiota guiquënê Edode nânö ëadincoo nê aacä iñongante Wäönâ iñömö Totânâ tönö ayæ wadâni onquiyænâni nanguî inâni tönö adobaî Itotaidi tönö godongämæ godinque pönö cædônânimpa. Tömênâni nâni ëadincoo incæ ante pöninque Itotaidi beyæ ante pönö cædônânimpa.

Waacä nânö quiyadö ante Itota odömonte apænecampa

(Mäateo 13.1-9; Mäadoco 4.1-9)

⁴ Nanguî inâni wayömö nâni quëwencabo wayömö nâni quëwencabo bacoo inâni godongämæ ponte a ongöñônânite Itota apænecantapa. Wængonguî nânö apænedö ante waodâni æbânö ëñênâni, ante ëñencædânimpa, ante inguipoga quëwênâni nâni cæinö ante iimainö ante apænecantapa. ⁵ “Waacä nê quiyadongä iñömö quiyacæ goampa. Gote quiyayongä pancamonga taadö iñömö wææmompä. Taadö wæænte eyepodimö õñõñonte pinä gäwadâni ædö cæte pæquî. Ayæ ayamöidi pöninque dobæ ade cæñânipa. ⁶ Pancamonga guiquënê dicamontaa iñömö wææninque pæquinâmaî gä æidinque oguïnto guiwapa pæquî. Guiwadâmaî inte edæ guingo icadinque tömencaguî nâñe wæncaguimpa. ⁷ Pancamonga guiquënê õmentacodê nânö eyepodimö iñömö pæquinâmaî tä bocate gä æiyonte õmentacoo adoyömö pö incootonque ganta cæca ate nâñe wæmpä. Wampo incapa pæquî. ⁸ Waëmonguipoga quiyadimö guiquënê tä bocate waa pædinque tömémö tiê ganca mänimpomö nanguî pöni incapa. Quiyacä nânö quiyadö ante edæ botö mäninque ante apænebopa.”

Mänömainö ante apænedinque Itota ogæ tededinque, “Eamonca ongonte edæ ëñëdâni,” angacäimpa.

Õnononque ëñente pönênâmaî inânipa, ante (Mäateo 13.10-17; Mäadoco 4.10-12)

⁹ Tömengä miñæ nê godâni iñömö, Itota ëñëmi, ânânitapa. Mäninö ante apænedinque bitö æbânö ante odömoncæte

ante apænebitawo. ¹⁰ Äñônânite tömengä, “Wængonguî Awënë Odeye nempo æbânö quëwenguiî, ante mîni waocabo wëñëñedê mîni ëñênâmaî ingainö ante botö ñôwo edonque pönö apænebo ate mînitö adomînique ëñëmiñi iimîniya. Wæætê wadâni inânite edæ botö inguipoga quëwênâni nâni cæinonque ante odömoninque apænebopa. Edæ tömênâni, Awincaque adinque wü ædæmö adâni inte õnononcaque ëñëninque ædæmö ëñênâmaî incædânimpa, ante dodâni Wængonguî beyæ ante nâni yewæmongainö baî iinque bacæimpa, ante botö tömênâni inânite mänömainonque ante apænebopa,” ante Itota apænecantapa.

Quiyacä nânö cæinö ante pönente iimainö ante ëñengëimpa

(Mäateo 13.18-23; Mäadoco 4.13-20)

¹¹ Itota ayæ godömenque apænecantapa. “Botö nê quiyacä nânö cæinö ante apænedinque iimainö ante odömoncæte ante apænetabopa. Tömémö quiyadimö iñömö Wængonguî nânö apænedö baî impa. ¹² Taadö wæænte õñömö botö äñömö guiquënê nê ëñênâni baî impa. Tömênâni Wængonguî nânö apænedö ante tæcæ ëñëñônânite wënæ awënë pöninque, Quëwênâmaî incædânimpa, ante cædinque Wængonguî nânö angainö ante õ ængä ininque tömênâni õmætawênâni inte ædö cæte pönente quëwenguiñâni. ¹³ Dicamontaa wæænte pædimö baî inâni guiquënê Wængonguî nânö apænedö ante watapæ ëñente todinque nê Ao ânâni inânipa. Tömênâni iñömö oguïnto guiwadâmaî baî inâni inte wantæ iñö pönênâni ate tömênâni nâni pönönö beyæ ante wadâni piinte cædâni ate tömênâni wæætê guïñente wædinque ëmö cæte godâni. ¹⁴ Õmentacodê wæænte pædimö baî inâni guiquënê tömênâni ëñëninque godömenque quëwëñônâni inguipoga quëwente quïëmê beyænque möñö wæpâmo pö ate guïñente wædinque pædâmaî inânipa. Mäincooque beyæ ayæ õnonque towente nâni wædö beyæ tömênâni õmentacoo incootonque ñâ caate baî cæ ininque edæ wampo encadânipa pæquinâni. ¹⁵ Onguipoga wainguipoga quiyadimö baî inâni guiquënê tömênâni nê pönente waa cæte quëwênâni inânipa. Tömênâni iñömö edæ Wængonguî nânö apænedö ante ëñëninque do bæi ongonte wede pönênâni inânipa. Wæntæye inâmaî inâni inte tömênâni ee cædinque tömëwæ incate baî waa cædânipa. Botö mänömainö tömänö ante odömoncæte ante nê quiyacä nânö cædö ante apænetabopa,” ante Itota apænegacäimpa.

Gongapæncade, ante odömonte apænecampa

(Mäadoco 4.21-25)

¹⁶ Ayæ, “Gongapæncade tū wodōnodinque waodāni dicæ owætadē boo cæcadāniyaa. Mōimoga ænōmengadæ inō dicæ concæcadāniyaa. Wæætē, Māniñōmō nē pō guidiāni acadānimpā, ante cædinque gongapæncade awæmpa æmongapaa concædāni ñāo bæco adānipa. ¹⁷ Quiēmē ante wē wodonte i iñōmō māninō tōmānō ante iincayæ ate edonque ate bai ēñengæimpā. Quinō ñōwo bee ocate bai i incæ māninō tōmānō iincayæ ate wi æncate bai iñonte edonque acæimpā,” ante Itota apænecantapa.

¹⁸ Ayæ, “Nē ēacā ingante godōnāni ængā bai nē ēñengā ingante godō apænebo ēñente entawēninque tōmengā godōmenque ēñente bacæcāimpā. Nē ēadāmai ingā guiquēnē tōmengā, Ēabopa, ante pōnēninque nānō wædænque pōni ēadincōo iñonte ō ænāni wæcā bai nē ēñēnāmai ingā adobai tōmengā, Entawēmopa, ante pōnengā iñinque wædænque pōni nānō entawēnō iñonte edæ ō ænte bai cæbo dæ ba ate wæcæcāimpā cæminii. Ēamonca ongonte ēñenguēnē quēwēmīni,” ante Itota apænegacāimpā.

Itota wāānā tōnō tōmengā biwīdi pōnānipa (Māateo 12.46-50; Māadoco 3.31-35)

¹⁹ Māniñedē tōmengā wāānā tōnō tōmengā biwīdi pōninque tōmengā weca guicæte ante cæyōnāni wadāni goto ongōnāni ate wædinque, Ēdō cæte guiquī. ²⁰ Ante wædāni adinque wacā,

–Itota ēñēmi. Bitō badā tōnō bitō biwīdi bitō imite ante oncodo ponte yabæque ongōnānipa cæbii.

²¹ Ante apænecā ēñēninque Itota,

–Wængongūi nānō ānō ēñēninque nē ēñente cædāni iñōmō tōmēnāni botō badā bai botō tōniñadāni bai iñānipa, angacāimpā.

Itota angā ēñente woboyæ æpæ næ gongæmpa

(Māateo 8.23-27; Māadoco 4.35-41)

²² Māniñedē tōmengā miñæ nē godāni iñānite Itota,

–Gāwapæ æmæmāa taocæimpā.

Angā ēñente cædinque tōmengā tōnō wipodē guidinque tæcæ taocæ wogaa godānitapa.

²³ Tao wogaa goyōnāni Itota wipodē nāñe ñongæninque edæ mō ñongantapa. Mānōmai mō ñōñongā goyōnānite woboyæ nanguī pōni pæmæninque edæ æpæ mængonta mængonta pōninque wipodē baguimæ guii adinque tōmēnāni, Ēpæ bete wængūi wæ, ante Yæ wædānitapa. ²⁴ Itota weca gote, Ōmæmoncæcāimpā, ante tao cædinque,

–Awēnē, mōni Awēnē, ēñenguēnē quēwē. Bete wæncæ cæmōmpa cæbii.

Ānāni ñāni ōmæmonte ængæ gantidinque, Woboyæ æpæ idæwaa mængonta cæbipa.

Næ gongæmāwe, angā. Næ gongæninque ñancæ ñancæ gongæmæmpa. ²⁵ Ayæ tōmēnāni iñānite,

–Mīni pōnēegade incæ quīnante wīi pōnēmīni.

Āñongante tōmēnāni ancai guīñēninque, Ēbānō anguimōō, ante nāmāneque tede-gadānimpā.

–Ingā iñōmō æcānō iñongā inte mānōmai angā ēñēninque woboyæ incæ æpæ incæ næ gongæmpa, ante wæmōnipa, ante tede-gadānimpā.

Guedatabæ iñōmō wēncæ inte nē ēnemopā (Māateo 8.28-34; Māadoco 5.1-20)

²⁶ Māniī Gadideabæ emō cæte godinque Itotaidi æmæmāa wogaa tao godinque Guedatabæ pō ti wæænānitapa. ²⁷ Wipodē manta wo cæyōnāni Itota ti wæænte tæcæ ōmaa goyongante onguīñængā wēnæidi tōnō nē quēwengā iñōmō mānō bee tengantapa. Īngā iñōmō tōmēnāni quēwēñōmō nē quēwengāingā inte ñōwo wantæpiyæ oncōnē quēwēnāmai inte ōmaacā quēwēninque waodānidoque cōwē quēwengā iñongāimpā. ²⁸ Itota ingante adinque tōmengā ōñōwa iñō ædæ wæænīnque edæ Yæ angantapa.

–Itota ēñēmi, bitō Ēibæ Quēwengā Wængongūi Wēmi iñōmi incæ quimæ botō weca pōwēē. Botō imote edæ, Āmogate wæcæcāimpā, ante cædāmai imāwe, ante nanguī angantapa.

²⁹ Edæ tæcæ pōñongante tōmengā wentamō nānō nē ēwocadongā ingante Itota, Gobāwe, ante do angā ēñente wædingā inte ñōwo mānōmai angantapa. Māniī wēnæ iñōmō wantæ wantæ iñonte onguīñængā ingante bæi ongonte bai cædongāimpā. Īninque māningā onguīñængā ingante waodāni daagōmenca edæ ēno pōnō goto wimænte wææ ēno pōnō goto wīwadinque wææ wānōñānimpā. Incæte tōmengā daagōmē wangō ñæ wangō ñæ cædongāimpā. Ayæ tōmengā ingante wēnæ wæætē wæætē da godongā ōñōmæca wodii winonte quēwēnongā inte adocā ñōwo Itota weca ponte angacāimpā. ³⁰ Angā ēñēninque Itota wæætē,

–Ēmōmidō imii.

Āñongante,

–Botō emōwo Deguiōnō emōmopa, angantapa.

Edæ tontadoidi Deguiōnō nāni ānoncabo bacoō iñāni bai botō nē ēnemopāni adobai wēnæidi bacoō iñānipa, ante adinque, Deguiōnō emōmopa, ante onguīñængā angantapa. ³¹ Wēnæidi guiquēnē Itota ingante wæætē wæætē āninque, Mōnitō imōnite tadōmengadænguipoga wido cædāmai imāwe, ancaā ānānitapa.

³² Māniñōmō odæ wængāñāidi nanguī iñāni ānanquidi a cængōnāni adinque,

Īñōmō odæ wængänä baönë ämi go guuite quëwengulmōni, änäni ëñëningue Itota, Ao angä. ³³ Ëñëningue waocä baönë quëwente tao godinque wënæidi odæ wængänä baönë wæætë go guiidäni ate odæncato wæætë ontadäa wæænōmēmō ĩñōmō gāwapæno pogodo wæi guuite becadote capo wængadänimpa.

³⁴ Itota mänōmaĭ cæcä ate wædinque odæ wængänäidi nē aadīnāni guiquënë pogodo wodii winonte tōmēnāni quëwēñōmō māo bee tente apænedinque idōmæ māo gode ä gode ä cæte, Itota mänōmaĭ cæcä wæmōnĭpa, ante apænedänitapa.

³⁵ Ëñëningue wadāni wæætë, Æbānō cæcäi, ante acæte ante pōnānitapa. Itota weca ponte ayōnāni wënæidi tōnō nē quëwëningä incæ ñōwo ònonganque bate weocoo ëñacä inte Itota ònōwa gāänë ëñëë congä adinque guīñente wægadänimpa.

³⁶ Wënæ tōnō quëwëningä ingante Itota mänōmaĭ cæcä ante nē adīnāni ĩñōmō ñōwo pōnāni ĩnānite, Mänōmaĭ cæcantapa, ante do apænedänitapa. ³⁷ Ëñëningue Guedatabæ quëwēnāni tōmānāni ancai guīñente wædinque Itota ingante, Mōnitō weca quëwēnāmaĭ ñōwo gobāwe, änāni ëñente wædinque tōmēngä wipodë ĩmæmäa poncæte ante guicä. ³⁸ Adinque wënæidi tao godāni ate nē ònonganque bate quëwengä ĩñōmō Itota ingante, Bitō miñæ māobi goboe, angä ëñëningue Itota wæætë, Bitō ee quëwēmi, āninque,

³⁹ –Tōmēmi oncōnë adodō godinque, Wængonguĭ æbānō nanguĭ cæcä waa bataboo, ante māo apænebi ëñencädänimpa. Angä ëñëningue oncōnë godinque tōmēnāni nāni quëwēñōmō tōmāo cægōninque tōmēngä, Itota mänōmaĭ cæcä ate waa batabopa, ante māo apæneçä ëñengadänimpa.

Gaido wēñængä beyæ cæcæ goyongante

Itota weocoo onquiyængä gampocampa (Mäateo 9.18-26; Mäadoco 5.21-43)

⁴⁰ Itota ĩmæmäa ocæ ëmænte pongä adinque, Æyedēnō ponguingäa, ante nē wædināni inte tōmānāni tōmēngä ingante waa ate togadänimpa. ⁴¹ Māniñedë wacä oodeoidi odōmōincō awënë ĩnongä inte tōmēngä ëmōwo Gaido ĩñōmō pō Itota ònōwaca ĩnō ædæ wææningue tōmēngä ingante, Botō oncōnë quingæ pōe, ante nanguĭ angantapa. ⁴² Edæ botō wēñængä onquiyængä adocanque ĩnongä inte dote wadepo nānō ëñagaĭ ĩñonte edæ wæncæ cæcampa cæbii, ante wæcantapa.

Īninque Itota tōmēngä miñæ gocantapa. Idōmæ goyongante nanguĭ ĩnāni goto goto pōninque wodo mō ñongæñāni wæcantapa. Wampo ĩmpa goquingäa. ⁴³ Māniñedë

wacä onquiyængä pongantapa. Tōmēngä ĩñōmō wantæpiyæ dote wadepo ĩñonte wepæ wantæ bidāmai cōwë wææ wædinque waa bawēncæte ante cædinque tōmēngä quincōo tōmancoo eyepote pædæ godongä æninque dotodoidi æcāmenque incæ onquiyængä beyæ ædō cæte waa cæquīnāni. ⁴⁴ Mänōmaĭ quëwente wædongä inte tōmēngä ñōwo Itota ònōñabæca ĩnō pōninque tōmēngä weocoo yæwedecooque godō gampo cæyongä wepæ ĩñontobæ edæ wantæ bitapa.

⁴⁵ Itota ĩñōmō edæ,

–Æcānō botō ĩmote pōnō gampodāi.

Åñongante tōmānāni, Æcānō gampo-datawogaa, ante adoyōmō ante änāni ate wædinque Pegodoidi wæætë,

–Awënë ëñëmi. Bitō weca tōmānāni goto goto godāni apa ämi.

⁴⁶ Itota wæætë,

–Īñæmpa adocanque botō ĩmote wede pōñëningue gampocantapa. Tæi piñænte botō entawēnō incæ edæ wacä beyæ cæquingue do gotimpa, ante wæwēnente awædō.

⁴⁷ Åñongante onquiyængä ĩñōmō, Ædō cæte wë womonguimoo, ante pōnente wædinque do do wāate bai guīñëningue Itota weca ædæ wæncate tōmānāni ayōnānite apænedinque, Botō waa bawēncæte ante bitō ĩmte pōnō gampotabopa. Tæcæ pōnō gampo cædinque waa babo ae. ⁴⁸ Ante apæneçä ëñëningue Itota,

–Onquiyæmi ëñëmi. Bitō wede pōnēnō beyæ edæ wantæ bawēnemĭpa. Ñōwo edæ nō bawēñëmi inte wampo pōnente waa goe, ante godō ædæmō apæneçantapa.

⁴⁹ Ante tæcæ apæneyongä oodeoidi odōmōincō awënë Gaido oncōnë quëwengä māniñedë pōninque edæ Gaido ingante apæneçantapa.

–Bitō wengä ĩñōmō ñōwo æmæwo wængampa cæbii. Nē Odōmongä ingante ñōwo bitō godōmenque änāmaĭ incæbiimpa.

⁵⁰ Ante ñōwo pōningä Gaido ingante angä ëñëningue Itota wæætë,

–Gaido, guīñënāmaĭ ie. Bitō wede pōnēmi adinque bitō wengä miingä quëwencæcäimpa.

⁵¹ Äninque Itota godōmenque godinque awënë oncōnë pō guicæ cædinque Pegodo ingante Tantiago tōnō Wāo ĩnate wēñængä wæmpo tōnō wāänä ĩnate mānimpodānique ĩnānite ænte manguicä wāänë guiidänitapa. Wadāni ĩnānite wæætë wææ cæcä guidāmaĭ ĩnānitapa. ⁵² Tōmānāni Ca ca wædinque wēñængä wodi ingante ante pōnente wæwēnāni adinque Itota tōmēnāni ĩnānite,

–Ca ca wædāmaĭ ĩedāni. Īñæmpa ĩñōmō wēñængä wodi edæ wii æmæwo wængantapa. Mō edæ ñongampa.

⁵³ Angä eñente wædinque tømënanî, Æmæwo wænte õfongampa, ante do adinãni inte wæætë edæ, Antedö amüni, ante tømengä ingante badete todänitapa. ⁵⁴ Ìnînque Itota wëñængä ingante pædæ wææmpo bæi ongonte töö æmæninque ogæ tededinque,

–Wëñæmi, ængæ gantibi, angantapa.

⁵⁵ Åñongä tømengä do wæningä inte ñani õmæmonte quëwëninque ængæ ganticantapa. Itota wëñængä beyæ cængui angä godöna cængantapa. ⁵⁶ Adinque mæmpoda, Æbänö cæte mänömai cæcää, ante guiñente wædatapa. Incæte Itota wæætë, Botö æbänö cæboo, ante mînatö wadäni ñänite apænedämai incæmînaimpa, angacäimpa.

9

Wængongui Awënë ingantedö ante apæneedäni, ante Itota angä godänipa
(Måateo 10.5-15; Mäadoco 6.7-13)

¹ Tømengä müñæ nê godäni, Dote ñäni, nãni ånönãni ñänite Itota angä pönãni ate, Botö nê åmo inte botö tæi piñænö ante ñowo pönömo ænte entawëninque mînitö tæi piñænînque nê åmîni bacæmînîmipa. Ìnînque mînitö åmîni ate wënæidi tømänãni do gocædänîmipa. Adobaï åmîni ate wënæ wënæ inte wæwënãni waa bacædänîmipa. ² Mînitö, Wængongui Awënë Odeye inguipoga do pongäimpa, ante apænemîni eñencædänîmipa. Ayæ wënæ wënæ ñäni ñänite godö cæmîni waa bacædänîmipa, ante Itota mänîmpodäni ñänite da godongä gogadänîmipa.

³ Ìimai angacäimpa.

–Mînitö õmæpomîni taadö goedäni. Ongonto incæ mäincoo da wenguincade incæ cængui incæ godonte æinta incæ tõmancoo edæ æñãmai inte õmæpomîni godinque edæ eñacooque eñate goedäni, angantapa. ⁴ Ayæ, Godinque æcönënë tãno go guimîni owodinque mînitö wayömö müni go quëwenganca mänincönenque go guii go guii cædinque quëwëedäni. ⁵ Æyömömë goyöminite wadäni, Pödäni, ånãmai inte mînitö apænedö ante wii eñënëni wædinque mînitö wæætë tømënanî ñänite emö cæte ñimainö ante goedäni. Mînitö ñæmpa, Pödäni, ånãmai ñimîni adinque mõnitö gomöni tamëñedäni, ante odõmoncæte ante mînitö õnöwa wadæ wadæ cæwadinque wadæ goedäni.

⁶ Angä godinque tømënanî quëwëñömö wayömö tømënanî quëwëñömö wayömö tõmão godinque Itota nãnö da godöninãni ññömö mõnö Awënë ingantedö ante mæo watapæ apænedäni eñënënitapa. Ayæ wënæ wënæ ñäni ñänite godö cædäni ate waa bagadänîmipa.

Itota æcãnö ingää, ante Edode wæcampa
(Måateo 14.1-12; Mäadoco 6.14-29)

⁷ Tømänãni mäniñedë, Itotaidi æbänö cædänii, ante tedeyönãnite pancabaa awënë odeye Edode incæ do eñengantapa. Itota ññömö æcãnö ingää, ante wædinque pancadänîya, Wäö wodi do wænte ñãni õmæmõningä inte ñingä Itota ñmaingampa, ante tededäni eñente wædinque awënë Edode guiñente wæcantapa. ⁸ Wadäni guiquënë, Ediya wodi ponte a ongõmaingampa, ante tedeyönãni wadäni guiquënë, Wængongui beyæ nê apænegainãni incæ adocanque docä incæ do ñãni õmæmõningä inte a ongõmaingampa, ante tededäni. ⁹ Eñente wædinque Edode wæætë,

–Botö tõmëmö åmo eñëninque Wäö wodi ingante wido tamencadäni wængantapa. Ìnînque mäningä Itota nãni nê tededongä guiquënë æcãnö ingää.

Ante wædinque Edode, Æbänö cæte Itota ingante aquimoo, ante nangui cægacäimpa.

5.000 ganca ñäni ñänite Itota godongä cænänipa

(Måateo 14.13-21; Mäadoco 6.30-44; Wäö 6.1-14)

¹⁰ Itota nãnö da godöninãni ññömö tømengä weca adodö pönînque, Mänömai mänömai cætamõnîpa, ante nangui tededäni eñengacäimpa. Eñente ate tømengä tømënanî ñänite nãnenë Betaida eyequei ænte mäocä.

¹¹ Goyönãnite wadäni do eñëninque tee empote pönãni adinque Itota, Waa pömîni abopa, ante waadete apænedinque, Mînitö Wængongui Awënë Odeye nempo watapæ quëwencæmînîmipa, ante apæncantapa. Ayæ, Pancadänîya waa baquënënanî ñänîpa, ante adinque tømengä godö cæcä ate waa badänitapa.

¹² Ayæ gawadecæ bayonte edæ, Dote, ante nãni Itota müñæ gocabo ññömö tømengä weca pönînque ånänitapa.

–Ïñömö õnõmæca impa cæbii. Bitö godongãmæ õngönãni ñänite ångi idõmæ owodäni weca godinque ayæ nangui ñäni nãni quëwëñömö godinque oncö eyepæ i ate cænînque moncædänîmipa.

¹³ Åñönãnite Itota,

–Mînitö wæætë godömîni cæncædänîmipa. Åñongante,

–Ïñæmpa päö õnõmpo æmæmpoque gæyæ mæa pönî mænîmpoque nææmõnîpa töö. Ìnînque bitö wæætë, Tømänãni beyæ cængui gote ænte pödäni, åmitawoo.

¹⁴ Onguñænänînque tinco müido ganca ñäni edæ mæ ongönönänîmipa. Incæte Itota tømengä müñæ nê godäni ñänite angantapa.

—Minitō tōmānāni inānite, Tincoenta ganca mīni cabo nānēnē tincoenta ganca mīni cabo nānēnē āmīni tæ contacädānīmpa.

¹⁵ Angä ēñēnīnque ānāni tæ contadānīta. ¹⁶ Itota pāo ōnōmpo æmæmpoque ænīnque gæyæ mēa ænīnque ōōnædē æmō adīnque Wængonguī ingante, Bitō waa pōnōmi ænte cæmōnīpa, ante apæncantapa. Ayæ pāo tōnō gæyæ pā æ pā æ cædīnque tōmēngä mīñæ nē godāni inānite pædæ godongä ænīnque tōmēnāni tōmānāni inānite di mæñæ di mæñæ cædāni ænte cængadānīmpa. ¹⁷ Tōmānāni eyepæ ænte tōmo pōñi cæñānīta. Ayæ ao mæ ao mæ cæte ñōnōnāni ate Itota mīñæ nē godāni wæætē ao mæ nāni ñōnōni ee ōñoncoo pædæ wææmpo ö ænīnque ōnōmpo tipæmpoga go mentodēa cænguī eyedē da wēnāni contagatīmpa.

Bitō Coditobi inōmi īmpa, ante Pegodo apæncampa

(*Māateo 16.13-19; Māadoco 8.27-29*)

¹⁸ Ayæ ate Itota nānēnē godīnque Wængonguī ingante apæneyongä tōmēngä mīñæ nē godāni tōmēngä tōnō godongāmæ ongōnōnānīmpa. Tōmēnāni inānite angantapa.

—Wadāni botō imotedō ante apænedīnque, Æbodō imoo, ante apænedāni ēñēmīnīi.

¹⁹ Åñongante tōmēnāni wæætē,

—Bitō imitedō ante apænedīnque pancadāniya, Wäo æpænē nē guidongaingä incæ Itota adocä imaingä ingampa, ānānīpa. Wadāni pancadāniya wæætē, Ediya wodi ingaingä incæ Itota adocä imaingä ingampa, ānānīpa. Pancadāniya wæætē, Wængonguī beyæ nē apænegaingä adocanque do wængaingä inte ñāni ōmæmonte quēwēnōngä incæ Itota adocä imaingä ingampa, ante tededānīpa.

²⁰ —Minitō guiquēnē, Botō æbodō imoo, ante pōnēmīnīi.

Åñongante Pegodo,

—Wængonguī nānō nē angāimi inōmi inte bitō iñōmō edæ nē Coditobi inōmi īmpa, angantapa.

Itota, Īmāi cædāni wæncæboīmpa, ante apæncampa

(*Māateo 16.20-28; Māadoco 8.30-9.1*)

²¹ Pegodo mānōmāinō ante apæncæ ēñēnīnque Itota wæætē angantapa. Minitō botō imotedō ante apænedīnque, Codito inōngä ingampa, ante gode ānāmaī iedāni āmpa, ante nanguī ānīnque edæ wææ angacāīmpa. ²² Ånīnque,

—Botō Waobo ēñagaīmo inte nanguī caate wæquēnēmo īmpa. Nē aadāni nāni Picæncabo tōnō, Wængonguī quī, ante nē godōnāni ñænænāni tōnō nē odōmōnāni tōnō mānīnāni edæ botō imote

Baa ānāni wæquēnēmo īmpa. Ayæ botō imote godōmenque wæñōnāni wænguēnēmo īmpa. Incæte Wængonguī angä beyænque botō mēōnaa go adoōnæque iñonte edæ ñāni ōmæmonte quēwēncæboīmpa, ante apænegacāīmpa.

²³ Ante apænedīnque Itota tōmānāni inānite godōmenque apænedīnque,

—Æcānō botō mīñæ pōinēna ina tōmēngä nāmā beyænque ante pōnēnāmā inte iimō iñō iimō iñō botō mīñæ tee empote poncæcāīmpa. Nāmā nānō wænguīwæ næænte ponte baī cædīnque tōmēngä, Botō wænguīmo incæ caate wæbo incæ Itota ingante cōwē tee empote gocæboīmpa, ānīnque poncæcāīmpa. ²⁴ Edæ æcānō, Nāmā wææ gompodīnque quēwēncæboīmpa, ante cædīnque botō mīñæ pōnāmaī ingä guiquēnē tōmēngä iñōmō edæ quēwēnāmāi incæcāīmpa. Wæætē edæ, Wæñōnāni wæmo incæte botō Itota mīñæ tee empote cōwē gocæboīmpa, ante æcānō āna guiquēnē tōmēngä wæætē quēwēncæcāīmpa. ²⁵ Edæ waocä inguipoga ongoncoo tōmancoo ö æncæte ante cædīnque nāmā ōñowoca incæ pædæ godongä wē womonte ba īnīnque edæ tōmēngä iñæmpa quēwēngampa diyæ māincoo ēaquingāā. ²⁶ Minitō pancamīniya botō beyæ ante botō apænedō beyæ ante guingo imonte wæmīnitawo. Īñæmpa botō Mæmpo nānō emōnō tōnō anquedoidi tæiyæ waēmō ināni nāni emōnō guīnæ gongæñonte botō Waobo nē ēñagaīmo inte edæ nāmā ñāo apāite baī dibæ pōnīnque botō wæætē nē guīfente wægaingä beyæ ante nāemæ guingo imonte edæ wæcæboīmpa. ²⁷ Nāwangä āmpa. Botō weca ongōmīni pancamīniya ayæ wæñāmāi edæ mīimīni quēwēñōmīni botō Wængonguī Awēnē Odeyēbo babo ate botō nempo guicæmīnīmpa, ante Itota apænegacāīmpa.

Itota waēmō pōñi ñāo baī emōngä bacä adānīpa

(*Māateo 17.1-8; Māadoco 9.2-8*)

²⁸ Mānōmāinō ante apænedīngä inte Itota adoque Wængonguī itædē go ate Wængonguī ingante apæncæte ante ædīnque Pegodo ingante Wäo tōnō Tantiago inate mānīmpodāni inānite ānanquidi ænte mæicä æidānīta. ²⁹ Æite go apæneyongä tōmēngä awīnca iñōmō edæ wīi cōwē nānō emōnō baī waēmō pōñi ñāo baī edæ emōngä bamongä adānīta. Ayæ tōmēngä weocco nānō ēñacoo iñōmō edæ nāinte baī emoncoo badīnque nāamænta pōñi ēñacantapa. ³⁰ Ayæ ayōnāni edæ onguīñæna mēnaa edæ Mōitee wodi tōnō Ediya wodi incæ iñontobæ a ongōnīnque Itota tōnō tededatapa. ³¹ Tōmēna iñōmō ñāo apāite baī emōna inte Itota tōnō godongāmæ apænedatapa. Godongāmæ apænedīnque tōmēnāni, Itota

æbānō ñōwo Eedotadēē godinque ïinque cædinque oo wænte wadæ gocæcāimpa, ante tededānitapa. ³² Mānōmainō ante tedeyōnāni Pegodoidi guiquēnē mōinente a ongōninque ædæmō ñāni ōmæmtoe æmō ayōnāni Itota ñāō apāte bai ēmongā adinque tōmēngā tōnō onguīñæna mēnaa godongāmæ adiyæ ongōnāni adānitapa. ³³ Onguīñæna ïñōmō Itota ingante tæcæ ēmō cæte gocæ cæyōna Pegodo guiquēnē,

–Awēnē ēñēmi. ïñōmō mōnō waa pōni ongonte awædō. Bitō āmi ate mōnitō oncon-taicoo mentaiya go adotaique mæñōninque bitō oncontai ante adotaique Mōitee oncon-tai ante adotaique Ediya oncontai ante adotaique mæñōmaimōnipa.

Mānōmainō ante tedinque Pegodo, Æbānō ante tedequēnēmo imoo, ante ēñēnāmāi inte ōnonque tedecantapa. ³⁴ Mānōmaī tedeyongā boguīmancoo obo wæante wææ owoyō adāmāi ïnāni inte, Boguīmancoo ganta cæ wæcæ wæ, ante Pegodoidi guīñente wædānitapa. ³⁵ Ayæ boguīmancodē ōnōnepāmoque apæncantapa. “Ïngā botō Wēngā botō nē apænte ængaingā ingampa cæminii. Tōmēngā pōnō apænecā ate ēñēdāni.”

³⁶ Ante apænecā ēñente ayōnāni Itota ñōwo adocanque a ongongā adānitapa. ïninque tōmēngā miñæ nē godāni nē adīnānique inte pæ wēñēdāni tōmēnāni nāni adīnō ante māniñedē wadāni ïnānite apænedāmāi ingadānimpa.

Itota wēnæ ingante angā go ate wēñcēngā waa bacampa

(Māateo 17.14-21; Māadoco 9.14-29)

³⁷ Māniī ānaquidi æi ïimō ate wææ pōñōnāni Itota ingante bee tençæte ante nanguī ïnāni pōnānitapa. ³⁸ Godongāmæ ponte nanguī ïnāni ongōñōnāni onguīñængā adocanque edæ ogæ tedinque,

–Nē Odōmōmi ēñēmi. Botō wēngā onguīñængā ingante pōnō waa æ. Tōmēngā adocanque botō wēngā ingampa cæbii. ³⁹ Tōmēngā nānō nē ēwocadongā inte wēnæ incæ tōmēngā ingante edæ bæi ongongā ate tōmēngā ïñontobæ Yæ yæ angampa. Ayæ godō cæcā ate botō wēngā edæ do do wāadinque ōnōne māwanta tademampa. Wēnæ ïñōmō wantæ ïñō tao godinque adodō pō guite edæ cōwē quēwēninque botō wēngā ingante edæ ēwencæ cæcampa cæbii. ⁴⁰ Bitō miñæ nē godāni ïnānite botō, Wēnæ inte wido cædāni, ancaā āñōmō tōmēnāni nē cæquēnēnāni incæ ædō cæte wido cæquīñāni, ante wæbopa.

⁴¹ Ante wæyongante Itota,

–Nōwōmīni mīni ædæmō cædāmāincabo mīni pōnēgade impa. Mīnitō weca æpogadō quēwēmoī. Wapiticæ cæyōmīnite botō æpogadō piyænē cæte wæwēmoī. Æninque

mæmpocā ingante apænedinque, Bitō wēngā ingante botō weca ænte pōe.

⁴² Angā ēñente ænte māmongā pōñongante wēnæ incæ yæipodē bæ tacā do do wāate wæwengantapa. Tōmēngā wentamō nānō nē ēwocadongā ingante Itota ïñōmō edæ, Ee æ, ante wææ angantapa. Ayæ wēñængā ingante pōnō cæcā ate tōmēngā wæætē ōnonganque bayongante mæmpocā ingante Itota pædæ godongā ængacāimpa. ⁴³ Mānōmaī cæcā adinque, Wængongui incæ tæi piñængā inte mānōmaī cæcampa, ante pōnēninque tōmānāni ancaī guīñente wægadānimpa.

Ïmaī cædāni wæncæboimpa, ante adodō ante apænecā

(Māateo 17.22-23; Māadoco 9.30-32)

Mānōmaī cæcā ate guīñente wæyōnāni tōmēngā miñæ nē godāni ïnānite Itota ïmaī ante apænegacāimpa.

⁴⁴ –Ñōwo āmo ēñenguēnē quēwēmīni. Adocanque, Waocā nē ēñagaingā æyōmōnō ongongāā, ante godō odōmōninque botō imote waodāni nempo pædæ godōnāni æncædānimpa.

⁴⁵ Æninque tōmēngā nānō apænedō æbānō ï, ante wædānitapa. Wē womonte ï ïinque tōmēnāni ædō cæte ēñenguīñāni. Ayæ, Æbānō ante āmii, ante anguēnēnāni incæ edæ guīñēnete wædinque pæ wēñegadānimpa.

Æcānonque nē angā inguingāā, ante ted-edānipa

(Māateo 18.1-5; Māadoco 9.33-37)

⁴⁶ Tōmēngā miñæ nāni nē gocabo ïñōmō, Mōni cabo incæ æcānonque ñæñængā pōni ïngā inte nē angā inguingāā, ante wædinque nāmā incæ wæætēdō wæætē tedeyōnānite ⁴⁷ Itota ōñōwēnenque do ēñgantapa. Æñēninque wēñængā adocanque ingante bæi ongōninque tōmēngā gāānē ïñōmō gō cæcantapa. ⁴⁸ Tōmēnāni ïnānite apæncantapa.

–Waocā botō ēmōwo beyænque ïngā wēñængā ingante, Pōe, ante waa cæcā ïñōmō tōmēngā botō imote adobai edæ, Pōe, ante do waa cæcampa. Botō imote æcānō, Pōe, æninque waa cæda tōmēngā adobai botō imote nē da pōnongā ingante Wængongui ingante edæ adobai, Pōe, ante do waa cæcampa. Edæ mīni waocabo wædāmīni ïñōmīnite waocā guiyangā pōni ïngā nānō entawēnō bai nē entawēngā ïñōmō tōmēngā ñæñængā pōni ïngā ingampa, ante apænegacāimpa.

Nē pūinte cædāmāi ïngā ïñōmō godongāmæ cæcā ingampa

(Māadoco 9.38-40)

⁴⁹ Wāō ïñōmō Itota ingante apænedinque,

—Awënë eñëmi. Wacä incæ mönõ cabo inämai inongä inte bitõ emõwo apænedinque wænæidi inänite wido cæcä atamõnipa. Ininque mönitõ wæætë edæ, Bitõ mönitõ tönõ gobi imipa Itota emõwo apænequimii, ante tömängä ingante edæ wææ atamõnipa.

⁵⁰ Ante apæneyongante Itota,

—Inæmpa munitõ iminite nê piinte cædämai ingä inõmõ tömängä wæætë munitõ tönõ godongämæ cæcä ingampa cæminii. Tömängä ingante wææ änämai incæminipa, angacäimpa.

Tantiago tönõ Wäo inate Itota wææ angampa

⁵¹ Oo pönii nänõ æiquionæ bacæ cæyonte Itota, Eedotadëe inõmõ botõ cõwë gocæboimpa, ante gocæ cæcantapa. ⁵² Wadäni inänite tömängä, Poncæcäimpa, ante munitõ täno beyænte goedäni, ante da godongä godänitapa. Godinque tömënëni inõmõ Tämadiabæ godinque tömängä beyæ cæcæte ante Tämadiadi nãni quëwëñõmõ gocæ cæyõnãni, ⁵³ Tämadiadi wæætë edæ, Eedotadëe gämænõ Itota gocä awædõ, ante adinque, Mõnitõ weca pönämai incæcäimpa, ante wææ änänitapa. ⁵⁴ Iimäi cædäni adinque Wäo tönõ Santiago tömängä nänõ emiñæna inõmõ,

—Awënë eñëmi. Baa änäni adinque õõnædë gonga ämõna wææ gonte wænguñãni, ämi, änatapa.

⁵⁵ Äñõnate Itota wæætë edæ dadi emæmonte wææ ante tömëna inate, “Inæmpa minatõ iminate æwocadõ angä eñente äminaa, ante minatõ edæ eñënëmai imina awædõ. ⁵⁶ Inæmpa botõ Waobo eñagaïmo imo inõmõ edæ waodäni inänite õmæe ewencæte ante wii pongaïmo imopa. Wæætë edæ, Botõ æmo beyænque quëwencædänimpa, ante pongaboimpa,” ante piingacäimpa. Ayæ wadäni nãni quëwëñõmõ gogadänimpa.

Itota miñæ nê goinënëni

(Mäteo 8.19-22)

⁵⁷ Taadonque goyõnãni Itota ingante wacä angantapa.

—Awënë, bitõ ædõmë goyõmite botõ bitõ miñæ põ gocæboimpa.

⁵⁸ Angä eñëninque Itota wæætë,

—Babæ guintaidi inõmõ ontatodë mongui eadäni inänipa. Ayamõidi ongonta eadäni inänipa. Botõ Waobo eñagaïmo wæætë edæ mongui õmaabo imopa poncæ ämii, angacäimpa.

⁵⁹ Ayæ wacä ingante Itota,

—Botõ miñæ põe.

Angä eñente wædinque tömängä,

—Awënë eñëmi. Botõ täno gote botõ wæmpo wängä ate daga wente ate põmoe.

⁶⁰ Äñõngante Itota wæætë,

—Inæmpa nê wæwocadäni incæ tömënëni guidënëni wænãni ate ee abi daga wencædänimpa. Bitõ wæætë, Wængongui Awënë Odeye do pongäimpa, ante gote apænebi eñencædänimpa. ⁶¹ Ayæ wacä adobaï,

—Awënë bitõ imite tee empote goinëmo incæ ee ongõñõmi täno gote botõ guidënëni inänite, Gobopa, ante apænete põmoe. ⁶² Äñõngante Itota wæætë,

—Õmæ nê mangæ mangæ cædongä inõmõ töõ pönii minte pæquimpa, ante cæquënegä ingampa. Tömängä dadi emænte adinque töõ pönii cæcampa diyæ töõ minte pæquii. Ayæ adobaï Wængongui Awënë Odeye nempo quëwëninque nê cæquënegä inõmõ tömängä dadi emænte inguipogaque ante acä ininque Awënë beyæ ante ædõ cæte cæquingäa.

10

72 ganca inäni inänite Itota da godongä godänipa

¹ Ayæ ate mönõ Awënë godõmenque tetenta i doo ganca inäni mänimpodäni inänite iimäi angantapa. Munitõ æmænõ mêmïnaa æmænõ mêmïnaa godinque botõ nê goquiiñõmõ ante wayõmõ nãni quëwëñõmõ mäo wayõmõ nãni quëwëñõmõ mäo täno beyænte gomini ate botõ ayæ poncæboimpa, äninque da godongä gogadänimpa. ² Iimäi ante da godongä godänitapa. “Nawangä ämopa. Wacä tömencacodë do pequinca nangui inca bai Awënë nempo nê quëwenguënenäni adobaï nangui inäni inänipa. Incæte nê tä pedäni wædænque inäni bai nê gode änäni inõmõ adobaï mënëniya pönii inänipa cæminii. Munitõ Wængongui ingante apænedinque, Awënë, bitõ tömencacodë nê eabi inte ämi eñëninque gote apæncædänimpa, ante äedäni. ³ Nõwo munitõ inõmõ goedäni, ämopa. Mëñeidi weca ongõninque codotedoidi inõmõ tæëmõ inänipa diyæ namä wææ aaquinänii. Munitõ inõmõ codotedoidi aquiiñãni bai adobaï aquiiñãni inõminite botõ ämo mëñe bai inäni weca edæ gomini ataqeedäni. ⁴ Godonte muni ænguinta wente æi ænãmai inte mäincoo mongænte godämai iedäni. Awæncata næænte godämai iedäni. Taadõ godinque wacä ingante bee téninque apænedämai inte goedäni. ⁵ Æconëmenque go guite, Mini quëwencabo gänë pönente waa quëwëedäni, ämïni eñencædänimpa. ⁶ Mänincõnë quëwängä Ao angä ininque tömängä gänë pönente waa quëwëmaingampa. Wæætë Baa angä ininque munitõ adomïnique gänë pönente waa quëwëmaimïnipa. ⁷ Mänincõnë muni go guidincõnë quëwëñõmïnite mäinincõnë quëwënëni pædæ pönönäni ænte cænte

bete quëwëedäni. Edæ nè cæcä iñömö tömengä nänö cædi beyæ eyepæ ænguënegä ingampa. Minitö adocönenque quëwëninque wacönë wacönë godämai ledäni. ⁸Æyömömë goyömini mäniñömö quëwënäni, Pöedäni, änäni ëfente wædinque minitö tömënäni cænguï pönönäni æninque cæedäni. ⁹Wënæ wënæ wæwënäni inänite godö cæmini waa bacædänimpa. Ayæ tömënäni inänite, 'Wængonguï Awënë Odeye minitö weca oo pongä acæminimpa,' ante apæneedäni. ¹⁰Ayæ tömënäni quëwëñömö go guiyöminite Baa änäni iñinque minitö wæætë tömënäni taadonque tao godinque tömënäni inänite, ¹¹'Minitö quëwëñömö onguipoi wadæ cæwate gomöna tamëñedäni. Incæte Wængonguï Awënë Odeye minitö weca oo pongä acæminimpa,' ante äedäni. ¹²Edæ minitö iminute ämopa. Wængonguï nänö apænte anguiönæ iñinque bayonte Todömä iñömö quëwengainäni guiquënë nangui pante wæwëñönäni minitö iminute nè Baa änäni guiquënë godömenque nangui pante wæwenguinäni inänipa," ante Itota angacäimpa.

Në ëñënamäi quëwënäni inänite Itota piingampa

(Mäateo 11.20-24)

¹³Äninque Itota nè ëñënamäi quëwënäni inänite piinque iñäi angantapa. "Codatüi iñömö quëwëmini ëñëedäni. Betaida iñömö quëwëmini ëñëedäni. Minitö mini wæwenguinque ëñënamäi cæte quëwëminidö angüenë. Edæ botö minitö weca tæi piñænte botö cædi bai Tido näni quëwengaiñömö Tidö näni quëwengaiñömö adobai cæbo bai mäniñömö quëwengainäni iñömö wënæ wënæ näni cægainö ante dobæ ñimpo cædinque gömæ ëmoncoo da wëñadinque gönaiboga tæ contadinque Ca ca wæcægadänimpa. ¹⁴Iñinque Wængonguï nänö apænte anguiönæ iñinque bayonte Tido iñömö tönö Tidö iñömö quëwengainäni inänite nangui pangä wæwënäni incæte tömengä minitö iminute godömenque pangä wæwencæminimpa. ¹⁵Ayæ Capënaömö iñömö quëwëmini ëñëedäni. Wængonguï minitö iminute dicæ öönædë wo ææntodongä æi gote toquiminyaa. Iñæmpa tadömengadænguipo wææntodongä guï wæcæminimpa," angantapa. ¹⁶Äninque Itota wæætë tetenta i doo inäni inänite apænedinque, "Minitö apæneyömini æcänö ëñengä tömengä iñömö edæ botö imote do ëñengä ingampa. Wæætë minitö iminute nè Baa angä iñömö tömengä edæ botö imote do Baa angä ingampa. Ayæ botö imote nè Baa äningä inte tömengä botö imote nè da pönöningä ingante do Baa angampa," ante apænedinque tömënäni inänite Itota angä godänitapa.

Tetenta i doo inäni do godinäni inte occë ëmænte pönäni

¹⁷Angä godinäni inte tetenta i doo ganca inäni adodö occë ëmænte pöninque watapæ todinque Itota ingante apænedinque,

–Awënë, bitö ëmöwo apænedinque mönitö wënæidi inänite ämöni ëñëninque bitö ëmöwo beyænque godänipa.

¹⁸Ante todäni ëñëninque Itota wæætë,

–Näinte quingæ cæ bai Tatäna iñömö wënæ awënë incæ öönædë inö wæængä nè agaïmo inte botö adobo ämopa. ¹⁹Botö pönö ämo ate minitö iñömö nè ämini badinque edæ tæntæ tönö emëñe ingante pinä gäwadäni bai adobai tæi ëmömüni inte tæntæ bai nè cædäni inänite wido cæcæminimpa. Ayæ mönö imonte nè piinte cædongä incæ tæi piñænte cæcä incæte minitö iñömö godömenque tæi ëmömüni inte mäningä nänö tæi piñænte cæpämö ante tömämämö ante edæ wido cæcæminimpa. Edæ æcæmenque incæ minitö iminute æmæwo wido cædämai incæcäimpa. ²⁰Incæte minitö ämini ëñëninque wënæidi do ëfente cædäni beyænque todämai ledäni. Wæætë, Mönitö ëmöwo öönædë dobæ yewæmonte ongompa, ante adinque minitö mänömai beyænque watapæ toedäni, angacäimpa.

Mæmpo Wængonguï ingante apænedinque Itota tocampa

(Mäateo 11.25-27, 13.16-17)

²¹Äninque Wængonguï Tæiyæ Waëmö Önöwoca ingante ëwocadongä inte Itota mäniñedë edæ watapæ todinque Wængonguï ingante iñäi ante apænecantapa. "Mæmpo ëñëmi. Bitö, Wadäni nämäi ocai encadäni tönö nangui adinque nè ëñënäni tönö mäninö bitö cægainö ante ëñënamäi incædänimpa, ante cædinque bitö cægainö ante wë wodongabiimpa. Wæætë wëñæñäni tæcæ ëñadäni bai inäni inänite bitö edonque odömömi adinque do ëñëñäni. Bitö öönædë Awënë ingäimi inte inguipoga Awënë adobi inömi inte edæ mänömai cæbipa, ante adinque botö bitö imite waa ate pönëninque apænebopa. Mæmpo, bitö tömëmi änö bai cædinque waa cæbi adinque botö Ao ämopa, ante apænebopa," ante Wængonguï ingante apænegacäimpa.

²²Ayæ, "Botö Mæmpo incæ, Bitö Awënë inömi inte aacæbiimpa, ante tömäo iñömö ongoncoo botö nempo pædæ pönöninque tömäo iñömö quëwënäni tömänäni inänite adobai botö nempo pædæ pönongä æninque botö iñömö edæ tömancoo ënempodinque tömäo iñömö quëwënäni inänite nè ënempobo imopa. Wængonguï Wëmo iñömete, Æbodö imoo, ante Mæmpoque ëñengä ingampa. Botö wæætë tömengä Wëmo inömo inte, Wængonguï æcänö ingää,

ante adoboque nē ēñēmo ĩmopa. Ayæ, ĩnānique nē ēñēnāni incādānĩmpa, ante botō nē angaināni ĩnānite odōmonte botō apænebo ēñēninque tōmēnāni wæætē, Wængongui æcānō ingāā, ante nē ēñēnāni badāni ate mōnitō adomōnique āanque bai nē ēñēmōni ĩmōnipa.”

²³ Ante apænedinque Itota dadi ēmæninque tōmengā miñæ nē godānique ĩnānite apænedinque, “Nōwo mīni adinō adinque nē ēmōmīni inte mīnitō mīni watapæ quēwenguinque ĩmpa. ²⁴ ĩmaĭ ĩmpa, ante apænebo ēñēdāni. Wængongui beyæ nē apænegaināni nangui ĩnāni tōnō ĩmæca awēnēidi nangui ĩnāni incæ mīni adinō bai ante aĭnente wægāināni incæte edæ adāmaĭ ingadānĩmpa. Mīni ēñēnīnō ante adobai ēñēnente wægāināni incæte tōmēnāni ēñēnāmaĭ ingadānĩmpa,” ante māninganca Itota apænecā ēñēngadānĩmpa.

Tāmadiabæ quēwengā incæ nē waa cæcā ĩngampa, ante

²⁵ Ayæ ate adocanque idægoidi nāni wææ angainō ante nē ate ēñengā ĩñōmō, Itota æbānō wapiticæ apænebaingāā, ante cædinque ængæ gantidinque tōmengā ingante ĩmaĭ angantapa.

—Awēnē nē Odōmōmi ēñēmi. Botō æbānō cæte cōwē wænāmaĭ wantæpiyæ quēwengui moo, ante wæbopa.

²⁶ Āñongante Itota,

—Mōitee wodi, ĩmaĭ cæedāni, ante wææ yewæmōninque æbānō ante yewæmongā ongō abii.

²⁷ Āñongante nē odōmongā wæætē,

—ĩmaĭ ante yewæmongacā ĩmpa. Bitō mīmō entawēmi inte Wængongui mōnō Awēnē ingante waadedinque bitō ōnōwoca ēwocadinque ædæmō waadete pōnencæbi ĩmpa. Bitō baō tæi piñænte ēñabi inte godō waadete cædinque bitō ocāi encabi inte nō pōnēninque waa waadete pōnē. Ayæ adobai bitō nāmā bitō waadete waa cædō bai adobai pōnēninque godongāmæ quēwēnāni ĩnānite adobai waa waadete cæe.

²⁸ Ante apænecā ēñēninque Itota tōmengā ingante wæætē,

—Bitō nō ēñēmi inte nōingā apænebitapa. Mānīnō bitō ānīnō bai cæbi ĩninque bitō wænāmaĭ quēwēmaĭ ĩmpa.

²⁹ Angā ēñēninque guiñente wædinque nē odōmongā ĩñōmō, Botō cæquēnēnō ante wīi cæbopa, ante Itota ēñēnāmaĭ incæcā ĩmpa, ante nāmanque ante wææ āninque,

—ĩñæmpa wa. Godongāmæ quēwēnāni, ante bitō ānīnāni ĩñōmō ædānidō ĩnāni.

³⁰ Āñongante Itota wæætē, Mōnō guidengā æcānō ingāā, ante odōmoncæte ante ĩmaĭ apænegacā ĩmpa.

—Onguñængā adocanque Eedotadēē quēwente Eedicoo wæidō cægōñongante nē ō ænāni tōmengā ingante ĩñontobæ bæi ongonte weocoo gāni tadongadinque tæi tæi pānāni nangæ bacā ĩninque wadæ godāni.

³¹ Ate, Wængongui quī, ante nē godongā adocanque adodō wæidō godō godinque nē nangæ bate ōñongā ingante gomō adinque ee wodo pænta æmæ wedeca gocampa.

³² Ayæ ate Debii wodi pæināni nāni Wængongui oncōnē cæcabo incæ adocanque adobai adoyōmō wææ pōninque nē nangæ bate ōñongā ingante gomō adinque ee wodo pænta gocampa.

³³ Ayæ ate wacā Tāmadiabæ nē quēwēnongā incæ ado wæidō godinque nē nangæ ōñongā weca adoyōmō ponte gomō adinque, Tōmengā ædō cæte quēwengui gāā, ante tōmengā wædō ante bai nangui pōnente cæcantapa.

³⁴ ĩngā ĩñōmō nē nangæ bate ōñongā weca pōninque tæi tæi pānāni nānō æbāadiñōmō oginguipæ tōnō yowepæ tī nāmæ biñōmæ nāni āmæ gao caadinque weocooa wīni caacampa.

Ayæ, Tæ contate gocæcā ĩmpa, ante adocā Tāmadiabæ quēwengā ĩñōmō nāmā nānō nē mōngænte goquēnengā bodo ōnōñabæ nē nangæ badingā ingante ængō cæcā tæ contayongante bodo ingante tōō tōō ænte gocampa.

Ayæ taadō pōnāni nāni cænte guite mōincō ganca ænte māo guidinque nē nangæ badingā ingante waa cæcampa.

³⁵ ĩmō ate padata nāni godonte æinta mentaa tadōninque mānincōnē nē aacā ingante pædæ godōninque, Bitō nē nangæ badingā ingante waa cæe. Quiēmē æinengā adinque bitō godōmi ængā ate botō bitō weca adodō pōninque bitō godō ĩmpa adopo wæætē pædæ pōnōmō æncæbi ĩmpa, ante gocampa. Mānōmaĭ cæcampa.

³⁶ Āninque Itota tōmengā ingante nē āningā ingante godōmenque angantapa. Bitō ĩmite ñōwo āmo ēñēninque bitō wæætē apænebi ēñēmoe. Nē nangæ bate ōñongā weca pōnāni mengāā go adocanque ĩnāni incæte æcānō tōmengā tōnō godongāmæ quēwēnāni bai inte waa cæcantawoo, ante pōnēmii.

³⁷ Āñongante nē odōmongā wæætē,

—Tōmengā ingante nē waadete godō waa cædongā incæ tōmengā guidengā bai cæcampa.

Ante apænecā ēñēninque Itota wæætē,

—Tōmengā nānō cædō bai bitō adobai godinque cæbāwe, angacā ĩmpa.

Ante apænecā ēñēninque Itota wæætē,

—Tōmengā nānō cædō bai bitō adobai godinque cæbāwe, angacā ĩmpa.

Māadota tōnō Māadiya nāna caya oncōnē Itota ēñacampa

³⁸ Ayæ taadō goyōnāni tōmēnāni quēwēñōmō pongā adinque onquiyængā tōmengā ēmōwo Māadota ĩñōmō Itota ingante angā tōmengā oncōnē pō guite ēñacantapa.

³⁹ Māadota tōniñacā Māadiya ĩñōmō Itota ōnōwaca ĩnō tæ contadinque tōmengā

apænecā ēñēē congantapa. ⁴⁰ Māadota guiquēnē nē ēñādāni beyæ ante nanguī cæte wædinqe Itota weca pōninqe,

—Awēnē, botō tōniñacā ēmō cæte gocā ate botō adoboque nanguī cæbo ate wædāmai imitawo. Edæ āni pō cæcæe.

⁴¹ Āñongante Itota,

—Māadota, Māadota, bitō wa wa wa cæcæte ante wæwēmi awædō. ⁴² Wæætē adoque pōni cædinque edæ eyepæ impa. Māadiya do, Quinō waa cæquimoo, ante apænte pōnēningā inte botō ōnōwaca inō pō tæ contate ēñēē congā adinqe botō wæætē tōmengā ingante, Goe, ānāmai incæboimpa, angacāimpa.

11

Wængonguī ingante æbānō apænequī, ante Itota apænecā

(Māateo 6.9-15, 7.7-11)

¹ Itota ayæ ate wayōmō gote Wængonguī ingante apæncantapa. Inque apænecā adinqe tōmengā nānō nē ēmiñængā adocanque tōmengā ingante apænedinqe,

—Awēnē ēñēmi, Wāō tōmengā nānō ēmiñænāni inānite odōmonte, Wængonguī ingante æbānō ante apænequī, ante nānō apænedō bai bitō mōnitō imōnite adobai ante odōmonte apænebi ēñenguimōni.

² Ante wæyōnāni Itota,

—Wængonguī ingante apæncæte ante iīmai ante apæneedāni,

“Mōnitō Mæmpo nē ōōnædē quēwēnōmi inte ēñēmi.

Mōnitō bitō ēmōwo tæiyæ waēmō ēmōmi adinqe bitō ēmōwo ante waa adinqe apænemōnipa.

Bitō ōōnædē Awēnē nē ingāimi inte inguipoga Awēnē Odeyebi bitō baquinque edæ quingæ pōe. Ōōnædē owodāni ēñente cædāni bai inguipoga adobai bitō ānō bai ēñente cæcæimpa.

³ Mōnitō imōnite bitō, Cænguī, ante iīmō iñō iīmō iñō eyepæ pōnōmi æte cæmōnie.

⁴ Mōnitō wēnæ wēnæ cæmōni incæte bitō nē panguēnēmi incæ pōnō ñimpo cæbi quēwēmōnie. Mōnitō adobai edæ wadāni mōnitō imōnite wēnæ wēnæ cædāni adinqe ñimpo cæmōni quēwēnāni ae.

Mōnitō wēnæ wēnæ mōni cæinēnō godō gocæte ante cæmōni adinqe bitō wææ cæbi ate māniñō godō godāmai inte mōnitō wæætē wēnæ wēnæ cædāmai incæmōnipa, Wæætē edæ nē wīwa ēwocadongā nempo ongōñōmōnite bitō gā pe æmpobi quēwēmōnie.”

Mānōmaiñō ante apænete Wængonguī ingante apæneedāni, Itota angantapa.

⁵ Āninqe tōmēnāni inānite godōmenque apænedinqe Itota,

—Bitō iīmai cæbi ininqe bitō æmigo æbānō cæbaingāā, ante pōnēdāni. Ayaōnænēña incæ bitō æmigo weca godinqe bitō, “Botō æmigo ēñēmi. Pāōmo bodogaa tānoque pōnōmi ænīmo inte ayæ ate botō adopo pōnōmo æncæbiimpa. ⁶ Edæ wacā botō æmigo incæ wayōmō gocæte ante botō weca pongampa cæbii. Botō, Quinō impa diyæ godōmo cænguingāā, ante wædīmo inte bitō imite āmopa.” ⁷ Āñōmi tōmengā guīicōnē ōñōninqe, “Botō odemō ædæmō tee mōnedinqe botō wēñænāni tōnō mōimoga ōñōmo inte diyæ ædō cæte ængæ gantite godōmo ænguīmii. Ee ae.” ⁸ Āninqe bitō æmigo incæ bitō āni beyænque ængæ gantite pōnōnāmai ingampa. Incæte wæætē wæætē āñōmi tōmengā, Ancaa ēñente awædō, āninqe ængæ gantidinqe bitō imite do pōnongā æmaimipa. ⁹ Ante apænedinqe botō iñōmō mīnitō imīnite iīmai āmopa. Pōnōmi æmoe, ante nē angā bai cædinque mīnitō mīni ænguīnō ante Wængonguī ingante apæneedāni. Ēyōmōnō iī, ante nē diqui diqui mingā bai cædinque mīnitō, Ēbānō iī, ante ædæmō ēñencæte ante Wængonguī ingante wede pōnente apæneedāni. Odemō mōnitō beyæ wi ænecæimpa, ante aa pecā bai cædinque mīnitō, Ēbānō cæquimoo, ante ēñencæte ante Wængonguī ingante nanguī apæneedāni. ¹⁰ Edæ, Pōnōmi æmoe, ante nē ānāni iñōmō edæ do ænānipa. Nē diqui diqui mināni iñōmō do adānipa. Ayæ odemō ponte nē aa pedāni tōmēnāni nāni guīiquinqe edæ do wi ænete bai bacæimpa.

¹¹ Ante apænedinqe Itota godōmenque apæncantapa.

—Wēñæ mæmpobi iīmi, ēñēmi. Bitō wēñængā pāō ante angā ēñēninqe bitō dicæ dicamō incæ godōmi ængāa. Gæyæ ante angā ēñēninqe bitō tæntæbo incæ dicæ godōmi ængāa. ¹² Enquēmo angā ēñēninqe bitō emēñe incæ dicæ godōmi ængāa. ¹³ Ininqe mīnitō nē wīwa cædōmīni incæ, Wēñængā beyæ quīnō waa i, ante ēñēmīni inte do godōmīni ængampa. Mōnō Mæmpo iñōmō waa pōni cædongā iñongante ānāni ēñēninqe tōmengā nē ānāni inānite tōmengā Tæiyæ Waēmō Ōnōwoca ingante da pōnongā æncædānipa, ante Itota apænegacāimpa.

Wēncæ tōnō cæcā iīmaingampa, ante wapiticæ ānānipa

(Māateo 12.22-30; Māadoco 3.20-27)

¹⁴ Ayæ wēnæ nē babetadecā iñōmō waocā baō do guīite ongōñongante Itota tæcæ wido cæcantapa. Wēnæ tao gocā ate onguīñængā tededāmai iñingā incæ do tedecā ate wædinque godongāmæ ongōnāni wæætē guīñente wædinque waa agadānipa.

15 Pancadāniya guiquēnē, “Īñæmpa wēnæ awēnē Beedeboo tōnō godongāmæ cædinque Itota wēnæidi inānite wido cæcā ĩmaingampa tōō,” ante tedewēnānitapa.

16 Wadāni guiquēnē, Æbānō cæmō ate Itota oda cæquingāā, ante cædinque tōmengā ingante, Bitō ōōnædē nāni cæi bai mā odōmōmi ate pōnēmaimōnīpa, ānānitapa. 17 Mānōmai babæ cæcæte ante ānewēnānīpa, ante Itota do ēñēningā inte ĩmaī angantapa. “Awēnē odeye nempo quēwēnāni nāēmæ wæætēdō wæætē cædāni ĩnīnque awēnē nānō ōmædempote wæquinque tōmēnāni nāmā ēwente cædānīpa. Ayæ adocōnē owocabo incæ adoyōmō godongāmæ quēwēnāni incæ nāēmæ wæætēdō wæætē cædāni ĩnīnque tōmēnāni oncō woquinque nāwæ gobainānīpa. 18 Mīnitō, Wēnæ awēnē Beedeboo tōnō cædinque Itota wēnæidi inānite wido cæbaingampa, ante ānewēmīnīpa tōō. Īñæmpa awēnē Tatāna nempo quēwēnāni ĩñōmō nāēmæ wæætēdō wæætē pīnāni ĩnīnque adocabodāni ĩnāmaī ĩñōnānite tōmengā dicæ tōmēnāni inānite ēnempobaingāa. 19 Mīnitō, Beedeboo tōnō cædinque Itota wēnæidi inānite wido cæcampa, ante tedewēmīnīpa. Mānīnō mīni ānewēnō nāwangā ī bai mīnitō mīñæ nē godāni guiquēnē æcānō tōnō cæte wido cædānī. ĩnīnque mīnitō mīñæ nē godāni incæ mīni ānewēnō beyænque ante nāēmæ pīnīnque mīnitō ĩmīnīte wæætē apænte ānīnque pīncædānīmpa anguēnē. 20 Botō ĩñōmō Wængonguī tōnō godongāmæ cædinque wēnæidi inānite wido cæbo apa ānewēmīni. Mānōmai ī ĩnīnque botō Wængonguī Awēnē Odeye ĩnōmo inte mīnitō weca do pōmo aedāni,” ante Itota apænegacāimpa.

21 Ayæ, “Īmaī impa. Nē tæi pīñængā ĩñōmō tæēmoncoo wēñate mongæñinque, Wææ godō cæinca, ante tæēmonca nææante tōmengā oncō boyæ wææ godō wææ godō cæyongā tōmengā ēadincoo ĩñōmō edæ ee ongōmpa. Tatāna ĩñōmō mānōmai ingampa. 22 Incæte wacā godōmenque tæi ēmongā inte pōnīnque māningā ingante edæ bæ tacampa. Ayæ tæēmonca, Wææ godō botō cæinca, ante māningā nānō ānīnca nōwo pōningā ĩñōmō gā pe æmpote ō æñinque tōmengā nānō ēadincoo adobaī gā pe æmpote ō ænte māo nēnempocampa. Botō ĩñōmō nē tæi ēmōmo pōni ĩnōmo inte edæ godōmenque tæi ēmongā nānō gānā cæbaī cæbopa,” angantapa.

23 Ayæ, “Botō tōnō æcānō wīi godongāmæ cæcā ĩñōmō tōmengā ĩñōmō edæ botō ĩmote Baa ante pīnte cæcā ingampa. Ayæ botō, Waodāni botō mīñæ poncædānīmpa, ante cæyōmo waocā botō tōnō wīi cæcā ĩñōmō tōmengā wæætē botō mīñæ poncæ

cæyōnānite tatodongā wadæ godānīpa,” ante Itota apænegantapa.

Wēnæ waodē owote godingā inte adodō pompa, ante

(Māateo 12.43-45)

24 Ayæ apænedinque Itota ĩmaī ante apænegantapa. “Waocā baōnē owote ate tao godinque wēnæ wentamō nānō ēwocadingā ĩñōmō edæ, Quingānō baōnē go guidinque edæ guēmanete quēwenguīmoo, ante diqui diqui mīnīte ayongā ōnōmæca to amīnīte ī ate wædinque edæ, ‘Botō tao godincōnē adodō go guīite quēwencæboimpā,’ ante pōnēnīnque adodō pongampa. 25 Ponte ayongā waocā ōnonganque bayongante wacā ōnōwoca tōmengā owodāmāi ingā adīnque wēnæ wæætē, Æ waocā botō owodincō bai ĩnongā inte nōwo wadæ nēmæante māincoo cabo tē gæte bai ōmæwocacā ingā abopa. 26 Ate adīnque tōmengā wæætē godinque wēnæidi godōmenque wentamō ēwocadāni tīæte ganca mānimpodāni inānite ænte pongampa. Tōmēnāni tōmēnāni waocā baōnē godongāmæ pō guīite owodāni ate waocā ĩñōmō wēnæ yewæñinque godōmenque wæwengampa,” ante Itota apænegacāimpa.

Æbānō cæte watapæ quēwenguī, ante

27 Itota tæcæ apæneyongante onquiyængā ĩñōmō godongāmæ ongōnāni tōnō ongōnīnque ogæ tēdedinque,

–Bitō ĩmīte nē mangāinā inte edæ tōmēnā nānā toquinque impa. Bitō ĩmī goōmæ gānongāinā inte edæ tōmēnā watapæ nānā quēwenguīnque impa.

28 Ante ogæ tēdecā ēñēnīnque Itota wæætē,

–Īñæmpa Wængonguī nānō ānō ēñēnīnque nē cædāni guiquēnē tōmēnāni wæætē nāni watapæ quēwenguīnque ēñēnte cædānīpa, ante apænegacāimpa.

Ōōnædē nāni cæi bai cædinque mā cæbi amōnie, ānānīpa

29 Māñīfēdē godōmenque nangūi ĩnāni pōnāni adīnque Itota, ĩmaī ante apænegantapa. “Mīnitō wīwa mīni cæcabo ĩmīnīpa. Mīnitō edæ, Mā cæte odōmōmi adīnque pōnēmaimōnīpa, ante ancaā āmīni awædō. Nāwangā āmo ēñēedāni. Cōnāo wodi beyæ cædinque Wængonguī hamōnengæ nānō cægañō ante mīnitō pōnēnāmaī ĩñōmīnīte edæ mānīnque mīni aquīnque cæcæimpā ānewēmīni. 30 Nīnebaidi pōnēncædānīmpa, ante Cōnāo wodi ingante Wængonguī angā quēwengacāimpa. Nōwōmīni pōnēncæmīnīmpa, ante adobaī cædinque Wængonguī botō Waobo ēñagāimo ĩñōmote adobaī angā quēwēmo acæmīnīmpa.

31 Doyedē ĩñōmō betamonca gāmæñō ōmæ awēnē ĩnongā inte onquiyængā

incæ awënë Tadömöö wodi nangui ēñente nāno apænedō ante ēñencæte ante doönæ quëwëningue pongacäimpa. Tadömöö wædænque ēñengä iñongante botō godōmenque nangui ēñëmo inte mīnitō weca ongōñōmote mīnitō iñæmpa wīi ēñëminipa tōō. Iñinque māningä onquiyængä incæ Wængongui nē apænte angä weca pōninque mīni ñōwo quëwencabo tōnō godongämæ ongōninque, Mīni pante wæquinque ēñënamä ingamīnipa tōō, ante apænte pīngingä ingampa. ³² Cōnäō wodi Wængongui beyæ apæneçä ēñëninque Nīnebaidi wënæ wënæ nāni cægaiñō ante wæwente pōnëninque ñimpo cægadānīmpa. Cōnäō wodi wædangä iñongante botō wæætë nē ñænæmo inte apænebo ēñëninque mīnitō iñōmō ēñënamä iñinipa. Iñinque Nīnebaidi incæ Wængongui nē apænte angä weca pōninque mīni ñōwo quëwencabo tōnō godongämæ gongænte ongōninque, Mīni pante wæquinque ēñënamä ingamīnipa tōō, ante apænte pīñānidō angüenë,” angantapa.

Mōnō awinca gomō aquīnemō bai ēmōmpa, ante

(Māateo 5.15, 6.22-23)

³³ Ayæ godōmenque apæneçantapa. “Gongapæncade tī wodōnodinque waodāni dicæ awëmō iñōmō wë wodōnāniyaa. Owæta boo cæcadāniyaa. Wæætë, Māññōmō nē pō guīdāni acædānīmpa, ante cædinque gongapæncade awæmpa æmongapaa cō cædāni ñāō bæco adānīpa. ³⁴ Mōñō bō tōmāo beyæ mōñō awinca tica ēnente bai ēmōmōmpa. Mōñō nō pōnëninque amō iñinque mōñō ñāō tica ēnente cægonte bai waa cæte quëwëmōmpa. Wæætë wiwa pōnente amō iñinque mōñō wëmō iñōmō cægonte bai inte wiwa cæte quëwëmōmpa. ³⁵ Māñōmaī beyæ bitō, Wëmō ēwocadāmaī incæboīmpa, ante bitō òñōwoca cōwä adinque nāmä wææ cæe. ³⁶ Iñinque bitō baō tōmāo ñāō entawëninque bitō òñōwoca adobai ñāō ēwocabi iñinque quīōmenque incæ wëmō entawënamä iñimāmpa. Gongapæncade ñāō bæco edonque abi bai edæ ñāō ædæmō entawëninque edonque adinque waa quëwëmaīmpa,” ante Itota apænegacäimpa.

Paditeoidi tōnō nē wææ odōmōnāni inānite Itota pīngä

(Māateo 23.1-36; Māadoco 12.38-40; Odoca 20.45-47)

³⁷ Iñinque apæneçä ate adocanque Paditeocä tōmengä ingante, Pō cæe, angä ēñente pō guīte cæncæte ante ongongä. ³⁸ Adinque Paditeocä iñōmō, Itota quīnante mempodāmaī inte cængäā, ante guīñente wæcä. ³⁹ Iñinque mōñō Awënë tōmengä ingante,

—Mīnitō Paditeoidi iñōmō edæ owæta tōnō podato cæncadë iñō wentamō ēnenco ee adinque yabæque mēnongate bai cæmīni iñinipææ. Māincooque æñente mīni wædō beyæ ayæ wiwa mīni cædō beyæ edæ mīmōno wentamō entawëmīni iñinipa. ⁴⁰ Mīni ēñëegadë. Nē badongä iñōmō yabæque badōninque cæncadë iñō badōnāmaī ingantawogaa. Iñæmpa mōñō baō nē badongaingä iñōmō adocä mōñō òñōwoca badongacäi apa quëwëmīni. ⁴¹ Iñinque mīnitō wæætë wadāni inānite ædæmō waadedinque mīnitō māincoo pædæ godō pædæ godō cæmīni iñinque tōmancoo edæ ñā mēnongate bai ha adinque mīnitō wæætë edæ ñāō bai entawencæmīnīmpa.

⁴² Paditeoidi mīni wæquinque iñimā cæmīnīpa. Māincoo diete ganca mānimpoco ænte cō cædinque, Adocooque Wængongui qui impa, ante mōñō godongæīmpa, ante cæmīnīpa. Mīnitō māñōmaī cædinque edæ òñābo mīni mīnte pæyabo, Oguī waa cængui, ante mīni tā pete æñābo incæ edæ, Wængongui qui impa, ante pancayaboga godōmīnīpa. Māninganca cædinque mīnitō waa cæmīni incæte wadāni inānite nō cædāmaī iñinī inte Wængongui ingante waadete pōnënamä iñinīpa tōō. Iñæmpa māñinō òñābo godonguënëmīni inte mīnitō godōmenque waadete pōnëninque nō cæquënëmīni iñinīpa.

⁴³ Ayæ Paditeoidi mīni wæquinque impa. Mīnitō odōmōincōnë go guīdinque nāmanque ante pōnëninque waëmōmpaa pōñi tæ contate tomīni awædō. Ayæ waodāni nāni godonte æīmancadë godinque mīnitō nāmanque pōnëninque, Wadāni, Waa quëwëedāni, ante apænedinque mōñitō imōñite waa acædānīmpa, ante mīni wæquinque edæ ænewëmīnīpa tōō.

⁴⁴ Ayæ waocä wodido ñōmæi ongō bai mīnitō iñōmō mīni wæquinque edæ wentamō entawëmīnīpa. Māñōmaī entawëmīnīpa, ante ēñënamäi inte wadāni edæ mīni āno ante ēñente cædinque edæ oda cædānīpa, ante Itota pīngantapa.

⁴⁵ Iñinque adocanque idægoidi nāni wææ angaiñō ante nē ate ēñengä iñōmō Itota ingante apænedinque,

—Awënë, māñōmaī āninque bitō mōñitō imōñite adobai piinte ænewëmi awædō.

⁴⁶ Åñongante,

—Mīnitō dodāni nāni wææ angaiñō ante nē adimīni inte edæ mīni adobai wæquinque impa. Edæ, Cædāmaī cædāmaī, ante ancaa wææ āninque mīnitō iñōmō edæ māincoo teēmenco mō paate wadāni òñōnancapæ cō cædancapæñāni bai cæmīnīpa tōō. Ayæ wæætë ònompogonca adopogoncaque incæ gä æñancapæñāmaī cæte bai cædinque mīnitō mīni wæquinque

edæ, Æbänö cæte waa quëwenguüi, ante odömönte apænedämaï imînipa töö, ante Itota apænecantapa.

⁴⁷ Ayæ godömenque apænedinque, “Wængongui beyæ në apænegainäni inänite mînitö mæmæidi incæ në wænönäni ingadänimpa. Mînitö inömö, Në wænongainäni nänömoidi imönipa, ante bai cædinque, Wængongui beyæ në apænegainänido, ante mænönominipa töö. Mîni wæquinque edæ mänömaï cæminipa. ⁴⁸ Ìnque, Mönitö mæmæidi wænongadänimpa, ante ëñënimöni inte tömënäni wodido ante mænönominipa, äninque mînitö mæmæidi nâni cægäinö ante Ao äninque cæminipa töö,” ante Itota püingantapa.

⁴⁹ Ayæ Ìmaï ante apænecantapa. “Mänömaï beyæ Wængongui mönö në ëñengaingä inongä incæ Ìmaï ante apænegacäimpa. ‘Botö beyæ në apænedäni tönö botö në da godönäni inänite botö, Idægoidi weca gote apæneedäni, ämo gocädänimpa. Ämo gote pönäni adinque idægoidi wæætë pancadäniya inänite wænönäni wæncädänimpa. Ayæ pancadäniya inänite togænte pänäni wæcädänimpa,’ ante Wængongui do apænegacäimpa. ⁵⁰ Ìnque ñowo quëwëminî inöminite, Quinante wænöminîi, ante Wængongui edæ mînitö imînite ancæcäimpa. Wængongui beyæ në apænegainäni inänite tömengä nänö badongaiñedë dodäni mä pöni wænönäni beyæ ayæ Ìncayæ ate ñowo ganca wænönäni beyæ Ìnque edæ në wænäni tömänäni wepæ nâni näagäinö ante, Ñowo quëwëminî mäninäni tömänäni wepæ näate bai imînipa. ⁵¹ Edæ tömänäni nâni wænongainö ante edæ ñowomîni mîni pante wæquinque impa. Edæ mä pöni wænöninque docä Abedo wodi ingante adocanque wænongä wængacäimpa. Ìncayæ ate Wængongui oncö ñænæncö boyæ nâni iya täimpaa gäänë ongöñongante Tacadiya wodi ingante wænönäni nänö wænganca wadäni nanguï inäni inänite wænönäni wængadänimpa. Incæte Wængongui, Mînitö mæmæidi nänömoidi ingaimîni inte tömënäni nâni wænongai beyænque wepæ näate bai wentamö entawëñöminite botö wæætë ñowomîni imînite pämo wæcæminipa, ante Wængongui angampa,” ante Itota apænegacäimpa.

⁵² Ayæ apænedinque, “Dodäni nâni wææ angäinö ante në adimîni inömö mînitö në ëñenguënimîni inte edæ mîni wæquinque nö pönente ëñënamäi imînipa. Ayæ wadäni, Nö pönente ëñengäimpa, ante odemö guiite bai tæcæ cædäni adinque mînitö odemö tee mönete yabæ wido cæte bai cædinque tömënäni inänite edæ wææ cæminipa töö,” ante Itota apænegacäimpa.

⁵³ Ìnque apænete tao goyongä në odömönäni tönö Paditeoidi tömengä ingante nanguï püinte badinque, Ämöni ëñëninque apænebi ëñëmönii, apænebi ëñëmönii, ante ancaa änanitapa. ⁵⁴ Ayæ, Tömengä wabänö oda cæte tedecä Ìnque mönö wæætë pämö wæbaingampa, ante wææ wänonte bai cægadänimpa.

12

Wadö tedete wadö nâni cædönö ante

¹ Mänîñedë nanguï inäni æpodö müdo ganca inäni adoyömö pö bee të bee të cædinque goto gongæñönäni Itota tömengä müñæ në godäni inänite täno apænedinque, “Paditeoidi inömö wadö tedete wadö cæyönäni mînitö wæætë wadö nâni cædö ante, Päö yedæ æmpoqui bai wodö wodö cæpa, ante gomö adinque tömënäni nâni cæinö bai cædämaï iedäni. ² Adämaï incädänimpa, ante quïëmë wë wodonte ï incæ Ìncayæ ate tömää wi ænete bayonte edonque pöni bacäimpa. Ayæ quïëmë awëmö cæte ï incæ Ìncayæ ate edonque pöni acädänimpa. ³ Wëmö inömö mîni tededö incæ edæ ñäö inömö edonque pöni ëñengäimpa. Ayæ guicönë mînitö wæntæ apænedö incæ Ìncayæ ate oncömanca inö æi edæ ogæ tedete edonque ëñengäimpa,” ante Itota apænecantapa.

Æcänö ingante guiñente wæquüi, ante (Mäateo 10.26-31)

⁴ Ayæ, “Botö æmigoidi ämo ëñëedäni. Waocä baonque wænönäni ate tömengä ingante adö cæte godömenque cæquinäni. Ìnque mînitö inömö, Baonque wænönäni wæncæ wæ, äninque edæ guiñënamäi iedäni. ⁵ Wæætë edæ, Æcänö ingante guiñente wæquënimîni imîni, ante botö odömönte apænebo ëñëedäni. Waomîni imînite wænonte ate në angä inongä inte tadömengadænguipo në wido cæcä ingante inömö mînitö tömengä ingante edæ guiñëedäni. Ao. Mäningä ingante guiñente wæedäni,” ante Itota apænecantapa.

⁶ Ayæ, “Waadäni ayamöidi önonpo æmæmpoque mänimpodäni beyæ tiguitamö mentamonga ante pædæ godonte ænäni aminitawo. Incæte ayamö adocanque ingante edæ Wængongui cöwë wææ aacampa. ⁷ Edæ, Ayamöidi bacoo pöni inäni incæte önönäniye inänipa, ante në äningä inte mönö Mæmpo inömö mînitö imînite wæætë godömenque waa acampa. Ìñæmpa mönö ocagui incæ æpoguino encamöö, ante Wængongui inömö edæ do ëñente aacä apa guiñëwëminîi,” ante Itota angantapa.

*Waodāni ēñēñōnāni mōnō Itota ingante
Ao angæimpa, ante
(Māateo 10.32-33, 12.32; Māadoco 10.19-
20)*

⁸ Ayæ apænedinque, “Nāwangā āmopa, angantapa. Æcānō waodāni ēñēñōnāni botō imote Ao āninque, Bitō botō Awēnē inōmi imipa, ante āna botō Waobo nē ēñagaīmo inte tōmengā ingante wæætē Ao āninque, Bitō iñōmō botō miñæ nē gogaīmi inōmi imipa, ante Wængonguī anquedoidi ēñēñōnāni ancæboimpa.” ⁹ Wæætē edæ waodāni ēñēñōnāni botō imote nē Baa angaingā ingante botō wæætē Wængonguī anquedoidi ēñēñōnāni tōmengā ingante edæ Baa ancæboimpa,” angantapa.

¹⁰ Āninque, “Botō Waobo ēñagaīmō iñōmote waocā babæ ante wiwa angā incæte Wængonguī wæætē edæ pōnō ñimpo cæcā quēwencæcāimpa. Wæætē Wængonguī Tæiyæ Waēmō Ōnōwoca ingante godō babæ ante nē ānewengā ingante Wængonguī wæætē edæ ñimpo cædāmaī inte cōwē pancæcāimpa,” ante Itota apænecantapa.

¹¹ Ayæ, “Minitō iminite bæi ongonte tōmēnāni odōmōincōnē ænte godinque gō cædāni incæte minitō māñiñedē, Æbānō ante apænequīmoo, ante wædāmaī iedāni. Awēnēidi weca incæ nē ānāni weca incæ minitō iminite ænte māo goncædāni incæte minitō māñiñedē, Pīñāni ēñente wædinque æbānō ante nāmā wææ anguīmoo, ante ayæ, Æbānō ante apænequīmoo, ante guīñente wædāmaī iedāni.” ¹² Iñæmpa Wængonguī Tæiyæ Waēmō Ōnōwoca māñiñedē incæ, Æbānō wææ anguī, ante odōmonte angā ēñēninque minitō wæætē māñinō ante wææ ancæminimpa,” ante Itota apænegacāimpa.

Māincoo nāni æñēmāmo ante

¹³ Tæcæ apæneyongā godongāmæ ongōnāni ongōninque adocanque Itota ingante,

—Awēnē, botō wæmpo wodi mangaincoo incæ mæmpo wodi omæ ingaīmæ incæ botō mēmō ingante tæcægedē āmi pā cæcā æmōe.

¹⁴ Āñongante Itota,

—Botō nē apænte āmo imopa diyæ āmo pā cæquingāā.

¹⁵ Āninque godongāmæ ongōnāni inānite apænedinque,

—Wī māincoo nanguī ænte beyænque mōnō quēwengæimpa cæminii. Mini māincoo æñēmāmo ante edæ ñimpo cædinque ee aedāni.

¹⁶ Āninque Itota, Wængonguī Awēnē æbānō cæquingāā, ante ēñencædānimpa, ante imæca quēwēnāni nāni cæinō ante odōmōninque iñmaī apænecantapa.

—Adocanque nē nanguī ēacā inte tōmengā omæ wainguipoga nanguī pōni

pæ. ¹⁷ Adinque tōmengā iñōmō, “Æbānō cæquīmoo. Botō cænguī da wenguincō ñæñæncō impa diyæ da wente manguīmoo.” ¹⁸ Āninque, “Iñmaī cæcæboimpa. Guiyancō oncō bæ tate ñæñæncō wæætē mæñoncæboimpa. Mæñōninque tōmēnoncoo tōnō māincoo wæætē māñincōnē tōmancoo da wencæboimpa.” ¹⁹ Ayæ nāmanque apænedinque botō, Botō cænguī tōnō māincoo nanguī wædopo ba beyæ eyepæ mānimo inte botō guēmancæboimpa. Ōnonque cænguī nanguī cænte nanguī bete tocæboimpa,” ²⁰ Ante nāmanque pōñēñongā wæætē nē māningā ingante Wængonguī, “Ēñēnāmaī cæbipa tōō. Nōwo woyowotæ incæ edæ, Idæwaa quēwēmipa, āmo wæncæbiimpa. Wæmi adinque edæ bitō māincoo iñi edæ æcānō māincoo baquī,” ante Wængonguī angampa, ante Itota, Māninque ante apænebopa, angacāimpa. ²¹ Ayæ tōmēnāni inānite wæætē, “Wængonguī māñōmaī angā ēñente wædinque minitō wæætē iñmaī ante pōñencæminimpa. Æcānō, Tōmēmoque quī, ante da da wente māna iñōmō tōmengā Wængonguī ayongā nē omæpocā bai inte omæwocā ingampa. Nē ēacā wodi nānō wænō bai tōmengā adobai bate wæquīnō anguēnē,” ante Itota apænegacāimpa.

*Tōmengā wēñcēnāni inānite Wængonguī aa-
campa, ante*

(Māateo 6.25-34)

²² Itota māñiñedē tōmengā miñæ nē godāni inānite, “Īninque botō minitō iminite āmopa. Inguipoga mini quēwenguīmāmo ante wædāmaī iedāni. Quīmōnō impa cænguīmoo, ante, Quincōdō impa wēñaquīmoo, ante wædāmaī iedāni.” ²³ Cænguinque cæninque dicæ quēwēmongaa. Weocooque wēñadinque dicæ quēwēmongaa. Mōnō quēwenguīmāmo iñōmō godōmenque impa. ²⁴ Gapatai iñōmō cænguī ante dicæ mīnte pæ ate tā pete māñāniyaa. Incæte Wængonguī eyepæ godongā cæñāni aedāni. Minitō guiquēnē oōmā ēadāni bai ināmaī iñōminite Wængonguī minitō iminite godōmenque waa adinque eyepæ pōnongā cæminipa. ²⁵ Wængonguī nānō anganca quēwēninque minitō nanguī cædinque wantæ iñō incæ ædō cæte godōmenque quēwenguīmīni. ²⁶ Māñinō wædænque cæquī incæte wī eyepæ cæminī inique minitō, Botō quēwenguīnō ante wadō wadō cæcæboimpa, ante quīnante wæminii,” ante Itota angantapa.

²⁷ Ayæ, “Ōngai guiquēnē weocoo ante daque daque dadāmaī inte wodonte tināmaī iñōnānite Wængonguī weocoo waēmoncoo bai godongā waa pōni ēnopa. Awēnē Tadōmōo wodi waēmoncoo ēgainingā incæ wī ongai bai ēñagacāimpa. Ōngai iñōmō godōmenque waēmō pōni ēnopa. ²⁸ Gaguīmæ

iñōmō iīmō ate edæ gongapamō nē tanguinque ñōwoōnæ pæ incæte Wængongui waēmō pōnongā ēnopa. Ininque, Waēmō ēnodō nē pōnongā inte mōnō imonte godōmenque eyepæ pōni pōnongā ænte ēñacæimpa, ante pōnēmīnyaa. ²⁹ Minitō cængui ante bequi ante æñente wædāmai iedāni. Edæ, Æbānō cæte ænguimōō, ante wædāmai iedāni. ³⁰ Inguipoga wayōmō nāni ēñēnāmai incabo wayōmō nāni ēñēnāmai incabo mānīnō ante wæyōnāni mīnitō guiquēnē, Mōnō ænguēñēnō ante mōnō Mæmpo iñōmō edæ do ēñengampa, ante pōñēninque guñente wædāmai iedāni. ³¹ Wæætē Awēnē Odeye nempo quēwencæte ante nanguī cæyōmīnite tōmengā wæætē mīnitō ænguēñēnō ante do edæ eyepæ pōni pōnongā æncæmīnīmpa,” ante Itota apæñecantapa.

Mōnō ēaquincoo ōōncædē do ēamōmpa, ante (Māateo 6.19-21)

³² Godōmenque apæñedinque Itota, “Botō nē aabo iñōmote mīnitō botō miñæ mīni gocabo iñōmō wædæenque pōni imīni incæte edæ guñente wædāmai iedāni. Iñæmpa mīnitō Mæmpo iñōmō, Awēnē Odeye nempo quēwencæmīnīmpa, ante pōnō cædinque waa tocampa cæmīni. ³³ Minitō iñōmō, Ō ænāni dæ āñōmō cayæ cænāmai iñōmō botō māincoo wodāmai inguincoo inte edæ cōwē mæ ongongæimpa, ante cædinque ōōnædē iñōmō wo ææntodonte bai cæedāni. Wodāmāncadedē da wente bai cædinque mīnitō māincoo godonte æninque ōmæpodāni wæwēnāni inānite wæætē godōmīni æncædānīmpa. ³⁴ Mīni waocabo iñōmō mīnitō māincoo ongōñōmō māniñōmō quēwencæte ante wæmīni imīnīpa, ante adinque botō, Ōōnædē iñōmō wo ææntodonte bai cæte māedāni, antabopa,” ante Itota apæñecantapa.

Tōmāā eyepæ cædinque wānō cōedāni, ante

³⁵ Ayæ apæñedinque, “Waadāni, Awēnē beyæ ante cæcæimpa, ante weocoo eyepæ wēñadinque, Gongapæncade waēmō bæcocæimpa, ante eyepæ pōni cædāni bai mīnitō adobai eyepæ pōni cædinque, Awēnē poncæcæimpa, ante wānō cōedāni. ³⁶ Edæ waodāni tōmēnāni awēnē wayōmō gote ææmæ bete ocæ ēmænte ponte aa pecā ēñēninque quingæ wi ænecæte ante wānō cōnāni bai cædinque mīnitō adobai, Awēnē poncæcæimpa, ante wānō cōedāni. ³⁷ Edæ awēnē ponte ayongā tōmengā ingante nē cædāni wānō cōnāni adinque tōmengā wæætē edæ pōnō waa cæcā æninque tōmēnāni iñōmō tocædānīmpa. Mīnitō imīnite nāwangā āmopa. Nē wānō cōnānāni inānite awēnē pōnō angā ate tæ contadāni ate tōmengā nē awēnē inongā

incæ, Nanguī cæcæimpa, ante weocoo wēñadinque tōmēnāni weca pōninque edæ pōnō cæcā æncædānīmpa. ³⁸ Edæ woyowotæ tæcæ bæcā incæ ayatadāa wæicā incæ pōninque tōmengā nē wānō cōnānāni inānite waa adinque pōnō waa cæcā adinque tōmēnāni iñōmō watapæ edæ tocædānīmpa. ³⁹ Wæætē oncō nē ēacā guiquēnē, Nē awēnō æncæ cædongā æyedēnō ponguingāā, ante ēñēninque do wææ cæcā bai nē awēnō æncæ cædongā wæætē edæ pō guite ænāmai incædongāimpa, ante apænebo ēñente pōñēedāni. ⁴⁰ Minitō adobai, Waocā nē ēñagangā æyedēnō ponguingāā, ante ēñēnāmai imīni inte edæ tōmānō eyepæ cædinque edæ wānō cōedāni,” ante Itota angacāimpa.

Awēnē ingante nē cæda, ante (Māateo 24.45-51)

⁴¹ Mānōmai angā ēñēninque Pegodo, –Mānīnō odōmote bitō apænedō ante mōnitō adomōnique ēñencæmōnīmpa, ante apænebitawo. Wæætē edæ, Wadāni tōmānāni ēñencædānīmpa, ante apænebitawo.

⁴² Āñongante mōnō Awēnē wæætē odōmoncæte ante apæñedinque, “Inguipoga awēnē iñōmō, Æcānō nē ēñengā inongā inte botō quincōo ante ædæmō aacā inguingāā, āninque, Mānōmai inte cæcā ingante adinque botō āmo ate tōmengā nē angā badinque botō oncōnē nē cædāni inānite ædæmō aadinque cængui eyepæ iñonte godongā cæncædānīmpa, angampa. ⁴³ Ininque awēnē wayōmō gote ponte ayongā, Nē cæcā botō ānō ante ēñente cæcampa, ante adinque awēnē wæætē tōmengā ingante godō waa cæcā ate nē waa cæcā iñōmō edæ waa tocæcāimpa. ⁴⁴ Minitō imīnite nāwangā ante apænebopa. Nē ēñente cædingā ingante awēnē, Bitō botō māincoo tōmancoo edæ nē aabi bacæbiimpa, ancæcāimpa.”

⁴⁵ “Incæte nē cæcā wæætē, Botō awēnē æiquedō ponguingāā, ante pōñēninque tōmengā tōnō awēnē ingante nāni godongāmæ cæcabo onguñæñāni incæ onquiyæñāni incæ tōmēnāni inānite tæi tæi pāninque cængui nanguī cæninque tī nāmæ nanguī bete quidi quidi dowænte bacā. ⁴⁶ Ininque tōmengā, Æōnædō ponguingāā, ante wædāmai iñongante, Æyedēnō ponguingāā, ante ēñēnāmai iñongante edæ awēnē iñontobæ pongā wæbaingampa. Ponte adinque awēnē wæætē māningā nē ēñēnāmai cædingā ingante wido wido todinque nē pōñēnāmai ināni weca māo wido cæbaingampa,” ante Itota apæñecantapa.

⁴⁷ Ayæ, “Awēnē ingante nē cæcā incæ awēnē nānō ānō ante ōñōmoncaque ēñēninque wīi eyepæ cædinque ēñēnāmai cæcā ininque awēnē iñōmō tōmengā ingante

nanguĩ tæi tæi pancæcäimpa. ⁴⁸ Ayæ wæætê edæ, Awênê æbänö angää, ante êñênämaĩ inte êmoncacä guiquênê tömengä nänö panguinque wênæ wênæ cæcä incæte tömengä ingante wædænque tæi tæi pancæcäimpa, ante Itota apænecäimpa. Edæ awênê æcänö nempo nanguĩ pönongä ænte næængä iñömö tömengä ingante Awênê wæætê, Bitö adodö nanguĩ pönömi æmoe, ancæcäimpa. Ayæ, Botö mäincoo nanguĩ ongoncoo iñonte bitö aacæbiimpa, ante æcänö ingante awênê angää tömengä ingante, Bitö godömenque nanguĩ cæcæbiimpa, ante awênê ancæcäimpa,” ante odömöninque Itota apænecäimpa.

Näwæ gocædänimpa, ante cæcæte ante pômopa, angampa

(Mäateo 10.34-36)

⁴⁹ Aninque Itota godömenque apænedinque, “Botö inguipoga gonga bai tänoncæte ante pongaimo inte edæ, Do tänonte bai edæ waa tocædömoimpa. ⁵⁰ Ayæ botö nantate wæwencæte ante pongaimo inte botö nantate wæganca nantate botö wæquênênö ante iinque cæcæte ante wæbopa. ⁵¹ Minitö, Inguipoga quëwênäni piyænê cæte wæætêdö wæætê cædämaĩ inte quëwencædänimpa, ante cæcæte ante Itota pongaingä ingampa, ante pönëminitawo. Iñæmpa wadö ämo êñeedäni. Botö inguipoga pömo beyænque wæætêdö wæætê pincædänimpa. ⁵² Iñcayæ ate önonpo æmæmpoqe nani owocabo mänimpodäni iñönänite mengäa go adocanque inäni iñömö botö beyænque mënäa inate næëmæ piinte bacædänimpa. Ayæ wæætê mënäa ina incæ mengäa go adocanque inäni inänite wæætê næëmæ piinte bacædäimpa. ⁵³ Botö emöwo beyæ mæmpocä tömengä wengä onguĩængä ingante næëmæ piinte bacæcäimpa. Wëñængä wæætê mæmpocä ingante næëmæ piinte bacæcäimpa. Wäänä tömënä wengä onquiyængä ingante wæætê næëmæ piinte bacædäimpa. Wæætê wäänä ingante wëñængä incæ næëmæ piinte bacæcäimpa. Biyongä ingante nänö wæntedä incæ næëmæ piinte bacædäimpa. Nänö wæntedä inante biyongä ingante næëmæ wæætê piinte bacæcäimpa,” ante Itota tömengä miñæ né godäni inänite apænecäimpa.

Æbänö oo baquimpa, ante êñengæimpa, ante

(Mäateo 16.1-4, 8.11-13)

⁵⁴ Ayæ godongämæ ongönäni inänite apænedinque, “Nænque guiidö gämæñö boguimö wentamö pö adinque minitö, Cöönæ wentamö wocæmpa, äñömini edæ do cæpa. ⁵⁵ Ayæ wæætê woboyæ betamonca inö pæmæ pö adinque, Ocoi näwanca cæpa, ante tedeyömini dobæ ocoi näwampa.

⁵⁶ Inguipoga gomö adinque öönædê æmö adinque minitö, Æbänö cæcæte ante emöö, ante edæ do êñëminipa. Wæætê, Inguipoga wayömö wayömö æbänö cædänii, ante adinque minitö, Wængongui oo pöni cæquingänö anguênê, ante quinante wii êñëminii. Edæ wadö tedete wadö cæmini iminipa töö,” ante Itota tömënäni inänite piingacäimpa.

Në piingä ingante waadete apænecæimpa, ante

(Mäateo 5.25-26)

⁵⁷ Ayæ edæ, “Æbänö cæte nö cæquii, ante minitö tömëminique apænte ante cæquênëmini iminipa. ⁵⁸ Në piinte angä iñömö bitö imite edæ, Wiwa cæbipa, ante awênê weca ænte mäocä idömæ godinque bitö guiquênê tömengä ingante waadete apænëbi êñëminique tömengä wæætê piyænê cædinque ee abaingampa. Wæætê edæ wii waadete apænëbi iinque tömengä në apænte angä weca godömenque ænte gobaingampa. Në apænte angä wæætê bitö imite wææ wänongä ingante pædæ godongä æninque wææ wänongä wæætê tee mönebaingampa. ⁵⁹ Tee mönecä iinque bitö quiemê beyæ debe imi iinque edæ tömanta pöni di godonte ate tabaimipa, ante ämo êñëmaimipa,” ante Itota apænecäimpa.

13

Occæ emænte Wængongui gämænö ponguênëmini iminipa

¹ Mäniñedê wadäni Itota weca pöninque iimäi ante apænedäni êñengantapa. Gadideabæ quëwênäni, Wængongui qui, ante cæningä ingante tæcæ wæñöñönänite Pidato guiquênê tömënäni inänite iñontobæ wæñöninque tömënäni wepæ cæningä wepæ tönö dibæ cæcantapa. ² Ante tedeyönäni Itota wæætê, “Gadideabæ quëwênäni wadäni pönömenque wênæ wênæ cædäni iñönäni mänimpodänique godömenque wênæ wênæ cædäni inte mänömaĩ wæñänipa, ante minitö pönëmini awædö. Iñæmpa Gadideabæ quëwênäni tömännäni adobai wênæ wênæ cædäni iñönäni mäninänique edæ wæñänipa. ³ Wii mänömaĩ impa, ämo êñëmaimipa. Tömënäni wii godömenque wênæ wênæ cædinäni inte wæñänitapa. Minitö guiquênê wênæ wênæ muni cædinö ante wæwente pönëninque iimpo cædämaĩ imini iinque minitö tömämüni adobai wæmaimünipa,” ängantapa.

⁴ “Ayæ Eedotadêe iñömö tömënäni nani gomö aquincö Tidoe nani änoncö tæ wææñonte woadäni dietiocho ganca inäni capo wæñäni iinque minitö, Tömënäni godömenque wênæ wênæ cædäni inte wæñänipa, ante pönëmini awædö.

Īñæmpa Eedotadēē quēwēnāni tōmānāni adobaĭ wēnæ wēnæ cædāni ĩñōnāni mānimpodānique edæ wænānīpa. ⁵ Wīi mīnitō pōnēnō baĭ ĩmpa, āmo ēñēmāĭmīnīpa. Tōmēnāni wīi godōmenque wēnæ wēnæ cædināni ĩnte wænānitāpa. Mīnitō guiquēnē wēnæ wēnæ mīni cædinō ante wæwente pōnēninque ĩmpo cædāmaĭ ĩmīni ĩninque mīnitō tōmāmīni adobaĭ wæmāĭmīnīpa,” ante Itota apænecantāpa.

Iigowæ òmæca ongompa, ante odòmante apænecampa

⁶ Ayæ Itota, Wængonguĭ Awēnē æbānō cæcāā, ante ēñencædānīmpa, ante ĩmæca quēwēnāni nāni cæinō ante odōmōninque ĩmaĭ apænecantāpa. “Waoçā tōmencodē iigowæ ĩnte pæ ate tōmenca ante ponte ayongā edæ dæ òmæcawæ ongompa. ⁷ Ate wædinque tōmengā ocæ ēmænte godinque tōmencawæncoo nē aacā ĩngante apænedinque, ‘Edæ mēa go adoque wadepo tōmenca ante gote ayōmo edæ mānīi iigowæ cōwē òmæcawæ ònonque wōæwæ ongompa cæbii. Òmæcawæ wææ ongōwæ adinque wido tate æmæwo wido cæe.’ ⁸ Āñongā tōmencawæncoo nē aacā wæætē, ‘Awēnē, ee ongōe. Botō iigowæ ònōwa gāānē ææ wodinque māmo wagada goĭ ænte wempo cædente tee moncabo ate wadepo ate bitō ongōñōmi edæ, ⁹ do incabāimpa. Wæætē wadepo ate ayōmite òmæcawæ ate wædinque edæ æmæwo wido tate wido cæbāimpa,’ ante nē cæcā angampa.” Māninque ante odòmante apænebopa, ante Itota apænegacāimpa.

Itota bocæ bocæ wædingā ĩngante cæcā ate waa bacampa

¹⁰ Guēmanguĭōnæ ĩñonte Itota oodeoidi odōmōncōnē go guidinque odòmante apænecantāpa. ¹¹ Onquiyængā mānīñōmō ongongā ĩñōmō tōmengā dietiocho wadepo ĩñonte wēnæ guicā ate bocæ bocæ wæwēningā ĩnte ædō cæte adiyæ ængæ gantiquingāā. ¹² Tōmengā ĩngante adinque Itota aa pecā pongā ate,

—Onquiyæmi, bitō bocæ bocæ wædō ante ñōwo botō ĩmæncæpote baĭ cæbo ate bitō waa babīpa.

¹³ Āninque tōmengā ĩngante gampocā ate ĩmæncæpote baĭ badinque onquiyængā ĩñōmō adiyæ gantidinque wæætē, Wængonguĭ bitō ñāō baĭ ēmōmi ĩnte waa pōnī pōnō cæbi æmopa, ante watapæ apænecantāpa. ¹⁴ Guēmanguĭōnæ ĩñonte Itota mānōmaĭ cæcā waa bacā adinque tōmēnāni odōmōncō awēnē guiquēnē pīnte badinque godongāmæ ongōnāni ĩnānite,

—Quimæ quēwēmīni. Ònompō æmæmpoque go adoñæque mōnō cæōnæ ĩñonte mīnitō waa bacæte ante

ponguēnēmīni ĩmīnīpa. Guēmanguĭōnæ ĩñonte edæ cædāmaĭ ĩnguēnē quēwēmīni.

¹⁵ Ante pīñongante mōnō Awēnē wæætē,

—Mīnitō wadō tedete nē wadō cædōmīni ĩnte ēñēedāni. Mīnitō cæningā ĩñōmō wagada incæ bodo incæ gue ænente wæyongante mīnitō guēmanguĭōnæ ĩncæte cōwē ñī cæyænte æpæ wedeca ænte māo gōnōmīni gongænte becampa. ¹⁶ Wæætē māningā onquiyængā ĩñōmō Abadāō wodi pæringā ĩñongante Tatāna dietiocho wadepo ĩñonte goti winte baĭ cæcā wædingā ĩñongante mīnitō ĩñæmpa guēmanguĭōnæ ĩ beyæneque edæ, Tōmengā ĩmæncæpodāmaĭ incæcāimpa, ante quīnante wææ āmīni.

¹⁷ Angā ēñente wædinque nē pīnte ānāni guingo imonte wæyōnāni godongāmæ ongōnāni guiquēnē, Bamōnengæ pōnī Itota waa pōnī cæcampa, ante adinque nangui togadānīmpa.

Mōotatamō guidimō ante odòmante apænecampa

(Māateo 13.31-32; Māadoco 4.30-32)

¹⁸ ĩninque Itota tōmēnāni ĩnānite, “Wængonguĭ Awēnē Odeye nempo nāni quēwencabo ĩñōmō quīnō baĭ ĩnānī. Edæ, Ābānō nangui yebænte badānī, ante botō ĩnguipoga quīnō pæte yebænte baĭ ĩ adinque, Mānīnāni adobaĭ yebænānīpa, ante ēñenguĭ. ¹⁹ ĩmaĭ ĩmpa. Waoçā mōotatamō tōmēmō ænte māo tōmēmōncodē quiyacā bocate pæ ĩninque ñænæñeque bayonte ayamōidi pōninque awænēmæ ongōnānīpa. Mōotatamō guidimō incæ mānōmaĭ pæ baĭ Wængonguĭ Awēnē nempo quēwēnāni ĩñōmō wædænque ĩñīnāni incæ nangui yebænguīnāni ĩnānīpa,” ante Itota odòmante apænegacāimpa.

Pāo yedæ æmpoquĭ da wenguĭ ante odòmante apænecampa

(Māateo 13.33)

²⁰ Itota ayæ angantāpa. “Wængonguĭ Awēnē ĩñōmō tōmengā nempo quēwēnāni ĩnānite æbānō cæcāā, ante odōmōncæte ante botō, ĩmaĭ cæcampa, ante odòmante apænebo ēñenguĭmīni. ²¹ Edæ ĩmaĭ ĩmpa. Onquiyængā ñænængade tee mangūncade ænte tee māninque ædīna nāni āmō ænte mēmpoga go adopoque da wēninque ayæ, Pāo yedæ æmpocæĭmpa, ante adoyōmō pōnō da wēninque wempo wempo ædæmō cædengā ate pāōmo yedæ æmpote tōmāo nāāmænta bapa. Yedæ æmpote ate pāōmo tōmāo nāāmænta ba baĭ òōnædē Awēnē nempo mīni quēwencabo ĩñōmō tōmāmīni nō ēñente bamīnīpa,” ante Itota odòmante apænecantāpa.

Odemō guiyānemō, ante (Māateo 7.13-14, 21-23)

²² Itota māniñedē Eedotadēē taadō godinque nanguī nāni quēwēñōmō wodo pænta godinque wædænque nāni quēwēñōmō wodo pænta godinque wayōmō wayōmō gote odōmonte apænecāiŋpa.

²³ Goyongante adocanque,
—Awēnē, bitō æmi beyænque nē quēwēnguīnāni iñōmō wædænque inānīpa, āmitawo.

Åñongante Itota,

²⁴ —Odemō guiyānemō guicæte ante edæ nanguī cædāni. Edæ nanguī ināni incæ guicæte ante cædinque guidāmaī incædānīpa, āmo ēñēmaīmīnīpa. ²⁵ Iīmaī impa. Oncō nē ēacā ængæ gantidīnque odemō tee mōnecā adinque mīnitō iñōmō tōmengā oncō boyæ gote ongōninque aa pedinque, “Awēnē, wi ænebi guiquimōnīi.” Ante wæyōmīnite tōmengā, “Æmīnidō iīmīnīi, ante ayæ, Ædōnō gāmæñō quēwente pōmīnī iīmīnīi, ante botō adāmaī iŋmopa,” ancæcāiŋpa.

²⁶ Angā ēñēninque mīnitō wæætē, “Iñæmpa mōnitō bitō tōnō godongāmæ cænte becongāmōnīpa. Ayæ bitō mōnitō taadō ponte cægōninque odōmonte apænēbi ēñengamōnī ae,” ancæmīnīpa. ²⁷ Åñōmīnī tōmengā iñōmō, “Æmīnidō iīmīnīi, ante, Ædōnō gāmæñō pōmīnī iīmīnīi, ante botō ēñēnāmaī iŋmopa. Edæ do antabopa. Nōwo nē wiwa cægāimīnīi inte edæ botō weca ongōnāmaī. Edæ wadæ goedāni, āmopa,” ancæcāiŋpa, ante Itota apænecantapa.

²⁸ “Iñinque mīnitō gomō ayōmīnī Wængonguī beyæ nē apænecānāni tōnō dodāni Abadāō wodi Itæca wodi Aacobo wodi tōnō tōmānāni Wængonguī Awēnē Odeye ōmæ godongāmæ ongōñōnāni mīnitō iīmīnīte edæ yabæque wido cæcā ate wædinque mīnitō wæætē guingo imonte piinte wædinque edæ Ca ca wæcæmīnīpa. ²⁹ Wadāni wæætē edæ nænque tamōnō pōnāni tōnō nænque guidō pōnāni ayæ betamonca æmatæ æmatæ pōnāni tōnō Wængonguī Awēnē Odeye oncōnē ponte tæ contadinque ææmæ bete cængoncædānīpa. ³⁰ Iñinque ayæ ate ēñēnāni incæ pancadāniya yæcado ongōnāni bate toyōnāni mīnitō guiquēnē do ēñēnīnīi inte yæcado ongōmīnī incæte pancamīniya wæætē yæmiñæ gote ongote wæcæmīnīpa,” ante Itota apænecāiŋpa.

Eedotadēē quēwēnāni beyæ ante Itota wæcampa

(*Māateo 23.37-39*)

³¹ Māniñedē Paditeoidi pancadāniya tōmengā weca pōninque,

—Awēnē Edode bitō imite wænoncæ angantaye. Bitō ongōnāmaī wayōmō wadæ goe.

³² Ånāni ēñēninque Itota,

—Edode congāñe bai babæ cædinque iñongante mīnitō tōmengā weca godinque, Itota iīmaī angampa, ante apænemīnī ēñengædāni. “Edode ēñēmi. Botō ñōwoñæque baōnæque wēnæidi inānite iñque wido cædinque iñque godō cæbo waa badāni ate iñabæ guingā iñonte botō edæ māniñedē edæ idæwaa cægāimo bacæboiŋpa, ante Itota apænecampa,” ante apænemīnī ēñengædāni, āmopa. ³³ Incæte botō ñōwoñæ godinque baōnæ godōmenque godinque edæ waōnæ godōmenque botō goquēñēnō godinque Eedotadēē gocæboiŋpa. Edæ Wængonguī beyæ nē apænecānāni incæ Eedotadēē iñōmō tōmēnāni nāni wængāiñōmō iñonte botō Wængonguī beyæ nē apænēbo adobo inōmo inte edæ ædō cæte wayōmō ongote wænguimoo.

³⁴ Ante apænedinque Itota Eedotadēē iñōmō quēwēnāni beyæ ante pōnente wædinque, “Eedotadēē quēwēmīnī ēñēdāni, angantapa. Wængonguī beyæ nē apænecānī inānite mīnī wænongāincabo inte ayæ Wængonguī nānō da pōñōnāni inānite dicaca tacamīnī iñōmīnīte botō iñōmō mīnitō iīmīnīte waadete pōñō cæinente nanguī wæbopa. Tawadiya wæmōnā iñōmō, Botō wēnāni, ante gompodinque tæcæñēmæ wæā pōñō ō ænā bai botō adobai, Botō wēnāni pōdāni, ante æpogadō āñōmote mīnitō, Wīi pōiñente awædō, ante Baa āmīnī wætabopa. ³⁵ Nōwo iñōmō mīnitō onconcoo edæ ōnonconcooque baconcoo tamēñedāni. Nōwo edæ botō dæ āñōmo mīnitō, ‘Awēnē Wængonguī ēmōwo beyænque pōninque bitō toquinque edæ waa cæcæbiŋpa,’ ante mīnī anguinganca mīnitō edæ botō imote adāmaī incæmīnīpa ante āmo ēñēdāni,” ante Itota apænecāiŋpa.

14

Æpæ ēñate nē wædongā ingante Itota cæcā waa bacā

¹ Itota guēmanguñōnæ iñonte Paditeoidi awēnē oncōnē cæncæte ante go guiyongante godongāmæ ponte ongōnāni guiquēnē, Itota æbānō cæquingā, ante waa agōñānitapa. ² Tōmengā weca adocanque æpæ ēñate nē wædongā inte a ongongā. ³ Adinque idægoidi nāni wææ angainō ante nē ate ēñēnāni tōnō Paditeoidi inānite apænedinque Itota iīmaī angantapa.

—Wængonguī æbānō ante wææ angacāi. Waa bacædānīpa, ante guēmanguñōnæ iñonte mōñō waa cæquēñēmō iñōō, ante pōñēmīnī. Wæætē edæ, Guēmanguñōnæ iñonte cædāmaī inguēñēmō iñōō, ante pōñēmīnī.

⁴ Åñongā edæ pæ wēñedānitapa. Itota iñōmō edæ nē æpæ ēñate wædongā ingante gampocā waa bacantapa. Ayæ, Goe, angā

gocantapa. ⁵ Angä gocä ate Itota wæætë tömënäni inänite iimäi angantapa.

—Minitö waocabo iñöminite adocanque tömengä wëñængä onguifængä incæ tömengä wagada onguifængä incæ æpæ ante nani ææ wodifñömö goyæ guicä iñinque mæmpocä iñömö guëmanguionæ iñonte edæ dicæ töö tadönämai inguingää. Mänömai goyæ guicä wædinque minitö tömäini guëmanguionæ i incæte do gote näwæ gongæninque edæ quingæ töö tadömaimünipa.

⁶ Ante Itota añongante tömënäni ædö cæte wæætë angünänii. Edæ pæ wëenedänitapa.

Monguimæno ante awënë beyæ gote ne wente ænani, ante

⁷ Ayæ Paditeo awënë nänö ne añedänäni pöningue nämanque ante pönëningue, Yæcado ongöñömote botö imote waa cæädänimpa, ante cædinque waa pöni tæ contai iñömö tæ contadäni Itota acantapa. Iñinque tömengä, Wængongui Awënë nempo quëwëninque æbänö cæquii, ante ëñncæädänimpa, ante imæca quëwëänäni nani cæinö ante odömöningue iimäi apænegacäimpa.

⁸ —Bitö imite, Monguimæno pö bee, ante ne wente ængä ëñëningue bitö pöningue yæcado inö waëmö iñömö tæ contadämai incæbiimpa. Iñæmpa wacä tömengä nänö ne waadecä pongä iñinque ⁹ minatö iminate ne wente ængä iñömö bitö weca pöningue, “Bitö gä goyömi botö ne waadecä wæætë tæ containgä,” ante ämaingampa. Iñinque bitö gä godingue wii waëmö iñömö wæætë tæ contadingue guingo imonte wæbäimipa. ¹⁰ Wæætë ne wente ængä ëñëningue bitö monguimæno pöningue yæmifñæ pöni wënæ wënæ iñömö tæ contæ. Edæ ne wente ængä ponte ayongä bitö wënæ wënæ iñömö tæ contabi adingue tömengä wæætë bitö imite, “Botö ne waadebi inömi inte bitö ñowo yæcado pöni pö tæ contæ, ämopa,” ämaingampa. Mänömai angä ëñëningue godongämæ cæ cönäni iñömö, Ne ëacä nänö ne waadebi bitö imi amönipa, ante bitö imite waa abainänipa. ¹¹ Edæ, Botö nämä ne waa cæbo inömo inte edæ yæcado ongonguënemo imopa, ante ne cæcä iñömö tömengä iñömö wææntodontö bai guingo imonte wæcæcäimpa. Wæætë edæ, Botö önömoque imopa, ante yæmifñæ ne ongongä iñömö tömengä guiquënë ængö cæte tocæcäimpa, ante Itota apænegacäimpa.

¹² Tömënäni inänite iñinque apænedingue ne wente æningä ingante Itota godömenque angantapa.

—Bitö, Pö cæe, ante ææmæsnoca wente æninque bitö æmigoidi inänite wente ænämai ie. Bitö töniñadäni inänite wente ænämai ie. Bitö guidëänäni inänite wente ænämai ie. Eyequei owote mäincoo ne ëadäni

inänite wente ænämai ie. Edæ bitö tömënäni inänite wente æmi iñinque tömënäni wæætë bitö imite wente æmäinänipa, ante wææ cædinque bitö iñömö, Botö godönö wæætë eyepæ pönönäni mäningue æninque öönæde wæætë ænämai imaimopa, ante wædinque edæ tömënäni inänite wente ænämai ie.

¹³ Wæætë ææmæno ante wente æninque ömæpodäni inte wæwënäni inänite cömante wæwënäni inänite bee fiante wæwënäni inänite babetamönäni inänite wente æe. ¹⁴ Mäninäni inänite wente æninque edæ bitö toquinque ingæimpa. Tömënäni wæætë ædö cæte adopo pönönäni ænguimii. Edæ ne nö cædäni nani nani ömæmonguionæ iñinque bayonte edæ mönö Mæmpo Wængongui incæ bitö imite adopo pönongä æncæbiimpa, ante Itota apænegacäimpa.

Ææmæ ante Itota odömoncæte ante apænegacäimpa

(Mäateo 22.1-10)

¹⁵ Angä ëñëningue Itota tönö ne cængongä adocanque tömengä ingante apænegacäimpa.

—Wængongui Awënë Odeye pongä ate tömengä tönö godongämæ ne cængä iñömö edæ tömengä nänö watapæ toquinque cænguingä.

¹⁶ Apænegä ëñëningue Itota wæætë tömengä ingante odömoncæte ante apænegacäimpa.

—Waocä ææmæno ante cædinque nangui inäni inänite mäo apænedingue, Iñcayæ ate ämo ate pö bete cæedäni, ante cæcantapa. ¹⁷ Ææmæno beyedë iñinque bayonte tömengä ingante ne cæcä ingante äninque, “Iñönæ ææmæno iñinque cætimpa. Pödäni,” ante bitö tæ tæ wente ænte pöe, ante da godongä.

¹⁸ Godingue wente ængä ëñëningue do nänö ne añedänäni wæætë, Ædö cæte ponguimöni, ante tömäni adoyömo wæädänipa. Tännocä iñömö, “Botö ömæ ante tæcæ godonte æninque botö acæ goquimo inte botö ææmæ beca godämai imopa. Incæte ne wente æningä weca adodö gote bitö botö beyæ apænebi ëñëningue tömengä wæætë botö imote pünämai incæcäimpa,” angampa. ¹⁹ Wacä guiquënë, “Wagada onguifñæna nana goti wimencacaya nana goti wimencacaya önompo æmæmpoque ganca mänimpodäni inäni inänite godonte ænimo inte botö, Æbänö cædäni, ante acæ gocæ cæbopa. Iñinque botö ææmæ beca pönämai imo incæte awënë ingante ämi botö imote pünämai incæcäimpa,” angampa. ²⁰ Wacä guiquënë, “Botö tæcæ mönimo inte ædö cæte ponguimoo,” angä. ²¹ Æñëningue ne cæcä iñömö awënë weca adodö pöningue tömënäni nani cædönö ante tömäi apænegä ëñente wædinque ne ëacä iñömö ængui badingue tömengä ingante ne cæcä ingante,

“Bitö mönö quëwëñömö wacä taadö wacä

taadó ñænænō incæ guiyānō incæ tōmāo gote adinque nē ōmæpodāni inānite, nē cōmāināni inānite, nē biyaate ināni inānite, nē babetamōnāni inānite adinque ænte pōe.”
²² Angā ēñente cædinque nē cæcā wæætē awēnē ingante, “Awēnē, bitō āninō ante do cæbo incæte bitō oncō wīi eyede impa.”
²³ Ante apænecā ēñente wædinque awēnē wæætē, “Ōnōmæca iñōmō ñænænō incæ guiyānō incæ gote diqui diqui minte wadāni inānite ate āmi pōnāni ininque botō oncō eyede ponte cæncædānimpā.”
²⁴ Edæ bitō imite āmopa. Wēēñēdē botō wente ænināni incæ bedāmai incædānimpā,” ante nē ēacā angampā. Māninque ante apænēbopa, ante Itota apænēgacāimpā.

Itota miñæ gocæte ante æbānō cæquīi, ante

(Māateo 10.37-38)

²⁵ Itota tōnō nangui ināni godongāmæ godānitapā. Tōmēnāni inānite apænecæte ante tōmengā dadi ēmænte adinque apænecantapā.

²⁶ “Minitō iñōmō, Itota gāmæñō ponguīmo, āmīnitawo. Iñæmpā botō weca pōninque waocā mæmpo tōnō wāānā inate ante wædāmai incæcāimpā. Tōmengā nānōogængā ingante ante wædāmai inte tōmengā wēñænāni tōnō tōmengā nānō tōniñadāni inānite ante wædāmai incæcāimpā. Mānimpodāni inānite piinte baī pōnēninque tōmengā, Nāmanque ante quēwencæboimpā, ante wædāmai inte piinte baī pōnēninque botō imote wæætē godōmenque nangui waadete pōnenguēngā ingampā. Mānōmai ante pōnēnāni iñōmō tōmēnānique edæ botō miñæ nē godāni badānīpā.”
²⁷ Ayæ botō miñæ poncæ cædinque waocā, Awæ botō wænguīwæ, ante næænte ponte baī cædinque, Wæñōnāni wæmo incæte Itota miñæ cōwē gocæboimpā, ante poncæcāimpā. Mānōmaiñō ante wīi cæcā iñōmō tōmengā iñōmō edæ botō nē ēmiñængā ædō cæte baquingāā.
²⁸ Æi gomō aquincō mānoncæ cædinque bitō, Æpodō godonte æninque iñque mæñonguīmo. Botō eyepæ mantawo, ante tāno pōnēnāmai inte edæ ædō cæte mæñonguīmīi.
²⁹ Tāno pōnēñē cōñāmai imi ininque bitō ongonto ontowæ do nāñe ñongæninque godōmenque ænguī ante ōmæpobi badinque iñque edæ mæñōnāmai imāimpā. Ayæ edæ mæñōnāmai imi adinque godongāmæ ongōnāni wæætē,
³⁰ Æ bitō mænoncæ cædimi incæ iñque mæñōnāmai imipā tōō,’ ante badete tobāinānīpā,” angantapā.

³¹ Ayæ, “Imæca awēnē wabæca awēnē ingante guēadō guēa piinte cæcæte ante cædinque ædō cæte tāno pōnēnāmai inte cæquingāā. Iīmāi pōnente cæquēngā ingampā. Botō tontadoidi guiquēnē diete

mīdo ganca iñōnānite wabæca awēnē tōmengā tontadoidi guiquēnē bæinte mīdo ganca ināni awædō. Tōmengā tontadoidi nangui ināni tōnō piincæte ante pōñongante botō æbānō cæte edæ wææ cæquīmo, ante tāno pōnēñē congruēnē ingampā.”
³² Ayæ, Botō iñōmō tæi piñæmo imopa diyæ tōmēnāni inānite wido cæquīmo, ante pōnengā ininque tōmengā edæ wabæca awēnē gobæ ongōñongante māo wææ anguēngā ingampā. Edæ, Botō æbānō cæbo ate bitō wæætē piyænē cæte ee ate gobi quēwēmo, ante wææ anguēngā ingampā.”
³³ Mīni cabo adobai imīnīpā. Māincooque impā, ante godonte baī cædinque mīnitō tōmancoo ēmō cædinque tōmānāni inānite ēmō cædinque botō miñæ poncæmīnīpā. Iñæmpā ēmō cædāmai imīni ininque mīnitō botō nē ēmiñæmīni ædō cæte baquīmīnīi,” ante Itota angacāimpā.

Cati incæ nongæ bapā, ante

(Māateo 5.13; Māadoco 9.50)

³⁴ Ayæ apænēdinque Itota, “Cati quīmonte cæi iñōmō wæime inte gæpæ ēmōmpā, angacāimpā. Incæte nongæmonte ba adinque mīnitō wæætē æbānō nō cæmīni wæætē gæpæ ēmonguīi.”
³⁵ Iñæmpā gōnæ inguipoga cati wāne cædāni ininque tōmēmo cati beyæ pædāmai ingæimpā. Ayæ wagada goi tōnō wempodente wāne cædāni ininque tōmēmō cati beyæ pædāmai ingæimpā. Ininque edæ cati nongæ ba ate wido cædānīpā. Mānōmai apænēbo ēñēninque ēamonca ongonte ēñēdāni,” ante Itota apænēgacāimpā.

15

Cæningā wē womōnīmpā, ante odōmōninque apænecampā

(Māateo 18.10-14)

¹ Odōmāno awēnē beyæ nē ænāni tōnō Wængongui ingante ēñēnāmai inte nē cædāni tōnō tōmānāni Itota apænecā ēñencæte ante godongāmæ pōnāni inōnānīmpā.
² Adinque Paditeoidi tōnō nē odōmōnāni guiquēnē Itota ingante ante piūninque,

–Iñgā iñōmō, Pōedāni, āninque nē ēñēnāmai cædāni tōnō cæ congā awædō.

³ Ante piinte tēdēdāni wædinque Itota, Wængongui Awēnē nempo quēwēninque æbānō cæquīi, ante ēñencædānīmpā, ante imæca quēwēnāni nāni cæiñō ante odōmōninque iīmāi apænecantapā.
⁴ “Minitō iñæmpā. Mīni waocabo iñōmīnīte adobi iñōmō bitō obegaidi tiē ganca ēabi iñōmi obega adocanque incæ wē womonte edæ dæ bacā ininque bitō iñōmō æbānō cæbāimīi. Edæ nōobenta i nōebe ināni ayæ ongoncoo inānite yabæque ēmō cæte godinque ōnōmæca gote wē womōningā ingante bitō ædō cæte diqui diqui mīnāmai imīi. Bitō aganca cōwē edæ diqui diqui mīmaīmpā.

5 Ayæ diqui diqui minte éadente ate, Nôwo éadêmopa, ante todingque ònôncapæ wo ææntodôningque, 6 oncônê mongænte pôninque bitô guidênâni tônô bitô æmigoidi tônô åñete pônâni ate, 'Badogaa, botô wê womô wædô dobæ éadente i abopa. Edæ mônô watapæ toquinque impa,' ante nè éabi iñômô åmaimipa. 7 Öönædê quëwênâni iñômô adobaï cædânipa, ante apænebo êñêedâni. Waodâni nôobenta i nôebe ganca inâni nè nô cædônâni inte wê womônâmaï inte ayæ ongônâni adinque öönædê quëwênâni wædænque todânipa. Wæætê waocâ adocanque incæ nè womöningâ iñômô tömengâ edæ wênæ wênæ nânô cædinô ante wæwente pönêninque ñimpo cæte pongâ adinque öönædê quëwênâni iñômô godömenque watapæ todânipa," ante Itota apænegacâimpa.

Onquiyængâ tiguitamô nânô wê wodönintamô ante

8 Godömenque apænedinque Itota odömongantapa. "Ayæ wæætê onquiyængâ tiguitamô diete ganca mãñongâ adotamonque wê wodonte ba adinque, Nâö gongængæimpa, ante tica wodönodinque tömengâ oncô tömâo wadæ ñêmæ wadæ ñêmæ cæte diqui diqui minte ængampa. 9 Do æninque tömengâ guidênâni tônô tömengâ æmigoidi tônô åñete pöñônânite, 'Botô wê womontamô wædô dobæ éadente abopa. Mônô edæ watapæ toquinque impa,' angampa. 10 Ñinque mînitô imînite apænebopa. Adocanque incæ wênæ wênæ nânô cædinô wæwente pönêninque ñimpo cædinque pongâ adinque Wængongui anquedoidi incæ watapæ todânipa," ante Itota apænegacâimpa.

Mâincoo nè êwengâ ingante mæmpocâ waadete pônô cæcâ

11 Ayæ godömenque apænedinque Itota, "Mæmpocâ tömengâ wêñæna mênâa iñônate, 12 ayæmengâ iñômô wæmpocâ ingante apænedinque, 'Mæmpo, bitô éacoo incæ æmæncooque pâ cæte botô ænguëncocooque pônömi æmoe.' Angâ Ao åninque wæmpocâ pâ cædinque wacâ ingâ pædæ wacâ ingâ pædæ godongâ æna. 13 Ate wantæ ate ayæmengâ iñômô ænte næænte wabæca godinque quingâmê bai önonque towente quëwêninque wæmpocâ nânô pönönincoo incæ eye cæpote ba. 14 Ate mãñiömæ cængui dæ ba ate nâni gæwænte wæpâmo pö ñinque tömengâ mãincoo ænguëngâ inte wæwengâ. 15 Ñinque tömengâ mãñiñômô quëwengâ weca gote åninque, Bitô imi nè cæbo bacæboimpa, åñongante Ao åninque, Botô ömæ odæ wængänâidi nâni cæmancadê gote nè aabi bacæbiimpa, ante da godongâ. 16 Gote aadinque tömengâ gue ænente

ömædengâ inte odæ wængänâidi nâni cæntapodê incæ cæñinente wæyongante cængui dicæ pönönâniyaa."

17 "Ante wædinque tömengâ nâmanque pönêê cöningque, 'Ïñæmpa botô wæmpo ingante nè cædâni iñômô öñônâni incæ eyepæ pönî cæñiñânî botô iñômô edæ gæwænte wængui wæ. 18 Botô mæmpo weca edæ wadæ gocæboimpa. Gote pöninque botô tömengâ ingante, Mæmpo êñêmi. Öönædê quëwengâ ingante botô godô êñênâmaï cædinque bitô ayömite pönô wênæ wênæ cæbo iñömote, 19 bitô ñôwo edæ, Botô wêmi, ante ædö cæte angüimii. Wæætê edæ, Bitô botô imote, Nê cæbi bae, åmi ate botô bitô imite nè cæbo bacæboimpa, ancæboimpa.' 20 Ante pönêninque wadæ godinque wæmpocâ weca gocantapa," ante apænedinque Itota godömenque odömonte apænecantapa.

"Ayæmengâ mãñomâi gote gobæ pönî dibæ pöñongante wæmpocâ iñômô gomô adinque iñontobæ pônô waadete wæcampa. Pogodo pönî godinque tömengâ wengâ ingante waa waadedinque bæi ongonte quëê bemongampa. 21 Tömengâ wengâ iñômô, 'Mæmpo êñêmi. Öönædê nè quëwengâ ingante botô godô êñênâmaï cædinque bitô ayömite pönô wênæ wênæ cæbo iñömote bitô ñôwo edæ, Botô wêmi, ante ædö cæte angüimii.' 22 Ante tæcæ apæneyongante mæmpocâ iñômô nè cædâni inânite åninque, 'Weocoo waëmoncoo quingæ ö ænte mãmô daga wêñaquimîni. Önompo timpoi ænte pöninque godô da timpodinque awæncata ö ænte godô da wëwædâni. 23 Ayæ wagada wêñængâ nanguï cænte oguïmo pönî inongâ inte wæñonte æñömîni ate mônô cænte tocæimpa. 24 Edæ botô wengâ iñômô do wænte bai inongâ incæte ñôwo mingâ pongâ ædâni. Botô nè wê womongâ wædongâ incæ edæ ñôwo dobæ éadente tobopa.' Ante wæmpocâ angâ êñêninque ææmæ cædinque nanguï todânitapa," ante Itota godömenque odömonte apænecantapa.

25 "Ææmæ cæte toyönâni bamoncadengâ guiquênê gönea ayæ cædongâimpa. Ñinque cæte ate obo ponte êñênongâ åmotamîni ante åwadâni. 26 Êñente wædinque nè cæcâ ingante åñecâ pöñongante, Åbânô cædâni, ante wæcampa. 27 Åñongante, 'Bitô biwi incæ do pongâ adinque bitô wæmpo, Botô wengâ mingâ êñadente tobopa, ante adinque wagada wengâ oguïmo pönî inongâ ingante do angâ wæñonte ææmæ cæte todânipa.' 28 Ante apæñecâ êñêninque bamoncadengâ iñômô edæ ængui badinque oncônê guidâmaï, Baa angâ. Wædinque wæmpocâ iñômô oncodo taodinque tömengâ ingante waadete apænedinque, Oncônê pö guie, angampa. 29 Bamoncadengâ

wæætē, Īñæmpa bitō beyæ ante wadepo Īñō wadepo Īñō botō ancaa cædinque bitō ānō tōmānō ante do cæbo Īñōmote bitō wæætē, Bitō æmigoidi tōnō cænte tocæminimpa, ante dicæ āmiyaa. Caboda wengā incæ dicæ pōnōmi æmogaa. ³⁰ Wæætē māningā bitō wengā guiquēnē onquiyæñāni māincoo beyæ ante nē towente quēwēnāni tōnō quēwēninque bitō ēadincoo incæ nē ēwēnengā inte pōngā adinque bitō wæætē wagada wē oguīmo pōni Īnōngā incæ māningā beyæ do wæñōmipa, ante awædō, angantapa.”

³¹ “Ante pūñongante wæmpocā, ‘Botō wēmi ēñēmi. Bitō Īñōmō cōwē edæ botō weca ongōmi Īmipa. Botō māincoo Īni edæ bitō māincoo cōwē Īmpa. ³² Incæte māningā bitō biwī, Do wæmai ingampa, ante monō nē pōnēnōngā inte ñōwo mīngā ingā pōngā ae. Nē wē womōningā ingante do ēadente ate edæ ææmæ cæte toquēnē Īnimpa,’ ante bamoncadengā ingante mæmpocā angampa.” Māninque ante apænebopa, ante Itota apænegacāimpa.

16

Nē aaquēnengā incæ nō cædāmai ingampa, ante

¹ Itota tōmengā mīñæ nē godāni Īnānite godōmenque apænedinque, “Wacā adocanque māincoo nanguī ēacā Īñongante wadāni, Bitō māincoo nē aaquēnengā incæ ōnonque pōni wido cæcā ae. ² Ānāni ēñēninque nē ēacā Īñōmō nē aaquēnengā ingante āñecā pōngā ate Īimai angampa. ‘Bitō quīmæ cæbii, ante adinque tededāni edæ ēñēmopa. Ñōwo idæwaa botō māincoo inte nē aadīmi inte edæ abæ tawæ gocæbiimpa. Āmo ate ēñente wædinque bitō botō māincoo Īni ante edæ, Ēbānō aadinque cæboo,’ ante apænebi ēñēmoe.”

³ “Ante piinte angā ēñente wædinque nē aadingā Īñōmō nāmāneque tedinque, ‘Botō awēnē, Gobāwe, angā ēñēninque botō abæ tawænte gote awædō. Botō cæte ænguēnenta ñōwo æñāmai Īninque æbānō cæte ænte quēwēnguīmo. Botō, Wadāni beyæ onguipoi ææ wobo ate pōnōnāni ænte quēwēncæboimpa, ante pōñemo bai edæ tæi piñæmopa diyæ ææ woquīmo. Ayæ, Ōnonque pōnōmīni æmoedāni, ante ædō cæte anguīmo. Guīñēnete awædō. ⁴ Æ. Tæcæ pōnēmopa. Botō awēnē angā botō abæ tawænte goyōmote wadāni wæætē, Botō oncōnē pō guīie, ancædānimpa, ante cædinque botō ñōwo Īimai cæcæboimpa,’ ante Īimai cæcampa,” ante apænedinque Itota godōmenque apænecantapa.

⁵ “Wadāni Īñōmō Īngā awēnē pōnōngā æninque adodō pōnōnāmai Īnāni inte debe Īnōnānimpa. Īnāni Īnānite adocanque adocanque tōmānāni Īnānite angā pōñōnānite

nē aadingā Īñōmō tāno pōningā ingante apænedinque, ‘Botō awēnē ingante bitō ayæ æpodō pōnōnāmai Īmii.’ ⁶ Āñongante, ‘Oguinguipe incæ botō tiēē ganca tanquebo encadedē awēnē ingante pōnōnāmai inte debe Īmopa.’ Ante apæneçā ēñēninque ‘Mānimpcadedē debe Īmipa,’ ante awēnē nānō yewæmōninta pædæ godōninque nē aadingā Īñōmō, ‘Bado, bitō Īinta ænte pōnōmenque ante yewæmōninque edæ, Botō tūcoenta ganca encadedē debe Īmopa, ante edæ quingæ tæ contate yewæmōe,’ angā ēñente cæcampa. ⁷ Ayæ pōningā ingante nē aadingā angantapa. ‘Bitō guiquēnē æpodō pōnōnāmai Īmii.’ Āñongante, ‘Todigo incæ tee manguincade ñæñængade pōni tiēē ganca encadedē botō debe Īmopa.’ Ante apæneçā ēñēninque awēnē nānō yewæmōninta pædæ godinque nē aadingā, ‘Bado bitō Īinta ænte pōnōmenque ante yewæmōninque, Otenta ganca debe Īmopa, ante yewæmōe,’ angā cæcampa.”

⁸ “Īninque nē aaquēnengā māñōmai ōnonque wiwa cæcā wædinque awēnē tōmengā ingante, Bitō ocai nanguī encabi inte nāmāneque ante pōñēwēninque cæbitapa, angampa, ante Itota nē aaquēnengā ingante ante māninque apænecantapa. Ayæ godongāmæ ongōnāni Īnānite godōmenque apænedinque, Inguipogaque ante quēwēnāni Īñōmō nāni caboque nanguī ēñente cæyōnāni botō ñāō Īñōmō nē quēwēnāni nāni cabo guiquēnē wīi nanguī ēñente cædānīpa,” ante Itota odōmoncæte ante apænecantapa.

⁹ Ayæ, “Mīnitō Īmīnite ñōwo āmo ēñēedāni. Māningā nē aacā ocai encate cæcā bai mīnitō Īñōmō adobaī inguipogaque wiwa cæcæte ante nāni godonte æinta māmīni Īninque ocai encate tōngā pōnente cæedāni. Inguipoga Īninque bayedē māninta Īñōmō edæ dæ bacæimpa, ante pōnente wædinque, wadāni beyænte ante godō waa cæedāni. Māñōmai cæmīni Īninque mīnitō ōmæponmīni inte ōñædē nāni cōwē wantæpiyæ quēwēncōnē æite godinque pōñōmīnite, Oncōnē pōdāni, āmāñānīpa,” ante Itota apænecantapa.

¹⁰ Ayæ, “Wacā māincoo wædænque pōni æninque ædæmō aacā Īninque tōmengā wæætē nanguī māincoo æninque adobaī ædæmō aaquingā ingampa. Wæætē edæ māincoo wædænque pōni aaquēnengā incæ habæ cæcā Īninque tōmengā wæætē nanguī æninque cōwē babæ cæquingā Īmaingampa. ¹¹ Īninque māincooque ante mīni wædoncoo æninque mīnitō ædæmō aadāmai Īmīni adinque mīnitō Īmīnite, Wo ēwēnāmāincoo aacæbiimpa, ante dicæ pōnōnāni ænguīmīniyaa. ¹² Ayæ wacā mīnitō Īmīnite, Botō quī ædæmō aadāni, ante pōnōngā ænimīni inte mīnitō ædæmō

aadāmaī īmīni adinque, Tömēmīni quī, ante mīnitō īmīnite pōnōnāmaī incædānīmpa,” ante Itota apænecāīmpa.

¹³ Ante apænedinque Itota godōmenque apænecantapa. “Mēnaa awēnēna īna beyæ waoçā ædō cæte cæqinggāā. Adocanque awēnē ingante pīīnīnque wacā ingante waadebaingampa. Wæætē adocanque mīñāš godinque wacā ingante wīī waa abaingampa. Mīnitō adobaī īmīni inte Wængonguī ingante nē cæmīni īninque māīncooquē ante ædō cæte cæquīmīnīi,” ante Itota angacāīmpa.

¹⁴ Itota apænecā ēñēninque Paditeoidi guiquēnē māīncooquē ante nē wæwēnāni īnōnāni inte, Quīmæ ānewēē, ante badete togadānīmpa. ¹⁵ Adinque Itota wæætē tōmēnāni īnānite, “Mīnitō īñæmpa, Mōnitō īmōnite adinque waodāni, Nē nō cædāni īnānīpa, ante pōnencædānīmpa, ante nē babæ cæmīni īmīnīpa. Incæte Wængonguī mīnitō mīmōnē mīni entawēnō ante edæ do acampa. Waodāni nāni waa adō ante Wængonguī wæætē. Wentamō pōnī ī awædō, ante pīīngampa,” ante Itota apænecantapa.

Wængonguī Awēnē nānō wææ angainō cōwē ongompa

¹⁶ Āninque Itota, “Wēēnēñedē īñōmō Wāō nānō ponganca dodāni Mōītee wodi nānō wææ angainō ante ayæ Wængonguī beyæ nē apænedāni nāni angainō ante apænete quēwengadānīmpa. Nōwo guiquēnē, Wængonguī Awēnē Odeye nempo guīte quēwengæīmpa, ante watapæ apænete impa. Īīne ante ēñēninque tōmānāni Awēnē nempo guīcæte ante edæ pæ pagænte cædinque da godō guīdānīpa,” ante apænecantapa.

¹⁷ Ayæ apænedinque, “Incæte oōnæ tōnō inguipo æmæwo edæ dæ nāni baganca edæ Wængonguī nānō wææ angainō īñōmō edæ cōwē mæ ongongæīmpa. Mānīne ante yewæmōninque dodāni nāni tænoncagaī īñōmō edæ guiyā pōnī incæ cōwē wadæ cædāmaī ingæīmpa,” ante Itota apænecāīmpa.

Nāni pāmænte wædō ante Itota apænecampa

(Māateo 19.1-12; Māadoco 10.1-12)

¹⁸ Ayæ godōmenque apænedinque Itota, “Æcānō nāwā nānōogængā ingante pāmæninque wacā onquiyængā ingante godō mōna īñōmō tōmēngā edæ wīwa towengā do bacampa. Adobaī, tōmēngā nānōogængā īningā īñongante wacā mōninque edæ do towente bacampa,” ante apænecantapa.

Tæcæ wodi tōnō Datado, ante Itota odōmōnte apænecā

¹⁹ Godōmenque odōmōnte apænecæte ante Itota īmaī ante apænecāīmpa. “Onguīñængā adocanque nē ēacā inte cæncadencoō waēmoncoō wēñadinque awēnēidi nāni opatawæ ēmoncoō baī yabæque wēñadongāīmpa. Tōmēngā tæcæ wodi īnongā inte waēme cænguīncooquē æninque īmō īñō īmō īñō æšmæš cædinque nangūi todinque quēwēnongāīmpa. ²⁰ Tæcæ wodi yabædemō īnō wacā tōmēngā ēmōwo Datado ingante ænte māmō nō cædāni nōngængantapa. Īngā īñōmō, Pōnōmi æmoe, Pōnōmi æmoe, ante nē ānewēnongā inte quēmoncoō tōmāo baate wædongāīmpa. ²¹ Ayæ tæcæ wodi weca cæninque eyepodāni wæænte oñoncoō adinque tōmēngā ænte cæncæte ante wæwēnongāīmpa. Ayæ edæ tōmēngā nangūi baate nōmænte wæyongā guīntaidi incæ pō yædæ yædæ beyadōnānīmpa. ²² Tōmēngā nē, Pōnōmi æmoe, Pōnōmi æmoe, ante ānewēnongā inte nāñe wængā adinque Wængonguī anquedoidi tōmēngā ōnōwoca ingante Abadāō wodi weca ænte mæīdāni æicantapa. Ayæ ate tæcæ wodi adobaī nāñe wængā adinque tōmēngā baō īni daga wēnānīta.”

²³ Ante apænedinque Itota tæcæ wodi ingante ante godōmenque apænecantapa. “Tōmēngā ōnōwoca guīdōmēmō taadō wææ gote mæ māmonte baī īñōmō ongōninque nangūi āmogate wæwēnongā inte gomō ayongā Abadāō wodi a ongongā acantapa. Datado wodi adobaī Abadāō wodi weca a ongongā acantapa. ²⁴ Adinque tæcæ wodi īñōmō Abadāō ingante aa pedinque, ‘Mæmpo Abadāō ēñēmi. Botō gonga bæcoyōmō guīte nangūi āmogate wæwēmo cæbīi. Botō āmogate wædō ante pōnō waadete waa cædinque bitō Datado ingante da pōnōmi pōninque tōmēngā æpæ ada ipomencacā botō cōñe bamen-caboe.’ ²⁵ Āñongante Abadāō, ‘Botō wēmi, Datado īmæcayedē wēnæ wēnæ āmogate wæwēñongante bitō māīncoo waēmoncooquē ænte todinque quēwēnōmīmpa. Nōwo diyæ bitō āmogate wæwēñōmite Datado ingante wæætē ædæmō cæbo ate wampo pōñēninque tōmēngā nōwo īñōmō watapæ quēwente tocampa. ²⁶ Ayæ godōmenque āmo ēñē. Nānēnē ī apa ānewēē. Botō weca ongongā inte ædō cæte bitō weca goqinggā. Wæætē bitō weca ongongā inte botō weca ædō cæte ponguinggā. Guībæ pōnī īñōmō taadō impa taquīi. Edæ dæ ampa,’ ante Abadāō wodi angampa, angantapa.”

²⁷ “Angā ēñente wædinque tæcæ wodi wæætē, ‘Mæmpo Abadāō ēñēmi. Datado ingante āmi ēñente tōmēngā botō mæmpo oncōnē adodō gocæcāīmpa. ²⁸ Māñīñōmō botō tōñīñadāni ōnompo æmæmpoquē ganca māñīmpodāni īnānīpa. Īninque bitō

Datado ingante ämi tömënäni weca gote, Wænopmadäni, ante wææ angä eñëningue tömënäni wæætë iñömö nangui põni ämogate wæwëñömö põnämai incädänimpa.'
 29 Äñongante Abadaö wæætë, 'Möitee wodi nänö wææ ante yewæmongainta Wængongui beyæ nê apænëdäni nani yewæmongainta do mänäni inte edæ bitö tönñadäni iñömö mäninta adinque, Æbänö i, ante do eñenguënänäni inäni.'³⁰ Ante apæneyongä tæcæ wodi wæætë, 'Inæmpa mæmpo Abadaö eñëmi. Wacä nê wængaingä inte nïäni ömæmonte tömënäni weca gote apænecä eñëningue botö tönñadäni tömënäni wënæ wënæ cædinö ante wæwente põnëningue do edæ ñimpo cæbainäni.'
 31 Ante wæyongante, 'Inæmpa Möitee wodi nänö wææ angainö ante Wængongui beyæ nani apænëgainö ante eñënämai inäni inte tömënäni nê wæwente nïäni ömæmönningä apæneyongante cöwë eñënämai imainäni,' ante Abadaö wodi angantapa." Tæcæ wodi ingante ante apænëningue Itota mäninque ante apænënegacäimpa.

17

Wacä oda cæcæcäimpa, ante nani wæcquinque cædänipa

(Mäateo 18.6-7; Mäadoco 9.42)

¹ Ayæ tömengä miñæ nê godäni inänite apænëningue Itota, "Nê põnënäni incæ pancadäniya wiñ eñente do oda cædänipa. Cöwë mänömai impa. Incæte, Oda cæcæcäimpa, ante nê cæcä iñömö edæ tömengä nangui nänö caate wæcquinque cæcampa. ² Ininque edæ, Wëñængä adocanque guiyangä põni incæ oda cæcæcäimpa, ante nê godö cæcæ cædingä iñömö edæ, Wiñ cæcæcäimpa, ante mönö edæ wææ cæcæcäimpa. Waodäni nani dacæ godö dacæ godö cæcquinca ñænænca æninque nê godö cæcæ cæcä öñomenca æ wëmencadinque tömengä ingante tæcætibæ wido cædäni ininque tömengä edæ, Wënæ wënæ cædämai inte wæmo beyænque Wængongui botö imote pänämai ingampa, ante tömengä waa toquënegä imaingampa. ³ Mänömai ämo eñëmini inte minitö, Oda cæcæcäimpa, ante nê cæcä bai cædämai incæbäimpa, ante edæ nämä wææ aedäni," äninque Itota iimäi apænëcantapa.

"Wacä wënæ wënæ cæcä adinque bitö wæætë tömengä ingante, Cædämai incæbäimpa, ante wææ æ. Ämi eñëningue tömengä wënæ wënæ nänö cædinö beyæ guingo imonte wædinque, Wiwa cætäbopa, ante apænecä eñëningue bitö wæætë piyænë cædinque tömengä ingante ñimpo cæbi ee gocæcäimpa. ⁴ Tömengä wæætë adöönæque iñonte önonpo æmæmpoque go mempoga mänimpoga bitö imite wiwa cædingä inte tömengä guingo imöningue,

'Bitö imite wiwa cætäbopa,' ante adopoga apænecä eñëningue bitö wæætë tömengä ingante adopoga ñimpo cæbi ee gocæcäimpa," ante Itota angantapa.

Mönö tæi piñænte entawenguinque wede põnëmpa

⁵ Mönö Awënë tömengä nänö nê da godöninäni iñömö tömengä ingante äninque, –Wædænque põnëmöni iñömönite bitö põnö cæbi æninque mönitö ædæmö wede põnëmöni bacæmönimpa.

⁶ Änäni eñëningue mönö Awënë wæætë, –Möotatamö guiyämö põni nänö inganca minitö põnënö mäninganca wædænque põnëminitawo. Mäningancaque põnëmini incæte minitö möodedawæ nani äwæ inte apænëningue, "Awæ eñëmi. Bitö bæ wite godö gäwapæ minte pæbæwe," ante ämini bai äwæ incæ dobæ edæ eñente cæcædönimpa, ante Itota apænëcantapa.

Wacä ingante nê cæcä incæ iimäi cæquënegä ingampa

⁷ Ayæ godömenque apænëningue, "Mïni waocabo iñöminite adobi nê äbi imi ininque bitö imite nê cæcä ingante edæ æbänö cæbaimi. Tömengä gönea mangæ mangæ wodinque ayæ cænïnäni inänite inque aadinque põ guicä adinque bitö iñömö edæ, 'Pö tæ contate cæe,' ante edæ dicæ ämiyaa. Edæ nê eacä ingampa diyæ täno cænguingä. ⁸ Wæætë nê äbi inömi inte bitö, 'Botö beyæ cængui ænöninque bitö weocoo topo cædinque põnömi æninque botö cænte bebo ate bitö mänñedë ate edæ cænte becæbiimpa,' ante cöwë ämaimipa. ⁹ Ayæ, Cæe, ante bitö äninö ante tömengä eñente cæcä beyænque bitö, Waa cæbi æmopa, ante dicæ angüimii. ¹⁰ Ininque mönö Awënë, Cæedäni, ante nänö angainö ante eyepæ põni cædinque minitö adobai ante põnenguënëmini iminipa. 'Mönitö nê cæmönique inte öñömönique inömöni inte wënæ wënæ cæte awædö. Mönitö tömengä nänö änonque mäninque cæte ate tömengä beyæ ante dicæ godömenque nangui cæmöniiyaa,' ante põnente wæquëñëmini iminipa," ante Itota tömengä miñæ nê godäni inänite apænënegacäimpa.

Itota angä ate diete ganca inäni waintai baadänipa

¹¹ Mänii Eedotadëe iñömö gocæte ante godinque Itota Tämadiabæ æmætæ Gadide-abæ æmætæ tæcæguedë põni godinque, ¹² waodäni nani quëwëñömö tæcæ põñongä nê baate wædäni önonpo tipæmpoga inäni põ bee ténänitapa. Pö gobæ næ gongæninque põmö adinque, ¹³ aa pedänitapa.

–Itota nê Awënë inömi inte eñëmi. Mönitö wædö ante põnö waadete waa cæe, ämönipa.

¹⁴ Äñönänite gomö adinque Itota,

—Minitō guiquēnē Wængonguī oncōnē godinque, Wængonguī qui, ante nē godōnāni inānite mīnitō æmontai māo odōmōmini acādānimpa.

Angā ēñente tōmēnāni idōmæ godinque iñtonobæ waintai baagadānimpa. ¹⁵ Ininque adocanque watapæ todinque, Wængonguī bitō ñāo apāite bai inōmi inte edæ waa cæbi æmontai, ante yedæ apænedinque adodō pongantapa. ¹⁶ Tōmengā iñōmō wabæca Tāmadiabæ nē quēwēningā incæ pō Itota onōwa inō guidōmēmæ ñongæninque waa ate pōnēninque, Bitō pōnō cæbi ate waintai baabopa, ante apænecā. ¹⁷ Eñēninque Itota wæætē angantapa.

—Iñæmpa mīni cabo onompo tipæmpoga mānimpomīni inōmīni inte edæ wīi tōmāmīni waintai baamīnitawo. Ininque wadāni onompo æmæmpoqe go mēnaa go mēnaa ināni iñōmō edæ ædōnō gote dæ ānāni. ¹⁸ Iñgā iñōmō wabæca quēwēningā incæ adocanque Wængonguī ingante waa pōni apænecæte ante ponte quēwēnōngā wadāni guiquēnē tōmānāni pōnāmai inānitawo.

¹⁹ Aninque Itota tōmengā ingante,

—Bitō wede pōnēnō beyænte waintai baadīmi inte ængæ gantite goe, angantapa.

Iñmai iñque bayonte Awēnē Odeye poncæcāimpa, ante
(Māteo 24.23-28, 36-41)

²⁰ Paditeoidi Itota ingante, Wængonguī Awēnē æyedēnō ponte Awēnē Odeye baquingāā, ante wæyōnānite tōmengā wæætē, Iñæmpa wīi waomīni ayōmīni Wængonguī Awēnē Odeye pongā ingampa. ²¹ Ininque, “Tōmengā iñōmō ponte on-gongampa,” ante ayæ wæætē, “Tōmengā wayōmō gote on-gongampa,” ante edæ ædō cæte anguii. Minitō weca nē quēwēngā incæ Awēnē Odeye bayongante waodāni tōmengā nempo do quēwēnāni apa ānewēmīni, ante Paditeoidi inānite angacāimpa.

²² Ayæ tōmēnāni inānite iñque apænedinque Itota tōmengā nānō nē emīñænāni inānite wæætē apænecantapa.

—Iñcayæ ate mīnitō, Waocā nē ēñagaingā ingante adōnæque incæ ainēmōnīpa, ante wæcæmīnimpa. Wæmīni incæte adāmai incæmīnimpa. ²³ Wadāni mīnitō imīnite, “Iñōmō on-gongā tamēñedāni,” aninque ayæ, “Wayōmō on-gongā tamēñedāni,” āñōnāni mīnitō acæ godāmai iedāni. Tōmēnāni mīñæ edæ godāmai imæwedāni. ²⁴ Botō ponguiōnæ iñque bayonte botō iñōmō edæ Waobo nē ēñagalmo inte edæ ñāo æmatæ æmatæ nāinte bai emōninque edæ edonque pōni ponte a ongoncæboimpa. ²⁵ Incæte botō ñōwo guiquēnē tāno nanguī āmogate wæwencæboimpa. Ayæ ñōwodāni iñōmō botō

imote edæ Baa aninque wido cæcædānimpa, ante Itota apænecantapa.

²⁶ “Botō Waobo nē ēñagalmo inte botō ponguiōnæ iñque bayedē guiquēnē Nōwee wodi Docā nāni angaingā nānō quēwēñedē dodāni nāni quēwēngai bai adobai edæ quēwēnguināni inānipa. ²⁷ Docā Nōwee wodi ñænæ wipoboga oncō bai mænōninque tōmengā nānō guiiganca tōmēnāni ononque cænte bete monte quēwēngadānimpa. Monguina, ante ñānonte quēwēngadānimpa. Māniñedē edæ tōmēnāni nāni capo bedō wænguinque edæ æpæ do angatimpa. ²⁸ Doto wodi nānō quēwēngaiñedē dodāni adobai cænte bete quēwēngadānimpa. Nē mānāni godongadānimpa. Aīnēnāni wæætē godonte ængadānimpa. Mīnte pæcæimpa, ante cædinque onconcoo mænōnte quēwēngadānimpa. ²⁹ Incæte Doto wodi Todōmā iñōmō quēwēnte nānō tao gogaiōnæ iñonte gonga tōnō atopodemō nanguī ocoi bæcomō cōōnæ cæ bai wæænīnque māo bæco iñinque māniñōmō quēwēnāni tōmānāni gonte wængadānimpa. ³⁰ Botō Waobo ēñagalmo inte edonque botō a ongōñedē māniñō nāni bæco gonte wængai bai adobai bacæimpa, ante āmo ēñēmaimīnipa,” ante Itota angacāimpa.

³¹ Ayæ godōmenque apænedinque, “Māniñōnæ iñonte mīnitō oncōmanca ongōninque, Botō mīncoo, ante oncōnē wæi guidinque ænāmai inte wodii wīnōmæwedāni. Ayæ gōnea cædinque mīncoo ante oncōnē ocæ ēmænte æncæ pōnāmai imæwedāni. ³² Iñæmpa, Doto nānōogængā wodi æbānō dadi ēmænte adinque edæ gonte wængacāi, ante pōnēmīniyaa. ³³ Inguipogaque cōwē quēwēncæboimpa, ante nē pōnēngā iñōmō tōmengā iñōmō edæ quēwēnāmai incæcāimpa. Wæætē edæ inguipoga mōnō guēmante quēwēnguiāmāo ante nē wædāmai iñgā guiquēnē tōmengā iñōmō edæ cōwē wænāmai quēwēncæcāimpa, ante āmo ēñēmaimīnipa,” ante Itota apænegacāimpa.

³⁴ Ayæ, “Māniñedē woyowotæ i iñinque mēnaa āñōmonque oñōna adocanque ingante bæi ongonte goyōnāni adocanque ingante emō cæte godāni a ongoncæcāimpa. ³⁵ Ayæ onquiyæna cængui ante guēa dicaca dacæ dacæ cæte godō wēñōna adocanque ingante bæi ongonte goyōnāni adocanque ingante emō cæte godāni a ongoncæcāimpa.” ³⁶ “Ayæ onguiñæna gōnea guēa cæyōna adocanque ingante bæi ongonte goyōnāni adocanque emō cæte godāni a ongoncæcāimpa.”

³⁷ Ante apænecā ēñente wædinque tōmēnāni wæætē,

—Awēnē, bitō ānō æyōmōnō incæ mānōmai baquui.

Äññänante,
 –Baö æyömmömë wænte öññöñmonte
 abadæidi wë ongonte edæ do godongamæ
 pönäni bai waodäni, Mönitö Awënë
 pongampa, ante do ëñëninque godongamæ
 poncædänimpa, ante Itota apænecäimpa.

18

*Në apænte änogä tönö owæmpoingä
 cæbänö cædai, ante*

¹ Ayæ tömengä miñæ nè godäni cöwë
 Wængongui ingante apænedinque wæntæte
 badämaï incædänimpa, ante cædinque Itota
 inguipoga quëwëñäni näni cæinö ante
 odömönte apænecäimpa. ² “Wayömo
 näni quëwëñömo adocanque waodäni näni
 nè apænte änogä inte quëwëñongäimpa.
 Wængongui ingante guiñëñämaï inongä inte
 tömengä iñömo, Waodäni æbänö äñäni,
 ante wædämaï inongäimpa. ³ Adoyömo
 tömëñäni quëwëñömo onquiyængä ado-
 canque owæmpoingä inte nè wædongä
 inte quëwëñongäimpa. Tömengä guiquënë
 mäningä nè apænte adongä weca wæætë
 wæætë pöninque, Botö imote adocanque
 nè piingä iñongante bitö ämi ëñente wæætë
 nö cæcæcäimpa. ⁴ Ante ancaa pöninque
 äñä ëñente wædinque nè apænte änogä
 iñömo edæ cöwë Baa Baa angä. Incæte
 ayæ ate nämäneque tededinque tömengä,
 ‘Onquiyængä iñömo ancaa angä awæddö,
 äninque, Wængongui ingante guiñëñämaï
 imo inte botö, Waodäni æbänö äñäni,
 ante wædämaï imo incæte, ⁵ mäningä
 owæmpoingä pö pö cæcä wædinque botö,
 Ancaa ponte angä wæcæ wæ, ante wæætë
 tömengä ingante waa cæcæboimpa. Tömengä
 ingante nè piingä ingante botö, Nö cæe, ante
 wææ ämo wæcæcäimpa.’ Äninque nè Baa
 äningä incæte owæmpoingä beyæ do waa
 cæcampa. Mäninque ante odömmömpa.”

⁶ Ante odömönte apænedinque mönö
 Awënë iñömo godömenque apænecantapa.
 “Në apænte angä iñömo wiwa cæcä incæte,
 Tömengä æbänö apænecäa, ante münitö
 ëñente pönëmæwedäni. ⁷ Wængongui nänö
 nè apænte ængaimini inte münitö itædë
 woyowotæ wæætë wæætë aa pe aa pe
 cæyömini Wængongui edæ ædö cæte Baa
 anguingäa. Wææ ämi ate nö cæcædänimpa,
 ante äñöminite tömengä iñömo edæ, Iincayæ
 ate cæcæboimpa, ante æddö cæte anguingäa.
⁸ Wæætë quingæ edæ do cæcæcäimpa. Në
 piinte cædinäni iñönänite Wængongui wææ
 angä ate tömëñäni münitö iminite wæætë
 nö cæcædänimpa, ante ämo ëñëmaimnipa.
 Incæte Wao Wëmo ëñgaimo inte botö ponte
 ayömo wede pönëñäni wabänö inguipoga
 mæ ongönäni aquimoo, ante wæbopa,” ante
 Itota angacäimpa.

*Paditeo tönö awënë beyæ nè cænogä
 cæbänö cæda, ante*

⁹ Ayæ pancadäniya, Wadäni öñönäni
 iñönäni mönonque nö cæmö imoppa,
 ante pönëwëninque wadäni inänite piinte
 adänipa. Mänömainö ante nè änewëñäni
 inänite Itota, Wængongui ingante æbänö
 apænequii, ante ëñencædänimpa, ante
 imæca quëwëna nänä apæneinö ante
 odömmöninque apænecantapa. ¹⁰ “Waoda
 mënaa Paditeo tönö odömano awënë beyæ
 nè æwengä iñömo Wængongui ingante
 apænecæte ante Wængongui oncö ðænæncö
 yabæcönë æi guuidatapa. ¹¹ Paditeo
 iñömo adiyæ gongæninque nämä ince
 apænedinque, ‘Wængongui ëñëmi. Wadäni
 bai wiï imoppa. Botö iñömo godömenque
 waëmö imoppa, ante todinque botö mänömaï
 beyæ bitö imite waa ate apænebopa,
 änewengampa. Edæ wadäni guiquënë
 wacä qui ö æñänipa. Wadäni inänite
 wiwa cædänipa. Tömëñäni nänöogængä
 inämaï iñongante godö guëa möñänipa. Botö
 iñömo mäñinäni bai inämaï inömo inte
 botö mäñiñömo ongongä odömano awënë
 beyæ nè æwengä bai wiï imoppa, ante
 adinque botö Wængongui bitö imite waa
 ate pönëninque apænebopa. ¹² Botö iñömo,
 mëönaa go mëönaa iñonte, mëönaa go mëönaa
 iñonte bitö imite apænecæte ante cænämaï
 quëwëmoppa. Ayæ botö ænincoo tömancoo
 ate adinque botö önompo tipæmpoga
 mänimpocoo mæ ongöñoncoo adocooque
 æninque, Wængongui qui, ante cöwë pædæ
 pönömo æe,’ ante apænewengampa.”

¹³ “Odömano awënë beyæ nè ænogä
 guiquënë guingo imöninque nämä tæi tæi
 yatawëninque, ‘Wængongui ëñëmi, botö nè
 wiwa cæbo adinque bitö waadete pönö
 piñämaï incæbiimpa, ämpopa,’ angä. Mäninque
 angampa. ¹⁴ Mänömainö ante odömoncæte
 ante apænedinque Itota, Nöwo ämo
 ëñëedäni, angantapa. Iingä awënë beyæ nè
 æwengä mänömaï äñongante Wængongui do,
 Botö ayömo bitö nö cæbi babipa, ante godö
 badongä ate tömengä edæ nö pönënongå inte
 tömengä oncönë gocampa. Wæætë Paditeo,
 Nämänque waëmö imoppa, ante nè änewëningä
 ingante Wængongui, Nö cæbi bacæbiimpa,
 ante godö badönämaï incæcäimpa, ante
 ämo ëñëmaimnipa. Edæ, Nämänque waa
 cæbo imoppa, ante nè ængö cæcä guiquënë
 edæ wææntodonte bai inte wæcæcäimpa.
 Wæætë, Nämänque wënæ wënæ cæbo
 imoppa, ante nè apænecä guiquënë edæ
 ængö cæte bai inte tocæcäimpa,” ante Itota
 apænecäimpa.

*Wëñcänäni inänite gampo cæcadinque Itota
 waa apænecä
 (Mäateo 19.13-15; Mäadoco 10.13-16)*

¹⁵ Ayæ ate wadāni, Wēñænāni inānite Itota pōnō gampo cæcadinque waa apænecæcāmpa, ante cædinqwe tōmengā weca guiyānāni inānite ænte pō ænte pō cædāni adinqwe tōmengā miñæ nè godāni guiquēnē, Ænte pōnāmai ledāni, ante Baa ānāni. ¹⁶ Adinqwe Itota wæætē wēñænāni inānite aa pecā pōñōnāni tōmengā miñæ nè godāni inānite apænecantapa.

—Wēñænāni inānite botō weca ee amīni poncædānīmpa. Ināmpa mānināni nāni pōnēnō bai adobai pōnēnāni inte edæ Wængonguī Awēnē Odeye nempo do quēwēnāni inānīpa. Ininqwe mīnitō iñōmō wēñænāni inānite Baa ānāmai ledāni. ¹⁷ Edæ nāwangā apænebo ēñēedāni. Wēñængā do pōnengā inte Ao angā ingā bai Wængonguī Awēnē Odeye ingante do pōnēninqwe nè Ao ānāni iñōmō tōmēnānīque tōmengā nempo guiidinqwe quēwēnānīpa. Wadāni guiquēnē Wængonguī Awēnē Odeye ingante Baa ante pōnēnāmai ināni guiquēnē tōmēnāni ædō cæte tōmengā nempo guiidinqwe quēwēngūnāni, ante Itota apænegacāmpa.

Māincoo nangui ēacā inte Itota weca ponte apænecampa

(Māateo 19.16-30; Māadoco 10.17-31)

¹⁸ Māniñedē Itota ingante wacā awēnē angantapa.

—Awēnē nè waa Odōmōmi apænebi ēñēmoē. Botō æbānō cædinqwe wænāmai wantæpiyæ quēwēmaīmoo.

¹⁹ Āñongante Itota tōmengā ingante,

—Wængonguī adocanque nè waa cæcā iñongante bitō botō imote, Nē waa cæbi imīpa, amīi. ²⁰ Āninqwe Itota godōmenque apænecantapa. Iīmai cædāni, ante Wængonguī nānō wææ angainō ante bitō tōmēmi edæ do ēñēmīpa. “Bitō nānōogængā ināmai iñongante bitō godō guēa mōnāmai iē. Wacā ingante godō wænōnāmai iē. Wacā qui adinqwe awēmō ænāmai iē. Wacā wēnæ wēnæ cæcā atabopa, ante godō babæ wapiticæ ānāmai iē. Wæmpocā ingante wāānā inante waa adinqwe tōmēna inate godō waadete cæe,” ante wææ yewæmongacāmpa, ante bitō edæ do ēñēmīpa, angantapa.

²¹ Ante apænecā ēñēninqwe māningā awēnē wæætē,

—Botō māniñō bitō ānō bai tōmānō ante ēñēnte cædinqwe pægaboi æe.

²² Ante apænecā ēñēninqwe Itota wæætē,

—Adodeque ayæ ēñēnte cæquēnēmi imīpa, ante āmo ēñēe. Ōōnædē bitō waēmōncoo ænguinque edæ imæca bitō māincoo tōmāncoo godonte æninqwe bitō æninta wæætē ōmæpodāni inte wædāni inānite tōmānta godōmi æncædānīmpa. Ayæ edæ botō imote tee empote pōe.

²³ Angā ēñēnte wædinqwe tōmengā māincoo nangui ēadongā inte māincoo beyænque ante pōnēninqwe māningā awēnē iñōmō wæwente bacantapa. ²⁴ Ininqwe Itota tōmengā ingante gomō adinqwe,

—Wængonguī Awēnē Odeye nempo guite quēwēncæte ante cædinqwe waodāni ōmæpodāni inte botō miñæ pōnānīpa. Māincoo nangui ēacā guiquēnē æbānō cæte ōmæpocā inte botō miñæ ponte guite quēwēngūngāā, angantapa. ²⁵ Cāmeyo iñōmō guiyangā ingampa diyæ daagō guiyampite pædæ tacāā. Ininqwe cāmeyo pædæ tadāmai ingā bai nè ēacā iñōmō adobai ingampa. Tōmengā nāmā ayongā ñænængā inongā inte edæ æbānō cæte Wængonguī Awēnē Odeye nempo do wāānē guite quēwēngūngāā.

²⁶ Mānōmāinō ante Itota apænecā ēñēninqwe nè ēñēnāni wæætē,

—Ināmpa mānōmai i ininqwe æcānō wāānē guite quēwēngūngāā.

²⁷ Ante wæyōnānite,

—Waomīni mīni, Ædō cæte cæquīi, ante mīni wædō incæ Wængonguī iñōmō do cæcampa, ante Itota apænecā.

²⁸ Ēñēnte wædinqwe Pegodo,

—Awēnē ēñēmī. Mōnitō ēadincoo owæ cæate bitō miñæ tee empo pōmōni abīpa.

²⁹ Āñongante Itota tōmēnāni inānite wæætē,

—Mīnitō nāwangā oncodo tao godinqwe mīnitō nānōogængā ingante mīnitō tōniñadāni inānite wæmpoda inate wēñænāni inānite emō cæte botō miñæ pōmīnitapa. Ininqwe iīmai ante nāwangā ñamopa. Æcānō Wængonguī Awēnē Odeye beyænque botō miñæ mānōmai pōna iñōmō, ³⁰ tōmengā iñōmō inguipoga quēwēninqwe nānō emō cædincoo adopocoo æninqwe ayæ wæætē godōmenque nangui æncæcāmpa. Ayæ iincayæ ate ōōnædē godinqwe edæ tōmengā cōwē wantæpiyæ wænāmai quēwēncæcāmpa, ante āmo ēñēmāimīnīpa, angacāmpa.

Itota, Wæncæboimīpa, ante wæcæē adodō ante apænecā

(Māateo 20.17-19; Māadoco 10.32-34)

³¹ Āninqwe tōmengā miñæ, Dote, ante nāni gocabo inānite Itota nānēnē ænte māocā goyōnāni iīmai ante apænecantapa. “Nōwo iñōmō mōnō edæ Eedotadēē iñōmō æicæimīpa. Wængonguī beyæ nè apænegaināni iīmainō ante yewæmōninqwe, Nē Waocā iincayæ ate ēñāte pæcā adinqwe tōmengā ingante æbānō cæquīnāni, ante yewæmongadānīmpa. Nōwo mōnō Eedotadēē iñōmō æi pō gongæmō ate edæ māniñō dodāni nāni angainō bai edæ do iinqwe bacæimīpa. ³² Botō edæ māniñōmō

ēñagaīmo iñōmote oodeoidi botō imote
ō æninque wadāni inānite pædæ māo
godōnāni ō æninque tōmēnāni wæætē
tawimæ botonga towæ tånongadinque botō
imote badete toduque pīinque wiwa
anguināni inānīpa. ³³ Ayæ æmontaimena
tæi tæi pānāni āmogate wæyōmote botō
imote godōmenque wæñōnāni wæncæboimpa.
Wæætē mēōnaa go adoōnæque iñonte edæ
botō do wæñimo inte edæ ñāni ōmæmonte
wæætē quēwencæboimpa,” angantapa.

³⁴ Tōmengā miñæ nē godāni iñōmō
mānīnō, Tōmengā æbānō bate wæquingā,
ante adodeque incæ edæ ēñēnāmai in-
gadānīpa. Tōmengā nānō apænedō edæ wē
wodonte bai iñonte tōmēnāni ōnōmoncaque
ēñēninque, Æbānō ante apænecā, ante wīi
edonque ēñēnānitapa.

*Itota angā ate babetamongā iningā incæ
do waa acampa*

(*Māateo 20.29-34; Māadoco 10.46-52*)

³⁵ Itota mānīnō godinque Eedicoo iñōmō
obo pōñongā onguīñængā babetamō inte
nē wædongā inte taadō wedeca, Pōnōmi
æmoe, ante ānecōnongāimpa. ³⁶ Nanguī ināni
cægōnāni ēñēninque babetamongā iñōmō,
Quinante cægōnāni, ante wæyongante,
³⁷ Itota Nāatadeta quēwēningā inte edæ ñōwo
wodo tebæ gocampa, ante apænedāni.

³⁸ Ēñēninque tōmengā iñōmō aa pedinque,

–Itota ēñēmi. Bitō Awēnē Dabii wodi
pæīmi inōmi inte botō wædō ante edæ ñōwo
waadete pōnō waa cæe.

³⁹ Āñongante tāno godāni wæætē tōmengā
ingante, Apocænē inguēnē ānewēē, ante
wææ āñōnāni tōmengā godōmenque nanguī
āninque,

–Awēnē Dabii pæīmi inōmi inte edæ botō
wædō ante pōnō waadete waa cæe, ante
wæcā.

⁴⁰ Wædinque Itota næ gongæninque,
Tōmengā ingante ænte māmōmīni
pongæedāni. Angā obo ænte māmōnāni
pōñongante Itota,

⁴¹ –Æbānō ante āmii. Bitō beyæ quīnō
cæquīmoo.

Āñongante,

–Awēnē, wēēnē botō ēmongā bai cæbi
acæboimpa.

⁴² Angā ēñēninque Itota wæætē,

–Wēēnē bitō ēmongā bai abāwe. Edæ
wede pōnēmi inte edæ waa bamōmīpa.

⁴³ Ante nānō āñedē nē babetamōningā
do waa bamōninque Itota miñæ godinque
Wængongū ingante, Bitō ñāo apāite bai
ēmōmi inte edæ waa cæbi æmopa, ante to-
gacāimpa. Mānōmai cæcā adinque tōmānāni
adobaī Wængongū ingante waa adinque,
Bitō ñāo bai ēmōmi inte waa cæbīpa, ante
togadānīpa.

19

Itota tōnō Taqueo

¹ Itota mānīi Eedicoo pōninque tæcæ
wodo tebæ gocā ingantapa. ² Mānīñōmō
adocanque Taqueo nāni ānongā iñōmō
tōmengā odōmāno awēnē beyæ nē ænāni
awēnē inongā inte nanguī māincoo ēadongā
inongāimpa. ³ Tōmengā ñōwo, Itota æcānō
ingāā, ante acæte ante ponte ayongā wadāni
nanguī ināni wææ ongōnāni adinque, Botō
ocāa pōni inōmo inte edæ Itota ingante ædō
cæte aquīmoo, ante wæcantapa. ⁴ Adāmai
inte wæyongante wadāni, Itota iñō gāmēnō
pō wodo tebæ goquingā, ante tededāni
ēñēninque tōmengā Itota ingante acæte
ante pogodo tāno gote awāa ticāmodōwāa
nāni āwāa daēwa æi næ gongænte a
ongongantapa. ⁵ Itota obo pōninque æmō
ayongā Taqueo a ongongā adinque tōmengā
ingante,

–Taqueo, quingæ wææe. Ñōwoñæ edæ
pō bitō oncōnē ēñaquēnēmo imopa.

⁶ Angā ēñēninque Taqueo quingæ wææ
ti wææninque, Ao, botō oncōnē waa
poncæbiimpa, ante watapæ toduque edæ
tōmengā oncōnē māmongā pongacāimpa.

⁷ Itota mānōmai cæcā adinque wadāni, Æ
nē wiwa cæcā weca Itota quīmæ ēñacæ
gocāā, ante tōmānāni pīnte tedegadānīpa.
⁸ Taqueo iñōmō edæ tōmēnāni ayōnāni ængæ
gantite adiyæ ongōninque mōnō Awēnē
ingante,

–Awēnē ēñēmi. Botō māincoo
tæcæguedencoo pā cædinque ōmæpodāni
inte wæwēnāni inānite ñōwo godōmo ænāni
ae. Ayæ botō wacā qui ante babæ
āninque ō æmo wæcā ininque wēēñēdē
botō ō ænincoo adopocoo bai incæ
godōmenque mempoga go mempoga
godōmo æncæcāimpa.

⁹ Ante apænecā ēñēninque Itota wadāni
inānite apænedinque,

–Taqueo adobaī Abadāo wodi pæingā
iñongante botō nē æmo inōmo inte tōmengā
oncōnē nāni owocabo quēwencædānīpa,
ante ñōwoñæ pontabopa. ¹⁰ Botō
Waobo ēñagaīmo iñōmō æmo beyænque
quēwencædānīpa, ante cædinque wē wom-
onte bai ināni inānite diqui diqui mincæ
pontabopa, ante Itota apænegacāimpa.

*Mīnata nāni godonte cēinta ante
odōmongampa*

(*Māateo 25.14-30*)

¹¹ Mānōmai apænecā ēñēnāni inte
tōmēnāni, Itota Eedotadēē obo pongampa,
ante adinque, Wængongū Awēnē Odeye
nempo mōnō oo pōni quēwenguinque
impa, ante pōnente edæ oda cædānitapa.
Īninque Itota, Wængongū Awēnē æbānō
cæquingā, ante ēñencædānīpa, ante imæcā

quëwëñani nãni cæinô ante odômônique apæñecantapa.

¹² Ìimainô ante apæñecantapa. “Waoçã adocanque awënë odeye pæingã inongã inte, Botô gobæ wabæca gote ìmæca pancabaa awënë odeye bate pômoedãni. ¹³ Æninqe tômengã ingante nê cædãni diete ganca inãni inãnite ãñete pônãni ate tômengã oodo mìnata nãni ãinta wantæpiyæ cæte nãni æinta incæ æninqe adocanque ingante adotaque pædæ wacã ingante adotaque pædæ godôninqe tômãnãni inãnite godongã adopota adopota æñanipa. ‘Minitô mãninta æninqe godonte æi godonte æi cædinque, Yebængæimpã, ante botô gote pompoga cæedãni.’ ¹⁴ Ante wadæ gocã adinque tômengã nempo quëwëñani guiquënë tômengã ingante piinte cædinque pancadãniya inãnite æninqe, Minitô tômengã miñæ godinque awënëidi inãnite gode æninqe, Mãningã ìñômô wii mõnitô awënë odeye bacæcãimpa, ante wææ åmĩni ëñencædãnimpa, ante da godônãni godãnitapa,” ante apæñedinque Itota ayæ godômenque apæñecantapa.

¹⁵ “Incæte awënëidi do ãnãni ate awënë odeye badinque tômengã ômæ pongantapa. Pôninqe tômengã, Botô beyæ nê cædãni ìñômô godonte æi godonte æi cædinque æbãnô godômenque nangui edæ ænte mãnãni, ante acæte ante cædinque, Botô oodo mìnata nê æninãni inãnite ãñete pøedãni, angã. ¹⁶ Æñete pônãni ate tômengã weca tãno pøningã ìñômô, ‘Awënë ëñëmi. Bitô oodo mìnata adotaque incæ ônompo tipæmpoga mãnimpota edæ ñowo yebænte bapa.’ ¹⁷ Ante apæñecã ëñëninque tômengã ingante, ‘Botô ìmote nê cæbi ìmi waa cæbi æmopa. Wædænque incæ ænimi inte bitô ædæmô aate cæbipa, ante adinque botô ônompo tipæmpoga nãni quëwëñômô quëwëñani ìñônãnite bitô nempo pônômô æninqe nê åmi inte aabi æmoe.’ ¹⁸ Ante tømëñãni awënë angã ate ayængã pøninqe, ‘Awënë ëñëmi. Bitô oodo mìnata adotaque incæ ônompo æmæmpoque mãnimpota ñowo yebænte bapa.’ ¹⁹ Ante apæñecã ëñëninque tômengã ingante adobai apæñedinque, ‘Ônompo æmæmpoque nãni quëwëñômô quëwëñani ìñônãnite botô bitô nempo godômô ænte aabi æmoe,’ angantapa,” ante Itota apæñecantapa.

²⁰ Ayæ godômenque apæñedinque Itota, “Awënë angã ate tømangã guiquënë pøninqe, ‘Awënë ëñëmi, tømëmi mìnata æe. Botô wecodë ædæmô wini caadinque wææ aate mantabopa. ²¹ Æninqe, Bitô wii bitô ñônõni incæ wacã ñônõni incæ ô ænte mãmi awædo. Ayæ wii bitô mimi pæ incæ wacã mingã pædi incæ tã pebi ìmipa, ante pønente wædinque cætabopa. Bitô tæëmô ìñõmi ìmipa,

ante guifente wædinque botô oodo mìnata botô æninta wini caapote wecodë ædæmô wææ aabo ae.’” ²² Æñongante tømengã awënë ìñômô, ‘Ìñæmpa bitô nê wiwa cæbi ìmi nãmã bitô tededô beyænque bitô ìmite apænte ancæboimpa. Botô tæëmô ìmo inte wii bitô ñônõni incæ wacã ñônõni incæ ô æmopa. Wii botô mimo pædi incæ wacã mingã pædi incæ edæ do tã pebo ìmopa. Mãnõmai impa, ante bitô dicæ ëñëñãmã ìmitawogaa. ²³ Do ëñënimite inte bitô ëñente edæ cæquënëmi ìmitapa tõe. Botô oodo mìnata godonte æinta æninqe edæ nê godonte æñãni weca baanco weca quinante wii guidonte æmitawo. Mãnõmai cæbi bai botô ocæ ëmænte pøninqe edæ botô qui do æninqe wadãni nãni guidõninta tønô edæ do æncædõmoimpa tõe,’ angampa.”

²⁴ “Æninqe godongãmæ ongõnãni inãnite awënë apæñecantapa. ‘Minitô ñowo ìngã mìnata nãnô nææñinta ô æninqe edæ mìnata ônompo tipæmpoga nê næængã ingante pædæ godõmini æncæcãimpa.’ ²⁵ Angã ëñëninque tømëñãni, ‘Awënë ìñæmpa, ìngã diete ganca mìnata do mangã apa åmii.’ ²⁶ Ante wæyõnãni awënë wæætë, ‘Ìñæmpa nê ëadãni inãnite tømãnãni inãnite godômenque godonte ingæimpa. Wæætë edæ ëadãmã ìnte ômæpocã ìngã guiquënë tômengã nãnô ëadincô wædænque põni ì incæte edæ ô ænte dæ ba wæcæcãimpa. Ante apæñebo ëñëmãmĩnipa. ²⁷ Ayæ botô ìmote nê piinãni guiquënë botô ìmotedô ante apæñedinque, Bitô wii mõnitô awënë odeye bacæcãimpa, ante nê Baa ãnãni guiquënë, tømëñãni inãnite botô weca ænte pøninqe botô ayõmo wænõmĩni wæncædãnimpa, åmopa,’ awënë angantapa. Mãninqe ante odõmte apæñebopa,” ante Itota apæñegacãimpa.

Eedotadë ìñômô Itota pongampa

(*Mãateo 21.1-11; Mãadoco 11.1-11; Wäö 12.12-19*)

²⁸ Mãninganca apæñedinque Itota Eedotadë æicæte ante tãno gocantapa. ²⁹ Godinque Odibowænquidi nãni anquidi ontacamô goinô Betapague nãni quëwëñômô obo pøninqe Betãnia ganca pøninqe Itota tômengã miñæ nê goda mënãa ìnate da godôninqe, ³⁰ ìimã angantapa.

—Mãnii nãni quëwëñômô ongô amĩna. Tømëñômô go guite ayõmĩna bodo wë picængã incæ waoçã ingante mongæñãmã ìningã ìnte ñãni ñæingã a ongongã acæmĩnaimpa. Adinque ñi cæyænte ænte pøda. ³¹ Ayæ wacã mìnãtô ìmĩnate, Quinante ñi cæyæmĩnaa, ante wææ angã ìninqe mìnãtô wæætë, Mõnô Awënë nãnô ænguënëno ante æmõnãpa, ante apæñeeda, angantapa.

³² Tömengä nänö nē da godöna wadæ gote ayöna Itota nänö äni bai bodo wē a ongö.
³³ Adinque nī cæyæñöna bodo wē nē ēadāni tömēna inate,

–Bodo wē quimæ nī cæyæwēmīnaa.

³⁴ Wææ äñönānite tömēna wæætē,

–Mönö Awēnē nänö ænguēñēnō ante æmönapa.

³⁵ Ante äna ēñēninque Ao änäni ininque awæ ña cæyæñömö nī cæyænte bodo ingante tōi tōi ænte pönatapa. Ayæ ænte pöninque tömēna weocoo yabæcoo que æidämæ wo cæyabædinque äna ate Itota wæñömēnæca inö æi tæ contate gocantapa.

³⁶ Bodoga æi tæ contate taadonque goyonga tömengä nänö goquñö ante waodāni weocoo wæænö bee podöwadānitapa.

³⁷ Odibowænquidi wæænömmö iñömö pönömenque pöñongante tömengä miñæ nē godāni godongämæ nāni poncabo tömänāni iñontobæ nangui todinque ogæ tededānitapa. Itota bamöngæ nangui cæcä atamönipa, ante nāni adinö ante pönēninque Wængongui ingante waa ate apænedānitapa.

³⁸ –Möni quēwenguinque impa, ante, Badogaa, ante tomönipa. Awēnē Wængongui emöwo beyænque pömi ininque bitö to-quinque edæ Wængongui bitö imite waa cæcæcäimpa. Öönædē nē quēwengä pönö piyænē cæcänö anguēnē. Æibæ pöni quēwēnongä iñömö ñäö bai emongänö anguēnē. ³⁹ Ante nangui ināni godongämæ godinque ämotamini ante bai äñönāni pancadāniya Paditeoidi inönāni inte Itota ingante,

–Nē Odömömi ēñēmi. Bitö miñæ nē godāni inānite wææ ämi apocænē inānie.

⁴⁰ Äñönānite tömengä wæætē,

–Minitö iminite näwangä ämopa. Waodāni pæ wēenedāni ininque dicacoo incæ botö imote waa ate bai edæ yedæ ämañānipa, ante Itota apænegacäimpa.

⁴¹ Ayæ pönömenque pöninque Eedotadē gomö adinque Itota mäniñömö quēwēnāni inānite ante pönēninque Ca ca wædinque,

⁴² iimañ angantapa. “Minitö iñömö edæ ñöwoönæ mīni gänē pönenguinque botö imote edonque pöni adinque Ao ämīni bai waa incædönimpa. Incæte minitö, Æbänö cæte gänē pönengui möö, ante edæ wē wodonte bai i ininque minitö adāmañ iminipa. ⁴³ Iñcayæ ate minitö iminite nē piñāni incæ minitö wææ cæinca gäänē pönö tee mongate godämæ wææ ongönāni adinque minitö edæ ædö cæte tao wodii winongui minii.

⁴⁴ Botö minitö weca pömo incæte minitö awincaque adinque, Wængongui ñöwoönæ ponte æncæcäimpa, ante dicæ amīniyaa. Mänömañ beyænque nē piñāni iñömö minitö iminite bæ tadāni tæ go wææñömöinite wæñönāni wæncæmīnimpā. Ayæ wēñæñāni

wææ cæte iñömö quēwēñönānite tömēnāni inānite edæ wæñönāni wæncædänimpa. Dica mīni mæñongainca incæ bæ tadāni ate dica adocaque incæ wæñömēnæca inö ongönāmañ ingæimpa,” ante Itota apænegacäimpa.

Wængongui oncö tæiyæ waemö baccäimpa, ante cæcampa

(Mäteo 21.12-17; Mäadoco 11.15-19; Wäö 2.13-22)

⁴⁵ Ayæ Wængongui oncö ñænæncönē yabæcönē go guidinque Itota mäniñömö nē godonte æncæte ante nē mänāni inānite da tadongä tao goyönānite, ⁴⁶ Ayæ tömēnāni inānite angantapa.

–Wængongui beyæ iimañö ante yewæmongatimpa. “Waodāni botö oncönē pö guidinque botö imote apæncædänimpa,” ante Wængongui angä incæte minitö wēnæ wēnæ cæmīni beyænque Wængongui oncö incæ nē awemö ö æñāni nāni womöincönē bai wentamö bapa töö.

⁴⁷ Ayæ iimö iñö iimö iñö Wængongui oncö ñænæncönē yabæcönē go guidinque Itota odömönte apæncæcä ēñēñānitapa. Mäniñömö, Wængongui quī, ante nē godönāni ñænæñāni tönö nē odömönāni tönö tömēnāni awēñēidi guiquēnē, Itota ingante wæñönte wido cæcäimpa, ante ancaa cæyönāni, ⁴⁸ wadāni tömänāni, Tömengä æbänö odömongä, ante ēñēñö cönāni adinque awēñēidi wæætē, Tömengä ingante mönö ædö cæte wido cæquī, ante wædinque ñimpo cægadänimpa.

20

Awēnē imipa, ante æcänö änañ, ante Itota ingante äñānipa

(Mäteo 21.23-27; Mäadoco 11.27-33)

¹ Iñcayæ ate Itota Wængongui oncö ñænæncönē yabæcönē go guite waodāni inānite odömönte apænedinque Wængongui Awēnē ingantedö ante watapæ apæncæcä ēñēñānitapa. Apæncæcä ēñēñönāni, Wængongui quī, ante nē godönāni ñænæñāni tönö nē odömönāni iñömö nē aadāni nāni Picæncabo tönö tömengä weca ponte äñānitapa. ² Ponte apænedinque,

–Æcänö nē angä inte bitö imite angä cæbii. Bitö imite æcänö, Nē ämi babipa, äna ēñēninque cæbii.

³ Ante äñönānite Itota,

–Botö wæætē minitö iminite ämo ēñente apænemini ēñēmoedāni. ⁴ Wäö wodi iñömö quñante æpænē guidongantawo, ante pönēmīni. Öönædē nē owocä angä ēñente cæcantawoo. Waodānique äñāni ēñente cæcantawoo. Æbänö ante pönēmīni. Minitö wæætē apænemini ēñēmoedāni.

⁵ Äñongä tömēnāni iñömö nāni caboque tededinque, “Iñæmpa mönö, Wængongui

öönædē inō angā Wāō ēñente cæcampa, āmō bai Itota wæætē, ‘Quinante tōmengā ingante pōnēnāmai īminii,’ ante mōnō imonte piincædongāimpa. ⁶ Ayæ wæætē, Waodānique ānāni ēñente cægacāimpa, āmō bai godongāmæ ongōnāni īñōmō, Wængongui beyæ nē apænecā Wāō wodi ingacāimpa, ante nē pōnēnāni inte tōmānāni mōnō imonte dicaca tacadāni wæncædōmōimpa.”

⁷ Ante pōnente wædinque tōmēnāni wæætē Itota ingante, Wa. Æcāmē angā ēñēninque Wāō wodi cægacāi, ante ēñēnāmai īmōnīpa, ānāni. ⁸ Wædinque Itota wæætē,

—Botō adobai, Æcānō nē angā inte pōnō āna ēñēninque botō mānōmai cæboo, ante mīnitō īminite apænedāmai incæboimpa, angacāimpa.

Nē aadāni inguēnēnāni incæ wīwa cædānīpa, ante

(*Māateo 21.33-44; Māadoco 12.1-11*)

⁹ Ayæ godongāmæ ongōnāni īnānite Itota, Wængongui Awēnē æbānō cæcāā, ante ēñencædānīpa, ante īmæca quēwēnāni nāni cæinō ante odōmōninque īīmai apænecantapa. “Onguīñængā adocanque yowementacodē mīnte pæyonte wadāni ōmæ wite aate nē tā pedāni īnānite, Botō yowementacodē incæ ōmæ wite aadāni. Aayōmīnite botō, Mīnitō quī, ante pancamonga pōnōmo æncæmīnīpa, angā Ao ānāni ate nē ēacā īñōmō edæ wantæpiyæ wabæca quēwencæ gocantapa. ¹⁰ Yowedepo īinque bayedē nē cæcā ingante nē ēacā īñōmō, Bitō yowementacodē nē aadāni weca godinque pancamonga āmi æninque botō weca wæætē māmōmi æmoe, angā. Gote pongā adinque yowementacodē nē aadāni guiquēnē nē æncæ pōningā ingante bæi ongonte tæi tæi pāninque da tadōnāni ōmæpocā inte gocantapa. ¹¹ Ayæ wæætē nē ēacā īñōmō wacā tōmengā ingante nē cæcā ingante angā gote pongā adinque yowementacodē nē aadāni adobai tæi tæi pānāni wæyongante, Guingo imonte wæcæcāimpa, ante godō wīwa cædāni wæyongante da tadōnāni ōmæpocā inte gocampa. ¹² Ayæ mēnaa īnate da godongā ōmæpoda pōna adinque nē ēacā īñōmō wacā nē cæcā ingante angā gote pōñongante tōmēnāni godō mæ yete wido cædānitapa,” ante odōmōninque Itota godōmenque apænecantapa.

¹³ “Mānōmai cædānīpa, ante ēñente wædinque yowementacodē nē ēacā īñōmō, ‘Botō īñōmō æbānō cæquēnēmo īmoo, ante wædinque, Botō edæ īīmai cæcæboimpa. Botō wengā onguīñængā botō nē waadecā īñongante da godōmo gocæcāimpa. Tōmēmo wengā da godōmo gocā adinque tōmēnāni wabānō guīñente wædinque ee abainānīpa,’

ante pōnēninque da godongā. ¹⁴ Gote dicæ pongā adinque yowementacodē nē aadāni guiquēnē, ‘Tōmengā ingampa. Wæmpocā māincoo īni edæ īngā īñōmō nē ænguīgā ingampa cæmōō. Mōnō edæ māo wæñōmō wængā ate edæ mōnō quī babaiimpa.’

¹⁵ Ānewēninque tōmēnāni tōmengā ingante wææ cæte īñōmō yabæque wido cædinque godōmenque wæñōnāni wængantapa.”

Ante Itota, Māninque ante apænecā, ante tōmēnāni īnānite angantapa. “Mānōmai cædāni adinque yowementacodē nē ēacā īñōmō tōmēnāni īnānite æbānō cæquīgāā, ante pōnēminī. ¹⁶ Tōmengā edæ do pōninque nē aacquēnēnāni īnānite godō wæñōninque wadāni īnānite wæætē yowementacodē godongā æninque nē aadāni bacædānīpa.”

Itota mānōmai angā ēñente wædinque godongāmæ ongōnāni īñōmō,

—Mānōmai cædāmai inguēnē ānewēē, ante wædānitapa.

¹⁷ Īninque Itota tōmēnāni īnānite gomō adinque,

—Īñempa ēñēnāmai cæmīni īñōmīnite Wængongui pānāmai inguīgāā, ante pōnēmīnitawo. Īninque mīnitō, īīmai ante quinante yewæmongatīpa, ante pōnēmīni. “Dica ænte adinque, Wēnæ wēnæ inca, ante nē mæñōnāni nāni wido cædinca incæ gomonga wæmonca inca īninque tāno nāni īñōnīnca bæbængapa do bacapa,”

ante yewæmongadānīpa. ¹⁸ Botō īñōmō mānīī dica wæmonca bai īñōmo inte āmo ēñēninque nē wæcā īñōmō tōmengā īñōmō mānīncaā tæ go wææninque tobænte wæte bai botō ōnōwa gāānē ædæ wæencæcāimpa. Wæætē æcānō ingante Wængongui piinte mānīncaca tacacā īnaa tōmengā guiquēnē quēmē bai yaintai bai goquīgānō anguēnē, ante pōnēmīniyaa, ante Itota apænecācāimpa.

¹⁹ Ante nē aacquēnēnāni nāni cæinō ante odōmōninque Itota apænecā ēñente wædinque nē odōmōnāni tōnō, Wængongui quī, ante nē godōnāni fñænænāni īñōmō, Īñempa mōnō imonte piinte angā awædō, ante pōnēnānitapa. Īninque tōmēnāni, Mōnō nōwo pōnī tōmengā ingante bæi ongongæimpa, ante cædānitapa. Incæte tæcæ bæi ongoncæ cædinque, Wadāni pīnāni wæcæ wæ, ante wædinque ee adānitapa.

Tæiyæ Awēnē nānō āntamō ante ted- edānīpa

(*Māateo 22.15-22; Māadoco 12.13-17*)

²⁰ Īninque, Mōnō Itota ingante bæi ongōninque odōmāno gobedōnadodo awēnē nempo godōmō æninque tōmengā wæætē nē angā inte edæ Itota ingante apænte ancæcāimpa, ante fñænænāni incæ tōmengā

ingante cōwā adānitapa. Ayæ wadāni inānite āninque, Minitō Itota miñæ tee empote gote nōingā ante bai apænedinque wæætē babæ cæedāni. Babæ cæmīni beyæ tōmengā adodeque incæ wapiticæ tedecā ēñēninque mīnitō ocæ ēmænte ponte apænemīni ēñencæmōnīmpa, ānāni ēñente godinque ñænænāni nāni āninō bai babæ cædānitapa. 21 Īninque ñænænāni nāni nē da godōnināni iñōmō Itota weca pōninque,

—Awēnē nē Odōmōmi ēñēmi. Bitō apænedō nō impa, ante do ēñēmōnīpa. Bitō ayōmi mōnō waocabo adoyōmō pōni imōnīpa, ante adinque bitō tōmāmōni imōnīte adoyōmō pōni cæbi æmōnīpa. Ayæ, Wængonguī taadō ante bitō nō pōni odōmōmi imīpa, ante ēñēmōnīpa. 22 Īninque apænebi ēñēmōni. Odōmāno gobiedōno beyæ ante tæiyæ awēnē Tetædo tīguitamō nānō ānintamō ante æbānō wææ yewæmonte ī, ante ēñencæte ante wæmōnīpa edæ. Godonte edæ wææ intawo. Wæætē wēnæ wēnæ cæte intawo.

23 Āñōnānite Itota iñōmō, Tōmēnāni wēnæ wēnæ ancæte ante babæ cædānīpa, ante do ēñente wædinque,

24 —Deēnadio tīguitamō odōmōmīni aboedāni. Æcānō awinca bai yewæmonte badonte ī. Æcānō emōwo ante yewæmonte ongō, ante edæ apænemīni ēñēmoedāni.

Āñongante,
—Awēnē Tetædo awinca bai yewæmonte badonte impa. Adocā emōwo ante yewæmonte ongō amōnīpa.

25 Ante apænedāni ēñēninque,
—Awēnē Tetædo qui ī Īninque edæ Tetædo ingante godongæimīpa. Wæætē Awēnē Wængonguī qui ī Īninque Wængonguī ingante godonguī ī apa ānewēmīni.

26 Ante Itota tōmānāni ayōnānite nō apæneçā ēñente wædinque ñænænāni nāni da pōnōnināni wæætē, Mōnō ædō cæte piingui, ante guingo imonte wædinque pæ wēñegadānīmpa.

Edō cæte ñāni omæmonguī, ante wædānīpa

(Māateo 22.23-33; Māadoco 12.18-27)

27 Tadoteoidi nē, Waocā wæninque ñāni omæmōnāmai æmæwo wængampa, ante nē ānewēnāni inte Itota weca pōninque, Mōni ānō ante apænebi ēñēmaimōnīpa, ānānitapa.

28 —Awēnē nē Odōmōmi ēñēmi. Mōnō beyæ ante Mōitee wodi īmai ante wææ yewæmongacāimīpa. Onguīñægā monte ate wēñæ tapæidāmai inte wængā Īninque tōmengā tōniñacā incæ owæmpoingā ingante tōninque, Botō tōniñacā wodi wēnāni wæætē pæcædānīmpa, ante tapæicæcāimīpa, ante yewæmongacāimīpa. 29 Īninque wadāni īmai cædānitapa, ante apænemōni ēñē. Edæ ōnompō æmæmpoque go mengāa nāni

caipæ iñōnānite bamoncadengā mōninque wēñæ tapæidāmai manguiwēninque edæ nāñe wængā. 30 Ate ayæmengā wææ adocā ingante mōninque wēñæ tapæidāmai inte nāñe wængā. 31 Ayæ wææ wacā mōninque adobai nāñe wængā, ayæ wææ wacā mōninque nāñe wængā, ayæ wææ wacā mōninque nāñe, ayæ wææ wacā mōninque nāñe, ayæ wææ wacā mōninque nāñe wængampa. Ōnompō æmæmpoque go mēnaa ināni owæmpoingā ingante mōninque edæ wēñæ tapæidāmai inte edæ tōmānāni nāñe wēnāni. 32 Ate onquiyægā tōmengā nāñe wængā. 33 Īninque, Mōnō ñāni omæmonguīōnæ, ante mīni āōnæ iñonte māningā owæmpoingā iñōmō æcānō nānōogægā baquingāa. Edæ tōmengā ingante iñōmō edæ tōmānāni manguiwengadānīmpa.

34 Āñōnānite Itota,
—Inguipoga quēwēninque edæ mīni waocabo iñōmō do mōmīnīpa. Wacā ingante do godō ñānōmīni mongampa. 35 Wæætē, Mīnguipoga bayonte iñāninque eyepæ inte ñāni omæmonte ōōnædē æite quēwencædānīpa, ante Wængonguī nānō nē angaināni iñōmō tōmēnāni mōnāmai Īninque wadāni inānite godō ñānōnāmai incædānīmpa. 36 Ayæ Wængonguī anquedoidi bai inōnāni inte tōmēnāni Wængonguī nānō nē angaināni iñōmō ædō cæte wæætē wænguināni. Tōmēnāni nē ñāni omæmongaināni inōnāni inte edæ Wængonguī wēñænāni inānīpa. 37 Wæætē Mōitee wodi incæ ocāñeque bæcoñeque ante nānō yewæmongainta adotaa yewæmōninque, Waodāni dobæ ñāni omæmonte quēwencædānīpa, ante edonque odōmongacāimīpa. Tōmengā īmai ante yewæmongacāimīpa. Mōnō Awēnē inongā iñōmō Abadāo Wængonguī ingaingā inte ayæ Itæca Wængonguī ingaingā inte adocā Aacobo wodi Wængonguī ingānō anguēnē, ante yewæmongacāimīpa. 38 Īñæmpa Wængonguī iñōmō nē quēwēnāni Wængonguī inongā inte tōmengā nē wængaināni Wængonguī ināmai ingampa. Wæætē tōmengā ayongante do wængaināni incæ tōmānāni mīñāni quēwēnāni.

39 Ante apæneyongante nē odōmōnāni pancadāniya,
—Awēnē nē Odōmōmi ēñēmi. Bitō nōingā ante apænebi awædō, ante apænedānitapa. 40 Ayæ wadāni tōmānāni guñente wædinque godōmenque ānāmai ingadānīmpa.

Codito æcānō Pæingā inongā ingāa, ante (Māateo 22.41-46; Māadoco 12.35-37)

41 Ayæ tōmēnāni inānite Itota,
—Awēnē Dabii wodi Pæingā inongā wææ Codito ingampa, ante quānante ānāni, ante pōnēmīni, angantapa. 42 Īñæmpa Dabii wodi

incæ tōmengā nānō ämotamīni äintaa iīmai ante yewæmongacäimpa.

“Botō Awēnē ingante apænedinque Awēnē Wængonguī incæ iīmai ante apænegacäimpa.

Bitō botō tōmēmæ inō tæ contate a ongōe.

⁴³ Ongōñōmite botō bitō imite nē pīnāni inānite bæ tate cæbo ate,

bitō önōwa gäänē ongōnāni inānite pīnā gāwacæbiimpa,” ante Awēnē Wængonguī apænegacäimpa.

⁴⁴ Codito nē Awēnē ingampa, ante awēnē Dabii wodi nānō nē angaingā inongā inte edæ adocæ Codito iñōmō ædō cæte nāēmæ Awēnē Dabii wodi Pæingā inguingā. ante pōnenguēnē ānewēmīni, ante Itota angacäimpa.

Nē wææ odōmōnāni inānite Itota pūingampa (Māateo 23.1-36; Māadoco 12.38-40; Odoca 11.37-54)

⁴⁵ Ayæ tōmānāni ēñēē cōñōnānite tōmengā miñæ nē godānique inānite Itota apænecantapa.

⁴⁶ “Cædāmai, ante wææ ante nāni yewæmongainta nē ate odōmōnāni inānite mīnitō gomō aedāni. Tōmēnāni iñōmō doyæncōo wæomoncōo wēñate mongænte todānipa. Waodāni nāni godonte æiñōmō cægōñōnānite wadāni pō bee tēninque tōmēnāni inānite, Nē odōmōmi, bitō imite waa amōnipa, ante apænedāni ēñēninque edæ nē odōmōnāni iñōmō nangui todānipa. Ayæ tōmēnāni odōmōincōnē go guidinque tōmēnāni nāmanque ante pōnēninque wæmompaa pōni tæ contate todānipa. Ayæ ææmæ becæ godinque tōmēnāni, Botō tāno bete tocäimpa, ante wæmompaa pōni tæ contate bete todānipa. ⁴⁷ Ayæ owæmpoināni oncō yo mongænte bai cædinque ò æwēnāni inte nē wææ odōmōnāni iñōmō, Botō imote waa acædānipa, ante cædinque Wængonguī ingante nōingā apænete bai cædinque babæ cædinque wantæpiyæ tededānipa. Tōmēnāni edæ nāni nangui pōni pante wæquinque mānōmai nāmā beyænque ante cædānipa, ante adinque mīnitō iñōmō ee gomō aedāni,” ante Itota wææ angacäimpa.

21

Owæmpoingā incæ, Wængonguī qui, ante godongampa (Māadoco 12.41-44)

¹ Itota Wængonguī oncōnē ongonte gomō ayongā nē nangui ēadāni, Wængonguī qui, ante nāni wēnoncadedē pō daga daga wēnāni acantapa. ² Ayæ ayongā onquiyængā owæmpoingā òmæpocā inte ònontamponque mentamonga pō daga wengā. ³ Adinque Itota iīmai ante apænecantapa.

—Nāwangā ante apænebo ēñēedāni. Wadāni tōmānāni wædænque pōni godonte

bai wīi eyepæ daga wēñōnāni iingā owæmpoingā iñōmō òmæpocā inte wædongā incæte godōmenque nangui godonte bai godongā abopa. ⁴ Tōmēnāni nangui ēadāni inōnāni inte, Quēwunginta impa, ante cō cædinque tōmēnāni nāni wīi æīnentaque ayæ ongōintaque godōnānipa. Iingā òmæpocā ingā guiquēnē tōmengā nānō quēwunginta incæ, Wængonguī qui bacäimpa, ante tōmanta edæ daga wengampa, ante Itota apænegacäimpa.

Wængonguī oncō ñæñæncō bæ tate bacäimpa, ante

(Māateo 24.1-2; Māadoco 13.1-2)

⁵ Wēēñēedē Wængonguī oncō ñæñæncō mænōninque wadāni dicacōo wæomoncōo pōni tee bædāni waa ongoncadompa. Ayæ wacōo wæomoncōo pōni ænte pōninque, Wængonguī qui impa, ante pædæ godōnāni ongōnompā. Nōwo iñōmō Itota miñæ nē godāni pancadāniya gomō ayōnāni, Dicacōo tōnō wadāni waa pōni nāni ænte pōnoncōo wæomoncōo pōni ongō amōnipa, ante tededānitapa. Tedeyōnānite Itota,

⁶ —Mānincoo mīni acoo incæ iincayæ ate tōmanca bæ tadāni wæænca adinque panguimæ panguimæ godinque dica adocaque pōni incæ wænōmēnæca ongōnāmai ingæimpa, ante apænegacäimpa.

Oo iinque bacäimpa, ante æbānō ate ēñenguī, ante

(Māateo 24.3-28; Māadoco 13.3-23)

⁷ Mānōmai apænecā ēñēninque tōmēnāni wæætē,

—Awēnē nē Odōmōmi ēñēmi. Māniī bitō āninō ante æyedēnō iinque baquī, ante ēñencæte ante wæmōnipa. Ayæ, iīmai cæbo ate mīnitō, Oo pōni impa, ante ēñencæmīnimpā, ante Wængonguī æbānō mā cæquingā, ante apænebi ēñēmōnie.

⁸ Åñōnāni Itota, “Wapiticæ odōmōñōnāni mīnitō wæætē, Mōnō oda cædāmai ingæimpa, ante nāmā wææ aedāni. Edæ iīmai baquī i ataquēdāni. Wadāni nangui ināni ponte botō emōwo ante apænedinque, ‘Coditoba imopa,’ ante babæ ante tedequināni inānipa. Ayæ, ‘Oo pōni impa,’ ante ponte nangui ināni tedequināni inānipa. Mānōmainō ante ponte tedeyōnānite mīnitō wæætē tōmēnāni miñæ tee empote godāmai imæwedāni. ⁹ Ayæ, Wabæca awēnē tōnō pō bee tēninque wæætedō wæætē cædapa, ante tededāni ēñencæmīnimpā. Ayæ, Adobæca quēwēninque incæ awēnē ingante wido cæcæte ante ængæ gantidānipa, ante tededāni ēñēninque mīnitō iñōmō edæ guñēnāmai iedāni. Mānōmai edæ tāno cōwē bacäimpa. Incæte iinque bañnæ botō åñnæ æiquedō pōnguī.”

¹⁰ Ante apænedinque Itota godömenque apænecantapa. “Adobæca quëwënäni iñönänite wabæca quëwënäni ponte bee téninque guëadó guëa cæquinäni inänipa. Adobæca awënë odeye nempo quëwëñönänite wabæca awënë odeye nempo quëwënäni mämö bee téninque guëadó guëa cæte wænonte wænguünäni inänipa. ¹¹ Ayæ wayömö wayömö goinque nanguï pönï ocæ ocæ cæcæïmpa. Ayæ waodäni näni cæïnente wænguinque cænguï incæ tömäå capo wængæïmpa. Ayæ quingæ näni wodonte wënæ wënæ inte wæwenguimämo incæ edæ do pongæïmpa. Edæ ancai näni guiñenguimämo edæ pongæïmpa. Öönædë iñömö näni wo go wo go cæwënguimämo edæ ate bai bacæïmpa.”

¹² Ayæ apænedinque Itota, “Mänimämo näni guiñenguimämo tömäämö ayæ pönämai iñonte mïnitö imïnite togænte yao ongonte tömënäni odömöincönë ænte go guidinque apænte äninque mïnitö imïnite mäo tee mönecædänimpa. Ayæ botö ëmöwo beyæ mïnitö imïnite tömäämæ awënëidi odeyeidi weca ayæ pancabaa awënëidi gobedönadodoidi weca ænte mäodäni gote gongæncæminimpa. ¹³ Mïnitö awënëidi weca godinque gongænte apænemini ëñëninque awënëidi incæ, Itota æcänö ingää, ante ëñencædänimpa. ¹⁴ Æninque mïnitö imïnite awënëidi weca ayæ ænte godämai iñedë incæ mïnitö iïmai ante nämæneque pönëedäni. Botö awënë weca ongöninque æbänö ante wææ anguimoo, ante edæ wædämai incæboimpa, ante piyænë cæedäni. ¹⁵ Ænæmpa botö pönö nö apænebo ëñënimini inte mïnitö wæætë adodö ante apænecæminimpa. Mänömainö ante apænemini ëñëninque në pïñäni quiquëñë nö pönï mïni apænëdö ante ædö cæte wido cæquinänii. Wæætëdö wæætë ædö cæte anguinänii. ¹⁶ Mïnitö mæmpoidi incæ mïnitö töniñadäni incæ mïnitö guidëñäni incæ mïnitö æmigoidi incæ, Ængä ingampa, ante godö odömöninque mïnitö imïnite wadäni nempo pædæ godönäni ö æncædänimpa. Æninque pancaminiya imïnite godömenque wænönäni wæwenguimini imïnipa. ¹⁷ Ayæ, Coditoidi imïnipææ, ante tömänäni botö ëmöwo beyænque mïnitö imïnite nanguï piincædänimpa. ¹⁸ Incæte mïnitö baö incæ ocaguï incæ adoguinqwe incæ æmæwo ëwënämai ingæïmpa. ¹⁹ Æninque mïnitö botö imote pïñämai inte wæntædämai inte ee cæmini Æninque botö æmo beyænque quëwëncæminimpa.”

²⁰ Ante apænedinque Itota godömenque apænecæimpa. “Wabæca tontadoidi pöninque Eedotadëe godongämæ wææ ongönäni adinque mïnitö, Bæ tate näni wido cæquimämo ö pompa, ante do edæ

ëñencæminimpa. ²¹ Mänömai cædäni adinque Oodeabæ quëwëmini iñömö änanquidi do wodii winonte æibæwedäni. Ayæ Eedotadëe quëwëmini iñömö edæ yabæque taobæwedäni. Ayæ yabæque quëwëmini inte Eedotadëe iñömö pö guidämai imæwedäni. ²² Mäniñedë edæ Wængonguï nänö panguiönæ incæ Wængonguï beyæ näni yewæmonte angaiönæ incæ Æninque baquinö angüënë. ²³ Mäniönæ Æninque bayedë edæ yædëmadä inäni tönö goömæ në gänönäni tönö tömënäni näni wæquimämo baquinö angüënë. Æmæca quëwënäni edæ mäniñedë nanguï pönï caate wæquinäni inänipa. Idægoidi inänite edæ nanguï pönï pïinte cæquinö angüënë. ²⁴ Pancadäniya inänite yaëmenca wido tadäni wænguünäni inänipa. Ayæ pancadäniya inänite bai ongonte mäo wabæca ænte goquünäni inänipa. Wængonguï doyedë apænedinque, Oodeo inämai inäni Æninque näni cæpoga cæcædänimpa, angacäimpa. Æninque tömengä nänö angaimpoga Æninque baganca oodeoidi inämai inäni incæ Eedotadëe iñömö pöninque nanguï cægöninque pinä gäwate bai bæ tadäni wæquimini imïnipa, ante apænebo ëñëmälminimpa,” ante Itota apænecæimpa.

Waobo ëñagaïmo inte botö iïmai ponte cæcæboimpa, ante

(Mäateo 24.29-35, 42-44; Mäadoco 13.24-37)

²⁵ Ayæ, “Oo pönï impa, ante edæ ëñencæminimpa, ante cædinque Wængonguï angä ate nænque tönö apäicä nëmoncoo mä pönï edæ wacoo bai bacæimpa. Inguipoga quiquëñë ñænængade pönï gäwawæntibæ tadömengadæ mængonta mængonta cædinque nanguï ä ëñente wædinque tömäämæ quëwënäni edæ, Æbänö cæquimö, ante edæ nanguï pönï guiñente wæquinäni inänipa. ²⁶ Ayæ waodäni æmö ayönäni öönædë tæï ongongaincoo incæ wancæ wancæ cæte bai wapiticæ go ate adinque tömënäni ancai guiñente wædinque, Inguipoga mönö quëwëñömö edæ quüëmë bai bacæimpa, ante wædinque iñontobæ nangæ bate wæcædänimpa. ²⁷ Mäniñedë edæ botö Waobo në ëñagaïmo inte boguimancodë pöninque tæï pönï pïñæmo Æninque edæ ñäö apäite bai waëmö ëmonte wææmo acædänimpa. ²⁸ Æninque mänömai tæca ba ate wædinque mïnitö ocabo guini æmencadinque, Badogaa, äninque edæ, Oo pönï mönö abæ tawænte goquinqwe impa, ante ämæwedäni,” ante Itota apænecæimpa.

²⁹ Ayæ, Wængonguï Awënë oo poncæcäimpa, ante æbänö ëñenguï, ante ëñencædänimpa, ante Itota imæca quëwënäni näni cæinö ante odömöninque iïmai apænecantapa. “Iigowæ ædäni. Ayæ

quiwæmē incæ tōmāwæ aedāni. ³⁰ Ōñabo tånā nā boca adinque mīnitō iñōmō, Ōñabo nānō bocainepo inte nænque nāwatedæ baquinque bocapa, ante pōnēninque edæ do ēñēmīnīpa. ³¹ Ayæ adobai mānīnō botō apænedō bai do edæ ba adinque mīnitō, Wængongui Awēnē Odeye do odemō pōni ongōninque inguipoga oo poncæcāimpa, ante ēñencæmīnīpa,” angacāimpa.

³² Ayæ apænedinque Itota, “Nāwangā āmopa. Nōwomīni mīlīnī quēwēninque wænte godāmai iñōmīni edæ mānīnō botō ānīnō bai tōmānō edæ do īnque baquinō anguēnē. ³³ Edæ oōnædē ongōñōmō inguipoga tōnō wo ēwente bai dæ ba incæte botō angainonque guiquēnē dæ badāmai inte edæ cōwē tæi ongongæimpa,” ante apænecantapa.

³⁴ Ayæ, “Mīnitō iñōmō edæ, Mōnō quingāmē bai wīwa quēwēmō īnīnque mōnō mīmō ōmædēmō bate wæcæ wæ, ante nāmā wææ aedāni. Tī nāmæ bete quidi quidi dowāninque mīmō ōmædēmō bacæ wæ, ante nāmā wææ aedāni. Ayæ, Inguipoga quēwēmō inte quiēmē beyænque wædinque mīmō ōmædēmō bacæ wæ, ante nāmā wææ cæedāni. Mīmō ōmædēmō inte wæyōmōnte mānīōnæ wīi iñontobæ pō wæcæimpa, ante mīmō ōmædēmō badāmai ingæimpa, ante nāmā wææ cæedāni. ³⁵ Īnæmpa waodāni tōmānāni inguipoga tōmāmæ quēwēñōnānite edæ iñontobæ ba wæcædānīpa. ³⁶ Īnīnque woyowotæ itædē cōwē wānō cōninque mīnitō Wængongui ingante cōwē apæneedāni. Mīnitō, Mānīnō īnque ba adinque mōnō eyepæ inte aamō cæte wodi wīnongæimpa, ante Wængongui ingante apæneedāni. Ayæ, Waocā nē ēñagāngā weca mōnō eyepæ gongængæimpa, ante adobai edæ Wængongui ingante apæneedāni,” ante Itota angacāimpa.

³⁷ Itota mānīfēdē Wængongui oncō ñænæncōnē īlīmō iñō īmō iñō yabæcōnē go guīte odōmōnte apænecā ēñēnāni ate tōmēngā wæætē gāwadecæ iñō gāwadecæ iñō tao godinque Odibowænquidi æite owodongāimpa. ³⁸ Ayæ tōmēngā Wængongui oncō ñænæncōnē yabæcōnē ongōnte apænecā ēñencæte ante tōmānāni wæætē baānæ iñō pō baānæ iñō pō bee tēnōnānīpa.

22

Itota ingante bæi ongongæimpa, ante cæedānīpa

(Māateo 26.1-5, 14-16; Māadoco 14.1-2, 10-11; Wāō 11.45-53)

¹ Pāō yedæ æmpoqui ōmæmō ī nāni cænguīōnæ ante oodeoidi, Patowa mōnō wodo pænta gogaīōnæ ææmæ oo pōni

bacæimpa, ante cædōnānīpa. ² Wængongui qui, ante nē godōnāni ñænæñāni tōnō nē odōmōnāni iñōmō, Itota ingante mōnō wido cæcæimpa, ante cōwē cædōnānīpa. Incæte, Wadāni pīnāni wæcæ wæ, ante guīñente wædinque tōmēnāni mānīfēdē, Mōnō æbānō cæte awēmō bæi ongongæimpa, ante wægadānīpa.

³ Ayæ Itota miñæ nāni, Dote, ante gocabo iñōnāni Codaa Icadote nāni ānongā adocā īnongāimpa. Tatāna mānīfēdē tōmēngā pō guicantapa. ⁴ Īnīnque nē godōnāni ñænæñāni tōnō Wængongui oncō nē wææ wānōnāni awēñēdi iñōmō godongāmæ ongōñōnāni Codaa tōmēnāni weca godinque īlīmā ante apænecantapa. Itota æyōmōnō ongongāā, ante botō æbānō odōmōnte pædæ pōnōmo ate ænguīmīni. Angā ēñēninque tōmēnāni tōmēngā tōnō mānīnō ante godongāmæ tedegadānīpa. ⁵ Tōmēngā, Odōmōnte pædæ pōnōmo æncæmīnīpa, ante apæneyongante tōmēnāni nangui todinque wæætē, Tiguitamō padatamō pōnōmōni æncæbiimpa, ante apænedāni. ⁶ Ēñēninque tōmēngā Ao ante wadæ godinque, Wadāni adāmai iñōnānite botō æbānō cæte īlīmāni īnānte awēmō odōmōnte godōmo ænguīnāni, ante cōwā adinque cægacāimpa.

Awēnē Itota pāō tōnō owæta godongā cænte bedānīpa

(Māateo 26.17-29; Māadoco 14.12-25; Wāō 13.21-30; 1 Coodintoidi 11.23-26)

⁷ Pāō yedæ æmpoqui ōmæmō ī nāni cænguīōnæ iñōnte wodo pænta gogaīōnæ bai ī īnīnque Patowa ææmæ bete cænguīōnæ do īnque batīpa. Mānīōnæ iñōnte oodeoidi cōwē cæningā codotodo ingante wæñōninque, Wængongui qui, ante godonguēñēnāni iñōnānīpa. ⁸ Īnīnque Pegodo tōnō Wāō īnate da godōninque Itota īlīmā angantapa.

–Mīnatō iñōnō gote, Patowa ææmæñō impa, ante æñōmīna ate mōnō cængæimpa.

⁹ Angā ēñēninque tōmēna,

–Æcōñēnō go guīte æñnonguīmōna, āmii.

¹⁰ Āñōnate tōmēngā wæætē,

–Waa aeda. Mīnatō mānī nāni

quēwēñōmō go guīyōmīna onguīñængā incæ cadabodē æpæ iyænte næænte gocā adinque tōmēngā ingante edæ tee empote goeda. Tee empo goyōmīna tōmēngā oncōnē go guīcā adinque, ¹¹ mīnatō wæætē oncō nē ēacā ingante īlīmā ante aeda. “Mōnō Awēnē nē Odōmōngā incæ bitō īmite īlīmā angampa. Bitō æcōñēnō āmi guīidinque botō nē ēmīñæñāni tōnō Patowa ææmæ ante cænguīmōnī, angampa,” ante apæneedā. ¹² Mānōmānī ante apænemīna ēñēninque nē oncō ēacā iñōmō æmongapaa mæi goyōmīnate oncō ñænæncō awæmpaa do nānō cōñōncō odōmōngā adinque mīnatō

mānincōnē tōmāā eyepæ cæcæmīnaimpa, ante Itota de godongā godatapa.

¹³ Mānōmaī angā godinque apæneyōna, Itota nānō ānō bai adobai tōmāā batimpa, ante adinque tōmengā nānō nē ēmīñæna, Patowa ææmæno impa, ante cædatapa.

¹⁴ Īnīnque ææmæno nāni cæñfēdē ĩnque bayonte Itota awæmpaa gāānē pō tæ contayongā tōmengā nānō nē da godōnīnāni godongāmæ pō tæ contadāni. ¹⁵ Adinque Itota tōmēnāni ĩnānite apænecantapa.

—Botō ĩñōmō caate wæte wænāmaī ĩfēdē mīnitō tōnō godongāmæ Patowa ante cæte tocæimpa, ante cæñfēdē nangui wætabopa. ¹⁶ Apænebo ēñēedāni. Botō Wængongui Awēnē ĩnōmo inte Awēnē Odeye badinque māñfēdē ate woadāni ĩnānite æmæwo pōñi ata cæpocæboimpa. Māninganca botō ata cæpoganca botō ñōwo, Wængongui Awēnē dodāni ĩnānite ata cæpodingue wodo pænta gogacāimpa, ante Patowa ææmæno ñōwo ĩnque cæncæ cæbopa. ¹⁷ Ānīnque ayæ Itota bequimæ owætaca bæi ongonte ænīnque Wængongui ingante waa ate apænedinque tōmēnāni ĩnānite angantapa.

—Mīnitō owæta ĩnta ænīnque godongāmæ beedāni. ¹⁸ Āmo ēñēedāni. Yowepæ ñōwo bedinque botō Wængongui Awēnē ĩnōmo inte Awēnē Odeye botō baganca edæ ñōwo æmæwo bebopa.

¹⁹ Ante apænedinque Itota pāō ænīnque Wængongui ingante waa ate pōnente apænedinque pā ænīnque pædæ godōnīnque apænecantapa.

—Īi pāō botō baō bai impa. Botō, Mīnitō quēwēncæmīnimpaa, ante botō baō godonte bai cædinque wæncæboimpa. Botō pā ænte pædæ pōnōmo bai mīnitō ĩncayæ ate botō ĩmote ante pōnēnīnque adobai cæte wacā ingā wacā ingā pædæ godonte cæedāni, angantapa. ²⁰ Mānōmaī angā ĩnque cæñāni ate owæta adobai ænte apænedinque tōmengā,

—Botō wepæ ĩmæ bai impa. Wængongui do apænedinque, Botō pōnō cæbo ate mīnitō Ao āmīni ĩnīnque mōñō godongāmæ waa cæte quēwēngæimpa, angacāimpa. Nōwo adobai botō wepæ mīnitō beyæ pædæ godōmo ate mīnitō Ao ante æmīni ĩnīnque mōñō godongāmæ waa cæte quēwēngæimpa. ²¹ Incæte botō ĩmote nē pōñō odōmonte pædæ godonguingā ĩñōmō botō ñonmpo gāānē cænguimpaa adoyōmō ongō aedāni. ²² Wængongui do nānō angāñō bai botō nē Waobo ēñāgāimo inte wænte gocæboimpa. Nāwangā impa. Incæte botō ĩmote nē pōñō odōmonte pædæ godonguingā ĩñōmō edæ tōmengā nānō nangui wæwēnīnque edæ māñōmaī cæcā ingampa tōō.

²³ Ante Itota apæneyongā tōmēnāni nāni caboque tededinque edæ, Æcāñō ingante ante apænecāā, ante wædānitapa.

Æcāñō yæcado ongonguingāā, ante ted-edānīpa

²⁴ Ayæ adobai, Mōñō cabo ĩñōmonte æcāñō ñæñængā inte edæ yæcado ongonte bai nē angā baquingāā, ante wædinque tōmēnāni wæætedō wææte ānīnque nangui tedewēnāni. ²⁵ Adinque Itota tōmēnāni ĩnānite, “Īdægoidi ĩnāmaī ĩnāni awēñēidi ĩñōmō tōmēnāni nempo quēwēnāni ĩnānite, Botō āmo ēñente cæedāni, ante nangui pūinte ānewēnānīpa. Incæte nē piinte ānewēnāni ĩñōñānite tōmēnāni nempo quēwēnāni wææte, Mōñitō awēñēidi nē Pōñō Cædāni ĩnānīpa, ante babæ ante pemōwēnānīpa. ²⁶ Wææte mīnitō guiquēñē ĩnguipoga awēñēidi nāni cæi bai cædāmaī ĩedāni. Mīni cabo incæ nē yæcado ongongā inte yæmīñængā bai baquēnengā ingampa. Ayæ nē angā ĩnongā inte wacā beyæ nē cæcā bai baquēnengā ingampa. ²⁷ Æbāñō ante pōñēmīnīi. Æcāñō ingante, Awēnē bai ingampa, ante nangui waa adānīi. Nē cænguimpaa gāānē tæ contate cængā ingante waa adānitawo. Wææte awēñē beyæ ante ænte māmō pōnongā ingante waa adānitawo. ĩñæmpa nē contacā ingante nāwangā waa adānīpa. Incæte botō ĩñōmō ñōnōmoque bai cædōmo inte mīnitō weca pōnīnque nē ænte māmō pōnongā bai inte nē pōñō cædōmo ĩmopa,” ante Itota apænecantapa.

²⁸ Ayæ apænedinque, “Botō caate wæwēñōmote mīnitō ĩñōmō botō tōñō godongāmæ ĩñacabo cædīmīni ĩmīnīpa.

²⁹ Īnīnque botō Mæmpo botō ĩmote, Awēnē Odeye bacæbiimpa, ante nāñō pōñō cægāi bai botō wææte, Botō tōñō ĩñacabo cædīmīni ĩñōmīni inte mīnitō awēñē odeyēidi adobai bacæmīnīmpaa, ante pōñō cæcæboimpa.

³⁰ Ayæ, Botō nē Awēnē Odeye bayōmote mīnitō botō awæmpaa gāānē tæ contadinque godongāmæ edæ cænte becæmīnīmpaa, āmopa. Ayæ ĩdægoidi ñonmpo tipæmpoga go mencabodānīya ĩñōñānite mīnitō awēñē tæ contaīmpaa tæ contadinque tōmēnāni ĩnānite nē apænte āmīni bacæmīnīmpaa,” ante tōmengā mīñæ nē godāni ĩnānite Itota apænegacāimpa.

Pegodo incæ, Dicæ abogaa, ante anguingā ingampa, ante

(Māateo 26.31-35; Māadoco 14.27-31; Wāō 13.36-38)

³¹ Itota ayæ,

—Timōñō, ēñēmi. Timōñō, bitō ĩmite āmopa. Wacā tōmēmō ænte wancæ wancæ cæcā ontapo wææ bai mīnitō ĩmīnīte Tatāna incæ bæi ongonte wēnæ wēnæ cæcæte ante angampa. ³² Wææte, Bitō wede pōñēnīnque nangæ badāmaī incæbiimpa,

ante botō do edæ Wængongi ingante apænetabopa. Inique bitō iñōmō edæ iincayæ ate botō gāmæñō ocæ emænte ponguimi imipa. Pōninque, Bitō tōniñadāni wæætē tæi piñænāni bacædānimpa, ante tōmēnāni inānite godō tōō æmænte bai cæe.

³³ Ante apænecā ēñēninque Timōnō wæætē,

—Awēnē ēñēmi. Bitō imite tee mōnedāni inique botō do bitō tōnō go guibaimopa. Bitō imite wænōnāni wæmi inique edæ botō bitō tōnō do wæmaimopa.

³⁴ Ante apænecā ēñēninque Itota angantapa.

—Pegodo, bitō imite āmo ēñēe. Tawadiya ñōwoñæ ayæ pedāmai iñonte bitō botō imotedō apænedinque, Dicæ abogaa, ante mempoga go adopoque anguimi imipa, ante Itota apænegacāimpa.

Botō caate wæquimāmo oo baccēimpa, angampa

³⁵ Ayæ wæætē tōmēnāni inānite,

—Botō wēēñēñedē mīnitō imīnite da godōninque, Godonte æinta da wente ænguincadedē æñāmai inte goedāni, antabopa. Māincoo da wente ængui nææñāmai inte awæncata nææñāmai inte goedāni, ante botō da godōmo godinque mīnitō ænguēñēmīni inte wæmīnitawo.

Åñongante,

—Enguēnente wædāmai intamōnīpa, āñanitapa.

³⁶ Itota wæætē tōmēnāni inānite,

—Ñōwo iñōmō æcānō godonte æinta da wente ænguincade māna tōmengā mānincade næænte gocæcāimpa. Ayæ māincoo da wente ængui adobai næænte gocæcāimpa. Ayæ yaēmē mānāmai ingā inte weocoo yacoo nē māningā wacā ingante godonte æninque wæætē yaēmē godonte æncæcāimpa. ³⁷ Iīmai ante dodāni nāni yewæmongainō bai botō imote cæcædānimpa. “Nē ēñēnāmai nāni cæcabo iñōnānite tōmengā adocā inongā ingampa, ante āñanitapa,” ante yewæmongatimpa. Mānōmai impa, ante pōnēninque botō iīmai āmopa. Botō imote æbānō cæquīnāni, ante nāni yewæmongainō bai botō imote tōmānō iinque cæquīnō anguēñē. Botō imote ante nāni yewæmongainō bai cædinque ñōwo iñōmō edæ eyepæ ba aedāni.

³⁸ Ante apæneyongante tōmēnāni,

—Awēnē, yaēmē mēa mæ ongō ae.

Åñanitapa. Tōmengā wæætē,

—Idæwaa, angacāimpa.

Guētēmāni iñōmō Itota Wængongi ingante apænecampa

(Māateo 26.36-46; Māadoco 14.32-42)

³⁹ Inique apænedinque Itota wadæ godinque cōwē nānō æidō bai æidinque Odi-bowænquidi go æiyongante tōmengā mīñæ nē godāni tee empo æigadānimpa. ⁴⁰ Æi cōwē nānō æi ongōñōmo pōninque tōmēnāni inānite,

—Mīnitō ñōwo Wængongi ingante nāmā beyænque apænedinque, Mōnitō wīi wēnæ wēnæ cæinēmōni bacæmōnimpa, ante apæneedāni.

⁴¹ Åninque Itota wadæ godinque dica mōnō wido cæganca māninganca godinque da guicapodinque Wængongi ingante apænecantapa. ⁴² Apænedinque, “Mæmpo ēñēmi. Bitō Ao āninque edæ ti nā wænguimæ bai ō ænte bai cædinque botō imote edæ, Wænāmai incæbiimpa, āmi inique botō edæ waa tobaimopa. Incæte botō ānōnō bai wīi cædinque wæætē tōmēmi ānōnō bai cæe, āmopa.”

⁴³ Ante apæneyongā Wængongi oōnædē nānō da pōnōningā anquedo Itota weca ponte a ongōninque, Tæi piñænte entawencæbiimpa, ante cædinque pōnō tōō æmænte bai cæcantapa. ⁴⁴ Incæte Itota iñōmō edæ nangui wæwente badinque Wængongi ingante anca apænecā inique edæ tōmengā owæmæ wepæ gowete bai tadinque onguipoiya petæ petæ wæantapa.

⁴⁵ Ayæ iinque apænedinque tōmengā ængæ gantite godinque tōmengā mīñæ nē pōnīnāni weca ponte ayongā tōmēnāni nangui wæwente wædinque mō ñōnāni.

⁴⁶ Adinque edæ tōmengā tōmēnāni inānite,

—Iñæmpa mōwo mōmīni. Edæ ængæ gantidinque, Wēnæ wēnæ cæinente badāmai incæmōnimpa, ante Wængongi ingante apæneedāni, angacāimpa.

Itota ingante bæi ongonte ænte godānipa (Māateo 26.47-56; Māadoco 14.43-50; Wāō 18.2-11)

⁴⁷ Ante tæcæ apæneyongā nangui ināni iñontobæ ponte a ongōnānitapa. Itota mīñæ nāni, Dote, ante gocabo iningā incæ Codaa iñōmō tāno beyænte pōninque Itota ingante waa cæte bai queē bemoncæte ante pongā. ⁴⁸ Adinque Itota tōmengā ingante,

—Codaa iñæmpa, botō Waobo ēñagaīmo iñōmote bitō, Iingā ingampa, ante queē bemōninque odōmote pædæ godōmi ænguīnāni, angantapa.

⁴⁹ Mānōmai cæcæ cædānipa, ante adinque tōmengā mīñæ nē godāni guiquēñē,

—Awēnē, yaēmēnca godō tao cæquimōni āmi, āñanitapa.

⁵⁰ Wængongi quī, ante nē godongā ñænængā pōni inongā ingante nē cæcā iñōmō māniñōmō ponte a ongongā adinque Itota mīñæ nē pōningā adocanque wæætē yaēmē æninque māningā

önömonca tömëmonca inö wangö tamoncaä wæcantapa. ⁵¹ Adinque Itota wæætë,

—Idæwaa, äninque gampo cæmoncaä waa bamoncagacäimpa. ⁵² Ayæ, Wængongui qui, ante nê godönäni ñænænäni incæ Wængongui oncö ñænæncö ante nê wææ wänönäni incæ nê aadäni nani Picæncabo incæ tömengä ingante æncæte ante nê pöninäni iñönänite Itota tömënäni inänite, Botö miñæ nê godäni tönö botö dicæ awënë ingante wido cæcæte ante cæbogaa. Incæte munitö, Nê wido cæcä ingampa, ante bai cæmîni awædö. Edæ canta teëmenca mîni badöinca tönö yaëmë næænte botö weca pöminii. ⁵³ Ìñæmpa botö æpogadö Wængongui oncö ñænæncönë Ìmö iñö Ìmö iñö yabæcönë go guidinque munitö weca a ongöñömote munitö wæætë bæi ongoncæte ante pædæ gopodämaï Ìminitapa. Edæ ñowo wëmö mæ mämonte bai iñonte edæ mîni nê wænæ wænæ cæyedë impa, ante apænegacäimpa töö.

Pegodo incæ, Dicæ abogaa, angampa
(Mäateo 26.57-58, 69-75; Mäadoco 14.53-54, 66-72; Wäö 18.12-18, 25-27)

⁵⁴ Ìninque Itota ingante bæi ongonte ænte mao, Wængongui qui, ante nê godongä ñænængä pöni inongä weca ænte godänitapa. Gobæ godäni Ìninque Pegodo iñömö ayæ ayæ gocantapa. ⁵⁵ Nænæ oncö yacömoyæ iñömö wææ wänönäni gonga tänonte godämæ pö tæ contadäni adinque Pegodo tömënäni weca pö tæ contacä. ⁵⁶ Adinque nê cæcä onquiyängä tömengä gongapamö ongongä adinque tömengä ingante cöwä adinque,

—Ìngä adobai mäningä miñæ tee empo gocä ingantapa.

⁵⁷ Äñongante Pegodo,

—Onquiyæmi ëñëmi. Botö mäningä ingante dicæ abogaa, angantapa.

⁵⁸ Ayæ wantæ ate wacä pöninque Pegodo ingante waa adinque,

—Bitö adobai tömengä miñæ nê gobi Ìmitapa töö.

Ante apæncä ëñëninque,

—Onguñæmi ëñëmi. Botö dicæ tömengä miñæ gobogaa. Edæ wabo Ìmopa.

⁵⁹ Ayæ wacä adobai wantæ wantæ adoque ooda go ate äninque,

Ìngä iñömö Itota miñæ nê godingä ingampa. Näwangä impa. Gadideabæ quëwëningä inte edæ pongä aedäni.

⁶⁰ Ängä ëñëninque Pegodo,

—Onguñæmi, quiëmë bai apænebipa, ante botö ëñënamäi Ìmopa.

Ante tæcæ mënea äñongante tawadiya iñontobæ aa aa pecantapa. ⁶¹ Itota incæ tömengä gämæñö dadi ëmænte pömö acä adinque Pegodo iñontobæ, Æ, äninque, “Tawadiya ñowoönæ pedämaï iñonte bitö botö Ìmotedö ante wadö ate apænedinque,

Dicæ abogaa, ante tededinque mepogaa go adopoque angüimi Ìmipa,” ante Itota wëenëñedë apæncä ëñentabopa. ⁶² Ñowo nänö pequinque do pecampa, ante pönente wædinque Pegodo oncodo tao godinque Ca ca wægacäimpa.

Itota ingante badete todinque cædänipa
(Mäateo 26.67-68; Mäadoco 14.65)

⁶³ Itota ingante nê wææ wänönäni iñömö tömengä ingante mäniñedë badete todinque edæ tæi tæi pänänitapa. ⁶⁴ Ayæ tömengä awinca wîni cæmöninque tömënäni,

—Æcänö bitö Ìmite tæi tæi pänaa, ante Wængongui apæncä ëñente ate apænebi ëñëmönie.

⁶⁵ Ante badete todinque quiëmë bai ante godö babæ änewëñänitapa.

Nê apænte änäni weca Itota ongongampa
(Mäateo 26.59-66; Mäadoco 14.55-64; Wäö 18.19-24)

⁶⁶ Nao bayedë, Wængongui qui, ante nê godönäni ñænænäni tönö nê odömönäni iñömö idægoidi inänite nê aadäni nani Picæncabo inönäni inte edæ godongämæ go bee tëninque tömënäni nani apænte anguimpaa gäänë ongöñönäni Itota ingante tömënäni weca töö æmænte ænte mao göñönäni gongængantapa.

⁶⁷ Tömengä ingante nê apænte änäni iñömö,

—Apænebi ëñëmönie, äninque, Bitö mönitö Codito inömi Ìmitawoo.

Äñönänite Itota wæætë,

—Botö apænebo Ìninque munitö wæætë ëñënamäi Ìmaimînipa. ⁶⁸ Ayæ wæætë botö ëñencæte ante ämo Ìninque munitö wæætë botö Ìmote apænedämaï Ìmaimînipa. ⁶⁹ Incæte ämo ëñëdäni. Botö iñömö nê Waobo ëñagaïmo inte Ìncayæ ate Wængongui nê tæi Piñängä tömëmæ inö tæ contate ongoncæboimpa.

⁷⁰ Ante apæncä ëñëninque tömännäni,

—Ìñæmpa, bitö Wængongui Wëmi Ìmitawoo.

Äñönänite,

—Botö mäniimodö Ìmopa. Tömëmîni edæ mänömaï äninque edæ nö apænemînipa.

⁷¹ Ante apæncä ëñëninque,

—Idæwaa. Tömengä nämä incæ edæ, Wængongui Wëmo Ìmopa, ante wænæ wænæ apæncä do ëñentamompa. Ìninque mönö ñowo edæ, Wadäni, Itota wænæ wænæ cæcampa, ante apæncädänimpa, ante quänante godömenque diqui diqui minguii, ante wægadänimpa.

23

Pidato weca gote Itota ongongampa
(Mäateo 27.1-2, 11-14; Mäadoco 15.1-5; Wäö 18.28-38)

¹ Ìnínque mǎnǐñǒmǒ ongǒnǎni tǒmǎnǎni godongǎmǎæ ængǎæ gantǐdínque Itota ingante awǎnǎ. ² Godínque tǒmǎnǎni, Itota ìmǎi nǎ wǎnǎ wǎnǎ cǎcǎ ingampa, ante pǐínínque,

—Mǒnitǒ cǒwǎ ayǒmǒni ìngǎ ìñǒmǒ wapitícǎ odǒmonte apǎnecǎ ãñǎnínque mǒnitǒ òmǎ quǎwǎnǎni oda cǎte ãñǎnǎmǎi cǎdǎni wǎmǒnǐpa. Edǎe odǒmǎno awǎnǎ Tetǎdo nǎnǒ ãninta godǒnǎmǎi ìdǎni, ante tǒmǎngǎ wǎæ angampa. Ayǎæ tǒmǎngǎ, Botǒ ìñǒmǒ Awǎnǎ Odeye Coditobo ìno mǒpa, ante nǎmǎ ante angampa tǒǒ.

³ Ante godǒ pǐínǎni ãñǎnínque Pidato ìñǒmǒ Itota ingante,

—Bitǒ oodeoidi Awǎnǎ Odeyebi ìmitawoo.

ǃñongante Itota wǎæǎtǎ,

—Bitǒ tǒmǎni ãnǒ baǐ botǒ mǎnǐmǒdǒ ìmǒpa, angantapa. ⁴ Ìnínque nǎ godǒnǎni ñǎnǎnǎni tǒnǒ wǎdǎni godongǎmǎæ ongǒñǎnǎite Pidato wǎæǎtǎ,

—Botǒ ayǒmote ìngǎ dicǎ ãñǎnǎmǎi cǎte wǎntamǒ mongǎngǎ abogaa, angantapa.

⁵ Ante Pidato apǎnecǎ ìncǎte tǒmǎnǎni godǒmenque ãnínque,

—Ìñǎmpa tǒmǎngǎ Gadideabǎ tǎno odǒmǒnínque ñǒwo ìñǒmǒ ganca pǒnínque Oodeabǎ tǒmǎo godínque odǒmonte apǎnecǎ ãñǎnínque waodǎni edǎe pǐinte badǎni apa cǎebǐ, ãnǎnitapa.

Edode weca Itota gote ongongampa

⁶ Mǎnǒmǎinǒ ãnǎni ãñente wǎdínque Pidato wǎæǎtǎ, ìngǎ ìñǒmǒ nǎwangǎ Gadideabǎ quǎwǎnǎngǎ ìnte pongantawoo.

⁷ ǃñongante, Mǎningǎnǒ ingampa, ante apǎnedǎni ãñǎnínque tǒmǎngǎ, Gadideabǎ nǎ quǎwǎnǎngǎ ìnte tǒmǎngǎ awǎnǎ Edode nǎnǒ nǎ ãnempodongǎ ingampa, ante tǎcǎ ãñǎngantapa. Ayǎæ, Edode ñǒwo Eedotadǎ ãntǎ quǎwǎngampa, ante do ãñǎnǎngǎ ìnte Itota ingante Edode weca Pidato da godongǎ gocantapa. ⁸ Doyedǎ ìñǒmǒ wǎdǎni, Itota æbǎnǒ cǎcǎ, ante tǎdedǎni ãñǎnínque Edode, Itota botǒ weca pǒnínque wǎbǎnǒ bamǒnǎngǎ pǒni cǎcǎ abǎimǒpa, ante pǒnǎnínque tǒmǎngǎ ingante wǎntǎpiyǎ ænǎngǎ ìnogǎimǒpa. Ìnínque Itota ingante ñǒwo adínque Edode nangǐ togacǎimǒpa. ⁹ Ìnínque, Apǎnǎni ãñǎmǒe, ãni ãñǎmǒe, ante Edode wǎæǎtǎ wǎæǎtǎ ãñongante Itota ìñǒmǒ edǎe pǎ wǎnǎte apǎnedǎmǎi ìngacǎimǒpa.

¹⁰ Edode weca adoyǒmǒ ongǒnínque nǎ godǒnǎni ñǎnǎnǎni tǒnǒ nǎ odǒmǒnǎni guǐquǎnǎ ængǐ badínque, Itota wǎnǎ wǎnǎ cǎcǎ ingampa tǒǒ, ante nangǐ pǐinte angadǎimǒpa. ¹¹ Ayǎæ Edode tǒnǒ tǒmǎngǎ tontadoidi tǒnǒ Itota ingante pǐínínque, Waa cǎte baǐ cǎcǎntedǒ abi, ante

badete todǎnitapa. Ònonque badete tocǎte ante tǒmǎnǎni wǎmǒmǒ pǒni weocoo daga wǎñǎdínque tǒmǎngǎ ingante adodǒ Pidato weca da godǒnǎni gogacǎimǒpa. ¹² Ìnínque do nǎna guǎdǒ guǎa pǐincaya ìnǎna ìnte edǎe Edode tǒnǒ Pidato mǎnǒnǎngǎ edǎe guǎa piyǎnǎ cǎte nǎna æmǐgocaya bagadaimǒpa.

Itota wǎncǎcǎimǒpa, ãnǎnǐpa

(Mǎateo 27.15-26; Mǎadoco 15.6-15; Wǎo 18.39-19.16)

¹³ Pidato ìñǒmǒ nǎ godǒnǎni ñǎnǎnǎni tǒnǒ awǎnǎidi tǒnǒ ònǒnǎnínque ìnǎnite ãñǎcǎ pǒnǎni ate tǒmǎngǎ, ¹⁴ tǒmǎnǎni ìnǎnite ãnínque,

—Ìngǎ ingante botǒ weca ænte pǒnínque mǐnitǒ, Tǒmǎngǎ wapitícǎ odǒmonte apǎnecǎ ãñǎnínque wǎdǎni oda cǎdínque ãñǎnǎmǎi cǎdǎnǐpa, ante pǐimǐnǐpa. Ìncǎte mǐnitǒ edonque ayǒmǐnite botǒ, Itota æbǎnǒ cǎcǎ, ante ãñǎncǎte ante cǒwǎ ayǒmo edǎe tǒmǎngǎ wǎnǎ wǎnǎ nǎnǒ cǎdǒ ante mǐni ãnewǎnǒ ante edǎe dǎe ã abopa.

¹⁵ Ayǎæ Edode adobǎi tǒmǎngǎ ingante apǎnte ãnínque wǎnǎ wǎnǎ nǎnǒ cǎdǐnǒ ante adǎmǎi ìnte wǎdínque adodǒ botǒ weca da pǒnǎngǎ ponte a ongǒngǎ aedǎni. Edǎe, Tǒmǎngǎ nǎnǒ wǎngǐnque, ante nǎnǒ cǎdǐnǒ edǎe dǎe ã apa ãnewǎmǐnǐ.

¹⁶ Ìnínque botǒ ònonque tǎi tǎi pǎnínque ñimpo cǎbo gocǎcǎimǒpa, ante Pidato angantapa. ¹⁷ Wadepo ìñǒ wadepo ìñǒ tǒmǎnǎni æǎmǎe nǎni cǎyedǎ, Nǎ tee mǒnete ongǒngǎ adocanque gocǎcǎimǒpa, ante cǒwǎ godǒ ñimpo cǎquǎnǎngǎ ìnogǎ ìnte awǎnǎ Pidato ñǒwo mǎnǒmǎinǒ ante cǎcantapa. ¹⁸ Mǎnǒmǎinǒ angǎ ãñǎnínque tǒmǎnǎni adoyǒmǒ ogǎ tǎdédínque,

—Itota ãnǎntǎ widǒ cǎdínque Badabato ingante wǎæǎtǎ pǒnǒ ñimpo cǎbǐ æmǒnie, ãnǎnitapa.

¹⁹ Badabato guǐquǎnǎ tǒmǎnǎni nǎni quǎwǎñǒmǒ awǎnǎ ìngante widǒ cǎcǎte ante cǎdínque godǒmonte waocǎ ìngante wǎñǒnǎngǎ ìnte edǎe ñǒwo tee mǒnete ongǒnǎngǎimǒpa. ²⁰ Pidato ìñǒmǒ, Itota ingante æbǎnǒ cǎte ñimpo cǎbo goquǎngǎ, ante wǎdínque tǒmǎnǎni ìnǎnite wǎæǎtǎ aa aa peyongante, ²¹ Oodeoidi wǎæǎtǎ,

—Awǎæ ñǎnquǎdǐmǎ æmǐ cǎte gǒnonte wǎñǒnǎni wǎngǎe tǒǒ, ante wǎæǎtǎ wǎæǎtǎ adodǒ ãnínque Yǎ ãnǎnitapa.

²² Quǐmǎ ænewǎmǐnǐ, ante do mempoga ãnǎngǎ ìnte Pidato ñǒwo mempoga go adopoque ãnogǎ ìnte,

—Quǐnǒ wǎnǎ wǎnǎ cǎcantawogaa, angantapa. Ìñǎmpa, Quǐnǒ wǎnǎ wǎnǎ cǎcantawo, ante cǒwǎ ayǒmo edǎe dǎe ampa. Ìnínque botǒ ãmo ate edǎe tǒmǎngǎ ingante tǎi tǎi pǎnínque ñimpo cǎdǎni gocǎcǎimǒpa, ãmǒpa, angantapa.

²³ Incæte awënëidi tönö wadäni godömenque Yæ äninque, Awæ ñænquedimæ ämi cæte gönonte wænönäni wæncæcäimpa, ante, Cöwë wæñongæimpa, ante ancaa aa pedänitapa. Ìniquè tömënäni nāni Yæ yæ äno beyænque Pidato ñimpo cæcantapa. ²⁴ Ìniquè ancaa wææ änäni ëñente wædinque tömengä, Tömënäni nāni äno bai godö cæcæboimpa, ante nāmāneque pönengantapa. ²⁵ Māññedë Badabato nē, Awënë ingante wido cæcæimpa, ante cædinque nē wænönningä inte ayæ tee mönete ongönongäimpa. Pidato ñöwo, Ìngä guiquënë oodeoidi nāni nē äningä ingampa, ante godö ñimpo cæcantapa. Itota ingante wæætë, Oodeoidi nāni äno bai cæcæimpa, ante cædinque Itota ingante wæætë tontadoidi nempo pædæ godongä ænte godänitapa.

Itota ingante awäa timpodäni wængampa
(Māteoo 27.32-44; Māadoco 15.21-32; Wäo 19.17-27)

²⁶ Itota ingante ænte goyönäni Tidënebæ nē quëwengä Timönö wayömö gote pöninque eyepæ pöni māmö bee tengantapa. Tömengä ingante adinque bæi ongöninque tömënäni, Ñænquedimæ möni cædiwæ Itota miñæ ænte goe, äninque ñö cædancapænäni næænte gocantapa.

²⁷ Goyongante Itota miñæ nangui inäni godänitapa. Onquiyænäni incæ Yæ yæ ante wo ca wo ca wædinque tee empote godänitapa. ²⁸ Ìniquè Itota dadi ëmænte adinque tömënäni inänite,

—Onquiyæmīni, Eedotadëë quëwëmīni inte mīnitö botö beyæ ante wædämaï iedäni. Wæætë tömëmīni nāmā beyænque ante wæedäni. Ayæ mīnitö wëñænäni beyæ ante pönente wæedäni, ämopa. ²⁹ Ìncayæ ate mīnitö caate wædinque ñimā ante wæquimīni imīnipa. “Wëñæ nē mænāmaï ingä ññömö edæ tömengä nänö waa toquinque. Goömæ nē gänönāmaï ingä ññömö edæ tömengä nänö toquinque impa,” ante wæquimīni imīnipa. ³⁰ Māññedë edæ, “Woadäni ñimā ante wæcædänimpa. Onquiyabo onguipo æmæwo cabæñö goyæ guimönie. Änanquidi wææ mönitonga capo ñongæñö wë womonte bamönie, ante wæcædänimpa,” ante dodäni nāni yewæmongainö bai edæ bacæimpa. ³¹ Edæ awæ müwæ ññonte gonga wædænque wo cædäni bai ñöwo ññömö woadäni wīi nangui wënæ wënæ cædänipa. Wæætë awæ amimö bayonte ti wodönoyönäni do bæ wo bæco bai woadäni ñincayæ ate quingämë bai cæquinäni inänipa, ante Itota māninö godinque apænecacäimpa.

³² Ayæ, Mäo wæñongæimpa, ante nē ænte godäni ññömö mēnaa nē wënæ wënæ cædäna inate tömengä tönö godongämæ ænte

gogadänimpa. ³³ Ocatainö, nāni äñömö ænte pöninque awæ ñænquedimæ nāni badöniwäa Itota ingante töö godonte timpodinqe wææ tiwadinque ængæ gantidëñänitapa. Ængæ gantidëñäni ate wægöñongä tömënäni nē wënæ wënæ cædäna inate adobai Itota tömëmæ inö adocanque tömengä dipæmæ inö adocanque timpote gönönäni gongænatapa. ³⁴ Māññomai cædäni adinque Itota,

—Mæmpo ëñëmi. Tömënäni ëñënāmaï inäni inte ñimā cædänipa cæbii. Wënæ wënæ nāni cæinö ante bitö wæætë edæ ñimpo cæbi quëwencædänimpa ämopa, angacäimpa.

Māññedë tömengä weocoo ñi ante, Æcänö quinca nö ta adinque tömengä badincoo æncæcäimpa, ante tömënäni wæntodöninque adocooque adocooque æñänitapa. ³⁵ Wadäni, Æbänö cæquingä, ante acæte ante godongämæ a ongönänitapa. Awënëidi incæ tömengä ingante ante badete todinque,

—Tömengä, Quëwencædänimpa, ante wadäni inänite ængä quëwëñänitawo. Ayæ Wængongui ññömö, Codito ingampa, äninque tömengä ingante ængantawo. Ìniquè tömengä Wængongui nänö nē ængaingä ñongä inte edæ nāmā aamö cæte quëwencæcäimpa, ante badete togadänimpa.

³⁶ Tontadoidi guiquënë obo pöninque tömengä ingante badete tote bai cædinque edæ, Yowepæ ti nāmæ becæcäimpa, ante pædæ æñöninque, ³⁷ tömengä ingante,

—Oodeoidi Awënë Odeyebi ñimā ñincayæ bitö nāmā aamö cædinque quëwëmäwe, ante towengadänimpa.

³⁸ Ayæ, “Ìngä oodeoidi Awënë Odeye ñongä ingampa,” ante yewæmöninque tömënäni tömengä dæca inö wo cædäni owotapa.

³⁹ Nē wënæ wënæ cædäna guiquënë tömengä tönö ongöñöna adocanque tömengä ingante godö wënæ wënæ ante badete tocantapa.

—Bitö ññæmpa, Codito inömo imopa, ämitawo. Māññimā inömi ñincayæ bitö tömëmā aamö cæte gote quëwëñänitawo mönatö imönate adobai ñimpo cæbi aamö cæte gomönae.

⁴⁰ Äñongante wacä wææ äninque,

—Ïñæmpa tömëmā adobai bitö wænguinque ongömi inte Wængongui ingante guññänimā inte ämi awædö. ⁴¹ Mönatö wënæ wënæ cæmönä ññömönate nē apænte äñäni edæ nöingä cæte pänäni wæmönäpa. Mönatö wënæ wënæ cædinö beyæ eyepæ tente wæmönäpa. Tömengä guiquënë wënæ wënæ cædämā ñongä inte wængä apa änewëë.

⁴² Äninque adocä wæætë Itota ingante apænedinque,

Awënë eñëmi. Bitō Awënë Odeye bad-
inque botō imote pōnente cæbi āmopa.

⁴³ Āñongante Itota,

—Nāwangā āmopa. Bitō nōwoonæ incæ
wænte godinque do wænte gogaināni nāni
watapæ quëwëñōmō botō tōnō guëa on-
gongcæbiimpa, angacāimpa.

Itota wængampa

(*Māateo 27.45-56; Māadoco 15.33-41; Wāō*
19.28-30)

⁴⁴ Māniñedē edæ tæcæbæcā iñedē mæ
māmante bai tæcæ badinque ayaōnāa
wæiganca tōmāmæ iñōmō edæ wēmō in-
gatimpa. ⁴⁵ Edæ nænque nāwānāmāi iñinque
wēmō ingatimpa. Ayæ Wængongui tæiyæ
waëmoncōnē odemō nāni wææ wodōincōo
adoyedē edæ önōnæca inō tæcæguedē pōni
tænguimæ wææntapa. ⁴⁶ Māniñedē Itota ogæ
tededinque,

—Mæmpo eñëmi. Nōwo edæ botō önōwoca
bitō önōnempo pædæ pōnōmo æe.

Āninqe edæ æmæwo guëmāninqe
wængacāimpa.

⁴⁷ Mānōmai cæte wængā adinque odōmāno
tontado capitāō incæ,

—Nāwangā impa. Ingā iñōmō edæ nō pōni
cæcā iñongā inte edæ wængā abopa, āninqe,
Wængongui ñāō apāite bai ëmōnongā inte
mānōmai cæcā abopa, ante apænecāimpa.

⁴⁸ Ayæ, Æbānō cæquii, ante godongāmæ
ponte a ongōnāni iñōmō tōmānāni,
Itota mānōmai wængā awædō, ante
wædinque edæ nāmā önontawē tæi tæi
tompotawëninque wadæ gogadānimpā.
⁴⁹ Wæætē Itota ingante nē do adināninqe
iñōmō gobæ ongonte pōmō agōnānita.
Wëenëñedē tōmengā Gadideabæ quëwente
pōñongante onquiyæñāni tōmengā miñæ nē
pōniñāni inte tōmēnāni nōwo adobai gobæ
ongonte pōmō agōnānita.

Itota wodi baō ini māo daga wënānipa

(*Māateo 27.57-61; Māadoco 15.42-47; Wāō*
19.38-42)

⁵⁰ Oodeoidi nāni Apænte Āincabo
iñōnānite adocanque tōmengā ëmōwo
Ootee inongāimpa. Tōmengā cōwē waa
cædinque nē nō cædongā inongāimpa. ⁵¹ Do
iñōmō, Itota ingante wæñongæimpa, ante
oodeoidi nāni Apænte Āincabo godongāmæ
pōnente cæyōnānite adocā Ootee iñōmō
edæ Baa ante tōmēnāni tōnō godongāmæ
cædāmāi inongāimpa. Tōmengā, Wængongui
Awënë Odeye nempo mōnō æyedēnō
quëwengæimpa, ante wānō conte bai
quëwëñongā inongāimpa. Tōmengā Oodeabæ
Adimatea iñōmō nē quëwëñongā inte nōwo
pōningā ingantapa. ⁵² Māningā Ootee iñōmō
awënë Pidato weca do gote apænedinque,
Itota wodi baō ini pōnōmi ænte daga wëmoe.
⁵³ Angā eñëninque awënë Ao angā eñente

gocantapa. Godinque tōmengā Itota wodi
baō ini wi æmpote wææ wi æwadinque
pædæ wæænonte ænte godinque waëmō
weocoo nino nāni ānoncōo wini wini caate
dicamontaa wointatodē önontatoque iñōmō
daga wengantapa. Do nāni wënāmāi inta-
tocæ iñonte daga wengantapa. ⁵⁴ Oodeoidi
nāni, Gāwadecæ ba ate guëmanguiōnæ
inguimpa, ante tāno nāni cæōnæ i iñinque
Ootee mānōmai tāno cægacāimpa.

⁵⁵ Do iñōmō Gadideabæ quëwente
Itota tōnō godongāmæ nē pōniñāni inte
onquiyæñāni nōwo Ootee miñæ tee empote
pōninqe Itota wodido adinque, Tōmengā
baō æbānō nō cædāni, ante do adānita.
⁵⁶ Adinque tōmēnāni oncōnē godinque
ogui wapæ ogui wayabo tōnō ænte ponte
ōni pæcæte ante cædānita. Incæte,
Guëmanguiōnæ impa, ante wædinque
waōnæ ate nāni goquinque tōmēnāni
Wængongui nānō wææ angaiñō bai cædinque
tāno guëmangadānimpā.

24

Itota do wæningā inte nāni òmæmonte
quëwengampa

(*Māateo 28.1-10; Māadoco 16.1-8; Wāō*
20.1-10)

¹ Ayæ guëmanguiōnæ iinque go ate baānæ
ate ooque pōnente bayonte māniñāni on-
quiyæñāni ogui waqui nāni cædincoo nōwo
ænte nææninqe Itota wodido pōnānita.
² Ponte ayōnāni dicabo ñæñængade pōni do
da tæñæi a òñō adānita. ³ Ayæ ontatodē
guite ayōnāni edæ mōnō Awënë Itota
wodi baō edæ dæ antapa. ⁴ Önontatoque i
awædō, ante adinque guñente wæyōnāni
edēnina bai ina iñōmō weocoo nāāmænta
pōni nāinte bai ëmoncōo mongæna inte
edæ iñontobæ tōmēna weca a ongōna.
⁵ Ate wædinque onquiyæñāni iñōmō ancai
guñente wædinque ædæ wæænte onguipoga
bigui tēmōnānita. Edēnina bai ina iñōmō
onquiyæñāni inānite,

—Īñæmpa mīnitō do wæniñāni weca
ponte nē quëwengā ingante ante quīnante
diqui diqui mīmīni. ⁶ Tōmengā iñōmō
edæ doabæ nāni òmæmonte godingā inte
edæ iñatodē iñōmō dæ angā aedāni.
Tōmengā wëenëñedē Gadideabæ mīnitō
weca nānō ayæ quëwëñedē mīnitō imīnite
iimāi ante apænecā eñëmīni inte nōwo
adodō ante pōñedāni. ⁷ Tōmengā iñōmō,
Botō Waobo eñagaīmo iñōmote nē wënæ
wënæ cædāni nempo odōmonte māo
pædæ godōnāni æninque tōmēnāni wæætē
wænōnāni wænguënemo imopa, ante
apænecā eñëmīnita. Ayæ mēōnaa go
adōōnæque iñonte botō ñāni òmæmonte
quëwenguënemo imopa, ante apænecā
eñëmīni inte pōnenguënē quëwëdāni.

⁸ Ante edēnina bai ina āna ēñente wædinqe onquiyænāni iñōmō, Itota æbānō angacāi, ante tæcæ pōnente wædānitapa. ⁹ Iñinque ontatodē tao wadæ godinque onquiyænāni iñōmō Itota tōmengā miñæ nē godināni ōnompō tipæmpoga go adocanque ināni inānite māo apænedinque wadāni tōmānāni inānite apænedāni ēñēnānitapa. ¹⁰ Mānōmaiñō ante Itota nānō nē da godongaināni inānite nē gote apænedāni iñōmō Māadiya Māagadādēnā nāni ānongā tōnō Wāōnā, Tantiago wāānā Māadiya ayæ wadāni onquiyænāni tōnō godinque tōmēnāni inānite apænedāni ēñēnānimpā. ¹¹ Incæte, Mānōmai impa, ante māo apænedāni ēñēninque, Onquiyænāni iñōmō ōnonquedō ante tededāni awædō, ante Itota nānō nē da godōnināni iñōmō edæ pōnēnāmai ingadānimpā. ¹² Pegodo guiquēnē quingæ ængæ gantidinque pogodo godinque Itota wodido pongantapa. Ponte ædæ wææninque guimō ayongā wīni wīni cædincooque ōñō adinque tōmengā nāmāneque pōnēninque, Æbāmē cætimpā, ante wædinqe wadæ gogacāimpā.

*Ēmaodō taadō godānipa
(Māadoco 16.12-13)*

¹³ Eedotadēē ongōninque wædænque ināni nāni quēwēñōmō Ēmao goinō iñōmō onte quidōmetodo ganca māninganca taadō impa. Māniōnæ adoōnæque iñōnte Ēmao iñōmō gocæte ante waoda mēnaa idōmæ godatapa. ¹⁴ Æbānō cætimpā, ante tōmānō ante tede-godatapa. ¹⁵ Tedegoyōna Itota incæ māmō bee tēninque godongāmæ gocā. ¹⁶ Incæte, Tōmengā æcānō ingāā, ante wē wodonte bai i beyæ tōmēna adāmai ēmōna inte ēñēnāmai inatapa. ¹⁷ Itota iñōmō,
–Æbānō ante wæætēdō wæætē tede gomīnatawoō.

Angā ēñente wædinqe tōmēna wæwente bai ēmōna inte edæ næ gongænatapa. ¹⁸ Adocanque tōmengā ēmōwo Codeopato iñōmō tōmengā ingante apænedinque,
–Eedotadēē quēwēnāni tōmānāni, Æbānō ñōwo māniñōmō cætimpā, ante ēñēñōnāni bitō adobique adoyōmō quēwēninque edæ ēñēnāmai imitawoo.

¹⁹ Āñongante Itota,
–Edō āmīna.
Āñongā tōmēna wæætē,
–Itota Nāatadeta quēwēningā ingante ante tedomōnapa. Wængongui beyæ nē apæneca iñongā inte māningā onguñængā iñōmō Wængongui ayongā ayæ waodāni ayōnāni adobai tæi piñæñongā inte waa pōni apænedinque nangui cæcā iñongāimpā. ²⁰ Mānōmai iñongante nē godōnāni ñæñænāni tōnō mōnō ōmæ awēnēidi guiquēnē wadāni nempo pædæ godōninque, Itota ingante apænte āninque māo wæñōmīni

wængædāni, ānāni ēñēninque iñnāni wæætē tōmengā ingante ñænquedimæ cæte timpote wææ tiwadinque edæ gōmōnāni wængantapa. ²¹ Mōnatō guiquēnē, Tōmengā mōnō idægocabo Awēnē badinque pōnō ængā beyænque mōnō abæ tawænte quēwenguimō imompa, ante pōnēnimōna inte edæ ñōwo wæmōnapa. Ayæ, Tōmēnāni mānōmai nāni cædiōnæ edæ ñōwo mēōnaa go adoōnæque impa, ante edæ mōnatō godōmenque wæmōna ae. ²² Mānōmai i incæte mōni cabo incæ onquiyænāni pancadāniya tōmengā wodido gote pōninque, Īmai atamōnipa, ante apænedāni ēñente wædinqe mōnatō wæætē ancai guñente wæmōnapa. ²³ Tōmēnāni iñōmō tōmengā baō inī adāmai ināni inte edæ wadæ pōninque Īmai ante apænedāni wætāmōnipa. Mōnitō wiimonte bai Wængongui anquedoda inate mā pōni atamōnipa, ānānitapa. Ayōmōnite anquedoda iñōmō, Itota ñāni ōmæmonte edæ mūngā quēwengampa, ante apænedāni ēñēninque edæ wadæ pōmōnipa, ante onquiyænāni apænedāni ēñentāmōnapa. ²⁴ Mānōmaiñō ante apænedāni ēñēninque mōni cabo incæ pancadāniya Itota wodido gote adinque, Onquiyænāni nāni ānīñō bai edæ nāwangā impa, ante adāni incæte Itota ingante adāmai ināni wæmōnapa.

²⁵ Ante apænedāni ēñēninque Itota wæætē tōmēna inate,

–Mīnatō pōnēegade i apa ānewēmīnaa. Mīmō ōmædēmīna imīna inte mīnatō Wængongui beyæ nē apænegaināni nāni apænedō ante tōmānō onte edæ ēñēnāmai imīna awædō. ²⁶ Codito iñōmō edæ cōwē caate wæquēnengā ingacāimpā. Ayæ wænte ñāni ōmæmōninque tōmengā nāmā nānō ñāō iñōmō æiquēnengā ingacāimpā, ante pōnēmīnaa.

²⁷ Ayæ, Codito æbānō cæquingāā, ante Mōitee wodi æbānō apænete yewæmongacāi, ante tāno apænedinque Itota mīmōnoque pōnēninque, Wængongui beyæ nē apænedāni tōmānāni æbānō apænegadāni, ante, Codito æbānō cæquēnengā ingacāi, ante edonque odōmonte apæneca ēñēnatapa.

²⁸ Māniñō tōmēna nāna quēwēñōmō tōmēna nāna gocæ cæyōmō pōñōnāni Itota wodo tebæ gocæ cæte bai cæcā. ²⁹ Adinque tōmēna nangui āninque tōmengā ingante edæ,

–Ñōwo gāwadecæ pōni inte wēmō ba apa. Mōnatō oncōnē go guite cænte monte baānæ ate goe.

Ante ancaā āñōna tōmēna oncōnē pō ēñacæ guicantapa. ³⁰ Ayæ tōmēna tōnō cæncæte ante tæ contadinque tōmengā pāo pā æninque Wængongui ingante waa ate pōnente apænedinque tōmēna inate tæcæ pædæ godoncæ cæyongā. ³¹ Tōmēna awinca

wi ænete bai bayö, Tömengä ingampa, ante edæ tæcæ adatapa. Tömengä iñömö edæ adoyedë tömëna ayöna edæ dæ gocä.

³² Adinque tömëna guëa tededinque, —Nawangä intawo. Wængongui mönö Codito ingatedö ante apæ necä ëñëninque æbänö yewæmongadänimpa, ante tömengä ponte odömongä ëñëninque mönö mimö edæ gonga bæco bai totatompä. Wüi edæ mänömaï intawo.

³³ Ante tededinque tömëna adodö taadö quingæ godinque Eedotadëë ponte ayönate edæ Itota miñæ në godinäni iñömö onte ganca mänimpodäni iñönäni tömënäni tönö wadäni godongämæ pö bee tente a ongönäni adatapa. ³⁴ Iñäni guiquëñë,

—Mönö Awënë iñömö ñäni ömæmonte mïngä quëwengampa. Nawangä edæ impä. Tömengä ingante Timönö Pegodo do acantapa, ante godongämæ tededäni adatapa.

³⁵ Mänömainö ante tededäni ëñëninque tömëna wæætë, Mönatö taadö goyömonate wacä pö bee téninque iïmaï cæcantapa, äninque, Æbänö cæcantapa, ante adodö adodö ante apænedatapa. Ayæ godömenque apænedinque, Oncönë go guiyömöni tömengä päö pä ængä adinque mönatö, Itota ingampa, ante do ëñentamönäpa, ante tömänö ante apænedä ëñengadänimpa.

Tömengä miñæ në godinäni weca Itota pongampa

(Mäateo 28.16-20; Mäadoco 16.14-18; Wäö 20.19-23)

³⁶ Mäninö ante ayæ tæcæ tedeyönäni Itota incæ edæ tömënäni weca tæcæguedëñäni do pö guite a ongöninque,

—Guiñënamäi gänë pönëedäni.

³⁷ Angä ëñëninque tömënäni, Önöwoca badï iïmaï, ante ancaï guifñente wædinque, Yæ äñäni. ³⁸ Adinque Itota,

—Quinante guifñewëminii. Mïmöno

quinante æmæ æmæ pönente wæminii. ³⁹ Bado botö önompo empobo edæ aedäni. Botö önöwa ëwabo aedäni. Botö baö edæ gampo caate aedäni. Iñæmpä önöwoca badï imo bai ædö cæte baö tönö bamë ëaquëñëmöö. Baö tönö bamë ëadömo inte botö imo apa guifñewëminii.

⁴⁰ Äninque Itota önompo tönö önöwa tömënäni inänite odömongä. ⁴¹ Adäni incæte tömënäni guifñente todinque wede pönënamäi iñönäni tömengä,

—Minitö weca cængui æbänö mämïminii.

⁴² Äñongante gæyæ baö do awëñii ëadäni inte pædæ godönäni ⁴³ æninque tömënäni ayönäni edæ ade cængantapa. ⁴⁴ Ayæ tömënäni inänite apænedinque Itota,

—Botö imotedö ante Möitee wodi wææ äninque æbänö yewæmongacäi, ante botö munitö weca ayæ quëwëninque do apænetabopa. Botö imotedö ante

Wængongui beyæ në apænegainäni æbänö yewæmongadänii, ayæ ämotamini äninque æbänö yewæmongadänii, ante apænetabopa. Mänine botö apænedö ante tömänö edæ iinque baquinö angüëñë.

⁴⁵ Ante apænedinque Itota, Ocai encate ëñencädänimpa, ante pönö cædinque tömënäni inänite Wængongui angä ëñëninque näni yewæmongainö ante odömonte apæ necä ëñëninque tömënäni edonque edæ ëñëñänitapa. ⁴⁶ Ayæ godömenque apænedinque,

—Mönö Codito cöwë nantate wæninque mëönaa go adoönæque iñonte ñäni ömæmonguëngä incæcäimpa, ante edæ edonque yewæmongatimpa. ⁴⁷ Ayæ,

Codito ëmöwo ante Eedotadëë iñömö täno apænete ate tömämæ quëwëñäni inänite iïmaï ante apæ necäcäimpa. Tömënäni inänite apænedinque, Wënæ wënæ mïni cædinö ante ñimpo cædinque Wængongui gämæñö pöedäni. Pöminii adinque tömengä wæætë pänämaï inte pönö ñimpo cæcæcäimpa, ante apænequinäni incädänimpa, ante yewæmongatimpa. ⁴⁸ Minitö iñömö,

Æbänö cætimpa, ante në adimini inte edæ në apænequimini iminipa. ⁴⁹ Ayæ edæ Wængongui, Botö Tæiyæ Waëmö Önöwoca ingante da pönömo æncæmïminpa, angacäimpa. Iñinque botö Mæmpo nänö në angaingä ingante botö oo da pönömo æncæmïminpa. Mänömaï i iñinque Wængongui nänö tæi piñænö æncæte ante munitö, Wængongui Önöwoca ingante ëwocæcæimpa, ante Eedotadëë iñömö wänö cödäni, angacäimpa.

Ööncädë Itota æicampa

(Mäateo 16.19-20)

⁵⁰ Itota ayæ tao godinque Betänia obo pöninque tipæmpoga pædæ æmpodinque, Minitö iminite Wængongui waa cæcæcäimpa, ante waa apæ necä ëñengadänimpa. ⁵¹ Tæcæ apæ necä ëñëñönäni edæ tömengä iñontobæ inque ingä edæ öönädë æigacäimpa.

⁵² Adinque tömengä miñæ në godinäni iñömö ædæ wæænte apænedinque, Nawangä Wængongui Wengä inongä inte æicampa, ante watapæ apænedinque Eedo-

tadëë wadæ godinque nangui togadänimpa. ⁵³ Wængongui oncö ñæñæncönë yabæcönë iimö iñö iimö iñö pö pö cædinque Wængongui ingante, Bitö ñäö bai ëmömi inte waa pönii cæbipa, ante cöwë waa apænegadänimpa.

Itota Codito ingantedö ante Wäo nänö watapæ ante yewæmongainta

Wængongui nänö Angainö ante nê emongaingä Waocä bagacäimpa

1 Wëenëñedê pönî Wængongui nänö mä badöñedê Wængongui nänö Angainö ante nê emongaingä iñömö do ingacäimpa. Tömengä Wængongui weca quëwengacäimpa. Ayæ adocä adobai nê Wængongui inongä ingacäimpa. 2 Wëenëñedê pönî tömancoo badönämaï iñedê mäningä do Wængongui weca quëwengacäimpa. 3 Wængongui angä ëñëningue adocä tömancoo badongacäimpa. Tömengä wï badongä bai Wængongui nänö badongaincoo tömancoo edæ dæ ancædönimpa. 4 Mäningä iñömö mönö quëwenguinö entawengacäimpa. Ayæ mönö quëwenguinö edæ entawëningue tömengä waodäni beyæ nê ñäö bai inongä ingacäimpa. 5 Tömengä nê ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mäniï ñäö ædö cæte mönæ emonguiï.

6 Onguiñængä adocanque ingante Wængongui da pönongä pöningä ingampa. Tömengä emöwo, Wäo, ante pëmonte ingacäimpa. 7 Tömengä iñömö Wængongui nänö ñäö emömämo ante edonque pönî bacæimpa, ante nê ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö nê apænedongä ingante pönencædänimpa, ante pongacäimpa. 8 Incæte mäningä wï ñäö bai ingaingä ingampa. Wæætê tömengä, Wacä waodäni beyæ nê ñäö bai ingaingä ingampa, ante apænecæte ante pongacäimpa. 9 Nê nê ñäö bai nê ingaingä iñömö waodäni tömänäni inänite tömengä nänö ñäö emömämo pönoncæte ante inguipoga wææ pongacäimpa.

10 Tömengä inguipoga iñömö quëwengacäimpa. Ayæ tömengä inguipoga nê badongaingä iñongante inguipogaque quëwëñäni wæætê Baa äninque tömengä ingante ædö cæte ate bai pönenguinänii. 11 Tömengä edæ tömengä qui weca pongacäimpa. Pongä ate tömengä guiddëñäni incæ tömengä ingante ænämäi ingadänimpa. 12 Incæte tömengä ingante nê ængainäni iñömö tömengä emöwo, Codito, ante nê wede pönëñäni iñönänite tömengä tömëñäni inänite Ao äninque edæ, Wængongui wëñäni bacædänimpa, ante pönö cægacäimpa. 13 Ayæ Wængongui wëñäni iñömö wï waocä ëñate bai inänipa. Waocä, Botö wë manguinque, ante änämäi iñongante

ëñadänipa. Wï iñömöogængä angä beyænque inänipa. Wæætê Wængongui tömenganque cæcä ate tömëñäni tömengä wëñäni badänipa.

14 Tömengä iñömö edæ, Wængongui nänö Angainö, ante nê emongaingä ininque Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængongui Wengä adocanque inte adocä godömenque ñænængä inte nê cædongä ingä atamönipa. Adocä Mæmpo weca quëwente nê pongä iñömö tömengä nanguï waadete pönö cædongä inte nöingä änogä ingampa. 15 Wäo iñömö, Mäningä æbänö ingäa, ante apænecäimpa. "Mäningä botö nê apænedongä ingantedö ante iïmaï apænëtabopa. Botö täno pömo imopa. Tömengä nê ayæ Ponguingä iñömö godömenque ñænængä inte cædongä ingampa. Edæ botö ëñadämaï iñedê tömengä do ingacäimpa," ante nanguï pönî yedæ äninque Wäo apænecäimpa.

16 Mäningä nê ayæ Ponguingä iñömö nanguï pönî waadete pönö cædingue tömengä wæætê wæætê nänö entawëno ante pönongä æninque tomompa. 17 Edæ Wængongui tömengä nänö wææ angainö ante apænecä ëñëningue Mõitee wodi wæætê adodö ante yewæmöninque waodäni inänite godongacäimpa. Wængongui nänö waadete pönö cægainö ante nöingä nänö angainö ante guiquënë Itota Codito beyænque ëñëmompa. Itota Codito iñömö mönö nê Ponguingä ingaingä ingampa. 18 Mönö waocabo tömämo incæ Wængongui ingante cöwë adämö imopa. Incæte tömengä adocanque Wengä Wængongui weca nê quëwënongå inte, Mæmpo æbänö ingaingä ingäa, ante tömengä odömongä ate pönëmompa.

Wäo apænë guidönongä, Botö wï Codito imopa, angä

(Mäateo 3.11-12; Mäadoco 1.7-8; Odoca 3.15-17)

19 Oodeoidi awëñëdi Eedotadë quëwëñäni iñömö Wængongui qui, ante nê godönäni tönö Debii wodi pæinäni inänite godönäni Wäo weca godänipa. Gote pöninque adodäni, Æbidö inömi imii, ante apænëbi ëñëmönie, äñönäni Wäo iïmaï äninque 20 nämä wææ änämäi inte wæætê, Botö wï Codito inömo imopa, ante edonque pönî angantapa.

—Botö wï Codito inömo imopa.

21 Äñongante tömëñäni wæætê tömengä ingante,

—Æbidö inömi imii, Ediya wodi inömi imii. Apænëbi ëñëmönie.

Ante änäni ëñëningue tömengä,

—Wabo imopa.

Ante äñongä tömëñäni wæætê,

—Wængongui beyæ nê apænebi ayæ Ponguimi Inömi İmitawo.

Änâni êñëninque tõmengä,

—Wabo İmopa.

Ante angantapa.

²² Tömënanî İnque äninque,

—Æbidö İnömi İmii, ante apænebi êñëmönîe töö. Mönitö İmönite nê da pönöninâni weca godinque mönitö tömënanî İnânite, Æbidö İmii, ante ancæmönimpa. İnıneque bitö nâmâ incæ æbânö ämii.

²³ Äñönâni Wäo wæætê tömënanî İnânite, İtaiya wodi nê Wængongui beyæ nê apæneca nânö angainö bai ante İımaİ ante apænebo êñencæminimpa.

—Önömæca incæ nê aa pebo İnömo inte botö tömëmo pepâmo İımaİ nâni êñënö İmpa. “Awënë nânö ponguinö ante töinö pınonte bai tee möedâni,” ante aa pebopa, angantapa.

²⁴ Paditeoidi nê wadö tedete wadö cædâni nâni cabo İnönâni inte tömënanî pancadâniya İnânite da godönâni Wäo weca nê godâniya.

²⁵ Gote pöninque mäninâni guiquënë,

—Bitö wıı Codito İnömi inte wıı Ediya wodi İnömi inte ayæ wıı Wængongui beyæ nê apænebi ayæ Ponguimi İnömi İmpa. Bitö ædö cæte woadâni İnânite æpænê guidömi İmii.

²⁶ Ante äñönâni Wäo wæætê,

—Botö önonque æpænê guidönömo İmopa. Wæætê mönitö weca adocanque a ongonğä İñongante, Tömengä æcânö ingää, ante mönitö êñënâmaİ İminipa. ²⁷ Botö tâno pömo İmopa. Tömengä nê ayæ Ponguingä İngampa. Botö önonque wædænque cæbo inte ædö cæte tömengä awæncata incæ ñi cæte cæbo İmoö.

²⁸ Betâniya nâni quewëñömo Oododânö æmæmäa Wäo æpænê nânö guidönömo mänömaİ bagatimpa.

İtota Wængongui Codotedo

²⁹ Baänæ ate İtota bee tente pongä adinque Wäo apæneçantapa. “Aedâni, İngä Wængongui da pönongä pönıngä İngampa. Ayæ tömengä woadâni İnguıgoga quewënâni nâni wënæ wënæ cægainö ante æninque teëmê mongænte wænguıngä İngampa, ante Wængongui tömengä İngante, Codotedo, ante pönö pemongacäimpa. ³⁰ Mänıngä İñömo botö nê apænedongä İñongante botö İımaİ apænetabopa. ‘Botö tâno pömo İmopa. Onguıñængä nê ayæ Ponguingä İñömo godömenque ñænængä inte cædongä İngampa. Edæ botö êñadâmaİ İñedê tömengä do İngacäimpa.’ ³¹ Botö incæ adobâi, Tömengä æcânö ingää, ante êñënâmaİ İntabopa. Mönö İdægocabo İñömonte, Mönitö tömengä İngante êñencæminimpa, ante botö æpænê guidöninque pömo İntabopa.”

³² Ayæ Wäo, Tömengä İngampa, ante äninque, “Botö æmö ayömete Wængongui

Önöwoca incæ öönædê owote equemö bai wææt tömengä næ gongængä atabopa. ³³ Wængongui, Woadâni İnânite æpænê guidöe, ante botö İmote nê da pönöningä wıı botö İmo angä bai botö, İtota æcânö ingää, ante êñënâmaİ incædömoimpa. Incæte tömengä botö İmote İımaİ angantapa. ‘Wængongui Önöwoca incæ æcânö onguıñængäa wææt næ gongængä ayömi mänıngä İñömo nê æpænê guidönâni bai Wængongui Tæiyæ Wæmö Önöwoca İngante da pönongä woadâni mımönöque pö guıquıngä, ante cæcä İngampa.’ ³⁴ Mänıñö botö adınö İmpa. Mänömaİ beyæ İımaİ ämopa, Mänıngä İñömo Wængongui Wengä İñongä İngampa,” ante Wäo apænegacäimpa.

İtota miñæ nê tâno godâni

³⁵ Baänæ ate Wäo töno tömengä emiñæna mënaa adoyömo onğöñönâni ³⁶ İtota wodo tebæ cængongä adinque Wäo angantapa.

—Aeda, tömengä İñömo Wængongui Codotedo İñongä İngampa.

³⁷ Mänıñö angä êñëninque Wäo nânö nê emiñæna İnına incæ İtota İngante tee empo godaİmpa. ³⁸ İtota dadi emænte ayongä tee empo pöna adinque angantapa.

—Quınante pöminaa.

Ante äñongä tömëna wæætê,

—Mætodo, æyömöno owobi. Apænebi êñëmönæe.

Änatapa. Mänıne, Mætodo, ante mönö tededö, Nê Odömongä, ante İmpa.

³⁹ Äna êñëninque tömengä,

—Ægodöeda go aeda.

Äñongä tömengä miñæ godatapa. Goyöna ædæ wææicä İntapa. Ayæ nânö owocönê gote adinque tömëna adöönæ tömengä weca a onğönapa.

⁴⁰ Wäo nânö äñinö êñëninque İtota İngante tee empo goda mënaa İñönte adocanque Æntade İñömo Timönö Pegodo töniñacä İngantapa. ⁴¹ Tömengä nânö töniñacä Timönö İngante ancæte ante diqui diqui minte gote adinque angantapa.

—Mæetiya mönö äñongä İngante atamönapa, angantapa. Tömengä İñömo Wængongui nânö nê Pönongaingä Codito İñongä İngampa.

⁴² Ayæ Timönö İngante İtota weca ænte mämongä pongä adinque İtota angampa.

—Bitö Wäo wê Timönömi İmi abopa. Botö wæætê, Bitö tæımö dicabo bai İmpa, ante bitö İmite mönö tededö, Quepata, pönö pemömo. Önonque adowo emöwo incæ guıdiego tededö, Pegodo, äñanipa.

Pedipe töno Näatänaedo İnate İtota angä tee empo goda

⁴³ Baänæ ate İtota, Gadideabæ ante gocæboimpa, ante pönengäimpa. Pedipe İngante adinque İtota tömengä İngante,

—Botō miñæ pœ, ämo, angacäimpa.

⁴⁴ Pedipe iñomō Æntade tönō Pegodo bai Betaida nāna quëwëñomō adoyomō quëwëningä inongaimpa. ⁴⁵ Pedipe Nāatānaedo weca gocä adinque tömengä ingante iñimä äninque,

—Wængongui nānō wææ angainō ante yewæmōninque Mōitee wodi nānō nē yewæmongaingä ingante mōnitō atamōnipa. Wængongui beyæ nē apæneganāni adobai māningä ingantedō ante yewæmongadānimpa. Tömengä iñomō Itota Nāatadeta quëwënongä inte Ootee wengä ingampa, ante angantapa.

⁴⁶ Ante āñongä Nāatānaedo wæætë,
—Nāatadeta quëwëñomō adocanque waa quëwente pongä, ante mōnitō dicæ ëñëmōniyaa.

Angä ëñëninque Pedipe iñomō,
—Pō ae, angantapa.

⁴⁷ Itota ayongä Nāatānaedo pongä adinque tömengä,

—İngä iñomō nāwä idægocä inongä inte tömengä nē nō entawënongä inte babæ cædāmai inongä ingampa, ämopa.

⁴⁸ Angä ëñëninque Nāatānaedo,
—Æbānō imoo, ante bitō æbānō cæte do ëñëmi,

Ante āñongä Itota wæætë tömengä ingante,

—Pedipe iñomō bitō imite ayæ aa pedāmai iñedë bitō iigowæncawa tæ contabi iñomite botō bitō imite do atabopa, angacäimpa.

⁴⁹ Ayæ Nāatānaedo,
—Awënë nē Odömōmi imi, bitō Wængongui Wëmi inōmi imipa. Idægoidi mōnō cabo iñomonte bitō mōnitō Awënë Odeyebi inōmi imipa, ämopa.

⁵⁰ Åñongä Itota wæætë,
—Bitō iigowæncawa tæ contabi iñomite botō bitō imite atabopa, ämo beyænque pönëmi imipa. Māninō ante adinque bitō godōmenque botō bamōnengæ cæbo acæbiimpa, ämopa.

⁵¹ Tömengä godōmenque angantapa.

—Bitō imite nāwangä ämopa. Öönædë wi ænete bayō Wængongui anquedoidi Waocä ëñagaingä weca wææninque æiyōnāni bitō acæbiimpa.

2

Cānaa quëwëñomō nāni monguimæno cæte bedāni

¹ Mëōnaa go adoönæque iñonte Cānaa quëwëñomō Gadideabæ iñomō monguimæno ante bedānipa. Itota wānā adoyomō ponte ongoncäimpa. ² Itota tömengä ëmiñænāni tönō tömënāni inānite adobai, Monguimæno mini bequinque, ante tē tē wente ænte pongadānimpa. ³ Ayæ yowepæ wædænque tī nāmæ biñomæ

nāni ämæ dæ bedāni adinque Itota wānā tömengä Wengä ingante,

—Tömënāni biñomæ dæ ämæmpa.

⁴ Åñongä Itota wæætë,

—Badä ëñëmi. Botō cæquëñënō tömëmoque cæquino impa. Botō cæyedë wii eyepæ impa, ämopa.

⁵ Tömengä wānā iñomō nē cædāni inānite,
—Minitō iminite æbānō angä ëñente cæedāni, angantapa.

⁶ Ayæ önonpo æmæmpoque go adocadeque æpæncade dica inte badöincade iñomō cō cædāni ongoncädepa. Wængongui weca guicæte ante waëmō bacëmōimpa, ante äate cædānipa, ante oodeicō nāni äagaincade in-cädepa. İncade pancacadea otenta ditodo næ ongoncädepa. Ayæ pancacadea tië ditodo næ ongoncädepa. ⁷ Nē cædāni inānite Itota,

—Æpæncadecoo iñomō æpæ eyede pōni pe ñiñæedāni.

Angä ëñëninque pe ñiñængadānimpa. ⁸ Ayæ tömënāni inānite,

—Owæta ænte wædænque mä iyænte monguimæno ante nē cædongä ingante godōmini æncæcäimpa, ämopa.

Angä ëñëninque mānōmai cægadānimpa. ⁹ Ayæ monguimæno ante nē cædongä æpæ inimæ incæ biñomæ badimæ æninque, Æbānō imæ, ante bedinque tömengä, Itota nānō badōnimæ impa, ante ëñënamai inongäimpa. Nē cædōnāni Itota weca æpæ pe ñiñænānique ëñëñōnānimpa. Ayæ monguimæno ante nē cædongä iñomō nē monguingä ingante, Nānënë pœ, aa pecä pongä ate, ¹⁰ iñimä angantapa.

—Wadāni tömānāni waimæ biñomæ tāno godōnāni bedānipa. Ayæ ate ææmæ becæ pōnāni tōmo pōni bedāni adinque tömënāni biñomæ wædænque godonte nāni ænimæ wæætë godōnāni bedānipa. Bitō guiquënë ñōwoyedë waimæ biñomæ bitō nānënë concædimæ ænte pōmipa.

¹¹ Itota, Acædānimpa, ante mānōmai cædinque tömengä Cānaa quëwëñomō Gadideabæ iñomō māñi mā nānō bamōnengæ cægacäimpa. Māñi tæi piñænte bamōnengæ cæcä adinque waodāni, Tömengä waëmō pōni inte cæcampa, ante edonque agadānimpa. Ayæ tömengä ëmiñænāni iñomō tömengä ingante godōmenque wede pōñenāni bagadānimpa.

¹² Ayæ ate Capënaömō quëwëñomō Itota tömengä wānā tönō tömengä biwiidi tönō tömengä ëmiñænāni tönō wææ gogadānimpa. Māñiñomō godinque wædænque eönæ quëwengadānimpa.

*Wængongui oncō tæiyæ waëmō bacæimpa, ante cæcä
(Māateo 21.12-13; Mādaco 11.15-18; Odoca 19.45-46)*

¹³ Wodo pænta gogaïönæ, ante oodeoidi Patowa nāni ææmæ cænguïönæ oo pōni bayedē Itota Eedotadēē iñōmō æigacāimpa. ¹⁴ Tōmengā iñōmō Wængonguï oncō ñænæncōnē yabæcōnē pō guïdinque ayongā wagadaidi obegaidi tōnō equemōidi inānite godonte æncæte ante nē mǎnāni inānite acantapa. Ayæ wadāni campio næænte nē godonte ænōnāni iñōmō nāni godonte æimpaa tæ contayōnānite tōmengā acantapa. ¹⁵ Yæguincamē ñænæmōmo nāā wēnēninque que cæte ate æninque tōmengā Wængonguï oncō ñænæncōnē yabæcōnē nē ongōnāni inānite tatodongā tao godānitapa. Adobaï obegaidi tōnō wagadaidi inānite, Tao gobæwedāni, angā tao godānitapa. Ayæ campio næænte nē godonte ænōnāni tōmēnāni tiguïtamō æninque tōmengā wido cæcā gueogæ gotimpa. Ayæ adodāni nāni æimpaa bæ tacā guïdōmēmæ go wææntapa. ¹⁶ Ayæ equemōidi godonte æncæte ante nē mǎnāni inānite Itota,

—Mīnitō equemōidi ænte tao gobæwedāni. Botō Mæmpo oncōnē incæ mīnitō ædō cæte, Mōnō godonte æiñōmō bai impa, ante cæmīnitapa tōō, angacāimpa.

¹⁷ Mǎnīnō angā ēñēninque tōmengā emīñænāni Awēnē Dabii nānō yewæmongaiñō ante iñmāi ante pōnente wædānipa. “Bitō oncō ante waodāni waa acædānipa, ante cæcæboimpa, ante botō nangui cæinente wængui wæ,” ante yewæmongatimpa.

¹⁸ Ayæ oodeoidi awēnēdi pancadāniya tōmengā ingante,

—Bitō mǎnīi tōmāā awēnē bai cæbi incæ æbānō bitō bamōngæ cæte odōmōmi adinque mōnitō, Māningā nē angā ingampa, ante ēñæcæmōnimpa, āmōnipa.

¹⁹ Āñōnāni Itota wæætē tōmēnāni inānite,

—Wængonguï tæiyæ waēmō oncō incæ mīnitō iñcō bæ tate ewēmīni iñinque botō mēōnaa go adoōnæque iñō mīincō mæñoncæboimpa, āmopa.

²⁰ Angā ēñēninque oodeoidi awēnēdi pancadāniya,

—Wængonguï tæiyæ waēmō oncō coadenta i tei wadepo ganca mæñongadānipa. Bitō iñōmō ædō cæte, Botō mēōnaa go adoōnæque iñō mīincō mæñoncæboimpa, āmii, ānānitapa.

²¹ Itota iñōmō nāmā baō incæ ante, Wængonguï tæiyæ waēmō oncō bai impa, ante apæncæā inongāimpa. ²² Tōmengā iñcayæ wængā ate Wængonguï, Nāni omæmōe, angā ñāni omæmongā ate, Æbānō angacāi, ante tōmengā emīñænāni pōnēnānitapa. Ayæ, Wængonguï angā ēñente nāni yewæmongaiñō nō impa, ante pōnēnāni inte ayæ Itota tōmēnāni inānite nānō ānīnō ante adobaï pōnengadānipa.

Itota, Mōnō waocabo æbānō imōō, ante ēñengampa

²³ Patowa nāni ææmæ cæyedē Itota Eedotadēē iñōmō ponte quēwēninque, Acædānipa, ante bamōngæ nangui cæcā adinque waodāni tæiyænāni iñōmō, Māningā mōnō Codito ingampa, ante pōnengadānipa. ²⁴ Itota edæ, Waodāni tōmānāni æbānō entawēnāni inānii, ante do ēñēnongā inte tōmengā, Wabānō pōnēnāni, ante tōmēnāni inānite gomō adongā ingantapa. ²⁵ Edæ tōmengā waodāni nāni entawēnō ante do ēñēnongā ingantapa. Iñinque waocā iñōmō, Waodāni æbānō cædāni, ante apæncæcāimpa, ante Itota tōmengā ingante, Bitō botō imo adodō ancæbiimpa, ante ānāmai ingacāimpa.

3

Itota tōnō Nicodemō

¹ Paditeocā adocanque tōmengā emōwo Nīicodemō tōmengā iñōmō oodeoidi awēnēdi tōnō nē godongāmæ cæcā ingacāimpa.

² Adocā woyowotæ Itota weca pōninque,

—Awēnē nē Odōmōmi ēñēmi. Wængonguï, Odōmoncæbiimpa, ante bitō imite da pōnongā pōnīmi imipa, do ēñēmōnipa. Edæ Wængonguï waocā tōnō godongāmæ cædāmai ingā iñinque māningā ædō cæte bitō bai bamōngæ cæcā aquimōnii.

³ Angā ēñēninque Itota wæætē,

—Bitō imite nāwangā āmopa. Nē mem-poga ēñadinganque Wængonguï Awēnē Odeye nempo guite aquingā ingampa.

⁴ Āñongā Nīicodemō,

—Waocā picængā ba ate ædō cæte mem-poga ēñaqingāā. Tōmengā nānō wāānā cæncadē ædō cæte mem-poga guī æidinque ēñaqingāā.

⁵ Angā ēñēninque Itota angantapa.

—Bitō imite nāwangā āmopa. Waocā æpænē guïdengā iñongante Wængonguï Ōnōwoca cæcā beyænque mem-poga ēñadinganque Wængonguï Awēnē Odeye nempo guite quēwengingā ingampa.

⁶ Baonga beyænque nē ēñadāni iñōmō edæ baonque ēñate quēwēnānipa. Wæætē Wængonguï Ōnōwoca cæcā beyænque nē ēñadāni iñōmō Wængonguï Ōnōwoca ingante ewocate quēwēnānipa.

⁷ Botō, Bitō mem-poga ēñaquēñēmi imipa, ante botō ānō ēñēninque, Æbāmē impa, ante ānāmai incæbiimpa. ⁸ Woboyæ nānō cægāi bai wayōmō wayōmō pæmænte gopa. Woboyæ nānō pæmæmāmo ēñēmō incæ, Ædonō pæmænte pō, ædonō pæmænte go, ante ēñēnāmai imompa. Wængonguï Ōnōwoca cæcā beyænque nē ēñadāni tōmānāni inānite tōmengā æbānō cæcāā, ante adobaï ēñēnāmai imompa, āmopa, ante Itota apæncæcantapa.

⁹ Apæneca ēñēninque Nīicodemō,

—Ēbānō inguū.

¹⁰ Āñongā Itota wæætē,

—Idægoidi Inānite nē odōmōmi īmi incæte māninō ante ædō cæte ēñēnāmaī īmii.

¹¹ Bitō īmite nāwangā āmopa. Mōnitō quiēmē ante ēñēnīmōni inte māninō ante apænemōnīpa. Mōnitō quiēmē ante adīmōni īninque, Mānōmaī impa, ante apænemōnīpa. Mīnitō guiquēnē mōni ānō ante apænemōni ēñēninque ayæ Baa āmini inte pōnēnāmaī īminīpa. ¹² Botō mūnitō īminite, Inguipoga quēwēnāni weca æbānō ī, ante apænedīmo īmo incæte mūnitō ēñēnāmaī īminīpa. Īninque Wængonguū cæcā beyænque oōnædē mīni quēwēnguīnō ante æbānō ī, ante apænebo bai ædō cæte pōnēnguīmīnii, ante apæneantapa.

¹³ Ayæ apænedinque, “Waadāni tōmānāni oōnædē æidāmaī ingadānīpa. Waobo nē ēñagaīmo inte oōnædē quēwente nē wææ pōmo īñōmō botō adoboque oōnædē æibo īmopa. ¹⁴ Mōitee wodi ōnōmæca tæntæ nāni badōninto æninque awāa nā cædinque gō cæcā a ongonatīpa. Waobo ēñagaīmo īmote adobaī awāa tīmpodinque tīwadīnque gō cædāni wægonquēnēmo īmopa. ¹⁵ Mānōmaī botō īmote cædāni adīnque botō īmote nē wede pōnēnāni īñōmō tōmānāni cōwē wæñāmaī quēwencædānīpa,” ante Itota apænegacāīpa.

Wængonguū nānō waadete pōnēnō

¹⁶ “Edæ Wængonguū incæ inguipoga quēwēnāni Inānite nē waadete pōngēngā inte tōmengā Wengā adocanque onguūñængā īñongante pōnongā pongacāīpa. Īninque æcānō tōmengā ingante nē wede pōnēna īñōmō tōmengā wē womōnāmaī inte cōwē wæñāmaī quēwencæcāīpa. ¹⁷ Edæ Wængonguū incæ tōmengā Wengā ingante inguipoga īñōmō da pōnongā pongacāīpa. Incæte, Inguipoga quēwēnāni nāni pante wæquinque, ante apænte ancæte ante wīī pongacāīpa. Wæætē inguipoga quēwēnāni Inānite tōmengā ængā beyænque quēwencædānīpa, ante tōmengā ingante da pōnongā pongacāīpa.”

¹⁸ “Æcānō tōmengā ingante nē wede pōnēna īñōmō Wængonguū tōmengā ingante, Bitō pante wæquinque cæbīpa, ante apænte ānāmaī incæcāīpa. Æcānō guiquēnē wede pōnēnāmaī īna īñōmō Wængonguū tōmengā ingante, Botō Wengā adocanque īñongante bitō tōmengā emōwo ante pōnēnāmaī īnōmi inte wæcæbīīpa, ante do apænte angā ingampa. ¹⁹ Wængonguū nānō apænte ānō īñōmō īmaī impa. Nē nāō bai inongā īñōmō, Wængonguū æbānō ingāā, ante inguipoga īñōmō ancæte ante pongacāīpa. Incæte waodāni tōmēnāni nāni cædīmāmo wēnæ wēnæ ī beyænque wēmō īñōmō

ante waadete pōnēnāni inānīpa. Wæætē nē nāō bai inongā ingante waadedāmaī inānīpa. ²⁰ Nē wēnæ wēnæ cædōnāni inte nāō īñōmō ante pīlīnīque Baa ānīnque, Mōnō cædīnō edonque pōni badāmaī ingæīpa, ante nāō īñōmō pōnāmaī inānīpa. ²¹ Waodāni Wængonguū nāwangā nānō āmaī nē cædōnāni guiquēnē, Mōnō cædīnō ante Wængonguū mōnō tōnō godongāmæ cæcā beyænque cætamōpa, ante edonque pōni acædānīpa, ante cædinque nāō īñōmō pōnīnque cædānīpa.”

Wäo nē guidōnongā Itota ingantedō ante apæneca

²² Ayæ ate Itota tōmengā emīñænāni tōnō Oodeabæ wædænque nāni quēwēñōmō godānitapa. Gote pōnīnque māniñōmō tōmēnāni tōnō wædænque quēwēnīnque Itota angā beyænque tōmēnāni waodāni Inānite æpæñē guidōnāni guīgadānīpa. ²³ Ēñōō quēwēñōmō æpæ nangūi mæ adīnque Wäo māniñōmō guidongā guīgadānīpa. Ayæ waodāni, Wäo mōnitō imōnite æpæñē guidongūngā, ante cōwē tōmengā weca pōnāni Inānite guidongā guīdānīpa. Ēñōō quēwēñōmō Tadiī quēwēñōmō eyequeī īnīpa. ²⁴ Māniñedē Wäo ingante ayæ tee mōnedāmaī ingadānīpa.

²⁵ Wäo emīñænāni pancadāniya oodeocā adocanque tōnō apænedinque, Mōnō oodeocabo æbānō cæte Wængonguū weca guicæte ante waēmō bacæmōīpa, ante tōmēnāni nāni pōnēnō ante guēadō guēa ante tedewēnānīpa. ²⁶ Adodāni Wäo weca ponte apænedinque,

—Nē odōmōmi ēñēmi. Oododānō æmæmāa bitō weca nē pōningā ingantedō ante bitō, Māningā ingampa, ante apænebitawo. Edæ māningā onguūñængā īñōmō adobaī æpæñē guidongā guīdānīpa tōō. Waodāni tōmānāni tōmengā weca godānīpa, ante wædānitapa.

²⁷ Ante wædāni ēñēninque Wäo,

—Wængonguū oōnædē quēwēnongā pōnō angā ænīnque waocā mānōmaī beyæ cæcampa. ²⁸ Botō wīī Codito inōmo īmopa. Īñæmpa Wængonguū botō īmote tāno da pōnongā pōnīmo īmopa. Tōmengā ayæ Pongūngā, ante apænetabopa. Mānōmaīnō ante apænebo ēñēnīmīni inte mīnitō tōmēmīni māninō ante nē apænequēnēmīni īminīpa. ²⁹ Mongūngā īñōmō mongā ate tōmengā onquīyængā nānōogængā bacampa. Tōmengā guīdengā īñōmō nē mongūngā ante wānō cōnīnque ēñēñongā mongūngā apæneca ēñēninque, Mongūngā apæneca ēñēmopa, ante watapæ tocampa. Botō adobaī Codito apæneca ēñēmopa, ante māningā bai nangūi watapæ tobo īmopa. ³⁰ Tōmengā īñōmō godōmenque nænængā inte cædongā baquēnengā

ingampa. Botó guiquenē pönömenque wädämo inte cädömo baquēnēmo imopa, ante Wäo apænecäimpa.

Öönædē nē quēwente wææ pongä

³¹ Ayæ Wäo godömenque apænecantapa. Öönædē nē quēwente wææ pongä iñömö tömengä iñömö wii wadäni bai wædangä inte wæætē ñænængä inte cædongä ingampa. Öönædē nē quēwente wææ pongä iñömö tömengä godömenque ñænængä inte cædongä ingampa. Inguipoga iñömö nē ēñacä guiquenē waodäni bai quēwēnongä inte inguipogaque ante apænecampa. ³² Tömengä Wængongui weca quiemē adingä inte quiemē ēñeningä inte mäninö ante apænecä ēñëninge wadäni wæætē, Nāwangä impa, ante ānāmai inānipa tōö. ³³ Mäninö ante nē Ao angä guiquenē tömengä, Wængongui nāwangä angä ingampa, ante edonque pōni angä inongä ingampa. ³⁴ Edæ Wængongui nänö da pönöningä iñömö Wængongui nänö änö ante apænecampa. Tömengä ingante Wængongui iñömö tömengä Öönöwoca ingante godongä æningue tömengä ædæmō ewocate quēwengampa. ³⁵ Mæmpo Wængongui iñömö tömengä Wengä ingante nē waadete pönengä ingampa. Wængongui tömengä ingante, Bitö nempo quinö inincoo tömancoo pönömo æninque bitö awënë bacæbiimpa, ante pönö cægacäimpa. ³⁶ Æcänö Wængongui Wengä ingante nē wede pönëna iñömö tömengä cōwē wænāmai quēwencæcäimpa. Æcänö Wængongui Wengä ingante nē Baa ante pönënamai ina guiquenē tömengä wii cōwē wænāmai quēwencæcäimpa. Edæ Wængongui tömengä ingante ængui nänö panguiämämo cōwē cædongä ingampa, ante Wäo mänifedē iinque apænecäimpa.

4

Itota Tämadiabæ onquiyængä ingante apænecä

¹ Paditeoidi inänite iimäi ante tededäni ēñënanitapa. Itota pönö cædinque æpænē guidongä guidinque tömengä nänö emiñænäni iñömö wii Wäo emiñænäni bai wædænque badäni inte nangui inäni badänipa, ante tededänitapa. ² Mänömai ānāni incæte wii Itota nē guidongä inongäimpa. Wæætē tömengä emiñænäni waodäni inänite guidönäni guigadänimpa. ³ Mäninö ante Paditeoidi do ēñënanipa, ante ānāni ēñëninge Awënë Itota Oodeabæ quēwëninge wadæ go Gadideabæ iñömö ocæ ēmænte gogacäimpa.

⁴ Gadideabæ taadö Tämadiabæ iñömö tæcæguedē inö godö tömengä goquēnengä inongäimpa. ⁵ Tämadiabæ iñömö godinque tömengä Ticada nāni āñömö pongantapa.

Mänii Ticada quēwëñömö eyequei docä Aacobo wodi tömengä wengä Ootei wodi ingante, Pancabaa bitö ömæ baquifñömö, ante tömengä ingante nänö godongaimæ inimpa. ⁶ Ayæ æpäämönicæ Aacobo wodi nänö ææ wogaïmönicæ adoyömö inimpa. Itota taadö gobæ inö godinque nangæ badinque æpäämönicæ iñömö pö tæ contayongä mänifedē tæcæ bæcä bagatimpa. ⁷ Tæ contate ongöñongä Tämadiabæ quēwengä onquiyængä æpæ iyænte tadonte æncæte ante pongä adinque Itota tömengä ingante, —Æpæ pönömi beboe, angantapa. ⁸ Edæ tömengä miñæ nē godäni mänināni quēwëñömö cængui godonte æncæ godäni inönänimpa.

⁹ Tämadiaidi inänite oodeoidi cōwē gomö adäni inänipa, ante ēñengä inte Tämadiabæ quēwengä onquiyængä iñömö Itota ingante,

—Bitö oodeobi imi incæte botö Tämadiabæ quēwëmo iñömote bitö ædö cæte botö imote, Æpæ pönömi beboe, ämi, ämopa.

¹⁰ Åñongä Itota wæætē,

—Bitö, Wængongui quinö nänö pönöni i, ante ēñente bai ayæ, Æbodö inömo inte bitö imite, Æpæ pönömi beboe, ante apænëboo, ante ēñente bai bitö wæætē botö imote, Æpæ pönömi beboe, ancædömiimpa. Ayæ botö bitö imite æpæ quēwenguimä pönömo becædömiimpa, ämopa.

¹¹ Angä ēñëninge onquiyængä,

—Awënë, bitö æpæ mä iyæncade dæ ampä. Ayæ æpäämönicæ guibæ impa. Mänimæ æpæ quēwenguimä bitö nē apænëdimæ ædönö mä iyænte ænguiimii. ¹² Mönö docä mæmpo Aacobo wodi iñömö, Botö æmæwo wæmo adinque botö æpäämönicæ munitö qui bacæimpa, ante iimönicæ mönö imonte godongacäimpa. Tömengä adomönicæ æpæ begacäimpa. Tömengä wëñäni tönö tömengä cæningäidi adobai adopæ begadänimpa. Adocä mönö docä wædangä iñongante bitö godömenque ñænæmi inte nē cædömi imitawogaa, ämopa.

¹³ Åñongä Itota wæætē,

—Æcämenque iñömö mänimæ bedinque wæætē gæwænte bacæcäimpa. ¹⁴ Æcämenque botö godonguimä nē becä guiquenē tömengä gæwænāmai cōwē quēwencæcäimpa. Wæætē botö tömengä ingante tömëmo godonguimä godömo bedinque tömengä botö quēwëno entawente quēwencæcäimpa. Æpäämönicæ cōwē cægö bai botö tömengä mümöno godonguimä beyænque tömengä wænāmai nänö quēwenguiñö do æninque quēwencæcäimpa, ämopa.

¹⁵ Onquiyængä tömengä ingante,

—Awënë, äninque, Botö gæwænāmai bacæboimpa, ante mänimæ botö imote

pönömi beboe, ämopa. Ayæ mäniñomö cöwé æpæ iyæncæ pönämaï incæboimpa.

¹⁶ Ante äñongä tömengä wæætê,
–Goe, bitö nänöögængä ingante aa ped-
ingate ænte mämömi pongæ, angantapa.

¹⁷ Äñongä tömengä wæætê,
–Botö nänöögængä dæ ampa.
Angä ëñëninque Itota tömengä ingante,
–Bitö, Botö nänöögængä dæ angampa,

äninque nö ante ämipa. ¹⁸ Ìñæmpa bitö nänöögæidi ðnompö æmæmpoque Ìñönänite bitö tömënanï inänite mönïmi ïmipa töö. Ayæ ñöwoyedê onguïñægä bitö weca në quëwëngä ññömö wïi bitö näwä nänöögængä ingampa. Ìninque ñöwo bitö äno ññömö edæ näwangä impa, ämopa.

¹⁹ Angä ëñëninque onquiyængä,
–Awënë, Bitö Wængonguï beyæ në apænebi ïmi adinque ëñëmopa. ²⁰ Mönitö dodäni mæmpoidi wodi, Ì onquiyabo ñnö gote Wængonguï ingante, Bitö Awënë Wængonguï ïmidö angüënë, ante ædæ wææninque angadänimpa. Minitö në oodeoidi ïmini guiquënë, Wængonguï ingante waa ate apæneçæte ante Eedotadëë quëwëñomö mäniñommonque godinque ædæ wæænte apæneçæimpa, äminipa töö.

²¹ Äñongä Itota wæætê,
–Onquiyæmi ëñëmi. Botö äno ëñëninque pönëe. Minitö ññömö ædæ wææninque botö Mæmpo ingante, Bitö Awënë Wængonguï ïmidö angüënë, ante Ì onquiyabo ñnö incæ Eedotadëë mäniñomö incæ munitö mäninö ante änämaï angüönæ oo pönï impa. ²² Minitö tämadiaidi ññömö në Wængonguï ingante, Bitö Awënë Wængonguï ïmidö angüënë, ante ædæ wææninque apænemïni incæte adocä ingante, Æbänö ingäa, ante ëñënämaï ïminipa töö. Mönitö guiquënë në ædæ wææninque Wængonguï ingante waa ate apænemöni inte adocä, Æbänö ingäa, ante do ëñëmöni ïmönipa. Edæ, Në wënæ wënæ cædäni wæncæ cædinäni incæ quëwëncædänimpa, ante në Ängä ññömö oodeocä ñongä ingä apa änewëë. ²³ Botö Mæmpo ingante, Bitö Awënë Wængonguï ïmidö angüënë, ante ædæ wææninque näwangä ante apænedönäni inte apæneçædänimpa. Adodäni, Näwangä impa, ante nö pönente ëwocadäni inte ædæ wææninque Wængonguï ingante mäninö ante watapæ apæneçædänimpa. Mäninö ante näni apænequïönæ ññömö edæ oo pönï impa. Edæ do ñinque batimpa. Wængonguï, Mänömaï entawente nö pönënanï bai ñnani inänite diqui diqui mininque, Mäninänite botö imote, Bitö Awënë Wængonguï ïmidö angüënë, ante ædæ wææninque watapæ apæneçædänimpa, angampa. ²⁴ Wængonguï ðñowocaque ëwocate quëwëngä ingampa. Ìninque në ædæ wæænte tömengä ingante

watapæ apænedäni ññömö tömënanï, Näwangä impa, ante nö pönente ëwocadäni inte ædæ wææninque tömengä ingante watapæ apænequëñënanï ñnänipa, ämopa.

²⁵ Angä ëñëninque onquiyængä,
–Botö, Mëetiya näni Codito äñongä poncæcäimpa, ante do ëñëmopa. Tömengä pongä ate, Æbänö inguïi, ante mönö ïmonte tömänö odömonte apæneçä ëñëncæmönimpa.

²⁶ Äñongä Itota wæætê,
–Botö në apænebo ññömö Codito ñnömo ïmo apa cæbii, ämopa.

²⁷ Tæcæ apæneyongante tömengä müñæ në godäni ocæ ëmænte ponte ayönäni tömengä ññömö onquiyængä ingante apæneçä adinque, Æbänö cæ wæmönii, ante guïñente wædänitapa. Incæte, Æbänö ämii, ante, Quinante tömengä ingante tedebii, ante adocanque incæ änämaï angantapa. ²⁸ Ayæ onquiyængä tömengä iyæncade ëmö cæte näni quëwëñomö ocæ ëmænte gote pöninque waodäni inänite apænedinque,

²⁹ –Ægodödäni, onguïñægä ññömö botö imote tæcæ adinque, Botö æbänö cæboo, ante tömänö ante botö imo në apæneçä ingante pö aedäni. Mäningä wabänö mönö Codito ñnogä ingantawo, ante ämopa.

³⁰ Angä ëñëninque tömënanï näni quëwëñomö tao godinque tömengä weca gogadänimpa. ³¹ Onquiyængä näni quëwëñomö tæcæ goyongä Itota näno në ëmiñænäni ññömö tömengä ingante,

–Awënë në Odömömi ïmi wædænque cæe, ämönipa.

³² Ante äñönäni tömengä wæætê tömënanï inänite,

–Botö cænguï botö ëadö ante quïnö ï, ante munitö guiquënë tömäa ëñënämaï ïminipa töö.

³³ Angä ëñëninque tömengä ëmiñænäni godongämæ nämanque apænedinque,

–Wabänö wacä tömengä ingante cænguï ænte pongantawo.

³⁴ Äñönäni Itota,

–Botö imote në da pönongä näno äno bai botö cædö ññömö mäni tömëmo cænguï bai impa. Ayæ, Tömengä näno cædö ante tömänö ñinque cæbopa, ante botö cædö ññömö botö cænguï bai adobai impa. ³⁵ Minitö ññömö, Mëa go mëa apäicä bayonte amüñayedê tömëmoncodê gæcæmönimpa, ante wïi äminitawo. Botö guiquënë munitö ïminite ämopa. Waodäni inänite wï æmonte aedäni. Edæ mäninäni tömëmoncoo gæyedê bai ñnänipa. ³⁶ Itota, Botö beyæ ante waodäni inänite në gædongä ingante botö, Bitö cæbipa, ante paga cædinque ñöwoyedê incæ do pönömo ængampa. Wænänämaï wantæpiyæ quëwëncædänimpa, ante cædinque ñöwoyedê incæ tömengä tömënanï inänite do gædongä ingampa. Ìninque botö äno ante waodäni

mimono në quiyadingä tönö në gædingä tönö guëa tocædaimpa. ³⁷ Mänömaï wëenëfedë nani angainö ante, Waocä adocanque tömëmö quiyacä ate wacä guiquenë në gædongä ingampa, ante nawangä ante impa. ³⁸ Tömëmoncodë iñömö cædäni bai cædämaï imini incæte minitö tömëmoncoo gæquïnäni bai bacæminimpa, ante botö, Waodäni botö quïnäni inänite gæcæminimpa, ante minitö iminite da godömo gominitapa. Wadäni iñömö do mänincodë nangui pöni quiyate cædinque botö äno ante waodäni inänite apænecadänimpa. Minitö guiquenë mini cædämaï iñömö incæ önonque gædimini iminipa, ante Itota apænecacäimpa.

³⁹ Onquiyængä guiquenë tãmadiadi mäniñömö nani quëwëñömö quëwëñäni inänite, "Tömengä iñömö botö imote tæcæ adinque, Botö æbänö cæboo, ante tömänö ante botö imote apænecantapa," ante apænecä ëñëninque tömëñäni nangui inäni Itota ingante pönegadänimpa. ⁴⁰ Tãmadiadi tömengä weca godinque, Bitö mönitö weca a ongöe, äñäni ëñëninque tömengä mëönaa iñonte tömëñäni weca owocantapa. ⁴¹ Tömengä nänö owoyedë tömengä nänö äno beyænque godömenque tæiyænäni iñömö tömengä ingante wede pönente badänitapa. ⁴² Adodäni onquiyængä ingante,

—Wii bitö apænete änonque ante ëñëninque pönëmöni inte mönitö tömengä apænecä adobaï ëñënimöni imönipa. Ayæ, Mäningä iñömö inguipoga mönö quëwëncabo iñömönte tömengä näwangä mönö imonte në Änongä ingampa, ante do ëñëmönipa, apænecadänimpa.

Itota cæcä beyænque awënë tönö cæcä wengä waa bacäi

⁴³ Mëönaa go ate tömengä mäniñömö quëwëninque wadæ godinque, Gadideabæ gocæboimpa, ante gocantapa. ⁴⁴ Itota incæ wëenëfedë, Iimaï impa, ante änongäimpa. Wængongui beyæ në apænecä inte tömengä nänö pægaimæ incæ mäniñömö apæneyongä tömengä tönö pægainäni guiquenë tömengä ingante wii waa adänipa töö, ante änongäimpa. ⁴⁵ Tömengä mäniï Gadideabæ nänö ponque pongä adinque gadideaidi edæ Eedotadëë iñömö Patowa nani ææmæ cæyedë Itota bai mäniñömö gote ongöñönäni, Tömengä æbänö cæcäa, ante tömäa adänäni inte, Bitö pömi waa amönipa, ante tömengä ingante apænecadänimpa.

⁴⁶ Ayæ Gadideabæ godinque Itota wæætë Cänaa nani quëwëñömö, Æpæ incæ biñömæ bacäimpa, ante wëenëfedë nänö cædiñömö adoyömö gocantapa. Capënaömö nani äñömö quëwëninque adocanque pancabaa awënë tönö godongämæ cæcä iñömö tömengä wëñængä onguiñængä wënæ wënæ inongäimpa. ⁴⁷ Adocä onguiñængä iñömö,

Itota Oodeabæ quëwente Gadideabæ pongä, äñäni ëñëninque tömengä Itota weca gote angantapa. Botö wëñængä onguiñængä wænecæ cæcä iñongante bitö tömengä ingante cæbi waa bacæe. Ægodöe. ⁴⁸ Itota tömengä ingante,

—Botö, Acæminimpa, ante bamönengæ cæbo ate wæmïni inte minitö mäninö beyænque botö imo pönëmïni awædö.

⁴⁹ Ante apænecä ëñëninque pancabaa awënë tönö godongämæ cæcä,

—Awënë, botö wëñængä ayæ wænämaï iñedë ægodöe gocäimpa.

⁵⁰ Ante äñongä Itota wæætë,

—Nöwo wadæ goe. Bitö wëñængä iñömö quëwëncæcäimpa, ämopa. Angä ëñëninque onguiñængä, Itota nänö äno nö impa, ante pönëninque wadæ gogacäimpa. ⁵¹ Tömengä, Botö oncö, ante taadonque goyongante tömengä beyæ në cædönäni tömengä ingante apænecæte ante pö bee ténäitapa. Pö bee téninque,

—Bitö wëñængä waa bacäi.

⁵² Ante apænecäni ëñëninque tömengä tömëñäni inänite, Botö wëñængä æyedëno waa bacäi, ante äñongä tömëñäni wæætë tömengä ingante,

—Iimö ædæ gowayedë mäniñedë tömengä gancæ bacantapa, ante apænecadänitapa.

⁵³ Ayæ wëñængä mæmpo, Bitö wëñængä quëwëncæcäimpa, ante Itota botö imote nänö äniñedë adoyedë botö wëñængä do waa bacantapa, ante wædinque tömengä tönö tömengä nani quëwëncabo tömancabo Itota ingante wede pönëñäni bagadänimpa.

⁵⁴ Itota oodeoidi weca quëwente Gadideabæ ocæ ëmænte pöninque tömengä mäniñömö ii bamönengæ cædinque mæmpoga nänö cædö bamönengæ bagatimpa.

5

Itota cæcä beyænque pæ opa pæ opa gocä waa bacäi

¹ Ayæ ate oodeoidi, Mönö Wængongui beyæ, ante nani ææmæ cæyedë Itota Eedotadëë iñömö æidinque ado ante gogacäimpa.

² Eedotadëë wææ cæte iñömö obegaidi nani pö guidemö gäänë gäwapæ impa. Mänimæ gäwapæ ebëdo tededö Betadapæ nani ämæ yæwedeca önonpo æmæmpoque ñoncæcate inoncöimpa. ³ Mänincönë wënæ wënæ inäni tæiyænäni cöwë öñönönänimpa. Pancadäniya babetamönäni inte pancadäniya pæ opa pæ opa godönäni inte pancadäniya cömante inönäni inänipa. ⁴ Adodäni, Æpæ incæ gopæ, ante wänö cönönäni inönänimpa.

Edæ Wængongui anquedo wæætë wæætë, Mänimæ incæ incæ gopængäimpa, ante wææ pöninque cædongäimpa. Gäwapæ incæ incæ go cæpæ adinque æcänö tãno mäniñænë guida inte adocä quëmë wënæ

wënæ i waa badongäimpa. ⁵ Mäniñomö öñönäni weca adocanque në öñönongä iñomö todëinta i ocho wadepo ganca wënæ wënæ inte wægaingä inongäimpa. ⁶ Adocä mäniñomö öñongä ingante Itota ponte ayongä wadäni, Mäningä wantæpiyæ mänömaï wënæ wënæ inte wægaingä ingampa, ante apænädäni ëñëninque Itota tömengä ingante,

–Bitö, Waa bälneño, ämitawo.

⁷ Ante äñongä në wënæ wënæ ingä wæætë,

–Awënë, gäwapæ incæ incæ gopæñedë æcänö botö imote ænte guiquinä edæ dæ angampa. Ayæ botö, Æpænë guicæboimpa, ante goyömo wacä pöninque do täno guicä.

⁸ Ante wæyongante Itota,

–Ængæ gantie, bitö bee podonte möimo ænte goe. ⁹ Äñongä onguiñængä iñomö iñontobæ waa badingä inte tömengä bee podonte möimo ænte cægonde gocantapa. Oodeoidi näni guëmanguionæ iñonte Itota mänömaï cæcantapa. ¹⁰ Mänömaï beyæ oodeoidi awënëidi iñomö onguiñængä në waa badingä ingante,

–Nöwoönæ guëmanguionæ iñonte mönö æbänö cæqui, ante do wææ yewæmonte impa cæbi. Bitö bee podonte möimo næænämaï incæbiimpa.

¹¹ Ante piñönäni tömengä wæætë,

–Botö imote, Waa bae, ante në cædingä iñomö adocä incæ, Bitö bee podonte möimo ænte goe, angä cætabopa.

¹² Angä ëñëninque tömënäni tömengä ingante,

–Mäningä iñomö bitö imite, Bitö bee podonte möimo ænte goe, ante në angä iñomö æcänö ingää. Apænëbi ëñëmönie, änänitapa.

¹³ Itota guiquënë do waodäni nanguï inäni ongönäni tæcæguedë go wadæ godongäimpa. Mänömaï beyæ onguiñængä në waa badingä iñomö, Në cædingä æcänö ingää, ante ëñënämaï ingantapa. ¹⁴ Ayæ ate Itota Wængongui oncö ñænæncö yabæcönë go guidinque tömengä ingante bee téninque,

–Ëñëmi, bitö wæætë waa babi impa. Ìninque godömenque wënæ wënæ cædämaï incæbiimpa. Bitö mäninö wënæ wënæ bitö cægainö ante ñimpo cædämaï imi ininque wabänö bitö wæwenguinque godömenque babaïmipa, ämopa.

¹⁵ Angä ëñëninque onguiñængä wadæ gote oodeoidi awënëidi weca pöninque angantapa. Botö imote, Waa bae, ante në cædingä iñomö Itota ingampa, ante apænecantapa. ¹⁶ Mänömaï beyæ Itota mäninö nënö cædinö ante guëmanguionæ iñonte cæcä adinque oodeoidi awënëidi iñomö tömengä ingante togænte wënæ wënæ cædänitapa. ¹⁷ Itota tömënäni inänite,

–Botö Mæmpo ñöwoönæ ganca tömengä nënö cædö ayæ cæcä ingampa. Ayæ botö adobaï cæbo imopa, ante apænecantapa.

¹⁸ Mäninö angä ëñëninque tömënäni godömenque piñinque, Mönö tömengä ingante æbänö cæte wænömö wænguingä, ante godömenque nanguï cægadänimpa. Tömënäni, Tömengä guëmanguionæ iñonte do cæcä ingampa. Ayæ godömenque, Wængongui botö Mæmpo inongäimpa, ante tededinque tömengä, Botö Wængongui bai imopa, ante bai cæcampa töö, ante tömënäni godömenque piñingadänimpa.

Tömengä Wengä ingante Wængongui pönö cæcä ate Awënë bacampa

¹⁹ Itota adodäni inänite iïmaï äninque, “Botö minitö iminite näwangä ämopa. Botö Wængongui Wëmo inömo incæ ædö cæte adoboque nämanque cæbo imoo. Botö Mæmpo æbänö cæcä adinque botö adodongue cæbopa. Edæ botö Mæmpo nënö cædö bai botö Wængongui Wëmo inte adobaï cæbopa. ²⁰ Edæ Mæmpocä Wëmo iñomote tömengä botö imote waadete pönëninque tömengä nënö cædö tömänö ante botö imote odömongä abo imopa. Ayæ minitö, Æbänö cæcä wæmöö, ante wæcæminimpa, ante cædinque tömengä godömenque bamönengæ nënö cædö ante botö imote odömongä ate botö wæætë cæbo acæminimpa. ²¹ Edæ botö Mæmpo iñomö æmæwo wængainäni inänite, Näni ömæmöninque minitö mümini quëwencæminimpa, ante pönö cæcä bai botö tömengä Wëmo iñomö adobaï cæbo imopa. Æcänö ingante, Bitö mü quëwencæbiimpa, ante äinömo inte botö tömengä ingante pönö cæbo ate müngä quëwencæcäimpa. ²² Adobaï botö Mæmpo iñomö waodäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï ingampa. Wæætë edæ botö tömengä Wëmo iñomote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³ Mänömaï cædinque botö Mæmpo, Waodäni botö imo näni waa abai adobaï botö Wengä ingante tömänäni waa acædänimpa, ante cægacäimpa. Botö tömengä Wëmo iñomote në waa adämaï ingä iñomö tömengä botö Wæmpocä botö imote da pönongä ingante adobaï waa adämaï ingampa töö,” ante Itota apænecantapa.

²⁴ Ayæ apænëdinque, “Minitö iminite näwangä ämopa. Waocä botö äno ëñëninque botö imote në da pönongäingä ingante në wede pönengä iñomö tömengä nënö apænte pante wæwenguinö godämaï incæcäimpa. Wæætë tömengä nënö wænämaï quëwenguinö gocæcäimpa. Edæ tömengä mönö æmæwo wænguinö ñimpo cædinque wænämaï mönö quëwenguinö do

gocäimpa. ²⁵ Minitö iminite näwangä ämopa. Waodäni nê quëwënäni incæ tömënäni æmæwo wængainäni bai inönäni inte tömënäni iñömö Wængongui Wëmo botö tedepämo oo ëñencädänimpa. Nöwoönæ tömënäni nani ëñenguiönæ do batimpa. Nê ëñëñäni iñömö tömënäni nani wänämaï quëwenguinö gocädänimpa. ²⁶ Wængongui nämä nê quëwëngongä inte tömännäni nani quëwëmämo ante nê godongä ingampa. Mänömaï beyænque botö tömengä Wëmo adobaï nämä nê quëwënömo inte tömännäni nani quëwëmämo ante nê godömo imopa. ²⁷ Ayæ Waobo ëñagaimo iñömotë tömengä pönö cæcä beyænque botö nê ämo badinque nämä tæï piñænte cædinque edæ, Æcänö waa cæcantawo, ante, Æcänö wënæ wënæ cæcantawo, ante nê apænte anguimo imopa. ²⁸ Botö mänömainö ante apænebo ëñëninque minitö, Æbänö angä wæmöö, ante änämaï incæminimpa. Edæ æmæwo wængainäni tömännäni tömënäni nani wodido nê öñongainäni iñönänite edæ botö tedepämo incæ tömënäni nani ëñenguiönæ oo pönï impa. ²⁹ Botö tedepämo ëñëninque tömënäni tömännäni ta poncädänimpa. Nê waa cægainäni iñömö wänämaï nani quëwenguinö nani goquingue ñäni ömæmoncädänimpa. Nê wënæ wënæ cægainäni guiquënë nani apænte pante æmæwo wæwenguinö nani goquingue ömæmoncädänimpa cæminii," ante Itota apænegacäimpa.

Æcänö äna ëñente cæbii, ante Itota ingante äñänpa

³⁰ Ayæ godömenque apænedinque Itota iïmaï apænecantapa. "Botö ædö cæte nämanque adoboque cæbo imoo. Wæætë Wængongui botö imote æbänö angä ëñëninque botö mäninö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayæ botö apænte äno iñömö cöwë nöinö ante impa. Edæ botö tömöme ämaï cädämaï imopa. Wæætë botö Mæmpo botö imote nê da pönongaingä nänö ämaï cæbo imopa. ³¹ Botö nämanque äninque, Æbänö cæboo, ante apænebo bai minitö, Önonquedö ante impa, ancædöminimpa. ³² Botö æbänö cæboo, ante wacä botö beyæ ante nê apænecä ingampa. Tömengä botö imotedö ante nänö apænedö iñömö edæ nö impa, ante ëñëmpa. ³³ Minitö botö imotedö ante, Æbänö cæcä, ante ëñencæte ante Wäo nê æpænë guidöngongä weca wadäni inänite da godöminitapa. Ayæ Wäo mäninäni inänite botö imotedö ante nö apænecä ëñëñänitapa. ³⁴ Botö æbänö cæboo, ante waodäni botö beyæ apænecädänimpa, ante botö änämaï imopa. Wæætë, Minitö botö æmo beyænque quëwëncæminimpa, ante cædinque botö

mänömainö ante apænëtabopa. ³⁵ Wäo nê æpænë guidöngongä tömengä iñömö ti wodönoincade bæcco bai ingacäimpa. Ayæ, Tömengä nänö angainö ñäö bai impa, ante adinque minitö wantæyö iñönte, Waa impa, ante watapæ tominitapa. ³⁶ Botö æbänö cæboo, ante Wäo nê æpænë guidöngongä nänö angainö beyæ waodäni mäninö ante do ewocädäni ingadänimpa. Ayæ botö Mæmpo, Bitö iïmaï cæe, ante, Tömää iñque cæcæbiimpa, ante botö imote nänö angainö bai ante do cædömo imopa. Botö Mæmpo botö imote da pönongaingä ingampa, ante wadäni botö cædinö beyæ do ëñëñänimpa. ³⁷ Ayæ botö Mæmpo botö imote nê da pönongaingä iñömö adobaï, Botö æbänö cæboo, ante apænecä ëñengadänimpa. Minitö guiquënë tömengä ingante adämaï imini inte tömengä nänö tedepämo incæ cöwë ëñëñämaï iminipa töö. ³⁸ Ayæ botö Mæmpo botö imote da pönongä pönimo imopa, ante minitö pönëñämaï imini inte edæ tömengä nänö angainö ante entawëñämaï quëwëmini iminipa. ³⁹ Wængongui angä ëñëninque nani yewæmongainta ædæmö adöminii inte edæ minitö, Mäninö nani yewæmongainta amöni beyænque mönitö wänämaï möni quëwenguinö gocæmönimpa, ante pönëmini iminipa. Iñæmpa mänintaa yewæmöninque botö imotedö ante apænedinque yewæmongadäni apa quëwëminii. ⁴⁰ Botö, Minitö wänämaï mini quëwenguinö ante pö æedäni, äñömotë minitö wæætë Baa äninque botö weca pönämaï iminipa," ante Itota apænecantapa.

⁴¹ Ayæ apænedinque tömengä, "Waodäni botö imote waa adinque apænecädänimpa, ante änämaï imopa, angantapa. ⁴² Iñæmpa, Minitö æbänö cæminii, ante botö do ëñëmpa. Wængongui nänö waadete pönente entawëñö minitö entawëñämaï quëwëminipa, ante do ëñëmpa. ⁴³ Wængongui angä ëñëninque botö wææ pönimo adinque minitö Baa ante botö imote pönëñämaï iminipa. Wacä guiquënë nämä äninque pongä iñinque minitö mäningä ingante Ao ante pönëmaininipa, ante awædö. ⁴⁴ Minitö wacä ingä wacä ingä, Botö imote waa adinque waa apænecädänimpa, ante cæmini awædö. Incæte minitö, Mönö Wængongui nê adocanque ingaingä ingampa, ante, Tömengä mönö imote waa adinque apænecäcäimpa, ante cädämaï iminipa. Mänömaï beyæ minitö botö imote ædö cæte pönëmini iminii. ⁴⁵ Botö Mæmpo weca ongöninque minitö iminitedö ante botö, Iñäni wënæ wënæ cädäni inänitapa, ante ancæboimpa, ante minitö pönëminitawo. Mänömainö ante edæ pönëñämaï iedäni. Wæætë Möitee wodi nänö angainö ëñente beyænque mönitö

quëwengæimpa, ante pönëminipa. Ìñæmpa adocã Mõitee wodi mîni nè pönënongå ìñômô, Në wënæ wënæ cæmîni iminipa, ante ancæcæimpa cæmîni. ⁴⁶ Mînitô Mõitee wodi ingante pönente bai adobai botô imote pönencædöminipa. Edæ tõmengã botô imotedô ante yewæmongacæimpa. ⁴⁷ Mõitee wodi nânô yewæmongainô ante pönënamai imîni ìninqe mînitô ædô cæte botô apænedô ante ëñëninque pönënguimîni,” ante Itota mænîñedë ìnque apænegacæimpa.

6

5.000 ganca ìnani ìnånite Itota godongã cænånipa

¹ Mænîñô ìnque apænete ate wantæyô ìñonte Itota wadæ godinque gæwapæ Gadideapæ nani ämæ æmæmãa tao gogacæimpa. Mænîmæ Tibediapæ nani ämæ impa. ² Tõmengã wogaa tao gocã adinque waodani tæiyæñnani pö tee empo godånitapa. Tõmengã, Acædånipa, ante cædinque wënæ wënæ ìnani ìnånite bamönengæ cæte odõmongã do adinani inte godånitapa. ³ Ayæ Itota tõmengã nânô ëmîñænani ìnånite änanquidi ænte mæicã æidinque tõmënani tõmengã tõnô tæ contadånitapa. ⁴ Wodo pænta gogaiõnæ, ante odeoidi Patowa nani ææmæ cæõnæ oo pöni ingatimpa. ⁵ Itota gomô ayongã waodani tæiyæñnani tõmengã weca pönani adinque tõmengã Pedipe ingante,

–Mænîñani waodani beyæ ædönô gote pão godonte æninque godömöni cænguimîni, angantapa.

⁶ Edæ Itota ìñômô, Æbänô cæbaïmoo, ante do ëñëningã inte mænîñô ante, Pedipe æbänô cæqingãã, ante acæte ante angantapa. ⁷ Pedipe wæætë tõmengã ingante,

–Ìñæmpa pão ante tõmånani wædænque cæncædånipa, ante ocho apaicã cæte beyæ paga æinta æninque mænimpota godonte æninque edæ wîl eyepæ ìmampa, angantapa. ⁸ Ayæ tõmengã ëmîñænani Timönô Pegodo biwî Æntade ìñômô Itota ingante,

⁹ –Mönitô weca nè ongongã edëningã ìñômô tebada nani awënënimô guiyã pão õnompõ æmæmpoquë tõnô guiyã gæyæ mæa pöni næængã ingampa. Incæte mænîl cænguî tæiyæñnani beyæ ædô cæte eyepæ ì, ante wæbopa.

¹⁰ Angã ëñëninque Itota,

–Mînitô tæiyæñnani godongãmæ ongönani ìnånite ämîni tæ contaedani, angantapa. Tõmengã nânô ämai äñani ëñëninque waodani õnömæcaque ìnô nanguî gaguimæ pæyômô do tæ contadånitapa. Onguîñænani ìncæ õnompõ æmæmpoquë müido ganca ìnani inte tæ contadani ingadånipa. ¹¹ Itota pão æninque, Wængonguî, Bitô waa pöni pönömi ænte cænguimöni, ante apænedinque

tõmengã nânô ëmîñænani ìnånite godongã æninque tõmënani wæætë tæ contadani ìnånite di mæñænani cænånitapa. Ayæ tõmengã gæyæ æninque adobai cæcantapa. Tõmånani ìñômô nani cæinënô ante eyepæ cængadånipa.

¹² Tõmënani tõmo pöni cænani ate tõmengã ëmîñænani ìnånite tõmengã,

–Cænguî nani ao mæ ao mæ ñönöni ee õñoncoo wote badamai ingæimpa, ante pædæ wææmpo ö æedani.

¹³ Angã ëñente cædinque nè cænani pão õnompõ æmæmpoquë tebada nani awënënimô nani ao mæ ao mæ ñönöni ee õñoncoo ö ænte da wënani ate edæ otodë tipæmpoga go mentodëa cænguî eyede da wënani contagatimpa. ¹⁴ Waodani ìñômô Itota bamönengæ nânô cædi adinque,

–Nawangã ìngã ìñômô Wængonguî beyæ nè apæncæã ingampa. Tõmengã inguipoga Ponguingã, ante nani angaingã ìnogæimpa, ante tæcæ äñånitapa.

¹⁵ Tõmënani, Bitô mönitô Awënë Odeye bacæbiimpa, ante botô imote bæi ongoncæte ante poncæ cædånipa, ante wædinque Itota wadæ godinque adocanque änanquidi wæætë æigacæimpa.

Itota æpæ yædopæ dao dao gocã

(Måateo 14.22-27; Måadoco 6.45-52)

¹⁶ Gæwadecæ pöni bayô tõmengã ëmîñænani ìñômô gæwapæ yæwedeca wæi gogadånipa. ¹⁷ Itota angã ëñëninque mænîñômô wæi wipodë guidinque tõmënani, Gæwapæ æmæmãa Capenãmö nani quëwëñômô mönô taocæimpa, ante tæcæ wogaa tao goyönani dobæ wëmô bayô Itota ayæ tõmënani weca pönamai ìnogæimpa. ¹⁸ Ayæ woboyæ nanguî pæmænte pöñô æpæ mæ conta mæ conta cæyonte, ¹⁹ tõmënani wodo tinto quidõmetodo wiyate cæyönani Itota ìñômô wipo gæmænô pöninque æpæ yædopæ wænömënæcapæ dao dao pongã adinque ancai guîñëñånitapa. ²⁰ Ancai guîñëñönånite Itota ìñômô tõmënani ìnånite,

–Botô ìmopa. Guîñëñamai ìedani, angantapa.

²¹ Ante añongã tõmënani Ao ante tõmengã ingante wipodë æninque tõmënani nani goinëñômô ëmönaiya do tao gogadånipa.

Waodani Itota ante diqui diqui minte pönani

²² Ìimô ate tæiyæñnani gæwapæ ìmæ wedeca a ongönönånipa. Ìninqe tõmënani, Wipo adoque pöni mænîñômô wai wocæ incæte Itota ìñômô mænimpodë guidamai ìñongante tõmengã müñæ godani adodånique guîi wadæ tao godånitapa, ante adinque wædånitapa. ²³ Awënë Itota do Wængonguî ingante, Bitô waa pöni pönömi cænguimöni, ante apæncæã ate waodani nani pão

cæniñomō pancadāniya ayæ ongōnānimpā. Nōwo iñomō wapocoo Tibedia nāni quēwēñomō wo cæwodinque māniñomō tōmēnāni nāni cæniñomō eyequei pōnāni adānitapā. ²⁴ Iñinque Itota tōnō tōmengā nānō ēmiñænāni edæ dæ ānāni wædinque tæiyæñāni iñomō wipodē guitte Capēnāomō godinque Itota ante diqui diqui mincæte ante wogaa gogadānimpā.

Itota, Mōnō quēwenguinque, ante cænguī bai ingampā

²⁵ Adodāni gāwapæ æmæmāa tao godinque tōmengā ingā adinque,

—Awēnē nē Odōmōmi imi æyedēnō iñomō pōmitawo, ānānitapā.

²⁶ Āñōnāni Itota wæætē,

—Minitō iminite nāwangā āmopā. Minitō tōmo pōni pāo cæniñmīni inte botō imote ante diqui diqui mincæ pōmīnitapā tōō. Wæætē edæ botō, Acæmīnimpā, ante bamōnengæ cæbo beyæ mīnitō wīl pōmīni awædō. ²⁷ Minitō, Mōnō cænguī, ante æncæte ante cæmīni incæte inguipogaque mīni woquīnonque ante æncæ cædāmai quēwēdāni. Wæætē edæ, Mōnō cænguī iñque bayedē cænguī mæ ōñongæimpā, ante cædinque mīnitō, Mōnō wænāmai quēwenguinque gocæmōimpā, ante pōnente quēwēdāni. Botō nē Waobo ēñagaīmo imo māni cænguī mīnitō iminite pōnōmo æncæmīnimpā. Botō Mæmpo botō imotedō ante, iñgā nō cæcā ingampā, ante odōmongacāimpā.

²⁸ Angā ēñēninque tōmēnāni tōmengā ingante,

—Mōnitō, Wængonguī nānō cæquīmāmo ante cæcæte ante quīnō cæquēñēmōni imōni, ante wæmōnimpā.

²⁹ Āñōnāni Itota wæætē,

—Botō Wængonguī nānō nē da pōnongaīmo iñomote mīnitō botō imote mīni wede pōnēnō iñomō edæ māniñō Wængonguī nānō cædō impā, angantapā.

³⁰ Mānōmai beyæ tōmēnāni godōmenque tōmengā ingante,

—Bitō, Ēñencædānimpā, ante bamōnengæ bitō cædō ante æbānō cæte odōmōmi adinque pōnēmaimōnimpā. Ēbānō cæquīmīi, ante ānewēnānitapā. ³¹ Mōnō wæmæidi ōnōmæca nāni quēwēñedē cænguī mānāā nāni angā cængadānimpā. Īmaīnō ante yewæmongatimpā. “Tōmengā, Mīnitō cænguī, ante tōmēnāni inānite ōōnædē inō māwææ godongacāimpā,” ante nāni yewæmongainō bai impā, ante apænedānitapā.

³² Itota wæætē tōmēnāni inānite,

—Nāwangā āmopā. Mīnitō iminite ōōnædē māwææ cænguī nē pōnongaingā iñomō tōmengā wīl Mōitee wodi ingacāimpā.

Wæætē botō Mæmpo iñomō tōmengā mīnitō iminite ōōnædē nāni nāwā cænguī bai pōnongā cæncæmīnimpā. ³³ Ōōnædē quēwente wææ pongaingā iñomō tōmengā iñomō, Cænguī bai ingampā, ante Wængonguī nānō nē angaingā ingampā. Adocā inguipoga quēwēñāni inānite, Mīni wantæpiyæ wænāmai quēwenguiñō ante pōnongā æninque quēwēñānimpā.

³⁴ Ante Itota apæncā ēñēninque tōmēnāni, —Awēnē, nōwo māni cænguī Īmō Īñō Īmō Īñō pōnōmi cæmōnie.

³⁵ Āñōnāni Itota godōmenque apænedinque,

—Botō iñomō, Mīni quēwenguinque, ante mīni cænguī bai inōmo ĩmopā. Botō weca nē pongā iñomō cōwē cænguī gue æñēnāmai bai quēwencæcāimpā. Ayæ botō imote nē wede pōnengā iñomō cōwē tepæ gæwænāmai bai quēwenguingā ingampā, ante apænecantapā. ³⁶ Ayæ wæætē, Mīnitō iminite do botō ānō bai impā. Botō imote do adīmīni incæte mīnitō ayæ wede pōnēnāmai ĩmīnimpā. ³⁷ Botō Mæmpo, Bitō quīnāni bacædānimpā, ante cædinque botō imote pōnongā æmo ĩnīnque botō quīnāni nē badāni inte tōmēnāni tōmānāni iñomō botō weca edæ do pōnānimpā. Ayæ æcæmenque botō weca pōna ĩnate, Botō weca pōnāmai ĩmipā, ante cōwē ānāmai incæboimpā. ³⁸ Edæ ōōnædē quēwēninque botō wīl tōmēmo āmai cæcæboimpā, ante wææ pontabopā. Wæætē botō imote nē da pōnongaingā nānō āmai cæcæboimpā, ante wææ pontabopā. ³⁹ Ayæ botō imote nē da pōnongaingā botō imo nānō angaiñō iñomō ĩmai impā. Waodāni bitō quīnāni bacædānimpā, ante pōnōmo æninque bitō quīnāni badinque adocanque incæ wē womonte wænāmai incæcāimpā. Wæætē ĩnque baquīōnæ ĩñonte bitō, Nāni ōmæmōedāni, āmi ēñēninque bitō quīnāni tōmānāni edæ nāni ōmæmoncædānimpā. ⁴⁰ Edæ botō Mæmpo nānō angaiñō iñomō ĩmai impā. Botō Wængonguī Wēmo iñomote botō imote ædæmō adīnāni inte edæ botō imote nē pōnēnāni tōmānāni cōwē wænāmai wantæpiyæ quēwencædānimpā. Mānōmaiñō ante impā. Ayæ ĩnque baquīōnæ ĩñonte botō māniñāni inānite, Mīnitō nāni ōmæmōedāni, āmo ate ōmæmoncædānimpā. Itota mānōmai apænecantapā.

⁴¹ Apæncā ēñēninque oodeoidi iñomō, Tōmengā, “Botō cænguī bai ĩmopā, ante ōōnædē inō wææ pontabopā,” angampā, ante tōmengā ingantedō ante tæcæ piinte tedewēñānitapā. ⁴² Tōmēnāni,

—Iñgā iñomō wīl Ootee wengā Itota ingantawo. Tōmengā Mæmpo tōnō wāānā wīl mōnō adōna ĩnatawo. Tōmengā ædō cæte, Botō ōōnædē quēwente wææ pontabopā, angā ānewēē.

⁴³ Ante piññōnāni Itota wæætē,

—Minitö nämanque godongämæ piinte tededämaï iedäni. ⁴⁴ Botö Mæmpo botö imote nê da pönongaingä wïi pönö cæcä bai æcämenque incæ botö weca pönämaï incædongäimpa. Ayæ iinque baquiönæ iñonte botö weca nê pongä ingante, Näni ömæmöe, ämo ñäni ömæmoncæcäimpa. ⁴⁵ Wængongui beyæ nê apænegainäni näni yewæmongaintaa iïmaï ante yewæmongadänimpa. “Wængongui waodäni tömänäni inänite odömonte apæneçä eñencædänimpa.” Botö Mæmpo apæneçä nê eñenäni iñömö tömengä nänö odömonte apænedö ante nê eñenäni inönäni iinque tömënäni tömänäni botö weca pönänipa, ante Itota apæneçantapa.

⁴⁶ Ayæ apænedinque, “Mïni waocabo tömämini incæ botö Mæmpo ingante cöwê adämaï imïnitapa. Botonque iñömö Wængongui weca nê quëwente pömo inte botö Mæmpo ingante nê adïmo iñömö adoboque pönï imopa. ⁴⁷ Minitö imïnite näwangä ämopa. Botö imote nê wede pönengä iñömö tömengä cöwê wantæpiyæ nänö quëwenguiämämo do entawente quëwengä ingampa. ⁴⁸ Botö iñömö, Mïni quëwenguinque, ante mïni cængui bai imopa. ⁴⁹ Mïni wæmæidi önomæca quëwëhedê cængui mänää näni angai cængainäni incæte edæ do wængadänimpa. ⁵⁰ Botö iñömö cængui bai inömo inte öönædê quëwente wææ pömo imopa. Iinque waocä, Cængui cænte bai quëwengæimpa, ante botö imote pönengä iinque tömengä cöwê wænämaï quëwëmaingampa. ⁵¹ Botö cængui bai imo inte öönædê quëwengaimo incæ wææ pontabopa. Æcänö cængui cænte bai botö imote pönëna tömengä iñömö cöwê wænämaï quëwencæcäimpa. Ii cængui botö godongui botö nämä baö impa. Inguipoga quëwënäni inänite, Minitö quëwenguiämïni, ante botö nämä baö incæ godoncæboimpa,” ante Itota mänömaï apæneçantapa.

⁵² Mäninö angä eñente wædinque oodeoidi näni cabo iñömö godongämæ nämanque tededinque wæætê godö wæætê godö änewënänitapa.

—Mäningä iñömö mönö imö tömengä nämä baö ædö cæte pönongä cænguiämöni.

⁵³ Ante tedewëñönäni Itota wæætê tömënäni inänite,

—Minitö imïnite näwangä ämopa. Botö Waobo eñagaïmo iñömote mïnitö botö baö cænämaï inte botö wepæ bedämaï imïni iinque ædö cæte Wængongui wantæpiyæ nänö quëwenguiämämo entawëmini inguiämïni. ⁵⁴ Botö baö nê cængä ayæ botö wepæ nê becä tömengä iñömö Wængongui wantæpiyæ nänö cöwê quëwenguiämämo do entawente quëwengä ingampa. Ayæ iinque baquiönæ iñonte botö mäningä

ingante, Bitö ñäni ömæmöe, ämo ñäni ömæmoncæcäimpa. ⁵⁵ Edæ botö baö näwä cængui bai impa. Ayæ botö wepæ näwä bequi bai impa. ⁵⁶ Botö baö nê cængä inte ayæ botö wepæ nê becä iñömö tömengä botö nempo ee quëwënongä ingampa. Ayæ adobai tömengä botö imote entawënongä ingampa. ⁵⁷ Botö Mæmpo nê Quëwënongä inte botö imote da pönongä pönïmo imopa. Tömengä pönö cæcä ate quëwëmo imopa. Botö imote nê cængä iñömö adobai botö cæbo beyænque quëwencæcäimpa. ⁵⁸ Botö cængui bai imo inte öönædê wææ pönïmo iñömö mänïi cængui bai imopa. Mönö wæmæidi cængui mänää näni angai cængainäni incæ edæ do wængadänimpa. Wæætê ñowo wææ pömo iñömote, Cængui impa, ante nê cænongä iñömö tömengä cöwê wænämaï quëwencæcäimpa, ante Itota apænegacäimpa.

⁵⁹ Tömengä mäninö ante Capënaömö näni quëwëñömö näni odömöincönê ongöinque tömënäni inänite odömonte apænegacäimpa.

Itota nänö äno beyænque mönö wænämaï quëwengæimpa

⁶⁰ Mäninö odömonte apæneçä eñëninque tömengä emïñenäni nanguï inäni,

—Tömengä nänö odömonte apænedinö iñömö waadedämainö impa. Edæ æcänö eñëmaïnaa, ante änanitapa.

⁶¹ Mäninö nänö odömonte apænedinö ante tæcæ piinte tedewënäni wædinque Itota tömënäni inänite,

—Minitö botö äninö ante oda cæmïni inte piimïni imïnitawo, angantapa. ⁶² Ayæ godömenque apænedinque, Botö Waobo eñagaïmo imo öönædê quëwente wææ pongaimo inte adodö adoyömö æibo adinque mïnitö æbänö ante ämaïmïni. ⁶³ Wængongui Önowoca pönö cæcä beyænque waocä quëwengä iinque tömengä baonque nänö eñayö beyænque ædö cæte quëwëmaingä. Botö Wængongui Önowoca tönö apænedinque mïnitö imïnite botö apænedinö beyæ mïnitö önowoca ewocate quëwencæmïnimpa. ⁶⁴ Incæte mïnitö weca pancadäniya iñömö botö imo pönënamäi inänipa töö, ante Itota apæneçantapa.

Edæ tömënäni weca æcänö tömengä ingante pönënamäi ingäa, ante Itota do eñënongäimpa. Ayæ tömengä ingante nê godö odömonguingä æcänö imaingäa, ante tömengä adobai do eñënongäimpa. ⁶⁵ Itota godömenque apænedinque,

—Botö mänïi beyæ mïnitö imïnite do antabopa. Botö Mæmpo wïi pönö cæcä bai æcämenque incæ botö weca pönämaï incædongäimpa, ante apænegacäimpa.

⁶⁶ Mänionæ ganca tömengä miñæ nê godäni incæ nanguï inäni wææ godinque tömengä miñæ ayæ tee empo godämaï

ingadänimpa. ⁶⁷ Tömēnāni wadæ godāni adinque Itota ōnompō tipæmpoga go mēa ganca ināni inānite,

—Minitō diyæ æbānō cæquimīni. Minitō tōmēnāni bai adobai botō imote emō cæte, Wadæ goinēmōnipa, āminitawo.

⁶⁸ Āñongā Timōnō Pegodo wæætē,

—Awēnē, æcānō miñæ gobaimōnii. Wacā mōnitō imōnite nē emiñængā iñōmō edæ dæ angampa. Wantæpiyæ wænāmaī mōni quēwenguinō ante æbānō gocæmōnimpa, ante wæyōmōni bitō iñōmō nē apænebi imipa. ⁶⁹ Bitō iñōmō Wængongui nānō da pōnōnōni inte tōmēngā nānō Tæiyæ Waēmō inōmi imipa, ante pōnēmōni inte ēñēmōnipa.

⁷⁰ Ante apæneca ēñēninque Itota,

—Minitō ōnompō tipæmpoga go mēa ganca imīni inte wīi botō apænte ænōmīni imīnitawo. Incæte mīni cabo incæ adocanque iñōmō wēnæ quī ingampa, ante apænegacāimpa.

⁷¹ Timōnō Icadote wengā Codaa ingantedō ante Itota mănōmaī angacāimpa. Tōmēngā ōnompō tipæmpoga go mēnaa nāni cabo adocanque inongā incæte ayæ ate Itota ingante odōmonte nē godonguingā inongāimpa.

7

Itota biwūdi tōmēngā ingante pōnēnāmaī ināni

¹ Ayæ ate Itota Gadideabæ tōmāmæ wayōmō wayōmō gocā ingacāimpa. Oodeabæ iñōmō oodeoidi awēnēidi botō imote wænōncæ cædānipa, ante wædinque Itota, Oodeabæ wīi goinēmōpa, ante mănōmæ godāmaī inongāimpa. ² Oodeoidi, Mōnō wæmæidi oncontaicoo mænōninque quēwengadānimpa, ante pōnēninque tōmēnāni ææmæ oo pōni ingatimpa. ³ Itota biwūdi tōmēngā ingante,

—Bitō emiñænāni bitō bamōnengæ cæbi acædānimpa, ante cæcæte ante bitō iñōmō ongōnāmaī inte wæætē Oodeabæ goquēnēmi imipa. ⁴ Waodāni tōmānāni ayōnāni cæbo edonque acædānimpa, ante cæinengā iñōmō tōmēngā wīi awēmō cæcampa. Bitō mănīi cædinō do cæbi inte waodāni tōmānāni bitō imite edonque pōni acædānimpa, ante odōmonte cæe, āmōnipa.

⁵ Edæ tōmēngā biwūdi incæ tōmēngā ingante pōnēnāmaī ināni inōnānimpa. ⁶ Mănōmaī beyæ Itota tōmēnāni inānite,

—Botō wīi nōwo goquēnēmo imopa. Minitō guiquēnē æyedēmē gomīni incæ cōwē waa impa. ⁷ Inguipogaque quēwēnāni mīnitō imīnite ædō cæte plinte badānii. Wæætē botō tōmēnāni inānite, Minitō wēnæ wēnæ cæmīni imīnipa, ante apænebo beyæ tōmēnāni botō imo pūinānipa. ⁸ Minitō ææmæ cædāni weca æite goedāni. Botō goquōnæ wīi eyepæ

impa, ante pōnēninque botō ayæ mănīmæ cædāni weca godāmaī imopa.

⁹ Mānīnō āninque tōmēngā godōmenque Gadideabæ ongonte quēwengacāimpa.

Itota nāni ææmæ cæyōmō gote pongacāimpa

¹⁰ Incæte tōmēngā biwūdi ææmæ ante godāni ate tōmēngā adobai godinque wīi waodāni nāni ayōmō gocampa. Wæætē awēmō gocantapa. ¹¹ Ayæ nāni ææmæ cæyōmō oodeoidi awēnēidi iñōmō,

—Māningā onguīñængā æyōmōnō ingāa, ante tōmēngā ingante ante diqui diqui mīnte wææ wānōnānītapa.

¹² Tæiyæ nāni ponte a ongōnāni godongāmæ nāmā tēdedinque tōmēngā ingantedō ante wæntæ wæntæ tēdedānītapa. Pancadāniya, “Tōmēngā waa cæcā ingampa.” Āñōnāni wadāni iñōmō, “Baa, māningā waodāni inānite wapiticæ māodinque, Oda cæquīnānimpa, ante cæcā ingampa,” ante apænedōnānimpa.

¹³ Oodeoidi awēnēidi ināni adinque guīñente wædinque wadāni tōmānāni tōmēngā ingantedō ante waodāni ēñēñōnāni apænedāmaī inōnānimpa.

¹⁴ Tōmēnāni ææmæ do cæyedē Itota iñōmō Wængongui oncō ñæñæncōnē yabæcōnē æite pō guīdinque waodāni inānite mā odōmonte apæneca ēñengadānimpa.

¹⁵ Tōmēngā odōmonte apæneca ēñēninque oodeoidi ancai guīñēninque,

—Æbānō cæte nanguī ēñengā ingāa. Edæ tōmēngā ecoeda adāmaī inongā ingampa.

¹⁶ Āñōnāni Itota wæætē,

—Botō odōmonte apænedō ante wīi nāmā pōnēninque odōmonte apænebo imopa. Wæætē Wængongui botō imote nē da pōnongaingā nānō angainō ante odōmonte apænebopa. ¹⁷ Minitō, Wængongui nānō angainō ante Itota odōmonte apænecampa, ante pōnēmīnitawo. Wæætē, Nāmā pōnēninque Itota odōmonte apænecampa, ante pōnēmīnitawo. Īñæmpa waocā, Wængongui nānō āmaī cæcæboimpa, ante æcānō ānaa tōmēngā iñōmō, Æcānō angā ēñēninque Itota odōmonte apænecaā, ante do ēñencæcāimpa. ¹⁸ Nē nāmā pōnēninque apæneca iñōmō tōmēngā nāmā ante, Botō imo waa acædānimpa, ante āinente apæneca ingampa. Wæætē edæ, Botō imo nē da pōnongaingane ingante waa acædānimpa, ante nē āinente cæcā iñōmō tōmēngā edæ nē nō cæte quēwēnongā ingampa. Adocā, Waodāni oda cæquīnānimpa, ante tōmēnāni inānite wīi wapiticæ māocā ingampa, ante Itota apænecantapa. ¹⁹ Ayæ apænedinque, “Wængongui nānō wææ angainō ante Mōitee wodi wīi mīnitō beyæ ante yewæmongacāi. Incæte mīnitō tōmāmīni Wængongui nānō wææ angainō

adinque eñente cædāmaī īminīpa tōō. Mīnitō quīnante botō īmote, Wæñōinēmōnīmpa, ante pōnēninque cæmīnīi.”

²⁰ Ante awēnēidi īnānite āñongante nangui īnāni adoyōmō ongōnāni wæætē,

–Bitō wēnæ tōnō cæbi īmipææ, ante tōmēngā ingante āninque, Bitō īmite æcānō wæñōinente cæcāā.

²¹ Ante ānāni eñēninque Itota godōmenque tōmēnāni īnānite,

–Guēmanguīōnæ īñonte botō adopoque bamōnengæ cæbo adinque mīnitō tōmāmīni ancaī guīñente wæmīnīpa edæ. ²² Mōitee wodi īñōmō, Mīnitō wēñængā eñacā ate ōnōmpo æmæmpoque go mēōnaa go adōōnæque īñonte māniōnæ tōmēngā yabæque eō togæncæmīnīmpa, ante mīnitō īmīnite odōmonte apænegacāīmpa. Wīi Mōitee wodi mānōmaī mā cæcā ingacāīmpa. Wæætē wēēñēdē incæ mīnitō wæmæīdi do adodō cægadānīmpa. Incæte Mōitee wodi, Māniōnæ īñonte eō togæncæmīnīmpa, ante pōnō angā beyænque mīnitō guēmanguīōnæ ī incæte mīnitō wēñængā onguīñængā ingante eō togæmīni īmīnīpa tōō. ²³ Mōitee wodi nānō wææ yewæmōngainō wido cædāmaī ingæīmpa, ante cædinque mīnitō guēmanguīōnæ īñonte edæ wēñængā onguīñængā ingante do eō togæmīnīpa. Incæte edæ guēmanguīōnæ īñonte botō wēnæ wēnæ īningā ingante āmo ate tōmēngā baō tōmāñō waa bacā beyænque quīnante botō īmote pīīmīni īmīnīi. ²⁴ Waocā wabānō nānō cædi wēnæ wēnæ ī, ante pōnēninque ædæmō eñēnāmaī īmīni inte mīnitō tōmēngā ingā, Bitō wēnæ wēnæ cæbi īmīpa, ante apænte ānāmaī īedāni. Wæætē, Æbānō ī, ante ædæmō eñēninque nōingā ante ancæmīnīmpa, ante Itota mānōmaī apænegacāīmpa.

Itota īñōmō Codito mōnō nē Ponguingā ingampa

²⁵ Mānōmaī beyæ Eedotadēē quēwēnāni pancadāniya,

–Māningā ingante wæñōmōni wæncæcāīmpa, ante awēnēdi wīi ānānitawo, ante māñēdē tæcæ tedewēnānitapa. ²⁶ Aedāni, tōmēngā īñōmō edonque pōni a ongōninque waodāni īnānite apæneyongā incæ mōnō awēnēdi tōmēngā ingante ānāmaī pæ wēēnete īnānīpa tōō. Tōmēnāni wabānō, Māningā īñōmō nāwangā Codito mōnō ānongā ingampa, ante pōnēnānitawo. ²⁷ Īñæmpa, Māningā onguīñængā æyōmōnō quēwente pongā ingāā, ante do eñēmōpa. Mōnō Codito, Nē Ponguingā, ante nāni angaingā īñōmō æyōmōnō quēwente pongāā, ante mōnō waocabo tōmāmō incæ eñēnāmaī inguimō īmōpa, ānānitapa.

²⁸ Ayæ Itota Wængongui oncō ñænæncōnē yabæcōnē odōmonte apænedinque aa pecantapa.

–Ao, Botō æbodō īmoo, ante mīnitō eñēmīniyaa. Ayæ botō, Æyōmōnō quēwente pōmoo, ante mīnitō adobaī eñēmīniyaa. Botō wīi nāmā pōnēninque pontabopa. Botō īmote nē da pōnongaingā nāwangā īnongā ingampa. Mīnitō, Tōmēngā æbānō ingāā, ante eñēnāmaī īmīnīpa tōō. ²⁹ Botō wæætē edæ tōmēngā weca quēwēmo īñōmote tōmēngā botō īmote da pōnongā pōnīmo inte edæ botō īñōmō edæ tōmēngā ingante do agāimo īñōmō īmōpa, angacāīmpa.

³⁰ Mānīnō angā eñēninque tōmēnāni, Quīnō cæte tōmēngā ingante bæi ongonguimōnīmpa, ante pōnengadānīmpa. Incæte tōmēngā nānō wænguiōnæ wīi eyepæ ī beyæ tōmēngā ingante ō ænāmaī ingadānīmpa. ³¹ Tæiyæñāni adoyōmō pō ongōnāni weca ongōninque nangui īnāni tōmēngā ingante wede pōnēnānitapa. Tōmēnāni,

–Māningā onguīñængā īñōmō nangui bamōnengæ cæcā īnongāīmpa. Mōnō Codito īñōmō tōmēngā pongā ate godōmenque bamōnengæ cæquingā ingantawogaa.

Itota ingante bæi ongoncæte ante cædāni

³² Tæiyæñāni māñīñōmō ongōnāni īñōmō Itota ingantedō ante mānōmainō ante wæntæ wæntæ tedeyōnāni Paditeoidi eñēnānitapa. Ayæ, Wængongui qui, ante nē godōnāni ñænæñāni tōnō Paditeoidi īñōmō Wængongui oncō ñænæncō wææ wānōnāni īnānite, Mīnitō goedāni. Tōmēngā weca godinque tōmēngā ingante bæi ongonte ænte pōedāni, ānānitapa. ³³ Itota godōmenque apænedinque,

–Mīnitō weca wantæyō quēwēninque botō ayæ ate botō īmote nē da pōnongaingā weca ocæ ēmænte gocæboīmpa. ³⁴ Botō ocæ ēmænte gobo ate mīnitō botō īmote ante diqui diqui mīmīni incæte adāmaī inguimīni īmīnīpa. Ayæ botō go quēwēñōmō mīnitō adoyōmō ædō cæte ponguimīni īmīnīi.

³⁵ Angā eñēninque oodeoidi awēnēdi nāmanque tededānitapa.

–Māningā, Gocæboīmpa, ante ædōnō goyongante mōnitō diqui diqui mīninque adāmaī inguimōni imōnīi. Tōmēngā, Edæ mōnō guidēnāni do panguimæ godinque guidiegoidi weca wayōmō wayōmō nāni quēwēñōmō tōmēngā wabānō goquingāā. Ayæ guidiegoidi māñīñōmō quēwēnāni īnānite odōmonte apænebo eñæncædānīmpa, ante apænequingāā. ³⁶ Tōmēngā īñæmpa, “Botō īmote ante diqui diqui mīmīni incæte mīnitō botō īmote adāmaī inguimīni īmīnīpa, angampa tōō. Ayæ, Botō go quēwēñōmō mīnitō adoyōmō dicæ ponguimīniyaa,” ante

mānīnō ante æbānō ante apænecantawo, angadānīmpa.

Waēmō æpæ tayōmō ta gopæ mōnō quēwenguimæ impa

³⁷ Ayæ tōmēnāni nāni ææmæ iinque cæōnæ iñonte, Ñænæ ææmæ impa, ante godōmenque nangui cæyōnāni Itota iñōmō ængæ gantidīnque yedæ yedæ tedecantapa.

—Nē gæwænte wæcā iñōmō tōmengā botō weca poncæcāimpa. Ayæ botō tōnō godongāmæ becæcāimpa. ³⁸ Æcāmenque botō imote nē wede pōnengā iñōmō tōmengā quēwenguimæ ænte entwencæcāimpa. Ayæ waēmō æpæ tayōmō ta gote cægōmæ bai tōmengā adobai tōmengā nānō entwēnō godonte bai cædinque, Wadāni bete bai quēwencædānīmpa, ante godō cæcæcāimpa. Wængongui angā ēñente nāni yewæmongainō bai ante mānōmainō ante impa.

³⁹ Mānōmainō ante Itota iñōmō, Botō imote nē wede pōnēnāni inte ayæ ate Wængongui Ōnōwoca ingante ænte entwenguināni inānīpa, ante pōnēninque māningā Wængongui Ōnōwoca ingantedō ante apænegacāimpa. Edæ Itota ayæ wænāmai inte ōnædē ocæ ēmænte æidāmai nānō iñedē Wængongui iñōmō Tæiyæ Waēmō Ōnōwoca ingante ayæ da pōnōnāmai iñongāimpa.

Waodāni wæætē godō wæætē godō nāni ānewēnō

⁴⁰ Mānīnō nānō ānō ēñēninque waodāni pancadāniya,

—Nāwangā impa. Māningā iñōmō, Wængongui beyæ nē apæncā nē Ponguingā, ante nāni angaingā adocā iñongā ingampa.

⁴¹ Ante āñōnāni wadāni guiquēnē,

—Mōnō Codito nē Ponguingā, ante nāni angaingā māningā ingampa.

Ānāni ēñēninque wæætē wadāni,

—Mōnō Codito ædō cæte Gadideabæ quēwente pongā ingā, ānānīpa. ⁴² Iñæmpa mōnō Codito iñōmō Awēnē Dabii pæingā inguingāimpa. Ayæ Bedēē Dabii nānō quēwengaiñōmō adoyōmō ēñāquingā ingampa, ante Wængongui angā ēñente nāni yewæmongainō ongō adāmai imīnitawo.

⁴³ Angā ēñēninque waodāni, Itota æcānō ingā, ante mānōmai wadō wadō ante pōnente tedewengadānīmpa. ⁴⁴ Pancadāniya, Tōmengā ingante bai ongōinēmōnīpa, ānāni incæte tōmengā ingante bæi ongonte ænāmai ingadānīmpa.

Awēnēdi Itota ingante pōnēnāmai iñōnāni

⁴⁵ Wængongui oncō tæiyæ waēmō oncōnē wææ wānōnāni iñōmō, Wængongui quī, ante nē godōnāni ñænænāni tōnō Paditeoidi

weca ocæ ēmænte pōnānīpa. Ocæ ēmænte pōnāni adinque tōmēnāni,

—Quinante tōmengā ingante ænte pōnāmai imīni.

⁴⁶ Ante āñōnāni wææ wānōnāni wæætē,

—Māningā onguiñængā waa apæncā bai æcānō adobai tedecā iñōmō edæ dæ angampa.

⁴⁷ Ānāni ēñēninque Paditeoidi guiquēnē,

—Tōmengā mūnitō imīnite adobai wapiticæ māocā oda cæte gobaimīni bamīnitawo.

⁴⁸ Āninque tōmēnāni godōmenque, Awēnēdi incæ Paditeoidi incæ adocanque tōmengā ingante pōnengā ingantawogaa. ⁴⁹ Nangui ināni iñōmō ongōnāni guiquēnē tōmēnāni nē ōnōnānique inte Wængongui nānō wææ angainō ante ēñēnāmai ināni inte tōmengā ingante pōnēnāni inānīpa. Mānōmai beyæ tōmēnāni Wængongui nānō pangaimāmo ante wæquināni inānīpa.

⁵⁰ Niicodemō iñōmō wēēñēdē Itota weca nē godingā adobai tōmēnāni bai Paditeocā iñongā inte apænecantapa.

⁵¹ —Waacā, Æbānō cæboo, ante nāmā beyæ wææ ānāmai iñongante mōnō, Tōmengā ingante pangæimpa, ante ædō cæte apænte angui. Edæ, Wææ ānāmai iñongante pangæimpa, ante dicæ wææ yewæmongadāniñaa.

⁵² Ante āñongā tōmēnāni,

—Bitō adobai Gadideabæ quēwente ponte bai tedebipææ. Wængongui beyæ nāni yewæmongainta ae. Adinque bitō, Wængongui beyæ nē apæncā wii Gadideabæ quēwente pongā ingampa, ante do ēñencæbiimpa, ante angadānīmpa.

Onquiyængā nānō towēnō

⁵³ Mānīnō ānāni ate tōmānāni oncōnē ocæ ēmænte gogadānīmpa.

8

¹ Itota guiquēnē Odibowænquidi nāni anquidi gocantapa. ² Iimō ate ñāō bayedē tōmengā Wængongui oncō ñænæncōnē yabæcōnē wæætē pō guicā adinque waodāni tōmānāni tōmengā nānō ongōñōmō goto pōnāni adinque Itota tōmēnāni inānite odōmonte apæncæte ante tæ contacantapa.

³ Māniñedē onquiyængā adocanque tōmengā nānōogængā ināmai iñongante wacā onguiñængā tōnō tæcæ godō guēa mongā adāni ate nē odōmōnāni tōnō Paditeoidi iñōmō māningā onquiyængā ingante ænte pōnānīpa. Tōmengā ingante tæcæguedē gō cædāni ongōñongā ⁴ tōmēnāni Itota ingante,

—Awēnē nē Odōmōmi imi, iingā onquiyængā iñōmō wacā ingante tæcæ godō guēa mongā adāni wæmōnīpa. ⁵ Wængongui nānō angainō ante Mōitēe wodi iimāi ante wææ yewæmongacāimpa. Onquiyænāni māningā onquiyængā bai cædāni iñōnānite

münitö tömënanî inänite dicaca tacamîni wæncædänîmpa. Bitö guiquëné quïnö ämii.

⁶ Mäninö ante tömënanî iñömö, Æbänö apæneçää, äninque, Wabänö pancadea wapiticæ tedecæcäîmpa, ante cædänitapa. Edæ wapiticæ tedecä iñinque mönitö, Adocä wënæ wënæ cæcä ingampa, ante ancæmönîmpa, ante cædänitapa. Itota guiquëné ædæ wææninque onguipoga tömengä önongompoga yewæmongacäîmpa.

⁷ Tömënanî godömenque tömengä ingante ëñencæte ante äñönänî Itota ængæ gantite tömënanî inänite,

—Münitö weca adocanque ongöninque në wënæ wënæ cædämaî ingä iñinque mäningä täno onquiyængä ingante, Wænguimi, ante dicaca tacacæcäîmpa, ante angantapa.

⁸ Äninque wæætë ædæ wææninque onguipoga yewæmongacäîmpa. ⁹ Mäninö angä në ëñënanî iñömö adocanque wadæ go wacä wadæ go wacä wadæ go tömënanî wadæ godänîpa. Picænänî täno wadæ godäni ayæ wadäni wadæ godänitapa. Tömënanî dæ godäni adinque Itota adocanque ee ongöñongä onquiyængä ayæ adoyömö næ gongængantapa. ¹⁰ Itota ængæ gantidinque onquiyængä ingante,

—Æyömönö inänî. Bitö imite apænte äninque tacadämaî inänitawo.

¹¹ Äñongä tömengä wæætë,
—Awënë, tömënanî mänömaî cædämaî inänitapa.

Angä ëñëninque Itota,
—Botö adobai bitö imite apænte äninque tacadämaî incæboîmpa. Nöwo goe ämopa. Bitö wënæ wënæ cæte quëwënimämo ñimpo cæte waa quëwëe, angacäîmpa.

Inguipoga quëwënanî beyæ Itota ñäö bai inongäîmpa

¹² Ayæ Itota wæætë waodäni inänite apænedinque,

—Botö iñömö inguipoga quëwënanî beyæ ñäö bai imodö angüënë. Æcänö botö müñæ tee empo goda tömengä wëmö iñömö cöwë cægönämaî ingampa. Wæætë tömengä nänö quëwëno taadö edonque acæcäîmpa, ante botö tömengä beyæ ñäö bai imopa, ante apæneçantapa.

¹³ Paditeoidi guiquëné tömengä ingante,
—Bitö iñömö nämä äninque, Æbänö imoo, ante apænebi imipa töö. Mänömaî namanque ante apænebi beyæ bitö äninö önonquedö ante impa, ämönîpa, püñänitapa.

¹⁴ Itota wæætë,
—Botö iñömö nämä äninque, Æbänö imoo, ante apænebo incæ botö apænedö näwangä impa. Edæ, Botö æyömönö quëwente pömo imoo, ante ayæ, Ædönö gobo imoo, ante do ëñëmopa. Münitö guiquëné, Botö æyömönö quëwente pömoo imoo, ante ayæ, Ædönö gobo imoo, ante wü ëñëmînipa töö.

¹⁵ Waodänique, Iïmaî cæedäni, ante nänî wææ ante cægaî bai münitö wacä ingante apænte ämîni iñinîpa. Botö guiquëné waodäni tömënanî inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaî imopa. ¹⁶ Incæte botö mänömaî apænte ämo bai, Æbänö apænte ämoo, ante pönëninque tömëmo nö ante apænte ämopa. Edæ wü botonque apænte ämopa. Wæætë botö Mæmpo botö imote në da pönongaingä iñömö tömengä iñömö botö tönö godongämæ cæcä ate apænte ämopa. ¹⁷ Münitö müni wææ yewæmongaintaa iïmaî ante wææ yewæmongatîmpa. Mënaa onguïñæna në adina inte tömëna nänä adinö ante apænedä ëñëninque münitö wæætë, Nö impa, ante ëñencæmînipa. ¹⁸ Botö iñömö nämä äninque, Æbänö imoo, ante apænebo imopa. Ayæ botö Mæmpo botö imote në da pönongaingä iñömö tömengä botö imotedö ante, Æbänö ingää, ante adobai apæneçä ëñencæmînipa.

¹⁹ Angä ëñëninque tömënanî tömengä ingante,

—Bitö Mæmpo æyömönö quëwengää.

Äñönänî Itota wæætë,

—Münitö iñömö, Botö incæ æbänö imoo, ante, Botö Mæmpo incæ æbänö ingaingä ingää, ante ëñëmîni imînitawogaa. Botö æbodö imoo, ante ëñëmîni inte bai münitö, Botö Mæmpo æbänö ingaingä ingää, ante adobai ëñëmîni incædöminîmpa, ante apænegacäîmpa.

²⁰ Itota Wængongü oncö ñænæncönë yabæcönë go guïdinque, Wængongü quï, ante nänî da wencade gäänë ongonte apænedinque mäñinö ante apænegacäîmpa. Incæte tömengä nänö wænguïönæ wü oo pönî i beyænque tömengä ingante bæi ongonte ænämaî ingadänîmpa.

Itota, Botö goquïñömö münitö ædö cæte goquïmîni, angä

²¹ Itota wæætë tömënanî inänite äninque,
—Botö wadæ goquïmo imopa. Gobo ate münitö botö imote ante diqui diqui mingüimîni iñinîpa. Münitö wënæ wënæ cædöminî inte wæncæmînipa. Botö goquïñömö münitö ædö cæte ponguïmîni, angantapa.

²² Mäninö beyæ oodeoidi awënëidi, Tömengä iñömö, Botö goquïñömö ante münitö ædö cæte ponguïmîni, ante quïnante angää. Tömengä nämä incæ, Wænonguïmo, ante pönëninque iïmaî angantawo, ante äñänitapa.

²³ Itota godömenque,

—Münitö iñömö inguipoga quëwëmîni iñinîpa. Botö guiquëné döñædë quëwente pömo imopa. Münitö iñömö iñ inguipogaque nänî quëwencabo tönö adomîni iñinîpa. Botö

guiquënë ï inguipogaque nani quëwencabo tönö adobo inämaï imopa. ²⁴ Mänömaï beyæ botö, Minitö wënæ wënæ cædömini inte wæncæminipa, ante minitö iminite apænetabopa. Botö, Æbänö imoo, ante ämo ëñëningue pönënamäi imini inique minitö wënæ wënæ cædömini inte nö wæmaïminipa.

²⁵ Ante apæneca ëñëningue tömënanäi,
—Ebidö imitawo.

Ante äñönäni Itota wæætë,

—Botö do minitö iminite, Æbodö imoo, ante në äniimo imopa. ²⁶ Botö minitö iminitedö ante nanguï angüenëmo imopa. Minitö iminitedö ante ämo bai mäniï botö äno mini apænte anguinque imaimpa. Incæte botö imote në da pönongaingä iñömö tömengä nöngä inte tömengä, Quinö botö imote angäa, ante botö ëñëninö ante botö adodö ante inguipoga quëwënanäi inänite apænebo imopa, angantapa. ²⁷ Incæte tömënanäi, Itota tömengä Mæmpo ingantedö ante mönitö imönite apæneca, ante ëñënamäi ingadänimpa. ²⁸ Mänömaï beyæ Itota,

—Botö Waobo ëñagaïmo iñömote minitö botö imote awäa timpodinque tiwadinque gö cæmini wægöñömo minitö mäniñedë edæ, Botö æbodö imoo, ante ëñencæminipa. Ayæ botö nämä pönëningue cædämaï imopa. Wæætë Wæmpo nänö odömonte apænedö ante botö imote apæneca botö ëñëninö ante adodö ante apænebopa, ante minitö adobai mäniñedë ëñencæminipa. ²⁹ Botö imote në da pönongaingä botö imote ëmö cædämaï inte cöwë botö tönö godongämæ ongongä ingampa. Edæ botö cöwë, Æbänö cæbo ate tömengä waa aquingäa, ante cæbopa, ante Itota apænegacäimpa.

³⁰ Mäninö äñongä nanguï inäni iñömö tömengä ingante pönengadänimpa.

Wënæ beyænque në cædäni

³¹ Oodeoidi pancadäniya në pönënanäi iñönänite Itota iñömö,

—Minitö cöwë botö odömonte apænedinö bai cæmini inique botö miñæ nö gomini imaiminipa. ³² Ayæ botö äno nöinö impa, ante ëñencæminipa. Mäninö nö botö äno beyænque minitö ñimpo cæte quëwencæminipa.

³³ Ante äñongä tömënanäi wæætë,

—Mönitö iñömö Abadäo nänö pæimöni imöni inte mönitö cöwë waocä æcämenque beyænque në cæmönï inämaï itamönipa töö. Bitö iñömö, Wacä beyænque minitö godömenque cædämaï inte ñimpo cæte quëwencæminipa, ante ædö cæte ämiï.

³⁴ Äñönäni Itota wæætë,

Minitö iminite näwangä ämopa. Në wënæ wënæ cæcä iñömö tömengä wacä beyænque cæte në quëwengä bai wædongä inte edæ tömengä nänö wënæ wënæ cægänonque ante

cædinque ædö cæte aamö cæte goqingäa. ³⁵ Wacä beyænque cæte në quëwengä iñömö tömengä awënë nani wencabo tönö wii cöwë godongämæ quëwengä ingampa. Awënë wengä guiquënë tömengä mæmpo tönö nana wencaya ina beyænque tömengä awënë tönö cöwë guëa quëwengä ingampa.

³⁶ Mänömaï beyæ Wængongui Wengä minitö iminite ñimpo cæcä inique minitö nö ñimpo cæte quëwëningue wacä beyænque në cæcä bai inämaï inte quëwengümini imaiminipa.

³⁷ Minitö iñömö Abadäo nänö pæimöni iminipa, ante do ëñëmäo. Incæte botö äno ante mimönë entawënamäi quëwëmini beyæ minitö botö imote, Wænömöni wæncæcäimpa, ante pönëmini iminipa. ³⁸ Botö iñömö botö Mæmpo weca tömëmo adinö ante minitö iminite apænebo imopa. Minitö guiquënë mini mæmpo nänö angainö mini ëñëninö ante cæmini iminipa.

³⁹ Ante apæneyongä tömënanäi wæætë,

—Abadäo mönö docä mæmpo ingaingä ingampa.

Änani ëñëningue Itota,

—Minitö nö Abadäo wëmini inte bai minitö tömengä nänö cægäinö bai adobai cæcædöminipa töö. ⁴⁰ Nöwo iñæmpa botö, Wængongui näwangä nänö angainö ante botö ëñëninö ante minitö iminite në apænebo iñömote minitö, Mönitö æbänö cæte wænömöni wænguingäa, ante pönëmini iminipa. Abadäo mäniï mini cægai bai cædämaï ingacäimpa. ⁴¹ Minitö iñömö tömëmini mæmpo nänö cægai bai adobai cædömini imini awædö.

Äñongante tömënanäi,

—Mönitö wii wegöwæ wëmöni imönipa töö. Wængongui incæ tömengä adocanque mönitö Mæmpo inongäimpa.

⁴² Änani ëñëningue Itota tömënanäi inänite,

—Wængongui näwangä minitö Wæmpocä ingä bai minitö botö imote waadete pönencædöminipa. Edæ botö Wængongui weca quëwente minitö weca ñöwo wææ pontabopa. Botö wii nämä pönëningue pontabopa. Wæætë tömengä botö imote da pönongä pongaïmo imopa. ⁴³ Minitö iminite botö quinö apæneboo, ante minitö quinante ëñënamäi iminii. Edæ botö äno ante, Quinö apæneboo, ante minitö babetamö inäni bai inömini inte ædö cæte ëñengüminii.

⁴⁴ Wënæ iñömö minitö mæmpo inongäimpa. Ayæ minitö mæmpo nänö cæinëwëno ante minitö adodö ante, Mönitö cæinëmönipa, ante cæminipa. Wëñëñedë inguipoga mä badöñedë tömengä, Botö wænongümo, ante do entawengä ingacäimpa. Tömengä, Quinö näwangä impa, ante cöwë änämaï ingampa. Ayæ edæ, Quinö äno nöinö impa, ante tömengä entawënamäi inongäimpa. Adocä babæ tededinque tömengä babæ nänö

entawënonque ante tedewengä ingampa. Edä tömengä nê babæ äongä ingampa. Ayæ tömengä iñömö mä babæ angaingä ingampa. ⁴⁵ Incæte botö näwangä ämo beyænque minitö botö äno ante pönënamäi iminipa töö. ⁴⁶ Minitö weca ongongä iñömö æcämenque incæ botö imote apænte äninque, Bitö wënæ wënæ cæbi imipa, ante, Näwangä impa, ante odömönatawogaa. Botö näwangä ämo bai minitö quïnante botö angainö ante pönënamäi iminipa. ⁴⁷ Wængongui wënäni nê inönäni iñömö Wængongui nänö angainö ante ëñënanäi inäni. Minitö guiquënë tömengä wëmini inämai imini beyæ, Tömengä quino angäa, ante ëñënamäi iminipa, ante Itota apænegacäimpa.

Abadäo ayæ ëñadämai iñedë mönö Codito do ingaingä

⁴⁸ Oodeoidi wæætë tömengä ingante, –Bitö Tämadiabæ quëwëmi imipææ. Ayæ wënæ tönö cæbi imipææ, ante wii näwangä ämöni intamöni.

⁴⁹ Ante pïinäni ëñëninque Itota wæætë apænedinque,

–Botö wii wënæ tönö cædömo imopa. Wæætë botö iñömö, Botö Mæmpo ingante waa acæboimpa, ante cæbo imopa. Minitö guiquënë botö imote waa adämai iminipa töö. ⁵⁰ Waodäni, Bitö waëmö imipa, ante botö imote apæncædänimpa, ante botö cædämai imopa. Wæætë wacä iñömö, Waodäni bitö imite apænedinque, Waëmö imipa, ante apæncædänimpa, ante nê cæcä ingampa. Mäningä nê apænte äongä ingampa. ⁵¹ Minitö iminite näwangä ämopa. Botö angainö ante nê ëñente cæcä tömengä iñömö wantæpiyæ wänämai quëwencæcäimpa, angantapa.

⁵² Ante apæncä ëñëninque oodeoidi, –Bitö wënæ tönö cæbi imipa, ante ñowo ædæmö ëñëmönipa. Abadäo wodi iñæmpa do wængacäimpa. Ayæ Wængongui beyæ nê apænedäni adobai do wængadänimpa. Incæte bitö, “Botö angainö ante nê ëñente cæcä tömengä iñömö wantæpiyæ wänämai quëwencæcäimpa, ante apænebi töö.” ⁵³ Mönö docä mæmpo Abadäo wodi ñænængä inte cægaingä incæte bitö iñömö edæ, Abadäo wædangä iñongante botö iñömö godömenque ñænæmo inte cædömo imopa, ämitawo. Tömengä iñömö edæ do wængacäimpa. Ayæ Wængongui beyæ nê apænedäni adobai do wængadäni apa änewëë. Bitö nämä äninque, Æcämë bai imoo, ante ämi.

⁵⁴ Äñönäni Itota wæætë, –Botö nämä äninque, Waodäni, Bitö waëmö imipa, ante botö imote apæncædänimpa, ante ëñëninque wæbo bai waodäni botö imote nani waa apænedö wæætë önonquedö ante incædönimpa. Botö

Mæmpo incæ minitö, Mönö Wængongui ingampa, ante mini äongä guiquënë tömengä iñömö, Bitö waëmö imipa, ante botö imote pönö apæncä apa quëwëminii. ⁵⁵ Minitö tömengä ingante wii ädinque pönënamäi iminipa töö. Botö guiquënë tömengä ingante do agaimo inte pönëmo imopa. Botö tömengä ingante adämai imopa, ante bai botö minitö bai babæ ante ancædömoimpa. Wæætë tömengä ingante do ädinque nê pönengaimo inte botö iñömö edæ tömengä nänö angainö bai nê cæbo imopa. ⁵⁶ Inguipoga botö ponguionæ ante minitö docä mæmpo Abadäo wodi incæ, Codito ponguionæ pongä acæboimpa, ante pönëninque do edæ watapæ togacäimpa. Æninque tömengä mäniönæ Codito nänö ponguionæ ädinque godömenque togacäimpa, ante Itota apæncantapa.

⁵⁷ Oodeoidi tömengä ingante, –Bitö ëñagai iñömö tincoenta wadepo inämai i incæte bitö ædö cæte, Botö Abadäo ingante atabopa, ante ämi.

⁵⁸ Ante pïinönäni Itota wæætë, –Minitö iminite näwangä ämopa. Abadäo wodi ayæ ëñadämai iñedë botö iñömö edæ do quëwëmo ingaimo imopa, ante apæncantapa.

⁵⁹ Mäninö ante apæncä ëñëninque tömënanäi iñömö tömengä ingante dicaca tacacæte ante cædinque dicacoo wææmpo ænänitapa. Incæte Itota wë womöninque Wængongui oncö ñænæncodo tao wadæ gogacäimpa.

9

Babetamö ëñagaingä incæ waa bamonte acampa

¹ Itota gomonga godinque onguinængä babetamö ëñagaingä ingante acantapa. ² Tömengä ëminænäni iñömö tömengä ingante,

–Awënë nê Odömömi imi, mäningä onguinængä incæ tömengä mæmpoda incæ æcänö wënæ wënæ cæda beyæ tömengä babetamö ëñacantawo, ante ëñencæte ante änanitapa.

³ Itota tömënanäi inänite, –Ingä onguinængä incæ tömengä mæmpoda incæ tömännäni wënæ wënæ cædämai inänitapa. Wæætë tömengä babetamö ëñagaingä inte quëwëñongante Wængongui nänö cædö iñömö edonque pönö acäimpa, ante mäningä mänömai ingacäimpa. ⁴ Iñänäni ëñëdäni. Botö imote nê da pönongaingä tömengä nänö cædö ante mönö mii quëwenganca mönö cæquënëmo imopa. Mönö wænguionæ iñonte mönö ædö cæte ayæ cæquimöö. ⁵ Botö inguipoga quëwëñedë botö inguipoga quëwënanäi beyæ ñäo bai inömo imopa.

⁶ Mäninö ante äninque Itota onguipoga towæ tänöningue wëä wëä gopodinque aquimæ bayonte æninque babetamongä awinca öni öni pæmongantapa. ⁷ Ayæ tömengä ingante,

–Goe. Gäwapæ Tidoee nani ämæ godinque bitö awinca nãö memöe, ämopa, angantapa. Tidoepæ nani ämæ iñömö mönö tededö, Da godömæ, ante impa.

Angä eñente godinque onguinængä nã memöningue tömengä oncönë ocæ emæente pöningue do acä ingacäimpa. ⁸ Tömengä mänömaï do acä inte pongä adinque godongämæ quëwënanï tönö wëñëñedë tömengä, Pönömi æmoe, añongante në adinãni tönö,

–Æ, iingä onguinængä diyæ, Pönömini æmoedäni, ante në äncöningä wii adocä ingantawo.

⁹ Änãni eñëningue pancadäniya,

–Mäningä ingampa, änãnitapa.

Wadäni guiquënë,

–Wii tömengä ingä, önonque tömengä nãnö emö bai emönongä ingampa.

Ante tedeyönãni onguinængä tömenganque,

–Botö mänimodö inömo imopa, angantapa.

¹⁰ Ayæ tömënanï,

–Æbãno cæte bitö waa bamonte abii.

¹¹ Äñönãni tömengä wæætë,

–Onguïnængä iñömö tömengä emöwo Itota iñömö onguipoga towæ tänöningue wëä wëä gopodinque aquimæ bayonte æninque botö awinca öni öni pæmongantapa. Ayæ botö imote, “Goe. Gäwapæ Tidoepæ nani ämæ godinque bitö awinca nã memöe” angantapa. Angä eñëningue botö wadæ gote nã memöningue do waa bamonte abopa, angantapa.

¹² Tömënanï tömengä ingante,

–Iingä onguïnængä bitö änogä iñömö æyömönö ingä.

Ante äñönãni tömengä wæætë,

–Botö eñënamäi imopa, angacäimpa.

Babetamö iingä ingante Paditeoidi ancaä änãni

¹³ Ayæ Paditeoidi weca onguïnængä në babetamö eñagaingä ingante ænte mämönãni pongantapa. ¹⁴ Itota mänii aquimæ badöningue babetamö iingä awinca wi æmante bai nãnö cæönæ iñömö oodeoidi guëmanguionæ inönimpa.

¹⁵ Mänömaï beyæ Paditeoidi iñömö adobai eñencæte ante babetamö iingä ingante edæ, Æbãno cæte bitö waa bamonte abii, ante äñönãni tömengä wæætë,

–Mäningä iñömö aquimæ æninque botö awinca öni öni pæmongantapa. Ayæ botö tömëmo awinca nã memöningue nïwo waa bamömo inte abopa, angantapa.

¹⁶ Paditeoidi pancadäniya,

–Iingä onguïnængä iñömö wii Wængongui weca quëwente pongä ingampa. Edæ tömengä mönö guëmanguionæ iñonte guëmänãmaï inte do cæcampa, änãnitapa.

Wadäni guiquënë,

–Iñæmpa waocä në wënæ wënæ cæcä inongä inte ædö cæte mänömaï, Acæminimpa, ante mä cæquingä, änãnitapa.

Iñinque tömënanï wadö wadö ante pönente tedewengadänimpa. ¹⁷ Ayæ tömënanï wæætë babetamö iingä ingante,

–Tömengä cæcä ate bitö waa abi inte bitö edæ tömengä ingantedö ante quinö ämii.

Ante äñönãni onguïnængä wæætë,

–Tömengä Wængongui beyæ në apæneccä ingampa, angantapa.

¹⁸ Babetamö iingä iñömö, Waa bamömo imopa, ante apæneccä eñëningue oodeoidi awëñëidi ayæ pönënamäi inãnitapa töö. Tömengä mæmpoda inate aa pedäni ponte apænedä ate mänñedë pönënanitapa. ¹⁹ Tömënanï tömëna inate,

–Iingä onguïnængä edæ minatö wengä ingantawo. Mäningä në babetamö eñagaingä minatö änogä adocä ingantawo. Æbãno cæte tömengä nïwo waa bamonte acäi.

²⁰ Ante äñönãni tömengä mæmpoda wæætë, Në babetamö eñagaingä iñömö tömengä mönatö wengä ingampa, ante eñëmönapa. ²¹ Incæte mönatö, Æbãno cæte tömengä nïwo waa bamonte acäa, ante, Æcãno tömengä awinca wi æmante bai cæcäa, ante eñënamäi imönapa. Minatö tömengä ingante eñencæte ante äedäni. Tömengä do picængä ingampa. Tömenganque apæneccä eñencæminimpa, änatapa.

²² Tömengä mæmpoda oodeoidi awëñëidi inãnite guinëningue mäninö ante apænedatapa. Edæ oodeoidi awëñëidi iimäi ante do apænedönanimpa. Æcãno Itota ingante Ao ante, Mönö Codito ingampa, äna eñëningue edæ, Mönitö odömöincönë ongönãmaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mæmpoda, “Tömengä do picængä ingampa. Minatö tömengä ingante eñencæte ante äedäni,” angadaimpa.

²⁴ Onguïnængä në babetamö iingä ingante wæætë aa pedäni pongä ate tömengä ingante,

–Bitö Wængongui eñëñongä näwangä ante apænee, amönipa. Edæ iingä onguïnængä mäninö në cædingä wënæ wënæ cæcä ingampa, ante edæ do amönipa.

²⁵ Ante piññönãni tömengä wæætë,

–Mäningä wënæ wënæ cæcä incæ wii wënæ wënæ cæcä incæ botö eñënamäi imopa. Botö babetamömo inimo incæ nïwo

waa bamonte abopa. Mäinque eñëmo imopa.

²⁶ Ante apæneca eñëninque tõmënanì tõmengä ingante,

–Tõmengä iñõmõ bitõ imite æbãno cæcantowa. Æbãno cæte bitõ waa bamonte abii, änãnitapa.

²⁷ Tõmengä wæætë,

–Minitõ iminite do antabopa. Botõ añõmote munitõ eñënamã iminipa tõõ. Quinante wæætë adodõ ante eñëinëminii. Minitõ adobaì, Mõnitõ tõmengä emiñãmõni baquimõni, ante aminitowa, ante angantapa.

²⁸ Ayæ tõmënanì tõmengä ingante piinte wënæ wënæ badete todinque,

–Bitõ mäningä emiñãmì imipa tõõ. Mõnitõ guiquënë Mõitee emiñãmõni imõni apa quëwëmiì, änãnitapa. ²⁹ Wængonguì Mõitee ingante apænecacãimpa, ante do eñëmõnìpa. Ìngä guiquënë æyõmõnõ quëwente pongää, ante eñënamã imõnìpa.

³⁰ Añõnanì onguifængä wæætë,

–Mäinõ munitõ añinõ wíwa impa aminii. Tõmengä põnõ cæcã waa bamonte abo incæte tõmengä æyõmõnõ quëwente pongää, ante munitõ eñënamã iminipa. ³¹ Nè wënæ wënæ cædãni iñõmõ Wængonguì ingante apæneyõnanì tõmengä tõmënanì inãnite eñënamã ingampa, ante do eñëmõmpa. Wæætë Wængonguì ingante, Bitõ adobique mõnõ Wængonguì imidõ anguënë, ante nè apænecã iñõmõ tõmengä Wængonguì nãnõ angainõ nè eñente cædongã inte apæneyongante Wængonguì tõmengä ingante eñencæcãimpa. ³² Waocã nè babetamõ eñagaingã iñongante wacã tõmengä awinca wí æmonte baì cæcã ante æyedëmenque incæ inguipoga quëwënanì dicæ añãni eñënanitawogaa. ³³ Ìngä onguifængä iñõmõ wí Wængonguì nãnõ da põnongã pongaingã inte baì tõmengä tõmãnõ cædãmaì incædongãimpa, angantapa.

³⁴ Mäinõ angã eñëninque tõmënanì wæætë,

Bitõ eñagãifedë do wënæ wënæ cæte eñagãimi imipa. Incæte bitõ mõnitõ imõnite ædõ cæte, Eñencæminìpa, ante odõmõnte apænëbi imipa tõõ.

Änãni ininque tõmënanì, Bitõ mõnitõ odõmõincõnë ongõnamã tao gobãwe, ante tõmengä ingante da tadõnanì tao gogacãimpa.

Në babetamõ baì inãni inãnite ante Itota apænecampa

³⁵ Tõmënanì tõmengä ingante da tadõnanìpa, ante tededãni eñëninque Itota tõmengä ingante ante diqui diqui minte gote adinque.

–Bitõ Waocã nè eñagaingã ingante põnëmitowa.

³⁶ Angã eñëninque onguifængä,

–Awënë, mäningä æcãno inaa. Botõ tõmengä ingante põnencæboimpa, ante apænëbi eñëmo.

³⁷ Ante añongã Itota wæætë,

Bitõ tõmengä ingante do abitapa. Ayæ bitõ imite nè apænëbo iñõmõ tõmëmo imopa.

³⁸ Angã eñëninque onguifængä,

–Awënë, botõ wede põnëmo imopa. Ayæ, Bitõ Wængonguì Wëmi imidõ anguënë, ante tõmengä Itota weca ædæ wæænìnque apænecantapa.

³⁹ Itota iñõmõ edæ,

–Botõ, Inguipoga quëwënanì æbãno cædãni, ante apænte ancæte ante põninque iimã cæbopa. Botõ nè babetamõnanì baì inãni waa bacædãnimpa, ante cædinque pontabopa. Ayæ wæætë, Mõnitõ waa amõnìpa, ante nè änãni inãnite, botõ, Babetamõminì baì iminìpa, ante edonque odõmõncæte ante pontabopa.

⁴⁰ Mäinõ angã eñëninque Paditeoidi pancadãniya tõmengä weca nè ongõnanì guiquënë tõmengä ingante,

–Æbãnõ amii. Iñæmpa mõnitõ adobaì babetamõnanì baì imõnitawogaa.

⁴¹ Ante añõnanì Itota wæætë,

–Minitõ babetamõminì baì inte baì wënæ wënæ cædãmaì incædõminìpa. Wæætë munitõ, Mõnitõ waa amõnìpa, ante nè änõminì inte muni wentamõ mongæncõo ee mongæminì inguimìnidõ anguënë, ante apænecacãimpa.

10

Në aacã tõnõ tõmengä obegaidi

¹ Itota ayæ iimã apænecantapa. “Minitõ iminite nãwangã ämopa. Onguifængä obegaidi nãni wææ cæyõmõ guidëmõ nè guidãmaì inte wæætë wayõmõ da ewa æi guicã iñõmõ tõmengä iñõmõ nè awëmõ õ ængã inongã inte adobaì wadãni ayõnanì nè põ õ ænte gocã ingampa. ² Odemõ nè guicã guiquënë tõmengä obegaidi inãnite nè aacã ingampa. ³ Nè aacã beyæ odemõ nè wææ cæcã wí ænecampa. Wí ænecã ate nè aacã põ guite tedeyongã obegaidi tõmengä nãnõ tedepãmo eñente inãnipa. Tõmengä obegaidi inãnite nãni emõwo nãni emõwo ante aa pecã põñõnãnite tõmengä tõmënanì inãnite ænte taocampa. ⁴ Tõmengä obegaidi tõmãnanì inãnite ænte taodinque tõmengä õnõmæca iñõmõ tãno beyænte gocã ate tõmengä obegaidi tõmengä nãnõ tedepãmo eñëninque tõmengä ingante tee empo godãnipa. ⁵ Wacã ingante guiquënë tõmënanì tee empote godãmaì inãnipa. Wæætë wacã nãnõ tedepãmo eñënamã inãni inte tõmënanì tõmengä weca ongõnamã wodii gocædãnimpa,” ante Itota apænecantapa.

⁶ Tömengä mänömaï tömënäni inänite odömoncæte ante, Nê aacä æbänö cæcäa, ante odömonte apæneccä incæte tömënäni tömengä nänö äninö ante ëñënämaï ingadänimpa.

Itota mönö imonte në Aacä ingä

⁷ Mänömaï beyæ Itota wæætë äninque, “Botö munitö iminite näwangä ämopa. Botö iñömö në obegaidi bai inäni nänäni wææ cæyömö, Guicædänimpa, ante odemö bai imopa. ⁸ Wëñëñedë botö ayæ pönämaï iñedë wadäni odömonte apæneccä pongadänimpa. Tömënäni tömänäni waodäni inänite në awëmö ö ænänäni bai inönäni inte adobai wadäni ayönäni në pö ö ænte gogainäni bai ingadänimpa. Incæte waodäni iñömö në botö obegaidi bai inönäni inte në ö æinënäni inänite wæætë ëñënämaï ingadänimpa. ⁹ Botö në odemö bai imopa. Odemö në guicä bai iñömö tömengä botö imote pönängä iñongante botö æmo beyænque quëwencæcäimpa. Adocä në obega bai inte tömënäni nänäni wææ cæyömö guidemö në guicä bai ininque tömengä piyæñë cæte quëwencæcäimpa. Ayæ tömengä wæætë në taocä bai ininque tömengä nänö cænguï mæ öñö adinque eyepæ cæncæcäimpa,” ante Itota apæneccatapa.

¹⁰ Ayæ apænedinque, “Nê awëmö ængä guiquënë tömengä iñömö awëmö æncæte ante pongä inongä inte adobai wænoncæte ante wo ewencæte ante mäninganca cæcæte ante pongä ingampa. Botö iñömö, Waodäni quëwencædänimpa, ante ayæ, Tömënäni nänäni quëwenguinque ante watapæ pöni quëwencædänimpa, ante pontabopa. ¹¹ Botö obegaidi bai inäni inänite në waa aacä bai imopa. Në waa Aacä iñömö nämä incæ obegaidi beyænque wæncæcäimpa. ¹² Godonte æinta ante wacä ingante në cæcä iñömö tömengä iñömö obegaidi në ëacä inämaï inongä inte në aacä inämaï ingampa. Mänömaï beyæ adocä iñömö mëñe bai ingä pongä adinque tömengä obegaidi inänite ëmö cæte wodii winongampa. Tömengä wodii winongä adinque mëñe bai ingä wæætë obegaidi weca pogodo ponte obega ingante yao ongönninque, Obegaidi pangocæ goquinäni, ante cæcampa. ¹³ Godonte æintaque ante në cæcä iñömö, Æbänö cæte obegaidi waa quëwenguinäni, ante änämaï inongä inte edæ wodii winongampa,” ante Itota apæneccatapa. ¹⁴⁻¹⁵ Ayæ apænedinque, “Obegaidi inänite waa aacä bai edæ botö iñömö në waa Aabo imopa. Botö Mæmpo edæ botö imote do ate pönängä bai botö adobai tömengä ingante do adinque pönëmopa. Ayæ tömëmö obegaidi bai inäni inänite do adinque tömënäni inänite pönëmopa. Ayæ tömënäni guiquënë botö imote do adäni inte botö imote pönënäni. Botö nämä incæ

obegaidi bai inäni beyænque wæncæboimpa. ¹⁶ Ayæ wadäni iñömö botö obegaidi bai në inäni incæ wii mäniiñömö wææ cæyömö quëwënäni inänipa. Botö mäninäni inänite adobai ænte mämö ponguënëmö imopa. Adodäni adobai botö tedepämo, Æbänö ämo, ante ëñenguinäni inänipa. Mänömaï beyæ mäninäni iñömö do botö quinäni tönö tömänäni adocabodänique baquinäni inänipa. Ayæ në Aabo adoboque iñömö tömänäni beyæ cæcæboimpa.” ante Itota apæneccatapa.

¹⁷ Ayæ apænedinque, “Botö nämä incæ Ao ante wæñinque ñäni ömæmoncæboimpa, ante cædinque wæætë tömëmö müi quëwenguimo incæboimpa. Mänömaï beyæ botö Mæmpo botö imote waadete pönängä ingampa. ¹⁸ Waodäni iñömö ædö cæte botö imote wæñonguinäni. Botö nämä incæ Ao äninque wæncæboimpa. Botö nämä tæi piñæmo iñömö, Wænguimo, ante në ämo inömo imopa. Ayæ adobai botö nämä tæi piñænte në ämo inte botö, Nänäni ömæmoncæboimpa, ante cædinque wæætë tömëmö müi quëwenguimo incæboimpa. Botö Mæmpo iñömö botö imote nänö wææ angaiñö botö ëñëñinö ante ëñente cæbopa,” ante apæneccatapa.

¹⁹ Mäninö apæneccä ëñëñinque oodeoidi wæætë wadö wadö ante pönente tedewengadänimpa. ²⁰ Oodeoidi nangui inäni iñömö, –Tömengä wënæ tönö cæcä inte edæ ömæcacä inongä ingampa. Ædö cæte tömengä ingante ëñëminii.

²¹ Äñönäni oodeoidi incæ wadäni guiquënë,

–Tömengä wënæ tönö cæcä inte bai tömengä iñömö nänö äninö ante wii angä incædongäimpa. Në wënæ inte quëwente cæcä iñömö babetamönäni awinca wi æmonte bai cæcä waa bamönäniyaa.

Oodeoidi Itota ingante Baa äñäni

²² Yoguïte tedæ iñonte waodäni Eedotadë quëwënäni, Wængongui oncö tæiyæ waëmö oncö ante dodäni mæñongadänimpa, ante pönente ææmæ cæyönäni. ²³ Itota Wængongui oncö ñænæncönë yabæcönë Tadömö nänäni änoncönë iñömö cængongantapa. ²⁴ Oodeoidi tömengä weca pö godongämæ gongænte äñäni,

–Bitö æbänö imii, ante æpoönæddö ayæ äñëñämaï imii. Bitö mönitö Codito imi ininque mönitö imönite edonque pöni apænebi ëñëmöni.

²⁵ Ante äñönäni Itota wæætë,

–Minitö iminite do antabopa. Incæte munitö pönënämaï iminipa töö. Botö edæ botö Mæmpo ëmowo ante bamönengæ cæbo adinque munitö, Botö æbänö imoo, ante ëñenguënëmini iminipa. ²⁶ Minitö wii

botö obegaidi bai inömini inte botö imote pönänāmai iminipa töö. ²⁷ Waodāni botö obegaidi bai nē ināni inte botö tedepāmo, Æbānō āmo, ante do ēñēnāni. Ayæ botö tömēnāni inānite adinque pönēmo iñōmote tömēnāni wæætē botö imote tee empote godānipa. ²⁸ Botö adodāni inānite wantæpiyæ nāni quēwenguinō godōmo æninque quēwencædānipa. Ayæ cōwē wænāmai incædānipa. Tömēnāni tömēmo önönempo ongōñōnānite æcānō tömēnāni inānite gā pe æmpoda iñōmō edæ dæ angampa. ²⁹ Botö Mæmpo edæ adodāni inānite botö imote nē pönongaingā inongā ingampa. Tömānāni wædānāni iñōnāni tömēngā iñōmō godōmenque ñænngā inte nangui cædongā ingampa. Ininque tömēngā önönempo ongōñōnānite æcānō tömēnāni inānite gā pe æmpoda iñōmō edæ dæ angampa. ³⁰ Botö iñōmō botö Mæmpo tönō āwocaque bai ēwocamōna imōnāpa, ante Itota apænecāiampa.

³¹ Māninō angā ēñēninque oodeoidi wæætē tömēngā ingante dicaca tacacæte ante cædinque dicaco wææmpo æñānāpa. ³² Tömēnāni dicaco wææmpo æñōnānite Itota tömēnāni inānite,

–Botö munitō weca botö Mæmpo nānō angai bai nangui bamōnengæ odōmonte cætabopa. Ædō botö bamōnengæ cædinō ante adinque munitō botö imote dicaca tacacæ cæminii.

³³ Ante āñongā oodeoidi wæætē,

–Māninō bitō waa cædinō beyæ ante mōnitō wīi bitō imite dicaca tacacæ cæmōnāpa. Wæætē bitō babæ ante Wængonguī ingante godō wēnæ wēnæ āmipa, ante bitō imite tacacæ cæmōnāpa. Edæ mōnitō waomōni bai inte bitō adobai waobi imi incæte bitō, Botö Wængonguimo inōmo imopa, ante āmipa töö.

³⁴ Ante wæyōnāni Itota wæætē tömēnāni inānite,

–Minitō mūni wææ yewæmongainō wīi iimāi ante yewæmongatūi. “Minitō iñōmō wængonguīdi iminipa, ante do antabopa,” ante yewæmongadānipa. ³⁵ Wængonguī angā ēñēnte nāni yewæmongainō ante waodāni ædō cæte Baa āninque wido cæquinānii. Wængonguī nānō angainō ante apænecā nē ēñēnāni iñōnānite tömēngā, Minitō wængonguīdi iminipa, angantapa. ³⁶ Ayæ botö Mæmpo botö imote inguipoga da pōnōncæte ante, Botö adoboque quīmi imipa, ante botö imote apænte ængacāiampa. Ininque edæ botö tömēngā quīmo inōmo inte tömēngā nānō nē da pōnongāimo iñōmote edæ botö imote edæ æbānō anguūi. Iñæmpa botö iñōmō Wængonguī Wēmo inōmo imopa, āñōmote edæ munitō wæætē, Bitō babæ ante Wængonguī ingante godō wēnæ wēnæ

āmipa, ante quinante āmīnitawo. ³⁷ Botö edæ Mæmpo nānō cædō bai cædāmai imo bai munitō māñīfēdē botö imote pönēnāmai imini bai waa incædōnāpa. ³⁸ Minitō botö imote pönēnāmai imini incæte botö guiquēnē botö Mæmpo nānō cædō bai adobai cæbo ininque munitō, Botö æbānō cæboo, ante adinque pōnencæmināpa. Mānōmai cædinque, Botö Mæmpo ingante botö ēwocabo imopa, ante ayæ, Botö adobai botö Mæmpo nempo quēwēmopa, ante ēñēnguimīni inte ayæ ēñēninque pōnencæmināpa, ante Itota angacāiampa.

³⁹ Māninō angā ēñēninque tömēnāni wæætē tömēngā ingante bæi ongoncæ cæyōnāni tömēngā do aamō cæte gocantapa.

⁴⁰ Ayæ Eedotadēē wadæ godinque Oododānō æmæmāa ocæ ēmænte taodinque tömēngā Wäo wēñēñēdē waodāni inānite æpænē nānō guidōñīñōmō adoyōmō gote ongonā ingantapa. ⁴¹ Ayæ tömēngā māñīñōmō ongōñēdē waodāni nangui ināni tömēngā weca goto pōninque ānānitapa.

–Ate ēñēncæmināpa, ante Wäo wodi cōwē bamōnengæ cædāmai ingā incæte tömēngā māningā Itota ingantedō ante nānō angainō tömānō nāwangā ante angantapa, ante apænecānitapa.

⁴² Ayæ māñīñōmō ongōninque waodāni nangui ināni Itota ingante wede pönēnāni bagadānāpa.

11

Datado wængāiampa

¹ Māñīfēdē wacā onguīñēngā tömēngā ēmōwo Datado wēnæ wēnæ badinque õñōnongāiampa. Māadiya tönō Māadota tömēngā tōñīñada nāna quēwēñōmō tömēngā adoyōmō Betānia iñōmō quēwēnongāiampa. ² Ingā Māadiya guiquēnē ayæ ate oguī wapæ ænte Awēñē Itota ingante õni pædinque nāmā ocaguī inte tömēngā õnōwa amīmō cæquingā adocā Māadiya iñongā tömēngā tōñīñacā Datado ñōwo wēnæ wēnæ bacā inongāiampa. ³ Ininque Datado tōñīñada iñōmō, Itota ingante aa pebi pongæ, āna ēñēnte wacā gote,

–Awēñē ēñēmi, Bitō nē waadecā iñōmō wēnæ wēnæ ingampa cæbii, ante ānāpa, ante apænecantapa.

⁴ Māninō nāna ānō ante apænecā ēñēninque Itota,

–Māninō wēnæ wēnæ inte nānō wædō iñōmō wīi wænguī impa. Wæætē waodāni, Wængonguī ñāō apāite ēmōnongā ingampa, ante acædānāpa. Ayæ botö imote, Bitō Wængonguī Wēmi adobai ñāō apāite ēmōnōmi imipa, ante apænecædānāpa, ante māningā wēnæ wēnæ ingampa, angantapa.

⁵ Māadota tönō tömēngā tōñīñacā Māadiya nāna caya inate ayæ Datado ingante Itota

tömənäni inänite waadete pönəngäimpa.
⁶ Datado wənə wənə ingampa, ante apænecä ēñgä incæte Itota nänö ongōñömö adoyömö meönaa ayæ ongongantapa. ⁷ Tömengä ayæ ate tömengä emiñænäni inänite,

—Egodöedäni, wæætē Oodeabæ monö gocäimpa.

⁸ Äñongä tömənäni wæætē tömengä ingante,

—Awënë nē Odömömi imi, wantæyö intapa oodeoidi bitö imite dicaca tacacæ cædäni incæte bitö ñowo wæætē, Mäniñömö goquimo, ämitawo.

⁹ Ante äñäni Itota wæætē,

—Inämpa nænque wii tömäa itädē apäitawo. Itädē nē gocä monö nænque inguipoga apäicä ate beyæ tēwadämaï gocampa. Botö inñömö itädē gocä bai adobai mümo botö quēwenganca botö cæquēñenö inque cæquinque gobopa. ¹⁰ Woyowotæ nē gocä bai guiquēñē tömengä wæætē ñäö dä ä beyæ tēwate bai gocampa, angacäimpa.

¹¹ Mäninö angä ate tömengä godömenque tömənäni inänite,

—Mönö æmigo Datado inñömö mö ñongä. Botö ñowo tömengä weca gote, Näni ömæmöe, ämo ñäni ömæmonguingä, ante apænecantapa.

¹² Tömengä emiñænäni wæætē tömengä ingante,

—Awënë Itota, tömengä mö ñongä ininque edæ gancæ baquingä, apænecänitapa.

¹³ Itota Datado nänö æmæwo wänimämo ante apænecä incæte tömengä emiñænäni guiquēñē, Datado önonque mö ñongampa, ante Itota apænecampa, ante pönönänimpa. ¹⁴ Mänömaï beyæ Itota tömənäni inänite,

—Datado æmæwo wängäimpa, ante edonque pöni apænecantapa. ¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönämaï intabopa, ante minitö beyæ ante tobopa. Egodöedäni, tömengä weca monö gocäimpa, angantapa.

¹⁶ Ayæ Tömato Äncadēnaque näni äñongä inñömö Itota emiñænäni wädäni inänite,

—Egodöedäni, äñinque, Tömengä tönö godongämæ wæncæte ante tömengä miñæ gocäimpa, angacäimpa.

Itota mönö ömæmonguimämo mönö mü quēwenguimämo ante nē pönongä ingampa

¹⁷ Ayæ Itota ponte ēñēñongä, Datado baö tömənäni näni wodintatodē meönaa go meönaa do daga wənänitapa, ante apænecäni ēñengacäimpa. ¹⁸ Betänia inñömö näni taadö godö Eedotadē näni quēwēñömö godö eyequei inönimpa. Mänü taadö wodo tedete quidömetodo ganca inönimpa. ¹⁹ Oodeoidi nangui inäni inñömö

Mäadota tönö Mäadiya weca pöninque, Minatö töninacä wängä ate wæwēmina incæte piyænē cæte quēwencæminäimpa, ante waadete apænecæte ante pönänitapa. ²⁰ Itota oo pöni pongampa, ante äñäni ēñēninque Mäadota tömengä ingante bee tencæte ante gocantapa. Mäadiya guiquēñē oncönē ee ongongantapa. ²¹ Mäadota Itota weca pöninque tömengä ingante,

—Awënë Itota, bitö monitö weca ongömi bai botö töninacä wii wæncædongäimpa.

²² Tömengä æmæwo wängä incæte bitö ñowo Wængongui ingante quiemē ante apænebi tömengä pönö cæcä ænguimi imipa, ante botö ēñēmopa, ante apænecantapa.

²³ Angä ēñēninque Itota tömengä ingante,

—Bitö töninacä wodi ñäni ömæmonguingä.

²⁴ Ante apænecä ēñēninque Mäadota wæætē,

—Ao, inguipoga inque bayedē mönö ñäni ömæmönēdē tömengä do wängaingä incæte ñäni ömæmoncæcäimpa, ante botö do ēñēmopa, angantapa.

²⁵ Itota tömengä ingante äñinque,

—Botö nē ñäni ömæmonguimo inömo inte cæbo beyænque minitö ñäni ömæmoncæminimpa. Mini wantæpiyæ quēwenguinque ante nē Quēwēmo inömo imipa. Botö imote nē wede pönengä inñömö do wängä incæte ayæ ate wantæpiyæ quēwencæcäimpa. ²⁶ Ayæ nē mü quēwängä inte botö imote wede pönengä inñömö tömengä cöwē wänämaï quēwencæcäimpa. Bitö mäninö ante pönemitawo.

²⁷ Angä ēñēninque Mäadota tömengä ingante,

—Awënë Itota Ao ämopa, ante apænecantapa. Bitö monitö Codito inömi imipa, ante pönēmopa. Wængongui Wēmi inömi inte bitö inñömö edæ, Inguipoga nē Ponguingä, ante näni angäimi imipa, ante pönēmopa, ante apænecantapa.

Itota Datado wodintatodē gote wæcä

²⁸ Mänömaï ante apænecäninque Mäadota ocæ emænte gote Mäadiya ingante aa pecä pongä ate Mäadota tömengä ingante awēmö äñinque,

—Mönö nē Odömongä do pöninque bitö imite aa pecampa.

²⁹ Angä ēñēninque Mäadiya quingæ ængæ gantite tömengä weca gocantapa.

³⁰ Itota Betänia inñömö ayæ guidämaï inongäimpa. Mäadota tömengä ingante nänö bee teninñömö tömengä adoyömö ayæ a ongönongäimpa. ³¹ Oodeoidi Mäadiya tönö oncönē godongämæ ongöninque, Tömengä piyænē cæcæcäimpa, ante tæcæ waadete apæneyönäni tömengä quingæ ængæ gantidinqe toacä adinque tömənäni, Tömengä Datado wodi nänö wodintatodē

wæcæte ante gocampa, ante pönente tömengä ingante tee empote godänitapa.

³² Itota nänö ongöñömö pöningue Mäadiya tömengä ingante adinque tömengä önöwa ædæ wæænte apænedinque,

—Awënë Itota, bitö mönitö weca ongömi bai botö töniñacä wii wæncædongäimpa, ante wæcantapa.

³³ Mäadiya mänömaï wæyongä oodeoidi tömengä tönö godongämæ në pöninani adobai wädäni adinque Itota wæwente entawëninque wæcantapa. ³⁴ Ayæ,

—Datado wodi baö æyömönö da wëminitawo,

Angä ëñëninque tömëñäni,

—Awënë Itota, pö æe.

³⁵ Ante äñönäni Itota Ca wæcantapa. ³⁶ Tömengä mänömaï wæcä adinque oodeoidi,

—Aedäni, tömengä Datado wodi ingante nö waadete pönengä ingantapa.

³⁷ Ante tedeyönäni pancadäniya,

—Tömengä iñæmpa në babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömçëmömämo

³⁸ Itota wæætë wæwente entawëninque Datado wodintatodë pongacäimpa. Tömengä wodido ontatodë i iñonte dicabo ñæñængade da pæñæ pönö tee mönodäni. ³⁹ Adinque Itota,

—Dicabo da tæ ñæedäni, äñongä Datado wodi töniñacä Mäadota wæætë,

—Awënë Itota, ëñëmi. Mëönaa go mëönaa tömengä wodido öñöninque tömengä wodi do öö wadingä ingampa.

⁴⁰ Ante wææ angä ëñëninque Itota,

—Bitö wede pönëmi iñinque edæ Wængongui æbänö ñäö apäite ëmönongä inte cæcä, ante bitö acæbiimpa, ante bitö imite wii antawo, angacäimpa.

⁴¹ Iñinque tömëñäni dicabo tæ ñæñänitapa. Ayæ Itota æmö adinque,

—Mæmpo botö apænedinö ante do ëñëmitapa, ante adinque botö bitö imite waa ate pönëninque apænebopa.

⁴² Botö apænedö ante æyedëmö apænebo ince bitö cöwë ëñëmipa, ante botö do ëñëmopa. Wæætë edæ woadäni botö weca godongämæ gongæñäni beyæ ante botö mäninö ante apænetabopa. Bitö botö imote da pönömi pontabopa, ante tömëñäni pönencædänimpa, ante apænetabopa.

⁴³ Mänömaïnö ante Wængongui ingante apænedinque Itota,

—Datado ta pöe, ante yedæ aa pecantapa.

⁴⁴ Në wæningä iñömö edæ do ta pongantapa. Tömengä önonpo weocoo inte nani wini wini cædincoo ayæ empodinque önöwa nani wini wini cædincoo ayæ

ëwadinque tömengä awinca weocoo nani ñäne cæmönincoo ayæ ëmongä inte ta pongä adinque Itota tömëñäni inänite,

—Mänincoo ñi cæmini gocæe, angacäimpa.

Itota ingante bæi ongonte ængëimpa, ante tedewëñäni

(Mäteo 26.1-5; Mäadoco 14.1-2; Odoco 22.1-2)

⁴⁵ Mänömaï beyæ oodeoidi nanguï inäni Mäadiya weca ëñæcæ në pöninani inte iñäni iñömö Itota mänömaï cæcä adinque tömengä ingante wede pönëñäni bagadänimpa.

⁴⁶ Pancadäniya guiquënë Paditeoidi weca godinque, Itota quinö cæcä, ante adodö angadänimpa. ⁴⁷ Iñinque Wængongui qui,

ante në godönäni ñæñänäni tönö Paditeoidi iñömö wæætë tömëñäni ömæ nani Apænte Äincabo tömänäni inänite, Möñö godongämæ apænecæimpa, ante adoyömö pöedäni, ante äñönäni pönäni adinque tömëñäni,

—Iñgä iñömö, Acædänimpa, ante nanguï bamönengæ cæcä ingä. Möñö quinö cæquimö.

⁴⁸ Ante wædinque möñö tömengä ingante, Bitö mänömaï godömenque cædämaï incebiimpa, ante wii wææ ämö iñinque woadäni tömänäni tömengä ingante pönëmainänipa. Tömengä ingante pönëñäni iñinque, Itota oodeoidi Awënë bacæte ante cæcampa, ante pönente wædinque odömänoidi ince edæ wææ cæbainänipa. Iñinque tömëñäni pöninque möñö tæiyæ waëmö oncö wo ëwëmainänipa. Ayæ möñö ömæ iñömö möñö quëwencabo ince nämä në ämö iñömö tömëñäni pö ö ænte bai cædinque tömëñänique në äñäni babañänipa, äñänitapa.

⁴⁹ Tömëñäni weca adocanque Caiapato mänii wadepo, Wængongui qui, ante në godongä ñæñængä pönii inongä inte tömengä iñömö,

—Minitö tömänö ante ëñëñämaï iminipa töö, apænecantapa. ⁵⁰ Möñö ömæ quëwencabo wii tömämö wængæimpa, ante wæætë tömëmö beyæ ante adocanque onguñængä wængä iñinque godömenque waa imaimpa, ante minitö ëñëñämaï imini inte tedewëmini awädö.

⁵¹ Mänömaïnö ante apænedinque Caiapato mä nänö pönënonque ante wii angacäimpa. Wæætë tömengä mänii wadepo iñonte, Wængongui qui, ante në godongä ñæñængä pönii inongä inte Wængongui beyæ apænedinque, Itota iñömö oodeoidi beyæ ante wæncæcäimpa, ante apænegacäimpa.

⁵² Ayæ wii Oodeabæ quëwëñänique beyæ ante wænguingä. Wæætë, Wængongui wëñäni wayömö wayömö pangote godinani inte adodänique badinque adoyömö godongämæ poncædänimpa, ante tömengä wæncæcäimpa. ⁵³ Caiapato mäninö ante nänö äniönæ iñonte täno godongämæ

pönëninque oodeoidi ömæ nãni Apænte Æincabo iñömö, Æebãno cæte Itota ingante wæñömö wænguingää, ante cöwë tedewëñönanimpa.

⁵⁴ Mänömaï beyæ Itota ayæ oodeoidi weca wii edonque gocá ñongáimpa. Wæætë wadæ godinque tömengä önomæca eyequei Epadaimë nãni ãñömö godinque maninñömö tömengä ëmiñænãni tönö ongönongáimpa.

⁵⁵ Wodo pænta gogaionæ, ante Patowa nãni cæönæ oo pöni ñonimpa. Mänifedë Oodeabæ wayömo wayömo quëwëñãni nangui ñãni Eedotadëë quëwëñömö pö æidinque tömënãni Patowa nãni ææmæ ayæ cædãmaï iñedë dodãni angai bai cædinque, Mönö wënæ wënæ cægainö ante mönö mënongate bai waëmö bacæimpa, ante namä incæ äacæte ante cædinque æi gogadänimpa. ⁵⁶ Adodãni Wængongui oncö ñænæncönë yabæcönë pö guidingue adiyæ gongæninque, Itota æyömönö ingää, ante pönente gomö adinque nämæneque godongämæ apænedinque,

—Mäningä iñömö ææmæ beyæ ante edæ pönãmaï ingantawo. Æebãno ante pönëmïni, ante apænedönänimpa.

⁵⁷ Wængongui qui, ante godönãni ñænænãni tönö Paditeoidi wæætë waodãni ñãnite wææ änonänimpa. Æecãno Itota nãno a ongönömö ante në ëñengä iñömö tömengä mönitö imönite angä ëñëninque mönitö wæætë Itota ingante yao ongonte æmaïmönipa, ante do wææ änonänimpa.

12

Awënë Itota önöwa ogui wapæ gao cæwacampa

(Máateo 26.6-13; Mäadoco 14.3-9)

¹ Önompo æmæmpoque go adoönæque ate Patowa nãni ämæ hacæ cæyedë Itota Betãnia iñömö pongantapa. Itota do angä ate në ñãni ömæmönningä Datado iñömö tömengä adoyömo Betãnia quëwëñongáimpa.

² Itota pongä adinque waodãni maninñömö quëwëñãni, Itota ingante waa amönipa, ante tömengä beyæ ææmæ cægadänimpa. Wadãni tönö Datado adobaï Itota tönö godongämæ tæ contate cæñönãnite Mäadota iñömö tömënãni ñãnite cængui godongä cæñänitapa. ³ Ayæ Mäadiya iñömö mëedio ditodo ganca nãni ogui wapæ öni pæquimæ ñaadodopæ nãno nangui godonte ænimæ incæ ænte mämö Itota önöwa gao cæwadinque tömengä ocagui inte amimö cæcä ñinque oncönë tömancönë ogui waacönë ingatimpa. ⁴ Itota miñæ në gocá adocanque Codaa Icadote nãni änongä iñömö edæ, Itota ingante æncædänimpa, ante odömönte në godonguingä inte ñöwo wææ apæñecantapa.

⁵ —Iimæ nãno ogui wapæ quinante ömæpodãni beyæ ante godonte æñãmaï ingantawo. Iñæmpa waocá adoque wadepo cæte beyæ paga æninque todetiento deëñadiota nãno æñimpota beyæ manimæ godonte ænimæ ñæmpa, ante wæcantapa.

⁶ Tömengä dicæ ömæpodãni beyæ ante pönëninque manömainö ante apæñecantawogaa. Wæætë tömengä në awëmö ænongä inte maninö ante apæñecantapa. Tömënãni da wente æintaa næænongä inte tömengä iñömö, Tömënãni da wëninta incæ pancataa botö qui bacæimpa, ante awëmö ænongä inte manömaï apæñecantapa. ⁷ Itota wæætë tömengä ingante,

—Onquiyængä ingante piinte änewëñãmaï incæbiimpa. Manimæ botö daga wenguiönæ ante manguëñengä inte tömengä botö baö nãni daga wenguinque ante eyepæ iñonte öni paacantapa. ⁸ Ömæpodãni cöwë mïnitö weca quëwëñãni ñãnipa. Botö guiquënë wii cöwë mïnitö weca quëwëmo ñmopa, ante apæñegacäimpa.

Datado ingante wæñongæimpa, ante tedewëñãni

⁹ Itota Betãnia ponte ongongampa, ante apænedãni ëñëninque oodeoidi nangui ñãni tömengä weca pönãni incæte wii tömengä beyænque pönänitapa. Wæætë adobaï Datado ingante angä në ñãni ömæmönningä ingante acæte ante pongadänimpa. ¹⁰ Mänömaï beyæ Wængongui qui, ante në godönãni ñænænãni iñömö, Æebãno cæte Datado ingante adobaï wænömö wænguingää, ante godongämæ tedewëñãnitapa. ¹¹ Iñæmpa oodeoidi nangui ñãni, Datado beyæ mönitö imönite ëmö cæte Itota ingante pönëninque tömengä gämænö godänipa, ante wægadänimpa.

Itota Eedotadëë iñömö pongä

(Mäateo 21.1-11; Mäadoco 11.1-11; Odoca 19.28-40)

¹² Iimö ate, Eedotadëë iñömö poncæte ante Itota idömæ pongampa, ante apænedãni ëñëninque ææmæ beyæ ante tæiyænãni pöninãni iñömö, ¹³ yædëmæmäa wangö tate mão bee tæte taodique yedæ aa pedinque,

—Möni quëwenguinque ante, Badogaa, ante tomönipa. Bitö Awënë Wængongui ëmöwo beyænque pömi ñinque bitö toquinque edæ Wængongui bitö imite waa cæcæcäimpa. Bitö idægoidi Awënë ñömi inte bitö toquinque ingæimpa.

¹⁴ Ante yedæ äñönãni Itota iñömö bodo wengä ate æninque tömengä æi contate pongantapa. Wëñëñedë Wængongui beyæ iimäi ante nãni yewæmonte angainö bai ñinque cædinque pongantapa.

15 “Tiöno iñömö quëwëmini iñömö edæ guññënamai ledäni.

Minitö Awënë Odeye ñowo munitö weca pongä aedäni. Edæ bodo wengäa æi contate pongampa,”

ante yewæmongadänimpa. 16 Tömënnäni dodäni näni angai bai cædinque Itota ingante bee tencæ taodäni adinque Itota nänö në ëmiññënnäni iñömö, Æbänö cædäni, ante mänññedë ëññënamai inte wædönänimpa. Wæætë edæ Itota Wængongui ñäö ëmönömö ocæ ëmænte gocä adinque tömengä ëmiññënnäni mänññedë ate edæ, Itota ingante waodäni ñowo näni cædönö ante dodäni wëññëñedë yewæmongadänimpa, ante pönente wædönänimpa.

17 Datado wodi ontatodë ongönongante Itota, Ta pöe, ante äa pecä ëññëninque në wæningä incæ ñäni ömæmöninque ta pongä adinque Itota weca godongämæ ongönänäni nangui inäni iñömö, Itota mänömai cæcä atamönipa, ante gode ä gode ä cædönänimpa.

18 Ìninque edæ, Itota mänömai hamönengæ cæcampa, ante apænedäni ëñente beyænque waodäni tæiyænnäni Itota weca bee tencæ pönänitapa. 19 Mänömai beyæ Paditeoidi iñömö nämanque godongämæ tedewënnitapa.

—Waodäni tömänäni æbänö tömengä miñæ tee empo godäni ante aedäni. Mänii beyæ ante, Mönö cædinö wii eyepæ impa, ante adinque, Mönö æbänö cæte godömenque cæquimöö, ante wægadänimpa.

Guidiegoidi pancadäniya Itota ingante diqui minäni

20 Eedotadëe iñömö tömënnäni ææmæ cæyedë Wængongui ingante waa ate apænecæte ante në pönäni pancadäniya iñömö guidiegoidi inönänimpa. 21 Mäninäni iñömö Pedipe weca pöninque edæ,

—Awënë, ëñëmi. Mönitö Itota ingante ainëmönipa, ante ännänitapa. Mäningä Pedipe iñömö Betaida quëwëññömö Gadideabæ quëwente pongä ñongäimpa.

22 Tömengä iñömö Æntade weca gote tömengä ingante guidiegoidi näni äninö ante apænecä ate tömëna wæætë Itota weca guëa godinque tömengä ingante äñöna, 23 Itota wæætë,

—Wængongui nänö cæönæ do ba ñinque tömengä pönö cæcä beyænque botö Waobo ëñagaïmo iñömö ñäö apäite ëmoncæboimpä. 24 Minitö ñinñite näwangä ämopa. Tömëmö onguipo quiyadimö incæ yabæque ñömädämaï i bai ædö cæte tä bocate pædinque tömëmö nangui pönii ñonguü. Wæætë tömëmö yabæque ñömäate ate tä bocate pædinque nangui pönii ñompa. Botö adobaï wænguëñëmö ñompa. Botö wii wæmo bai ædö cæte waodäni tæiyænnäni botö quinnäni baquinnäni. 25 Në, Nämanque

pönente quëwëmote, ante pönengä iñömö edæ tömengä nänö quëwenguimämo incæ wo ëwente bacæcäimpä. Inguipoga quëwëññedë në, Wii nämanque pönente quëwëmote, ante pönengä quiquëñë tömengä nänö wantæpiyæ quëwenguinö ante do ëadingä inte tömengä nänö wænñämai quëwenguinque gocæcäimpä. 26 Æcänö botö ñmote në cæda ina tömengä iñömö edæ botö ñmote tee empo goquëñengä ingampa. Ayæ æyömönö botö quëwëmo botö ñmote në cædongä adoyömö quëwencæcäimpä. Botö Mæmpo iñömö botö ñmote në cædongä ingante waa acæcäimpä, ante Itota apænegacäimpä.

Itota, Botö wæncæboimpä, ante apænecä

27 Ayæ godömenque apænedinque Itota iimäi apænecantapa. “Botö guññëmämo entawëninque wæbo inte quinnö anguimoo. ‘Botö Mæmpo ëñëmi, äninque, Botö nantate wæwenguionæ oo pönii ba incæte bitö pönö ö æmi ate wæwënnämai bacæboimpä,’ ante botö wii mänömainö ante ancæboimpä. Edæ botö wæwenguinö beyæ ante pontabopa. 28 Mæmpo, Bitö æbänö ñäö apäite ëmömii ñmii, ante odömömi acædänimpa,” angantapa.

Äñongä öönædë ñnö tedepämo apænedinque, “Botö æbänö ñäö apäite ëmömö ñompa, ante do odömöntabopa. Ayæ wæætë adodö cæcæboimpä,” ante apænecä ëññënnitapa.

29 Mänññömö godongämæ ongönäni nangui inäni iñömö mänimämo ëññëninque edæ, Detæbo tæi tömämö bai impa, ante wædänitapa. Wadäni quiquëñë,

—Anquedo iñömö tömengä ingante apænecantapa, ante ännänitapa.

30 Itota iñömö wæætë,

—Mänimämo wii botö beyæ ante apænecampa. Wæætë munitö beyæ ante apænecampa. 31 Nöwoyedë Wængongui inguipoga quëwënnäni inänite apænte nänö panguinö iñömö edæ oo baquinnö anguëñë. Inguipogaque quëwënnäni awënë ñongante wënæ ingante Wængongui ñöwoyedë, Gobäwe, angä gocæcäimpä. 32 Botö ñmote awäa timpodique ængæ gantidënnäni wægömo ate botö waodäni tömänäni inänite, Minitö botö weca poncæminimpa, ante aa pecæboimpä, ante Itota apænecantapa.

33 Mänömainö ante apænedinque tömengä, Æbänö wænguimoo, ante ëññëcædänimpa, ante apænecantapa. 34 Æññëninque mänññömö ongönäni nangui inäni,

—Mönitö iñæmpä, Mönö Codito cöwë ee ongoncæcäimpä, ante dodäni näni wææ angainö ante yewæmonte ongampa, ante ëññtamönipa. Incæte bitö iñömö nämanque äninque, Botö Waobo ëñagaïmo iñömote botö ñmote awäa timpodique gö cædäni wængonguimo ñompa, ante ædö cæte ämii.

Äninqe, Ìngä Waocä nê ëñagaingä ìñæmpa ee ongönämaï wænte goquingäa.

³⁵ Ante wæyönäni Itota tömënäni inänite, –Botö, Waodäni mímönê ñäo bai entawëninque quëwencädänimpa, ante pontabopa. Wædænque ayæ ìñö botö mînitö weca quëwëninque mînitö ìmînite odömonte apænëbopa. Mönitö taadö wëmö badämaï ingæïmpa, ante mînitö taadö ayæ ñäo ìñedê goedäni. Edæ wëmö ìñömö nê gocä ìñömö tömengä edæ, Ædönö goboo, ante ëñënämaï ingampa. ³⁶ Botö ñäo bai ëmönömo ìmpa. Ñäo ìñömö nê cægömöni incæmönimpa, ante bacæte ante cædinque mînitö ìñömö botö mînitö weca ayæ ongönömote botö ìmote pönëdäni ämpa, angantapa.

Tömengä ìnque apænëte ate wadæ godinque wê womonte ongongacäïmpa.

Oodeoidi Itota ingante ìmaï cæte pönënämaï inänpa

³⁷ Itota oodeoidi weca nangui bamönengæ cæte odömongä incæte tömënäni ayæ tömengä ingante pönënämaï inänitapa.

³⁸ Wængongui beyæ nê apænecä Itaiya wodi ìmaï ante do nänö angainö bai ìnque baquinque tömënäni mänömaï cædönänimpa.

“Awënë Wængongui ëñëmi. Mönitö apænëmöni tömënäni nani ëñënö ante edæ æcänö ëñente pönengäa. Ìñæmpa nê pönengä ìñömö edæ dæ angä awædö.

Ayæ Awënë Wængongui nänö tæï piñænte cægainö ante æcänö ada ìñömö edæ dæ angampa.”

³⁹ Ìnque tömënäni ædö cæte pönenguänäni, ante Itaiya wodi edæ wayömö yewæmöninque, Wængongui ìmaïno ante cæcä beyæ pönënäni inänpa, ante yewæmongacäïmpa.

⁴⁰ “Tömënäni botö gämæñö ocæ ëmænte pönäni bai botö wæætê, Waa bacæmînimpa, ante godö cæcædömoimpa.

Incæte mänömaï cædämaï incæboimpa, ante Wængongui ìmaï cægacäïmpa.

Tömengä godö cæcä beyænque waodäni babetamönäni bai adämaï bagadänimpa. Adobaï mímönê nani pönënö ömædê badinque ëñënämaï bagadänimpa.

Edæ, Tömënäni nani adinö ante ëñënämaï incädänimpa, ante cædinque

ayæ edæ, Tömënäni nani ëñënö ante ëñënämaï incädänimpa,” ante wææ cægacäïmpa.

ante Itaiya wodi yewæmongacäïmpa.

⁴¹ Itaiya wodi Itota nänö ñäo ëmömämo æbänö ingui, ante do ate bai ingaingä inte edæ Itota ingantedö ante mäninö ante doyedê angacäïmpa.

⁴² Nöwo guiquënë oodeoidi awënëidi tæiyænäni Itota ingante pönënänimpa.

Incæte Paditeoidi beyæ guññënanî inte, Mönö odömöincönê go guiyömönite tömënäni mönitö ìmönite wîi tatodoncädänimpa, ante wææ cædinque tömënäni nê pönënäni incæ waodäni ëñëñönäni pæ wëñete tededämaï inänpa. ⁴³ Edæ mäninäni, Waodäni mönitö ìmönite waa ate apænecädänimpa, ante nangui äinente wædäni inönänimpa. Adodäni, Wængongui mönitö ìmönite waa ate apænecæcäimpa, ante pönömenque äinente wædäni inönänimpa.

Itota nänö äno beyænque waodäni apænte wæcædänimpa

⁴⁴ Itota yedæ äninque aa pecantapa. “Botö ìmote nê pönengä ìñömö wîi botö adoboque ìmote pönënongå ingampa. Wæætê edæ botö ìmote nê da pönongaingä ingante tömengä adobaï pönengä ìnongäimpa. ⁴⁵ Adocä botö ìmote nê acä ìñömö tömengä botö ìmote nê da pönongaingä ingante adobaï acä ingampa. ⁴⁶ Botö ìmote nê wede pönënäni ìñönäni adocanque incæ wëmö ìñömö wîi godömenque ee ongoncæcäimpa, ante cædinque botö ìñömö inguipoga quëwënäni weca ñäo bai inömo inte pontabopa.”

⁴⁷ “Waacä botö äno ëñëninque wîi ëñente cæcä ingä incæte botö tömengä ingante apænte änämaï ìmpa. Edæ botö wîi inguipoga quëwënäni inänite apænecæte ante pontabopa. Wæætê inguipoga quëwënäni inänite æmo beyænque quëwencæmînimpa, ante pontabopa cæmîni. ⁴⁸ Botö ìmote nê Baa angä ìñömö tömengä botö änonö ante, Dicæ pönëmogaa, angä ìñongante tömengä ingante nê apænte äno incæ edæ mæ ongompa. Inguipoga ìnque baquionæ ìñonte botö äniñö incæ nê apænte anguingä bai ba ìnque mäningä ingante, Bitö pante wæquinque Baa angabiimpa, ante bai apænëte ingæïmpa. ⁴⁹ Edæ botö wîi namanque pönëninque apænëtabopa. Wæætê, Botö quîno apænëquimoo, ante, Æbänö ante apænëquimoo, ante botö Mæmpo botö ìmote nê da pönongaingä ìñömö tömengä botö ìmote wææ angä ëñëninque apænëtabopa. ⁵⁰ Tömengä nänö wææ angainö ëñente cæbo beyænque mînitö wantæpiyæ cöwê quëwencæmînimpa, ante do ëñëmopa. Ìnque botö Mæmpo botö ìmote nänö angainö ante botö adodö ante apænëbopa,” ante Itota mäniñedê ìnque apænënegacäïmpa.

13

Itota incæ tömengä ëmiñcänäni önöwa mëñöwacä

¹ Patowa nani ämæ wantæyö bacæïmpa, ante nani cæyedê Itota ìñömö, Botö inguipoga quëwente ëmö cæte botö Mæmpo weca ocæ ëmænte æi goquionæ do

bacæimpa, ante do eññongäimpa. Itota ingante pönëñani nê inguipoga quëwëñani iññonäñite tömengä tömëñani inäñite waadete pönëñinque ñöwoyedë, Botö æbänö nangui waadete pönëmo imoo, ante odömongäimpa.

² Gäwadeçæ bayö Itota tömengä ëmiñænäni töñö godongämæ cæññonäni wënæ awënë cæcä beyænque Timönö wengä Codaa Icadote iñömö, Itota ingante odömonte godoncaëboimpa, ante pönengä ñongäimpa.

³ Itota iñömö, Quincoomë ongoncoo incæ Wængongui pönö cæcä beyænque botö tömancoo awënë badinque nämä tæi piñænte nê ämo imopa, ante eññongäimpa. Ayæ edæ Wængongui weca quëwente wææ pönimo inte botö Wængongui weca ocæ ëmænte goquimo imopa, ante do eññongäimpa. ⁴ Mäninö ante eññongä incæ tömengä iñque cænte ate ængæ gantidique yabæcoo gä tadongadinque wadæ caaincoo æninque önoncädëyæ inö goti padengantapa. ⁵ Ayæ ate æpæ mënongaquintadë pe ñiñæninque tömengä ëmiñænäni tömänni öñöwa mënöwadinque wadæ caaincoo goti padëincoo inte wadæ cæwacæ tæcæ cætantapa.

⁶ Mänömai cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awënë ñi incæte botö öñöwa mënöwacæ pömitawo.

⁷ Ante äñongä Itota wæætë,

—Ñöwoque botö æbänö cæboo, ante eññëñamai imipa. Incæte ayæ ate eññencæbiimpa.

⁸ Angä eññëñinque Pegodo,

—Botö öñöwa cöwë mënöwadämai incæbiimpa, ante Baa ämopa cæbii.

Ante äñongä Itota godömenque,

—Botö bitö öñöwa mënöwadämai imo bai bitö wii botö quimi imaimipa, ante angantapa.

⁹ Mäninö angä eññëñinque Timönö Pegodo wæætë,

—Awënë, Mänömai i iñinque bitö wii botö öñöwacæ mënöwaquimi. Wæætë botö öñompo adobai mënompodique botö ocabo mënöncae.

¹⁰ Ante äñongä Itota wæætë,

—Æpæ nê äadingä iñömö tömengä baö ëñayö tömäñö waëmö impa. Iñinque tömengä öñöwacæ nämanque mënöwacä inte eyepæ impa. Minitö do mimö mënongate waëmö entawëñömini iminipa. Incæte wii tömämini waëmö entawëmini iminipa, angantapa.

¹¹ Edæ, Æcänö botö imote nê odömonte godonguingä ingäa, ante tömengä do eññongäimpa. Mänömai beyæ tömengä, “Minitö wii tömämini do mënongate waëmö entawëñömini iminipa,” angantapa.

¹² Ayæ tömëñani öñöwa iñque mënöwadinque tömengä yabæcoo wëñadinque tömengä adodö gote tæ contadinque tömëñani inäñite,

—Botö mänömai cædinque minitö beyæ ante quinö cæboo, ante eññëñitawo, ante äninque Itota godömenque, ¹³ Minitö botö imote, Nê Odömömi imipa, äninque ayæ adobai, Awënë imipa, ämini iminipa. Edæ botö minitö Awënë inömo iñinque minitö mänömainö ante näwangä ante äminipa.

¹⁴ Botö iñömö minitö Awënë inömo inte nê minitö iminite Odömömo imo incæ minitö öñöwa do mënöwabo aminipa. Iñinque botö mänömai mënöwabo bai minitö adobai wacä öñöwa wacä öñöwa mënöwacëñëmini iminipa. ¹⁵ Botö cæbo bai minitö adobai cæcæminimpa, ante cædinque botö minitö beyæ ante cæbo aedäni. ¹⁶ Minitö iminite näwangä ämopa. Awënë ñænængä inongä iñongante tömengä ingante nê cæcä iñömö wii godömenque ñænængä ingampa. Awënë nê da godongä ñænængä iñongä tömengä nänö nê da godöningä wæætë wii godömenque ñænængä ingampa. ¹⁷ Minitö ñöwo mäninö ante eññëñini inte edæ ado ante cæmini iñinque mini toquinque bacæimpa, ante Itota apænecantapa.

¹⁸ Ayæ apænëdinque, “Botö wii tömämini beyæ antabopa. Botö apænte æñinäni ædänidö inäñi, ante botö nê eññëmo imopa. Wængongui angä eññente näni yewæmongainö bai iñque bacæimpa, ante iñmai bacæ cæpa. ‘Botö töñö godongämæ nê cængongä iñömö botö imote nê piñte cæcä bacantapa.’ ¹⁹ Mänömai ba adinque edæ minitö botö imotedö ante apænëdinque, Tömengä möñö Codito inongä ingampa, ante pönencæminimpa, ante cædinque botö ñöwo ayæ badämai iñedë minitö iminite ämopa. ²⁰ Minitö iminite näwangä ämopa. Æcämenque botö nê da godongaingä ingante æña tömengä iñömö edæ botö imote adobai ængä ingampa. Ayæ æcämenque botö imote æña tömengä iñömö botö imote nê da pönongaingä ingante ængä ingampa cæminii,” ante Itota apænecäimpa.

Itota ingante Codaa nê godonguingä ingampa, ante

(Mäteo 26.20-25; Mäadoco 14.17-21; Odoca 22.21-23)

²¹ Mäninö angä ate Itota iñömö tömengä nänö wæwëmämo entawëñinque wæcä inte, Näwangä ante apænëbo eññëdäni. Mini cabo incæ adocanque, Æncädäñinpa, ante botö imote odömonte pædæ godonguingä ingampa.

²² Ante apænecä wædinque tömengä ëmiñænäni, Æcänö ingante apænecäa, ante eññëñamai inte godongämæ wacä ingä wacä ingä adäñitapa. ²³ Itota

ëmiñænäni adocanque iñömö Itota nänö në waadete pönengaingä inongäimpa. Tömengä iñömö Itota tönö ääñömonque tæ contate ongönaimpa. ²⁴ Timönö Pegodo iñömö iingä ingante ömö ömö cædinque angampa. Bitö Itota ingante, Æcänö ingää, ante ämi angä ëñente ate apænebi ëñëmönie. ²⁵ Angä ëñëninge mäningä Itota tönö ääñömonque në tæ contacä iñömö,

—Awënë, æcänö ingää, ante apænebi ëñëmönie, ante tömengä ingante äñongä.

²⁶ Itota wæætë,

—Botö iï päö owætaca müi cæte godömo në æuingä iñömö tömengä në cæquiringä ingampa.

Ayæ päö owætaca müi cædinque Timönö wë Codaa Icadote ingante godongantapa. ²⁷ Codaa päö ængä ate Tatäna iñömö tömengä do guigacäimpa. Ìninqe tömengä ingante,

—Bitö quinä cæcæ cæbii edæ quingæ cæe, ante Itota angantapa.

²⁸ Wadäni adoyömö në cænäni iñömö, Itota quinänte mäninö ante tömengä ingante angää, ante ëñënamäi inönänimpa. ²⁹ Edæ Codaa tömënanäni da wente æinta nææñongä ingä beyæ tömënanäni pancadäniya, Ææmæ beyæ ante mönö cængü wii eyepæ ëamöni ininqe, Bitö godonte æncæbiimpa, ante Itota angampa, ante pönëñönänimpa. Adobaï ömæpodäni inänite, Godömi ængüñänimpa, ante Itota angampa, ante pönëñönänimpa.

³⁰ Codaa päö ænte ate tao gogacäimpa. Do woyowotæ inönimpa.

Itota nänö wææ änönö ante ñöwo angampa

³¹ Codaa dæ gocä adinqe Itota,

—Botö Waobo ëñagaïmo inte æbänö ñäö apäite ëmönömo imoo, ante ñöwo edonque bacæimpa. Botö cæquïnö beyæ Wængongüi æbänö ñäö apäite ëmongä ingää, ante edonque bacæimpa. ³² Ayæ botö cæquïnö beyæ Wængongüi ñäö apäite nänö ëmönö edonque ba ininqe Wængongüi cæcä ate botö ñäö apäite botö ëmönö adobaï edonque bacæimpa. Ayæ mänömaï Wængongüi wantæyö cæcæcäimpa. ³³ Botö wëmini botö mïnitö weca wantæyö quëwëninge gobopa. Mïnitö botö imote ante diqui diqui mingüimini iminipa. Ayæ oodeoidi inänite botö angäinö bai ñöwo mïnitö iminite adodö ämopa. Botö goquïñömö ante mïnitö ædö cæte pongüimini iminii. ³⁴ Botö wææ änönö ante ñöwo mïnitö iminite ämopa. Wacä ingä wacä ingä waadete pönencæminimpa. Botö mïnitö iminite waadete pönëñönö bai mïnitö adobaï wacä ingä wacä ingä waadete pönenguëñëmïni iminipa. ³⁵ Mïnitö wacä ingä wacä ingä waadete pönëmïni adinqe wadäni tömënanäni, Mïnitö Itota nänö në

ëmiñæmïni iminipa, ante ëñencædänimpa, ante Itota apænegacäimpa.

Pegoda incae, Dicæ abogaa, anguingä ingampa, ante

(Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante äñongä Itota wæætë,

—Botö goquïñömö ante bitö ædö cæte botö imote ñöwo tee empo pongüimi imii. Ayæ ate guiquënë bitö botö imote tee empo pongüimi incæbiimpa, angantapa.

³⁷ Pegodo godömenque,

—Awënë, äninque, Botö quinänte bitö imite ñöwo tee empo godämaï imoo, ante wæcampa. Botö Ao äninque bitö beyæ ante nämä wængüimo imopa.

³⁸ Ante äñongä Itota wæætë,

—Bitö Ao äninque botö beyæ ante näwangä wængüimi imiyaa. Bitö imite näwangä ante apænebo ëñëe. Tawadiya pedämaï iñonte bitö iñömö botö imotedö, Dicæ abogaa, ante mempogo go adopoque angüimi imipa, ante apænegacäimpa.

14

Mæmpo weca mönö godö ante Itota taadö bai ingampa

¹ Itota tömengä ëmiñænäni inänite, “Mimönë guïñente wædämaï ledäni. Wæætë Wængongüi ingante wede pönëdäni, angantapa. Ayæ adobaï botö imote wede pönëdäni. ² Botö Mæmpo nänö quëwëñömö onconcoo haco pöni mæ ongompa. Mänömaï impa, ante wii näwangä i bai botö mïnitö iminite ancædömoimpa. Mïnitö beyæ ante botö, Mïni ponte quëwengüi onconcoo ante tömää ædæmö badoncæte ante mäniñömö gocæboimpa. ³ Ayæ mïnitö quëwengüi onconcoo tömää ædæmö mænoncæte ante gobo ininqe botö ocæ ëmænte poncæboimpa. Pöninqe mïnitö botö quëwëñömö adoyömö botö tönö godongämæ quëwencæminimpa, ante botö mïnitö iminite ænte mæibo æicæminimpa. ⁴ Botö goquïñömö æyömönö i, ante ayæ mäniñömö gocæte ante taadö godö ante mïnitö do ëñëminipa,” ante Itota apænecantapa.

⁵ Apæncä ëñëninge Tömato iñömö tömengä ingante,

—Awënë, Ædömë goquimii, ante mönitö ëñënamäi imöni inte mönitö mäninö bitö goquïnö ædönö i, ante taadö ædö cæte ëñenguimöni.

⁶ Äñongä Itota wæætë,

—Botö iñömö tömëmo në taadömo bai inömo imopa. Ayæ botö adobo në näwangä änö bai inömo bai iñömote mïnitö æbänö näwangä impa, ante ëñenguimini iminipa.

Botö edæ nê Quëwëmo inte pönö cæbo beyænque minitö quëwenguimîni imînipa. Botö wîi pönö cæbo bai waocä æcämenque incæ botö Mæmpocä weca godämaî incædongäimpa.⁷ Botö imote do ate pönëmîni inique minitö botö Mæmpo ingante adobai ate pönëmîni imaimînipa. Nöwo tömengä ingante tæcæ ate bai pönëmîni inte minitö tömengä ingante cöwë nê agaimîni incæmînipa, ante apænecantapa.

⁸ Mäninö apænecä ëñëninque Pedipe iñömö,

—Awënë, Mæmpocä ingante odömömi amönie. Mäninque adinque idæwaa. Eyepæ impa.

⁹ Äñongä Itota wæætë,

—Pedipe ëñëmi. Botö minitö weca wantæpiyæ quëwëmo incæ bitö ayæ botö imote adämaî inte bai pönënamäi imitawo. Nê botö imote acä iñömö tömengä adobai Mæmpocä ingante nê acä ingampa. Inique bitö iñömö, Mæmpocä ingante odömömi amönie, ante ædö cæte botö imote ämii.¹⁰ Wæmpocä nempo botö nê quëwëmo imopa, ante ayæ, Wæmpocä ingante botö entawëmo imopa, ante bitö pönënamäi imitawo. Botö minitö iminite, Æbänö apæneboo, ante wîi nämanque pönëninque apænebopa. Wæætë botö Wæmpocä incæ botö tönö nê äawocæque bai quëwëngä inte edæ tömengä nänö cædö ante nê cæcä ingampa.¹¹ Tömengä nempo quëwëmo imopa, ante ayæ, Tömengä ingante botö entawëmo imopa, ante minitö iminite apænebo ëñëninque pönëdäni. Wæætë edæ minitö botö äno beyænque ayæ pönënamäi imîni incæte botö bamönengæ nangui cædinö adinque mäninö beyænque pönëdäni.¹² Minitö iminite näwangä ämopa. Botö imote nê wede pönengä iñömö tömengä botö cæbai adobai cæcæcäimpa. Ayæ botö Mæmpocä weca ocæ ëmænte gobo beyæ nê wede pönengä iñömö edæ wîi önonque botö cæbai cædinque godömenque cæquingä ingampa.¹³ Minitö botö ëmowo ante apænëdinque quiemë æncæte ante apænemîni ëñëninque botö Wængongui Wëmo inömo inte edæ, Mæmpocä nänö nïäo ëmömämo edonque pönî acædänimpa, ante cædinque minitö äno bai edæ do cæcæboimpa.¹⁴ Minitö, Ænguimöni, ante quiemë beyæ ante botö ëmowo ante botö imo apænemîni ëñëninque do cæcæboimpa, ante Itota apænecäimpa.

Wængongui Tæiyæ Waëmö Önöwoca poncæcäimpa, ante

¹⁵ Ayæ godömenque apænëdinque Itota iimäi ante apænecantapa. “Minitö botö imote waadete pönëmîni inique botö wææ angainö ante ëñente cæquimîni imaimînipa.¹⁶ Ayæ, Wacä botö beyæ ante minitö tönö godongämæ cæquingä, ante

botö iñömö botö Mæmpocä ingante, Da godömi gocæ, ante apænecæboimpa. Ayæ tömengä botö äno ante do ëñente cædinque edæ, Tömengä minitö tönö cöwë ongonte godongämæ cæcæcäimpa, ante cædinque adocä ingante minitö weca da pönongä ponguingä ingampa.¹⁷ Wængongui nê nö cæcä ingampa, ante näwangä impa, ante Wængongui Tæiyæ Waëmö Önöwoca incæ nê odömongä inongä ingampa. Incæte waodäni nê inguipogaque quëwënanî iñömö tömengä ingante adämaî inäni inte pönënamäi inönäni inte edæ ædö cæte tömengä ingante Ao ante ænguinanîi. Wæætë edæ tömengä minitö weca quëwëngä iñongä minitö tömengä ingante nê entawenguimîni inte tömengä ingante do ate bai pönëmîni imînipa,” ante Itota apænecantapa.

¹⁸ Ayæ apænëdinque, “Botö wîi minitö nöwamîni bai mîni baquinque ante edæ ëmö cæte goquimo imopa. Wæætë minitö weca ocæ ëmænte poncæboimpa.¹⁹ Wantæ ate waodäni nê inguipogaque quëwënanî iñömö edæ botö imote adämaî inguinäni inänipa. Minitö guiquënë botö imote aquimîni imînipa. Edæ botö quëwëmo beyænque minitö adobai quëwëcæmînimpa.

²⁰ Ayæ Wængongui Tæiyæ Waëmö Önöwoca nänö ponguionæ iñonte minitö iñömö edæ, Mönö æbänö äanque bai quëwëmo imöo, ante ëñencæmînimpa. Edæ, Botö Mæmpocä nempo quëwëmo imopa, ante ayæ edæ, Minitö botö nempo quëwëmîni imînipa, ante ayæ, Minitö iminite adobai botö entawëmo quëwënomîni imînipa, ante minitö ëñencæmînimpa.²¹ Æcänö botö wææ angainö ö æninque ëñente cæda tömengä iñömö botö imote nê waadete pönengä ingampa. Botö imote nê waadete pönengä ingante botö Mæmpo näëmæ waadete pönencæcäimpa. Ayæ botö adobai mäningä ingante waadete pönencæboimpa. Ayæ, Botö æbänö imoo, ante tömengä ingante odömömo acæcäimpa,” ante Itota apænecantapa.

²² Codaa iñömö edæ wîi Codaa Icadote wacä Codaa iñömö edæ Itota ingante apænecantapa.

—Awënë iñæmpa bitö mönitö imönite apænëdinque, Botö æbänö imoo, ante odömömo acæmînimpa, äninque quianate wæætë, Inguipogaque quëwënanî inänite odömönämäi incæboimpa, ante pönëninque cæbitawo, angantapa.

²³ Itota wæætë,

—Waocä botö imote nê waadete pönengä inique tömengä iñömö botö odömönte apænëdö ante ëñente cædongä imaingampa. Botö Mæmpo adocä ingante waadete pönenguingä ingampa. Ayæ mönatö tömengä tönö cöwë godongämæ quëwëncæte ante tömengä weca ponguimöna imönäpa.

24 Botō imote nē waadete pōnēnāmai ingā guiquēnē tōmēngā iñōmō botō odōmonte apænedōnō ante ēñēnāmai cædongā ingampa. Māninō botō odōmonte apænebo mīni ēñēninō iñōmō wīi botō nāmā pōnēningue apænedinō impa. Wæætē botō imote nē da pōnongaingā nānō angainō impa, ante Itota apænecantapa.

25 Ayæ apænedinque, “Mīnitō weca botō quēwēñedē botō māninō ante mīnitō iñinite apænetabopa. 26 Botō Mæmpocā botō ēmōwo beyæ ante tōmēngā Tæiyæ Waēmō Ōnōwoca ingante da pōnongā ponguingā inte tōmēngā mīnitō tōnō godongāmæ nē cædongā ingampa. Adocā mīnitō iñinite tōmānō ante odōmonte apænecā ēñencæmīnimpā. Ayæ botō apænedō mīni ēñēninō tōmānō ante tōmēngā adodō apænecā wæætē pōnencæmīnimpā,” ante Itota apænecantapa.

27 Ayæ apænedinque, “Botō pōnō cæbo beyæningue mīnitō gānē entawente quēwēñedāni, ante pōnō cædingue gobopa. Botō gānē entawēmāmo incæ mīnitō iñinite pōnōmo æninque mīnitō gānē pōnente quēwēncæmīnimpā. Botō inguipogaque quēwēñāni nāni godōnō bai wīi pōnōmo impa. Nō cæte pōnōmo impa. Mīnitō mīmōnē guīñente wædāmai inte piyæñē cæte quēwēncæmīnimpā. 28 Botō mīnitō iñinite ēmō cæte godinque mīnitō weca ocæ ēmænte poncæboimpā, ante botō apænebo ēñēmīnitapa. Botō edæ, Botō Mæmpocā weca gocæboimpā, ante apænebo ēñēmīnīni inte mīnitō botō imote waadete pōnēmīni iñinque botō beyæ ante watapæ tobāimīnimpā. Edæ botō wīi botō Mæmpo bai iñōmo inte wædāmo iñōmo impa. 29 Mānōmai iñinque ba adinque mīnitō, Nāwāngā impa, ante pōnencæmīnimpā, ante botō ñōwoque ayæ badāmai iñedē mīnitō iñinite apænetabopa,” ante Itota apænecantapa.

30 Ayæ apænedinque, “Ii inguipogaque quēwēñāni awēñē iñōmō wēnæ inongā inte oo poncæ cæcampa. Iñinque botō mīnitō iñinite wīi wantæpiyæ ayæ apænebopa. Edæ tōmēngā ædō cæte botō imote nāmā tæi piñænte nē angā inguingā. 31 Incæte botō, Waodāni inguipogaque quēwēñāni iñōmō iñmai ante ēñencædānimpā, ante cæbopa. Botō Mæmpo ingante botō waadete pōnēmopa, ante ayæ, Botō Mæmpo botō imo wææ angā bai botō adodō cæbo impa, ante tōmēnāni ēñinguēñēnāni iñānimpā,” ante Itota iñinque apænegacāimpā.

Ayæ, “Ñōwo edæ ængæ gantidinque mōnō gocæimpā,” angacāimpā.

15

Itota nāwā yowementa bai ingampa

1 Ayæ godōmenque apænedinque Itota iñmai apænecantapa. “Botō nāwā yowementa bai impa. Ayæ botō Mæmpo yowementa nē acā bai ingampa. 2 Botō imote pōnēnāni tōmānāni ii yowementa gædēmænto bai iñānimpā. Æcānō wīi botō ēmīñængā bai cæda tōmēngā iñōmō gædēmænto ōmæcato bai ingampa. Botō Mæmpo gædēmænto ōmæcato bai iñongante wangō topænte bai cædingue tōmēngā ingante wido cæcampa. Æcānō botō ēmīñængā bai cæda guiquēnē tōmēngā gædēmænto tōmenca incato bai ingampa. Gædēmænto tōmenca incato incæ godōmenque waa pædinque nanguū incacæimpā, ante wææ topæ wææ topæ cædāni bai botō Mæmpo iñōmō adobai cæcampa. Botō nē ēmīñængā wīi eyepæ cæcā adinque tōmēngā ingante wadæ cæcampa. 3 Botō äno ante mīnitō iñinite botō apænedinō beyæ mīnitō mīmōnē do mēnongate quēwēmīni iñinimpā. 4 Mīnitō botō nempo ee quēwēñōmīni incæmīnimpā. Ayæ adobai mīnitō botō imote cōwē entawente quēwēñōmīni iñinimpā. Gædēmænto yowementa adoyōmō ibænte odæ yate bai pæte incate bapa. Edæ gædēmænto adotoque iñonte ædō cæte nāmā cædingue incaquintoo. Mīnitō iñōmō, Tōmenca incate bai mōnō nanguū cæcæimpā, ante cædingue botō nempo ee quēwēngūēñēmīni iñinimpā,” ante Itota apænecantapa.

5 Ayæ apænedinque, “Botō yowementa bai impa. Mīnitō guiquēnē gædēmænto bai iñinimpā. Waocā botō nempo ee quēwēñōngā inte ayæ botō imote cōwē entawēñōngā ingā iñinque tōmēngā tōmenca incate bai nanguū cæbaingampa. Wæætē edæ botō nempo quēwēñāmai iñinīni iñinque mīnitō tōmāā cædāmai imaīmīnimpā tōō. 6 Nē botō nempo ee quēwēñāmai ingā iñōmō tōmēngā gædēmænto nāni wido cædinto bai ingampa. Māninto amīmō bayonte gæte māmō gongapamō ñō cædāni wo bæco bai cædingue tōmēngā ingante botō Mæmpo adobai wido cæcā ingampa,” ante Itota apænecantapa.

7 Ayæ apænedinque, “Mīnitō guiquēnē botō nempo ee quēwēñinque botō angainō ante ee entawente quēwēmīni iñinque mīnitō quīēmē æncæte ante äinēmīni incæ Wængonguū ingante apænemīni inte tōmēngā wæætē pōnongā æmaīmīnimpā. 8 Mīnitō nanguū pōñi tōmenca incate bai iñinīni inte, Mīnitō botō ēmīñæmīni iñinimpā, ante edonque pōñi ingæimpā. Mānōmai cæmīni iñinque, Botō Mæmpo ñāō apāite ēmōnongā ingampa, ante odōmonte ingæimpā. 9 Botō Mæmpo iñōmō botō imo waadete pōnēngā ingaingā bai botō adobai mīnitō iñinite waadete pōnēmo intabopa. Botō nē waadete pōnēmo iñōmote mīnitō iñōmō botō

nempo ee ongödäni. ¹⁰ Botö Mæmpo në waadecä iñongante botö tömengä nänö wææ angainö ante ëñente cædimö inte tömengä nempo ee ongömopa. Minitö adobaï botö në waadete pönëmo iñömote minitö botö wææ angainö ante ëñente cæmini iñinque edæ botö nempo ee ongömini iñaiminipa,” ante Itota apæñecantapa.

¹¹ Ayæ apæñedinque, “Botö watapæ topämo ante minitö mïmönë entawëñinque watapæ tocæminipa, ante ayæ, Mïni watapæ topämo eyepæ ingæimpa, ante botö minitö iminite mäninö ante apæñetabopa. ¹² Botö wææ äno iñömö iñaimi ante impa. Minitö iminite botö waadete pönëninö bai minitö adobaï wacä ingä wacä ingä waadete pönëedäni. ¹³ Æcänö nänö æmigoidi beyæ ante, Botö Ao äñinque nämä incæ tömënäni beyæ ante wænguimo, ante cæcä iñömö tömengä nänö waadete pönëmämo wïi waodäni tömänäni waadete pönëmämo bai impa. Tömengä iñömö edæ godömenque nanguï waadete pönengä ingampa. ¹⁴ Minitö botö wææ angainö ëñente cæmini iñinque botö guidëmini iñaiminipa. ¹⁵ Minitö botö imo në cædömini iminipa, ante botö minitö iminite godömenque apæñedämaï impa. Edæ awënë ingante në cæcä iñömö, Awënë æbänö cæcää, ante ëñëñämaingä ingampa. Wæætë edæ botö Mæmpo nänö angainö ante botö ëñëñinö tömänö ante minitö iminite apænebo ëñëmini beyæ botö, Minitö botö guidëmini iminipa, ante apæñedimo impa. ¹⁶ Minitö wïi botö imote apænte æñimini iminipa. Wæætë botö iñömö, Minitö botö ëmïñæmini inömini inte tömenca nanguï incate bai nanguï cæcæminipa, ante minitö iminite apænte æñimo impa. Minitö botö ëmïñæmini inömini inte cöwë cæmini iñinque minitö quïemë ante botö ëmowo beyæñque apæñemini ëñëñinque Mæmpocä iñömö do pönongä æncæminipa. ¹⁷ Botö wææ äno iñömö iñaimi ante impa. Minitö wacä ingä wacä ingä waadete pönëedäni,” ante Itota apænegacäimpa.

Inguipogaque në quëwënäni Itotaidi inäñite nani pïimämo

¹⁸ Mänömaïno ante apæñedinque Itota godömenque iñaimi ante apæñecantapa. “Inguipogaque në quëwënäni iñömö minitö iminite pïinäni adinque minitö guñëñämaï inte edæ, Itota ingante do pïingadäñimpa, ante pönëmini iminipa. ¹⁹ Waodäni në inguipogaque quëwënäni nani cabo wacä ingä wacä ingä waadete pönëñäni inäñipa. Minitö inguipogaque nani quëwencabo töno adömini imini bai tömënäni minitö iminite adobaï waadete pönencædönäñimpa. Wæætë minitö inguipoga nani quëwencabo töno adömini inämaï iminipa. Iñæmpa wëenëñedë minitö

inguipoga quëwënöminite botö do minitö iminite apænte æntabopa. Mänömaï beyæ në inguipogaque quëwënäni iñömö minitö iminite pïinäni inäñipa. ²⁰ Botö äno ante minitö iminite, Æbänö apæneboo, ante ñowo wæætë pönëedäni. ‘Awënë ñæñængä inongä iñongante tömengä ingante në cæcä iñömö wïi godömenque ñæñængä ingampa.’ Waodäni botö imote pïinäni wæwëmo bai minitö iminite adobaï pïinäni wæwëmini incæminipa. Botö odömonte apænegainö ante ëñente cædäni bai minitö odömonte apæñedö ante adobaï ëñente cæcædäñimpa. ²¹ Minitö botö quimini iñöminite edæ botö ëmowo beyæñque iñäni, Botö imote në da pönongaingä, Æbänö ingää, ante ëñëñämaï inäni inte mänömaï edæ cæquänäni inäñipa,” ante Itota apæñecantapa.

²² Ayæ apæñedinque, “Botö tömënäni inäñite wïi ponte apænebo bai tömënäni nani wentamö mongænguimämo mongænämaï incædönäñimpa. Ñowo iñömö, Botö apænebo në ëñëñäni inte tömënäni nani wentamö mongæmämo do mongænäñipa. Iñæmpa Itota apæñecä ëñëñämaï imönipa, ante ædö cæte anguänäni. ²³ Botö imote në pïingä iñömö tömengä adobaï botö Mæmpocä ingante pïingä ingampa. ²⁴ Wacä, Botö bamönengæ botö cæbaï adobaï cæcä iñömö cöwë dæ angampa. Iñinque botö wïi tömënäni weca bamönengæ cæbo bai tömënäni nani wentamö mongænguimämo mongænämaï incædönäñimpa. Incæte, Botö æbänö cæboo, ante do adäni incæ tömënäni botö imote pïinque botö Mæmpo ingante adobaï pïinäñitapa. ²⁵ Dodäni nani wææ yewæmongaintaa yewæmöninque iñaimi ante nani apænegainö bai ñowodäni nani cædö beyæ edæ iñinque batimpa. ‘Botö imote önonque pïinäñitapa,’ ante yewæmongadäñimpa,” ante Itota apæñecantapa.

²⁶ Ayæ apæñedinque, “Botö edæ botö Mæmpo weca ocæ ëmænte gote ate minitö beyæ ante minitö töno godongämæ cæquingä ingante da pönoncæboimpa. Mäningä iñömö Wængonguï Tæiyæ Waëmö Önöwoca inongä inte edæ, Æbänö näwangä i, ante apæñecä ëñëncæminipa. Tömengä botö Mæmpo weca quëwente ponguingä ingampa. Pöninque tömengä, Botö æbänö cæboo, ante apæñecä ëñëncæminipa. ²⁷ Minitö adobaï wëenëñedë botö mä cæyedë do botö miñæ godimini imini inte edæ, Botö æbänö cæboo, ante apænequëñëmini iminipa,” ante Itota tömengä nänö në ëmïñæñäni inäñite apænegacäimpa.

16

¹ Godömenque apæñedinque Itota iñaimi apæñecantapa. “Minitö oda cædämaï

tæi gongænte ongoncæminimpa, ante cædinque botō mīnitō imīnite mānīnō ante tōmānō apænetabopa. ² Mīnitō odōmōincōnē go guiyōmīnite wadāni, Mōnitō tōnō godongāmæ ongōnāmai iedāni, ante mīnitō imīnite tatodōnāni gocæminimpa. Wīi mānīnonque cæquīnānimpa. Wæætē īncayæ ate æcāmenque mīnitō imīnite nē wæñonguīna ina īñōmō tōmengā, Botō Wængonguī nānō cædō ante cæbopa, ante pōnencæcāimpa. ³ Botō Mæmpo ingante wīi adinque pōnēnāmai ināni inte ayæ botō imote adāmai inte bai pōnēnāmai ināni īñōmō tōmēnāni īñōmō mīnitō imīnite mānīnō cæquīnāni inānipa. ⁴ Edæ mānīōnæ bayonte mīnitō, Botō wææ angainō ante æbānō āmo, ante wæætē pōnencæminimpa, ante botō mīnitō imīnite mānīnō ante do apænetabopa,” ante Itota apænegacāimpa.

Wængonguī Tæiyæ Waēmō Ōnōwoca nānō cædō

Ayæ godōmenque apænedinque Itota īimai apænegacantapa. “Mīnitō tōnō wēēñēdē godongāmæ ongōmo beyæ botō mānīnō ante māñīfēdē apænedāmai intabopa. ⁵ Botō imo nē da pōnongaingā weca botō ñōwo pōni ocæ ēmænte goquīmo incæte, Bitō æyōmōnō goquīmi, ante mīnitō tōmāmīni botō imote ānāmai imīnipa. ⁶ Botō mānīnō āmo beyæ mīnitō nanguī pōni wæwēmīni imīnipa. ⁷ Incæte botō mīnitō imīnite nāwangā āmopa. Mīnitō beyæ waa ingæimpa, ante botō goquīmo imopa. Botō wadæ godāmai imo bai mīnitō tōnō godongāmæ nē cæquingā īñōmō mīnitō weca pōnāmai incædongāimpa. Wæætē edæ cōwē goquīmo inte godinque botō tōmengā ingante mīnitō weca da pōnōmo ponguingā ingampa. ⁸ Pōninque Wængonguī Tæiyæ Waēmō Ōnōwoca cæcā beyænque inguipogaque quēwēnāni, Mōnō wēnæ wēnæ cædōmō inte wentamō mongæmō awædō, ante wæcædānimpa. Ayæ tōmengā cæcā beyænque, Wængonguī weca æcānō nō cæte quēwēna ina, ante ēñencædānimpa. Ayæ Wængonguī apænte ante pancæcāimpa, ante adobai ēñencædānimpa. ⁹ Edæ botō imote nāni pōnēnāmai inō beyænque inguipogaque quēwēnāni īñōmō edæ, Mōnō wēnæ wēnæ cædonque ante cædinque pōnēnāmai imopma, ante wæcædānimpa, ante adocā cæcæcāimpa. ¹⁰ Ayæ edæ, Botō īñōmō botō Mæmpo weca gote quēwēñōmote mīnitō botō imote adāmai inguīmīni imīnipa. Īnque botō Mæmpo weca gote quēwēmo beyæ Wængonguī Tæiyæ Waēmō Ōnōwoca incæ, Æbānō nō cæte quēwenguīi, ante inguipogaque quēwēnāni inānite odōmōnte apænegā ēñencædānimpa. ¹¹ Ayæ inguipogaque quēwēnāni awēnē īñongante wēnæ ingante

Wængonguī, Botō pancæboimpa, ante do apænte angacāimpa, ante Wængonguī Tæiyæ Waēmō Ōnōwoca godō odōmōnte apænegā beyænque ēñencædānimpa,” ante Itota apænegacantapa.

¹² Ayæ apænedinque, “Botō mīnitō imīnite nanguī ayæ apæneinente wæbo incæte mīnitō ñōwo ganca ædō cæte ēñenguīmīni. ¹³ Wængonguī Tæiyæ Waēmō Ōnōwoca pongā ate tōmengā īñōmō, Æbānō nāwangā impa, ante tōmānō ante mīnitō imīnite odōmōnte apænegā ēñencæminimpa. Adocā, Æbānō apænequīmo, ante wīi nāmā pōnēninque apænegacāimpa. Wæætē Wængonguī tōmengā ingante angā nānō ēñēnīnō ante Wængonguī Ōnōwoca īñōmō mānīnonque ante mīnitō imīnite odōmōnte apænegā ēñencæminimpa. Ayæ, Īncayæ ate æbānō baquīi, ante tōmengā mīnitō imīnite apænegā ēñencæminimpa. ¹⁴ Botō æbānō ñāō apāite ēmōnōmo imopa, ante edonque pōni bacæimpa, ante cædinque tōmengā īñōmō botō entwēnō ante mīnitō imīnite odōmōnte apænegā ēñencæminimpa. ¹⁵ Botō Mæmpo nānō ēadoncoo īñōmō edæ tōmancoo botō quīncoo impa. Mānōmai beyæ īimai apænetabopa. Tōmēmo entwēncoo ante Wængonguī Ōnōwoca īñōmō mīnitō imīnite odōmōnte apænegā ēñencæminimpa, ante apænetabopa,” angantapa.

¹⁶ “Ayæ wantæ ate mīnitō botō imote adāmai inguīmīni imīnipa. Ayæ ate wantæyō īñonte botō imote wæætē acæminimpa,” ante Itota apænegacāimpa.

Mīni wæwēmāmo incæ wæætē mīni to-quinque bacæimpa

¹⁷ Tōmengā ēmīñēnāni pancadāniya nāmanque godongāmæ apænedinque,

–Mānīnō āninque tōmengā, Mīnitō wantæ ate botō imote adāmai inguīmīni imīnipa, ante æbānō ancæte ante apænegāā, ante wædānitapa. Ayæ, Wantæ īñonte mīnitō botō imote wæætē acæminimpa, ante ayæ, Botō Mæmpo weca gote quēwēmo beyæ impa, ante Itota apænegā awædō, ante apænedānitapa. ¹⁸ Tōmēnāni wæætē wæætē, Mānīnō tōmengā, Wantæyō, ante nānō ānō īñōmō edæ æbānō ante apænegāā, ante wædānitapa. Tōmengā æbānō ancæte ante apænegāā, ante ēñēnāmai imōnipa, ante wædānitapa.

¹⁹ Tōmēnāni mānīnō ante pōnēninque botō imote ēñencæte ante āñēnāni inānipa, ante wædinque Itota tōmēnāni inānite,

–Wantæ ate mīnitō botō imote adāmai inguīmīni imīnipa, ante botō ānō ante ayæ, Wantæyō īñonte mīnitō botō imote wæætē acæminimpa, ante botō æbānō āmo, ante mīnitō nāmanque godongāmæ tedemīnitawo. ²⁰ Mīnitō imīnite nāwangā āmopa. Inguipogaque quēwēnāni īñōmō watapæ

toyönäni munitō caate wæquimīni inte Ca ca wæcæmīnīpa. Minitō wæwenguimīni imīnīpa. Incæte mīni wæwēmāmo incæ mīni toquinque bacæīmpa. ²¹ Onquiyængā iñōmō tōmengā wēñæ ēñacæ cæyedē nangui nantate wæcā inte wæwengā bacā incæte tōmengā wēñæ ēñacā adinque tōmengā, Botō wē ēñacā ingampa, ante watapæ tote beyæ tōmengā nāno wædīno ante edæ pōnēnāmaī ingampa. ²² Minitō tōmengā baī adobaī imīnīpa. Nōwoyedē mīni caate wæyedē impa. Incæte botō wæætē munitō imīnite aquīmo īmpa. Mānōmaī beyæ munitō watapæ tocæmīnīpa. Māniñedē, Minitō todāmaī incæmīnīpa, ante acæmenque incæ wææ cædāmaī incæcāīmpa.

²³ Godōmenque apænedinque Itota, “Māniñedē munitō botō imote, Æbāno ī, ante ēñencæte ante godōmenque ānāmaī incæmīnīpa. Minitō imīnite nāwangā āmpa. Botō Mæmpo ingante munitō quiēmē æncæte ante botō émōwo ante apæneyōmīni tōmengā iñōmō do pōnongā æncæmīnīpa. ²⁴ Nōwo ganca munitō quiēmē æncæte ante botō émōwo ante apænedāmaī imīnīni imīnīpa. Nōwo iñōmō edæ, Pōnōmi æmōnie, ante Wængongui ingante apænedāni. Apænemīni ēñēninque tōmengā pōnongā æninque munitō eyepæ pōni mīni watapæ toquinque ænguimīni incæmīnīpa,” ante Itota apænegacāīmpa.

Itota nē tæi emōnongā ingampa

²⁵ Mānōmaīno ante apænedinque Itota iīmaī apænecantapa. “Minitō imīnite inguipoga quēwēnāni nāni cæbainō ante odōmonte apænedīmo incæte botō wanteyō baquionæ iinque bayonte mānōmaīno ante godōmenque odōmonte apænedāmaī incæboīmpa. Wæætē botō tōmēmo Mæmpo ingantedō ante apænedinque munitō imīnite edonque pōni apænecæboīmpa. ²⁶ Māniñæ munitō botō Mæmpo ingante botō émōwo beyænque apænequimīni imīnīpa. Iinque botō, Minitō beyæ ante botō Mæmpo ingante apænequīmo īmpa, ante mānōmaī beyæ botō ānāmaī īmpa. ²⁷ Edæ botō Mæmpo incæ munitō imīnite waadete pōnengā ingampa. Botō īmo waadete pōnēninque munitō iñōmō edæ, Wængongui weca quēwēninque Itota pongaingā ingampa, ante pōnēnimīni beyæ botō Mæmpo adobaī munitō imīnite waadete pōnengā ingampa. ²⁸ Botō edæ Mæmpocā weca quēwente inguipoga iñōmō pōnīmo inte nōwo pōni inguipoga quēwēninque wadæ godinque Mæmpocā weca ocæ emænte goquīmo īmpa,” ante Itota apænecantapa.

²⁹ Tōmengā emiñænāni,

—Nōwo inguipoga quēwēnāni nāni cæbainō ante odōmonte apænedāmaī inte bitō edonque pōni apænebi ēñēmōnīpa.

³⁰ Bitō tōmāno ante ēñēmi īmpa, ante nōwo ēñēmōnīpa. Iinque mōnitō, Æbāno ī, ante ēñencæte ante bitō imite ānāmaī iñōmōni bitō iñōmō do nē ēñēmi īmpa. Mānōmaī beyæ mōnitō, Bitō Wængongui weca quēwente pōnīmi inte nē ēñēmi īmpa, ante do pōnēmōni imōnīpa.

³¹ Ante āñōnāni Itota wæætē,

—Nōwo tæcæ pōnēmīni imīnitawo. ³² Wanteyō bayedē iñōmō edæ nōwo pōni batīmpa. Māniñedē munitō botō imote emō cæte panguimæ panguimæ wodii winōninque tōmēmīni oncōnē go guīquimīni imīnīpa. Botō īmo adoboque emō cæte gomīni incæte botō iñæmpa wīi adoboque ongōmopa. Edæ botō Mæmpo botō tōno godongāmæ ongongampa. ³³ Minitō iñōmō botō nempo quēwēmīni inte gānē pōnente quēwencæmīnīpa, ante cædinque botō mānīno ante munitō imīnite apænetabopa. Ī inguipoga quēwēninque munitō caate wæcæmīnīpa. Incæte mīni wæwenguimāmo ante guīñēnāmaī iedāni. Edæ inguipogaque ante nāni wēnæ wēnæ cædōno ante Baa āninque botō godōmenque tæi emōnōmo inte nē gānā cægāimo īmpa. Mānōmaīno ante Itota tōmengā nāno emiñænāni inānite iinque apænecā ēñengadānīpa.

17

Itota Mæmpo ingante mōno beyæ ante apænecampa

¹ Itota mānōmaīno ante iinque apænedinque oōnædē æmō adinque iīmaī apænecantapa. “Mæmpo ēñēmi. Bitō, Æbāno baquī, ante bitō angainō baī do batīmpa. Botō edæ, Bitō Wēmo inōmo iñōmote bitō pōno cæbi ate botō nāo apāite baī botō emōno iñōmō edonque pōni bacæīmpa, ante apænebopa. Mānōmaī cæbi adinque botō wæætē bitō beyæ pōno cæbo ate bitō nāo emōmāmo edonque pōni bacæīmpa. ² Bitō pædæ pōnōmi botō nē ængaināni inānite botō cōwē wantæpiyæ nāni quēwenguīno ante godōmo æncædānīpa, ante bitō botō tōno godongāmæ cæbi beyænque botō waodāni tōmānāni inānite nē āmo batabopa. ³ Waodāni cōwē wantæpiyæ nāni wænāmaī quēwenguīno ante iīmaī īmpa. Mæmpo, bitō adobique nāwā Wængongui inōmi iñōmite tōmēnāni bitō imite ate baī pōnencædānīpa. Ayæ botō Itota Coditobo bitō nē da pōnongāimo iñōmote do adinque tōmēnāni pōnencædānīpa. Tōmēnāni mānōmaī nāni pōnēno beyænque edæ cōwē wantæpiyæ nāni wænāmaī quēwenguimāmo edæ do ēadānīpa,” ante Itota apænecantapa.

⁴ Ayæ Mæmpo ingante godōmenque apænedinque, “Bitō, iīmaī cæe, ante bitō angainō ante botō inguipoga quēwēninque do iinque cæbo beyæ bitō nāo emōmāmo

edonque pōni bagatimpa. ⁵ Wēēñēñedē pōni inguipoga badōnāmai īñedē bitō weca ongōninque botō ñāō ēmongai mo inte ñōwo bitō weca ocæ ēmænte pōmo adinque bitō pōnō cæbi ate botō adobo ñāō apāite bai ēmōmo ate edæ edonque pōni acæimpa,” Mæmpo ingante apæñecantapa.

⁶ Ayæ, “Inguipoga quēwēñāni bitō quīñāni īñānīpa, ante bitō pædæ pōnōmi æninque botō wæætē, Wængonguī æcānō ingāā, ante tōmēñāni īñānite odōmōmo ēñēñānīpa. Adodāni bitō quīñāni īñōñānite bitō tōmēñāni īñānite pædæ pōnōmi æntabopa. Tōmēñāni bitō angaiñō ante ēñente cædināni īñānīpa. ⁷ Bitō pōnōmi æninque botō ēwocagaincoo ante īñāni īñōmō edæ, Mānincoo tōmancoo edæ Mæmpocā pōnongā æninque Itota ēwocacampa, ante ñōwo do ēñēñānīpa. ⁸ Edæ Mæmpo bitō pōnō apænebi botō ēñente ængaiñō ante botō adodō ante edæ tōmēñāni īñānite godō apænebo ēñēninque tōmēñāni do æñānīpa. Botō bitō weca quēwente pongaimo īmopa, ante ēñēninque tōmēñāni ædæmō ēñēñānīpa. Ayæ, Bitō botō imote da pōnōmi nē pongaimo īmopa, ante pōñēñānīpa,” ante Itota Mæmpocā ingante apæñecantapa.

⁹ Ayæ, “Mæmpo, botō tōmēñāni beyæ ante bitō imite apænebopa. Botō wī inguipogaque quēwēñāni beyæ ante apænebopa. Wæætē edæ, Bitō nē pædæ pōnōmi botō ængaiñāni īñōmō edæ bitō quīñāni īñānīpa, ante botō tōmēñāni beyæ ante bitō imite apænebopa. ¹⁰ Botō quīñāni tōmāñāni bitō quīñāni īñānīpa. Ayæ bitō quīñāni tōmāñāni botō quīñāni adobai īñānīpa. Tōmēñāni cædāni beyænque botō ñāō ēmōmāmo edonque pōni batimpa.”

¹¹ Ante apæñedinque Itota godōmenque apæñecantapa. “Botō inguipoga īñōmō godōmenque ongōnāmai incæboimpa. Wæætē bitō weca ocæ ēmænte ponguimo īmopa. Botō ēmiñēñāni guiquēñē inguipoga īñōmō ayæ ongōñāni īñānīpa. Mæmpo bitō nē Tæiyæ Waēmō inōmi inte ēñēmi. Bitō ēmōwo bitō pōnō pemongaīwo beyænque botō tæī piñænte nē āmo īmopa. Īnīnque mōnatō āāwocaque bai ēwocate quēwēmōna bai māñināni adobai āāwocaque bai ēwocate quēwēñānīpa, ante cædinque bitō tæī piñæmi inte tōmēñāni īñānite wææ aacæbiimpa, ante bitō imite apænebopa. ¹² Māñināni weca botō quēwēñedē botō īñōmō bitō ēmōwo bitō pōnō pemongaīwo beyænque botō tōmēñāni īñānite wææ aatabopa. Ayæ, Wē womōñāmai incædānīpa, ante adodāni īñānite wææ gampotabopa. Īnīnque tōmēñāni tōmāñāni wē womōñāmai īñānīpa. Ōnonque adocanque īñōmō æmæwo wē womonguēngā incæ

tōmēngā īñōmō edæ Wængonguī angā ēñente nāni yewæmongaiñō bai ñōwo ĩnīnque baquinque ante edæ æmæwo wē womongantapa,” ante Itota Mæmpocā ingante apæñecantapa.

¹³ Ayæ, “Botō ñōwo bitō weca ocæ ēmænte ponguimo īmopa. Tōmēñāni botō watapæ topāmo tōmāmāmo entawēninque quēwēñānīpa, ante botō māñinō ante inguipoga ayæ quēwēñedē apænebo īmopa. ¹⁴ Mæmpo, bitō angaiñō ante botō tōmēñāni īñānite godō apænebo ēñēñānīpa. Botō inguipogaque nāni quēwēñāni tōñō adobo īñāmai imo bai tōmēñāni edæ adobai inguipogaque nāni quēwēñāni tōñō adodāni īñāmai īñāni adinque inguipogaque quēwēñāni wæætē tōmēñāni īñānite piñānīpa. ¹⁵ Mæmpo ēñēmi. Bitō botō ēmiñēñāni īñānite, Mīnitō inguipoga īñōmō ayæ quēwēñāmai incæmīnīpa, ante ænte māobi gocædānīpa, ante botō bitō imite apæñedāmai īmopa. Wæætē, Wēñæ awēñē nē wīwa cædongā īñōmō tōmēñāni īñānite, Oda cæcædānīpa, ante cæyongante bitō wææ aabi ate tōmēñāni wæætē oda cædāmai incædānīpa, ante bitō imite apænebopa. ¹⁶ Botō inguipogaque nāni quēwēñāni tōñō adobo īñāmai imo bai tōmēñāni edæ adobai inguipogaque nāni quēwēñāni tōñō adodāni īñāmai īñānīpa. ¹⁷ Bitō āñō īñōmō edæ nāwangā ante impa. Īnīnque bitō godō cæbi ate nāwangā bitō āñō beyænque tōmēñāni īñōmō tōmēmi cædonque ante cædinque tæiyæ waēmō ēwocate quēwēñāni incædānīpa, ante bitō imite apænebopa. ¹⁸ Bitō botō imote inguipoga īñōmō bitō da pōnōmi pōmo bai botō adobai tōmēñāni īñānite inguipoga quēwēñāni weca da godōmo godānīpa. ¹⁹ Tōmēñāni īñōmō bitō cædonque ante cædinque tæiyæ waēmō ēwocate quēwēñāni incædānīpa, ante botō īñōmō edæ bitō cædonque ante Ao āninque, Botō nāmā incæ tōmēñāni beyæ ante wænguimo īmopa,” ante Itota apæñecantapa.

²⁰ “Mæmpo ēñēmi. Botō wī bitō ēmiñēñānīnque beyæ ante bitō imite apænebopa. Wæætē tōmēñāni botō angaiñō ante apæñedāni ēñente pōñēninque wadāni nē wede pōñēnguīñāni īñōñānite botō īñāni beyæ ante adobai bitō imite apænebopa. ²¹ Mæmpo, Bitō imite botō entawēmo imo bai ayæ botō bitō nempo quēwēmo imo bai māñināni tōmāñāni adobai āāwocaque bai ēwocate quēwēñānīpa, ante cæcæbiimpa, ante bitō imite apænebopa. Ayæ inguipoga quēwēñāni īñōmō, Bitō botō imote da pōnōmi pongaimo īmopa, ante pōñēñānīpa, ante cædinque bitō godō cæbi ate tōmēñāni mōnatō nempo quēwēñānīpa, ante bitō imite apænebopa. ²² Bitō pōnō cæbi

beyænque botō ñāō bai entawēninque, Mōnatō āawocaque bai ēwocate quēwēmōna bai tōmēnāni adobaī āawocaque bai ēwocate quēwēncædānimpa, ante botō iñōmō bitō pōnōnimāmo botō ñāō entawēmāmo tōmēnāni inānite adopāmo godōmo ænte entawēnānipa. ²³ Tōmēnāni āawocaque bai ēwocate quēwēncædānimpa, ante tōmēnāni botō imote entawēnānipa. Ayæ botō bitō imite entawēmo imopa. Tōmēnāni mānōmai āawocaque bai ēwocadāni adinque inguipoga quēwēnāni iñōmō, Bitō botō imote nē da pōnōmi pongaīmo imopa, ante ēñēncædānimpa, ante apænebopa. Ayæ botō imote waadete pōnengaīmi imi bai bitō tōmēnāni inānite adobaī waadete pōnengaīmi imipa, ante ēñēncædānimpa, ante apænebopa,” ante Mæmpocā ingante Itota apænecantapa.

²⁴ Ayæ, “Mæmpo, Bitō pædæ pōnōmi botō nē ængaīnāni iñōmō botō ñāō ēmōmāmo acædānimpa, ante botō, Tōmēnāni botō quēwēñōmō adoyōmō quēwēncædānimpa, ante aīnente wæbopa. Wēēñēñedē pōni inguipoga badōnāmai iñedē bitō iñōmō edæ botō imote waadete pōnēninque botō ñāō ēmōmāmo pōnōmi botō ængaīmāmo tōmēnāni adopāmo acædānimpa, ante aīnente wæbopa. ²⁵ Mæmpo nē nō cædōmi imi ēñēmi. Inguipogaque quēwēnāni bitō imite wīl adinque pōnēnāmai ināni incæte botō iñōmō edæ bitō imite do ate pōnēmo imopa. Botō ēmiñænāni iñōmō, Bitō botō imote da pōnōmi nē pongaīmo imopa, ante do ēñēnānitapa. ²⁶ Botō cæbo beyænque mānīnāni iñōmō, Bitō imite ate bai pōnēnānitapa. Botō imote bitō waadete pōnēnō ante adodō waadete pōnēnō tōmēnāni mīmōñē entawete quēwēncædānimpa, ante ayæ, Tōmēnāni botō imote entawēncædānimpa, ante botō ayæ cæbo beyænque tōmēnāni iñōmō, Bitō imite ate bai pōnēncædānimpa,” ante Itota Mæmpo ingante linque apænegacāimpa.

18

*Itota ingante bæi ongonte ænte godānipa
(Māateo 26.47-56; Māadoco 14.43-50;
Odoca 22.47-53)*

¹ Wængonguī ingante iinque apænedinque Itota tōmengā ēmiñænāni tōnō wadæ godinque Quedodōō biyōnæ æmæ wedeca godānitapa. Æmæ wedeca odibowæncodē nāni ancodē i ininque Itota tōmengā ēmiñænāni tōnō mānincodē pō guidānitapa.

² Itota ingante nē odōmonguingā Codaa iñōmō Itota tōmengā ēmiñænāni tōnō mānincodē wantæ iñō wantæ iñō gote ongōnāni ininque Itota ingante nē odōmonguingā Codaa iñōmō mānincodē do adingā inongāimpa. ³ Ininque tontadoidi adocaboque inānite æninque Codaa iñōmō

edæ tāno beyænte adocodē pongantapa. Ayæ, Wængonguī qui, ante nē godōnāni ñænænāni tōnō Paditeoidi nāni wææ wānōnāni inānite Codaa nempo godōnāni æningā inte tōmengā tōmēnāni inānite tontadoidi tōnō ænte māmongā pōnānitapa. Pōninque tōmēnāni gonga ticaiñē næænte gongapæncade ticaiñē nææninque yaēmē næænte Codaa miñæ pōnānitapa. ⁴ Itota nāmā ante, Æbānō bate wæquīmoo, ante tōmāā ēñēnongā inte awænē tao godinque tōmēnāni inānite,

—Æcānō ingante ante diqui diqui minte pōmīni.

⁵ Ante añongā tōmēnāni wæætē,

—Itota Nāatadeta nē quēwēningā ingante āmōnipa.

Ānāni ēñēninque,

—Botō tōmēmo imopa, ante Itota apænecantapa.

Ayæ nē odōmonguingā Codaa iñōmō tōmēnāni weca a ongōnongāimpa. ⁶ Itota iñōmō, “Botō tōmēmo imopa,” ante añongā tōmēnāni gā godinque onguipoga tæ go wæænānitapa. ⁷ Tæ go wæænāni adinque tōmengā adodō,

—Æcānō ingante ante diqui diqui minte pōmīni.

Ante añongā tōmēnāni wæætē,

—Itota Nāatadeta quēwēningā ingante āmōnipa.

⁸ Ānāni ēñēninque Itota wæætē,

—Botō tōmēmo imopa, ante do antabopa. Mīnitō iñōmō botō imote ante diqui diqui minte pōmīni bai mānīnāni inānite bæi ongōnāmai iedāni.

⁹ Itota Mæmpocā ingante do apænedinque, “Bitō edæ pōnōmi botō ængaīnāni inānite wææ aabo beyæ adocanque incæ wē womōnāmai inānitapa,” ante nānō angaiñō bai ñōwo linque bacæimpa, ante mānōmai angantapa. ¹⁰ Timōnō Pegodo iñōmō nē yaēmē næwengā inte pædæ guiipote yaēmē æninque, Wængonguī qui, ante nē godongā ñænængā pōni inongā ingante nē cæcā ingante tæi pāninque tōmēmonca iñō wangō tamoncacantapa. Pegodo nānō nē wangō tamoncadingā ēmōwo Māadoco ēmongā inongāimpa. ¹¹ Itota wæætē Pegodo ingante,

—Bitō yaēmē adodō da wē, āninque, Botō wæwenguīmāmo ante botō Mæmpo pōnongā ænīmo inte wæwenguēnēmo imopa, angacāimpa.

Itota ingante bæi ongōninque Ānato weca ænte godāni

*(Māateo 26.57-58; Māadoco 14.53-54;
Odoca 22.54)*

¹² Ayæ odōmāno tontadoidi tōnō tōmēnāni awēnē ayæ oodeoidi awēnēdi tōnō Itota ingante bæi ongōninque ænānitapa. Æninque tōmengā ingante goto wimpote cædānitapa.

13 Ayæ adodäni Änato nänöwäa Caiapato weca Itota ingante ænte mäo godänitapa. Edæ Caiapato iñömö, Wængongui qui, ante nê godongä ñæñængä pöni inongä mänü wadepo iñonte inongäimpa. ¹⁴ Caiapato wëñëñedë oodeoidi awëñëidi inänite iñmai ante nê äñongä inongäimpa. Mönö waocabo beyæ ante adocanque onguiñængä wængä iñinque waa imaimpa.

Pegodo incae, Dicæ abogaa, angampa
(Mäateo 26.69-70; Mäadoco 14.66-68; Odoca 22.55-57)

¹⁵ Itota nänö ëmiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö ëmiñængä iñömö, Wængongui qui, ante nê godongä ñæñængä pöni nänö nê adingä inongäimpa. Iñinque Itota tönö pöninque tömengä Wængongui ingante nê godongä ñæñængä pöni inongä oncö yacömöñäa iñömö pö guicantapa. ¹⁶ Pegodo guiquënë odemö yabæ inö a ongönongäimpa. Wacä Itota miñæ nê gocä iñömö, Wængongui qui, ante nê godongä ñæñængä pöni inongä nänö nê adingä iñömö tömengä ocæ ëmænte pöninque baquécä odemö nê wææ aacä ingante apæñecantapa. Pegodo ingante ämi guicæ, angä ëñëñinque baquécä wi æñecä ate tömengä Pegodo ingante ænte manguiçä guicantapa. ¹⁷ Manguiçä guiyongä baquécä odemö nê wææ aacä iñömö Pegodo ingante,

—Bitö adobai mäningä onguiñængä nänö nê ëmiñænömi imipa töö.

Äñongä tömengä wæætë,

—Botö wabo imopa, angantapa.

¹⁸ Yoguite ingatimpa. Ayæ nê cædönäni tönö oodeoidi awëñëidi wææ wänönäni gongapamö ootoqui, ante nani tadöni gäänë adiyæ ongonte ootodönänimpa. Pegodo adobai tömëñäni tönö godongämæ adiyæ ongonte ootocantapa.

Nê godongä ñæñængä Itota ingante angampa

(Mäateo 26.59-66; Mäadoco 14.55-64; Odoca 22.66-71)

¹⁹ Mäñiñedë Änato iñömö, Wængongui qui, ante nê godongä ñæñængä pöni iñömö Itota ingante, Bitö nê ëmiñænäni diyæ, äñongäimpa. Ayæ Itota nänö odömönte apæñegainö ante, Äbänö i, ante tömengä ingante adobai angantapa. ²⁰ Itota wæætë,

—Waadäni ëñëñönänite botö edonque pöni apænebo ëñëñänitapa. Botö cöwë mïnitö odömöincönë incae Wængongui oncö ñæñæncönë incae oodeoidi tömännäni nani pöincönë pö guidique odömönte apænebo ëñëñänitapa. Botö cöwë awëmö apæñedämai intabopa. ²¹ Bitö botö imote, Äbänö i, ante quinante ämii. Botö imote nê ëñëñänäni

inänite ämi ëñente apæñedäni ëñëñæbiimpa. Edæ mäninäni ædæmö ëñëñäni inänipa.

²² Mänömainö angä ëñëñinque wææ wänongä adocanque iñömö Itota gäänë ongöninque tömengä ingante tæi tamöñinque apæñecä,

—Wængongui qui, ante nê godongä ñæñængä pöni inongä ingante ædö cæte mänömai ante wæætë änewëë töö.

²³ Ante äñongä Itota wæætë,

—Botö wënæ wënæ äñimo imo bai bitö botö wënæ wënæ äñinö ante, Äbänö i, ante apæñebi ëñëmoe. Wæætë edæ näwangä ante apænebo iñinque bitö quinante botö imote tæi tamöñipææ, angantapa.

²⁴ Ayæ, Wængongui qui, ante nê godongä ñæñængä pöni Caiapato weca gocæcäimpa, ante Änato iñömö Itota ingante ayæ goto wimpoingä iñongante angä ëñëñinque tömengä ingante ænte gogadänimpa.

Pegodo incae, Dicæ abogaa, wæætë angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayæ adiyæ ootoyongante wadäni,

—Bitö tömengä ëmiñænömi adobai imipa töö.

Äñäni ëñëñinque tömengä,

—Wabo imopa, angantapa.

²⁶ Wængongui qui, ante nê godongä ñæñængä pöni inongä ingante nê cædäni iñönänite adocanque iñömö Pegodo nänö nê wangö tamoncadängä guidengä inongäimpa. Tömengä iñömö Pegodo ingante,

—Bitö tömengä miñæ odibowæncodë ongöñedë bitö imi atabopa. Bitö wü imitawo.

²⁷ Ante äñongä Pegodo wæætë, Wabo imopa, ante tæcæ änewëñongä tawadiya dobæ pegatimpa.

Pidato weca Itota ongongä

(Mäateo 27.1-2; Mäadoco 15.1-5; Odoca 23.1-5)

²⁸ Tæcæ näö bayonte Itota ayæ Caiapato weca ongöñongante oodeoidi iñömö, Mönö tömengä ingante odömäno gobedönadodo awënë Pidato weca ænte gocæimpa, ante cædinque awënë oncö boyæ mäodäni gocantapa. Incæte tömännäni dodäni nani wææ angainö beyæ ante guñente wædinque, Pidato oncönë guite bai mönitö mïmö wentamö ewocamöni incædömönimpa. Iñæmpa mänömai cæmöni iñinque mönitö Patowa mönö ææmæ cæyedë cængui ædö cæte cænguimöñii, ante wædinque guidämai inänitapa. ²⁹ Iñinque Pidato tömännäni weca oncö boyæ taodique tömännäni inänite,

—Ingä onguiñængä iñömö quinö wënæ wënæ cæcantawo.

³⁰ Äñongä tömännäni wæætë,

—Māningā wīi wēnæ wēnæ cæcā inte bai mōnitō tōmengā ingante wīi ænte māmō pædæ godōmōni æncædōmiimpa.

³¹ Ānāni ēñēninque Pidato,

—Mīnitō tōmēmīni tōmengā ingante ænte godinque mīni wææ yewæmongainō bai ante cædinque, Tōmengā ingante pangæimpa, ante apænte ædāni.

Āñongā oodeoidi awēnēidi,

—Īñæmpa mīnitō wææ āmīni iñōmīni mōnitō cōwē tacamōni wēnāni mōni cægainō bai ædō cæte æcāmenque ingante wēnōmōni wænguingāā, ante wædānitapa.

³² Odōmānoidi māñīfēdē wēnæ wēnæ cædāni inānite awā tōō godōmænte tīmpodinqe wææ tīwadinque godō wēnōnāni inōnānimpa. Īninqe odōmānoidi inānite pædæ godōninque oodeoidi wæætē Itota, Æbānō cædāni wænguimoo, ante do nānō angainō bai ñōwo ĩnque baquinque cædānitapa.

³³ Māñīnō ānāni ēñēninque Pidato wæætē oncōnē ñænæncōnē guidinque Itota ingante āñecā pongā adinqe, Pidato,

—Bitō oodeoidi Awēñē Odeyebi ĩmitawo.

³⁴ Angā ēñente Itota wæætē,

—Bitō nāmā pōnēninque apænebitawo. Wabānō wacā botō ĩmotēdō ante bitō ĩmite apæneccā ēñēmitawo.

³⁵ Ante āñongā Pidato,

—Botō dicæ oodeobo ĩmogaa. Tōmēmī guiddēnāni tōnō Wængonguī quī, ante nē godōnāni ñænæñnāni iñōmō bitō ĩmite māmō pædæ pōnōnāni æntabopa tōō. Bitō quīnō wēnæ wēnæ cæbitawo.

³⁶ Āñongante Itota wæætē apænedinque,

—Wīi inguipoga quēwēnāni ānāni beyæ botō Awēñē Odeyebō nē ingaiimo ĩmopa. Botō inguipoga quēwēnāni Awēñē Odeyebō inte nē āmo ĩmo bai botō nempo quēwēnāni iñōmō botō ĩmote, Bæi ongonte ænte godāmaĭ incædānimpa, ante wææ cædinque oodeoidi tōnō guēa wæætedō wæætē cæcædōnānimpa. Incæte wīi inguipoga quēwēnāni ānāni beyæ wæætē edæ wayōmō quēwengaiimo inte botō tōmēmō nāmā incæ Awēñē Odeyebō nē ingaiimo ĩmopa.

³⁷ Māñōmaĭnō ante Itota apæneccā ĩninqe Pidato,

—Īñæmpa Awēñē Odeyebi bitō ĩmitawo.

Āñongante Itota wæætē,

—Bitō tōmēmī ānō bai botō Awēñē Odeyebō inōmoimpa. Nāwangā āmpa. Botō iñōmō Wængonguī nānō angainō ante, Nāwangā ĩmpa, ante inguipoga quēwēnāni inānite apæneccæte ante edæ māñī beyænque ante inguipoga iñōmō pō ēñagāimo ĩmopa. Wængonguī nāwangā ante nānō angainō ante Ao ante ēñente nē cædāni iñōmō edæ tōmēnāni tōmānāni botō ĩmote nē ēñēnāni ĩnānipa, angantapa.

³⁸ Āñongante Pidato,

—Æcāmē nāwangā angāā, angacāimpa.

Itota wæncæcāimpa, ānānipa

(*Māateo 27.15-31; Māadoco 15.6-20; Odoca 23.13-25*)

Pidato māñōmaĭ apænedinque wæætē oodeoidi weca oncō boyæ taodinque apæneccantapa.

—Īngā quīnō wēnæ wēnæ cæcā ingampa, ante ēñēnāmaĭ ĩmopa. Īninqe botō dicæ tōmengā ingante apænte angūimo ĩmogaa. ³⁹ Wadepo iñō wadepo iñō Patowa mīni ææmæ cæōnæ mīnitō, Ædānidō tee mōnete ongōnāni, ante pōnēninque adocanque ēmōwo ante botō ĩmote apænedinque, ĩngā ingante ĩmpo cæbi goqingā, ante cōwē āmīnipa. Īninqe adocanque ingante, ĩngā iñōmō mīni apænedongā ingampa, ante botō tōmengā ingante ĩmpo cæbo ate ænte gomīni inōmīnimpa. Īninqe ñōwo diyæ. Mīnitō, Oodeomōni Odeye iñongante pōnō ĩmpo cæbi abæ tawænte goguinga, āmīnitawo.

⁴⁰ Āñongante tōmēnāni yedæ tededinque,

—Māningā ingante dicæ āmōniyaa. Wæætē Badabato ingante ĩmpo cæbi gocæe, ante tedewengadānimpa.

Badabato wēñēñēdē wadāni tōnō, Odōmāno tæiyæ awēñē ingante wido cæcæimpa, ante cædingā inongāimpa.

19

¹ Ayæ Pidato angā ate Itota ingante bæi ongonte māo æmontaiya tæi tæi pānānitapa. ² Tontadoidi daa mongæmenca æninque que que cædinque, Awēñē poganta, ante pōnō da wencadānitapa. Awēñē weocoo wēñacæbiimpa, ante badete tote bai cædinque Itota ingante opatawæ ēmoncoo pōnō daga wēñadānitapa. ³ Daga wēñadinque tōmēnāni wæætē wæætē tōmengā weca ponte āninque,

—Badogaa, bitō oodeo awēñē odeyebi ĩmipææš.

Ante badete todinque tōmengā ingante tæi tamōnānitapa.

⁴ Pidato tōmēnāni weca oncō boyæ adopoque ayæ tadinque oodeoidi inānite apænedinque,

—Īngā iñōmō æbānō cæcantawo, ante ēñencæte ante cæbo ate tōmengā wēnæ wēnæ nānō cædō ante dicæ abogaa. Mīnitō māñōmaĭnō ante ēñencæmīnimpa, ante botō tōmengā ingante mīnitō weca ænte mantabo tacā ædāni, angantapa.

⁵ Itota daa mongæmenca poganta encadinque opatawæ ēmoncoo mongænte tayongā Pidato tōmēnāni inānite,

—Īngā onguīñgā ongongā ædāni.

⁶ Tōmengā ingante adinqe, Wængonguī quī, ante nē godōnāni ñænæñnāni tōnō

adodäni inänite nē wææ wänönäni iñömō yedæ tedewēninque,

—Awæ ñænquedimæ cæte ämi wænönäni wængæe. Ämi wænönäni wængæe.

Ante ancaa änewēnāni ēñēninque Pidato wææte,

—Mñitō iñæmpa tōmengä ingante æninque awæ ñænquedimæ cæte wænömīni wængæe. Botō guiquēnē iñgä wēnæ wēnæ nänō cædō ante dicæ abogaa.

⁷ Pidato äñongä oodeoidi wææte iimāi tedewēnānitapa.

—Mñitō wææ yewæmongainō ante ēñente quēwēmōni imōnipa. Iñgä iñömō edæ nāmā ante edæ, Wængonguī Wēmo inōmo imopa, ante cædinque edæ māñinō mōni wææ yewæmongainō ante ēñēnāmāi cæcampa. Mänōmāi ēñēnāmāi inte cæcä beyæ tōmengä nē wænguēngä ingampa.

⁸ Mänōmāinō äñāni ēñēninque Pidato godōmenque guñente wædinque, ⁹ oncōnē ñænæncōnē adodō pō guidinque Itota ingante,

—Bitō ædōnō quēwente pōmi imii.

Ante äñongä Itota guiquēnē pæ wēēnecä.

¹⁰ Adinque Pidato tōmengä ingante,

—Bitō quñante botō imo tededāmāi imii. Botō nāmā nē tæi pñænte ämo inōmo inte ämo ininque ñimpo cædāni gobaimipa. Botō wadō ante ämo ininque bitō imite do awæ ñænquedimæ cæte wænönäni wæmāimipa, ante ēñēnāmāi imitawo.

¹¹ Äñongante Itota wææte,

—Wængonguī bitō tæi pñænte ämāmo ante godōnāmāi iñgä bai bitō tōmēmi tæi ämi imi diyæ botō imote anguimiyaa. Mänōmāi beyæ bitō imite, Wænōmi wæncæcäimipa, ante botō imote nē pædæ pönōningä iñömō edæ godōmenque wēnæ wēnæ cæcä ingampa, ante apæñecantapa.

¹² Mänōmāinō angä ēñēninque Pidato, Æbänō ñimpo cæbo goquingäa, ante cædongäimipa. Cæyongä oodeoidi wææte godōmenque yedæ äñönānimipa,

—Bitō mäningä ingante ñimpo cæbi bai bitō odōmāno tæiyæ awēnē Tetædo æmigo dicæ imiyaa. Æcāmenque iñömō edæ, Botō awēnē inōmoimipa, ante nē angä inte tōmengä iñömō Tetædo ingante nē pñinongä ingampa.

¹³ Mäninō äñāni ēñēninque Pidato iñömō, Itota ingante ænte tao godinque awēnē nänō apænte äimpaa gote tæ contacantapa. Pidato nänō tæ contayōmō iñömō, Dicacoo ayadi bai nāni caayōmō impa, ante nāni äñömō ininque ebdeo tededō, Gabata, nāni äñömō inōnimpa. ¹⁴ Patowa nāni ææmæ cæyedē inque bayō oodeoidi, iimō ate guēmanguñæ inguimipa, ante mōnō ñwoonæque cæcæimipa, ante nāni cæonæ inōnimpa. Iñonæ wodo tæcæ bæcä bayonte Pidato oodeoidi inänite,

—Iñgä iñömō mñitō Odeye inongä ingampa.

¹⁵ Äñongante yedæ äninque tōmēnāni,

—Tōmengä ingante wænōmi wængæe. Tōmengä ingante wænōmi wængæe. Awāa timpote ämi wænönäni wængæe.

Ante ancaa änewēñönāni Pidato wææte,

—Botō iñömō mñitō Odeye iñongante awāa timpote ämo wænönäni wængæe, ante änewēmñitawo.

Angä ēñēninque Wængonguī quī, ante godōnāni ñænænāni iñömō,

—Tetædoque incæ mñitō awēnē odeye inongä apa cæbii, änewēñönānimipa.

¹⁶ Ancaa änewēñönāni Pidato, Awāa ämo timpote wænōmīni wængæedāni, ante Itota ingante tontadoidi inänite pædæ godongä ængadānimipa. Ayæ tōmēnāni Itota ingante ænte gogadānimipa.

Itota ingante awāa timpodāni wængäimipa (Mäateo 27.32-44; Mäadoco 15.21-32; Odoca 23.26-43)

¹⁷ Itota incæ tōmengä timpoquiwæ æninque mongænte taodique "Ocatāinō" mñō äñömō pongantapa. Mänñömō ante ebdeo tededō, Godogota, nāni äñömō impa. ¹⁸ Mänñömō pñongante tōmēnāni awæ ñænquedimæ cædinque tōmengä ingante tōo godonte timpodinque wææ tiwadinque ængæ gantidēnāni ongongantapa. Ayæ wada inate tōmengä weca æmatæ inō æmatæ inō māmō adobai cæte ængæ gantidēnāni wægōñona Itota tæcæguedē wængongä ingantapa. ¹⁹ Pidato angä yewæmointa, Nāni ēñeguinta, ante yewæmonte æninque ñænquedimæ iwāa wo cædānitapa. "Itota Näatadeta quēwēningä oodeoidi Awēnē Odeye inongä ingampa," ante yewæmonte wo cæte ongongatimipa. ²⁰ Itota ingante nāni timpodñömō eyequei i ininque oodeoidi nangui ināni tōmēnāni nāni quēwēñömō ta pōninque Pidatoidi nāni yewæmōninta adānitapa. Mäninta iñömō ebdeo tededō datūi tededō guidio tededō ante yewæmonte ingatimipa. ²¹ Oodeoidi beyæ ante, Wængonguī quī, ante nē godōnāni ñænænāni iñömō Pidato weca godinque tōmengä ingante,

—Bitō, "Oodeoidi Awēnē Odeye inongampa," ante yewæmōnāmāi inguēnē quēwēe. Wææte tōmengä nāmā nänō angainō bai, "Botō oodeoidi Awēnē Odeyebo inōmoimipa, ante nē änewēningä ingampa," ante yewæmōe.

²² Ante änewēñönāni Pidato wææte,

—Botō yewæmōninō ante yewæmōnimo inte botō wææte wadō ante yewæmōnāmāi incæboimipa.

²³ Tontadoidi iñömō tōmengä ingante awāa timpote ængæ gantidēnāni wægōñongä tōmēnāni tōmengä weocco

ini æninque mencooga go mencooga cönönnique adocanque adocooque adocanque adocooque æninque tömänäni ænönänimpa. Täno mongæincoo guiquënë ayæ öñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa.

²⁴ Adocooque wänä iñänämaï ingæimpa, ante adodäni godongämæ tedinque,

—Æcänö quınca nö ta adinque tömengä mänincoo æncæcäimpa, ante wææntodönänitapa.

Edæ Wængongui angä ëñente dodäni iïmaï ante näni yewæmongainö bai ñöwo iinque baquinque tontadoidi mänömaï cædänitapa. “Edæ botö weocoo ini ö æninque tömënäni näni caboque wacä ingä wacä ingä nènempodänitapa. Ayæ, Æcänö quınca nö ta adinque tömengä mänincoo æncæcäimpa, ante wææntodönnique ænänitapa,” ante näni yewæmongainö bai tontadoidi ñöwo cædänitapa.

²⁵ Itota ingä näni ængæ gantidëñömö tömengä wäänä tönö wäänä tönifacä näna caya ayæ Codeopato nänöogængä Mäadiya tönö wacä Mäadiya Mäagadadënä mänifömo pönnique eyequei a ongönänitapa. ²⁶ Itota iñömö tömengä wäänä inante acantapa. Ayæ botö tömengä miñæ né godimo iñömö tömengä nänö nê waadebo inömo inte tömënä weca ongömo adinque Itota tömengä wäänä inante,

—Badä ëñëmi. Mäningä iñömö minö wengä bacæcäimpa.

²⁷ Äninque tömengä ëmiñænimo iñömotë,
—Botö ëmiñænimi ëñëmi, Mäninä iñömö botö badä incæ bitö badä bacædäimpa, angæcäimpa.

Iinque botö Itota nänö nê ëmiñænimo inte tömengä nänö änöñedë täno ænte mämömo pönnique tömengä wäänä iñömö botö oncönë cöwë owodönäimpa.

Itota incæ wængäimpa

(Mäateo 27.45-56; Mäadoco 15.33-41; Odoca 23.44-49)

²⁸ Quinö bacæimpa, ante ñöwo iinque batimpa, ante nê ëñëngä inte Itota iñömö edæ, Wængongui angä ëñente näni yewæmongainö bai ñöwo iinque bacæimpa, ante cædinque,

—Botö gæwænte awædö, ante apænecantapa.

²⁹ Adoyömö biñömæ näni ämæ bai wædænque godonte näni ænimæ owætadë engate ongö adinque tömënäni dayömö bai æninque mänimæñë pædæ guidonte aa beyonte wëä tadonte æninque iitopowænca näni äwænca ongontoca goto wencadod-inque Itota önöne pædæ æænö pæ mänänitapa. ³⁰ Pæ mäñönäni Itota oo guëmante bedinque,

—Ñöwo iinque batimpa.

Ante apænedinque tömengä ocabo ædæ wææncadinque tömengä önöwoca wadæ goyöwoca do wængäimpa.

Itota betagonta inö tontado boo tæñongä

³¹ Iimö ate, Mönö guëmanguiönæ iñömö Patowa inguiönæ beyæ godömenque waa ëönæpa, ante oodeoidi, Nöwoönæque cæcæimpa, ante näni cæönæ iinpa. Oodeoidi awënëidi, Awäa nê ongönäni baö mäniwäa guëmanguiönæ ongönämaï incædänimpa, ante Pidato weca godinque tömengä ingante, Iinäni näni timpodiwäa nê ongönäni quingæ wæncædänimpa, ante cædinque bitö tömënäni önömënë bamë ämi wadäni taa mænäni do wæncædänimpa. Ayæ tömënäni baö o togænte pædæ wææñonte ämi ænänie, änänitapa. ³² Mänii beyæ tontadoidi pönnique Itota weca täno näni nê ængæ gantidëningä önömënë bamë taa mæninque edæ ayæ näni nê timpaddingä wængongä önömënë bamë taa mænänitapa.

³³ Taa mæninque Itota weca pönnique tömengä do wængäi adinque tömengä önömënë taa mænämaï inönänimpa.

³⁴ Wæætë tontado adocanque Itota betagonta inö boo tæñöñongä wepæ tönö æpæ gui gotimpa. ³⁵ Botö mäninö bayonte nê adimo inte, Æbänö näwangä batimpa, ante nö apænëbopa. Ayæ, Botö äno ante näwangä impa, ante do ëñëmopa. Minitö adobaï ëñente pönencæminimpa, ante apænëbopa. ³⁶ Edæ, “Tömengä bamë adomenque incæ taa mænte wædämaï incæcäimpa,” ante Wængongui angä ëñente näni yewæmongainö bai bacæimpa, ante mänömaï batimpa. ³⁷ Ayæ edæ, “Waadäni näni nê boo tæñöningä ingante aquinäni inänipa,” ante Wængongui angä ëñente wataa näni yewæmongainö bai iinque bacæimpa, ante mänömaï batimpa.

Itota wodi baö ini mäo daga wëñänipa

(Mäateo 27.57-61; Mäadoco 15.42-47; Odoca 23.50-56)

³⁸ Ayæ ate Adimatea quëwengä Ootee iñömö oodeoidi awënëidi inänite guifente awædö, ante awëmö Itota ëmiñæningä inongäimpa. Tömengä iñömö Pidato Awënë ingante, Itota wodi baö pönömi ænte wëmoe, angantapa. Pidato Ao angä ëñënnique Ootee do pönnique Itota wodi baö timpodiwäa ongöñongante o togænte pædæ wæænonte ængantapa. ³⁹ Ayæ Niicodemö wëenëñedë Itota weca woyowotæ ëñacæ nê pöningä iñömö Ootee miñæ pongantapa. Tömengä müdamö näni änömö nangui ti nämö tönö aadoemö näni änömö nangui ogui wamö tönö adoyömö näni wempo cædimö todëinta quido ganca ænte pongantapa. ⁴⁰ Ootee tönö Niicodemö iñömö Itota wodi baö

æninque nīncoo nāni ancoo guiancoo incæ doyæncoo mānincoo ogui wamō nāna ænte pōnimō ænte wāne cædedatapa. Ayæ oodeoidi daga wencæte ante nāni cægai bai adobaī cædinque tōmēna nāna wāne cædincoo inte tōmengā baō wīni wīni cægadainpa.⁴¹ Itota ingante nāni timpodīñōmō eyequeī gōnea īnimpā. Adodea īñōmō mīintatodē nāni ææ wodiñōmō ōnontatoque īnimpā.⁴² Īimō ate guēmanguiōnæ inguimpā, ante oodeoidi, Nōwoðnæque cæcæimpā, ante nāni cæðnæ impā, ante beyæ, Ontato eyequeī impā, ante tōmēnāni Itota wodi baō māniñōmō daga wengadānimpā.

20

Itota nē wæningā incæ nāni òmæmonte quēwengā

(Māateo 28.1-10; Māadoco 16.1-8; Odoca 24.1-12)

¹ Oodeoidi guēmanguiōnæ Tabado go ate mōnō Domico tæcæ ooque pōnente bayedē Māadiya Māagadadēnā Itota wodido ponte ayongā dicabo ontato tee mōnocæte ante nāni da pæñæninca incæ do wēa godō concæi intapa. ² Botō Itota nānō nē waadedīmo tōnō Timōnō Pegodo īñōmō Itota miñæ mōna nē godincaya īñōmōnate Māadiya Māagadadēnā wæætē, Mānōmai impā, ante adinque mōnatō weca pogodo ponte apænecantapa,

—Awēnē Itota wodi baō ontatodē ōñōngante ænte taodinke æðōnō māo ñō cæðāni, ante ēñēnāmai īmōnīpa.

³ Ante apæneyongā Pegodo tōnō botō Itota miñæ mōna nē godincaya īñōmō tōmengā wodido quingæ gote pogodo pontamōnapa. ⁴ Guēa pogodo gomōna incæte tōmengā emiñæniimo botonque quingæ tōmengā wodido tāno pontabopa.

Pegodo ayæ pangantapa. ⁵ Māniñōmō tāno pōninque ædæ wæænte guite ayōmo īñāna nāna wīni caadincōoque ōñō abo incæte guidāmai intabopa. ⁶ Timōnō Pegodo botō miñæ ayæ nē pōningā Itota wodido ontatodē ponte wānē guicantapa. Wānē guiyongante doyæncōoque īñāna nāna wīni caadincōoque māniñōmō ōñō acantapa. ⁷ Ayæ Itota wodi ocabo nāna ñāni cæcadincōo adobaī ōñō acantapa. Mānincoo doyæncōo tōnō wīī adoyōmō ñōnontē intapa. Wæætē īlincōo nāā wēnente nānēñē ñō cæte ōñō acantapa. ⁸ Īinque botō tōmengā wodido ontatodē tāno nē pōniimo incæte ñōwo tæcæ adobaī wānē guitabopa. Guite ayōmo, Itota nānō ōñōniñōmō æbānō ī, ante adinque, Tōmengā ñāni òmæmonte quēwengā ingampa, ante pōnentabopa. ⁹ Edæ Wængongui angā ēñente yewæmōninque dodāni, Mōnō Codito īñōmō do wæningā incæ ñāni òmæmonte quēwenguēnengā

incæcæimpā, ante mōnatō māniñedē ayæ ēñēnāmai īnōmōnaimpa. ¹⁰ Ayæ mōnatō tōmengā miñæ nē godimōna īñōmō wadæ godinque tōmēmōna oncōnē ocæ ēmænte gotamōnapa.

Itota īñōmō Māadiya Māagadadēnā weca pongā

(Māadoco 16.9-11)

¹¹ Māadiya guiquēnē Itota wodido ontatodē yabæ īnō a ongonte wædongāimpā. Mānōmai wædinque tōmengā, Abote, ante ædæ wæænte guite ¹² adinque Wængongui anquedoda nāāmæntacoo mongæna inte Itota wodi baō ōñōniñōmō tæ contada īna acantapa. Adocanque Itota wodi ocabo ōñōniñōmō tæ contayongā wacā Itota wodi ōnōwa ōñōniñōmō tæ contate ongongā acantapa. ¹³ Tōmēna īñōmō tōmengā ingante,

—Onquiyæmi, minō quīnante wæmintawo.

Āna ēñēninque tōmengā wæætē,

—Botō Awēnē wodi baō īni ō ænte godāni awæðō. Æðōnō māo ñō cæðāni, ante ēñēnāmai wæbopa.

¹⁴ Māniñō āninque Māadiya dadi ēmænte ayongā Itota māniñōmō a ongongā adinque Itota incæcā tōmengā ēñēnāmai ingantapa. ¹⁵ Itota īñōmō,

Minō quīnante wæmintawo. Æcānō ingante ante diqui diqui mīmintawo.

Ante angā ēñēninque Māadiya, Īingā īñōmō wabānō gōnea òmæ wite nē aacā ingampa, ante ōnōwēnēnque pōnēninque,

—Ēñēmi, bitō tōmengā wodi baō īni wayōmō ænte māobi inte bai æðōnō gote ñō cæbitapa, ante apænebi ēñēmo. Apænebi ēñēninque botō tōmengā wodi baō do gote æmaīmpa.

¹⁶ Āñongante Itota tōmengā ingante,

—Māadiya, angantapa.

Angā ēñēninque tōmengā weca dadi ēmænte ebēdeo tēdēdō āninque,

—Adabōni, angantapa. Māniñō mōnō tēdēdō, “Awēnē nē Odōmōmō īmi,” ante impā.

¹⁷ Itota īñōmō,

—Edæ botō ayæ botō Mæmpo weca ocæ ēmænte godāmai Īmpa, ante adinque minō botō īmo pæ mānāmai iedā, angantapa. Wæætē minō botō tōniñadāni weca godinque tōmēnāni inānite īmai apænebi ēñēncæðānimpā. Botō ñōwo botō Mæmpo weca ocæ ēmænte goquimo Īmpa. Tōmengā īñōmō mīnitō Mæmpo adobaī īnongampa. Botō ñōwo botō Wængongui weca ocæ ēmænte goquimo Īmpa. Tōmengā īñōmō mīnitō Wængongui adobaī īnongampa, angantapa.

¹⁸ Itota angā ate Māadiya Māagadadēnā īñōmō Itota nānō nē emiñænināni weca pōninque, Awēnē Itota ingante atabopa, āninque, Tōmengā īmaiñō ante apænecā

ēñtentabopa, ante tōmēnāni inānite māo apænegacāimpa.

Itota iñōmō tōmengā ēmiñænīnāni weca pongā

(Māateo 28.16-20; Māadoco 16.14-18; Odoco 24.36-49)

¹⁹ Guēmanguiōnæ go ate iimō ate wēmō bayō tōmengā ēmiñænīnāni adoyōmō pōninque, Oodeoidi awēñēdi inānite ancaī guññente awædō, ante odemō tee mōnete ongōñānitapa. Itota tōmēnāni weca pō guuite tæcæguedē a ongōninque,

—Guññēnāmai inte gānē pōnencæmīnīmpa, angantapa.

²⁰ Mānīnō angā ate tōmengā ōnompō odōmōninque tōmengā betagonta odōmongā adānitapa. Īninque mōnō Awēñē ingante adinque tōmengā ēmiñænīnāni nangui watapæ todānitapa. ²¹ Itota wæætē adodō,

—Guññēnāmai inte gānē pōnencæmīnīmpa, angantapa. Botō Mæmpo iñōmō botō imote nānō da pōnongaimo imo bai botō adobai mīnitō ĩmīnite da godōmo goquimīni ĩmīnīpa.

²² Ante apænedinque tōmēnāni baonga woo ōngate apænecā,

—Botō ñowo pōni mīnitonga Wængongui Tæiyæ Waēmō Ōnōwoca ingante pōnō pōnōmo æedāni. ²³ Nē wēnæ wēnæ cæcā ingante adinque mīnitō tōmengā ingante godō ñimpo cæmīni ĩninque Wængongui adobai tōmengā ingante godō ñimpo cæcā quēwēmaingampa. Mīnitō wæætē nē wēnæ wēnæ cæcā ingante godō ñimpo cædāmai ĩmīni ĩninque Wængongui adobai cædāmai inte tōmengā ingante pōnō ñimpo cædāmai ĩmaingampa.

Itota ñāni ōmæmonte nē quēwengā ĩngante Tōmato acā

²⁴ Itota ēmiñænīnāni adoyōmō a ongōñōnāni tōmengā pō guuite tōmēnāni weca tæcæguedē a ongōñongā tōmengā ēmiñæningā adocanque Tōmato mēwoga ēmongā Āncadēnaque iñōmō dæ angampa. ²⁵ Ayæ ate Itota nānō nē ēmiñænīnāni wadāni iñōmō,

—Mōnō Awēñē ingante atamōnīpa, ante Tōmato ingante apænedāni ēñēninque tōmengā wæætē,

Botō iñōmō tōmengā ōnōmpo nāni daagō timpodīñōmō, Āyōmōnō empocā, ante adinque ōnongompoca gampodinque ayæ tōmengā betagonta ĩnō nāni tapa tænonte codīñōmō botō tōmēmo ōnongompoca gampote ate pōnēmai wædō, angantapa.

²⁶ Wacā tēmāna go ate Itota ēmiñænīnāni wæætē oncōnē adoyōmō pō guuite a ongōñōnāni Tōmato tōmēnāni tōnō godongāmæ pō guuite a ongongan-tapa. Odemō tee mōnete ongō incæte

Itota iñontobæ pō guuite tōmēnāni weca tæcæguedē a ongōninque,

—Guññēnāmai inte gānē pōnencæmīnīmpa, angantapa.

²⁷ Ayæ Tōmato ingante,

—Bitō tōmēmi ōnongompoca pædæ pom-podinque botō ōnompō ae. Pædæ guipote botō betagonta ĩnō gampoe. Ayæ, Wabānō incædō, ante ānāmai incæbiimpā. Wæætē pōnēe.

²⁸ Ante āñongā Tōmato,

—Botō Awēñē ĩnōmi ĩmīpa. Ayæ adobai botō Wængongui ĩnōmi ĩmīpa, angantapa.

²⁹ Ayæ Itota tōmengā ingante,

—Botō imote ate pōnēmi ĩmīpa. Wæætē nē adāmai ĩnāni incæ botō imote pōnēnāni ĩninque tōmēnāni nāni toquinque ingæimpā, angacāimpa.

Wāo nāno yewæmongainta quñante yewæmongacāi

³⁰ Tōmengā ēmiñænīnāni weca Itota, Ēñencædānīmpa, ante wadō wadō cædinque tōmengā nānō bamōnengæ ayæ godōmenque nangui pōni cægacāimpa. Botō iñōmō ĩntaa yewæmōninque mānīnō tōmengā nānō cægāinō ante wīi tōmāā yewæmontabopa. ³¹ Wæætē mānīnō ante yewæmōninque botō, Itota mōnō Codito ĩnongāimpā, ante ayæ, Tōmengā Wængongui Wengā ĩnongā ingampa, ante mīnitō pōnencæmīnīmpa, ante yewæmontabopa. Edæ tōmengā ēmōwo beyæñque mīnitō mānōmainō ante pōnēninque cōwē wæñāmai quēwencæmīnīmpa, ante botō ĩnta yewæmōmpa.

21

Itota tōmengā ēmiñænīnāni 7 ganca ĩnāni weca pongā

¹ Ayæ ate tōmengā ēmiñænīnāni Tibedi-apæ nāni āmæ yæwedeca ēmōnaiboga ongōñōnāni Itota iñōmō tōmēnāni weca pōninque a ongongā adānitapa. Edæ ĩmai batīmpa. ² Timōnō Pegodo adocanque,

Tōmato Āncadēnaque nāni āñongā tōnō Gadideabæ Cānaa nē quēwengā Nāatānaedo mēnaa, Tebedeo wēna nāna caya mēnaa, ayæ Itota nānō nē ēmiñænīna wada mēnaa mānīmpodāni adoyōmō ongōñōnānīmpa. ³ Timōnō Pegodo iñōmō tōmengā tōnō ongōñāni ĩnānite,

—Botō ñowo gæyæ dadoncæ tao gobopa.

Angā ēñēninque tōmēnāni iñōmō,

—Bitō miñæ gocæmōnīmpa.

Āninque, Āgodōedāni gomōmpa, ante tao godinque wipodē godongāmæ guidinque tōmāā woyowotæ gæyæ dadoncæ cædāni incæte gæyæ dæ æñāmai ĩnōnānīmpa. ⁴ Nāō bayonte Itota iñōmō ēmōnaiya yæwedeca a ongongā adinque, Itota ingampa, ante

tömengä emiñænināni incæ ēñēnāmai inānitapa. ⁵ Ayæ tömengä tömēnāni inānite yedæ aa pedinque,

—Inānāni, gæyæ æmīnitawo.

Åñongante,

—Enāmai imōnipa.

⁶ Ånāni ēñēninque tömengä wæætē,

—Mīnitō dicamonca wipo tömēmæ inō æpænē wo guitodonte gæyæ dadonte æedāni.

Tömengä nānō āmai cædinque tömēnāni nangui pōni gæyæ dicamonca date owo adinque ædō cæte dicamonca wēā pōnonte ænguīnāni. ⁷ Itota emiñæninimo tömengä nānō nē waadebo inōmo inte botō Pegodo ingante apænedinque,

—Ingā iñōmō mōnō Awēnē Itota ingampa.

Åmo ēñēninque Timōnō Pegodo iñōmō tömengä yabæcoo nānō gā tadongate cōnōnincōo æninque daga wēñate æpænē to go ti wææninque ōmaa taocantapa. ⁸ Wadāni Itota nānō nē emiñænināni iñōmō yæwedeca obo pōni tiēē mēetodo ganca bai iñōmō wāi wocadāni iñinque wipodē ayæ owodāni iñōmō Pegodo miñæ wogaa godinque dicamō gæyæ eyede pōni wēā pōnō pōnānitapa. ⁹ Tömēnāni wipodē inte pædæ æænoncado ponte ayōnāni, Æænongui, ante gonga emōñōmō gæyæ ōñō adinque adoyōmō wædænque pāo cō cæte ōñō adānitapa. ¹⁰ Itota tömēnāni inānite,

—Gæyæ mīni ñōwo æni wædænque ænte pōedāni.

¹¹ Angā ēñēninque Timōnō Pegodo wipodē pō guidinque dicamō ænte emōnaiya wēā tadongantapa. Edæ tiento tincoenta i todee ganca ināni mānimpodāni gæyæ ñænængade dicamō iñōmō eyede owodāni incæte dicamō wangō tēmōnāmai inimpa. ¹² Itota iñōmō tömēnāni inānite,

—Pō cæedāni,

Åñongante tömengä emiñænināni tōmānāni, Mōnō Awēnē Itota ingampa, ante ēñēninque, Æbidō imi, ante tömengä ingante ædō cæte anguīnāni. ¹³ Itota gongapamō iñōmō pōninque pāo ænte tömēnāni inānite pædæ godongā ænāni iñinque tömengä ayæ gæyæ ōñō æninque tömēnāni inānite pædæ godongā cænānitapa.

¹⁴ Mānōmai cædinque Itota do wæningā incæ ñāni ōmæmonte quēwente mempoga do ponte a ongōningā inte ñōwo tömengä emiñænināni weca mempoga go adopoque pongacāimpa.

Timōnō Pegodo ingante Itota apæncæā

¹⁵ Tömēnāni iñinque cænāni ate Itota iñōmō Timōnō Pegodo ingante,

—Timōnō Wäo wēmi ēñēmi. Botō imo mānināni pōnōmenque waadete pōñēñōnāni bitō iñōmō nāwangā botō imote godōmenque waadete pōñēmitawo.

Åñongā,

—Awēnē, Ao āmopa. Bitō imite botō waadedō ante bitō do ēñēmipa.

Angā ēñēninque Itota,

—Waadāni iñōmō botō obegaidi wēnāni bai iñōnānite bitō tömēnāni inānite botō angaiñō ante odōmonte apænebi ēñencædānimpa, angantapa.

¹⁶ Ayæ wæætē,

—Timōnō Wäo wēmi ēñēmi. Bitō nāwangā botō imote waadete pōñēmitawo.

Åñongā,

—Awēnē, Ao āmopa. Bitō imite botō waadedō ante bitō do ēñēmipa.

Angā ēñēninque Itota,

—Waadāni botō obegaidi bai iñōnānite bitō tömēnāni inānite aacæbiimpa, angantapa.

¹⁷ Itota mempoga go adopoque tömengä ingante,

—Timōnō Wäo wēmi ēñēmi. Bitō botō imote waadete pōñēmitawo, ante angantapa.

Itota mempoga go adopoque tömengä ingante, Bitō botō imote waadete pōñēmitawo, ante angā ēñēninque Pegodo wæwente inongāimpa. Incæte Itota ingante,

—Awēnē bitō tōmāā ēñēmi imipa. Bitō imite botō waadedō ante bitō do ēñēmipa.

Ante wæyongā Itota wæætē,

—Waadāni iñōmō nē botō obegaidi bai iñōnānite bitō tömēnāni inānite botō angaiñō ante odōmonte apænebi ēñencædānimpa. ¹⁸ Bitō imite nāwangā āmopa. Bitō wēñæmiyedē tömēmi nāmā daga wēñadinque, Ædōmō goinēmo, ante bitō goinēnonque do gobi imitapa. Nōwo iñōmō bitō picæmi bayedē bitō pædæ gopoyōmi wacā incæ bitō imite godō daga wēñadinque bitō goinēnāmai iñōmō māniñōmō bitō imite māocā gocæbiimpa.

¹⁹ Pegodo ingante mānōmāinō ante apænedinque Itota iñōmō, Tömengä ingante æbānō wæñōnāni wæñongā Wængongui ñāō apāite bai nānō emōnō edonque bacæimpa, ante odōmoncæte ante apænegacāimpa. Ayæ godōmenque tömengä ingante,

Botō miñæ tee empo pōe, angacāimpa.

Itota emiñæniningā nānō nē waadecā

²⁰ Pegodo guiquēnē dadi emænte botō Itota emiñæninimo nānō nē waadebo iñōmō tömēna miñæ tee empo pōmo acantapa. Mānimo iñōmō do mōni cæñedē Itota tōñō āññōmonque tæ contadinque, “Awēnē bitō imi æcānō godō odōmonguīnaa, apænebi ēñēmōnie,” ante nē apænedimō iñōmoimpa.

²¹ Pegodo botō imo adinque Itota ingante,

—Ingā iñōmō nē tee empo pongā diyæ æbānō tömengä beyæ bacæimpa.

²² Åñongā Itota wæætē,

—Botō ocæ emænte ponguinganca tömengä ayæ quēwencæcāimpa, āmo bai bitō

wæætē ædō cæte nē ämi inguimii. Botō iñömō nē anguimo ïmopa. Bitō guiquēnē botō miñæ tee empo ponguēnēmi ïmipa, angantapa.

²³ Mänömaï beyæ pancadäniya möni tönñadäni weca godinque gode ä gode ä cædinque botō ïmotedō ante apænedinque, ïngä iñömō cōwē wænāmaï quēwengingä ingampa, ante tedewengadänimpa. Itota iñæmpa, ïngä iñömō wænāmaï quēwencæcäimpa, ante änāmaï ingacäimpa. Wæætē, “Botō ocæ emænte ponguinganca tōmengä ayæ quēwencæcäimpa, ante ämo bai bitō ædō cæte anguimii. Botō anguimo ïmopa,” ante mäninque angacäimpa.

²⁴ Tömēnāni, ïngä wænāmaï quēwengä ingampa, ante nāni nē apænedimo iñömō edæ botō tōmengä nānō nē emiñænimo adobo ïmopa. Tömēmo, Æbänō batimpa, ante botō apænedō iñömō nāwangä ante nē apænedimo inte botō adodō ante tōmānō ante nē yewæmönimo ïmopa. Mäninō ante botō angainō iñömō nāwangä impa, ante mönitō ēñēmönipa.

²⁵ Itota iñömō nanguï pōni godōmenque wadō wadō cægacäimpa. Æbänō cæcää, ante tōmää nānō cægainō ante adinque yewæmömöni bai mänintacoo möni yewæmönintacoo ñönonguï ante edæ inguipoga tōmäo incæ wii eyepæ incædönimpa, ante pönēmopa. Mäninque ante yewæmömopa.

Itota nänö da godongäinäni Näni Cægäinö

Wængongui Täiyæ Waëmö Önöwoca poncæcäimpa, ante

¹ Teopido bitö acæbiimpa, ante botö do yewæmöninque, Itota æbänö mä cægacäi, ante, Itota æbänö mä odömonte apænegacäi, ante yewæmontabopa. Mänömainö ante do yewæmönimo inte botö adobo Odoca inömo inte ñöwo godömenque yewæmömö ae. ² Itota do inömo, inäni botö imotedö ante nê apænequinäni inänipa, ante cædinque tömënäni inänite apænte æninque da godongacäimpa. Ininque tömengä nänö æite goquionæ inönte tömënäni tönö godongämæ ongöninque Itota inömo Wængongui Täiyæ Waëmö Önöwoca tönö cædinque tömënäni inänite, Botö dæ gobo ate munitö iima cæcæminimpa, ante apænegacäimpa. Ininque apæneca ate tömengä ingante Wængongui do ænte mæicä inque ingä æigacäimpa. Ininque mäninganca tömengä nänö cægäinö ante do yewæmönimo inte botö inömo, Bitö Teopidobi godömenque acæbiimpa, ante ñöwo wæætê yewæmömopa.

³ Itota adocä incæ nantate wægaingä inte ñäni ömæmonte ate coadenta eönæ manimpöönæ inguipoga quëwëninque tömënäni weca müngä inte wæætê pö wæætê pö cædinque mä pöni cædongäimpa. Ininque, Tömengä näwangä müngä inte mänömai cæcampa, ante adinque tömënäni ædö cæte wadö ante pönenguinänii. Ayæ tömënäni weca a ongöninque tömengä tömënäni inänite, Wængongui Awënë Odeye nempo quëwëncæminimpa, ante tömänö ante adodö adodö ante apæneca ëñengadänimpa.

⁴ Tömënäni tönö godongämæ ongöninque Itota iima angantapa.

—Wii wayömö goedäni, Eedotadê inömo ee quëwëedäni, angantapa. Botö Mæmpo inömo, Wacä ingante da pönömo æninque ëwocacæminimpa, ante do apænebo ëñëminitawo. Tömengä, Da pönonguimo, ante nänö nê angaingä ingante ante ænte ëwocacæte ante munitö ñöwo wänö cöedäni. ⁵ Edæ Wäo wodi inömo æpænê guidongacäimpa. Wængongui Täiyæ Waëmö Önöwoca guiquënë munitö baonga wantæ inö pö guicæcäimpa, ante Itota apænegacäimpa.

Itota öönædê cæcampa

⁶ Ayæ Itota tönö godongämæ ponte ongönäni inömo tömengä ingante anänitapa.

—Itota ëñëmi. Mönö idægocabo mönö quëwëngaimæ inönte wadäni do ö ænäni incæte bitö ñöwo wæætê adobæ æninque

mönitö Awënë Odeyebi oo bacæ cæbitawo. Edæ, Bitö nempo oo pöni godongämæ quëwëncæmönimpa, ante cæbitawo, ante ëñencæte ante wæmönipa.

⁷ Ancaa äñönäni,

—Inæmpa munitö ante wæinö bai, Äyedönö baquii, ante, Äpogadö baquii, ante munitö wii ëñënguëñëmini iminipa. Mæmpoque nê angaingä inte mäninö ante ëñengampa. ⁸ Wæætê Wængongui Täiyæ Waëmö Önöwoca pö guidingque pönö cæcä ate munitö wæætê tæi piñænte ëwocamini edæ bacæminimpa. Ininque, Botö æbänö cægabo, ante nê adimini inte mäninö botö cægäinö ante munitö täno Eedotadê inömo quëwënte apænedinque ayæ Oodeabæ mäo apænedinque ayæ Tämadiabæ mäo apænedinque godömenque tömämæ mäo apænemini ëñencädänimpa, ante Itota angacäimpa.

⁹ Mänömainö ante apæneca ëñente a ongönönäni Itota mäniñömö ongonte æi boguimancodê ingæ æicä æmö agadänimpa.

¹⁰ Öönædê æite ingæ göcä æmö ayönäni edæ onguinæna näamænta weocoo mongæna tömënäni weca a ongöninque edæ, ¹¹ tömënäni inänite apænedinque,

—Gadideabæ quëwëmini inte onguinæmini ëñëedäni. Quinante æmonga a cöminii. Edæ Itota munitö tönö ongöninque öönædê æicä aminitawo. Edæ öönædê æicä mini adi bai adocä Itota iincayæ ate ocæ ëmante poncæcäimpa, ante apænedatapa.

Codaa nänö cæquënëno wacä cæcæcäimpa, ante cædäni

¹² Oodeoidi nani guëmanguionæ cöwë nani goganca mäningancaque i ininque wii gobæ i ininque tömënäni Odibowænquidi nani anquidi ongöninque ocæ ëmante wææ Eedotadê pönänitapa. ¹³ Tömënäni ëmowo Pegodo tönö Wäo, Tantiago tönö Äntade, Pedipe tönö Tömato, Batodömê tönö Mäateo, Adepeo wengä Tantiago, wacä, Mönö ömæ ingæimpa, ante nê ängä Timönö, Tantiago wengä Codaa. Mänömai ëmönäni inte pö guidingque tömënäni nani wänoncönê æmongapaa æi guidänitapa. ¹⁴ Ayæ inäni tönö wadäni Wængongui ingante godongämæ apæneceate ante cöwë pö pö cægadänimpa. Onquiyænäni adoba Itota badä Mäadiya tönö ayæ Itota biwiidi tönö cöwë ponte apænedönänimpa.

¹⁵ Mäniñedê Itota ingante nani tee empote quëwënanii tiento bæinte ganca inäni inte ongönönäni Pegodo tæcæguedê ængæ gantite apæneantapa. ¹⁶ “Inänäni ëñëedäni. Nöwocä Codaa wodi Itota wodi ingante nê æncædäni inänite nê godö odömongä ingantawo. Edæ tömengä ingante ante Wængongui Täiyæ Waëmö Önöwoca

wēēnēñedē apæñecā ēñēninque awēnē Dabii wodi nānō yewæmongaīnō bai cōwē īnque baquīnō anguēnē. ¹⁷ Edæ Itota mōnitō īmōnite apænte æninque Codaa ingante adobai apænte ængacāīmpa. Īnque mōnō cabo mōnō nē cæquēñēnō ante Codaa wodi adocā incæ mōnō tōnō godongāmæ cæcā ingacāīmpa. ¹⁸ Tōmengā wīwa cæte tīguitamō nānō ænintamō incæ adodō godongā ænānitapa. Tōmēnāni wæætē tīguitamō æninque, Waodānido bacæīmpa, ante ōmæ godonte ænānitapa. Tōmengā īñōmō guidōmēmæ wæænte ōmengō tæi æbæ godente æmæwo wængantapa. ¹⁹ Mānōmai wængā ēñēninque Eedotadēē quēwēnāni tōmānāni, 'Wepæ onguipo ba awædō,' ante tōmēnāni nāni tededō Atedāmæ pemōnānitapa. ²⁰ Edæ Āmotamīni nāni Angaintaa īīmai ante dobæyedē yewæmongatīmpa.

'Tōmengā oncō æmæwo ōnonconque bacæīmpa.

Wacā mānincōnē cōwē quēwēnāmai incæcāīmpa.'

Ante nāni Āmotamīni Angainta bai do batīmpa. Ayæ,

'Tōmengā nē aacā bate nānō cæquēñēnō incæ wacā badinque cæcæcāīmpa,'

ante yewæmōnte ongōmpa."

²¹ Ante apænedinque Pegodo godōmenque īīmai ante apæñecantapa. "Mānōmai īī īnque Codaa wodi nē nānō cæquēñēnō incæ edæ wacā cæcæcāīmpa, ante ñōwo mōnō apænte angæīmpa. Awēnē Itota īmæca mōnō tōnō guēa cægongāñedē wadāni godongāmæ nē cægōnināni īnānite adinque mōnō īīmaiñō ante apænte ængæīmpa.

²² Wāō wodi nānō guidōñedē cægōninque ñōwoōnæ Itota nānō æite goōnæ ganca æcānō æcānō mōnō tōnō godongāmæ cægōnināni īnāni, ante adinque mōnō adocanque ingante apænte ængæīmpa. Apænte æmō ate tōmengā, Itota dobæ ñāni ōmæmōngantapa, ante nē againgā inte wæætē mōnō tōnō godongāmæ apæñecā incæcāīmpa."

²³ Ante Pegodo angā ēñente cædinque tōmēnāni wæætē, Æcānō æcānō nē agaiñāni īnāni, ante adinque mēnaa īnate apænte ænānitapa. Adocanque Ootee, Badatabato nāni ānongā inte tōmengā mæmæ beyæ, Yoto, ante nāni pemongaingā īñongante tōmēnāni tōmengā ingante apænte æninque edæ wacā ingante Māatiya ingante apænte ænte gōnōnānitapa. ²⁴ Mānōmai apænte æninque Wængonguī ingante apænedānitapa. "Awēnē ēñēmi. Mōnitō æbānō pōñēmōni, ante tōmāā ēñēmi inte bitō īīna īnate adinque æcānō ingante do apænte ængabiī, ante odōmōmi amōni. ²⁵ Edæ Codaa wodi tōmengā nānō pante wænguinque oda cæcantapa.

Īnque bitō ñōwo wacā ingante da godōmi godinque Codaa wodi nānō cæquēñēnō ante cæcæcāīmpa, ante āmii, ante wæmōñipa."

²⁶ Ante Wængonguī ingante apænedinque tōmēnāni, Æcānō īnaa, ante ēñencæte ante cædinque dicamō æninque, Wo godō wo godō cæyōmō to ta wææ acæī, ante cæte ayōñāni Māatiya nānō cæ to ta wæænca adinque, Mōnō īmōnte Itota da godongā nē godimō ōnōmpo tipæmpoga go adocanque īñōmōnte tōmengā mōnō cabo badinque godongāmæ cæcæcāīmpa, ante cægadāñīmpa.

2

Wængonguī Tæiyæ Waēmō Ōñōwoca pongampa

¹ Tōmēmō incadepo ba ate Pentecotee æmæmænoca nāni āōnæ īñōnte tōmēnāni nāni cabo adoyōmō ponte godongāmæ ongōnānitapa. ² Ongōnte ēñēñōnāni woboyæ nanguī pæmænte ā bai īñontobæ ōōnædē pō ēñēñōnāni oncōnē nāni ongōncōnē tōmancōnē wææ guite bai woboyæ nanguī pæmænte ā bai ēñēñānitapa. ³ Ayæ waodāniya incæ gonga bai onguēñē onguēñē bæco adāñitapa. ⁴ Ayōñāni

Wængonguī Tæiyæ Waēmō Ōñōwoca incæ tōmānāniya pō guicā ēwocadāñitapa. Pō guidinque Wængonguī Ōñōwoca pōnō cæcā beyænque tōmēnāni wadāni nāni tededō bai wadāni nāni tededō bai mā apænedānitapa.

⁵ Māniñedē oodeoidi Wængonguī ingante guīñente quēwēnāni inte edæ wabæca wabæca tōmāmæ quēwēninque ñōwo Eedotadēē ponte quēwēñōnāñīmpa. ⁶ Īñāni īñōmō woboyæ nanguī pæmænte bai ā ēñente wædinque ponte ēñēñōnāni Itota ingante nē pōñēnāni īñōmō ñōwo pōñāni nāni tededō bai tededāni ēñēñānitapa. Adocanque nānō tededō bai wacā nānō tededō bai tededāni ēñēninque tōmēnāni, Æbānō cæte tōmāmō tededō bai tededāni ēñēmōni, ante wædāñitapa. ⁷ Tōmēnāni nāmāneque apænedinque,

—Īñæmpa Gadideabæ quēwēñāniñique inte īñāni mānōmai tededāni awædō.

⁸ Īnque ædō cæte mōnō ēñagaīōmæ mōnō tededō bai tededāni ēñēmōō, ante ancaī guīñente wædāñitapa. ⁹ Edæ īñōmō nē ongōmō īñōmōnte pancadāniya Padatiabæ quēwente pōñōmō wadāni guiquēñē Mēediabæ, Edāmæ, Mēetopotāmiabæ, Ood-eabæ, Capadotiabæ, Pontobæ, Atiabæ quēwente pōñāni īñāniya. ¹⁰ Wadāni guiquēñē Pidiguīabæ, Pampidiabæ, Eq-uitobæ quēwente pōñāni īñāniya. Wadāni guiquēñē dibiabæidi īñāni inte Tidēne īñōmō quēwente pōñāniya. Wadāni guiquēñē

Odōmā īñōmō quēwēninque ēñacæ ante ponte owodāñīmpa. ¹¹ Odōmā īñōmō nē

quēwēnināni iñōmō pancadāniya oodeoidi ēñagāināni iñōnāni pancadāniya wæætē wadāni incæ oodeoidi pōnēnāni bai adodō pōnente oodeoidi bai bagāināni inānīpa. Ayæ wadāni guiquēnē codetenteidi tōnō adabeidi inte pōnāni inānīpa. Īnīnque mōnō wabæca wabæca quēwēnīnque wadāni nāni tededō bai wadāni nāni tededō bai nē tedemō imōmpa. Incæte iñnāni guiquēnē, Wængongui waa pōnī cæcā ingampa, ante mōnō tededō bai mā pōnī tededīnque apænedāni ēñēmōmpa tōō.

¹² Ante wædīnque tōmēnāni nāni cabo nāmāneque apænedīnque,

—Ebnāō ēñēmōō, ante wæmōnīpa tōō.

¹³ Ante wæyōnāni pancadāniya babæ apænedīnque,

—Biinōmæ mīimæ tōmo pōnī bedīnque dowæñāni inte tededānīpa, ante badete togadānīmpa.

Pegodo tōmēnāni inānīte apænecampa

¹⁴ Mānōmaī tedeyōnāni Pegodo iñōmō ōnōmpo tipæmpoga go adocanque ināni tōnō ængæ gantidīnque nangui tedecā ēñengadānīmpa. “Oodeoidi ēñēedāni. Ayæ wamīni guiquēnē Eedotadēē iñōmō ñōwo ponte owomīni inte mīnitō oodeoidi tōnō tōmāmīni ēamonca ongonte ēñēedāni. Botō, Ebnāō ī, ante edonque apænebo ēñencæmīnīmpa,” angantapa.

¹⁵ “Gāwadecæ impa diyæ tī nāmæ bete dowænte baquīnānī. Īñæmpa nænque ayaōnā ææñongā ædō cæte mīni ānō bai bete dowænte baquīnānī. ¹⁶ Wæætē Wængongui beyæ nē apænegangā Oedo wodi do nānō angainō bai ñōwo cædānīpa, ante apænebo ēñēedāni. Oedo wodi iñōmō iīmāinō ante yewæmongacāīmpa.

¹⁷ Wængongui iīmāi angampa, angacāīmpa. Īnīnque bayedē botō Ōnōwoca ingante tōmānāniya āmo pō guicā ēwocacædānīmpa.

Māniñedē onquiyæñāni incæ onguīñæñāni incæ

mīnitō wēnāni inōnāni inte botō beyæ apænecædānīmpa.

Edēnīnāni iñōmō ate bai mā pōnī acædānīmpa.

Picæñāni guiquēnē nō wīimonte bai acædānīmpa.

¹⁸ Ayæ botō Ōnōwoca ingante āmo pō guicā ēwocadīnque

onguīñæñāni incæ onquiyæñāni incæ botō beyænque nē cædāni inōnāni inte botō beyæ apænecædānīmpa.

¹⁹ Edæ mīni ææmō ate pōnengīnque ante botō ōnōædē mā cæbo acæmīnīmpa.

Ayæ imæca adobai pōnō cæbo ate wepæ gonga tēemā nangui mongæ adīnque ēñencæmīnīmpa.

²⁰ Edæ nænque tāno wentamō bayō apāicā wepæ emō ba acæīmpa.

Ayæ ate tōmengā nānō ponguiōnæ iñonte Wængongui Awēnē incæ tæi piñængā inongā inte

ñāō apāite bai emōnīnque poncæcāīmpa.

²¹ Īnīnque botō emōwo ante nē aa pedāni iñōmō

tōmānāni botō æmo beyænque quēwencædānīmpa. Ante Wængongui Awēnē cæcæcāīmpa, ante Oedo wodi yewæmongacāīmpa.”

²² Ante apænedīnque Pegodo godōmenque iīmāi ante apænecantapa. “Idægoidi, apænebo ēñēedāni. Itota Nāatadeta nē quēwengāingā nāwāngā botō nē da pōnongā ingampa, ante pōnencæmīnīmpa, ante mā cædīnque Wængongui Itota tōnō godongāmæ tæi piñænte nangui cæcā ate Itota mīnitō weca bamōnengæ cædīnque nangui cægacāīmpa. Īnīnque mānōmaī cæcā nē agaimīni inte mīnitō, Nāwāngā Itota ingante Wængongui da pōnongā ponte cæcampa, ante do ēñēmīnīpa. ²³ Wængongui nāmā pōnēnīnque, Codito ingante tōmēnāni nempo pædæ godoncæboīmpa, ante do angaingā inte, Mīnitō tōmengā ingante ænīnque mānōmaī cæcæmīnīmpa, ante do ēñengacāīmpa. Īnīnque mīnitō iñōmō Itota ingante bæi ongonte ænīnque ēñente cædāmāi ināni nempo pædæ godōnīnque, Mīnitō tōmengā ingante awāa timpodīnque wææ tīwate wænōedāni, ante āmīni wænōnānītapa. Mānōmaī ōnōnecaque tedete beyæ mīnitō tōmēmīni edæ nē wænōmīni bai bamīnīpa tōō. ²⁴ Mīnitō mānōmaī wadāni tōnō cædīnque wænōmīni beyæ Itota iñōmō mōnō wænguēnēmāmo teēmē mongænte caate wædīnque wængacāīmpa. Ayæ pæ opate ōñōñongante Wængongui wæætē, Idæwaa, ante wi ænote bai cædīnque angā ate Itota ñāni ōmæmonte ta pongantapa. ²⁵ Adocā Codito beyæ ante apænedīnque awēnē Dabii wodi iīmāi ante yewæmongacāīmpa.

‘Botō, Mōnō Awēnē cōwē botō weca mæ on-gongampa, ante atabopa.

Īnīnque tōmengā botō tōmēmæ inō tōō æmænte ongongā Īnīnque botō imote ædō cæte bæ tadāni wæquīmō.

²⁶ Mānōmaī beyæ botō, Watapæ bacæīmpa, ante mīmōnē pōnēmo inte botō ōnōneca āmotamīni ante bai nangui tobopa.

Botō ñāni ōmæmongīnque nē wæwocabo imopa, ante pōnēmo inte botō guīñēñate wædāmāi inte baō ēñate quēwencæboīmpa.

²⁷ Wængongui ēñēmi. Botō wadāni nāni wænte ongōñōmō ōñōñōmote bitō emō cæte godāmāi incæbiīmpa.

Bitō imite nē cæbo inte botō tōmēmī cædō ante cōwē cæbo iñōmote bitō ædæmō

wææ aabi ate botō baō ñōmāadāmaī incæboīmpa, ante edæ botō do ēñēmopa.

28 Taadō botō quēwenguīnō ante bitō do odōmōmi agaboīmpa.

Bitō weca æīdinque bitō awīnca adīnque watapæ tocæboīmpa,

ante awēnē Dabii wodi āmotamīni ante baī apænegacāīmpa.”

29 Ante apænedīnque Pegodo godōmenque apæneantapa. “Īñānāni ñōwo edonque apænebo ēñenguēnē quēwēmīni. Mōnō mæmæ Dabii wodi do wængacāīmpa. Tōmēngā māo do daga wengadāīmpa. Edæ tōmēngā wodido nāni wengaiñōmō ñōwo ganca a ongō amīnīpa. 30 Incæte tōmēngā īngante Wængonguī, Dabii ēñēmi, angacāīmpa. Bitō pæīnāni wææ pæyōnāni adocanque īngante botō bitō awēnē contāīmpaa pōnō cōnōmo contādīnque tōmēngā īñōmō nē Awēnē bacæcāīmpa, ante apæneccā ēñēnīnque awēnē Dabii wodi Wængonguī beyæ nē apænegacāīmpa īngā īnte edæ, Wængonguī tōmēngā nānō ānō baī cōwē cæcæcāīmpa, ante do ēñēngacāīmpa. 31 Ayæ, Æbānō cæquīngā, ante do ēñēngāīngā īnte tōmēngā, Mōnō Codito īñōmō waodāni nāni wænte ongōñōmō ñōñōngante Wængonguī ēmō cæte godāmaī īnte wææ aacā beyænque tōmēngā baō incæ ñōmāadāmaī īngæīmpa, ante apænegacāīmpa. Mānōmaīnō ante apænedīnque awēnē Dabii wodi, Mōnō Codito ñāni ōmæmoncæcāīmpa, ante do apænegacāīmpa. 32 Itota īngante Wængonguī, Nāni ōmæmōe, angā ñāni ōmæmongantapa. Īnīnque mānīnō tōmēngā nānō ñāni ōmæmongaīnō ante nē adīmōni īnte mōnītō tōmāmōni edæ, Nāwangā īmpa, ante nē apænemōni īmōnīpa.”

33 “Īnīnque Wængonguī angā beyænque Itota īnque īngā ōōnædē æīdinque Wængonguī tōmēmæ īnō tæ contate ongongampa. Ayæ Mæmpo Wængonguī, Botō Ōnōwoca īngante æncædāīmpa, ante nānō nē angāīngā īngante do godongā ænīnque Itota wæætē mōnītō īmōnīte ñōwo da pōnongā ænte ēwocāmōnīpa. Īnīnque mōnītō guīquēnē gonga bæco ate wæmīnitawo. Wadāni nāni tede baī tedemōni ēñēnte wæmīnitawo. Edæ Wængonguī Ōnōwoca pōnō cæcā beyænque gonga bæco amīnīpa. Wængonguī Ōnōwoca pōnō cæcā beyænque wadāni nāni tede baī tedemōni ēñēmīnīpa. 34 Itota ōōnædē īnque īngā æīcā baī awēnē Dabii wodi wīī adobaī æīgacāīmpa. Incæte tōmēngā godōmenque apænedīnque īīmaī ante yewæmōngacāīmpa.

‘Awēnē Wængonguī incæ botō Awēnē īngante apænedīnque, Nē Awēnē īmi ēñēmi. Botō tōmēmæ īnō tæ contayōmi,

35 botō bitō īmite nē pīinte cædāni īnānīte bæ tabo ate bitō tōmēnāni īnānīte pīnā gāwate baī cæcæbiīmpa,’ ante Awēnē Wængonguī angacāīmpa,” ante Dabii wodi yewæmōngacāīmpa.

36 Ante apænedīnque Pegodo godōmenque īīmaī angantapa. “Mānōmaī beyæ mīni idægocabo tōmāmīni, Īīmaīnō ante nāwangā pōnī īmpa, ante ēñēncæmīnīmpa. Mānīngā Itota īngante mōnītō ñænquedīmæ gōnōnte wæñōmīni nē wæñīngā īngante ante apænedīnque Wængonguī incæ, Itota nē Awēnē īnongā īngampa, ante ayæ, Nē Codito īnongā īngampa, ante edæ do cæcægāīmpa.”

37 Ante Pegodo apæneccā ēñēnīnque tōmēnāni, Æ, wēnæ wēnæ cæte awædō, ante ancaī guīñēnte wæēdīnque Pegodoidī īnānīte, –Īñānāni, æbānō cæquēñēmōni īmōnī.

38 Āñōnānīte Pegodo wæætē,

–Īīmaī cædāni. Mōnītō wēnæ wēnæ mīni cædīnō ante Wængonguī pōnō ñīmpo cæcæcāīmpa, ante cæēdīnque, Æmæwo wēnæ wēnæ cætabopa, ante Itota Codito ēmōwo ante apænedīnque apæñē guīēdāni. Mānōmaī cæmīni adīnque Wængonguī tōmēngā Ōnōwoca īngante da pōnongā ænte ēwocacæmīnīmpa. 39 Edæ mōnītō īmīnīte aa pecā incæ mīni wēnāni īnānīte aa pecā incæ gobæ quēwēnāni īnānīte aa pecā incæ ayæ ate quēwēnāni īnānīte aa pecā incæ mōnō Awēnē Wængonguī nānō nē aa pedāni īnānīte apænedīnque, Botō ānō baī cōwē cæcæboīmpa, angampa.

40 Ante apænedīnque Pegodo godōmenque nangū ānīnque, Ēñenguēnē quēwēnānīi, ante wantæpiyæ apæneantapa.

–Nōwodāni īñōmō nāmanque nāni cæīnēnō ante idīquībæ nāni cæī baī mōnītō adobaī cædāmaī īnte nōīngā cæte waa quēwēdāni.

41 Ante Pegodo ancaa angā ēñēnīnque pancadānīya Ao ānīnque æpæñē do guīdānītapa. Īnīnque edæ mānīōnæ todee mīdo ganca īnāni mānīmpodāni wede pōnēnīnque do pōnēngāīnāni tōnō adocabodāni bagadānīmpa. 42 Īñāni īñōmō adocabodāni badīnāni īnte cōwē ñīmpo cædāmaī īnīnque godongāmæ pō pō cæyōnānīte Itota nānō da godongāīnāni apænedāni ēñēñōnānīmpa. Ayæ nāni pōnēncabo īñōnāni īnte wacā īngā wacā īngā watapæ apænedīnque pāō pā ænte godongāmæ cænīnque Wængonguī īngante cōwē apænete quēwēñōnānīmpa.

42 Īñāni īñōmō adocabodāni badīnāni īnte cōwē ñīmpo cædāmaī īnīnque godongāmæ pō pō cæyōnānīte Itota nānō da godongāīnāni apænedāni ēñēñōnānīmpa. Ayæ nāni pōnēncabo īñōnāni īnte wacā īngā wacā īngā watapæ apænedīnque pāō pā ænte godongāmæ cænīnque Wængonguī īngante cōwē apænete quēwēñōnānīmpa.

Nāni pōnēncabo godongāmæ waa cæte quēwēñōnānīpa

43 Īnīnque edæ tōmānāni guīñēnte wæēdīnque ee quēwēñōnānīmpa. Ayæ Itota nānō da godongāīnāni īñōmō, Tōmānāni pōnēncædānīmpa, ante cæēdīnque Wængonguī Tæīyæ Waēmō Ōnōwoca tōnō cæēdīnque

tömēnāni nāni pōnēningue ante mā cædinque bamōngæ nangui cædōnānimpā. ⁴⁴ Nē pōnēnāni tōmānāni adoyōmō pō pō cædinque tōmēnāni nāni mānincōo incæ, Tōmāmō qui impā, ante nē pōnēningue, Wacā ingā wacā ingā mōnō godongāmæ godonguinque māmompā, ante cædōnānimpā. ⁴⁵ Māincōo tōnō ōmæ nāni ēadincōo incæ godonte æ godonte æ cædinque wadāni nē ōmaadāni inte wādāni inānite pancæ pancæ godōnānimpā. ⁴⁶ Ī inique iimō iñō iimō iñō adoyōmō pōninque Wængongui oncō ñænæncōnē yabæcōnē nē guī guī cædāni inte mīmōno nō pōnēningue tōmēnāni oncōnē adobaī pāo pā ænte watapæ todinque godongāmæ cænōnānimpā. ⁴⁷ Tōmēnāni edæ Wængongui ingante, Waa pōni nē cæbi imipā, ante ancaā āñōnāni wadāni edæ tōmēnāni inānite waa adōnānimpā. Ayæ mōnō Awēnē pōnō cæcā ate tōmēnāni edæ, Itota Codito ængā beyænque mōnō quēwengæimpā, ante pōnēningue iimō iñō wacabomō iimō iñō wacabomō nē pōnēnāni badinque edæ tæiyænāni bagadānimpā.

3

Cōmāwaingā ingante āna waa bawacampa

¹ Īncayæ ate nænque ædæ wæicā ate oodeoidi nāni cōwē Wængongui ingante apænēdōñēdē Pegodo tōnō Wāō iñōmō Wængongui oncōnē ñænæncō yabæcōnē guīcæte ante æidatapa. ² Æite ayōna wadāni pōninque cōmāwaingā ēñate nē pædingā ingante næænte māmōnāni pongā adatapa. Īngā cōmāwaingā iñōmō nē pō guīdāni inānite, Pōnōmi æmoe pōnōmi æmoe, ancæcāimpā, ante cædinque tōmēnāni tōmēngā ingante iimō iñō iimō iñō næænte pō næænte pō cædinque edæ Wængongui oncō ñænæncō boyæ yabædemō, Wainemō, nāni ānemō yabæque cō cædōnānimpā. ³ Īniquē ñōwo Pegodo tōnō Wāō Wængongui oncō ñænæncōnē yabæcōnē pō guīcæ cæda adinque tōmēngā tōmēna inate, Pōnōmīna æmoeda, angantapa. ⁴ Angā ēñēninque Wāō tōnō tōmēngā ingante cōwā adinque Pegodoque apænecantapa.

—Mōnatō imōnate ææmō ae.

⁵ Angā ēñēninque cōmāwaingā, Botō imote wabānō pōnōna ænguimo, ante pōnēningue ææmō ayongā ⁶ Pegodo iñōmō,

—Quīnō māmopa pōnōmo ænguimii. Edæ oodo incæ tīguitamō incæ ōmæpobo imopa. Wæætē tæiyæ wæmō botō ēwocadō ante bitō imite pōnō apænebo ate bitō æe. Nāatadeta quēwengāngā Itota Codito ēmōwo beyænque bitō dao dao goe, angacāimpā.

⁷ Āninque Pegodo cōmāwaingā tōmēmæ iñō pædæ wææmpo bæi ongonte tōō æmængā ate cōmāwadingā ōnōwa tōnō

ōnoncāiwa tæī piñæwacā. ⁸ Ate iñontobæ ængæ gantite dao dao gocantapa. Ayæ Wāō tōnō Pegodo mīñæ Wængongui oncō ñænæncōnē yabæcōnē godongāmæ go guīdinque dao dao go togæi togæi godinque Wængongui ingante waa ate apænēdinque, Wængongui, bitō cōwē waa pōni inōmi inte pōnō cæbi æmopa, ante nangui apænecantapa. ⁹ Wængongui māmōmāi waa cæcampa, ante nangui pōni tededinque dao dao gocā adinque edæ tōmānāni, ¹⁰ Æ, ĩngā iñōmō, Pōnōmi æmoe pōnōmi æmoe, ante Wængongui oncō ñænæncō boyæ yabædemō, Wainemō, mōnō ānemō gāānē mōnō nē ānecōningā adocā ingampa. Ante adinque, Quīnō baī cæte waa bacāi, ante ancaī guīñente wægadānimpā.

Tadōmōō yabætaa ongonte Pegodo apænecampa

¹¹ Māniī cōmāwaingā ĩngā incæ Pegodo tōnō Wāō inate winimā winimā cæcā adinque wadāni tōmānāni guīñente wædinque Tadōmōō yabætaa nāni āñōmō pogodo ponte tōmēnāni weca guīdānitapa. ¹² Guīdāni adinque Pegodo, “Mīni idægocabo ēñēdāni. Mōnatō imōnate quīnante waa amīni. Māmōmāi waa bawacā adinque edæ quīnante guīñente wæmīni. Mōnatō edæ, Tōmēngā dao dao gocæcāimpā, ante cædinque tæiyæ wæmōna imōnapa diyæ tæī piñænte cæquīmōna. ¹³ Abadāō wodi Itæca wodi Aacobo wodi tōmēnāni, Mōnō Wængongui inongā ingampa, ante nāni nē angāingā inte Wængonguinque cæcā ate waa bawacampa. Mōnō wæmæidi Wængongui incæ, Itota botō imote nē cædongæ ñāō baī ēmōñongante tōmēngā ingante waa acædānimpā, ante māmōmāi cæcampa. Adocā Itota ingante mīnitō iñōmō, Wænongæimpā, āninque pædæ godōmīnitapa. Ayæ Pidato, Nīmpo cæbo gocæcāimpā, ante apænte angā ate mīnitō wæætē Pidato weca ongōninque adocā ingante ante Baa amīnitapa. ¹⁴ Īniquē nē Tæiyæ Wæmō inongā inte nō cæyongante mīnitō Baa āninque wæætē nē wæñōningā ingante ante āninque, Īngā ingante nīmpo cæbi pongæ, amīnitapa tōō. ¹⁵ Īniquē mōnō quēwenguimāmo nē pōnongā ingante Baa āninque mīnitō nē wæñōnīmīni imīnipā. Incæte Wængongui tōmēngā ingante, Nāni ōmæmōe, angā nāni ōmæmongantapa. Īniquē tōmēngā ñāni ōmæmongā nē adīmōni inte mōnitō, Æbānō cægacāimpā, ante adodō ante nē apænēmōni imōnipā. ¹⁶ Adocā Itota ēmōwo ante apænēmōna ēñente pōnēningue māningā cōmāwadingā mīni nē adingā iñōmō ñōwo tæī piñæwacampa. Edæ Itota pōnō cæcā beyæ māniī onguīñængā nē pōnēngā badinque Itota ēmōwo beyænque ædæmō

waa bawate tæi piñængä bacä aminipa,” ante Pegodo apænegacantapa.

¹⁷ Ayæ godömenque apænedinque Pegodo, “Nöwo botö tönināni eñeedāni. Minitö awenēidi eñenāmai nāni cæi bai cædinque minitö iñömö adobai, Æbānō nō cæquīl, ante eñenāmai inte cæminitapa, ante awædö. ¹⁸ Incæte minitö mänōmai eñenāmai cædinque Wængongui beyæ nē apænegaināni tōmänāni nāni apænegai bai do iñque cæminipa. Tömēnāni, Mönö Codito caate wæte wæncæcäimpa, ante nāni angainō bai minitö cædi beyæ ñowo iñque batimpa. ¹⁹ Iñinque minitö wænæ wænæ mīni cædinō ante wæwente pōnente ñimpo cædinque wentamō mīni mongæñō mīni ñā mēnongaquinque Wængongui gāmæñō pōedāni. ²⁰ Mönö Awēñē weca mīni wampo pōnenguinque pōedāni. Ayæ Wængongui, Minitö Codito poncæcäimpa, ante do nānō angaingä iñongä inte Itota minitö weca poncæcäimpa, ante tōmengä gāmæñō pōedāni.”

²¹ “Incæte edæ, Tōmancoo do ingai bai adobai bacoocäimpa, ante Wængongui badoncæcäimpa, ante tæiyæ waēmō ingaināni Wængongui beyæ doyedē apænegadānimpā. Wængongui mänōmai nānō badompoga Itota iñömō mānimpoga öönædē quēwencæcäimpa anguēñē. ²² Edæ Mōitee wodi, ‘Botö wænte gobo ate mīnitö Awēñē Wængongui wæætē mīnitö beyæ cædinque mīni cabo iñömīnite adocanque ingante apænte Ao ante æncæcäimpa. Tōmengä ingante äñinque, Mōitee wodi botö beyæ nē apænegä ingaingä bai bitö adobai edæ botö beyæ nē apænebi bacæbiimpa, ancæcäimpa. Wængongui mönö Codito ingante mänōmai angä iñinque tōmengä wæætē nē apænegä bagacäimpa. Iñinque mīnitö iñömö tōmengä quīēmē ante apæneyongä eamonca ongonte tōmänō ante eñencæminimpā. ²³ Iñinque edæ mäningä Wængongui beyæ nē apænegä ingante æcänö eñenāmai ina iñömö, tōmengä guidēñāni weca quēwēñāmai edæ wæncæcäimpa,’ ante Mōitee wodi apænegacäimpa,” ante Pegodo apænegacantapa.

²⁴ Ayæ apænedinque Pegodo, “Æpodānidö Wængongui beyæ nē apænegaināni ināni. Edæ tōmēnāni Tāmoedo tönö ayæ pōnāni tönö tōmänāni adoyōmō apænedinque Codito ñowoñæ nānō cædö ante apænegadānimpā. ²⁵ Iñinque mīnitö guiquēñē Wængongui beyæ nē apænegaināni wēmīni inōmīni inte tōmēnāni nāni angainō ante nē ænguimīni imīnipa. Ayæ edæ Wængongui, Botö pōnō cæbo ate Ao ämīni iñinque mönō godongāmæ waa cæcæimpa, ante nānō angainō ante mīnitö edæ mīni quēwenguinque eñente quēwencæminimpā. Abadäö wodi

ingante apænedinque Wængongui, ‘Abadäö eñēmi. Minitö mīni quēwencabo tönö wadāni tōmāmæ quēwēñāni nāni cabo nāni cabo tönö tōmāmīni iñömīnite bitö Pæingä pönö waadete cæcä beyænque waa quēwēñinque tocæminimpā,’ ante apænegacäimpa. ²⁶ Wængongui, Botö Wengä pönö aa pecä eñēñinque mīnitö wæætē wēñæ wēñæ cæte mīni gogainō ocæ emænte wadæ pōninque wæætē waa quēwenguñö cægōninque waa tocæminimpā. Ante cædinque tōmengä tāno mīnitö beyæ ante tōmengä ingante nē cædongä mönö Codito ingante da pōnongä pongacäimpa,” Ante Pegodo iñinque apænegacäimpa.

4

Pegodo tönö Wäö awēñēidi weca gongcæte apænedapa

¹ Pegodo tönö Wäö tōmänāni inānite tæcæ apæneyōna wadāni tōmēna weca māo godongāmæ pōnānitapa. Ināni iñömö nē, Wængongui quī, ante godōnāni tönö Tado-teoidi tönö Wængongui oncö ñæñæncö ante nē wææ wāñōñāni awēñē tönö māñināni pongadānimpā. ² Itota ñāni ömæmongä bai mönö adobai ñāni ömæmongæimpa, ante Pegodo tönö Wäö apænedapa, ante do wædōñāni inte tōmēnāni ñowo pīnte māmō pōnānitapa.

³ Pōninque tōmēnāni iñāna inate bæi ongōñānitapa. Ayæ wēmō ba iñinque bañæ ate nāna taquinque tōmēna inate tee mönedāni guiddatapa. ⁴ Incæte tōmēna äna nē eñēñināni guiquēñē pancadāniya nangui ināni incæ nē pōñēñāni bagadānimpā. Iñinque onguñæñāni nāni nē pōñencabo iñömö wodo tinco müdo ganca ināni māñimpodāni bai bagadānimpā.

⁵ Bañæ ate odeoidi awēñēidi tönö tōmēnāni inānite nē aadāni nāni Picæncabo tönö nē odömōñāni tönö Eedotadēē iñömö godongāmæ ponte ongōñānitapa. ⁶ Wængongui quī, ante nē godongä ñæñængä pōñi Anato ponte a ongōñongä tōmengä guidēñāni Caiapato Wäö Adecantodo tönö wadāni tōmengä guidēñāni incæ tōmengä weca godongāmæ pō guiddānitapa. ⁷ Pō guiddinque edæ Wäö tönö Pegodo inate tæcæguedē māmō gōñōñāni gongæñōna äñānitapa.

–Mīnatö æcänö tönö tæi piñænte cæmīna ate cōmāwadingä waa bawacantawo. Edæ æcänö emōwo apænete cæmīnai.

⁸ Ante äñōñāni Pegodo iñömö Wængongui Tæiyæ Waēmō Öñowoca tönö apænedinque, –Awēñēidi imīni eñēdāni, nē aamīni mīni Picæncabo eñēdāni. ⁹ Cōmāwaingä æbānō cæte waa bawacāi, ämīnitawo. Edæ cōmāwaingä ingante möna waa cædi beyænque mīnitö ñowoñæ pōñö

apænte ämīni awædō. ¹⁰ Īnīnque mīnitō tōnō idægoidi wadāni tōnō botō tōmāmīni ĩmīnite adoyōmō apænebo ēñencæmīnīmpa. Itota Codito Nāatadeta quēwēningā ingante awæ ñænquedīmæ cæte mīni nē wænōningā ingante Wængonguī angā do ñāni ōmæmongacāīmpa. Tōmēngā adocā Itota ěmōwo beyænque cōmāwaingā ĩningā tæī piñængā badīnque mīnitō weca a ongongā apa ānewēmīnīi. ¹¹ Edæ wainca nē mænōnāni nāni wido cædinca incæ wacā, Tæcæ manca pōni tæī manguīmpa, ante cōngongampa. Itota ĩñōmō mānīnca bai ææmōnga pōni ongongampa.

¹² Īnīnque Itota, Quēwencæmīnīmpa, ante mōnō ĩmōnte ængā bai wacā ædō cæte adobai ænguingā. Itota ěmōwo beyænque quēwencæmīnīmpa, ante pōnō cægāingā ĩnte Wængonguī wæætē, Wawo adobai i, ante dicæ pōnō cæcantawogaa. Īñæmpa ĩnguipoga tōmāmæ ĩñōmō edæ æcāmēnque incæ adobai nē tæī piñænte ěmōnongā ĩñōmō edæ dæ angampa, ante apænedatapa.

¹³ Ayæ Pegodo tōnō Wāō ōnōnaque ĩna ĩnte nanguī adāmāi ĩna incæte edæ guññēnāmāi edonque apænedapa, ante adīnque tōmēnāni, Æbānō cæte edæ do ēñēnatawoo, ante wædinque, Itota mīñæ nē godīna ĩnte do ēñēnapa. Nāwangā ĩmpa, ante wædānitapa. ¹⁴ Edæ cōmāwādingā ĩningā tōmēnāni weca a ongongā adīnque tōmēnāni ædō cæte wadō ante tedequīnānīi. ¹⁵ Īnīnque tōmēna ĩnate, Mōnitō godongāmæ Apænte Āincabo weca ongōnāmāi godōmenque goeda, ānāni goda ĩnīnque, Tōmēna ĩnate æbānō cæquī, ante pōnēnīnque godongāmæ tedeconānitapa. ¹⁶ Īmāi ante apænedānitapa.

–Mānīna ĩnate quīnō cæquīmōō. Īñæmpa tōmēna tæī piñænte bamōnengæ cædatapa, ante Eedotadēē quēwēnāni, Nāwangā ĩmpa, ante tōmānāni do ēñēnānīpa. Īnīnque, Waa cædāmāi ĩnatapa, ante mōnō ædō cæte anguī. ¹⁷ Incæte mānīnō nāni apænedō ante wadāni wīi godōmenque ēñencædānīmpa, ante wææ cædinque mōnō tōmēna ĩnate wææ angæīmpa. Mānīi ěmōwo ante mīnatō mīna wæquinque apænemīnāpa. Wacā æcāmēnque ĩngante apænedāmāi ĩmāeweda, ante mōnō wææ angæīmpa, ante nāmāneque tededānitapa.

¹⁸ Ayæ ĩnque tededīnque Wāō tōnō Pegodo ĩnate āñete māmōnāni pōna adīnque tōmēna ĩnate wæætē, Ēñenguēnē quēwēmīnaa, ānānitapa. Edæ mīna panguīnque ante Itota ěmōwo ante apænemīna. Īncayæ ate tōmēngā ěmōwo ante apænedīnque edæ adopoque incæ odōmōnāmāi ĩmāeweda. ¹⁹ Ante āñōnānīte Pegodo tōnō Wāō wæætē,

–Īñæmpa æcānō ĩngante ēñente cæquīmōna, ante pōnēmīnīi. Mīnitō ānō ēñēnīnque wæætē Wængonguī nānō ānō ēñēnāmāi ĩnte cæmōna adīnque Wængonguī edæ, Nō cæmīna abopa, anguingā. ²⁰ Edæ mōna adīnō ante mōna ēñēnō ante ædō cæte apænedāmāi ĩnguīmōnaa.

²¹ Ante apænedā ēñente wædinque awēnēdi wæætē, Mīni panguīnque, ante ancaa apænedānitapa. Incæte wadāni, Cōmāīningā ĩngante Wængonguī waa pōni cæcantapa, ante watapæ apænedāni ate wædinque awēnēdi wæætē Wāō tōnō Pegodo ĩnate pancæte ante cædināni ĩnte, Īñæmpa waodāni piñāni ĩnīnque mōnō æbānō cæte panguīmōō, ante guññente wædinque pānāmāi ĩnte ĩmpo cædāni godatapa. ²² Edæ waa nē bawādingā ĩñōmō do coadenta wadepo ayæ godōmenque tōmēngā nānō ēñādī ĩñonte Wængonguī bamōnengæ cæcā waa bacā adīnque tōmānāni ædō cæte wadō ante pōnenguīnāni.

Wede pōnente tæī piñænte cæcæmōnīmpa, ante Wængonguī ĩngante apænedānīpa

²³ Mānīi ĩmpo cædāni godīnque Pegodo tōnō Wāō ĩñōmō tōmēna tōnō godongāmæ pōnēnāni weca ponte apænedīnque, Wængonguī quī, ante nē godōnāni ñænñænāni tōnō nē aadāni nāni Piccæcabo ĩñōmō mōnatō ĩmōnate ĩmāi ānāni wætāmōnāpa, ante tōmānō ante adodō ante apænedā. ²⁴ Ēñēnīnque tōmēnāni nāni pōnencabo adoyōmō pōnēnīnque Wængonguī ĩngante adotedæ tedete apænegadānīmpa. “Awēnē Wængonguī ēñēmi. Tæiyæ Awēnē ĩnōmi ĩnte bitō ōōnæ owocoo tōmāncoo ĩnguipoga tōmāmæ gāwapæntībæ tōmāmæ badōnīnque ōōnædē wōdāni yæipodē quēwēnāni gāwapāa owōdāni æyōmōmē quēwēnāni tōmānāni ĩnānīte bitō adobīque badongabiīmpa. ²⁵ Īnīnque mōnitō mæmæ Dabīi wodi ĩngante apænedīnque bitō, Dabīi ēñēmi, Bitō botō ĩmote nē cædōmi ĩñōmīte botō Tæiyæ Waēmō Ōnōwoca apænecā ēñēnīnque bitō wæætē ĩmāi ante apænecæbīmpa.

‘Wadāni nē ēñēnāmāi ĩnāni incæ quīnante ænguī badīnque wido cæcæte ante cædānīi.

Waodāni nāni cabo waodāni nāni cabo incæ ĩdīquībæ ante quīnante pōnēnānitawo.

²⁶ ĩnguipoga awēnē odeyēidi, Wido cæcæīmpa, ante tæī gongænte ongōnānīpa.

Pancabaa awēnēdi adobai, Æbānō cæquīmōō, ante godongāmæ pōnēnīnque

mōnō Awēnē ĩngante ayæ tōmēngā nānō nē ōni pæcadongā Codito ĩngante piinte ānewēnānīpa tōō, ante apænebi

ēñēninque mæmæ Dabii wodi wæætē
bitō beyæ apænegacāimpa.”

²⁷ Ante Wængonguī ingante apænedinque
ñowodāni nāni pōnencabo godōmenque
apænedānitapa. “Wængonguī ēñēmi. Tōmēmi
Wengā bitō Tæiyæ Waēmō inongā iñongante
bitō, Botō imote nē cæbi bacæbiimpa, ante
ōni pæcagabiimpa. Nāwangā impa. Incæte
bitō imite nē cædongā iñongante Itota bitō
nē ōni pæcadongā ingante edæ Edode tōnō
Pontio Pidato tōnō idægoidi tōnō wadāni
tōnō piinte adoyōmō ponte mōni quēwēñōmō
incæ ongōninque bitō imite nē cædongā
ingante, Æbānō cæte wido cæquī, ante do
cædānitapa. ²⁸ Edæ bitō tæi piñæmi inōmi
inte nāmā pōnēninque edæ, Īmai baquīnō
anguēnē, ante do angabiimpa. Tōmēnāni
guiquēnē bitō angāinō bai wæætē cædinque
piinte pō gongænte cædānitapa. ²⁹ Nōwo
iñōmō bitō imite nē cæmōni iñōmōnīte
ñowodāni pōnō piinte ānāni ate wædinque
bitō wæætē pōnō cæbi ate mōnitō tæi
piñæninque bitō ānō ante guiñēnāmāi
apænegacāimpa. ³⁰ Ayæ nē wēnæ wēnæ
ināni inānīte bitō ōnompoca pōnō gampobi
ate waa bacædānimpa, āmōnīpa. Ayæ
bitō Wengā Itota Tæiyæ Waēmō iñongante
mōnitō tōmengā ēmōwo apænedinque,
Wadāni pōnencædānimpa, ante mā cædinque
bamōnengæ cæmōni adinque tōmēnāni
guiñēnte wæcædānimpa āmōnīpa,” ante
Wængonguī ingante apænedānitapa.

³¹ Īnque apænedāni ate tōmēnāni nāni
godāmæŋ ongōñōmō incæ iñontobæŋ ocæ ocæ
cætapa. Cæyō tōmānāni inānīte Wængonguī
Tæiyæ Waēmō Ōnōwoca pō guiciæ æninque
ædæmō ēwocadinque tōmēnāni Wængonguī
nānō ānō ante guiñēnedāmāi inte edonque
apænegadānimpa.

*Tōmāmō mōnō quincōo impa, ante
cædānīpa*

³² Ayæ tōmānāni nāni pōnencabo incæ
tōmēnāni nāni ēwocadō adodō ēwocate bai
ināni inte mīmōnē adodō ante pōnēninque
tōmēnāni ēadincoo incæ, Botō quī impa,
ante ānāmāi ināni inte, Tōmāmō mōnō quī
impa, ante pæ gompodāmāi inōnānimpa.
³³ Ayæ Itota nānō da godongāināni iñōmō
tæi piñænte apænedinque, Itota Cōditō ñāni
ōmæmongantapa, ante cōwē nāni apænedī
bai apænedōnānimpa. Edæ Wængonguī
tōmēnāni inānīte waadete pōnō cæcā ate
watapæ quēwēñōnānimpa. ³⁴ Ayæ tōmēnāni
nāni cabo incæ æcāmenque ōmæpocā i iñōmō
edæ dæ angantapa. Edæ ōmæ nāni ēadī
incæ godonte æninque oncō mænonte
nāni ēadī incæ godonte æninque tōmēnāni
nāni godonte ænīnta ænte pōninque ³⁵ Itota
nānō da godongāināni weca ænte māmō
ñō cædāni æninque tōmēnāni wæætē
ōmæpodāni inānīte godōnāni eyepæ eyepæ

æñōnānimpa. ³⁶ Īnīnque Itota nānō da godon-
gāināni iñōnāni adocanque Debii wodi
pæingā Ootee ingacāimpa. Tōmengā iñōmō,
Wadāni wampo pōnente quēwēncædānimpa,
ante nē ædæmō apænedongā iñongante
wadāni tōmengā ingante Bedēnabee ante
pōnō pemongadānimpa. Īngā Ootee
Bedēnabee nāni pemōningā iñōmō Tipidebæ
quēwente pōningā inte edæ, ³⁷ tōmengā
ōmæ ēadī godonte æninque tōmengā nānō
godonte ænīnta Itota nānō da godongāināni
weca māmō ñō cægacāimpa.

5

Ānāniya tōnō Tapidæ

¹ Māniñedē Ānāniya nāni ānongā tōmengā
nānōogængā Tapidæ tōnō tōmēnāni nāni cæi
bai cædinque ōmæ nāna ēadīmæ godonte
ænatapa. ² Ayæ nānōogængā ēñēñongā
tōmēna godonte nāna ænīnta incæ Ānāniya
iñōmō pancataa pæ gompote æninque
wæætē pancataa ænte māmō Itota nānō da
godongāināni weca ñō cæcantapa. ³ Ñō cæcā
adinque Pegodo,

–Ānāniya ēñēmi. Tatāna ingante ædæmō
entawēmi inte ōmæ beyæ bitō ænīnta pan-
cataa, Botō quī, ante awēmō ñō cædinque
edæ pancataa ænte māmō ñō cædinque bitō,
Tōmanta impa, ante quimæ ānewēē. Īñæmpa,
babæ cædīmi inte bitō Wængonguī Tæiyæ
Waēmō Ōnōwoca ingante babæ āmīpa tōō.
⁴ Edæ bitō ōmæ ĩni incæ bitō qui cōwē in-
tapa. Ayæ ñōwo mānīnta æninque, Æbānō
cæquī, ante tōmēmi nē āmi ĩmitapa. Īnīnque
edæ mīmōno pōnēninque quimæ wapitīcæ
cæbitawo. Bitō mānōmāi cædinque waodāni
inānīte wīi babæ apænedinque Wængonguī
ingante babæ apænebitapa tōō.

⁵ Angā ēñēnte wædinque Ānāniya iñōmō
tæ wæænte æmæwo wængantapa. Wængā
adinque tededāni ēñēninque tōmānāni
guiñēnte wædānitapa. ⁶ Wængā ĩnīnque
edēñīnāni ponte wīni caate næænte māo
daga wēnānitapa. ⁷ Dobæ wængā ate todee
ooda go ate tōmengā æbānō wængā ante
ēñēnāmāi ĩningā inte tōmengā nānōogængā
incæ pō guiciæ. ⁸ Adinque Pegodo tōmengā
ingante,

–Apænebi ēñēmoe. Mīnatō ōmæ
godōninque mānīmpota æmīnatawo. Āñongā,
Ao, mānīmpota.

⁹ Angā ēñēninque Pegodo wæætē,
Mīnatō ĩñæmpa edæ guēa pōnēninque,
Mōnō Awēnē Ōnōwoca æbānō panguingā,
ante quimæ cæmīnatawo. Edæ bitō
nānōogængā baō ĩni nē daga wēñīnāni incæ
do dao pōnāni ēñēmi. Edæ bitō baō
adobai ænte gocædānimpa tōō.

¹⁰ Tæcæ ante āñongā onquiyængā iñōmō
tōmengā ōnōwa gāānē tæ wææninque nāñe

wængantapa. Wængä ate mänii edēnināni pō guite ayōnāni dobæ wænte a ōñongä adinque tömengä baō ini æninque tömengä nānōogængä wodido gäänē māo daga wēnānitapa. ¹¹ Mänōmai nāñe wænapa, ate dededāni ēñēninque Codito ingante nāni nē godongāmæ pōnencabo tōnō wadāni tōmānāni ancaī guifēnte wægadānīpa.

Ate ēñencædānīpa, ante bamōnengæ nanguī cædānīpa

¹² Māniñedē Itota nānō da godongaināni iñōmō Wængongui Ōnōwoca tōnō cædinque, Ate pōnencædānīpa, ante wadāni ayōnāni mā cædinque bamōnengæ nanguī cædōnānīpa. Ayæ adoyōmō pōnēninque tōmānāni Wængongui oncō Tadōmō yabæcōnē nāni ānoncōnē pō guī pō guī cædōnānīpa. ¹³ Wadāni tōmēnāni inānite adinque, Nē pōnēnāni waa quēwēnāni inānipa, ante pōnēnāni incæte guifēnte wædinque godongāmæ pō guīdāmai gomō adōnānīpa. ¹⁴ Pancadāniya guiquēnē onguīñānāni tōnō onquiyānāni tōnō nanguī ināni mōnō Awēnē ingante ūwo pōnēnānitapa. Ināni iñōmō dō pōnēnāni tōnō adocabodāni bacoo ināni bagadānīpa. ¹⁵ Inique mänii bamōnengæ cædāni adinque wadāni wēnæ wēnæ ināni inānite ænte pōninque mōimoga mōincodē ūō cædānitapa. Edæ, Pegodo nænque pāmo wodo pænta goyongä tömengä gāñēñōmō ōñōninque adocanque adocanque waa bacædānīpa, ante cædinque Pegodo nānō goquinō ante ænte māmō ūō cædāni ōñōnānitapa. ¹⁶ Ayæ adobaī Eedotadēē eyequeī wayōmō nāni quēwēñōmō wayōmō nāni quēwēñōmō quēwēninque wadāni wēnæ wēnæ ināni inānite næænte māmō næænte māmō cōnōnāni ate tōmānāni waa badānitapa. Ayæ wēnæ nē wentamō ēwodadāni inte yewænte wæwēnāni inānite adobaī ænte māmō pōninque waa badānitapa.

Itota nānō da godongaināni inānite piñte tee mōnedānīpa

¹⁷ Wængongui quī, ante nē godongä ñænængä pōni inongä tōnō wadāni tömengä tōnō godongāmæ cædāni incæ Tadoteoidi inōnāni inte, Nāni ōmæmōnāmai ingæimpa, ante nē pōnēnāni inōnānīpa. Inique Itota nānō da godongaināni mænōmai waa cædāni ate wædinque awēnē tōnō Tadoteoidi iñōmō tōmēnāni inānite piñte agadānīpa. ¹⁸ Inique Itota nānō da godongaināni inānite yao ongonte æninque tōmānāni ayōnāni tee mōnedānitapa. ¹⁹ Tee mōnedāni wæcōñōnānite Wængongui anquedo woyowotæ ponte odemō wi ænete mantacā tayōnānite apænecantapa. ²⁰ “Goedāni. Wængongui oncō ñænæncō yabæcōnē go guite næ gongæninque mīnitō māniñōmō

pōnāni inānite apænedinque, Wængongui pōnō cæcā beyænque mōnō quēwengæimpa, ante ædæmō apænemīni ēñencædānīpa.” ²¹ Angä ēñente cædinque tōmēnāni baōnæ ñāō bayonte Wængongui oncō ñænæncō yabæcōnē do go guīdinque odōmonte apænedāni ēñēnānitapa.

Mænōmai do go guite apænedānīpa, ante ēñēnāmai ināni inte edæ, Wængongui quī, ante nē godongä ñænængä pōni inongä guiquēnē tömengä tōnō godongāmæ cædāni tōnō adoyōmō pō guīdānitapa. Pōninque tōmēnāni idægoidi inānite nē aadāni Picæñāni godongāmæ nāni Apænte Ånoncabo tōmānāni inānite āñete pōnānitapa. Ināni wæætē tontadoidi awēñēdi inānite āninque, Mīnitō tee mōneincōnē gote Itota nānō da godongaināni inānite āñete māmōmīni poncædānīpa. ²² Ånāni tee mōneincōnē gote ayōnāni edæ dæ ānāni ante wædinque wææ wānōnāni awēñēdi gode ancæ pōninque, ²³ iūmai ante apænedānitapa.

—Gote ayōmōni oncō ædæmō tee mōnete intapa. Ayæ tontadoidi odemō pōni a ongōnāni adinque mōnitō go wi ænete guiyōmōni edæ dæ ānāni ate wædinque wadæ pōmōnīpa. ²⁴ Ante dededāni ēñēninque, Wængongui quī, ante nē godōnāni ñænæñāni tōnō Wængongui oncō ñænæncō ante nē wææ wānōnāni tæiyæ awēnē tōnō guifēnte wædinque, Nōwo quīemē baī bacæimpa. ²⁵ Ante wæyōnāni wacā do pō guīdinque tōmēnāni inānite,

—Aquēnē quēwēmīni. Māniñāni mīni tee mōnedānāni incæ Wængongui oncō ñænæncō yabæcōnē go guite a ongōninque māniñōmō pōnāni inānite odōmonte apænedāni ēñēnāni ataqeedāni.

²⁶ Ante apæneccā ēñente wædinque wææ wānōnāni awēnē tömengä nānō wææ wānoncabo tōnō Itota nānō da godongaināni inānite æncæ godinque, Godongāmæ ongōnāni incæ piñte tacadāni wæcæ wæ, āninque pānāmai inte ee ænte pōnānitapa. ²⁷ Ænte pōninque nē aadāni Picæñāni godongāmæ nāni Apænte Ånoncabo weca ænte māmō gōnōnāni gongæñōnānite, Wængongui quī, ante nē godongä ñænængä pōni inongä iñōmō tōmēnāni inānite angantapa.

²⁸ —Māningä Itota emōwo apænedinque wadāni inānite odōmōnāmai imæwedāni, ante ancaā antamōnīpa tōō. Incæte mīnitō māniñe mīni odōmonte ānewēnō ante Eedotadēē tōmāo odōmonte apæneminīpa. Ayæ godōmenque tedewēninque mīnitō, Māningä nē wængaingä ingante awēñēdi nē wēnæ wēnæ cædināni inānipa, ante mōnitō imōnitedō ante ānewēminīpa tōō.

²⁹ Ante nē ñænængä piññongä Pegodoidi wæætē,

—Mōnitō guiquēnē waomīni imīnite ēñēnāmaī inte Wængonguī ingante ēñente cæquēnēmōni imōnīpa. ³⁰ Mīnitō Itota ingante ñænquedīmæ timpote wæñōmīni wængā ate mōnō wæmæīdi Wængonguī incæ angā ñāni ōmæmongantapa. ³¹ Ayæ nē ñāni ōmæmōningā ingante apænedīnque Wængonguī, Bitō, Quēwencædānīpa, ante nē Æmī bacæbiīpa, angacāīpa. Nē Æmī iñōmīte idægoidi tōmānāni, Idæwaa wēnæ wēnæ cæte quēwente awædō, ante botō gāmæīnō poncædānīpa, ante cæcæbiīpa. Bitō æmī beyænque botō tōmēnāni inānite pōnō waadete ñīmpo cæcæboīpa. Ante cædinque edæ Itota nānō Awēnē baquinque Wængonguī æmōnga ænte mæīcā æīdinque Wængonguī tōmēmæīnō tæ contate on-gongampa. ³² Itota ingante Wængonguī ænte mæīcā æīgacāīpa, ante nē adīmōni inte mōnitō mānīnō ante nē apænemōni imōnīpa. Ayæ nē ēñēmō cæmō iñōmōnte Wængonguī tōmēngā Tæiyæ Waēmō Ōnōwoca ingante da pōnōngā ænte ēwocampō. Tōmēngā Ōnōwoca adobaī mōnitō tōnō godongāmæ nē apænecā ingampa, ante Pegodoidi apænedānīpa.

³³ Mānōmaī apænedāni ēñēnīnque awēnēīdi ænguī badīnque tōmēnāni inānite edæ wæñoncæ cædānīpa. ³⁴ Mānīñedē adocanque Paditeocā incæ tōmēngā ēmōwo Gāmadiēdo tōmēnāni nāni wææ angāīnō ante nē ēñēngā iñongante tōmānāni tōmēngā ingante waa adōnānīpa. Īnīnque tōmēnāni nāni Apænte Āncabo wæñoncæ cæyōnāni māningā iñōmō tōmēnāni nāni nē waadecā īnōngā inte ængæ gantīdinque, Itota nānō da godongāīnāni inānite oncodo mantamīni wantæ ongoncædānīpa. ³⁵ Angā dæ godāni Īnīnque Gāmadiēdo wæætē awēnēīdi inānite apænecantapa.

—Idægoidi ēñēedāni. Mānīnāni inānite æbānō cæquīī, ante ædæmō pōnente ate edæ ee cæedāni. ³⁶ Edæ doyedē wacā Teodo adobaingā ængæ gantīdinque, Botō nē nangūī cæbo īmopa, ante āñongante edæ tōmēngā mīñæ coatodo tiento ganca īnāni godānīpa, ante pōnēedāni. Tōmēngā ingante wadāni māo wæñōnāni wængā ate tōmēngā ēmīñænīnāni wæætē nāwæ godāni ate edæ dæ batīpa. ³⁷ Ayæ ate edæ awēnē, Mīnitō ēmōwo ponte yewæmoncæmīnīpa, ante nānō ānīñedē wacā Gadīeabæ quēwēningā Oodaa adobaī awēnē ingante wido cæcæte ante ængæ gantīyongā nangūī īnāni tōmēngā mīñæ goyōnāni tōmēngā ingante wæñōnāni wængā ate nāwæ adobaī gogadānīpa. ³⁸ Īnīnque, Mānōmaī batīpa, ante pōnente cæedāni. Nōwo iñōmō īnāni adobaī ængæ gantīdāni adīnque mīnitō tōmēnāni inānite ee ate gomō aedāni āmopa. Tōmēnāni waodānīque inte

cædāni baī ædō cæte cæquīnāni. Edæ dæ bacæīmpa. ³⁹ Wæætē Wængonguī angā ēñente cædāni baī mīnitō ædō cæte Baa ante wido cæquīmīni. Edæ mīnitō mānōmaī cædinque Wængonguī ingante pīmīni inte wæbaīmīnīpa.

Ante wææ angā ēñente wædinque Ao ante tōmēngā nānō ānō baī cædānīpa. ⁴⁰ Itota nānō da godongāīnāni inānite aa pedāni pōnāni ate awēnēīdi, Pæedāni, ānāni ēñēnīnque nē wææ wāñōnāni æmontaimenca tæi tæi pānānīpa. Ayæ awēnēīdi godōmenque, Itota ēmōwo ante apænedāmaī Īmæwedāni, ante ānīnque Itota nānō da godongāīnāni inānite ñīmpo cædāni godānīpa. ⁴¹ Nē Apænte nāni Āncabo weca ongonce tao godīnque tōmēnāni wæætē, Wængonguī mōnō imonte adīnque, Botō Wēñængā ēmōwo beyæ wadāni wēnæ wēnæ ānāni ate mīnitō eyepæ inte caate wæcæmīnīpa, ante do cæcampa, ante pōnēnīnque edæ nangūī togadānīpa. ⁴² Īnīnque Wængonguī oncō ñænæncō yabæcōnē incæ waodāni oncōnē incæ tōmēnāni ñīmpo cædāmaī inte cōwē go guī go guī cædinque cōwē odōmōnte apænedīnque, Itota tōmēngā nāwāngā mōnō Codito ingampa, ante watapæ apænedāni ēñēngadānīpa.

6

Tiæte ganca īnāni nē nēnempodāni badānīpa

¹ Itota ingante nē tee empote quēwēnāni mānīñedē nangūī īnāni badāni ate pancadāniya guidiego tededō nē tededāni iñōmō ebēdeo tededō nē tededāni inānite pīnte ānīnque, Mīnitō mīni cabo owæmpōīnāni inānite īīmō īñō īīmō īñō cænguī eyepæ godōnīnque mōni cabo owæmpōīnāni inānite pōnōnāmaī īmīnīpa tōō, ante ānāni. ² Itota nānō nē da godongāīnāni iñōmō dote ganca īnāni iñōnānite wadāni, Dote īnānīpa, ante pemonte baī apænedōnānīpa. Īnāni iñōmō guidiegoidi mānōmaīnō ante wædānīpa, ante ēñente wædinque wadāni Itota ingante nē tee empote quēwēnāni inānite āñete godongāmæ pōnāni ate tōmēnāni inānite,

—Wængonguī nānō apænedō ante nē apænequēnēmōni inte mōnitō ædō cæte mōni cæquēnēnō ante ñīmpo cædinque cængūinque ante godongūīmōni. ³ Īnīnque botō tōñīñamīni ēñēedāni. Mīni pōnencabo nāmā cōwā adīnque, Æcānō æcānō Wængonguī Ōnōwoca tōnō āawocaque baī ēwocate nō cædāni īnāni, ante adīnque mīnitō tiæte ganca īnāni mānīmpodāni inānite apænte æedāni. Apænte æmīni adīnque mōnitō tōmēnāni inānite, Cænguī nē godōmīni bacæmīnīpa, āmōni ēñente cæcædānīpa. ⁴ Mōnitō wæætē Wængonguī ingante cōwē

apænedinque Wængonguī nānō apænedō ante godōmenque odōmonte apænedinque mānīnonque cæte quēwencæmōnīmpa.

⁵ Mānōmāinō ante ēñēninque tōmēnāni nanguī ināni inōnāni inte tōmānāni Ao ante edæ, īīnāni mānōmāi inānīpa, ante adinque īīmāi ēmōnāni inānite apænte ængadānīmpa. Adocanque Etebā nē wede pōnengā inte Wængonguī Tæiyæ Waēmō Ōnōwoca tōnō āawocaque bai ēwocacā īnongāīmpa. Tōmengā tōnō Pedipe, Podocodo tōnō Niicānodo, Timōnō tōnō Padōmēna, ayæ Antioquiya īīñōmō nē quēwēningā Niicodato. Īngā īīñōmō oodeoidi nāni pōnēnō bai pōnengā inte do oodeo bai bacā īnongāīmpa. Mānīmpodāni inānite apænte ænānitapa. ⁶ Apænte ænīnque Itota nānō nē da godongāināni weca ænte māmō gōnōnāni ongōñōnāntē īīnāni īīñōmō, Mīnitō nē godōmīni bacæmīnīmpa, ante cædinque tōmēnāni inānite gampodinque Wængonguī ingante apænedānitapa.

⁷ Īnīnque Wængonguī nānō apænedō ante gode ā gode ā cædinque māo apænedāni ēñēnōnānīmpa. Īnīnque Ee-dotadēē īīñōmō Codito mīñæ nāni tee empote quēwencabo tæiyæñāni yebænte bagadānīmpa. Wængonguī quī, ante nē godōnāni incæ adobai nanguī ināni wede pōnēninque ēñente bagadānīmpa.

Etebā ingante bæi ongōnānīpa

⁸ Etebā īīñōmō Wængonguī waadete pōnō cæcā ate tæi piñænte ēwocadongā inte bamōnengæ nanguī cædongāīmpa. Ayæ, Cæbo ate pōnencædānīmpa, ante mā cæcā adinque godongāmæ ongōnāni pancadāniya, Æbānō cæcā, ante wædānitapa. ⁹ Wadāni guiquēnē Etebā tōnō guēa wæætēdō wæætē ancæte ante cædānitapa. Īnāni īīñōmō oodeoidi inōnāni incæ pancadāniya Tidēnebæ quēwēnīnāni īīñōnāni pancadāniya Adecantodia īīñōmō quēwēnīnāni īīñōnāni pancadāniya Tiditiabæ quēwēnīnāni īīñōnāni pancadāniya Atiabæ quēwēnīnāni īīñōnānīmpa. Tōmēnāni doyedē wadāni inānite nē cægāināni inōnāni inte nōwo abæ tawænte godīnāni inōnāni inte godongāmæ pōnīnque adocabodāni bai badīnāni inōnānīmpa. Tōmēnāni odōmōincō ante, Mōni nē Abæ Tawænte Gocabo Odōmōincō impa, ante pemōnōnānīmpa. Īnīnque tōmēnāni pancadāniya Etebā ingante wæætēdō wæætē ante cæyōnāni, ¹⁰ tōmengā nē nō ēñēnongā inte Wængonguī Ōnōwoca tōnō godongāmæ apænecā ēñēninque tōmēnāni, Æ mōnō wæætē ædō cæte wææ anguī, ante wædānitapa.

¹¹ Īnīnque nē wæætēdō wæætē ānāni adodāni incæ wadāni inānite godō awēmō ānānitapa. Mīnitō babæ ante ī incæte, Mōitee

wodi ingante ante Etebā godō wēnæ wēnæ apænecā ēñentamōnīpa, ante ōnonque ædāni. Ayæ Wængonguī ingante adobai tōmengā godō wēnæ wēnæ ante babæ apænecā ēñentamōnīpa tōō, ante incæ ædāni, ante nē abæ tawænte godīnāni ānānitapa. Mānōmāinō ānāni Ao ante tōmēnāni nāni angāinō bai cædinque Etebā ingante ante babæ ante piñānitapa. ¹² Mānōmāinō ante babæ ante piñāni ēñēninque wadāni ōnōnānique incæ nē aadāni nāni Picæncabo incæ nē odōmōnāni incæ tōmānāni ænguī badānitapa. Mānōmāi ænguī badinque tōmēnāni Etebā wodi ingante bæi ongote nē Apænte nāni Āincabo weca ænte māo gōnōnāni ongongantapa. ¹³ Pancadāniya Etebā ingante ante babæ apænedinque īīmāi ānānitapa. Īngā īīñōmō nīmpo cædāmāi inte cōwē Wængonguī oncō tæiyæ waēmō oncō īīñonte wiwa tedewēninque tōmengā godōmenque Mōitee wodi nānō wææ angāinō ante godō wiwa ante babæ apænecā ēñentamōnīpa. ¹⁴ Īñōmō oncō ante apænedinque adocā Etebā īīñōmō, Itota Nāatadeta nē quēwēningā īī oncō bæ tadete wido cæcæcāīmpa, ante ānewengampa. Ayæ adocā Itota īīñōmō, Īīmāi cæedāni, ante Mōitee wodi nānō wææ angāinō ante Ao ānāmāi inte edæ, Wadō ante cæquēnēmīni īmīnīpa, ante odōmongampa, ante īngā Etebā īīñōmō adobai ānewengā ēñentamōnīpa tōō, ante babæ apænegadānīmpa.

¹⁵ Mānōmāi babæ apænedāni ēñēninque nē Apænte nāni Āincabo incæ Etebā ingante cōwā ayōnāni tōmengā awınca Wængonguī anquedo nānō ēmōnō bai ēmōngā agadānīmpa.

7

Etebā nāmā wææ apænecampa

¹ Īnīnque, Wængonguī quī, ante nē godongā nānengā pōni inongā īīñōmō Etebā ingante ānīnque, Bitō ĩmitedō nāni ānīnō nāwāngā intawoo. ² Āñongante Etebā wæætē īīmāi ante nāmā wææ apænecantapa. “Botō wæmpoidi ēñēedāni. Botō tōnīñāmīni ēñēedāni. Mōnō wæmæ Abadāō wodi Mēetopotāmiabæ ayæ quēwēninque Cadāna īīñōmō ayæ quēwencæ godāmāi īīnongante Wængonguī nē nāō apāite bai ēmōnongā inte Abadāō weca ponte a onongā agacāīmpa. ³ Ayæ Abadāō ingante apænedinque Wængonguī, ‘Bitō guīdēnāni inānite ēmō cæte bitō ōmæ ēmō cæte godīnque wabæca botō odōmonguīmæca æmæwo wadæ goe,’ angacāīmpa. ⁴ Angā ēñente cædinque Abadāō wodi māniōmæ Cadeabæ ēmō cæte wadæ godīnque Cadāna nāni quēwēñōmō ganca pōnīnque quēwengacāīmpa. Ayæ tōmengā wæmpo wodi wængā ate Wængonguī

tömengä ingante angä eññëningue Abadaö iimæca mönö ñowo quëwëmæ ponte quëwengacäimpa.”

⁵ “Incæte Wængonguï, Tömëmi ömæ, ante Abadaö wodi ingante cabo incæ ömæ pönönämaï ingacäimpa. Wæætë Abadaö wodi wëñængä mämpo inämaï iñongante Wængonguï, Iimæ incæ bitö ænguimæ iñonte bitö pæinäni adobæ tömäo quëwencædänimpa, ante odömongacäimpa. ⁶ Ayæ godömenque apænedinque Wængonguï, Bitö pæinäni iñömö wabæca gote mänimæ quëwënäni weca quëwëñönänite iñäni wæætë bitö pæinäni inänite edæ ö ænte bai cædinque, Mönitö beyænque cæedäni, ante nangui änäni wæcædänimpa. Ayæ tömënäni nempo wantæpiyæ coatodo tiento wadepo ganca mänimpoga quëwëñönänite adodäni wënæ wënæ cædäni beyæ caate wæcædänimpa. ⁷ Antë Wængonguï godömenque apænedinque, ‘Bitö pæinäni inänite nê ö ænte wënæ wënæ cædäni inänite botö wæætë apænte äninque pancæboimpa. Ayæ iñcayæ ate bitö pæinäni mäniömæ tömënäni näni caate wædiömæ ëmö cæte wadæ pöningue iimæca wæætë pöningue botö Wængonguïmo iñömote botö beyæ cæquinäni inänipa.’ ⁸ Äninque Wængonguï, Mönö godongämæ cæcæimpa, ante pönö cæbo ate minitö wæætë Ao ante eñente cæcæminimpa. Mänömaï ante cædinque minitö onguïñæminique ëö togænte caate wædinque eñencæminimpa. Angä eñëningue Abadaö wodi wëñængä Itæca ëñacä ate tömengä nänö ëñadi adoque Wængonguï itædé go ate tömengä ingante ëö togængacäimpa. Itæca wodi pæte wææ Aacobo wæmpo bagacäimpa. Aacobo wodi pæte wææ dote ganca inäni tapæicä wææ mönö wæmæidi wodi baquinque pægadänimpa.”

⁹ Antë apænedinque Etebä godömenque, “Mäninäni mönö wæmæidi ingainäni iñömö tömënäni biwi Ootee ingante ante adinque piinte wædinque tigitamö beyænque pædæ godönäni ö æninque Equitobæ ænte mäodäni gogacäimpa. Equitobæ pöningue tömënäni godonte æncæte ante cædinque Ootee wodi ingante mäniñömö quëwengä nempo pædæ godönäni awënë beyænque cæte quëwengantapa. Mänömaï quëwengä incæte tömengä tönö godongämæ Wængonguï cöwë cægacäimpa. ¹⁰ İninque Ootee wodi ingante nangui wiwa cædäni wæyongante Wængonguï cöwë wææ aacä quëwengacäimpa. Ayæ Wængonguï pönö apænecä eñëningue nê eñente bayongante Equitobæ tæiyæ awënë Padaönö incæ tömengä ingante waa adinque, Botö tæiyæ awënë imo bai bitö wodo adobaï badinque

Equitobæ wædænque awënë bacæbiimpa. Ayæ adobaï botö awënë onconcoo bitö aacæbiimpa, angacäimpa.”

¹¹ Antë apænecä eñëñönäni Etebä godömenque, “Mänifedë Equitobæ tömäo Cänäämæ tömäo to aminte bayonte tepæmpo gæwænte wædönänimpa. Mönö wæmæidi cænguï æncæte ante cædinque ænämaï inönänimpa. ¹² İninque, Equitobæ cænguï ayæ mæ öñompa, ante tededäni eñëningue wæmpocä Aacobo wodi mönö mæmæidi nê baquinäni inänite äninque, Botö wëmini, Equitobæ godinque cænguï ænte pödäni, angä mä gogadänimpa. ¹³ Gote pöningue ayæ wæætë mæmpoga gote a ongönäni adinque Ootee wodi incæ tömengä mëmöidi inänite, Botö munitö biwimo ëñagaïmö imopa, angä wægadänimpa. Ayæ, Ootee guidënäni do pönäni, ante tededäni eñëningue awënë Padaönö ingante gode änäni edonque eñhengacäimpa. ¹⁴ Ayæ ate Ootee wodi tömengä wæmpo Aacobo wodi näni pæincabo tænta i tincö ganca mänimpodäni äñecä gogadänimpa. ¹⁵ Aacobo wodi mänomäï Equitobæ gote quëwëningue wængacäimpa. Ayæ tömengä pæinäni wææ mönö wæmæidi ingainäni inte adobaï mäniñömö gote quëwente wægadänimpa. ¹⁶ Abadaö wodi wëenëñedë, Mönitö wodido, ante Caämödo wënäni näni änimpota mänimpota godonte æninque Tiqemö iñömö ömæ godonte ænongäimpa. Antë do againäni inte mönö wæmæidi ñowo Aacobo wodi bayetoca ingai Cänäämæ ænte pöningue, ayæ iñcayæ ate wææ tömengä wënäni bayetoca ingai Abadaö wodi nänö ængaïmæ tömënäni wodido ingaiñömö mämö daga wægadänimpa.”

¹⁷ Antë apænedinque Etebä godömenque apænecantapa. “Abadaö wodi ingante Wængonguï wëenëñedë nänö, Botö wantæpiyæ ate bitö pæinäni inänite adodö ænte mämömo poncædänimpa, ante nänö angaiñedë wodo iñque bayonte tömënäni Equitobæ quëwëningue nangui bacoo yebænte bagadänimpa. ¹⁸ Mänifedë wacä onguïñængä ñowocä incæ, Ootee wodi æcänö ingacäi, ante eñëñämäi inongä inte Equitobæ awënë bagacäimpa. ¹⁹ Tömengä iñömö mönö guidënäni wodi inänite wapiticæ ante wënæ wënæ cægacäimpa. Tömengä, Minitö wëñænäni tæcæ ëñadäni inänite wido cæedäni, ante piingä eñente wædinque mönö wæmæidi wodi incæ tæcæ ëñadäni inänite yabæque wido yabæque wido cædäni wængadänimpa.”

²⁰ “Tömënäni mänomäï näni cægaiñedë incæ Möitee wodi eñate pægacäimpa. Tömengä waëmö wëñæ iñongante Wængonguï waa acampa, ante pönëningue mäa go adoque apäicä go ate tömengä

ingante mæmpo oncōnē pæ gompote pæpogada pæcantapa. ²¹ Ayæ, Wænōnāni wæncæ wæ, ante guifente cædinque tōmēna tōmengā ingante yabæque gāwapæ yædopæ wo cæda ongōñongante awēnē Padaōnō wengā onquiyængā adinque, Botō wē, ante cædinque Mōitee ingante ænte pæpogacā pægacāimpa. ²² Mānōmai cæcā beyæ equitoidi nāni ēñgēainō ante tōmānō ante odōmōnāni ēñente pædinque Mōitee wodi nē angā baquinque nangui cæcā baquinque tæi piñænongā inte pægacāimpa.”

²³ Ante Etebā godōmenque apænedinque, “Ayæ æmæwo pædinque coadenta wadepo nānō ēñagāifedē Mōitee wodi, Idægoidi botō tōniñadāni inānite ēñacæ gobote, ante ēñacæ gocantapa. ²⁴ Gote ēñayongā, Equito onguifængā incæ botō guidengā ingante wīwa cæcā caate wæcampā, ante adinque Mōitee wodi tōmengā guidengā ingante wææ cæcæte ante cædinque tiyæñō tiyæ cædinque Equito onguifængā ingante wængōngā wængacāimpa. ²⁵ Edæ, Wængongui botō imote āninqe, Bitō idægoidi inānite ō æte māobi wadæ gocædānimpā, ante do angā ēñentabopā, ante do ēñēningā inte Mōitee wodi, Idægoidi adobai ante ēñente pōnencædānimpā, ante pōnente cæyongā tōmēnāni wæætē mānīnō ante ēñēnāmai ingadānimpā. ²⁶ Mānōmai ī ininqe Mōitee wodi īmō ate ponte ayongā idægoda wæætēdō wæætē cæda adinque, ‘Īñāna, mīna guidencaya incæ wacā ingante quimæ wēnæ wēnæ cæte quēwēmīnaa.’ ²⁷ Ante, Guēa waa waadete quēwencædāimpā, ante cæyongā adocanque tōmengā guidengā ingante nē wēnæ wēnæ cædingā guiqūēnē Mōitee wodi ingante bæ tadinque angantapa. ‘Īñæmpā, Bitō mōnitō awēnē inōmi ĩmpā, ante, Nē apænte āmi ĩmpā, ante æcānō bitō imite nē ānāi. ²⁸ Edæ Equito ingante īmō bitō wænōmi bai nōwoñnæ adobai botō imote wænōncæte ante pōnēmi awædō.’ ²⁹ Angā ēñente wædinque Mōitee wæætē wodiī wīnongacāimpā. Wodiī wīnonte wabæca Mādiāmæ gote wadāni ōmæ quēwēninque wēñæna mēnaa wæmpocā bagacāimpa.”

³⁰ Ante apænedinque Etebā godōmenque awēñēidi inānite īimai ante apænecantapa.

“Ayæ wæætē coadenta wadepo go ate Mōitee wodi ōnōmæca cægōninque onquiyabo Tinaiquidi gāmæñō gote dadi ēmænte ayongā ocāñeqiawæ gonga bæcōyōmō Wængongui anquedo ponte a ongōngā agacāimpa. ³¹ Ate wædinque Mōitee wodi, Quinō bai inte bæco ante botō wīlmonte bai aboo, ante acæte ante pōnōmenque pōñongante mōnō Awēnē tōmengā ingante īimai ante apænegacāimpa. ³² ‘Bitō wæmæšidi Wængonguimo inōmo inte botō Abadāo wodi Itæca wodi Aacobo

wodi Wængonguimo inōmo ĩmpā.’ Ante apænecā ēñente wædinque Mōitee wodi do do wæate guifente wædinque, Wīi aīnente awædō, ante cægacāimpa. ³³ Mānōmai cæyongante mōnō Awēnē wæætē, ‘Bitō næ gongænte ongōñōmō botō adoyōmō ongōmo beyænque onguipoi tæiyæ wæmō ĩmpā, ante pōnēninque bitō awæncata gā tadōwæe āmpā. ³⁴ Botō edæ cōwā adinque, Botō quināni inānite equitoidi æbānō wēnæ wēnæ cædānīi, ante do abopā. Tōmēnāni caate ō ō wædāni do ēñente wædinque botō, Nīmpo cæbo ate abæ tawænte gocædānimpā, ante wææ pōmo ĩmpā. Nōwo ĩñōmō edæ ægodōe. Botō, Equitobæ gocæbiimpā, ante bitō imite adodō da godōmo gocæbiimpā,’ ante Wængongui Mōitee wodi ingante angacāimpa.”

³⁵ Ante apænedinque Etebā īimai ante godōmenque apænecantapa. “Adocā Mōitee ingante piīninque idægoidi doyedē, ‘Īñæmpā, Bitō mōnitō awēnē inōmi ĩmpā, Nē apænte ānōmi ĩmpā, ante æcānō bitō imite nē ānāi,’ ante ānōnānimpā. Nōwo ĩñōmō Wængongui anquedo ocāñeqi ĩñōmō pōninque tōmēnāni nāni nē piingāngā adocā Mōitee ingante, Bitō idægoidi awēnē bacæbiimpā, angacāimpa. Bitō tōmēnāni inānite ō æninque ænte māobi abæ tawænte gocædānimpā, ante cædinque Wængongui bitō imite da godongā gocæbiimpā, ante Wængongui beyæ apænedinque Wængongui anquedo angacāimpa. ³⁶ Mōitee ĩñōmō, Ate pōnencædānimpā, ante mā cædinque ayæ Wængongui tōnō bamōnengæ nangui cædinque idægoidi inānite ænte māocā gogadānimpā. Equitobæ ēmō cæte wadæ pōninque gāwapæntibæ Opatawæmæ yæwedecapæ pō ongōninque adocā Mōitee mantacā ĩmæmāa pongadānimpā. Ōnōmæca ta pōninque coadenta wadepo ganca cægōñōnāni tōmengā, Ate pōnencædānimpā, ante mā cædinque bamōnengæ nangui cægacāimpa,” ante Etebā wodi apænecantapa.

³⁷ Ayæ, “Adocā Mōitee, Idægoidi ēñēdāni. Botō Wængongui beyæ nē apænebo ĩmo bai wacā edæ mōnitō tōniñacā incæ adobai edæ Wængongui beyæ nē apænecā bacæcāimpa. Tōmengā ponte apænecā ēñēninque mōnitō tōmengā ingante ædæmō ēñente cæcæmīnimpā, ante Mōitee wodi apænegacāimpa. ³⁸ Godongāmæ nāni Wængongui ingante apæneincabo tōnō Mōitee wodi ōnōmæca cægōngāimpā. Mōnō mæmæšidi tōnō cægōñōnāni Wængongui anquedo wēēñēdē Tinaiquidi nē ponte āningā incæ adocā tōnō Mōitee wodi ōnōmæca cægōngāimpā. Māniñedē mōnō imote ante pōnō cædinque Wængongui, Mōitee

ēñēmi, angacāimpa. Īncayæ quēwenguīnāni ēñēnte quēwencædānīmpa, ante cædinque botō, Mīnitō cæte quēwenguīmīnī, ante apænebo ēñēninque bitō adodō ante yewæmoncæbiīmpa, ante apænegacāimpa,” ante Etebā apænecantapa.

³⁹ Ayæ, “Mōitee wodi mǎnōmaī cæyongante mōnō wæmæidi guiquēnē ēñēnāmaī ĩnāni inte tōmēngā ingante Baa āninque Equitobæ mōnō adodō gocæīmpa, ante ōnōwēnenque pōnente wægadānīmpa. ⁴⁰ Mǎnōmaī nē wædōnāni inte tōmēnāni wæætē Aadōō wodi ingante apænedinque, ‘Aadōō ēñēmi. Māningā, Equitobæ nē ēmō cæte mōnō ĩmonte māmōningā Mōitee wodi ædōnō gote dæ angāā, ante adāmaī ĩmōnīpa cæbīi. Wængonguīdi ĩnānīpa, ante mōnō ĩmonte nē tōō æmænte ænte goquīnāni ante bitō badōmi æmōnie.’

⁴¹ Āninque māñīñedē, Mōnō wængonguī ingampa, ante cædinque tōmēnāni wagada wē baī badongadānīmpa. Ayæ, Mōnō wængonguī quī ĩmpa, ante cædinque cænīnāni wænōninque baō tōmēnāni nāni badōinca gāānē ænte māmō nō cædinque ōnompoca nāni badōinca adinque ææmæ baī cæte togadānīpa. ⁴² Mǎnōmaī cædāni ate wædinque Wængonguī nāēmæ, Pōnē cæmīniyaa, ante pīngacāimpa. Ayæ, ĩnāni ōōnædē owocooque ante, Wængonguīdi ĩnānīpa, ante oda cæcædānīmpa, ante cædinque idægoidi ĩnānite nīmpo cædinque dadi ēmæninque aadāmaī ingacāimpa. Edæ māñinō tōmēnāni nāni cægaīnō baī ante pōnente yewæmōninque wacā wantæpiyæ ate Wængonguī beyæ ĩmaī ante yewæmongacāimpa.

‘Idægoidi ēñēdāni. Ōnōmæca gote coadenta wadepo ganca cægōninque mīnitō, Wængonguī quī, ante pōnōncæte ante cædinque cænīnāni wænōninque baō tōnō māincoo ænte pō ænte pō cæmīni ĩncæte

dicæ botō ĩmote ante pōnēninque pōnōmīni æntawogaa. ⁴³ ĩnæmpa, Mōnō wængonguīdi ĩñōnānite ædæ wæænte apænecæāīmpa, ante cædinque mīnitō mīni badōinca adoca Mōnoco mīni ānonca beyæ æmōntaicō oncō næænte godinque wocæ wocæ cædōmīni awædō. Ayæ waca, Mōni wængonguī Adempaō nēmō baī owocæīmpa, ante mīni badōinca næænte æmōnga cō cæ cō cæ cædōmīnīmpa tōō.

Ante adinque Wængonguī, Mǎnōmaī cæmīni beyæ botō mīnitō ĩmīnite Babidōnia ganca da godōninque godōmenque gobæ da godōmo gocæmīnīmpa,’ angampa, ante yewæmongatīmpa.” Ante apænedinque Etebā, Mōnō wæmæidi

īmaī cægadānīmpa, ante godōmenque apænecantapa. ⁴⁴ “Wængonguī doyedē Mōitee wodi ingante apænedinque, Mīnitō æmōntaicō mænonate ate botō wææ ante yewæmōnīnca cō cæte mancæmīnīmpa. ĩmaī mænoncæmīnīmpa, ante odōmōngā adinque Mōitee wodi wæætē mōnō wæmæidi ĩnānite odōmōngā ate ēñēninque tōmēnāni wæætē Wængonguī nānō odōmōnō baī mǎnōmaīnonque æmōntaicō mænongadānīmpa. Mǎnōmaī mænonate ate dica wææ ante Wængonguī nānō yewæmōngainca ĩncæ māñincōnē cō cægadānīmpa. Ayæ ōnōmæca wayōmō wayōmō gocæte ante æmōntaicō capote mōngænte māo wocæ wocæ cægadānīmpa. ⁴⁵ Ayæ wadāni māñiōmæ nē quēwēnāni ĩñōnānite Wængonguī wido cæcā ate mōnō wæmæidi Ootowee wodi mīñæ ponte ōmæ æninque Wængonguī oncō æmōntaicō nāni ænte mōngængāincō māmō wodongadānīmpa. Wodōnāni ate Awēnē Dabii wodi nānō ēñate quēwenguīmpoga māñincō æmōntaicō ĩncæ ayæ a owogatīmpa. ⁴⁶ Awēnē Dabii ingante Wængonguī pōnō waa agacāimpa. ĩninque Dabii wæætē Wængonguī ingante apænedinque, Bitō Aacobo wodi Wængonguī ĩnōmi ĩmīpa, ante adinque botō, Bitō quēwenguīñōmō, ante oncō āmi mænonguīmo, āñongante Wængonguī Baa angacāimpa. ⁴⁷ Wæætē Tadōmōō wodi Wængonguī beyæ nē oncō mænongā ingacāimpa. ⁴⁸ Mǎnōmaī cægaīnāni ĩncæte Wængonguī ĩñōmō edæ æmōnga pōnī nē ongōngā inte waocā nānō ōnompoca mæñōnīncōnē ædō cæte pōnō Ao ante guīite quēwenguīngāā. Mǎnōmaīnō ante pōnente wædinque Wængonguī beyæ nē apænegaingā ĩmaī ante apænegacāimpa.

⁴⁹ ‘Botō nē Tæiyæ Awēnē ĩnōmo ĩñōmote ōōnæ ĩncæ botō Awēnē tæ contaquī baī ĩmpa, ĩnguīpoga wæætē botō ōnōwa podōwate quī baī ĩmpa.

Mǎnōmaī nē ongōmo beyæ mīnitō botō oncō ante ædō cæte mænonguīmīnī. ĩnguīpoga æcōnēnō guīdinque guēmanguīmoō, ante Wængonguī angampa. ⁵⁰ Botō ĩnæmpa tōmēmo ōnompoca tōmāā nē badongāīmo ĩnōmo ĩmōpa,’ ante Wængonguī Awēnē angampa, ante wacā yewæmōngacāīmpa.”

⁵¹ Ante apænedinque Etebā godōmenque ĩmaī ante apænecantapa. “Nōwo ēñēdāni. Mīnitō mīmō ōmædē ĩmīni inte wīī pōnencædō. Ōnōmōncaque ēñēninque wīī ædæmō ēñēmīni ĩmīni awædō. Mīnitō wæmæidi nāni cægaīnō ante ēñēmīnitawo. ĩnæmpa tōmēnāni nāni cægaī baī adobāī cædinque mīnitō Wængonguī Tæiyæ Wæmō

īmaī ante apænecantapa. “Nōwo ēñēdāni. Mīnitō mīmō ōmædē ĩmīni inte wīī pōnencædō. Ōnōmōncaque ēñēninque wīī ædæmō ēñēmīni ĩmīni awædō. Mīnitō wæmæidi nāni cægaīnō ante ēñēmīnitawo. ĩnæmpa tōmēnāni nāni cægaī baī adobāī cædinque mīnitō Wængonguī Tæiyæ Wæmō

Önōwoca ingante Baa āninque cōwē wææ āminipa tōō. ⁵² Minitō wæmæidi doyedē Wængonguī beyæ nē apænegaināni inānite togænte pāninque adocanque ingante ata cæpodāmaī inte tōmānāni inānite togænte pangadānimpā. Edæ nē apænedāni, Nē nō entawēnongā inte ponguingā ingampa, ante apæneyōnānite tōmēnāni inānite do wæñōnāni wængadānimpā. Nōwo iñōmō tōmēnāni nāni, Ponguingā, angaingā incæ do pongā adinque mīnitō godō wæñōmīnitapa tōō. ⁵³ Edæ, Iīmaī cæedāni, ante Wængonguī wææ angampa, ante Wængonguī anquedoidi ānāni ēñēninque yewæmōnāni ate mīnitō nē adōmīni incæ Baa āninque ēñēnāmaī cōwē cæmīnipa tōō,” ante Etebā iinque apænecantapa.

Etebā ingante wæñōnāni wængampa

⁵⁴ Mānīī awēñēidi guiquēnē Etebā nānō apænedō ante ēñente wædinque āināni badinque бага wentoquēnē wentoquēnē angate piñānitapa. ⁵⁵ Etebā iñōmō Wængonguī Tæiyæ Waemō Önōwoca ingante ædæmō ewocadinque oōnædē inō æmō adinque Wængonguī nāō apāite bai nānō emōnō acantapa. Ayæ nē Waocā ēñagāingā inte Itota incæ Wængonguī tōmēmæ inō adiyæ ongongā acantapa. ⁵⁶ Adinque, —Badogaa, oōnædē wi ænete bai ba abopa. Waocā nē ēñagāingā incæ Wængonguī tōmēmæ inō adiyæ ongongā abopa.

⁵⁷ Ante apænecā ēñente wædinque tōmēnāni piinte Yæ yæ āninque ēñēnāmaī cæcæte ante oñōmonca nī māmoncate cædānitapa. Godongāmæ piinte quingæ tōmēngā weca pogodo pōninque, ⁵⁸ tōmēngā ingante bæi ongōninque tōmēnāni nāni quēwēñōmō yabæque ænte māo dicaca tæi tacacæ cædānitapa. Tōmēngā æbānō angāā, ante ēñēnīnāni inte nē apænedāni iñōmō edæ tacacæ cædinque tōmēnāni weocoo yabæcooque gā tadongate tæcæ æmæwo pædingā Taodo nāni ānongā önōwaca inō nō cædōnānimpā. ⁵⁹ Dicaca tacayōnāni Etebā iñōmō Wængonguī ingante apænedinque, “Awēñē Itota, bitō botō önōwoca æncæbiimpā.” ⁶⁰ Ante da guicapod- inque yedæ āninque, “Awēñē, tōmēnāni nāni wēnæ wēnæ cædōnō ante ee ae,” āninque edæ mō ñonte bai wængacāimpā.

8

¹ Etebā wodi ingante wænoncæte ante dicaca tacadāni adinque Taodo guiquēnē, Waa wæñōmīni wængampa, ante Ao ante ongongacāimpā.

Nē godongāmæ pōnēnāni inānite Taodo togænte pangā

Mānīōnæ incæ mā togænte pāninque Eedotadēē iñōmō Codito ingante nāni nē

godongāmæ pōnencabo inānite godōmenque nangui togænte piinte pangadānimpā. Ate wædinque Itota nānō nē da godongainānique godāmaī ongōñōnāni wadāni iñōmō nāwæ wodii winōninque Oodeabæ Tāmadiabæ æmæñō æmæñō gogadānimpā. ² Mānīī Etebā wodi ingante æmæwo wæñōnāni wængā ate Wængonguī ingante nē waa adāni incæ Ca ca wædinque māo daga wenānitapa. ³ Taodo guiquēnē, Itota ingante nē pōnēnāni inānite wido cæcæimpā, ante nangui wēnæ wēnæ cædinque wacōnē pō guī wacōnē pō guī cædinque onguīñænāni tōnō onquiyæñāni inānite bæi ongonte wēā māo tee mōnegadānimpā.

Tāmadiabæ godinque Pedipe apænecā ēñēnānipa

⁴ Mānīī nē wodii winōnāni iñōmō ædōmē godinque Codito ingantedō ante cōwē watapæ apænedāni ēñēñōnānimpā. ⁵ Iinque Pedipe iñōmō Tāmadiā nāni nanguī quēwēñōmō gote apænedinque, Mōnō Codito æbānō do ponte cægacāi, ante apænecā ēñēñānitapa. ⁶ Mānōmaīnō ante apænedinque tōmēngā, Ate pōnecædānimpā, ante mā cæcā adinque nanguī ināni adoyōmō pōnēninque, Mōnō ēñengæimpā, ante cædānitapa. ⁷ Waodāni nanguī ināni wēnæidi wentamō ewocadāni tōnō quēwēñāni adinque Pedipe angā ēñēninque wēnæidi incæ Yæ āninque dæ tao godāni ate önōnānique badānitapa. Ayæ cōmāināni incæ cabæināni incæ tæiyæñāni inānite Pedipe cæcā ate waa badānitapa. ⁸ Ante adinque mānīñōmō quēwēñāni wæætē watapæ togadānimpā.

⁹ Wacā idō tōmēngā emōwo Timōnō iñōmō tōmēngā adoyōmō quēwēninque wēnæ tōnō wantæpiyæ cæcā inongāimpā. Iinque Tāmadiabæ quēwēñāni tōmānāni, Æbānō nanguī cæcāā, ante guīñente wæyōnānite tōmēngā, Nē idōmo inōmo inte botō iñōmō edæ nanguī cæte beyæ ñæñæmo pōni imo aedāni. ¹⁰ Angā ēñēninque awēñēidi incæ önōnānique incæ tōmānāni adoyōmō pōnēninque, “Wængonguī nānō tæi piñænō bai entawēninque ingā idō iñōmō nē Tæi Piñænongā ingampa,” ante pōñewēninque, Nē Næñængā pōni inongā ingampa, ante pemongadinque tōmēngā apænecā ate ædæmō ēñēñōnānimpā.

¹¹ Ayæ tōmēngā wantæpiyæ wēnæ tōnō wæætē wæætē mā cæcā adinque tōmēnāni, Tōmēngā ingante mōnō ēñengæimpā, ante tee empo tee empo godōnānimpā. ¹² Mānōmaī cæyōnānite Pedipe guiquēnē, Wængonguī Awēñē Odeye nempo mōnō quēwengæimpā, ante watapæ apænecā ēñēñānitapa. Ayæ, Mōnō Codito iñōmō tōmēngā emōwo Itota emongampa, ante apænebo ēñēdāni. Ante apænecā

ēñēninque onguifñānāni incæ onquiyānāni incæ wede pōnēninque æpānē guiddānitapa. ¹³ Īninque Timōnō incæ adobaī pōnēninque æpānē guiddinque Pedipe miñæ tee empo tee empo gocantapa. Pedipe, Ate pōnencædānimpā, ante mā cædinque tæī piñānte nanguī cæcā ate wædinque Timōnō adocā cōwē guifñente wægacāimpā.

¹⁴ Īninque, Tāmadiabæ quēwēnāni Wængonguī nānō apānedō ante ēñēninque do Ao ānānīpā, ante Eedotadēē ponte tedeyōnānīte Itota tōmēngā nānō da godongāināni incæ do ēñēnānitapa. Ēñēninque Pegodo tōnō Wāō inate Tāmadiabæ da godōnāni godatapa. ¹⁵ Godinque Tāmadiabæ pōninque tæcæ mā pōnēnāni beyæ ante tōmēna Wængonguī ingante iīmaī ante apānedatapa. Wængonguī ēñēmi. Bitō Tæiyæ Waēmō Ōnōwoca ingante tōmēnāniya da pōnōmi pō guicā ate ēwocacædānimpā, āmōnapā. ¹⁶ Edæ Awēnē Itota ēmōwo apānedinque tōmēnāni mā æpānē guiyōnānīte bitō Tæiyæ Waēmō Ōnōwoca tōmēnāniya wææ guiddāmaī ingantapa cæbii. Nōwo āmi pō guicæcāimpā. ¹⁷ Ante apānedinque Pegodo tōnō Wāō tōmēnāniya pōnō gampote apāneyōna Wængonguī Tæiyæ Waēmō Ōnōwoca pō tōmēnāni baonga guicantapa.

¹⁸ Mānōmaī pōnō gampoyōna Wængonguī Tæiyæ Waēmō Ōnōwoca tōmēnāniya pō guicā ate wædinque Timōnō guiquēnē tōmēnāni godonte æinta pædæ pōnōninque, ¹⁹ tōmēna inate,

–Mīnatō baī botō adobaī nē cæbo bacæboimpā āmopa. Pōnō cæmīna ate botō nē cæbo badinque wadāniya pōnō gampobo ate Wængonguī Ōnōwoca adobaī pō guicæcāimpā, āmopa.

²⁰ Āñongante Pegodo,

–Bitō mīni godonte æintaque pædæ godōninque, Wængonguī Ōnōwoca nānō da pōnōnongā ingante æncæboimpā, ante pōnēwēmīi. Edæ tōmēmi tiguitamonque nææninque edæ bitō ōmæe ēwenguinque gobāwe. ²¹ Īñæmpā, Wængonguī Ōnōwoca nānō da pōnōnongā ingante æninque godongāmæ cæcæboimpā, āmitawoo. Wængonguī ayongā nō pōnente cæbīpā ænguīmīi. Edæ mōnatō tōnō ædō cæte cæquīmīi. ²² Nōwo edæ mānīnō bitō wīwa cædinō ante wæwente pōnēninque ñimpo cæe. Ayæ mōnitō Awēnē ingante apānebi ēñēninque tōmēngā wabānō pōnō waadete cædinque mīmōno bitō pōnēwēnō ante wadæ cædinque ñimpo cæbaingampā. ²³ Bitō nāmā beyænque ante nē æinēmi inte bitō mīmōnē guinæmæ entawente baī quēwēmīpā. Ayæ bitō tōmēmi wīwa cædō beyænque ñā cæyænte baī quēwēmīpā, ante awædō.

²⁴ Angā ēñēninque Timōnō wæætē,

–Æ āmi awædō, āninque Pegodo ingante, Botō mīnatō ānō baī wīi bacæboimpā, ante cædinque mīnatō botō beyæ Wængonguī ingante apāneeda, angantapa.

²⁵ Ayæ Wāō tōnō Pegodo iñōmō, Itota incæ mōnō Codito ingaingā ingampā, ante mānīñōmō quēwēnāni inānīte mōnō Awēnē nānō ānō ante apānēda ēñēnānitapa. Īnque apānedinque adodō Eedotadēē gocæte ante wadæ gote Tāmadiabæ godinque tōmēna wayōmō wayōmō māo wædænque quēwēnāni weca pō pō cædinque nanguī ināni inānīte apānedinque Codito ingantedō ante watapæ apānēda ēñēnānitapa.

Etiopææ awēnē ingante Pedipe bee tengampa

²⁶ Māningā Pedipe ingante anquedo ayæ ate ponte āninque, “Bitō ægdōde, Eedotadēē wæi Gata goquīnō pædæ taoquinque betamonca gocæbīimpā,” angantapa. Mānīnō ōnōmæcaque wæidō ĩnompā. ²⁷ Mānōmaīnō angā ēñēninque Pedipe ængæ gantidinque wadæ godinque anquedo nānō ānīnonque cægonte ayongā onguifñængā Etiopææ quēwēningā pō eyepæ bee tengā acantapa. Īngā iñōmō Etiopææ tæiyæ awēnē onquiyængā Cantate beyæ tōmēnāni godonte æinta nē aacā ĩnongā inte ñænxæ awēnē ĩnongāimpā. Tōmēngā ñōwo Wængonguī weca ædæ wææninque watapæ apānecæte ante Eedotadēē æidingā inte ocaē ēmænte pōninque Pedipe ingante eyepæ māmō bee tengantapa. ²⁸ Īngā iñōmō cabayo nānō wēā pōnōncadea æi tæ contate ocaē ēmænte pōninque Itaiya wodi Wængonguī beyæ nē apānēgaingā nānō yewæmongainta næænte a cogantapa.

²⁹ Mānōmaī a conte pōñongante Pedipe ingante Wængonguī Ōnōwoca, “Goe, Īi cabayo nānō wēā pōnōncade eyepæ godinque guēa goe,” angantapa. ³⁰ Angā ēñēninque Pedipe pogodo godinque obo ponte ēñēñongā Etiopææ awēnē iñōmō Itaiya wodi nānō Wængonguī beyæ yewæmongainta ādinque apānecā ēñēninque,

–Bitō ate apānedō ante ædæmō ēñēmitawo.

³¹ Āñongante,

–Īñæmpā ēñēmogaa. Botō ĩmote apānedānīpā ēñēnguimoo.

Ante apānedinque Pedipe ingante, Bitō botō weca ææ guīte tæ contæe, angā ææ guī tæ contacantapa.

³² Mānīnta Wængonguī angā ēñēnte nāni yewæmongainta Etiopææ awēnē nānō aintā iīmaī ante yewæmonte ongōnōnimpā.

“Codotedo ingante wæñongæimpā, ante bæi ongote æninque tōō godonte baī cædinque

tōmengā ingante adobai wænoncæte ante bæi ongonte ænte godānitapa.

Obegaidi ocaguincoo ēō toyōnāni wædāmai pæ wēēnecā bai

tōmengā adobai wædāmai inte pæ wēēnecantapa.

³³ Piinte ānāni wæyongante nē apænte anguēnēnāni incæ, Pangæimpa, ante cædinque nōingā ante ānāmai īnānitapa.

Tōmengā ingante æmæwo wænonāni wængaingā īfongante,

Tōmengā nānō pæīnāni, ante ædō cæte apænequīlī.

³⁴ Ante nāni yewæmongāinō adingā inte Etiopæbæ awēnē ņōwo Pedipe ingante,

—Apænebi ēñēmoe. Nē Wængongui beyæ apænegaingā īfōmō æcānō ingante ante nē apænegacāi. Tōmengā nāmā ingante ante yewæmongantawo. Edæ wacā ingante ante yewæmongantawo, ante ēñencæte ante wæbopa.

³⁵ Ante āñongante Pedipe īfōmō Etiopæbæ awēnē nānō adinta adotaa ate apænedinque ayæ wataa wataa adinque Itota ingantedō ante watapæ apænecā ēñengantapa.

³⁶ Apæneyongā taadō godinque wapæ ganca pōnatapa. Equitobæ awēnē mānimæ adinque Pedipe ingante, Waa ae. īfōmō gāwapæ impa. Æpænē guīdāmai inguīmo, āmitawoo.

³⁷ Angā ēñēninque, —Bitō mīmōno wede pōnēmi ate botō Ao āmaīmopa, angantapa. Āñongate,

—Ao botō, Itota Codito nāwangā Wængongui Wengā īnongā ingampa, ante wede pōnēmopa.

³⁸ Āninque Etiopæbæ awēnē angā cabayo næ gongæ ate Pedipe tōnō guēa æpænē ti wæēna ate Pedipe tōmengā ingante æpænē guīdōngā guīicantapa.

³⁹ Ayæ æpænē guīite ate tōmengā tao gongæñongā Wængongui Awēnē Ōnōwoca Pedipe ingante īnæ æænonte ō ængā. Ate æmæwo adinque Etiopæbæ awēnē watapæ todinque oncōnē goinō gocantapa.

⁴⁰ Pedipe guīquēnē Atota īfōmō īñontobæ a ongōninque godōmenque wadāni nāni quēwēñōmō go apænedinque wayōmō nāni quēwēñōmō go apænedinque Tetadea ganca godinque Codito ingantedō ante watapæ apænecā ēñengadānimpa.

9

Awēnē Itota ingante Taodo acampa

(Nāni Cægāinō 22.6-16, 26.12-18)

¹ Taodo guīquēnē mōnō Awēnē ingante nē tee empote quēwēnāni īnānite piīninque, Wænongæimpa, ante bæi ongō bæi ongō cædinque cōwē ņimpo cædāmai ingacāimpa. ņōwo godōmenque cæcæte ante Wængongui oncōnē gote nē godongā űænængā pōni

īnongā ingante apænedinque, ² Awēnē ēñēmi, angantapa. Bitō Ao āmi īninque botō Daāmaco nāni quēwēñōmō gote ayōmo,

Onguīñænāni incæ onquiyænāni incæ æcāmenque Itota Taadō ante nē godāni īnāni,

ante adinque tōmēnāni īnānite bæi ongonte goti winte Eedotadēē ænte pōmaīmopa.

īninque bitō, Taodo mānōmai cæcæcāimpa, ante botō beyæ cadota ante yewæmōninque pædæ pōnōmi æninque botō wæætē

Daāmaco īfōmō māo oodeoidi odōmōincōnē awēnēidi weca gote pædæ godōmo ænte adinque tōmēnāni Ao āñōnāni mānōmai cæbāimopa.

³ Āñongā awēnē Ao ante yewæmōninque pædæ pōnongā æninque Taodo Daāmaco obo gote ayongante īñontobæ ōōnædē īnō nāinte bai cædinque tōmengā nānō ongōñōmō tōmāo guīnæ gongæ.

⁴ Adinque Taodo guīdōmēmæ tæ go wæængantapa. Ayæ wæænte ōñōñongante tōmengā ingante, “Taodo. Taodo. Quīnante botō īmote togænte pāmii.”

⁵ Angā ēñēnte wædinque Taodo wæætē, “Awēnē, æmōmidō īnōmi īmii.” Ante ēñēñongā, “Botō Itotabo īnōmo inte bitō nē togænte pānimo mānimotō īmopa cæbii.

īñæmpa wagada pāntoca bai bitō nāmā īñæ æwate bai cædinque cowate bai edæ caate bai wæbipa tōō.”

⁶ Mānōmai apænecā ēñēninque Taodo ancai guīñente do do wāadinque, “Awēnē, æbānō cæquūmo āmii.”

Āñongante mōnō Awēnē wæætē apænecantapa. “Bitō ængæ gantidinque īnāni nāni quēwēñōmō goe. Botō, Taodo īmaī cæcæcāimpa, ante wacā ingante Daāmaco īfōmō nē quēwengā ingante do apænebo ēñengampa cæbii. Bitō Daāmaco īfōmō gote ongōñōmi tōmengā wæætē bitō īmote apænecā ēñente cæcæbiimpa.”

⁷ Taodo tōnō godongāmæ godāni guīquēnē waocā ingante adāmai īnāni incæte, Ōnonque tempa, ante pōnēninque ancai guīñente wædānitapa.

⁸ Taodo īfōmō onguipoga ayæ a ōñongā inte ængæ gantidinque awinca adāmai ingā adinque wadāni tōmengā ingante ōnōmpo bæi ongōninque Daāmaco ganca ænte māodāni gocantapa.

⁹ Māniñōmō gote ongōninque tōmengā adāmai īnongā inte cænāmai bedāmai mēōnaa go adoōnæque īñonte wæwengacāimpa.

¹⁰ Ayæ wacā nē pōnengā Ānāniya Daāmaco īfōmō quēwengā inte mā pōni wīīmote bai ayongā mōnō Awēnē, “Ānāniya,” angā ēñēninque, “Awēnē, botō ēñē cōmopa.”

¹¹ Āñongā mōnō Awēnē wæætē, “Taodo űōwo Wængongui ingante apænecampa cæbii. Bitō ængæ gantidinque taadō nāni Tōinō ānōnō godinque Codaa oncōnē gote āninque, Tadoto nē quēwēningā Taodo īfōmō owocantawo, ante acæbiimpa.

¹² Wængongui ingante űōwo apænedinque ate bai ayongā

wacā Ānāniya pō guiidinque, Nōwo edonque acæbiimpa, ante gampocampa, ante ate bai Taodo wæcantapa cæbii. Tömengā wīimonte bai adinque nānō wædō bai cædinque bitō nōwo gote cæcæbiimpa.”

¹³ Angā ēñente wædinque Ānāniya wæætē, “Awēnē iñæmpa botō, Māningā Taodo iñōmō quīnō bai onguīñængā ingāā, ante nanguī dededāni do ēñēmopa. Ayæ, Eedotadēē iñōmō tömengā bitō quīnāni inānite wēnæ wēnæ cæcampa, ante dededāni ēñente wæbopa. ¹⁴ Ayæ nē godōnāni ñænænāni Ao ante yewæmōnāni æninque tömengā iñæmpa nē angā badinque bitō emōwo ante nē apænemōni iñōmōnite bæi ongonite tee mōnecæte ante pongampa cæbii.”

¹⁵ Ante wæyongante mōnō Awēnē wæætē Ānāniya ingante, “Īngā ingante do apænte æmo apa ānewēē. Tömengā ingante, Bitō wabæca gote wadāni inānite botō emōwo ante apænedinque ayæ tömēnāni awēñēdi inānite botō emōwo ante apænedinque idægoidi inānite adobaī botō emōwo apænebi ēñencædānimpa, ante tömengā ingante do antabopa cæbii. Nōwo tömengā weca gobāwe. ¹⁶ Ayæ botō nē æningā inte tömengā æbānō botō emōwo beyæ nanguī caate wæquēnengā ingāā, ante odōmōmo ate ēñencæcāimpa.”

¹⁷ Angā ēñēninque Taodo nānō owoyōmo go guiidinque Ānāniya tömengā ingante gampomōninque,

—Taodo botō tōniñabi ēñēmi. Bitō taadō pōninque Itota ingante abitawo. Tömengā iñōmō nē Awēnē inongā inte botō imote apænecantapa. Bitō Taodo weca godinque cæbi ate tömengā wēēñēdē nānō emōnō bai adinque Wængonguī Tæiyæ Wæmō Ōnōwoca ingante da pōnōmo æninque ewocacæcāimpa, ante mōnō Awēnē angā ēñēninque botō bitō weca pontabopa.

¹⁸ Ante Ānāniya tæcæ apæneyongā Taodo tömentagæ nānō emōnintagæ tæ wæænte iñontobæ edonque acantapa. Ayæ ængæ gantiyongante Ānāniya tömengā ingante æpænē guidongā guicantapa. ¹⁹ Ayæ cænguī cæninque tömengā baō wæætē tæi piñængā bacantapa. Ayæ Daāmaco iñōmō Itota ingante nē tee empote quēwēnāni weca godōmenque tæñōnæ quēwengantapa.

Daāmaco iñōmō Taodo apænecā ēñēnānipa

²⁰ Māniñōmō quēwēninque Taodo do oodeoidi odōmōincōnē go guīi go guīi cædinque, Itota Codito nāwangā Wængonguī Wengā ingampa, ante apænecā ēñēnānitapa. ²¹ Mānōmaī apænecā ēñēninque tömengā ingante nē ēñēnāni iñōmō ancaī guīñēninque, “Æ. Īngā adocā Eedotadēē iñōmō Itota emōwo ante nē apænedāni inānite nē wido

cæcā ĩmaingampa. Tömengā adocā nē wido cæcā incæ adodāni inānite bæi ongonite æninque, Wængonguī qui, ante nē godōnāni ñænænāni weca māo pædæ godoncæte ante nōwo iñōmō pōninque cæcā awædō. Edæ adocā ingānō angūēñē.”

²² Ante wædāni incæte Taodo godōmenque tæi piñænte entawēninque ĩmaī ante apænecantapa. Awēnē bacæcāimpa, ante Wængonguī nānō nē gao cæcadongā iñōmō mōnō Codito iñōmō edæ Itota adocā inongā ingampa, ante, Nāwangā impa, ante nōingā pōni apænecā. Adinque Oodeoidi Daāmaco iñōmō quēwēnāni guīquēñē, Ædō cæte wadō anguīi, ante wægadānimpa.

Oodeoidi wænoncæ cæyōnāni Taodo aamō cæte gocampa

²³ Īninque tæñōnæ go ate oodeoidi godongāmæ pōnente Ao āninque, Taodo ingante wænongæyimpā, ante cædānitapa. ²⁴ Mānōmaī ante cæyōnāni Taodo māniñō nāni āniñō do ēñengantapa. Tömēnāni guīquēñē, Mōnō quēwēñōmō wææ cæñemō tacā ate wæñōmō wæncæcāimpa, ante itædē woyowotæ wææ wāñōnānitapa. ²⁵ Wææ wāñōñōnāni tömengā ingante nē tee empote quēwēnāni wæætē yabæ wææ cæte iñōmō Taodo ingante woyowotæ mæi ayacōmoyāa inō otodē pædæ wææñōnāni ti wæænte gocantapa.

Taodo Eedotadēē ponte apænecampa

²⁶ Mānōmaī godinque Taodo Eedotadēē pōninque, Itota ingante nē tee empote quēwēnāni weca gobote, ante pongā. Adinque tömānāni, Nāwangā Itota ingante nē pōnengā ingantawogaa, ante guīñente awædō, ante pōnēninque wææ adānitapa. ²⁷ Bedēnabee guīquēñē Taodo ingante bæi ongōmænte æninque Itota nānō nē da godongaināni weca ænte māmongā pongantapa.

Ayæ tömēnāni inānite Bedēnabee apænecantapa. Taodo nōwo taadō godinque mōnō Awēnē ingante dobæ acāimpa. Mōnō Awēnē tömengā ingante do apænecantapa. Daāmaco gote quēwēninque Itota emōwo ante tömengā guīñēnāmaī apænedingā inte nōwo iñōmō pongā apa quēwēmīni. ²⁸ Bedēnabee mānōmaī angā ēñēninque Ao āñōnāni Taodo Eedotadēē iñōmō quēwēninque tao guīte ta tao guīte ta cædinque tömēnāni tōnō godongāmæ cædinque mōnō Awēnē emōwo ante guīñēdāmāi apænecantapa. ²⁹ Ayæ wadāni oodeoidi incæ guīdiego dededō nē dededāni māniñōmō quēwēñōnānimpa. Īnāni inānite Pabodo mōnō Awēnē emōwo ante nanguī apænedinque wæætēdō wæætē āñongante tömēnāni wæætē wænoncæte ante cædānitapa. ³⁰ Mānōmaī cædānipa, ante ēñente wædinque tömengā

nānō tōniñadāni bai badināni inte pancadāniya Taodo ingante Tetadea ganca māo ēmōninque, Godōmenque Tadoto iñōmō wodii wīnonte goe, ante da godōnāni gogacāimpa.

³¹ Iñinque Codito ingante nāni godongāmæ pōnencabo incæ Oodeabæ Gadideabæ Tāmadiabæ tōmāo quēwēninque māniñedē wædāmaī inte guēmānānitapa. Ayæ tæi piñænte entawēnāni badānitapa. Ayæ Wængongui Tæiyæ Waēmō Ōnōwoca ædæmō apæneca ate tōmēnāni wampo pōnēnāni badinque yebænte nanguī ināni baḡadānimpa. Ayæ mōnō Awēnē ingante ædō cæte ēñēnāmaī cæquīl, ante guīñente wæḡadānimpa.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nanguī yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninque mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā ēmōwo Ēnea do ocho wadepo ganca mōimoga cōmāingā inte nē ongōningā ingā. ³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidique tōmēmi mōimo ni capoe.

Āñongā Ēnea iñōmō do edæ ængæ ganticā. ³⁵ Adinque Dida quēwēnāni tōnō Tadōō quēwēnāni tōnō wēēnē nāni pōnēwengainō ante ēmō cædinque Wængongui Awēnē ḡamæñō pōnānitapa.

Dodoca wodi ingante Pegodo angā ñāni ōmæmongampa

³⁶ Māniñedē wacā onquiyængā nē pōnengā Tabita iñōmō Cope nāni quēwēñōmō quēwēnongāimpa. Tōmengā ēmōwo guidiego tededō Dodoca incæ mōnō tededō Cowāñe ēmongā inḡāimpa. Tōmengā iñōmō nē waa cædongā inte ōmæpodāni wæwēnāni inānite nanguī waa cædongā inte Cope iñōmō quēwēnongāimpa. ³⁷ Tōmengā māniñedē nangæ badinque æmæwo wængā. Ate tōmengā baō iñi æpæ āadēninque wæñōmēnacapaa mæi nō cædānitapa. ³⁸ Cope iñōmō quēwēninque Dida wāi gobæ impa, eyequei impa. Mānōmaī beyæ, Pegodo Dida iñōmō ongongampa, ante tededāni ēñente wædinque Itota ingante do tee empote quēwēnāni iñōmō onḡuiñæna mēnaa inate da godōninque, Cope iñōmō gote Pegodo ingante, “Quingæ pōe, ante æeda.”

³⁹ Ānāni gote āñete pōñōnate Pegodo godongāmæ pongā adinque tōmengā ingante wæñōmēnacapaa mæidāni guite acantapa. Owæmpoināni godongāmæ pōninque doyæncōo tōnō yabæcōo Dodoca mīngā quēwengāñedē nānō badongaincōo odōmōninque Ca ca wædāni. ⁴⁰ Adinque

Pegodo tōmānāni inānite angā tao godāni adinque da guicapote Wængongui ingante apænecantapa. Ayæ dobæ wænte onquite a ōñongā ḡamæñō dadi ēmænte adinque,

—Tabita, ængæ gantibi āmo.

Āñongā Tabita wodi awinca wi æmōninque Pegodo ingante adinque ængæ gantite contacantapa. ⁴¹ Ængæ ganti contayongante tōmengā ōnompō bæi ongōninque Pegodo tōō æmængā ate ædæmō ængæ gantite adiyæ ḡongængantapa. Ayæ owæmpoināni tōnō mōnō Awēnē quīnāni inānite Pegodo aa pecā pō guidāni ate mīngā ingā odōmḡongā adānitapa. ⁴² Iñinque, Mōnō Awēnē mānōmaī cæcantapa, ante Cope iñōmō nāni quēwēñōmō tōmāo gote tededāni ēñēninque nanguī ināni mōnō Awēnē ingante nē pōnēnāni badānitapa. ⁴³ Pegodo māniñedē æmontai nē aminengā Timōnō weca owodinque Cope iñōmō tæōnæ quēwengacāimpa.

10

Pegodo tōnō Codōnedio

¹ Tetadea nāni quēwēñōmō odōmāno tontadoidi Itadiaidi nāni ānoncabo inte quēwengadānimpa. Iñinque tontadoidi tiēē ganca nāni cabo tiēē ganca nāni cabo iñōnānite adocabodāni capitāo tōmengā ēmōwo Codōnedio ēmongacāimpa. ² Tōmengā nāni wencabo nāni owocabo owodinque, Mōnō wadō pōñēñōmonte Wængongui pangā wæcæ wæ, āninque Wængongui nānō ānō ante ēñente quēwēñōnānimpa. Ayæ pæ ḡompodāmaī inte Codōnedio, Ōmæpodāni wæwēnāni quī, ante pædæ godō pædæ godō cæcā æñōnānimpa. Ayæ Wængongui ingante ñimpo cædāmaī cōwē apænedongāimpa. ³ Tōmengā iñōmō ædæ wæicā ate mā pōni wīlimate bai acantapa.

Edonque wīlimate bai ayongante Wængongui anquedo tōmengā weca pō guidinque, “Codōnedio bitō imi.” ⁴ Angā wædinque Codōnedio tōmengā ingante cōwā adinque ancai guīñente wædinque, “Awēnē, æbānō ante āmii. Āmi ēñēmoe.” Āñongante, “Bitō Wængongui ingante nē apænebi imitawo, ōmæpodāni wæwēnāni inānite nē godōmi imitawo. Māninō bitō apænedō ante māninō bitō godōnō ante adinque bitō imite waa abopa, Wængongui angampa, angantapa. ⁵ Nōwo wadāni inānite āmi Cope iñōmō gote Timōnō Pegodo nāni ānongā ingante āñete poncædānimpa. ⁶ Adowo ēmōnongā Timōnō weca Timōnō Pegodo ḡawapæntibæ wedeca owocampa. Māningā Timōnō æmontai nē aminēnongā ingampa.”

⁷ Ante apænedingā inte Wængongui anquedo ingæ ḡocā adinque Codōnedio wæætē tōmengā ingante nē cæda mēnaa inate aa pecā pōnatapa. Ayæ tontadoidi incæ

pancadāniya tōmengā ingante nē cædāni inōnānīmpa. Īnīnque adocanque tontado incæ Codōnedio ingante nē cæcā incæ Wængonguī ingante nē ēñengā ĩnongāīmpa. Tōmengā ingante Codōnedio adobaī aa pecā ate tōmēnāni godongāmæ pōnāni ate Codōnedio, Wængonguī æbānō angantawoo, ante tōmānō ante adodō apænedīnque, Nōwo Cope ĩñōmō goedāni, angantapa.

⁹ Angā godīnque ĩmō wææñō taadō godīnque Cope ĩñōmō obo pōñōnāni māniñedē incæ tæcæbæcā incæ Pegodo guīquēnē Wængonguī ingante apæncæte ante oncōmanca æicantapa. ¹⁰ Ayæ ate gue ænente wædinque wadāni ĩnānite, Cæīnente awædō, āñongante cænguī ĩnque æænōnāmai ĩnte cōnōnāmai ĩñōnānite tōmengā wīlmonate ate baī cæwēngantapa. ¹¹ Ate baī æmō ayongante oōnædē wī ænete baī bayō mōincoo baī ñænæncoo pōni ĩñonte æmænecoo bæi æmænecoo bæi ongōnete baī inguipoga pædæ wæænōnte baī wææ wāi wocæ acantapa. ¹² Wāi wocæñō nē ocaguī mongæñāni incæ, nē ocaguī ōmaadāni incæ, nē oōmā ēmænte æidāmæ godāni incæ babæidi tōmānāni weocoo cæncadencoo ĩnō ongōnāni acantapa. ¹³ Ayongante wacā ānīnque, “Pegodo, ængæ gantīdīnque wæñonte cæe.”

¹⁴ Angā ēñēnīnque Pegodo, “Awēnē, ēñēmi. Ōnōnānīque ĩñōnānite botō, Baacā awædō, ānīnque cōwē cænāmai ĩmo apa āwæēē.” ¹⁵ Ānīnque wæætē ēñēñongā, “Wængonguī nānō ædæmō mēnongadongā incæ bitō ædō cæte baacā āmii.”

¹⁶ Ānīnque nē apænedīngā ĩñōmō wæætē adodō adodō angā ēñēnīnque Pegodo wæætē, Baacā awædō, ante Baa angantapa. Ayæ mempoga go adopoque wæætēdō wæætē adodō āna ate ñænæncoo pōni weocoo incæ oōnædē ĩnō wēā æænongā baī acantapa. ¹⁷ Īnīnque, Mānōmāinō ante wīlmonate baī adīmo ĩnte botō quīnō baī cæquīmoo, ante Timōnō Pegodo pōnēē congantapa. Pōnēē cōñongā Codōnedio nē nānō da pōñōnāni guīquēnē, Timōnō oncō æyōmōnō ĩ, ante diquī diquī mīnte adīnque yabædemō ĩnō næ gongæñīnque, ¹⁸ Timōnō Pegodo nāni ānongā ĩñōmō owocāā, ante ēñencæte ante aa pedānīnque.

¹⁹ Pegodo wīlmonate baī nānō adīnō ante ayæ pōnēē cōñongante Wængonguī Ōñowoca, “Timōnō ēñēmi, bitō ĩmīte ante onguīñænāni mengāā go adocanque diquī diquī mīnānīpa quēwēmīi. ²⁰ Tōmēmo āmo pōnānīpa cæbīi. Bitō ængæ gantīdīnque yæipodē wæidinque tōmēnāni tōnō ee goe,” angantapa.

²¹ Angā ēñēnīnque Pegodo yæipodē wæidinque tōmēnāni ĩnānite, Botō mīnītō nē

diquī diquī mīnōmo adobo ĩmopa. Mīnītō quīnante pōmīnīi.

²² Āñongante,

—Mōnītō awēnē capitāō Codōnedio incæ angā pōmōnīpa. Tōmengā ĩñōmō Wængonguī ayongante nō cæcā ĩnongā ĩnte Wængonguī ingante guīñēte quēwengampa. Nē nō cæcā ĩngampa, ante pōñēnīnque oodeoidi tōmānāni tōmengā ingante waa adānīpa. Īnīnque Wængonguī anquedo tæiyæ waēmō ĩnongā ĩnte wæætē Codōnedio ingante, Bitō wadāni ĩnānite āmi gote Pegodo ingante āñete poncædānīmpa. Tōmengā ĩñōmō bitō weca pōnīnque apæncā ēñencæbīīmpa, angā ēñēte wædinque Codōnedio wæætē mōnītō ĩmōnīte da pōnongā pōmōni ae.

²³ Ante apænedāni ēñēnīnque Pegodo angā pō guīite tōmengā weca owodānīnque. ĩmō ate Pegodo tōmēnāni tōnō tao goyongante Cope ĩñōmō quēwente nē pōñēnāni incæ pancadāniya godongāmæ tao wadæ godānīnque.

²⁴ Mānōmāi godīnque Pegodo ĩñabæ wæængā Tetadea pongantapa. Codōnedio guīquēnē, Ōo ponguīngā, ante pōñēnīnque tōmengā guīdēnāni tōnō tōmengā æmīgoidi ĩnānite do āñecā ponte godongāmæ ongōnānīnque. ²⁵ Īnīnque Pegodo ĩñōmō oncōnē pō guīicæ cæyongā Codōnedio wæætē oncodo tao bee tēnīnque, Æ, bitō Wængonguī anquedo ĩnōmi ĩmīpa, ante baī cædinque ædæ wæænte Pegodo ōñowa gāānē guīdōmēmæ ñongængā. ²⁶ Adīnque Pegodo wææ ānīnque,

—Īñæmpa bitō waobi ĩmi baī botō adobaī waobo ĩnōmo ĩmopa. Ængæ gantībi, ānīnque Pegodo angā ængæ gantīcantapa.

²⁷ Ayæ Codōnedio tōnō guēā tededīnque Pegodo oncōnē guīite ayongante nangūi ĩnāni godongāmæ mæ ongōnāni. ²⁸ Adīnque tōmēnāni ĩnānite,

—Mīnītō do ēñēmīnīpa. Oodeoidi ĩnōmōni ĩnte mōnītō Mōitee wodi nānō wææ angāinō ante Ao ante ēñēte cæmōnīpa. Īnīnque, Oodeo ĩnāmai ĩnāni tōnō godongāmæ cædāmai incæmīnīmpa, ante ayæ, Tōmēnāni weca go guīdāmai incæmīnīmpa, ante mōnītō ēñēngāinō ante cæmōnīpa, ante mīnītō do ēñēmīnitawoo. Incæte Wængonguī wæætē botō ĩmote ĩmai ante odōmōngānīpa. Bitō, Baacā awædō, ante tedete baī wocāā ĩngantedō ante tededīnque, Wentamō mongængampa, ante ānāmai incæbīīmpa. Ayæ, Ōnonganque ĩngampa, ante ānāmai incæbīīmpa, ante Wængonguī botō ĩmote do odōmōngā atabopa. ²⁹ Āñete pōñāni ate botō, Wængonguī mānōmāinō ante odōmōngā atabopa, ante pōñēnīnque ee pontabopa. Īnīnque quīnante botō ĩmote aa pemīnīi, ante ēñencæte ante wæbopa.

³⁰ Āñongante Codōnedio wæætē,

—Do mēōnaa go mēōnaa iñonte botō tōmēmo oncōnē cæñāmaī inte Wængongui ingante apænetabopa. Botō mǎnōmaī ñōwo bai ædæ wæicā apæneyōmo onguiñængā weocoo nǎāmænta pōni mongængā ponte botō weca a ongongā atabopa. ³¹ Ayæ botō imote apænedinque, “Codōnedio, bitō Wængongui ingante apænebitawo, angantapa. Mǎninō bitō apænedō ante Wængongui do ēñengantapa. Ōmæpodāni wæwēnāni qui, ante bitō godōmitawo. Mǎninō bitō godōnō ante adinque Wængongui cōwē pōnengampa cæbii. ³² Ñōwo āmi Cope gote Timōnō Pegodo nāni ānongā ingante āñete poncædānimpa. Tōmengā wacā Timōnō æmontai nē aminengā weca gāwapæntibæ wedeca owocampa.” ³³ Angā ēñēninque botō wæætē bitō imite ante, Āñete pōedāni, antabopa. Nōwo bitō do pōmi waa abopa. Īninque ñōwo iñōmō Wængongui ayongā tōmāmōni godongāmæ a ongōñōmōni bitō, Wængongui Awēnē mōnitō beyæ ante bitō imite æbānō angāā, ante apænebi ēñencæte ante ongōmōnipa, angantapa.

Codōnedio oncōnē ongōninque Pegodo apænecampa

³⁴ Codōnedio mǎnōmaī apænecā ēñēninque Pegodo iīmaī ante apænecantapa.

—Wængongui, Adoyōmō pōni imīnipa, ante tōmāmō imonte pōnō adoyōmō pōni cæcampa, ante botō, Nāwangā impa, ante ñōwo tæcæ ēñēmopa. ³⁵ Īninque iīmæca quēwēnāni incæ æcānō Wængongui ingante guiñente wædinque nō cæte quēwēna ante adinque Wængongui mǎningā ingante Ao ante do ængampa. ³⁶ Mǎnōmaī cæbopa, ante idægoidi inānite apænemīni ēñencædānimpa, ante Wængongui mōnitō imōnite da godongā gote iīmaī ante apænemōni ēñēnānipa. Tōmāmæ quēwēmō iñōmonte mōnō Tæiyæ Awēnē iñōmō Itota Codito ingampa. Tōmengā waa pōni pōnō cæcā beyænque Wængongui piyænē nānō cægainō ante watapæ mōni apænedō impa. ³⁷ Wāō wodi, Āpæñē mōnō guidongæimpa, ante apænecā ēñēnāni ate Itota Codito iñōmō Gadideabæ iñōmō mā cædinque Oodeabæ tōmāo cægonte æbānō cægacāi, ante do ēñēmīnipa. ³⁸ Iīmaī ingatimpa. Wængongui tōmengā Ōnōwoca ingante angā Itota Nāatadeta nē quēwengāngā baonga wææ guigacāimpa. Wææ guicā ate Itota tæi piñænte entawēninque wayōmō wayōmō gote tōmāo cægōninque waa cægacāimpa. Edæ Wængongui tōmengā tōnō godongāmæ quēwente cæcā beyæ Itota iñōmō, Wadāni wēnæ angā ēñēninque goti winte bai wæwēnānipa, ante adinque wēnæidi inānite

angā tao godānitapa. Ayæ wadāni wēnæ wēnæ inte wæyōnānite tōmengā godō cæcā ate edæ waa ināni bagadānimpa.

³⁹ Pabodo mǎnōmaīnō ante godōmenque apænecantapa. “Oodeoidi ōmæ cægōninque ayæ Eedotadēē iñōmō quēwēninque, Itota Codito æbānō cægacāi, ante nē adimōni inte mōnitō iñōmō mǎninō tōmānō ante nē apænemōni imōnipa. Tōmengā ingante awæ ñænquedimæ cæte godō wæñōnāni wængacāimpa. ⁴⁰ Incæte

Itota do wæningā inte mēōnaa go adoōnæque ōñongante Wængongui angā ñāni ōmæmonte mīngā inte edonque pōni a ongongā agadānimpa. ⁴¹ Wīi tōmānāni adānitapa. Pancamōniya atamōnipa. Itota ñāni ōmæmongā ate tōmengā tōnō nē godongāmæ cænte bedimōni iñōmōnite Wængongui, Mānimodānique Itota mīngā ongongā ingampa, ante nē adināni inte nē apænedāni incædānimpa, ante mōnitō imōnite apænte ængacāimpa. Mōnitō adomōnique tōmengā ingante atamōnipa. ⁴² Ayæ mōnitō imōnite āninque Wængongui, Mīnitō iñōmō do ēñēnimīni inte nē apænemīni badinque waodāni inānite mǎnōmaīnō ante apænedinque iīmaī ante apænecāmīnimpa. Mīi quēwēnāni inānite do wæñināni inānite Itota Codito iñōmō edæ tōmānāni inānite edæ nē apænte anguingānō anguēnē, ante apænemīni ēñencædānimpa, ante Wængongui mōnitō imōnite angacāimpa. ⁴³ Ayæ, Mōnō Codito poncæcāimpa, ante do ēñegaināni inte tōmānāni Wængongui beyæ adoyōmō apænegadānimpa. Tōmēnāni, Codito ingante nē pōnēnāni wēnæ wēnæ nāni cædō ante adocā Codito emōwo beyænque Wængongui pōnō waadedinque ñimpo cæcā quēwencædānimpa, ante doyedē apænegadānimpa,” ante Pegodo Codōnedioidi inānite apænecā ēñēnānitapa.

Oodeoidi ināmaī ināni Wængongui Ōnōwoca ingante cēnāni

⁴⁴ Pegodo mǎninō ante tæcæ apænecā ēñēē cōñōnānite Wængongui Tæiyæ Waēmō Ōnōwoca tōmēnāni tōmānāni baonga wææ guicantapa. ⁴⁵ Pegodo tōnō godongāmæ pōnināni guiquēnē nē pōnēnāni ināni incæte, Mōnō ēō togænte quēwengæimpa, ante nē ānōnāni ingadānimpa. Īninque tōmēnāni, Oodeoidi ināmaī ināni inānite Wængongui Tæiyæ Waēmō Ōnōwoca do wææ guicampa, ante adinque edæ guiñente wædānitapa. ⁴⁶ Edæ Codōnedioidi Wængongui Ōnōwoca ingante ewocadinque wadāni nāni tede bai wadāni nāni tede bai iñontobæ apænedinque Wængongui ingante waa adinque waa todāni ēñente wædinque oodeoidi mǎnōmaī guiñente wædānitapa. ⁴⁷ Adinque Pegodo tōmengā tōnō nē pōnināni inānite,

—Tömēnāni mōnō bai Wængongui Tæiyæ Waēmō Ōnōwoca do ænināni inānite adinque tōmēnāni, Æpænē guidōmi guīboe, āñōnānite mōnō ædō cæte wææ anguiī. ⁴⁸ Āninqe Pegodo angā ēñēninque tōmēnāni Itota Codito émōwo apænedinque æpænē guidōnāni guīdānitapa. Æpænē nē guīdēnāni iñōmō ayæ Pegodo ingante, Tæōnæ mōnitō weca quēwencæbiimpa, ānāni Ao ante quēwengacāimpa.

11

Eedotadēē iñōmō nē pōnēnāni inānite Pegodo apæneca

¹ Oodeoidi ināmai ināni incæ Wængongui nānō ānō ante do Ao ante ēñēnānīpa, ante wadāni Oodeabæ tōmāo cægonte tededānitapa. Īninqe Itota nānō da gogaīnāni tōnō wadāni nē pōnēnāni tōnō mānīnō ante do ēñēnānitapa. ² Īninqe Pegodo Eedotadēē iñōmō æite quēwēñongate nē pōnēnāni incæ pancadāniya, Mōnō ēō togængæiimpa, ante nē ānōnāni inte tōmengā ingante pūininqe, ³ Īmai ante ānānitapa.

—Quimæ bitō togænāmai ināni weca incæ go guīdinque cæmitapa tōō.

⁴ Āñōnānite Pegodo, Æbānō cæte ī, ante adodō adodō ante apæneca ēñēnānitapa.

⁵ —Botō Cope nāni quēwēñōmō gote quēwēninque Wængongui ingante apænedinque cæwēnente ongōninque wūimonte bai atabopa. Wūimonte bai ayōmote weocoo ñæñæncōo mōincoo bai æmæñecoo yao æmæñecoo yao oncōnete bai oōnædē īnō pædæ wææñonte bai ayōmote botō weca wææ wāi wocæ atabopa. ⁶ Wāi wocæñō botō acæte ante guimō ayōmo babæidi bai ināni inte ocagui mōngæñāni, æmōntaique mongæñāni, oōmā ēmæñāni yæmiñæncōo īnō ongōnāni bai atabopa. ⁷ Ayæ wacā botūmote, “Pegodo, ængæ gantidinque wænonte cæe.” ⁸ Angā ēñēninque botō, “Awēnē ēñēmi. Baacā ingā ānewēē. Nāwāqingā ināmai iñongante cōwē cænāmai īmōi ae.” ⁹ Ante wæyōmote oōnædē apæneca botō nē ēñēningā godōmenque āninqe, “Wængongui nānō ædæmō mēnongadongā ædō cæte baacā āmii.” ¹⁰ Āninqe tōmengā wæætē wæætē mempoga go adopoque adodō angā ate ñæñæncōo bai adodō oōnædē ingæ æi atabopa. ¹¹ Māniñedē Tetadea nē quēwengā da pōnongā pōninque onguīñæñāni mengāa go adocanque botō īmote ante diquī mīncæte ante botō owocō boyæ tæcæ pōninque næ gongæñānitapa.

¹² Ayæ Wængongui Ōnōwoca incæ botō īmote angā ēñēninque botō, Wadāni inānīpa, ante pūnāmai īmo inte guīñēnāmai tōmēnāni tōnō ee gotabopa. Ayæ botō tōnō īināni iñōmō

tei ganca ināni mānimpodāni godongāmæ godānitapa. Gote ayōmōni, Codōnedio oncō impa, ante adinque go guītamōnīpa, ante Pegodo apæneca. ¹³ Ayæ, Go guīte ēñēñōmōnite Codōnedio iñōmō, Æbānō cætīmpa, ante apænedinque mōnitō imōnite īmai ante apæneca. Botō oncōnē Wængongui anquedo a ongongā atabopa. Ayæ botō īmote āninqe anquedo iñōmō, “Bitō Cope iñōmō āmi wadāni gote Timōnō Pegodo nāni ānongā ingante āñete poncædānīpa. ¹⁴ Tōmengā pōninque, Mīni quēwencabo æbānō cæte wænāmai quēwenguīmīni, ante bitō īmite apæneca ēñæncæbiimpa.” Mānōmāinō ante Wængongui anquedo apæneca ēñente cætābopa, ante Codōnedio mōnitō imōnite apæneca ēñentamōnīpa.

¹⁵ Māningāpa apænedinque Pegodo īmai angantapa. “Wængongui Tæiyæ Waēmō Ōnōwoca mā pōninque mōnitō imōnite nānō guidō bai ñōwo iñōmō botō tæcæ apæneca cæyōmo adocā edæ tōmēnāniya adobai wææ guīcantapa. ¹⁶ Īninqe botō, Mōnō Awēnē Itota æbānō angacāi, ante adodō ante pōnentabopa. ‘Wāō wodi iñōmō æpænē guidongacāimpa. Wængongui Tæiyæ Waēmō Ōnōwoca guīquēnē mīnitō baonga pō guīcæcāimpa,’ ante Itota do apænegacāimpa, ante botō ōnōwēnenque pōnentabopa. ¹⁷ Ayæ, Mōnō Awēnē Itota Codito ingante wede pōnēmōni ate Wængongui tōmengā Tæiyæ Waēmō Ōnōwoca ingante da pōnongā æntamōnīpa. Ñōwo tōmēnāni adobai wede pōnēnāni ate Wængongui mōnitō imōnite nānō da pōnongāingā ingante tōmēnāniya adobai da pōnongā ænānīpa, ante pōnentabopa. Mānōmai cæcampa, ante pōnēninque botō, Ædō cæte Wængongui ingante Baa anguīmoo.”

¹⁸ Ante Pegodo, Æbānō cætīmpa, ante tōmānō ante edonque apæneca ēñēninque tōmēnāni wæætē, Mōnō ædō cæte godōmenque piinte anguiī, ante piyænē cæte apænedānitapa.

—Ñōwo idæwaa āmōnīpa. Wadāni oodeoidi ināmai ināni incæ mōnō bai, Idæwaa wēnæ wēnæ cæte awædō, ante guingo imonte wædāni ate Wængongui pōnō waadete cæcā ate quēwēnānīpa, ante ñōwo tæcæ mā ēñēmōnīpa, ante todinque Wængongui ingante edæ watapæ apænegadānīpa.

Antioquiya iñōmō Itota ingante nāni pōnencabo

¹⁹ Māningā Etebā wodi ingante wænōninque oodeoidi godōmenque wadāni nē pōnēnāni inānite wēnæ wēnæ togænte pānāni wædinque nē pōnēnāni iñōmō wodii winōninque nāwæ gote Pēnitā ganca Tipidebæ ganca Antioquiya ganca

godānitapa. Godinque tōmēnāni, Itota Codito æbānō cægacāi, ante oodeoidique inānite apænedinque wadāni inānite apænedāmai ingadānimpa. ²⁰ Incæte Tipidebæ iñōmō quēwēnāni tōnō Tidēnebæ iñōmō quēwēnāni pancadāniya Antioquiya iñōmō godinque guidiegoidi inānite adobai Itota Codito ingantedō ante watapæ apænedāni ēñēnānitapa. ²¹ Iñinque mōnō Awēnē tōmēnāni tōnō godongāmæ cæcā beyænque nanguī ināni tæcæ pōnēninque tōmengā gāmænō pōnānitapa.

²² Mānōmai pōnēnānīpa, ante tededāni ēñēninque Eedotadēē iñōmō Codito ingante nāni godongāmæ pōnencabo incæ Bedēnabee ingante, Bitō Antioquiya iñōmō godinque ate pōe, ānāni. ²³ Māniñōmō gote pōninque Bedēnabee iñōmō, Antioquiya iñōmō quēwēnāni inānite Wængongui waadete pōnō cæcampa, ante adinque nanguī todirque tōmānāni inānite, Minitō mīmōno wede pōnēninque mōnō Awēnē miñæ cōwē quēwēdāni, ante nanguī angantapa. ²⁴ Bedēnabee iñōmō Wængongui Tæiyæ Waēmō Ōnōwoca ingante ēwocadinque nē wede pōnengā iñongā inte nē waa cæcā iñongāimpa. Iñinque tōmengā apænecā ēñēninque tōmēnāni nanguī ināni mōnō Awēnē gāmænō pongadānimpa.

²⁵ Bedēnabee wæætē Taodo ingante diqui mincæte ante Tadoto iñōmō gote, ²⁶ adinque tōmengā ingante Antioquiya iñōmō ænte pongantapa. Pōninque adoque wadepo quēwēninque tōmēnāni Codito ingante nē tee empote quēwencabo tōnō cōwē godongāmæ ponte apænedinque nanguī ināni inānite odōmonte apæneda ēñēnānitapa. Ayæ Antioquiya iñōmō quēwēnāni Codito ingante nē tee empote quēwēnāni inānitedō ante apænedinque, Coditoidi inānīpa, ante mā pemōninque apænedōnānīpa.

²⁷ Ayæ Wængongui beyæ nē apænedāni pancadāniya māniñedē Eedotadēē quēwēninque Antioquiya pōnānitapa. ²⁸ Tōmēnāni nāni Wængongui beyæ apæneincabo incæ adocanque Agabo nāni ānongā iñōmō Wængongui Ōnōwoca ingante ēwocate apænedinque, Mōnō waocabo quēwēñōmō tōmāmæ cænguī oo dæ ba adinque mōnō gæwænte wæquimāmo baquino anguēnē, ante angacāimpa. Iñinque iñincayæ ate Codaodiu Awēnē ingāñedē Agabo nō nānō āninō bai do batimpa. ²⁹ Ba adinque Antioquiya nāni pōnencabo godongāmæ pōnēninque, Mōnō tōniñadāni iñōmō Oodeabæ quēwēninque edæ tepempo gæwænte wædānīpa cæmōō. Tōmēnāni beyæ mōnō godonte æinta pædæ godōninque adocanque eyepæ inte nānō godonganca wacā eyepæ inte nānō godonganca godongæimpa, ante

godongāmæ Ao ānānitapa. ³⁰ Āninque eyepæ pædæ pōnōninque Bedēnabee tōnō Taodo inate, Ānte māo godinque nē pōnēnāni inānite nē aadāni nē Picænāni nempo pædæ godōmīna æncædānīpa, ante da pōnōnāni ænte gote godōna ængadānīpa.

12

Tantiago wængā ate Pegodo ingante tee mōnedānīpa

¹ Māniñedē Codito ingante nāni godongāmæ pōnencabo iñōnānite awēnē odeye Edode iñōmō pancadāniya inānite wēnæ wēnæ cæcæte ante angā bæi ongonte ængadānīpa. ² Mānōmai cædinque tōmengā angā ēñēninque Wāō tōniñacā Santiago ingante yaēmenca wæñōnāni wængacāimpa. ³ Santiago wodi mānōmai wængā adinque oodeoidi todāni ate wædinque Edode, Godōmēnque cæbo ate nanguī todirque botō imote waa acædānīpa, ante cædinque Pegodo ingante adobai bæi ongongantapa. Edæ pāo yedæ æmpoqui omæmō i nāni ææmæ cæyedē māniñedē tōmengā ingante bæi ongonte ængantapa. ⁴ Mānōmai æninque Edode iñōmō, Oodeoidi Patowa ææmæ iñinque bedāni ate botō Pegodo ingante ænte tadonte tōmānāni ayōnānite apænte ancæboimpa, ante pōnēninque tōmengā ingante tee mōnecantapa. Tee mōnedinque Edode godōmēnque angā ēñēninque tontadoidi mengāa go mengāa nāni cabo pō wææ wānonte goyōnāni wacabo adopodāni pō wææ wānonte godōnānīpa. Mānōmai wacabo pō wacabo pō cædinque menca-bodāniya go mēncabodāniya wæætē wæætē ponte wææ wānonte godōnānīpa. ⁵ Iñinque Pegodo ayæ tee mōnete ongōnongāimpa. Incæte tōmēnāni Codito ingante godongāmæ nāni pōnencabo Wængongui ingante tōmengā beyæ cōwē nanguī apænegadānīpa.

Pegodo ingante Wængongui incæ ñimpo cæcā gocampa

⁶ Pegodo ingante tontadoda mēnaa tōnō æmæncaipo æmæncaipo yaēmēngō tæi goti wincapodāni wæyongante wada odēmō cōwē wānō cōñōnāimpa. Iñinque Edode tōmengā nānō apænte anguiōnæ ado woyowotæ Pegodo mānōmai goti winte wædongā inte mō ñongantapa. ⁷ Iñontobæ Wængongui Awēnē nānō da pōnōningā anquedo a ongongantapa. Tee mōnete oncōnē ñāō gongæntapa. Pegodo mō ñōñongante Wængongui nānō da pōnōningā iñōmō æmætæ inō tao cædinque, “Pegodo, nāni omæmonte quingæ ængæ gantibi.” Āñongā daagōmē nāni tæi wini incæ tōmenque ñimæncæ tæ wæængatimpa. ⁸ Ayæ, “Bitō weoocoga pacadeyænta pacadeyænte awæncata wēwabi.” Angā ēñente cæcā

adinque Wængongui anquedo godōmenque, “Yacoo wīni caadinque botō miñæ pōe.”

⁹ Angā ēñēninque Pegodo, Awii cæmante awædō. Anquedo dicæ ponte cæcāā. Mānōmaī ponte cæcampa, ante botō wīlimate baī aboimpa, ante wawique pōnengā incæte anquedo miñæ tee empote tao gocantapa. ¹⁰ Mānōmaī tao godinque guicōnē nē wānōna ongōñōna wodo tebæ tao godinque yabæcōnē tamongademō nē wānōna ongōñōna wodo tebæ tao godinque yaēmewæ odemō tōmēnāni quēwēñōmō ante nāni tao goquīnemō ganca pōnatapa. Mānīnemō ganca ponte ongōñōna yaēmewæ odemō incæ tōmenque æ ænete bayō tao godinque taadō adodonque cægōna ate anquedo iñōmō ingæ gocā ate Pegodo guiquēnē adocanque a ongonantapa.

¹¹ Adoboque a ongōmopa, ante wædinque tōmengā wæætē nāmā pōnengā badinque, “Æ. Nāwangā incæ do tate ēñēmopa. Edode nempo wæwēninque botō oodeoidi nāni pīnō wæquēnēmo īmo adinque Wængongui angā ēñēninque tōmengā anquedo ponte botō īmote gā pe æmpote ō ængā ate aamō cæbopa, ante tæcæ pōnēmopa.”

¹² Ante pōnente wædinque Pegodo wadæ godinque Wāō Māadoco nāni ānongā tōmengā badā Māadiya oncō boyæ ponte næ gongægantapa. Mānīcōnē wadāni nē pōnēnāni incæ do pōninque Wængongui ingante godongāmæ apænee cōnōnānimpa. ¹³ Pegodo iñōmō yabædemō ongote aa peyongā baquēcā nē ēacā ingante nē cæcā inte tōmengā ēmōwo Adoda iñōmō ēñēcæte ante pongantapa. ¹⁴ Ponte ēñēñongā Pegodo incæ aa pecā ēñēninque watapæ tote wædinque tōmengā wīlī pōnēninque odemō wi ænedāmaī pogodo gote edæ wadæ guidinque, Pegodo incæ oncodo a ongonā tamēñedāni. ¹⁵ Ante apæneccā ēñēninque tōmēnāni wæætē,

—Adoque antedō amīni.

Ante wæyōnāni tōmengā, Nāwangā impa, ante ancaa angā ēñēninque tōmēnāni,

—Wa. Pegodo ingante nē aacā anquedo īmaingampa.

¹⁶ Ante tēdeyōnāni Pegodo iñōmō ayæ aa pete ongōnongāimpa. Ayæ ponte wi ænete ayōnāni Pegodo ingante adinque ancaī guīñente wædānitapa. ¹⁷ Tōmengā wæætē, Apocæñē īedāni, ante ōnopocaque compo cæcā adinque pæ wēneyōnāni tōmēnāni īnānite apæneccantapa. Botō tee mōnete wæyōmote Wængongui æbānō pōnō cæcā ate tate pōmoo, ante tōmānō ante adodō ante apæneccanque,

—Botō apænebo mīni ēñēnō ante mīnitō wæætē wacā Tantiago ingante apæneccanque wadāni mōnō tōniñadāni īnānite apænemīni ēñēcædānimpa.

Āninque Pegodo wayōmō wadæ gocantapa.

¹⁸ Īimō wæñō nāō bayonte tontadoidi guiquēnē, Pegodo ædōnō gote dæ angāā, ante nangui Yæ yæ ante cædānitapa. ¹⁹ Mānōmaī cætimpā, ante apænedāni ēñente wædinque Edode angā diquī diquī miñōnāni Pegodo ayæ dæ angantapa. Īininque nē wææ wānōnīnāni īnānite Edode, Ābānō cætīi, ante ancaa angā wædinque tōmēnāni, Mōnō ædō cæte anguii, ante wæyōnānite tōmengā wadāni īnānite angā capo wæñōnāni wængadānimpa. Edode tōmē Oodeabæ wadæ tao godinque Tetæda gote quēwengacāimpa.

Edode wængampa

²⁰ Tido iñōmō quēwēnāni tōnō Tidōō iñōmō quēwēnāni īnānite awēnē Edode wodi māniñedē ēnagate ængui bacā adinque tōmēnāni wæætē godongāmæ pōnente Ao āninque Edode weca apæneccā pōnānitapa. Tōmēnāni, Mōnō iñōmō awēnē odeye Edode ōmæ quēwēnāni pōnōnāni æninque mānīnonque cænte quēwēmopa, ante wædōnāni inte tōmengā ingante, Bitō pīnāmaī inte piyæñē cæbi quēwēmōnie, ante ancæte ante pōnānitapa. Pōninque tōmēnāni Edode oncōnē owodāni īnānite nē aacā Bodato ingante waa cædinque tōmengā ingante ānāni Ao ante tōmengā wæætē Awēnē Edode ingante tōmēnāni beyæ apæneccā ēñęcacāimpa. ²¹ Edode iñōmō, Īiōnæ ba ate botō ponte apæneccæboimpa, ante tōmengā nānō āniōnæ ĩnque ba ate tōmengā awēnē weocco waēmconcoo wēñate pōninque awēnē nāō apænte ante contaimpaa tæ contadinque tōmānāni ayōnāni tōmēnāni īnānite apæneccantapa. ²² Apæneccā ēñēninque tōmānāni Yæ yæ āninque, “Wīlī waocanque tēdecā ēñēmopa. Wængonguiidi nāni tēdepāmo baī tēdecā ēñēmopa.” ²³ Ante Yæ āñōnāni Edode wodi wæætē, Nāwā Wængonguinque nē waa cæcampa, ante anguēnengā incæte ānāmaī pæ wēneccā adinque tōmengā ingante Wængongui anquedo wæætē godō cæcā ate ayago cæ æmæwo wængacāimpa.

²⁴ Incæte Wængongui nānō angāiñō ante māniñedē wayōmō māo wayōmō māo apænedāni ēñēninque nangui īnāni mōnō Awēnē ingante nē wede pōnēnāni badānitapa.

²⁵ Bedēnabee tōnō Taodo iñōmō Eedotadēē iñōmō godinque tōmēna nāna cæquēnēnō tōmānō ĩnque cædinque wadæ godinque Wāō Māadoco nāni ānongā ingante tōmēna tōnō æninque adodō godānitapa.

13

Wængongui angā ēñente Bedēnabee tōnō Taodo godapa

¹ Antioquiya iñōmō Itota Codito ingante nāni godongāmæ pōnencabo inōnāni iñōmō pancadāniya Wængongui beyæ nē apænedāni iñōnāni pancadāniya guiquēnē nē odōmonte apænedāni inōnānimpā. Bedēnabee tōnō wacā Timōnō Nēgodo nāni ānongā inōnānimpā. Tidēnebæ nē quēwēningā Dotio inongāimpā. Pancabaa awēnē Edode tōnō godongāmæ nē pædingā Mānāēnē tōnō Taodo inōnānimpā. Mānimpodāni ingadānimpā. ² Ininque tōmānāni godongāmæ mōnō Awēnē ingante, Tæiyæ Waēmō imipa, ante watapæ apænecæte ante cænāmaī apæneyōnānīte Wængongui Tæiyæ Waēmō Ōnōwoca incæ iīmaī angacāimpā. “Bedēnabee tōnō Taodo munitō tōnō nē cæda iñōnate āmini botō beyēnque cædinque nānēnē godinque botō āniñō ante cæcædaimpā,” angacāimpā.

³ Ininque iīnque cænāmaī inte apænedinque tōmēnāni Bedēnabee tōnō Taodo inate gampocadinque Wængongui ingante apænedinque ānāni ate wadæ gogadāimpā.

Wāā tēiwæcnē Tipidebæ gote apænedā eñēnāni

⁴ Bedēnabee tōnō Taodo iñōmō Wængongui Tæiyæ Waēmō Ōnōwoca mānōmaī angā godīna inte Tedeotia iñōmō wæi wipodē ñæñæmpodē go guiddinque wogaa godinque wāā tēiwæcnē Tipidebæ nāni āmæ godatapa. ⁵ Tadamīna nāni quēwēñōmō pōninque oodeoidi odōmōincōnē wacōnē go guīi wacōnē go guīi cædinque Wængongui nānō apænedō ante nōingā apænedā eñengadānimpā. Ayæ Wāō tōmēna mīñæ godinque tōmēna beyæ nē cæcā inongāimpā.

⁶ Mānōmaī wāā tēiwæcnē tæcæguedē wodo tebæ cægōninque yæcado godinque Papo nāni quēwēñōmō ganca pōnānitapa. Pōninque tōmēnāni wacā idō tōmēngā ēmōwo Baditota ingante māmō bee tēnānitapa. Tōmēngā iñōmō oodeocā inongā inte, Wængongui beyæ nē apænebo imopa, āninque nē babæ ānongā inongāimpā. ⁷ Tōmēngā wāā tēimæ awēnē Tedeguo Pabodo nāni ānongā tōnō godongāmæ nē cædongā inongāimpā. Awēnē Tedeguo guiquēnē nē ocāi encadongā inte Wængongui nānō ānō ante eñēnēnēte wædinque Bedēnabee tōnō Taodo inate āñete māmōngā pōnatapa. ⁸ Tōmēna ponte apæneyōnate idō Baditota guiquēnē guiddio tededō Edīma nāni ānongā inongā inte edæ, Awēnē nē pōnēngā badāmaī incæcāimpā, ante wææ cæcæte ante piinte cæcantapa. ⁹ Ininque Taodo Pabodo nāni ānongā iñōmō Wængongui Tæiyæ Waēmō Ōnōwocaque ewocadinque idō ingante gomō adinque, ¹⁰ tōmēngā ingante angantapa.

—Bitō iñōmō wēnæ awēnē nānōmōmi baī imidō anguēnē. Iñæmpa, Wadāni quīēmē nō impa, ante oda cæcædānimpā, ante bitō piinte pōnēwēnonque entawēninque bitō nē babæ cædōmi imipa tōō. Wængongui nānō tōinō ponguīnō ante idiquibæ bacāimpā, ante bitō æpogamē incæ cæbii. ¹¹ Nōwo iñōmō Wængongui Awēnē nē piñængā inongā inte bitō imite pancæcāimpā. Tōmēngā pōnō gampomōngā ate bitō habetamōmi badinque nænque ñāō tamōnō wantæpiyæ tōmēngā nānō ānimpoga adāmaī incæbiimpā.

Āñongā boguimā bai do wææ iīnque wēmō ēmōninque Edīma Baditota nāni ānongā gampo gampo cædinque, Ēcānō botō imote tōō æmænte māoda goquīmoo, ante diqui diqui mingantapa. ¹² Mānōmaī bacā adinque wāā tēimæ awēnē wæætē Wængongui Awēnē ingantedō ante iñāna nāna odōmonte apænedō ante pōnente guñente wædinque nē pōnēngā bagacāimpā.

Pitidiabæ Antioquiya godinque cædapa

¹³ Pabodoidi iñōmō Papo iñōmō wadæ godinque wipodē ñæñæmpodē wogaa taodinque Pampidiabæ pōninque Pedegue iñōmō ti wææñōnāni Wāō wæætē adodō Eedotadēe gocæte ante tōmēna inate ēmō cæte wadæ gogacāimpā. ¹⁴ Tōmēna wæætē Pedegue wadæ godinque Pitidiabæ pōninque Antioquiya nāni quēwēñōmō pōnatapa. Ayæ tōmēnāni guēmanguilōnæ iīnque bayō oodeoidi odōmōincōnē pō guīite tæ contadatapa. ¹⁵ Tæ contate a cōñōna Mōitee wodi nānō yewæmongainta adinque Wængongui beyæ nē apænegānāni nāni yewæmongainta ate apænedānitapa. Ayæ māniñōmō awēnēidi iñōmō tōmēnāni weca onongā adocanque ingante apænedinque,

—Bitō ñōwo pōna inate māo āninque iīmaī apænecæbiimpā, Iñāna, mōni tōniñamīna eñēmīna. Iñōmō ongōnāni wampo pōnēninque tæi gongænte ongoncædānimpā, ante cædinque mīnatō ædæmō apænemīna eñenguñāni, ante āmi apænebaīnāna.

¹⁶ Ānāni ēñente māo angā eñēninque Pabodo iñōmō ængæ gantidinque ōnompoca compo compo cædinque tōmēnāni inānīte apænecantapa.

—Minitō, pancamīniya idægoidi iñōmīnīte pancamīniya wamīni incæ, Nāwā Wængongui inongā ingampa, ante nē guñente wæmīni iñōmīnīte botō tōmāmīni imīnīte apænebo eñēedāni. ¹⁷ Idægoidi, mīnitō imīnīte tāno apænebo eñēedāni. Mōnō idægocabo Wængongui incæ mōnō mæmæidi inānīte apænte ængā ate wadāni nēmæ Equitobæ iñōmō quēwēñōnānīte tōmēngā pōnō cæcā ate tōmēnāni tæiyæñāni yebængadānimpā. Ayæ Wængongui tæi piñæñongā inte ingæ æmæninque tōō æmænte māocā wadæ gogadānimpā.

18 Godinque tōmēnāni coadenta wadepo mānimpoga ōnōmæca cægōninque æbāmē wēnæ wēnæ cæte quēwēnāni ate wæcā incæte tōmengā pānāmai inte ata cæpote ænte māocā gogadānimpā. 19 Ayæ wadāni Cānaāmæ quēwēnāni ōnopo æmæmpoque go mēncabodāniya iñōnānite wido cædinque Wængongui, Tōmēnāni ōmæ ini mīnitō ōmæ wæætē bacæimpa, ante mōnō wæmæidi inānite pōnongā ængadānimpā. 20 Edæ coatodo tiento tincoenta wadepo mānimpoga wabæca quēwēnāni ate māniñedē ate Wængongui, Mīnitō ōmæ, āninque mōnō wæmæidi inānite pōnongā æninque quēwengadānimpā.

Ante apænedinque Pabodo, Idægoidi dodāni æbānō cægadāni, ante godōmenque apænegantapa. “Mānimæca ponte wantæpiyæ quēwēnāni ate pancadāniya nē apænte ānāni iñōnānite Wængongui angā ate adodāni awēnēidi bai badinque wayedē wacā adocanque wayedē wacā adocanque wayedē wacā adocanque aagadānimpā. Tāmoedo Wængongui beyæ nē apæneccā nānō ponte apæneganca māninānique aagadānimpā. 21 Iincayæ ate mōnitō dodāni iñōmō Wængongui ingante apænedinque, Bitō adocanque ingante āmi ate tōmengā tæiyæ awēnē bacæcāimpa, ante ancaā ānāni eñente wædinque tōmengā wæætē Beencaminō wodi pæingā incæ Titæ wengā Taodo ingante angā bagacāimpa. Tæiyæ awēnē badinque tōmengā coadenta wadepo mānimpoga iñonte aagacāimpa. 22 Ayæ ate Wængongui wæætē, Idæwaa, ante Taodo wodi ingante wido cædinque Dabii wodi ingante wæætē angā tæiyæ awēnē bagacāimpa. Adocā Dabii ingantedō ante apænedinque Wængongui, Botō waa pōni entawēmo bai Yæte wengā Dabii iñōmō adobaī entawengā abopa. Tōmengā iñōmō botō ānō bai edæ tōmānō cæquingā ingampa, ante apænegacāimpa.”

23 “Wængongui doyedē, Codito ængā beyæneque idægoidi quēwēncædānimpā, ante do nānō angainō bai ñōwo cædinque adocā Dabii pæingā Itota Codito ingante da pōnongā pongacāimpa. 24 Itota ayæ pōnāmai iñongā Wāō wodi idægoidi tōmānāni inānite apænedinque, Mīnitō, Idæwaa wēnæ wēnæ cæte awædō, ante Wængongui gāmæñō wadæ pōninque æpæñē guiedāni, ante apæneccā eñengadānimpā. 25 Ayæ adocā Wāō incæ, ‘Botō æbodō imoo, ante pōnēmīni. Mīnitō pōnēñō bai wīi imopa. Botō do pōnimō iñōmote mīni nē pōnēnongā iñōmō ayæ poncæcāimpa. Tōmengā ingante adinque botō waēmō imopa diyæ tōmengā awæncata godō ñi cæquimoo.’ Ante Wāō tōmengā nānō cæquēnēñō wodo iinque cæyedē apænegacāimpa.”

26 Ante apænedinque Pabodo godōmenque apænegantapa. “Iñānāni, pancamīniya Abadāō wodi pæimīni iñōmīni pancamīniya wamīni incæ Wængongui ingante guñēmīni iñōmīni edæ botō tōmāmīni imīnite apænebo eñēedāni. Māniñō, Codito ængā beyæneque quēwēncæmīnimpā, ante Wængongui tōmāmō beyæ pōnō apænegacāimpa. 27 Eedotadēē quēwēnāni tōnō tōmēnāni awēnēidi iñōmō, Itota æcānō ingāā, ante pōnēnāmai ingadānimpā. Iinque guēmanguiōnæ iñō guēmanguiōnæ iñō Wængongui beyæ nē apænegaināni nāni yewæmongainta cōwē adāni incæte tōmēnāni, Itota nānō wænguinque wēnæ wēnæ cæcā ingampa tōō, ante babæ ante apænte ānewēninque edæ dodāni nāni yewæmonte angainō bai iinque cædānitapa. 28 Tōmēnāni, Itota nānō wænguinque æbānō wentamō mongængāā, ante cōwā ayōnāni edæ dæ ampa. Ante wædinque awēnē Pidato ingante apænedinque tōmēnāni, Itota ingante āmi wæñōnāni wængæe, ante ancaā ānāni eñēninque Pidato Ao angā wæñōnāni wængacāimpa. 29 Iinque Itota ingante awāa timpote wæñōninque tōmēnāni dodāni tōmengā ingante ante nāni yewæmonte angainō bai tōmānō ante iinque cædānitapa. Mānōmai cædāni ate wængā ate tōmēnāni ānāni ate tōmengā miñæ godināni wæætē tōmengā nānō ongōwāa pædæ æmpodinque ōnopo o togæmpote wæi ōnōwa o togæwadinque pædæ wæænōninque edæ ænte māo daga wengadānimpā.”

30 “Incæte Wængongui guiquēnē do wæningā ingante, Nāni ōmæmōe, angā ñāni ōmæmonte quēwengampa. 31 Nāni ōmæmōninque tōmengā tæōnæ iñonte pō pō cædinque a ongōñongante edæ tōmengā tōnō wēnēñedē Gadideabæ quēwēninque Eedotadēē iñōmō nē pōngaināni iñōmō edæ tōmengā ingante wæætē adānitapa. Iinque tōmēnāni iñōmō nē adināni inte waodāni inānite, Itota nāwangā ñāni ōmæmonte mīingā quēwengampa, ante nē apænedāni inānipa.”

32 Ante apænedinque Pabodo, “Dodāni inānite Wængongui, Mīnitō beyæ botō cōwē pōnō cæcæboimpa, ante apænegacāimpa, ante eñēmīnitawo. Māniñō ante watapæ nānō apænegainō ante mōnitō ñōwo iimāi ante apænemōnipa. 33 Māniñō tōmengā dodāni inānite nānō angainō bai ñōwo tōmēnāni mōmōidi beyæ iinque cædinque Wængongui Itota ingante, Nāni ōmæmōe, angā ñāni ōmæmongacāimpa. Tōmengā ñōwo iinque cæcampa, ante Āmotamīni nāni Angainta tānota gao wæintaa Wængongui beyæ iimāi ante yewæmongatimpa. ‘Botō Wēmi inōmi imipa. Nōwoñæ bitō Mæmpobo

babopa.’³⁴ Ayæ māninō, Tōmengā Wengā do wæningā iŋongante Wængongui angā nāni ōmæmōninge baō nōmāadāmai incæcāimpa, ante pōnēninge Itaiya wodi iīmai ante Wængongui beyæ ante yewæmongacāimpa. ‘Awēnē Dabii wodi ingante apænedinque botō, Tæiyæ waēmō botō cædō bai cædinque cōwē ædæmō aate cæcæboimpa, ante nō botō angainō bai cædinque mūnitō iīmīnīte pōnō adobai cæcæboimpa,’ ante Wængongui angampa, ante yewæmongacāimpa.³⁵ Ayæ māninō ante wataa adobai Wængongui ingante apænete bai Dabii wodi yewæmongacāimpa. ‘Bitō iīmīte nē Cæcā iīnōmō bitō cædō ante cōwē cædongā inte wængā adinque bitō ædō cæte tōmengā ingante ænāmai inte ee abi baō nōmāaquingāā,’ ante yewæmongacāimpa.”

³⁶ “Awēnē Dabii wodi guiquēnē Wængongui nānō ānōnō ante ēñēninge adoyedē quēwēnāni beyæ waa cædingā inte edæ nāŋe wæninque tōmengā mæmæidi weca æiyongā tōmengā baō iīnī nōmænte bagatimpa. ³⁷ Wæætē Wængongui, Nāni ōmæmōe, angā ēñente nē ōmæmongaingā iīnōmō tōmengā baō nōmāadāmai ingatimpa. ³⁸ Iīnque onguīñæmīni botō tōniñamīni ēñēedāni. Itota pōnō cæcā beyænque mōnitō mīnitō iīmīnīte apænedinque, Wēnæ wēnæ mōnō cædō ante adinque Wængongui pōnō ŋimpo cæcā ate quēwēmōmpa, ante apænemōni ēñēmīnīpa. Mōitee wodi nānō wææ angainō ante ēñente beyænque mōnō iīnōmō dicæ nō cæte quēwēmō iṃongaa. ³⁹ Wæætē māningā onguīñængā iīnōmō Itota iīnōmō tōmengā nō pōni nānō entawēnō ante pōnongā ænte entawēmō beyænque mōnō nē pōnēmō tōmāmō wæætē Wængongui ayongā edæ nō cæte quēwēmō iṃōmō iṃōmpa. ⁴⁰ Iīnque Wængongui beyæ nē apænegaināni iīmai ante nāni apænegainō ante pōnēninge mīnitō iīnōmō, Mōnitō iīmōnīte wīi bacæimpa, ante nāmā wææ aquēnē quēwēedāni. Iīmai ante edæ āmotamīni ante bai yewæmongadānīmpa.

⁴¹ Mīnitō nē badete towēmīni inte cōwā aquēnē quēwēedāni.

Botō cæbo adinque mīnitō ancai guīñente wæcæmīnīmpa.

Mīnitō ayæ mīimīni quēwēñōmīni edæ botō mā pōni cæcæboimpa, ante pōnēmīniyaa.

Wængongui mānōmai cæcæcāimpa, ante edonque pōni apænedāni bai mīnitō wæætē, Babæ ancædō, ante wæcædōmīnīmpa.’

Ante nāni yewæmongainō ante adinque edæ badete todāmai iedāni,” ante Pabodo apæneantapa.

⁴² Mānōmaiñō ante iīnque apænedinque Pabodo tōnō Bedēnabee tōmēnāni

odōmōincōnē ongonte oncodo tao goyōnate Antioquiya iīnōmō quēwēnāni iīnōmō, Wacā guēmanguiōnæ bayonte mīnatō nōwoōnæ mīna apænedō bai godōmenque apænemīna ēñencæmōnīmpa, ānānitapa. ⁴³ Ayæ godongāmæ nāni ponte ongōnīcabo tao goyōnāni oodeoidi pancadāniya ayæ oodeoidi bai nē bagaināni adobai Wængongui ingante guīñente quēwēnāni nanguī iīnāni iīnōmō Pabodo tōnō Bedēnabee iṃate edæ tee empote godāni. Adinque iīnāna wæætē tōmēnāni iīnānte apænedinque, Wængongui waadete nānō pōnō cædōnō ante pōnēninge mīnitō cōwē ŋimpo cædāmai tæi ongōnīnque edæ waa quēwēedāni, ante nanguī apænedatapa.

⁴⁴ Ayæ adoque Wængongui itædē go ate tōmēnāni nāni guēmanguiōnæ bayonte māniñōmō quēwēnāni wodo tōmānāni Wængongui Awēnē nānō ānō ēñencæte ante godongāmæ pōnānitapa. ⁴⁵ Nanguī iīnāni mānōmai pōnāni ate wædinque oodeoidi guīquēnē piinte badingue, Babæ ante ānewengampa, ante Pabodo ingante godō piinte tedewēñōnitapa. ⁴⁶ Mānōmai tedewēñōnānīte Pabodo tōnō Bedēnabee wæætē guīñēnedāmai inte apænedatapa.

—Mīnitō oodeoidi iīmīni inte edæ tāno ēñencæmīnīmpa, ante cædinque mōnatō Wængongui nānō ānō ante edæ mā apænedinque mīnitō iīmīnīte tāno apænequēnēmōna intamōnāpa. Mīnitō iīnāmpa mīni cōwē wæñāmai quēwēnguiñō ante apæneyōmōna mīni apænte pangā wæquinque edæ Baa āmīnīpa. Ante wæmōna inte mōnatō nōwo ēmō cæte godinque edæ oodeoidi iīnāmai iīnāni weca edæ apænece gomōna tamēñedāni. ⁴⁷ Mōnitō Awēnē iīmai ante mōnatō iṃonate angacāimpa.

“Quēwencæmīnīmpa, ante botō cægainō ante bitō inguipoga tōmāmæ māo apænedinque

Oodeoidi iīnāmai iīnāni beyæ tica ēnente bai cæcæbiīmpa,

ante cædinque botō bitō iīmīte da godōmo apænece gōcæbiīmpa.”

Ante nē apænegaingā inte Wængongui mōnatō iṃonate angā ēñente apænemōnāpa.

⁴⁸ Mānōmaiñō ante apænedā ēñēninge oodeoidi iīnāmai iīnāni iīnōmō, Awēnē nānō apænedō waa ēñēmōnīpa, ante watapæ apænedānitapa. Ayæ mōnō Awēnē doyedē apænedinque, Mānimpodānique wede pōnēninge cōwē wædāmai quēwēnguiñāni incædānīmpa, ante tōmengā nānō nē angainānīque nōwo pōnēnānitapa. ⁴⁹ Iīnque mōnō Awēnē tōmengā nānō apænedō ante māo apæneyōnāni māniōmæ tōmāo quēwēnāni ēñēnānitapa.

⁵⁰ Oodeoidi guīquēnē, Pabodo tōnō Bedēnabee iṃate mōnō wido cæcæiīmpa, ante

cædinque īīmaī cædānitapa. Onquiyæsnāni nāni nē waa adāni inte Wængonguī ingante guīfente quēwēnāni īfōnānīte tōmēnāni tōnō onguīfæsnāni māniīfōmō quēwēnāni awēnēidi bai inte fæsnæsnāni īfōnānīte oodeoidi, Badogaa, ante nanguū ānāni ēfēnānitapa. Oodeoidi nanguū ānāni ēfēnte cædinque māniīnāni wæætē Pabodo tōnō Bedēnabee īnate togænte pāninque, Mōnitō ōmæ quēwēnāmaī, ante wido cædāni godatapa. ⁵¹ Mānōmaī cædāni godinque tōmēna īfōmō, Māniīmæ nāwate awædō, ante bai cædinque piwacæ piwacæ cædinque Icōnio īfōmō gocæte ante wadæ godatapa. ⁵² Itota ingante nē tee empote quēwēnāni guiquēnē watapæ todāni badinque Wængonguī Tæiyæ Waēmō Ōnōwoca ingante ænte ēwocadinque edæ waa quēwengadānīmpa.

14

Pabodo tōnō Bedēnabee Icōnio īfōmō godapa

¹ Māniī godinque Icōnio nāni quēwēfōmō pōninque Pabodo tōnō Bedēnabee cōwē nāna cæi bai cædinque oodeoidi odōmōincōnē go guīdatapa. Go guīte apæneyōna, Nō apæneda, ante pōnēninque oodeoidi tōnō oodeoidi īnāmaī īnāni tōnō nanguū īnāni nāni wede pōnēninque ēfēnānitapa. ² Wæætē oodeoidi incæ pancadāniya nē Baa ānāni inte babæ wapitīcæ apænedinque, īfāna nē wēnæ wēnæ apæneda īnate wīī ēfēngæīmpa. Ante tedewēnāni ēfēnte wædinque wadāni oodeoidi īnāmaī īnāni wæætē pīinte badinque mōnō tōniīfada īnate ante wīwa adānitapa. ³ Incæte īfāna wantæpiyæ māniīfōmō quēwēninque guīfēnedāmaī inte mōnō Awēnē beyæ apænedatapa. Apæneyōna mōnō Awēnē incæ, Pabodo tōnō Bedēnabee īfōmō botō pōnō waadete cægaīnō ante nē nō apæneda īnōnāpa, ante wadāni pōnencædānīmpa, ante cædinque tōmēna tōnō godongāmæ cæcā ate tōmēna, Ate pōnencædānīmpa, ante mā cædinque bamōnengæ cædatapa.

⁴ Mānōmaī cæda incæte māniīfōmō quēwēnāni pancadāniya, Oodeoidi bai pōnēmōnīpa, āfōnānīte wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa. ⁵ Īninque oodeoidi tōnō oodeoidi īnāmaī īnāni tōnō tōmēnāni awēnēidi tōnō godongāmæ pōnēninque, Pabodo tōnō Bedēnabee īnate mōnō pīinte cædinque dicaca tacamō wæncædaīmpa. ⁶ Ante Ao ante cæyōnāni Pabodo tōnō Bedēnabee īfōmō, Mānōmaī ante cædānīpa, ante ēfēnte wædinque wodii wīnōnatapa. Wodii wīnōnte godinque Dicaōniabæ pōninque tōmēna Ditada nāni quēwēfōmō Dedebe nāni quēwēfōmō wayōmō wayōmō godinque,

⁷ mōnō Awēnē ingantedō ante watapæ māo godōmenque apæneda ēfēnōnānīmpa.

Ditada īfōmō Pabodo ingante tacadānīpa

⁸ Māniīfōmō Ditada īfōmō edæ wacā cabæwaingā tōmēngā ōnōwa tipæwaa wēnæ wēnæ ēwacā ēfāgaingā inte dao dao godāmaingā pægaingā inte tæ contate a ongongantapa. ⁹ A ongōfōngā Pabodo ponte apænecā ēfēe congantapa. Pabodo wææmō adinque ōnōwēnenque pōnēninque, Īngā nānō waa bawāquinque nē pōnēngā ingampa, ante do pōnente wædinque, ¹⁰ tōmēngā ingante ogæ tedete,

—Ængæ gantidinque adiyæ gongæmi āmopa.

Ængā ēfēninque nē cabæwainīgā incæ quingæ ængæ gantidinque dao dao gocantapa. ¹¹ Māniīfōmō ongōnāni guiquēnē Pabodo mānōmaī cæcā ate wædinque dicaōniadi tōmēnāni tededō yedæ āninque,

—Īfāna īfōmō wængonguīna incæ waoda bai bate mōnō weca wæænte ongōna abaiīmpa.

¹² Ante pōnente wædinque Bedēnabee ingantedō ante apænedinque, Mōnō wængonguī Deoto ingānō anguēnē, ante Deoto pōnō pemōninque, Īngā wæætē nē apænecā ingampa, ante pōnēninque Pabodo ingante, Mōnō wængonguī Edēme ingānō anguēnē, ante pemōnānitapa. ¹³ Ayæ tōmēnāni quēwēfōmō yæcado tōmēnāni wængonguī Deoto oncō mænonte ongōnīmpa. Deoto quī, ante nē godongā īfōmō edæ, Pabodo tōnō Bedēnabee nē wængonguīna īnāpa, ante wapitīcæ pōnēninque, Mōnō wængonguīna quī, ante tōmānāni tōnō godoncæ cæcantapa. Mānōmainō ante cædinque tōmēngā nāni que cædi ongai ænte pōninque wagadāidi onguīfæsnāni īnānīte yabædemō ænte ponte wænoncæ cæcantapa. ¹⁴ Mānōmaī cæcā ate wædinque nē ponte apæneda Bedēnabee tōnō Pabodo īfōmō, Wīwa cæmīnīpa, ante bai cædinque nāmā weocoo wānā fæfōninque pogodo mānō nanguū ongōnāni weca tæcæguedē næ gongæninque,

¹⁵ —Īfānāni, quīmæ quēwēmīnī. Mīnitō waomīni īmīnīpa, mōnatō mīnitō bai adobai waomōna īmōna apa quēwēmīnī. Mōnatō īfāmpa watapæ mōna ēfēnō ante apænecæte ante pōniīmōna inte mīnitō īmīnīte īīmaī ante āmōnāpa. Īncoo mīni waa adincoo incæ edæ, Ōnoncooqe impa, ante adinque mīnitō mānincooqe wido cædinque Wængonguī nē Quēwēngā gāmæfō pōdāni. Tōmēngā īfōmō ōnæ inguipoga gāwapæntibæ nē badongaingā inte ōnædē quēwēnāni tōmānāni inguipoga quēwēnāni tōmānāni gāwapāa quēwēnāni tōmānāni īnānīte nē badongaingā Wængonguī īnongā ingampa. ¹⁶ Tōmēngā wēēnēfēdē tōmāmæ

quëwënnäni nämä pönëningue näni go-
quïnonque ee acä gogadänimpa. ¹⁷ Incæte
tömënnäni inänite wïi æmæwo ëmò cæte
gogacäimpa. Wæætë edæ, Wængonguï
æbänö ingää, ante ëñencädänimpa, ante
cædinque tömëngä ñimpo cædämaï cöwë
odömongacäimpa. Edæ munitö iminite pönö
waadete cædinque Wængonguï cöönæ angä
inguipoga wææ ñinque incadepo incadepo
cænguï eyepæ pönongä cænningue munitö
watapæ todinque quëwënnäni.

¹⁸ Mänömainö ante Pabodo tönö
Bedënabee wææ cæcæte ante apæneda
ëñënnäni incæte godongämæ ongönäni
guiquënë, Minatö wængonguïmïna qui,
ante cöwë pönoncæmönimpa, ante waw-
ique pönëningue cædänitapa. Wodo edæ
pönöñönänite inäna godömenque wææ äna
ëñëningue ñimpo cæte wïi pönönänitapa.

¹⁹ Ayæ ate oodeoidi Antioquiya inömo
quëwëningue Icónio inömo quëwëningue
pö Ditada inömo pöninque mäniñömö
godongämæ ongönäni inänite, ñina
onguïñænäna inate mönö wïi ëñengæimpa,
ante ännäni. Ëñëningue godongämæ Ao
äninque Pabodo ingante dicaca tacadäni
wæyongä, Æmæwo wængampa, ante
pönëningue tömënnäni näni quëwëñömö yabæ
inö wëä mäo wido cædänitapa. ²⁰ Incæte
Itota ingante tee empote quëwënnäni
godongämæ ponte ææñimæ gongænte
ayönäni Pabodo yabæque æmæwo wænte
bai öñöningä inte ængæ gantidinque adodö
tömënnäni quëwëñömö pongantapa. Ayæ
ïimö ate tömëngä Bedënabee tönö wæætë
Dedebe näni quëwëñömö adodö gocæte ante
wadæ godatapa.

²¹ Godinque Dedebe inömo pöninque
Codito ingantedö ante watapæ apæneda
ëñëningue tömënnäni nanguï inäni Itota
miñæ quëwënnäni bagadänimpa. Ñinque
tömëna mäniñömö idæwaa apænete wadæ
godinque Ditada inömo adodö pö godinque
Icónio inömo adodö pö godinque Antio-
quiya näni quëwëñömö wæætë pönatapa.
²² Mänömaï wayömö wayömö godinque Itota
ingante nê tee empote quëwënnäni inänite
bee téninque Pabodo tönö Bedënabee nanguï
apæneda ëñëningue ñinäni godömenque
tæï piñænte entawënnäni badänitapa. Ayæ
tömënnäni inänite, Mini pönëno ante ñimpo
cædämaï inte godömenque wede pönëningue
tæï ongoncæminimpa, ante ædæmö
apæneda ëñënnänitapa. Ayæ waadete
apænëdinque, Mönö nanguï nantate
wædinque Wængonguï Awënë Odeye nempo
guicæäimpa, ante apænëdatapa. ²³ Ayæ
wayömö wayömö tömäo godinque Itota
ingante godongämæ näni pönencabo weca
go guite ongöningue Pabodo tönö Bedënabee
inömo ñimaï cædatapa. Nê nö cædäni inänite

adinque tömëna, Itota Codito ingante mïni
godongämæ pönencabo inöminite inäninque
edæ nê aadäni bacædänimpa, ante äna ate
mäniñäninque nê Picænäni näni äñönäni
badänitapa. Ayæ cænämaï inte Wængonguï
ingante apænete ate tömënnäni inänite
inäna, Minitö mönö Awënë ingante wede
pönëminitawoo. Tömëngä mïni nê pönëngä
incæ munitö iminite wææ acacæäimpa, ante
apænëdatapa.

*Tidiabæ Antioquiya inömo ocæ ëmænte
godapa*

²⁴ Pabodo tönö Bedënabee ayæ Pitidi-
abæ wodo tebæ godinque Pampidiabæ
pönatapa. ²⁵ Mäniñömö ponte Pedegue
näni quëwëñömö mönö Awënë nänö
angainö ante apænëdinque Ataya näni
quëwëñömö wææ pönatapa. ²⁶ Mäniñömö
pöninque tömëna imæmäa Antioquiya
inömo adodö tacæte ante ñænæ wipodë
guidatapa. Doyedë inömo tömëna näna
mäniñömö quëwente tao goyedë wadäni
nê pönënnäni inte tömëna inate, Wængonguï
pönö waadete godongämæ cæcä ate minatö
eyepæ cæcæminäimpa, ante da godongainäni
inönänimpa. Nöwo inömo tömënnäni näni
äninö do ñinque eyepæ cædäna inte tömëna
adoyömö näni da godiñömö ocæ ëmænte
pönatapa. ²⁷ Mäniñömö pöninque tömëna
Itota ingante godongämæ näni pönencabo
inänite äñete pönäni ate tömënnäni inänite
apænëdinque Wængonguï tömëna tönö
nänö cædinö ante adodö adodö tömänö
ante apænëdatapa. Oodeoidi inämaï inäni
wede pönëningue guicædänimpa, ante
Wængonguï odemö wï ænete bai cæcä
ate do pönente badänipa, ante apæneda
ëñënnänitapa. ²⁸ Ayæ mäniñömö Itota ingate
nê tee empote quëwënnäni tönö wantæpiyæ
quëwëngadäimpa.

15

*Eedotadë inömo pöninque wæætëdö
wæætë ännäni*

¹ Mäniñedë onguïñænäni Oodeabæ
quëwënnäni pancadäniya Antioquiya inömo
wææ pöninque nê pönënnäni inänite ñimaï
ante odömönte wææ angadänimpa. Minitö
bagäminäni inte Möitee wodi nänö wææ
angainö bai wïi cæminäni adinque Wængonguï
dicæ ængampa quëwëngüminäni. ² Ante wææ
änewënnäni ëñente wædinque Pabodo tönö
Bedënabee inömo, Quimæ änewënnäni, ante
näëmæ wææ änatapa. Ñinque Antioquiya
inömo quëwënnäni guiquënë Pabodo tönö
Bedënabee tönö wadäni nê pönënnäni inänite,
Minitö Eedotadë godinque Itota nänö da
godongainäni tönö nê aadäni Picænäni
inänite bee téninque, Oodeabæ quëwënnäni
näni wææ äñönö ante æbänö cæquïi, ante
ëñencæte ante ädäni.

³ Ānincque Itota Codito ingante godongāmæ nāni pōnencabo incæ Pabodoidi inānite da godōnāni wadæ godānitapa. Ayæ godinque Pēnitiabæ wodo tebæ godinque mānīmæ quēwēnāni inānite apænedinque godōmenque Tāmediabæ adobaī wodo tebæ gote apænedinque, Wængongūi pōnō cæcā ate oodeoidi ināmai ināni incæ mōnō Awēnē gāmænō do pōnānīpa, ante Pabodoidi apænedāni. Ēñēninque mōnō tōniñadāni mānīmæ quēwēnāni incæ watapæ todānitapa.

⁴ Pabodoidi Eedotadēē iñōmō pōnāni adinque Codito ingante nāni godongāmæ pōnencabo tōnō Itota nānō da godongaināni tōnō nē pōnēnāni inānite nē aadāni nē Picænāni tōnō godongāmæ ponte ongōninque Pabodoidi inānite, Waa pōmīni amōnīpa. Ante āñōnānīte Pabodo tōnō Bedēnabee iñōmō, Wængongūi iīmai mōnatō tōnō godongāmæ cæcampa, ante tōmānō ante adodō adodō apænedā ēñēnānitapa. ⁵ Māniñedē Paditeoidi incæ pancadāniya nē pōnēnāni badīnāni inte ængæ gantidinque iīmai ante apænedānitapa.

—Iñæmpa oodeoidi ināmai ināni inānite, Cōwē ēō togænguēñēmīni iīmīnīpa, ante mōnō wææ angæiīmpa. Ayæ Mōitee wodi, iīmai cæedāni, ante nānō angainō ante ēñēnguēñēmīni iīmīnīpa, ante mōnō cōwē angæiīmpa.

⁶ Ānāni ate Itota nānō da godongaināni tōnō nē pōnēnāni inānite nē aadāni Picænāni tōnō godongāmæ pōninque, Oodeoidi ināmai ināni inānite mōnō æbānō angūi, ante tedecōnānitapa. ⁷ Māniñō ante wæætedō wææte apænedāni adinque Pegodo guiquēnē ængæ gantidinque godongāmæ ongōnāni inānite iīmai ante apænecantapa.

—Botō tēmōidi, mīnitō iīmaiñō ante do ēñēmīnīpa. Wængongūi do inōñedē, Oodeoidi ināmai ināni incæ Codito ingantedō ante watapæ ēñēninque edæ nē pōnēnāni bacædānīmpa, ante cædinque mōnō imonte apænte æninque botō imote angā gote māniñō ante apænebo ēñēnānitapa. ⁸ Da godongā gote apæneyōmo Wængongūi, Waocā æbānō mīmōno pōnengā ingāā, ante nē ēñēnongā inte edæ tōmengā Tæiyæ Waēmō Ōnōwoca ingante oodeoidi ināmai ināni inānite da pōnongā ænte ēwocadānīpa.

Iñinque mōnō imonte pōnō cæcā bai tōmēnāni inānite adobaī cædinque tōmengā edæ, Oodeoidi ināmai ināni inānite botō Ao ante do æmopa, ante odōmongā abaiīmpa. ⁹ Tōmēnāni wede nāni pōnēnō beyænque Wængongūi tōmēnāni mīmō ñā mēnongadinque, Oodeoidi ināmai ināni incæ mīnitō bai adobaī ināni apa ānewēmīnīi, angampa. ¹⁰ Mōnō iñōmō mōnō mæmæsiði tōnō teēmē mongænte bai wædinque edæ,

Mōitee wodi nānō wææ angainō ante mōnō ædō cæte ēñente cæquīi, ante godongāmæ wægamōiīmpa. Nōwo guiquēnē Oodeoidi ināmai ināni incæ tæcæ pōnēñōnānīte mīnitō iñōmō teēmē cōnōncapænte bai cædinque tōmēnāni inānite, Cæedāni, ante wææ āmīnīpa tōō. Mānōmai cædinque mīnitō, Wængongūi ōnonque cæcampa, ante bai cæmīnīpa tōō. ¹¹ Iñæmpa mōnō Awēnē Itota pōnō waadete ængā beyænque tōmēnāni wænāmai inte quēwēnāni bai mōnō adobaī māniñō beyænque wænāmai inte quēwēmōmpa, ante pōnēmōnīpa. Mānōmaiñō ante Pegodo iñque apænecā ēñēnānitapa.

¹² Ayæ Bedēnabee tōnō Pabodo wææte tōmēnāni inānite apænedā ēñēninque godongāmæ ongōnāni tōmānāni edæ tededāmai inte ēñēē cōnānitapa. Tōmēna iñōmō, Wængongūi mōnatō tōnō godongāmæ cædinque edæ, Mīnatō mā cæmīna adinque Oodeoidi ināmai ināni incæ pōnencædānīmpa, ante cædinque bamōnengæ wææte cæcantapa, ante adodō adodō ante apænedatapa. ¹³ Iñque apænedā ate Tantiago wææte tōmangā apænecantapa.

—Botō biwīdi, botō ñōwo apænebo ēñēedāni. ¹⁴ Wængongūi tāno waadete pōnō cædinque oodeoidi ināmai ināni pancadāniya inānite apænte æninque, Botō quīmīni bacæmīnīmpa, ante cæcantapa, ante Timōnō do apænecā ēñentamōmpa. ¹⁵ Ayæ Wængongūi beyæ nē apænegaināni incæ, Iñcayæ ate Wængongūi mānōmai cæcæcāiīmpa, ante pōnēninque adoyōmō ante iīmaiñō ante do yewæmongadānīmpa.

¹⁶ “Awēnē Dabii nempo nē quēwengaināni nāwæ godāni adinque botō iñōmō oncō wodintai wææte tæi mænonte bai cædinque, iñcayæ ate adodō pōninque pōnō cæbo ate nāwæ gogaināni iñōmō Awēnē nempo adodō pōninque quēwecædānīmpa.

¹⁷ Mānōmai cæbo ate edæ wadāni tōmāmæ quēwēninque oodeoidi ināmai ināni incæ botō ēmōwo ante nē ēwocadāni inte nāwā Awēnē ingante ante diqui diqui minte acædānīmpa,

¹⁸ ante mōnō Awēnē iñōmō edæ māniñō ante nē cægainā ingōngā inte, do cæcā nāni ēñengainō ante apænecampa.”

¹⁹ Ante yewæmongatīmpa, ante Tantiago godōmenque apænecantapa. “Botō Wængongūi nānō apænegainō ante pōnente wædinque, iīmai cæcæiīmpa, ante pōnēmōpa. Oodeoidi ināmai ināni, Idæwaa waptīcæ pōnente awædō, ante wædinque ocæ ēmænte nāwā Wængongūi gāmænō pōñōnānīte mōnō edæ ee cædinque tōmēnāni taadō ganta cædedāmai ingæiīmpa. ²⁰ Ōnonque,

Tömēnāni acædānimpā, ante iūmaī ante yewæmongæimpā, Wadāni, Wængongūidi qui, ante cængūi nāni cōnōni cænāmaī incæminimpā. Ayæ nānōogængā ināmaī iñongante godō mōnāmaī incæminimpā. Ööingā ñē wēmencate wæningā ate cænāmaī incæminimpā. Baō wepæ owemōingā i adinque cænāmaī incæminimpā, ante mōnō yewæmongæimpā, āmopa. ²¹ Edæ doyedē pōni oodeoidi nāni quēwēñōmō nāni quēwēñōmō tōmāā iñōmō māo Mōitee wodi nānō wææ angainō ante apænedāni ēñengadānimpā. Ayæ ñōwo ganca adobainō ante guēmangūiōnæ iñō guēmangūiōnæ iñō mōnō odōmōincōnē go guiite apænedāni ēñente mānōmainō ante ēñente cæquēñēnāni inānimpā. Māninonque ante mōnō yewæmongæimpā, āmopa,” ante Tantiago iinque apæñecantapā.

Oodeoidi ināmaī ināni acædānimpā, ante yewæmōnānimpā

²² Mānōmainō ante apæñecā ēñēninque Itota nānō da godongainōni tōnō nē aadāni Picæñāni tōnō Itota Codito ingante godongāmæ nāni pōñencabo tōmancabo tōnō godongāmæ pōñēninque, Mōnō cabo incæ mēnaa inate apænte æninque tōmēna inate, Mīnatō Pabodo tōnō Bedēnabee miñæ Antioquiya goeda, āmō gocædaimpā. Ante Ao āninque tōmēnāni, Mōnō pōñencabo iñōmōnte Codaa Badatabato mōnō ānongā tōnō Tidato iñōmō nē āna inapā, ante adinque tōmēna inate apænte æñānitapā. ²³ Ayæ, Cadota ante ænte gocædānimpā, ante iūmaī ante yewæmongadānimpā.

Mōnitō pancamōniya Itota nānō da godongaimōni iñōmōni pancamōniya nē pōñēnāni inānite nē aamōni Picæmōni imōnimpā. Mānōmaī imōni inte mōnitō mīnitō tōññamōni imōnimpā. Mīnitō oodeoidi ināmaī imīni inte Antioquiya iñōmō Tidiabæ iñōmō Tiditiabæ iñōmō quēwēninque mīni pōñencabo mīni pōñencabo iñōmōinite mōnitō, Waa quēwencæminimpā, āmōnimpā.

²⁴ Iūmaī ante tededāni ēñentamōnimpā. Mōnitō, Goedāni, ānāmaī iñōmōni wadāni mōni cabo incæ pancadāniya wadæ gote mīnitō weca pōninque mīnitō imīnite, Eō togæedāni, ante wææ ānāni. Eñēninque mīnitō tōmēnāni nāni wææ āñinō beyænque teēmē mongænte bai, Æbānō cæquīlī, ante wæminimpā, ante tededāni ēñēmōnimpā. ²⁵ Mānōmainō ante tededāni ēñente wædinque mōnitō godongāmæ pōñēninque onguñæna mēnaa inate apænte æninque tōmēna inate iūmaī antamōnimpā. Mīnatō Bedēnabee tōnō Pabodo mōnō nē waadeda tōnō godongāmæ godinque oodeoidi ināmaī ināni weca goeda, ante cætāmōnimpā. ²⁶ Bedēnabee tōnō

Pabodo iñōmō mōnō Awēñē Itota Codito ēmōwo beyænque cædinque nāna nāmā wodo wænguinque cædatapā. ²⁷ Iñinque, Iī cadota mōni yewæmōnō nāwangā impā, ante adodō ante apæñecædaimpā, ante cædinque mōnitō Codaa tōnō Tidato inate da godōmōni godinque mīnitō weca pōna aedāni. ²⁸ Edæ, mōnitō Wængongūi Tæiyæ Waēmō Ōnōwoca tōnō godongāmæ pōñēninque, Mīnitō godōmenque teēmē mongæñāmaī incæminimpā, antamōnimpā. Iñinque, Mīnitō iūmaī cædinque idæwaa, ante pōñēmōnimpā.

²⁹ Wadāni, Wængongūidi qui, ante cængūi nāni cōnōnincoo ante cænāmaī gomō aedāni. Wepæ owemōingā adinque ööingā ñē wēmencate wæningā adinque cænāmaī iedāni. Ayæ nānōogængā ināmaī iñongante godō mōnāmaī iedāni. Mīnitō māninque ante eē ate cædāmaī imīni iñinque waa quēwēmaimīnimpā. Māninque ante yewæmōmōnimpā.

³⁰ Ante yewæmōnte pædæ pōñōnāni ænte wadæ godinque Antioquiya iñōmō wæidinque nē pōñēnāni inānite āñete godongāmæ pōñāni ate Eedotadēē quēwente pōñāni tōmēnāni nāni yewæmōninta pædæ pōñōnāni ænte adānitapā. ³¹ Eedotadēē quēwēnāni, Mīnitō godōmenque teēmē mongæñāmaī incæminimpā, ante nāni yewæmōnte āñinō adinque oodeoidi ināmaī ināni iñōmō wampo pōninque todānitapā. ³² Codaa tōnō Tidato iñōmō Wængongūi beyæ nē apæñeda inte adobai, Tæi piñænte entawencæminimpā, ante cædinque ædæmō apæñeda ēñēninque tōmēnāni nāni pōñencabo mīmōñē ganca batawente wede pōñēñānitapā. ³³ Iñinque tæñōnæ quēwēna ate māniñōmō quēwēnāni nāni pōñencabo wæætē tōmēna inate waa apæñedinque, Ñōwo gāñē pōñēninque waa goeda, ante tōmēna inate nē da pōñōnāni weca wæætē adodō da godōñāni godatapā. ³⁴ Tidato guiquēñē, Iñōmō ongoncæboimpā, ante ayæ ongongantapā. ³⁵ Pabodo tōnō Bedēnabee guiquēñē Antioquiya iñōmō ayæ quēwēninque wadāni nangui ināni tōnō godongāmæ odōmōninque Wængongūi nānō ānō ante watapæ apæñeda ēñengadānimpā.

Pabodo ingante wæætē da godōñāni go-campa

³⁶ Iñcayæ ate Bedēnabee ingante Pabodo, –Wēēñēñedē Wængongūi nānō ānō ante mōna gote apæñediñōmō wæætē adoyōmō gote mōnatō tōññadāni weca gote ēñadinque, Æbānō quēwēnāni, ante acēmōnaimpā.

³⁷ Āñongā Bedēnabee Ao angantapā. Ayæ tōmēngā, Wāō Māadoco nāni ānongā ingante mōnatō tōnō godongāmæ gocæcāimpā, ante cæcantapā. ³⁸ Pabodo guiquēñē,

Īñæmpa wēēñēfēdē Pampidiabæ īñōmō pōñōmōnate ĭngā Māadoco īñōmō mōnatō tōnō godōmenque cædāmaī inte edæ wadæ gocantapa, ānīnque, Nōwo wīl ænte gocæīmpa, ante Baa angantapa. ³⁹ Īnīnque tōmēna wæætēdō wæætē ānīnque tōmēna wadō wadō gote panguīmæ godatapa. Bedēnabee guiquēnē Māadoco ingante ænte ñænæ gāwapāa gote wipodē ñænæmpodē guite wogaa godinque wāā tēiwænē Tipidebæ tao gocantapa. ⁴⁰ Pabodo guiquēnē Tidato ingante apænte ænte gocæ cæyongante tōmēnāni nāni pōnencabo īñōmō tōmēna ĩnate apænedīnque, Wængonguī mīnatō beyæ pōnō waadetē cæcæcāīmpa, ānāni ēñēnīnque wadæ godatapa. ⁴¹ Ayæ Tidiabæ tōmāo godinque Tiditiabæ tōmāo godinque Pabodo īñōmō Codito ingante nāni godongāmæ pōnencabo ĩnānīte apæneccā ēñēnīnque tōmēnāni wede pōnēnīnque tæī piñænte bawatengadānīmpa.

16

Pabodo tōnō Tidato mīñæ Timoteo go-campa

¹ Mānīl godinque Pabodo Dedebe īñōmō ponganque go Ditada īñōmō pongantapa. Itota ingante tee empote nē gocā Timoteo mānīñōmō quēwengacāīmpa. Tōmengā wāānā oodea ĩnōna incæ nē ædæmō cæte pōnēnā ĩnōnāīmpa. Timoteo mæmpo wæætē guidiego ĩnongāīmpa. ² Timoteo īñōmō Itota ingante pōnente quēwengā adinque nē pōnēnāni Ditada īñōmō quēwēnāni incæ Īcōnio īñōmō quēwēnāni incæ, Timoteo nē waa quēwēnongā ingampa, ante adoyōmō apænedānītapā. ³ Īnīnque Pabodo, Botō tōnō Timoteo guēa gocæcāīmpa, angantapa. Wæætē, Oodeoidi mānīmæ quēwēnāni tōmānāni, Timoteo mæmpo guidiego ingampa, ante do ēñēnāni inte piñāni wæcæ wæ. Ānīnque Pabodo angā yæcadogæ ēō togæñāni ate Timoteo ingante ænte gocantapa. ⁴ Godinque Pabodoidi wayōmō nāni quēwēñōmō wayōmō nāni quēwēñōmō godinque ĭmaī ante apænedānītapā. Mīnitō oodeoidi ĩnāmaī ĩmīni inte æbānō ēñente cæte quēwenguīmīni, ante Eedotadē īñōmō nē aadāni Picænāni tōnō Itota nānō da godongāīnāni tōnō godongāmæ pōnēnīnque do ānānīpa. Ante apænedīnque Pabodoidi wæætē tōmēnāni nāni ānīnō ante adodō ante apænedāni ēñēnānītapā. ⁵ Mānōmaī apænedāni ēñente wædinque Codito ingante nāni godongāmæ pōnencabo īñōmō wayōmō nāni cabo wayōmō nāni cabo tōmānāni wede pōnēnīnque edæ tæī piñænte badinque ĭmō ĩñō godōmenque ĭmō ĩñō godōmenque nanguī yebænte bagadānīmpa.

Māatedōniabæ quēwengā ingante Pabodo wīlmonte acā

⁶ Pabodoidi Atiabæ gocæ cæyōnānīte Wængonguī Tæiyæ Waēmō Ōnōwoca ĭmaī ante apæneccantapa. Mīnitō botō ānō ante mānīmæ apæneccā godāmaī incæmīnīmpa, ante wææ angā ēñente wædinque tōmēnāni wæætē Gadatiabæ incæ pancabaa Pidiquiabæ tōmāo cægōnīnque godānītapā. ⁷ Mānīmæ cægōnaque go Mītiyabæ ganca pōnīnque Bītiñiabæ gocæ cæyōnānīte Itota Tæiyæ Waēmō Ōnōwoca incæ, Godāmaī, Baa angā wædinque tōmēnāni mānīñōmō ĩmīpo cæte godōmenque godāmaī ĩnānītapā. ⁸ Mānōmaī beyæ tōmēnāni Mītiyabæ wodo pænta go Todoa īñōmō wæi godānītapā.

⁹ Mānīñōmō wæi gote ongōnīnque woyowotæ ba ate Pabodo wīlmonte baī ayongā Māatedōniabæ onguīñængā a ongōnīnque tōmengā ingante ĭmaī ante apæneccantapa. “Māatedōniabæ pōnīnque bitō mōnitō ĩmōnīte pōnō cæquīmi āmōnīpa,” ante Pabodo ingante angā ēñengantapa. ¹⁰ Īnīnque Pabodo, Mānōmaī wīlmonte baī atabopa, ante apæneccā ēñente wædinque mōnitō wæætē, Mīnitō Māatedōniabæ gote māo apænemīni ēñencædānīmpa, ante Wængonguī incæ cæbaingampa. Ante pōnente wædinque botō Odocabo tōnō wadāni Pabodo tōnō nē godongāmæ cædāni tōnō wæætē, Mōnō mānīñōmō gote Codito ingantedō ante watapæ apæneccāīmpa, ante pōnēnīnque gocæte ante cætāmōnīpa.

Pabodo tōnō Tidato Pidipoto īñōmō ponte cædapa

¹¹ Mānōmaīnō ante pōnēmōni inte mōnitō Todoa īñōmō gāwapæ wedeca quēwēnīnque ñænæ wipodē guite wogaa tao godinque wāā tēiwænē Tāmōtatate tōingā gote mōnīnque ĭmō ate tao Nēapodi pontāmōnīpa. ¹² Mānīñōmō pō ti wææñīnque taadonque godinque mōnitō Pidipoto odōmānoidi nāni ponte quēwēñōmō adoyōmō pōnīnque tæōnæ quēwentāmōnīpa. Māatedōniabæ incæ pancabaa quēwēnāni nāni yæcado quēwēñōmō Pidipoto ĩmpa. ¹³ Mōnitō mānīñōmō ponte quēwēnīnque guēmanguñōmō ĩnīnque bayonte tōmēnāni nāni quēwēñōmō yabædemō tao godinque, Ōnō wedeca Wængonguī ingante godongāmæ apænebāīnānīpa, ante ōnōwēnenque pōnēnīnque mānīñōmō gotāmōnīpa. Mānīñōmō ponte ayōmōni onquiyænāni do godongāmæ ponte a ongōnāni adinque mōnitō tæ contadinque tōmēnāni ĩnānīte apænetāmōnīpa. ¹⁴ Mānīñōmō nē ēñēnāni tōnō adodanque tōmēnā ēmōwo Didia īñōmō Tiatida quēwēnōnā inte weocoo awēñēidi nāni opatawæ ēmoncōo godonte ænte quēwēnōnāīmpa. Tōmēnā Wængonguī ingante nē waa ate pōnēnā

īnonāīmpa. Īnīnque Pabodo apæne cā ēamonca ongonte ēñēñōnante mōnō Awēnē tōmēnā mīmō wi ænete bai cæcā ate tōmēnā wede pōnēnantapa. ¹⁵ Īnīnque tōmēnā nāni owocabo pōnēnīnque godongāmæ æpænē guīdāni ate tōmēnā īñōmō mōnitō īmōnite apænedantapa.

—Botō īmote ante adīnque mīnitō, Mōnō Awēnē īngante Didia ædæmō cæte pōnengā īngampa, ante pōnēmīnitawoo. Mānōmālnō ante pōnēmīni īnte mīnitō botō oncōnē ponte owoedāni, āmopa.

Ante ancaa apænedā ēñente wædīnque mōnitō Ao ante gotē owotāmōnīpa.

¹⁶ Mānīñedē wacā onquīyængā obe badā īngōgā īnte wadāni nempo quēwēnīnque tōmēnāni beyænque nē cæte quēwengā īngōgāīmpa. Tōmengā īñōmō nē cæwēnengā īnte wadāni īnānite, Īncayæ ate æbānō baquūī, ante yewænte tedecā īngōgāīmpa. Tedecā ēñēnīnque nē ēñēnāni wæætē tōmēnāni nāni godonte æīnta bacoo pædæ pōnō pædæ pōnō cædāni īncæte tōmengā awēnēidi wæætē ō æ ō æ cædōnānīmpa. Īnīnque mānīñōmō quēwēnīnque mōnitō ayæ ate Wængonguī īngante nāni apæneīñōmō adodō gocæ cæyōmōnite mānīngā onquīyængā māmō bee tengantapa. ¹⁷ Mānōmāī bee tēnīnque tōmengā mōnitō Pabodo tōnō mōni gocabo īñōmōnite tee empo tee empo pōnīnque yedæ āngantapa.

—Īnāni Wængonguī Æibæ pōnī Quēwengā īngante nē cædāni īnte mīnitō īmīnite apænedīnque, Æcānō ængā beyænque quēwengūī, ante apænedānīpa.

¹⁸ Ānīnque tæθōnæ īñōnte tōmengā tōmēnāni īnānite tee empote godīnque Yæ yæ ānewengā ēñente wædīnque Pabodo, Ancaa ēñente awædō, ante dadi ēmænte wēnæ īngante ānīnque,

—Bitō īmite botō Itota Codito ēmōwo apænedīnque, Tao gobāwe, āmopa.

Ante tæcæ apæneyōngā wēnæ īncæ baquecā īngante ēmō cæte tao gocantapa.

¹⁹ Pabodo mānōmāī āngā ate tao go ate wædīnque onquīyængā awēnēidi guīquēnē, Æ tōmengā yewængā beyæ mōnō æīncædō īncæ dæ gotīmpa. Nōwo æbānō cæte nanguī ænguīmōō. Ante pīnte wædīnque tōmēnāni, Mōnō tōmēna īnate odōmāno awēnēidi weca ænte gocæīmpa, ante Pabodo tōnō Tidato īnate bæi ongonte wēā māo tōmēnāni nāni godonte æīñōmō ænte godānīpa. ²⁰ Ayæ odōmāno awēnēna tōmēnāni quēwēñōmō nē apænte āna īñōnate nē pīinte cædāni mānīna awēnēna weca Pabododa īnate ænte māmō gō cædīnque,

—Īna īñōmō edæ oodeoda īnōna īnte mōnitō quēwēñōmō ponte wēnæ wēnæ apænedā ēñēnīnque tōmānāni ænguī badīnque Yæ yæ ānānīpa. ²¹ Mōnō odōmānocabo

mōnō wīī cæquēnēnō ante odōmōnte apænedīnque tōmēna īñōmō, Mānīnōnque cædedāni, ante ancaa ānewēnāpa.

²² Ante tæcæ apæneyōnāni godongāmæ ongōnāni īñacabo cædīnque Pabodo tōnō Tidato īnate pīnte cædānīpa. Ayæ odōmāno awēnēna īñōmō, Tōmēna weocoo gā tadongate tæi tæi pædāni. ²³ Āna ēñente tæi tæi pānāni wæyōnate awēnēna godōmenque āna ēñente cædīnque tōmēna īnate bæi ongonte māo tee mōnedīnque tee mōneīncō nē aacā īngante, Īna īnate bitō ædæmō wææ ae, ānatapa. ²⁴ Īnīnque mānōmāī ānāni ēñente wædīnque nē wææ wānōngā wæætē Pabodo tōnō Tidato īnate guīmōngacōnē mangūicā guīdatapa. Ayæ godōmenque tōmēna ōnōwa awæmpaa goti guīdōwate tæi tee mōnecā ongōñōna wadæ taocantapa.

²⁵ Ayaōnæñēna bayō Pabodo tōnō Tidato mānōmāī goti guīdōwate wægōnīnque Wængonguī īngante apænedīnque āmotamīni ānecōñōnate wadāni nē tee mōnete ongōnāni ēñē cōnānīpa.

²⁶ Īñontobæ goīnque nanguūī ocæ ocæ pōnīnque tee mōneīncō tæñōnīnca īncæ wanca wanca cæyō odemō tōmānemō wi æmænete gotapa. Ayæ tōmānāni īnānite nāni tæi pōnī yaēmōgō nāni nāni nēñīmē īncæ nīmæncæ nīmæncæ wææntapa. ²⁷ Tee mōneīncō nē aacā guīquēnē īñontobæ nāni ōmæmōnte ayōngā, Odemō dobæ wi æmænete gotīmpa, ante wædīnque tōmengā, Æ tee mōnete ongōnīnāni dobæ tao wodīī wīñōnānīpa, ante pōnente wædīnque, Botō awēnēidi pīinte pānāni wænguūī wæ, ante pōnēnīnque nāmā wæñōnte wæncæte ante yaēmē o togænte ængā. ²⁸ Ate wædīnque Pabodo īñontobæ ogæ tededīnque,

—Nāmā wēnæ wēnæ cædāmāī. Ee ae. Tōmāmōni ayæ ongōmōni apa quēwēē.

²⁹ Āngā ēñēnīnque nē wææ wānōngā īñōmō edæ, Tīca wodōnoī ante pōedāni, āngā ænte pōnāni ænīnque tōmengā pogodo pōnīnque ancaī guīñente wædīnque do do wāate wædīnque Pabodo tōnō Tidato ōnōwa īnō wæængantapa. ³⁰ Ayæ ængæ gantīdīnque edæ tōmēna īnate oncodo ænte māocā tayōnate,

—Mīnatō nē āmīna īnte apænemīna ēñēmoeda. Botō æbānō cæte quēwengūīmoo, ante wæcā.

³¹ Ēñēnīnque tōmēna wæætē,

—Awēnē Itota īngante edæ wede pōnēmi ate tōmengā ængā beyænque quēwēncæbīīmpa. Mīni owocabo tōmāmīni adobaī wede pōnente quēwēncæmīnīmpa, ānatapa.

³² Ānīnque tōmēna nē wææ wānōngā īngante godōmenque Wængonguī Awēnē nānō apænegāīnō ante apænedīnque tōmengā oncōnē nāni owocabo tōmānāni

inānite apænedā eññēnaitapa. ³³ Ayæ woyowotæ incæ tōmēna inate æninque nē wææ wānongā iñfōmō tōmēna inate tæi tæi pānāni nāna æbāate wædiñfōmō ñā mēnongacantapa. Ayæ tōmengā nāni wencabo do æpænē guiidānitapa. ³⁴ Ayæ tōmengā oncōnē ænte mængā ææ guiyōna tōmēna inate cænguī godongā cænātapa. Ayæ tōmengā nāni wencabo nē Wængonguī ingante pōnēnāni badināni inte watapæ todānitapa.

³⁵ Baānæ ate odōmāno awēnēna guiquēnē poditiyaiidi inānite nē wææ wānongā weca da godōninque, Pabodo tōnō Tidato inate ñimpo cæbi gocædaimpa, āmīni eññengæda, angā eññēninque godānitapa. ³⁶ Ponte odōmāno awēnēna emōwo ante apænedāni eññēninque nē wææ wānongā wæætē Pabodo ingante apænedinque,

–Poditiyaiidi ñōwo ponte apænedinque, Pabodo tōnō Tidato inate ñimpo cæbi gocædaimpa, ante odōmāno awēnēna ānāpa, ante apænedānīpa. Ñinque mīnatō ñōwo taote godinque piyænē cæte ee goeda.

³⁷ Angā eññēninque Pabodo wæætē poditiyaiidi inānite apænedinque,

–Mōnatō odōmānomōna imōna incæte nē apænte āna weca apænedāmaī iñfōmōnate tōmēna āna tōmānāni ayōnāni edæ mōnatō imōnate tæi tæi pāninque tee mōnedānitapa tōō. Tee mōnedāni wæyōmōna ñōwo wæætē mōnatō imōnate awēmō wido cæcæte ante cædānīpa tōō. Mōnatō iñfēmpa edæ Baa āmōnāpa. Awēnēna incæ iñfōmō pōninque mōnatō imōnate ænte māoda gocæmōnāimpa.

³⁸ Mānōmaīno ante apæneccā eññēnte wædinque poditiyaiidi tōmēnāni awēnēna weca adodō godinque Pabodo nānō apænedō ante adodō ante apænedānitapa. Ayæ, Pabodo tōnō Tidato odōmānoda ināpa, ante apænedāni eññēninque odōmāno awēnēna guiquēnē guīñente wædatapa. ³⁹ Ayæ guīñente wædinque awēnēna incæ Pabodo tōnō Tidato weca ponte waadete apænedinque, Mōnatō oda cædinō ante mīnatō odōmānomīna imīna inte pīnte ānāmaī ieda, ante āninque Pabodo tōnō Tidato inate ænte māoda taoda adinque tōmēna inate, Nōwo mōnitō quēwēñfōmō emō cæte wadæ goeda, āmōnāpa. ⁴⁰ Āna eññēnte taodinque onquiyæñā Dīdia oncōnē go guiidinque Pabodo tōnō Tidato iñfōmō, Nē pōnēnāni wampo pōnēninque tæi ongoncædānīmpa, ante cædinque ædæmō apænedinque wadæ gogadaimpa.

17

Tetadōnica iñfōmō quēwēnāni Yæ yæ ānānīpa

¹ Mānīi godinque Pabodo tōnō Tidato Ampipodi nāni quēwēñfōmō wodo tebæ

godaque go Apodōnia nāni quēwēñfōmō wodo tebæ godaque go Tetadōnica nāni quēwēñfōmō pōnatapa. Mānīñfōmō oodeoidi Wængonguī apæneccā nāni eññēnte yewæmongainta ate odōmōincō nāni mænongaincō mæ ongō. ² Adinque Pabodo cōwē nānō cæi bai cædinque guēmanguiōnæ bayō guēmanguiōnæ bayō mēōnaa go adoōnæque iñfōnte tōmēnāni odōmōincōnē go guiidinque edæ Wængonguī angā eññēnte nāni yewæmongaintaa ate adinque tōmēnāni inānite, Īmaī impa quēwēmīni, ante nō apæneccantapa. ³ Tōmēnāni inānite edonque apænedinque Pabodo, Wængonguī beyæ nē apænegaināni Īmaī ante do yewæmongadānīmpa, angantapa. Mōnō Codito iñcayæ ate pōninque cōwē caate wæquēnēngā ingampa. Ayæ adocā wænte ate cōwē ñāni omæmonte quēwēngūnēngā ingampa, ante yewæmongadānīmpa, ante Pabodo apæneccantapa. Ayæ godōmenque apænedinque,

–Itota botō nē ānongā incæ adocā mōnō Codito inongā ingampa, ante apæneccantapa.

⁴ Mānōmaī apæneccā eññēninque oodeoidi pancadāniya, Nō impa, ante pōnēninque Pabodo tōnō Tidato mīñæ godānitapa. Ayæ guidiegoidi nanguī ināni Wængonguī ingante nē guīñēnāni inte adobaī pōnēninque tōmēna mīñæ godānitapa. Ayæ awēnēidi bai ināni onquiyæñāni incæ nanguī ināni adobaī pōnēninque tōmēna mīñæ godānitapa. ⁵ Mānōmaī pōnēnānīpa, ante wædinque oodeoidi guiquēnē pīnte wædinque Īmaī cædānitapa. Tōmēnāni nāni godonte æiñfōmō gote ayōnāni nē wīwa cædāni ongōnāni adinque tōmēnāni inānite ānāni Ao ante godongāmæ pōninque oodeoidi tōnō iñcabo cædinque Yæ yæ ante pīñānitapa. Mānōmaī yedæ ānāni eññēnte wædinque māñīñfōmō quēwēnāni tōmānāni godongāmæ pīnte badinque Yæ yæ ānānitapa. Oodeoidi iñfōmō, Mōnō Yatōnō oncōnē guiidinque Pabodo tōnō Tidato inate da tadōninque nē pīnte cædāni inānite da godōmō æencædānīmpa, ante cædinque diquī diquī mīncæte ante tee gāwade guiidānitapa. ⁶ Wāānē guiidinque tōmēna inate adāmaī ināni inte oodeoidi wæætē oncō nē ēacā Yatōnō ingante yao ongōninque wadāni nē pōnēnāni inānite yao ongōnte wēā tadō māo tōmēnāni nāni quēwēñfōmō awēnēidi weca ænte godānitapa. Ayæ, ogæ tededinque,

–Īina onguīñæna iñfōmō tōmāmæ quēwēnāni inānite wapiticæ nē apænedīna inte ñōwo wæætē iñfōmō pōna tamēñedāni. ⁷ Ayæ Yatōnō guiquēnē, Botō oncōnē pōeda, ante manguicā guiidatapa. Īnāni tōmānāni edæ odōmāno tæiyæ awēnē Tetædo nānō ānīnō ante Baa āninque wacā Itota nāni

ānongā ingantedō ante, Tōmengā nē Awēnē Odeye ingampa, ante ānewēnānīpā cæmīnīi.

⁸ Ante pīnānī ēñente wædinque godongāmæ ongōnānī tōnō awēnēidi adobaī pīnīnque, Quīnō cæquīi, ante wædinque Yæ yæ ānānitapa. ⁹ Īnīnque Yatōnōidi Īnānite ānīnque awēnēidi, Mīnitō nōwo mānīmpota pōnōmīnī ænte māñōmōnī mīnitō wēnæ wēnæ cædāmai ĩmīnī adīnque mōnitō ĩncayæ ate wæætē adodō pōnōmōnī æmāimīnīpā, ante tōmēnānī godonte ænta ānānī pædæ godōnānī ænīnque ĩmpo cædānī abæ tawænte gogadānīpā.

Bedeā ĩñōmō quēwēnānī ēñente pōnēnānīpā

¹⁰ Ayæ tæcæ wēmō bayonte nē pōnēnānī wæætē Pabodo tōnō Tidato ĩnate, Bedeā ĩñōmō goeda, ante da godōnānī godatapa. Māñīñōmō gote pōnīnque tōmēna oodeoidi odōmōincōnē go guīdatapa. ¹¹ Māñīi Tetadōnīcā ĩñōmō quēwēnānī nē pīnte cædānī ĩñōnānīte bedēaidi guīquēnē pīnāmai ĩnānī inte mōnō Awēnē nānō apænedō ante do ēñēnānitapa. Ayæ ēñēnīnque, Wængonguī angā ēñente nānī yewæmongāinō bai Pabodo nō apænecantawo, ante pōnente wædinque bedēaidi ĩñōmō, Wængonguī æbānō angā ēñente yewæmongadānī, ante ēñencæte ante ĩmō ĩñō ĩmō ĩñō mānīnta ænīnque cōwā adānitapa. ¹² Māñōmai cædinque oodeoidi tæiyæñānī wede pōnēnānī badānitapa. Ayæ guīdiegoidi awēnēidi bai ĩnānī onquīyæñānī incæ nanguī ĩnānī pōñēñōnānī guīdiegoidi onguīñæñānī adobaī tæiyæñānī nē wede pōnēnānī badānitapa.

¹³ Incæte wadānī Tetadōnīcā ĩñōmō godīnque oodeoidi ĩnānīte apænedīnque, Pabodo nōwo Bedeā godīnque māñīñōmō quēwēnānī ĩnānīte apæñecā ēñēnānīpā, ante tededānī. Ēñēnīnque oodeoidi wæætē Bedeā ĩñōmō pōnīnque, Pabodo wīwa apæñecā apa ēñencæ quēwēmīnīi, ānīnque wapīticæ tededānī ēñēnīnque godongāmæ ongōnānī guīquēnē ænguī badānitapa. ¹⁴ Māñōmai ænguī badānī adīnque nē nānī pōnecabo ĩñōmō Pabodo ingante æpæ yæwedeca do ænte māodānī godīnque tōmengā wīpodē ñænæmpodē go guīdīnque godōmenque wogaa goyongante Tidato tōnō Timoteo wæætē Bedeā ĩñōmō ayæ ongōnatapa. ¹⁵ Pabodo tōnō godongāmæ godānī ĩñōmō Atēna ganca māodānī gocā ate tōmengā wæætē, Mīnitō adodō Bedeā ĩñōmō godīnque Tidato tōnō Timoteo ĩnate apænedīnque tōmēna eyepæ inte ate botō weca quīngæ āmīnī pōnæ, angā ēñēnīnque tōmēnānī adodō Bedeā ĩñōmō godīnque Pabodo nānō ānīnō bai ĩñāna ĩnate apænedānitapa.

Atēna ĩñōmō Pabodo apæñecā ēñēnānīpā

¹⁶ Māñōmaiñō ante āningā inte Pabodo tōmēna nāna ponguīnō ante ee ongongantapa. Ee ongōnīnque ayongā māñīñōmō quēwēnānī, Wængonguīdi ĩnānīpā, ante badonte nānī cō cægānca bacoo mæ ongō ate wædinque Pabodo wæwēwocate quēwengantapa. ¹⁷ Māñōmai beyæ oodeoidi odōmōincōnē go guīdīnque oodeoidi ĩnānīte apænedīnque ayæ guīdiegoidi incæ Wængonguī ingante nē guīñēnānī ĩnānīte apænedīnque Pabodo, Māñōmai ĩmpā. Apænebo ēñēmāimīnīpā, ante apæñecantapa. Ayæ tōmēnānī nānī godonte æñīñōmō adobaī ĩmō ĩñō ĩmō ĩñō godīnque māñīñōmō ponte ongōnānī ĩnānīte adobaī nō apæñecā ēñēnānitapa. ¹⁸ Māñōmai cægongā wadānī Epicodeoidi, Mōnō tote quēwengæĭmpā, ante nē ānewēnānī nānī cabo tōnō wadānī Etoicoidi, Waa ĩmō incæ caate wæmō incæ mōnō piyænē cæte quēwengæĭmpā, ante nē quēwēnānī nānī cabo tōnō tōmānānī adoyōmō ponte bee tēnīnque Pabodo ingante wæætēdō wæætē ānānitapa.

Pabodo ĩñōmō Itota emōwo ante apæñecā beyæ ayæ Itota nānō ñānī ōmæmongāinō ante apæñecā beyæ Epicodeoidi nānī cabo tōnō Etoicoidi nānī cabo tōnō pancadānīyā guīquēnē,

—Īngā ĩñōmō ōnonque ante tedewēnongā inte æbāmē ante tedewengā.

Ante wæyōnānī adodānī incæ pancadānīyā guīquēnē,

—Tōmengā wabānō, Wabæca wængonguīdi ĩnānīte pōnencæmīnīpā, ante cæcā ĩmaingampa, ante wædānitapa.

¹⁹ Īnīnque Pabodo ingante bæi ongonte tōō æmænte ænte godīnque tōmēnānī Adeopagoidi nānī ānōnānī nānī godongāmæ ēñente pōnencōñōmō māodānī gocantapa. Go guīte ongōñongante,

—Mā bitō odōmonte apænedō æbānō ĩi. Edæ apæñebi ēñēmōnīe. ²⁰ Edæ bitō odōmonte apænedō ante tæcæ ēñēmōnī inte mōnitō, Æbānō ante apæñebīi, ante ēñencæte ante wæmōnīpā, ānānitapa.

²¹ Edæ atēnāidi tōnō wadānī Atēna ĩñōmō nōwo ponte quēwēnānī tōnō tōmānānī wadō cædāmai inte ōnonque, Wadānī æbānō mā apænete pōnēnānīi, ante wædinque māñīnonque ante tedete quēwēnōnānīpā.

²² Pabodo ĩñōmō Adeopagoidi godongāmæ nānī ēñente pōnencōncabo tæcæguedē ængæ gantīdīnque tōmēnānī ĩnānīte apænedīnque,

“Atēnāidi, ēñēdānī. Wængonguīdi, mīnī ānōnānī ĩnānīte waa ate bai mīnitō nanguī pōnī cæmīnī abopa. ²³ Botō mīnitō quēwēñōmō tōmāo cægonte ayōmo, Wængonguīdi ĩnānīpā, ante mīnī waa adoncacoo nanguī ongō atabopa. Ayæ mīnī

waa adonca adocaque iñōmō mīni pōnō yewæmōnimpaa iīmaī ante yewæmonte ongō atabopa. ‘Wacā wængonguī æcāmē ingāā, ante mōnō ēñēnāmaī nē inongā beyæ mōnō waa adonca impa,’ ante mānimpaa yewæmōi ongō atabopa. Mānimpaa yewæmōi ongō adimo inte botō mīni, Æcāmē ingāā, ante ēñēnāmaī inte mīni waa adongā ingante ante ñōwo, Æcanō ingāā, ante ñōwo apænebo ēñēedāni.”

²⁴ Ante apænedinque Pabodo godōmenque, “Wængonguī inguipoga nē badongaingā inongā inte tōmāā iñōmō ongoncoo nē badongaingā inongā inte tōmengā inguipoga tōmāmæ Awēnē inongā ingampa. Tōmengā adocā iñōmō oōnædē Awēnē ingampa. Iñinque Tæiyæ Awēnē inongā inte tōmengā waomō ōnopoca mæñōnincōnē ædō cæte guite quēwengingāā. ²⁵ Ayæ waomō iñōmonte tōmengā mōnō quēwenguimāmo pōnongā æmompaa. Ayæ mōnō guēmanguimāmo adocā pōnongā guēmāmompaa. Ayæ tōmengā adocā nānō pōnōnonque tōmānō æninque quēwēmompaa. Mānōmaī nē pōnōnongā inte tōmengā mōnō waocabo iñōmonte, Pōnōmi æmoe, ante ædō cæte anguingāā. Iñinque tōmengā beyæ ante mōnō waomō ōnopoca ædō cæte cæquimōō.”

²⁶ Ante apænedinque Pabodo godōmenque apænecantapa. “Wængonguī waocā adocanque ingante badōninque, Tōmengā nānō pæīnāni nanguī ināni yebæninque nāni cabo nāni cabo tōmancabodāni bacædānimpaa, angacāimpaa. Ayæ edæ, Adocanque pæīnāni inōnāni inte mānincabodāni iñōmō nānēneto nānēnē godinque adocaboque wabæca wacabo wabæca godinque inguipoga tōmāo go go cædinque wayōmō wayōmō quēwencædānimpaa, ante cægacāimpaa. Mānōmaīnō ante badōninque tōmengā tōmancabodāni inānite ante pōnēninque, Æyōmōnō quēwenguīnāni, ante cædinque, Iīnāni Iīmæca mānimpoga quēwencædānimpaa, āninque, Wadāni wabæca mānimpoga quēwencædānimpaa, ante doyedē angacāimpaa. ²⁷ Edæ tōmāmæ quēwēnāni botō imote ante diqui diqui mincædānimpaa. Ayæ botō imote ante pædæ æmpo cædinque wabānō bee tenguīnāni, ante cædinque Wængonguī mānōmaī badōninque angacāimpaa. Incæte Wængonguī mōnō tōmāmō weca ongōninque wīi gobæque quēwengampa. ²⁸ Wængonguī tōmāo quēwengā iñongante mōnō waomō iñōmō inte wayōmō wayōmō gomō incæte tōmengā nempō edæ cōwē quēwēmompaa. Mīni cabo incæ āmotamīni ante baī nē tededāni pancadāniya, ‘Wængonguī pæīmō adomō imompaa,’ ante do nāni ānō baī edæ mānōmaī impa,” ante Pabodo

apænecantapa.

²⁹ Ayæ, “Mānōmaī beyæ mōnō Wængonguī pæīmō iñōmō inte edæ iīmaīnō ante wīi pōnenguēnēmō imoppa. Mōnō, Waocā nanguī pōnēninque dicaa yewæmōninque waa pōni nānō badōinca baī Wængonguī adobai ingampa, ante ædō cæte ānewengūi. Oodo tōnō padata waocā nānō badōi baī Wængonguī ingampa, ante mōnō wīi mānōmaīnō ante pōnenguēnēmō imoppa. ³⁰ Incæte wēēnēnedē mānīnō nāni ēñēnāmaī ingaīnō ante adinque Wængonguī pōnō waadete ata cæpogacāimpaa. Ñōwo guiquēnē tōmāmæ quēwēnāni inānite, Mīnitō ēñēnāmaī cædō ante, Ancaa wæwente awædō, ante ñimpo cæedāni. ³¹ Ante Wængonguī nē apænte anguingā inongā inte iīmaī angampa. Iīonæ iīnque bayonte botō inguipoga tōmāmæ quēwēnāni inānite apænte ancæboimpaa, ante māniōnæ æonædō i, ante do angacāimpaa. Ayæ, Waocā adocanque tōnō botō godongāmæ cæyōmo tōmengā nōingā ante apænte ancæcāimpaa, ante Wængonguī māningā onguīñængā ingante do apænte ængacāimpaa. Ayæ tōmānāni, Wængonguī nānō angaīnō baī cōwē bacæimpaa, ante pōnencædānimpaa, ante cædinque Wængonguī māningā Onguīñængā dobæ wængā ate, Nāni ōmæmōe, angā iñinque māningā iñōmō edæ do ñāni ōmæmonte quēwengampa.”

³² Ante Pabodo mānīnō Itota nānō ñāni ōmæmongaīnō ante apænecā ēñēninque pancadāniya, Babæ ancædō, ante badete todānitapa. Wadāni guiquēnē,

—Iīncayæ ate mānīnō ante adodō apænebi ēñēmōnie, ānānitapa.

³³ Mānōmaīnō ante cædāni adinque Pabodo iñōmō tōmēnāni inānite emō cæte godinque tao gogacāimpaa. ³⁴ Incæte pancadāniya tōmengā mīñæ godinque nē pōnēnāni badānitapa. Adeopagoidi nāni ēñente pōnē cæcabo iñōnānite adocanque Diōnitio adobai nē pōnēngā bacantapa. Ayæ onquiyængā tōmengā emōwo Daāmadi tōnō wadāni adobai nē pōnēnāni bagadānimpaa.

18

Coodinto iñōmō pōninque Pabodo apænecampa

¹ Atēna iñōmō ongonde apænecā ēñēninque mānōmaī cædāni ate Pabodo wadæ godinque Coodinto nāni quēwēñōmō pongantapa. ² Doyedē iñōmō odōmānoidi tæiyæ awēnē Codaodio oodeoidi inānite piinte āninque, Mōnitō quēwēñōmō Odōmā iñōmō ñōwo quēwēnāmaī inte tōmāmīni wadæ goedāni, angā ēñente wædinque tōmānāni nāwæ wadæ godōnānimpaa. Adocanque tōmengā emōwo Aquidæ Pontobæ ēñagaingā inte Itadiabæ gote māniñedē

quëwënongäimpa. Tömengä adocä oodeocä inongä inte awënë nänö äno ante ëñente wadæ godinque tömengä nänöogængä Pidotida tönö ñowo Coodinto iñömö wadæ ponte quëwënonäimpa. Ìninqe Pabodo ñowo Aquidæ ingante tæcæ adinque tömëna weca ëñacæ pongantapa. ³ Tömëna weca ponte ayongä tömëna tömengä nänö tadömönö bai adobai æmontai cadopa tadömönte godonte ænte quëwëna adinque Pabodo tömëna weca ee owodinque tömëna tönö godongämæ tadömönänitapa. ⁴ Mänömai cæte quëwëninque Pabodo guëmangüönæ iño guëmangüönæ iño oodeoidi odömöincönë go guidinque, Oodeoidi incæ oodeoidi inämai inäni incæ ëñente pönencädänimpa, ante cædinque, Ìmai impa ante apænebo ëñëmaimünipa, ante nangui apænecantapa.

⁵ Ayæ Tidato tönö Timoteo Mäatedöniabæ quëwente wadæ pöninque Coodinto iñömö nana wæxë pönedë Pabodo mänifidë æmontaicö nänö badöninö ñimpo cædinque wæætë, Wængongui nänö apænedö ante ëñencädänimpa, ante nangui cæinente wædinque nangui apænedinque mäninque cæte quëwengantapa. Mänömai cædinque tömengä, Codito mönö në änogä incæ Itota adocä inongä ingampa, ante botö në agaimo inte apænebo ëñëmaimünipa, ante oodeoidi inänite apænecantapa. ⁶ Mänömai apæneyongante oodeoidi wæætedö wæætë godö wënæ wënæ ante pünäni wædinque Pabodo wæætë, Wii ëñëinë wædö, ante bai cædinque nämä weocoo wancæ wancæ cæcantapa. Ayæ tömënanä inänite,

–Wængongui weca mini goquënëno ante apænebo ëñëninque munitö pönö wææ äninque tömëmüni wænguinque wentamö mongæminipa. Botö wæætë munitö iminute edonque pönä apænedimo inte mini cædö wentamö mongænämai imopa töö. Ìninqe botö Wængongui taadö munitö iminute idæwaa odömöninque edæ oodeoidi inämai inäni weca ñowo wadæ gobo tamëñedäni.

⁷ Äninque Pabodo wadæ tao godinque oodeoidi odömöincö gäänë wacä oncönë go guii go guii cædinque cöwë apænecantapa. Mänincö në ëacä Titio Yoto nani änogä iñömö Wængongui ingante në waa ate pönengä inongäimpa. ⁸ Oodeoidi odömöincönë në aacä Codipo guiquënë mönö Awënë ingante në pönengä bayongä tömengä oncönë në owodäni tömänäni pönënanitapa. Ayæ coodintoidi nangui inäni pö ëñë pö ëñë cædinque adobai wede pönëninque æpænë guigadänimpa. ⁹ Mänifidë woyowotæ iño Pabodo wimonte bai ayongante mönö Awënë tömengä ingante apænecantapa. “Bitö guifidëdämai inte apænebi ëñencädänimpa.

Pæ wëenedämai incæbiimpa. ¹⁰ Coodinto iñömö botö quinäni nangui inäni inänipa, ante cædinque botö iñömö edæ bitö tönö godongämæ cöwë cæcæboimpa. Ìninqe wadäni bitö imite mämö püninque wënæ wënæ cædämai incædänimpa.” ¹¹ Ante mönö Awënë tömengä ingante apæneca ëñëninque Pabodo adoque wadepo go tæcæ inönte Coodinto iñömö ongöninque Wængongui nänö apænedö ante tömënanä inänite odömönte apæneca ëñënonänimpa.

¹² Mänifidë odömänoidi änanä ate Acayabæ awënë Gadiöno inongäimpa. Tömengä awënë nänö inöfidë oodeoidi godongämæ pönëninque Ao äninque Pabodo ingante quingæ mämö bæi ongönte æninque awënë Gadiöno nänö cöwë apænte änoñömö ænte mäodäni gocantapa. ¹³ Awënë weca pöninque Pabodo ingantedö ante piinte äninque,

–Ìngä iñömö, Mönö wadö bai cædinque Wængongui ingante waa ate apænecaimpa, ante odömöninque mönitö awënëdi nani wææ änonö ante wido cæcampa. Mänömai wapiticæ cædinque ancaa änewengä ëñëninque tömänäni adobai wapiticæ cædänipa cæbii.

¹⁴ Änanä ate Pabodo tæcæ apæneca cæyongante Gadiöno oodeoidi inänite Ìmai ante wææ apænecantapa.

–Oodeoidi ëñëdäni. Minitö botö weca ponte apænedinque, Odömäno awënë nänö wææ äno bai Ìngä ëñënämai cæcampa, äminä bai, Waocä ingante ædæmö wiwa cæcampa, ante äminä bai botö mini äno do ëñëninque apænte ancädömoimpa. ¹⁵ Minitö iñæmpa, Tömengä tededonque ante oda cæcampa, äminä. Minitö ëmowo ante oda cæcampa, äminä. Minitö wææ ängainö ante oda cæcampa, ante püiminä. Mäninonque ante oda cæcampa, ante ancaa tedewëmini wædinque botö wæætë tömengä ingante apænte änämai incæboimpa. Tömëminique tömengä ingante apænte äedäni.

¹⁶ Ante piinte äninque awënë tömënanä inänite, Botö apænte äñömö ongönämai gobæwedäni. ¹⁷ Ante wido cæcä tao godinque tömänäni oodeoidi odömöincönë në aacä Totënë ingante wæætë bæi ongönte tæi tæi pänäni incæte në apænte angüënegä incæ Gadiöno iñömö önonque adämai inte bai ee acä pangadänimpa.

Pabodo Antioquiya ponte gocampa

¹⁸ Ìninqe tæönæ quëwente ate Pabodo Coodinto iñömö nani pönencabo inänite, Gobopa, äninque wadæ godinque Tidiabæ gocæte ante Tencodea ganca pongantapa. Tömengä do apænedinque, Botö mänimpoga ocagui tocadämai inte Wængongui beyænque cædinque botö tömëmo äninö ante cöwë cæcæboimpa, ante doyedë änogäimpa.

Nöwo iñömö tömengä nänö äninö bai iinque cædingä inte Tencodea iñömö pöningue ocagui eö tocantapa. Ayæ eö tocacä ate tömengä Pidotida tönö Aquidæ nana gæncaya tönö godongämæ ñænæ wipodë go guidinqe tömënäni Tidiabæ gocæte ante wogaa godänitapa. ¹⁹ Mänömaï godinque Epeto iñömö go ti wæænänitapa. Tömëna nana gæncaya mäniñömö ti wææninqe tæ contayöna Pabodo iñömö oodeoidi nani odömöincönë go guidinqe oodeoidi inänite, Iïmaï impa apænebo ëñencæminimpa, ante apæneçä. ²⁰ Eñëningue tömënäni, Bitö mönitö weca wantæpiyæ quëwenguimi, äñönäni tömengä Baa äninque, ²¹ wæætë, Gobopa, angantapa. Ayæ, "Nöwo Eedotadëe iñömö ææmæ bequinque goquënëmo imo incæte Wængongui Ao angä ate botö munitö weca ayæ ate wæætë ocæ ëmænte poncæboimpa. Nöwo gobo tamëñedäni."

Äninque Epeto iñömö ñænæ wipodë go guii tæ contadinqe Pabodo wogaa gocantapa. ²² Godinque Tetadea pö ti wææninqe Eedotadëe iñömö Itota Codito ingante godongämæ nani pönencabo weca ëñacæte ante æicantapa. Ayæ ate Antioquiya wæicantapa. ²³ Ayæ ate mäniñömö tæönæ quëwëningue wadæ godinque Gadatiabæ adodö godinque Pidiquiabæ tömäo wayömo wayömo cægonte godinque Itota miñæ në tee empote quëwënäni tömänäni inänite mäo apænedinque, Mönö ñimpo cædämaï inte tæi piñænte cæcæimpa, ante apæneçä ëñëningue tömënäni tæi piñænte entawëningue quëwengadänitapa.

Epeto iñömö Apodo apæneçä ëñënanipa

²⁴ Mäniñedë wacä oodeo tömengä ëmöwo Apodo iñömö Equitobæ Adecantodia nani quëwëñömö ëñate pægaingä inte ñöwo Epeto nani quëwëñömö pongantapa. Tömengä iñömö nangui adinque në ëñëngä inte Wængongui angä ëñente nani yewæmongainö ante do ëñëningue waa pöni apæneçä inongäimpa. ²⁵ Mönö Awënë taadö ante apæneyönäni do ëñëningä inte mäniñö ante ædæmö ewocadinque tömengä, Eñencædänimpa, ante nangui apæneçantapa. Ayæ Itota nänö cægaïnö ante nö ante odömönte apæneçä incæte Apodo iñömö Wäo æpænë nänö guidongainonque ante mäninganque ëñëningä inte mäninganque ante töngä odömongä ëñëñänänimpa. ²⁶ Tömengä ñöwo oodeoidi odömöincönë go guii go guii cædinque guiiñedämaï inte apæneçantapa. Pidotida tönö Aquidæ nana gæncaya guiquëné tömengä mänömaï apæneçä tæcæ ëñëningue edæ Apodo ingante, Mönatö weca pöe, äna pöñongante, Wængongui taadö iïmaï inompa, ante töingä apæneçä tæcæ mä ëñengantapa.

²⁷ Mänömaï cæda ate Apodo wæætë Acayabæ gocæte ante cæyongante tömënäni nani pönencabo tömengä ingante, Waa goe, äñänitapa. Ayæ, Acayabæ iñömö Itota ingante në tee empote quëwënäni acædänimpa, ante iïmaï ante cadota ante yewæmönänitapa. Minitö, Apodo pongä adinque tömengä ingante waa cædäni, ante yewæmöninque tömengä ingante pædæ pönönäni ænte godinque mäo Acayabæ quëwënäni inänite pædæ godongä adänitapa. Tömënäni Wængongui waadete pönö cæcä ate në pönëñäni iñönänite Apodo në waa pöni apænedongä inte mäniñömö ponte apænedinque tömënäni tönö godongämæ cægacäimpa. ²⁸ Edæ tömänäni ayönäni Apodo oodeoidi inänite nangui wæætëdö wæætë apænedinque gomonga apæneçä wædänitapa. Tömengä, Mönö Codito æbänö cæquingäa, ante Wængongui angä ëñente nani yewæmongainö adinque mönö ëñengäimpa, angantapa. Ayæ, Itota mäniñö nani yewæmongainö bai në cædongä inte näwangä mönö Codito inongä ingampa, ante nö apæneçä ëñëningue tömënäni ædö cæte wadö ante apænequünäni.

19

Epeto iñömö Pabodo ponte apæneçampa

¹ Apodo ayæ Coodinto iñömö ee ongöñongä Pabodo nänö cægöñimæ tæcæguedë änanquidi owëñaque pö Epeto iñömö wæængantapa. Ponte ayongä Itota ingante në tee empote quëwënäni pancadäniya a ongönäni. ² Adinque tömengä tömënäni inänite,

–Minitö pönente bayömiñi Wængongui tömengä Tæiyæ Waëmö Öñowoca ingante da pönongä æmunitawo.

Äñongä tömënäni wæætë,

–Iñæmpa mäningä Tæiyæ Waëmö Öñowoca ingantedö ante apænedänipa ëñenguimöñii.

³ Ante apænedäni ëñëningue Pabodo wæætë,

–Iñinque æcänö ëmöwo ante æpænë guimunitawo.

Äñongante,

–Wäo wodi nänö æpænë guidongainö ante guitamönipa.

⁴ Mänömaïnö ante apænedäni ëñëningue Pabodo wæætë,

–Wäo wodi nänö guidongainö ante guigaimiñi inte munitö, Idæwaa wënæ wënæ cæte awædö, ante Wængongui Awënë gämænö ocæ ëmænte pongaimiñi iñinipa. Incæte Wäo wodi, Iñcayæ ate në Ponguingä ingante pönencæminimpa, äninque tömënäni inänite æpænë guidongacäimpa. Mäningä iñömö Wäo nänö, Në Ponguingä, äñongä iñömö Itota inongä ingampa.

⁵ Ante apæneca ēfente wæyōnāni Pabodo wæætē mōnō Awēnē Itota ēmōwo apænedinque æpænē guidongā guiddānitapa. ⁶ Ayæ tōmengā gampocā ongōñōnāni Wængonguī Tæiyæ Wæmō Ōnōwoca wæætē tōmēnāni baonga guican-tapa. Guicā ate tōmēnāni wadāni nāni tede bai mā tededinque Wængonguī beyæ apænedānitapa. ⁷ Mānināni onguīñænāni æpænē nē guiddēnāni īñōmō ōnompō tipæmpoga go mengāa inōnānīmpa.

⁸ Pabodo apāicā mengāa go adocanque pāmonque adoyōmō quēwēninque oodeoidi odōmōincōnē go guīi go guīi cædinque guīñēdāmaī apænedinque, Wængonguī Awēnē Odeye do pongāimpa, ante apænebo ēñēedani, ante nōngā ante apæneca ēñēnānitapa. ⁹ Apæneca ēñēñōnāni pancadāniya guīquēnē, Wīl pōnēinente awædō, ante Baa āninque Wængonguī Awēnē taadō ante wīwa tedewēnānitapa. Mānōmaī tedewēnāni ēfente wædinque Pabodo īñōmō ēmō cæte godinque Itota ingante nē tee empote quēwēnāni inānite æte wadæ gocantapa. Ayæ īimō īñō īimō īñō Tidānō nānō apæneincōnē go guīi go guīi cæte apænedinque Pabodo māniñōmō pō guiddāni tōnō guēadō guēa apænedānitapa. ¹⁰ Ayæ mēnepoga wadepo ganca Pabodo mānōmaī cæyongā oodeoidi incæ guidiegoidi incæ Atiabæ quēwēnāni tōmānāni mōnō Awēnē nānō apænedō ante ēñēnānitapa.

¹¹ Ayæ Pabodo tōnō godongāmæ cædinque Wængonguī tæī piñænongā inte nanguī cæcantapa. ¹² Īninque tōmēnāni Pabodo weocoo wadæ cæcadoquincoo incæ padēincoo incæ æninque wēnæ wēnæ īnāni inānite ænte māmō wo caayōnāni waa badānitapa. Ayæ mānōmaī cæyōnāni wēnæidi nē wīwa ēwocadāni tōmēnāni nāni nē ēwēnēnināni tao godānitapa.

¹³ Māniñedē oodeoidi Itota ingante pōnēnāmaī ināni incæ pancadāniya wayōmō wayōmō godinque wēnæidi nē wīwa ēwocadāni inānite nē wido cædāni inōnānīmpa. Tōmēnāni nāmā mā pōnēwēninque, Nōwo Awēnē Itota ēmōwo apænedinque mōnō wēnæ ingante wido cæcæimpa, ante cædinque wēnæidi inānite īmaī ānōnānīmpa. Pabodo nānō nē apænedongā Itota ēmōwo apænedinque botō, Wēnæbi tao gobāwe āmopa, ānewēnōnānīmpa.

¹⁴ Māniñedē oodeoidi beyæ, Wængonguī quī, ante nē godongā ñænængā adocanque Etequeba īñongā tōmengā wēnāni tiæte ganca inānitapa. Īnāni īñōmō Itota ingante pōnēnāmaī ināni incæte adobaī cæcæ cædānitapa. ¹⁵ Tæcæ cæcæ cæyōnānite wēnæ nē wīwa ēwocadongā incæ tōmēnāni

inānite nāemæ tededinque, “Itota ingante do abopa. Ayæ Pabodo æcānō ingāa, ante do ēñēmopa. Wæætē mūnitō guīquēnē æminidō īmīni.”

¹⁶ Āñongā wēnæ wīwa inongā ingante nē ēwēnengā inte wīyæmæ tōmēnāni inānite to māo yao ongōninque bæ tacantapa. Mānōmaī cædinque tōmēnāni weocoo gā tadongadinque tæi tæi pangā ate tōmēnāni weocoo ōmaadāni inte wepæ taate wædinque oncodo tao wodii wīnōnānitapa. ¹⁷ Mānōmaī batimpa, ante tedeyōnāni Epeto īñōmō quēwēnāni oodeoidi incæ guidiegoidi incæ tōmānāni ēñēninque ancaī guīñte wædānitapa. Īninque mōnō Awēnē Itota ēmōwo wīl ōnonque ante tededāni inte tōmengā ēmōwo æwocæte bai cædinque, Tæī piñængā inte ēmongampa, ante wædānitapa.

¹⁸ Ayæ nanguī ināni nōwo wede pōnente badinque adoyōmō pōninque tōmānāni ēñēñōnāni tōmēnāni nāni wēnæ wēnæ cædinō ante tōmānō ante edonque apænedinque, Idæwaa wēnæ wēnæ cæte awædō, ante wido cædānitapa. ¹⁹ Ayæ idō inte nē yewænīnāni incæ pancadāniya adobaī pōnente badinque tōmēnāni nāni, Æbānō cæte yewænguī, ante yewæmōnīnta incæ adoyōmō ænte pōninque tōmānāni āñōnāni nē tānānitapa. Mānīntacoo æpodō itædē cædinque padata nāni æinta beyæ godonte æñāni, ante cōwā ayōnāni tincoenta mūido ganca mānīmpota nāni godonte ænīnta incæ nē tānāni agadānīmpa. ²⁰ Mānōmaī nē pōnēnāni badinque waa cædāni Īninque mōnō Awēnē nānō ānō ante godōmenque wayōmō wayōmō māo gode ānāni ēñēninque tōmengā ingante nāni pōnencabo incæ yebæninque tæī piñænāni bagadānīmpa.

²¹ Mānōmaī cædāni ate Pabodo ōnōwēnēnque pōnēninque, Mātedōniabæ ēñacæ godinque botō Acayabæ ēñacæ godinque Eedotadēē gocæboimpa, ante pōnēninque, ayæ, Māniñōmō gote ate Odōmā nāni quēwēñōmō cōwē goquēnēmo īmopa, angantapa. ²² Īninque tōmengā beyæ nē cædāni īñōnānite mēnaa īnate Timoteo tōnō Edaato īnate apænedinque, Mātedōniabæ gote ongōñōmīna botō Atiabæ wantæ quēwēnente pōmoeda, ante da godongā godatapa.

Epetoidi nanguī Yæ yæ ānānīpa

²³ Māniñedē Epeto īñōmō quēwēnāni īñōmō, Itota Taadō mōnō wido cæcæimpa, ante nanguī Yæ yæ ānānitapa. ²⁴ Tōmēnāni, Mōnitō wængonguīnā Diānā īnampa, ante onquiyænā ēmōnō bai badōninque mānīnca weca ædæ wæænte nē apænedāni inōnānīmpa. Tōmēnāni quēwēñōmō adocanque Deēmetedio nāni ānongā īñōmō padata aca podonte nē badongā inongāimpa.

Tömengā īñōmō padatagæ æninque aca podonte badōninque, Mīni wængonguīnā Diānā inante mīni tæiyæ waēmō apæneincō bai impa, ante guīyanconque badonte quēwēnongāimpa. Mānōmaī badōñongā tömēngā tōnō godongāmæ cædāni wæætē wadāni īnānite godonte æninque mānīncoo beyæ tömēnāni godonte æinta nanguī æninque quēwēnōnānīmpa. ²⁵ Īninque tömēngā tōnō nē cædāni īnānite ayæ wadāni adobai cædāni īnānite ānete pōnāni ate Deēmetedio īñōmō tömēnāni īnānite apænecantapa.

“Īñānāni, do ēñēmīnīpa. Mōnō badonte godōninque wadāni nāni pōnōnīnta nanguī æmompā. ²⁶ Ayæ nanguī īnāni Epeto īñōmō quēwēnāni incæ Atiabæ wodo tömāmæ quēwēnāni incæ īngā Pabodo guīquēnē wapitīcæ apænecā ēñēninque edæ oda cædinque tömēngā mīñæ godānīpa, ante do ēñēmīnīpa. Tömēngā īñōmō, Ōnompoca badōnīnca wīi wængonguīdī īnānīpa, ante tedecā apa quēwēmīnī. ²⁷ Mānōmaī tedecā beyæ mōnō badōnō ante wadāni nanguī īnāni pīnte anguīnāni awædō. Ayæ Diānā ñæñæñā wængonguīnā īñōnante tömēngā ingante mōnō apæneincō incæ, Ōnonconque impa, anguīnāni awædō. Ayæ godōmenque, Mōnō wængonguīnā Diānā waa pōnī wængonguīnā īnampa, ante Atiabæ tömāo quēwēnāni tōnō inguīpoga tömāo quēwēnāni nāni waa adōnā īñōnante wabānō wapitīcæ tededīnque godō pīnguīnāni badānīpa, ante awædō.”

²⁸ Ante Deēmetedio mānōmaīnō ante apænecā ēñēninque tömēnāni ænguī badīnque ogæ tededīnque, “Epetoidī wængonguīnā Diānā ñæñæñā īnampa,” ante wæætē wæætē ancaā ānānīpa.

²⁹ Mānōmaī padata nē badōnāni Yæ yæ ānāni ēñente wædinque mānīñōmō quēwēnāni tömānāni, Quīēmē bai cædānīpa, ante acæte ante wadō pō wadō pō pogodo pōnānīpa. Ponte ayōnāni Mātedōniabæ quēwente Pabodo tōnō godongāmæ nē pōnīna Gayo tōnō Aditadoco a ongōna adīnque tömēnāni tömēna īnate bæi ongonte quīngæ māo tömēnāni nāni aīncōnē ñæñæncōnē go guīdānīpa. ³⁰ Pabodo guīquēnē mānōmaī cædāni ate wædinque, Godongāmæ ongōnāni weca go guīdīnque apænecæboīmpa, ante cæyongante Itota ingante nē tee empote quēwēnāni wæætē, Wænompā, ante, Go guīdāmaī incæbīmpa, ante wææ cædānīpa. ³¹ Ayæ mānīmæ awēnēdī pancadānīya Pabodo æmīgoidī īnāni inte adobai māmo tömēngā ingante gode ānīnque, Bitō ædō cæte mānīñōmō go guīquīmī, ante wææ ānānīpa.

³² Īñōnte godongāmæ ongōnāni guīquēnē, Quīnante pōmoī, ante wodo tömānāni

ēñēnāmaī īnānīta. Pancadānīya, Īmaī cæcæīmpa, āñōnānīte wadāni guīquēnē, Wadō bai cæcæīmpa, ante wæætēdō wæætē ante ogæ tededīnque nanguī pōnī Yæ yæ ānānīta. ³³ Yæ yæ āñōnāni oodeoidī guīquēnē Adecantodo ingante wæcō gō cædāni ongongā adīnque godongāmæ ongōnāni pancadānīya tömēngā ingante, Īmaī cæcæīmpa, ānānīta. Tömēngā guīquēnē tömēnāni īnānite wææ apænecæte ante, Apocænē īedāni, ante bai cædinque pīpo pīpo cæcantapa. ³⁴ Oodeo īnongā inte mānōmaī cæcampa, ante wædinque tömēngā ingante ēñēnāmaī inte tömānāni adoyōmō ogæ tededīnque, “Epetoidī wængonguīnā Diānā ñæñæñā īnampa,” ante mēa ooda ganca adodō adodō adodō ante nanguī ānānīta.

³⁵ Ayæ ate tömēnāni awēnē Tequedetadio incæ ancaā tömēnāni īnānite angā ēñente apocænē cæyōnāni tömēngā, “Epetoidī ēñēmīni. Tömāo quēwēnāni mānōmaīnō ante do ēñēnānīpa. Mōnō Epeto īñōmō quēwēncabo mōnō wængonguīnā Diānā apæneincō nē aamō īmompā. Ayæ tömēngā awīnca bai yewæmōīnca oōnædē mōnō wæængainca adobai nē wææ cæmō īmompā, ante adīnque tömāmæ quēwēnāni do ēñēnānīpa cæmīnī. ³⁶ Mānīnō ante nāwangā pōnī impa, ante adīnque, Babæ impa, ante ædō cæte anguīnānī. Īninque mīnitō ēñēnāmaī mīni Yæ yæ ānewēnō ñūmpo cædinque pīyæñē cæquēñēmīni īmīnīpa. ³⁷ Īina mīni bæi ongonte ænte pōnōnīna īñōmō mōnō wængonguīnā Diānā apæneincōnē guīdāmaī īna inte wēnæ wēnæ cædāmaī īnapa. Ayæ mōnō wængonguīnā Diānā īnantedō ante wīi wēnæ wēnæ ante pīina apa quēwēnānī.”

³⁸ “Deēmetedio padatagæ nāni badoncabo incæ wacā ingante, Wīwa cæbitapa, pīnte wædānitawo. Edæ nē apænte nāni āīncō cōwē wī ænete ongompā. Mānīncōnē nē apænte ānāni cōwē ongōnānīpa. Īninque Deēmetedioidī nē nāni pīnongā ingante mānīñōmō ænte gote ānāni ēñēninque nē apænte ānāni wæætē tömēngā ingante do apænte anguēñēnāni īnānīpa. ³⁹ Ayæ apænte ānāni, ñiōnæ tömāmīni godongāmæ pōdāni, nāni āñiōnæ bayonte mīnitō godōmenque pīnte āñēmīni inte māñiōnæ ponte āmīni ēñente apænte ānāni ate mīnitō pīyæñē cæquēñēmīni īmīnīpa. ⁴⁰ Edæ ñiwoōnæ mīni Yæ yæ ānewēnīnō ante awēñēdī pōnīnque, Quīnante mānōmaī cæmīnī, ante āñōnāni wæætē, Quīēmē beyæ cætīmpa, ante mōnō angæīmpa. Tömēnāni wæætē mōnō īmōnte ānīnque, Mīnitō awēñē ingante wido cæcæte ante cæmīnīpa, ante pīnāni wæcæ wæ.”

⁴¹ Ānīnque godongāmæ ponte ongōnāni īnānite tömēngā angā godadānīpa.

20

*Māatedōniabæ godinque Pabodo Guide-
tiabæ gocampa*

¹ Mānī Yæ yæ ante nāni ānewēnō īinque cædāni ate Itota ingante nē tee empote quēwēnāni īnānite wæætē āñete pōñōnānite Pabodo, Minitō gancæ pōnente godōmenque cæcæminimpa, ante godō ædæmō apænecantapa. Ayæ, Nōwo gobopa, ante Māatedōniabæ gocantapa. ² Godinque tōmengā māniñōmō quēwēnāni īnānite, Minitō gancæ pōnente godōmenque cæcæminimpa, ante godō ædæmō apænecā ēñēnānitapa. Mānōmai nanguī apænedinque tōmengā mānimæ tōmāo cægōninque wayōmō māo wayōmō māo apænecā ēñēnāni ate Guidetiabæ gote pongantapa. ³ Māniñōmō pōninque mēa go adoque apāicā quēwengantapa.

Ayæ, Tidiabæ goquīmo, ante tæcæ ñænæ wipodē guicæ cæyongante wādāni, Oodeoidi bitō īmite wænoncæte ante cædānipa ataque. Ante wææ ānāni wædinque tōmengā, Botō wæætē adodō godinque Māatedōniabæ wodo tebæ gocæboimpa, āninque taadonque gocantapa. ⁴ Goyongā tōmengā tōnō godongāmæ godāni īñōmō, adocanque Bedea quēwēningā inte Pidido wengā Topatede, ayæ wææ Tetadōnica quēwēnāna Aditadoco tōnō Tegonto mēnaa, ayæ wææ Dedebe quēwēningā Gayo tōnō Timoteo mēnaa, ayæ wææ Atiabæ quēwēnāna Tiquico tōnō Todopīmo mēnaa, mānimpodāni īnānitapa. ⁵ Tōmēnāni tāno godinque Todoa nāni quēwēñōmō pōninque mōnitō wipodē ponguīmōni ante ee ongōnānitapa. ⁶ Mōnitō guiquēñē oodeoidi pāo yedæ æmpoquī ōmæmō ī nāni cænguīōnæ īinque baganca Pidipo īñōmō quēwēninque wipodē ñænæmpodē go guidinque wogaa godinque ōnompō æmæmpoque ēōnæ gote ate tōmēnāni weca Todoa pōninque ōnompō æmæmpoque go mēōnaa quēwentamōnipa.

Todoa īñōmō Pabodo ponte apænecampa

⁷ Tōmēnāni nāni guēmanguīōnæ go ate mōnitō, Nōwo gāwadedæ bayō Wængonguī itædē impa, ante pāo godongāmæ cæncæte ante æmongapaa æi wæñōmēncapaa æi guidinque tæ contatamōnipa. Pabodo īñōmō baānæ ate gocæ cædingā inte æi guī tæ contadinque wantæpiyæ ayaōñēñēna pōni ayæ apænecā ēñentamōnipa. ⁸ Wæñōmēncapaa mōni godongāmæ ēñengoncōñē gongapæncade bacoo ti wadōnote mæ ongōnimpa. ⁹ Adocanque edēningā tōmengā ēmōwo Eotico ayamōnecāa tæ contate ongongantapa. Īinque Pabodo wantæpiyæ apæneyongā edēningā īñōmō mōwocodē nanguī mōinente ayæ wangæ monte wæñōmēncapaa ongōninque

yæipodē tæ go wæængantapa. Go wæænte do wængā adinque tōmengā ingante yao ongonte mānānitapa. ¹⁰ Nāñe wænte ōñōñongā Pabodo yæipodē wææninque, Quēwencæcāimpa, ante cædinque wīni ænte pæ mangantapa. Ayæ nē pōnēmōni mōni caipæ īmōnite apænedinque,

—Mīi quēwengā ingampa. Guññente wædāmai īedāni, angantapa.

¹¹ Āninque Pabodo wæætē adodō æmongapaa æidinque pāo ænte pā ænte mōnitō tōnō godongāmæ cæninque wantæpiyæ godōmenque apænecōñongā edæ ñāō batimpa. Nāō ba ate Pabodo ñimpo cæte wadæ gocantapa. ¹² Ayæ, Edēningā mīingā quēwengampa, ante ænte wadæ godinque tōmēnāni wampo pōnēninque nanguī togadānimpa.

*Ōmaaque godinque Pabodo Mīideto ganca
pongampa*

¹³ Pabodo guiquēñē taadonque gocæ cædinque mōnitō īmōnite apænecantapa. Minitō wipodē ñænæmpodē go guidinque māodāmæ wipodenque godāmæ goyōmīni, botō ōmaaque nāñe tebæ pōmoedāni. Atōnō īñōmō pō wāi wocænte owoyōmīni botō īñōmō ōmaaque pō adopodē guībo ate gocæimpa, angā Ao ante mōnitō tāno go guī tæ contadinque ōme tagamōnimpa. ¹⁴ Mānōmai godinque Atōnō īñōmō pō wāi wocænte owoyōmōni tōmengā ōmaaque pō bee tēninque ñænæ wipodē adopodē pō guīte tæ contacā ate mōnitō godongāmæ wogaa godinque Mīitidēne nāni quēwēñōmō pontamōnipa. ¹⁵ Māniñōmō wāi wocænte monte ate ñāō ba wogaa godinque mōnitō Quiyo ganca pōninque waōnæ ate wodo pænta godinque wæætē Tāmo īñōmō pōmōnique go Todoguidio īñōmō pōmōnique go īñabæ guingā ate Mīideto pontamōnipa. ¹⁶ Edæ, Ææmæ Pentecotee nāni ānōmæ botō bequinque Eedotadē eyepæ poncæte ante quingæ goquēñēmo īmopa, ante do āningā inte Pabodo ñōwo, Atiabæ wantæpiyæ ongōninque ædō cæte Eedotadē eyepæ pōmaimoo. Ante pōnente wædinque, Epeto īñōmō ti wææñāmai yaatænque gocæboimpa. Āñongā mōnitō tōmengā tōnō Epeto wodo tebæ godinque Mīideto īñōmō pontamōnipa.

*Epeto īñōmō nē Picænāni īnānite Pabodo
apæncampa*

¹⁷ Mānī wipo ñænæmpo Mīideto īñōmō wogaa pō wāi wocæ ate ti wææninque Pabodo wādāni īnānite da godōninque, Minitō Epeto īñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni īnānite nē aadāni Picænāni īnānite āñete pōedāni. ¹⁸ Angā āñete pōñōnānite tōmengā, “Botō Atiabæ mā ponte quēwēninque botō goganca

æbānō mīnitō weca waa cæte quēwēnōmoī, ante do ēñēmīnīpa. ¹⁹ Edæ oodeoidi, Wænoncæ, ānāni ēñēnīnque nanguī guīñente wæbo incæte botō, Ōnōmoque baī īmopa, ante pōnēnīnque Wængonguī beyænque nanguī cædinque Ca ca wædinque ee cætābopa. ²⁰ Īnīnque botō, Mīnitō beyænque quīnō waa inguī, ante pōnēnīnque pæ wēenedāmaī inte do apænebo ēñēmīnīta. Ayæ edæ tōmānāni ayōnāni odōmonte apænedīnque botō wacōnē māo wacōnē māo go guīdīnque apænebo ēñēmīnīta. ²¹ Ayæ pancamīniya oodeoidi īñōmīnīte pancamīniya guīdegōidi īñōmīnīte botō tōmānīni īmīnīte apænedīnque īmaī ante apænetābopa. Mīnitō, Idæwaa wēnæ wēnæ cæte awædō, ante pōnente wædinque Wængonguī gāmæñō pōnīnque mōnō Awēnē Itota Codito ingante pōnecāmīnīpa, ante āmo ēñēmīnīta. Mānōmaī tōmāā cætābopa, ante do ēñēmīnīpa.”

²² “Nōwo guīquēnē Wængonguī Ōnōwoca angā ēñēnīnque Eedotadēē gocæboīmpa. Mānīñōmō pōñōmote quīēmē baī bacæīmpa, ante pōnente wædīmo incæte ee gocæboīmpa. ²³ Ōnonque botō fīwō wayōmō wayōmō nāni quēwēñōmō pōñōmote wadāni Wængonguī Tæiyæ Waēmō Ōnōwoca tōnō apæneca ēñēnāni inte do botō īmote īmaī ante wææ ānānīpa. Bitō tee mōnete nanguī caate wæquinque Eedotadēē gobīpa, ānāni ēñēnīnque mānīnque ante ēñēmopa. ²⁴ Incæte, Wængonguī waadete pōnō cædinque nānō cægaīnō ante watapæ apænedīnque bitō, Nō pōnī impa, ante apænebi ēñēncædānīpa, ante mōnō Awēnē Itota doyedē botō īmote angacāīmpa. Īnīnque tōmengā nānō anganca īnque cæcæte ante cæyōmote wæñōnāni wæmo incæte botō, Godōmenque inguīpoga quēwengūēmo intābopa, ante wædāmaī incæboīmpa. Ayæ pogodo gote baī botō goquīnō tōmānō gocæte ante nanguī cæcæboīmpa, āmopa,” ante Pabodo apænecantāpa.

²⁵ Ante apænedīnque tōmengā ayæ godōmenque apænecantāpa. “Botō, Mōnō Awēnē Odeye do pongāīmpa, ante apænedīnque wayōmō māo wayōmō māo apænebo ēñēmīnīta. Idæwaa apænebo ēñēmīnīni inte mīnitō nōwo æmæwo botō awīnca amīnīpa. ²⁶ Mānōmaī beyæ botō nōwoōnæ apænedīnque mīnitō īmīnīte īmaī āmopa. Botō, Quēwencāmīnīpa, ante cædinque anca apænebo incæte pancadāniya tōmēnāni nāni wīl ēñēnō beyænque wentamō mongænte nāni wængūnque goyōnāni botō wæætē mānīnō beyæ wentamō mongænāmaī īmopa. ²⁷ Wængonguī, īmaī cæbo bacæīmpa, ante nānō ānō ante botō īñōmō edæ pæ wēenedāmaī inte mīnitō īmīnīte tōmānō edonque pōnī apænebo

ēñēmīnīta.”

²⁸ “Mīnitō īñōmō edæ nāmā wææ aadīnque waa cæte quēwēedāni. Wængonguī Ōnōwoca mīnitō īmīnīte ānīnque, Īnāni cæningāidi baī īnānīpa, ante nānō nē angānāni īñōnānīte mīnitō wæætē nē aamīni īnōmīni inte tōmēnāni īnānīte ædæmō wææ aaedāni. Mōnō Awēnē Codito ingante nāni godongāmæ pōnecabo īnānīte æncæte ante tōmengā nāmā wepæ godonte ængā ate Wængonguī quīnāni bagadānīpa cæmīnī. Mīnitō tōmēnāni īnānīte nē aamīni inte waa aaedāni. ²⁹ Edæ botō do ēñēmopa. Babæidi gāwæī ecate ade cænāni amīnīpa. Edæ botō emō cæte gobo ate waodāni incæ babæidi cædāni mīni abāi adobāi wēnæ wēnæ cædinque mīni pōnecabo īñōmīnīte ata cæpodāmaī incædānīpa. Tōmēnāni babæ wapitīcæ ānāni ēñēnīnque mīni cabo incæ pancadāniya ēñēnāmaī badīnque wadæ godāni wæcāmīnīpa. ³⁰ Ayæ tōmēmīni mīni pōnecabo incæ pancadāniya, Mōnitō mīñæ poncāmīnīpa, ante cædinque babæ wapitīcæ odōmoncædānīpa cæmīnī. ³¹ Edæ wææ cædāni. Botō, Mānōmaī bacæīmpa, ante wadepo mēnepoga go adodepoque īñonte itadē incæ woyowotæ incæ ūmpo cædāmaī inte Ca ca wædinque mīnitō tōmānīni īmīnīte apænebo ēñēnōmīnīpa. Mānōmaīnō ante pōnēdāni,” ante Pabodo apænecā ēñēnānīta.

³² Ānīnque tōmengā, “Īñānāni, botō mīnitō īmīnīte Wængonguī nempo nōwo emō cæte gobo tamēñedāni. Tōmengā waadete nānō pōnō cædīnō ante mōnī apænedō ante ēñēnte ēwocamīni īñōmīnīte tōmengā mīnitō īmīnīte godongāmæ cæcā ate tæī pīñænte bacāmīnīpa. Ayæ Wængonguī quīmōnī tōmāmōnī tōnō mīnitō adocabomīni bayōmīnīte tōmengā eyepæ da pōnongā ate mīnitō mōnītō tōnō godongāmæ æncāmīnīpa. ³³ Botō īñōmō æbānō quēwēmoī aedāni. Edæ wacā quī tīgūtāmō incæ oodo incæ weocoo incæ, Botō quī bacæīmpa, ante cōwē æīnēnāmaī īnōmīpa. ³⁴ Edæ tōmēmo ōnompoca botō cædīnō beyænque quīēmē ænguēnēmo ante eyepæ ænīnque quēwēnōmīpa. Ayæ botō tōnō godongāmæ cædāni nāni ænguēnēmo ante adīnque adobāi botō tōmēmo ōnompoca cædīnō beyænque ænīnque tōmēnāni īnānīte da godō da godō cæbo ænīnque quēwēnōnānīpa. Mānōmaī botō cædīnō ante do ēñēmīnīpa. ³⁵ Mōnō Awēnē Itota incæ īmaī ante apænegacāīmpa. ‘Māincoo ænīnque mōnō wædæncæ tomōmpa. Wæætē wacā ingante pædæ godōnīnque mōnō nanguī toquinque impa.’ Ante Itota nānō apænegāīnō ante pōnēnīnque botō, Mānōmaī mōnō ōnompoca nanguī cædinque ænīnque wadāni nē ænguēnēnāni

īnānite mōnō pædæ godongæimpa, ante mīnitō īmīnite cōwē odōmonte apænebo ēñēmīnitapa.”

³⁶ Mānōmaīnō ante īnque apænedīnque Pabodo tōmēnāni tōnō da guīcapodīnque Wængonguī ingante apænecantapa. ³⁷ Ayæ tōmēnāni Ca ca wædīnque, Waa goe, ancæte ante godongāmæ goto pōnīnque tōmengā ingante yaagō yaagō cædānitapa. ³⁸ Tōmengā nānō, Botō īmote æmæwo amīnīpa, nānō ānīnō beyæ godōmenque nangūi wædānitapa. Ayæ tōmengā ingante ñænæ wīpo ganca ænte māodāni gogacāimpa.

21

Pabodo Eedotadēē gocampa

¹ Mōnitō tōnīñadāni tōnō godongāmæ wægōnīnque Pabodo tōnō mōni goquīncabo īñōmō, Wīpo ñænæmpo do wogaa gocæ cæpa, ante adīnque edæ, Nōwo gomōnīpa, ante tōmēnāni īnānite emō cæte godīnque mānīpodē go guītamōnīpa. Guīdīnque mōnitō tōingā wogaa godīnque Coto nāni quēwēñōmō ponte tōmæwæ æite monte ate īimō ate Ododata gomōnīque go Patada nāni quēwēñōmō pontamōnīpa. ² Patada īñōmō pō ti wæænte ayōmōni, Wīpo ñænæmpo Pēnitā goquīmpo impopa, ante adīnque mānīpodē go guīdīnque wogaa gotamōnīpa. ³ Wogaa godīnque dipæmæ īnō gomō ayōmōni wāā tēiwæñē Tipidebæ a ongō adīnque tæcæpæ īnō wodo tebæ wogaa gomōnīque go Tīdiabæ pontamōnīpa. Ayæ ñænæmpo mōni goīmpo Tīdo īñōmō māīncoo owāaquī impa, ante ēñēnīnque mōnitō mānīñōmō adobaī ti wææntamōnīpa.

⁴ Ti wæænīnque mōnitō tōmēnāni quēwēñōmō ponte ayōmōni Itota ingante nē tee empote quēwēnāni a ongōnāni adīnque mōnitō onompo æmæmpoque go mēōnaa īfōnte tōmēnāni tōnō godongāmæ quēwentamōnīpa. Tōmēnāni guīquēnē, Wængonguī Tæiyæ Wæmō Ōnōwoca apænecā ēñēnīnāni īnte Pabodo ingante, Bītō wægūnque Eedotadēē īñōmō gocæ cæbīpa, ante wææ ānānitapa. ⁵ Mānōmaī ante wææ ānāni ēñēmōni incæte mōnitō, Mānīmpoōnæque quēwenguēñēmōni īntamōnīpa, ante adīnque wadæ gotamōnīpa. Īnīnque tōmēnāni nāni quēwēñōmō yabæ īnō tōmēnāni nāni wencabo tōmānāni ænte māodāni godīnque mōnitō emōnaiya pōnīnque godongāmæ da guīcapodīnque Wængonguī ingante apænetamōnīpa. ⁶ Apænete ate mōnitō, Gomōnīpa, ānīnque go ñænæ wīpodē adopodē guīdīnque wogaa gocæ cæyōmōnīte tōmēnāni wæætē, Waa goedāni, ānīnque ocæ emænte tōmēnāni oncō godānitapa.

⁷ Mōnitō īñōmō Tīdo īñōmō wadæ tao wogaa godīnque Todēmaida īñōmō

pō tōmæwæ æīdīnque mānīñōmō nāni pōnencabo īnānite adīnque mōnitō, Pōmōnīpa, ānīnque tōmēnāni tōnō adōōnæque quēwentamōnīpa. ⁸ Īimō ate wadæ godīnque Tetadea nāni quēwēñōmō pōnīnque Pedīpe oncōnē pō guīte quēwentamōnīpa. Wēēñēñedē Itota nānō nē emīñænāni, Mōnō pōnencabo beyæ ante nē cædāni tīæte ganca īnāni incædānīmpa, ante nāni Tīæte ānōnāni īñōnāni adocā Pedīpe tōmēnāni nāni pōnencabo beyæ ante nē cæcā īnongā īnte Codīto waa pōnī nānō pōnō cægaīnō ante nē apænecā īnongāīmpa. ⁹ Tōmengā wēnāni baquedānīque mengāa go mengāa īñōnānīte Wængonguī Ōnōwoca pōnō cæcā ate tōmēnāni Wængonguī beyæ nē apænedāni īnōnānīmpa. ¹⁰ Mōnitō Pedīpe weca tæōnæ quēwēmōni ate wacā onguīñægā tōmengā emōwo Agabo Wængonguī beyæ nē apænedongā īnte Oodeabæ quēwente wææ pongantapa. ¹¹ Mōnitō weca pōnīnque tōmengā Pabodo pacadeyænta ænīnque nāmā onompo goti wīmpote wæi onōwa goti wēwādīnque īmaī ante apænecantapa.

–Wængonguī Tæiyæ Wæmō Ōnōwoca botō īmote æbānō ante apænecā, ante apænebo ēñēedāni. Oodeoidī Eedotadēē nē quēwēnāni īñōmō īi pacadeyænta nē ēadingā ingante mānōmaī goti wīnīnque oodeoidī īnāmaī īnāni nempo pædæ godōnāni æncædānīmpa, ante do apænecā ēñēmopa, ante Agabo apænecantapa.

¹² Mānōmaī apænecā ēñēnīnque mōnitō Tetadea quēwēnāni tōnō Pabodo ingante wææ wææ apænedīnque, Eedotadēē godāmaī īmāwe. ¹³ Ante wææ āñōmōnīte Pabodo wæætē,

–Mīnitō īñæmpa Ca ca wæmīni ēñente wædīnque wætawente awædō. Edæ Eedotadēē goyōmote bæi ongonte goti wīnāni incæte wæñōnāni wæmo incæte botō īñōmō űmpo cædāmaī īnte mōnō Awēñē Itota emōwo beyænque cōwē gocæboīmpa.

¹⁴ Ante mānōmaī apænecā ēñēnīnque mōnitō ancaā wææ āñōmōnīte Pabodo, Cōwē gocæboīmpa, ante űmpo cædāmaī īnte angā wædīnque mōnitō wæætē edæ, Wængonguī nānō ānō baī bacæīmpa, ante adīnque mōnitō ee ate pæ wēēnetamōnīpa.

¹⁵ Īnīnque mānīmpoōnæ mānīñōmō quēwēnīnque, Nōwo mōnō Eedotadēē gocāīmpa, ante cædīnque Pabodo tōnō godongāmæ ee gotamōnīpa. ¹⁶ Goyōmōni Tetadea īñōmō quēwēnāni īnte Itota ingante nē tee empote quēwēnāni pancadāniya mōnitō tōnō godongāmæ godīnque, Nāatōō oncōnē owocæmīnīmpa, ante māninganca ænte mānōnāni pō guītamōnīpa. Tōmengā īñōmō wāā tēiwæñē Tipidebæ nē quēwēningā īnte dobæyedē

Itota nānō nē ēmiñægā badingā inte quēwēnongāimpa.

Tantiago weca Pabodo ēñacæ gocampa

¹⁷ Tōmengā oncōnē pō guīi mōmōnique go Eedotadēē pōñōmōni māniñōmō quēwente nē pōnēnāni iñōmō, Waa pōmīni amōnīpa, ante todānitapa. ¹⁸ Ayæ iimō ate Pabodo tōnō godongāmæ mōni poncabo Tantiago weca ēñacæ gotamōnīpa. Tōmengā weca pōñōmōnite nē pōnēnāni inānite nē aadāni nē Picænāni tōmānāni adoyōmō pōnānitapa. ¹⁹ Adinque Pabodo, Waa quēwēmīni, āninque godōmenque iimāi ante apænecantapa. Mēmōidi ēñēdāni, āninque, Botō oodeoidi ināmaī ināni weca gote cæyōmote Wængonguī iimāi godongāmæ waa cæcantapa, ante Wængonguī nānō cædinō ante tōmengā adodō adodō ante apænecā ēñēnānitapa. ²⁰ Ēñēninque nē aadāni Picænāni guiquēnē, Wængonguī, Bitō waa pōni cæbitapa, ante godongāmæ watapæ apænedānitapa. Ayæ Pabodo ingante wæætē apænedinque,

–Biwī ēñēmi. Oodeoidi æpodō mīdo ganca ināni ñōwo do pōnente badāni abitapa. Tōmēnāni iñōmō Wængonguī nānō wææ angaiñō ante tōmānāni ēñente cōwē cædāni abitawo. ²¹ Ayæ edæ bitō Pabodobi wēnæ wēnæ cædāmaī iñōmite wadāni bitō imitedō ante babæ wapiticæ godō oodeoidi inānite iimāi ante tedewēnāni ēñēnānīpa. Tōmēnāni, Pabodo wayōmō wayōmō godinque oodeoidi wabæca quēwēnāni inānite bee tente odōmōninque iimāi ante apænecampa, ante tedewēnānīpa. Pabodo, Mīnitō wēnāni inānite ēō togænāmaī iedāni, āninque, Dodāni nāni angaiñō mīni ēñēnō ante ñimpo cæedāni, ante ānewengampa, ante tedewēnānīpa. Ayæ godōmenque āninque, Mōitee wodi nānō wææ angaiñō ante wido cæedāni, ante Pabodo ānewengampa tōō. Ante tōmēnāni bitō imitedō ante babæ ante tedewēnānīpa. Īñæmpa bitō mānōmaīnō ante ānāmaī iñōmite tōmēnāni oodeoidi inānite babæ ante apænedāni ēñēnānīpa cæbii. ²² Īninque, Pabodo do pongāimpa, ante oodeoidi do ēñenguīnāni inānīpa, ante pōnente wædinque mōnitō ñōwo, Ēbānō cæte wææ cæquīi, ante wæmōnīpa. ²³ Īninque, Pabodo nō cæcā iñongante wadāni babæ wapiticæ tededānīpa, ante oodeoidi ēñēcædānīpa, ante wææ cædinque bitō iimāi cæcæbiimpa āmōnīpa.

“Pabodo ēñēmi, ānānitapa. Mōnitō weca onguīñænāni mengāa go mengāa ināni ñōwo ongōninque, Wængonguī beyænque ante cōwē cæcæmōnīpa, ante nē ānīnāni inte tōmēnāni nāni ānīnō baī ĩnque cæquīnāni inānīpa. ²⁴ Tōmēnāni, Mōnitō ānīnō ante do ĩnque cædimōni inte wentamō mongænāmaī ĩmōni acædānīpa, ante cædinque, Wængonguī quī, ante godoncæ

cædānīpa. Īninque bitō iñōmō māniñāni inānite ænte godinque tōmēnāni tōnō godongāmæ, Wængonguī quī, ante godōe. Ayæ bitō eyepæ pædæ godōmi āninque tōmēnāni nāni godonguēnecoo godonte āninque, Wængonguī quī, ante godōninque tōmēnāni ocaguī tōmanguī ocāa pōni ēō tocate incædānīpa. Bitō mānōmaī tōmēnāni tōnō iñacabo cædinque Mōitee wodi nānō angaiñō baī cæbi adinque oodeoidi wæætē, Ē, Pabodo nō cæcā iñongante wadāni iñōmō babæ wapiticæ tededānīpa, ante ēñēcædānīpa,” ante nē Picænāni ānānitapa.

²⁵ “Ayæ oodeoidi ināmaī ināni guiquēnē nē pōnēnāni badinque æbānō cæquēnēnāni inānīpa, ante pōnente wædinque mōnitō do godongāmæ pōnēninque tōmēnāni inānite iimāi ante yewæmontamōnīpa. Wadāni, Wængonguīdi quī, ante cænguī nāni cōnōnincoo ante mīnitō cænāmaī gomō aedāni. Wepæ owemōingā adinque cæningā ñē wimencate wæningā adinque cænāmaī iedāni. Ayæ nānōogægā ināmaī iñongante mīnitō godō guēa mōnāmaī iedāni, ante do yewæmontamōnīpa,” ante nē aadāni Picænāni Pabodo ingante apænegadānīpa.

Wængonguī oncōnē Pabodo ingante bæi ongōnānīpa

²⁶ Īmō ate ñāō bayonte nē aadāni Picænāni nāni ānīnō baī ēñente cædinque Pabodo mengāa go mengāa ināni inānite ænte māocā gote cæyōnāni tōmengā nānō tæiyæ wæmō baquinque ante tōmēnāni tōnō Mōitee wodi nānō wææ angaiñō ante ēñente cæcantapa. Mānōmaī cædingā inte tōmengā Wængonguī oncō ñænæncō yabæcōnē go guīdinque māniñōmō cædāni inānite apænedinque, Mōnitō adoque Wængonguī itædē go ate Mōitee wodi nānō angaiñō ĩnque cæmōni ate ĩnāni iñōmō, Wængonguī quī, ante baō pædæ pōnōnāni āninque tancæmīnīpa, ante Pabodo tōmēnāni beyæ ante apænecantapa.

²⁷ Ayæ onompo æmæmpoque go mēōnaa nānō ānimpoōnæ wodo ĩnque ba ate oodeoidi Atiabæ quēwente nē pōniñāni guiquēnē Wængonguī oncō ñænæncō yabæcōnē ponte ayōnāni Pabodo a ongongā. Adinque māniñōmō ononque ongōnāni inānite, Mōnō pīnte cæcæmīpa, ante ānāni ēñēninque ĩnāni wæætē ænguī badānitapa. Ayæ Pabodo ingante bæi ongonte, ²⁸ aa pedinque tōmengā ingante nē pīnte ānāni iñōmō, “Idægoidi cōwā aedāni” ante, “Īngā ingampa cæmīni. Pō godongāmæ cæedāni. Tōmengā inguīpoga tōmāo godinque tōmāmaē quēwēnāni inānite māo apænedinque iimāinō ante tedewengampa. Idægoidi wēnæ wēnæ cædāni inānīpa, ante cōwē ānewengampa. Wængonguī

oncō ñænæncō incæ ōnonconque impa, angampa. Ayæ Wængongui nānō wææ angainō ante mōnō ēñēnāmai ingæimpa, ante tōmengā ānewengampa tōō. Ayæ iñōmō oncō tæiyæ waēmō oncō iñonte tōmengā wæætē guidiegoidi inānite ænte māmō iincōnē guidingue otænē ōñō bai cæcantapa cæminii,” ante pīlnānitapa.

²⁹ Do edæ wacā Todopīmo iñōmō Epeto iñōmō quēwēningā inte Eedotadēē pōninque Pabodo tōnō cægōna inōnāimpa. Mānōmai guēa cægōna adinque oodeoidi, Æ, iingā oodeocā ināmai iñongante Pabodo do Wængongui oncō ñænæncō yabæcōnē ænte māmongā wāānē guibaingampa, ante wawique pōnēninque māniñō ante wapiticæ apænedānitapa.

³⁰ Mānōmai ante ānewēnāni ēñēninque Eedotadēē quēwēnāni tōmāo iñōmō Yæ yæ āninque pogodo pōnānitapa. Ponte Wængongui oncō ñænæncō yabæcōnē māo pō guidingue Pabodo ingante bæi ongonte æninque oncodō wēā mantao godinque odemō do tee mōnedānitapa.

³¹ Ayæ godōmenque, Wængongæimpa, ante tæcæ cæyōnāni adocanque mæi odōmāno tontadoidi awēnē cōmantante ingante apænecantapa. Eedotadēē tōmāo Yæ yæ āninque pogodo pōnānipa cæbii. ³² Ante mæi angā ēñente wædingue awēnē cōmantante iñōmō tontado capitāōidi tontadoidi inānite, Pōedāni, āninque nē Yæ ānāni weca pogodo wææ do pōnānitapa. Iñinque awēnē cōmantante tōnō tontadoidi do wæænte pōnānipa, ante adinque wadāni wæætē Pabodo ingante nē tæi tæi pānīnāni inte ñōwo ñimpo cædingue ee adānitapa. ³³ Pabodo weca pōninque awēnē cōmantante angā ēñēninque tontadoidi wæætē Pabodo ingante bæi ongōninque yaēmengō mēmēñā gotū winānitapa.

Awēnē cōmantante iñōmō, Æcānō ingāi, ante ayæ, Quinō wēnæ wēnæ cæcāi.

³⁴ Añongante pancadāniya, Iīmai cæcantapa, āñōnāni wadāni wæætē, Wīi Iīmai wadō cæcantapa, āninque wææ wææ āñōnānite tontadoidi awēnē cōmantante iñōmō, Nōingā ante æbānō cæte ēñengūimoo, ante wædingue tontadoidi inānite angā ēñēninque Pabodo ingante tōmēnāni wææ cæte iñōmō ænte mæicæte ante cædānitapa. ³⁵ Ænte godinque tēwaimpa ganca tæcæ pōñongante godongāmæ ongōnāni godōmenque ængui badinque wiwa cæcæ cædāni wædingue tontadoidi wæætē Pabodo ingante wææ cædingue ōnōnancapæ ængō cædingue adimongā næænte mæidāni tēwaimpaa æicantapa. ³⁶ Ayæ tōmānāni edæ tee empote pōnāni iñōmō Yæ yæ āninque, “Cōwē wido cæcæimpa,” ante ancaā ānānitapa.

Pabodo nāmā wææ apænecampa

³⁷ Wææ cætiñōmō tæcæ mangui guicæte ante cæyōnāni Pabodo iñōmō tontadoidi awēnē cōmantante ingante apænedinque,

–Bitō Ao āni ēñente ate botō adodeque bitō imite apænecæboimpa.

Añongante,

–Iñæmpa bitō guidiego tededō tedebi imitawo. ³⁸ Bitō iñæmpa equitobi inōmi inte edæ doyedē, Wido cæcæimpa, ante cædingue nē, Wængongæimpa, ante nāni ānincabo iñōnānite coatodo mīdo ganca ināni inānite ōnōmæca ænte māobi godānitapa. Botō ayōmo bitō adobi imitapa tōō.

³⁹ Añongante Pabodo wæætē,

–Iñæmpa botō waobo ēñagaīmo inte ood-eobo inōmo imopa. Botō wīi ōnōñōmonque ēñagaīmo imopa. Tiditiabæ Tadoto nāni nanguī quēwēñōmō ēñagaīmo imopa cæbii. Ao āni ate botō iīnāni inānite apænebo ēñēmainānipa.

⁴⁰ Añongante Ao angā ate tēwaimpaa adiyæ gongæninque godongāmæ ongōnāni inānite Pabodo, Apocæñē iedāni, ante bai cædingue compo compo cæcā. Adinque tededāmai ongōnāni ate tōmengā ebedeoidi nāni tededō tededinque iīmai ante apænecā ēñēnānitapa.

22

¹ “Botō tōniñamīni iīmini ēñēedāni. Botō wæmpomīni iīmini botō nāmā wææ apænebo ēñēedāni.”

² Ante Pabodo ebedeō tededō apænecā ēñēninque tōmēnāni, Æ mōnō tededō apænecampa, ante wædingue godōmenque ēamonca nōwæ ongōñōnāni tōmengā iīmai ante apænecantapa.

³ “Botō iñōmō oodeobo ingaīmo imopa. Tiditiabæ Tadoto iñōmō ēñagaīmō inte botō Eedotadēē ponte pægaboī aedāni. Iñōmō pædingue Gāmadiedo nē odōmongā weca adimo inte botō mōnō mōmæīdi nāni wææ angainō ante ædæmō ēñēninque adodō ante ēñente cæte pægaboimpa. Mīnitō, Wængongui beyæ ante mōnō cōwē cæcæimpa, ante ñōwoōnæ cæminīpa. Mīnitō cæminī bai botō adobaī Wængongui beyæ ante cæcæte ante cōwē nanguī cædingue quēwengaboimpa. ⁴ Iñinque, Itota ōnōædē godō Taadō bai ingampa, ante nē pōnēnāni inānite botō, Pāmo wæncædānimpa, ante togænte pangaboimpa. Onguiñænāni incæ onquiyænāni incæ tōmānāni inānite bæi ongōninque botō wadāni nempo pædæ godōmo æninque tōmēnāni wæætē nē pōnēnāni inānite māo tee mōnedāni wægadānimpa.”

⁵ “Mānōmai cædingue botō, Godōmenque Daāmaco iñōmō godinque botō, Taadō, ante nē pōnēnāni inānite bæi ongonte goti winte adodō Eedotadēē iñōmō ænte māmō pædæ godōmo æninque awēnēīdi wæætē tōmēnāni

īnānite pānāni wæcædānīmpa, ante cætabopa. Mānōmaī cæcæte ante cæbo adīnque, Wængongūī qui, ante nē godongā nænængā pōnī īnongā tōnō nē aadāni nāni Picæncabo tōnō Ao ānīnque, Mōnītō tōnīfādāni Daāmaco īfōmō quēwēnāni acædānīmpa, ante cadota ante yewæmōnāni æte gotabopa. Īnīnque, Botō æbānō cæboo, ante nē agānāni īnte awēnēidi incæ edæ, Pabodo nāwangā angampa, ante nōwo nē apænequēnēnāni īnānīpa,” ante Pabodo angantapa.

Botō wēnē pōnēwengānō ante nīmpo cædīnque wadō ante pōnēmopa, ante Pabodo apænecampa

(Nāni Cægaīnō 9.1-19, 26.12-18)

6 Ānīnque Pabodo, Īmaī cægaboīmpa, ante godōmenque apænecantapa, “Botō taadō godīnque tæcæbæcā īfōnte Daāmaco obo ponte ayōmote oōnædē īfōntobæ nāō botō weca pō godongāmæ guīnæ gongæ ate wædīnque, ⁷ botō guīdōmēmæ tæ go wææntabopa. Ayæ ēfēfōmote, ‘Taodo, Taodo. Botō īmote quīnante togænte pāmī.’ ⁸ Āfōngante, ‘Awēnē, æbidō īnōmī īmī.’ Ante wæyōmote tōmēngā, ‘Itota Nāatadeta quēwēnīmo īnte mānīmodō bitō nē togænte pānōmo īmopa,’ ante apænecantapa. ⁹ Mānōmaī apæneyongā botō tōnō godongāmæ godāni guīquēnē nāō gongæneque adīnque botō īmote nē apænecā nānō tēdēdō ante ēfēnāmaī īnānītapa. ¹⁰ Botō īfōmō, ‘Awēnē, quīnō cæquēnēmo īmo, ante āmī ēfēmoe.’ Āfōmote mōnītō Awēnē wæætē, ‘Bitō ængæ gantīdīnque Daāmaco īfōmō goe. Botō, Taodo Īmaī cæcæcāīmpa, ante wacā īngante Daāmaco īfōmō nē quēwēngā īngante do apænebo ēfēngampa cæbīī. Bitō Daāmaco īfōmō gote ongōfōmī tōmēngā wæætē bitō īmīte apænecā ēfēnte cæcæbīīmpa,’ angantapa. ¹¹ Ayæ nāō gongæ adīnque botō bee wodōmonte baī bayōmote botō tōnō godongāmæ godīnāni wæætē tōō æmænte Daāmaco īfōmō māodāni gotabopa,” ante Pabodo apænecantapa.

¹² Mānōmaīnō ante apænedīnque Pabodo godōmenque apænecantapa. “Mānīfōmō gote ongōfōmō wacā tōmēngā ēmōwo Ānāniya botō weca pongantapa. Tōmēngā īfōmō Wængongūī īngante guīfēnte wædongā īnte dodāni nāni wææ angānō ante cōwē ēfēnte cæcā īngāīmpa. Īnīnque oodeoidī mānīfōmō quēwēnāni tōmānāni tōmēngā īngante waa adōnānīmpa. ¹³ Tōmēngā īfōmō botō weca pō næ gongænīnque, ‘Taodo, bitō botō bīwī īmī, nōwo waa bamonte ae.’ Tæcæ āfōngante botō æmō adīnque tōmēngā īngante waa atabopa. ¹⁴ Tōmēngā ayæ apænedīnque, ‘Mōnō mæmæīdī Wængongūī incæ, Botō æbānō cæquīmo īmo, ante botō pōnente

angānō ante bitō ēfēncæbīīmpa, ante cædīnque bitō īmīte apænte ængampa. Ayæ, Mōnō nō cædongā īngante tōmēmi acæbīīmpa. Adocā apænecā ēfēncæbīīmpa, ante cædīnque Wængongūī bitō īmīte do apænte ængampa. ¹⁵ Īnīnque nē adīmī inte nē ēfēmi īnte bitō īfōmō edæ bitō adīnō ante bitō ēfēnīnō ante, Nāwangā īmpa, ante tōmāmæ quēwēnāni īnānite māo apænebī ēfēncædānīmpa. ¹⁶ Nōwo īfōmō quīnante a ongōmī. Āngæ gantīdīnque Itota ēmōwo apænedīnque, Wēnæ wēnæ botō cædō pōnō nā mēnongabī quēwēmoe, ānīnque æpæne guīīe.’ Ante Ānāniya angā ēfēnīnque botō æpæne guīitabopa,” ante Pabodo apænecantapa.

Oodeoidī weca gotabopa, ante Pabodo apænecampa

¹⁷ “Ayæ ate adodō Eedotadēē pontabopa. Ayæ Wængongūī oncō nænæncō yabæcōnē go guīdīnque Wængongūī īngante apænedīnque botō ate baī cæwēnente ayōmō, ¹⁸ mōnō Awēnē botō īmote īmaī ante apænecantapa. ‘Bitō botō īmote ante nō apænebī incæte īnāni ēfēnāmaī īnāni īnte Baa angūīnāni īnānīpa cæbīī. Nōwo Eedotadēē quīngæ wodīī tao gobāwe.’ ¹⁹ Āfōngante botō, ‘Awēnē ēfēmi, antabopa. Oodeoidī odōmōīncōnē wacōnē wacōnē go guīdīnque botō bitō īmīte nē pōnēnāni īnānite māo tee mōnedīnque tæi tæi pānīmo īmopa. Mānōmaī īmpa, ante īnāni do ēfēnānīpa. ²⁰ Ayæ, Itota incæ nāwā Awēnē īnongā īngampa, ante nē apænecā īfōngante Etebā wodi īngante wænōnāni wæfōngā botō edæ Ao ānīnque nē wænōnāni weocoo aate a ongontabopa, ante tōmēnāni do agānāni īnte botō īmote waa aquīnāni īnānīpa.’ ²¹ Ante wææ apænebo incæte Wængongūī Awēnē wæætē, ‘Nōwo goe, āmopa, angantapa. Gobæ oodeoidī īnāmaī īnāni weca bitō īmīte da godōmo gocæbīīmpa,’ ante da godongā gotabopa,” ante Pabodo apænecantapa.

Pabodo tontadoidī awēnē cōmantante weca ongongampa

²² Pabodo, Oodeoidī īnāmaī īnāni weca angā gotabopa, ante nānō apænedī ganca godongāmæ ongōnāni ēfēē gōnānītapa. Wæætē mānīne apænecā ēfēnte wædīnque tōmānāni yedæ ānīnque, “Oodeoidī īnāmaī īnāni weca godīngā īfōmō edæ quēwēnāmaī īnguēngā awædō. Tōmēngā īngante mōnō wo ēwēngæīmpa.” ²³ Ānīnque tōmēnāni godōmenque ængūī badīnque Yæ yæ ānīnque nāmā weocoo yabæcōoque gāni tadongadīnque wancæ wancæ cædīnque onguīpo guīdīmō ō ænīnque wo ææntodō wo ææntodō anca cædānītapa. ²⁴ Mānōmaī ængūī bate wēnæ wēnæ cædāni

adinque tontadoidi awënë cömantante angä eñëningue Pabodo ingante wææ cæte iñömö manguidäni guicantapa. Ayæ, Quinö wënæ wënæ cæcäi ante piinte äñäni, ante eñencæte ante tontadoidi inänite apænedinque, Minitö cöwë cædinö bai cædinque tæi tæi pämini caate wædinque Pabodo tömää tömengä cædinö edonque pöni apænecä eñencæboimpa, angantapa.²⁵ Eñëningue tömengä ingante pancæte ante æmontaimenca tæcæ goti wininque ñö cæyönäni Pabodo iñömö tontado awënë capitäo mäniñömö ongongä ingante apænedinque,

—Iñæmpa apænte äñämaï iñönäni botö odömäno onguiñæmo iñömote quimæ päwëminii. Mänömainö cædinque munitö awënëidi näni wææ angäinö ante dicæ eñente cæminiyaa.

²⁶ Äñongä capitäo wæætë awënë cömantante weca godinque,

—Iñgä iñömö odömäno onguiñængä inongä ingä атаque. Ñöwo æbänö cæquimii.

²⁷ Angä eñente wædinque cömantante iñömö Pabodo weca pöningue tömengä ingante,

—Bitö näwangä odömäno onguiñæmi imitawo.

Äñongante Pabodo,

—Ao, bitö ä bai botö mäniimodö imopa, angantapa.

²⁸ Pabodo apænecä eñëningue cömantante wæætë,

—Botö guiquënë odömäno inämaï eñagaïmo inte mäniñö bacæte ante cædinque nanguï godömo æninque odömänoidi wæætë botö imote, Odömänobi imipa, ante yewæmönäni bagaboimpa.

Apænecä eñëningue Pabodo wæætë,

—Botö guiquënë odömänobo eñagaïmo inte edæ odömänobo inömo imopa, ante apænecantapa.

²⁹ Mänömaï apæneyongä në pancæ cædinäni guiquënë do tömengä ingante emö cæte wadæ godänitapa. Ayæ cömantante iñömö, Pabodo odömäno onguiñængä iñongante botö ämo yaëmengonca goti winäniipa töö, ante guifente wædinque, Botö awënëidi piñäni wæcæ wæ, ante wægacäimpa.

Odeoidi näni Apænte Äincabo weca Pabodo ongongä

³⁰ Iimö ate cömantante iñömö, Quinö Pabodo wënæ wënæ cæcäi ante oodeoidi piinte äñäni, ante eñencæte ante Pabodo ingante äñecä ta pongantapa. Ayæ, Wængongui qui, ante në godönäni ñænænäni tönö oodeoidi tömënäni näni në Apænte Äincabo inänite äñete godongämæ ponte ongöñönäni Pabodo ingante ænte mäwæ tömënäni weca gö cæcä gongængantapa.

23

¹ Pabodo iñömö oodeoidi näni në Apænte Äincabo inänite gomö adinque,

—Botö mëmöidi eñëedäni. Botö mimö entawente nämä apænte cædinque Wængongui beyæ botö cæquënëno ante wëñëñedë iinque cædinque cöwë fiöwo ganca adobai cædinque quëwëmopa.

² Ante mänömaï apænecä eñente wædinque, Wængongui qui, ante në godongä ñænængä pöni inongä Äñäniya guiquënë Pabodo gäänë ongönäni inänite apænedinque, Öñöneca tæi tæi tadeedäni, angantapa.

³ Äñongä Pabodo wæætë,

—Bitö iñæmpa botö imote apænte ancæte ante Möitee wodi näno wææ angäinö ante cæbitawo. Incæte adode näno wææ angäinö ante eñëñämaï inte bitö edæ, Tæi tadeedäni, ante pönö ämi awædö. Bitö weocoo waëmoncoo eñabi incæte mimö wentamö entawëningue cæyömite Wængongui bitö imite näëmæ tæi tadeecäimpa töö.

⁴ Ante apænecä eñëningue Pabodo gäänë ongönäni wæætë,

—Bitö iñæmpa, Wængongui qui, ante në godongä ñænængä pöni iñongante quimæ tedewëmi.

⁵ Äñönäni Pabodo wæætë,

—Botö töninädäni eñëedäni. Botö, “Wadäni awënë iñongante tömengä ingante wënæ wënæ tededämaï incæbiimpa,” ante do wææ yewæmongatimpa, ante do eñëmopa. Iinque botö, Iñömö ongongä, Wængongui qui, ante në godongä ñænængä pöni inongä ingampa, ante eñëñämaï inte botö mänömainö ante apænetabopa.

⁶ Ante apænedinque Pabodo, Iinäni pancadäniya Tadoteoidi iñönäni pancadäniya Paditeoidi inänipa, ante adinque tömënäni näni në Apænte Äincabo inänite aa pedinque,

—Botö mëmöidi eñëedäni. Botö Paditeo wëmo në eñagaïmo inte botö mëmpo Paditeo näno ingai bai botö adobai Paditeobo inömo imopa. Mäniimodö inömo inte botö, Mönö ñäni ömæmonte watapæ quëwængäimpa, ante pönëmopa. Iinque mäniine botö pönënë beyænque botö imote apænte äninque munitö pancæ cæminii awædö, angantapa.

⁷ Pabodo mänömainö ante apænecä eñente wædinque Paditeoidi tönö Tadoteoidi dodäni näni pönengäinö ante wæætëdö wæætë änewëningue Paditeoidi nänënë Tadoteoidi nänënë näni cabo näni cabo badänitapa. ⁸ Iimaï impa. Tadoteoidi guiquënë, Mëwoga waomö ewocamo inte mönö näni ömæmongæimpa, ante, Babæ ancædö, ante Baa äninque, Öñöwocaidi tönö anquedoidi Wængongui weca owodänipa, ante adobai edæ Baa äñäni inönänimpa.

Paditeoidi guiquënë mënea ante pönëningue

Ao wādō inōnānīpa. ⁹ Īnīnque wadō wanō tedete ogæ tedeyōnānīte Paditeoidi tōmēnāni nē odōmōnāni pancadāniya ængæ gantīdinque,

–Īngā īñōmō mōnitō ayōmōni wēnæ wēnæ cædāmaī ingampa tōō. Wæætē edæ anquedo incæ wacā ōñowaca incæ Wængonguī weca owocā inongā inte tōmengā ingante apæneccā īmaingampa ānewēmīni.

¹⁰ Ante nanguī ogæ tedeyōnāni tōmānāni godōmenque Yæ yæ ānāni ate wædinque tontadoidi awēnē cōmantante īñōmō, Pabodo ingante æmæmæ inō tōō godō æmæmæ inō tōō godō cædinque æi guīñænāni wæmaingampa. Ante pōnente guīñente wædinque tontadoidi inānīte angā wæænāni ate, Pabodo ingante bæi ongonte ō ænīnque wææ cæte īñōmō ænte mæi tee mōneedāni, angā ēñente tee mōnedānitapa.

¹¹ Īimō ate woyowotæ mōnō Awēnē īñōmō Pabodo weca ponte apæneccantapa. “Pabodo, Guīñente wædāmaī incæbiimpa. Bitō doyedē Eedotadēē īñōmō botō imotedō ante apænedīnque, Nāwā Awēnē inongā ingampa, ante apænebitawo. Nōwo īñōmō do bitō apænedō bai Odōmā īñōmō godīnque adobaī apæneccæbiimpa,” angantapa.

Pabodo ingante wængongæimpa, ante cædānīpa

¹² Nāō bayonte Oodeoidi pancadāniya guīquēnē godongāmæ pōnēnīnque īmaīnō ante Ao ānānitapa. Cæñāmaī bedāmaī īnīmo inte mōnō Pabodo ingante wængongæimpa, ante cædinque, Pabodo mīi quēwēñongante mōnō cabo incæ æcānō cæna æcānō beda māningā nānō wængūnīnque cæcampa.

¹³ Onguīñænāni nē ānāni īñōmō coadenta ganca ināni ayæ godōmenque nanguī ināni godongāmæ pōnēnīnque mānōmaī ānewēnīnque cædāni inānitapa. ¹⁴ Īnāni īñōmō, Wængonguī quī, ante nē godōnāni ñænænāni tōnō nē aadāni nāni Picæncabo weca godīnque īmaī ante apænedānitapa.

–Mōnitō godongāmæ Ao ānīnque, Pabodo ingante wængongæimpa. Edæ mīi quēwēñongante æcānō cæna æcānō beda nānō wængūnīnque, ante āmōnīpa cæmīnīi.

¹⁵ Mīnitō tōnō wadāni mīni Apænte Āincabo inōmīni inte mīnitō īñōmō, Pabodo æbānō cæcāi, ante ædæmō ēñencæte ante wæte bai apænedīnque tontado awēnē cōmantante ingante babæ ante āmīni ēñēnīnque tōmengā wæætē Pabodo ingante mīnitō weca ænte poncæ cæcæcāimpa, āmōnīpa. Mānōmaī babæ āmīni ēñente cædinque cōmantante wæætē Pabodo ingante māwængā tæcæ wææñongante mōnitō guīquēnē taadō wææ wānōnīnque bæi ongonte edæ wæñōmōni wæncæcāimpa āmōnīpa.

¹⁶ Āñōnāni Pabodo nānōwāa īñōmō edæ do ēñengantapa. Ēñēnīnque tōmengā tontadoidi nāni wææ cæte īñōmō do go guīdinque Pabodo ingante apæneccā. ¹⁷ Ēñēnīnque Pabodo wæætē tontadoidi awēnē capitāō ingante apænedīnque,

–Īngā edēningā ingante mīnitō awēnē cōmantante weca ænte manguibi guīcæe. Tōmengā cōmantante ingante adodeque apæneccæcāimpa.

¹⁸ Angā Ao ānīnque capitāō wæætē māningā edēningā ingante ænte guīdinque cōmantante ingante apæneccantapa.

–Pabodo mōnō nē tee mōnedongā īñōmō botō imote aa pedīnque īmaī angantapa. Īngā edēningā ingante awēnē cōmantante weca ænte māobi guīdinque tōmengā awēnē ingante adodeque apæneccæcāimpa, angantapa.

¹⁹ Ante apæneccā ēñēnīnque cōmantante īñōmō edēningā ingante tōō æmænte nānēnē māocā goyongante,

–Botō imote æbānō apæneccæte ante pōmīi.

²⁰ Āñongante,

–Awēnē ēñēmi. Oodeoidi godongāmæ pōnēnīnque īmaī babæ cæcæte ante cædānīpa. Tōmēnāni, Pabodo æbānō cæcāi, ante ædæmō ēñencæte ante bai apænedīnque bitō imite babæ ante apæneccæ cædānīpa. Bitō īimō ate Pabodo ingante tōmēnāni nāni nē Apænte Āincabo weca ænte poncæbiimpa, ante cædinque babæ cæcæte ante cædānīpa. ²¹ Tōmēnāni īñōmō, Pabodo mīingā quēwēñongante æcānō cæna æcānō beda nānō wængūnīnque, ante nē āñōnāni inte edæ, Wængongæimpa, ānīnque cædānīpa. Adodāni nāni cabo incæ coadenta ganca onguīñænāni wænoncæte ante taadō do wææ wānōnīnque edæ, Wæñōmō wæncæcāimpa, ante edæ a ongōnānīpa cæbīi. Tōmēnāni, Bitō æbānō Ao angūimi, ante ēñencæte ante ponte ānewēñōnāni bitō īñōmō wæætē tōmēnāni nāni ānō bai cædāmaī incæbiimpa āmōpa.

²² Ante edēningā apæneccā ēñēnīnque cōmantante īñōmō, Bitō, Awēnē ingante ante mānōmaī apænetabopa, ante wacā ingante apænedāmaī pæ wēnecæbiimpa. Nōwo edæ goe, angantapa.

Pedīque weca Pabodo ingante ænte māodāni gocampa

²³ Edēningā ingante mānōmaī angā gocā ate cōmantante wæætē awēnēna capitāōna mēnaa inate aa pecā pōñōnate tōmēna inate īmaī angantapa. Mīnatō ñōwo tontadoidi ōnōwa nē godāni dotiento ganca ināni tōnō cabayo mongænte nē godāni tetenta ganca ināni ayæ tapa nē næænāni dotiento ganca ināni tōnō mānīmpodāni inānīte īmaī

ancæminaimpa. Mīnitō ñōwoōnæ eyepæ cædinque wantæ wantæ guññongā wadæ godinque Tetadea ganca goedāni, ante da godōmīna tao gocædānimpā. ²⁴ Ayæ Pabodo beyæ cabayoidi āmi ænte gocædānimpā. Tōmēngā ingante wæxæ aadinque pancabaa awēnē gobedōnadodo Pedique weca āmīna ænte māodāni cabayo mongænte adīmōngā gocæcāimpā. ²⁵ Ānīnque awēnē cōmantante iñōmō cadota ante iimāi ante yewæmōngantapa.

²⁶ Pedique eñēmi.

Bitō acæbiimpā, ante botō Codaodio Ditia iñōmo inte ñōwo yewæmōmopa. Bitō nē gobedōnadodo awēnē iñōmi inte waēmō pōni imipa, āmopa. Waa quēwencæbiimpā, āmopa.

²⁷ Iingā ingante oodeoidi bæi ongonte wænoncæ cæyōnānite botō wæxætē, Iñæmpa iingā iñōmō odōmāno onguññængā ingampa, ante do eñente wædīmo inte tontadoidi tōnō godinque tōmēngā ingante gā pe æmpote ō ænte wæxæ aatabopa. ²⁸ Ayæ oodeoidi, Pabodo wēnæ wēnæ cæcāi, ante quīnante piinte ānānii. Ante eñencæte ante cædinque botō tōmēngā ingante tōmēnāni nāni nē Apænte Āincabo weca ænte gotabopa. ²⁹ Āente gote eñēñōmo tōmēnāni dodānique nāni angainonque ante, Pabodo eñēnāmāi cæcampa, ante piinte ānāni wætabopa. Iñique botō ayōmote tōmēnāni, Pabodo nānō wænguinque nānō tee mōnequinque wēnæ wēnæ cæcampa, ante piīnīnque ōnonquedō ante cædānīpa, ante awædō. ³⁰ Nōwo iñōmō, Iingā onguññængā ingante wænoncæte ante oodeoidi awēmō cædānīpa, ante tededāni eñēnīmo inte botō tōmēngā ingante bitō weca do da godōmo gocampa. Tōmēngā ingante nē piinte ānīnāni iñānite bitō weca adobai da godōmo godānīpa. Mānīnque ante yewæmōmopa.

Ante cadota ante yewæmōnīnque, Awēnē gobedōnadodo Pedique acæcāimpā, ante tontado awēnē cōmantante da godongā ænte godānitapa.

³¹ Iñīnque cōmantante nānō ānīnō eñente cædinque tontadoidi woyowotæ tao godinque Pabodo ingante Antipati ganca adīmōngā māodāni gocantapa. ³² Iimō ate, Cabayo mongænte nē godāni tōnō Pabodo adīmōngā gocæcāimpā, ānīnque tōmēnāni nempo emō cæte godinque ōnōwa nē godānique tōmēnāni nāni cæte quēwencōnē ocæ ēmænte godānitapa. ³³ Cabayo mongænte nē godāni wæxætē Pabodo ingante godōmenque ænte godinque Tetadea iñōmō pōnīnque awēnē gobedōnadodo ingante cadota pædæ godōnīnque Pabodo ingante awēnē nempo pædæ godōnāni

ængantapa. ³⁴ Awēnē gobedōnadodo iñōmō cadota ænte adinque, Bitō æbædō eñagabiimpā. Āñongā Pabodo, Tiditiabæ eñagaboimpā. ³⁵ Ante apænecā eñēnīnque gobedōnadodo wæxætē,

–Bitō imite nē piinte ānīnāni pōnāni ate māniñedæ ate botō, Bitō æbānō apænequīmi, ante eñencæboimpā.

Ānīnque wæxæ wānōnāni iñānite apænedīnque, Mīnitō Awēnē Edode wodi nānō apænte angaincōnē Pabodo ingante ænte gote wæxæ wānōedāni, ante gobedōnadodo angā ænte godānitapa.

24

Pedique weca ongōnīnque Pabodo nāmā wæxæ apænecā

¹ Ōnompō æmæmpoque iñōnæ go ate, Wængonguī qui, ante nē godongā ñæñængā pōni inongā Ānāniya iñōmō Edotadēē quēwēnīnque wæxæ Tetadea gocantapa. Ayæ wacā tōmēngā emōwo Tedetodo tōmēnāni nāni wæxæ angainō ante ædæmō adingā inte wadāni beyæ ante nē wæxæ apænecā inongā inte nē abogado nāni ānongā inongāimpā. Tōmēngā tōnō oodeoidi nē aadāni nāni Picæncabo pancadāniya adobai Ānāniya tōnō godongāmæ godānitapa. Godinque pancabaa awēnē gobedōnadodo weca ponte apænedīnque, Pabodo nē wēnæ wēnæ cædongā ingampa tōō, ānānitapa. ² Pabodo ingante āñete māmōnāni pongā ate nē abogado Tedetodo iñōmō gobedōnadodo Pedique weca ongōnīnque apænecantapa.

–Awēnē gobedōnadodo eñēmi. Bitō nempo quēwēnīnque mōnitō wantæpiyæ wæxætēdō wæxætē cædāmāi inte godongāmæ piyænē cæte waa quēwēmōnīpa. Ayæ bitō nē aabi iñōmi inte, Ābānō cæcæimpā, ante do eñēnīnque mōnitō omæ iñōmō waa cæbi ate mōnitō godōmenque waa pōni quēwēmōnīpa. ³ Awēnē Pedique, bitō waēmō pōni iñōmi inte imæca tōmāo waa cæbi ænīnque mōnitō bitō imite cōwē waa ate pōnēnīnque waa apænemōnīpa. ⁴ Incæte, Botō wantæpiyæ apænebo bai bitō wæcædōmiimpā, ante pōnente wædinque botō, Ao āmi ate wantæ iñō apænebo pōnō eñēe, ante abogado Tedetodo angantapa.

⁵ Ayæ, “Mōnitō ayōmōni iñōmō ongongā iñōmō nē wēnæ wēnæ cædongā inte tōmāo godinque wapitīcæ apænecā eñēnīnque oodeoidi ænguī badīnque Yæ yæ ānāni wæmōnīpa. Edæ Nāatadēnōidi wapitīcæ nāni cæcabo iñōnānite iingā iñōmō adocā inongā inte nē angā ingampa tōō. ⁶ Ayæ Wængonguī oncō ñæñæncō incæ ōnonconque bai baquinque tōmēngā wēnæ wēnæ cæcā adīnque mōnitō tōmēngā ingante bæi ongotāmōnīpa. Ayæ mōnitō mæmæxīdi nāni wæxæ angainō ante Pabodo æbānō eñente

cæcāi, ante mōnitō apænte ancæte ante cætāmōnīpa. ⁷ Mānōmaī ante tæcæ cæyōmōni tōmengā mōnitō nempo ongōñongante cōmantante Ditia īñōmō māmō gā pe æmpote ō ængantapa. ⁸ Ayæ mōnitō adocā Pabodo ingantedō ante nē piinte āmōni īñōmōnite adocā cōmantante Ditia angā ēñēninque bitō weca ponte ongōmōni ae. Bitō Pabodo ingante āmi ēñēninque tōmengā, Æbānō cæboī, ante nāmā wææ apæñecæcāimpa. Tōmengā mānōmaī wææ apæñecā ēñēninque bitō, Mōnitō æbānō nāwangā āmōnīpa, ante do ēñēcæbbīimpa.”

⁹ Ante Tedetodo mānōmaīnō ante apæñeyongante oodeoidi godongāmæ apæñedinque, Tedetodo nāwangā angampa. Pabodo wēnæ wēnæ cæcā ingampa tōō, ante adoyōmō ante apæñedānitapa. ¹⁰ Gobedōnadodo Pedique guiquēnē Pabodo gāmæñō opo cæpyongante Pabodo wæætē īmaī apæñecantapa.

—Awēnē Pedique ēñēmi. Tæiyæ wadepo īñonte bitō īmæca nē apænte angāimi inte mōni oodeocabo æbānō cæmōni imōnī, ante do ēñēmīpa, ante adinque botō, Bitō weca ponte nāmā beyæ wææ apæñecæboimpa, ante tobopa. ¹¹ Bitō īñōmō ēñēcæte ante cæbi īninque īmaīnō ante do ēñenguīmi īmaīmīpa. Botō ōnompō tipæmpoga go mēōnaa mānīmpoñæque īñonte Wængonguī weca ædæ wææñinque tōmengā ingante waa apæñecæte ante Eedotadēē æitabopa. ¹² Māniñōmō æi pōninque botō tōmēnāni ayōnāni quīnō wēnæ wēnæ cæboī ae. Botō Wængonguī oncōnē ñæñæncō yabæcōnē go guībo incæ, oodeoidi odōmōincōnē go guībo incæ taadō gobo incæ wadāni tōnō guēadō guēa piinte āmo dicæ adāniyaa. Botō ædōmē godinque Yæ yæ āmo dicæ ēñēñāniyaa. ¹³ Īninque tōmēnāni nāni, Pabodo wēnæ wēnæ cæcampa, ante nāni piinte āwēnō ante edæ, Nāwangā impa, ante quīnō impa odōmonguīnāni. Edæ dæ ampa, ante Pabodo nāmā wææ apæñecantapa.

¹⁴ “Incæte mōnitō, Quēwenguīnō Taadō impa, ante mōni pōñēnōnō ante oodeoidi wæætē, Wapiticæ goquīnō impa, ante pīñānīpa. Īninque, Pabodo māniñōnō ante pōngangampa, ante īñāni nō ante apæñedānīpa. Nāwangā impa, ante bitō īmite āmopa. Botō māniñōnō ante pōñēninque mōnitō mæmæīdi Wængonguī ingante waa ate cædinque quēwēmopa. Ayæ Mōitee wodi nānō wææ angāiñō ante botō Ao āninque Wængonguī beyæ nē apæñedāni nāni yewæmongāiñō ante adobāi Ao āninque quēwēmopa. ¹⁵ Wængonguī angā ate mōnō waocabo edæ nō cæmō incæ wīwa cæmō incæ tōmāmō wænte ate ñāni ōmæmōninque mōnō quēwengæīmpa, ante īñāni pōñēnānīpa. Botō tōmēnāni

nāni pōñēnō baī adobāi ante pōñente tobopa. ¹⁶ Mānōmaī beyæ botō, Wængonguī ayongā incæ waodāni ayōnāni incæ botō nāmā apænte botō pōñēnō tæiyæ wæmō entawencæboimpa, ante cōwē nangui cæbopa.”

¹⁷ Āninque Pabodo godōmenque apæñecantapa. “Botō wayōmō gote tæiyæ wadepo quēwente ate tōmēmo ōmæ adodō pōninque, Ōmæpodāni wæwēnāni quī, ante ænte pōninque botō guīdēnāni oodeoidi īñānite wæætē pædæ godōmo æñānīpa. Ayæ, Wængonguī quī, ante baō pædæ godontabopa. ¹⁸ Mānōmaī cæyōmo ayōnāni botō īñōmō tæiyæ wæmō hacete ante Mōitee wodi nānō angāiñō baī do eyepæ cædīmo inte Wængonguī oncō ñæñæncō yabæcōnē pō guīdinque, botō, Wængonguī quī, ante godōmo adānīpa. Wīī nangui īñāni tōnō cædinque botō Yæ yæ ānāmā inte cæbo adānīpa. ¹⁹ Incæte botō īmotedō ante nāni piinte āniñō nāwangā ī baī wadāni guīquēnē oodeoidi incæ Atiabæ quēwente pōñāni īñōmō, tōmēnāni wæætē bitō weca do ponte anguēñēnāni īñānīpa. ²⁰ Botō oodeoidi nāni nē Apænte Āincabo weca ongōñōmote, Pabodo æbānō nō cædāmāi ingāā, ante apænte āñōñānite bitō weca ñōwo ongōñāni guīquēnē māniñō ante nē ēñēñāni īñānīpa. Īninque wadāni dæ ānāni adinque īñāni wæætē edæ tōmēnāni nāni ēñēñōnō ante nē anguēñēnāni īñānīpa. ²¹ Botō awēñēdi weca ongōñinque yedæ āninque, ‘Mōnō wænte ate ñāni ōmæmongæīmpa, ante botō apæñedō beyænque mūnitō ñōwoōnæ botō īmote apænte āninque pūīmīnīpa,’ ante apæñetabopa. Īninque īñōmō ongōñāni wabānō adobāi adode botō āniñō beyænque piinte āñānīpa,” ante Pabodo nāmā wææ ante Īninque apæñecantapa.

²² Pabodo māninganca apæñecā ēñēninque Pedique, Taadō ante nē quēwēnāni æbānō ante pōñēnāni, ante do ēñēningā inte, Idæwaa, āninque tōmēnāni īñānite,

—Cōmantante Ditia pongā ate wæætēdō wæætē mīni āniñō ante apænte ancæboimpa.

²³ Āninque tontadoidi capitāō ingante apæñedinque, Pabodo ingante tee mōnedāmāi inte wææ wāñōdāni. Ayæ tōmengā quīēmē ante ænguēngā ingā adinque tōmengā æmigoidi ponte pædæ pōñōñāni ængā Īninque mūnitō ee amīni æncæcāimpa, angantapa.

²⁴ Tæōnæ go ate Awēnē Pedique tōmengā nāñōgængā Dodotida tōnō nāna gæncaya pōnatapa. Tōmengā nāñōgængā oodea onquiyængā īngōngāimpa. Pedique īñōmō Pabodo ingante āñete māñōñāni pōninque Pabodo wæætē, Codito Itota ingante mōnō wede pōñente quēwengæīmpa, ante apæñecā ēñēē cōnatapa. ²⁵ Ayæ Pabodo

godōmenque apænedinque, Mōnō nō cæte quēwengæimpa, āninque, Mōnō nāmā wææ aate waa cæte quēwengæimpa, angantapa. Ayæ, Wængonguī Awēnē nānō apænte anguīōnæ oo baquīnō anguēnē, æte apæncā ēñēninque Pedique wæætē guīñente wædinque, Idæwaa, āninque,

—Nōwo gobāwe, angantapa. Waōnæ ate botō eyepæ imo inte āmo bitō imite āñete māmōnāni ponte apænebi ēñēmaīmopa, angantapa.

²⁶ Mānōmaī āninque tōmengā, Pabodo wabānō, Nīmpo cæbi gocæboimpa, ante cædinque godonte æinta pōnōmaingampa, ante pōnengantapa. Īninque tōmengā wantæ wantæ iñō Pabodo ingante angā pōñongā guēa tededatapa. ²⁷ Mānōmaī ancaa cæyongā wadepo mēnepoga ba ate Pedique gobedōnadodo awēnē ĩnque bayongante wacā Pontio Peto nāni ānongā pōñinque wæætē awēnē gobedōnadodo bacantapa. Īninque Pedique ĩnque awēnē bayedē, Botō ĩmaī cæbo ate oodeoidi botō imote waa acædānīmpa, ante pōñente cædinque Pabodo ingante tee mōneincōnē oncodo tadōnāmaī ee adinque wadæ gogacāimpa.

25

*Gobedōnadodo Peto weca Pabodo on-
gonte apæncampa*

¹ Peto iñōmō pancabaa awēnē gobedōnadodo tæcæ badingā inte mānīmæ pōninque Tetadea nāni quēwēñōmō mēōnaa go adōōnæque quēwēninque Eedotadēē go æicantapa. ² Eedotadēē iñōmō ponte ongōñongante, Wængonguī qui, ante nē godōnāni ñænēnāni tōnō oodeoidi awēnēidi tōmengā weca pōninque, Pabodo ĩmaī wēnæ wēnæ cæcantapa tōō, ante apænedāni ēñengantapa. ³ Tōmēnāni doyedē adoyōmō pōñēninque, Gobedōnadodo Peto ingante āmō ate tōmengā wæætē Pabodo ingante Eedotadēē iñōmō da pōnongā pōñongante mōnō taadō wææ wānonte ō æte wæñongæimpa. Ante nē pōñewēnāni inte tōmēnāni nōwo Peto weca pōninque ĩmaī ānānitapa. Gobedōnadodo Peto ēñēmi, Bitō Ao ante mōni āmaī pōnō cæquīmi. Bitō Pabodo ingante āmi Eedotadēē iñōmō ænte māmōnāni pongæ, ante ancaa ānāni. ⁴ Ēñēninque Peto wæætē tōmēnāni ĩnānite edæ, Pabodo iñæmpa Tetadea iñōmō tee mōnete ongongantawo. Botō tōmēmo edæ oo adoyōmō wæi gocæboimpa. ⁵ Āninque,

—Mānōmaī beyæ mīnitō mīni cabo iñōmīnite nē ānāni pancadāniya ĩnānite da godōmīni botō tōnō godongāmæ Tetadea wæi gocædānīmpa. Pabodo wēnæ wēnæ cæcā ingā ĩninque tōmēnāni māñiñōmō pōninque ancædānīmpa.

⁶ Āninque tōmēnāni tōnō wodo ōnompō tipæmpoga ĩñōnæ godōmenque quēwēninque Peto wadæ godinque Tetadea wæi gocantapa. Pōninque tōmengā ĩimō ate awēnēidi apæncæte ante nāni containpaa tæ contadingque angā ate Pabodo ingante æte māmōnāni pongā. ⁷ Ate oodeoidi Eedotadēē quēwente nōwo wææ pōñināni inte pō godongāmæ gongæninque, Pabodo mānōmaī wīwa cæcampa, wadō wīwa cæcampa, ĩmaīnō wīwa cæcampa, ante ancaa ānewēnānitapa. Incæte Petoidi ĩnānite, Nāwangā ante apæñemōnīpa, ante odōmōncæte ante tōmēnāni quīnō ĩmpa ante odōmōnāni aquīnāni. ⁸ Pabodo iñōmō nāmā wææ apænedinque,

—Oodeoidi nāni wææ angāinō ante Baa ānāmaī ĩnōmo inte botō ēñente cæte quēwēnīmo ĩmopa. Wængonguī oncō ñænēncō waa adinque botō mānincōnē yabæcōnē guite wēnæ wēnæ cædāmaī ĩntabopa. Odōmānoidi tæiyæ awēnē Tetædo nānō ānō ante ēñente cædinque wadō ante cōwē cædāmaī ĩntabopa.

⁹ Āñongante Peto, Oodeoidi tōmēnāni nāni āñinō baī cæbo ate botō imote waa acædānīmpa, ante babæ cædinque Pabodo ingante,

—Botō Eedotadēē go æibo ate adinque bitō botō weca pōñōmi ĩnāni pñite nāni āñinō ante apænte ancæboimpa. Bitō Ao ante, Gocæboimpa, āmitawo.

¹⁰ Āñongante Pabodo wæætē,

—Botō iñæmpa odōmāno tæiyæ awēnē Tetædo nānō Apænte ante Containpaa gāānē nōwo incæ ongōmo ae. Mīnitō iñōmō Tetædo beyæ ante nē apænte āmīni ĩnōmīni inte edæ botō imote nē apænte anguēñēmīni ĩmīnitapa tōō. Bitō tōmēmi iñōmō edæ, Pabodo oodeoidi ĩnānite wēnæ wēnæ cædāmaī ĩningā ingampa, ante edæ do ēñēmpa. ¹¹ ĩninque wēnæ wēnæ cædinque botō tente wænguēñēmo ĩmo baī botō edæ Baa ānāmaī inte edæ dobæ wæncædōmoimpa. Wæætē edæ, Wēnæ wēnæ cæbīpa, ante ĩnāni oodeoidi nāni ānewēnō guīquēñē ōnonquedō ante ĩninque waocā cæcāmenque incæ ædō cæte tōmēnāni nempō pædæ godonguēnengā ingāā. ĩninque botō, Odōmāno tæiyæ awēnē Tetædo ingante āmo botō imote pōnō apænte ancæcāimpa, angantapa.

¹² Pabodo mānōmaī angā ēñente wædinque Peto tōmengā tōnō godongāmæ nē apænte ānāni tōnō, Ēbānō cæquīmōō, ante adoyōmō pōñēnāni ate tōmengā Pabodo ingante,

—Ao āmōnīpa. Tæiyæ awēnē Tetædo incæ apænte ancæcāimpa, ante do ānīmi inte bitō Tetædo weca edæ gocæbiimpa, angacāimpa.

*Awēnē odeye Agodīpa ingante Peto
apæncampa*

¹³ Tæōnæ go ate wacā awēnē odeye Agodipa tōnō onquiwængā Bedēnite īñōmō gobedōnadodo awēnē Peto ingante, Bitō īīmæca waa pōmi amōnāpa, ante apæncæcæte ante Tetadea īñōmō pōninque Peto weca ēñacæ pōnatāpa. ¹⁴ Pōninque tæōnæ quēwēna ate awēnē Peto guiquēnē awēnē odeye Agodipa ingante, Pabodo ingante īīmaī cætāmōnīpa, ante apænedīnque,

–Gobedōnadodo awēnē Pedique wodi nānō nē tee mōnete ēmō cæte godīngā īñōmō onguīñængā adocanque ayæ a ongongampa. ¹⁵ Īnīnque botō Eedotadēē æite quēwēñōmote, Wængongūi quī, ante nē godōñāni ñænænāni tōnō oodeoidi īnānite nē aadāni nāni Picæncabo guiquēnē botō īmote ānīnque, Māningā īñōmō wīwa cæcā ingā adīnque bitō tōmængā ingante apænte ānīnque āmi wænñōnāni wæncæcāīmpa, ānānitāpa. ¹⁶ Ēñēninque tōmēnāni īnānite botō wæætē īīmaī antabopa. Waocā nāmā beyæ apænedāmaī īñongante mōnitō mōni odōmānocabo īñōmō nē pānāni īnānite pædæ godōñāmaī īmōnīpa. Wæætē wadāni, Īngā īīmaī cæte wēnæ wēnæ cæcampa, ante pīnte ānāni ēñente wædinque mōnitō māningā tōnō nē pīñāni īnānite āmōni godongāmæ pōnānīpa. Ponte awīncadō awīnca adīnque wæætēdō wæætē āñōnānite mōnitō īñōmō, Tōmēnāni nāni pīnte ānīnō ante tōmængā æbānō nāmā wææ apæncæcā, ante æadēmō ēñente ate nōīngā ante apænte āmōnīpa. Mānōmaīnō ante botō tōmēnāni īnānite apænetābopa, ante awēnē Peto apæncacatāpa.

¹⁷ Ayæ, “Mānōmaī ante apænebo ēñēninque nē pīnte ānāni botō tōnō wææ Tetadea īñōmō godongāmæ pōnānitāpa. Īnīnque botō a ongōnāmaī do mōni apænte āīmpaa īīmō ate go tæ contadīnque, Māningā ingante ænte pōedāni, āmo ænte pōnānitāpa. ¹⁸ Botō īñōmō, Pabodo wadāni īnānite wīwa cæcampa, ante pīnguīnāni īmaīnānīpa, ante pōnentābopa. Incæte nē pīnte ānāni ængæ gantite apænedīnque edæ botō ante pōnēnīnō baī wīi pīñānitāpa. ¹⁹ Wæætē edæ wadō ante pīñāni ēñente wætābopa. Wængongūi ingante æbānō cæte waa aquīi, ante tōmēnāni Pabodo tōnō wæætēdō wæætē pīñānitāpa. Ayæ tōmēnāni mæmæīdī nāni wææ angāīnō ante tōmēnāni, Pabodo ēñēnāmaī ingampa tōō, ante pīñānitāpa. Ayæ adocanque Itota wodi do wængaingā incæte Pabodo, Mīingā quēwængampa, ante tedecampa tōō, ante pīñānitāpa. ²⁰ Īnīnque botō, Quīēmē baī ānewēnānīi, Æbānō cæte nō ēñente apænte angūīmoo, ante wædinque botō Pabodo ingante īīmaī antabopa. Tōmēnāni nāni pīnte ānīnō ante bitō Ao ānīnque Eedotadēē gote ongōñōmite botō apænte ancæboīmpa,

antabopa.”

²¹ “Āñōmō tōmængā wæætē, Botō īmote ee wææ wānōñōmīni, Botō æbānō cætawoo, ante tæiyæ awēnē Empedadodo mōnō ānongā apænte ancæcāīmpa, āmopa. Īngā ēñēninque botō, Ēyedēmē eyepæ. Ate Pabodo ingante tæiyæ awēnē Tetædo weca da godōmo gocæcāīmpa, ante pōnēninque, Tōmængā ingante mānimpoga wææ wānōedāni, antabopa,” ante Peto apæncacatāpa.

²² Mānōmaī apæncæcā ēñēninque awēnē Agodipa wæætē,

–Īngā onguīñængā æbānō apæncæcā, ante tōmēmo ēñēnente wætābopa.

Āñongante Peto,

–Īīmō ate tōmængā apæncæcā ēñencæbiīmpa, angantāpa.

²³ Īīmō ate awēnē odeye Agodipa tōnō Bedēnite īñōmō wæēmō pōni weocoo wēñate mongæninque tōmēnāni nāni ēñēincōnē ñænæncōnē pōninque, Mōnatō awēñēmōna īñōmōnate waa aedāni, ante baī cædinque wæñee da da pō guīdatāpa. Ayæ tontadoidi tæiyæ awēñēdī tōnō māñīñōmō quēwēnāni awēñēdī ñænænāni tōnō tōmēna mīñæ dao dao pōnānitāpa. Ayæ Peto angā ēñēninque nē wææ wānōñāni wæætē Pabodo ingante ænte māñōnāni pō guīite ongōñongante, ²⁴ Peto īñōmō,

–Awēnē odeye Agodipa ēñēmi, angantāpa. Īñōmō ongōmīni tōmāmīni edæ ēñēedāni. Īngā ingante amīnīi. Tōmængā ingante ānīnque Eedotadēē quēwēnāni incæ īñōmō quēwēnāni incæ oodeoidi tōmānāni botō īmote yedæ ānīnque, Īngā nē wēnæ wēnæ cæcā inte godōmenque wīi quēwenguēnengā ingampa cæbīi, ānīnque, Bitō apænte ancæbiīmpa, ante wædānīpa. ²⁵ Īnīnque, Adocā Pabodo nānō wængūinque wēnæ wēnæ cæcantawoo, ante botō cōwā ayōmo edæ dæ antāpa. Ante wæyōmo tōmængā guiquēnē, Tæiyæ awēnē empedadodo incæ botō īmote apænte ancæcāīmpa, angā ēñente pōnēninque botō, Ao, tæiyæ awēnē Tetædo weca da godōmo gocæbiīmpa, antabopa. ²⁶ Incæte, Īngā nānō cædīnō ante tæiyæ awēnē aquīnō ante botō ædō cæte yewæmongūīmoo, ante wæbopa. Mānōmaī beyæ botō, Mīnitō tōmāmīni apænte amīni ēñencæboīmpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboīmpa, ante cædinque botō ñōwo Pabodo ingante ænte māñōmo ponte a ongongā aedāni. ²⁷ Īñæmpa botō, Mōnō nē tee mōnete ongongā wēnæ wēnæ nānō cædīnō ante yewæmōnāmaī inte mōnō ædō cæte da godongūi, ante awædō, ante Peto apænegacāīmpa.

26

Agodipa weca ongonte Pabodo nāmā wææ apænecampa

¹ Awēnē odeye Agodipa wæætē Pabodo ingante,

—Bitō nōwo nāmā beyænque wææ apænecæbiimpa, āmopa.

Angā ēñēninque Pabodo compo compo cædinque nāmā beyænque ante wææ apænecæ cæcantapa. ² “Awēnē odeye Agodipa, ēñēmi. Oodeoidi nāni piinte āninō tōmānō ante nāmā beyænque wææ apænedingque botō bitō awēnē imi weca ongonte apænebopa, ante adinque botō waa edæ tobopa. ³ Mōni oodeocabo dodāni nāni cægāi bai mōni cæinō ante bitō iñōmō edæ do ēñēmipa, ante tobopa. Ayæ adobai, Oodeoidi nōwodāni æbānō ante wæætēdō wæætē ante tededāni, ante do ēñēmi inōmi inte bitō botō wææ apænēdō ante edonque ēñenguimi imipa, ante pōnēninque botō godōmenque tobopa. Inique bitō Ao ante ee ongōninque ēñencæbiimpa, āmopa.”

Īmai quēwengaboimpa, ante Pabodo apænecampa

⁴ Ante apænedingque, “Botō nōwo ganca æbānō quēwēmoī, ante oodeoidi tōmānāni do ēñēnānīpa. Edæ do wēñæmoyedē botō ēñagāimæ quēwente pædinque botō edēnimoyedē nōwo ganca æbānō Eedotadēē iñōmō quēwengaboī, ante do ēñēnānīpa. ⁵ Mōni oodeocabo incæ pancadāniya Wængonguī ingante wædænque ēñente quēwēñōnāni mōni Paditeocaboque wæætē, Dodāni nāni wææ angāinō ante mōnō ēñente cæcæimpa, ante ēñente quēwēmōnīpa. Botō iñōmō Paditeobo inōmo inte mānīnō ante cōwē Ao ante godōmenque nanguī cæte quēwentabopa. Inique oodeoidi do agāināni inōnāni inte Ao ante bai, Nāwangā Pabodo ēñente quēwengampa, ante apænecædōnānīpa. ⁶ Mōnitō mæmæidi inānite apænedingque Wængonguī, Mīnitō beyæ cōwē pōnō waa cæcæboimpa, ante nānō angāinō bai cæcā beyænque mōnō watapæ bacæimpa, ante botō pōnēmopa.”

“Nōwo iñōmō mānīne botō pōnēnō beyænque iñāni, Pabodo ingante apænte ancæmīnīpa, ante ænte māmōnāni pōninque botō mīnitō weca a ongōmo aedāni. ⁷ Wængonguī, Mīnitō beyæ pōnō waa cæcæboimpa, ante nānō angāinō ante inque bacæimpa, ante mōni pōnēnō beyænque mōni oodeo pægāincabo ōnompō tipæmpoga go mencaboga mānīmpomōni imōni iñōmō woyowotæ itædē, Wængonguī ingampa, ante tōmengā beyæ cæte quēwēmōnīpa. Incæte awēnē odeyebi, ēñēmi. Wængonguī, Cōwē cæcæboimpa, ante nānō angāinō ante mōni pōnēnō beyænque oodeoidi incæ botō

imote, Wiwa cæbipa tōō, ante pīnānīpa. ⁸ Mīnitō imīnite āmo apænemīni ēñēmōedāni. Do wæñināni iñōnānite Wængonguī, Botō pōnō cæbo ate nāni ōmæmoncædānīpa, angacāimpa. Mīnitō iñæmpa, Wængonguī ædō cæte mānōmai cæqinggāā, ante pōnente wædinque quīnante Baa ānewēmīnīi,” ante Pabodo angacāimpa.

Pabodo, Coditoidi inānite togænte pantabopa, angampa

⁹ Äninque Pabodo godōmenque apænecantapa. “Botō wēēñēdē edæ oodeoidi nāni pōnēwēnō bai pōnengaboimpa. Māniñedē botō Itota wodi Nātatadeta quēwengāngā ēmōwo ante nāni pōnēnō ante piinte cædinque nanguī wido cæquēnēmo imopa, ante pōnēwentabopa. ¹⁰ Inique botō Eedotadēē iñōmō quēwēninque māñinonque ante cægaboimpa. Māniñedē edæ, Wængonguī quī, ante nē godōnāni nænænāni inānite antabopa. Åmo Ao ante tōmēnāni nē ānāni inte yewæmōnte pædæ pōnōnāni æninque botō Wængonguī Awēnē quīnāni nanguī ināni inānite bæi ongonte æninque nē tee mōnebo ingaboimpa. Ayæ tōmēnāni inānite wænoncæ cæyōnāni botō cōwē godō Ao angaboimpa. ¹¹ Botō wayōmō wayōmō godinque oodeoidi odōmōincōnē wantæ wantæ iñō go guidinque, Wængonguī Awēnē quīnāni tōmengā ingante godō wēnæ wēnæ ante piincædānīpa, ante cædinque pædāni, ante nanguī āmo pangadānīpa. Ayæ tōmēnāni inānite nanguī piininque godōmenque ænguī badinque botō tōmēnāni inānite pancæte ante wabæca nāni quēwēñōmō wabæca nāni quēwēñōmō incæ togænte gogaboimpa,” ante Pabodo wææ apænecantapa.

Wadō ante pōnente babopa, ante Pabodo adodō angampa

(Nāni Cægainō 9.1-19, 22.6-16)

¹² Ante apænedingque Pabodo godōmenque, “Mānōmai wabæca go wabæca go cædōmo inte Daāmaco iñōmō gocæte ante cætabopa. Cæyōmō, Pabodo iūmai cæcæcāimpa, ante Ao āmōnīpa, ante, Wængonguī quī, ante nē godōnāni nænænāni nē ānāni inōnāni inte botō beyæ cadota ante yewæmōninque pædæ pōnōnāni ænte gotabopa. ¹³ Awēnē odeyebi, ēñēmi. Mānōmai gote idōmæ goyōmo tæcæ bæcā pōni bayonte nænque nānō nāwā bai godōmenque nāwā oōnædē inō botonga mōni godongāmæ gocaboga pō tōmāo guīnæ gongæ. ¹⁴ Ate wædinque tōmāmōni guidōmēmæ go go wææñōmōni adocanque mōni ebēdeo tēdēdō tēdēte oōnædē apænecā botō adoboque ēñentabopa. ‘Taodo. Taodo āmo. Botō imote quīnante togænte pāmīi. Iñæmpa wagada pāintoca bai

bitō nāmā iñæ æwate cowate bai bitō caate wæquinque cæbipa, angacāimpa.”

¹⁵ “Angā ēñente wædinque botō, ‘Awēnē, æbidō inōmi imii.’ Ante ēñente wæyōmote, ‘Botō Itota inōmo inte bitō nē togænte pānīmo mānīmodō īmopa cæbii. ¹⁶ Nōwo edæ ængæ gantidinke adiyæ næ gongæmī āmopa. Botō beyæ nē pōnō cæbi āmo edæ bacæbiimpa. Ayæ, Botō īmote æbānō abii, ante bitō adīnō ante nē apænebi āmo bayōmite botō īncayæ ate godōmenque odōmōmo ate bitō aquīnō ante bitō nē apænebi āmo bacæbiimpa. Mānōmainō ante āmo bacæbiimpa, ante apænecæte ante botō bitō weca ponte a ongōmopa. ¹⁷ Ayæ bitō guidēnāni oodeoidi incæ wadāni wabæca quēwēnāni incæ bitō īmite wēnæ wēnæ cæca cæyōnāni ate botō bitō īmite gā pe æmpote wææ gompobo beyænque bitō wæætē quēwencæbiimpa. Tōmēnāni weca botō bitō īmite da godōmo gocæbiimpa. ¹⁸ Tōmēnāni botō īmote wede pōnēnāni ate botō wēnæ wēnæ nāni cædinō ante godō nīmpo cæbo ate tōmēnāni do botō tæiyæ waēmō badongāināni tōnō adocabodāni bai badōmo badinke quēwencædānīmpa, ante cæbopa. Mānōmainō cæcæte ante botō, Bitō Taodobi iñōmō tōmēnāni awīnca wi æmōnte bai cædinque apænebi ēñēninque tōmēnāni wæætē edonque adinke nāō inō gāmæñō poncædānīmpa, ante cæbopa. Tatāna nempo quēwēñōnānīte bitō wæætē gā pe æmpote bai cædinque odōmōnte apænebi ēñēninque tōmēnāni wæætē edæ ocæ ēmænte pōninque Wængongūi nempo quēwencædānīmpa, ante bitō īmite da godōmo gocæbiimpa.’ Ante Awēnē Itota botō īmote angā ēñente gotabopa,” ante Pabodo apænecantapa.

Pabodo, Ōñcædē apæncēā ēñente cætābopa, angampa

¹⁹ Mānōmaī apænedinke Pabodo godōmenque, “Awēnē odeyebi Agodipa, ēñēmi. Botō wīimōnte bai ayōmo ōñcædē inō nē angā nānō angāinō ante botō ædō cæte ēñēnāmaī cæquīmoo. Edæ do cætābopa. ²⁰ Tāno Daāmaco iñōmō quēwēnāni inānīte apænedinke botō ayæ Eedotadēē iñōmō godinke mānīñōmō quēwēnāni inānīte apænedinke Oodeabæ quēwēnāni inānīte go apæneboque go wayōmō oodeo ināmaī ināni inānīte māo apænedinke iīmaīnō ante apænebo ēñēnānitapa. Mīnitō wēnæ wēnæ mīni cædō ante, Ancaæ wæwente awædō, ante nīmpo cædinque Wængongūi gāmæñō edæ pōedāni. Ayæ pōninque mīnitō, Mānīnō wēnæ wēnæ botō cædinō edæ æmæwo nīmpo cæbopa, ante edonque acāīmpa, ante cædinque waa cæte quēwēdāni, ante āmo ēñēnānitapa.”

²¹ “Iñinque botō mānōmaī cæbo beyænque Wængongūi oncō nīænæncō

boyæ ongōñōmote oodeoidi botō īmote bæi ongōninque edæ wænoncæ cædānitapa. ²² Mānōmaī wēnæ wēnæ cædāni incæte Wængongūi nōwoōnæ ganca botō tōnō cōwē godongāmæ cæcampa. Iñinque botō, Wængongūi Awēnē æbānō cæcāā, ante guīñēnāmaī inte næ gongæninque awēñēdi inānīte ōñōnānīque inānīte apænedinke apæneboī aedāni. Mōitee wodi tōnō wadāni Wængongūi beyæ nē apænegāināni tōnō, Æbānō baquīi, ante apænegadānīmpa, ante apænebopa. Mānīne tōmēnāni nāni apænegāineque adodō ante apænedinke botō godōmenque apænedāmaī īmo inte edæ iīmaīnō ante apænebopa. ²³ Mōiteeidi iñōmō, Mōnō Codito cōwē caate wæqingā ingampa, ante apænegadānīmpa. Ayæ, Wænte ate tōmengā tānocā nē nāni ōmæmōningā inongā inte, Acædānīmpa, ante cædinque nāō tica ēnente bai tōmengā guidēnāni inānīte wadāni inānīte edæ odōmoncæcāīmpa, ante yewæmōngadānīmpa. Botō iñōmō, Mōiteeidi nāni angāinō do edæ iñinque batīmpa, ante apænedinke wadō ante apænedāmaī īmopa,” ante Pabodo apænegacāīmpa.

Agodipa, bitō Codito ingante pōnengēñēmi īmipa, angā

²⁴ Pabodo mānōmaī nāmā beyænque tæcæ wææ apæneyongante awēnē Peto do ogæ tededinque,

—Iñæmpa Pabodo ocāi ōmæcabi inte tedebi awædō. Nanguī wantæpiyæ dibodo adīmi inte idiquibæ pōnente bābiīmpa tōō.

²⁵ Ante wææ tedecā ēñēninque Pabodo, —Awēnē Peto bitō waa pōni awēnē gobedōnadodo īmi incæte botō wīi bitō ānō bai īmopa. Botō wīi idiquibæ pōnēmo inte tōingā pōnēninque nāwangā ante apænebopa. ²⁶ Awēnē odeye Agodipa guīquēnē tōmengā mānīnō botō apænedō ante tōmāā ēñengā iñongante tōmengā ingante edonque apænebo ēñengampa. Edæ mānīnō botō ānīnō wīi awēmō cætīmpa, ante pōnēninque botō, Awēnē odeye incæ do adingā inte ædō cæte ēñēnāmaī inguingāā, ante awædō. ²⁷ Awēnē odeyebi Agodipa, nōwo bitō īmite apænebo ēñē. Wængongūi beyæ nāni apænegāinō ante bitō pōnēmitawo. Do pōnēmi īmitapa, ante ēñēmopa.

²⁸ Āñongante Agodipa wæætē,

—Iñæmpa bitō botō īmote wantæ iñō tededinque. Agodipa bitō Codito ingante do pōnencæbiīmpa, ante cæcæte ante cæbitawo.

²⁹ Āñongā Pabodo wæætē,

—Wantæ iñō apænebo incæ wantæpiyæ apænebo incæ bitō botō bai pōnēmi waa tobaīmopa. Edæ bitō tōnō godongāmæ ēñēē cōnāni tōnō mīnitō tōmāmīni botō bai entawencæmīnīmpa, ante botō Wængongūi ingante apænebopa. Incæte, Botō bai

baedāni, āninqe botō, Yaēmengoncoo em-
pocæminimpa, ante apænedāmaī intabopa.

³⁰ Ante Pabodo mānōmaī apænecaē
ēñēninqe awēnē odeye Agodipa ængæ
gantiantapa. Ayæ pancabaa awēnē
Peto, Bedānite, godongāmæ ongōnāni
adobaī tōmengā tōnō ængæ gantidinqe,
³¹ mānincōnē tao godinqe īmaī ante
tededānitapa.

—Īngā Pabodo wēnæ wēnæ cædāmaī
īfongante quīnante wææ wānonguīī.
Quīnante apænte wænonguīī. Edæ wēnæ
wēnæ nānō cædinō dæ ampa.

³² Ante tedeyōnāni Peto ingante Agodipa
apænecantapa.

—Tetædo incæ botō īmote apænte
ancæcāimpa, ante Pabodo wīī angā bai
botō edæ tōmengā ingante do űimpo
cæcædōmoimpa, angacāimpa.

27

*Pabodo ingante Odōmā īñōmō da
godōnāni gocampa*

¹ Mānōmainō ante wædinque mānīmæ
awēnēidi, Pabodoidi īnānite űōwo Ita-
diabæ āmō wogaa gocædānimpa, ante
godongāmæ Ao ānānitapa. Mānīñōmō ton-
tadoidi īñōmō tæiyæ awēnē empedadodo
beyænque nāni wææ wānoncabo īñōnāni inte
Empedadodoidi nāni ānoncabo īñōnānimpa.
Tōmēnāni capitāō Codio nempo Pabodo tōnō
wadāni nē tee mōnete ongōnīnāni īnānite
pædæ godōnāni ō æninqe ænte gocantapa.
Ayæ botō Odocabo nē yewæmōmō tōnō
wadāni adobaī Pabodo tōnō godongāmæ
gotamōnīpa. ² Gāwapæntibæ wedeca gote
ayōmōni wipo űænæmpo Adadāmitio wāi
wocænte nāni ænte pōnimpo inte űōwo
Atiabæ godinqe wayōmō go ti wææ
wayōmō go ti wææ nāni goquimpo adinqe
mōnitō mānimpodē go guīite gāwapæntibæ
wogaa gotamōnīpa. Ayæ wacā Aditadoco
Māatedōniabæ Tetadōnica īñōmō quēwēningā
inte mōnitō tōnō pō āmpodenque gocantapa.

³ Īmō ate Tidōō nāni quēwēñōmō pō wāi
wocæñfōmōni Pabodo ingante capitāō Codio
waa cædinque pōnō apænecantapa. Bitō
æmigoidi weca quīēmē bitō ænguēnēnō
ante gote ænte pōe, āninqe ee acā tōmæwæ
gote ēñadinqe ænte pongantapa. ⁴ Ayæ
mānīī Tidōō īñōmō ēñate wogaa goyōmōnite
mōni nē gocæ cædō woboyæ betamonca
pæmæ ate wædinque mōnitō wāā tēiwæñē
Tipidebæ nāni āniwæñē wææ cæteīnō
wogaa gotamōnīpa. ⁵ Wāā tēiwæñē go wodo
tebæ gomōnique go tæcæpæ pōnī wogaa
godinqe Tiditiabæ wodo tebæ pōmōnique
go Pampidiabæ wodo tebæ pōmōnique go
Ditiabæ godinqe Mīida nāni quēwēñōmō
pō wāi wocæntamōnīpa.

⁶ Mānīñōmō wacā wipo űænæmpo
Adecantodia nāni ænte pōnimpo adinqe
capitāō Codio, Itadiabæ goquimpo impa,
āninqe mōnitō īmōnite angā godongāmæ
guīite wogaa gotamōnīpa. ⁷ Tæōnæ īñonte
wæñee godinqe mōnitō, Æiqueđō go-
quimōni, ante ancaa cæmōnique go Gōnido
nāni quēwēñōmō go wodo tebæ gotamōnīpa.
Ayæ woboyæ cōwē mōnitō gocæ cædō īnō
nanguī pōnī pō ate wæmōnique go wāā
tēiwæñē Tadamōne wodo tebæ godinqe
wawæñē Cædeta nāni ānōwæñē yaatænque
gotamōnīpa. ⁸ Māniwæñē wææ cæteīnō
yæwedecaque ancaa cædinque wæñee god-
inqe mōnitō Datea wēmōnca wodōīñōmō
nāni Waa Wodōīñōmō nāni āniñōmō
pontamōnīpa. Mānīñōmō pōmōni ate
wipodē nē cædāni īñōmō, Wipo űænæmpo
wāi wocæñfōmpo nāmā godāmaī ingæimpa,
ante cædinque teēmenca gæguincamē inte
nāni űā cæcadōinca guitodōnāni nāñe
ñongæ ate wipo godāmaī wāi wocæntapa.

⁹ Mānīñōmō wāi wocænte owodinqe
mōnitō, Quingæ pongamō incæ wæñee
pōmōmpa, ante wædinque mōnitō, Woboyæ
nanguī pæmæ tedæ baquinque mōnitō
Wængonguī beyæ ante mōnō cænāmaī ēōnæ
do īnque batimpa, ante pōnentamōnīpa.
Īninqe mōnitō, Nōwo mōnō wænguinque
wipodē godōmenque gomōmpa, ante
wæyōmōni wipo űænæmpo nē ænte
godāni īnānite Pabodo nō pōnēninqe wææ
angantapa.

¹⁰ —Īñānāni, botō ayōmo mōnō ēwente
wæquinque godōmenque gomōmpa. Māincoo
mīni ænte gocco wido cæquinque wipo nā
tobæ go ate mōnō becadote wænguinque
impa cæmīni.

¹¹ Añongā wipo űænæmpo nē ēacā tōnō
wipo capitāō wadō ante apæneda ēñēninqe
tontado capitāō Codio īñōmō Pabodo nānō
ānīnō ante ēñēnāmaī cæcantapa. ¹² Wæætē
edæ, īñōmō ponte mōnō wodōīñōmō
woboyæ pæmæ tedæ īñonte wīī owoīnente
wæmōmpa. Ante wædinque wodo tōmānāni,
Pēnite nāni wēmōnca wodōīñōmō nænque
tamōnō īmætæ īnō ongōninqe woboyæ
ante wææ cæte impa cæmōō. Nōwo wadæ
godinqe Pēnique nāni wēmōnca wodōīñōmō
go ti wæænte quēwēninqe woboyæ pæmæ
tedæ īnque pæmænte go ate mōnō gomōnca
gocæimpa, ante adoyōmō ānānitapa.

Wini cai pompa

¹³ Mānōmainō, Gocæimpa, āñōnāni űænæñ
wipo goquinque woboyæ dipæmæ īnō be-
tamonca wædænque pæmæ ate wædinque,
Mōnō ānīnō bai űōwo mōnō waa goquinque
impa, ante todānitapa. Ayæ wipo űænæmpo
wāi wocæñfō teēmenca nāni guitodōnīnca
ñōwo gæguincamenca quingæ īñæ æsēnō
ñænæ wipodē cō cædāni ate mōnitō wogaa

go Cædeta nāni ānōwænē yæwedecaque gotamōnipa.

¹⁴ Mānīnō tæcæ gocæ cæyōmōni do woboyæ wīni cai Yodocodōno nāni ānō wāā tēiwæñē ayaēnēmāa inō māmō pæmæ pōnīnque, ¹⁵ wipo ñænæmpo māmō ō ænīmpa. Mōnitō, Mōnō wodōiñōmō adodō gocæīmpa, ante cædinque woboyæ pōnō gāmæñō ædō cæte wiya wēnente goquū. Ante wædinque mōnitō ee amōni woboyæ betamonca inō quingæ māmō dadi wēnente da godō māo gotamōnipa. ¹⁶ Wāā tēiwæñē guiyawænē Caoda nāni ānōwænē dipæmæ inō yæwedeca woboyæ wææ cæteīnō godinque mōnitō guiyampo mōni wēā wēā ænte pōnīmpo ante, Tobæñāmaī impacæīmpa, ante pæ pagænte ancaa cædinque wēā pōnōnte pæ mantamōnipa. ¹⁷ Ayæ nē cædāni guiyæmpo gæguincamenca wēā æænōnte ñænæmpodē da wēñānitapa. Guiyæmpo da wēnente ate tōmēnāni, Ñænæmpo awæmpacoo wīi bede wæñecæīmpa, ante cædinque ñænæ wipo incæ gæguincamenca wīni wīni cæte goto wīñānitapa. Ayæ, Ōnætāmō Tidite nāni ānōntāmō impa, ante adinque tōmēnāni, Æ quingæ gomō bai mōnō wænguinque Tidite ēmōnaiboga go nāñe ñongæncædōnīmpa. Ante pōnente guīñente wædinque wæñee gocæte ante cædinque weocoo ñænæmpodē pæmænte māo nāni gocoo incæ wēā wæñōnte ñō cædinque ee adāni woboyænque wæñee māo gotamōnipa.

¹⁸ Wīni cai iñōmō godōmenque woboyæ pæmæñinque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætāmōnipa. Ininque iimō ate tōmēnāni, Wipo ōmædē bate wodæī bacæīmpa, ante cædinque mǎincoo ñænæmpodē ongōnīncoo incæ æpænē edæ wido wido cædāni gotapa. ¹⁹ Waōnæ bayōnte tōmēnāni, Ñænæ wipo quīncoo, ante nāni cæincoo incæ nāmā ōmōpoca pancacooga æpænē wido cædāni gotapa. ²⁰ Ayæ tæōnæ iñōnte nænque edæ tamōñāmaī nēmō tamōñāmaī i ate mōnō, Ædōmē gomōmpa, ante ēñēñāmaī inte edæ wætāmōnipa. Ayæ woboyæ godōmenque māmō pæmæñō æpæ nangui mængonta mængonta cæ wædinque mōnitō, Nōwo quēwenguīnāmaī iōmpa, ante edæ pōñēninque wætāmōnipa.

²¹ Mānīnāni wantæpiyæ cænāmaī ināni adinque Pabodo tæcæguedē ængæ gantidinque tōmāmōni ayōmōni tōmēnāni inānite iimāi apæñecantapa.

—Iñānāni, botō āmo ēñēninque Cædeta nāni ānōwænē ēmō cæte pōñāmaī inte ee owoquēñēminī iimīnitapa. Edæ māñōmaī ee ongōmīni bai wipo tobæñāmaī iñōnte mīnitō mǎincoo ēwēñāmaī inte wædāmāi

incædōmīnīmpa. ²² Nōwo guiquēñē guīñēñāmaī piyænē cæte quēwēdāni. Nænæ wipo mōnō goīmpo incæ tobænte bacæīmpa. Nāwāngā impa. Incæte waomō iñōmō wænāmaī tōmāmō mīimō quēwenguīmō iōmpa. ²³ Botō iñōmō edæ Wængongui quīmo inōmo inte botō, Wængongui ingāmpa, ante tōmēngā beyæ cæbopa. Nōwoōnæ woyowotæ tōmēngā anquedo botō weca pōnīnque, ²⁴ botō imote apæñecā ēñentabopa. “Pabodo, guīñēñāmaī ie. Tæiyæ awēñē Tetædo weca bitō cōwē gote gongæncæbiīmpa. Ayæ bitō beyæ waadete pōnō cædinque Wængongui bitō tōnō adopodē godongāmæ godāni inānite do angā quēwencædānīmpa.” ²⁵ Ante māñōmaī pōnō apæñecā ēñēnīmo inte botō wæætē mīnitō imīnite, Guīñēñāmaī imīni inte pōñēncæmīnīmpa, āmopa. Tōmēngā nāñō apæñedō baquīnō anguēñē, ante botō Wængongui ingānte nē wede pōñēmo inte āmopa. ²⁶ Incæte wipo ñænæmpo wāā tēiwæñē wawænē godinque tobænte ba wæcæīmpa, ante Pabodo angantapa.

²⁷ Ininque mēa Wængongui itædē iñōnte woboyæ ayæ pæmæ māo godinque mōnitō Adodiaticopæ nāni āñōmāa wadō wadō wogaa gotāmōnipa. Mānīmpoōnæ iinque go ate woyowotæ ayaōñæñēñā iñōnte wipo ñænæmpodē nē cædāni iñōmō, Onguipoiya obo pōmōmpa, ante pōñēñānitapa. ²⁸ Tōmēnāni, Ægancadō iī, ante acæte ante cædinque pædæ guidōnte adinque todēinta i tei mēetodo impa, ante adinque ayæ godōmenque godinque pædæ guidōnte adinque tōmēnāni, Nōwo edæ pōñōmenque bæintitīæte mēetodo impa, ante wædānitapa. ²⁹ Dicaboga pōni edæ gomō tamēñedāni, ante guīñente wædinque, Ñænæ wipo wāi wocængæīmpa, ante teēnca nāni guitodōnīnca menca go mencaa yæmīñæmpo inō edæ guitodōñānitapa. Ayæ, Nāō ba waa tobaiīmpa, ante Wængongui ingānte apæñedinque edæ wāi wocænte a owotāmōnipa. ³⁰ Wipo ñænæmpo nē cædāni guiquēñē, Mōnō wodīi wīnongæīmpa, ante awēmō cædinque waca nāni guitodōnīnca yæcadopo inō guitodōncæte ante cæte bai babæ cædinque, Mōnō awēmō goquīmpo, ante guiyā wipo incæ pædæ wæænoncæ cædānitapa. ³¹ Guiyæmpo tæcæ pædæ wææñōñōñāni Pabodo iñōmō tontado capitāō tōnō tontadoidi inānite angantapa.

—Iñāni wipo ñænæmpo nē cædāni inte ñænæ wipodē ongōñāmaī ināni bai mīnitō ædō cæte nāmā cæte quēwenguīmīni.

³² Angā ēñente wædinque tontadoidi guiquēñē ñænæ wipo nē cædāni nāni awēmō gocæ cædimpo gæguīncamē aa wiyæñāni iinque guiyæmpo tæi guīte æmæwo gotīmpa.

³³ Tæcæ oque pōnente iñonte Pabodo iñōmō, Tōmāmīni cænguī cædedāni, ante nanguī āninque,

–Nōwo mēa Wængonguī itædē iñonte mīnitō ancaī guīfente wædīnque ee ate cæñāmaī quēwēmīni abopa. ³⁴ Nōwo iñōmō mīnitō iñnīte, Cædedāni, āmopa. Cænte quēwenguēnē cæmīnī, āmopa. Mīnitō æcāmenque incæ tōmāmīni wænāmaī incæmīnīmpa.

³⁵ Āninque tōmānāni waa ayōnāni Pabodo pāo æninque Wængonguī ingante, Waa pōnōmi cæmōnīpa. Ante apænedīnque ao mænte cængā. ³⁶ Adīnque tōmēnāni, Mōnō quēwengæīmpa, ante gancæ pōnente wædīnque tōmānāni cæñānitapa. ³⁷ Wīpodē mōni adopodē gocabo iñōmō dotiento tetenta i tei mānīpomōni intamōnīpa. ³⁸ Mānōmaī cædīnque tōmēnāni eyepæ cæñāni ate edæ, Wīpo teēmē ēmīfēante ōnætāmō iñōmō gobāīmpa, ante guīfente wædīnque, Wodæī bacæīmpa, ante cædīnque mōnitō cænguī tōmēmo incæ æpænē gāwapænē wīdo cægadānīmpa.

Wīpo ñæncempo incæ goycæ guīpa

³⁹ Mānū ñāo bayō ōmæ adīnque ñæñæ wīpo nē cædāni iñōmō, Īmæ quīmæmē impa, ante ēñēnāmaī iñāni iñānitapa. Wæætē cōwā ayōnāni, Æpæ wedeca togaa paodāmæ iñōmō ēmōnai impa, ante adīnque, Eyepæ īmō īnīnque mōnō ēmōnaiboga wīpo nāñe ñongæīmpa. ⁴⁰ Ante cædīnque teēmenca nāni gūitodōnīnacoo ēmō cæte gocæte ante gæguīncamē aa wiyæninque ñīmpo cædāni tadōmengadæ ee ongontapa. Ayæ wiyāīmpa mēmpaa tōmēnāni wāi wocæñedē yæmīfēmpoya iñō nāni goti wīnīmpa incæ ñōwo wæætē edæ, Wīpo tōō gocæīmpa, ante ñī cædīnque æpænē wæætē pædæ gūidōñānitapa. Ayæ, Woboyæ pæmænte māo gocæīmpa, ante ñæñæ wīpo weocoo adocooque yæcadopo pædæ æfēnōnte wo cædāni ate ēmōnaiboga togaa paodāmæ iñōmō tōīngā māo gotamōnīpa. ⁴¹ Incæte tæcæ goyōmōni ōnætāmō iñōmō nāñe ñongæntapa. Wīpo yæcado nāñe ñongæ adīnque mōnitō, Mōnō ædō cæte goquī, ante wæyōmōni æpæ nanguī mængonta mængonta cæ beyænque yæmīfēmpo nā tobæninque pangūīmæ pangūīmæ æmæwo gopotapa.

⁴² Tæcæ tobæñō tontadoidi guīquēnē, Nē tee mōnete ongōnāni wīl tæi tæi wāte wōdīi wīnongūnāni, ante wææ cædīnque tōmēnāni iñānīte wæñoncæ cædānitapa. ⁴³ Adīnque tontado capitāo iñōmō, Pabodo cōwē quēwencæcāīmpa, ante cædīnque tōmēnāni nāni cæcæ cædīnō ante wææ angā ēfente ñīmpo cædānitapa. Ayæ mōnitō iñōnīte, Nē īpo cæmīni iñōmō tāno æpænē tæi guīdīnque ōnompoca compo compo

go tōmæwæ ōmaa goedāni, angā ēfente gotamōnīpa. ⁴⁴ Wadāni īpo cædāmaī iñāni iñānīte tōmēngā, Mīnitō guīquēnē awæmpaa incæ wīpopa tobæñīmpaa incæ nāñe ñongæninque wiyacæ wiyacæ goedāni, angā ēfente godānitapa. Mānōmaī ēfente cædīnque mōnitō edæ tōmāmōni æpæmpo becadote wænāmaī inte ōmaa edæ tōmæwæ pongamōnīmpa.

28

Wāā tēiwænē Mānatabæ Pabodo ponte quēwengampa

¹ Æpæmpo becadote wænāmaī inte tōmāmōni ōmaa taote ēñēñōmōnīte, Wāā tēiwænē īiwænē Mānatabæ impa, ante apænedāni ēñentamōnīpa. ² Mānīōmæ quēwēnāni iñōmō wīl wadāni bāi cædīnque mōnitō iñōnīte waadete cædānitapa. Cōōnæ ayæ nanguī cæ ate yogūite wæyōmōnīte tōmēnāni gonga tånōnīnque, Pō ootoedāni, ānāni gonga tōmāmōni bæcōyōmō ooto-tamōnīpa. ³ Pabodo iñōmō ōnompoca gæte tēnewæ bacoo ænte māmō ñō cæyongā gonga ocoī ā wædīnque tæntæ gongapamō manta Pabodo ōnompō æo pocænte ñīnga cædāmaī ee engate owo wæcā. ⁴ Adīnque iñōmō quēwēnāni wæætē nāni cabo nāmæneque tededīnque, “Īngā iñōmō waocā ingante nē wæningā ingā awædō. Tōmēngā æpæmpo becadote wænāmaī iñongante edæ mōnō nō cæte pānongā incæ tōmēngā ingante ata cæpodāmaī inte angā ate ñōwo quēwenguīnāmaī incæcāīmpa.”

⁵ Ante wapitīcæ ante pōnente tedeyōnānīte Pabodo iñōmō pongadāmaī ingā inte pīpo cæcā tæntæ ñīngacæ gongapamō togodo guīite gonga gonte wængantapa. ⁶ Adīnque tōmēnāni, Tīncadō pæncæ pæncæ mēmpoquīngā, ante ayæ, Tīncadō iñontobæ tæi go wæænte wænguīngā, ante acæte ante wantæpīyæ cōwā ayōnāni, Ayæ dæ pongadāmaī ī inque ingampa, ante adīnque tōmēnāni wæætē edæ, Æ īngā wacā wængonguī īnongā inte ponte a ongongampa, ante wapitīcæ ante pōnēnānitapa.

⁷ Ayæ māniwænē awēnē Pobīdio iñōmō tōmēngā quīncodē mōni ōmaa pōñōmō eyequēi intapa. Tōmēngā, Oncōnē pō guīite quēwēedāni, angā pō guīite mōnitō mēōnaa go adōōnæque quēwēñōmōni tōmēngā waadete pōñō cæcā ate waa quēwentamōnīpa. ⁸ Pobīdio mānōmaī waa cæcā quēwēñōmōni, Tōmēngā mæmpo wēpæ tōñō gōmæ cæte daicawo gawænte mōīmoga a ōñongampa. Ante apænedāni wædīnque Pabodo tōmēngā weca guīdīnque Wængonguī ingante apænedīnque gampocā ate waa bacantapa. ⁹ Pabodo mānōmaī cæcā adīnque māniwænē tōmāo gode ānāni

ēñente wædinque nē wēnæ wēnæ ināni inānite Pabodo weca ænte māmō ænte māmō cæyōnāni tōmānāni Wængonguī cæcā waa badānitapa. ¹⁰ Māniñōmō quēwēnāni mōnitō imōnite wæætē pōnō waa apænedinque cōwē waa cædānitapa. Ayæ wogaa tæcæ gocæ cæmōni adinque quiēmē mōni ænguēñēnō ante adinque tōmēnāni, Mīnitō ænte goquī, ante eyepæ pōni ænte māmō da wēnāni ænte gotamōnipa.

Odōmā iñōmō Pabodo pongampa

¹¹ Ayæ mōnitō Mānatabæ iñōmō mengāa go adocanque māmonque quēwēninque gocæte ante cædinque, Åancadēnaquepo, Adecantodia iñōmō quēwēnāni nāni pemonte ānimpodē go guitamōnipa. Tōmēnāni wængonguīna Catodo tōnō Podoco awinca bai ante badōninque tōmēnāni ñænæ wipocado gō cædinque wipo ñænæmpo ēmōwo, Åancadēnaquepo impopa, ante pemōnōnānipa. Mānimpo Mānatabæ wēmonca wodōiñōmō do pōninque pæmæ tedæ wāi wocæ adinque mōnitō iñōmō mānimpodē go guidinque wogaa gotamōnipa. ¹² Godinque Tidacota iñōmō nāni wēmonca wodōiñōmō pō wāi wocæninque mōnitō mēōnaa go adoōnæque quēwentamōnipa. ¹³ Ayæ wadæ godinque Odegui nāni quēwēñōmō pontamōnipa. Ìimō ate dipæmæ gāmæñō woboyæ betamonca wædænque pæmæ wædinque mōnitō wadæ godinque waōnæ ate Poteodi quēwēnāni nāni wēmonca wodōiñōmō æmæwo pō ti wææninque tōmæwæ gotamōnipa.

¹⁴ Tōmæwæ godinque Poteodi nāni quēwēñōmō ponte ayōmōni nē pōnēnāni nāni cabo ongōnāni atamōnipa. Tōmēnāni, Adoqe Wængonguī itædē mōnitō tōnō ee owoedāni, ānāni Ao ante mōnitō tōmēnāni nāni ānimpoga māniñōmō quēwentamōnipa. Ayæ ate Odōmā taadonque gotamōnipa. ¹⁵ Odōmā iñōmō quēwente nē pōnēnāni iñōmō, Pabodoidi o pōnānipa, ante do ēñēnāni inte doōnæ tadinque mōnitō imōnite bee tencæte ante pōnānitapa. Pancadāniya iñōmō Apio nāni godonte æiñōmō ganca pōninque mōnitō imōnite māmō bee tēnāni ate godongāmæ gotamōnipa. Godinque, Cæincō, ante Menconga go Adoconque, nāni āñōmō māniñōmō pōñōmōni wadāni māmō bee tēnānitapa. Māniñāni inānite adinque Pabodo iñōmō, Nōwo iñōmō wampo pōnēmopa, āninque Wængonguī ingante waa ate pōnēninque apænecantapa. ¹⁶ Ayæ odōmānoidi nāni nanguī quēwēñōmō Odōmā nāni āñōmō pōñōmōni tontado capitāō iñōmō nē tee mōnedināni wadāni inānite tōmengā awēñē nempo pædæ godōninque Pabodo ingante tee mōnedāmāi ingantapa. Wæætē wacōnē nānēñē ænte māodāni

quēwēñōngante tontado adocanque tōmengā ingante wæwæ wānōnongāimpa.

Odōmā iñōmō Pabodo quēwengampa

¹⁷ Māniñōmō ponte ate Pabodo mēōnaa go adoōnæque ate oodeoidi nē ānāni inānite āñecā godongāmæ pōnāni ate tōmēnāni inānite,

—Botō tōniñamīni, ēñēedāni. Mōnō guidēnāni inānite wēnæ wēnæ cædāmāi inte botō dodāni nāni angainō ante wido cædāmāi iñōmote oodeoidi incæ Eedotadē iñōmō botō imote bæi ongōninque æninque odōmānoidi nempo pædæ godōnāni gotabopa. ¹⁸ Odōmānoidi guiquēñē botō imote apænte āninque, Åebānō cæcantawo, ante ancaā ante adinque, Pabodo dicæ tōmengā nānō wænguinque wēnæ wēnæ cæcāa, ante adinque botō imote ñimpo cæcæte ante cædānitapa. ¹⁹ Odōmānoidi botō imote ñimpo cæcæte ante cæyōnāni oodeoidi wæætē ancaā Baa ānāni ēñente wædinque botō iñōmō edæ, Odōmānoidi tæiyæ awēñē Tetædo incæ botō imote apænte anguēnengā ingampa, antabopa. Mānōmāi ānilmo incæte botō awēñē Tetædo weca ongōninque, Botō guidēnāni wēnæ wēnæ cædānitapa, ante wæætē piinte ānāmāi incæboimpa. ²⁰ Mānōmāi beyæ mīnitō imīnite apænecæte ante botō, Pōedāni, antabopa. Nōwo apænebo ēñēedāni. Mōnō idægocabo iñōmō, Mōnō nē ponguingā Codito pōnō cæcā beyænque watapæ bacæimpa, ante mōnō pōnēmompa. Māniñō mōnō pōnengainō beyænque botō daagōmē ñānoncapoīmo a ongōmo aedāni.

²¹ Ante apæneyongante tōmēnāni wæætē Pabodo ingante apænedinque,

—Oodeabæ quēwēnāni bitō imite ante yewæmōninque cadota pædæ pōnōnāni dicæ æmōniyaa. Mōnitō tōniñadāni Oodeabæ quēwente pōninque bitō imitedō ante dicæ wīwa ānāniyaa. Bitō wīwa cædīnō ante yewæmōninque odōmōnāmāi inōnānipa. ²² Mānōmāi i incæte wayōmō wayōmō tōmāmæ quēwēnāni, Māniñāni Coditoidi iñōmō wēnæ wēnæ cædāni inānipa, ante piinte tededāni do ēñēmōni ñinque mōnitō, Bitō ayōmi Coditoidi æbānō cædāni ināni. Åebānō pōnēmīi, ante ēñençæte ante wæmōnipa.

²³ Åninque tōmēnāni, Ìiōnæ godongāmæ bee tēninque ēñengæimpa, āninque wadæ godānitapa. Ayæ wæætē māniñōnæ nāni āniñōnæ ñinque ba ate ocæ ēmænte pōñōnāni tæiyæñāni bee tēninque Pabodo weca godongāmæ pōnānitapa. Pōnāni adinque Pabodo iñōmō baānæ contadingā gāwacæcæ pōni apænedinque, Wængonguī Awēñē Odeye nempo mōnō quēwengæimpa, ante apænecantapa. Ayæ, Mōitee wodi tōnō Wængonguī beyæ nē apænegaināni, Mōnō

Codito ponte cæcæcäimpa, ante nāni angainō bai Itota iñōmō ñowo ponte tōmānō ante do iinque cægacäimpa. Nāwangä impa, ante botō apænebo eñēmaimīnīpa, ante Pabodo oodeoidi inānite apænecantapa. ²⁴ Angä eñēnīnque pancadāniya, Pabodo nāwangä angampa, ānānitapa. Pancadāniya guiquēnē, Wū pōnēnente awædō, ānānitapa. ²⁵ Nāni cabo incæ mānōmai wæætedō wææte apænete wadæ gocæ cæyōnānite Pabodo wææte æmæwo apænecantapa.

—Wængongui Tæiyæ Waēmō Öñowoca apæneca eñēnīnque Itaiya wodi doyedē mīnitō mæmæidi inānite nāwangä ante apænegacäimpa.

²⁶ “Itaiya eñēmi, bitō oodeoidi weca godinque iūmai ante apænebi eñencädānīpa.

Mīnitō öñōmoncaque eñēnīnque eñēnāmai incæmīnīpa.

Awīncaque adīnque cōwē adāmai incæmīnīpa, ante apænebi eñencädānīpa.

²⁷ Iñāni edæ mīmō ömædēnāni inte wū eñēnente wæwædō,

ānīnque ædō cæte eñenguīnāni.

Awīnca wū aīnente awædō, ānāni inte ædō cæte aquīnāni.

Edæ mīmō ēnēnāni inte bai tōmēnāni awīnca wi æmōnte adīnque

önōmonca wi æmoncate eñencädōnānīpa.

Edæ mīmō nō pōnēnīnque dadi ēmænte botō gāmænō pōnāni bai

botō do godō cæbo waa bacädōnānīpa.”

Ante Itaiya wodi mīnitō mæmæidi beyæ ämotamīni ante bai yewæmongacäimpa.

²⁸ Iñīnque mīnitō oodeoidi inōmīni inte eñēnāmai imīni adīnque Wængongui ñowo wææte, Botō pōnō æmo beyænque quēwencæmīnīpa, ante oodeo ināmai ināni inānite do apæneca cæcampa. Tōmēnāni guiquēnē ædæmō waa eñenguīnāni inānīpa, ante apænebo eñēmaimīnīpa, ante Pabodo apænecantapa.

²⁹ Mānōmai apæneca eñente wædinque oodeoidi nāni cabo nanguī pōni wæætedō wææte ānīnque wadæ godānitapa. ³⁰ Pabodo iñōmō oncō ænte quēwencæte ante tōmēnāni nāni godonte æinta pædæ godōnīnque wacā oncō incæ tōmengä oncō bai bayō mānīncōnē wadepo mēnepoga quēwengantapa. Ayæ, Æcānō eñacæ pōinēna cōwē botō weca waa ponguīmīni, ante quēwēnīnque tōmengä nē pōnāni inānite apæneca eñēnōnānīpa. ³¹ Ayæ nē wææ wānōnāni cōwē Baa ānāmai iñōnāni tōmengä guīñēnāmai apænedīnque, Wængongui Awēnē Odeye nempo mōnō quēwengæimpa, ante apænedīnque, Mōnō Awēnē Itota Codito æbānō cægacäi, ante edonque odōmōnte apæneca eñengadānīpa.

Odömānoidi inānite Pabodo nānō cadota ante yewæmongainta

Waa quēwencæminimpa, ante

¹ Itota Codito ingante nē cædōmo inte botō Pabodobo inōmo inte iī cadota ante nē yewæmōmo imopa. Wængongui botō imote apænte æninque iūmainō ante aa pegacāimpa. Bitō Pabodobi gote botō pōnō cædō ante watapæ apænebi ēñencædānimpā, ante angacāimpa.

² Māninō, Wængongui æbānō pōnō cæqingā, ante watapæ apænedinque tōmengā beyæ nē apænegaināni wēñēñedē pōni nāni tæiyæ waēmō yewæmongainō ante botō māninō ante nē apænebo imopa.

³ Māninō waa pōni nānō cæquinō ante iinque cæcæte ante cædinque Wængongui tōmengā Wengā ingante da pōnongā pongacāimpa. Tōmengā iñōmō waocā onguiflængā nānō baquinque Awēñē Dabii wodi Pæingā inte ēñagacāimpa.

⁴ Adocā Itota iñōmō botō Wengā inongā ingampa, ante tōmānāni edonque acædānimpā, ante odōmoncæte ante cædinque Wængongui tæi piñænongā inte iūmai cægacāimpa. Iingā Itota Codito mōnō Awēñē iñōmō Tæiyæ Waēmō ewocacā inte do wæningā iñongante Mæmpo Wængongui wæætē nangui angā ate nāni ōmæmongacāimpa.

⁵ Ayæ adocā tōnō godongāmæ cædinque tōmengā émōwo beyæ mōnitō imōnite Wængongui pōnō waadete cægacāimpa. Ayæ, Minitō wabæca wabæca gote apænemini ēñēninque tōmāmæ quēwēnāni Itota Codito émōwo ante wede pōñēninque nē ēñente cæte quēwēnāni bacædānimpā, ante cædinque Wængongui adobai Itota ōnompō inte mōnitō imōnite da godongā gotamōnimpā. ⁶ Iinque tōmāmæ quēwēnāni inānite Itota Codito, Botō gāmænō pōedāni, ante aa pedinque mīnitō imīnite adobai aa pecampa. ⁷ Minitō botō quimīni badinque botō ayōmō tæiyæ waēmō ewocate quēwēmīni bacæminimpā, ante Wængongui cægacāimpa. Iinque mīnitō Odōmā iñōmō quēwēninque Wængongui quimīni iñōmīnite botō, Acæminimpā, ante iūmai ante yewæmōmopa. Mōnō Mæmpo Wængongui tōnō Awēñē Itota Codito waadete pōnō cæyōnate mīnitō wæætē gānē pōnente bacæminimpā, āninque yewæmōmopa.

Odōmā iñōmō ēñacæ pōinēmpa, ante

⁸ Minitō æbānō wede pōñēmīni, ante tōmāmæ quēwēnāni tededāni ēñēnānimpā. Iinque botō iñōmō Itota Codito émōwo apænedinque Wængongui ingante waa ate apænebo. Wængongui bitō adobiqwe

pōnō cæbi ate odömānoidi wede pōñēnānimpā, ante apænebo. ⁹ Wængongui Wengā ingantedō ante watapæ apænedinque botō Wængongui ingante nē cædōmo inte tōmengā nānō ānō ante ædæmō ewocadinque apænebo ēñēnānimpā. Botō mānōmai cæbopa, ante nē adingā inte Wængongui iñōmō edæ, Odömānoidi beyæ ante Pabodo botō imote woyowotæ incæ itædē incæ apænecampa, ante nē ēñengā ingampa. ¹⁰ Edæ, Wængongui, bitō Ao āmi ate botō ñōwo odömānoidi weca ēñacæ gobai mopa, ante Wængongui ingante mīnitō beyæ ante botō cōwē apænebo. ¹¹ Wængongui Ōnōwoca beyæ apænebo ēñēninque mīnitō tæi piñænte ewocacæminimpā, ante cæcæte ante botō mīnitō weca ēñacæboimpā, ante wæbopa. ¹² Edæ mīnitō botō wede pōñēnō beyæ wampo pōnente bayōmīni botō wæætē, Minitō wede pōñēmīnimpā, ante adinque adobai wampo pōñēmō iinque mōnō pōnencabo godongāmæ wampo pōñēninque godōmenque tæi piñænte entawengæimpā, ante pōñēninque botō mīnitō imīnite aīnente wæbopa.

¹³ Botō wabæca quēwēnāni weca gote apænebo ēñēninque pancadāniya wede pōñēnāni badānitapa. Iinque, Botō mīnitō weca gote apæneyōmo wadāni pancadāniya adobai wede pōñencædānimpā, ante cædinque botō æpogamē incæ poncæ cæyōmo edæ wææcæte intapa. Iinque botō, Tæmpo poncæ cætabopa, ante yewæmōmo ate ēñencæminimpā, ante yewæmōmopa. ¹⁴ Edæ guidiegoidi incæ wadāni incæ, ocai encadāni incæ ocai ōmæcadāni incæ ædānimē iñōnānite botō debe inte bai edæ tōmānāni inānite odōmonte apænequēñēmō inōmo imopa. ¹⁵ Mānōmai beyæ mīnitō Odōmā iñōmō quēwēmīni iñōmīnite botō mīnitō imīnite adobai mōnō Codito ingantedō ante watapæ apænecæte ante nangui cæinente wæbopa.

Mōnō tæi piñænte ewocadō Codito beyænque impa, ante

¹⁶ Mōnitō oodeomōni iñōmōnite tāno apænedinque Wængongui iñōmō mīnitō oodeoidi ināmai iñōmīnite ayæ adobai apænedinque, Minitō wede pōñēmīni adinque Codito waa pōni pōnō ængā beyænque quēwencæminimpā, ante tæi piñænte cægacāimpa. Iinque māninō Codito ingantedō ante botō iñōmō watapæ apænedinque, Wængongui tæi piñænte nānō cægānō impā, ante pōnente wædinque edæ guifñenedāmai inte do apænebo. ¹⁷ Mōnō wede pōñēmō iñōmonte Wængongui mānīne ante odōmonte watapæ apænecā beyænque mōnō nō cæte quēwēmō bagamōimpā. Mānīne beyænque godōmenque wede pōnente badinque mōnō wede pōñēnō

beyænque quëwëmpoma. Ìnque docä ìñòmò Wængonguì beyæ yewæmòninque, “Në nõ cæte quëwënongå incæ tõmengä nänò wede põnenò beyænque quëwëncæcäimpa,” ante nänò yewæmongainò bai edæ do batimpa.

Mönò waocabo wentamò mongente wæmompoma, ante

¹⁸ Në wíwa cædäni guiquënë wíwa nâni cædò beyænque wadâni edæ Wængonguì nõ põni nänò apænegainò ante ædò cæte ëñgunguinâni. Ìnque Wængonguì ingante nè wíwa cædâni nâni ëñênâmai ìñinò ante godò pîininque tõmengä öönædë ongóninque wíwa nâni cædinò beyænque do pangä wædâni edonque amompa. ¹⁹ Wængonguì, Botò æbodò imoo, ante tõmâmini edonque põni ëñencæminimpa, ante cædinque tõmâmò imonte odömòninque tõmênâni ìnânite adobai edonque põni odömongä wægadânimpa. ²⁰ Wëenëfëdë põni nè quëwëngainâni tõnò ñowo ganca quëwëmò adobai, Wængonguì mõnò nè adâmai ìnongå inte æbânò quëwëngä, ante ëñencæte ante wægalimò ìnòmò inte mõnò tõmengä nänò badongaincooque adinque edæ edonque põni acæimpa. Edæ, Tõmengä ñimpo cædâmai inte cöwë nè tæi pîñænongå ingampa, ante ayæ, Nè Wængonguì ìnongå ingampa, ante wædinque mõnò waocabo edonque aquënëmò ìmompoma. Ìñæmpa ëñênâmai intabopa, ante ædò cæte anguui.

²¹ Wængonguì ingante do ate bai ingainâni incæte woadâni tõmengä ingante edæ, Bitò Wængonguì ñäo ëmönömi ìmipa, ante edæ ânâmai ìnonânimpa. Wængonguì ingante waa ate põnente apænedâmai ìnonânimpa. Mänömai ocai ömæcadâni bai mímò ömædênâni bai badinque tõmênâni wentamò entawênâni bagadânimpa. ²² Ocai encamöni ìmönipa, ante ânâni incæte tõmênâni wæætë mänömai cædinque ocai ömæcadâni bagadânimpa. ²³ Edæ Wængonguì wænâmai nè Quëwëngaingå ìñongante tõmênâni wæætë godò Baa angadânimpa. Tõmengä nänò ñäo ëmönò ante piinte cædinque tõmênâni wæætë waomò nè wæwocamò mõnò ëmönò bai badóninque, öömä ëñadâni nâni ëmönò bai badóninque, ocaguì ëñadâni nâni ëmönò bai badóninque, ocaguì ömaadâni nâni ëmönò bai badóninque tõmênâni, Mönitò wængonguì ingampa, ante cædönânimpa.

²⁴ Mänömai cædâni ate wædinque Wængonguì, Minitò mûni cæinente wædò ante ee abo cæcæminimpa, ante da godongä wadæ godinque tõmênâni baonga nâni ñömæi mongænte quëwënguinque cædönânimpa. Ìnque nâna gæncaya nâna gæncaya nâni monguënënò ante Baa ante guñëñadâmai inte cædinque wacä ingä wacä ingä godò wíwa cædönânimpa. ²⁵ Wængonguì

nâwangä põni nänò apænegainò ante tõmênâni Baa äninque mã põnëninque nâni babæ apænegainonque ante Ao änonânimpa. Mänömai cædönâni inte tõmênâni wæætë Wængonguì nänò nè badongaincoo weca ædæ wææninque, Mönitò wængonguì impa, ante cædinque nè Badongaingå ingante edæ ëmò cæte wadæ gogadânimpa. Incæte tõmengä nè Badongaingå ìñongante mõnò waocabo inguipoga mõnò quëwëñedë ayæ ate mîinguipo bayonte wantæpiyæ mõnò quëwëñedë Wængonguì ingante, Bitò tõmëmi toquinque põnò waa cæbi æmönipa, ante mõnò apænecæimpa. Mänömai impa, ante Amëë, ämopa.

²⁶ Mänömai cæyönânite Wængonguì, Minitò guñëñadâmai mûni toinente wædonque gobæwedâni, ante da godongä gogadânimpa. Ìnque onquiyænâni incæ, Nè onquiyæmo ìnomo inte botò onguñængä tõnò monguënëmo ìmopa, ante ânâmai ìnâni inte godò wacä onquiyængä tõnò towente mõwënönânimpa. ²⁷ Ayæ onguñænâni incæ adobai cædinque, Botò onguñæmo ìnomo inte onquiyængä tõnò monguënëmo ìmopa, ânâmai ìnâni inte godò wacä onguñængä tõnò mõinente gonga bæco bai toinente wædâni bagadânimpa. Ìnque cöwë nâni waa quëwëngüenënò ante Baa äninque nâni onguñæncabo ìnonâni inte wíwa cædönânimpa. Mänömai cæyönânite Wængonguì eyepæ põni godò pangä wædinque tõmênâni wíwa nâni cædò beyænque nâmä baonga caate wæwengadânimpa.

²⁸ Wængonguì ingante mõnò põnente ëñengæimpa, ante tõmênâni, Önonquedò ante impa, ante tedeyönânite Wængonguì wæætë, Ocaidë wentamò encadömîni inte edæ waomîni mûni wíi cæquënënò incæ ee abo cæbæwedâni, ante da godongä gogadânimpa.

²⁹ Tõmênâni ìñòmò nõ cæquñnâmai ìnâni inte do wíwa cædâninque badinque ìimâi cædâni. Wacä ingä godò towëninque tõmênâni wadâni ìnânite nè wënæ wënæ cædâninque ìnâni. Mâincoo ante æinente wæwênâni inte tõmênâni, Wacä gomonga ængä ingante godò piinte adâni. Ayæ edæ, Mönò godò wænongæimpa, ante cædinque do cædâni. Guëadó guëa piinte cædâni. Wacä oda cæcæcäimpa, ante ancaa cædinque tõmênâni godò babæ cædâni. Ayæ nè wíwa põnëwênâni inte tõmênâni, Wadâni wæcædânimpa, ante godò piinte cædâni. Godò wæntaa godò wæntaa tedewênâni ìnâni. ³⁰ Ayæ wadâni ìnânite pîininque ìñâni ìñòmò godò babæ ante tedewênâni ìnâni. Wængonguì ingante piinte cædâni ìnâni. Ayæ, Tõmëmoque waëmò ìmopa, ante nâmä ængò cæte bai cædinque wadâni

ināninte wææntodonte bai āninque, Ōnonquedō cæcantedō abii, ante godō piinte todāni inānīpa. Edæ, Æbānō godōmenque wēnæ wēnæ cæte toquūmo, ante edæ pōnēē cōninque edæ nangui cædānīpa. Mæpocā tōnō badā, Cæedāni, āñōnate tōmēnāni ēñēnāmai cædānīpa. ³¹ Mīmō ōmædēnāni inte tōmēnāni ocai ōmæcadāni bagadānīpa. Cæcæboīmpa, āninque edæ iinque cædāmai inōnānīpa. Wacā caate wæcā adinque godō waadedāmai inōnāni inte tōmēnāni edæ godōmenque piināni inte cædōnānīpa.

³² Mānōmai cædāni iñōmō nāni wænguinque cædānīpa, ante Wængongui nō pōni nānō angaiñō ante tōmēnāni ōnōmoncaque nē ēñēnāni inte tōmēnāni nāni wēnæ wēnæ cæinēnonque ante cædānīpa. Ayæ tōmēnāni wīwa nāni cædō bai wadāni adobai cædāni adinque tōmēnāni, Waa cæminīpa, āninque nē cædāni inānite waa adānīpa.

2

Nōingā ante Wængongui apænte angampa, ante

¹ Tōmēnāni mānōmai cædānīpa. Incæte bitō adobai wīwa cædōmi inte tōmēni pante wæquinque tōmēnāni inānite apænte ānīpa. Iinque bitō wacā ingante, Bitō pante wæquinque wīwa cæbīpa, ante apænte āmi inte bitō iñæmpa adobai wīwa cædōmi inte edæ æbānō cæte nāmā ante wææ anguūmii. ² Wīwa cædāni inānite apænte āninque Wængongui cōwē nōingā ante apænte angampa, ante edæ do ēñēmōmpa. ³ Iinque waobi ōnōmīque inōmi inte bitō iñæmpa tōmēnāni inānite apænte āmi incæte tōmēnāni nāni cædō bai adobai cædōmi inte edæ, Wængongui botō imote pānāmai inte ata cæpocæāimpa, ante pōnēmītao. ⁴ Bitō wīwa cæbi inte Ca ca wæquēnēmi iñōmite Wængongui wæætē ee pānāmai inte nangui waadete pōnō cæyongante bitō wæætē edæ piinīnque Baa āmitawo. Iñæmpa tōmēngā, Bitō, Æmæwo wēnæ wēnæ cætabopa, ante wædinque botō gāmæñō poncæbiīmpa, ante Wængongui pōnō waadete cæcampa, ante pōnēmīyaa.

⁵ Incæte bitō mīmō ōmædēmi inte ancaa Baa āninque edæ wēnæ wēnæ bitō cædō ante ñimpo cædāmai iñōmite Wængongui nānō ængui baquūōnæ iinque bayonte tōmēngā ængui pōni badinque godōmenque pangā wæcæbiīmpa. Tōmēngā æbānō nō apænte angāā, ante māniñedē ate edæ edonque acæīmpa. ⁶ Edæ, Tōmāmō mōnō cægāi ganca ante Wængongui eyepæ pōni pædæ pōnongā æncæmōīmpa, ante dodāni nāni yewæmongaiñō bai edæ iinque bacæīmpa.

⁷ Iinque, Mōnō ñāō bai entawengæīmpa, ante cædinque ayæ, Wængongui mōnō

imonte waa adinque pōnō cæcā ate mōnō wæwocadāmai ēwocacæīmpa, ante cædinque mōnō wæntædāmai inte ee waa cæte quēwēmō iinque Wængongui pōnō cæcā ate mōnō cōwē wænāmai quēwēmaīmōmpa. ⁸ Wæætē, Wængongui nāwangā nānō apænedō ante Baa āninque, Tōmēmo beyænque quēwencæboīmpa, ante nē ānāni inānite ayæ wadāni wīwa nāni cæquīnonque ante nē tee empote godāni inānite Wængongui ængui badinque godō piinte cæcæcāīmpa. ⁹ Edæ mōnō waocabo wēnæ wēnæ cæmō adinque Wængongui oodeomōni iñōmōnite tāno pāninque oodeomōni ināmai imīni imīnite adobai pāñongā nē wēnæ wēnæ cæmō tōmāmō iñōmō edæ caate wæwencæmōīmpa. ¹⁰ Wæætē waa cæmō adinque Wængongui oodeomōni imōnite tāno pōnō waadete cædinque oodeomōni ināmai imīni imīnite adobai pōnō waadete cæyongā nē waa cæmō wæætē gānē entawēninque ñāō apāite bai entawēñōmonte edæ Wængongui tōmāmō imonte waa acæcāīmpa.

¹¹ Edæ mōnitō oodeomōni imōni incæ mīnitō oodeomōni ināmai imīni incæ Wængongui tōmāmō imonte adoyōmō pōni adinque wadō wadō ate pōnente cædāmai ingampa. ¹² Mōitee wodi, Iīmai cæedāni, ante nānō wææ angaiñō ante ōmæmoncadāni inte wīwa cædāni iinque tōmēngā nānō wææ angaiñō dæ ante bai mānīnāni wæncædānīpa. Wæætē Mōitee wodi nānō wææ angaiñō ante do ēñente ēmoncadānīni incæte wīwa cædāni adinque Wængongui mānīne ante ēñēnāmai cædāni beyænque apænte āninque pangā wæcædānīpa. ¹³ Edæ Mōitee wodi nānō wææ angaiñō ante ōnōmoncaque ēñēnāni inte tōmēnāni nāni ōnōmoncaque ēñēnō beyænque Wængongui ayongā dicæ nō cædāni badānīyaa.

Wæætē edæ mānīne ante ēñente cædāni inānite guiquēnē Wængongui pōnō angā ate tōmēnāni iñōmō nō cædāni bacædānīpa. ¹⁴ Edæ Mōitee wodi nānō wææ angaiñō ante ōmæmoncadāni inte oodeoidi ināmai ināni incæ pancadānīya tōmēnāni dodāni nāni wææ angaiñonque ante Ao ante cædinque Wængongui nānō wææ angaiñō bai edæ do cædānīpa. Mānōmai ēñente bai cædinque tōmēnāni mīmō entawēnāni inte mānīne ante ōmæmoncadāni ināni incæte nāmā nāni wææ ānonque ēñente cædānīpa. ¹⁵ Edæ, Tōmēnāni dodāni nāni wææ angaiñō ēñēninque waa cædāni inte tōmēnāni Wængongui nānō wææ angaiñō bai do entawēnānīpa, ante edonque acæīmpa. Mīmō entawēnāni inte tōmēnāni nāni caboque godongāmæ pōnēninque wēnæ wēnæ nāni cædōnō ante nāemæ apænte wææ ānānīpa. Ayæ wæætē waa cædāni ate

tömēnāni nāēmæ apænte ñimpo cædānīpa.

¹⁶ Codito ingantedō ante watapæð ēñengaimo inte botō ñimāi ante apænebopa. Wængonguī angā ēñente cædinque Itota Codito wæætē waomō mōnō awēmō entawēnō ante edonque pōñi adinque apænte ancæcāimpa. Tōmengā nānō apænte anguīōnæ ñinque bayedē edæ māñinō ante botō yewæmonte apænedō bai edæ ñinque bacæimpa.

Mōitee nānō wææ angainta adinque oodeoidi wīi ēñēnāni

¹⁷ Bitō ññōmō edæ, Oodeobo ññōmo ñmopa, ante āmīpa. Ayæ, Mōitee wodi nānō wææ angainta nē ēñēmo inte botō Wængonguī ayongante waa quēwēmo ñmopa, ante edæ nāmā ængō cædinque āmīpa. ¹⁸ Wængonguī æbānō angāā, ante do ēñēmīpa. Ayæ tōmengā nānō wææ angainō ante do ēñēmi inte bitō, Quinō waa ī, ante do ēñēninque Ao ante æmīpa. ¹⁹ Bitō, Wadāni babetamō bai ēwocayōnānite botō tōō æmænte māobo godāni. Wēmō ññōmō quēwente bai adāmai ññōnānite botō ññōmō, Acæmīnimpa, ante tica ēñente bai odōmonte apænebopa, ante edæ, Nāwangā āmopa, ante bitō apænebitawo. ²⁰ Ayæ adobaī, Mōnō Mōitee wodi nānō wææ angainō ante ēñente beyænque mōnō ēñenguēnēnō ante entawēninque mōnō nō cæwēnēnō ante adobaī tōmānō ante entawengæimpa, ante bitō pōñemitawo. Ayæ māñōmānō ante bitō pōñēnō beyæ bitō, Nē oda cædāni ññānite botō nē tōingā odōmōmo ñmopa, ante pōñemitawo. Wēñānāni bai wædænque ēñēnāni ññōnānite botō nē odōmonte apænebo ñmopa, ante pōñemitawo.

²¹ ññāmpa māñōmai ññōmi inte bitō edæ dicæ nāmā odōmonte apænete ēñemitawogaa. Wadāni ññānite odōmonte apænedinque, Awēmō æñāmāi ñēdāni, ante odōmonte apænedōmi inte tōmēmi awēmō æmitawo. ²² Bitō wadāni ññānite odōmonte apænedinque, Nāñōogængā ññāmai ññongante godō guēa mōñāmāi īe, ante nē wææ āmi inte bitō adobaī wacā tōnō guēa mōmitawoo. Ayæ, Wængonguī ingampa, ante nāni badōinca ante nē pīimi inte bitō edæ tōmēnāni nāni apæneincōnē go guidinque edæ ō æmitawoo. ²³ ññāmpa bitō, Mōitee wodi nānō wææ angainō ante botō ēñente cæbo ñmopa, ante tēdedinque nāmā ængō cædōmi inte edæ māñine ante ēñēnāmāi cæbi adinque wadāni wæætē Wængonguī ingante waa adāmai ññānīpa tōō. ²⁴ Edæ, “Mīnitō cædinō beyæ oodeoidi ññāmai ññāni incæ Wængonguī ēmōwo ante godō babæ ante wēnæ wēnæ ānewēnānīpa,” ante tōmengā beyæ dodāni nāni yewæmongainō bai do batimpa.

²⁵ Edæ Wængonguī nānō wææ angainō ante ēñente cæbi ññinque bitō, Nāwā oodeobo ñmopa, ante nē ēō togæñimi badinque waa ñmāimpa. Wæætē edæ ēñēnāmāi cæbi ññinque oodeo ññāmai ingā bagāacā ingā bai bitō ññōmō edæ do babañmīpa. ²⁶ Oodeoidi ññāmai ññāni guiquēnē bagāadāni ññāni incæte tōmēnāni Wængonguī nānō wææ angainō ante ēñente cædāni ññinque Wængonguī ayongā tōmēnāni do ēō togæñināni bai ññōnāni inte oodeoidi bai ññānīpa. ²⁷ Bitō ññōmō Mōitee wodi nānō wææ yewæmongainta māñimi inte nē ēō togæñimi ññitawo. Bitō māñōmai ññi incæte ēñēnāmāi cæbi ññōmi wacā wæætē bagāacā ññongā inte ēñente cæcā ññinque tōmengā ēñente nānō cædō beyænque Wængonguī wæætē bitō ññite apænte āninque pancæcāimpa.

²⁸ ññāmpa oodeo ēñagāingā inte baō beyænque oodeocā ingā incæte tōmengā wīi māñōmai ingā beyænque nāwā oodeocā ingampa. Adobaī nē ēō togæñingā ññōmō baonque nānō ēō togæñinō beyænque tōmengā Wængonguī ayongā ædæmō ēō togæñingā bai wīi ingampa. ²⁹ Wængonguī Ōñōwoca ingante nē ēwocacā guiquēnē tōmengā ññōmō edæ nāwā oodeo bai badinque Wængonguī wēñængā ingampa. Edæ Mōitee wodi nānō wææ yewæmongainō ante ēñente ēō togæñinque waocā tōmengā wentamō nānō entawēnō dicæ wido cæquingāā. Wængonguī Ōñōwoca guiquēnē pōñō wido cæcā beyænque waocā wæætē waēmō entawengampa. Māñōmai entawengā ingante wadāni waa adāmai ññāni incæte Wængonguī wæætē, Bitō waa entawēmi abopa, āninque tōmengā ingante waa apæñecampa.

3

¹ ññinque oodeocā ññōmō edæ, Oodeobo ñmopa, ante toquēngā ingantawo. Ayæ adobaī, Botō ēō togæñimo ñmopa, ante toquēngā ingantawo. ² Ao āmopa. Nē oodeoidi ññōnāni inte tōmēnāni cōwē nangūi toquēñēnāni ññānīpa. Edæ Wængonguī apæñecā ēñengāñāni inte edæ oodeoidi tōmengā nānō apænedō ante nē mangāñāni inte nē toquēñēnāni ññānīpa. ³ Māñōmai ī incæte pancadāniya ññōmō edæ wede pōñēnāmāi ññānīpa. ññinque mōnō æbānō angūi. Tōmēnāni nāni pōñēnāmāi ññō beyænque Wængonguī tōmēnāni ññānite dicæ ññimpo cædinque ædæmō aadāmāi ingantawogaa. ⁴ Edō cæte māñōmai ingūi. Mōnō waocabo tōmāmō nē babæ apæñemō ññōmonte Wængonguī ññōmō nō pōñi cæcā ingainō anguēnē. Edæ tōmengā beyæ ññimāi ante yewæmongatimpa.

“Wængonguī bitō æbānō apæñebii, ante apænte ancæ cædāni incæte

tömēnāni, Wængonguī nō pōni ante apænecampa, ante edonque acædānimpā.

Bitō nē tæi emōmi inte edæ bitō imite nē apænte ancæ cædāni inānite nāemæ edæ wææntodonte bai cædinque edæ gānā cæcæbiimpā.”

Ante nāni yewæmongainō bai edæ bacæimpā.

⁵ Waodāni mā pōnēninque iīmai ante tedewēnānimpā. Mōnitō wīwa cæyōmōnite Wængonguī nō cæcā adinque wadāni, Wængonguinque nē nō cædongā ingampa, ante godōmenque edonque acædānimpā. Ininque wīwa cæyōmōnite Wængonguī quīnante piinte pangāā, ante tedewēnānimpā. Mānōmai tedewēnāni adinque mōnō wæætē æbānō anguēnēmō imōō. Inæmpa waodāni nēni ānewēnō bai dicæ anguēnēmō Imongaa. ⁶ Edō cæte mānōmai ānewenguī. Mānīnō nāni tedewēnō nāwangā i bai inguipoga quēwēmō imonte Wængonguī apænte ānāmai inguēnengā.

⁷ Wadāni guiquēnē iīmai ante tedewēnānimpā. Wængonguī cōwē nāwangā ante apæneyongante botō babæ apænebo adinque wadāni, Wængonguinque nāwangā ante apænecampa, ante tōmengā ingante godōmenque waa acædānimpā. Ininque babæ botō apænedō beyænque Wængonguī godōmenque nīāō apāite bai emongā ingampa. Ininque, Bitō nē wēnæ wēnæ cæbi imipa, ante Wængonguī quīnante botō imote apænte angāā, ante tedewēnānimpā. ⁸ Tömēnāni, Wængonguī ingante godōmenque waa acædānimpā, ante mōnō godōmenque wēnæ wēnæ cæcæimpā, ante tedewēnānimpā. Tömēnāni nāni tedewēnō nāwangā i bai mōnitō adobai ante ancædōmōnimpā. Edæ, Tömēnāni nāni tedewēnō bai edæ Pabodoidi adobai ante apænedānimpā, ante pancadāniya pōnō wēnæ wēnæ ante babæ apænedānimpā. Mānōmai ante nē apænewēnāni inānite pāninque Wængonguī nō cæte pangampa.

Tōmāmō mōnō pante wæquinque wentamō mongæmompā

⁹ Ininque æbānō ante anguī. Mīnitō oodeoidi ināmai ōnōmīnīque inōmīnīte mōnitō mōni oodeocabo dicæ godōmenque waa pōni imōniyaa. Inæmpa mōnitō oodeomōni incæ mīnitō oodeomīni ināmai imīni incæ tōmāmō nē wēnæ wēnæ cædōmō imōmpa, ante do odōmōnte yewæmōmōni abaimīnimpā. ¹⁰ Edæ iīmai ante Wængonguī beyæ ante āmotamīni ante bai yewæmongatimpā.

“Nē nō cædongā inōmō edæ dæ angampa.

Adocanque incæ edæ dæ angampa.

¹¹ Nē ēñente pōnengā inōmō edæ dæ angampa.

Wængonguī ingante ante nē diqui diqui mīnogā inōmō edæ dæ angampa.

¹² Tömēnāni edæ oda cæte wapiticæ godinque,

nāni waa cædāmai incaboque badānitapa.

Nē waa cædongā inōmō edæ dæ angampa.

Adocanque incæ edæ dæ angampa.

¹³ Waodāni inānite wænoncæte ante ææ ænete bai ēmencadinque,

tömēnāni babæ ante enguēnēwate tedewēnānimpā.

Edæ tæntæ tōmēmæ ēnete bai, Wænongæimpā, ante ēnedānimpā.

¹⁴ Tömēnāni piinte nāni tedewēnō beyænque moncapæ ti nā bai enguēnēwadānimpā.

¹⁵ Tömēnāni wænonguīwaque pogodo guīwaque ēwadānimpā.

¹⁶ Tömēnāni nē godō wænonāni inte māincoo wido cæte wodi godāni ate edæ mī quēwēnāni ponte adinque caate bai wæwēnānimpā.

¹⁷ Nē piinte cædōnāni inte tōmēnāni Wængonguī taadō tōmengā gānē entawente nānō godōnō ante adāmai inte cædānimpā.

¹⁸ Tömēnāni, Wængonguī ingante mōnō guīñente ēñengæimpā, ante pōnēnāmai inānimpā.”

Ante dodāni nāni yewæmongainō bai impā.

¹⁹ Ecānō Mōitee wodi nānō wææ angainō ante nē ēñente quēwenguēnā inaa tōmengā beyænque ante wææ yewæmongatimpā. Mānōmai i beyæ, Botō eyepæ cæbo imōpa, ante mōnō ædō cæte anguī. Edæ guīñēnēte mōnō pæ wēnecæimpā. Ayæ inguipoga tōmāō quēwēmō tōmāmō Wængonguī nē apænte angā weca ongōninque edæ, Æbānō cætaboo, ante Wængonguī ingante mōnō edonque apænequēnēmō imōmpa. Mānōmainō ante edæ do ēñēmōmpa. ²⁰ Mānōmai beyæ Wængonguī, Mōitee wodi nānō wææ angainō ædæmō ēñente cæbi beyæ bitō botō ayōmo nē nō cæbi babīpa, ante adocanque ingante edæ ānāmai incæcāimpā. Wæætē mānīne nānō wææ angainō ēñente beyæ mōnō, Nē wēnæ wēnæ cæmō imōmpa, ante edonque amōmpa.

Mōnō wede pōnēnō beyænque nō cæte quēwēmōmpa, ante

²¹ Wīi Mōitee wodi nānō wææ angainō ante ēñēmīni beyæ wæætē edæ Wængonguī incæ pōnō badongā beyænque mōnō tōmengā ayongā nō cæmō bamōmpa, ante nōwo pōni odōmongatimpā. Dodāni Mōitee wodi tōnō Wængonguī beyæ nē apænegaināni inōmō, Inīcayæ ate mānōmai bacæimpā, ante do yewæmongadānimpā.

²² Wængonguī pōnō badongā ate mōnō nē wede pōnēmō inōmō Itota Codito ingante mōnō wede pōnēnō beyænque edæ tōmāmō tōmengā ayongā nō cæmō bamōmpa. Edæ

mōnō adoyōmō ingaimō inte ōnōmonque īmōmpa. ²³ Īnīnque mōnō tōmāmō wēnæ wēnæ cæmō inte Wængongui nānō nāō bai quēwēñōmō guicæte ante cædinque wīī eyepæ cæmō inte wīī guimōmpa. ²⁴ Incæte Itota Codito ængā beyænque abæ tawænte gote bai quēwēmō īñōmonte Wængongui ōnonque ānāmaī inte waadete pōnō badongā ate mōnō tōmengā ayongā nō cæmō bamōmpa. ²⁵ Wængongui īñōmō Itota Codito ingante da pōnōnīnque, Tōmengā mīnitō wēnæ wēnæ cædō ante teēmente wængā beyænque botō wæætē piyænē cædinque mīnitō īmīnite pānāmaī incæboīmpa, ante cægacāīmpa. Īnīnque tōmengā, Mānōmaī pōnō cæbo ate mīnitō, Itota wepæ mōnō beyæ pe tæ pe tæ wæænīmpa, ante wede pōnēnīnque wede mīni pōnēnō beyænque quēwēncæmīnīmpa, ante pōnō cægacāīmpa.

Mānōmaī cædinque Wængongui wēēñēdē mōnō waocabo mōnō wēnæ wēnæ cægāīnō ante ee adīnque nē pānāmaī ingāīngā incæte edæ, Botō cōwē nōīngā ante apænte ānōmō īmōpa, ante ēñēncæmīnīmpa, ante odōmongacāīmpa. ²⁶ Īnīnque, Wængongui nē nō cæcā īnongā ingampa, ante mōnō acæīmpa. Ayæ adobaī, Itota ingante nē pōnēmō īñōmonte Wængongui nē panguēnengā īngā incæ mōnō īmonte ata cæpōdīnque pōnō badongā ate mōnō wæætē tōmengā ayongā edæ nē nō cæmō bamōmpa, ante mōnō acæīmpa. Īnīnque tōmengā mānōmaī cædinque tōmengā nō nānō cædō ante odōmoncæte ante nōwo cægacāīmpa.

²⁷ Īnīnque mōnō waocabo īñōmō nāmā ængō cæte bai cædinque mōnō, Nāmā cædinque nō cæmō bamōmpa, ante ædō cæte anguīmō. Īñæmpa mānōmaī ānīnque cædāmaī īngæīmpa. Quīnante nāmā wīī ængō cæquīī, ante wæmīnitawo. Mōītee wodi nānō wææ angāīnō ædæmō ēñēnte cæmō inte bai mōnō, Tōmēmō cætāmōmpa, ancædōmōīmpa. Incæte ædæmō ēñēnte dicæ cæmongaa. Wæætē tōmengā ingante wede mōnō pōnēnō beyænque tōmengā ayongā nō cædōmō bamōmpa, ante adīnque mōnō, Tōmēmō cætāmōmpa, ante ædō cæte anguīī. ²⁸ Īñæmpa waocā Wængongui nānō wææ angāīnō ante ēñēnte cæcā incæ wīī tōmengā nānō ēñēnte cædō beyæ nē nō cæcā bacampa. Wæætē wede nānō pōnēnō beyænque Wængongui ayongā edæ nē nō cæcā bacampa, ante do edæ apænebo ēñēmaīmīnīmpa.

²⁹ Oodeomōni īñōmōnīte Wængongui mōnitō Wængongui īnongā ingampa. Oodeomīni īnāmaī īmīni guīquēnē, Wīī mōnitō Wængongui ingampa, ante pōnēmīnitawo. Īñæmpa oodeomīni īnāmaī īñōmīnite adocā Wængongui mīnitō Wængongui ingampa. ³⁰ Edæ adocanque Wængongui īnongā

ingampa. Īnīnque nē ēō togæīmōni īmōni mōni wede pōnēnō beyænque tōmengā pōnō badongā ate tōmengā ayongā edæ nō cæmōni bamōnīpa. Adobaī bagāamīni mīni wede pōnēnō beyænque Wængongui adocanque īnongā inte pōnō badongā ate mīnitō adobaī tōmengā ayongā nō cæmīni bamīnīpa. ³¹ Mōnō pōnēnō beyænque īmpa, ante apænedīnque mōnitō Wængongui nānō wææ angāīnō ante dicæ wēā godonte bai cæmōniyaa. Wīī mānōmaī cæmōnīpa. Wæætē mānōmaīnō ante apænedīnque tōmengā nānō wææ angāīnō ante Ao ānīnque mōnitō, Ēñēedāni, ante odōmonte apænemōnīpa.

4

Abadāō wodi æbānō cægacāī, ante pōnengcæīmpa

¹ Mānīnō ante mōnitō mæmæ Abadāō wodi īñōmō æbānō ante ēñēngacāī, ante mōnō nōwo pōnente apænecæīmpa. ² Abadāō wodi nē ēñēnte cæcā īngāīngā incæte tōmengā nānō ēñēnte cædō beyænque dicæ nō pōni entawengā bacantawogaa. Mānōmaī cædinque nō cæcā bagacāīmpa, ante nāwangā ī bai tōmengā waodāni ēñēñōnānīte, Waa cæbo īmōpa, ante do ancægacāīmpa. Incæte tōmengā Wængongui ēñēñongante mānīnō ante cōwē ānāmaī īnguēnengā īngacāīmpa. ³ Wængongui æbānō ante apænecā ēñēnte yewæmongadāni, ante amīnīi. Edæ īmaī ante apænecā ēñēnte yewæmongadānīmpa. “Wængongui nōīngā ante apænecampa, ante Abadāō wede pōnengacāīmpa. Īnīnque tōmengā wede nānō pōnēnō beyænque Wængongui wæætē edæ, Botō ayōmō Abadāō nē nō entawengā īngā abopa, angacāīmpa,” ante yewæmongadānīmpa.

⁴ Edæ wadāni beyæ waocā nanguī cæcā ate tōmēnāni debe badīnāni inte edæ, Ōnonque pōnōmōni æe, ante ædō cæte anguīnānīi. Īñæmpa wīī ōnonque godonte īmpa. Wæætē tōmengā nānō nanguī cædīnō beyænque paga ante nē godonguēnēnāni inte awēñēdī, Bitō nanguī cæbitapa, ante godōnāni ængampa. ⁵ Wængongui guīquēñē ōnonque pōnō cæcā æmōīmpa. Waocā wīwa cæcā incæ wede pōnengā adīnque Wængongui pōnō badongā ate tōmengā Wængongui ayongante wæætē nō cæcā bacampa. Īnīnque waocā waa cædāmaī incæ edæ wede pōnengā adīnque Wængongui wæætē tōmengā ingante pōnō badōnīnque, Nō pōni bitō entawēngūnque bitō wede pōnēmi abopa, angampa. ⁶ Waocā waa cædāmaī īñongante Wængongui pōnō badongā ate tōmengā Wængongui ayongā nō pōni entawengā īnīnque tōmengā watapæ quēwēncæcāīmpa, ante apænedīnque

Dabii wodi adobaī ämotamīni ante baī yewæmongacäimpa.

⁷ Adocä yewæmöninque,

“Waadāni eñēnāmaī cädāni inānite Wængonguī pönö ñimpo cæcä ate tömēnāni wæætē watapæ quēwēncädänimpa. Edæ tömēnāni eñēnāmaī nāni cædö ante ö ænte mǎo tee moncate baī cæcä adinque nangui tocädänimpa.

⁸ Æcänö ingante Wængonguī, Bitö pante wæquinque wēnæ wēnæ cæbipa, ante cōwē piinte änāmaī ingä ñinque māningä waocä wæætē nangui tocäcäimpa.”

⁹ Ante Awēnē Dabii wodi, Eö togæñnānique tocädänimpa, ante dicæ yewæmongantawogaa. Bagäadāni adobaī tocädänimpa, ante ancæte ante yewæmongacäimpa. Abadäö wodi

Wængonguī ingante wede nānö pönēnö beyænque Wængonguī, Botö ayömo Abadäö nē nō entawengä ingä abopa, angacäimpa. Mänömainö ante edæ botö do yewæmömo abaiminipa. ¹⁰ Abadäö wodi æbänö engæñongante Wængonguī mänömaī angacäi. Dicæ eö togæningä ñiongante angantawogaa. Wæætē bagäacä ñiongante angacäimpa. ¹¹ Ñinque, Abadäö bagäacä inte wede pönengä beyænque botö pönö badömo ate nō cæcä bacampa, ante eñencädänimpa, ante cædinque Wængonguī angä eö togænte bagacäimpa.

Mänömaī cæcä beyæ mīnitö bagäamīni inte wede pönēmīni ññömīni Abadäö wodi mīnitö wæxmængä baī bagacäimpa. Abadäö wodi pæimīni baī wede pönēmīni adinque Wængonguī adobaī, Nö entawēmīni bamīni acæboimpa, ante pönö badongacäimpa. ¹² Mönitö wæxmæ Abadäö wodi doyedē bagäacä ingäñedē incæ wede pönengä ingacäimpa. Mōni idægocabo ññömö nē eö togæimōni inte edæ tömengä wede pönente nānö cængainö adodö tee empote gomōnipa. Ñinque mäninönö möni wede pönente godönö gomōni beyænque möni eö togæncabo wæxmængä adocä Abadäö wodi ingacäimpa.

Mönö wede pönēnö beyænque Wængonguī

nānö angainö ante cæcampa, ante

¹³ Wængonguī, Inguipoga incæ bitö nē ænguimi incæbiimpa, äninque Abadäö wodi tönö tömengä nänömoidi inānite pönö angä ægadänimpa. Mänömainö äninque Wængonguī dicæ, Botö wææ angainö ante eñente cädänique æncädänimpa, ante angantawogaa. Wæætē edæ wede pönente tömengä ayongä nō entawēnāni badāni beyænque Wængonguī, Inguipoga incæ pönömo æncæminimpa, ante apænegacäimpa. ¹⁴ Wængonguī dicæ, Botö wææ angainö eñente nē cädänique nē

ænguīnāni inānipa, ante angantawogaa. Edæ mänömainö angä baī mönö wede pönēnö ante önonque pönencädömöimpa. Tömengä nānö angainö incæ wo ewente baī bacädönimpa. ¹⁵ Edæ mäninö tömengä nānö wææ angainö ante eñēnāmaī cädāni beyænque Wængonguī ænguī badinque pangampa. Wæætē wææ änāmaī inte baī Wængonguī, Botö wææ angainö ante eñēnāmaī cæbipa, ante ædö cæte anguingä. Edæ dæ ancädönimpa.

¹⁶ Mänömaī beyæ Wængonguī, Botö waadete pönö cædö beyænque æminipa, ante edonque acäimpa, ante cædinque Abadäö wodi wede nānö pönēnö beyænque ante, Pönömo æncæminimpa, angacäimpa. Mönitö Möitee wodi nānö wææ angainö ante nē eñēmōni ññömōnite wii adomōnique imōnite angacäimpa. Wæætē Abadäö wodi nānö wede pönengä baī adobaī wede pönēmö ññömōnte mönö tömämö imonte Wængonguī, Cōwē pönömo æncæminimpa, angacäimpa. Edæ mönö wede pönencabo ññömōnte Abadäö wodi tömämö wæxmængä baī ingacäimpa. ¹⁷ Wængonguī edæ do wængaināni inānite pönö cæcä ate tömēnāni ññömö ñāni ömæmōnte edæ mūñāni quēwēnānipa. Dæ angaincoo incæ tömengä do badongä ate edæ a ongoncoopa. Wængonguī mänömaī nē badongä ñiongante Abadäö wodi tömengä ingante nē wede pönengä ingacäimpa. Ñinque Wængonguī,

“Abadäö eñēmi. Botö pönö badömo ate bitö pæināni yebæninque wacabodāni nāni cabo wacabodāni nāni cabo nangui ināni ññönānite edæ bitö adobique tömēnāni wæxmæmi incæbiimpa.” Ante Wængonguī beyæ ante yewæmongatimpa. Ñinque Wængonguī ayongante mönö wede pönēmö ññömōnte Abadäö wodi mönö wæxmængä bagacäimpa.

¹⁸ Tömengä ingante, “Bitö pæināni edæ mänimpodāni bacädänimpa,” ante Wængonguī do angacäimpa. Mänömainö angä eñēninque, Ædö cæte baquī, ante wædongä incæ Abadäö wodi, Wængonguī cōwē cæcä beyæ watapæ bacäimpa, ante wede pönengä ingacäimpa. Ñinque tömengä wede nānö pönēnö beyænque “wacabodāni nāni cabo wacabodāni nāni cabo nangui ināni bayönānite tömēnāni wæxmængä” Abadäö bagacäimpa.

¹⁹ Tömengä, Botö picængadebo wodo tiēē wadepo quēwengäimo inte edæ botö baö wænte baī eñabo inte edæ ædö cæte wēñæ tapæiquimoo, ante eñengacäimpa. Ayæ, Tada adobaī wēñæ cōwē mänāmaī ingaingä inte picængadecä badinque ædö cæte wēñæ manguingä, ante pönengacäimpa. Incæte mäninö nānö wædö beyænque guñēñadāmaī inte Abadäö wodi Wængonguī

nänö äninö ante godömenque pönengacäimpa. ²⁰ Tömengä, Wængongui wabänö cæbaingää, ante wædämai inte wæætë Wængongui nänö, Cöwë pönö cæcæboimpa, äninö ante wede pönengacäimpa. Ayæ, Wængongui bitö ñäö entawëmi inte tæi emonte waa cæcæbiimpa, ante godömenque tæi piñante entawëninque Abadaö wodi wede pönengacäimpa. ²¹ Edæ, Wængongui nê tæi piñængä inte, Cöwë cæcæboimpa, ante nê angaingä inte edæ cöwë cæcæcäimpa, ante Abadaö do ëñëninque edæ wede pönengacäimpa. ²² Tömengä mänömai wede pönegä beyænque Wængongui, Abadaö bitö nò entawëmi ìmi abopa, angacäimpa.

²³ Mänine, Bitö nò cæbi ìmi abopa, ante nänö angaine iñömö wii tömengä beyænque yewæmongatimpa. ²⁴ Wæætë mönö beyæ adobai yewæmongatimpa. Edæ, Mönö Awënë Itota ingante Wængongui angä ñäni ömæmongacäimpa, ante nê angaingä ingante wede pönëmö iñömönte Wængongui, Botö ayömo minitö nò cæmîni ìmîni abopa, ante badongampa. ²⁵ Wënæ wënæ mönö cædö beyænque mönö Awënë Itota ingante Wængongui pædæ godongä wængacäimpa. Ayæ mönö beyæ ante cædinque tömengä mönö Awënë Itota ingante, Bitö nê nò cædömi inte ñäni ömæmömi beyænque tömëñäni botö ayömo nò entawëñäni bacædänimpa, ante cædinque angä ñäni ömæmongacäimpa.

5

Wængongui badongä ate mönö nò cæmö bamompa

¹ Mönö wede pönënö beyænque Wængongui pönö badongä ate mönö tömengä ayongante edæ nò cæmö bamompa. Ìnînque mönö Awënë Itota Codito nänö cægäinö beyænque Wængongui piyænë cæcä ate mönö tömengä tönö godongämæ gänë entawente quëwëmompa. ² Mönö wede pönënö beyæ adocä Codito mönö imonte pönö ænte mämongä ate Wængongui waadete pönö cædinque mönö imonte ængampa. Ayæ Wængongui nê ñäö ëmongä weca ongöñömö tömengä pönö badongä ate mönö godongämæ ñäö emonte mönö watapæ bacæimpa, ante wede pönëninque tomompa.

³ Ayæ wii mäninque beyæ tomompa. Ìñæmpa, Waocä nänö wæntædämai inte ee cæquinque caate wæcampa, ante ëñëmö ìnînque mönö caate wæmö incæte caate mönö wædö beyæ adobai tomompa. ⁴ Ayæ nê wæntædämai inte ee cæmö adinque mönö Wængongui ayongä nê waa cæmö edæ bamompa. Mänömai bamö ìnînque mönö, Watapæ bacæimpa, ante pönente tomompa. ⁵ Mänömainö ante nê pönente tomö iñömö

edæ mönö ænguënëno ante do æninque mönö guingo imonte wædämai imompa. Edæ Wængongui tömengä Tæiyæ Waëmö Önöwoca ingante da pönöninque tömengä nänö waadete pönënö adobai do pönongä æninque mîmönë entawëmompa.

⁶ Edæ ìmai impa. Mönö aquüimö pönî iñömo inte, Ædö cæte cæmöö, ante wæyömonte mönö Codito iñömö eyepæ pönî pöninque, Minitö Wængongui ayongante wiwa cæmîni ìmînipa, ante adinque wiwa mönö cædö ante teëmente wæætë wængacäimpa. ⁷ Waocä guiquënë wacä nê nò cædongä ingä adinque tömengä beyæ wæætë dicæ wænguingä. Incæte, Nê waa cædongä wæætë quëwencæcäimpa, ante cædinque adocanque adocanque wabänö Ao ante tömengä beyæ wæætë wæmäinänipa. ⁸ Incæte, Wængongui minitö ìmînite nangui waadete pönengampa, ante odömoncæte ante cædinque mönö Codito iñömö nê wënæ wënæ cæmö iñömönte mönö beyænque wæætë wængacäimpa. ⁹ Codito wepæ mönö beyæ pe tæ pe tæ wææ beyænque mönö Wængongui ayongante nò entawëmö do batamompa. Codito mönö beyæ mänömai wængaingä inte cöwë godömenque cæcæcäimpa.

Ämo ëñëedäni. Wængongui nê piinte panguënengä iñongante adocä Codito gä pe æmpote ængä beyænque Wængongui wæætë mönö imonte edæ ata cæpocä quëwencæmöimpa. ¹⁰ Mönö edæ Wængongui tönö mönö godongämæ piincabo iñömönte tömengä Wengä mönö beyæ wæætë wængä beyænque mönö Wængongui tönö godongämæ piyænë cæmö bagamöimpa. Mönö Wængongui tönö godongämæ piyænë cæmö ìnînque tömengä Wengä iñömö cöwë godömenque cæcæcäimpa. Ämo ëñëedäni. Tömengä adocä do wængaingä inte ñäni ömæmonte müngä quëwëninque mönö imonte ængä beyænque mönö wænämäi inte cöwë quëwencæmöimpa. ¹¹ Ayæ mönö godömenque ìmaiñö ante ëñengäimpa. Mönö Awënë Itota Codito ængä beyænque Wængongui piyænë cæcä ìnînque mönö ñöwo Wængongui nempo quëwëninque edæ Itota Codito beyæ ante watapæ tomompa.

Tänocä Adäo wodi bai Codito adobai Tănocä ingampa

¹² Docä mæmæ adocanque tänocä incæ ëñëñämäi cæcä ìnînque mönö wënæ wënæ cæpämö inguipoga do pongatimpa. Ayæ tömengä nänö ëñëñämäi cægäinö beyænque nê wæwocacä bagacäimpa. Tömengä wënæ wënæ cæcä ingaingä bai mönö tömämö adobai nê wënæ wënæ cæmö ìmö ìnînque edæ mönö waocabo tömämö nê wæwocamö edæ do bagamöimpa. ¹³ Edæ wëñëñedë Möitee wodi nänö wææ äñämäi iñedë

incæ waodāni do wēnæ wēnæ cædāni ingadānīpa. Wēnæ wēnæ cædāni incæte Wængonguī, Botō wææ änō ante ēñēnāmaī cæmīnīpa, ante ædō cæte apænte anguingāā. Īñæmpa māniñedē ayæ wææ änāmaī ingacāīpa. ¹⁴ Nē Ponguingā, ante dodāni nāni nē angaingā ĩñōmō Tānocā nānō ingai bai docā Adāō wodi adobai tānocā ingacāīpa. Incæte Adāō wodi Wængonguī nānō wææ änō ante ēñēnāmaī cædinque wēnæ wēnæ cægacāīpa. Wæætē Wængonguī edæ Mōitee wodi nānō quēwenganca wææ änāmaī ĩñongante Adāō wodi pæināni guiquēnē wēnæ wēnæ cædāni incæte tōmengā nānō ēñēnāmaī cægai bai wīi adobai ēñēnāmaī cægadānīpa. Incæte tōmēnāni nē wæwocadāni inte wægadānīpa.

¹⁵ Incæte Wængonguī nānō wææ angainō ante adocanque nānō ēñēnāmaī cægai bai Wængonguī nānō pōnongai ĩñōmō wīi adobai ĩpa. Edæ adocanque nānō ēñēnāmaī cægai beyænque nangui ĩnāni inte wængadānīpa. Incæte Wængonguī guiquēnē nangui pōni waadete pōnō cædinque Itota Codito ingante da pōnongā pōninque tōmengā adocanque ĩnongā waadete eyepæ pōni pōnō cæcā ate mōnō nangui pōni ĩmō inte quēwēmōmpa. ¹⁶ Onguiñægā adocanque wēnæ wēnæ nānō cægai beyæ nē wæwocadāni bagadānīpa. Wængonguī nānō pōnongai ĩñōmō edæ wīi adobai ĩpa. Adocanque nānō adopoque ēñēnāmaī cægainō ante adinque Wængonguī tōmengā ingante apænte āninque edæ, Bitō tente wæquinque ĩpa, angacāīpa. Wæætē Wængonguī nānō wææ angainō ante ēñēnāmaī wæætē wæætē cæmō incæte tōmengā, Botō ayōmo mīni nō entawēnīnque ĩpa, ante ōnonque pōnongā ænte entawēmōmpa.

¹⁷ Waocā adocanque incæ Wængonguī nānō wææ angainō ante ēñēnāmaī cæcā ĩnīnque tōmengā adocanque nānō ēñēnāmaī cægai beyænque mōnō wæwocamō do bagamōīpa. Wængonguī guiquēnē godōmenque eyepæ pōni waadete pōnō badongā ate tōmengā ayongā mōnō nō entawēmō bagamōīpa. Īnīnque Itota Codito adobai Adocanque ĩñongante mōnō tōmengā nempo wæwocadāmaī inte quēwēnīnque awēñēdi bai badinque quēwēmōmpa.

¹⁸ Mānōmaī beyæ adocanque adopoque ēñēnāmaī cæcā beyænque Wængonguī mōnō tōmāmō ĩmonte apænte āninque, Mīni wænguinque wēnæ wēnæ cæmīnīpa, angampa. Ayæ adobai Adocanque adopoque nānō nō cægainō beyænque mōnō Wængonguī ayongā nō cæmō bamō ĩnīnque Wængonguī apænte āninque mōnō tōmāmō ĩmonte, Mīni quēwēnīnque mīnitō botō ayōmo nō entawēmīni bamīnīpa, angampa. ¹⁹ Edæ adocanque nānō

adopoque ēñēnāmaī cægai beyænque mōnō nangui ĩmō incæ edæ nē wēnæ wēnæ cæmō bagamōīpa. Adobai Adocanque nānō adopoque ēñēnte cægai beyænque mōnō nangui ĩmō incæ edæ Wængonguī ayongā nō cæmō bagamōīpa.

²⁰ Mōnō waocabo wēnæ wēnæ cæyōmonte Wængonguī, Botō wææ änō ēñēnāmaī inte cæmīnīpa, ante edonque acæmīnīpa, ante wææ angacāīpa. Wææ angā ate edonque adinque mōnō waocabo wæætē, Nanguī ēñēnāmaī inte cæte awædō, ante wæyōmonte Adocā incæ godōmenque nangui waadete pōnō cæcā æmōmpa. ²¹ Īnīnque mōnō ēñēnāmaī cægai beyæ mōnō nē wæwocamō bagamōīpa. Wæætē mōnō Awēñē Itota Codito waadete pōnō nō cæte badongā ate mōnō cōwē wæñāmaī quēwēnīnque Wængonguī ayongā nō entawēmō bagamōīpa.

6

Codito nempo quēwēnīnque mōnō nē wīwa cædongā nempo wīi quēwēmōmpa

¹ Īnīnque mōnō æbānō anguiī. Pancadāniya ĩmaī ānewēñānīpa. Wængonguī godōmenque waadete pōnō cæcæcāīpa, ante cædinque mōnō godōmenque wēnæ wēnæ cæcāīpa, ante tedewēñānīpa. Mōnō ĩñōmō dicæ mānōmaīnō ante tedewēngūēñēmō ĩmongaa.

² Īñæmpa ædō cæte mānōmaīnō ante tedewēnguiī. Wēnæ wēnæ mōnō cæte quēwēmāmo pædæ godōmo ænīnque Codito teēmē mongæñinque wæññongante mōnō tōmengā tōnō godongāmæ wænte bai ĩnōmo inte ædō cæte godōmenque wēnæ wēnæ cæte quēwēnguiī. ³ Mōnō Itota Codito nempo quēwēngæīpa, ante æpæñē guīdinque mōnō tōmengā tōnō godongāmæ wængaimō bai batamōmpa, ante mīnitō ĩñōmō ēñēnāmaī ĩmīnitawo.

⁴ Tōmengā wænte ōññongante Mæmpo Wængonguī nē ñāō entawēnongā inte tæi ēmōnongā inte, Nāni ōmæmōe, angā ñāni ōmæmongacāīpa. Īnīnque mōnō ĩñōmō edæ, Codito tōnō ñāni ōmæmonte bai mōnō mīimō quēwēngæīpa, ante cædinque æpæñē guīdinque tōmengā wodido godongāmæ guīte bai wænte bai ōññontamōmpa.

⁵ Edæ tōmengā wængā ate godongāmæ wænte bai bagaimō ĩnīnque mōnō tōmengā ñāni ōmæmongā ate tōmengā tōnō āawocaque bai ēwocate ñāni ōmæmonte bai quēwēmaīmōmpa. ⁶ Waocā nānō nē ō æññāni inte tōmengā beyænque cæte nē quēwēñāni bai mōnō adobai wēnæ wēnæ mōnō cædō beyænque wægāmōīpa. Mānōmaī inte wæyōmonte mōnō Codito ĩñōmō, Aamō cæte gocæmīnīpa, ante cædinque wēnæ wēnæ cæte mōnō wentamō

mongæñño ð ænte teemē mongængantapa. Ee mongæñngante tõmengā ingante awāa timpodāni wængā adinque baonque ante mõno wænæ wænæ cæpāmo iñõmõ ewente bai ba iñinque mõno do aamõ cæte bai māniñõ ante emõ cæte gomompa. ⁷ Waocā æmæwo wængaingā inte edæ ædõ cæte wænæ wænæ cæqinggā. Edæ tõmengā nāno wænæ wænæ cægainõ ante emõ cæte aamõ cæte bai gogaingā ingamapa.

⁸ Mõno Codito tõno äawocaque bai ewocadinque adopoque wængaimõ inte mõno tõmengā tõno godongāmæ quëwengæimpa, ante wede pönemompa. ⁹ Edæ do wænte ñāni omæmonte mīngā quëwëningā inte Codito wæætē mempoga wænguingā ināmai ingamapa. Tõmengā ñowo wæwocadāmai iñongante tõmengā ingante, Wæmāwe, ante ædõ cæte anguii. Iñæmpa, wænāmai incæcāimpa, ante do eñemompa. ¹⁰ Tõmengā adopoque wæningque mõno wænæ wænæ cægainõ ante æmæwo wido cæcæte ante teemē mongænte wængacāimpa. Wæætē ñāni omæmonte mīngā quëwëninque tõmengā, Wængongui beyænque cæte quëwencæboimpa, ante quëwengampa. ¹¹ Minitõ adobai Codito nempo quëwënomini inte wīwa mīni cægainõ ante æmæwo wido cæcæte ante cædinque, Itota Codito tõno adopoque wængaimõ imompa, ante wæætē, Mõno Wængongui beyænque cæte quëwengæimpa, ante pönëninque quëwëedāni.

¹² Mānõmai beyæ munitõ, Baonga mõno ñõmænguiñõ quëwëninque mõno wænæ wænæ cæinënõ ante mõno eñente cædāmai ingæimpa, ante nāmā wææ aadinque edæ wænæ wænæ mīni cæinëwëno ante edæ eñënāmai inte quëwëedāni. ¹³ Ayæ munitõ, Bado, ante edæ, Botõ baonca wīwa cæcæimpa, ante edæ munitõ baõ quiomē i incæ wænæ wænæ cæquinque ante edæ godõ cædāmai ledāni. Wæætē do wæwocagaimini inte ñāni omæmonte mīmīni quëwëninque munitõ wæætē Wængongui ingante nāmā godõmīni æncæcāimpa. Edæ, Botõ baõ inī edæ tõmāo Wængongui qui impa, ante pædæ godõninque mīmīni quëwëñõmīnite tõmengā wæætē munitõ tõno godongāmæ cædinque nõ põni cæcæcāimpa. ¹⁴ Edæ Mõitee wodi nāno wææ angainõ ante eñemini incæte wīi māniñõ beyænque quëwëminipa. Wæætē Wængongui waadete pönõ cæcā beyænque quëwëmīni inte munitõ wænæ wænæ mīni cæinëwëno ante eñente cædāmai inte quëwencæmīnimpa.

Wīwa mõno cæinëwëno ante mõno eñënāmai ingæimpa

¹⁵ Mõitee wodi nāno wææ angainõ ante eñente beyænque wīi quëwëmõ inte mõno Wængongui waadete pönõ cæcā beyænque

quëwëmompā. Nāwängā impa. Iñinque mõno æbāno cæquii. Wadāni iñõmõ idiquibæ ante pönëninque, Wængongui pönõ cæcā beyænque nē quëwëñõmõ inte mõno wæætē wænæ wænæ cæcæimpa, ante tedewëñānipa. Mõno iñõmõ ædõ cæte mānõmainõ ante cæquimõõ.

¹⁶ Wacā ingante nē cæte quëwëmīni bacæte ante cædinque munitõ, Bado, bitõ botõ awënë badingue edæ āni eñente nē cæbo baboe, āmīni iñinque edæ māningā munitõ imīnite ð ængā ate tõmengā beyænque cæte quëwëmaimīnipa. Māniñõ ante pönëminīyaa. Ayæ adobai munitõ wænæ wænæ cæinente mīni wædõ ante Ao ante cæmīni iñinque mīni wænguinque edæ māniñõ beyænque cæte nē quëwëmīni inte wæbaimīnipa. Wæætē Wængongui ingante, Bado, bitõ botõ Awënë inõmi inte edæ āni eñente nē cæbo baboe, āninque munitõ nõ cæte mīni quëwënguinque tõmengā beyænque nē cæmīni babaimīnipa. ¹⁷ Minitõ doyedē mīni wænæ wænæ cæinëwënonque ante cædinque munitõ awënë beyænque cæte nē quëwëmīni bai ingamīnimpa. Nõwo guiquënë Wængongui nõ nāno ānõ ante odõmõmõni eñëninque munitõ iñonque ante edæ nē eñente cæmīni bamīnitapa. Mānõmai bamīnipa, ante adinque botõ Wængongui ingante waa ate pönëninque apænebopa. ¹⁸ Ayæ wænæ wænæ mīni cædõ beyænque cæte nē quëwëmīni inte wæyõmīnite Wængongui ñimpo cæcā ate munitõ abæ tawænte ee gote bai quëwëminipa. Nõwo wæætē tõmengā nāno nõ cædonque ante eñente cæmīni iñinque munitõ edæ nē nõ cædongā nempo quëwëninque tõmengā beyænque cæte nē quëwëmīni bamīnipa.

¹⁹ Minitõ õnõmīninque inte æiquedõ ædæmõ eñënguimīni, ante wædinque botõ, Waocā nāno cæi bai impa, ante tededinque odõmõmo aedāni. Wëñëñedē wænæ wænæ cædinque godõmenque quingāmē bai quëwëncæte ante munitõ, Bado, ante quiomē incæ mīni baonga wīwa cæquinque pædæ godõ cæmīnitapa. Mānõmai beyænque eñënāmai mīni cæinëwëno ante eñente cædinque edæ munitõ māniñonque ante nē cæte quëwëmīni ingamīnimpa. Nõwo guiquënë tæiyæ wæmõ mīni ewocate quëwënguinque ante munitõ baõ inī edæ, Wængongui qui impa, ante tõmāo pædæ godõedāni. Ayæ mīni nõ cæquinque ante edæ tõmengā beyænque nē cæmīni inte quëwëedāni. ²⁰ Wëñëñedē iñõmõ munitõ wænæ wænæ mīni cæinënõ beyænque cæte nē quëwëmīni bai inte wægaminīmpa. Māniñedē munitõ nē nõ cædongā nempo quëwëñāmai ingaimīni inte tõmengā nāno angainõ ante edæ eñënāmai ingamīnimpa. ²¹ Māniñedē quingāmē bai mīni cægainõ

ante pōnente wædinqe mīnitō fīōwo iñōmō guingo imonte bamīnīpa. Edæ mānīnō mīni wīwa cægāinō beyæ ante dicæ watapæ tote bamīniyaa. Iñæmpa edæ mīni wænguinque mānōmaī cægāmīnīpa.

²² Nōwo guiquēnē, Wēnæ wēnæ mīni cæinēwēnō ante idæwaa ēñencæmīnīpa, ante cædinqe Wængonguī gā pe æmpote ængā ate mīnitō abæ tawænte bai Wængonguī nempo wæætē ee pongāmīnīpa. Iñinqe nē gā pe æmpocā nempo quēwēninqe mīnitō tōmēngā ingante cæte nē quēwēmīni inte mīni cōwē wæñnāmāi quēwēnguinque tæiyæ waēmō ēwocāmīni bamīnīpa. ²³ Mōnō waocabo mōnō wēnæ wēnæ cædō beyæ ante paga cæte bai cædinqe Wængonguī mōnō imonte pōnō pangā wænguēnēmō imōmpa. Wæætē, Wantæpiyæ quēwēncæmīnīpa, ante adocā incæ mōnō Awēnē Itota Codito tōnō godongāmæ cædinqe mōnō imonte ōnonque pōnō ængā beyænque mōnō cōwē wæñnāmāi quēwēmōmpa.

7

Ēñente cæquēnēmō inte nā cæyænte bai ingamōimpa

¹ Iñānāni ēñēdāni. Mōitee wodi nānō wææ ante yewæmongainō ante do adīmīni iīmīni incæte mīnitō iīmāi ante ēñēmīniyaa. Edæ, Ēñente cæedāni, ante tōmēngā mīnāni quēwēnānīque iñānite wææ ante yewæmongacāimpa. Iñinqe waocā do wæñningā iñongante, Cæe, āñōmō tōmēngā mīngā ingampa diyæ cæquingāā. Edæ dobæ wængāimpa.

² Iīmāinō ante pōnēdāni. Onquiyængā ingante nānōnāni mongā ate tōmēngā nānōogængā mīngā nānō quēwēnganca onquiyængā iñōmō tōmēngā nānōogængā ingante ēñente quēwēncæcāimpa, ante wææ ante yewæmongatimpa. Wæætē edæ tōmēngā nānōogængā wængā ate onquiyængā owæmpoingā inte adocanque quēwēñongante mānōmāinō ante edæ ædō cæte wææ anguī. ³ Iñinqe nānōogængā ayæ mīngā quēwēñongante onquiyængā wacā ingante godō guēa mongā adinque, Bitō nānōogængā mīngā iñongante bitō wacā ingante guēa godō mōmīpa tōō, ante pīnānīpa. Incæte tōmēngā nānōogængā wængā ate abæ tawænte gote bai tōmēngā adocanque quēwēñongante, Wacā ingante mōnāmāi incæbiimpa, ante ædō cæte wææ anguīnānīi. Do owæmpoingā inte wacā ingante mongā adinque tānocā quēwēngampa diyæ wææ anguīnānīi. Edæ owæmpoingā inte tōmēngā do mongampa.

⁴ Mānōmaī beyæ botō tōniñāmīni, Mōnō adobai imōmpa, ante āmo ēñēdāni.

Nānōnāni nē mōningā iñōmō ēñente cæquēnēngā ingā bai mīnitō wēēñēdē adobai Mōitee wodi nānō wææ angāinō ante ēñente cæquēnēmīni inte nā cæyænte bai ingāmīnīpa. Mānōmaī inte wæyōmīnite Codito iñōmō, Mīnitō botō nempo quēwēninqe waincate bai cæmīni badinque Wængonguī beyænque ante ēñente cæcæmīnīpa, ante pōnō cægacāimpa. Tōmēngā baonga ponte ēñadinqe mōnō beyæ wæñninqe nāni ōmæmongacāimpa. Iñinqe mōnō tōmēngā tōnō adobai wænte bai ingāimō inte mōnō wēēñēdē mōnō ēñinguēngainō ante edæ ædō cæte wæætē ēñinguēnēmō inguīmōō. Wæætē edæ nē nāni ōmæmongaingā nempo quēwēnōmo inte mōnō tōmēngā quīmō iñōmō imōmpa.

⁵ Doyedē iñōmō mōnō nē wæwocamō iñōmō inte baonque ante pōnente mōnō quēwēñēdē Mōitee wodi nānō wææ angāinō ante ēñente wædinqe godōmenque wīwa cæinēwente wæmō batamōmpa. Iñinqe mōnō baaca incate bai cædinqe mōnō wænguinque wēnæ wēnæ cætamōmpa. ⁶ Wēēñēdē wææ ānāni ate mōnō, Ēdō cæte ēñente cæquī, ante nā cæyænte bai wægāimō inte mōnō edæ Codito tōnō adopoque wænte bai nī cæyænte bai bagamōimpa. Nōwo guiquēnē adopoque wængāimō inte mōnō Mōitee wodi pedænte ante nānō wææ ante yewæmongainō ante wīi ēñente cæquēnēmō inte abæ tawænte bai gomōmpa. Wæætē edæ Wængonguī Tæiyæ Waēmō Ōñowoca beyæ quēwēmō iñōmō inte mōnō tōmēngā mīne nānō ānonque ante ēñente cæmō imōmpa.

Wēnæ wēnæ botō cædō beyæ ante wæbopa, ante

⁷ Iñinqe æbānō ante anguīmoo. Mōitee wodi, Wēnæ wēnæ cæqui, ante yewæmongacāimpa, ante botō dicæ antawogaa. Ēdō cæte edæ mānōmaī anguī. Iñæmpa tōmēngā wææ ānāmāi ingā bai botō, Quinō wēnæ wēnæ cæte i, ante ēñēnāmāi incædōmōimpa. Botō edæ, Wacā quī æinente wæbo incæte botō æñāmāi inte ee abo inte waa cæbopa, ante pōnengaboimpa. Mōitee wæætē, “Wacā quī ante æinente wædāmāi ie,” ante wææ angā beyænque botō, Ē æinente botō wædō incæ wēnæ wēnæ impa, ante tæcæ ēñentabopa. Mānīnō ante ānāmāi ingā bai botō, Wēnæ wēnæ impa, ante ēñēnāmāi incædōmōimpa. ⁸ Iñinqe nē wēnæ wēnæ cædōmo inte botō Mōitee nānō wææ angāinō ante ōnōmoncaque ēñente ate botō quingāmē bai tōmancoo ante godōmenque æinente wætabopa. Edæ tōmēngā wææ ānāmāi ingā bai mōnō wēnæ wēnæ cædō iñōmō edonque iñāmāi inte edæ dæ ante bai incædōnīmpa.

9 Mōitee wodi wææ ante nānō yewæmongainō ante botō adāmaī īmoyedē botō ōnonque wædāmaī quēwengaboimpa. Wæætē, īīmaī wææ ante yewæmonte ongompa, ante adinque botō, Æ, wēnæ wēnæ cæbo īmopa, ante tæcæ ēñēninque, 10 edæ nāñe wænte bai botō, Wæwocabo īmopa, ante wætabopa. Edæ, īīmaī cædinque quēwencæmīnimpā, ante wææ ante nānō yewæmongainta adinque botō edæ, Botō wænguinque wīī ēñente cæbopa, ante tæcæ ēñēninque wætabopa. 11 Edæ Mōitee wodi wææ ante nānō yewæmongainta do adimo inte māñinō ante ēñēnāmaī cædinque botō pante wænguinque wēnæ wēnæ cætābopa. Edæ, Ōnonque wēnæ wēnæ cæte tocæī, ante wapiticæ pōnente cæyōmote tōmengā nānō wææ angainō ante odōmōnāni ēñēmo beyænque botō, Æ, botō wænguinque wēnæ wēnæ cæbopa, ante wægaboimpa.

12 Wængonguī nānō wææ angainō īñōmō tæiyæ waēmō īnepa. Ayæ Mōitee wodi adobaī māñine tæiyæ waēmō īnedō ante apænedinque, īīmaī cæedāni, ante wææ āninque, Mīni waa cæte quēwenguinque ēñente cæcæmīnimpā, ante nōingā pōni angacāimpa.

13 Īnīnque tōmengā, Mīni waa quēwenguinque impa, ante nānō wææ angainō incæ botō īmote ædō cæte wængonguī. Wængonguī wæætē, Quinō wēnæ wēnæ cæte ī, ante edonque acæmīnimpā, ante pōnō waa cædinque, Mīnitō ēñēnāmaī īmīni beyænque mīni wænguinque impa, ante wææ angacāimpa. Īnīnque Wængonguī nānō wææ angainō beyænque botō īñōmō, Wēnæ wēnæ cægaboimpa, ante edonque atābopa.

14 Mīnitō tæiyæ waēmō ēwocacæmīnimpā, ante Wængonguī mōnō ōnōwoca beyænque ante wææ angacāimpa, ante do ēñēmōmpa. Incæte botō wīwa cædōnō beyænque cæte nē quēwēmo inte botō edæ ōmæwocate bai inte wæbopa. 15 Edæ botō waa cæinente wædō ante cædāmaī inte botō wæætē edæ, Wīī cæinente awædō, ante botō piinte adō incæ edæ do cæte wæbopa. Īnīnque botō, Æbānō cæboo, ante ēñēnāmaī īmopa. 16 Wængonguī nānō wææ angainō ante ēñēnāmaī cæbo incæte botō ēñēnāmaī botō cædō ante wīī cæinēmōmpa. Mānōmaī botō wīī cæinēnō beyænque botō, Wængonguī waa cædinque wææ angacāimpa, ante bai cædinque tōmengā nānō wææ angainō ante edæ Ao ante bai cæbopa. 17 Incæte botō wodi wīī tōmēmo ānō ante cæbopa. Wæætē edæ botō wīwa entawēnō beyæ wīī cæinente botō wædō ante do ēñente cædinque wæbopa. 18 Edæ ancaā waa cæinente wæbo incæte botō dicæ waa cæbogaa. Mānōmaī beyæ botō, Botō baonga quēwēninque botō waa cæquīnō īñōmō edæ dæ ampa, ante do

ēñēmōmpa. 19 Waa pōni botō cæinēnō incæ cædāmaī inte wæbopa. Wæætē edæ wēnæ wēnæ cæte botō wīī cæinente wædō ante ancaā cæte wæbopa. 20 Īnīnque botō wīī cæinēmo inte do cæbo īnīnque wīī tōmēmo cæbopa. Wæætē wīwa cæquīnque botō entawēnō beyænque edæ wēnæ wēnæ cæte wæbopa.

21 Waa cæinente wæbo incæte botō wēnæ wēnæ cæquīnō edæ do entawente wæbopa. Īnīnque botō nā cæyænte bai īmopa, ante do abopa. 22 Edæ botō Wængonguī nānō wææ angainō ante mīmōnē pōnēninque watapæ tobopa. 23 Incæte, Wængonguī nānō wææ angainō ante botō pōnēnō incæ ēñēnāmaī ingæimpa, ante botō edæ wade wææ ante entawente bai inte wæbopa. Īnīnque nāmā wææ ante bai mīmōnē botō pōnēnō tōnō wade, Ēñēnāmaī ingæimpa, ante wææ ante botō entawēnō tōnō nāēmæ guæadō guæa cæ bai inte wæbopa. Edæ māñine beyæ wīwa botō cæquīnō entawēninque botō yæguīncamenca nā cæyænte bai inte wæwēmōmpa.

24 Edæ cætawente wængui wæ. Botō wīwa cæquīnō entawente beyæ botō wænguiñō ēñate wæyōmote æcānō edæ æna beyænque quēwēmalmoō, ante wæbopa. 25 Edæ, Ītota Codito beyænque quēwēnguīmo īmopa, ante botō Wængonguī ingante waa ate pōnente apænebopa. Īnīnque Wængonguī nānō wææ angainō ante ēñēninque botō tōmēmo mīmōno tōmengā beyænque cæte nē quēwēmo īnōmo īmopa. Incæte botō ēñayō beyæ botō wīwa cæinēnō beyænque cæte nē quēwēmo inte wæbopa.

8

Wængonguī Ōnōwoca ingante ēwocate quēwengcēimpa

1 Īnīnque mōnō Ītota Codito nempo quēwēninque mōnō wīwa cæinente wæwēnō ante cædāmaī īñōmō inte wæætē tōmengā Ōnōwoca pōnō angā ēñēninque cæte quēwēmo adinque Wængonguī īñōmō, Mīni wænguinque, ante apænte ānāmaī ingampa. 2 Edæ wīwa cæinente mōnō wæwēnō ante mōnō wænguinque ēñente cæyōmonte Ītota Codito īñōmō pōnō gā peyæmpote bai ō angā beyænque mōnō abæ tawænte ee gote bai quēwēmōmpa. Ayæ tōmengā Ōnōwoca nē quēwēnongā nānō wææ ānō ante wæætē mōnō ēñente cæinente quēwēmōmpa.

3 Edæ Mōitee wodi, īīmaī cæedāni, ante wææ āñongā mōnō īñōmō wīwa cæinente mōnō wæwēnō beyænque aquīī piñænāmaī ēñadōmō inte, Mōnō ædō cæte ēñente cæquīī, ante wægamōimpa. Mōnō waocabo mānōmaī wēnæ wēnæ cædōmō inte wæyōmō Wængonguī wæætē, Waocā

bacæcāimpa, ante tōmengā Wengā ingante da pōnongā pōninque mōnō wīwa cæinentali bai adotai bai ēñate pægacāimpa. Ēñate pædinque tōmengā nāmā baō nānō ēñayō ante edæ, Wængonguī qui impa, ante pædæ godonte bai cædinque wænæ wænæ mōnō cædō beyænque ante wængacāimpa. Mānōmaī cædinque Wængonguī mōnitō imōnite apænedinque, Mini wænguinque mīnitō baonga ēñadinque wænæ wænæ cæmīni awædō, ante apænte angacāimpa. ⁴ Mānōmaī pōnō cædinque tōmengā, Wīwa cæinente mīni wæwēnō ante ēñente cædāmaī inte mīnitō ñōwo wæætē botō Ōnōwoca ingante ēwocadinque tōmengā beyænque quēwēmīnīpa. Īnīnque nō pōnī botō wææ angainō ante tōmānō ante ēñēnīnque nō cæte quēwēncæmīnīpa, ante cægacāimpa.

⁵ Adopoque ēñadinque baonque nē ēñādāni guiquēnē wīwa cæinente nāni wæwēnō ante pōnente cædānīpa. Mēmpoga ēñadinque Wængonguī Ōnōwoca ingante nē ēwocadāni guiquēnē tōmengā nānō ānonque ante pōnente cædānīpa. ⁶ Wīwa cæinente nāni wæwēnō ante cæcæte ante nē pōnēwēnāni guiquēnē tōmēnāni nāni wænguinque mānīnō ante pōnēwēnānīpa. Wæætē Wængonguī Ōnōwoca angā ēñente nē pōnēnāni guiquēnē tōmēnāni nāni gānē entawente quēwēnguinque edæ mānōmaī pōnēnānīpa. ⁷ Waodāni wīwa nāni cæinente wæwēnō ante cæcæte ante nē pōnēwēnāni iñōmō edæ Wængonguī ingante piinte cædānīpa. Wængonguī nānō wææ ānō ante tōmēnāni ōnōmoncaque ēñēnāni inte edæ wīi ēñente cædānīpa. Īñæmpa tōmengā Ōnōwoca ingante ēwocadānīpa diyæ ēñente cæquīnānīi. ⁸ Wīwa cæinente nāni wæwēnō ante cæcæte ante nē cædāni iñōmō, Wængonguī waa acæcāimpa, ante ancaa cædāni incæte Wængonguī wæætē edæ waa todāmaī incæcāimpa.

⁹ Mīnitō guiquēnē Wængonguī Ōnōwoca ingante ēwocamīni Īnīnque edæ wīwa cæinente mīni wæwēnīnō ante cædāmaī inte quēwēmīni Īmaīmīnīpa. Wæætē edæ tōmengā Ōnōwoca angā ēñente cæte quēwēmaīmīnīpa. Incæte waocā æcāmenque incæ Codito Ōnōwoca ingante ēwocadāmaī ingā Īnīnque tōmengā wæætē Codito nempo quēwēnāmaī Īmaīngampa. ¹⁰ Mīnitō guiquēnē Codito ingante entawēmīni Īnīnque wænæ wænæ mīni cægāinō beyænque mīnitō baō incæ tōmengā tōnō adopoque wænte bai ēñamīnīpa. Incæte Codito nānō nō cædōnō entawēmīni inte mīnitō ōnōwoca mēmpoga ēñate bai mīlwoca ēwocamīnīpa. ¹¹ Itota ingante Wæmpocā, Nāni ōmæmōe, angā ēñēnīnque nāni ōmæmongacāimpa. Ayæ mīni baō ñōmæñintai ēñayōmīnite tōmengā Ōnōwoca

pō guidinque quēwēngā Īnīnque Wæmpocā wæætē mīnitō Īmīnite, Nāni ōmæmōe, ante adobai angā nāni ōmæmoncæmīnīpa. Edæ tōmengā Ōnōwoca mīni nē ēwocadongā tōnō tōmengā pōnō cæcā ate mīnitō baō incæ ñōmæñāmaī intai bacæimpa.

¹² Īnīnque botō tōñīñamīni ēñēedāni. Wængonguī Ōnōwoca angā ate mōnō ēñente cæquēnēmō Īmōmpa. Wæætē wīwa cæinente mōnō wæwēnō ante wīi ēñente cæte quēwēnguēnēmō Īnōmō Īmōmpa. ¹³ Īñæmpa wīwa cæinente mīni wæwēnō ante ēñente cæmīni Īnīnque mīni æmæwo wænguinque cæbaīmīnīpa. Wæætē Wængonguī Ōnōwoca ingante ēwocadinque mīnitō wīwa mīni cædīnō ante wido cæmīni Īnīnque mīni quēwēnguinque Īmaīmpa.

¹⁴ Ēdānidō Īnānite Wængonguī Ōnōwoca tōō æmænte angā ate ēñente goda iñōmō tōmēnāni iñōmō edæ Wængonguī wēnāni Īnānīpa. ¹⁵ Mīnitō guīñente mīni wægāinō beyænque ñā cæyænte bai nē quēwēngāimīni inte ñōwo wæætē Wængonguī Ōnōwoca ingante ænīnque wīi adobai guīñente wæmīni Īmīnīpa. Wæætē Wængonguī Ōnōwoca pōnō cæcā beyænque mīnitō nāwā wēmīni bamīnīpa. Ayæ tōmengā Ōnōwoca pōnō cæcā ænte ēwocadinque mōnō guīñēnedāmaī inte edæ, Mæmpo, botō Wæmpo, ante apænemōmpa. ¹⁶ Edæ mōnō mīmōnē ponte apænedinque Wængonguī Ōnōwoca incæ, Bitō Wængonguī nāwā wēmi Īnōmi Īmīpa, ante apæñecampa. ¹⁷ Īnīnque mōnō Wængonguī wēmō Īnōmō inte tōmengā nānō pōnonguincoo nē ænguīmō Īmōmpa. Edæ Codito tōnō āanque bai caate wæmō Īnīnque mōnō tōmengā ñāō bai nānō ēmō bai ñāō adobai ēmōnīnque tōmengā tōnō edæ godongāmæ ænguīmō Īmaīmōmpa.

Ñāō bai mōnō entawēngūimāmo

¹⁸ Botō Īmaī ante pōnēmōpa. Nōwo caate mōnō wæpāmo iñōmō pōnōmenque iñōnte Īncayæ ate ñāō bai mōnō ēmōngūimāmo guiquēnē wīi adobai wædænque inte godōmenque nangui pōnī Īngæimpa. ¹⁹ Ēyedēnō Wængonguī wēnāni tæī ēmōnte badīnque edonque a ongonquīnānīi, ante acæte ante edæ Wængonguī nānō badongaincoo incæ nangui aīnente wædinque wānō conte bai ongoncoo. ²⁰ Edæ wænæ wænæ cædāmaī incoo iñōnte mōnō waocabo mōnō ēñēnāmaī cægāinō beyæ Wængonguī nānō badongaincoo ōnoncooque bai bagatīmpa. Wīi nāmā ānō beyæ mānōmaī bagatīmpa. Wæætē Wængonguī nē, Īncayæ ate watapæ bacæimpa, ante angaingā inte adocā angā beyænque ōnoncooque bai bagatīmpa. ²¹ Edæ Wængonguī nānō badongaincoo ñōmænguincooque inte

yæguincamenca nã cæyænte bai wæyoncoote Wængongui gâ pe æmpote bai godô cæcâ beyænque nômænâmai inguincocoe bacæcoimpa. Mönö Wængongui wêñæmô iñômönte tömengä pönö nïmpo cæcâ ate mönö abæ tawænte bai tæi emonte bamö bai tömengä nänö badongaincoo adobai abæ tawænte bai müncocoe bacæcoimpa. ²² Wêñæ nantate, Æiquedö êñaqingäa, ante nâni wæ bai Wængongui nänö badongaincoo incæ nïwo ganca godongämæ nantate bai, Æiquedö waa baquii, ante ö ö wæconcoopa.

²³ Ayæ Wængongui mönö imonte mä pönöninque tömengä Önöwoca ingante pönongä ænte do ewocamö inömö inte mönö adobai, Mönö baö müñö êñaquinque æiquedö Wængongui wêñæmô ædæmö baquii, ante nangui æinente wänö conte ö ö wæmompä. ²⁴ Edæ Codito, Botö iincayæ ate badömo ate watapæ bacæimpa, ante pönëedâni, äninque mönö imonte edæ ængä beyænque quëwëmompä. Æinque mäninö edæ, Watapæ bacæimpa, ante nänö angainö iñömö inque ba acæte ante mönö ayæ wänö cömompä. Mäninö watapæ do ba amö bai mönö, Ayæ ate watapæ ba acæimpa, ante änamai incædömöimpa. Waocä do æningä inte, Æinente wæbopa, ante quinante anguingäa. Æinæmpä edæ dobæ ængantapa. ²⁵ Æinque mönö æinente wædö ante mönö cöwë ængæimpa, ante wede pönëmö Æinque mönö wæntædâmai inte ee wänö cömompä.

²⁶ Ayæ adobai mönö aquimö pöni iñömönte Wængongui Önöwoca mönö beyæ cæcampa. Æbänö cæte Wængongui ingante apænequii, ante êñênâmai inte wæyömönte tömengä wii waomö tededö ante apænedinque tömengä öñöwënenque mönö beyæ apæñecampa. Mäninö tömengä nänö tededönö ante mönö quiquëñënö inte öñöneca ædö cæte tedequii. ²⁷ Mönö Wængongui quimö tæiyæ wæmö ewocamö iñömönte Wængongui Önöwoca iñömö mönö beyæ apænedinque, Mæmpo Wængongui nänö angainö bai bacæimpa, ante pönëninque apæñecampa. Æinque mönö mümönö do adongä inte Mæmpo Wængongui iñömö edæ, Botö Önöwoca æbänö pönëninque apæñecäa, ante do êñëngampa.

Në tæi emöninque mönö gänä cæmö imompä, ante

²⁸ Wængongui, Botö änö bai inque bacæimpa ante cæcæminimpa, ante mönö imonte aa pegacäimpa. Æinque tömengä nänö änö bai në cæmö inte mönö tömengä ingante waadete pönëmö iñömönte Wængongui wæætë mönö beyænque cöwë waa pönö cæcâ ate mönö edæ, Inguipoga æbâmë ba incæte mönö waa pöni quëwënguinque impä, ante edæ do êñëmompä. ²⁹ Doyedë

badöninque Wængongui iñömö, Botö Wengä Bamoncadengä iñongante iñäni tömengä biwüidi badinque nangui inäni yebænte bacædänimpa, angacäimpa. Æinque tömengä mänömai cæcæte ante cædinque, Do botö në againäni iñömö tömënanique botö Wengä nänö entawëñö bai adobai entawencædänimpa, ante badongacäimpa. ³⁰ Ayæ, Botö Wengä nänö entawëñö bai entawencæminimpa, ante nänö në againäni iñönänite do aa pegacäimpa. Ayæ tömengä nänö aa pegainäni adodâni inänite, Botö ayömo munitö nö cæminäni bacæminimpa, ante badongacäimpa. Tömengä ayongä nö cædâni në bagainäni inänite tömengä, Minitö tæi emonte badinque nãö bai emonte bacæminimpa, ante do badongacäimpa.

³¹ Æinque æbänö ante angüimoo. Edæ Wængongui mönö mönö godongämæ cæcâ iñongante æcänö mönö imonte bæ taquingäa. Edæ dæ angampa. ³² Tömengä Wengä adocanque iñongante Wængongui pæ gompodâmai inte da pönongä pöninque tömengä wæætë mönö tömämö beyæ teëmente wæætë wængacäimpa. Mäningä ingante da pönöninque Wængongui tömengä nänö æagaincoo ante ædö cæte pönönâmai inguingäa. Edæ, Botö Wengä tönö godongämæ entawencæminimpa, ante Wængongui tömancöo do pönongä æmompä. ³³ Wængongui mönö imonte apænte ængä ongöñömönte æcänö, Wiwa cæbipa töö, ante apænte anguingäa. Æinæmpä Wængongui incæ, Botö ayömo munitö edæ nö cæminäni iminipa, ante badongä bamöimpa. ³⁴ Itota Codito në wængaingä inte godömenque nâni ömæmongaingä inte Wængongui tömëmæ inö do tæ contate a ongongampa. Ayæ mönö beyæ Wængongui ingante cöwë apæñecampa. Tömengä mänömai cæcâ adinque mönö imonte æcänö, Bitö wænguinque, ante apænte anguingäa. Æinæmpä wii eyepæ inänipa.

³⁵ Codito mönö imonte waadete pönente aayongä æcänö gâ pe æmpote ö ænguingäa. Edæ, Ædö cæte cæquimöö, ante wæmö incæ caate wæwëmö incæ mönö imonte togænte pänäni wæmö incæ mänömai wæyömönte mönö Codito dicæ mänifedë edæ waad-edâmai inguingäa. Mönö wænguinque gue ænente wæmö incæ weocöo ömaamö inte wæmö incæ tömengä mönö imonte dicæ waadedâmai inguingäa. Quiëmë beyæ, Mini wænguinque, ante wææ änäni wæyömönte yaëmenca tacadâni wæyömönte Codito mänifedë dicæ waadedâmai inguingäa. ³⁶ Edæ Wængongui ingante ämotamini ante bai yewæmongatimpä.

“Bitö beyænque wæñönäni wængui wæ, ante mönitö tömäa itædë wæmönipa.

Obegaidi inānite, Wænongæimpa, ante
ānāni bai,

mōnitō imōnite adobai, Wænongæimpa,
ante piīnāni wæmōnīpa,”

ante yewæmonte ongō aedāni.

³⁷ Edæ mānimāmo mōnō wæpāmo
tōmāmāmo pō ate wædōmō incæte mōnō
imonte nē waadete pōnengā nempo
ongōninque mōnō tæi ēmonte godōmenque
gānā cæte ongōmōmpa. ³⁸ Botō do ēfēnte
pōnēmōpa. Mōnō nē waadete pōnengā
nempo ongōñōmonte mōnō wænguimāmo
incæ mōnō quēwenguimāmo incæ an-
quedoidi incæ wēnæidi incæ ñōwōpāmo
incæ iīncayæ pōnguimāmo incæ tæi nāni
piīæmāmo incæ mānimāmo tōmāmāmo ædō
cæte mōnō imonte gā pe æmpote ò ænguī.
³⁹ Ayæ edæ æibæ mōnō æite wæquimāmo
incæ guibæ mōnō wæænte wæquimāmo
incæ quīēmē Wængonguī nānō badon-
gaimāmo incæ mānimāmo tōmāmāmo iñōmō
mōnō Codito nempo ongōñōmonte ædō cæte
gā pe æmpote ò ænguī. Edæ Wængonguī
nānō waadete pōnēnō entawēninque mōnō
Awēnē Itota Codito iñōmō mōnō imonte
waadete pōnēninque pæ gompyongante
mānimāmo tōmāmāmo incæ gā pe æmpote
ò ænāmāi ingæimpa. Amo ēñēmāimīnīpa.

9

*Idægoidi inānite Wængonguī apænte an-
gacāimpa, ante*

¹ Botō iñōmō edæ mīmō entawēmo inte
nāmā apænte pōnēñōmote Wængonguī
Tæiyæ Waēmō Ōnōwoca adoyōmō ante
apæncæ iīnque botō ædō cæte babæ
wapiticæ anguīmoo. Edæ Codito nempo
quēwēnōmo inte botō nō pōni apænedinque
iīmāi āmōpa. ² Mīmōno cōwē cæwēnente
wæwēmo inte botō iīmāi ante pōnēninque
nanguī wæbōpa. ³ Botō guidēnāni botō tōnō
adodāni inōnāni iñōnānite Wængonguī ængā
beyænque quēwencædānīmpa, ante botō
nanguī āninque wæbōpa. Iīnque Wængonguī
tōmēnāni inānite, Quēwencæmīnīmpa, ante
æninque wæætē botō Codito nempo
quēwēñōmote botō imote piīninque tatodonte
wido cæcā bai botō Ao ante piyænē
cæcædōmōimpa.

⁴ Tōmēnāni iñōmō idægoidi inānīpa.
Wængonguī pæpogacā pædāni iīnque
tōmēnānique tōmengā wēnāni ingadānīmpa.
Tōmēnāni inānite Wængonguī ñāō entawente
nānō tæi ēmōnō ante odōmongā adinque
tōmēnānique nē agāināni inānīpa. Tōmēnāni
inānite apænedinque Wængonguī, Botō
pōnō cæbo ate mīnitō Ao āmīni iīnque
mōnō godongāmæ waa cæcæimpa,
ante cægacāimpa. Iīmāi cæedāni, ante
tōmengā tōmēnāni inānite tāno wææ
angā ēfēnte mānīnō nānō wææ angāinō

ante tōmēnānique nē mangāināni inānīpa.
Wængonguī oncōnē ñæncōnē wadāni gui-
idāmāi iñōnānite idægoidique guīte tōmengā
ingante waa ate ædæ wæænte apænedānīpa.
Tōmēnānique inānite Wængonguī, Cōwē waa
cæcæboimpa, ante mā apænegacāimpa.
⁵ Mōnitō, Mæmæidi, ante mōni nē angāināni
incæ idægoidi mæmæidi adodāni inānīpa.
Iīnque tōmēnāni Pæingā badinque mōnō
Codito inguipoga ēñagacāimpa. Tōmengā
iñōmō tōmāmō Wængonguī inongā ingampa,
ante adinque mōnō tōmengā ingante
apænedinque, Tōmēni toquinque pōnō
waa cæbi æmōnīpa, ante mōnō cōwē ñimpo
cædāmāi apæncæcāimpa. Mānōmāi impa,
ante botō, Amēē, āmōpa.

⁶ Idægoidi quēwencædānīmpa, ante
nānō angāinō bai Wængonguī cædāmāi
ingacāimpa, ante botō dicæ āmogaa. Wæætē
edæ iīmāi impa. Nāwā idægoidi nāni
wede pōnēnō bai pancadānīya pōnēnāmāi
ināni iñōnānite botō tōmēnāni inānite,
Nāwā idægoidi inānīpa, ante apænedāmāi
imōpa. ⁷ Edæ Abadāō wodi pæināni
incæ pancadānīya iñōmō, Abadāō wodi
wēnāni, mōnō ānōnāni wīi inānīpa. Wæætē,
“Botō ayōmo Itæca wēnānique bitō pæināni
inguināni inānīpa,” ante mæmæ Abadāō
ingante Wængonguī angampa, ante
yewæmongatīmpa. ⁸ Mānōmāi i iīnque
Abadāō tapæicā nē ēfēnte pædāni inānite
Wængonguī, Abadāō wēnāni, ante anganta-
wogaa. Wæætē Abadāō wodi ingante
apænedinque, Bitō wēnāni bacædānīmpa,
ante Wængonguī nānō nē angāināni
guīquēnē tōmēnānique tōmengā wēnāni
inānīpa. ⁹ Edæ, “Iīñedē impa, ante botō
ānōñedē botō adodō pōmo ate māniñedē
ate edæ Tada incæ wēñængā onguīñængā
ingante mancæcāimpa,” āninque Wængonguī,
Mānīnō botō ānō bai cōwē cæcæboimpa,
angacāimpa.

¹⁰ Wīi māninque impa, ante ēñengæimpa.
Godōmenque iīmāi ante mōnō pōnengæimpa.
Wæmpocā adocanque tapæicā ate Adebeca
wodi wēna āncadēnaque ēñagadāimpa.
Mānīna wæmpocā iñōmō mōnō wæmæ
Itæca wodi ingacāimpa. ¹¹ Tōmēnā wēna
ayæ ēñadāmāi iñedē ædō cæte wēnæ wēnæ
cæquīnaa, ædō cæte waa cæquīnaa. Incæte
edæ Wængonguī, Iīngā ingante apænte
æncæboimpa, ante nānō angāinō ante cōwē
bacæcāimpa, ante cædinque, ¹² tōmēna ayæ
cædāmāi iñōnate Wængonguī nē aa pedongā
inte, “Bamoncadengā incæ ayæmengā
ingante nē cæcā incæcāimpa,” ante
Adebeca wodi ingante apænegacāimpa.
¹³ Adobāinō ante Wængonguī beyæ
yewæmongadānīmpa. “Aacobo ingante
waadete pōnengaboimpa. Etawoo in-
gante guīquēnē piīnte agaboimpa,” ante

yewæmongatimpa.

¹⁴ Ìninqe mõnõ æbånõ anguii. Wængongui dicæ nõ cædåmai ingantawogaa. ¹⁵ Wæætê Mõitee wodi ingante apænedinque Wængongui iimaï angacåimpa. “Waocå adocanque ingante botõ, Wii pånîewædõ, åninqe tõmengå ingante do godõ ñimpo cædinque pånåmai incæboimpa. Adocanque ingante nè waadete cæinêmo inte botõ tõmengå ingante do godõ waadete waa cæcæboimpa,” angacåimpa, ante yewæmongatimpa. ¹⁶ Ìninqe waocå nanguï cæinengå incæte waocå nanguï cæcå incæte Wængongui wii waocå nånõ cædõ beyænque apænte ængampa. Wæætê nånå nånõ waadete waa cæinênõ beyænque Wængongui waocå ingante godõ apænte ængampa. ¹⁷ Edæ awênê Padaõnõ wodi ingante apænedinque Wængongui, “Botõ iimaï ante cæcæte ante bitõ imite ængõ cætabopa. Edæ bitõ imite ængõ cædinque tæi piñænte pönõ cæbo adinque waodåni, Wængongui tæi piñængå inte månõmai cæcampa, ante botõ êmõwo ante inguipoga tõmå apænedåni do êñencædånimpa, ante cætabopa.” Wængongui månõmainõ ante Padaõnõ ingante apænecantapa, ante yewæmongatimpa. ¹⁸ Ìninqe Wængongui, Adocanque ingante godõ waadete ñimpo cæcæboimpa, åninqe tõmengå ingante do godõ waadete ñimpo cæcampa. Wæætê wacå ingante guiquênê, Godõ cæbo ate mimõ õmædengå bacæcåimpa, åninqe Wængongui tõmengå ingante do cæcå ate edæ mimõ õmædengå bate wæcampa.

¹⁹ Månõmainõ ante yewæmõmo adinque bitõ wabånõ iimaï anguimi, ante awædõ. “Ìñæmpa mõnitõ Wængongui nånõ ånõ ante Baa ånåmai iñõmõnite tõmengå, Minitõ beyænque impa, ante quinante piinte angåå.” Månõmainõ ante åmitawoo. ²⁰ Bitõ iñæmpa õnõmique inõmi inte Wængongui ingante wæætêdõ wæætê åmii. Nê badongå ingante tõmengå nånõ nè badõninca incæ dicæ, “Botõ imote quinante månõmai badõwemii,” ante dicæ anguii. ²¹ Nê bædongå iñõmõ daiþo pancaiya æninque waa põni wamoncade bædinque ado daiþo pancaiya æninque õnonque ewenguincade bæyongante æcånõ nè bædingå ingante Baa anguingåå. Nê bædongå iñõmõ nè ånongå inte bæcampa. Edæ Baa anguimii.

²² Wængongui nånõ nè piinåni iñõmõ tõmênåni nåni õmæe ewente wæquinque wiwa cæyõnånite tõmengå piyænê cædinque wantæpiyæ pånåmai inte ee ongongantawo. Ìñæmpa tõmengå nånõ piimåmo ante adinque do wæcædånimpa, ante cædinque ayæ tõmengå nånõ tæi piñæmåmo ante edonque acædånimpa, ante cædinque Wængongui månõmai ee ongongå apa ånewêê. ²³ Ayæ

wæætê, Botõ waadete godõ waa cæbo ænåni inte edæ tõmênåni iñõmõ botõ ñåõ bai botõ êmõnõ ante acædånimpa, ante cædinque Wængongui månõmai pånåmai inte edæ ee cæcampa. Wæætê, Tõmênåni ñåõ iñõmõ quëwencædånimpa, ante tõmengå godõ badongå ate tõmênåni ñåõ bai êmõnånipa. ²⁴ Edæ mõni oodeocabo iñõmõnite minitõ oodeomîni inåmai iñõmînite Wængongui mõnõ tõmåmõ imonte månõmai cæcæte ante aa pegacåimpa. ²⁵ Wængongui iimaï angampa, ante Ootea wodi yewæmongacåimpa.

“Botõ guidênåni inåmai iñõnånite botõ wæætê,

Botõ guidêmîni, ante apænecæboimpa. Onquiyængå botõ nè waadedåmai ingaingå iñongante botõ wæætê,

Botõ nè waadebi impa, ancæboimpa.

²⁶ Ayæ, ‘Botõ guidêmîni inåmai imînipa,’ ante botõ ongonte åñõmõ adoyõmõ ongõninque

botõ wæætê edæ, ‘Botõ Wængonguimo nè Quëwëmo wëmîni imînipa,’ ancæboimpa.”

Ante adocå Wængongui nånõ ånõ ante yewæmongacåimpa. ²⁷ Idægoidi inånitedõ ante yedæ åninqe Itaiya wodi iimaï apænegacåimpa. “Gåwapæ wedeca êmõnaicoo nanguï põni õñõ bai idægoidi adopodåni nanguï põni inåni incæte pancadånिया guiyå wææntodõni bai månimpodånique quëwencædånimpa. ²⁸ Edæ Wængongui, Inguipoga quëwênåni inånite apænte åninqe botõ angainõ bai do edæ cæcæboimpa, ante nè apænegaingå inte tõmengå adocå, Idæwaa, ante quingæ põni edæ ñinque cæcæcåimpa,” ante Itaiya wodi yewæmongacåimpa. ²⁹ Adocå Itaiya wëênê iimaïnõ ante nånõ apænegainõ bai impa.

“Mõnõ Awênê nè Tæiyæ Awênê tæi piñængongå inte dodåni inånite, Minitõ pæinåni yebænte nanguï inåni bacædånimpa, ante cædinque pancadånिया inånite ata cæpocå quëwengadånimpa. Månõmai ante cædåmai ingå bai,

mõnõ wæætê Todõmå quëwengainåni bai dæ badinque Gõmoda nåni quëwêñõmõ dæ ba bai mõnõ adobaï edæ dæ bacædõmõimpa,” ante nånõ angainõ bai impa.

Idægoidi adobaï pönëninque quëwenguênênåni inånipa

³⁰ Ìninqe æbånõ ante anguii. Oodeo inåmai inåni guiquênê, Nõ entawëmõni bacæmõnimpa, ante ånåmai ingadånimpa. Incæte Wængongui godõ cæcå beyænque tõmênåni wede pönëninque wede nåni pönênõ beyænque Wængongui ayongå nõ entawênåni do badånipa. ³¹ Idægoidi

guiquēnē, Nō cædāni, ante mōni wææ angainō beyænque nō entawēmōni bacæmīnīmpa, ante nē angaināni inte eyepæ cædāmaī īnānīpa. ³² Quinante eyepæ cædāmaī īnānīi. Tōmēnāni wede pōnēnāmaī īnāni inte wæætē edæ, Mōnō nanguī cædinque nō cæmōni bacæmōnīmpa, ānīnque oda cæte nāni pōnēnō beyænque dicaboga tee tēwate bai cædinque eyepæ cædāmaī ingadānīmpa. ³³ Edæ do Wængonguī beyæ yewæmongatīmpa.

“Aquēnē quēwēnānīi. Botō Codito ingante Tiōno nāni quēwēnōmō dica bai gō cæbo gongængā adīnque edæ waodāni dicaboga tee tēwate bai pōnēnāmaī īnāni inte tæ go wææncædānīmpa.

Tōmēngā adocā ingante nē pōnēngā guiquēnē cōwē edæ guingo imōnāmaī inte quēwēncæcāīmpa,” ante yewæmongatīmpa.

10

¹ Botō tōniīnamīni ēñēdāni. Idægoidi quēwēncædānīmpa, ante botō mīmōnē nanguī aīnente wædinque Wængonguī ingante apænedīnque botō, Bitō æmī beyænque quēwēncædānīmpa, ante cōwē apænebopa. ² Wængonguī beyæ nō cæcæīmpa, ante cæīnente wædānīpa, ante nāwangā īmpa. Incæte tōmēnāni, Wængonguī beyæ nō cæcæte ante æbānō cæquīi, ante ēñēnāmaī īnāni inte ōnonque cæte wædānīpa. Botō, Mānōmaī īmpa, ante nē apænebo īnōmo īmpa. ³ Edæ Wængonguī pōnō badongā ate mōnō tōmēngā ayongā nō entawēmō bamōmpa, ante ēñēnāmaī īnāni inte idægoidi īñōmō, Nāmā mōnō cædō beyænque nō cæmō bacæīmpa, ante cædinque edæ oda cægadānīmpa. Mānōmaī cædinque tōmēnāni Wængonguī nānō nō cægānō ante edæ Baa angadānīmpa. ⁴ Nō cæmō bacæte ante Wængonguī nānō wææ angainō ante ēñente cæquēnēmō inte mōnō tōmāmō wīi eyepæ inte wægāmōīmpa. Mānōmaī inte wæyōmonte Codito īñōmō, Mīni pōnencabo Wængonguī ayongā nō entawēmīni bacæmīnīmpa, ante cædinque mānīnō Wængonguī nānō wææ angainō ante tōmānō ante īnque cægacāīmpa. Īnīnque tōmēngā mānōmaī īnque cæcā adīnque Wængonguī mōnō īmonte wæætē wææ ānāmaī īngāmpa.

⁵ Īmaī cædāni, ante botō wææ angainō ēñente cædinque nō cædāni badānīpa, ante Mōitee wodi īmaī ante yewæmongacāīmpa. “Nē ēñente cæcā īñōmō tōmēngā nānō ēñente cædō beyænque quēwēncæcāīmpa,” ante yewæmongacāīmpa. ⁶ Wæætē, Mōnō wede pōnencabo æbānō cæte Wængonguī ayongā nō entawēmō īmōō, ante īmaī ante adocā yewæmongacāīmpa. “Bitō, ‘Æcānō ōnædē

æi āñete wæænguingāā,’ ante nāmāneque ānāmaī ie.” Mānōmaī ante tōmēngā, Codito ingante æi āñete wææncæte ante mōnō pōnēnāmaī ingæīmpa, ante ancæte ante yewæmongacāīmpa. Īñæmpa Codito pōnāmaī īngāmpa diyæ æite māwæmī wæænguingāā. Dobæ edæ inguīpoga pongacāīmpa. ⁷ “Ayæ, ‘Æcānō tadōmēngadæ wæi āñete ænguingāā,’ ante ānāmaī ie.” Īñæmpa Codito ayæ ōñongāmpa diyæ wæite mæmī æænguingāā. Edæ Codito dobæ nāni ōmæmonte quēwēngāmpa.

⁸ Īnīnque, Mōnō wede pōnencabo æbānō nō cæmō bamōō, ante æbānō ante yewæmongacāī. Edæ, Wede pōnēngæīmpa, ante mōnitō apænemōni mīni ēñēnīne ante adode ante īmaī ante yewæmongacāīmpa. “Wængonguī nānō nō ānōne īñōmō edæ bitō weca eyequeī pōnī ēnepa. Edæ bitō ōnōne tedeyōmī bitō mīmōno pōnēñōmī tōmēngā nānō nō ānōne edæ adoyōmō pōnī ēnepa.” ⁹ Æbānō cæte quēwēngūi, ante īmaī ante ēnepa. Itota Codito Tæiyæ Awēnē īnongā īngāmpa, ante bitō ōnōneca apænedīnque, Itota Codito wæante ōñōñongante Wængonguī angā nāni ōmæmongacāīmpa, ante bitō mīmōno pōnēni adīnque tōmēngā ængā beyænque quēwēncæbiīmpa, ante adode incæ ēnepa. ¹⁰ Mīmōno edæ wede pōnēnīnque mōnō Wængonguī ayongā nō entawēmō bamōmpa. Mānōmaīnō ante wede pōnēmōpa, ante ōnōneca apæneyōmonte tōmēngā ængā beyænque mōnō quēwēmōmpa.

¹¹ Codito ingantedō ante apænedīnque, “Tōmēngā ingante nē wede pōnēngā īñōmō tōmēngā edæ guingo imōnāmaī incæcāīmpa,” ante Wængonguī angā ēñente yewæmongadānīmpa. ¹² Edæ mōnitō ood-eomōni īñōmōnīte mīnitō wæætē oodeomīni īnāmaī īñōmīnīte mōnō tōmāmō īmonte adīnque mōnō Awēnē īñōmō edæ, Adoyōmō pōnī īmīnīpa, ante acāmpa. Īnīnque tōmēngā adocā tōmāmō Awēnē īnongā īngāmpa. Ayæ tōmēngā ingante aa pemō ēñēnīnque tōmēngā īñōmō edæ tōmāmō īmonte nanguī pōnī pōnō cæcā æmōmpa.

¹³ Īmaī ante Wængonguī beyæ ante yewæmongatīmpa. “Mōnō Awēnē ēmōwo ante apænedīnque aa pedāni ēñēnīnque mōnō Awēnē īñōmō edæ tōmēnāni tōmānāni īnānīte ængā beyænque quēwēncædānīmpa.”

¹⁴ Īnīnque tōmēngā ingante nē pōnēnāmaī īnāni īñōmō ædō cæte tōmēngā ingante aa pequīnānīi. Ayæ tōmēngā ēmōwo ante ēñēnāmaī īnāni īñōmō tōmēngā ingante ædō cæte pōngūnānīi. Ayæ tōmēngā ēmōwo ante wadāni gote apænedāmaī īñōnāni tōmēnāni ædō cæte ēñēngūnānīi. ¹⁵ Ayæ edæ wadāni da godōnāmaī īñōnāni nē apænequēñēnāni wæætē ædō cæte

gote apænequinānii. Iimainō ante edæ Wængongū beyæ ante yewæmongatimpa. “Tömengā waa pōni nānō cægainō ante nē watapæ apænedāni iñōmō tōmēnāni nāni apæneca gote cægōniwa iñōmō edæ waa pōni ēwadānīpa,” ante nāni yewæmonte angainō bai impa. Edæ nē apæneca godāni inānite Wængongū waa acampa.

¹⁶ Mōnō Awēnē ingantedō ante watapæ apænedāni ēñēninque idægoidi pancadāniya Ao angadānīpa. Pancadāniya guiquēnē Baa angadānīpa. Tōmēnāni mānōmainō nāni cædinō ante Itaiya wodi iimāi ante yewæmongacāimpa. “Awēnē Wængongū ēñēmi. Mōnitō apænemōni tōmēnāni nāni ēñēnō ante edæ æcānō ēñente pōnengāā. Iñæmpa nē pōnengā iñōmō edæ dæ angā awædō,” ante yewæmongacāimpa. ¹⁷ Iñinque gode ānāni ate nē ēñēnānique wede pōnēnāni badānīpa. Ayæ Codito nānō ānōnō ante gode ante apænedāni beyænque nē ēñēnāni badānīpa. ¹⁸ Iñinque botō, Māninō ante idægoidi gobæ ongōnānīpa diyæ ēñēnāmai inguinānīi, āmopa. Do ēñēnānitapa, ante edæ iimāi ante Wængongū beyæ yewæmongatimpa.

“Nē apænedāni inguipoga tōmāo gote tededāni ēñēnānīpa.

Waadāni inguipoga nāni quēwenganca quēwēñōnānite māninō tōmēnāni nāni apænedō ante do ēñēnānīpa,” ante yewæmongatimpa.

¹⁹ Ayæ wæætē, Idægoidi ōnōmonca ēñēninque ōmæcadāni inānīpa diyæ ēñēnāmai inguinānīi. Do ēñēnānitapa. Edæ Mōite wodi incæ iimāi ante yewæmongacāimpa.

“Wadāni ōnōnānique iñōnānite botō godō waa cæbo adinque

mīni idægocabo wæætē, Mōnitō Imōnite wīi pōnō cæbii, ante piinte wæcæmīnīpa.

Ayæ wadāni ocai ōmæcadāni iñōnānite botō godō waa cæbo adinque mōnitō wæætē nē piinte amīni bacæmīnīpa,”

Ante cæcæte ante Wængongū pōnō cægacāimpa. ²⁰ Itaiya wodi guiquēnē Wængongū beyæ ante guīñēnāmai inte apænegacāimpa.

“Wadāni iñōmō botō imote ante diqui diqui mināmai ināni incæte do adānitapa.

Ayæ, Wængongū ingante ainēmōnīpa, ante ānāmai iñōnānite, Botō imote aedāni, ante botō odōmōmo adānitapa.”

²¹ Āninque Itaiya wodi idægoidi inānitedō ante apænedinque, “Ēñēnāmai inte Baa ānōnāni iñōnānite botō, Pōedāni, ante tōmāā itædē ōnōmpo compo compo cæbo incæte pōnāmai inānitapa.”

11

Idægoidi pancadāniya inānite Wængongū apænte ængā

¹ Iñinque botō iimāi ante apænebopa. Tömengā quīnāni iñōnānite Wængongū dicæ idægoidi inānite Baa angantawogaa. Iñæmpa botō adobo nāwā idægobo imopa. Abadāo wodi pæimo inōmo inte botō edæ Beencaminō wodi pæimo inōmo inte tōmengā pæināni tōnō adocabobo tōmēmo inōmo imopa. ² Idægoidi botō quīnāni incædānīpa, āninque Wængongū wēēnēñedē pōni mōnitō imōnite adinque do apænte ængacāimpa. Iñinque mōnitō tōmengā nānō nē agaimōni iñōmōnite tōmengā cōwē Baa ānāmai ingacāimpa. Idægoidi inānite piinte apinque Ediya wodi Wængongū ingante apænegacāimpa, ante æbānō yewæmonte ongōmpa, ante mōnitō adāmai imīnitawo.

³ “Awēnē ēñēmi. Bitō beyæ nē apænedāni inānite wæñōninque idægoidi godōmenque cædinque, Wængongū qui, ante nāni iya tāinca bæ tadinque edæ wido cædānitapa. Ayæ botō adoboque inte edæ ayæ quēwēñōmote botō imote wæñoncæte ante cædāni wæbo abi.” ⁴ Āñongante

Wængongū, “Iñæmpa botō tiæte mūido ganca mānimpodāni inānite, Botō quīnāni inānīpa, ante wææ gōmpo quēwēnāni apa quēwē. Wadāni nāni, Mōnitō wængongū Baado ingampa, nāni ānongā weca botō quīnāni iñōmō edæ da guicapodāmai inānīpa cæbii,” angacāimpa, ante nāni yewæmongainta adāmai imīnitawoo.

⁵ Nōwo iñōmō edæ adobāi impa. Idægomōni mōni cabo incæ mēa pōni imōni inte Wængongū ingante Baa ānāmai iñōmōnite tōmengā mōnitō imōnite waadete pōnō cædinque, Botō quīmīni imīnīpa, ante apænte ængampa. ⁶ Iñinque, Wængongū waadete pōnō cædinque apænte ængampa, ante adinque tōmēmonque waa cæmō beyæ ædō cæte Wængongū apænte ænguingāā.

Iñæmpa tōmēmonque waa cæmō beyæ Wængongū mōnō imonte apænte ængā bai, Wængongū waadete pōnō cæcampa, ante ædō cæte anguēnē i. Wæætē edæ tōmēmonque waa cæmō beyæ Wængongū apænte ængā bai tōmengā adocā ædō cæte nānō waadete pōnō cædō beyænque mōnō imonte apænte ænguēnengāā. Iñæmpa Wængongū waadete pōnō cædinque apænte ængā iñinque, Tōmēmonque waa cæmōmpa, ante ædō cæte angūi.

⁷ Mānōmai i iñinque æbānō ante angūi. Edæ idægoidi tōmēnāni nāni nanguī æinēnō ante diqui diqui mīnte ænāmai iñōnāni mōnō iñōmō Wængongū nānō nē apænte ængaimō imō iñōmō edæ do æntamōmpa. Nē ænāmai ināni inānite Wængongū ee ayongante mīmō ōmædēnāni bagadānīpa. ⁸ Iimāi ante Wængongū beyæ nāni yewæmongainō bai ingatimpa.

“Tömēnāni inānite Wængonguī godō cæcā ate mōwo mōlente bai wædāni inte tömēnāni awinca ēmōnāni incæ fīowo ganca adāmai inte wædānīpa. Önōmonca ēmoncadāni incæ edæ ēñēnāmai inte wædānīpa,” ante yewæmongatīmpa. ⁹ Ayæ awēnē odeye Dabii wodi Wængonguī ingante apænedinque iīmaīnō ante apænegacāīmpa. “Wængonguī ēñēmi. Waodāni nāni wænguinque gote ææmæ bedāni bai cædinque iīnāni iñōmō edæ wapiticæ nāni towēnōnō ante gote towēnānīpa. Incæte bitō godō cæbi ate tömēnāni nāni towēnō beyæ edæ wæncædānīmpa, āmopa.

Tömēnāni tee tēwate bai oda cæte wæyōnāni bitō godō pāmi wæcædānīmpa, āmopa.

¹⁰ Bitō godō cæbi ate tömēnāni awinca edæ mæ māmonte bai bamōninque adāmai incædānīmpa.

Ayæ teēmē mongæninque bocæ fīongænte cōwē wæcædānīmpa, āmopa,” ante awēnē Dabii wodi Wængonguī ingante apænegacāīmpa.

Idægoidi ināmai ināni quēwēnānīpa, ante

¹¹ Nōwo wæætē iīmai āmopa. Do oda cædāni incæ idægoidi iñōmō dicæ æmæwo tæ go wæænguīnāni inānitawogaa. Iñæmpa ayæ ate ængæ gantidinque tömēnāni nē quēwenguīnāni inānīpa. Incæte Wængonguī, Tömēnāni ēñēnāmai cædāni beyæ wadāni quēwēnāni adinque idægoidi wæætē, Mōnō quēwengade impa, ante piīnte wæcædānīmpa, ante godō cæcā ate idægoidi edæ oda cægadānīmpa. ¹² Iñinque idægoidi ēñēnāmai cædinque ænāmai ināni beyæ mōnō ingui-poga tömāmæ mōnō quēwencabo wæætē edæ nanguī pōni æmompā. Tömēnāni ænāmai inte òmæpodāni wædāni beyænque mīnitō idægomīni ināmai iīmīni wæætē nanguī pōni æmīnīpa. Iñinque idægoidi nāni quēwenguīmāmo iīncayæ ate eyepæ pōni ænāni ate edæ æbānō baquī. Edæ idægoidi iīncayæ ate eyepæ pōni ænte entawēnāni beyænque mōnō waocabo tömāmō godōmenque nanguī pōni ænte entawengæīmpa.

¹³ Idægomīni ināmai iīmīni iīmīnite apænebo ēñēdāni. Botō imote Codito, Idægoidi ināmai ināni inānite apænecebiīmpa, ante da godongā gotabopa. Iñinque botō, Mīnitō iīmīnite nē apænebo inte tobopa, ante nanguī tedebopa. ¹⁴ Edæ, Idægoidi ināmai ināni incæ do quēwēnānīpa, ante botō tedebō ēñēnte wædinque botō guīdēnāni idægoidi wæætē, Mōnitō adobaī quēwencæmōnīmpa, ante piīnte wæcædānīmpa, ante tedebopa. Ayæ adodāni pancadāniya godōmenque pōnēninque quēwencædānīmpa, ante cædinque botō edæ nanguī tedebopa.

¹⁵ Idægoidi inānite Baa ante wido cædinque Wængonguī wæætē ingui-poga tömāmæ quēwēmō iñōmonte piyænē cædinque edæ waadete pōnō cægacāīmpa. Iñinque tömengā iīncayæ ate idægoidi inānite Ao ante ængā ate edæ æbānō baquī. Māniñedē ate edæ mōnō wænte òfonte bai inōmō inte edæ mōnō fāni òmæmonte quēwengæīmpa. ¹⁶ Iīmai ante pōnengæīmpa. Pāo pancaboga pancæte bai wædænque ināni inte tāno nāni pōnente quēwencabo iñōmō tæiyæ waēmō ināni iñinque iīncayæ nāni pōnente quēwencabo guīquēnē pāo babo bai adobaī ināni inte tömēnāni adobaī tæiyæ waēmō inānīpa, ante pōnengæīmpa. Tāno pōnengāināni guīquēnē tæcæguinto bai inōnāni inte tæiyæ waēmō ināni iñinque edæ iīncayæ pōnēnāni guīquēnē yæpænto bai inōnāni inte adobaī tæiyæ waēmō inānīpa.

¹⁷ Odibowæ ònonque pæwæ incæ wainca incacæīmpa, ante cædinque waocā tömengā nānō mingāiwæ waa pōni incawæ adinque yæpængō nāmænte godō ònonque pæwæ yæpæntoga mīne tīmongā amīnīpa. Idægoidi iñōmō waocā nānō mīnte pæwæ bai iñōnānite Wængonguī pancadāniya inānite yæpængō wæi fīæmænte bai wido cæcā wædānīpa. Tömēnāni mānōmai wæyōnāni bitō guīquēnē ònonque pæwæ yæpængō bai imitapa. Incæte Wængonguī, Odibowæ yæpængoncoo bai tæcæguinto beyænque odæ yate bai pæte incacæīmpa, ante odibowāa yæpæntoga godō mīni tinte bai cædinque bitō imite waadete pōnō cæcā ate bitō idægoidi beyænque mīmi inte ongōmīpa. ¹⁸ Mānōmai i iñinque bitō wæætē edæ, Wængonguī botō imote pōnō cæcæte ante tömēnāni inānite wido cæcampa, ante bitō nāmā ængō cæcæte ante cædinque idægoidi inānite ante wīi piīnte ancæbiīmpa. Iñæmpa tæcæguinto ēwa bai ināni inte idægoidi iñōmō edæ bitō beyæ dicæ quēwēnāniyaa. Wæætē edæ tæcæguinto ēwa bai ināni beyænque bitō quēwēmīpa, ante apænebo ēñēninque bitō piīmi iñinque, Mānōmai impa, ante tāno pōnēe.

¹⁹ Iñinque bitō, “Odæ yacæīmpa, ante cædinque godō mīne tīmōnāni bai Wængonguī botō imote pōnō cæcæte ante cædinque idægoidi inānite wæætē wido cæcampa,” ante pōnēmitawoo. ²⁰ Bitō pōnēnō edæ nāwangā impa. Incæte edæ tömēnāni nāni pōnēnāmai inō beyænque Wængonguī tömēnāni inānite wido cægacāīmpa. Bitō guīquēnē wede bitō pōnēnō beyænque mīmi inte ongōmīpa. Iñinque bitō guīñēnte wædinque edæ nāmā ængō cædāmai inte edæ, Botō waēmō imo beyæ cæcantapa, ante pōnēnāmai imāwe. ²¹ Iñæmpa nāwā yæpængō bai ināni inānite Wængonguī tapodāmai inongā inte bitō ònōmique iñōmīte dicæ ata cæpoquingāā.

²² Iñinque, Wængonguī nē waadete

cædongā incæ cōwē nē apænte pangā ingampa, ante pōnēe. Tōmengā iñōmō nē oda cædāni inānite pangampa. Wæætē bitō nē waadete cædongā nempo quēwēmi iñinque tōmengā bitō imite waadete cæbaingampa. Incæte tōmengā nempo wīl quēwēmi iñinque tōmengā wæætē bitō imite edæ wæi ñæmænte bai wido cæbaingampa. ²³ Idægoidi guiquēnē, Idæwaa pōnēnāmaī inte awædō, ante ocæ ēmænte pōnāni adinque Wængongui nē tæi piñænongā inte tōmēnāni inānite wæætē ado awæ yæpæntoga godō mīni tīmonte bai pōnō cæcā ate mīlnāni edæ ongōmainānipa. ²⁴ Waodāni waa incawæ yæpængō nāmænte ōnonque pæwæ yæpæntoga godō nāni mīne tīmōnō bai Wængongui wīl adobaī cæcampa. Wæætē edæ bitō ōnonque pædiwæ yæpængō bai iñōmite tōmengā waadete pōnō nāmænte bai cædinque, Nāwā idægobi babipa, ante waa pæwæ yæpæntoga godō mīni tīmōnte bai cæcampa. Bitō imite mænōmaī waa cæcā inongā inte tōmengā idægoidi inānite æbānō godōmenque waa cæbaingāā. Tōmēnāni iñōmō waa pōni pæwæ yæpængoncoo tōmengā nānō wæi ñæmæncoo bai inte wæyōnānite adowæne yæpæntoga godō mīne tīmōnte bai cædinque tōmengā tōmēnāni inānite, Nāwā idægomīni inte mīnitō wæætē mīlminī ongoncæmīnīmpa, ante do cæcæcāimpa.

Idægoidi iñinque bayonte quēwēncædānīmpa, ante

²⁵ Iñānāni ēñēedāni. Mīnitō nāmā ængō cædāmaī incæmīnīmpa, ante cædinque botō wēñēñedē mīni ēñēnāmaī ingainō ante edæ wææ āmopa. Mīnitō idægomīni ināmaī imīni mīni pōnencabo eyepæ pōni mīni yebænganca idægoidi iñōmō ñōwo mīmō ōmædēnāni inte wædōnāni inte edæ māninganca cōwē mīmō ōmædēnāni inte wæcædānīmpa. ²⁶ Iñcayæ ate guiquēnē idægoidi tōmānāni quēwēngūnāni inānipa. Edæ iīmaī ante yewæmōnte ongōmpa.

“Mōnō ñā cæyænte bai tee mōnete bai wæwēñōmōnte nē Ñimpo Cæcā iñōmō Tiōno iñōmō quēwēnte poncæcāimpa. Acobo wodi pæñnāni Wængongui ingante ēñēnāmaī cæte quēwēnāni adinque nē Ñimpo Cæcā iñōmō tōmēnāni nāni ēñēnāmaī entawēnō wadæ cæcā ate tōmēnāni wæætē ēñente cæte quēwēncædānīmpa.

²⁷ Iñinque wēnæ wēnæ nāni cægāinō ante wadæ cæte wido cædinque Wængongui tōmēnāni inānite iīmaī angampa.

Botō pōnō cæbo ate mīnitō Ao āmīni iñinque edæ mōnō godongāmæ waa cæte quēwēngæimpa, ante

Wængongui angampa,” ante yewæmongadānīmpa.

²⁸ Codito ingantedō ante watapæ ēñente pōnēnīnque mīnitō idægomīni ināmaī imīni do quēwēmīni beyæ idægoidi wæætē Wængongui ingante piinte adānipa. Incæte tōmēnāni mæmæidi inānite nē apænte ængaingā inte Wængongui wæætē mæmæidi beyænque ante pōnēnīnque ñōwodāni inānite waadete pōnengampa. ²⁹ Edæ waomō imonte quincōmē pōnongā æññōmōnte Wængongui adodō ō ænāmaī ingampa. Ayæ adobaī waomō imonte aa pedinque tōmengā wadō ante ānāmaī inte edæ adodō ante edæ cōwē aa pecampa. ³⁰ Mīnitō wēñēñedē ēñēnāmaī cæmīni incæte Wængongui iñōmō idægoidi ēñēnāmaī cædāni beyæ mīnitō imīnite wæætē waadete cædinque pōnō ata cæpocā quēwēmīnīmpa. ³¹ Ayæ adobaī mīnitō imīnite pōnō waadete ata cæpocā quēwēmīni beyæ idægoidi ēñēnāmaī cædāni iñōnānite Wængongui ñōwo tōmēnāni inānite adobaī waadete cædinque godō ata cæpocā quēwēnānīmpa. ³² Iñinque tōmengā, Mīni waocabo tōmāminī imīnite botō waadete cædinque pōnō ata cæpocæboimpa, ante cædinque, Mīni ēñēnāmaī cæcabo inōmīni inte mīnitō nāmā ēō toyænte aamō cædāmaī incæmīnīmpa, ante tōmāmō imonte ñā cæyænte bai cæcā wæcongāmōimpa.

³³ Iñinque Wængongui nangui pōni waadete entawēnongā iñongante tōmengā nānō pōnō cædōnō ante mōnō ædō cæte tee mante aquīl. Tōmengā tōmancoo do adongā inte nangui pōni ēñēnongā inte cæcā ingānō anguēnē. Tōmengā edæ, Æbānō i, ante do againgā inte edæ, Æbānō cæquīl, ante do apænte āñongante mōnō waocabo wæætē tōmengā nānō cædō ante ædō cæte ēñenguīl. Tōmengā ædōnō ponte ædōnō gocāā, ante pōnente wædinque mōnō tōmengā ōnōwa amōmpa diyæ taadō aquīl. ³⁴ Edæ iīmaī ante nāni yewæmongainō bai impa. “Mōnō Awēnē æbānō pōnengāā, ante pōnente wædinque æcānō ēñengāā. Ayæ, iīmaī cæquī impa, ante mōnō tōmengā ingante edæ ædō cæte odōmōnte apænequīl. ³⁵ Wængongui ingante æcānō do godongā inte wæætē, Bitō debe imīpa, ante anguingāā. Iñæmpa tōmengā ingante godōmōmpa diyæ debe inguingāā,” ante Itaya wodi nānō yewæmongainō bai impa. ³⁶ Edæ tōmengā nānō pōnongaincooque inte edæ tōmancoo ongōmpa. Mōnō waocabo iñōmō tōmengā badongā beyænque tōmengā quimō baquinque ongōmōmpa. Ayæ adobaī edæ tōmengā badongā beyænque tōmancoo tōmengā quincōoque edæ baquinque ongoncoopa. Edæ tōmengā adocanque pōni ñāō entawente edæ cōwē tæi ēmoncæcāimpa. Mānōmaī impa, ante

mönö, Amëe, ante apænecæimpa.

12

Wængongui quimö imompa, ante cæte quëwengcæimpa

¹ Botö tönifamini ëñëedäni. Wængongui waadete pönö waa cæcä ængaimini inte munitö iimaï cæedäni, ante botö nanguï ämopa. Wængongui qui, ante baö pædæ godönäni waa ængä bai munitö adobaï edæ, Wængongui quimöni imönipa, ante mümüni inte edæ tömengä ingante nämä pædæ godömini ængæedäni. Mänömaï cædinque munitö tömengä önöwa inö mini edæ wæænte nanguï cæquëñö ante edæ do cæmini incæminimpa. Mänömaï godömini æninque tömengä wæætë edæ, Botö ayömo tæiyæ waemö pönömini æmopa, ante tocæcäimpa. ² Inguipogaque ante pönente mini cægaïnö ante ñöwo ñimpo cædinque munitö mümüni mini quëwenguinque ante edæ ocai müinque encate bai nöingä ante pönëedäni. Mänömaï cædinque munitö, Wængongui waa pöni nänö äñönö ante, Æbänö i, ante ædæmö ëñëninque, Tömengä nänö äñö inömo eyepæ pöni impa, ante ëñencæminimpa. Mäninö ante ëñente cæte quëwëmö inte mönö tömengä tönö godongämæ waa tocæcäimpa.

³ Wængongui waadete pönö cæcä ate botö nê apænebo badimo inte iimaï ante apænebopa. Munitö nämä pönëninque, Ñænæmo imopa, ante pönënamäï iedäni. Wængongui pönö badongä ate munitö wede pönëmini badimini inte mini wede pönenganca mäningancaque pönëninque iimaïnö ante pönëedäni. Botö önömoque bai inömo imopa, ante ocai encamini inte töö pöni pönëedäni. ⁴ Mönö baö adoyonque pöni ëñamö incæte wii adodonque mönö cæquëñö ante ëñamompa. Ìninque mönö aquïnö ante awinca ëmöninque mönö dao dao goquïnö ante önöwa ëwamompa. Ayæ wadö mönö cæquïnö ante wayö ëñadinque mönö wæætë wadö mönö cæquïnö ante wayö ëñadinque wayö wayö mönö ëñacoo ëñamompa. ⁵ Ìninque wayö wayö ëñamö incæ mönö baö pæ pagænguïncoo adoyonque i bai mönö adobaï Codito nempo mönö quëwencabo nanguï pöni imö incæte adocabomö inömo imompa.

⁶ Ìninque mönö adocabomö inömonte Wængongui waadete pönö cædinque mönö imonte wadö wadö mönö cæquïnö ante tömänö pönongä æmopma. Ìninque mönö tömengä da pönongä mönö ænganca edæ adoganca wadö wadö cæmopma. Mänömaï ænte cædömö inömonte pancaminiya iminite Wængongui pönö apænecä ëñëninque munitö tömengä beyæ nê apænemini do badinque wede mini pönenganca apæneedäni. ⁷ Wæætë wamüni iminite Wængongui pönö

cæcä æninque munitö wadäni inänite nê cæmini do badinque wadäni beyæ cæcæminimpa. Wæætë wamüni iminite tömengä pönö cædinque odömonte apænecä ëñëninque munitö nê odömonte apænemini do badinque odömonte apænecæminimpa. ⁸ Ayæ wæætë wamüni iminite Wængongui pönö waadete apænecä ëñëninque nê waadete apænemini badinque munitö inömo wæntæye inte wædäni inänite ædæmö apænemini ëñëninque tömënäni wæætë edæ wampo pönëninque tæï piñænte cæcædänimpa. Wamüni iminite Wængongui pönongä æninque nê nënempomüni badinque munitö, Tömëmöni qui, ante wædämaï inte wæætë wadäni nänö ænguëñö ante eyepæ godömini æncædänimpa. Wamüni iminite Wængongui pönö angä ëñëninque munitö wæætë awëñëidi bai nê ämini badinque wadäni inänite nöingä cæte awëñëidi bai ancæminimpa. Wamüni iminite Wængongui ædæmö waadete pönö waa cæcä æninque munitö wæætë ædæmö waadete cæmini do badinque wadäni inänite ædæmö waadete godö waa cædinque edæ wædämaï inte tocæminimpa.

Codito nempo quëwëninque iimaï cæcæimpa, ante

⁹ Botö waadete pönëmopa, ante tedemüni ininque munitö nöinö cæte waadete pönencæminimpa. Wiwa mini cædönö ante piñinque wido cæedäni. Wæætë, Quinö waa cæquï, ante adinque mäinö ante ænte munitö mümönë ædæmö entwëninque cöwë waa cæte quëwëedäni. ¹⁰ Mönö waadete pönencabo imompa, ante pönëninque wacä ingä wacä ingä waadete pönente cæedäni. Wadäni ñænænäni inänipa, ante munitö tömënäni inänite ængö cæte bai cædinque wæætë, Botö wædämo imopa, ante nämä ængö cædämaï iedäni.

¹¹ Tæï piñænte ëwocadinque mönö Awëñë beyæ ante wæntædämaï inte cæedäni.

¹² Watapæ bacæimpa, ante pönëninque tocæminimpa. Caate wæwëmini incæte wæntæye badämaï inte ee cæedäni. Ñimpo cædämaï inte Wængongui ingante cöwë apæneedäni.

¹³ Wængongui quïnäni ænguëñänäni inte wædäni adinque munitö mäincoo wæætë nënempomüni æncædänimpa. Ayæ, Botö oncönë pö guite cænte möedäni, ante wadäni inänite waadete cæedäni.

¹⁴ Munitö iminite nê piñte cædäni inöñänite munitö tömënäni inänite waadete godö apæneedäni. Edæ tömënäni inänite waadete apænedinque, Wængongui munitö iminite waa cæcæcäimpa, ante apænedinque wæætë piñte änämaï iedäni.

15 Nē watapæ todāni tōnō godongāmæ watapæ toedāni. Nē Ca wædāni tōnō mīnitō godongāmæ Ca ca wæedāni.

16 Mōnō pōnencabo ĩmōmpa, ante adoyōmō pōnente quēwēedāni. Ōnōnānique nāni nē ānōnāni tōnō godongāmæ cædinque, Botō ñænāmo ĩmōpa, ante pōnēnāmai ĩedāni. Mīnitō, Wadāni pōnōmenque ocai encayōnāni botō godōmenque nangui pōni encabo ĩmōpa, ante nāmā ante pōnēnāmai ĩedāni.

17 Wadāni mīnitō ĩmīnite pōnō wēnæ wēnæ cædāni adinque mīnitō wæætē godō wēnæ wēnæ cædāmai ĩedāni. Ayæ, Quinō waa cæquī, ante tōmānāni nāni waa adōnō ante adinque mīnitō māninonque ante cæedāni. 18 Eyepæ ĩmīni inte mīnitō cæganca cædinque tōmānāni tōnō godongāmæ piyænē cæte quēwēedāni. 19 Botō nē waademīni ēñēedāni. Mōnō Awēnē beyæ ĩmai ante yewæmongatimpa. “Wēnæ wēnæ cædāni adinque botō wēnæ wēnæ nāni cædinō beyæ ante nē apænte panguēnēmo inte tōmēmo eyepæ wæætē godō cæbo wæcædānimpa, ante Awēnē angampa,” ante yewæmonte ongōmpa cæmīnī. Mīnitō ĩmīnite pōnō wēnæ wēnæ cædāni wæmīni ĩnque edæ wæætē godō cædāmai ee aedāni. Edæ nē āingā bate pānongā inte Wængongui incæ pancæcāimpa. 20 Wæætē, “Bitō ĩmite nē piinte cædongā incæ gæwænte wæcā adinque godōmi cængæ. Gue ænente wæcā adinque godōmi becæe. Edæ mānōmai waa cædinque edæ tōmengā guingo imonte nānō wæwenguinque bitō tōmengā ingante waa cæcæbiimpa,” ante Wængongui beyæ yewæmonte ongō apa cæbii. 21 Tōmēnāni wēnæ wēnæ nāni cædō beyæ oda cædāmai inte wæætē māninō ante wido cæte bai cædinque bitō waa cædinque edæ tæī ēmonte gānā cæe.

13

1 Gobiedōno awēnē nempo waodāni ēñente cæte quēwencædānimpa, ante Wængongui incæ godō gō cæcā beyænque gobiedōno awēnēidi badānīpa. Edæ Wængongui mānōmai ante gō cædāmai ingā bai quingānō awēnē inguēnengā. Edæ dæ ancædōnimpa. ĩnque gobiedōno awēnēidi ĩnānite mōnō tōmāmō Ao ānīnque ēñente cæcæimpa. 2 ĩnque awēnē ingante æcānō Baa ānaa tōmengā nānō apænte pante wæquinque Wængongui nānō goncægāinō ante ēñēnāmai inte edæ Baa angampa. 3 Nē waa cædāni guiquēnē awēnēidi ĩnānite waa ate todinque guñēnāmai ĩnānīpa. Wæætē wēnæ wēnæ cædāni guiquēnē awēnēidi ĩnānite guñēnte wædānīpa. Gobiedōno awēnē ingante guñēnāmai inte quēwencæboimpa, ante bitō āmitawoo. ĩnque bitō guñēnāmai inte quēwencæte ante waa cæcæbiimpa. Waa

cæbi adinque tōmengā, Bitō waa cæbi abopa, ante pōnō waa cæcā ĩnque bitō guñēnāmai ĩmaiimpa.

4 Botō ĩmote nē cædongā inte mīnitō beyæ waa cæcæcāimpa, ante Wængongui gobiedōno awēnē ingante godō gō cæcā ongongampa. Edæ Wængongui ingante nē cæcā ĩnongā inte tōmengā nē wēnæ wēnæ cæcā ingante nō cæte nē panguēnengā ingampa. ĩnque awēnē yaēmē nē næængā inte wīl ōnonque næængampa cæbii. Wēnæ wēnæ cæbi ĩnque edæ guñēnte wæcæbiimpa. 5 ĩnque mōnō, Pangā wæcæ wæ, ānīnque awēnē ingante ēñente cæcæimpa. Ayæ pangā wæmō incæ wīl pangā wæmō incæ mōnō mīmō nē entawente nāmā apænte ānōmō inte mōnō awēnē ingante Ao ante ēñente edæ nōingā cæcæimpa. 6 Wængongui beyæ nē cædōnāni inte awēnēidi ĩñōmō tōmēnāni nempo quēwēnāni ĩnānite cōwē aadinque mānīnque cæte quēwēnānīpa. Mānōmai ĩ ĩnque mīnitō, Awēnēidi eyepæ ænīnque mōnitō beyæ cæcædānimpa, ante tōmēnāni nāni āinta pædæ godōmīni ænānīpa.

7 Æcāmenque ingante cæquēnēmīni ĩmīni inte mīnitō tōmānāni ĩnānite mīni cæquēnenganca do godō cæmīni æncædānimpa. Awēnē nempo quēwēñōmonte tōmengā eyepæ ænīnque mōnō beyæ cæcæcāimpa, ante mīnitō awēnē nānō āinta godonguēnēmīni inte do godōmīni ængæedāni. Waocā ingante mīnitō guñēnte ēñēngūēnēmīni ĩmīni ĩnque tōmengā ingante guñēnte ēñēedāni. Waocā ingante mīnitō waa aquēnēmīni ĩmīni ĩnque edæ tōmengā ingante waa aedāni.

8 Wacā ingante mīni cæquēnēnō ante edæ ee ongōnāmai inte godō cæmīni ængā ate abæ tawænte gocæbiimpa. Wæætē wacā ingā wacā ingā waadete mīni pōnenguēnēnō ante edæ godongāmæ cōwē waadete pōnenguēnēmīni ĩmīnīpa. Wadāni ĩnānite nē waadete pōngē ĩñōmō tōmengā ĩñōmō Wængongui nānō, ĩmai cæedāni, ante nānō wææ angāinō ante do ēñente cæcā ingampa. 9 Tōmēmi nāmā bitō waadete pōnēnō ganca wacā ingante adoganca waadete pōnencæbiimpa, ante Mōitee wodi yewæmongacāimpa. Mānīne adodeque ante ēñente cædinque waocā Wængongui nānō wææ angāinō ante tōmānō do ĩnque cæcampa. Edæ, “Bitō nānōgængā ĩnāmai ĩñongante godō guēa mōnāmai ĩe. Wacā ingante godō wænōnāmai ĩe. Wacā nānō ēadincoo adinque godō ænāmai ĩe. Wacā wēnæ wēnæ cæcā atabopa, ante godō babæ wapiticæ apænedāmai ĩe. Wacā quī ante æīnente wædāmai ĩe.” Mānīnecoo Wængongui nānō wææ angāinecoo ante bitō waadete pōnēmi beyænque tōmāne do ĩnque

cætimpā. Ayæ quīnemē godōmenque wææ ante ī mānīne adobāi bitō waadete pōnēmi beyænque tōmāne do īinque cætimpā. ¹⁰ Nē waadete pōnengā īñōmō edæ wacā ingante cōwē wīwa cædāmaī ingampa. Mānōmaī beyæ nē ædæmō waadete pōnēnānīque Wængonguī nānō wææ angainō ante īinque cædānīpa.

¹¹ Īinque, Nōwoyedē æbānō oo baquīī, ante do ēñēninque mīnitō waadete pōnente quēwēedāni. Edæ wēēñēdē mā mōnō wede pōnēñedē mīnguipo mōnō quēwēngūimāmo īñōmō edæ māñīñedē edæ oo bacæ cædāmaī ingatimpā. Nōwo guiquēñē, Oo pōnī bacæimpā, ante pōnente wædinque mīnitō mōwocodē ōñōmīni inte edæ ñāni ōmæmōninque mīmīni quēwēedāni. ¹² Wēmō īñōmō mōnō wæwēmāmo idæwaa edæ bapa. Mīnguipoga ñāo baī baquinque edæ oque pōnente impā cæmōō. Wēmō īñonte mōnō wēnæ wēnæ cædō æmæwo wido cædinque, mōnō wæætē ñāo īñōmō quēwēninque edæ wææ cæquincoo wēñate baī cædinque nāmā wææ gompotawengæimpā. ¹³ Mānōmaī cædinque mōnō itædē quēwēnōmō inte nō pōnī cæcæimpā. Baonque ante mōnō cæinēwēnō ante towēnāmaī inte mōnō tī nāmæ nangūi bete quidi quidi dowæñāmaī ingæimpā. Mōnō wacā tōnō godō guēa mōnāmaī, cænguī eyepæ cæninque godōmenque nangūi cænāmaī ingæimpā. Wæætēdō wæætē piinte cædāmaī inte mōnō, Wacā baī bacæboimpā, ante piinte adāmaī ingæimpā. ¹⁴ Wæætē wææ cæquincoo entawente baī cædinque mīnitō nāmā wææ gompotawencæte ante cædinque mōnō Awēñē Ītota Codito ingante entawente quēwēedāni. Ayæ baonque ante mīni cæinēwēnō ante wido cædinque, Æbānō cæte wēnæ wēnæ cæquīmoo, ante cæcæte ante wædāmaī iedāni.

14

Mīnitō tōñīñadāni īnānte piinte ānāmaī iedāni, ante

¹ Wacā wīī ædæmō pōnengā incæte mīnitō, Mōnō pōnencabo īmopca, ante pōnēninque tōmengā adocabocā nānō baquinque āmīni pongæedāni. Tōmengā nānō pōnēnō ante wæætēdō wæætē ānāmaī iedāni. ² Pancadāniya wede pōnēnāni inte cænguī adinque, Nāwā cænguī impā, ante guīñēnāmaī inte quīēmē cænguī incæ edæ dobæ ade cænānīpa. Wadāni guiquēñē æmæ pōnente beyæ, Tōmāā baō baacā impā, ante awente baī cædinque quingāmenque baō incæ cænāmaī inte onguipoiya pæcooque edæ cænānīpa. ³ Incæte tōmāā cænguī nē cænongā īñōmō onguipoiya pæcooque nē cænongā ingante piinte adāmaī

incæcāimpā. Wacā ingante, Bitō ōnōmique baī īnōmi inte edæ awente cænāmaī ĩmpā, ante ānāmaī incæcāimpā. Ayæ wæætē onguipoiya pæcooque nē cænongā guiquēñē baō nē cænongā ingante, Baacā apa cæwēe, ante apænte ante piñāmaī incæcāimpā. Edæ nē cænongā ingante Wængonguī Ao āninque, Botō quīmi ĩmpā, ante do ængampa. ⁴ Īñæmpā tōmengā wacā awēñē ingante nē cæcā īñongante bitō ædō cæte apænte āmīi. Edæ tōmengā awēñē incæ, Waa cæbīpa, angā wædinque edæ tōmengā adiyæ tæī ongōmaingampa. Wæætē adocā tōmengā awēñē, Wēnæ wēnæ cæbīpa, angā wædinque edæ tæ go wææmaingampa. Incæte edæ tōmengā mōnō Awēñē ingante nē cæcā īñongante mōnō Awēñē adocā incæ tæī piñæñongā inte eyepæ cædinque edæ ææñō gō cæcā tæī ongoncæcāimpā.

⁵ Ayæ wacā guiquēñē, Pancaōnaa godōmenque waa ēōnæpa, ante cæcæimpā, ante pōnēñongante wacā guiquēñē, Tōmāā itædē ōnōnæque impā, ante pōnengampa. Īinque mōnō pōnencabo wacā wadō wacā wadō pōnēmō incæte mōnō tōmāmō īñōmō edæ, Nāmā botō pōnēnonque ante botō nō pōnente cæcæboimpā, ante edæ māñīnonque ante cæcæcāimpā. ⁶ Edæ, Pancaōnaa godōmenque waa ēōnæpa, ante nē pōnengā guiquēñē tōmengā mōnō Awēñē ingante waa adinque māñōmaīnō ante cæcampa. Pancaōnaa wīī godōmenque waa ēōnæpa, ante nē pōnengā guiquēñē tōmengā adobāi mōnō Awēñē ingante waa adinque māñōmaīnō ante cæcampa. Baō nē cænongā guiquēñē Wængonguī ingante, Waa pōnōmi cæmopa, ante adobāi mōnō Awēñē ingante waa adinque cængampa. Baō ate nē awente cænāmaī inongā guiquēñē tōmengā adobāi Wængonguī ingante, Waa pōnōmi cæmopa, ante onguipoiya pæcooque cæninque mōnō Awēñē ingante waa adinque baō cænāmaī ingampa.

⁷ Mōnō pōnencabo īñōmonte æcāmenque incæ nāmā beyænque dicæ quēwēngāā. Dicæ nāmā beyænque wængāā. ⁸ Wæætē edæ quēwēmō ĩnque mōnō Awēñē beyænque quēwēmompā. Wæætē edæ wæmō ĩnque mōnō Awēñē beyænque wæmompā. Īinque quēwēmō incæ wæmō incæ mōnō Awēñē quīmō īñōmō inte quēwēninque tōmengā quīmō inte edæ wæmompā. ⁹ Edæ do wængaināni beyæ ante mīlmō quēwēmō beyæ ante Codito tōmāmō Awēñē nānō baquinque edæ wænte ñāni ōmæmōngacāimpā.

¹⁰ Bitō guiquēñē bitō tōñīñacā ingante ædō cæte apænte āmīi. Ayæ bitō tōñīñacā ingante, Ōnōmique baī ĩmpā, ante quīnante āmīi. Edæ Wængonguī nānō apænte angūmpaa gāāñē ongōñōmonte tōmengā

tömāmō ïmonte apænte ancæcäimpa cæbii.
 11 Edæ Wængongui beyæ ante ïmaï ante
 yewæmonte ongompa.

“Mönō Awënē incæ, ‘Nē Quëwëmo ïnömō
 inte edæ ämo ëñëedāni,’ angampa.

Ayæ, ‘Minitō tömāmī botō öñōwa ïnō da
 guicapodinique,

Bitō Wængongui ïnōmi ïmipa, ante
 adoyōmō apænecæminimpa,
 angampa.”

12 Ante nāni yewæmongainō bai ïnque
 cædinque mönō tömāmō Wængongui weca
 ponte ongöningue mönō pönengainō ante
 mönō apænegainō ante mönō cægainō
 ante tömengä ingante edonque pöni
 apænecæimpa.

*Wacä oda cæcæcäimpa, ante cædämaï
 incæbiimpa, ante*

13 Mänōmaï beyæ mönō wacä ingante
 apænte änāmaï ingæimpa. Wæætē
 minitō, Waa cæcæboimpa, ante nāmā wææ
 cædinque, Botō tönñacä taadō nānō goquino
 ante ee acæboimpa, ante pönëedāni. Tömengä
 tee tēwate bai oda cædämaï incæcäimpa, ante
 nöngä cæquinque ante pönencæminimpa.

14 Botō ïñömō Itota Codito nempo quëwëmo
 inte edæ nöngä pönëningue, Tömää cængui
 nāmā incæ nāwäaquinğä impa, ante do
 ëñëmopa. Incæte wacä, Pancaæ cængui
 baacä impa, ante nē pönengä inte tömengä
 beyæ baacä ïñonte tömengä nānō, Baacä
 impa, äno cænāmaï ingüenğä ingampa.

15 Bitō quingämē cæmi adinque bitō
 tönñacä, Baacä apa cæwëe, ante wæwente
 bacä ïnque bitō waadedämaï inte
 godömenque cæmaimipa. Edæ bitō tönñacä
 beyæ Codito wængacäi apa quëwëe. Bitō
 tönñacä nānō pönënamāi bate wænguinque
 baō cæmipa, ante wædinque bitō tömengä
 ingante nāwangä waadete pönëmi inte
 tömengä beyænque ante cöwë baō cænāmaï
 incæbiimpa. 16 Botō mänōmaï cædinque waa
 pöni cæbopa, ante pönëmi incæte wadāni
 bitō waa cædō ante, Wīwa cæbipa, ante
 pönō babæ ante tedewënāni ate wædinque
 bitō wæætē waadete pönëningue wææ
 ämi tedewënāmaï incædänimpa. 17 Wīi
 cænguinque ante wīi bequinque ante
 Wængongui nempo quëwëmompā. Wæætē
 Wængongui Tæiyæ Waëmō Öñōwoca nempo
 quëwëñomonte tömengä pönō cæcä æninque
 mönō nō entawenguinque impa. Ayæ
 mönō gänë pönenguinque ante mönō watapæ
 tote quëwenguinque ante tömengä nempo
 quëwëmompā. 18 Edæ Codito nempo
 quëwëninque waocä mänōmaï cæcä adinque
 Wængongui tömengä ingante waa ate
 tocampā. Waodāni adobaï, Waa cæbipa,
 ante waa adānipa.

19 Mänōmaï impa, ante adinque,
 Mönō pönencabo godongämæ piyænë

cæte quëwengæimpa, ante, Ayæ mönō
 godongämæ wede pönëningue tæï mænonte
 bai ongongæimpa, ante mönō nan-
 gui cæcæimpa. 20 ïnque cængui
 cæñente beyænque bitō Wængongui nānō
 nē badongaināni ïnānite bæ tadāmaï
 incæbiimpa. Tömää cængui edæ nāwäaquinğä
 impa. Incæte bitō cænino beyænque
 wacä ëñënamāi inte tee tēwate bai oda
 cæbaingampa, ante do ëñëmi inte bitō
 godömenque cæmi ïnque wīwa cæbalimipa
 töö. 21 Waa cæcæte ante bitō ïmaï
 cæcæbiimpa. Bitō baō cæmi beyæ, biñömæ
 nāni wædænque tī nāmæ bebi beyæ,
 quïëmē cæbi beyæ bitō tönñacä oda cæte
 wæcantawo. ïnque bitō ïñömō, Botō
 tönñacä oda cædämaï incæcäimpa, ante
 wææ cædinque ee cædämaï ïmi ïnque waa
 imaimpa.

22 Mänino, Ebänō cæte waa inguii, ante
 bitō pönëno beyænque wadāni ïnānite
 apænte änāmaï inte bitō adobique inte
 Wængongui ayongante cæcæbiimpa. Waa
 cæqui impa, ante mimōno bitō pönënonque
 ante mäninonque cædinque bitō tente
 wæquinque cædämaï inte waa tobaïmipa.
 23 Wæætē nē æmæ pönengä guiquënë,
 Cæmo beyæ Wængongui pangä wæcæ wæ,
 ante wædingä inte tömengä nāmā nānō
 apænte pante wæquinque ade cængampa.
 Edæ æcänō wede pönënamāi inte cæda
 tömengä nānō cædönō tömānō edæ wīwa
 cætimpa. ïnque bitō cædō tömānō wede
 pönente cæcæbiimpa.

15

*Wadāni incæ watapæ quëwencædänimpa,
 ante cæe, ante*

1 Mönō nē wede pönëmō ïñömō tæï
 piñænte entawëmō ïñömō inte nāmanque
 ante mönō cænëno ante edæ wædämaï
 ingæimpa. Wæætē edæ nē æmæ pönënanī
 guiquënë tömënanī aquīi pönī ïnāni inte,
 Ædō cæte cæquimoo, ante wædāni ad-
 inque mönō tömënanī wædō ante ænte
 mongænte bai cædinque tömënanī tönō
 ïñacabo cæcæimpa. 2 Godongämæ godō
 cæmō æninque waa todinque tömënanī
 wæætē wede pönëningue oncō tæï mænonte
 bai tæï ongoncædänimpa, ante mönō
 ædæmō cæcæimpa. 3 Edæ mönō Codito
 incæ nāmanque ante nānō cænëno ante
 cæcæte ante edæ wædämaï inte piyænë
 cægacäimpa. Wængongui ingante do nāni
 apænegainō bai tömengä wadāni beyænque
 ante cægacäimpa. “Wængongui ëñëmi.
 Wadāni bitō ïmite piinte badete tocæte ate
 cædinque botō ïmote wæætē piinte badete
 todānipa,” ante apænete bai Codito ee
 cægacäimpa. 4 Edæ mönō ïmote odömōnte
 apænecæte ante Wængongui angä ëñëningue

dođāni tōmantaa yewæmongadānimpa. Īninque māninta ædæmō adinque wampo pōnēninque wæntædāmaī inte ee cæmō ĩninque edæ mōnō, Watapæ bacæimpa, ante pōnente tocæimpa.

⁵ Īninque Codito Itota miñæ tee empote goyōmonte Wængongui ĩñōmō edæ, Minitō wampo pōnēninque wæntædāmaī inte ee cæcæminimpa, ante nē ædæmō cæcā ingampa. Tōmengā mānōmaī pōnō cæcā ate mīnitō ĩñōmō adoyōmō ante mīni pōnencabo bacæminimpa, āmopa. ⁶ Mānōmaī bamīni ĩninque mīnitō ānque baī adodō ante pōnēninque ĩmaī ante Wængongui ingante apænecæminimpa. Mōnitō Awēnē Itota Codito Mæmpobi ĩnōmi inte bitō tōmengā Wængongui adobi ĩmi ĩñōmō bitō tæī ēmōmi inte ñāo apāite baī ĩmi amōnipa, ante adoyōmō ante apænecæminimpa, ante botō mānōmaīnō ante yewæmōmopa.

Odeoidi ĩnāmaī ĩnāni ēñencædānimpa, ante

⁷ Codito mīnitō ĩmīnite Ao ante ængacāimpa. Īninque tōmengā mīnitō ĩmīnite nānō ængā baī mīnitō adobaī wacā ingā wacā ingā godongāmæ Ao ante ædāni. Mānōmaī cæmīni adinque wadāni Wængongui ingante apænedinque, Bitō waa pōni cæbi amōnipa, ante watapæ pōni apænecædānimpa. ⁸ Edæ apænebo ēñēdāni. Mōnitō mæmæidi ĩnānite Wængongui, Minitō beyæ pōnō waa cæcæboimpa, angacāimpa. Īninque, Wængongui tōmengā nānō angainō ante cōwē cæcæcāimpa, ante oodeoidi ēñencædānimpa, ante cædinque mōnō Codito tōmēnāni beyæ nē cæcā bagacāimpa. ⁹ Tōmengā ĩñōmō, Idægoidi ĩnāmaī ĩnāni incæ Wængongui ingante, Bitō ñāo baī ēmōmi inte pōnō waadete waa cæbi æmōnipa, ante apænecædānimpa, ante mānōmaī cægacāimpa. ĩmaī ante Wængongui beyæ nāni yewæmongainō baī impa.

“Botō mānōmaī beyæ, Bitō æbānō nē waa cæbi ĩmi, ante idægo ĩnāmaī ĩnāni weca gote apænecæboimpa.

Bitō ēmōwo ante āmotamīni watapæ pōni ancæboimpa,” ante nāni yewæmongainō baī Codito cægacāimpa.

¹⁰ Ayæ wataa ĩñōmō ĩmaī ante yewæmongatimpa.

“Idægoidi ĩnāmaī ĩmīni incæ mīnitō Wængongui quīnāni tōnō godongāmæ watapæ toedāni.”

¹¹ Ayæ wæætē,

“Idægoidi ĩnāmaī ĩmīni mōnō Awēnē ingante apænedinque, Bitō waa pōni cæbi amōnipa, ante watapæ pōni apæneedāni.

Wamīni mīni cabo mīni cabo tōmāmīni āmotamīni ante baī apænedinque, Waa pōni cæbi amōnipa, ante watapæ pōni apæneedāni.”

¹² Itaiya wodi adobainō ante yewæmongacāimpa. “Inguipoca quēwēnāni tōmānāni Awēnē baquinque

Awænguinto tā bocate baī cædinque Yæte Pæingā ĩñōmō ængæ ganticæcāimpa.

Tōmengā cæcā beyænque watapæ bacæimpa, ante idægoidi ĩnāmaī ĩnāni incæ pōnencædānimpa,” ante Itaiya wodi yewæmongacāimpa.

¹³ Wængongui ĩñōmō, Watapæ bacæimpa, ante nē badongaingā ĩnongā inte ĩmaī cæcæcāimpa, āmopa. Tōmengā Tæiyæ Waēmō Ōnōwoca tæī piñænte cæcā ate mīnitō, Watapæ bacæimpa, ante godōmenque wede pōnencæminimpa. Mānōmaī cæcæte ante cædinque Wængongui pōnō apænecā ēñēninque mīnitō tōmengā ingante wede pōnēninque edæ gānē entawēninque watapæ tocæminimpa, āmopa.

¹⁴ Botō tōniñamīni ēñēdāni. Botō tōmēmo ayōmote mīnitō nē waa cæmīni ĩmīni abopa. Ayæ, Æbānō waa cæquīl, ante do ēñēmīni ĩmīnipa. Ayæ adobaī mīnitō eyepæ ĩmīni inte wacā ingā wacā ingā do odōmonte apænemīni ĩmīnipa, ante pōnēmopa. ¹⁵ Īninque botō, Minitō ēñēnīnō ante mīnitō ocai encadōmīni inte edæ adodō ante pōnencæminimpa, ante baī cædinque pancadea ante yewæmontabopa. Botō ĩñōmō Wængongui waadete pōnō cæcā ænte nē entawēmo inte mānōmainō ante yewæmōninque edæ guñēnāmaī inte nanguī ante yewæmōmopa. ¹⁶ Edæ tōmengā waadete pōnō cæcā ænte entawēninque botō Itota Codito beyænque ante idægoidi ĩnāmaī ĩnāni ĩnānite nē cæbo badinque Wængongui ingantedō ante watapæ apænebo ēñēnānipa. Mānōmaīnō ante apænebo ēñēñōmīnite Wængongui Tæiyæ Waēmō Ōnōwoca pōnō badongā ate idægoidi ĩnāmaī ĩnāni incæ tæiyæ waēmō ēwocate quēwēnāni badānipa. Mānōmaī bayōnānite botō ĩñōmō, Wængongui qui, ante pædæ godōnāni baī cædinque tōmēnāni ĩnānite ante edæ, Wængongui quīmīni bacæminimpa, ante pædæ godōmo æninque Wængongui wæætē waa tocampa.

¹⁷ Mānōmaī beyæ botō Itota Codito nempo quēwēninque Wængongui beyæ cædinque edæ nanguī tobopa. ¹⁸ Codito botō tōnō guēa cæcā beyænque botō nanguī apænedinque nanguī cæbo ate tōmengā ĩñōmō tōō æmængā pōninque edæ idægoidi ĩnāmaī ĩnāni incæ edæ Wængongui ingante ēñente cædāni badānitapa. Botō Codito mānōmaī botō tōnō nānō cædinō ante apænedinque edæ māninque ante apænedinque guñēnate

wædinque godōmenque apænedāmai incæboimpa. ¹⁹ Wængongui Tæiyæ Waēmō Ōnōwoca tæi piñænongā inte botō tōnō godongāmæ cæcā ate botō, Ēñencædānimpa, ante bamōnengæ cæbo ate nē pōnēnāni badānitapa. Mānōmai Eedotadēē iñōmō mā cæte godinque Iddiābæ gæca tōmāo godāmæ godinque botō Codito ingantedō ante watapæ apænedinque adodō adodō ante tōmānō ante apænebo ēñēnānitapa.

²⁰ Botō, Codito ēmōwo ante wadāni nāni apænedāmai iñōmō gote tōmengā ingantedō ante watapæ apænebo ēñencædānimpa, ante cōwē goinente wætabopa. Wacā onguitanca nānō tæñōnincōnē æmonga mæñnōnāmai incæboimpa, ante bai cædinque botō, Wacā do nānō apænediñōmō botō wæætē apænedāmai incæboimpa, ante cætabopa. ²¹ Wæætē iīmai ante Itaiya wodi nānō yewæmongainō bai cætabopa. “Tōmengā ingante ante ēñēnāmai iñināni incæ edæ do ate bai ēwocacædānimpa. Ōnōmonca ēñēnāmai iñināni incæ edæ, ‘Ebānō i,’ ante do ēñencædānimpa.” Ante nānō yewæmongainō bai botō, Ēñencædānimpa, ante cætabopa.

Odōmā iñōmō pōinēmopa, Pabodo angampa

²² Mānōmai beyæ botō mīnitō weca poncæ cæyōmote edæ, Wææ cæte i, ate wædinque pōnāmai intabopa. ²³ Iñōmō ōmæ idæwaa cæbo inte botō æpomē wadepo iñtente mīnitō imīnite ainente wædōmopa. ²⁴ Iñinque botō, Iñcayæ ate Epāñabæ gocæ cædinque wodo tebæ godinque mīnitō weca ēñate aboque gocæboimpa, āmopa. Edæ botō wantæpiyæ ēñate tote quēwente ate godōmenque Epāñabæ gote cæyōmo mīnitō botō beyæ cædinque da godōmīni gocæboimpa.

²⁵ Nōwo guiquēnē botō tāno Eedotadēē iñōmō Wængongui quīnāni beyæ godō cæcæte ante gobopa. ²⁶ Wængongui quīnāni incæ Eedotadēē quēwēnāni pancadāniya ōmæpodāni inte wædāniya, ante pōnente wædinque wabæca Māatedōniabæ quēwēnāni tōnō Acayabæ quēwēnāni tōnō, Mōnō da godō da godō cæcæimpa, ante pōnēninque watapæ todinque tōmēnāni, Wængongui quīnāni quī, ante do godōnānitapa. ²⁷ Mānōmainō ante watapæ pōnente cædāni incæte tōmēnāni Eedotadēē iñōmō quēwēnāni iñānite nē godonguēnēnāni inte da godōnānimpa. Edæ Wængongui Ōnōwoca nānō pōnongaincoo ante idægoidi pōnō apænedāni ēñente ænte ēwocadināni inte wabæca quēwēnāni iñōmō tōmēnāni nāni ēadincoo incæ idægoidi beyæ ante wæætē godonguēnēnāni badīnāni iñāniya. ²⁸ Iñinque botō iñōmō mānincoo tōmēnāni

nāni da godōnincoo idægoidi weca ænte gocæboimpa. Godinque botō cōwā adinque, Nē ōmæpodāni inte nē wædānique æncædānimpa, ante wææ cæcæboimpa. Ēdæmō cæbo ænāni ate botō māniñedē ate Epāñabæ gocæte ante cædinque mīnitō ōmæ wodo tebæ godinque mīnitō weca ēñacæ poncæboimpa. ²⁹ Codito pōnō waa cædinque da pōnongā pōninque botō cōwē tōmengā tōnō waa pōni botō cæquinque mīnitō weca poncæboimpa, ante do ēñēmopa.

³⁰ Botō tōniñamīni ēñēdāni. Botō pæ pagænte bai nanguī cæyōmote mīnitō iñacabo cædinque botō beyæ Wængongui ingante nanguī apæneedāni, ante botō mōnō Awēnē Itota Codito beyænque āninque ayæ Wængongui Ōnōwoca nē waadete pōnengā beyænque āninque mīnitō imīnite nanguī āmopa. ³¹ Oodeabæ pōnēnāmai iñāni iñōmō Pabodo ingante wēnæ wēnæ cædāmai incædānimpa, ante botō beyæ ante apæneedāni. Ayæ, Eedotadēē iñōmō botō gote cæbo adinque Wængongui quīnāni incæ botō cædō ate Ao ancædānimpa, ante apæneedāni. ³² Mānōmai i adinque botō, Awēnē Wængongui angā ate botō watapæ todinque mīnitō weca pōmo ate mōnō godongāmæ guēmāninque wampo pōnengæimpa, āmopa. ³³ Wængongui nē gānē pōnengā inte mīnitō tōnō godongāmæ ongōninque pōnō cæcā ate gānē pōnencæmīnimpa, āmopa. Mānōmai impa diyæ, ante botō, Amēē, āmopa.

16

Waa quēwencæmīnimpa, ante

¹ Botō iīmai āmopa. Mōnō tōniñacā tōmengā ēmōwo Pebe mīnitō weca ñōwo poncæ cæcampa. Tencodea iñōmō Codito ingante nāni godongāmæ pōnencabo iñōnānite tōmēnāni beyæ nē waa cæcā inte iingā onquiyængā iñōmō waingā pōni ingampa. ² Tōmengā nanguī iñāni beyæ wææ gompodinque waa cædongā inte botō beyæ adobai nanguī cæcantapa. Iñinque edæ botō mīnitō imīnite iīmai āmopa. Wængongui quīmō inōmō inte mōnō Awēnē nempo quēwēñōmote Pebe adocā inte adobai ingampa, ante adinque mīnitō tōmengā ingante waa adinque Ao ante æedāni. Ayæ tōmengā quīēmē æinente wæcā iñongante mīnitō wæætē edæ godō cædāni āmopa.

³ Ayæ wada Piditida tōnō Aquidæ nāna gæncaya iñōmō Itota Codito nempo quēwēninque edæ botō tōnō godongāmæ cæda iñapa. Iñinque mīnitō tōmēna inate, Waa quēwencæmīnaimpa, ante botō beyæ ante apænemīni ēñēcædaimpa. ⁴ Wadāni botō imote wænoncæ cædāni wæyōmote tōmēna nāna wodo wænguinque edæ botō imote wææ cædatapa. Mānōmai cædapa, ante botō

tömēna inate waa ate pōnente apænebopa. Ayæ idægoidi ināmai ināni Codito ingante nāni wayōmō pōnencabo wayōmō nāni pōnencabo adobaī tōmānāni Aquidæda nāna cædinō ante ēñēningque tōmēna inate waa ate pōnēningque apænedānīpa.

⁵ Ayæ Itota Codito ingante nē pōnēnāni Aquidæda oncōnē godongāmæ pō guiddāni inānite, Waa quēwēedāni, ante apænemīni ēñēncædānīpa. Botō æmigo Epēneto botō nē waadecā iñongante mīnitō botō beyæ apænedīnque, Waa quēwēncæbiimpa, ante apæneedāni. Atiabæ iñōmō Codito ingante wadāni pōnēnāmai iñōnāni tōmengā iñōmō tāno pōnengatapa. ⁶ Ayæ Māadiya mīnitō beyæ nangui cædingā iñongante mīnitō wæætē tōmengā ingante Waa quēwēncæbiimpa, ante apæneedāni. ⁷ Botō guiddēna Antodōnico tōnō Nōniato iñōmō botō tōnō godongāmæ tee mōnete wædīna inapa. Tōmēna iñōmō botō pōnēnāmai iñōmote wēēñēdē Itota Codito nempo quēwēna iñōnate Codito incæ tōmēna inate da godongacāimpa. Iñinque, Itota Codito nānō nē da godongāina tānoda ina adīnque mīnitō botō beyæ ante tōmēna inate waa apæneedāni.

⁸ Ayæ wacā mōnō Awēnē nempo quēwēningque Ampidiato ingante waadete pōnēmo inte edæ botō, Waa quēwēncæbiimpa, āmopa. ⁹ Ayæ adobaī Odömāno mōnitō tōnō godongāmæ Codito nempo quēwēnte nē cæcā iñongante, Waa quēwēncæbiimpa, ante botō beyæ ante apæneedāni. Botō nē waadecā Etaquito ingante adobaī ante apæneedāni. ¹⁰ Ayæ Apede iñōmō Codito nempo quēwēñongante tōmengā æbānō cæcāā, ante adīnque Codito tōmengā ingante wæætē, Waa cæbi abopa, angampa. Tōmengā ingante botō beyæ ante waa apæneedāni. Ayæ Aditobodo nāni quēwēncabo inānite adobaī waa apæneedāni. ¹¹ Botō guiddengā Edodiyaonō ingante waa apæneedāni. Ayæ Nāadotito guiddēnāni incæ æcānō mōnō Awēnē nempo quēwēna tōmēnāni inānite adobaī, Waa quēwēncæmīnīpa, ædāni.

¹² Ayæ wada mōnō Awēnē nempo quēwēna onquiyæna Tidipīna tōnō Tidipota iñōmō nē nangui cæda inapa. Tōmēna inate botō beyæ ante waa apæneedāni. Ayæ wacā onquiyængā mōnō nē waadecā Pedetida iñōmō tōmengā mōnō Awēnē nempo quēwēningque nangui cæcantapa. Tōmengā ingante adobaī, Waa quēwēncæbiimpa, ædāni. ¹³ Ayæ mōnō Awēnē nānō nē apænte ængaingā Odopo ingante waa apæneedāni. Tōmengā badā incæ adobaī botō badā bai iñōnante tōmēnā inate botō beyæ ante waa apæneedāni. ¹⁴ Ayæ adobaī Atincodito, Pedegonte, Edēme, Patodobato, Edēma

tōmēnāni nāni pōnencabo tōmānāni inānite, Waa quēwēncæmīnīpa, ante apæneedāni. ¹⁵ Ayæ wadāni Pidodogo tōnō Oodia, Nēdeo tōmengā mængā tōnō, Odimpa tōnō Wængongui quīnāni tōmānāni inānite, Waa quēwēncæmīnīpa, ante apæneedāni.

¹⁶ Edæ, Waa quēwēncæmīnīpa, ante mīnicabo incæ tōmānīni godongāmæ waa waadete apæncæmīnīpa. Codito ingante wayōmō nāni pōnencabo wayōmō nāni pōnencabo tōmānāni mīnitō iñinite wæætē, Waa quēwēncæmīnīpa, ante ānānīpa.

¹⁷ Botō tōniñamīni ēñēdāni. Mīnitō adocabomīni iñōmīnite wadāni æmæmoncadō æmæmonca pā cædāni inānite cōwā adīnque edæ Baa ædāni. Doyedē mīnitō ēñēnō ante ēñēnāmai ināni inte tōmēnāni, Mīnitō tee tēwate bai oda cæcæmīnīpa, ante cædīnque wadō ante edæ odōmōnānīpa cæmīnīi. Tōmēnāni inānite gomō aquēnē cæmīnīi. ¹⁸ Mānōmai cædāni iñōmō mōnō Awēnē Codito ingante cædāmai inte nāmā nāni cæinēnonque ante cædānīpa. Tōmēnāni ante, Mīnitō iñinite waa amōnīpa, ante waa tedete bai tededāni ēñēningque pancadāniya guiquēnē, Babæ wapiticæ impa, ante cōwā adāmai ināni inte, Nō impa, ante do pōnēnānīpa. ¹⁹ Mīnitō cōwē ēfente cæmīni iñinīpa, ante tōmānāni do ēñēnānīpa. Mānōmai beyæ botō iñōmō nangui tobopa. Incæte, Quīnō waa cæquī, ante mīnitō ædæmō ēñēncæmīnīpa, ante aīnēmopa. Quīnō wēnæ wēnæ cæquī, ante edæ ædæmō ēñēnāmai inte edæ gomō acæmīnīpa, ante aīnēmopa. ²⁰ Wængongui, Gānē pōnente quēwēncæmīnīpa, ante nē pōnō cæcā iñōmō edæ Tatāna ingante mīnitō onōwa gāānē wææntodongā ate mīnitō wæætē do pīnā gāwate bai cæcæmīnīpa. Nōwo iñōmō mōnō Awēnē Codito nānō waadete pōnō cædō incæ entawēncæmīnīpa, āmopa.

²¹ Botō tōnō guēa cædongā Timoteo iñōmō mīnitō iñinite, Waa quēwēncæmīnīpa, angampa. Ayæ botō guiddēnāni Dotio tōnō Yatōnō adobaī Totipatedo adobaī mīnitō iñinite, Waa quēwēncæmīnīpa, ānānīpa.

²² Nōwo botō Tedetiyobo iñōmō Pabodo onōneque tedecā ēñēningque iī cadota ante nē yewæmōnīmo inte botō adobaī, Waa quēwēncæmīnīpa, āmopa.

²³ Gayo adobaī mīnitō iñinite, Waa quēwēncæmīnīpa, angampa. Tōmengā oncōnē Codito ingante nāni pōnencabo cōwē godongāmæ ponte apænedānīpa. Ayæ tōmengā botō imote adobaī, Pōe, angā ēñēningque edæ botō iñōwo tōmengā oncōnē owobopa. Ayæ iñōmō quēwēnāni awēnē nānō ānta æningque adocanque Edaato nāni ānongā iñōmō tōmengā, Tōmānāni beyæ æbānō cæquī, ante nē angā iñōmō tōmengā

tönö mönō tōnīñacā Coadoto adobai, Waa
quēwēedāni, ānapa.

²⁴ Mōnō Awēnē Itota Codito mīnitō īmīnite
pōnō waadete cæcæcāimpa. Mānōmai impa,
ante botō, Amēē, ante āmopa.

*Wængonguī ingante waa ate apænecæimpa,
ante*

²⁵ Nōwo īñōmō Wængonguī ingantedō
ante watapæ botō apænedō ante ayæ Itota
Codito ingantedō ante mönō apænedō
ante nē pōnēmīni inte mīnitō tæī pīñante
ongoncæmīnimpa. Wængonguī eyepæ inte
mānōmai pōnō cæcæcāimpa. Tōmengā
mānīnō ante nōwo tæcæ nānō odōmōnō
ante wēēnēñedē pedæmāmo īñonte cōwē
wantæpiyæ wē wodonte bai cægacāimpa.

²⁶ Nōwo guiquēnē, Codito æbānō cægacāi,
ante inguipoga tōmāmæ quēwēnāni ēñente
wede pōnēnīnque botō īmote ēñente
cæcædānimpa, ante cædīnque Wængonguī
cōwē nē Quēwēnongā inte do odōmongā
acæimpa. Tōmengā angā ēñēnīnque tōmengā
beyæ nē apænegaināni wæætē edonque
pōnī yewæmōnāni acæimpa.

²⁷ Īnīnque Wængonguī nō pōnī ēñēnongā
inte adocanque Wængonguī ingampa,
ante adīnque mönō, Bitō adobique
ñāō bai ēmōmi inte edæ waa cæbi
amōnīpa, ante mönō Itota Codito ēmōwo
apænedīnque Wængonguī ingante edæ cōwē
apænecæimpa. Mānōmai impa diyæ, ante
botō, Amēē, āmopa.

1 Coodintoidi inānite Pabodo cadota ante tānota nānō yewæmongainta

*Coodinto iñōmō Codito ingante nāni
pōnencabo*

¹ Wængonguī angā ēñēninque Itota Codito botō imote aa pedinque da godongā godōmo inte botō Pabodobo yewæmōmopa. Mōnō tōniñacā Totēnē tōnō guēa apænete ate yewæmōmo aedāni. ² Coodinto iñōmō mīnitō Codito ingante mīni godongāmæ pōnencabo inōmīni inte ēñēedāni. Wængonguī, Botō quimīni badinque mīnitō Itota Codito nempo quēwēninque tæiyæ waēmō ēwocate quēwencæmīnimpā, ante cædinque āñecā pōnīmīni inte mīnitō acæmīnimpā, ante yewæmōmopa. Ayæ adobaī, Mōnō Awēnē Itota Codito ēmōwo ante nē aa pedāni tōmāmæ quēwēnāni incæ acædānimpā, ante yewæmōmopa. Itota Codito iñōmō mōnō Awēnē ingā incæ tōmēnāni Awēnē adocā ingampa. ³ Mōnō Mæmpo Wængonguī tōnō mōnō Awēnē Itota Codito godongāmæ waadete pōnō cæda ate mīnitō gānē pōnente quēwencæmīnimpā, ante botō Totēnē tōnō āmōnāpa.

*Codito nānō entawēnō bai nangui
entawēmōmpa, ante*

⁴ Wængonguī waadete pōnō cæcā ate mīnitō Codito Itota nempo quēwēninque tōmengā nānō entawēnō bai nangui entawēmīnīpa, ante adinque botō mīnitō beyæ ante Wængonguī ingante waa ate pōnēninque cōwē apænebopa. ⁵ Edæ Codito nempo quēwēñōmīnīte tōmengā nānō ate ēñengālnō ante pōnō apæneccā ēñēninque mīnitō do entawēmīnīpa. Inīnque mānīnō nānō ate ēñengālnō ante eyepæ entawēmīni inīnque mīnitō nō apænemīni bamīnīpa. ⁶ Edæ mōnitō, Itota iñōmō adocā mōnō Codito inongā ingampa, ante apænemōni ēñēninque mīnitō Ao ānīnque, Nāwangā impa, ante wede pōnēninque waa cæte quēwēmīni acæimpā.

⁷ Mānīnō beyæ, Mōnō Awēnē Itota Codito æyedēnō pōnīnque edonque pōnī a ongonguingā, ante wānō cōnīnque mīnitō wæntæye badāmai incæmīnimpā, ante cædinque Wængonguī Ōnōwoca pōnō apæneccā ēñēninque mīnitō eyepæ inte waa cæquimīni imīnīpa. ⁸ Mīnitō cōwē līnque baganca tæī ongonte oda cædāmai incæmīnimpā, ante Wængonguī pōnō cæcā ate mōnō Awēnē Itota Codito pōñedē māniñedē ate mīnitō wentamō ædō cæte entawenguiimīni. Edæ dæ ampa. ⁹ Wængonguī, Botō Wengā Itota Codito iñōmō mīnitō Awēnē inongā

ingampa. Inīnque mīnitō tōmengā nempo quēwēninque tōmengā tōnō godongāmæ cæte quēwencæmīnimpā, ante mīnitō imīnīte āñete aa pecantapa. Mānōmai ante nē aa pecā iñōmō tōmengā nānō angālnō bai edæ cōwē nē ædæmō cæcā ingampa cæmīnīni.

*Wæætē godō wæætē godō cædāmai iedāni,
ante*

¹⁰ Botō tōniñamīni, botō mōnō Awēnē Itota Codito ēmōwo apænēdinque iīmai ante āmo ēñēmaimīnīpa. Mōnō pōnencabo imōmpa, ante adodō pōnēninque mīnitō tōmāmīni godongāmæ Ao ante adodonque cædinque nāwæ godāmai iedāni. ¹¹ Botō tōniñamīni apænebo ēñēedāni. Codoēdi mīnitō imīnītedō ante apænēdinque, Coodintoidi nāni pōnencabo incæ wæætē godō wæætē godō tedewēnānīpa. ¹² Ante apænēdāni ēñēninque botō, iīmai impa, ante apænebo ēñēedāni. Pancamīniya, “Mōnitō Pabodo nānō nē ēmīñæmōni imōnīpa,” ante cæmīnīpa. Pancamīniya guiquēnē, “Apodo nānō nē ēmīñæmōni imōnīpa,” ante cæmīnīpa. Pancamīniya guiquēnē, “Pegodo nānō nē ēmīñæmōni imōnīpa,” ante cæmīnīpa. Ayæ wæætē pancamīniya guiquēnē, “Codito nānō nē ēmīñæmōni imōnīpa,” ante cæmīnīpa. Mānōmainō ante mīnitō wadō wadō ante tedewēmīni awædō.

¹³ Iñæmpa Codito nāmā incæ ante dicæ wadō wadō ante apænecantawogaa. Incæte Codito nempo quēwēmīni inte mīnitō, Pabodo ēmīñæmōni imōnīpa, āmīni. Apodo ēmīñæmōni imōnīpa, āmīni. Pegodo ēmīñæmōni imōnīpa, āmīni. Ayæ botō Pabodobo iñōmote wadāni awæ ñænquedīmæ gōnōnīnque mīnitō beyæ wænōnāni dicæ wæntawogaa. Ayæ botō Pabodobo ēmōwo apænēdinque mīnitō dicæ æpænē guimīnītatowogaa. ¹⁴ Botō mīnicabo weca quēwēninque Codipo tōnō Gayo inate mānīnaque inate æpænē guidōmo guīdatapa, ante pōnēninque waa tobopa. ¹⁵ Mānōmai ī adīnque mīnitō, Pabodo ēmōwo apænēdinque æpænē guītamōnīpa, ante ædō cæte anguimīnīi, ante tobopa.

¹⁶ Æ, tæcæ pōnēmpa. Etepānāidi inānite adobaī guidōmo guīdānitapa. Wadāni inānite wabānō guidōmoī, ante wīi pōnēmpa. ¹⁷ Edæ Codito, Bitō æpænē guidōmī guīcædānimpā, ante botō imote ānāmai ingacāimpā. Wæætē, Tæī piñænongā inte Codito mōnō wædō ante teēmē mongænte ñænquedīmæ wængā beyænque mōnō quēwengæimpā, ante apænebi ēñencædānimpā. Ayæ, Mānīne ante wadāni, Ōnonque impa, ante ānāmai incædānimpā, ante wææ cædinque bitō waodānīque nāni nangui ēñete apænēdō ante apænēdāmai incæbiimpā. Wæætē, Codito ingantedō ante

watapæ apænebi eñencæðanimpa, äninque Codito botö imote da godongä gobo ïmopa.

Codito Wængongui nänö eñenö entwæninque tæi nänö piñænö entwængampa

¹⁸ Itota ingante nâni timpogaiwæ ante apænemöni adinque nê wænguünâni guiquenê, Mâniwæ ante apænete wæðänitedö abi, ante badete todänipa. Codito ængä beyænque nê quëwëmöni guiquenê, Codito mâniwäa wængä beyænque Wængongui tæi piñænte pönö cæcampa, ante wede pönente apænemöni. ¹⁹ Edæ Wængongui, Ìmai cæcæboimpa, angampa, ante yewæmonte ongompa.

“Nê adâni önonquedö ante eñenänipa, ante botö nangui nâni eñenö ante wido cæcæboimpa.

Nê nâmä mä pönente eñenâni guiquenê önonque eñenänipa, ante botö nâmä nâni eñenö ante Baa ancæboimpa,”

ante Wængongui cæcampa, ante yewæmongatinipa.

²⁰ Mänömai cædinque Wængongui, Inguipogaque quëwënâni nâni nangui eñenö incæ önonque impa, ante eñenguenê quëwëmini, ante do odömongampa. Ìninque adocanque ingante, Nangui eñëmipa, ante Wængongui dicæ anguingäa. Dodâni nâni wææ angainö ante nê nõ odömömi ïmipa, ante Wængongui dicæ anguingäa. Nâmä mä pönëninque nê nõ apænebi ïmipa, ante Wængongui dicæ anguingäa. Edæ dæ ampa. ²¹ Edæ, Inguipogaque quëwënâni ocaidê nangui eñenâni incæ önonque nâni eñenö beyænque botö imote ædö cæte ate bai pönenguinâni, ante Wængongui nê nõ eñenongä inte cæcampa. Codito nänö cægainö ante apænemöni adinque ïnâni ïñömö, Önonque tedewënanitedö abi, ante badete todänipa. Ìñæmpa Codito nänö cægainö ante badete nâni todö beyænque minitö wæætê nê wede pönëmini inte quëwencæminimpa, ante Wængongui nöingä pönëninque pönö cæcampa.

²² Oodeoidi, Öönæðê nâni mä cæi bai bamönengæ cæmini ate eñëmaimöni, ante änewënâni. Guidiegoidi guiquenê, Nâmä mä pönëninque eñëmaimöni, ante cæðänipa. ²³ Mönitö guiquenê, Codito ingante awænëmæ timpote wænönâni wængacäimpa, ante mäninonque ante apænemöni eñëmünipa. Mänömainö ante apænemöni eñëninque oodeoidi guiquenê Baa ante tee tewater bai oda cæðänipa. Guidiegoidi guiquenê mänine ante eñëninque badete todänipa. ²⁴ Mönitö oodeomöni ïñömönite minitö guidiegomöni ïñömönite æðänimê ïnânite Wængongui apænte ængä ingainö inte mönö ïñömö edæ ïmai ante pönëmompä. Wængongui nänö nõ eñenö incæ Codito encacampa, Wængongui nänö

tæi piñænö incæ Codito entwængampa, ante do edæ eñente pönëmompä.

²⁵ Wængongui önonque ante cæcampa, ante pönëwëminitawoo. Mönö waocabo nangui eñëmö ïmopa, ante pönëminitawoo. Ìñæmpa, Nangui eñëmö, ante tedewëmö incæ önonque wæðämö inte cæmompä. Wæætê Wængongui guiquenê önonque cæte bai cæcä incæ godömenque gomonga nangui eñengä inte cæcampa. Ayæ, Wængongui aquingä inte cæcampa, ante pönëminitawoo. Ìñæmpa mönö waocabo tæi piñæmö ïmopa, ante tedewëmö incæ mönö önonque aquimö inte cæmompä. Wæætê Wængongui guiquenê nê önonque cæte bai cæcä incæ godömenque gomonga tæi piñængongä inte cæcampa.

²⁶ Ìñänâni, æbänö ïñömönite Wængongui aa pecantapa, ante pönëðäni. Tömämini dicæ nangui eñëmini ingaminiyaa. Inguipogaque quëwënâni nangui nâni encadö bai minitö tömämini dicæ adobai nangui encamini ingaminiyaa. Tömämini dicæ nangui tæi piñæmini ingaminiyaa. Awënëidi päingä nänö awënê baquinque eñacä bai minitö tömämini dicæ adobai awënê baquinque eñaminiyaa. Mänömai ïñömönite Wængongui dicæ aa pecantawogaa. Incæte adocanque adocanque mänömai ïñömönite Wængongui aa pegacäimpa.

²⁷ Wæætê, Nê nangui eñenâni incæ guñente wæcæðänimpa, ante cædinque Wængongui ïmai cægacäimpa. Inguipoga quëwënâni ïnânite cöwä adinque nê önonque cæi bai cæðäni ïnânite apænte ængacäimpa. Ayæ, Nê tæi piñænâni incæ guñente wæcæðänimpa, ante cædinque Wængongui inguipoga nê wæntæte cæðäni ïnânite apænte ængacäimpa. Ìninque tömengä mänömai cæcä ate waa cæðänipa, ante adinque nê tæi piñænâni wæætê guñente wæðänipa.

²⁸ Wængongui inguipoga quëwënâni nâni waa pöni mäincoo ewente bai bacæimpa, ante cædinque, Inguipoga pancacooa wiwa incoo impa, ante adinque mänincooque æninque waa cægacäimpa. Ayæ, Önoncooque impa, ante mönö änoncoo adinque tömengä ingante do æninque nõ cægacäimpa. Ayæ, Dæ ampa, mönö änoncoo incæ do adinque Wængongui mänincoo æninque nangui cægacäimpa. ²⁹ Ìninque Wængongui weca ongöninque waocä adocanque incæ, Waëmö ïmopa, ante ædö cæte anguingäa.

³⁰ Wængongui pönö ængä beyænque minitö Codito Itota nempo quëwëminipa. Wængongui Codito Itota ingante da pönongä æninque mönö Codito nänö eñenö bai ænte entwawëmompä. Tömengä nempo quëwëninque mönö tömengä nänö nõ cæte quëwënö bai adobai ænte entwawëmompä. Ayæ tömengä tæiyæ waëmö nänö ewocadö

adobai pönongä æninque tæiyæ waëmö ewocate quëwëmomp. Ayæ Codito ængä beyænque mönö abæ tawænte gote bai quëwëmomp. ³¹ Ìninque Wængongui beyæ nani yewæmongainö bai iimaï ante bacæimpa. “Waocä, botö nanguï waëmö pöni imopa, ante nämä waa ate apæneinente wædongä iñömö tömengä wæætë, Mönö Awënë adocanque waëmö pöni ingampa, ante apæneca Ìninque waa cæbaingampa.”

2

Itota Codito ingante awäa timpodäni wængacäimpa, ante

¹ Iñänäni botö munitö weca apæneceäte ante mä pöninque nê nanguï ëñänäni nani waa ëñënö bai ëñänämaï imo inte bai pontabopa. Waodäni nani waa tede bai tededämaï imo incæ pontabopa. Wæætë, Wængongui näwangä waa pöni cægacäimpa, ante mäninonque ante apæneceäte ante pontabopa. ² Itota Codito ingante do adimo inte botö, Tömenganque nänö cægainonque ante ëñente bai cædinque botö coodintoidi weca gote apænebote, ante godämaï iñedë do änoimoipa. Ìninque, Wadö nani nanguï ëñënö ante ëñänämaï inte bai cædinque botö, Itota Codito ingante awäa timpodäni wængacäimpa, ante mäninonque ante ëñente bai gote apænebote, ante pönëninque munitö weca pontabopa. ³ Ayæ botö aquïmo pöni inömo inte munitö weca pöninque, Ædö cæte apænequïmo, ante guïñënete wædinque nanguï do do wäate pömo aminitapa. ⁴ Pöninque botö, Mänömaï impa, ante dicæ tömëmo nanguï ëñënö ante tedetabogaa. Wængongui beyæ apænebo ëñëädäni, ante änimö incæ botö dicæ waa pöni tedete bai apænetabogaa. Wæætë Wængongui Önöwoca tönö äawocaque bai ewocadinque botö tömengä nänö tæi piñænö beyænque apænebo aminitapa. ⁵ Mänömaï cædinque botö, Waomö mönö nanguï ëñënö beyænque ante wii pönencæminimpa. Wæætë Wængongui nänö tæi piñænö beyænque wede pönëmini bacæminimpa, ante cæcæte ante mänömaï ponte apænetabopa.

Wængongui æbänö ëmengä, ante tömengä Önöwoca odömongä ëñëmomp, ante

⁶ Wæætë ædæmö pönënanäni æmæwo pæte bai iñänänite munitö tömënanäni weca ongöninque möni nanguï ëñëninö ante apænemönipa. Incæte nïwodäni nämä nani ëñënö ante apænedämaï imönipa. Ayæ imæca awënëidi nani dæ goquincabo tömënanäni nani ëñënö ante apænedämaï imönipa.

⁷ Wæætë Wængongui awëmö iñonte nänö ëñengainö ante apænemönipa. Tömengä iñömö, Botö nanguï ëñënömo inte pönö

cæbo beyænque botö nê apænte ænänique nïö apæite bai entawencædänimpa, ante inguipoga dæ äñedë wëñëñedë pöni incæ mönö imonte ante pönö cægacäimpa. Incæte, Mänömaï cæcæboimpa, ante tömengä nänö ëñënö ante wadäni ëñänämaï incædänimpa, ante wææ cædinque wë wodonte bai cædinque tömengä nänö ëñengainö ante nïwo ganca awëmö iñömö entawënongäimpa. Nöwo iñömö tömengä awëmö nänö ëñengainö ante tæcæ apæneca ëñënimöni inte mönitö wæætë mäninö ante nïwo apænemönipa. ⁸ Inguipoga awënëidi guiquënë Wængongui nänö wë wodonte ëñengainö ante dicæ ëñänäniyaa. Edæ mäninö ante ëñente bai tömënanäni mönö Awënë nïö bai entawënongä iñongante awäa timpote wænönämaï incædönänimpa. ⁹ Wæætë iimaï ante yewæmongatimpa.

“Botö imote nê waadete pönënanäni iñömö watapæ quëwëncædänimpa, ante Wængongui do pönö badongacäimpa.

Mäninö nänö pönö cægainö ante waocä dicæ acäa.

Mäninö ante dicæ ëñengäa.

Edæ waocä nämanque mä pönëninque dicæ ëñengäa,”

ante nani yewæmongai bai iinque bacæimpa, ante mönitö apænemönipa.

¹⁰ Wængongui Önöwoca guiquënë tömäa cöwä adinque Wængongui awëmö nänö pönö badongainö ante edonque adinque do ëñengampa. Ìninque mönonga pö guidinque tömengä mönö imonte edonque odömongä ëñëmomp.

¹¹ Edæ mönö waocabo incæ, Adocanque önöwënenque pönëë cöñongante wacä, Æbänö ante pönëë congäa, ante ædö cæte ëñenguingäa. Edæ nê pönëë congä guiquënë, Botö æbänö ante pönëë cömo, ante tömengä adocanque önöwënenque pönente ëñengampa. Wængongui adobai ingampa. Wængongui æbänö ante awëmö pönëë congäa, ante waocä ædö cæte ëñenguingäa. Wængongui æbänö ante pönëë congäa, ante tömengä Önöwoca adocanque ëñëñongä wadäni ëñänämaï inänipa. ¹² Wængongui iñömö, Botö æbänö pönömo æminäni, ante edonque acæminimpa, ante cædinque tömengä Önöwoca ingante da pönongä ænte ewocate amomp. Ìninque inguipogaque quëwënanäni nani pönëno bai entawënämaï inömo inte mönö Wængongui tömengä Önöwoca tönö äawocaque bai ewocamö inte do ëñëmomp.

¹³ Mönitö iñömö, Wængongui mänömaï pönö cæcampa, ante odömoncæte ante mä pönente möni ëñënö ante apænedämaï imönipa. Wæætë Wængongui Önöwoca pönö odömonte apæneca ëñente ewocadinque

tömengä nänö odömönö möni eññē ante apænemōnipa. Edæ Wængongui Önöwoca nänö pönēnō ante eññencæte ante Wængongui Önöwocaque nänö apænedē ante apænete eññente ewocacæimpa, ante pönēninque mōnitō māñineque ante apænemōnipa.

¹⁴ Edæ, Wængongui Önöwoca nänö pönēnō æbänō ī, ante tömengä Önöwoca tönö äawocaque bai nē ewocadānique pönente eññänānipa. Īninque nē ömæwocacā bai ingä guiquēnē tömengä ædō cæte edonque eññenguingā. Edæ oda cæcampa. Māñinō ante apænemōni eññēninque tömengä, Önonquedō ante apænete wæcantedō abi, ante badete todinque edæ, Baa angampa. ¹⁵ Wængongui Önöwoca tönö äawocaque bai nē ewocacā guiquēnē, Tömää æbänō ī, ante cōwā adinque edonque pōni eññengampa. Wæætē edæ, Tömengä æbänō ewocacā, ante wadāni cōwā adāni incæte ædō cæte apænte anguināni. ¹⁶ Ayæ, “Wængongui Awēnē æbänō nangui eññente pönengā, ante æcānō eññenguingā. Edæ Wængongui ingante godōmenque odömönānipa diyæ eññente baquingā,” ante yewæmngatimpa. Mōnō guiquēnē Codito eññente nänö pönēnō ante entawēmompa.

3

Wængongui ingante nē cæmō mōnō godongāmæ cæcabo

¹ Īñänāni eññēdāni. Codito Önöwoca tönö nē ædæmō ewocadāni Īñānite botō Wængongui Önöwoca nänö apænedō ante do apænebopa. Mīnitō guiquēnē mempoga eññāmīni inte Codito nempo quēwēmīni incæ tæcæ eññadāni bai pædāmāi Īnōmīni inte mīnitō inguipogaque ante pönēmīni awædō. Māñōmāi beyæ botō adobainō ante ædō cæte mīnitō ĩmīnite apænequīmoo. ² Edæ tæcæ eññadāni ĩñōmō tæēmō mōnō cængui capo capo cænāmāi ĩñānipa. Mīnitō ĩñōmō tōmēnāni bai adobai ĩmīni inte Wængongui Önöwoca nänö apænedō ante ædō cæte eññenguiñīni. Īninque tæcæ eññadingä ingante goōmæ di godōnete bai cædinque botō mīnitō ĩmīnite apænedinque adodeque adodeque apænebo eññēminitapa. Īñæmpa ñowo ganca tæcæ eññadāni bai ĩnōmīni inte mīnitō æiquedō eññenguiñīni. ³ Edæ cōwē inguipogaque ante pönēmīni inte pancamīniya, Wacā gomonga cæcampa, ante piinte wæmīniya. Pancamīniya guiquēnē wæætē godō wæætē godō piinte ānewēmīniya. Māñōmāi cæte quēwēninque mīnitō ömæwocadāni bai ĩmīni inte inguipogaque ante pönente quēwēmīni abopa. ⁴ Edæ ĩmāi ante tedewēmīniya. Adocanque, “Botō Pabodo nänö nē eññæmo ĩmopa,” ante cæcampa. Wacā, “Botō guiquēnē Apodo

nänö nē eññæmo ĩmopa,” ante cæcampa. Māñōmāinō ante mīnitō ömæwocamīni inte bai cæmīni awædō.

⁵ Īñæmpa, Apodo æcānō ingā, ante pönēmīni. Pabodo æcānō ingā, ante pönēmīni. Edæ botō mōnō Awēnē nänö pönō anganca tömengä ingante nē cæbo bagaboimpa. Apodo adobai mōnō Awēnē nänö pönō anganca Awēnē ingante nē cæcā bagacāimpa. Īninque tömengä beyæ nē cæmōnaque ĩmōna inte mōnatō mīnitō ĩmīnite apænemōna eññente pönēmīnitapa. ⁶ Tömēmō mīnte bai cædinque botō mā apænebo ate mīnitō tæcæ eññēminitapa. Apodo guiquēnē, Cōñe bate pæcæimpa, ante æpæ gao caadāni bai cædinque mīnitō ĩmīnite godōmenque nangui odōmōnte apæneccā eññēminitapa. Incæte mōnatō apænemōna beyænque ædō cæte tā bocate bai pæwocauīmīni. Wængongui adocanque nē apæneccā beyænque mīnitō tā bocate bai pæwocate ewocamīniya. ⁷ Īninque mīnte bai nē apænebo inte botō tönō Apodo æpæ gao cæte bai nē odōmōnte apæneccā tönō mōnatō ĩñōmō öñōmōnaque ĩmōnā. Wængongui tömengānque, Pæe, ante nē ānongā ingampa. Tömengä adocanque angā beyænque pæmīnitapa.

⁸ Botō nē apænebo tönō Apodo nē odōmōnte apæneccā tönō mōnatō, Pæcæimpa, ante āanque bai Wængongui beyænque cæmōnā. Īninque botō nē apænebo ĩñōmōte tömengä nē odōmōnte apæneccā ĩñongante Wængongui ĩñōmō, Mīnatō apænegainō beyæ æeda, ante eyepæ pōni pōnongā æncæmōnāimpa. ⁹ Mōnatō ĩñōmō Wængongui tönō godongāmæ cæmōni inte mōni nē cæcabo ĩmōnipa. Mīnitō guiquēnē Wængongui quīmīni ĩnōmīni inte tömengä gōnea bai pæwocamīni ĩmīniya.

Ayæ adobai tömengä nänö mæñōincō bai ĩmīniya. ¹⁰ Nē eññente mæñongā ĩñōmō, Wæñōmēnæca ĩnō mæñongæimpa, ante cædinque dicacoo cō cō cæcampa. Botō ĩñōmō Wængongui waadete pönō cæcā ate nē eññente mæñongā bai adobai bagaiimo inte botō mīnitō weca mā ponte apænebo eññēminitapa. Ñowo guiquēnē botō māñōmāi cō cæte bai mā apænebo eññēminī ate wadāni ponte botō cō cædinca wæñōmēnæca mæñonte bai cædinque godōmenque odōmōnte apænedāni eññēminīya. Īninque edæ æcānō māñinca mæñonte bai odōmōna tömengä tōingā mæñonte bai nō eññente odōmōnte apænequēngā ingampa. ¹¹ Waodāni, Dica adocaa wæñōmēnæca ĩnō mæñongæimpa, ante tāno nāni cō cædinca bai Itota Codito adocanque Tānocā ingampa. Īninque, Wacā tānocā ingampa, ante bai cædinque mīnitō ædō cæte wacā

mūñæ gomīni. Īñæmpa, Dica wacaa wæñnômænæca ĩnô mæñonte baĭ babainpa.

¹² Ayæ tånoca nāni gō cædinca baĭ Itota Codito Tānocā ĩñongante mōnitō, Mānincaa adocaa wæñnômænæca mæñongæĭmpa, ante baĭ cædinque odōmonte apæñemōnĭpa. Nē mæñōnāni ĩñōmō oodo æñinque padata æñinque dica nāni waa pōnĭ adinca æñinque, Quincamē ēwēnāmaĭ inguinca, ante æñinque tōmēnāni nāni mæñnō baĭ cædinque pancamōniya nō pōnĭ odōmonte apæñemōnĭ ate mōnitō apænedō wido cædāmaĭ ingæĭmpa. Wadāni guiquēnē awæ æñinque gaguimæ amimō ĩ æñinque ayawāa amiwæ æñinque quincoomē ēwenguincoo æñinque godō mæñnōnāni baĭ cædinque tōmēnāni ōnonque odōmonte baĭ apænedānĭpa. ¹³ Edæ Wængonguĭ nānō apænte anguiōnæ ĩnque ba ate gonga nāni angā nanguĭ bæcocæĭmpa. Māniñedē ate edæ, Mōnitō æbānō ñōwo odōmonte apæñemōnĭ, ante ñāō gongæ edonque acæĭmpa. Wængonguĭ māniñedē mōnitō apænedō apænte ancæte ante cædinque nē tante baĭ cæcā ate pancadea æmæwo montæ gōne ate pancadea ongō æncæcæĭmpa.

¹⁴ Īnĭnque, Æcānō mæñongaincō montæ gōnāmaĭ ĩ, ante adinque Wængonguĭ eyepæ pōnongā æñinque nē mæñongaingā wæætē watapæ quēwencæcæĭmpa. ¹⁵ Wacā guiquēnē tōmengā nānō mæñongaincō do montæ gō adinque Wængonguĭ mānincō nē mæñongaingā ingante pōnōnāmaĭ incæcæĭmpa. Incæte māningā waocā gonga bæcoyōmō wodĭi tao wĭnongā baĭ ōmæpocā wæyongante Wængonguĭ ængā beyænque tōmenganque quēwencæcæĭmpa.

¹⁶ Mīnitō ĩñōmō, Wængonguĭ Ōñowoca ingante do æñinque tōmengā ingante ēwocamōmpa, ante ēñēnāmaĭ ĩmīnitawo. Wængonguĭ tæiyæ waēmō oncō baĭ mōnō baō ēñamōmpa, ante ēñēnāmaĭ inte baĭ cæmīni awædō. ¹⁷ Wængonguĭ oncō tæiyæ waēmō oncō ĩ ĩñonte waocā bæ tate wido cæcā adinque Wængonguĭ nāēmæ tōmengā ingante edæ ōmæ ēwencæcæĭmpa. Ayæ adobaĭ Wængonguĭ tæiyæ waēmō oncō baĭ baō ēñayōmīnite waocā wapiticæ odōmonte apæñecā beyæ mīni godongāmæ apæñedincabo incæ oda cæte nāwæ gomīni adinque nē wapiticæ apæñecā ingante Wængonguĭ adobaĭ wido cæcæcæĭmpa.

¹⁸ Mīnitō, Ñōwodāni nāni ēñēnō ante do nanguĭ ēñēmōnĭpa, ante pōnēmīnitawo. Īñæmpa māñōmaĭnō ante mīnitō nāmā babæ pōñēwēnĭnque apæñemīni awædō. Nē nō ēñēmīni bacæte ante mīnitō ñōwodāni nāni nanguĭ ēñēwēnō ante wido cædinque ōmæcamīni badinque nē ēñēmīni bacæmīnĭpa. ¹⁹ Inguipogaque quēwēnāni

nanguĭ ēñēnāni incæte Wængonguĭ, Ōnonquedō ante ēñēmīni awædō, angampa. Edæ Wængonguĭ beyæ apæñedĭnque ĩmaĭ ante yewæmongadānĭmpa. “Ōmē nāmā nānō ññōmē incæ waocā nāēmæ wīni wīni dawacā baĭ nē nanguĭ ēñēnāni adobaĭ nāmā nāni ēñēnō beyænque nāēmæ oda cædānĭpa, ante cæbopa,” Wængonguĭ angampa. ²⁰ Ayæ adobaĭ, “Nē ēñēnāni ĩñōmō tōmēnāni nāni nanguĭ ēñēte pōñēnō incæ idiquibæ ĭmpa, ante edæ mōnō Awēnē do ēñengampa,” ante yewæmonte ongōmpa.

²¹ Īnĭnque, Botō waocā adocanque nānō nē ēmīñæmo inte tobopa, ante ānāmaĭ incæmīnĭmpa. Īñæmpa mōnitō waomīni inte tōmāmōni mīnitō beyæ ante cæte quēwēmōnĭpa. ²² Botō Pabodobo ĩnōmo incæ Apodo ingā incæ Pegodo ingā incæ mīnitō beyæ ante cæte tōmāmōni quēwēmōnĭpa. Inguipo incæ inguipoga ongoncoo incæ mīnitō beyæ ongōmpa. Mōnō quēwēmāmo incæ mōnō wænguimāmo incæ mīnitō beyæ ongōmpa. Ñōwopāmo incæ mīlmāmo ĩncayæ ponguimāmo incæ quincōmē incæ edæ mīnitō beyæ tōmancoo ongōmpa. ²³ Ayæ mīnitō wæætē Codito beyænque quēwēmīni ĩmīnĭpa. Codito wæætē Wængonguĭ beyænque quēwēngā ingampa, ante āmo ēñēmāimīnĭpa.

4

Itota nānō nē da godongaimōni inte ĩmaĭ cæmōnĭpa

¹ Īnĭnque mōnatō Pabodobo tōnō Apodo ĩñōmōnate mīnitō ĩmaĭ ante ēñenguēñēmīni ĩmīnĭpa. Codito tōnō godongāmæ cædinque tōmengā beyæ ante Pabodo tōnō Apodo nē cæda ĩnāpa. Ayæ godōmenque, Wængonguĭ tōmengā nānō awēmō ēñengainō ante pōnō apæñecā ēñēna inte tōmēna mānĭnō ante nē apæñeda ĩnāpa, ante ēñenguēñēmīni ĩmīnĭpa. ² Īnĭnque Awēnē Wængonguĭ ĩmaĭ angampa. Botō waocā ingante quīēmē pōnō cæbo æñinque tōmengā botō pōñōnonque entawēnĭnque nō pōñente ædæmō aaquēnengā ingampa, ante Wængonguĭ cōwā adinque, Æbānō botō beyæ wææ aabii, ante apænte angampa.

³ Īnĭnque mīnitō, Pabodo æbānō cæcāā, ante apænte ancæte ante cōwā amīni incæte botō wædāmaĭ ĩmaĭmōpa. Nē apænte nāni ānoncabo incæ botō ĩmote adobaĭ cōwā adinque apænte ānāni ēñēnĭnque botō wædāmaĭ ĩmaĭmōpa. Tōmēmo incæ, Æbānō botō cōwē wede pōñente cæbo ĩmo, ante ædō cæte nāmā anguimoo. ⁴ Botō, Tōmēmo wēnæ wēnæ cædāmaĭ ĩnōmo ĩmōpa, ante pōñēmōpa. Incæte, Wentamō mongæñāmaĭ ĩmōpa, ante ædō cæte botō nāmā anguimoo.

Mönö Awënë adocanque botö imote në apænte angä ingampa.

⁵ Mäninö beyæ minitö, Ìnque bayedë tòmää apænte angæimpa, ante mönö Awënë ponganca ee adinque apænte änämaï Ìedäni. Tömengä Ìñömö waomö mönö awemö cögainö ante, Edonque pöni acæimpa, ante ñäö Ìñömö mäo odömoncæcäimpa. Ayæ, Æbänö cæcæboimpa, ante mönö öñowënenque pönengainö incæ edonque odömongä gongæ näwæ acæimpa. Ayæ, Adocanque æbänö waa cægacäi, ante, Wacä æbänö waa cægacäi, ante watapæ apænedinque tömämö mönö cægainö ante Wængongui pönö apæneçä ëñente mönö tocæimpa.

⁶ Ìñänäni ëñeedäni. Waocä adocanque ingante, Waingä ingampa, äninque wacä ingante wii piincæminimpa, ante yewæmongatimpa. Ìnque botö minitö beyæ ante, Mönatö æbänö cæmöna, ante yewæmontabopa. Minitö, Apodo tönö Pabodo æbänö cæda inaa, ante pönëninque Wængongui beyæ näni yewæmongainonque ante mäninonque ëñente cædinque godömenque cædämaï incæminimpa, ante cætabopa. ⁷ Ìñæmpa tömämö öñömonque Ìñömonte Wængongui, Bitö gomonga waemömi pöni Ìmpa, ante dicæ apænte angantawogaa. Bitö entawënö Ìñömö tömëmi ocaidë mä bitö pönënö beyænque dicæ entawëmitawogaa. Mönö Codito adocanque edæ pönö apæneçä ëñente në ænte entawëmi Ìnömi inte bitö, Tömëmoque nämä beyænque entawëmopa, ante ædö cæte änewëmi.

⁸ Minitö, Eyepæ pöni do entawëmönipa, ante bai cæmini awædö. Minitö waa quëwënguinque ante do eyepæ ænte bai cæmini awædö. Edæ Pabodoidi mönitö beyæ cædämaï Ìñönänite tömëmöni nämä beyænque awënë odayemöni bamönipa, ante cæte bai cæmini awædö. Ìñæmpa minitö näwangä awënë odayemöni bamöni bai mönitö adobai awënë odayemöni badinque nanguï tocædömönipa. ⁹ Wæætë Itota nänö në da godongaincabo Ìñömonite Wængongui incæ, Yæmiñæ pöni gote näni wænguinque godänitedö aminä, ante badete tote bai odömongä awædö. Mänömaï cæcä adinque waodäni incæ anquedoidi incæ Wængongui nänö në badongainäni tömänäni mönitö imönite adinque badete todänipa, ante awædö.

¹⁰ Edæ minitö adobai cædinque Ìmaï piimi wæmönipa. Mönitö Codito beyæ cæyömönite minitö, Ocai ömæcamini inte cæminipa, ante pönëminitawoo. Wæætë nämanque ante pönëninque, Codito nempo quëwëninque mönitö ocai encamöni inte nanguï ëñëmönipa, ante tedewëmini awædö.

Ayæ, Pabodoidi aquii pöni Ìñönänite mönitö wæætë tæëmö piñæmöni imönipa, ante pönëmini awædö. Wadäni adobai minitö imönite ante apænedinque, Waimini pöni iminipa, äninque mönitö imönite ante wæætë, Önomöniñque iminipa, ante piñänipa.

¹¹ Ayæ mönitö ñowo ganca cængui cænämaï inte gue ænente awædö. Tepæ bedämaï inte gæwænte awædö. Weocoo wää tæincoo mongænte awædö. Ayæ tæi tæi pänäni caate wæmönipa. Ayæ oncö ömaamöni inte ¹² mönitö önompoca nanguï cædinque ænte quëwëmönipa. Wënæ wënæ iminipa, ante piñäni wædinque mönitö wæætë, Minitö imönite Wængongui pönö waadete cæcæcäimpa, ante cæmönipa. Ayæ togænte pänäni ate wædinque mönitö wæætë piñämaï piyænë cæmönipa. ¹³ Mönitö imönite ante apænedinque, Wiwa cædänipa töö, ante babæ änäni ëñente wædinque mönitö wæætë waadete apænemönipa. Edæ, Æwëmöimæ gadonguimæ bai iminipa. Ömæpocoo wido cæquincoo bai iminipa töö, ante piñinque inguipogaque quëwënanäni Ìñömö mönitö imönite ñowo ganca cöwë wido cædäni wædömöni imönipa.

¹⁴ Mönitö beyæ cædinque Pabodoidi wæwente quëwënanäni, ante adinque minitö wæætë guingo imonte wæcæminimpa, ante botö dicæ mänömainö ante yewæmömogaa. Wæætë botö wëmini bai Ìñöminite botö, Mänömaï cædinque mini wæquinque impa, ante wææ yewæmömopa. ¹⁵ Minitö imönite në aadäni Ìñömö diete mido ganca mänimpodäni Ìñönänite mönitö minitö mämpoidi bai imöni guiquëñë mëmönipa pöni imönipa. Edæ, Itota Codito nempo quëwëninque botö, Itota Codito pönö cæcä beyænque mönö watapæ quëwengæimpa, ante apænebo ëñëminitapa. Mänömainö ante apænebo ëñëninque minitö mëmpoga ëñämini ate botö minitö mëmpo bai bagaboimpa. ¹⁶ Mänömaï beyæ botö minitö imönite waadete apænedinque, Botö mëmpobo cædö bai minitö adobai cæcæminimpa, ante nanguï ämpa.

¹⁷ Botö tömämæ godinque wayömö Codito ingante näni godongämæ pönencabo weca wayömö näni pönencabo weca go guidinque Ìmaï ante apænebopa. Mönö Itota nempo quëwëninque nö ëñëninque waa cæte quëwengæimpa, ante odömonte apænebopa. Mänömainö ante botö odömonte apænedö bai botö tömëmo adodö ëñente quëwëmo abaimpa. Ìnque minitö, Pabodo mänömaï quëwengampa, ante ëñencæminimpa, ante botö në waadecä Timoteo ingante da godömo minitö weca ponte apæneçæcäimpa. Tömengä Ìñömö botö wengä bai inongä inte Codito nempo quëwëninque cöwë nö pönente cæcä ingampa. Tömengä minitö

weca ponte apænedinque, Pabodo nânô ôdomonte apænedô bai tômengâ nâmâ adodanque ante cōwê êñente quêwengampa, ante apæncâ êñëninque adodô ante pönencæmîninpa.

¹⁸ Pancamîniya, Pabodo wîl pongâ awædô, ante, Tômëmônique wæætê nê âmōni incæmōninpa, ante botô imote piinte tedewëmîninpa. ¹⁹ Incæte mōnô Awënê Ao angâ ate botô oo poncæboimpa. Ponte adinque botô, Tômëmônique nê âmōni incæmōninpa, ante nê tedewëmîni æbânô tedewëmîni, ante ânâmaî incæboimpa. Wæætê adomîni mîni tæi piñænô ante cōwê adinque apænte ancæboimpa. ²⁰ Wængonguî Awënê Odeye nempo nê quêwëmô iñômô wîl ônonque mōnô tedequinô beyænque quêwëmomp. Wæætê edæ tæi piñænte mōnô quêwenguîno ante mōnô tômengâ nempo quêwëmomp. ²¹ Mînitô æbânô cæmîni ate mînitô weca panguîmo. Edæ mîni cædinô adinque botô panguënêmo inguîmo, âmînitawo. Wæætê waadete pönëninque ædæmô cæquënêmo inguîmo, âmînitawo.

5

Nê wîwa towengâ ingante apænte angæimpa, ante

¹ Edæ, Nê wîwa towengâ incæ coodintoidi nâni pönencabo tönô godongâmæ ongongampa, ante tededâni êñentamōninpa. Mînitô weca ongongâ adocanque tômengâ wæmpo nânôogængâ incæ manguiwengampa tōô. Iñæmpa Wængonguî ingante nê êñênâmaî inâni incæ mânōmaî wënæ wënæ cædâmaî iñônâni mînitô weca ongonganque do cæcâ apa cæmîni. ² Nê wîwa towengâ tönô godongâmæ ongōmîni incæte mînitô, Tômëmônique waa cæmōni îmōnîpa, ante tedewëmîni awædô. Incæte Ca ca wæmîni bai waa incædōninpa. Nê wîwa cæcâ ingante, Mōnitô weca ongōnâmaî gobæwe, ante da godōmîni gocâ bai waa incædōninpa. ³ Botô guiquënê nânêne quêwëmo incæte mînitô weca owote bai ônôwënenque pönêmo împa. Iñinque mînitô weca owote bai botô nê wîwa cæcâ ingante do apænte âmopa. ⁴ Mînitô Awënê Itota êmōwo apænedinque godongâmæ pōñōmîni botô nânêne quêwëmo incæte adoyōmô owote bai pönencæboimpa. Ayæ Awënê Itota tæi piñænongâ inte mînitô tönô adoyōmô ongōncæcâimpa. Iñinque mînitô îmaî cædâni. ⁵ Awënê nânô ponguîonæ iñedê nê wîwa cædongâ tômengâ ônôwoca quëwencæcâimpa, ante îmaî cædâni. Tômengâ nânô wîwa êñayô ewente hacæimpa, ante cædinque mînitô tômengâ ingante Tatâna nempo pædæ godōmîni æncæcâimpa.

⁶ Mînitô, Waa îmōni îmōnîpa, ante tedinque wîwa tedewëmîninpa tōô. Edæ

dodâni nâni yewæmongainô ante adâmaî inte bai tedewëmîninpa. “Päo tômao yedæ æmpoquinque wædænque da wënâni” bai mînitô adobaî adocanque wîwa cæcâ ingante mîni oda cæquinque ee amîni ongongampa. ⁷ Mîni pönencabo waëmô pōni mîni entawenguinque päo yedæ æmpoqui wido cæte bai cædinque nê wîwa cædongâ ingante da tadōmîni gocæcâimpa. Edæ mōnô Codito iñômô wîwa mōnô cædinô ante ñâ mënongacæte ante nâmâ wepæ godongacâimpa. Edæ dodâni, Nê wænonguëngâ wænōnâmaî inte wodo pænta gocæcâimpa, ante, Patowa, ante codotodo nâni nê wænongaingâ bai mōnô Codito iñômô adobaî inongâ inte wængacâimpa. ⁸ Iñinque mōnô päo yedæ æmpoqui ômæmô î cænte bai cædinque wîwa mōnô cædô ante wido cædinque mōnô piinte cædâmaî inte waa cæte quêwengæimpa. Ayæ ææmæ watapæ bete bai cædinque, Quîno nâwangâ pōni î, ante Ao ante æninque mōnô nô pönente quêwengæimpa.

⁹ Nê wîwa towënâni tönô godongâmæ cædâmaî iedâni, ante botô cadota ante do yewæmōmo amînitawo. ¹⁰ Mânōmaîno ante yewæmōninque botô, Inguipogaque quêwënâni tönô godongâmæ cædâmaî iedâni, ante dicæ antabogaa. Iñæmpa wîwa towënânique, wacâ qui nê æinente wædânique, wacâ qui nê ô ænânique inguipoga quêwënâni. Ayæ, Wængonguî impa, ante badōninque nê ædæ wæante quêwënânique mânîmpodânique inguipoga quêwënâni. Iñinque ædô cæte tōmënâni weca cædâmaî inguî. Edæ inguipo êmô cæte gote bai tōmënâni weca ongōnâmaî inguî.

¹¹ Wæætê mânîno ante yewæmōninque botô, Mîni pönencabo incæ adocanque wîwa cæcâ adinque mînitô tômengâ tönô godongâmæ cædâmaî iedâni, ante wææ âmopa. Edæ, Nê pönengâ incæ wîwa towengantawo. Nê pönengâ incæ wacâ qui æinente wæcantawo. Wængonguî impa, ante badonte nê pönengâ ædæ wæængantawo. Wacâ ingante, Wënæ wënæ împa, ante angantawo. Tî nâmæ bete nê pönengâ incæ quidi quidi dowængantawo. Wacâ qui æncæte ante babæ cædinque ô ængantawo. Iñinque tômengâ, Nê pönêmo împa, ânongâ incæ mânōmaî wîwa cæcâ adinque mînitô tômengâ tönô godongâmæ cædâmaî inte godōmenque tômengâ tönô godongâmæ contate cænâmaî iedâni, ante botô wææ ancæte ante âmopa.

¹² Mînitô Codito nempo mîni quëwencabo incæ næmæ apænte ânâmaî îmîni inte oda cæmîninpa. Wadâni inânite Codito nempo quêwënâmaî iñônânite botô, Tōmënâni æbânô wënæ wënæ cædâni, ante ædô cæte apænte anguîmo. ¹³ Wængonguinque

tömēnāni inānite apænte ancæcāimpa. Incæte mīni cabo incæ adocanque wīwa cæcā adinque mīnitō tōmēmīni, Mōnitō weca ongōnāmaī gobāwe, ante da tadōmīni tao gocæcāimpa.

6

Nē pōnēnāmaī ingā apænte ancæcāimpa, ante ānāmaī īe

¹ Mīni pōnencabo īñōmīnite adocanque bitō īmite wēnæ wēnæ cæcantawo. Īnīnque bitō, Tōmēngā ingante apænte ancædānīmpa, ante cædinque ēñēnāmaī īnāni weca ædō cæte ænte gobīi. Wæætē Wængonguī quīnāni inānite angā ēñēnīnque tōmēnāni wæætē, Tōmēngā æbānō wēnæ wēnæ cæcāā, ante apænte adinque nō ancædānīmpa. ² Edæ mōnō Wængonguī quīmō īñōmō edæ, Inguipoga tōmāmæ quēwēnāni æbānō wēnæ wēnæ cædānīi, ante nē apænte anguīmō īmōmpa. Incæte mīnitō, Mānōmaī cæcæmōnīmpa, ante ēñēnāmaī inte bai cæmīni awædō. Tōmāmæ quēwēnāni inānite nē apænte anguīmīni inte mīnitō ñowo wædænque mīni apænte anguēnēnō incæ quīnante ānāmaī īmīnīi. ³ Mōnō īñōmō Wængonguī anquedoidi inānite nē apænte anguīmō īnōmōmpa, ante ēñēnāmaī īmīnitawo. Mānīnāni inānite nē apænte anguīmō īnōmō inte mōnō pōnencabo ñowo mōnō wædō ante mōnō godōmenque apænte angæīmpa, ante pōnēmīniyaa.

⁴ Codito ingante mīni godongāmæ pōnencabo incæ mīni wædō ante apænte ancædānīmpa, ante mīnitō ædānidō īnānite āmīni apænte ānānīi. Īñæmpa, Ōnōnānīque īnānīpa, ante mīni ānōnāni incæ mānīnō ante nē apænte ānāni badānitawo. ⁵ Mīnitō guingo imonte mīni wæquīnque cæmīnīpa, āmo ēñēmaīmīnīpa. Nāna pōnencaya incæ nāēmæ wæætēdō wæætē āna wædinque mīnitō, Mōnō pōnencabo incæ æcānō nē nō ēñēngā inte apænte anguīgāā, ante adinque tōmēngā ingante anguēnēmīni īmīnīpa. Īñæmpa mīnitō weca nē nō ēñēngā adocanque dæ angantawogaa. ⁶ Wæætē nāna pōnencaya incæ nāēmæ pīīnīnque adocanque, Botō beyæ apænte ānīnque īngā ingante pancædānīmpa, angampa. Ayæ godōmenque wēnæ wēnæ cædinque tōmēngā nānō tōnīñacā ingante nē pōnēnāmaī īnāni weca ænte godīnque, Apænte ānīnque pancæmīnīmpa, angā pānānīpa.

⁷ Īñæmpa mīni pōnencabo incæ nāēmæ pīīnīnque, Apænte ante pangæīmpa, ante dobæ oda cæmīnīpa tōō. Edæ wacā wīwa cæcā ate wædinque bitō wæætē piyæñē cæbi waa īmaīmpa. Tōmēngā babæ wapitīcæ ānīnque ō ængā wædinque bitō piyæñē cæbi waa īmaīmpa. ⁸ Incæte piyæñē cæquēnēmīni incæ mīnitō wæætē babæ cædinque ō æmīni

awædō. Wacā ingante wīwa cæmīni awædō. Mānōmaī cædinque mīnitō mīni pōnencabo incæ wæætē godō wæætē godō wīwa cæmīnīpa tōō.

⁹ Wīi ēñēnte cædāni īñōmō Wængonguī Awēñē Odeye nempo cōwē guīdāmaī īnguīnāni īnānīpa, ante mīnitō īñōmō ēñēnāmaī inte bai cæmīnīpa tōō. Mānōmaīnō ante pōnēnīnque mīni oda cæquinque ī apa cæmīni. Nōwo godōmenque āmo ēñēdāni. Pancadānīya towente cædānīpa. Pancadānīya guīquēñē, Wængonguī īmpa, ante nāni badōnīñōmō gāānē ædæ wææñānīpa. Pancadānīya guīquēñē nānōgæ īnāmaī īñongante godō guēa mōwēnānīpa. Pancadānīya guīquēñē nāna onguīñæncaya incæ nāna gæncaya inte bai cædinque guēa monte quēwēnāpa. ¹⁰ Pancadānīya guīquēñē awēmō æñānīpa. Pancadānīya guīquēñē wacā māīncoo ante æīnente wædānīpa. Pancadānīya guīquēñē tī nāmæ bete quīdī quīdī dowæñānīpa. Pancadānīya guīquēñē wacā ingante, Bitō wēnæ wēnæ īmīpa tōō, ante pīīnīnque babæ ānānīpa. Pancadānīya guīquēñē babæ apænedīnque ō æñānīpa. Mānōmaī wīwa cædōnāni inte tōmēnāni Wængonguī Awēñē Odeye nempo cōwē guīdāmaī īnguīnāni īnānīpa, āmo ēñēmaīmīnīpa. ¹¹ Mīni pōnencabo incæ pancamīnīya mānōmaī īngāīmīni inte ñowo īñōmō æbānō īmīnīi. Edæ mōnō Awēñē Itota Codito ēmōwo beyænque Wængonguī Ōnōwoca pōnō ñā mēnongacā ate mīnitō tæiyæ wæmō ēwocate quēwēmīni adinque Wængonguī. Botō ayōmo mīnitō waa cæmīni īmīnīpa, angampa.

Baonga quēwēnīnque mōnō tæiyæ wæmō entawente quēwēngæīmpa

¹² “Botō cæīnēnonque ante cæbo incæ Wængonguī wææ ānāmaī ingampa,” ante apænedānīpa. Incæte botō cæīnēnonque ante quēwēmo bai wīi botō waa quēwēngūnque incædōmoīmpa. Botō cæīnēnonque ante cæbo incæ Wængonguī wææ ānāmaī ingampa, ante nāni ānō īñōmō edæ nāwangā īmpa. Incæte botō cæīnēnonque ante cæbo bai botō ñā cæyænte bai wæwēngūēnēmo inte awædō. ¹³ Ayæ cængūi īñōmō. “Mōnō cæncadē guīquīnque cængūi æmōmpa. Ayæ adobaī mōnō cæncadē cæī cængūi beyænque ēñēmōmpa,” āmīnitawo. Īñæmpa cængūi incæ cæīnca incæ, Idæwaa īmpa, ante Wængonguī wo ēwencæcāīmpa. Ayæ adobaī mōnō baō īñōmō wīi towēngūnque beyæ ēñamōmpa. Wæætē mōnō Awēñē beyænque mōnō baō ēñate quēwēmpa. Ayæ mōnō baō beyæ ante mōnō Awēñē pō guīcā ate tōmēngā tōnō āāwocaque bai ēwocamōmpa. ¹⁴ Īnīnque edæ mōnō Awēñē ingante Wængonguī tæēmō pīñæñīnque angā ñāni ōmæmōngā bai

mönö imonte adobai tæëmö piñæninqe angä ñäni ömæmönquimö imompa.

¹⁵ Edæ, Codito qui, ante mönö baö incæ godömö ængä ate mönö tömengä baö bai eñamompa, ante eñenämaï iminitawo. Ìninqe Codito baö bai eñabo inte botö iñömö edæ onquiyængä mäincoo beyæ ante nê towente quëwengä tönö edæ ædö cæte godö monguimoo. ¹⁶ Edæ, Æcänö mänömaï godö möna tömengä nê tote quëwengä tönö adocanque bai bacampa, ante eñenämaï iminitawo. Edæ, “Ménaa ñina incæ tömëna wæætê nana gæncaya möninque adocanque bai bacædaimpa,” ante apænete yewæmonte ongompa. ¹⁷ Ayæ mönö Awënë nempo quëwengä tömengä iñömö mönö Awënë tönö ääwocaque bai ewocacampa cæminii.

¹⁸ Æcänö godö towëna tömengä nämä baö cædingä inte nämä baö nänö wæwenguinque wënæ wënæ cæcampa. Wæætê yabæque mönö wënæ wënæ cædö beyæ mönö baö ædö cæte wæwenguü. Mänömaï ñinque munitö iñömö wodii winonte towënamäi quëwëedäni. ¹⁹ Edæ Wængongui tömengä Tæiyæ Waëmö Önöwoca ingante munitonga da pönongä pö guite owocampa. Ìninqe munitö, Botö baö tömëmo qui eñabopa, ante ædö cæte äminii. Ìñæmpa Wængongui Önöwoca tæiyæ waëmö oncö bai eñate apa änewëminii. ²⁰ Wængongui nanguï pönü godonte ængä beyænque munitö baö tömengä qui eñapa. Mänömaï beyæ munitö, Tömänäni Wængongui ingante waa ate eñencædänimpa, ante cædinque munitö baonga quëwëninque edæ waa cæedäni.

7

Näna gæncaya inöna inte iimäi cæbainapa

¹ Nöwo iñömö mini wædö ante yewæmömüni ænte adinque botö iimäi ämopa. Onguiñængä iñömö onquiyængä ingante mönämaï ingä waa tobaimpa. ² Incæte, Wüi towëinente wæcæcäimpa, ante cædinque onguiñænäni tömänäni, Botö nänöogængä incæcäimpa, ante mönäni waa imaimpa. Ayæ onquiyænäni adobai tömänäni, Botö nänöogængä incæcäimpa, ante mönäni waa imaimpa. ³ Onguiñængä iñömö tömengä nänöogængä äñongante, Botö nänöogæmi imipa, ante Ao äninque ääodenque moncæcäimpa. Ayæ onquiyængä adobai, Botö nänöogæmi imipa, ante äninque tömengä nänöogængä äñongante ääodenque moncæcäimpa. ⁴ Monte ate nänöogængä tönö adocanque bai ba adinque onquiyængä wæætê, Onguiñængä qui, ante eñadinque, Tömëmo baonque eñabopa, ante ædö cæte anguingä. Ayæ adobai onguiñængä wæætê, Onquiyængä qui, ante eñadinque, Tömëmo baonque eñabopa, ante ædö cæte anguingä. ⁵ Nänöogængä angä

eñente edæ Baa änämaï. Pancaguënä Wængongui ingante nanguï apænecæte ante guëa Ao äninque nänëneto nänëné wantæ iñö möninque idæwaa. Edæ, Tatäna angä wacä ingante towëinente wæcæ wæ, ante wææ cædinque adodê iñömö wæætê moncædaimpa.

⁶ Incæte mänömaï äninque botö, Minitö botö änö bai cöwê cæcæminimpa, ante wææ änämaï imopa. Wæætê, Minitö mänömaï cæmini waa imaimpa, ante mäninonque ante apænëbopa. ⁷ Onguiñænäni tömänäni botö bai wëmö cædäni quëwënanäi bai waa incædönimpa, ante pönëmopa. Incæte Wængongui pancadäniya inänite pönö apænedinque, Bitö mönämaï inte adobique wëmö cæte botö beyæ cæcæbiimpa, äninque wadäni inänite, Bitö möni ate mina gæncaya botö beyæ cæcæminimpa, angampa.

⁸ Botö, edëningä ingante apænedinque ayæ owæmpoingä ingante apænedinque, Botö bai wëmö cæbi waa imaimpa, ämopa. ⁹ Incæte adocanque, Onquiyængä ingante cöwê moncæboimpa, ante wæcä adinque botö, Bitö cöwê moncæbiimpa, ämopa. Edæ tömengä towëinente wædämaï incæcäimpa, ante wææ äninque botö, Tömengä godömenque waa quëwëncæcäimpa, ante ee abo moncæcäimpa.

¹⁰ Do möningä ingante edæ botö iimäi ämopa. Æ, wadö ämopa. Wüi botö ämopa. Mönö Awënë incæ iimäi angampa. Onquiyængä incæ tömengä nänöogængä ingante ëmö cæte godämaï incæcäimpa, angampa. ¹¹ Incæte ëmö cæte gocä ñinque wæætê adodö pöninque adocä ingante mongä waa imaimpa. Wæætê adodö pönämaï ingä ñinque tömengä ee quëwëninque wacä ingante cöwê mönämaï incæcäimpa. Ayæ onguiñængä incæ nänöogængä ingante pämänte godämaï incæcäimpa, ante mönö Awënë angampa.

¹² Wamini iminitite guiquënë mönö Awënë änämaï iñongä botö wæætê iimäi ämopa. Onguiñænganque nê pönëngä inte, Botö nänöogængä pönënamäi ingä incæ botö tönö ee quëwengampa, ante adinque tömengä nänöogængä ingante pämänamäi incæcäimpa. ¹³ Onquiyænganque nê pönëngä inte, Botö nänöogængä pönënamäi incæ botö tönö ee quëwengampa, ante adinque tömengä nänöogængä ingante pämänamäi incæcäimpa. ¹⁴ Onquiyænganque nê pönëngä iñongante tömengä adocanque nänö pönëno beyænque Wængongui, Mina gæncaya botö quimäna iminapa, ante onguiñængä ingante edæ do ængampa. Ayæ adobai onguiñænganque nê pönëngä iñongante tömengä nänö pönëno beyænque Wængongui, Mina gæncaya botö quimäna iminapa, ante onquiyængä ingante adobai do ængampa. Wængongui mänömaï cæcä beyænque minätö

wēnāni nāni waa quēwenguinque Wængongui quināni badānīpa. Wængongui wīi mānōmaī cæcā bai mīnatō wēnāni īñōmō Wængongui quināni ināmaī inte nōwadāni bai nānēnē pæcædōnānīmpa.

¹⁵ Bitō adobique nē pōnēmi īñōmite bitō nānōogængā pāmænte gocā wædinque ee abi gocæe. Mānōmaī ēmō cæte gocā adinque bitō tōmengā ingante nānōnāmaī inte bai badinque ee quēwencæbiimpa. Edæ, Piyæñē cæte quēwēedāni, ante Wængongui tōmāmō imonte aa pegacāimpa. ¹⁶ Bitō onquiyæmi tōmēmi waa cæbi adinque bitō nānōogængā wabānō waa pōnente quēwēmaingā, ante ædō cæte ēñēmī. Edæ onguīñæmi adobai tōmēmi waa cæbi adinque bitō nānōogængā wabānō waa pōnente quēwēmaingā, ante ædō cæte ēñēmī.

¹⁷ Incæte mōnō Awēnē, īmaī cæe, angā ate ēñente wædinque bitō tōmengā nānō ānōnonque ante cæte quēwencæbiimpa. Ayæ, Æbānō botō nānōogængā ēayōmo mōnō Awēnē aa pecantapa, ante pōnēninque bitō māñifedē bitō nānōogængā ēagai bai adobi inte quēwencæbiimpa. Botō īñōmō Codito ingante nāni pōnencabo wayōmō nāni godongāmæ poncabo wayōmō nāni godongāmæ poncabo weca gote apænedinque, Mānōmaī cæedāni, ante tōmānāni īnānite ante apænebopa.

¹⁸ Onguīñæmi imi do ēō togæñimi īñōmite Wængongui aa pecantawo. Īnīnque bitō, Bagācā bai babote, ante cædāmaī incæbiimpa. Eō togæmi inte ee quēwēe. Wæætē ēō togænāmaī īñōmite Wængongui aa pecantawo. Īnīnque bagāabi inte ee quēwēe. ¹⁹ Edæ ēō togæmō incæ bagāamō incæ waomō onōmonque imōmpa. Wīi māñinō beyænque waa quēwēmō imōmpa. Wæætē Wængongui nānō wææ angainō ēñente beyænque waa quēwēmōmpa. ²⁰ Īnīnque, Æbānō engæñōmo Wængongui aa pecantawo, ante pōnēninque bitō adobi inte cōwē quēwēe. ²¹ Bitō wacā beyænque cæte nē quēwēmi īñōmite Wængongui bitō imite aa pecantawo. Īnīnque bitō nē cæbi inte piyæñē cæte wædāmaī incæbiimpa. Incæte bitō imite ĩmpo cædinque, Abæ tawænte goe, angā ēñēninque ee goe.

²² Waocā beyænque cæte nē quēwēmi īñōmite mōnō Awēnē aa pecantawo. Īnīnque mōnō Awēnē incæ pōnō ĩmpo cædinque, Abæ tawænte goe, angā ēñēninque ee gote bai ēwocabīpa. Wæætē bitō waocā beyænque nē cæbi ināmaī īñōmite mōnō Awēnē aa pecantawo. Īnīnque Codito nē aa pete ængā beyænque bitō cæte nē quēwēmi babīpa. ²³ Edæ Wængongui tōmengā nānō Tæiyæ Waēmō Wengā ingante godongā beyænque mōnō wæætē tōmengā quīmō bagamōimpa, ante pōnēninque mīnitō wæætē waocā

beyænque nē cæte quēwēmi badāmaī iedāni. ²⁴ Īñānāni īmaī ante cæedāni. Botō Wængongui Awēnē nempo quēwēninque tōmengā nānō ānonque ēñente cæcæboimpa, ante cædinque mīnitō Wængongui nānō aa peyedē mīni ēagai bai adomīni inte quēwēedāni.

²⁵ Ayæ, Mōnāmaī ināni æbānō quēwenguēnēnāni ināni, ante mōnō Awēnē angampa diyæ ēñenguimoo. Incæte Wængongui waadete pōnō apæneccā ēñēninque botō nē ēñēnōmo bagaimo inte mā pōnēninque āmo ēñēmaīmīnīpa. ²⁶ Mōnō wæwenguīmāmo oo pōni impa, ante pōnēninque bitō, Nōwo botō nānōogængā ingante æbānō ēate quēwēmoo, ante pōnēninque ĩŋwo bitō ēadō bai adobi inte cōwē quēwenguēnēmi ĩmpa, ante pōnēmōpa. ²⁷ Onguīñæmi ēñēmī, Bitō nānōogængā ingante do mōmitawo. Īnīnque, Pāmæncæboimpa, ante ānāmaī iē. Wæætē wacā ingante āmōpa. Bitō wēmō cæbitawo. Īnīnque, Botō nānōogængā, ante diqui diqui mīnāmaī imi waa ĩmaīmpa. ²⁸ Incæte ĩŋwo mōmi incæ wēnæ wēnæ cædāmaī inte mōmīpa. Ayæ baquēcā adobai do mongā incæ wēnæ wēnæ cædāmaī inte mongampa. Incæte æcānō mōna tōmengā inguīpoga quēwente nānō caate wæquinque mongampa. Mānōmainō ante yewæmōninque botō, Mīnitō caate wædāmaī incæmīnīmpa, ante wææ āmōpa.

²⁹ Īñānāni, Nōwopāmo wīi wantæpiyæ ingæimpā, ante wædinque āmōpa. Edēningā nānō pōnēnō bai nē manguiwengā incæ adobai pōnengā bai waa ĩmaīmpa. ³⁰ Æcānō Ca ca wæda tōmengā īñōmō wīi wæcā bai bacā ĩnīnque waa ĩmaīmpa. Æcānō Ca ca toda tōmengā wīi tocā bai bacā ĩnīnque waa ĩmaīmpa. Æcānō godonte æna tōmengā omæpocā bai bacā ĩnīnque waa ĩmaīmpa. ³¹ Inguīpoga mōnō cædō ante æcānō cæda tōmengā māñinō ante ānāmaī inte bai cæcā ĩnīnque waa ĩmaīmpa. Edæ inguīpoga quēwēninque mōnō cædō oo pōni ēwente baquīnō anguēnē.

³² Edæ mīnitō, Æbānō cæquimoo, ante wædāmaī incæmīnīmpa, ante botō īmaī ante wææ āmōpa. Nē wēmō cæcā guīquēnē, Æbānō cæbo ate mōnō Awēnē waa toquingā, ante pōnēninque tōmengā mōnō Awēnē beyænque ante quēwengampa. ³³ Do mōingā guīquēnē inguīpoga nānō quēwenguīnō ante pōnēninque, Æbānō cæbo ate botō nānōogængā waa toquingā, ante wæcampā. ³⁴ Īnīnque tæcæ tæcæ pōnente cæcampā. Onquiyængā guīquēnē owæmpoingā ingā incæ baquēcā ingā incæ mōnō Awēnē beyæ ante pōnēninque, Æbānō botō baō tæiyæ waēmō ēñaquimoo, ayæ, Æbānō botō ōnōwoca tæiyæ waēmō ēwocāquimoo, ante

cæcampa. Do mōingā guiquēnē, Æbānō cæbo ate botō nānōogængā waa toqingā, ante inguipogaque nānō quēwenguinō ante wæcampa.

³⁵ Māninō ante botō wīl mīnitō īmīnite wææ cææte ante āmopa. Wæætē mīnitō mīni watapæ quēwenguinque ante botō, Mōnō Awēnē ingante æmæ pōnēnāmai inte nōingā cæte quēwencæmīnīmpa, ante āmopa.

³⁶ Onguifængā adocanque guiquēnē, Botō wengā baquēcā do picængā bacampa, ante adinque botō tōmengā ingante godonguēnēmo īmopa, angā īninque tōmengā nānō ānō bai cædinque ee godongā moncæcāīmpa. Edæ mānōmai godōninque tōmengā wīl wēnæ wēnæ cæcā ingampa. ³⁷ Wacā guiquēnē mīmōno ædæmō nō pōnēninque, Botō wengā baquēcā picængā bacā incæte botō piyænē cæte godōnāmai incæboīmpa, angampa. Īninque wadāni tōmengā ingante wææ ānāmai īñōnāni tōmengā, Tōmēmoque botō ānīnō bai cæcæboīmpa, ante nē ēñente pōnēninque godōnāmai ingampa. Tōmengā adobāi waa cæcampa. ³⁸ Īninque tōmengā wengā baquēcā īñongante edæ, Moncæcāīmpa, ante nē godongā guiquēnē waa cæcampa. Wæætē wacā, Mōnāmai incæcāīmpa, ante wīl godongā guiquēnē tōmengā godōmenque waa cæcampa.

³⁹ Nānōogængā ayæ mīngā quēwēñongante onquiyængā īñōmō tōmengā tōnō cōwē quēwenguēngā ingampa. Wæætē nānōogængā wængā owæmpote ate tōmengā abæ tawænte bai adocanque quēwengampa. Do owæmpoingā inte, Wacā ingante mōinēmopa, angā ēñēninque mīnitō, Tōmēna mōnō Awēnē nempo nāna quēwęcaya īnapa, ante adinque mōinente nānō wædō ante ee godōmīni moncædāīmpa. ⁴⁰ Incæte botō, Owæmpoingā ee wēmō cædinque godōmenque watapæ quēwēmaingampa, ante pōnēmopa. Edæ Pabodo īmo Wængonguī Ōnōwoca tōnō āawocabo bai ēwocabo inte mānōmāinō ante pōnēmopa.

8

Mōnitō wængonguī cænguī, ante wadāni nāni cōnōni ante

¹ Wadāni, Mōnitō wængonguī cænguī īmpa, ante nāni cōnōnincoo ante adinque mīnitō, Ōnonque cænguī īmpa, ante abāīmpa, āmīnitawo. Nāwangā tōmāmō mīni ānō bai do ēñēmompā. Incæte, Tōmēmoque do ēñēmopa, ante nē angā īñōmō tōmengā nāmā ængō cæte bai cædinque wadāni īnānite pīinte bai cæcampa. Wæætē nē waadecā guiquēnē wadāni īnānite ængō cæte bai cædinque tōmēnāni īnānite waadete cæcampa. ² Waocā, Tōmēmo do ēñēmopa, ante nē ānewengā guiquēnē tōmengā nō nānō ēñenguēnēnō

ante ayæ ēñēnāmai inte cæcampa. ³ Wæætē Wængonguī ingante nē waadedāni īnānite do againgā inte tōmengā tōmēnāni īnānite pōnengampa.

⁴ Īninque, Mōnitō wængonguī cænguī īmpa, ante wadāni nāni cōnōnincoo ante ñōwo apænebo ēñēedāni. Tōmēnāni nāni, Mōnitō wængonguī īmpa, ante nāni cōnōninca ōnoncaque īmpa, ante mōnō do ēñēmompā. Ayæ adobāi, Nāwā Wængonguī adocanque pōni ingampa, ante do ēñēmompā. ⁵ Wængonguīdi nāni ānōnāni incæ awēnēdi nāni ānōnāni incæ nangui pōni īnānipa. Nāwangā īmpa. Incæte tōmēnāni, Wængonguīdi īnānipa, ante nāni ānōnāni inguipoga incæ ōnōædē incæ ongōnāni incæte, ⁶ Wængonguī mōnō Wæmpocā īñōmō adocanque pōni ingampa. Ōnōæ incæ inguipo incæ ōnōædē ongoncoo incæ inguipoga ongoncoo incæ tōmancoo incæ tōmengā adocanque badonte aacā beyænque edæ ongoncoopa. Ayæ adobāi mōnō tōmengā nempoque quēwēmompā. Ayæ Itota Codito mōnō Awēnē adocanque pōni ingampa. Tōmengā tōnō godongāmæ cædinque Wængonguī tōmancoo badongacāīmpa. Adocā Codito tōnō godongāmæ cædinque Wængonguī pōnō cæcā ate mōnō quēwēmompā.

⁷ Māninō ante pancamonga guiquēnē ēñēmompā. Pancadāniya guiquēnē nē pōnēnāni incæ māninō ante ēñēnāmai īnānipa. Īnāni Codito ingante tæcæ pōnēnāni īñōmō tōmēnāni wēēñēdē, Mōnitō wængonguī īmpa, ante badonte cōnonte ædæ wæænte cægāināni īnānipa. Ñōwo īñōmō tōmēnāni Codito ingante tæcæ pōnente ate, Wadāni wængonguī cænguī incæ cæninque wentamō mongænte wæcæ wæ, ante guīñente wædāni incæte do edæ cænānipa. Mānōmai Codito ingante æmæ pōnēnāni inte tōmēnāni wadāni nāni wængonguī cænguī cæninque nāmanque nāni æmæ pōnēnō beyænque nāmā apænte do wentamō entawēnāni īnānipa. ⁸ Incæte cænguī ōnonque īñonte mōnō cænāmai īmō beyænque ædō cæte wīwa entawenguīi. Wæætē mōnō cæmō beyænque ædō cæte waa entawenguīi. Edæ mōnō īmonte cænguī beyænque Wængonguī dicæ waa aqingāa.

⁹ Wængonguī wææ ānāmai ingā adinque mīnitō do cæmīnitawoo. Īñæmpa mānōmai cæmīni adinque wadāni nē æmæ pōnēnāni adobāi cænāni īninque tōmēnāni tee tēwate bai oda cæbāinānipa. Mānōmai īmpa, ante pōnēninque mīnitō, Oda cædāmai incædānipa, ante cædinque ee cænāmai īmæwedāni āmopa. ¹⁰ Edæ, Mōnitō wængonguīdi oncō īmpa, ante tōmēnāni nāni ānīncōnē bitō nē ēñēmi inte go guīdinque cængōmitawo. Īñæmpa bitō

männōmaī go guī cængōmi adinque wacā nē æmæ pōnengā guiquēnē bitō cæbaī adobaī do cædinque nāmā apænte ānāmā inte tōmengā nānō oda cæquinque do go guite cæmaingampa. ¹¹ Codito tōmāmō beyæ wæninque nē æmæ pōnengā beyæ adobaī wængacāimpa cæbii. Bitō tōmēnāni nāni wængonguī oncō ante, Ōnonconque impa, ante nē ēñēmi inte do guite cæmi beyænque bitō tōniñacā nē æmæ pōnengā iñongante wapiticæ māobi oda cæte wæwente bacampa tōō. ¹² Mānōmaī cædinque mīnitō tōniñadāni inānite mīnitō waadedāmāi inte wēnæ wēnæ cæmīnīpa. Tōmēnāni nāni nāmā apænte æmæ pōnēnō ante wido cæte bai cædinque mīnitō mōnō Codito ingante do wīwa cæmīni imīnīpa. ¹³ Iñinque botō cæmo beyænque botō tōniñacā oda cæcā adinque botō, Tōmengā oda cædāmāi incæcāimpa, ante cædinque baō incæ cōwē cænāmāi incæboimpa.

9

Codito nānō da godongaināni iūmaī cæquēnēnāni inānīpa

¹ Botō Pabodobo æbānō imoo, ante mīnitō æbānō ante pōnēmīni. Edæ, Botō Itota nānō nē da godongaīmo imopa. Tōmengā botō imote pōnō ñimpo cæcā beyænque quēwēmopa. Mōnō Awēnē Itota ingante do agaīmo imopa. Mīnitō guiquēnē, Pabodo mānōmaī ingampa, ante pōnēmīniyaa. Ayæ mōnō Awēnē nempo quēwēninque botō Pabodobo tōmengā beyæ apænebo ēñēmīni inte mīnitō wæætē, Pabodo apæneca beyænque mōnitō nē pōnēmōni imōnīpa, ante pōnēmīniyaa. ² Wadāni guiquēnē, Pabodo ingante Awēnē Itota da godōnāmāi ingacāimpa, ānānitawo. Tōmēnāni mānōmaīnō ante tedewēnāni incæte mīnitō guiquēnē, Pabodo ingante mōnō Awēnē Itota nāwangā da godongacāimpa, ante apænequēnēmīni imīnīpa. Edæ botō pōnō apænebo beyænque mīnitō wede pōnēninque mōnō Awēnē nempo quēwēmīnīpa, ante edonque abaimpa.

³ Pancamīniya botō imote apænte ancæte ante cæyōmīni botō nāmā wææ cæcæte ante iūmaī āmopa. ⁴ Mōnatō apænemōna ēñēmīni incæte mīnitō iñōmō, Mīnatō eyepæ cæmīnīpa diyæ cænguī tōnō bequī ænguīmīnaa, ante wææ ante bai tedemīni awædō. ⁵ Wadāni mōnō Awēnē Itota nānō nē da godongaināni iñōmō nāna gæncaya nāna gæncaya godānīpa. Mōnō Awēnē tōniñadāni adobaī Pegodo adobaī tōmēnāni nāna gæncaya nāna gæncaya godānīpa. Mōnatō imōnate guiquēnē mīnitō, Mīnatō godinque nānōogængā ænāmāi inte goeda, ante wææ ante bai tedemīni awædō. ⁶ Wadāni ōnopoca cædāmāi inte quēwēñōnāni botō

tōnō Bedēnabee adomōnaque ōnopoca mōna cædō beyænque ænte quēwēnguēnēmōna imōnatawo.

⁷ Tontadoidi guiquēnē dicæ tōmēnāni nāmā nāni godonte æinta beyæ quēwēnāniyaa. Ayæ æcānō yowementacoo mingā pæ inca ate nē mīningā iñōmō ædō cæte yowepæ ænte bedāmāi inguingāā. Edæ dobaē ade becampa. Cænīnāni nē aacā guiquēnē dicæ goōmæ yopænte ænāmāi inguingāā. Edæ do yopænte ænte becā apa ānewēmīnīi.

⁸ Mānōmaīnō ante apænedinque botō waodānique nāni ānōnō ante wīi āmopa. Wæætē Wængonguī nānō wææ angaiñō ante māniñonque ante āmopa. ⁹ “Wagada onguīñængā nē cæcā inte tōmentapo æ yacāimpa, ante āmi pīnā pīnā gāwate cægōñongā bitō tōmengā ōnōne wææ wodōnedāmāi inte ee abi cæncæcāimpa,” ante Mōitee wodi wææ yewæmongacāimpa. Iñinque Wængonguī dicæ wagada beyænque ante pōnēninque mānōmaīnō ante angantawogaa. ¹⁰ Wæætē mōnō beyænque ante Wængonguī angampa, ante pōnengāēimpa. Nāwangā mōnō beyænque yewæmongatimpa. Waocā dicæ, Wadānique cæncædānīpa, ante onguipoi mangæ mangæ tæñongāā. Wæætē, Mōnitō godongāmæ cæncæmōnīpa, ante mangæ mangæ tæñongampa. Ayæ tōmēmō nē æ yeyacā guiquēnē dicæ, Wadānique cæncædānīpa, ante æ yeyacāā. Wæætē edæ, Mōnitō godongāmæ cæncæmōnīpa, ante pōnengā inte æ yeyacampa. ¹¹ Iñinque, Mīnitō mīmōno cænte bai ewocacæmīnīpa, ante cædinque mōnatō tōmēmō mīnte pæ bai pōnō apænemōna do ēñēte ewocamīnīpa. Incæte mōnatō imōnate wæætē māincooque pōnōmīni wēnæ wēnæ ænguēnēmōna āmīnitawo. ¹² Iñæmpa wadāni inānite māincoo ee godōmīni ænānīpa. Mōnatō iñōmō godōmenque apænedinque godōmenque ænguēnēmōna iñōmōnate mīnitō Baa āmīnitawoo.

Mōnatō nē ænguēnēmōna incæte cōwē ænāmāi imōnāpa. Edæ, Mōnō Codito ingant-edō ante watapæ apænedinque mōnatō māincoo æmōna bai wadāni, Pabodoidi māincoo æncæte ante apænedapa, ante pīinīnque wææ ancædōnānīpa. Iñinque, Wææ ānāmāi incædānīpa, ante cædinque mōnatō, Cōwē ænāmāi incæmōnāimpa, ante piyæñē cæte ee apænemōnāpa. ¹³ Nāwā Wængonguī cænguī, ante ænte māmō cōnōnāni ongō adinque Wængonguī oncōnē ñænæncōnē nē cædāni incæ pancaa ænte ade cænte quēwēnānīpa. Ayæ, Wængonguī quī, ante baō nāni iya tāimpaa nē cædāni adobaī iya tāimpaa nāni cōnōningā incæ pancacāā ænte cænte quēwēnānīpa, ante

pönēmīniyaa. ¹⁴ Mōnō Awēnē adobaī, Botō īmotēdō ante watapæ apænedāni ate nē ēñēnāni wæætē nē apænedāni inānite cænguī pædæ godōnāni ænte cænte quēwencædānimpa, angampa. ¹⁵ Botō guiquēnē nē ænguēnēmo incæte cænguī ante ānāmai inte cōwē apænebo inōmoimpa. Nōwo mīnitō īmīnite yewæmōninque botō dicæ, Pōnōmīni æncæboimpa, ante yewæmōmogaa. Cænguī ante ānāmai inte botō Wængonguī beyænque apænebo ēñēminpa, ante pōnēninque mānīnō beyænque tobopa. Mānōmaiñō ante todōmo inte botō, Gæwænte wædinque nāñe wæmo incæ wacā māincoo edæ ænāmai incæboimpa.

¹⁶ Itota Codito ingantedō ante apænebi ēñencædānimpa, angā ēñente botō nē apænebo bagaimo inte edæ ædō cæte wadō cæquīmoo. Īninque botō mānōmaiñō ante nē apænedōmo inte edæ, Tōmēmo waa cædinque apænebopa, ante ædō cæte tedequīmoo. Edæ botō Itota ingantedō ante mōni watapæ apænedō ante wīī apænebo bai edæ botō wæquinque incædōnimpa. ¹⁷ Edæ Itota Codito, Apænebi ēñencædānimpa, angā ēñēninque botō Ao ante watapæ todinque apænebo adinque tōmengā, Waa cæbi ĩmpa, ante eyepæ pōngā æmaimopa. Wæætē, Wīī apæneinente wæbo incæte botō cōwē apænebo ĩninque edæ tōmengā nānō angainonque cæte apænebopa. Edæ botō nē apænequēnēmo inte ædō cæte apænedāmai inguīmoo. ¹⁸ Īninque botō ēñente cæbo beyænque quīnō ænguīmoo. Botō Itota Codito ingantedō ante watapæ apænebo beyænque Wængonguī ĩmai pōnō cæcā æninque tocæboimpa. Botō apænebo beyæ mīnitō nē pōnonguēnēmīni incæte pōnōnāmai ĩmīni ĩninque botō wæætē ænāmai inte tocæboimpa.

¹⁹ Ayæ waodāni wīī botō awēnēidi inānipa. Ayæ botō wacā ingante nē cæbo ināmai inte abæ tawænte bai quēwēmopa. Incæte botō, Waodāni godōmenque nanguī ināni Codito gāmænō poncædānimpa, ante cædinque tōmānāni inānite nē cæte quēwēmo bai botō baquinque nāmā pædæ godonte bai quēwēmopa. ²⁰ Godongāmæ cæbo ate oodeoidi incæ Itota gāmænō poncædānimpa, ante cædinque botō oodeoidi nāni pōnēnō bai pōnēninque tōmēnāni nāni quēwēnō bai quēwēmopa. Pancadāniya, Mōitee wodi nānō wææ angainō ēñēmō beyænque mōnō quēwengæīmpa, ante pōnēninque mānīnonque ante ēñente cædānipa. Botō guiquēnē, Wīī Mōitee wodi nānō wææ angainō ēñēmō beyænque mōnō quēwengæīmpa, ante pōnēmopa. Incæte, Godongāmæ cæbo ate mānīnonque ante nē ēñente cædāni adobaī Itota Codito gāmænō poncædānimpa, ante cædinque botō tōmēnāni

ēñēnō bai adobaī ēñente bai cæbopa.

²¹ Wadāni guiquēnē Mōitee wodi wææ ante nānō yewæmongainta adāmai inānipa. Botō guiquēnē, Wængonguī, ĩmai cædāni, ante nānō wææ angainō ante cōwē ēñinguēnēmo inte botō mōnō Awēnē Codito nempo quēwēninque tōmengā nānō angainō ante cōwē ēñente quēwēmopa. Incæte godongāmæ cæbo ate nē adāmai ināni adobaī Itota Codito gāmænō poncædānimpa, ante cædinque botō wadō pōnēmo incæ tōmēnāni adāmai inte nāni quēwēnō bai adobaī inte bai quēwēmopa. ²² Ayæ, Godongāmæ cæbo ate æmæ pōnēnāni adobaī Codito gāmænō poncædānimpa, ante cædinque botō tōmēnāni æmæ pōnente quēwēnāni bai æmæ pōnēmo inte bai quēwēmopa. Īninque, Godongāmæ cæbo ate pancadāniya Codito gāmænō ponte quēwencædānimpa, ante cæcæte ante botō æbānō cæquīmoo, ante wædinque ĩmai cæbopa. Wadāni nāni quēwēnō bai wadāni nāni quēwēnō bai wadāni nāni quēwēnō bai adobaī cædinque botō tōmānāni nāni quēwēnō bai adodō ante pōnēmo inte bai quēwēmopa. ²³ Edæ, Itota Codito watapæ pōnō cæcā beyænque tōmāmō tōmengā nempo quēwēninque godongāmæ watapæ tocæīmpa, ante cædinque mānīnō wadāni nāni quēwēnō bai wadāni nāni quēwēnō adodō ante pōnēmo inte bai quēwēmopa.

²⁴ Edæ nē quingæ pogodo godāni ĩñōmō tōmēnāni nāni pogodo goīmancadē tōmānāni pogodo godānipa. Incæte adocanque quingæ pogodo gocā inte tāno gote næ gongængā adinque edæ, Bitō adobique quingæ pogodo gote gānā cæbipa, ante pædæ pōnōnāni ængampa, amīnitawoo. Mīnitō guiquēnē quingæ pogodo gote bai gānā cæte æncæte ante tæī piñænte cædāni. ²⁵ Gānā cæcæīmpa, ante cædinque tōmēnāni wadō nāni cæīnēnō ante cædāmai inte wæntæye ināmai inte mānīnonque ante cædānipa. Tōmēnāni guiquēnē gānā cædinque poganta aquī guīñē wænguīñabo nāni que cædintaque ænte wencacæte ante mānōmai cædānipa. Mōnō guiquēnē poganta guīñē wænāmai inta mōnō cōwē encaquinta æncæte ante mānōmai cæmompā. ²⁶ Mānōmai ĩmpa, ante pōnēninque edæ wīñatæ wīñatæ guīddāmai inte pogodo godāni bai botō tōingā gobopa. Ayæ, Æcānō gānā cæcāā, ante tūyæmāa tamonte guēa cæda bai cædinque botō, Gānā cæcæboimpa, ante tæīmō piñænte nō cæbopa. ²⁷ Īninque godōmenque godōmenque apænebo ēñēnāni ate tōmēmo oda cædāmai incæboimpa, ante cædinque botō, Tæī piñænte quingæ gobāwe, ante bai cædinque botō nāmā incæ da godō da godō godoncæte ante nāmā tæi tæi pante bai cæbopa.

10

Wængongui impa, ante nāni cōnōninca

¹ Botō tōniīnamīni īlmaī ante apænebo ēñēedāni. Mōnō wæmæidi wodi tōmānāni boguimā gānēñōmō quēwente cængogadānimpa. Ayæ tōmānāni gāwapæntibædē tæcæguedēmæ ti wææ tao gogadānimpa. ² Īnīnque æpænē guite bai cædinque tōmēnāni Mōitee wodi nempo tōmānāni nāni quēwengūnque edæ boguimāmodē godinque gāwapæntibæ tæcægūidēmæ gogadānimpa. ³ Ayæ cængui Wængongui ōnōædē dā pōnongā wææ nāni cæ bai tōmēngā Ōnōwoca nānō apænēdō adobai ēñēnte ēwocate quēwengadānimpa. ⁴ Wængongui Ōnōwoca apænecā ēñēnīnque tōmānāni godongāmæ bete bai ēwocate quēwengadānimpa. Edæ dicabo tæēmonca īñōnte Mōitee wodi ongonto tæi tæi āayongā æpæ ompade ba begadānimpa. Īncayæ Ponguingā mōnō Codito adobai tæi piñānongā inte tōmēnāni tōnō godongāmæ godinque tōmēngā Ōnōwoca ingante pōnongā ænīnque tōmēnāni ompade bete bai āāwocaque bai ēwocagadānimpa. ⁵ Incæte wodo tōmānāni ēñēnāmāi cædāni adinque Wængongui wīl togacāimpa. Edæ piīnīnque wæñōnīnque ōnōmæca yabæque wido cæcā ñōmængadānimpa.

⁶ Īnīnque, Tōmēnāni wēnæ wēnæ cæcæte ante nāni toīnente wædō bai mīnitō wīl adobai toīnente wæcæmīnimpa, ante mōnō īmonte wææ odōmoncæte ante Wængongui tōmēnāni nāni toīnēnō beyæ ante pangā wængadānimpa, ante abaimpa. ⁷ Pancadāniya nāni badonte cōnōninca weca ædæ wæænte, Wængongui impa, ante babæ apænete towengadānimpa. Edæ, “Cæncæte ante becæte ante tæ contadinque tōmēnāni Yæ yæ owempocæte ante ængæ gantidānitapa,” ante yewæmongatimpa cæmīnī. Mīnitō īñōmō edæ, Wængongui impa, ante nāni babæ towengāi bai wīl adobai cæedāni. ⁸ Pancadāniya guiquēnē nānōogængā īnāmāi īñongante wīwa towengadānimpa. Edæ bæintitodee mīdo ganca īnāni mānimpodāni edæ mānōmāi towēnāni inte adoīnæque īñōnte nāñe wængadānimpa, ante adinque pōnente wædinque mōnō wæætē towēnāmāi ingæimpa. ⁹ Pancadāniya guiquēnē, Quiēmē cæmō īñōmonte Awēnē dicæ pangāa, ante ancaa wēnæ wēnæ cædāni adinque Wængongui tæntæ angā pocæ wængadānimpa. Īnīnque tōmēnāni nāni wēnæ wēnæ cægāinō ante mōnō Baa ante wēnæ wēnæ cædāmāi ingæimpa. ¹⁰ Pancadāniya guiquēnē Wængongui nānō pōnōnīncoo adinque, Wængongui wīl waēmō pōnongā awædō, ante piīnte tēdēdāni ate Wængongui anquedo nē wido cædongā īnongā inte

tōmēnāni īnānite wænonte edæ wido cægacāimpa. Mānōmāi cæcā ante adinque mīnitō, Pangā wæncæ wæ, ante wædinque tōmēnāni nāni piīnte tēdewengāi bai adobai piīnte tēdēdāmāi īmæwedāni.

¹¹ Īnīnque, Wāmīni mīni adobai pangūnque cæmīnimpa, ante wææ odōmoncæte ante pancadāniya īnānite Wængongui mānōmāi pangacāimpa. Ayæ īmāmō wodo īnīnque bayonte quēwēmō īñōmonte dodāni mōnō īmonte wææ ancæte ante yewæmōnīnque, Wēnæ wēnæ cædāni ate Wængongui æbānō pangacāi, ante aedāni, ante wææ yewæmongadānimpa. ¹² Mānōmāi impa, ante adīmīni incæte mīnitō, Mōnitō nāmā ongonte cōwē oda cædāmāi incæmōnimpa, ante pōnēmīnitawo. Edæ mīni ædocæ tæ go wæængūnque mānōmāi ānewēmīnīpa tōō. ¹³ Mīnitō wēnæ wēnæ cæīnente wæmīnitawo. Edæ wīl mīnitō adomīnīnque mānōmāi wēnæ wēnæ cæīnente wæmīnīpa. Mōnō waocabo mōnō wēnæ wēnæ cæīnente wæcabo tōmāmō īmōmpa. Incæte mīnitō mīni oda cæquīnque wēnæ wēnæ cæīnente wæmīni adinque Wængongui mōnō īmonte cōwē nē pōnēngā īnongā inte, Oda cædāmāi incæmīnimpa, ante wææ ānīnque edæ, Idæwaa, angampa. Ayæ wēnæ wēnæ cæīnente wæmīni incæte tōmēngā tōō æmænte ængā beyængūnque mīnitō eyepæ inte ate adiyæ næ gongænīnque oda cædāmāi īnguīmīni īmīnīpa.

¹⁴ Mānīnō beyængūnque botō nē waademīni, āmō ēñēedāni. Wængongui impa, ante nāni babæ ante gōnōninca gomō adinque ocæmæ wodiī winōedāni āmōpa. ¹⁵ Mīnitō ocāi encadōmīni īmīnīpa, ante adinque botō mānōmāinō ante yewæmōmōpa. Īnīnque botō ānō ante, Nō intawo, babæ intawo, ante mīnitō nē encadōmīni inte apænte ante bai ēñēncæmīnimpa. ¹⁶ Mōnō pōnencabo owæta ænīnque Wængongui ingante waa ate pōnente apænedīnque, Mōnō Codito wepæ tōmāmō beyæ godonte impa, ante pōnēnīnque mōnō pōnencabo īñōmō godongāmæ bemōmpa. Ayæ pāō mōnō pā ænō ænīnque, Mōnō Codito tōnō godongāmæ caate wængāimō bai īmōmpa, ante pōnēnīnque mōnō godongāmæ cæmōmpa. ¹⁷ Mōnō pāō adocaque ænīnque pā ænte godongāmæ cænīnque mōnō, Pāō adocaque ī bai mōnō tæiyæmō pōni īmō incæte adocabomō īmōmpa, ante pōnēngæimpa.

¹⁸ Idægoidi ēñægāināni īñōmō, Wængongui quī, ante baō ænte māmō ñōnōnīnque iya tånānīpa. Mānīl baō tōmēnāni nāni iya tāimppā ñōnōningā pancacāa ænīnque tōmēnāni, Baō Wængongui quī ī bai mōnō adobai Wængongui quīmō īmōmpa, ante bai cædinque godongāmæ cæñānīpa, ante

do eñemínipa. ¹⁹ Mánómai áninque botó æbānō ámoo, ante pōnēmīni. Nē eñēnāmai ināni nāni babæ cōnōnīca iñōmō edæ nāwā Wængonguī ingampa diyæ tōmēnāni tōmengā quīnāni ināniyaa. Ayæ, Wængonguī cænguī impa, ante babæ nāni ánongā iñōmō nāwā Wængonguī cænguī impa diyæ tōmēnāni Wængonguī tōnō godongāmæ cænāniyaa. Botó iñōmō edæ mánōmainō ante dicæ ámogaa.

²⁰ Mánómai ánāmai imo inte botó iīmai ámopa. Tōmēnāni, Wængonguī quī, ante babæ cōnōnīque dicæ nāwā Wængonguī ingante godōnāniyaa. Iñæmpa wēnæidi inānite godōnānipa cæmīni. Wēnæ tōnō cædāni awædō, ante mīnitō gomō adīnque godongāmæ cænāmai imæwedāni, ámopa. ²¹ Edæ mōnō Awēnē bepæ godongāmæ bemīni inte mīnitō wēnæidi bepæ ædō cæte godongāmæ bequīmīni. Mōnō Awēnē cæimpaa tæ contate godongāmæ cæmīni inte mīnitō wēnæidi cæimpaa ædō cæte godongāmæ tæ contate cænguīmīni.

²² Æmæ pōnente bai wēnæidi nāni bepæ bemō adīnque mōnō Awēnē piinte badīnque pāmaingampa, ante eñēnimō inte mōnō ædō cæte wēnæidi bepæ bequīmō. Tæi piñænte wææ cæmōmpa mōnō Awēnē pānāmai inguīngāa.

Nī cæyænte gote bai quēwente waadete pōngæimpa

²³ Mīnitō iīmai apænedīnque, “Mōnō quīēmē bai cæinēmo incæ Wængonguī wææ ánāmai ingampa,” ámīnitawo. Iñæmpa mōnō cæinēnonque cæte quēwēmō bai wīi mōnō waa quēwenguīque incædōnīpa. Ayæ adobai, “Mōnō cæinonque cæmō incæ Wængonguī wææ ánāmai ingampa,” ámīnitawo. Iñæmpa mōnō cæinēnonque cæte quēwēmō bai wacā, Botó adobai cæbote, ante oda cæcædongāimpa cæmō. Oda cædāmai incæcāimpa, ante wææ cædinque mōnō Wængonguī nānō ánōnonque ante eñente cæcæimpa. ²⁴ Edæ, Mōnō æbānō cæte eyepæ æninque quēwenguīmō, ante nāmā beyæntæ wædāmai inte wæætē wadāni beyæ ante pōnēninque, Tōmēnāni nōingā ante eñente waa quēwencædānīpa, ante mōnō nanguī cæcæimpa.

²⁵ Iñique baō godonte æncæte ante nē mánāni nāni æi pancadē gote æninque mīnitō mīmō entawēmīni incæte, Baacā bai intawo, nāwāaquiringā intawo, ante apænte ánāmai inte guññedāmai ade cæedāni. ²⁶ Edæ, Inguipo Wængonguī quī impa. Iñique inguipoga ongoncoo tōmancoo adobai Wængonguī quī inte nāwāaquincoo impa, ante yewæmongatūi apa guññewēmīni.

²⁷ Ayæ nē pōnēnāmai ingā mīnitō imīnite, Pō cæedāni, angā eñēninque mīnitō goinēmīni inte godīnque tæ contayōmīni cænguī pædæ pōnongā adīnque ee ō ænte cæedāni. Baacā intawo, Nāwāaquiringā intawo, ante nāmanque apænte ánāmai inte ade cæedāni. ²⁸ Wæætē wacā tōmengā nānō mīmō pōnēnō beyænque ante wææ áninque, “Wadāni tōmēnāni, Mōnitō wængonguī cænguī impa, ante do nāni godōni impa iñæmpa cæmīni,” angantawo. Mánōmainō wææ angā eñente wædinque mīnitō nē wææ áningā beyæ ante ayæ tōmengā nānō nāmā apænte æmæ pōnēnō beyæ ante edæ cænāmai iedāni. Iñæmpa inguipo incæ inguipoga ongoncoo tōmancoo incæ mōnō Awēnē quī impa cæmīni. ²⁹ Wīi tōmēmīni mīmō entawēnō beyæ ante nāmā apænte áninque wæætē nē wææ áningā beyæ ante tōmengā nānō nāmā apænte æmæ pōnēnō beyænque ante mīnitō cænāmai incæmīnīpa.

Incæte bitō wabi iīmai ante wæbitawo. “Mōitee wodi nānō wææ angainō beyæ ñā cæyænte wægāimo bai inte botó ñōwo ñī cæyænte gote bai imo adīnque wacā tōmengā nānō nāmā apænte æmæ pōnēnō beyænque ædō cæte botó imote apænte angūngāa,” ante wæbitawoo. ³⁰ Ayæ, “Wængonguī ōnonque pōnongā æninque botó tōmengā ingante waa ate pōnente apænedīnque ade cæmo adīnque wadāni iñōmō edæ, Baacā incæ iñæmpa cæmīi, ante quīnante pōnō babæ ante tedewēnāni,” ante bitō wæbitawoo. ³¹ Incæte mīnitō cæmīni incæ bemīni incæ quīēmē bai cæmīni incæ mīnitō cædinō adīnque wadāni, Wængonguī ñāō apāite bai ēmōnongā ingampa, ante acædānīpa, ante cædinque waa cæedāni. ³² Edæ mīnitō iñōmō, Waa cæmōni adīnque wadāni oodeoidi incæ guidiegoidi incæ Codito ingante nē godongāmæ pōnēnāni incæ tōmānāni tee tēwadāmai inte oda cædāmai incædānīpa, ante pōnēninque edæ waa cæedāni. ³³ Botó adobai, Botó tōmēmo ænguīnō ante wædāmai imopa. Wæætē, Botó waa cæbo adīnque wadāni Itota gāmænō pōninque tōmengā ængā beyænque quēwencædānīpa, ante pōnēninque botó quīēmē cæbo incæ cōwē waa cæbopa.

11

¹ Mōnō Codito tōmengā nānō cæi bai botó adobai cæbo adīnque mīnitō botó cæi bai adobai cæbaīmīnīpa.

Iīmai cæte Wængonguī ingante apæneccēimpa

² Mīnitō botó imote cōwē pōnēmīni adīnque botó mīnitō imīnite waa adīnque apænebopa. Ayæ do pōnengāināni nāni apænegainō ante botó adodō ante apænebo

ēñēninque mīnitō, Nāwangā impa, ante ēñēnte cæmīnipa, ante adinque botō mīnitō īmīnite waa ate pōñēninque apænebopa.

³ Nōwo īñōmō īīmaī āmo ēñēedāni. Mōnō Codito ñæñængā īnongā inte onguiñængā ingante nē angā ingampa. Waoda nāna gæncaya adinque onguiñængā ñæñængā bai īnongā inte onquiængā ingante nē angā ingampa. Mæmpo Wængongui guiquēnē ñæñængā pōñi īnongā inte mōnō Codito ingante nē angā ingampa. ⁴ Īninque onguiñængā īñōmō Wængongui ingante apænedinque ayæ, Wængongui æbānō angāā, ante apænedinque wencadāmaī apæñecæcāimpa. Edæ bee ocadinque tōmængā nāmā ocabo ante guīñencate bai apænebaingampa.

⁵ Onquiængā guiquēnē bee ocadinque Wængongui beyæ apæñecæcāimpa. Bee ocadinque tōmængā, Wængongui æbānō angāā, ante apæñecæcāimpa. Edæ bee ocadāmaī inte nāmā ocamō ante guīñencate bai onquiængā apænebaingampa. Mānōmaī cædinque tōmængā nē ēñēnāmāī cædingā ingante nāni ēō tocadingā bai īnongā inte encabaingampa. ⁶ Edæ onquiængā bee ocadāmaī ingā inte godōmenque ēō tocadā bai waa incædōnīmpa. Wæætē, Eō tocate wæcæ wæ, ante wæcā īninque tōmængā īñōmō edæ bee ocabaingampa. ⁷ Edæ onguiñængā ingante badōninque Wængongui tōmængā nānō ēmōnō bai adobai badongā ēmongacāimpa. Īninque Wængongui nānō ñāō apāidō bai adobai ēmōnongā inte onguiñængā bee ocadāmaī incæcāimpa. Onquiængā guiquēnē onguiñængā nānō ēmōnō māninque ēmōnongā ingampa. ⁸ Onguiñængā ingante tāno badōninque Wængongui ayæ onquiængā ingante badoncæte ante onguiñængā iyapa ænte badongacāimpa. ⁹ Edæ wīī onquiængā beyæ ante onguiñængā ingante Wængongui badongacāimpa. Wæætē, Bitō onguiñængā beyæ quēwencæbiimpa, ante onquiængā ingante badongacāimpa. ¹⁰ Īninque onquiængā īñōmō, Botō nānōogængā beyæ Wængongui botō īmote badongacāimpa, ante pōñente wædinque bee ocacæcāimpa. Ayæ, Bee ocabo adinque Wængongui anquedoidi incæ, Botō nānōogængā nē angā ingampa, ante ēñēncædānīmpa, ante cædinque onquiængā waa cædinque bee ocacæcāimpa.

¹¹ Incæte mōnō Awēnē nempo quēwēninque onguiñængā dæ angā bai onquiængā ōnonganque baquēnengainō anguēnē. Wæætē onquiængā dæ angā bai onguiñængā wæætē ōnonganque baquēnengainō anguēnē. ¹² Edæ onquiængā ayæ dæ āñongante tōmængā ingante badoncæte ante Wængongui

onguiñængā iyapa æninque badongacāimpa. Wæætē wēñængā onguiñængā ingante onquiængā mangā beyænque ēñacampa. Incæte Wængongui beyænque tōmāmō quēwēmompā.

¹³ Onquiængā bee ocadāmaī inte Wængongui ingante apæñecā īninque waa intawoo, ante mīnitō tōmēmīni godongāmæ pōñēē cōninque æedāni. ¹⁴ Edæ dodāni nāni cægai bai cæquēnēmō inte mōnō īīmaī ante pōñengæimpa. Onguiñængā doyængui encadinque guīñencate wæquēnengā ingampa, ante edonque ate pōñēmaīmpa. ¹⁵ Onquiængā guiquēnē tōmængā doyængui pæ īninque edæ waa impa. Edæ, Doyængui bee ocacæbiimpa, ante onquiængā ingante Wængongui badongā encacampa. ¹⁶ Botō mānōmaīnō ante apænebo ēñēninque mīnitō pancamīniya wæætēdō wæætē āinēmīnitawo. Īñæmpa botō āninō bai mōnitō cōwē cæmōnipa. Ayæ Codito ingante godongāmæ nāni pōñencabo adobai Wængongui quīnāni īñōnāni inte edæ cōwē mānōmaī cædānīpa cæmīnīi.

Awēnē cæcæmæ ante bedinque pancamīniya wīwa cæmīni

¹⁷ Mīnitō mīni waa quēwēnūnque ante godongāmæ ponguēnēmīni incæte mīni godōmenque wīwa quēwēnūnque godongāmæ pōmīni awædō. Īninque botō, Waa cæmīnipa, ante ædō cæte anguīmoo. ¹⁸ Īīmaīnō ante ñōwo tāno apænebo ēñēedāni. Codito ingante mīni pōñencabo godongāmæ pōninque mīnitō īñōmō mīni caipæ incæ wæætē godō wæætē godō tedewēninque wacabo nāñēnē wacabo nāñēnē bamīnipa. Ante apæñedāni ēñēninque botō, Wabānō nōingā ante apænedānīpa, ante pōñēmopa. ¹⁹ Nāwangā impa, ante pōñēmopa. Edæ, Ædānidō īnānite Wængongui waa acāā, ante edonque acāīmpa, ante tōmængā angā ate mīnitō mīni cabo wadō ante mīni cabo wadō ante tedemīnipa, ante awædō.

²⁰ Īninque, Awēnē ææmæ impa, ante godongāmæ pōninque mīnitō wīī mōnō Awēnē ææmæ bete bai cæmīni awædō. ²¹ Edæ mīni godongāmæ cæññedē incæ mīnitō, Wadāni adobai cæncædānīmpa, ante ee ongōnāmāī īmīni inte tōmāmīni cængui ade cæmīnipa. Pancadāniya ayæ gæwæante ongōñōnāni edæ pancamīniya do tōmo bete dowænte wæmīni awædō. ²² Īñæmpa oncō ōmaamīni bai inte mīnitō tōmēmīni oncōnē cænte wīī bemīnīi. Edæ Codito ingante mōnō godongāmæ pōñencabo Wængongui quīmō īmō incæte mīnitō nāēmæ pīinte cæmīni awædō. Ōmæpodāni incæ tōmēnāni nāni guingo imonte wæquinque ante mīnitō pæ gompote ade cæmīnipa tōō. Mānōmaī

cæmini adinque botō dicæ, Waa cæminipa, āmogaa.

Mōnō Awēnē cæcmæ

(*Māteoo 26.26-29; Māadoco 14.22-25; Odoca 22.14-20*)

²³ Edæ mōnō Awēnē botō imote pōnō apæncæcā ēñēninque botō wæætē īīmaī ante mīnitō īmīnite pōnō apænetabopa. Mōnō Awēnē Itota ingante Codaa nānō odōmonte godongāiōnæ woyowotæ īñonte Itota pāō æninque, ²⁴ Wængonguī ingante waa ate pōnente apænedinque pāō pā æninque angacāīmpa. “Īī pāō botō baō baī impa. Botō, Mīnitō quēwencæmīnīmpa, ante botō baō godonte baī cædinque wæncæboīmpa. Botō pā ænte pædæ pōnōmo baī mīnitō adobaī īīncayæ ate botō imote ante pōnēninque godongāmæ cæedāni,” angantapa.

²⁵ Mānōmaī angā īīnque cænāni ate owæta adobaī æninque tōmēngā, “Botō wepæ īīmæ baī impa. Wængonguī do apænedinque, Botō pōnō cæbo ate mīnitō Ao āmīni īīnque mōnō godongāmæ waa cæte quēwengæīmpa, angacāīmpa. Nōwo adobaī mīlne āninque apænebopa. Botō wepæ ante Ao ante æmīni inte mōnō godongāmæ waa cæte quēwengæīmpa. Īīnque mīnitō wantæ wantæ īñō bedinque botō imote ante pōnente becæmīnīmpa.” Ante Itota angā begadānīmpa. ²⁶ Īīnque Itota nānō ponguīōnæ ganca mīnitō mānōmaī pāō wæætē wæætē cænīnque mānīmæ baī wæætē wæætē bedinque, Mōnō Awēnē tōmāmō beyæ wængacāīmpa, ante odōmonte baī cæmīni adinque wadāni ēñencædānīmpa.

Nōīngā ante pōnēninque mōnō Awēnē cæcmæ becæīmpa

²⁷ Mānōmaī ī īīnque waocā pōnēnāmaī inte mōnō Awēnē pāō ōnonque cænīnque Awēnē nānō bequīmæ ōnonque bedinque tōmēngā nānō wentamō mongængūinque mōnō Awēnē baō ante, Ōnonque impa, ante piīnte baī cædinque tōmēngā wepæ ōnonque wido cæte baī cæcampa. ²⁸ Īīnque, Æbānō entawēmōō, ante mīnitō nāmā nāēmænte cōwā adinque nōīngā ante pōnēninque pāō cænīnque mānīmæ bequēnēmīni īmīnīpa. ²⁹ Edæ, Mōnō Awēnē baō baī impa, ante æcānō pōnēnāmaī inte cænte beda īñōmō tōmēngā nāmā nānō apænte pante wæquinque mānōmaī cænte becampa. ³⁰ Edæ mānōmaī cæmīni beyænque pancamīniya aquīmīni badinque wæntæye bamīnīpa. Pancamīniya wīī pōnente wæmīnīpa. Ayæ wadāni æpodānīmē mānīnō beyænque do æmæwo wænānīmpa.

³¹ Incæte mōnō cōwā adinque nāmanque apænte āninque nōīngā cæmō īīnque mōnō Awēnē wæætē mōnō imote apænte ante pīīnāmaī īīmaīngampa. ³² Mōnō Awēnē mīnitō

īmīnite apænte ante pīīngantawo. Edæ mōnō Awēnē, Inguipogaque quēwēnāni īnānite apænte āninque botō pāñedē mīnitō wīī adobaī pante wæquīmīni, ante wææ cædinque nōwo īñōmō edæ, Ēñēnguēnē quēwēedāni, ante wædænque pangā wæmōmpa.

³³ Botō tōnīñamīni ēñēedāni. Mānōmaī ī, ante pōnēninque mīnitō cæncæte ante pōnīnque ee ongōñōmīni tōmēnāni adoyōmō pōnāni ate godongāmæ cæedāni. ³⁴ Godongāmæ pōnīnque mōnō wīī apænte panguēnēmō bacæīmpa, ante wææ cædinque mīnitō nē gæwænte wæcā ingante āmīni oncōnē tāno cæncæcāīmpa. Nōwo mānīnque ante yewæmōnīnque botō mīnitō weca īīncayæ ate pōnīnque wadō mīni ānīnō ante godōmenque apænebo ēñencæmīnīmpa.

12

Wængonguī Ōnōwoca pōnō cæcā æninque cæcæīmpa

¹ Īñānāni ēñēedāni. Wængonguī Ōnōwoca mōnō imote pōnō cæcā ate tōmēngā nānō pōnōnoncoo eyepæ ænte ēwocadinque mōnō æbānō cæquīī, ante ēñēninque mīnitō oda cædāmaī incæmīnīmpa, ante nōwo yewæmōmo aedāni.

² Doyedē īñōmō mīnitō ēñēnāmaī īñōmīnite wadāni, Mōnītō mīñæ pōedāni, ante æbāmē cæte ænte māodāni gogamīnīmpa. Tōmēnāni mīñæ mānōmaī go go cædinque mīnitō do oda cædinque babetade nāni badōnīnca weca ædæ wææninque, Mōnītō wængonguī impa, ante cædinque quēwengamīnīmpa.

³ Īīnque mīnitō īmīnite botō nōwo, Ēñēnguēnē quēwēmīniī, ante īīmaī ante apænebopa. Æcānō Wængonguī Ōnōwoca tōnō āāwocaque baī ēwocacā guīquēnē tōmēngā, Itota nānō panguīnque nē wentamō mongængā ingampa, ante ædō cæte tedewēngūngā. Ayæ wæætē Wængonguī Tæiyæ Waēmō Ōnōwoca tōnō ēwocadāmaī ingā guīquēnē tōmēngā, Itota Tæiyæ Awēnē ingampa, ante ædō cæte apænequīngā.

⁴ Adocanque ingante wadō pōnō cædinque Wængonguī Ōnōwoca wacā ingante wadō pōnō cædinque tōmēngā nānō pōnōnīncoo nēnēmpote baī cæcā æninque mōnō wadō wadō nē cæmō īmōmpa. Wængonguī Ōnōwoca adocanque pōnī īnongā incæ mānōmaī wadō wadō pōnō cæcampa. ⁵ Ayæ mōnō Awēnē adocanque pōnī īnongā inte waocā adocanque ingante, Īīmaī cæe, āninque wacā ingante, Wadō baī cæe, angā ēñēninque mōnō tōmāmō wadō wadō nē cæmō īmōmpa.

⁶ Ayæ Wængonguī adobaī adocanque pōnī incæ tæī pīñængā īnongā inte waocā adocanque ingante pōnō cæcā æninque tōmēngā tæī pīñængā badinque inte wadō

cæcampa. Wacā ingante wadō pōnō cæcā æninqe tōmengā tæi piñængā badinque wadō wadō cæcampa. Ìninqe Wængongui mǎnōmaī wadō wadō pōnō cæcā æninqe mōnō tōmāmō eyepæ badinque cæmompā.

⁷ Wængongui Ònōwoca, Tōmǎnāni waa quëwencædānimpā, ante cæedāni, ante tōmāmō imonte wadō wadō pōnō odōmonte apæneçā ëñëninque tōmāmō mōnō waa quëwenguinque ante godongāmæ cæmompā.

⁸ Ìninqe Wængongui Ònōwoca pancadāniya inānite, Wængongui nō nānō ëñënō ante apæneçā ëñëninque tōmēnāni nē nō ante apænedāni badānimpā. Ayæ adocā Ònōwoca iñōmō Wængongui nānō cædō ante edonque odōmongā adinque pancadāniya nē adīnāni badinque, Wængongui mǎnōmaī cæcampa, ante nō apænedānimpā. ⁹ Adocā Wængongui Ònōwoca apæneçā ëñëninque pancadāniya, Wængongui eyepæ pōnō cæcampa, ante wede pōnēnāni inte tōmēnāni wede nāni pōnēnō beyænque nanguī cædānimpā. Ayæ Wængongui Ònōwoca adocanque inongā inte pōnō cæcā æninqe pancadāniya wēnæ wēnæ ināni inānite gampote apænedāni ate waa badānimpā. ¹⁰ Pancadāniya inānite guiquēnē Wængongui Ònōwoca godō cæcā æninqe tōmēnāni tæi piñænāni badinque nanguī pōni cædānimpā. Wængongui Ònōwoca apæneçā ëñëninque wadāni Wængongui beyæ nē apænedāni inānimpā. Ayæ wacā yewænte bai tedecā adinque, Wængongui Ònōwoca tedecantawo, wēnæ tedecantawo, ante wæyōnāni Wængongui Ònōwoca pancadāniya inānite edonque odōmongā adinque tōmēnāni, Ecānō ònōwoca nē tedecāā, ante do ëñënānimpā. Pancadāniya guiquēnē Wængongui Ònōwoca tōnō apænedinque wadāni nāni tede bai nē tededāni inānimpā. Ayæ iñāni wadāni nāni tede bai tededāni ëñëninque pancadāniya Wængongui Ònōwoca apæneçā ëñëninque, Nē tededāni æbānō ante tededāni, ante do ëñënāni inte wadāni inānite edonque pōni apænedāni ëñënānimpā.

¹¹ Ìninqe adocā Ònōwoca adocanque inongā inte tōmengā nānō nō angai bai cædinque mōnō imonte apænte æninqe, Pancamīniya iīmaī cæcæmīnimpā, wamīni iīmaī cæcæmīnimpā, ante pōnō cæcā æninqe adocanque nānō cæquēnēnō ante wacā nānō cæquēnēnō ante edæ tōmāmō mōnō cæquēnēnō ante cæmompā.

Adocabomō bai imompā

¹² Mōnō baō adoyonque pōni ëñāmō incæ mōnō wīi adodonque cæquinō ante ëñāmō inte mōnō pæ pagænguincōo watai watai ëñānompā. Edæ wadō mōnō cæquinō ante watai ëñadinque mōnō wæætē wadō cæquinō ante watai watai ëñānompā. Ìninqe

watai watai nanguī mōnō ëñācoo iñōmō adoyonque pōni impā. Ayæ Codito nempo quëwëninque mōnō adobai adocabomō imompā. ¹³ Mōnō adocabomō mōnō tōmāmō baquinque Wængongui Ònōwoca mōnonga pō guite owocampa. Ìninqe oodeocā incæ guidiegocā incæ wacā ingante nē cæcā incæ abæ tawænte ee gote bai nāmā beyænque nē cæcā incæ mōnō tōmāmō adotaca bete bai Wængongui Ònōwoca tōnō äawocaque bai tōmāmō ëwocampā.

¹⁴ Mōnō baō adoyonque pōni ëñāmō incæ mōnō wīi adodonque cæquinō ante ëñāmō inte mōnō ëñācoo watai watai nanguī ëñānompā. ¹⁵ Ìninqe mōnō ònōwa incæ, “Ònompō òmæpobo inte botō waocā baō òmaabo imopā,” ante ædō cæte anguingāā. Ìñæmpā mǎnōmaī wæte tedecā incæ ònōwa cōwē waocā baō ëñate ewacampā. ¹⁶ Ayæ mōnō ònōmonca incæ, “Awinca òmæmōo inte botō waocā baō òmaabo imopā,” ante ædō cæte anguingāā. Ìñæmpā mǎnōmaī ante tedecā incæ ònōmonca cōwē waocā baō ëñate ëmoncampa. ¹⁷ Ìñæmpā mōnō baō tōmāñō awincaque ëmōmō bai edæ quimoncadō ëñenguēnēi. Ëñënāmaī incædōmōimpā. Ayæ mōnō baō tōmāñō ònōmoncaque ëmoncamō bai quincadodō ongoncadoquēnēi.

¹⁸ Incæte Wængongui iñōmō edæ, Waomīni mīni cæquēnēnō ante eyepæ cæcæmīnimpā, ante badoncæbōimpā, ante Wængongui angacāimpā. Ìninqe tōmengā nāmā nānō angainō bai badōninque mōnō pæ pagænguincōo adoyonque baquinque ante wadō cæquinō ante wadō cæquinō ante tōmāñō badongacāimpā. ¹⁹ Edæ adodonque pōni mōnō cæquēnēnō ante Wængongui badongā bai mōnō wadō mōnō cæquēnēnō ante quiodō pæ pagænte cæquēnēi. ²⁰ Wængongui nānō nē badongaimō iñōmō inte wadō mōnō cæquinō ante watai wadō mōnō cæquinō ante watai nanguī mōnō ëñācoo ëñāmō incæ mōnō baō adoyonque pōni ëñānompā.

²¹ Mǎnōmaī ëñāmō iñōmonte edæ mōnō awinca incæ ònompō inte apænedinque, “Bitō dæ āmi bai botō tōmēmo eyepæ cæcædōmoimpā,” ante ædō cæte anguii. Ayæ wæætē mōnō ocamō incæ ònōwa inte apænedinque, “Bitō dæ āmi bai botō tōmēmo eyepæ cæcædōmoimpā,” ante ædō cæte anguii. ²² Wæætē mōnō baō pancayonga pæ pagænāmaī iñcæte mǎniñō ante mōnō godōmenque waa adinque, Mōnō quëwenguiñō impā, ante angæimpā. ²³ Wayō guiquēnē, Wīi wæmongā awædō, ante mōnō āñō ante, Waa acædānimpā, ante cædinque wæmoncoo pōnō dadi ompogate mǎniñō beyæ godōmenque waa ate bai cæmompā. Wayō guiquēnē mōnō guñëñate wædō ante, Wīi edonque acæimpā, ante

pönö bee ogate cædinque mōnō guīñēñayō beyæ godōmenque waa cæmompā. ²⁴ Waēmō mōnō ayō guiquēñē, Edonque acæimpa, ante bee ogadāmaī cæmompā.

Incæte, Adoyonque bacæimpa, ante mōnō baō wayō wayō badōninque Wængonguī, Wīī waēmōngā, ante mōnō wæyō ante pōnēninque, Māniñō botō godōmenque waa abopa, ante badongacāimpa. ²⁵ Īninque, Mīnitō baoncoo nāēmæ pūīnāmaī incæmīninpa, ante cædinque Wængonguī mōnō baō adoyonque badongacāimpa. Wæætē mīnitō nāmā baoncoo incæ nāēmæ waadete waa cæcæmīninpa, āninque Wængonguī tōmāñō waa acampa. ²⁶ Īninque mōnō baō adoyōmonque nantate wæyōmō tōmāo wootæ wootæ nantate wæmompā. Ayæ wæætē adoyōmonque adinque, Waēmō impa, ānāni ēñente wædinque tōmāo watapæ tomompā.

²⁷ Mīnitō ĩñōmō, Wayō wayō ēñamō incæ adoyonque ēñamompā, ante do pōnēninque, Mōnō adobai nāñēñē nāñēñē ingaimō inte ñōwo wæætē Codito nempo quēwēninque adocabomō ĩmompā, ante pōnencæmīninpa. ²⁸ Īninque Codito ingante godongāmæ mōnō pōnencabo imō adinque Wængonguī angā ēñēninque ĩmaī cæmompā. Yæcadomōni ĩmōni ĩñōmō Codito nāñō da godongaimōni ĩmōni. Gao wæi ĩnāni ĩñōmō Wængonguī beyæ nē apænedāni ĩnāni. Ayæ tæcæguedēñāni ĩnāni ĩñōmō nē odōmonte apænedāni ĩnāni. Wæænōmenque ĩnāni ĩñōmō tæī piñænte entawente nē nanguī cædāni ĩnāni. Yæmīñæ gao æidinque ĩnāni ĩñōmō Wængonguī Ōñowoca tōnō āawocaque bai ēwocadinque ĩmaī cædāni. Pancadāniya, Wēnæ wēnæ ĩnāni waa bacædāniimpa, ante nē waa cædāni ĩnāni. Pancadāniya wadāni beyæ nē waa cædāni ĩnāni. Pancadāniya nē ānāni ĩñōnāni inte awēñēdi ĩnāni. Ayæ yæmīñæ pōni ĩnāni ĩñōmō wadāni nāni tede bai nē tededāni ĩnāni.

²⁹ Māñōmaī imō incæte edæ Codito nāñō nē da godongaimō dicæ tōmāmō ĩmongaa. Ayæ Wængonguī beyæ nē apæñēimō dicæ tōmāmō ĩmongaa. Nē odōmōnōmō dicæ tōmāmō ĩmongaa. Nē tæī piñænte entawente nanguī cædōmō dicæ tōmāmō ĩmongaa. ³⁰ Ayæ Wængonguī Awēñē pōnō cæcā incæte wēnæ wēnæ ĩnāni nāni waa baquinque ante dicæ tōmāmō nē waa cæmongaa. Edæ wadāni nāni tede bai dicæ tōmāmō tedomongaa. Wacā māñōmaī wadāni nāni tede bai tededā ēñēninque tōmāmō dicæ mōnō tededō adodō edonque apænemongaa. ³¹ Incæte mīnitō Wængonguī ingante, Bitō Ōñowoca pōnō cæcā ate mōnitō eyepæ inte ate yæcado ongōñāni nāni cæī bai

adobai cæcæte ante nanguī wæmōni, ante apænedinque nanguī cædāni.

Mōnō waadete pōnente cæcæimpa, ante

Ñōwo ĩñōmō botō, Ābāñō godōmenque waa pōni cæquīī, ante yewæmonte odōmōmo aedāni.

13

¹ Botō waodāni nāni tede bai tede bopa, āmīnitawo. Wængonguī anquedoidi nāni tede bai tede bopa, ante tomīnitawo. Īñempa mōnō wadāni ĩnānite waadedāmaī inte tedomō ĩninque ampoincade ōnonque ampōi bai ĩmaimpa. Waadedāmaī inte tedomō ĩninque adoyōmō pōnō wo pōnō wo pōnō wæcāinta bai mōnō adobai ōnonque tede wēñō ĩmaimompā.

² Wængonguī Ōñowoca pōnongā æninque botō tōmēngā beyæ nē apænebo ĩmopa, ante tomīnitawo. Waodāni nāni wē wodonte ēñēngāñō tōmāñō ante edonque pōni ate ēñēmopa, ante tomīnitawo. Waodāni nāni nanguī ēñēñō ante adinque tōmāñō ante ēñēmopa, ante tomīnitawo. Edæ nē wede pōñēmīni inte mīnitō ānanquidi incæ āmīni ēñente cabænte gotawo. Īñempa māñiñō tōmāñō waa pōni cæmō incæ mōnō wadāni ĩnānite waadedāmaī inte cæmō ĩninque wæætē ōñōmonque edæ mōnō babaimpa.

³ Ōmæpodāni ĩnānite botō māincoo tōmāā nēnempote godōmopa, ante tomīnitawo. Wængonguī beyæ ante cæyōmote wadāni botō baō botō ēñayō incæ iya tanca cædāni ate wædinque botō piyæñē cæbaimopa, ante mīnitō, Waa cæbopa, ante tomīnitawo. Īñempa māñi tōmāā waa cædinque mōnō waadedāmaī inte cæmō ĩninque mōnō waa cædō beyæ æñāmaī ĩmaimompā.

⁴ Nē waadete pōnēngā ĩñōmō tōmēngā pūīnāmaī inte edæ piyæñē cædinque godō waadete cæcampa. Wadāni gomonga cædinque godōmenque nanguī æñāni adinque nē waadecā wæætē waadete pōnēninque piinte wædāmaī inte piyæñē cæcampa. Nāmā nāñō cædinō ante pōnēninque nē waadete pōnēngā ĩñōmō, Botō gomonga cæbopa, ante tededāmaī ingampa. Tōmēmoque waēmō ĩmopa, ante nāmā waa adāmaī ingampa. ⁵ Wacā tæcæ cæyongante nē waadete pōnēngā ĩñōmō, Tāno cæbote, ante wææ cædāmaī ingampa. Nāmā nāñō æñēñō ante cædāmaī inte tōmēngā wadāni beyænque cæcampa. Wæætē wīī ĩñontobæ ænguī bacampa. Wadāni wēnæ wēnæ cædāni ate wædinque tōmēngā nē waadecā ĩnongā inte wæætē piyæñē cæcampa.

⁶ Īninque, Wacā wēnæ wēnæ cæcampa, ante tededāni ēñente wædinque nē waadete pōnēngā ĩñōmō māñiñō ante todāmaī ingampa. Wæætē, Wacā ñōingā cæcampa, ante tededāni ēñēninque tōmēngā watapæ

pöni tocampa. ⁷ Æbämë cædäni incæ në waadete pönengä iñömö piyænë cædinque tömänäni inänite wææ gom pocampa. Wæætë, Waa cædänipa, änäni ëñëninque tömengä, Näwangä impa, ante do ëñengampa. Æbämë ba incæte tömengä, Ayæ ate watapæ bacæimpa, ante cöwë pönëninque wæntædämaï inte ee cæcampa.

⁸ Mönö waadete pönëmämö iñömö cöwë dæ badämaï ingæimpa. Wæætë Wængongui iincayæ ate, Idæwaa, angä iñinque ingui poga tömengä beyæ mönö apænëdö guiquënë edæ dæ angæimpa. Wadäni näni tede bai mönö tededö incæ pæ wëñecæimpa. Ingui poga nangui adinque mönö ëñënö ante Wængongui, Idæwaa, ancæcäimpa. ⁹ Nöwo mönö ëñënö iñömö pancaä ëñëninque pancaä wæætë oda cæmompä. Wængongui beyæ mönö apænëdö iñömö pancaä apænëdinque mäninque apænemompä. ¹⁰ Iñinque bayedë guiquënë Wængongui nänö apænëdö ædæmö ëñëninque mönö nöingä pöni odömönte apænecæmöimpa. Oda cæte mönö ëñënö ante, Idæwaa, äninque Wængongui mänifedë edæ mönö wii eyepæ apænëte wædö ante, Idæwaa, ancæcäimpa.

¹¹ Botö iñömö wëñæmoyedë wëñængä nänö tede bai tededinque wëñængä nänö ocai ëñënö bai ëñengaïmo inte wëñængä, iïmaï impa, ante nänö pönënö bai botö mänifedë adobai pönengaboïmpä. Nöwo guiquënë picæmo badinque wëñæmoyedë botö cægäinö ante iïmpo cæbopa. ¹² Awocawænta wëmö ate bai cædinque mönö nïwo Wængongui Önöwoca nänö odömönö ante edæ wii edonque amoppa. Ayæ ate guiquënë mönö awincadö awinca edonque pöni acæimpa. Botö nïwo pancaä adinque oda cæte ëñëmo iïmpa. Ayæ ate guiquënë Wængongui pönö odömönö adinque tömengä botö imote edonque pöni acä bai botö adobai tömää eyepæ pöni acæboïmpä.

¹³ Iñinque mönö entawënoncoo ante adinque mënonque go adodonque mänimpodonque ayæ ongompä. Mönö wede pönënö ante ædæmö entawengæïmpä. Watapæ bacæimpa, ante mönö pönënö ante ædæmö entawengæïmpä. Mönö waadete pönënö ante ædæmö entawengæïmpä. Iñinque mänimpodonque ayæ ongö incæte mönö waadete pönënö iñömö edæ ñænænö pöni i iñinque mönö mäninö ante täno ædæmö entawengæïmpä.

14

Wadäni näni tede bai æbänö tedequii, ante

¹ Iñinque munitö, Në waadete pönëmö bacæimpa, ante mäninonque ante pogodo

gote bai nangui cæedäni. Ayæ adobai, Wængongui Önöwoca mönö imonte nänö pönönö bai mönö eyepæ ewocadinque cæcæimpa, ante nangui æinente wæedäni. Mäninö Wængongui Önöwoca nänö pönönoncoo ate adinque munitö, Wængongui beyæ në apænëmö mönö täno adodonque ante bacæimpa, ante godömenque æinente wædinque cæedäni. ² Edæ wadäni näni tede bai æcänö tededä tömengä wii waodäni inänite apænecampa. Wængonguinque ingante apænecampa. Edæ tömengä Önöwocaque tedecä iñinque tömengä ingante Wængongui æbänö awëmö apænecä, ante ædö cæte ëñenguinänii. ³ Wængongui beyæ në apænecä guiquënë waodäni inänite waadete pönëninque iïmaï cæcæte ante apænecä ëñënanipa. Minitö tæi piñæmini mini entawenguinque wede pönencæminimpä, ante apænecampa. Ayæ, Wæwente quëwëmini incæ munitö wampo bawënte tæi piñænte cöwë cæcæminimpä, ante tömengä Wængongui beyæ ante pönö apænecampa. ⁴ Wadäni näni tede bai në tedecä guiquënë, Tömëmo tæi piñæmo botö entawenguinque ante nangui ëñencæboïmpä, ante nämä beyænque ante tedecampa. Wængongui beyæ në apænecä guiquënë Codito ingante näni godongämæ pönencabo beyæ ante apænëdinque, Minitö tæi piñænte mini entawenguinque ëñencæminimpä, ante apænecampa.

⁵ Iñinque munitö tömämini wadäni näni tede bai apænëmini adinque botö wædænque tobaïmpa. Wæætë tömämini Wængongui beyæ apænëmini adinque botö godömenque watapæ tobaïmpa. Wængongui beyæ në apænecä iñömö ñænængä iñongä wacä tededö në tedecä guiquënë wædangä ingampa. Incæte, Codito ingante mini godongämæ pönencabo tæi piñænte entawencæminimpä, ante cædinque tömengä wacä tededö tedete ate, iïmaï ante tedetabopa, ante munitö tededö adodö ante edonque apænecä iñinque tömengä adobai ñænængä iñongä iïmaingampa. ⁶ Iñänäni ëñëedäni. Wængongui nänö wë wodönö incæ tömengä nänö nö ëñënö incæ tömengä nänö nö odömönö incæ ante botö munitö weca pöninque odömönte apænëbo ëñëninque munitö godömenque pönëmaïminipa. Wængongui iïmaï cæcæcäimpa, ante apænëbo ëñëninque munitö guinente wædinque waa cæbaïminipa. Wæætë munitö weca pöninque botö wadäni näni tedebai tedete apænëbo bai munitö ædö cæte godömenque në pönëmini baquëñëminii.

⁷ Edæ gobæ ongönte aa pedinque önonque ante pedäni ëñëninque mönö wæætë, Ædemë ante pedänipa, ante ædö cæte ëñenguü. Në ampoinca ampodäni adobai ämotämini inämaï önonquedö ante ampodäni

ēñēninque mōnō, Ædemē ante ampodānīpa, ante ædō cæte ēñenguīl. ⁸ Ayæ tontado adobaī, Wæætēdō wæætē cæcæīmpa, ante todompeta nāni ancadeca we ōōninque idiquibæ we ōngā īninque wadāni, Æbāmē cæcæte ante we ōngāā, ante wædinque oda cæte ee ongonde wæætēdō wæætē cædāmaī īmaīnānīpa. ⁹ Ayæ mīni cabo adobaī wīl edonque apænemīni ēñēninque wadāni, Æbāmē ante tedecāā, ante wædinque oda cæte wæbaīnānīpa. Woboyæ māmoque īñampa tedewēmaīmīnīpa.

¹⁰ Waodāni inguipoga tōmāo quēwēninque nanguī nāni tededoncoo tededānīpa. Nāwangā īmpa. Incæte wadāni nāni tededō wadāni nāni tededō tōmāā tedequīnō ī īninque adodeque incæ ōnonque tedete īnāmaī īmpa. ¹¹ Īninque wacā apænecā ēñēninque botō, Æbānō ante tedecāā, ante ēñēnāmaī īmo adinque tōmengā wæætē, Wabi inte wīl ēñēmīpa, ancædongāīmpa. Tōmengā ingante botō adobaī, Wabi inte botō tededō wīl tedebīpa, ante ancædōmoīmpa. ¹² Īninque mīnitō, Wængonguī Ōnōwoca pōnō cæcā æninque mōnō eyepæ ēwocadinque cæcæīmpa, āmīnitawo. Mānōmaīnō āninque mīnitō, Wængonguī Ōnōwoca pōnō cæcā ænte ēwocadinque cædōmō inte mōnō Codito ingante mōnō godongāmæ pōnencabo godōmenque tæī piñænte entawengæīmpa, ante pōnēninque mīnitō, Mānīnonque ante botō ēwocate cæquīnō ante pōnongā æncæboīmpa, ante tāno æīnente cæedāni.

¹³ Mānōmaī beyæ wadāni nāni tede baī nē tedemīni īñōmō mīnitō tōnīñadāni adobaī ēñēcædānīmpa, ante cædinque Wængonguī ingante īmaī ante æedāni. Wængonguī ēñēmī. Wadāni nāni tede baī do tededinque botō æbānō ante tedetawo, ante bitō odōmōnte apænēbi ēñēmoe. Mānōmaīnō ante apænēbi ēñēninque botō wæætē mōnitō tededō adodō ante edonque apænēbo ēñēninque mīnitō Wængonguī ingante apænēte cæedāni. ¹⁴ Wadāni nāni tede baī tededinque Wængonguī ingante apænēbo inte botō ōnōwocaque pōnente apænēdinque ocaī ōmædæcabo baī inte apænēbaīmōpa.

¹⁵ Mānōmaī īmpa, ante adinque æbānō cæquīmoo. Edæ ōnōwoca pōnente apænēdinque botō ocaī adobaī ēñēnte pōnēninque Wængonguī ingante apænecæboīmpa. Ayæ Wængonguī ingante waa pōnī apænecæte ante ōnōwoca pōnente āmotamīni āninque adobaī ocaī ēñēnte pōnēninque āmotamīni ancæboīmpa. ¹⁶ Bitō, Wængonguī ingante waa pōnī cæcampa, ante ōnōwocaque pōnēninque apænēbitawoo. Īñampa Wængonguī ingante waa ate pōnēninque ōnōwocaque pōnente apænēbi ēñēninque wacā nē

ōnonganque ingā guiquēnē, Bitō æbānō apænēbīi, ante ēñēnāmaī inte, Ædō cæte Ao anguīmoo, ante wæbaingampa. ¹⁷ Bitō waa ate pōnēninque ōnōwocaque waa apænēbi ēñēninque tōmengā wæætē, Bitō æbānō ancæte ante tedebīi, ante ēñēnāmaī inte ædō cæte godōmenque tæī piñænte entawengūngāā. ¹⁸ Botō īñōmō, Mīnitō wadāni nāni tede baī wædænque tedeyōmīni botō godōmenque nanguī tedebōpa, ante Wængonguī ingante waa ate pōnēninque apænēbōpa. ¹⁹ Incæte Codito ingante mōnō pōnencabo tōnō godongāmæ pōninque botō wadāni nāni tede baī tæne tīnco mīdo ganca tedequī incæ wīl tededinque wæætē, Wadāni ēñēcædānīmpa, ante mēnea pōnī edonque apænēdinque waa tobaīmōpa.

²⁰ Īñānāni ēñēedāni. Tæcæ ēñadāni īñōmō wēnæ wēnæ mōnō cæpāmo ante ēñēnāmaī īnānīpa. Mīnitō adobaī mānīnō wēnæ wēnæ mōnō cæpāmo ante ēñēnāmaī inte baī pōnēedāni. Wæætē ocaī mōnō pōnēnō guiquēnē mīnitō mānīnō ante wēñænāninque wædænque nāni encadō baī wīl pōnēninque wæætē picænāni nāni nanguī encadō baī adobaī nanguī encate pōnēedāni. ²¹ Dodāni mōnō Awēnē beyæ ante wææ āninque īmaī ante yewæmongadānīmpa. “Wadāni nāni tede baī nē tededāni īnānīte botō āmo ēñēninque tōmēnāni wæætē botō quīnāni īnānīte apænecædānīmpa. Incæte īñāni guiquēnē botō īmote cōwē ēñēnāmaī inguīnāni awædō, ante mōnō Awēnē angampa,” ante yewæmongatīmpa.

²² Īninque, Wadāni nāni tede baī tedemīni ēñēninque nē pōnēnāni wēdāmaī īñōnāni nē pōnēnāmaī īnāni guiquēnē mānōmaī tedemīni ēñēninque guīñente wæcædānīmpa, ante cædinque Wængonguī Ōnōwoca pōnō cægacāīmpa. Wæætē Wængonguī beyæ ante edonque apænemīni ēñēninque nē pōnēnāmaī īnāni wædāmaī īñōnāni nē pōnēnāni guiquēnē do ēñēcædānīmpa, ante cædinque Wængonguī Ōnōwoca pōnō cægacāīmpa. ²³ Codito ingante mīni pōnencabo godongāmæ pōninque tōmāmīni wadāni nāni tede baī wadāni nāni tede baī tedemīni adinque ayæ pōnāni guiquēnē nē ēñēnāmaī īnāni incæ nē pōnēnāmaī īnāni incæ æbānō anguīnānīi. Mānōmaīnonque tedemīni ēñēninque tōmēnāni wæætē, Mīnitō ōmædæcamīni inte ōnonque tedewēmīnīpa, ante wæbaīnānīpa.

²⁴ Tōmāmīni wæætē Wængonguī beyæ edonque apænēyōmīni nē pōnēnāmaī ingā incæ nē ēñēnāmaī ingā incæ ponte ēñēninque tōmāmīni mīni apænēdō beyæ tōmengā, Botō wēnæ wēnæ cætābōpa, ante wæbaingampa. Ayæ Wængonguī beyæ āmīni ēñēnte wædinque tōmengā, Botō nāwangā wēnæ wēnæ cædōmo inte

wentamō mongænte awædō, ante nāmā apænte āmaingampa. ²⁵ Ayæ tōmengā mīmōno nānō wentamō wē wodōnincoo da tadonte ate bai edonque ate wædinque tōmengā ædæ wæænte guidōmēmæ ñongæninque Wængongui ingante, Bitō adobique nē waa cæbi imipa, ante waa apænebaingampa. Ayæ mīnitō iminite, Nāwangā Wængongui Ōnōwoca tōnō āawocaque bai ēwocāmīnīpa, ante apænebaingampa.

Quiēmē cæmīni incæ nōingā pōnente ædæmō cæedāni

²⁶ Mānōmai ī īnīnque īñānāni, mōnō æbānō cæquū. Wængongui Ōnōwoca pōnō cæcā æninque eyepæ inte mīnitō tōmāmīni godongāmæ pōninque īmai cæmīni incæmīnīpa. Adocanque āmotamīni adodeque angā ingampa. Wacā odōmoncæte ante adodeque apænecā ingampa. Wacā ingante Wængongui edonque odōmonte apænecā ēñēningā inte tōmengā adodō ante adodeque ante odōmonte apænecā ingampa. Wacā guiquēnē wadāni nāni tede bai adodeque tedecā ingampa. Tōmengā æbānō ante tedecā, ante wacā do ēñēninque mīnitō tededō wæætē edonque apænecā ingampa. Mānōmai wade wade ante nē apænemīni inte mīnitō tōmāmīni, Godongāmæ tæi piñænte entawengæimipa, ante īmai cæte tedecāmīnīpa. ²⁷ Wadāni nāni tede bai tedecā wacā adotedæ wææ tededāmai incæcāimipa. Māningā īnīnque tedecā ate wacā tedecæcāimipa. Ayæ wæætē wacā, Tedecæboimipa, angā Ao āmīni tedecā ate idæwaa. Mānimpodānique tedete ñīne cædāni adīnque wacā ēñēninque, Æbānō ante tededāni, ante mīnitō tededō edonque apænecā ēñencæmīnīpa. ²⁸ Codito ingante mīni pōnencabo weca nē ēñente adodō apænequēnengā dæ angā īnīnque edæ wadāni nāni tede bai nē tedeinente wæcā īñōmō wæætē ee adīnque tededāmai inte pæ wēenecæcāimipa. Tōmengā nāmā incæ ōnōwēnenque tedete Wængongui ingante tedecæcāimipa.

²⁹ Wængongui beyæ nē apænedāni adobai mengāa pōni apænedāni ate idæwaa. Mānimpodānique apænedāni ēñēninque mīnitō, Nō ante apænedāni, idi quibæ ante apænedāni, ante apænte ante ēñencæmīnīpa. ³⁰ Ayæ adocanque tæcæ apænee gōñongā wacā nē ēñēe congā ingante Wængongui Ōnōwoca īñontobæ apænecā ēñēninque tōmengā, Botō apæneceboimipa, angā ēñēninque nē apænedīngā wæætē apocænē edæ ēamonca ēñēe concæcāimipa. ³¹ Edæ Wængongui beyæ apænedīnque adocanque tāno apænete ñīne cæcā ate wæætē wacā wæætē wacā apænete ñīne cæcæcāimipa. Mānōmai

cædinque mīnitō godongāmæ ēñente badīnque wampo bawēnente ongoncæmīnīpa. ³² Wængongui beyæ nē apænedāni īñōmō tōmēnāni nāmā ōnōwoca wææ ānīnque ōnōwēnenque wædāmai inte ocai pōnente apænedānīpa. ³³ Edæ Wængongui incæ nē gānē pōnēnongā inte Yæ yæ wapitīcæ godō tededāmai ingampa cæmīnī.

Wængongui quīnāni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninque nāni cæi bai cædinque, ³⁴ mīnitō adobai Codito ingante mīni pōnencabo godongāmæ pōñōmīni onquiyæñāni īnānite āmīni tededāmai incædānīpa. Edæ, Apocænē ēñēmæwedāni, ante Mōitēe wodi nānō wææ angai bai cædinque onquiyæñāni wæætēdō wæætē ānāmai inte onquīñæñāni nāni ānonque ēñēninque edæ ēñēe concædānīpa. ³⁵ Æbānō ante apænedāni, ante ēñencæte ante wædinque onquiyængā oncōnē gote ate angā ēñēninque tōmengā nānōgængā wæætē adodō apæneceā ēñencæcāimipa. Edæ Codito ingante mīni pōnencabo godongāmæ pōñōmīni onquiyængā īñōmō, Guīñēnete awædō, ānīnque ee tededāmai incæcāimipa.

³⁶ Īñæmpa, Wængongui nānō angainō ante mīnitō adomīnīque dicæ mā pōnēninque odōmōmīnitawogaa. Wadāni ēñēnāmai īñōñānite mīnitō dicæ adomīnīque Wængongui nānō apænedō ante ēñēmīnitawogaa. ³⁷ Bitō, Wængongui beyæ nē apænebo imopa, āmitawo. Wængongui Ōnōwoca pōnō cæcā æninque botō eyepæ ēwocadinque nē nangui cæbo imopa, āmitawo. Mānōmai ēwocabi inte do ēñēmi īnīnque bitō, Mōnō Awēnē nānō wææ angainō ante Pabodo mānīnque ante yewæmōngampa, ante, Nāwangā imipa, ante apænebaimīpa. ³⁸ Wæætē mānīnō ante æcānō ēñēnāmai īna tōmengā ingante wæætē mōnō ēñēnāmai ingæimipa.

³⁹ Īñānāni, Mānōmai imipa, ante pōnēninque mīnitō, Wængongui beyæ apæneceāimipa, ante cæcæte ante cōwē nangui cæedāni. Ayæ, Pancadāniya wadāni nāni tede bai apænedānīpa, ante adīnque mīnitō Baa ānāmai īedāni. ⁴⁰ Incæte quīēmē cæmīni incæ mīni pōnencabo mīni godongāmæ watapæ quēwenguinque ante nōingā pōnente ædæmō cæedāni.

15

Codito ñāni ōmæmongacāimipa, ante

¹ Nōwo botō tōniñāmi ēñēdāni. Codito ingantedō ante botō do watapæ apænebo ēñēninque mīnitō mānīneque ante Ao ante wede pōnēninque edæ tæi ongōmīnitapa. Nōwo guiquēnē mīnitō, Mānīne ante æbānō intawoo, ante oda cædāmai incæmīnīpa, ante botō adodō ante ædæmō odōmonte

yewæmōmoi aedāni. ² Mānīne ante watapæ apænebo eñēninque edæ mīnitō adode ante wede pōnēninque tæī ongōmīni inte edæ mānīne beyænque quēwēmaīmīnīpa. Wæætē mānīne botō watapæ apænedō ante æmæ pōnēmīni īninque mīni pōnēnīmāmo incæ ōnōmāmoque pōnī babaimpa.

³ Edæ mōnō Codito tōmēngā nānō pōnō cægāinō ante botō eñēnō ante botō doyedē, Mānīne ante mōnō tāno pōnēngæīmpa, ante pōnō apænebo eñēmīnitapa. Nōwo wæætē, Eñencæmīnīmpa, ante botō adode ante yewæmōmo acæmīnīmpa. Wængonguī angā eñēnte nāni yewæwōngainō bai īninque cædinque mōnō Codito īñōmō wēnæ wēnæ mōnō cægāinō ante teēmē mongænte wæætē wængacāīmpa, ante impa.

⁴ Ayæ, Wængā ate tōmēngā baō īnī ō ænte māo daga wengadānīmpa. Ayæ Wængonguī angā eñēnte nāni yewæwōngainō bai cædinque Codito mēōnaa go adoōnæque īñonte do nāni ōmæmōnte mīingā quēwengacāīmpa, ante mānīne ante impa.

⁵ Ayæ nāni ōmæmōnte quēwēnōngā inte tōmēngā dobæ Pegodo weca ponte a ongongā acantapa. Ayæ ate tōmēngā nānō nē ēmīñængāināni, Dote, nāni ānōnāni weca dobæ ponte a ongongā adānitapa.

⁶ Ayæ ate mōnō tōmīñadāni quīnīento ganca ayæ godōmenque nanguī īnāni godongāmæ ongōñōnāni tōmēngā tōmēnāni weca do ponte edæ a ongongā adotedæ agadānīmpa. Īnāni īñōmō pancadāniya nōwo do wængadānīmpa. Pancadāniya nanguī īnāni nē agāināni incæ ayæ mīlīnāni quēwēnānīpa. ⁷ Mānīnāni adāni ate Itota wæætē Tantiago weca a ongongā agacāīmpa. Ayæ ate tōmēngā nānō nē da godongāināni weca adocā Itota ponte a ongongā agadānīmpa. Itota mānōmaī cægacāīmpa, ante botō, Mānīne tāno pōnēngæīmpa, ante yewæmōmopa.

⁸ Botō guiquēnē nē wæmpōdingā bai inte wæyōmote tōmēngā nōwo pōnī botō weca a ongongā atabopa. ⁹ Edæ Codito tōmēngā nānō nē da godongāimo īmo incæ botō wadāni tōmēngā nānō nē da godongāināni bai wīi adobai īmopa. Edæ Itota ingante godongāmæ nāni pōnencabo īnānite nē togænte pangāimo inte botō wædāmo pōnī īmopa. ¹⁰ Edæ æbāmē īmo incæte Wængonguī waadete pōnō cæcā beyænque botō mānōmaī īmopa. Edæ tōmēngā nānō pōnō cædō ante botō wīi ōnonque cæcæte ante æmoīmpa. Wæætē wadāni wædænque cæyōnāni tōmēngā waadete pōnō cæcā ænīnque botō godōmenque nanguī cætabopa. Incæte botō dicæ tōmēmoque adoboque cæbogaa. Wæætē Wængonguī nānō waadete pōnō cædō ænīmo inte botō tōmēngā tōnō cædinque nanguī cæbo īmopa. ¹¹ Īnīnque

botō apænebo incæ tōmēnāni apænedāni incæ mōnō Codito tōmēngā nānō pōnō cægāinonque ante tōmāmōni apænemōnīpa. Mānīneque ante apænemōni eñēninque mīnitō mānīneque ante pōnēmīnitapa.

Do wængāināni incæ nāni ōmæmoncædānīmpa, ante

¹² Īnīnque, Codito do nāni ōmæmongacāīmpa, ante apænemōni eñēmīni incæte pancamīniya, Nē wængāināni dicæ nāni ōmæmōnāniyaa, ante ædō cæte ānewēmīnīi.

¹³ Īñæmpa, Cōwē nāni ōmæmōnāmaī īnāni bai mōnō Codito incæ adobai nāni ōmæmōnāmaī incædongāīmpa. ¹⁴ Ayæ

Codito nāni ōmæmōnāmaī ingā bai tōmēngā waa pōnī nānō pōnō cægāinō ante quīnante apænequēnēmōnīi. Edæ ōnonque pōnī bacædōnīmpa. Ayæ

ōnonquedō ante apænemōni bai mīnitō mānīne ante pōnēmīni incæ ædō cæte quēwenguēnēmīnīi. ¹⁵ Mōnītō godōmenque

Wængonguī ingante ante apænedīnque, Codito ingante Wængonguī incæ angā nāni ōmæmongacāīmpa, ante apænetamōnīpa.

Īnīnque, Nē wængāināni cōwē nāni ōmæmōnāmaī īnānīpa, ante mīni ānewēnō īñōmō nāwangā ī bai mōnītō Wængonguī nānō cægāinō ante babæ wapitīcæ ante edæ apænecædōmōnīmpa. Edæ, Cōwē nāni ōmæmōnāmaī īnānīpa, ante mīni ānewēnō nāwangā ī bai Wængonguī, Nāni ōmæmōe, ante ædō cæte anguēnēngā.

¹⁶ Īñæmpa, Nāni ōmæmōnāmaī īnānīpa, ante mīni ānewēnō nāwangā ī bai Codito incæ adobai nāni ōmæmōnāmaī incægacāīmpa.

¹⁷ Ayæ Codito nāni ōmæmōnāmaī ingā bai mīnitō mīni wede pōnēnō incæ ōnonque pōnī pōnente incædōnīmpa. Īnīnque wentamō mīni mongæñō ædō cæte nā mēnōngaquēnēmīnīi. Mīni

wēnæ wēnæ cædinō beyæ wentamō mongænte wæcædōmīnīmpa. ¹⁸ Mānīnō

ante mīni ānewēnō nāwangā ī bai Codito nempo quēwēninque do wængāināni incæ do mēmpoga wæninque ædō cæte quēwenguēnēnānīi. Quēwēnāmaī incædōnānīmpa. ¹⁹ Codito pōnō ængā

beyænque mōnō adopoque wæninque wæætē wæñāmaī quēwengæīmpa, ante mōnō inguipogaque pōnēninque wæmo bai wadāni wædænque wæwēñōnāni mōnō godōmenque nanguī wæwenguēnē incædōnīmpa.

²⁰ Incæte Codito dobæ nāni ōmæmongacāī apa ānewēmīnīi. Edæ waodāni tānomō amīñayonte tā pedāni bai cædinque Wængonguī adobai, Do wængāināni īnānite āmo nāni ōmæmoncædānīmpa, ante cæcæte ante cædinque Codito Tānocā ingante do angā eñēninque nāni ōmæmongacāīmpa. Nāwangā impa, ante āmo eñēmaīmīnīpa.

21 Edæ waocā incæ adocanque eññenāmai cæcā beyænque mōnō wænguimāmo pongatimpa. Ayæ nē wænguēnēmō inte wæyōmonte Nōwocā Waocā eñnagaingā inte wæninque ñāni ōmæmongā beyænque mōnō ñāni ōmæmonte quēwenguimāmo adobai pongatimpa. 22 Edæ mæmæ Adāo wodi tōmengā tōnō tōmāmō godongāmæ nē wænguēnēmō bagaimō inte mōnō tōmāmō adobai Codito tōnō godongāmæ nē ñāni ōmæmonguimō bagamōimpa. 23 Incæte to amīñayedē tānomō ñāni tā pedōmō bai Inongā inte mōnō Codito adobai Tānocā Inongā inte edæ tāno ñāni ōmæmongacāimpa. Codito nempo nē quēwēnōmō guiquēnē mōnō ayæmō inōmō inte edæ tōmengā nānō ponguionæ inque ba ate mōnō māniñedē ate nē ñāni ōmæmonguimō inompa.

24 Māniñedē ate inguipoga awēnē odeyēidi nempo ongoncoo incæ Codito tōmancoo ō ænte ōmæe ewencæcāimpa. Ñænænāni ñāni ānōmāmo adobai tōmāmāmo ōmæe ewencæcāimpa. Tæi piñænāni ñāni nangui cædoncoo incæ Codito adocā incæ tōmancoo wido cæcæcāimpa. Ayæ adocā nē Awēnē Odeye inongā inte tōmengā nempo ongoncoo wæætē edæ Mæmpo Wængonguī nempo edæ pædæ godongā æninque Mæmpo Wængonguinque tōmenganque adocanque Awēnē Odeye inongā incæcāimpa. Māniñedē ate edæ ñōwo mōnō quēwēmāmo iñōmō edæ inque baquinō anguēnē. 25 Incæte Wængonguī Codito ingante, Bitō imite nē piinte cægaināni tōmānāni inānite mō gongæncæbiimpa, ante cædinque tōmengā ōnōwa gāānē nānō wæantodonganca edæ adocā Codito incæ māninō nānō inque cæganca nē Awēnē inongā ingampa.

26 Ayæ tōmengā ingante nē piinte cædāni inānite æmæwo bæ tacā adinque adoque pōni mōnō wænguimāmo incæ ayæ ongō adinque Wængonguī, Mānimāmo dæ bacæimpa, ante māo ōmæe ewencæcāimpa. 27 Tōmengā nempo Wængonguī tōmancoo pædæ godongā æninque tōmengā nē Awēnē bacæcāimpa, ante do yewæmongatimpa. Mānōmālnō ante yewæmonte ongō incæte Wængonguī nē pædæ godōnongā inte ædō cæte, Nāmā pædæ godōmopa, anguingā, ante edonque acæimpa. 28 Ayæ ate Wængonguī Wengā incæ, Mæmpo Wængonguī botō nempo tōmancoo nē pædæ pōnongā inte tōmengā adocanque pōni Tæiyæ Awēnē badinque tōmenganque tōmancoo enempocæcāimpa, ante cæcæcāimpa. Mānōmai cæte ate tōmengā adobai Mæmpo Wængonguī nempo quēwēninque Mæmpo nānō ānonque ante eññente cæcæcāimpa.

29 Pancadāniya edæ, Do wængaināni

beyænque cæmōnīpa, ante cædinque tōmēnāni beyæ æpænē guidānīpa. Ininque, Ñāni ōmæmōnāmai ingæimpa, ante ñāni ānewēnō nāwangā i bai tōmēnāni æbānō cæquēnēnāni Inānīi. Edæ, Ñāni ōmæmōnāmai ingæimpa, ante nāwangā i bai edæ tōmēnāni nē wængaināni beyæ quīnante æpænē guiquēnēnānīi. 30 Ayæ ñāni ānewēnō nāwangā i bai mōnitō iñōmō quīnante mōni wantæ iñō wantæ iñō wodo wænguino ante wæquēnēmōnīi. 31 Botō iimō iñō iimō iñō do wæwocabo inōmo imopa, ante nāwangā āmopa. Botō mōnō Awēnē Itota Codito nempo quēwēninque mīnitō imīnite ante pōnēninque watapæ tobopa, ante nāwangā antawoo. Edæ botō tōniñāmīni iñōmīnite botō māninō ante nāwangā ānimo inte, Wæwocabo imopa, ante adobai, Nāwangā impa, ante āmo eññemāimīnīpa. 32 Waomō mōnō æinēnō æncæte ante botō epetoidi babæidi bai Ināni tōnō guēa wæætēdō wæætē cæbo bai ōnonque cæte incædōnīpa. Edæ, Do wængaināni ñāni ōmæmōnāmai incædānīpa, ante nāwangā i bai botō, “Iimō ate mōnō æmæwo wænguinque ante cænte bete tocæimpa,” ante ñāni ānewēnō bai ante ee quēwencædōmoimpa.

33 Iñæmpa mānōmālnō ante tedewēnāni eññēninque mīnitō wæætē oda cædāmai imæwedāni. Edæ do yewæmōninque, “Wiwa cædāni tōnō guēa cædinque bitō adobai wapiticæ quēwēnguinque godongāmæ cæbīpa.” 34 Ante wææ ānāni eññēdāni. Edæ, mīnitō wēnæ wēnæ cæmīni adinque Wængonguī ingante ante eññēnāmai ināni iñōmō oda cæbainānīpa. Mānōmai beyæ mīnitō guingo imonte wæquēnēmīni inōmīni inte nō cæte quēwēninque edæ wēnæ wēnæ cædāmai iedāni.

Do wængaināni iimāi ñāni ōmæmoncædānīpa, ante

35 Bitō, Do wængaināni æbānō cæte ñāni ōmæmonguīnānīi, ante āmitawo. Ayæ, Ñāni ōmæmōninque mōnō baō quīnō bai eññate ponguimōō, ante eññencæte ante wæbitawo. 36 Iñæmpa ōnonquedō ante wæbi awædō. Edæ waocā tōmēmō quiyacā ate yabæque ñōmāate ate tā bocate pædimō bai mōnō baō adobai inte ñōmængæimpa. 37 Iñæmpa todigo incæ wawæ incæ bitō, Tā bocate pæcæimpa, ante cædinque do pædiwæ tōmēwæ ænāmai inte tōmēmouque ænte godō quiyabi ate tā bocate pæpa. 38 Incæte, Tōmēwæ æbānō iwæ pæquiwæ, ante nāmā nānō angainō bai cædinque Wængonguinque pōnō badongā ate tā bocate pæpa. Wamō tā bocate pædinque æbānō incaquīi, wamō æbānō incaquīi, ante do eññengaingā inte Wængonguī pōnō badongā ate wainca wainca incapa.

³⁹ Tömäñño baõ wii adoyõ bai eñompa. Mõnõ waomõ baõ wayõ eñamompa. Ööingäidi baõ wayõ eñadäniipa. Ayamõidi baõ wayõ eñadäniipa. Gæyæidi baõ wayõ eñadäniipa. ⁴⁰ Ayæ õõnæde quëwënanï wayõ mongæñõnani inguiopaga quëwëmö iñõmö wayõ eñamompa. Ìninqe õõnæde quëwënanï waa nani eñadõ wayõ iñõnte inguiopaga quëwëmö waa põni mõnõ eñayõ guiquenë wii adobaï eñamõ imompa. ⁴¹ Woyowotæ apäicä iñõmö itæde nænque nãno apäi bai wii apäicampa. Põnõmenque põni apäicampa. Nëmõidi guiquenë wadõ bai apäidäniipa. Edæ nëmõidi incæ pancadäniya nãmõinani inte wædænque apäiyõnani pancadäniya waa põni emõnani inte guinæ nanguï apäidäniipa.

⁴² Mänii quiyadimõ yabæque ñõmãate ate tä bocate pædimõ bai mõnõ adopoque wæmõ ate mõnõ baõ adobaï aquifõ inte ñõmæmpa. Wæætë iincayæ ate mõnõ baõ ñõmãadamaï inguinque wæætë ñani õmæmonguimõ imõimpa. ⁴³ Ayæ mõnõ guifñate wægaifõ wido cæte ate mõnõ waa põni eñaquinque ñani õmæmongæimpa. Edæ mõnõ aquifõ wido cædinque mõnõ tæi piñæñõ baaquinque ñani õmæmongæimpa. ⁴⁴ Edæ inguiopagaque quëwëninque mõnõ eñayõ wido cæte ate mõnõ õõnæde põniwoca eñate ewocadinque mõnõ waiñõ põni eñate ñani õmæmongæimpa.

⁴⁵ “Adäõ wodi tänocä Ìnongä inte nê ewocacä badinque quëwengacäimpa,” ante yewæmongatimpa. Ayæ adobaï Adäõ wodi bai Nõwocä mõnõ Codito incæ nê ewocacä inte quëwëninque mõnõ imote põnongä æninque ewocate quëwëmompa. ⁴⁶ Inguiopagaque nê quëwengä guiquenë täno pongacäimpa. Mempoga nê Quëwënongå guiquenë ñõwoque ayæ põningä inte nê Quëwengä ingampa. ⁴⁷ Tãnocä ingante badoncæte ante Wængongui onguipoi guidimõ: æninque badongacäimpa. Nõwocä guiquenë õõnæde quëwengaingä inte pongacäimpa. ⁴⁸ Inguiopagaque ante quëwënanï guiquenë inguiopaga täno quëwengaingä bai adobaï inäniipa. Öõnæde mõnõ goquincabo guiquenë õõnæde quëwente Pongaingä bai adobaï imompa.

⁴⁹ Inguiopagaque quëwengä nãno eñayõ bai mõnõ adobaï ñõwo eñamompa. Ìncayæ ate guiquenë õõnæde quëwente nê Pongaingä nãno eñayõ bai mõnõ adobaï eñaquimõ imompa.

⁵⁰ Botõ tõiñãmïni apænebo eñëedäni. Adopoque eñagaingä inte Wængongui Awënë Odeye nempo ædõ cæte guite quëwengugäã. Nê aquifõ ñõmænguifõ eñadongä incæ tõmengä mempoga eñadamaï inte ædõ cæte baõ ñõmãadamaï iñõ eñaquingäã. ⁵¹ Mõnõ waocabo wëneñedë mõnõ eñënamäi ingainõ ante botõ tæcæ

eñënimõ inte ñõwo edonque apænebo eñëedäni.

Wii tõmãmõ wænguimõ imompa. Incæte tõmãmõ iñontobæ wayonque eñaquimõ imompa. ⁵² Edæ todompeta mõnõ ancadeca æmæwo põni nanguï õõnani ate mõnõ awinca adopoque bomõ cæyõmonte iñontobæ bacæimpa. Edæ todompeta tæcæ we õõñõnani do wængainani incæ ñõmænamäi nani inguinque ñani õmæmoncædäniipa. Mäniñedë edæ wayonque põni mõnõ tõmãmõ eñacæmõimpa. ⁵³ Edæ mõnõ baõ mõnõ aquifõ ñõmænguifõnque wido cæte ate mõnõ ñõmænamäi inguifõnque eñaquinque impa. Ayæ mõnõ aquifõ wænguifõ ewente ate waiñõnque mõnõ wænamäi inguifõ eñacæimpa. ⁵⁴ Mõnõ ñõmænguifõ eñamõ adinque Codito waiñõ põnongä ænte eñadinque mõnõ baõ ñõmænamäi ingæimpa. Ayæ mõnõ wænguifõ eñamõ adinque tõmengä mõnõ wænamäi inguifõ ante waiñõ põni põnongä eñacæimpa. Mãnõmõi cæcä ate dodäni nani yewæmonte angainõ tõmãã Ìnque cæte ingæimpa. Edæ iimäi ante yewæmongadäniipa. “Mõnõ Codito nê tæi piñænongå inte mõnõ wænguimãmõ godõ õmæe ewëninque gänä cæcæcäimpa. ⁵⁵ Ìninqe õonque bagai inte mõnõ wænguimãmõ iñõmö dicæ tæi piñænte cæpa æmæwo wænguimõ. Mõnõ wænguimãmõ incæ dicæ daapa emiñæmpa guif wænguimõ.”

⁵⁶ Mõnõ wënæ wënæ cægainõ beyænque mõnõ daapa guite bai pante wæquinque nê wænguënemõ ingamõimpa. Ayæ eñënamäi cæyõmonte Wængongui wææ angä beyænque mõnõ nê pante wæquinque nê wænguënemõ bagamõimpa. ⁵⁷ Wæætë mõnõ Awënë Itota Codito gänä cædinque mõnõ wænguënemãmõ ante godõ õmæe ewengä beyænque Wængongui mõnõ imonte põno cæcä ate gänä cæmõimpa. Ìninqe, Mãnõmõi waa põni cæcampa, ante põnëninque mõnõ Wængongui ingante waa ate põnëninque apænecæimpa.

⁵⁸ Mãnõmõi beyæ botõ nê waadete tõiñãmïni eñëedäni. Minitõ, Mõnõ imonte bæ tadamaï incädäniipa, ante adiyæ tæi ongonte wææ cædäni. Edæ, Mõnõ Awënë nempo quëwëninque nanguï cæmõ Ìninqe mõnõ cædinõ iñõmö edæ cõwë ewënamäi ingæimpa, ante põnëninque munitõ mõnõ Awënë beyæ ante cõwë godõmenque gomonga cæcæminimpa, ämpa.

16

Wængongui quinani beyæ iimäi cæte godongæimpa, ante

¹ Nõwo iñõmö munitõ godonte æinta ante, Wængongui quinani beyæ impa, ante mini godonguënemõ ante apænebo

ēñeedāni. Gadatiabæ iñōmō Itota ingante godongāmæ nāni pōnencabo iñānite do ānimo inte botō mīnitō iñānite adobaī ante iīmai āmo cæedāni. ² Mīnitō tōmāmīni, Botō ænincōo æpodō ī, ante adinque, Pancaa Wængonguī quīnāni quī baquimpa, ante cædinque Wængonguī itædē iñō pancacooga nānēnē cō cædinque wacā Wængonguī itædē iñō pancacooga nānēnē cō cædinque ee māedāni. Iñinque wæætē wæætē cō cæte eyepæ māmini adinque botō mīnitō weca ponte adinque, Godōmenque cōō cæedāni, ante ānāmaī inguēnēmo iñopa. ³ Edæ botō mīnitō weca ponte āñōmo mīnitō, Iñāni nō cædōnāni inte mōnitō godōnincōo ænte māo godoncædānīmpa, ante odōmōmīni adinque botō wæætē tōmēnāni beyæ cadota ante yewæmoncæboīmpa. Ayæ cadota tōnō mīnitō pōnōnōcōo tōnō botō iñāni iñānite pædæ godōnīnque da godōmo ænte māo Eedotadēē gote nēnempocædānīmpa. ⁴ Ayæ Wængonguī Ao angā ate botō tōmēnāni baī adobaī gobo adinque tōmēnāni botō tōnō godongāmæ edæ gobānānīpa.

Iīmai gocæboīmpa, ante

⁵ Cōwē Māatedōniabæ wodo pænta gocæboīmpa. Iñinque mānīmæ tāno wodo pænta gote ate botō ayæ wæætē mīnitō weca poncæboīmpa. ⁶ Ayæ mīnitō weca pōnīnque wabānō wantæ iñō quēwente goquīmo. Æbāmē cæcæboīmpa. Edæ, Quēwente ate ædōmē gomonga gocæ cæyōmo mīnitō botō tōnō godongāmæ waa cæmīni ate waa gocæboīmpa, ante pōnēnīnque botō wabānō godōmenque quēwēnīnque tōmāā mōnō yoguīntedæ incæ mīnitō weca quēwencæboīmpa. ⁷ Edæ, Botō wodo pænta gocæ cædinque mīnitō weca ñōwo pōmo baī wantæ iñō ēñāquinque incædōnīmpa, ante pōnēnte wædinque botō wī ñōwo pōīmō iñopa. Wæætē, Wængonguī Ao angā ate botō iīncayæ ate mīnitō weca ponte wantæpiyæ quēwēnīnque tocæboīmpa, ante pōnēmpa. ⁸ Wæætē mōni oodeocabo ææmæ Pentecotee mōni ānōmæ iñinque beganca botō Epeto adoyōmō quēwencæboīmpa. ⁹ Edæ Epeto iñōmō quēwēnāni wede pōnēnte bacædānīmpa, ante botō guite apænequinque odemō baī wī ænete baī ongō abopa. Ayæ adobaī, Nē piīnte cædāni nanguī iñāni mæ ongōnānīpa, ante adinque botō adoyōmō quēwēnīnque nanguī wææ apænecæboīmpa.

¹⁰ Timoteo mīnitō weca wabānō ponguīngā. Pongā iñinque mīnitō wæætē, Mōnitō weca guīñēnāmaī inte quēwencæbiīmpa, ānīnque tōmēngā ingante waa cæedāni. Edæ botō nē cæbo īmo baī tōmēngā adobaī Wængonguī beyænque nē cæcā ingampa. ¹¹ Iñinque, Timoteo ñonque cæcampa, ante tedewēnāmaī inte mīnitō tōmēngā ingante

Baa ānāmaī incæmīnīmpa. Wæætē waadete cædinque da pōnōmīni ate tōmēngā piyænē cæte botō weca adodō poncæcāīmpa, āmpa. Edæ, Mōnō tōñīñadāni tōnō Timoteo godongāmæ poncæcāīmpa, ante pōnēnīnque botō wānō cōmpa.

¹² Botō mōnō tōñīñacā Apodo ingante guiquēnē, Mōnō tōñīñadāni tōnō bitō coodintoidi weca ēñate pōe, ante ancaa āmo incæte tōmēngā wæætē, Ñōwo wī goquīmo, ante Baa angantapa. Incæte Wængonguī Ao angā ate tōmēngā iīncayæ ate mīnitō weca cōwē poncæcāīmpa.

Waa quēwencæmīnīmpa, ante

¹³ Mīnitō guiquēnē cōwā ate nāmā wææ aadedāni. Wede pōnēmīni inte tæī gongæte ongōedāni. Æmæwo pægaīmīni inte tæī piñæte entawēnīnque guīñēnāmaī inte ee cæedāni. ¹⁴ Ayæ tōmāā quīēmē cæmīni inte waadete pōnēnīnque cæedāni āmpa.

¹⁵ Botō tōñīñāmīni mīnitō iīmai ante do ēñēmīnīpa. Acayabæ iñōmō tāno pōnēngānāni inte Etepanā nāni quēwencabo iñōmō, Wængonguī quīnāni iñānite nē cæmōni bacæmōnīmpa, ante ñōwo cæedānīpa cæmīnīi. ¹⁶ Iñinque mīnitō Wængonguī quīnāni beyæ nē cædināni iñānite Ao ānīnque piyænē cædinque tōmēnāni nāni ānō baī do ēñēnte cæedāni. Ayæ, Wadāni adobaī, Mōnō tōnō godongāmæ nanguī cædānīpa, ante adinque mīnitō tōmēnāni nāni ānō baī do ēñēnte cæedāni.

¹⁷ Etepanā tōnō Podotōnato ayæ Acaico botō weca pōnīnque mīnitō botō beyæ mīni cæinēnō ante do cædāni ate nanguī totabopa. ¹⁸ Edæ tōmēnāni pōnō apænedāni ēñēnīnque mīnitō wampo pōnēnte tæī piñæte ēwocāmīnitawo. Ayæ adobaī pōnō apænedāni ēñēnīnque mōnitō wampo pōnēnte tæī piñæte ēwocāmōnīpa. Mānōmaī nē pōnō cæedāni iñānite mīnitō wæætē waa ate pōnēnīnque cæquēnēmīni iñīnīpa.

¹⁹ Atiabæ iñōmō Codito ingante godongāmæ nāni pōnencabo nāni cabo nāni cabo tōmānāni mīnitō iñānite ante pōnēnīnque, Waa quēwencæmīnīmpa, ante apænedānīpa. Aquidæ tōnō Pidica nāna gæncaya adobaī ayæ tōmēna oncōnē Codito ingante pōnēnte godongāmæ pōnīnque nāni pōnencabo adobaī mīnitō iñānite waadete pōnēnīnque, Mōnō Awēnē nempo waa quēwencæmīnīmpa, ānānīpa. ²⁰ Mōnō tōñīñadāni tōmānāni, Waa quēwencæmīnīmpa, ante apænedānīpa. Mīnitō guiquēnē mīni cabo godongāmæ pō bee tēnīnque waadete pōnēnte waa apænedāni, āmpa.

²¹ Botō Pabodobo iñōmō tæcæ tōmēmo ñonpoca yewæmōnīnque, Waa quēwencæmīnīmpa, ante tōmēmo yewæmōmpa.

²² Æcānō mōnō Awēnē ingante waadete pōnēnāmaī Ina īñōmō tōmengā nānō wænguinque mǎnōmaī cæcampa tōō. Botō īñōmō wæætē, Mōnitō Awēnē imi pōe, ante wæbopa.

²³ Mōnō Awēnē Itota waadete pōnō cæcā æninqe mīnitō tōmengā nānō waadete pōnō cædō entawēninqe waa quēwencæmīnīmpa. ²⁴ Codito Itota nempo mōnō quēwencabo imōmpa, ante pōnēninqe botō mīnitō imīnite waadete pōnēmopa. Māninqe ante yewæmōmopa.

2 Coodintoidi inānite **Pabodo cadota ante ayenta nānō yewæmongainta**

Waa quēwencæminimpa, ante

¹ Wængongui pōnō angā beyæ Itota Codito botō Pabodobo imote da godongā godongaimo inte botō mōnō tōniñacā Timoteo tōnō guēa apænemōna ate botō iīmai ante yewæmōmopa. Coodinto iñōmō quēwēmini inte mīnitō iñōmō Codito ingante mīni godongāmæ pōnencabo incæ acæminimpa, ante yewæmōmopa. Ayæ Acayabæ tōmāo iñōmō quēwente Wængongui quīnāni inte tōmēnāni adobaī adota acædānimpa, ante yewæmōmopa. ² Mōnō Awēnē Itota Codito tōnō Mæmpo Wængongui tōnō guēa waadete pōnō cæda adinque mīnitō gānē pōnente waa quēwencæminimpa, amōnapa, ante yewæmōmopa.

Codito iīmai waadete pōnō cæcampa, ante

³ Mōnō Awēnē Itota Codito Wæmpocā iñongante Itota iñōmō adocā ingante, Botō Wængongui inongā ingampa. Ayæ Itota Wængongui adocā inongā inte tōmēngā mōnō wæwēnō ante adinque godongāmæ wæte bai pōnō waadete apænecā ēñēninque mōnō wampo pōnēmō imopa. Mānōmai beyæ, Itota Mæmpo Wængongui cōwē waa cæcampa, ante mōnō watapæ apænecæimpa. ⁴ Adocā Wængongui mōnō imonte āninque, Wēnæ wēnæ wæwēmini adinque botō waadete pōnō apænebo ēñēninque mīnitō wampo pōnēmīnitapa. Inique wadāni wēnæ wēnæ wæwēnāni adinque mīnitō botō apænedō ante waadete godō apænemīni ēñēninque tōmēnāni wæætē wampo pōnencædānimpa, ante botō mīnitō imīnite pōnō cætabopa, Wængongui angampa.

⁵ Edæ iīmai beyæ mānōmai angampa. Codito nē nantate wægāngā beyæ nantate wæwēninque mōnō tōmēngā tōnō ānque bai nantate wæwēmōmopa. Ayæ adobaī nantate wæwēmō adinque adocā Codito waadete pōnō apænecā ēñēninque mōnō tōmēngā tōnō ānque bai ēwocadinque wampo pōnēmōmopa. ⁶ Mōnitō nantate wæwēmōni amīnitawo. Edæ mōnitō nantate wæwente apænemōni beyæ Wængongui mīnitō imīnite wæætē pōnō waadete apænecampa. Apænecā ēñēninque mīnitō wæætē wampo pōnēninque wænāmai quēwencæminimpa, ante Wængongui cæcampa. Ayæ mōnitō wæwēñōmōnite tōmēngā pōnō waadete apænecā ēñēnte wampo pōnēmōni amīnitawo. Edæ mīnitō nantate wæwēmini inte wampo pōnencæminimpa, ante Wængongui mānōmai

cæcampa. Ayæ wampo pōnēmīni badinque mīnitō iīncayæ ate mōnitō nantate wæwēnō bai adobaī nantate wæwēmini incæte piyænē cæte ee cæte quēwencæminimpa, ante Wængongui pōnō cæcampa. ⁷ Ayæ mōnitō tōnō ānque bai mīnitō nantate wæwēmīnitawo. Edæ tōmēngā waadete pōnō apænecā ēñēmīni ate mīnitō adobaī mōnitō tōnō ānque bai wampo pōnengui mīni imīnīpa. Ante do ēñēninque mōnitō, Nāwāngā mīnitō watapæ quēwencæminimpa, ante do pōnēmōnīpa.

⁸ Iñānāni, mōnitō Atiabæ quēwēninque æbānō wēnæ wēnæ bate wætāmōnīni, ante ñōwo yewæmōmo aedāni. Tæi piñæmōni ināmai inte mōnitō godōmenque teēmē mongænte bai nanguī wēnæ wēnæ bate wædinque, Nangæ bate wænguī wæ, ante wætāmōnīpa. ⁹ Wængongui do angā wænguēñēmōni imōnīpa, ante nāmāneque pōnente wætāmōnīpa. Incæte mōnitō, Tōmēmōni nāmā tæi piñæñō beyænque quēwencæmōnīpa, ante pōñēnāmai incæmōnīpa, ante odōmoncæte ante Wængongui pōnō cæcā wætāmōnīpa. Wæætē tōmēngā, Do wægānāni quēwencædānimpa, ante botō nē āmo iñōmote mīnitō wæætē botō imote wede pōnente quēwencæminimpa, ante cæcæte ante Wængongui mānōmai pōnō cæcā wætāmōnīpa. ¹⁰ Mōnitō mānīnō mōni oo wænguīnque ante wæyōmōnite tōmēngā do bæi ongonte ængā beyænque quēwentāmōnīpa. Ayæ ate wæyōmōnite tōmēngā ængā beyænque quēwencæmōnīpa. Ayæ, Adocā wæætē wæætē ængā beyænque quēwencæmōnīpa, ante pōñēninque mōnitō tōmēngā ingante wede pōnente tomōnīpa. ¹¹ Inique mīnitō iñacabo gongænte bai mōnitō beyæ Wængongui ingante apænemīni ēñēninque tōmēngā cōwē bæi ongonte ængā beyænque quēwencæmōnīpa. Mānōmai cæcā adinque nanguī ināni wæætē Wængongui ingante waa ate pōnente iīmai ante apænecædānimpa. Wængongui ēñēmi. Nanguī ināni apænedāni ēñēninque bitō Pabodoidi beyæ pōnō waa cæbi amōnīpa, ante apænequīnāni inānīpa.

Coodinto iñōmō quīnante pōñāmāi imōi, Pabodo angampa

¹² Mōnitō iīmai ante nāmā waa ate pōñēninque apænemōnīpa. Wængongui quīmōni inōmōni inte mōnitō tōmēngā, Tæiyæ wæāmō ēwocacæminimpa, ante ænte entawēmōnīpa. Mānōmai beyæ Wængongui nō cæcā bai mōnitō adobaī inguiipoga quēwēninque nō cæte quēwēmōnīpa. Ayæ mīnitō weca pōninque mōnitō godōmenque waa cætāmōnīpa. Mānōmai cædinque mōnitō inguiipoga quēwēnānīque nāni ēñēñō beyænque dicæ cætāmōniyaa. Wæætē mīmō entawēmōni inte nāmā apænte

āninque mōnitō Wængonguī waadete pōnō apæneceā ēñēninque eyepæ cætāmōnipa, ante tomōnipa. ¹³ Mīnitō acæmīnīmpa, ante yewæmōninque mōnitō dicæ idiquibæ ante yewæmōmōniyaa. Wæætē, Edonque adinque do ēñencæmīnīmpa, ante edonque yewæmōmōni abaimīnīpa. Ayæ botō, Mīnitō nāwangā godōmenque ēñencæmīnīmpa, ante īīmaī ante pōnēmopa. ¹⁴ Mōnitō æbānō īmōnīi, ante mīnitō pancaā ante do ēñēmīnīpa. Ayæ, Mōnō Awēnē Itota tōmengā nānō ponguīōnæ īnque bayonte mōnitō mīnitō īmīnite adinque, Mīnitō nē wede pōnengaimīnī īmīnīpa, ante adinque tocæmīnīmpa, ante do ēñēmīnitawo. Ayæ mānīōnæ bayonte mōnitō īmōnite adinque mīnitō adobaī, Waa nē cægaimīnī īmīnīpa, ante tocæmīnīmpa, ante āmo ēñēmāimīnīpa.

¹⁵ Mānōmaī impa, ante pōnēninque botō, īīmaī cæcæboīmpa, ante pōnentabopa. Wayōmō ayæ godāmaī inte botō tāno mīnitō weca ponte waadete apæneceæboīmpa. Apænebo ēñēninque mīnitō wæætē mem-poga tocæmīnīmpa, ante īīmaī cædīmo intabopa. ¹⁶ Mīnitō weca tāno ponte ēñadinque godōmenque godinque botō Māatedōniabæ gote pōninque wæætē mīnitō weca adodō ocæ ēmænte poncæ cædīmo intabopa. Ayæ pōmo ate mīnitō botō īmote godongāmæ cædinque da godōmīni godōmenque Oodeabæ gocæ cædīmo intabopa. ¹⁷ Incæte botō, Mānōmaī cæquīmo īmopa, ante pōnēninque dicæ ōnonque ante pōnentawogaa. Mānōmaī pōinēmo inte botō űimpo cæte pōnāmaī imo adinque mīnitō, Pabodo æmæ pōnente, Wīī pōinente wabānō wīī pongā, ante pōnēmīnitawo. Īñæmpa inguipogaque quēwēnāni mānōmaīnō ante nāni æmæ pōnēnō baī botō īñōmō edæ dicæ adobaī pōnentawogaa.

¹⁸ Wængonguī nāwangā mōnō īmōnte cōwē pōnēninque nē aacā ingampa, ante nō pōnī impa. Mānōmaīnō ante nō pōnī ī baī mīnitō īmīnite mōnitō apænedō īñōmō adobaī nō pōnī impa. Īninque mōnitō ædō cæte wadō ante apænequīmōnīi. ¹⁹ Tidibānō tōnō Tīmoteo botō tōnō mīnitō weca pōninque, Wængonguī Wengā Itota Codito ingampa, ante nō impa, ante apænemōni ēñēmīnitawo. Īninque mōnitō Itota Codito nempo quēwēninque nē Ao āmōni inte ædō cæte æmæ pōnente baī wadō ante apænequīmōnīi. ²⁰ Īīmaī impa. Wængonguī, Cōwē cæcæboīmpa, ante æpogamē wæætē wæætē angacāīmpa. Wæætē wæætē angā incæte Codito īñōmō edæ cōwē Ao āninque, Wængonguī nānō angainō tōmānō īnque cæcæīmpa, ante cæcampa. Īninque mōnitō tōmengā tōnō cædinque, Wængonguī űāō apāite baī ēmōñongante tōmānāni tōmengā ingante waa cæcādānīmpa, ante cædinque, Ao,

mānōmaī impa, ante, Amēē, ante watapæ apænemōnīpa. ²¹ Wængonguī incæ mōnitō īmōnite apænte æninque ayæ mīnitō īmīnite apænte æninque, Mīnitō Codito nempo quēwēninque nē tæī piñæmīni bacæmīnīmpa, ante mōnō tōmāmō īmōnte pōnō ōni pæte baī cædinque īīmaī cæcampa. ²² Tōmengā ēmōwo yewæmōnte baī cædinque, Botō quīmīnī īmīnīpa, ante pōnō cæcampa. Ayæ, Īncayæ ate mīni godōmenque nanguī ænguinque mīnitō űōwo botō Ōnōwoca ingante ænte ēwocædāni, ante tōmengā Ōnōwoca ingante űōwo da pōnongā ænte ēwocāmīnīpa.

²³ Īninque Coodinto īñōmō botō quīnante wæætē pōnāmaī ingaboī. Edæ wēnæ wēnæ cæmīni adinque mīnitō īmīnite nē panguēnēmo incæ botō, Wīī pāinente awædō, ante wīī pontabopa. Wængonguī ayongante botō, Mānōmaī impa, ante nō apænebo ēñēmāimīnīpa. ²⁴ Īīmaī ante wede pōnencæmīnīmpa, ante mōnitō dicæ nē wææ āmōni īmōniyaa. Wæætē edæ, Mīnitō mīni wede pōnēnō beyænque tæī ongōninque edæ nanguī cæmīnīpa, ante adinque mōnitō wæætē, Mīnitō watapæ tocæmīnīmpa, ante cædinque mīnitō tōnō godongāmæ cæmōnīpa.

2

¹ Botō wēēnēnedē mīnitō weca ēñacæ pōninque nanguī āmo wæmīnitapa. Īninque, Wīī wæætē āmo wæcæmīnīmpa, ante űōwo ēñacæ pōnāmaī incæboīmpa, ante nāmāneque pōnēninque intabopa. ² Edæ pīīmo wæwēmīni baī æcānō wæætē, Tocæbiīmpa, ante botō īmote waadete pōnente apænequēnengā. Īñæmpa botō pīīmo beyæ nē wæwēmīnīnīque ongōmīni baī botō īmote nē waadete pōnente apænequēnengā īñōmō edæ dæ ancædongāīmpa. ³ Botō quīēmē beyæ tobo adinque mīnitō godongāmæ watapæ toquēnēmīni īmīnīpa, ante pōnentabopa. Mīnitō botō beyæ āninque, Pabodo mōnō weca pongā adinque mōnō cæmō tocæcāīmpa, ante nē cæquēnēmīni īmīnīpa, ante awædō. Īninque, Mīnitō weca pōninque botō mīnitō wæwēnō ante wædāmaī incæboīmpa, ante cædinque botō, Botō cadota ante yewæmōmo adinque mīnitō ēñente cæcæmīnīmpa, ante wæbopa. ⁴ Botō nanguī caate wædōmo inte mīmōnoque pōnente wæwēninque yabæque adobaī Ca ca nanguī pōnente wædinque mānōmaīnō ante wæbopa. Incæte botō, Mīnitō wæwencæmīnīmpa, ante dicæ āmogaa. Wæætē, Botō æbānō mīnitō īmīnite nanguī waadete pōnēmopa, ante ēñencæmīnīmpa, ante odōmoncæte ante yewæmōmopa.

Nē wīwa cæcā ingante æbānō godō waadete űimpo cæquīī

⁵ Adocanque wiwa cæcā adinque botō tōmengā nānō wiwa cædō beyæ wæwēmo incæte mīnitō tōmāmīni wædænque incæ nanguī incæ wæwēmīni adobaī īmīnīpa. Botō, Tōmengā ingante pīināmai incæboīmpa, ante pōnēninque, Wædænque wæwēmīnīpa, ante apænebopa. ⁶ Nē ēñēnāmai cædingā ingante mīnitō pancamīniya wodo tōmāmīni do pāmīnitapa. Īnīnque botō, Idæwaa pāmīnīpa, āmopa. ⁷ Tōmengā, Ancaa pāmīni awædō, ante godōmenque wæwente bacantawo. Īnīnque mīnitō pōnō nīmpo cædinque tōmengā ingante, Idæwaa pāmōni wæbīpa, ante ædæmō waadete apænemīni ēñēninque tōmengā īnīnque wædinque wampo pōnencæcāmpa. ⁸ Mīnitō wæætē, Bitō īmite nāwangā waadete pōnēmōnīpa, ante adodō apænemīni ēñencæcāmpa, ante botō mīnitō īmīnite nanguī āmopa. ⁹ Botō ānō ante æbānō tōmānō ante ēñente cæmīnī, ante ēñencæte ante botō wēñēñedē yewæmontabopa. Eyepæ cæmīni ate wædinque botō, Eyepæ cæmīnīpa, āmopa. ¹⁰ Nē ēñēnāmai cæcā ingante mīnitō nīmpo cæmīni ee gocantawo. Mānōmai cæmīni īnīnque botō nīwo adobaī nīmpo cæbopa. Waocā æcāmenque ēñēnāmai cæcā adinque godō pōnō nīmpo cæbo īnīnque botō Codito ayongante mīnitō beyænque ante mānōmai godō nīmpo cæbo intabopa. ¹¹ Īñæmpa Tatāna incæ angā ēñente beyænque mōnō oda cæte wæquinque edæ godōmenque pīīmāimompa, ante aquēnē quēwēdāni. Tatāna æbānō, Oda cæte wæcædānīmpa, ante cæcampa, ante edæ do ēñēmompa.

Tito beyæ ante Pabodo wæcampa

¹² Botō Todoa nāni quēwēñōmō tāno pōninque, Mōnō Codito ingantedō ante watapæ apæneceate ante cæyōmo mōnō Awēñē, Botō beyæ guīite apænee, ante odemō wi ænete baī do cæcā atabopa. ¹³ Incæte botō tōniñacā Tito dæ angā wædinque botō, Ædō cæte īñōmō a ongonte apænequīmoo, ante tōmēnāni īnānite, Gobopa, ante Māatedōniabæ gocæte ante wadæ gotabopa.

Codito nempo quēwēninque tæī ēmōmōnīpa, ante

¹⁴ Nē tæī ēmongā inte mōnō Codito īñōmō nē pīinte cædāni īnānite gānā cæcampa. Īnīnque mōnitō Codito nempo quēwēñōmōnīte Wængonguī, Nē tæī ēmongā ingante waa acædānīmpa, ante cædinque mōnitō īmōnite nē tæī ēmongā mīñæ ænte māocā dao dao godinque mōnitō tōmengā nānō ēmōnō baī adobaī tæī ēmōmōnīpa. Ayæ oguī wa woboyæ wodo wodo cædinque tōmāo māo oguī wa baī Wængonguī adobaī cædinque mōnitō īmōnite angā ēñēninque mōnitō wæætē, Mōnō Codito æbānō ingāā,

ante wayōmō wayōmō māo apænemōni ēñēnānīpa. Wængonguī mānōmai cæcā beyæ mōnō Wængonguī ingante waa ate pōnēninque apæneceāmpa.

¹⁵ Īmāi edæ impa. Codito ængā beyænque nē quēwēnguīnāni weca quēwēmōni incæ nē wænguīnāni weca quēwēmōni incæ mōnitō Codito nempo quēwēninque tōmengā nānō oguī wamōnedō baī mōnitō adobaī, Wængonguī wē ongonte baī tocæcāmpa, ante oguī wamōnete baī apænemōnīpa. ¹⁶ Mōnitō oō wa wamōnete baī cædinque nē wænguīnāni īnānite tōmēnāni nāni wænguīmāmo ante apænemōni ēñēninque tōmēnāni nāni wænguinque wē ongonte ocado cæte baī ēñēnānīpa. Wæætē oguī wamōnete baī mōnitō nē quēwēnguīnāni īnānite guīquēñē tōmēnāni nāni quēwēnguīmāmo ante apænemōni ēñēninque tōmēnāni wæætē nāni quēwēnguinque wē ongonte ocado cæte baī ēñēnānīpa.

Īnīnque mānīnō mōnitō cæquēñēnō ante æcānō eyepæ cæquingāā. ¹⁷ Edæ nanguī īnāni nāmā beyænque ante æncæte ante cædinque Wængonguī nānō apænedō ante apænewēnāni baī mōnitō wī adobaī wēnæ wēnæ cæcæte ante apænemōni īmōnīpa. Wæætē Wængonguī mōnitō īmōnite da godongā godinque māo nē apænemōni inte mōnitō Wængonguī ayongā mōnō Codito nempo quēwēninque nō pōnente apænemōnīpa.

3

Wængonguī mīne pōnō angā beyænque quēwēmompa

¹ Mōnitō īmōnitedō ante pōnēninque mīnitō, Pabodoidī, Waa cæmōni aedāni, ante tedewēnānīpa, ante wēñēñedē āmīnitawo. Ayæ, Nōwo wæætē adodō ante tedewēnānīpa, ante pīīmīnitawo. Mōnitō īñæmpa nāmanque ante, Waa cæmōni aedāni, ante dicæ āmōniyaa. Wadāni mōnitō īmōnite waa acædānīmpa, ante cædinque pancadāniya guīquēñē mīnitō īmīnite ānīnque, Cadota ante pōnō yewæmōedāni, ānāni ēñēninque yewæmōmīni ate tōmēnāni ænte māo odōmōnāni adānīpa. Ayæ wadāni īnānite adobaī, Cadota, ānāni ēñente yewæmōnāni ænīnque mīnitō īmīnite odōmōnānīpa. Mōnitō guīquēñē, Cadota ante pōnō yewæmōedāni, ante dicæ āmōniyaa. ² Wæætē mīnitō guīquēñē waa quēwēmīni adinque wadāni, Pabodoidī tōmēnāni īnānite apænedāni beyænque coodintoidi wede pōnēnāni inte waa quēwēnāni amōnīpa, ante pōnēninque cadota ate baī do ēñēnānīpa. Mānōmai pōnō cæmīni ænīnque mōnitō cadota nææante odōmonte baī cædinque, Coodintoidi

æbānō waa cædānii, ante tōmānāni īnānite
 oðōmōmōni adinque ēñēnānīpa. ³ Īnīnque,
 Pabodoidi apænedāni beyænque waa
 cædānīpa, ante edonque acædānīmpa, ante
 cædinque Codito īñōmō Wængonguī nē
 Quēwengā Ōnōwoca ingante da pōnongā
 ænte ēwocamīnīpa. Mānōmāi cædinque Codito
 cadota ante yewæmōnte bai pōnō cædinque
 wīi tōmengonca yewæmōngampa. Wīi
 dicaboga yewæmōnīnque tōmengā Ōnōwoca
 ingante mīnitō baonga da pōnongā ænte
 ēwocamīnīpa.

⁴ Codito godongāmæ cæcā beyænque
 mōnitō Wængonguī ayongā nōingā ante
 apænemōnīpa, ante pōnēnīnque mōnitō
 guīñēnēdāmāi inte do eðæ apænemōnīpa.
⁵ Mōnitō nāmanque ante, Æbānō waa
 cæmōnīi, ante eyepæ īmōnīpa diyæ apænte
 anguīmōnīi. Wæætē Wængonguinque pōnō
 godongāmæ cæcā ate mōnitō eyepæ
 badīnque cæmōnīpa. ⁶ Wængonguī, Botō
 pōnō cæbo ate mīnitō Ao āmīni īnīnque mōnō
 godongāmæ waa cæte quēwengæīmpa, ante
 cōwē angampa. Tōmengā doyedē īñōmō,
 Botō wææ angainō ante ēñēnte cædinque
 quēwēncæmīnīmpa, ante nānō wææ angāine
 ante ñōwo wæætē ānāmāi ingampa. Māñīne
 ante ñōwo ganca wææ angā bai mōnō
 wænguinque incædōnīmpa. Ñōwo guīquēnē
 Wængonguī wæætē, Botō Ōnōwoca ingante
 ænte ēwocadinque quēwēncæmīnīmpa, ante
 mīne ante apæneçā ēñēnīnque mōnō
 quēwēnguinque Wængonguī Ōnōwoca ingante
 ænte ēwocamōmpa eðæ. Mōnitō īñōmō
 tōmengā Ōnōwoca ingante nē ēwocamōni inte
 eyepæ badīnque mīne Wængonguī ñōwo
 nānō pōnō apæneçā ante nē apænemōni
 īmōnīpa.

⁷ Wængonguī, Īīmāi cæedāni, ante di-
 caboga wææ yewæmōngā ate mōnō
 ēñēnāmāi imō beyænque māñīne tōmengā
 nānō wææ yewæmōngāine beyænque
 mōnō wænguīmāmo bagatīmpa. Incæte
 māñīne beyæ eðæ ñāo nanguī apāigatīmpa.
 Īnīnque māñīne ænte godōmenque wææ
 ānīnque Mōitee wodi awīnca ñāo apāite
 bai ēmongacāīmpa. Māñīi ñāo wodēmæmō
 ēmongā incæte idægoidi tōmengā awīnca
 adīnque, Ædō cæte Mōitee awīnca cōwā
 anguīmōnīi, ante wægadānīmpa.

⁸ Mōnitō guīquēnē, Wængonguī Ōnōwoca
 ingante ænte mōnō quēwengæīmpa, ante
 mōni apænedō beyænque quīēmē bai
 godōmenque nanguī apāite bai apāicæīmpa.
⁹ Mōnō apænte tente wænguinque eðæ
 māñīne pedæne ante ēñēnāmāi cægāmōīmpa.
 Incæte māñīne ante nānō wææ angainō
 beyænque Mōitee wodi awīnca ñāo
 apāite bai ēmongacāīmpa. Īnīnque ñōwo
 īñōmō, Mōnō nō cæte quēwēnguinque ante

Wængonguī Ōnōwoca ingante ængæīmpa,
 ante mōni apænedō guīquēnē ñāo quīēmē
 bai godōmenque nanguī nāwante bai
 ēnēpa. ¹⁰ Wængonguī Tæiyæ Waēmō
 Ōnōwoca ingante ante mōni apænedō
 īñōmō godōmenque ñāo nānō apāidō
 beyænque Mōitee wodi nānō wææ angainō
 guīquēnē pōnōmenque apāidinque eðæ
 wodēmāa badīnque eðæ dæ bapa. ¹¹ Eðæ
 māñīne mōnō wodēmāa baquēnēmāmo incæ
 ñāo apāite bai īñōte Mōitee wodi ænte
 apænegacāīmpa. Wængonguī ñōwo nānō
 pōnō āne guīquēnē cōwē wodēmāa badāmāi
 ēne inte godōmenque nanguī guīnæ nāwante
 bai ēnēpa.

¹² Īnīnque, Wængonguī Tæiyæ Waēmō
 Ōnōwoca pōnō cæcā beyænque mōnō nō
 cæte watapæ quēwengæīmpa, ante pōnente
 quēwēmōni inte mōnitō guīñēnēdāmāi
 inte do apænemōnīpa. ¹³ Mōitee wodi
 guīquēnē, Ñāo apāi bai botō ēmōnō incæ
 wodēmāa bamōñōmote idægoidi adāmāi
 incædānīmpa, ante cædinque weocoo ñāne
 cæmongacāīmpa. Mōnitō guīquēnē Mōitee
 wodi nānō ñāne cæmongāi bai cædāmāi imōni
 inte edonque apænemōnīpa. ¹⁴ Māñīnta,
 Botō wææ angainō ante ēñēnte cædinque
 quēwēncæmīnīmpa, ante Wængonguī nānō
 pedænta ante adīnque idægoidi do nāni
 ñāne cæmongaincoo ñōwo ganca eðæ ñāne
 cæmōnte bai ēmōnānīpa. Īnīnque tōmēnāni
 ocāi omæcadāni bai bagadānīmpa. Eðæ
 Codito nempo quēwēnānīque māñīncoo wi
 cæmōnte bai ēmōnāni inte tōmēnānīque
 edonque adāni īnānīpa. Īnīnque idægoidi
 wæætē Codito nempo quēwēnāmāi īnāni
 inte ayæ eðæ wi cæmōnāmāi inte wædānīpa.
¹⁵ Īnīnque idægoidi ñōwo ganca mīmō bee
 otawente bai īñōnāni inte Mōitee wodi nānō
 yewæmōngāinta adīnque ēñēnāmāi īnānīpa.

¹⁶ Incæte Awēnē gāmæñō æcānō pōna
 tōmengā Mōitee wodi nānō wi cæmōnō bai
 badīnque do wi cætawente bai bacampa.
¹⁷ Mōnō Awēnē incæ Wængonguī Ōnōwoca
 ingampa. Ayæ waocā mōnō Awēnē
 Ōnōwoca ingante ēwocacā Īnīnque tōmengā
 wi cætawente bai entawente quēwēnongā
 inte wīi tee mōnete wæcā bai ingampa.
¹⁸ Mōnō tōmāmō īñōmō awīnca wi cæmōnte
 bai ēmōnōmō inte mōnō awocawænta bai
 bamōmpa. Īnīnque wadāni mōnō imōnte
 adīnque, Mōnō Awēnē æbānō ñāo apāite
 bai ēmongāā, ante awocawænta ate bai
 edonque acædānīmpa. Ayæ godōmenque
 ayæ godōmenque mōnō ñāo apāidō mōnō
 ēwocāquinque mōnō Awēnē nānō ēwocadō bai
 mōnō ayæ godōmenque ayæ godōmenque
 ēwocāmō imōmpa. Mōnō Awēnē incæ
 Wængonguī Ōnōwoca īnongā inte māñōmāi
 pōnō cæcā entawēmōmpa.

4

1 Wængonguī, Botō pōnō cægainō ante mīnitō nē apænemīni incæmīnīmpa, ante waadete pōnō angā beyænque mōnitō mānīnō ante nē apænemōni bagaimōni inte fīowo wæ guemōnāmai inte cōwē apænemōnīpa. 2 Wadāni guiquēnē tōmēnāni nāni guingo imonte wæquinque awēmō cædānīpa. Mōnitō iñōmō tōmēnāni nāni cæwēnō bai cædāmai incæmōnīmpa, ante do ānimōni inte babæ cædāmai imōnīpa. Wængonguī nānō apænedō ante idiquibæ apænedāmai imōnīpa. Wæætē Wængonguī ayongā mōnitō tōmēngā nō nānō apænēgainō ante edonque pōni odōmonte apænemōni ēñēnīque tōmānāni mīmō entawēnāni īnīnque edæ, Pabodoidi nō ante cædānīpa, ante apænebainānīpa. 3 Incæte mōnō Codito ingantedō ante watapæ mōni apænedō iñōmō fīāne cædete bai intawo. Iñæmpa fīāne cædete bai ī īnīnque nē wē womonte wænguīnāni beyænque fīāne cædete bai impa. 4 Wængonguī nānō ēmōnō nē ēmōnongā inte mōnō Codito iñōmō mōnō beyæ fīāō apāite bai cæcampa, ante watapæ mōnō ēñēnte pōnēnō ante apænemōnīpa. Nōwoguipogaque quēwēnāni beyæ guiquēnē tōmēnāni awēnē wængonguī bai Tatāna nē cæcā ingampa. Tōmēngā iñōmō mānīne watapæ mōni apænedō ante pīīnīnque, Nē pōnēnāmai īnāni adāmai incædānīmpa, ante tōmēnāni awīnca fīāne cæmonte bai wææ cæcampa.

5 Mōnitō iñōmō, Nāmā incæ waa cæmōnīpa, ante tēdēdāmai imōnīpa. Wæætē, Itota Codito incæ mōnō Awēnē ingampa, ante mōnitō, Tōmēngā beyænque mōnitō mīnitō imīnite nē cæmōni imōnīpa, ante mānīnque ante apænemōnīpa. 6 Wēmō iñōmō fīāō apāicæīmpa, ante Wængonguī incæ badongacāīmpa. Adocā fīāō ante nē angaingā inte fīowo wæætē mōnitō mīmōno tīca ēnēnte bai cædīnque īīmai ante odōmongā amōnīpa. Tōmēngā iñōmō, Botō æbānō guīnæ nāwante bai ēmōmoo, ante mīnitō Codito awīnca adīnque edonque pōni acæmīnīmpa, ante pōnō tīca ēnēnte bai odōmongā amōnīpa.

Itota ingante mōnō wede pōnēnō beyænque quēwēmō

7 Nanguī fīāō apāite bai ēwocamōni incæ ōnoncadedē mante bai edæ ēwocamōnīpa. Edæ daigæñē cængæmoncadenque bai mōnitō baō mongæñōmōnīte Wængonguī, Wīi mīnitō nāmā tæī pīñænō beyænque ēwocamīnīpa, wæætē botō tæī pīñænō beyænque ēwocamīnīpa, ante acædānīmpa, ante badongampa. Iñīnque tōmēngā tæī pīñænte pōnō badongā ænīnque mōnitō fīāō apāidō mōni mānō iñōmō ōnoncadedē mante bai ēwocamōnīpa. 8 Mōnitō imōnīte tōmānō māmō mō ongonte bai cædāni wæmōni

incæ gueogæ godāmai imōnīpa. Æbānō cæte quēwēmō imōō, ante wæmōni incæ mōnitō guīñēnte wædāmai imōnīpa. 9 Ancaā togænte pānāni wæyōmōni Wængonguī mōnitō imōnīte cōwē ēmō cæte godāmai ingampa. Ayæ wænoncæte ante bæ tadāni incæte æmæwo wænāmai imōnīpa.

10 Itota tōmēngā nānō quēwēnō pōnongā æmōni beyænque mōnitō, Baō ayæ mongænte quēwēmōni acædānīmpa, ante cæmōnīpa. Tōmēngā nānō wængainō bai mōnitō adobai wæætē wæætē wænte bai baō mongæmōnīpa. 11 Mōnitō nē quēwēmōni iñōmōnīte wadāni wæætē mōnitō imōnīte bæi ongonte ænīnque, Itota beyænque wæncæmīnīmpa, ante nangūi cædānīpa. Iñīnque mōnitō baō fīōmænguīfīō ēñayōmōnīte wadāni, Itota tōmēngā nānō quēwēnō ēñate beyænque ayæ quēwēnānīpa, ante edonque acædānīmpa, ante mōnitō wæncæ cæte bai ēñate wæmōnīpa. 12 Iñīnque mōnitō mōni wænguīmāmo beyæ ante wæyōmōni mōnitō wæætē mīni quēwēnguīmāmo ēñate quēwēmīnīpa.

13 Docā do apænedīnque, Botō nē wede pōnēmo inte apænetabopa, ante yewæmongacāīmpa. Tōmēngā wede nānō pōnēngainō bai adobai ēwocadīnque mōnitō nē wede pōnēmōni inte adobai apænemōnīpa. 14 Iīmānō ante ēñēnīnque wede pōnēmōni inte mōnitō apænemōnīpa. Itota ingante, Nāni ōmæmōe, ante nē cægāingā adocā mōnitō imōnīte angā ate mōnitō Itota tōnō godongāmæ fīāni ōmæmoncæmōnīmpa, ante do ēñēmōnīpa. Ayæ mīnitō tōnō mōnitō tōmāmō iñōmonte Wængonguī ænte māmō gōnongā ate mōnō tōmēngā weca godongāmæ gongænguīmō īmōmpa. Mānōmānō ante do ēñēmōni inte mōnitō nē wede pōnēmōni inte apænemōni imōnīpa. 15 Wængonguī godōmenque nangūi īnāni īnānīte waadete pōnō cæcā ate tōmēnāni wæætē Wængonguī ingante waa ate pōnēnīnque apænecædānīmpa. Ayæ mānōmai pōnō cæcā adīnque, Wængonguī fīāō apāite bai ēmōnongā inte mānōmai cæcampa, ante mōnō tōmāmō watapæ apænecæīmpa. Iñīnque, Mānōmai bacæīmpa, ante mīnitō beyæ ante mōnitō tōmāā edæ cæmōnīpa.

16 Mānōmai beyæ mōnitō, Æbānō cæquīmōnīi, ante wædāmai imōnīpa. Edæ īīmō iñō īīmō iñō mōnō baō godōmenque wænguīfīō bai mongæñōmō mōnō ōnōwoca wæætē īīmō iñō godōmenque īīmō iñō godōmenque mīīwoca badonte bai ēwocamōmpa. 17 Iñæmpa wēnæ wēnæ mōnō wæwēnō incæ wantæ iñō wodēmāa pōnī badīnque wodæī bai bapa. Incæte mānīi mōnō wæwēnō beyæ mōnō godōmenque fīāō apāite bai ēwocacæīmpa. Iñīnque mōnō

wæwēnō wodæi pōni inte dæ bayō mōnō ñāō apāidō mōnō ēwocadō wæætē cōwē wodēmāa badāmai ingæimpa. Wæætē mōnō watapæ quēwenguinque godōmenque nangui apāite bai bacæimpa. ¹⁸ Inguipogaque mōnō quēwēnō guiquēnē wantæ iñō dæ gocopa. Öönædē ñōwo mōnō adāmai incoo guiquēnē cōwē dæ badāmai inte ongongæimpa. Ìnque inguipogaque mōnō quēwēnō ante mōnō adāmai inte bai pōngæimpa. Wæætē öönædē mōnō adāmai incoo ante mōnō cōwē ate bai pōngæimpa.

5

¹ Oncontai wido cæquintai bai mōnō æmontai mongænte quēwēmompā. Ìnque mānintai wido cæmō incæte Wængongui wæætē, Öönædē mīintai mīni cōwē owoquintai, ante do mænongacæimpa. Mānintai iñōmō waocā öonopoca mænōnāmai intai iñonte mōnō öönædē æite owoquimō imompā, ante do ēñēmompā. ² Ñōwo iñōmō mōnō wido cæquintai mongæninque ö ö ante nantate wæwēmompā. Mānōmai beyæ mōnō öönædē æidinqe mōnō owoquintai ēñacæte ante wæmompā. ³ Edæ, Baō ömaamō inte wæcæ wæ, ante guñēwocate wædinque mōnō, Mīintai ēñacæimpa, ante wæmompā. ⁴ Mōnō iintaique ēñadinque, Baō ömaamō inte wædāmai incæmōnimpā, ante guñēwocate wæmompā. Mōnō wænguintai mongænte nantate wæmō inte ö ö ante wæmompā. Wængongui, Mīnitō ēñate quēwenguintaique, ante yabæque wīni caate bai pōngā ēñayōmō mōnō wænguēñēñō edæ dæ bacæimpa, ante æncæte ante wæmompā.

⁵ Ñōwo ämo ēñēedāni. Wængongui incæ edæ, Mīni mīintai wēñate mongænguinque, ante mōnō imonte badongacæimpa. Ayæ, Mīnitō mīintai cōwē pōnōmo æncæmīnimpā, ante, Nāwangā impā, ante odōmconcæte ante Wængongui tōmengā Önōwoca ingante ñōwo da pōngā æmompā. Ìnque tōmengā Önōwoca ingante ænte ēwocadinque mōnō, Mīintai ēñate mongænguinque ēwocamompā, ante do ēñēmompā.

⁶ Mānōmai beyæ mōnitō cōwē, Wængongui cæcæcæimpa, ante wede pōnente tomōnipā. Oncōnē owote bai iñtaidē mōnō quēwenganca mōnō Awēnē oncōnē owodāmai imompā, ante do ēñente wædinque, ⁷ mōnitō māñinō ante ayæ adāmai ēmōmōni inte wīi mōni adinō beyæ quēwēmōnipā. Wæætē mōni wede pōnēñō beyænque quēwēmōnipā. ⁸ Ìnque edæ, Wængongui cōwē cæcæcæimpa, ante wede pōnēmōni inte mōnitō, Ìntaidē owodāmai inte wæætē mōnō Awēnē oncōnē gote owote waa tobaimpā, ante pōnēmōnipā. ⁹ Ìnque oncōnē owote

bai tomōni incæ oncōnē owodāmai inte bai wæmōni incæ mōnitō, Mōnō Awēnē waa tocæcæimpa, ante cædinque cōwē nō cæte quēwēmōnipā. ¹⁰ Codito tōmengā ñāñō apænte anguimpāa gāñē mōnō tōmāmō ponte edæ a ongonguēñēmō imompā. Mōnō edæ inguipoga iñtai ēñate quēwēninque mōnō cædō ante do againgā inte tōmengā iñōmō apænte ancæcæimpa. Edæ waa cægaimō imō adinque tōmengā mōnō imonte edæ eyepæ pōni pædæ pōngā ænguimō imaimompā. Wæætē edæ wēnæ wēnæ cægaimō imō adinque tōmengā wæætē eyepæ pōni pangā wæbaimompā.

Wængongui piyæñē cædinque, Pōedāni, angampā

¹¹ Ìnque mōnō Awēnē ingante guñente wæmōni inte mōnitō waodāni inānite godō waadete apænemōnipā. Codito gāmæñō pōninque watapæ quēwængæimpa, ante pōnencædānimpā, ante mōnitō godō waadete apænemōnipā. Edæ, Mōnitō æbāñō ēwocamōnii, ante Wængongui do edonque acampā. Ayæ adobai mīnitō mīmō entawēmīni inte mōnitō ēwocadō ante edonque amīni Ìnque botō waa tobaimpā. ¹² Māñōmāñō ante apænedinque mōnitō, Wæmō pōni imōnipā, ante nāmā ante dicæ ämōñiyāa. Wæætē iñmai ante apænemōnipā. Pancadāñiyā iñōmō mōnitō awincaque adinque, Pabodoidi æbāñō ēwocadāñii, ante adāmai ināni inte tōmēñāni nāni adōnonque ante pōnēninque nāmā ængō cæte bai todāñiyā. Mīnitō guiquēñē, Mōnitō æbāñō ēwocamōnii, ante do amūnitapā. Ìnque tōmēñāni mōnitō imōñite ante pīinte äñāni ēñēninque mīnitō wæætē edæ, Pabodoidi nō ēwocadāni inte waa cædāni amōnipā, ante wææ apænecæmīnimpā, ante cæbopā. ¹³ Edæ ömæcamōni bai cæmōni incæte Wængongui beyænque ante māñōmai cæmōnipā. Wæætē nō pōnente cæmōni incæ mīnitō beyæ ante cæmōnipā.

¹⁴ Ìmāñinō ante pōnente wædinque edæ māñōmai cæmōnipā. Tōmāmō beyæ adocanque wængacæimpa, ante adinque mōnitō, Mōnō tōmāmō do wængamōimpā, ante edonque ēñēmōnipā. Ìnque, Mōnō Codito nangui waadete pōngā inte pōñō cæcampā, ante pōnēninque mōnitō ædō cæte wapiticæ cæquimōñii. ¹⁵ Mōnō Codito iñōmō tōmāmō beyæ wæñinque, Mīnitō idæwaa nāmā beyænque quēwēmōnipā, ante wængacæimpa. Ayæ, Botō nē wænte ñāni ömæmongaimō iñōmote mīnitō botō beyæ ante quēwencæmīnimpā, ante cædinque tōmengā tōmāmō beyæ wængacæimpa. ¹⁶ Māñōmai impā, ante pōnēninque mōnitō ñōwo iñcayæ ate waodāni inānite adinque, Inguipogaque ēñate quēwēñāñiyā, ante pōñēñāñiyā imōnipā. Edæ mōnō Codito

incæ inguipoga eñate quëwëñongante mōnitō mānōmaīnō ante pōnengaimōni incæte mōnitō ñōwo wæætē mānōmaīnō ante wīi pōnēmōnīpa. ¹⁷ Inique Codito nempo acānō quëwënaa tōmengā ingante Wængonguī mīngā badongā ate mīngā bate quëwëngampa. Tōmengā nānō inguipogaque nānō quëwënimāmo edæ dæ gotimpa. Ñōwo wæætē edæ mīimāmoque ewocacampa.

¹⁸ Mānīnō botō ānō ante tōmānō nē pōnō badongā iñōmō edæ Wængonguī adocanque ingampa. Tōmengā iñōmō, Mīnitō eñēnāmaī cæmīni incæte Codito pōnō cæcā beyænque botō piyænē cæcæboimpa, angampa. Inique botō piyænē cæbo adinque mīnitō botō gāmænō pōedāni, angampa. Ayæ mōnitō imōnite pōnō angā eñēninque mōnitō wæætē edæ wadāni inānite, Wængonguī piyænē cædinque, Pōedāni, angampa, ante nē cæmōni batamōnīpa. ¹⁹ Inique iīmaī ante apænemōnīpa. Codito tōnō godongāmæ cædinque Wængonguī iñōmō piyænē cædinque, Inguipoga quëwëmīni tōmānīni botō gāmænō pōedāni, angampa. Pōmīni adinque botō, Æpogadō wënæ wënæ cæmīnitawo, ante tee mante adāmaī inte piīnāmaī incæboimpa, angampa.

Tōmengā mānōmaī angā eñēninque mōnitō wæætē mānīne ante nē waadete apænemōni badinque edæ, Wængonguī piyænē cæcā adinque pōedāni, ante apænemōnīpa. ²⁰ Inique Wængonguī mōnitō imōnite ānīnque, Mīnitō wæætē botō beyæ wadāni inānite waadete apænemīni eñēninque poncædānīmpa, angā eñēninque mōnitō wæætē Codito beyænque nē waadete apænemōni bamōnīpa. Inique mīnitō imīnite waadete pōnō apænedinque mōnitō, Wængonguī gāmænō pōedāni, ante Codito beyænque ante apænemōnīpa. ²¹ Wængonguī, Mīnitō Codito nō nānō ewocadō ænte ewocacæmīnīmpa, ante pōnō cædinque Codito ingante angā eñēninque tōmengā iñōmō edæ wënæ wënæ ewocadāmaī inte wæætē edæ mōnō beyæ ante nē wënæ wënæ cæcā bai badinque mōnō wentamō ewocadō incæ mongængacāimpa. Inique mōnitō tōmengā nempo quëwëninque nō pōnī tōmengā nānō ewocadō wæætē ænte ewocamompa.

6

¹ Tōmengā tōnō godongāmæ nē cæmōni inte mōnitō mīnitō imīnite iīmaī ante waadete apænemōnīpa. Wængonguī waadete pōnō cæcā æmīni inte mīnitō wīi ōnonque oda cæcæte ante æncæmīnīmpa, ante nanguī āmōni eñēmaīmīnīpa. ² Edæ Wængonguī do angacāimpa,

“Mīnitō imīnite botō waadete pōnō cæyedē mānīfēdē mīnitō apænemīni eñentabopa.

Ayæ, Mīni quëwënguīōnæ impa, ante Codito nānō bæi ongonte æñēdē botō mānīfēdē mīnitō beyæ pōnō cægaboimpa.”

Ante yewæmongatimpa. Inique botō iīmaī āmo eñēedāni. Wængonguī tōmengā nānō waadete pōnō cæyedē do ba apa quëwëmīni. Codito edæ ængā beyænque mīni quëwënguīōnæ iñōmō edæ do batimpa cæmīnī.

³ Mōnō quëwënguīnō ante adocanque incæ Wængonguī beyæ mōni apænēdō ante piīnāmaī incæcāimpa, ante wææ cædinque mōnitō iñōmō idiquibæ cædāmaī imōnīpa. ⁴ Wæætē mīnitō, Pabodoidi Wængonguī beyæ nē cædāni inānīpa, ante acæmīnīmpa, ante odōmoncæte ante mōnitō cōwē iīmaī cæmōnīpa. Cōwē nantate wæmōni incæ wënæ wënæ cædāni wæmōni incæ mō ongonte wææ cædāni wæmōni incæ æbāmenque wæmōni incæte mōnitō cōwē wæntæye badāmaī inte ee cæmōnīpa. Ædō cæte quëwënguī, ante wæmōni incæ Wængonguī beyæ nē cæmōni inte mōnitō godōmenque cæmōni aedāni. ⁵ Ayæ tæi tæi pānāni wæmōni incæ tee mōnedāni wæmōni incæ Yæ yæ ante mōnitō imōnite wido cædāni incæte mōnitō wæætē Wængonguī ingante nē cæmōni inte edæ nanguī cæmōnīpa. Ayæ woyowotæ nanguī cædinque mōnitō mōwo mōnāmaī inte cæmōni incæ cænguī cænāmaī inte gæwænte wædinque cæmōni incæ mōnitō godōmenque cæmōni aedāni.

⁶ Mānōmaī cædinque mōnitō wentamō mongæñāmaī inte cæmōnīpa. Ayæ wadāni æbāmenque cædāni incæ mōnitō nō eñēmōni inte edæ piyænē cæte piīnte ānāmaī imōnīpa. Wæætē waadete cæmōnīpa. Edæ Wængonguī Tæiyæ Wæmō Ōnōwoca nempo quëwëninque nāwangā waadete pōnēmōnīpa. ⁷ Wængonguī nānō tæi piīñænō ewocadinque mōnitō Wængonguī nō nānō angainō ante apænemōnīpa. Ayæ tontadoidi guëadō guëa wænoncæte ante tipæmāa nææñāni bai cædinque mōnitō nō pōnī cæcæte ante Wængonguī nānō tæi piīñænō ante eyepæ næænte bai cæmōnīpa.

⁸ Mōnitō imōnite waa adāni incæ wīwa adāni incæte mōnitō Wængonguī beyænque ante cæmōnīpa. Pabodoidi waa pōnī cædānīpa, ante nō apænedāni incæ wæætē, Pabodoidi wënæ wënæ cædānīpa, ante tedewënāni incæ mōnitō cōwē godōmenque cæmōnīpa. Pabodoidi babæ cædānīpa, ante piīnāni incæte mōnitō nōingā pōnente Wængonguī beyænque ante cæmōni aedāni. ⁹ Edæ tōmānāni mōnitō

imönite do edonque pōni adāni incæ adāmai inte bai cædinque, Önömīnique imīnīpa, ante tededānīpa. Wæncæ cæmōni incæte ee quëwëmōnīpa. Pānāni wæmōni incæte mōnitō imönite wæñnōnāmai inānīpa.¹⁰ Wæwëmōni incæte mōnitō cōwë mīmōno watapæ towocāmōnīpa. Mōnitō māincoo òmæpomōni incæ wadāni inānite godō cæmōni æninque tōmēnāni māincoo nangui pōni ænte bai eyepæ pōni entawēnānīpa. Edæ nē òmæpomōni inte wæmōni incæte mōnitō tōmancoo pōni entawëmōni inte Wængongui ingante nē cæmōni imōni aedāni.

¹¹ Coodintoidi eñēedāni. Mīnitō imīnite mōnitō edonque pōni apænetamōnīpa. Mīnitō imīnite nangui pōni waadete pōnēmōnīpa. ¹² Mōnitō dicæ pæ gompote mīnitō imīnite waadedāmai imōniyaa. Wæætē edæ tōmēmīni pæ gompodinque edæ mōnitō imönite waadedāmai imīni inte wæwēmīnīpa. ¹³ Ìninque botō wëñæmīni bai iñōmīnite iīmai āmopa. Mīnitō imīnite waadete pōnēmōni adinque mīnitō nāemæ waadete pōnēedāni.

Wængongui nē Quëwengā nānō owocō bai imōmpa, ante

¹⁴ Guëa mangæ mangæ woquīna, ante wagada tōnō bodo guëa goti wēmencadāmai iedāni, ante do yewæmongatimpa cæmīnī. Pōnēnāmai ināni tōnō godongāmæ cædāmai iedāni. Iñæmpa nē nō cæcā tōnō guëa ātantawente bai nē eñēnāmai cæcā guiquēnē dicæ adobai entawengā. Ayæ ñāō entawengā tōnō guëa gocæte ante cædinque nē wēmō entawengā iñōmō mīmō ñāō entawengampa diyæ guëa goquingā. ¹⁵ Codito nānō pōnēnō ante edæ wënæ awēnē Bediado iñōmō edæ adodō ante pōnengampa diyæ guëa cæquingā. Nē wede pōnengā nānō pōnēnō ante nē pōnēnāmai ingā iñōmō edæ adobai pōnengampa diyæ adobai quëwengingā. ¹⁶ Ayæ, Wængongui impa, ante woadāni nāni badōninca æninque edæ nāwā Wængongui tæiyæ wæmō oncōnē ædō cæte mangui cō cæquī. Mōnō guiquēnē Wængongui nē Quëwengā nānō tæiyæ wæmō owoquincō bai iñōmonte tōmengā Ònōwoca mōnonga pō guite owocampa. Ìninque tōmēnāni tōnō mōnō ædō cæte godongāmæ cæquī. Wængongui incæ, Mānōmai impa, ante ancæte ante iīmai angacāimpa.

“Woadāni weca owodingue botō tōmēnāni tōnō godongāmæ cægoncæboimpa. Botō tōmēnāni Wængongui iñōmote tōmēnāni wæætē botō quīnāni incædānīpa,” angacāimpa.

¹⁷ Mānōmainō ante apænedinque mōnō Awēnē adobai ante,

“Wadāni inānite taayænte pōninque nānēnē ponte quëwēedāni, angampa.

Wentamō i adinque gampodāmai iedāni. Mānōmai cæmīni adinque botō mīnitō imīnite, Pōedāni, ante ee æncæboimpa. ¹⁸ Æninque, Mīnitō Wæmpobo inōmo inte botō, onguiñæmīni incæ onquiyæmīni incæ, Botō wēmīni imīnīpa, ante æncæboimpa, ante nē Tæi Pīñængā inte Awēnē Wængongui angampa.”
Ante Wængongui beyæ yewæmongatimpa.

7

¹ Ìninque botō nē waademīni eñēedāni. Mōnō iñōmō, Wængongui, Cōwë cæcæboimpa, ante nānō angainō ante do eñengāmōmpa. Ìninque baonga wentamō mōnō eñadō tōnō mīmō mōnō wentamō entawēnō adobai ñā mēnongate bai cædinque edæ mōnō tæiyæ wæmō ewocate quëwengæimpa. Ayæ, Wængongui ingampa, ante guīñente wædinque mōnō, Cōwë nō cæte waa quëwengæimpa, ante nangui cæcæimpa.

Coodintoidi Codito gāmēnō pōnānīpa

² Mōnitō dicæ wacā ingante wënæ wënæ cæmōniyaa. Wacā wentamō nānō mongænguinque mōnitō dicæ wënæ wënæ cæmōniyaa. Dicæ wapiticæ apænedinque wacā quī ò æmōniyaa. Ìninque, Pa-bodoidi mānōmai cædāmai inānīpa, ante adinque mīnitō wæætē mōnitō imönite waadete pōnēninque eñēedāni, āmopa. ³ Mānōmainō ante āmo incæte botō, Mīni pante wæquinque, ante dicæ apænte āmogaa. Edæ botō do antabopa. Mīnitō tōnō mōni quëwenguinque incæ mīnitō tōnō mōni wænguinque incæ mōnitō mīnitō tōnō ānque bai entawente mīnitō imīnite cōwë waadete pōnēmōnīpa, antabopa. ⁴ Edæ, Mīnitō nō pōnente cæmīni imīnīpa, ante pōnēmopa. Mōnitō apænemōni eñēninque mīnitō nē waa cæmīni bamīnitapa, ante adinque botō mōnitō apænedō ante nangui tobopa. Mīnitō mānōmai cæmīni imīnīpa, ante eñente wædinque botō gancæ pōnēmopa. Ìninque mōnitō wënæ wënæ inte wæwēmōni incæte botō wæætē godōmenque watapæ tobopa.

⁵ Iīmai edæ Māatedōniabæ pōninque cætamōnīpa. Æmætæ æmætæ gote apænecæte ante cæyōmōnite wadāni bæ ta bæ ta cædāni wædinque mōnitō ædō cæte guëmanguimōnī. Edæ nangui pūnte cædāni wædinque mōnitō baonga nantate wædinque ònōwoca adobai guīñente wæwocatomōnīpa. ⁶ Incæte mōnitō wæwëñmōnīte, Nē wæwēnāni gancæ bacædānīpa, ante nē pōnō cæcā inongā Wængongui iñōmō Tito ingante da pōnongā pongā adinque mōnitō wæætē gancæ pōnentamōnīpa. ⁷ Tōmengā ponte a ongongā beyæ gancæ pōnēñmōnīte tōmengā, Coodintoidi botō imote waa cædāni adinque botō wæætē

gancæ pönentabopa, ante apænecä eñente mōnitō godōmenque totamōnipa. Ayæ botō imote ante apænedinque tōmengä, Bitō imite ante nanguī aīnente wædinque coodintoidi Ca ca wædānipa. Tōmēnāni iñōmō, Mōnō ñōwo Pabodo beyæ ante nanguī cææīmpa, ante wædānipa, ante Tito tedecä eñēninque botō godōmenque nanguī totabopa.

⁸ Botō doyedē cadota ante yewæmōninque da godōmo æninque mīnitō wæwente baminitawo. Nāwangä botō cadota beyæ wæwente bamīnitapa, ante wædinque botō, Quīnante mǎnōmaī yewæmōmōi, ante wætābopa. Incæte ayæ ate, Coodintoidi wantæ iñō wæwēninque ñōwo iñōmō edæ wæwēnāmaī inānipa, ante adinque botō ñōwo edæ, Nō cædinque yewæmōmoīmpa, ante piyænē cæbopa. ⁹ Edæ mīnitō wæwēmīni beyæ todāmaī iñīmo inte botō wæætē, Mīni wēnæ wēnæ cædinō ñīmpo cædinque mīnitō Codito gāmænō mīni ponguinque wæwente bamīnitapa, ante adinque mǎnōmaī beyænque totabopa. Edæ Wængonguī nānō ānōnō mīni eñenguinque wæwente bamīni īninque mōnitō cædō beyæ dicæ wæmīniyaa.

¹⁰ Edæ Wængonguī nānō ānōnō ante wæwēmō baī mōnō ocæ ēmænte ponte quēwenguinque impa. Īninque, Quīnante mǎnōmaī wæwēmōi, ante wædāmaī īmōmpa. Wæætē inguipoga mōnō quēwenguiāmāmo ante wæwēmō baī mōnō wænguinque impa. ¹¹ Edæ Wængonguī nānō ānōnō ante do wæwēnimīni inte mīnitō ñōwo, Mǎninō mōni wæwēnō beyæ æbānō entawēmōnii, ante nāmā aedāni. Edæ mǎnōmaī wæwēmīni inte mīnitō, Mōnō ee ongōnāmaī inte cææīmpa, ante do cæmīnitapa. Cædinque, Mōnō pōnencabo wentamō mongæñāmaī ingæīmpa, ante nanguī cædinque mīnitō nē wēnæ wēnæ cædingä ingante edæ do pūmīnitapa. Ayæ, Pabodo æbānō anguingāā, ante guīñente wæmīni incæte botō imote ante aīnente wæmīnitapa. Ayæ, Nē wēnæ wēnæ cædingä ingante mōnō nō ante pangæīmpa, ante do cæmīnitapa. Mǎnōmaī eyepæ cædimīni inte mīnitō wentamō mongæñāmaī īmīnipa, ante edonque abaimpa.

¹² Īninque mīnitō īmīnite yewæmōninque botō nē wēnæ wēnæ cædingä beyæ ante wīi yewæmontabopa. Tōmengä wēnæ wēnæ cæcä wædingä beyæ ante adobaī yewæmōnāmaī intabopa. Wæætē mīnitō Wængonguī ayongä nāmā adinque, Mōnitō Pabodoidi inānite waadete amōnipa, ante, Nāwangä impa, ante edonque acæmīnimpa, ante botō mīnitō beyænque ante yewæmontabopa. ¹³ Mīnitō mǎnōmaī cæmīni adinque mōnitō wēēñēhedē nē wæwēmōni inte ñōwo iñōmō gancæ

pōnēmōnipa.

Mīnitō waa cæmīni beyæ wēēñēhedē wæwēningä inte Tito adobaī gancæ pōnente ñōwo watapæ pōnengampa, ante adinque mōnitō do gancæ pōnēmōni inte ñōwo godōmenque nanguī tomōni īmōnipa. ¹⁴ Botō do inōñedē Tito ingante apænedinque, Coodintoidi waa cædāni abopa, antabopa. Ñōwo mīnitō waa cæmīni adinque botō, Tito ingante botō apænedinō nō impa, ante adinque botō guingo imōnāmaī imopa. Edæ botō mīnitō īmīnite nōinō ante apænetawo. Edæ mīnitō īmīnite nōinō ante apænebo baī botō Tito ingante, Coodintoidi waa cædānipa, ante apænedinque adobaī nōinō ante apænetabopa. ¹⁵ Ayæ Tito iñōmō, Coodintoidi tōmānāni botō imote waa adinque guīñente wædānitapa. Ayæ, Pōe, āninque tōmēnāni botō apænebo eñēninque Ao ante eñente cædānitapa, ante pōnēninque tōmengä mīnitō īmīnite godōmenque waadete pōnengampa. ¹⁶ Ayæ, Mīnitō cōwē waa cæmīni īmīnipa, ante pōnēninque edæ botō adobaī watapæ tobopa.

8

Mōnō godōmenque nanguī godongæīmpa, ante

¹ Ñōwo botō tōñīñadāni apænebo eñēedāni. Māatedōniabæ iñōmō Codito ingante godongāmæ nāni pōnencabo wayōmō nāni cabo wayōmō nāni cabo ongōñōnānite Wængonguī Ōñōwoca pōnō apænecä eñēninque tōmēnāni wæætē waadete cædinque īmaī cædānipa. ² Nanguī wēnæ wēnæ nantate wæwēnāni incæ tōmēnāni cōwē piyænē cæte watapæ todānipa. Īninque ōmæpodāni incæte tōmēnāni nanguī mǎnāni baī cædinque, Wængonguī quīnāni quī, ante godōmenque toduinque nanguī gomonga godōnānitapa. ³ Tōmēnāni edæ nāni godonguēñēnō ganca do godōninque ayæ godōmenque nanguī godōnāni adimo inte botō, Nāwangä impa, ante apænebopa. Ayæ edæ tōmēnāni nāni nāmā pōñēnō baī cædinque, ⁴ Wængonguī quīnāni beyæ impa, ante mōnitō wadāni tōnō godongāmæ godoncæmōnimpa, ante tōmēnāni mōnitō imōnite nanguī āninque ancaa ānānitapa. ⁵ Mōnitō guiquēñē, Māatedōniabæ quēwēnāni tōmēnāni nāni godonte æintaque godonguīnāni inānipa, ante edæ pōnentamōnipa. Incæte tōmēnāni, Wængonguī quīmōni īmōnipa, ante edæ Wængonguī ingante nāmā godōninque ayæ, Mīnitō īmīnite nē cæmōni bacæmōnimpa, āninque mōnitō imōnite edæ adobaī nāmā pōñōnānitapa. Ayæ mōnitō pōñēnō ganca adobaī godōninque tōmēnāni nāni godonte æinta ayæ godōmenque godōnānitapa.

6 Mäatedöniabæ quëwënanî mánömaï cædäni adinque mōnitō Tito ingante ïlmaï antamōnîpa. Bitō doyedē ämi ëñëninque coodintoidi waadete pōnëninque tæcæ godoncæ cædänitapa cæbii. Nōwo wæætē ämi ëñëninque tōmënanî nē waadete godōnāni badinque eyepæ godoncædänîmpa, ante mōnitō Tito ingante nanguï antamōnîpa. 7 Mīnitō ïñōmō wede pōnëmīni inte edæ nē waa pōnî apænemīni ïmīnîpa. Ayæ godōmenque gomonga ëñëmīni inte mīnitō, Mōnō cōwë cæcæîmpa, ante nanguï cædōmīni ïmīnîpa. Ayæ mōnitō ïmōnite nē waadete pōnëmīni ïmīnîpa. Mánömaï tōmānō ante do cædōmīni inte mīnitō ñōwo adobaï, Wængonguï quï, ante mōnō nē waadete godōmō bacæîmpa, ante edæ nanguï cædäni, ämopa.

8 Mänömainō äninque botō, Cædäni, ante wææ änāmaï ïmopa. Wæætē, Mīnitō æbānō cæmīnii, ante ëñencæte ante cædinque botō wadāni nāni nanguï cædinō ante apænetaþopa. Mänömainō ante apænëdîninque botō, Mīnitō adobaï tōmënanî nāni cæbaï nanguï waadete pōnente cæmīnitawo, ante acæte ante cædinque, Nē godōmīni baedāni, antabopa. 9 Mīnitō do ëñëmīnîpa. Mōnō Awënë Itota Codito öönædē quëwëninque nanguï gomonga ënepogangä inte mōnō ïmōnte waadete pōnëninque ïlmaï ante pōnō cægacæîmpa. Botō ömæpobo babo beyænque mīnitō nanguï wæætē entawencæmīnîmpa, ante cædinque tōmengä edæ mīnitō beyænque ante inguipoga pōninque edæ ömæpocä bagacæîmpa.

10 Ayæ, Mäninō mīni godonguïnō ante æbānō cæquënemīni ïmīnii, ante botō nāmā pōnëninque ïlmaï ämopa. Wadepo ïnōñedē wadāni godōnāmaï ïñōnāni mīnitō ïñōmō edæ do tano godōmīnitawo. Mōnō godongæîmpa, ante edæ mīnitō cōwë tano cæinëmīni ïmīnitawo. 11 ïninque, Mōnō godongæîmpa, ante quingæ änimīni inte ñōwo edæ ïnque cædäni. Mīni ëadincōo adinque mīnitō, Eyepæ inte botō panca-cooga godoncæboîmpa, ante mīni änincoo edæ godōmīni adinque, Eyepæ godōmīnîpa, ante acæîmpa. 12 Edæ æcānō godōinengä tōmengä nānō godonte æinta tōmanta adinque, Æpotadō botō godongüenëmo ïmoo, ante adinque mänimpotaque godōninque idæwaa. Godōmenque nanguï mangampa diyæ nanguï godonguingä.

13 Mänömaï äninque botō, Wadāni pōnōmenque godōninque guëmāñōnāni mīnitō wæætē mīni eyepote wæquinque godōmenque nanguï godoncæmīnîmpa, ante dicæ ämogaa. 14 Wæætē, Cōwë eyepæ bacæîmpa, ante ämopa. Edæ mänincōo ñōwo eyepæ mäninque mīnitō

nē ænguënete wædāni ïnānite godōmīni ænānîpa. ïninque ïncayæ ate mīnitō wæætē nē ænguënemīni bamīni ate tōmënanî wæætē eyepæ mante ate mīnitō ïmīnite pōnōnāni æñōmīni adopo adopo edæ eyepæ babaiþpa. Mänömainō ancæte ante ämopa. 15 Edæ do yewæmongatîmpa. “Cænguï gomonga wææmpo æningä incæ tōmengä nānō ænguënenanca ænte baï mäninque godōmenque mänāmaï ingantapa. Wæætē edæ wædænque wææmpo æningä guiquëñë tōmengä nānō ænguënenanca eyepæ ænte baï eyepæ mangantapa.” Ante nāni yewæmongainō baï ïnque bacæîmpa, ante mīnitō ïmīnite ämopa.

Mīnitō weca Titoidi poncædänîmpa, ante

16 Botō cōwë, Coodintoidi beyæ cæcæîmpa, ante mīnitō ïmīnite waadete pōnëmopa. Ayæ, Wængonguï pōnō apænecä ëñëninque Tito ïñōmō botō pōnëmo baï adobaï pōnente cæcampa, ante adinque botō wæætē Wængonguï ingante waa ate pōnëninque apænëþopa. 17 Edæ mōnitō, Coodintoidi weca goe, ämōni ëñëninque edæ Tito do Ao ante pongä aedāni. Incæte wīi mōnitō äñinō beyænque pongampa. Wæætē nāmanque pōinente wædinque tōmengä nanguï todinque mīnitō weca pongampa.

18 Ayæ Tito tōnō wacä mōnō tōniñacä ingante da pōnōmōni pongampa. ïngä Tito tōnō nē pongä ïñōmō tōmengä Codito ingantedō ante watapæ mōni apænëdō ante nē apænecä ingampa. ïninque Codito ingante godongämæ nāni pōnencabo wayōmō nāni cabo wayōmō nāni cabo tōmānāni tōmengä ingante waa ate waa apænëdänîpa. 19 Codito ingante nāni pōnencabo incæ adocä ingante apænte æninque, Pabodoidi tōnō gocæbiîmpa, ante da godōnāni ate tōmengä mōnitō tōnō godongämæ goquingä ingampa. Edæ mōnitō, Mōnō Awënë ñāō apāite baï ëmongä ingampa, ante acædänîmpa, ante cædinque ayæ, Mōnitō wadāni beyæ cæinëmōnîpa, ante acædänîmpa, ante cædinque mīnitō da godonguincōo ænte goquimōni ïmōnîpa. Mänömaï cæcæte ante goyōmōni, Tōmengä godongämæ gote cæcæcæîmpa, ante da godōnāni gocæcæîmpa. 20 Edæ wadāni, Pabodoidi babæ cædänîpa, ante änāmaï incædänîmpa, ante wææ cædinque mōnitō nō pōnî cædinque nanguï pōnî mīnitō godonguincōo ænte godinque pædæ godoncæmōnîmpa. 21 Edæ, Mōnitō Wængonguï ayongä nō cæmōni inte waodāni ayōnāni adobaï edonque pōnî cædinque nō pōnî cæcæîmpa, ante cæmōnîpa.

22 Ayæ wacä mōnō tōniñacä ïñongante mōnitō æpogamē cōwä ayōmōni tōmengä cōwë tōmāā nō cæcä ïngongampa. Ayæ ñōwo tōmengä, Coodintoidi nō cædänîpa, ante

pönengä inte godömenque waa cædongä ingampa. Mänömai ingampa, ante adinque mönitö ñowo tömengä ingante da godömöni godinque tömengä ñāna tönö munitö weca poncæcäimpa. ²³ Tito ññömö botö tönö godongāmæ cöwë cæcampa. Ñinque munitö beyæ guëa nē cæmōna imōnāpa. Codito ingante nāni godongāmæ pönencabo incæ mönitö tönñāda Tito tönö wada inate da godönāni godinque tömēnāni, Mönö Codito ingante waa acædānimpā, ante nangui cæda ñnāpa. ²⁴ Ññāni ññānite apænedinque mönitö, Coodintoidi nē waa cædāni ññānīpa, ante do apænetamōnīpa. Ñinque munitö eyepæ godömīni adinque tömēnāni, Nāwängä ñnāpa, ante edonque acædānimpā. Ayæ adobai, Minitö waadete pönö cæmīni adinque Pabodoidi wæætē munitö ññānite waa adānīpa, ante acædānimpā, ante cædāni. Mänömai cæmīni adinque Codito ingante godongāmæ nāni pönencabo wayömö nāni cabo wayömö nāni cabo tömānāni adobainö ante edonque acædānimpā.

9

Mönö wædāmai eyepæ pönī godongæimpa, ante

¹ Ñowo mānīnō, Wængonguī quīñāni beyæ munitö godoncæmīnimpā, ante botö idæwaa yewæmōmōpa. ² Edæ, Minitö wædāmai inte do cæmīnīpa, ante ēñēninque botö Mäatedōniabæ quēwēnāni ññānite apænedinque, Acayabæ quēwēnāni ññömö wadepo ññōñedē do godoncæte ante cædōnānimpā, ante do apænetabōpa. Apænebo ēñēninque tömēnāni wodo tömānāni, Æ Acayabæ quēwēnāni nāni quingæ cæbai mönō adobai cæcæimpa, ante cædānīpa.

³ Incæte botö ñowo mönö tönñāñāni ññānite da godōmo pōninque tömēnāni munitö ññānite apænedāni ēñēninque munitö wæætē eyepæ godoncæmīnimpā. Mänömai cæmīni ate botö babæ apænedāmai ñmoī, ante edonque ēñengæimpa. ⁴ Ññæmpā Mäatedōniabæ quēwēnāni botö tönö godongāmæ ponte ayōñāni munitö wī eyepæ cæmīni adinque tömēnāni wæætē, Minitö dicæ cæmīniyaa, ante badete tobainānīpa. Ayæ mönötö quiquēñē, Coodintoidi ññinque cæcædānimpā, ante nē āñimōni inte odadete guingo imonte wæbalmōnīpa. Minitö adobai, Mōni cæquēñēñö cædāmai ñmōnīpa, ante guingo imonte wæbalmōnīpa. ⁵ Ñinque munitö, Godoncæmōnimpā, ante mīni āñinō bai eyepæ godoncæmīnimpā. Ante cædinque botö mönö tönñāñāni ññānite āninque, Minitö gote apænemīni ēñēninque coodintoidi ædæmō pönente cæcædānimpā, ante da pönōmo pönāni aedāni. Ñinque munitö tönö godongāmæ

cædāni ate munitö ædæmō pönēninque, Botö wææ gompodāmai inte waa todinque godōmōpa, ante godoncæmīnimpā.

⁶ Ññāni ante pönēdāni. Wædænque quiyadingä ññömö amīñāimō wædænque pete æncæcäimpa. Nangui quiyadingä quiquēñē amīñāimō nangui pete æncæcäimpa. ⁷ Wadāni quī, ante æcāñö watapæ todinque godōñā, ante adinque Wængonguī tömengä ingante waadete pönengampa. Ñinque wadāni wææ āñāmai ññōñāni munitö, Botö æpotadō godonguimoo, ante pönēninque tömāñāni wædāmai inte mīni āñimpota adopota godōninque do godonguēñēmīni ññānīpa. ⁸ Ayæ, Eyepæ pönī ēamīni inte munitö quīēmē cæmīni incæ tömāñāni beyæ ante cōwë godō waa cæcæmīnimpā, ante Wængonguī cæcampa. Ñinque, Minitö eyepæ ænte ēadinque mänömai cæcæmīnimpā, ante tömengä nangui cædongä inte cōwë eyede tate bai waadete pönö cæcä ingampa. ⁹ Edæ docä ingante ante ññāni ante yewæmongatimpā. “Yepanca quiyacä bai ññongä inte tömengä, Æmæpodāni quī, ante wayömö wayömö godongantapa.

Ñinque tömengä nō nāñö cædinö ññömö edæ cōwë ēwēñāmai ongongæimpa.”

¹⁰ Ante yewæmongatimpā. Nē quiyacä ingante Wængonguī, Tömēmö quiyaquimō, ante eyepæ pönōninque adobai, Cænguī, ante tömāmō imonte eyepæ pönongä ænte cæmōmpā. Minitö ññömö eyepæ ēamīni inte wacä ingä wacä ingä quiyate bai ññemopæcæmīnimpā, ante cædinque Wængonguī mīni godonganca da pönōninque godōmenque gomonga da pönongä æncæmīnimpā. Mänömai eyepæ da pönongä æninque munitö wæætē nō cædinque wadāni nangui ññāni ññānite ññempomīni æninque tömēñāni wæætē amīñāimō tā pete bai watapæ quēwēncædānimpā. ¹¹ Minitö pæ gompodāmai inte wadāni ññānite cōwë pædæ godoncæmīnimpā, ante cædinque munitö ññānite Wængonguī nangui pönī pönongä æncæmīnimpā. Æninque munitö pæ gompodāmai inte pædæ godō pædæ godō cæmīni adinque mönötö wæætē, Coodintoidi mänömai cædānīpa, ante tedemōni ēñēninque wadāni wæætē Wængonguī ingante waa ate pönēninque apæñecædānimpā.

¹² Wadāni quī, ante do godömīni æninque Wængonguī quīñāni tömēñāni nāni ænguēñēñö ante eyepæ pönī æncædānimpā. Ayæ mīni godōñö æninque tömēñāni mīmōno eyede tate bai Wængonguī ingante waa ate pönēninque nangui apæñecædānimpā. ¹³ Möñö Codito ingant-edō ante watapæ ēñēninque munitö Ao ante do pönēmīnitapa. Ñinque Wængonguī nāñö

ānōno ante do ēfente cædinque mīnitō, Ōmæpodāni quī, ante pædæ godōmīni æninque nē ænāni wæætē Wængonguī ingante, Bitō nāo bai nō pōni cæbi ate coodintoidi bitō ānōno ante ēfente cædānīpa, ante watapæ apænecædānīmpa. Ayæ nē ænīnāni inte adodāni godōmenque apænedinque, Nē ōmæpodāni tōmānāni inānite da godōninque coodintoidi iñōmō mōnitō imōnite adobai eyepæ pōnōnāni æmōnīpa, ante Wængonguī ingante godōmenque waa ate apænecædānīmpa. ¹⁴ Ayæ, Coodintoidi inānite Wængonguī godōmenque nanguī waadete pōno cæcā beyæneque tōmēnāni waa cædāni inānīpa, ante pōnēninque nē ænīnāni iñōmō edæ mīnitō imīnite waadete pōnēninque mīnitō beyæ ante Wængonguī ingante apænecædānīmpa.

¹⁵ Wængonguī iñōmō godōmenque waa cædinque mōnō Codito ingante da pōnongā ængamōimpa. Inīnque mōnō, Wængonguī, bitō waa pōni pōno cægabiimpa, ante mōnitō ædō cæte eyepæ inte waa ate pōnente apænequimōnī, ante mōnō Wængonguī ingante apænecæimpa.

10

Pabodo, Itota nānō nē da godōnīmo imopa, angampa

¹ Mīnitō, Wayōmonque quēwēninque Pabodo nanguī piinte angampa, ante pōnēmīnitawo. Wæætē mōnitō weca pōninque awincadō awinca adinque tōmengā guīfēnete wædinque pæ wēnecampa, ante pōnēmīnitawo. Iñæmpa mīni ānōmo mānīmotō inte iīmāi āmopa. Codito iñōmō edæ gānē pōnengā inongā inte pōno piyæne cæcantawo. Botō adobai nōwo piyæne cædinque mīnitō imīnite pōno waadete apænebopa. ² Pabodoidi iñōmō inguipogaque ante pōnente cædānīpa, ante pancadāniya odadete ānewēnānīpa. Tōmēnāni inānite botō guīfēnedāmai inte nanguī ancæboimpa. Mīnitō quīquēnē adobai odadete āmīni inīnque botō mīnitō weca pōninque piinte anguēnēmo imāimopa. Inīnque, Wīi piinte anguīmo bacæboimpa, ante wææ cæcæte ante botō nōwo mīnitō imīnite. Ee aquēnē quēwēmīni, ante waadete pōnente yewæmōmopa.

³ Edæ inguipoga quēwēmōni incæte mōnitō Wængonguī beyæ ante wæætēdō wæætē cæcæte ante cædinque inguipogaque quēwēnāni nāni wæætēdō wæætē cæi bai cædāmai imōnīpa. ⁴ Wæætē edæ mōnitō Wængonguī beyæ ante wæætēdō wæætē cæcæte ante cædinque inguipogaque quēwēnāni nāni wænoncaquincoo næænāmai inte cæmōnīpa. Wæætē Wængonguī tōmengā nānō tæi piñæmāmo ænte mīmōno entawēninque eyepæ næænte

bai badinque mōnitō tōmēnāni nāni tæi mænōincō bæ tate bai cædinque wæætēdō wæætē nāni godō ānewēnō ante wido cæte bai cæmōnīpa. ⁵ Wængonguī ingante pōnēnāmai ingæimpa, ante nē pōnēwēnāni inte ængæ gantidinque tōmēnāni iñōmō, Wadāni tōmānāni adobai Wængonguī ingante pōnēnāmai incædānīmpa, ante cædinque babæ wapiticæ cædānīpa. Mānīi babæ wapiticæ nāni cædōno ante mōnitō wæætē bæ tate wido cæmōnīpa. Edæ, Codito ingante mōno ēfengæimpa, ante nō apænemōni ēfēninque wadāni idiquibæ pōnēwēnāni iñōnāni mōnitō wæætē mānīnō nāni pōnēwēnō tōmāno ō ænte bai wido cæmōnīpa. ⁶ Ayæ mīnitō ædæmō nē ēfente cæmīni bamīni ate adocanque incæ ēfēnāmai cæcā adinque mōnitō wæætē tōmengā ingante do panguīmōni imōnīpa.

⁷ Æbāno ī, ante edonque ongō abaimīnīpa. Pancamīniya, Botō nāwangā Codito nempo quēwēmo imopa, ante pōnēmīnitawo. Mīnitō mānōmai pōnēmīni inte godōmenque iīmāi ante pōnenguēnēmīni imīnīpa. Botō Codito nempo quēwēmo imo bai Pabodoidi adobai Codito nempo quēwēnāni inānīpa, ante nāwangā impa, ante pōnenguēnēmīni imīnīpa. ⁸ Iñæmpa Wængonguī mōnitō imōnite āninque, Mīnitō nē āmīni badinque coodintoidi inānite bæ tate wido cædāmai incæmīnīmpa. Wæætē ædæmō āmīni ēfēninque coodintoidi wæætē oncō tæi mænonte bai gongæncædānīmpa, ante cædāni, ante Wængonguī pōno angā ēfēninque mōnitō nē āmōni batamōnīpa. Inīnque botō, Nē āmo inte nāmā tocæboimpa, ante tedebo incæte guīfēnedāmai tedecæboimpa.

⁹ Botō, Cadota ante botō yewæmōinta adinque mīnitō guīfēnte wæcæmīnīmpa, ante dicæ āmogaa. ¹⁰ Pancamīniya, Pabodo tæi piñænongā bai inte cadota ante yewæmōninque nanguī angā awædō, ante wæmīnīpa. Wæætē edæ adocā incæ mōnitō weca ponte ongōninque edæ aquīi ingā amōnīpa. Tōmengā nānō tedepāmo ōnōmāmoque bai impa, ante pōnēmīni awædō. ¹¹ Iñæmpa, Tæi piñæmōni inte cadota ante nē yewæmōmōni incæ mōnitō adomōni inte mīnitō weca ponte ongōninque adobai tæi piñænte cæcæmōnīmpa, āmo ēfēmaimīnīpa.

¹² Pancadāniya nāmā incæ, Wæmō pōni imopa, ante tededāni incæte tōmēnāni nāmā nāni tede bai mōnitō ædō cæte adobainō ante tedequimōnī. Tōmēnāni iñōmō, Ægancadō waa cæbo eyepæ inguīi, ante nāmā nāni cægancaque ante adinque edæ, Eyepæ cætābopa, ante pōnēwēnānīpa. Tōmēnāni nāni cædō ante, Waa cætawo, ante tee mancæte ante, Do botō cædinō bai adobai cæbopa, ante adinque, Eyepæ

impa, ante pönëwënanipa. Mänömai nämä nāni pönëwënonque ante cædinque tōmënanī ēñënanīmaī inte oda cæte cædānīpa.

¹³ Mōnitō guiquënë, Īngancaque goedāni, ante Wængonguī nānō angancaque cōwë gomōnīpa. Īnīnque tōmëngā, Coodintoidi ganca godinque apænëedāni, angā ēñëninque mōnitō do gote apænëdinque, Māningancaque waa cæmōnīpa, ante nämā waa ate tedemōnīpa. Godōmenque ante tededāmaī ĩmōnīpa. ¹⁴ Mīnitō ganca pōnāmaī inte baī mōnitō, Coodintoidi weca gote do cætāmōnīpa, ante tedemōni baī babæ wapiticæ incædōnīpa. Incæte mīnitō ganca do pōnīnque Codito ingantedō ante mōnitō watapæ mōni ēñëno ante apænëtamōnīpa. Īnīnque edæ, Māninganca cætāmōnīpa, ante mānīnque ante tedemōnīpa. ¹⁵ Ayæ wadāni nāni cædinō ante adīnque mōnitō, Tōmëmōni cædinō impa, ante ānāmaī ĩmōnīpa. Wæætë mīnitō godōmenque godōmenque wede pōñëñōmīni mōnitō wæætë adodō mīnitō weca ponte quëwëninque godōmenque gomonga cæyōmōni mōnō watapæ bacæīmpa, ante pōñëmōnīpa. ¹⁶ Ayæ mīnitō weca ĩnīnque cædinque mōnitō godōmenque gomonga godinque mōnō Codito ingantedō ante watapæ mōni ēñëno ante apænëcæmōnīpa, ante pōñëmōnīpa. Mänömai cædinque mōnitō wacā nānō cædīñōmō ante, Mōnitō māniñōmō cætāmōnīpa, ante tededāmaī incæmōnīpa.

¹⁷ Æcāno, Botō waëmō pōni ĩnōmo inte waa cæbopa, ante toinēna tōmëngā wæætë, Mōnō Awënë waëmō pōni ĩnongā inte pōnō waa cæcampa, ante toquëngā ingampa. ¹⁸ Edæ, Waëmō ĩnōmo ĩmpa, ante nämā ānongā ingante Wængonguī waa adāmaī ingampa. Wæætë, Īngā waëmō ĩnongā ingampa, ante mōnō Awënë nānō ānongā ingante ante Wængonguī wæætë waa acampa.

11

Wængonguī beyæ, ante pancadāniya babæ apænëdānīpa

¹ Nōwo botō adodeque ònonque tedete baī yewæmōmo adīnque mīnitō ee amīni ĩnīnque botō waa tobāimopa. Wadō āmo, Mīnitō ee ayōmīni edæ botō ònonque tedete baī do yewæmōmopa. Īnīnque ĩmaī ante odōmoncæte ante yewæmōmoī aedāni. ² Wængonguī wææ gompocā baī botō adobai mīnitō beyæ ante wææ gompote āmopa. Mīnitō baquëcā mōnāmaingā baī ĩñōmīnīte Codito ængā beyænque mīni pōñëncabo tōmëngā nempo nō cæte quëwëncæmīnīpa, ante pædæ godoncæte ante cædinque botō tōmëngā adocanque ingante, Bitō quīnāni ĩnānīte æe, antabopa. ³ Mīnitō nōingā cædinque wacā mīñæ godāmaī inte Codito

ingante waadete pōñëmīni incæte botō, Mīnitō oda cæmīni wæcæ wæ, ante guīñente wæbopa. Eba wodi ingante Tæntæbo nangui ēñëngā inte babæ cædinque apænëcā ēñëninque tōmëngā nānō oda cægāi baī mīnitō wīl adobai oda cæcæmīnīmpa, ante botō wææ ante apænëbopa.

⁴ Mōnitō, Itota ingante pōñëngæīmpa, ante do apænëmōni ēñëmīnīta. Incæte wacā mīnitō weca pōnīnque nāwā Itota ingante apænëdāmaī inte, Wacā Itota ingante pōñëedāni, ante babæ apænëyongante mīnitō edæ ēñëē cōmīni awædō. Adobai Wængonguī Ōñōwoca do ængaimīni ĩñōmīnīte wacā òñōwoca pō guīyongante mīnitō ee æmīni guicā awædō. Ayæ wadāni mōnō Codito ingante ante apænëdāmaī ĩnāni inte, Wacā ængā beyæ quëwëngæīmpa, ante babæ apænëyōnāni mīnitō edæ ēñëē cōmīni awædō. ⁵ Mänömaīno ante nē tededāni ĩñōmō nämā ante pōñëninque, Nē gode āmōni inte mōnitō ñænænē mōni pōni ĩmōnīpa, ante edæ babæ ānewënanīpa. Tōmënanī nāwangā ñænænēnāni ĩnāni baī botō dicæ wædāmo ĩnguëñemogaa, ante pōñëmopa. ⁶ Botō æbānō tedeebo, ante ēñëninque mīnitō ĩñōmō, Ōñōñëpāmoque tedecampa, ante pīmīnītawo. Incæte botō ædæmō adīmo inte nē ēñëñimo inte apænëbopa. Pabodo mänömai ĩnongā inte apænëncampa, ante acæmīnīpa, ante mōnitō cōwë mīnitō ĩmīnīte edonque odōmōmōni amīnīta.

⁷ Mīnitō ĩmīnīte ængō cæte baī cæcæte ante botō Wængonguī ingantedō ante watapæ apænëbo beyæ ænāmaī intabopa. Mänömai ænāmaī inte botō nämā edæ pīnte baī cædinque dicæ wīwa cætābogaa. ⁸ Codito ingante godongāmæ nāni pōñëncabo wayōmō nāni cabo wayōmō nāni cabo da pōñōnāni ò ònīnque botō mānīntaque godonte ænte quëwëninque mīnitō beyæ cætābopa. ⁹ Ayæ mīnitō weca ongōnīnque botō quīemē æīnente wæbo incæ edæ waa atabopa. Wadāni edæ mōnō tōñīñadāni incæ Māatedōñīabæ quëwente pōnīnque tōmënanī botō ænguëñëno ante eyepæ pōñōnāni æntabopa. Īnīnque coodintoidi botō ānō beyæ wædāmaī incædānīpa, ante wææ cædinque botō ĩñōmō edæ, Pōñōmīni æmoedāni, ante cōwë ānāmaī intabopa. Ayæ ĩncayæ ate cōwë ānāmaī incæboīmpa. ¹⁰ Mōnō Codito nō nānō apænëdō ante ēñente entawëmo inte āmopa. Botō, Mänömai cædinque waa cæbopa, ante cōwë edæ tedeyōmote mīnitō Acayabæ quëwëmīni inte edæ wææ cædāmaī incæmīnīpa. ¹¹ Quīnante mänömaī ante tedebōi. ĩñæmpa botō æbānō mīnitō ĩmīnīte waadete pōñëmoo, ante do againgā inte Wængonguī tōmëngā ancæcāīmpa.

¹² Wadāni guiquēnē, Mōnitō Codito nānō nē godongaimōni imōnīpa, ante nē ānāni guiquēnē, Ēbānō cæte odōmōmōni adinque wadāni Pabodoidi inānite waa adō bai mōnitō imōnite adobai waa acædānīpa, ante wædānīpa. Īnīnque botō īfōmō, Īnāni mǎnōmǎinō ante odōmōnāmāi incædānīpa, ante mǎnōmǎi tedete wææ cæbo inte edæ cōwē godōmenque wææ cæcæboīpa. ¹³ Tōmēnāni īfōmō edæ, Wadāni oda cæcædānīpa, ante awēmō cædāni Īnānīpa. Mōnō Codito tōmēnāni inānite da godōnāmāi ingā incæte tōmēnāni īfōmō edæ, Codito nānō da godongaimōni imōnīpa, ante babæ apænedānīpa. Ayæ edæ mōnitō Codito nānō da godongaimōni mōni ēmōnō bai ōnōmoque ēmōnīnque babæ cædānīpa. ¹⁴ Mīnitō, Tōmēnāni quīnante wacā bai ēmōnānīi, ante wæmīnitawo. Īnæmpa tōmēnāni awēnē Tatāna incæ babæ cædinque Wængonguī anquedoidi nǎo nāni ēmōnō bai nǎo ēmonte bai ēmongampa. ¹⁵ Īnīnque Tatāna beyæ nē cædāni īfōmō tōmēnāni awēnē Tatāna nānō babæ cædō bai adobai babæ cædinque, Nē nō Cædongā ingante nē cæmōni imōnīpa, ante ōnōmoque ēmōnānīpa. Īnīnque tōmēnāni nē ōnōmoque ēmōnāni inte ōnonque ēwente baquīnānidō anguēnē.

Ēbānō caate wæboo, ante Pabodo yewæmongampa

¹⁶ Botō nōwo adodō ante yewæmōmopa. Mīnitō, Pabodo ocai ōmædæcacā Īnongā inte ōnonque tedecampa, āmīnitawo. Mǎnōmǎinō ante ānāmāi Īmæwedāni. Incæte wacā ocai ōmædæcacā tedeyongante mīnitō ee amīni tedecā bai botō adobai ocai ōmædæcabo inte bai, Nāmā waa cæbo ĩmopa, ante adodeque tedebō ĩnīnque ee amīni tedebōedāni. ¹⁷ Botō nōwo mǎnōmǎi nāmā waa ate bai tedete yewæmōnīnque mōnō Awēnē nānō āmāi wīi yewæmōmopa. Wæætē ocai ōmædæcacā mā nānō pōnente tede bai adobai ōnonque tedete bai yewæmōmopa. ¹⁸ Pancadāniya nanguī ĩnāni incæ, Mōnitō nāmā waa cæmōnīpa, ante edæ inguipogaque quēwēnāni tededāni bai adobai tededānīpa. Tōmēnāni mǎnōmǎi tededāni ĩnīnque botō adobai, Nāmā waa cæbopa, ante tedecæboīpa. ¹⁹ Nē ēfēmōni imōnīpa, ante nē amīni inte mīnitō īfōmō ocai ōmædæcadāni ōnonque tedeyōnānite ee ēfēē cōmīnīpa tōō. ²⁰ Wacā edæ mīnitō ĩmīnite bæi ongongā wædinque mīnitō tōmēngā ingante ee nē cæmīni bawēmīni awædō. Wacā babæ wapiticæ cædinque mīnitō quī inguēnē incæ ō ængā incæte mīnitō edæ ee amīnīpa. Wacā mīnitō awēnē bai nāmā ængō cæte angā incæ ee ēfēmīnīpa. Wacā mīnitō ĩmīnite pōnō tamongā incæte mīnitō ee ate wæmīni awædō. ²¹ Botō wæætē aquūimo inte, Tōmēnāni nāni nanguī cædō

bai ædō cæte cæquīmo, ante botō guingo imonguinque ōnonque tedebopa tōō.

Tōmēnāni nāmanque waa adinque edæ guīfēnāmāi inte tededānitawo. Botō adobai nāmanque waa adinque edæ guīfēnāmāi inte tedecæboīpa. Incæte mǎnōmǎi tededīnque botō ōnonque badete tote bai tedebopa. ²² Tōmēnāni guiquēnē ebēdeoidi ĩnānitawo, ante pōnēmīni. Botō īfōmō edæ tōmēnāni nāni ĩmāi adobo ĩmopa. Tōmēnāni idægoidi ĩnānitawo. Edæ botō tōmēnāni nāni ĩmāi adobo ĩmopa. Tōmēnāni Abadāō wodi pæīnāni ĩnānitawo. Edæ botō tōmēnāni nāni ĩnō bai adobo Abadāō wodi pæīmo ĩmopa. ²³ Mōnō Codito beyæ nē cædōnāni ĩnānīpa, ante pōnēmīni. Botō edæ tōmēnāni nāni ĩmāi inte edæ gomonga ĩmopa. Incæte mǎnōmǎinō ante tededīnque botō ocai ōmædæcacā bai inte ōnonque tedebopa. Tōmēnāni ĩnānite adopoque adopoque wædænque cæyōnāni botō godōmenque nanguī cægaboīpa. Tōmēnāni ĩnānite wædænque tee mōnedāni wæyōnāni botō ĩmote godōmenque wæætē wæætē tee mōnedāni wægaboīpa. Tōmēnāni ĩnānite wædænque tæi pānāni wæyōnāni botō ĩmote godōmenque nanguī tæi pānāni wægaboīpa. Ayæ botō wæætē wæætē wodo wægaboīpa.

²⁴ Oodeoidi æmontaimenca wodo coadenta ganca adoyedē nāni cōwē tæi pāimpoga botō ĩmote adoyedē mǎnīmpoga tæi tæi pānīnque ōnonpo æmæmpogoncaque wæætē adopoga adopoga tæi tæi pānāni wægaboīpa. ²⁵ Ayæ cantaca mempoga go adopoque botō ĩmote tæi tæi pānāni wægaboīpa. Ayæ adopoque botō ĩmote dicaca tacadāni wangæ wægaboīpa. Ayæ wipodē wogaa godīnque mempoga go adopoque wipo tente tobæmpo wægaboīpa. Edæ wīi eyepæ gote botō tōmāā itædē tōmāā woyowotæ tææpæno pōni wæwogaboīpa. ²⁶ Wayōmō wayōmō botō ancaa godīnque wætabopa. Ōnō æpæmpo wodo bete wæntabopa. Nē ō ænāni incæ botō guīdēnāni incæ wadāni incæ wodo wænonāni wæmo adinque botō wænguinque ante wægaboīpa. Ayæ tōmēnāni nāni quēwēfōmō quēwēnīnque, Ōnōmæca quēwēnīnque, gāwapæno owodīnque botō wænguinque ante wægaboīpa. Ayæ wadāni incæ, Mōnō pōnencabo ĩmopa, ante babæ ānāni adīnque botō īfōmō edæ, Babæ cædāni wæncæ wæ, ante wægaboī aedāni. ²⁷ Botō pancaōnaa tōmāā woyowotæ mīimo inte nanguī cædinque wægaboīpa. Tepæ pancaōnaa gæwænte wægaboīpa. Pancaōnaa cænguī dæ ā ate gue ænente wægaboīpa. Edæ æpogamē pōni cænāmāi inte wægaboīpa. Pancayedēna botō weocoo ōmaabo inte yoguīte wægaboīpa.

²⁸ Mänömaï wædömo inte botö, Codito ingante godongämæ nāni pönencabo tōmancabodāniya nāni wædö ante æbānō cæquïmo, ante wædinque ïimō ïñō ïimō ïñō nanguï cæbopa. ²⁹ Edæ wacā aquïngā inte wæcā ïinque botö adobai aquïmo inte bai wæbopa. Ayæ, Wënæ wënæ cæe, ānāni ēñēninque adocanque oda cæcā ēñente wædinque botö ædö cæte wæwēnāmaï inguïmo.

³⁰ ïinque, Nāmā tæēmō inte cæbopa, ante tededāmaï incæboïmpa. Wæætē, Æbānō aquïmo inte cæbopa, ante acædānïmpa, ante botö mäninonque ante tedecæboïmpa. ³¹ Wængonguï ïñōmō mōnō Awēnē Itota Wæmpocā ïnongā inte edæ tōmengā adocā ïñōmō Itota Wængonguï ingampa. Tōmengā wæmō pōnï ïnongā inte cōwē waa pōnï cæcampa, ante mōnō tōmengā ingante cōwē apænecæïmpa. Tōmengā ïñōmō edæ, Pabodo nō angampa, ante do ēñengampa. ³² Ayæ ïmaï cædāni wægaboïmpa. Adeto Tidiabæ awēnē nānō ïñōñedē māniñedē botö ïmote bæi ongoncæte ante cædinque tōmengā nānō ēmiñængā wædænque awēnē ïñōmō ïmaï cæcantapa. Tōmengā wadēni ïnānite angā ēñēninque tōmēnāni wæætē Daāmaco ïñōmō tōmēnāni nāni wīni wææ cæincō boyæ yabædemō gāānē wānō cōñōnāni, ³³ botö tōnō cædāni guiquēnē Daāmaco nāni wīni wææ cæincō boyæ cæimpiticæ ïnō otodē ñā cædete botö ïmote pædæi wæænōnāni ti wææ aamō cæte wodii wīnongaboïmpa.

12

Pabodo, ïmaï wīlmonte bai atabopa, angampa

¹ Ōnonque tedebo incæte botö, Waa cætabopa, ante cōwē tedequēnēmo ïmopa. ïinque botö ñōwo edæ, Wīlmonte bai ayōmo mōnō awēnē mā pōnï odōmongā atabopa, ante yewæmoncæboïmpa. Ayæ tōmengā, Æbānō ï, ante edonque pōnï nānō odōmōñōnō ante godōmenque yewæmoncæ cæbopa. ² Codito nempo nē quēwēmo ïñōmote Wængonguï do catodote wadepo ïñonte botö ïmote oñōædē wænōmēnæcāñæ mæicā æigaboïmpa. Incæte wacā æicā ate bai nāmā incæ agaboïmpa. Wabānō ōñōwoqaque inte æigaboï. ïntai ēñate wabānō ïnque inte æigaboï, ante botö adāmaï ïmopa. Wængounginque nē æente mæigaingā inte tōmenganque ēñengampa. ³ Edæ baō ēñate æiabo incæ baō ōmaabo inte æiabo incæ Wængounginque ēñēñongā botö, ïmaï ingatïmpa, ante māninque ēñēmopa. ⁴ Waēmōnædē tōmengā ōmæ ïñōmō Wængonguï æente mæicā æigaboïmpa. Māniñōmō waa pōnï apænedāni ēñēmo incæte tōmengā, ïñōmō mōni apænedō ante

mīni waocabo apænedāmaï incæmīnïmpa, ante wææ angā ēñēninque botö waobo inte ædö cæte apænēquïmo.

⁵ ïinque wacā mänömaï oñnædē æite ēñægā ïinque botö, Tōmengā waa pōnï cæcampa, ante do apænēbaïmpa. Wæætē nāmā botö waa cædōnō ante apænēdāmaï incæboïmpa. Incæte, Tōmēmo aquïmo inte ōnonque cætabopa, ante mäninonque ante botö nāmā waa ate bai apænecæboïmpa. ⁶ Waa cægaboïmpa, ante tedebo ïinque botö wīi ocai ōmæcabo inte edæ tedebaïmpa. ïñæmpa nāwangā waa cægāimo ïñōmo inte botö nō ante edæ tedebaïmpa. Incæte botö wædænque apænēte pōnōmenque cæyōmote æcāmenque incæ, Pabodo godōmenque waa pōnï cæcampa, ante ānāmaï incæcāïmpa, ante wææ cædinque botö waa cægāinō ante tededāmaï inte edæ pæ wēēnebopa.

⁷ Wængonguï mā nānō odōmongāinō æbānō waa pōnï ingatei, ante wadāni adāmaï ïñōnāni botö adoboque atabopa. ïinque, Pabodo, Botö adoboque nē agāimo ïmopa, ante nāmā waa adāmaï incæcāïmpa, ante wææ cædinque Wængonguï angā ate Tatāna botö ïmote pōnō da boo codongate oca oca coingā bai cæcā wætabopa. ⁸ Mänömaï cæcā wædinque botö mepmoga go adopouque Wængonguï Awēnē ingante apænēdinque, Botö daa cogate bai wæyōmote o tongaate bai cæbi quēwēmo, ante nanguï ante wætabopa. ⁹ Ca wæyōmote mōnō Awēnē wæætē, “Nē aquï pōnï ïnāni ïñōnānite botö tæi piñæmāmo eyepæ pōnï pōnōmo æninque tōmēnānique wæætē tæi piñænte entawencædānïmpa. ïinque bitō nē aquïmi ïmi beyænque botö waadete pōnō cædö ïñōmō edæ eyepæ pōnï ïmpa.”

ïinque mōnō Codito nānō tæi piñænte cæpāmo æente entawencæte ante cædinque botö ïñōmō edæ, Nāmā aquïmo inte botö wædinō beyæ ante botö nāmā waa ate tobopa, ante tededinque godōmenque tocæboïmpa. ¹⁰ Æyedēnō aquïmo ïmōi māniñedē edæ tæi ewocaboïmpa. Mänömaï beyæ aquïmo inte botö Codito beyænque nanguï tobopa. Badete tote piñte cædāni wæbo incæte botö piyænē cædinque tobopa. Ancaa nanguï caate wædinque nangæ babo incæ, togænte pānāni wæbo incæ, Ædö cæte quēwenguïmo, ante wæbo incæ māniñō tōmāā beyæ wædōmo inte botö Codito beyænque ante piyænē cæte nanguï tobopa.

Coodintoidi æbāmē cædāni, ante wæbopa, Pabodo angā

¹¹ Ocai ōmædæcacā ingā bai Pabodo ōnonque tedete yewæmongampa, ante pōnēmīnitawo. ïñæmpa tōmēniñi botö beyæ wææ apænēdāmaï ïmīni beyænque botö tōmēmo nāmā wææ cæcæte ante

cædinque mǎnōmaī tedete yewæmōmopa. Wadāni nē gode ānāni guiquēnē nāmā nāni waa acabo inānīpa. Incæte tōmēnāni nāwangā nānānāni ināni ininque botō iñōmō dicæ wædāmo imogaa. Ininque munitō tōmēmīni, Pabodo waa cæci ingampa, ante tedequēnēmīni iminīpa tōō.

¹² Wacā munitō weca pōninque æbānō cæcā ate munitō, Iingā iñōmō mōnō Codito nānō nē da godongaingā ingampa, ante ēñēmīnīi. Iīmaī impa. Tōmengā, Ēñencæmīnīpa, ante mā pōnī cæcā ate do ēñēmīnīpa. Tōmengā bamōnengæ nanguī odōmongā ate ēñēmīnīpa. Wadāni cædāmaī iñōnāni tōmengā tæī piñænte cæcā ate wædinque munitō wæætē edæ, Codito nānō nē da godongaingā ingampa, ante do ēñēmīnīpa. Ininque botō munitō weca quēwēnīnque edæ Codito nānō nē da godongaingā mā cæte nāni odōmōnī baī adobaī odōmōnīnque edæ wæntædāmaī inte ee cæbo abaiīmīnīpa.

¹³ Ininque wadāni Codito ingante nāni godongāmæ pōnencabo inānīte waa cædinque botō munitō imīnite dicæ pōnōmenque cætabogaa. Wabānō munitō imīnite, Pōnōmīni æmoedāni, ante ānāmaī inte botō munitō imīnite wīwa cæboþææ.

¹⁴ Botō do munitō weca mempoga pōnīmo inte nōwo wæætē poncæ cæbopa. Pōninque botō munitō mǎincoo ante ānāmaī incæboimpā. Wæætē, Munitō botō wēmīni bacæmīnīpa, ante cæbopa. Wēñænāni tōmēnāni mæmpoidi beyæ ante dicæ godonguēnēnāni inānīyaa. Wæætē edæ mæmpoidi iñōmō wēñænāni beyæ ante nē godonguēnēnāni inānīpa. ¹⁵ Ininque, Munitō quēwencæmīnīpa, ante botō mǎincoo tōmancoo godōninque waa tocæboimpā. Ayæ, Munitō quēwencæmīnīpa, ante cæte wæmo ininque waa tobaīmopa. Botō mǎnōmaī munitō imīnite gomonga waadete pōnēmo ininque munitō wæætē botō imote pōnōmenque waadete pōnēmīni imīnitawo.

¹⁶ Incæte edæ idæwaa āmopa. Munitō mǎincoo ante botō ānāmaī intabopa. Incæte munitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædo. ¹⁷ Wadāni inānīte munitō weca da godōninque botō awēmō æntawo, ante pōnēmīnitawo. ¹⁸ Tito ingante, Coodintoidi weca ate pōe, nanguī āninque botō wacā mōnō tōniñacā tōnō tōmengā tōnō da godōmo guēa godatapa. Ininque Tito munitō weca pōninque dicæ wīwa cædinque mǎincoo o ængantawogaa. Iñæmpa tōmengā tōnō botō guēa āawocaque baī ēwocamōna inte mōnatō guēa cægōmōna adinque munitō adāmaī inte baī tedewēmīni awædo.

¹⁹ Munitō, Pabodoidi nāmā wææ cæcæte ante apænedānīpa, ante pōnēmīni awædo.

Iñæmpa mōnō Codito nempo quēwēnōmo inte mōnitō Wængonguī ayongante apænetamōnīpa. Edæ, Botō nē waademīni imīni inte munitō tæī piñænte bacæmīnīpa, ante cædinque mōnitō mǎnōmaīnō ante apænetamōnīpa. ²⁰ Botō iñōmō edæ munitō waa cæmīni acæte ante ponte ayōmo munitō wadō cæmīni baī botō nanguī wæcædoimoimpā, ante guīfēnte wæbopa. Ayæ munitō wæætē, Pabodo waa cæcæte ante pongampa, ante pōnēñōmīni botō wadō cæbo baī munitō nanguī wæcædoimīnīpa, ante pōnente wædinque botō, Mōnō mǎnōmaī wædāmaī ingæimpā, ante wææ cæcæte ante cæbopa. Edæ munitō wæætēdo wæætē piinte amīnitawo. Wacā ingante waa cædāni wædinque munitō godō piinte amīnitawo. Iñontobæ ænguī bamīnitawo. Nāmanque pōnente cæmīnitawo. Wacā ingante piīninque godō babæ ante tedewēmīnitawo. Godō wæntaa wæntaa āmīnitawo. Nāmā waa adinque cæmīnitawo. Wīi ēñēnte cædinque munitō Yæ yæ tedemīnitawo. Mānīnō tōmānō wabānō cæmīnīi, ante guīfēnte wædinque botō mǎnōmaīnō ante edæ yewæmontabopa.

²¹ Ininque botō ponte ayōmo pancamīniya wēēnēñedē mīni cægā baī nōwo adobaī cæmīni adinque botō guingo imonte wæcōnguēnēmo ante awædo. Edæ pancamīniya wēēnēñedē wentamō mīni mongæñō ee mongæmīni adinque botō Ca ca wæbaīmopa. Wēēnēñedē mīni godō towengainō ayæ towēmīni intawo. Wēēnēñedē ēñēnāmaī inte mīni wīwa cædinō ayæ cæmīni intawo. Edæ wentamō mongæmīni inte guingo imōnāmaī imīni inte pancamīniya Wængonguī gāmæñō ocæ ēmænte pōnāmaī imīnīpa, ante guīfēnte wæbopa.

13

Idæwaa māninque yewæmōmopa, ante

¹ Botō munitō weca mempoga do pongaimo inte nōwo wæætē poncæ cæbopa. Iīmaī ante do yewæmongatimpā. Nō nō æbānō cætimpā, ante ēñencæte ante waoda mēnaa incæ mengāa go adocanque incæ nē adināni inte adodō ante apænedāni ēñēninque do apænte angæimpā, ante nāni yewæmongainō ante ēñēninque cæcæboimpā. ² Wēēnēñedē wēnæ cædināni tōnō wadāni tōmānāni inānīte botō munitō weca doyedē pōninque, Amo ēñēdāni, ante wææ āninque nōwo wæætē wayōmō ongōninque adodō ante wææ ante yewæmōmopa. Ayæ ate wæætē munitō weca ponte ongōninque tōmanga apænte āninque adodāni inānīte ata cæpodāmaī incæboimpā.

³ Pabodo wabānō mōnō Codito tōnō godongāmæ cæte apænecāā, ante

wæmīnitawo. Mānīnō ante mīni wædō ante edæ, Nāwangā impa, ante odōmoncæte ante botō mānōmaī apænte ancæboimpa. Mōnō Codito incæ botō tōnō godongāmæ nē cædongā īñōmō tōmengā īñōmō aquīngā īnāmaī inte mīnitō īmōnite apænte angā abaimīnīpa. Tōmengā īñōmō nanguī tæī pīñænongā inte mīnitō weca cæcā apa ānewēmīnī. ⁴ Nāwangā impa. Mōnō Codito adocā incæ aquīngā baī inte cæyongante waodāni wæætē hænquedīmæ cæte māo timpodāni wængacāimpa. Incæte Wængonguī nānō tæī pīñænō beyænque adocā hāni ōmæmonte quēwengampa. Mōnitō adobai tōmengā nempo quēwēnīnque aquīmōni inte edæ Wængonguī nānō tæī pīñænō beyænque mōnō Codito tōnō godongāmæ quēwēnīnque mīnitō beyæ ante cæquīmōni īmōnīpa.

⁵ Mīnitō tōmēmīni īñōmō, Æbānō wede pōnēmo īmoo, ante nāmā waa aedāni. Mīni cædinō adīnque, Æbānō nōingā cæbo īmoo, ante aedāni. Īñæmpa, Itota Codito ingante entawēmōmpa, ante ēñēnāmaī īmīnitawo. Wabānō mīnitō pancamīniya nāmā adīnque, Botō nōingā cædāmaīmo inte edæ wede pōnēnāmaīmo inte awædō, ante ēñencæte ante aquēnēmīni īmīnīpa. ⁶ Ayæ nāmā mīni a baī mōnitō īmōnite adobai apænte adīnque mīnitō, Pabodoidi guiquēnē nōingā cædōnāni inte nē wede pōnēnāni īnānīpa, ante edonque amīni waa tobaīmōpa. ⁷ Mīnitō beyæ ante mōnitō Wængonguī ingante apænedīnque, Coodintoidi cōwē wēnæ wēnæ cædāmaī incædānīmpa, ante apænemōnīpa. Incæte mōnitō, Mīnitō wēnæ wēnæ cædāmaī īmīni ate wadāni, Pabodoidi ædæmō cædāni beyænque impa, ante mōnitō īmōnite waa acædānīmpa, ante wīī cæmōnīpa. Wæætē wadāni, Pabodoidi wīī eyepæ cædānīpa, ante pīinte ānāni incæte mīnitō wæætē nōingā cæcæmīnīmpa, ante mōnitō mānīnonque ante cōwē cæmōnīpa.

⁸ Edæ Wængonguī nōingā nānō ānō ante nē cæmōni inte mōnitō adodē ante ædō cæte wido cæquīmōnī. ⁹ Īnīnque mōnitō æyedēmē aquīmōni īñōmōni mīnitō wæætē tæī pīñænte cæmīni adīnque mōnitō nanguī tomōnīpa. Mīnitō beyæ edæ Wængonguī ingante apænedīnque mōnitō, Coodintoidi eyepæ entawēnīnque picænāni baī nō cæcædānīmpa, ante apænemōnīpa. ¹⁰ Botō īmote apænedīnque Wængonguī, Bitō wadāni īnānite bæ tadāmaī inte tæī mænonte baī pōnō cæcæbiīmpa, ante pōnō cæcā ate botō tæī pīñæmo badīnque nē āmo batabōpa. Nē āmo īmo incæte botō mīnitō weca ponte ayōmo wīwa cæmīni adīnque pīinte panguēnēmo īnāmaī incæboimpa, ante wææ cædinque botō hōwo wayōmō quēwēnīnque, Nāmā apænte æedāni, ante wææ yewæmōmōpa.

¹¹ Īñānāni, mānīnque ante hōwo yewæmōmōpa. Mīnitō eyepæ entawēnīnque, Mōnō picænāni baī badīnque nō cæcæīmpa, ante nanguī cæedāni, āmōpa. Wæntædāmaī inte tæī pīñænte cæedāni. Mīni cabo incæ adoyōmō pōnēnīnque gānē pōnente quēwēedāni. Wængonguī incæ nē Waadecā inte nē gānē entawengā inte mīnitō tōnō cōwē quēwēncæcāimpa, āmōpa. ¹² Mīni cabo incæ godongāmæ pō bee tēnīnque waadete pōnente waa apænedāni. ¹³ Wængonguī quīnāni eyequeī quēwēnāni īñōmō, Mīnitō waa quēwēncæmīnīmpa, ante apænedāni ēñente yewæmōmōpa.

¹⁴ Mīnitō tōmāmīni mōnō Awēnē Itota Codito waadete nānō pōnō cægāinō ante entawencæmīnīmpa, āmōpa. Mæmpo Wængonguī tōmengā nānō waadete pōnēnō ante entawencæmīnīmpa, āmōpa. Wængonguī Tæiyæ Waēmō Ōnōwoca tōnō āawocaque baī ēwocadīnque tōmāmīni godongāmæ waa quēwēncæmīnīmpa, ante botō Pabodobo mānīnque ante yewæmōmōpa.

Gadataidi inānite Pabodo nānō cadota ante yewæmongainta

*Gadataidi inānite Pabodo, Waa
quēwēedāni, angampa*

¹ Botō Pabodobo inōmo inte, Minitō acæwēminpa, ante yewæmōmopa. Mæmpo Wængongui incæ Itota Codito ingante, Nāni ōmæmōe, angā nāni ōmæmongacāimpa. Mæmpocā inōmō Itota Codito tōnō guēa cædinque botō imote da godonga gotabopa. Inique botō dicæ waodānique ānāni ēñente gotabogaa. Botō imote edæ dicæ waocanque da godongā gotabogaa. ² Minitō Gadatiabæ wayōmō wacabo wayōmō wacabo quēwēmini inte Codito ingante mīni godongāmæ pōnencabo inōmīni inte edæ ēñencæmīnīpa, ante mōnitō mōni pōnencabo tōmāmōni iūmaī ante apænemōnīpa.

³ Wængongui mōnō Mæmpo tōnō mōnō Awēnē Itota Codito godongāmæ pōnō waadete cæda ate mīnitō gānē pōnente waa quēwēncæmīnīpa, āmōnīpa. ⁴ Adocā mōnō Mæmpo Wængongui inōmō, Minitō pedænguipogaque wīwa cæte mīni wæwēñōmō edæ abæ tawænte ponte baī botō gāmænō ponte quēwēedāni, angampa. Inique, Wængongui nānō angainō baī cæcæmīnīpa, ante cædinque mōnō Awēnē Itota Codito mōnō imonte ō æncæte ante cægacāimpa. Mīni wēnæ wēnæ cæpāmo mongæncæboimpa, ante tōmengā nāmā wepæ pædæ godonte baī cædinque pōnō ængā beyænque mōnō wæætē quēwēmōmopa. ⁵ Edæ pedænguipoga iñonte mīnguipoga bayonte edæ, Mānōmaī bacæimpa, ante nē angaingā inongā inte mōnō Mæmpo Wængongui inōmō edæ cōwē nāō apāite baī waēmō pōni ēmōnongā ingānō anguēnē. Mānōmaī impa, ante botō, Amēē, āmopa.

*Codito ingantedō ante watapæ
ēñengæimpa*

⁶ Minitō inōmō æbāmē pōni cæmīni awædō. Mōnō Codito waadete pōnō cæcā beyænque mīnitō Wængongui āñecā pōmīnitawo. Nōwo guiquēnē nē āñecā inongante quimæ panguiamæ gomīnīi. Wadāni, Quēwēngui taadō wadō inōmopa, ante tededāni ēñēninque mīnitō do Ao ānewēmīni awædō. ⁷ Inæmpa wadō incæ wīi quēwēnguinō inōmopa. Wæætē edæ, Minitō oda cæcæmīnīpa, ante cædinque wadāni pancadāniya, Codito ingantedō ante watapæ mōni apænēdō ante edæ, Idiquibæ bacæimpa, ante cædāni apa ēñēwēmīni.

⁸ Mōnitō Codito ingantedō ante watapæ apænemōni ēñēmīnitapa. Incæte mōnitō

adomōni incæ wadō ante apænemōni baī Wængongui wæætē pōnō piinte apænte angā wæquimōnidō anguēnē. Ayæ adobaī Wængongui anquedo incæ ōōnædē owo-dinque wæætē pōninque wadō ante apænecā baī Wængongui tōmengā ingante wæætē godō piinte apænte angā wæquingānō anguēnē. ⁹ Edæ doyedē mōni ānīnō baī botō nōwo wæætē adodō ante āmopa. Codito ingantedō ante watapæ apænemōni ēñēninque mīnitō Ao āmīnitawo. Inique mānīnō ante æcāmenque pōnēnāmaī inte wadō ante apænecā ēñēninque Wængongui tōmengā ingante wæætē godō piinte apænte angā wæquingānō anguēnē.

¹⁰ Botō dicæ, Minitō waomīnique botō imote Ao ancæmīnīpa, ante apænebogaa. Wængonguinque, Ao ancæcāimpa, ante apænebo aedāni. Ayæ, Waomīnique tocæmīnīpa, ante dicæ cæbogaa. Waomīnique tocæmīnīpa, ante cæbo inte baī edæ Codito ingante nē cædōmo ināmaī incædōmoimpa.

*Pabodo Wængonguinque da godongā
gotabopa, angampa*

¹¹ Botō tōniñamīni ēñēedāni. Codito ingantedō ante watapæ botō apænēdō inōmō edæ wīi waodānique nāni mā pōnengainō impa, ante āmo ēñēedāni. ¹² Mānīnō ante waocanque dicæ pōnō apænecā ēñente æntabogaa. Waocanque dicæ odōmōnte apænecā ēñēninque apænetabogaa. Wæætē Itota Codito edonque odōmōnte apænecā ēñēninque botō nē æmo inte adodō ante apænebopa.

¹³ Oodeobo inōmō inte botō inōmō edæ mōni oodeocabo pōnengainō ante wēēnēñedē mānīnōnque ante ēñēninque quēwēngaboī aedāni. Botō māniñedē edæ Codito ingante nāni godongāmæ pōnencabo inānite wido cæcæte ante cædinque anca togænte edæ nangui pōni pāmo wægadānīpa, ante do ēñēmīnīpa. ¹⁴ Ayæ botō tōnō guēa pægānāni incæ nangui ināni guiquēnē mōni oodeocabo mōni ēñengainō ante wædænque ēñente cæyōnāni botō inōmō godōmenque nangui pōni ēñente cægaboimpa. Edæ mōnitō mæmæidi nāni odōmōnte angainō ante botō, Mōnō Ao ante adodō ēñente cæte quēwēngæimpa, ante nangui cæbo ingaboimpa.

¹⁵ Incæte botō badā cæncadē ongōñōmote Wængongui. Botō beyæ cæcæcæbiimpa, ānīnque edæ māniñedē botō imote apænte ængaingā inte nōwo botō imote pōnō waadedinque āñecantapa. Ayæ nōwo pōni tōmengā nāmā nānō pōnēnō ante cæte todinque edæ, ¹⁶ botō imote pōnō angantapa. Bitō oodeoidi ināmaī ināni inānite apænebi ēñēninque tōmēnāni botō Wēngā ingante edonque ate baī ēwocæcædānīpa, ante tāno botō

imote edonque odömongä adinque botö tömengä Wengä ingante do ewocabo inte apænebo eñenänitapa. İnıneque botö waocä ingante, Æbänö cæquımo, ante edæ änämaı intabopa. ¹⁷ Botö imote da godongä ate botö Codito täno nänö nê da godongainäni inänite apæneceate ante Eedotadêe iñömö æidämaı intabopa. Wæætê edæ wadæ godinque botö wayömö Adabiabæ do godinque ayæ ate Daämaco iñömö ocæ emænte gotabopa.

¹⁸ Ayæ wadepo mênepoga go adodepoque iınque go ate botö Pegodo weca mä eñacæte ante Eedotadêe æidinque mäa Wængongui itadê tömengä weca quëwentabopa. ¹⁹ Ayæ wadäni İtota nänö nê da godongainäni iñönänite botö adocanque ingante mönö Awênê İtota biwi Tantiago ingante adinque wadäni inänite adämaı intabopa. ²⁰ Mänömaıno ante botö Wængongui ayongä babæ änämaı inte näwangä ante yewæmömö adäni.

²¹ Mänii gote eñate ate botö Tidiabæ godinque godömenque Tiditiabæ gotabopa.

²² İnıneque Oodeabæ quëwente Codito ingante näni godongämæ pönencabo mönö Codito nempo nê quëwänäni iñömö botö awınca cöwê adämaı inäni inte önöwêneneque pönengadänimpa. ²³ Tömênäni iñömö iımaıno ante önömoncaque eñengadänimpa. “Wëenêñedê mönö imonte nê togænte pangaingä iñömö mönö pönente quëwenguıne ante, Mänıne ante wido cæcæimpa, angantawo. Nöwo guiquênê tömengä, Wido cæquıne, ante nänö angaine incæ adode ante edæ watapæ apæneca eñenänipa,” ante tededäni eñengadänimpa. ²⁴ İnıneque, Pabodo nöwo waa cæcampa, ante adinque tömênäni Wængongui ingante apænedinque, Bitö waëmö pönı emönöni inte nê waa cæbi iımpa, ante watapæ apænegadänimpa.

2

İtota nänö nê da godongainäni Pabodo ingante Ao änäni

¹ Ayæ mänii pö godinque iıncayæ ate catodote wadepo go ate botö Bedênabee tönö Eedotadêe iñömö adodö æidinque Tito ingante mäömöna gocantapa. ² Wængongui do botö imote apænete bai edonque odömongä adinque botö Eedotadêe iñömö æidinque iımaı ante apænetabopa. Botö iñömö oodeoidi inämaı inäni weca godinque, Codito ingantedö ante cöwê watapæ apænebopa, ante botö iñænænänique inänite awëmö apænebo eñenänitapa. Mänömaı cædinque botö, Æbänö cæboı, ante adodö adodö ante apænebo eñenıneque tömênäni pıınämaı incædänimpa, ante cætabopa.

³ Ayæ, Botö tönö guëa pönıngä Tito ingante adinque pancadäniya, İngä iñömö Guidiego inongä iñongante ämıni êö togæncædänimpa,

ante piınte änäni incæte nê änäni guiquênê, Êö togæedäni, ante änämaı änänitapa. ⁴ Êö togængæimpa, ante nê piınte änäni näni wææ angainö ante mönitö iñömö Codito İtota gä pe æempote æængä beyænque abæ tawænte ee gote bai quëwëmönıpa. Mänömaı iñömönte pancadäniya, Æbänö quëwänänii, ante edæ awëmö acæte ante cædinque edæ, Mönö caıpæ imopma, ante bai babæ cædinque mönitö weca pönäni wætämönıpa. Ayæ edæ mönitö tömênäni näni wææ änö beyænque nê cæte quëwëmönı bacæmönımpa, ante cædinque tömênäni godömenque, Cæedäni cæedäni, ante wææ änewênäni wætämönıpa. ⁵ Incæte edæ, Mönö Codito ingantedö ante watapæ möni apænedö näwangä ante impa, ante mınitö oda cædämaı incæmınımpa, ante wææ cædinque mönitö wantæ iñö incæ nê wææ änewênäni inänite eñente cædämaı intämönıpa.

⁶ Nænænäni inänıpa, ante wadäni näni nê waa adönäni iñömö æbamê emönänii, ante botö iñömö edæ wædämaı imopa. Edæ Wængongui incæ waocä ingante apænte acæte ante cædinque adämaı ingampa. Mımönöque acampa. İnıneque botö idæwaa apænebo ate iınäni incæ ædö cæte godömenque apænequinäni. ⁷ İñæmpa iınäni incæ edæ do eñenänitapa. Pegodo ingante mönö Awênê incæ pönö angä ate tömengä oodeoidi inänite mönö Awênê ingantedö ante nê watapæ apæneca ingampa. Botö imote adobai mönö Awênê incæ pönö angä ate botö wæætê oodeoidi inämaı inäni inänite nê apænebo imopa. İnıneque botö mänömaıno ante apænebo ate nê änäni iñömö, Pegodo cæcä bai Pabodo adobai cæcampa, ante do eñenänitapa. ⁸ Pegodo oodeoidi weca gote cæyongante Wængongui tömengä tönö godongämæ cæcä bai botö guiquênê oodeoidi inämaı inäni weca edæ gote cæyömete adocä incæ botö tönö adobai edæ godongämæ cæcampa, ante do eñenänitapa.

⁹ Tantiago, Pegodo, Wäö iñömö nê tæi emönäni inänıpa, ante adinque wadäni, Gönönıwæ onguıtanca bai inänıpa, ante apænedänıpa. İnıneque botö apænebo eñenıneque mänınäni, Onguıtancaıdi, näni änäni iñömö edæ, Pabodo ingante Wængongui mänömaı pönö waadete cæcampa, ante adinque botö imote ayæ Bedênabee ingante, Mönitö tönıñamına imınıpa, ante tömëmæ inö pædæ pompote bæi ongompodänıpa. Ayæ, Mönitö oodeoidi weca gote apæneyömönı mönitö wæætê oodeoidi inämaı inäni weca gote apæneceamınımpa, ante godongämæ Ao änänitapa. ¹⁰ Ayæ, Mınitö nê ömaadäni inte wædäni inänite ante cöwê pönenıneque waa

cæcæmīnīmpa, ānīnque mānīnque ante wææ ānānītaþa. Mānīnō nānī ānīnō incæ botō cōwē pōnēnīnque edæ nanguī cæīnente wæþo īntabopa.

Pegodo ingante Pabodo angā wæcampa

11 Ayæ Pegodo Antioquiya īñōmō pōnīnque wīī nō cæcā adīnque botō tōmengā awīnca waa adīnque, Bitō pante wæquinque wēnæ wēnæ cæbi īmpa, āmo wæcantapa. 12 Īīmaī edæ Pegodo cæcā īnongāīmpa. Tæcæ Antioquiya pōnīnque tōmengā oodeoidi īnāmaī īnānī weca wæætē wæætē pō guīī pō guīī ongōnīnque godongāmæ cænongāīmpa. Incæte Tantiago nāmō da pōnōnīnānī pōnānī ate Pegodo īñōmō edæ, Mōnō ēō togængæīmpa, ante nē ānōnānī pīīnānī wæcæ wæ, ante guīīnēngā īnte edæ oodeoidi īnāmaī īnānī weca nōwo cænāmaī īnte edæ gomonga gote cænongāīmpa. 13 Mānōmaī wadonque cædingā īnte nōwo wadonque cæyongante tōmengā tōnō oodeoidi tōmānānī wadonque cædīnānī īnte edæ nōwo wæætē wadonque cædānīpa, ante adīnque Bedēnabee incæ oda cæte wapitīcæ cæcantapa.

14 Īnīnque edæ Codito īngantedō ante wat-apæ mōnō ēñēnō nō pōnī ī incæte tōmēnānī nō cædāmaī īnte wapitīcæ cædānīpa, ante adīnque botō tōmānānī ayōnānī edæ Pegodo īngante īīmaī ante āmo wæcantapa. “Bitō īñōmō oodeobi īnōmī īnte edæ oodeo īnāmaī īnānī baī nīmpo cæte quēwēnīnque edæ wīī oodeoidi nānī wææ angainō ante ēñente quēwēmīpa. Incæte bitō, Oodeo īnāmaī īnānī incæ oodeoidi nānī wææ angainō ante ēñente quēwēncædānīmpa, ante quīmæ wææ ānēwēmīi,” āmo wæcantapa.

Mōnō pōnēnō beyænque mōnō tōmāmō quēwēmōmpa

15 Oodeoidi īnāmaī īnānī nānī ēñēnāmaī quēwēncabo baī īnāmaī īmōnī īnte mōnītō īñōmō edæ oodeomōnī nē ēñagāīmōnī īmōnīpa. 16 Incæte edæ īīmaī ante do ēñēmōnīpa. Īīmaī cæedānī, ante Mōītee wodi nānō wææ angainō ante ēñente cæcā beyænque waocā dicæ Wængonguī ayongā edæ nō cæcā baquīngāā. Wæætē Itota Codito īngante wede nānō pōnēnō beyænque waocā nō cæcā bacampa, ante mōnītō do ēñēmōnīpa. Īnīnque, Waocā æcāmenque incæ mānīnō Mōītee wodi nānō wææ angainō ante tōmengā nānō ēñente cædō beyænque edæ nō cæcā badāmaī incæcāīmpa, ante do ēñēmōnī īnte mōnītō adobaī, Ædō cæte mānīnō beyænque nō cæmōnī baquīmōnī, ante ēñēmōnīpa. Wæætē, Codito īngante mōnī wede pōnēnō beyænque nō cæmōnī bacæte ante mōnītō adobaī tōmengā īngante wede pōnēmōnīpa.

17 Īnīnque mōnītō oodeoidi īmōnī īñōmō, Mōnō Codito nempo quēwēnīnque Wængonguī ayongā mōnō nō cæmō bacæīmpa, ante cæmōnīpa. Mānōmaīnō ante cædīnque mōnītō nē wēnæ wēnæ cæmōnī īnte wæmōnī incæte dicæ Codito angā beyæ wēnæ wēnæ cætamōnīyaa. 18 Mānīnō Mōītee wodi nānō wææ angainō ante ēñente cæte quēwēngæīmpa, ante botō pōnēngainō ante do wido cægaboīmpa. Mānōmaīnō ante botō pōnēngainō ante nē wido cægāīmo īnte botō ædō cæte wæætē adodō ænte baī cædīnque, Mānīnō ante ēñente mōnō quēwēngæīmpa, ante anguīmoo. Mānōmaīnō ante āmo īnte baī botō Wængonguī nānō wææ angainō ante edæ nē ēñēnāmaī īmo bacædōmoīmpa. 19 Edæ, Wængonguī nānō wææ angainō ante ædō cæte tōmānō ante ēñente cæquīmoo, ante botō wædō beyænque nē wæwocāīmo bagaboīmpa. Īnīnque botō nē wæwocagāīmo īnōmo īnte mānīne ante ēñente cæcæte ante quīnante wæquīmoo. Wæætē edæ Wængonguī beyænque ante botō quēwēngūnīnque īmpa.

20 Mōnō Codito īngante awāa tīmpodānī wæñongante botō tōmengā nō godongāmæ wænte baī bagaboīmpa. Īnīnque botō baonga ēñate quēwēmō incæte botō wīī tōmēmō quēwēngūīmāmo ēwocate quēwēmōpa. Wæætē Codito nānō quēwēngūīmāmo ēwocate quēwēmōpa. Īnīnque adocā Codito Wængonguī Wēngā botō īmote waadete pōnēnīnque nāmā tōmengā wēpæ ante, Wængonguī quī, ante botō beyæ pædæ godongā adīnque botō baō ēñate quēwēnīnque tōmengā īngante wede pōnēnīnque quēwēmōpa. 21 Īnīnque, Īīmaī cæedānī, ante Mōītee wodi nānō wææ angainō ante ēñente cædīnque mānōmaīnō cæmō beyænque nā mānōngate nō entawēmō bamō baī mōnō Codito ōnonque pōnī wæncægacāīmpa. Mānōmaī beyæ Wængonguī nānō pōnō waadete cægāīnō ante botō Ao ante ō ænīnque cōwē wido cædāmaī īmpa.

3

Mōnō pōnēnō beyænque mōnō quēwēngæīmpa, ante

1 Gadataidi ōnonque pōnī mīnī cæcabo īnōmīnī īnte ēñēedānī. Æcānō wadō ante apæneccā ēñēnīnque mīnītō dowænte baī ōnonque tedewēmīnīpa. Īñæmpa botō doyedē, Itota īngante æbānō awāa tīmpodānī wængacāī, ante botō edonque pōnī odōmonte apænebo ēñēnīnque mīnītō ōnōwēnenque ante baī do pōnēmīnītaþa. 2 Adodeque āmo ate apænenmīnī ēñēmoedānī. Mīnītō Wængonguī Ōnōwoca īngante æbānō cæte æmīnīi. Mōītee wodi wææ nānō angainō ante ēñente mīnī cædō beyæ mīnītō

tömengä ingante æmīnitawogaa. Wæætē edæ mōnitō apænemōni ēñēninque wede pōnēmīni inte æmīnitawo.

³ Īnæmpa mīmō ōmædē ĩmīni inte ēñēnāmai incædō. Mīnitō wēēñēdē mā pōni pōnēninque Wængongui Ōnōwoca tōnō nē cægāimīni inte ĩfōwo wæætē edæ ōmæwocamīni inte bai edæ baonga ēñādinque nāmanque cædinque ĩnque cæmīni. ⁴ Wængongui nangui pōni pōnō cæcā caate wædinque mīnitō ōnonque beŷæ caate wæmīnitawo. Tömengä dicæ ōnonquedō ante cæcæte ante pōnō cæcā wæmīniyaa. ⁵ Wængongui tömengä Ōnōwoca ingante da pōnōninque mīnitō weca bamōnengæ pōni cæcampa. Quinante mānōmai cæcā. Edæ, Mōitee wodi nānō wææ angaiñō ante ēñente mīni cædō beŷæ ante dicæ cæcā. Wæætē mōnitō apænemōni mīni ēñente pōnēnō beŷæ Wængongui tömengä Ōnōwoca ingante da pōnōninque mīnitō weca bamōnengæ pōni pōnō cæcā æmīnīpa.

⁶ Wængongui apænecā ēñēninque Abadāō wodi, Nōingā ante apænecampa, ante wede pōnengacāimpa. Īnque tömengä wede nānō pōnēnō beyænque Wængongui, Botō ayōmo Abadāō ĩñōmō nē nō cæte quēwēnongā ingampa, angacāimpa, ante quēwēnongā ingampa. ⁷ Mānōmainō ante adinque mīnitō ĩmai ante ēñēdāni. Mōnō nē wede pōnēnō ĩñōmō Abadāō wodi pæīmō bai adomō ĩmōmpa, ante ēñente pōñēdāni. ⁸ Wængongui, Oodeoidi ĩnāmai ĩnāni incæ wede nāni pōnēnō beyænque botō ayōmo edæ nē nō cæte quēwēnāni bacædānīpa, ante badoncæcāimpa, ante dodāni edonque adinque Wængongui beŷæ yewæmongadānīpa. Ayæ Abadāō wodi ingante apænedinque tömengä, “Botō bitō ĩmite pōnō waa pōni cæbo æmi ĩnque bitō beyænque wadāni nāni cabo wadāni nāni cabo tōmancabodāniya edæ watapæ quēwēngūñānidō anguēñē,” ante apænecāimpa. Mānōmai ĩmpa, ante yewæmōninque dodāni wēēñēdē pōni Wængongui waa pōni nānō cæquīñō ante yewæmongadānīpa. ⁹ Abadāō wodi cōwē ædæmō cæte pōnengāingā ĩñongante Wængongui pōnō waa pōni cægacāimpa. Mōnō nē wede pōnēnō ĩñōmonte tömengä adobai pōnō waa pōni cæcā æninque mōnō ĩñōmō edæ Abadāō wodi tōnō godongāmæ watapæ quēwēmō ĩmōnō anguēñē.

¹⁰ Wæætē edæ, “Wææ ante botō yewæmongainta adinque æcāñō tömānō ante dicæ cæcā tömengä ĩñōmō Wængongui piinte angā wæwocāingā ingāñō anguēñē,” ante Mōitee wodi incæ do yewæmongacāimpa. Īnque Wængongui edæ nānō wææ angaiñō ante waodāni, Botō ēñente cædō beyænque quēwencæboimpa,

ante nē ānewēnāni incæ wīi eyepæ ēñente cædāni ĩñōnāni inte tömēnāni tömānāni ĩnānite Wængongui piinte angā wæwocāināni ĩñānidō anguēñē. ¹¹ Ayæ wacā Wængongui beŷæ yewæmōninque, “Nē nō cæte quēwēnongā incæ tömengä nānō wede pōnēnō beyænque quēwencæcāimpa,” angacāimpa. Īnque ĩmai ante mōnō edonque ēñengæimpa. Mōitee wodi nānō wææ angaiñō ante ēñente cæte beyænque waocā dicæ Wængongui ayongā nē nō cæcā badinque quēwengūngā. ¹² Wængongui nānō wææ angaiñō ante ēñente quēwengæimpa, ante nē cædōnāni ĩñōmō tömēnāni dicæ nāni wede pōnēnō beŷæ quēwēnāniyaa. Wæætē, “Māñinō ante nē ēñente cæcā ĩñōmō tömengä nānō ēñente cædō beyænque quēwencæcāimpa,” ante Mōitee wodi nānō yewæmōni angaiñō bai ĩmpa.

¹³ Ayæ adobai, “Æcāñō ingante awāa wodoncædāni a ongōna tömengä ingante Wængongui piingā wæwocāingā ingāñō anguēñē,” ante Mōitee wodi yewæmongacāimpa. Īnque Wængongui nānō wææ angaiñō ante wīi eyepæ ēñente cæmō beŷæ mōnō wæwocāimō inte wæyōmonte mōnō Codito ĩñōmō, Abæ tawænte gote bai quēwencæmīnīpa, ante cædinque mōnō beŷæ wæætē wæwocāingā badinque edæ awāa wæninque a on-gongacāimpa. ¹⁴ Abadāō wodi ingante Wængongui waa pōni pōnō cægacāimpa. Ayæ, mīnitō oodeoidi ĩnāmai ĩñōmīnite Itota Codito pōnō cæcā beyænque Abadāō tōnō godongāmæ watapæ quēwencæmīnīpa, ante Wængongui adobai pōnō waa cæcampa. Mānōmai bacæimpa, ante cædinque Codito tömāñō ĩmonte, Mīnitō wede pōnēninque botō Ōnōwoca ingante ænte ēwocacæmīnīpa, ante cædinque mōnō ĩmonte æncæte ante nāmā wepæ godonte ængā beyænque quēwēmōmpa.

Wængongui tāno, Cæquīmo, aninque ayæ ate wææ angacāimpa

¹⁵ Botō tōñīñamīni ēñēdāni. Botō, Waomō mōnō cæi bai Wængongui mōnō beŷæ wodo adobai cæcampa, ante odōmoncæte ante ĩmai ante yewæmōmo aedāni. Waoda, Mōna guēa cæcaya ĩmōnāpa, ante Ao āna ate adocanque inte ædō cæte waddō ante cæquēngā. Ayæ, Mōnō godōmenque cæcāimpa, ante waocā adocanque inte ædō cæte edæ ante cæquēngā. Nōwo edæ āmo ēñēdāni. Wængongui, Mōnō godongāmæ cæcabo bacæimpa, ante botō pōnō cæcæboimpa, angā ēñēninque mōnō Ao ante cæquēñēnō ĩñōmō edæ wodo adobai ĩmpa. ¹⁶ Mæmæ Abadāō wodi ingante apænedinque Wængongui, Bitō Pæingā ingante botō cōwē pōnō waa cæcæboimpa,

angacäimpa. Mänömai äninque tömengä Abadäo wodi ingante, “Bitö päinäni,” ante änamai ingacäimpa. Wæætē, “Bitö Pæingä ingante pönö cæcæboimpa,” äninque Abadäo wodi Pæingä adocanque Codito ingante ante pönëninque angacäimpa.

¹⁷ Mänömainö ante apænedinque botö iimainö ante odömoncæte ante apænetabopa. Abadäo wodi ingante Wængongui, Botö pönö cæbo ate minitö Ao ämini ininque mönö godongämæ waa cæcæimpa, ante wëñëñedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, iimai cæedäni, ante pönö wææ ängongäimpa. Ininque Wængongui wantæpiyæ ate wææ äninque do nänö angäine ante wëä godönämai ingacäimpa. Edæ, Cöwë pönö cæcæboimpa, ante doyedë nê angaingä inte tömengä ñowo wææ äninque mänine ante dicæ wëä godongantawogaa. ¹⁸ Möitee wodi nänö wææ angainö ëñente cæmö beyænque mönö ænguëncocoo do æmö bai Wængongui, Cöwë pönö cæcæboimpa, ante önonque ancægacäimpa. Incæte Wængongui pönö waadete cædinque mæmæ Abadäo wodi ingante apænedinque, Cöwë pönömo æncæminimpa, ante nänö angainö bai cædinque do cægacäimpa.

¹⁹ Ininque, Cöwë pönömo æedäni, ante nê angaingä inte Wængongui quinante ñowo wæætē, iimai cæedäni, ante wææ angacäi. Inæmpa tömengä, Minitö botö äno ante ëñëñämai cædinque wënæ wënæ mini cædinö edonque bacæimpa, ante odömoncæte ante wææ angacäimpa. Mänömai cædinque tömengä, Abadäo wodi Pæingä botö nê angaingä incæ tömengä nänö ponganca minitö ëñente cædinque quëwencæminimpa, ante wææ angacäimpa. Mänine nänö wææ angäine ëñente cæcædänimpa, ante Wængongui tömengä anquedoidi inänite da pönongä pöninque tömëñäni Möitee wodi ingante mämö odömönäni agacäimpa. Tömengä inömö tæcæguedë ongonte bai nê anguingä badinque Wængongui nänö angäine ante idægoidi inänite wæætē angä ëñengadänimpa. ²⁰ Nöwo apænebo ëñedäni. Adocanque eyepæ cæcä adinque tömengä beyæ ancæte ante wacä tæcæguedë ongönämai imaingampa. Wængongui inömö, Cöwë pönö cæcæboimpa, nê angaingä inte adocanque incæ eyepæ cædongä ingampa.

İimai cæedäni, ante quinante angacäi, ante

²¹ Ininque Wængongui, Cöwë pönö cæcæboimpa, ante nê angaingä inte wantæpiyæ ate, iimai cæedäni, ante wææ äninque tömengä doyedë nänö angäine dicæ wëä godongantawogaa. Edæ tömengä mönö imonte apænedinque, Botö

wææ angainö beyæ quëwencæminimpa, ante mänine pönongä ænte quëwëmö bai mänine beyænque edæ nê nö quëwëmö bacædömöimpa. Wæætē edæ wii mänömai impa. Wængongui, Cöwë pönö cæcæboimpa, angä ëñëninque mönö quëwënginque edæ nê nö cæmö bamompä. ²² Ininque Wængongui, Cöwë pönömo æncædänimpa, ante nê angaingä inte iimai ante cæcampa. Botö angaincöo ante Itota Codito ingante nê pönëñäni inänite da pönömo ate tömëñäni wede nani pönëñö beyænque ænte ëwocæcædänimpa, ante iimai cæcampa. Tömengä mönö inguipoga tömäo quëwëmö mönö wënæ wënæ cædimämo adinque mönö imonte pönö tee mönete bai cæcä ongömompa. Mänömai pönö cæcä ongongaimö inömonte Wængongui mönö wede pönencabo adomönque inömonte tömengä nänö angaincöo ante pönongä ænte ëwocamompä. Wængongui, Mänömai cæbopa, ante apæñecä ëñëninque yewæmongadänimpa.

²³ Doyedë inömö mönö, Möitee wodi nänö wææ angainö tömänö ante mönö ædö cæte eyepæ cæquii, ante tee mönete bai wægämoimpa. Edæ Itota Codito mönö nê wede pönëñongä edonque pöni nänö ponte a ongonganca mönö tee mönete bai wægämoimpa. ²⁴ Ininque, Minitö Codito ingante wede pönëninque nê nö cæmini bacæminimpa, ante cædinque Wængongui Codito gämæñö töö æmænte bai cædinque wææ angacäimpa. Mänömai i ininque tömengä nänö wææ angainö beyænque mönö wapiticæ godamai inte Codito gämæñö pongamöimpa. ²⁵ Ayæ ñowo inömö, Mönö nê wede pönëñongä do pongäimpa, ante adinque Wængongui ñowo wæætē wææ änamai ingampa.

²⁶ Minitö Itota Codito ingante wede pönëmini inte tömämäni Wængongui wëñæmini iminipa. ²⁷ Edæ tömämäni mönö Codito tönö godongämæ guite bai æpæñë guidinque tömengä nänö ëwocadö adodö ëwocadinque tömengä nempo quëwëminipa. ²⁸ Tömengä nempo adocabomö inömö inte mönö adocanque ingantedö ante apænedinque, Oodeocä ingampa, ante änamai ingæimpa. Ayæ wacä ingantedö ante adobai, Guidiego ingampa, ante änamai ingæimpa. Ayæ, Waocä nänö nê ö æningä inte awënë beyænque cæte nê quëwëngä ingampa, ante mönö änamai ingæimpa. Wacä ingantedö ante, Abæ tawænte gocä ingampa, ante mönö änamai ingæimpa. Ayæ adocanque ingantedö ante, Onguiñængä ingampa, ante mönö änamai inte wacä ingantedö ante adobai edæ, Onquiyængä ingampa, ante änamai ingæimpa. Inæmpa Codito Itota nempo

quëwëningue adocabomö imompa. ²⁹ Ayæ mînitö iñômö Codito nempo quëwëmini inte mæmæ Abadäö wodi pæimîni bai imînipa. Ìnînque Wængonguî nânö, Cöwë pönömo æncæmînimpa, ante nânö angaincoo ante mînitö nê ænguimîni imînipa.

4

¹ Mäninö ante yewæmöninque botö, Wadäni æbänö cædäni, ante odömöninque Ìimai ante apænecæte ante yewæmömopa. Wæmpocä wængä ate tömengä wengä iñômö wæmpocä nânö éadincoo nê ænguingä ingampa. Ìinque wæmpocä ayæ mîngä quëwëngäñedë mänincoo tömancoo do ænte bai tömengä wengä nê éacä ingampa. Incæte tömengä wengä tömancoo nê éacä incæ edæ tömengä wëñængäñedë guiquënë wæmpocä beyænque cæte nê quëwëngä bai ìnongä ingampa. ² Ìinque wæmpocä do äninque, Ìiönæ ìnque bayonte botö wengä do picængä badinque nämä nê angä bacæcäimpa, ante nânö angaiönæ ìnque baganca nê aadäni inänite wæmpocä angä ëñëninque tömënäni wæætë wëñængä ingante wææ aadänipa. Ayæ, Wëñængä nânö manguincoo ante æbänö cæquî, ante nê aadänique änäni ëñente wëñængä incæ cæcampa.

³ Mönö iñômö doyedë mäningä wëñængä bai adobaî picæmö inämaî mönö ingaiñedë inguipogaque nâni wææ angainonque ante ëñente cægamoîmpa. Waocä beyænque cæte nê quëwëngä bai mönö adobaî inguipogaque nâni wææ angainonque ante ëñencæte ante cædinque mäniñö beyænque cæte nê quëwëmö bai inte wægamoîmpa.

⁴ Incæte Mæmpo Wængonguî iñômö, Ìiönæ da pönömo poncæcäimpa, ante doyedë nânö angaiönæ ìnque bayonte tömengä Wengä ingante da pönongä pongacäimpa. Ìingä Wëñængä ingante onquiyængä mangä ëñadinque tömengä Wængonguî nânö wææ angainö ante nê ëñente cæquëwëngä nânö baquinque pægacäimpa. ⁵ Ìinque mönö Môtee wodi nânö wææ angainö beyæ tee mönete bai wæyömonte adocä Wængonguî Wengä incæ, Mînitö abæ tawænte bai picæmîni badinque nâwä wëmîni bate quëwëncæmînimpa, ante mönö ìmote ængä beyænque mönö abæ tawænte bai quëwëmompä. ⁶ Mæmpo Wængonguî iñômö, Mînitö nâwä wëmîni imîni beyæ, ante tömengä Wengä Önöwoca ingante mönonga da pönongantapa. Ìinque tömengä Önöwoca iñômö, “Mæmpo, botö Wæmpo,” ante nê apænecä ìnongä inte mönö mîmönë owodinque adodö ante mönö beyæ apænecampa. ⁷ Ìinque bitö iñômö bitö ìmite nê wææ angaingä beyænque idæwaa

cæte quëwëngäimîni inte ñöwo abæ tawænte bai æmæwo pædimi inte nâwä wëmi inömi imipa. Ayæ nâwä wëmi iñömite Wængonguî pönö cæcä ate bitö tömengä nânö éagaincoo ante nê ænguimîni babipa.

Në pönëmini æbämë cæte quëwëmini, ante wæcampa

⁸ Wængonguîdi inämaî iñönänite wadäni iñômö, Wængonguîdi inänipa, ante babæ apænedänipa. Mînitö wëenëñedë Wængonguî ingante mîni adämaî ìñedë, Wængonguîdi, ante tömënäni babæ ante nâni nê änonäni beyænque cæte nê quëwëmini inte ñæ cæyænte bai wægämînimpa. ⁹ Nöwo iñômö mînitö Wængonguî ingante ate bai nê pönëmini imîni inte ædö cæte wapiticæ ante ëñëmîni. Æ wadö ante godömenque ämo. Wængonguî incæ mînitö iminite do ate pönengaingä ingä incæte mînitö ædö cæte inguipogaque quëwënäni nâni önonquedö ante wææ angainö ante ëñente quëwëmîni. Ìñæmpa, Mänine nâni wææ angainö ante wæætë ëñængäimpa, äninque mîni ñä cæpote wæquinque ämîni awædö. ¹⁰ Edæ Wængonguî änämaî ìñongante mînitö mä pönëninque, Wængonguî beyæ, ante mönö ìiönæ cædämaî inte ongöninque ææmæ cæte becäimpa, änewëmînipa. Ayæ, Ìi apäicä ìñonte adobaî, ìntedæ ìñonte adobaî, ìnepo ìñonte adobaî, Wængonguî beyæ, ante mönö cædämaî inte ææmæ cæte becäimpa, ante önonque pönî ante cæmînipa töö. ¹¹ Ìinque, Mînitö ëñënämaî inte mîni wæquinque cæmînipa, ante adinque botö mînitö beyæ ante guñente wæbopa. Botö pönö nanguî cæbo incæte edæ önonque wabänö cægaboimpa, ante wæbopa.

¹² Botö tönîñamîni ëñëedäni. Botö wëenëñedë mînitö bai Môtee wodi nânö wææ angainö nê cæbo bai inte wæbo amînitawo. Wæætë botö nê wææ angaingä ingante idæwaa ëñente cædinque abæ tawænte gobo bai mînitö adobaî cæmîni waa tobaimopa. Mînitö dicæ botö ìmote wënæ wënæ cæmînitawogaa. ¹³ Wëenëñedë wënæ wënæ mänimo inte botö mänömaî beyæ mînitö weca pöninque mönö Codito ingantedö ante watapæ apænedinque mä apænebo ëñëmînitapa. ¹⁴ Ìinque mänömaî wënæ wënæ bate pömo ate wædimîni incæte mînitö guñëñate wædämaî inte towæ tänongadämaî imînitapa. Wæætë edæ botö ìmote adinque mînitö, Wængonguî anquedo ingampa, ante pönente bai cædinque watapæ todinque, Pöe, ämînitapa. Ayæ edæ, Itota Codito ingampa, ante pönente bai cædinque, Pöe, ämînitapa. ¹⁵ Mînitö mäniñedë watapæ mîni todinö bai ñöwo guiquënë quimæ todämaî imîni. Mînitö mäniñedë edæ eyepæ inte bai nämä

awinca o togæmõninqu botõ imo põno mĩne tĩmoncædõmĩnĩmpa, ante põnẽnĩnqu apænebopa.

16 Iĩnæmpa mĩnitõ imĩnite nãwãgã apænebo beyænqu mĩnitõ nõwo wæætẽ botõ imote piĩte bamĩnitawo. 17 Wadãni iĩõmõ, Mõnitõ gãmæno ponte eĩnẽedãni, ante nangui cædãni iĩõmõ mĩnitõ imĩnite wẽnæ wẽnæ cæcæte ante anewẽnãnipa. Tõmẽnãni iĩõmõ, Pabodoidi inãnite eĩnẽnãmai inte mĩnitõ wæætẽ mõnitõ tõno godongãmæ cædinqu mõnitõ cæinẽnonqu ante amõni eĩnẽnĩnqu cæcæmĩnĩmpa, ante babæ cædãnipa.

18 Wacã nanõ cæinẽnõ ante godongãmæ cæmĩni cõwẽ waa imaiĩmpa. Nãwãgã impa. Incæte tõmẽngã nanõ waa cæquẽnẽnonqu ante cæcã adĩnqu mĩnitõ, Mãnĩnonqu edæ cæcæĩmpa, ante nangui cæquẽnẽmĩni imĩnipa. Ayæ edæ botõ mĩnitõ weca quẽwẽmoyedẽ cæmĩni bai mĩnitõ botõ dæ amõ iĩnẽdẽ cõwẽ adobai cæmĩni waa imaiĩmpa. 19 Botõ wẽmĩni eĩnẽedãni. Yædẽmadã inte nantate wædã bai botõ iĩõmõ wæætẽ nantate wædinqu edæ, Mĩnitõ mĩmõnẽ Codito ingante ædæmõ entawencæmĩnĩmpa, ante nangui põni cædinqu wæbopa. 20 Edæ, Mĩnitõ æbãmẽ cæmĩni, ante eĩnẽnãmai imo inte botõ mĩnitõ weca põnĩnqu wĩ gobæ tedete botõ anõ bai tededĩnqu wæætẽ wadõ bai tedecæte ante põĩnente nangui wæbopa.

Tada wodi tõno tõmẽnã inante nẽ cægaingã Agada

21 Mĩnitõ, Mõitee wodi nanõ wææ angainõ ante mõnõ eĩfengæĩmpa, ante nẽ amĩni inte apænemĩni eĩnẽmoedãni. Mĩnitõ wææ ante tõmẽngã nanõ yewæmongainta incæ adãmai inte eĩnẽnãmai imĩnitawo. 22 Iĩmai ante yewæmongatĩmpa. Abadãõ wodi iĩõmõ wẽnæna onguĩnæna mẽnæa inate tapæĩgacãĩmpa. Adocanqu guiquẽnẽ nanõogængã beyænqu nẽ cæte quẽwẽngã wẽnængã iĩongã wacã guiquẽnẽ nãwã nanõogængã wẽnængã ingacãĩmpa. 23 Nẽ cæte quẽwẽngã wẽnængã guiquẽnẽ cõwẽ mõnõ eĩnadõ bai adobai õnonqu eĩngacãĩmpa. Nãwã nanõogængã wẽnængã guiquẽnẽ Wængongui, Cõwẽ põnõmo æncæbiĩmpa, ante nanõ anĩnõ beyænqu eĩngacãĩmpa.

24 Wængongui iĩõmõ, Botõ põnõ cæbo ate mĩnitõ Ao amĩni iĩnqu mõnõ godongãmæ waa cæcæĩmpa, ante mempoga apænægacãĩmpa. Iĩnqu, Wængongui mẽnæa nanõ apænægainõ æbãnõ inei, ante eĩnecæte ante mõnõ mãnĩna onquĩnæna inate adĩnqu põnengæĩmpa. Wængongui iĩõmõ adopoqu apænecæte ante Tinaiquidi wæænte ongõnĩnqu wææ angacãĩmpa. Mãnĩnequ tõmẽngã nanõ wææ angainẽqu

ante nẽ eĩnente cædãni iĩõmõ Agada wodi wẽnãni mãnĩne beyænqu nẽ cæte quẽwẽnãni bai nãni baquinqu eĩnadãnipa.

25 Mãnĩngã Agada tõmẽngã nãni wencabo iĩõmõ wacã ingante nẽ cædõnãni inte cæningã nã cæyænte bai inte wægadãnipa. Iĩnqu Adabiabæ ongonquidi Tinaiquidi ongõnĩnqu Wængongui wææ angã ate mõnõ iĩõmõ Agada bai wacã ingante nẽ cæmõ bagamõĩmpa. Edæ Agada wodi nãni wencabo wacã beyænqu nẽ cæte quẽwẽnãni inte nãni wægainõ bai nõwo Eedotadẽ quẽwẽnãni adobai wacã beyænqu nẽ cæte quẽwẽnãni bai inõnãni inte wæwente quẽwẽnãnipa. 26 Eedotadẽ inguipoga ongõnõmõ bai mõnõ õonædẽ æite Eedotadẽ bai iĩõmõ ongongæĩmpa. Mãnĩnõmõ Eedotadẽ nãni anõmõ mõnõ badã Tada wodi bai impa. Tada iĩõmõ wĩ wacã ingante nẽ cæcã bai iĩõnante mõnõ tõmẽnã wẽnõ bai imõmpa. 27 Edæ iĩmai ante Wængongui beyæ yewæmongatĩmpa,

“Bitõ owæntabi eĩnẽmi. Wẽnæ mãnãmai inimi inte bitõ, Iĩncayæ ate mancæboĩmpa, ante watapæ tocæbiĩmpa.

Bitõ wẽnæ nantadãmai inimi inte, Botõ iĩncayæ ate toquinqu impa, ante yedæ ancæbiĩmpa.

Edæ nanõogængã emõ cæte gocã ate adocanqu inte wẽnæ mãnãmai iĩongante,

Wængongui, Botõ põnõmo æncæbiĩmpa, angã eĩngã inte owæmpocã iĩõmõ godõmẽnqu nangui wẽnænanĩ inãnite mãnõngã nanõogængã eacã guiquẽnẽ wẽnænanĩ wædænqu mancæcãĩmpa,” ante yewæmongatĩmpa.

28 Botõ tõnĩfamĩni, eĩnẽedãni. Wængongui, Bitõ wẽnængã cõwẽ põnõmo æncæbiĩmpa, ante nanõ angainõ beyænqu Itæca wodi eĩngacãĩmpa. Wængongui, Cõwẽ cæcæboĩmpa, ante mĩnitõ imĩnite adobai angã beyænqu mĩnitõ mempoga eĩadinqu tõmẽngã wẽmĩni bagamĩnĩmpa. 29 Mãnĩnẽdẽ iĩõmõ Wængongui Onõwoca beyænqu eĩnacã iĩongante Itæca ingante õnonqu nẽ eĩngaingã Itĩmædo guiquẽnẽ piĩte cægacãĩmpa. Mãnõmai nanõ piĩte cægaĩ bai inguipogaqu quẽwẽnãni Wængongui wẽnãni inãnite nõwo adobai cædãnipa.

30 Iĩnqu Wængongui æbãnõ angã eĩnente yewæmongadãni. Iĩmai impa. “Nãwã nanõogængã wẽnængã mæmpocã eadincoo ænõngã nanõogængã beyænqu cæte nẽ quẽwẽngã wẽnængã wæætẽ ænãmai incæcãĩmpa. Iĩnqu nẽ cæte quẽwẽngã nãna wencaya inate mõnõ wido cæcæĩmpa.” Ante yewæmongatĩmpa. 31 Iĩnqu botõ tõnĩfamĩni eĩnẽedãni. Mõnõ iĩõmõ nãwã nanõogængã wẽnæmõ bai inõmõ inte mõnõ nanõogængã beyænqu nẽ cæte quẽwẽngã

wēñæmō bai wīl inōmō imōmpa, ante āmo ēñēdāni.

5

Abæ tawænte bai mōnō quēwēnō ante

¹ Mōnō īine Mōitee wodi nānō wææ angainō ante ēñente nē cæmō inte ñā cæyænte bai wæyōmonte Codito, Abæ tawænte bai inte quēwencæminimpa, ante pōnō ō ænte ñimpo cæcā beyænque mōnō abæ tawænte gote bai ee quēwēmō imōmpa. Īinque mīnitō īñōmō nē abæ tawænte gogaimīni inte tæi ongōninque edæ wæætē mānīne beyænque ñā cæyænte bai badāmai iedāni.

² Īñānāni, botō Pabodobo apænebo ēñenguēnē quēwēmīni. Mīnitō, Mōnō ēō togæimō inte quēwengæimpa, ante cæmīni Īinque ædō cæte Codito ængā beyænque quēwenguēnēmīni. Īñæmpa mānōmai cæmīni Īinque Codito mīnitō beyæ ædō cæte pōnō cæquingā. ³ Bitō, Botō ēō togæimo inte quēwencæboimpa, ante cæbitawo. Edæ botō bitō imite īlmai ante apænebo ēñēe. Bitō quēwencæte ante cædinque ēō togæimi babi Īinque Mōitee wodi nānō wææ angainō tōmānō ante bitō ēñente cæte quēwenguēnēmi babaimpa tōō. ⁴ Pancamīniya, Nō cæmō mōnō baquinque Mōitee wodi nānō wææ angainō ante ēñente cæcæimpa, ante āmīnitawo. Īñæmpa mānōmai ante nē āmīni inte mīnitō mōnō Codito ingante do pango cæte bai cæmīnīpa tōō. Edæ pango cæte nānēnē goyōmīnite tōmengā ædō cæte pōnō waadete cæquingā. ⁵ Mōnitō guiquēnē, Wængongui ayongā mōnō nē nō entawēmō bacæmōimpa, ante nangui pōni æinente wānō cōñōmōnite Wængongui Ōnōwoca pōnō apænecā ēñēninque mōnitō, Mōnō nē nō entawēmō badinque watapæ bacæimpa, ante wede pōnēmōnīpa. ⁶ Edæ Codito Itota nempo quēwēninque ēō togæimō imō incæ bagæmō imō incæ tōmāmō adobai onōmonque inōmō imōmpa. Wæætē edæ Codito ingante wede pōnēninque nē waadete pōnēmō īñōmō mānīnō mōnō pōnēnō beyænque waa pōni entawēmōmpa.

⁷ Mīnitō guiquēnē wēēñēdē godongāmæ pogodo gote bai nangui cædinque waa cæmīnitapa. Edæ ñōwo guiquēnē mīnitō waa pōni pogodo gote bai cæyōmīni æcāmē wææ āna ēñēnīmīni inte wæætē Wængongui nō ante nānō apænegainō ante ēñēnāmai cæmīnitawo. ⁸ Wængongui mīnitō imīnite nē aa pegaingā inte tōmengā īñōmō edæ, Ēñēnāmai cædāni, ante dicæ wææ angantawogaa. ⁹ Edæ, “Yedæ æmpocæimpa, ante cædinque guiyā pōni da wente ate pāō cæquimo tōmāo guipæñō pāō yedæ æmpopa,” ante pōnēninque īlmai ante ēñengæimpa. Adocanque wapiticæ wææ

angā ēñēninque nangui ināni wæætē oda cæte wæcædānimpa. ¹⁰ Mōnō Awēnē nempo mōnō quēwencabo imōmpa, ante pōnēninque botō, Mīnitō botō pōnēnō bai pōnēmīni inte wīl wapiticæ ante pōnenguimīni imīnīpa, ante pōnēmōpa. Wæætē edæ æcāmenque mīnitō imīnite wapiticæ ante wææ angā, ante adinque Wængongui nē apænte angā ingante cōwē godō pangā wæcæcāimpa.

¹¹ Botō tōniñāmīni ēñēdāni. Botō Itota awāa wængacāimpa, ante apænebo ēñēninque, Ēō togæimīni baedāni, ante nē ānāni īñōmō botō imote cōwē pīninque pānāni wæbo aedāni. Incæte botō tōmēnāni nāni ānō bai, Ēō togæimīni baedāni, ante āmo bai tōmēnāni botō imote wīl bæi ongōninque pancædōnānimpa. Edæ mānōmainō āmo bai tōmēnāni wæætē pīnāmai ināni inte, Pabodo Itota nānō wængaiwæ ante apænecā awædō, ante tee tēwate bai oda cædāmai incædōnānimpa. ¹² Mīnitō imīnite nē wapiticæ ante wææ ānāni īñōmō nāmā wido togænte bai cædinque nāmā ta ñænte Codito ingante nē pōnēmīni weca pōnāmai ināni inte waa imaimpa, ante awædō.

¹³ Mīnitō botō tōniñāmīni abæ tawænte gote quēwencæmīnīpa, ante mōnō Awēnē mīnitō imīnite apænte aa pegacāimpa. Incæte mīnitō, Abæ tawænte godimōni inte inguipogaque mōni cæinēnō ante godōmenque cæcæmīnīpa, ante cædāmai iedāni. Wæætē edæ wadāni inānite godō waadete pōnēninque tōmēnāni beyæ ante cædāni. ¹⁴ Edæ Itota, “Nāmā bitō waadete pōnēnō bai pōnēninque bitō wacā ingante adobai edæ waadete pōnencæbiimpa,” angacāimpa. Īine adodeque ēñente cæmō Īinque Wængongui nānō wææ angainō incæ tōmānō ante do nē cæmō edæ babaimpa. ¹⁵ Edæ babæidi bai nāēmæ pocænte bai cædinque nāēmæ gāwæi cænte bai cæmīni bai mīnitō nāēmæ wido cædinque wantæ biquēnēmīnīdō anguēnē, ante apa quēwēmīni.

Mōnō Wængongui Ōnōwoca nempo quēwengæimpa, ante

¹⁶ Nōwo āmo ēñēdāni. Wængongui Ōnōwoca ewocadinque quēwēdāni. Mānōmai quēwēninque mīnitō inguipogaque mīni cæinēwēnō ante wīl ēñēninque nāmā beyænque ante cædāmai inguimīni imīnīpa. ¹⁷ Edæ inguipogaque mōnō cæinēwēnō ante adinque Wængongui Ōnōwoca īñōmō edæ Baa angampa. Ayæ wæætē æcānō inguipogaque mōnō cæinēwēnō ante cæte quēwēna tōmengā Wængongui Ōnōwoca ingante nāēmæ Baa angampa. Īinque mōnō inguipogaque cæinēwēnō ante wæyōmō Wængongui Ōnōwoca guiquēnē, Wadō cædāni, angampa. Mānōmai beyæ

6

mīnitō mīmōnē wæætedō wææteð ante bai entawēmini inte mīnitō nāmā mīni ānō ante ædō cæte cæquīmīni. ¹⁸ Incæte mīnitō imīnite Wængonguī Ōnōwoca nōinō tōō æmænte māocā gomīni inte mīnitō Mōitee wodi nānō wææ angainō ante do abæ tawænte gomīni imīnipa.

¹⁹ Inguipogaque mōnō cæinēwēnō ante ēñēninque nē cædāni iñōmō æbānō cædāni, ante edonque abaimpa. Edæ iīmaī impa. Tōmēnāni nānōogængā ināmaī iñongante do godō guēa towēnānipa. Wentamō pōnēwēninque cædānipa. Ōnonque guīñēñadāmaī inte nāmā baonque pōnēwēninque towēnānipa. ²⁰ Wængonguīdi inānipa, ante badōninque ædæ wæænte waa adānipa. Idō bai yewæninque ōnonque tedewēnānipa. Piinte quēwēnānipa. Tiyæñō tiyæ tedewēnānipa. Wacā godōmenque ængā ate wædinque piinte awēnānipa. Aēnguī bawēnānipa. Nāmā waa tobote, ante ānewēnānipa. Wæætedō wææteð āninque nāwæ godānipa. Wadō ante nāni cabo wadō ante nāni cabo badinque wæætedō wææteð cædānipa. ²¹ Wacā gomonga ængā ingante godō piinte adānipa. Tī nāmæ nangui bedinque dowænte badānipa. Ayæ nangui pōni godōmenque bedinque nangui pōni cæninque guīñēñadāmaī inte towēnānipa. Ayæ godōmenque quīemē bai nē cæināni inānipa. Mānōmaī cæte quēwēnāni iñōmō Wængonguī Awēñē Odeye nempo ædō cæte edæ guīquināni, ante do botō āninō bai ñowo wææteð āmo ēñēdāni.

²² Wængonguī Ōnōwoca ingante ēñēnte nē cæmō guiquēñē mōnō waincawæ incate bai iīmaī cæmompā. Waadete pōnēmompā. Watapæ tomompā. Gānē entawente pōnēmompā. Ee cæte piināmaī imompā. Waadete cæmompā. Wadāni beyæ ante waa pōni cæmompā. Wæntædāmaī inte cōwē cæmompā. ²³ Gānē pōnēninque ædæmō cæmompā. Nāmā wææ āninque nō cæmō imompā. Wængonguī Ōnōwoca ingante ēñēninque mānōmāi cæmō adinque Wængonguī mōnō cædōnō ante wææ ānāmaī ingampā. ²⁴ Mōnō Codito quimō inōmō inte mōnō baō tōmēngā tōnō awæñēmæ timpote bai wængaimō iñinque inguipogaque mōnō cæinēwēngainō adobai awæ timpote bai iñonte mōnō abæ tawænte bai godimo inte baonque ante mōnō cæinēwēnō ante ēñēnāmaī inte cæmompā. ²⁵ Edæ Wængonguī Ōnōwoca ængā beyænque quēwēmō inte mōnō tōmēngā Ōnōwoca tōnō guēa godongāmæ cægonte bai quēwēngæimpā. ²⁶ Mānōmaī quēwēninque mōnō nāmā waa adāmaī ingæimpā. Edæ wacā tōnō guēa wæætedō wææteð ānāmaī ingæimpā. Wacā gomonga ængā ingante mōnō godō piinte adāmaī ingæimpā.

Mōnō wacā ingā wacā ingā iñacabo cæcæimpā, ante

¹ Botō tōniñamīni ēñēdāni. Wacā ēñēnāmaī cædinque oda cæte wæcantawo. Iñinque mīnitō Wængonguī Ōnōwoca ingante mīni ēwocacabo iñōmō, Māningā nē oda cædingā inte Wængonguī taadonque adodō pō gocæcāimpā, ante cædinque tōmēngā ingante ædæmō cædāni. Mānōmaī cædinque nē apæneca guiquēñē, Botō adobai ēñēnāmaī cæinente wīi bacæboimpā, ante pōnente wædinque nāmā wææ cædāni. ² Wacā teēmente mongænte bai entawēngā ate wædinque mīnitō mōnō Codito nānō, iīmaī cædāni, angainō ēñēnte cædinque tōmēngā nānō cængæncōo iñacabo mongænte bai cædinque waa cædāni.

³ Ecānō ōnonganque ina inte, Botō ñænæmo inōmo imopa, ante pōnēna, tōmēngā iñōmō nāmā babæ apænete bai oda cæte pōnēngampā. ⁴ Iñinque adocanque nāmā nānō cæinō cōwā adinque adocanque nāmā nānō cæinō cōwā adinque tōmāmini, Tōmēmo æbānō cæboo, ante nāmā apænte anguēñēmīni imīnipa. Mānōmaī cædinque wacā nānō cæinō adāmaī inte waocā nāmā nānō cæinonque cōwā adinque apænte āninque, Tōmēmo nō cæbo imopa, ante adinque tobaingampā. ⁵ Edæ adocanque nāmā nānō cæquēñēnō ante teēmente mongænte bai cædinque adocanque nāmā nānō cæquēñēnō ante teēmente mongænte bai cædinque tōmāmini eyepæ cæbaimīnipa.

⁶ Ayæ Wængonguī nānō apænedō ante wacā apæneca ēñēninque nē ēñēngā iñōmō tōmēngā māincōo pancacooga waincooga æninque nē apæneca ingante eyepæ pædæ godongā æncæcāimpā.

⁷ Tōmēmo tā bocate pæte incayō waocā wānā adomō bai tā pete ængampā. Mānōmaī ingæimpā, ante nē angaingā inte Wængonguī iñæmpā oda cæcampā diyæ waocā wamō ænguīgāā. Iñinque, Waocā æbānō cæcāā, ante adinque Wængonguī pōnō cæcā ate waocā nānō cægai bai adobai ænte wæcæcāimpā. Āmo ēñēninque mīnitō wīi wacā wapiticæ nānō apænedō beyæ oda cæquēñēmīnidō anguēñē. ⁸ Edæ mīnte pædimō bai tā pete ængā bai cædinque iñæcæque ante nāmā pōnente nē cæcā guiquēñē adobai iñæcæque nānō ñōmænguīnque æncæcāimpā. Wææteð Wængonguī Ōnōwocaque ante pōnēninque nē cæcā guiquēñē Wængonguī Ōnōwoca pōnō cæcā beyænque tōmēngā nānō cōwē wænāmaī quēwēngūnque æncæcāimpā. ⁹ Iñinque mōnō wæntæye badāmaī inte wadāni beyæ godōmenque waa cæcæimpā. Ñimpo cædāmaī imō iñinque edæ Wængonguī,

Īñedē æncæmīnīmpa, ante nānō angaiñedē ĭnque bayonte māñīfedē mōnō edæ tā pete bai eyepæ pōnī æmaiīmōmpa. ¹⁰ Māñōmaī beyæ mōnō eyepæ ĩmō ĩñedē tōmānāni ĩnānite mōnō waa cæcæīmpa. Ayæ wadāni nē wede pōñēnāni ĩñōñānite mōnō, Adomō ĩmōmpa, ante pōñēnīnque tōmēnāni ĩnānite godōmenque nanguī cædinque waa cæcæīmpa.

Mānīnque ante yewæmōmōpa, ante Amēē āmōpa.

Waa quēwencæmīnīmpa, ante

¹¹ Botō ōnōmpoca yewæmōnīnque tōmēmo ñænæmōmō yewæmōmōi aedāni. ¹² Codito mōnō beyæ awāa wængacāīmpa, ante nē pōñēnāni incæ pancadāniya, Māñīne ante ēñēnīnque oodeoidi pīñāni wæcæ wæ, ante nāmā wææ cæcæte ante cædānīpa. ĩnīnque tōmēnāni, Ēō togænte cæmōni ĩnīnque oodeoidi wæætē mōnitō ĩmōnite waa acædānīmpa, ante cædinque mīnitō ĩmīnite, Ēō togæīmīni bacæmīnīmpa, ānānīpa. ¹³ Nē ēō togæīnāni incæ edæ Wængonguī nānō wææ angaiñō ante dicæ ēñente cædāniyaa. Incæte tōmēnāni, Mōnitō ānō bai mīnitō do ēō togæīmīni bamīni ate wadāni mōnitō ĩmōnite waa acædānīmpa, ante cædinque mīnitō ĩmīnite, Ēō togæīmīni baedāni, ante cædānīpa.

¹⁴ Botō guīquēnē quīēmenque ante, Waa aedāni, ante dicæ āmogaa. Īñæmpa ĩmæcaque ante botō cæīnēmāmo ante botō, Codito nānō wængaiwāa tente bai wæīnēmāmo ĩmpa, ante bai cædinque edæ māñīmāmo ante æmæwo wido cætābōpa. Ayæ tōmēmo adobai Codito tōnō āanque bai awāa wænte bai ingaiīmo inte edæ ĩmæcaque botō cæīnēnō ante cædāmai ĩnōmo ĩmōpa. ĩnīnque, Mōnō Awēnē Itota Codito awāa wæñīnque mōnō beyæ waa pōnī pōnō cægacāīmpa, ante pōñente wædinque botō māñīwænque tōmengā nānō wængaiwænque ante waa ate apæñedinque edæ wade ante cōwē waa ate tededāmai incæboīmpa, āmōpa. ¹⁵ ĩnīnque ēō togæīmō incæ bagāamō incæ ōnōnque pōnī edæ ĩmpa. Edæ Itota Codito badongā beyænque mōnō mīīmō quēwēmōmpa. ¹⁶ Māñōmāñō ante pōñente cæmīni ĩñōmīnite Wængonguī pōnō waadete piyæñē cæcā adīnque mīnitō gāñē pōñente waa cæcæmīnīmpa. Idægoidi ĩmīnīpa, ante Wængonguī nē nānō angaiīmīni incæ mīnitō māñōmaī cæte quēwencæmīnīmpa.

¹⁷ Botō Itota beyæ ante cæyōmō wadāni pāñāni wædīmo inte botō do baonga āmogate ee ēñābo ĩñōmote ñōwo ĩncayæ ate mīnitō tōmāmīni edæ ee amīni quēwēmoedāni. ¹⁸ Botō tōñīñamīni waa quēwencæmīnīmpa, āmōpa. Mōnō Awēnē Itota Codito pōñō waadete apæñecā ēñēnīnque mīnitō mīmōñē adobai waadete entawencæmīnīmpa.

Epetoidi inānite Pabodo nāno ƿadota ante yewæmongainta

Waa quēwencæminimpa, ante

¹ Wængongui angā ēñēninque Itota Codito botō imote da godongā gogaīmo inte botō Pabodobo inōmō inte yewæmōmopa. Epeto iñōmō quēwēmīni incæ mīnitō Wængongui quīmīni inte Itota Codito nempo quēwēninque nē ædæmō cæte pōnēmīni iñōmīnite botō, Mīnitō acæminimpa, ante yewæmōmopa. ² Mōnō Mæmpo Wængongui tōnō mōnō Awēnē Itota Codito piyænē cæte waadete pōnō cæda ate mīnitō gānē pōnēninque waa quēwencæminimpa, ante yewæmōmopa.

*Codito nempo quēwēninque mōnō eyepæ
ēwocamōmpa*

³ Mōnō Awēnē Itota Codito Wæmpocā iñongante Itota iñōmō adocā ingantedō ante, Botō Wængongui inongā ingampa, ante apænegacāimpa. Īnquinque mōnō iñōmō Codito tōnō do oōnædē æite bai tōmengā nempo quēwēñōmonte adocā Itota Wængongui incæ tæiyæ waēmoncoo nē ēwocagaingā inte pōnō cæcā æninque mōnō tōmengā nāno ēwocadoncoo tōmancoo bai adobai eyepæ pōni ænte ēwocamōmpa. Mānōmai cæcā adinque mōnō tōmengā ingante apænedinque, Bitō waa pōni cæbi æmōnīpa, ante watapæ apænecæimpa. ⁴ Tōmengā iñōmō edæ, Codito nempo quēwēninque mīnitō botō ayōmo edæ tæiyæ waēmō ēwocamīni inte edæ wentamō mongænāmai incæminimpa, ante tōmengā inguipoga nāno badōnāmai iñedē incæ mōnō imonte pōnō apænte ængacāimpa. Ayæ mōnō imonte waadete pōnēninque tōmengā, ⁵ Botō pæpogate bai æmo beyænque mīnitō iñōmō Itota Codito nempo quēwēninque botō wēmīni baquīmīni incæminimpa, ante cædinque tocæboimpa, angacāimpa. Īnquinque tōmengā doyedē nāno angainō bai cædinque pōnō angā ate mōnō Wængongui wēmō cōwē baquēnēmō ingamōimpa.

⁶ Edæ nanguī waadete pōnō cædinque tōmengā nāno nē Waadecā ingante da pōnongā æmōmpa. Mānōmai beyæ mōnō iñōmō tōmengā ingante, Bitō ñāo apāite bai ēmōnōmi inte mānōmai waadete pōnō cæbi æmōnīpa, ante watapæ apænecæimpa.

⁷ Edæ tōmengā nāno nē Waadecā iñōmō mōnō imonte æncæte ante nāmā wepæ godonte ængā beyænque mōnō abæ tawænte quēwēmōmpa. Ayæ adobai tōmengā wepæ inte ñā mēnongacā beyænque ēñēnāmai mōnō cædō ante Wængongui nanguī waadete pōnō cædinque ñimpo cæcā

quēwēmōimpa. ⁸ Tōmengā iñōmō edæ, Æbānō ī, ante tōmānō ante nē ēñēnongā inte, Æbānō cæquīi, ante edæ nōingā ēñēninque mōnō beyæ ante godōmenque nanguī pōnō cæcā æmōimpa. ⁹ Ayæ edæ, Codito tōnō guēa cædinque nāmā botō ānō bai cæte tocæboimpa, ante Wængongui angacāimpa. Tōmengā mānōmainō ante nāno wēmō iñōmō angainō ante mōnitō imōnite ñōwo edonque pōni odōmonte apænecā ēñēmōnīpa. ¹⁰ Tōmengā, iñnedē cæcæboimpa, āninque tōmengā nāno angāiñedē linque ba ate tōmengā nāno angainō bai edæ linque cæcæcāimpa. Edæ oōnædē ongoncoo tōnō inguipoga ongoncoo tōmancoo tē gæte māmō adocanque nempo Codito Awēnē nempo godōmo æncæcāimpa, ante cæcampa.

¹¹ Nāmā pōnente nāno angainō bai tōmānō ante adobai pōni nē cædongā inte Wængongui, Īmai cæcæboimpa, ante pōnente ate cōwē cæcampa. Īnquinque tōmengā, Codito nempo quēwēnāni inānite æncæboimpa, ante nāno pōnente angainō bai cædinque, Mīnitō Codito nempo quēwēngūimīni incæminimpa, ante pōnēninque mōnitō imōnite apænte ængacāimpa. ¹² Mōnitō, Codito beyæ watapæ bacæimpa, ante tāno pōnēmōni iñōmōnite tōmengā, Botō ñāo ēmōnō ante watapæ apænēmīni bacæminimpa, ante mōnitō imōnite pōnō apænte ængacāimpa.

¹³ Ayæ, Codito pōnō ængā beyænque mīnitō quēwencæminimpa, ante Wængongui watapæ nāno apænegainō ante ēñente pōnēninque mīnitō epeteomīni adobai Codito nempo quēwēmīni imīnīpa. Wede pōnēmīni adinque Wængongui, Botō wēmīni imīnīpa, ante edonque acæimpa, ante odōmoncæte ante tōmengā ēmōwo ante mīnitonga yewæmonte bai cædinque tōmengā Tæiyæ Waēmō Ōnōwoca ingante da pōnongā ænte ēwocamīnīpa. ¹⁴ Edæ Wængongui, Botō quīmīni inōmīni inte mīnitō abæ tawænte mīni goyedē mīnitō ænguīncoo māniñedē ate eyepæ pōni æncæminimpa, angampa. Āninque tōmengā, Nō pōni impa, ante ēñencæminimpa, ante cædinque tōmengā Ōnōwoca ingante ñōwo da pōnongā ænte ēwocamōmpa. Īnquinque pancacooga do ænte bai ēwocamō inte mōnō, Īncayæ ate mōnō tōmancoo ænguīnque impa, ante edonque ēñengæimpa. Tōmengā mānōmai cæcā adinque mōnō, Wængongui bitō godōmenque ñāo apāite bai bitō ēmonguinque mānōmai cæbīpa, ante watapæ apænecæimpa.

*Nō ēñēnāni bacædānīpa, ante Pabodo
apænecampa*

¹⁵ Botō iñōmō, Epeteoidi mōnō Awēnē Itota ingante wede pōnēnāni inānīpa, ante tededāni ēñentabopa. Ayæ adobai, Wængongui quīnāni tōmānāni inānite

epeteoidi iñomō waadete pōnēnāni inānīpa, ante ēñēnīmo inte, ¹⁶ botō iñimpo cædāmaī inte Wængonguī ingante cōwē waa ate pōnēninque apænebopa. Ayæ mīnitō beyæ ante cōwē apænebopa. ¹⁷ Itota Codito mōnō Awēnē iñongante Wængonguī iñomō adocā Codito Wængonguī inongā ingampa. Ayæ nē Mæmpocā inongā inte tōmengā ñāō ēmōnongā ingampa. Tōmengā ingante apænedinque botō, Bitō Ōnōwoca ingante da pōnōmi æninque epeteoidi iñomō nē ēñēnāni bacædānīmpa, ante apænebopa. Ayæ, Bitō Ōnōwoca pōnō odōmongā adinque epeteoidi wæætē Itota Codito ingante do ate bai ædēmō pōnecædānīmpa, ante botō mīnitō beyæ ante Wængonguī ingante cōwē apænebopa.

¹⁸ Wængonguī pōnō cæcā beyænque watapæ bacæīmpa, ante mīnitō pōnente tocæmīnīmpa, ante cædinque Wængonguī mīnitō imīnite aa pegacāīmpa. Ayæ adobai, Mōnō tōmengā quimō inte tæiyæ waēmō bayōmonte tōmengā nānō godōmenque ñāō ēmonginque mōnō imonte ængacāīmpa. Mānīne mēnea edæ nāwangā inepa, ante mīnitō ēñencæmīnīmpa, ante botō, Wængonguī bitō tōmēnāni mīmōnē tica ēnente bai odōmonte apænebi ate do ēñencædānīmpa, ante Wængonguī ingante apænebopa. ¹⁹ Mōnō nē pōnēmō iñomonte Wængonguī nānō pōnō cæquīnō ante tōmengā nānō tæī piñæmāmo æpodō ī, ante mōnō ædō cæte tee mante aquī. Incæte mīnitō, Mānīmāmo ante æpodō ī, ante epeteoidi ēñencædānīmpa, ante botō Wængonguī ingante apænebopa. Edæ, Tōmengā nānō tæī piñæmāmo iñomō æbānō ī, ante ēñencæte ante mōnō, Tōmengā gomonga tæī piñænongā inte iīmaī cægacāīmpa, ante ēñēngæīmpa.

²⁰ Nē tæī piñænongā inte Wængonguī angā ate mōnō Codito iñomō do wæningā inte edæ do ñāni ōmæmongacāīmpa. Ayæ godōmenque tæī piñæninque Codito ingante ōōnædē ænte mæidinque Wængonguī tōmēmæ inō angā Codito tæ contagacāīmpa. ²¹ Edæ æcāmenque pedænguipoga iñonte mīnguipoga iñonte ñænængā inte nē angā inaa, æcāmenque nē awēnē inaa, æcāmenque tæī piñænte ongongā inaa, æcāmenque ingante, Awēnē ingampa, ante godō pemōnānī mānīnāni tōmānāni ōnōnāni que incædānīmpa. Mōnō Codito adocanque ingante ogæ æænonte bai cædinque Wængonguī angā ate tōmengā wæætē Tæiyæ Awēnē bacā acæīmpa. ²² Ayæ Wængonguī tōmāo iñomō ongoncoo Codito ōnōwaca inō pōnō wææntodōninque edæ, Bitō edæ Tæiyæ Awēnē inōmi inte edæ æmonga pōnī ongoncæbiīmpa, angacāīmpa. Ayæ, Bitō imite godongāmæ nē pōnēnāni tōmēnāni Ocamō

bai iñomite, ²³ tōmēnāni wæætē bitō baō bai adoyonque bai incædānīmpa. Codito ingante mānōmāinō ante apænedinque Wængonguī, Bitō nē Awēnē inōmi inte tōmāo iñomō ongoncoo tōmancoo bitō nempo ongoncooque bacæīmpa. Ayæ bitō imite nē pōnēnāni iñomō bacoo ināni yebænāni ininque bitō ēnempodō eyede pōnī bacæīmpa, ante Wængonguī Codito ingante pōnō cægacāīmpa.

2

Wængonguī nānō waadete pōnēnō beyænque quēwēmō

¹ Mīnitō guiquēnē wēēnēñedē ēñēnāmaī cæte quēwēmīni inte wēnæ wēnæ mīni cædō beyæ dobæ edæ wæwocāimīni ingamīnīmpa. ² Nē inguipogaque ante pōnēnāni taadō adodō cægonte bai mīnitō mānīñedē edæ wēnæ wēnæ cæte quēwengamīnīmpa. Ayæ wēnæidi tæī piñænte nāni owocabo awēmō iñomō nāni cægōnō adodō gote bai mīnitō tōmēnāni awēnē mīñæ tee empote godinque wēnæ wēnæ cægamīnīmpa. Nōwo incæ Wængonguī nānō ānō ante nē ēñēnāmaī cæte quēwēnāni guiquēnē adocā wēnæ awēnē nānō pōnēwēnō ante ēñente ēwocadinque cædānīpa. ³ Wēēnēñedē tōmēnāni tōnō godongāmæ quēwēninque mōnō tōmāmō adobai imæcaque ante pōnēninque mōnō towēmāmoque ante quēwengamōīmpa. Quiēmenque ante townencæte ante mōnō cæinēwēnō ante cædinque mōnō ocaidē ædēmenque pōnēninque mōnō cæinēwēnonque cæte quēwengamōīmpa. Ininque wadāni nāni tente wæquēñēnō bai mōnō adobai imæcaque ante pōnente nē cæmō inōmō inte edæ Wængonguī nānō piinte panguēnemāmo ante edæ do tente wæquēñēmō ingamōīmpa.

⁴ Mānōmaī ingaimō iñomonte Wængonguī mōnō imonte nanguī waadete pōnēninque iīmaī nanguī waadedongā inte pōnō waa cægacāīmpa. ⁵ Mōnō ēñēnāmaī cægāinō beyæ ante wæwocate wæyōmonte tōmengā pōnō cæcā beyænque mōnō Codito tōnō godongāmæ quēwēmōmpa. Mīnitō edæ Wængonguī nānō waadete pōnō cægāinō beyænque quēwēmīni imīnīpa. ⁶ Wængonguī angā Codito ñāni ōmæmōñongā mōnō tōmengā tōnō godongāmæ ñāni ōmæmonte bai mīmō badinque quēwengamōīmpa. Ayæ mōnō tōmengā nempo quēwēmō iñomonte Wængonguī iñomō Itota Codito ingante ææntodōninque mōnō imonte ōōnædē ææntodote Itota tōnō pōnō gōnongā tæ contate bai ongōmōmpa. ⁷ Mānōmaī Itota Codito nempo quēwēñōmonte Wængonguī iñomō, Botō pōnō waadete cædinque godōmenque gomonga cæbo acædānīmpa,

ante cægacäimpa. Ayæ, Miingupo badömo ate botö mänifedê ate odömömo adinque tömänäni, Wængongui nänö waadete pönö cæganca wadäni dicæ adoganca cædäniyaa, ante wæcædänimpa, ante cæcæte ante mänömaï cægacäimpa.

⁸ Edæ Wængongui nänö waadete pönö cægainö beyænque munitö mini quëwënguinque wede pönëmini bamunitapa. Incæte munitö dicæ nämä mini cæinö beyænque nê wede pönëmini bamunitawogaa. Wæætê edæ Wængongui pönongä æninque munitö nê wede pönëmini bamunitapa. ⁹ Ìninque, Nāmanque cæte quëwëmo aedäni, ante mönö edæ ānāmaï ingæimpa. Ìñæmpa wīī mönö cædö beyæ quëwëmompā. ¹⁰ Edæ Wængongui nänö nê badongaimö ìnömö ìmompā. Ayæ, Codito nempo nê quëwënäni ìīmaï cædinque waa cæcædänimpa, ante tömengä wëenënedê mönö cæquënênö ante eyepæ badongacäimpa. Ìninque mönö ìmonte badöningque tömengä, Codito Itota nempo quëwëningque munitö mini waa cæquënênö ante edæ cæte quëwëncæmīnimpa, ante pönö badongä bagamöimpa.

Codito beyænque ganccæ pönëmompā, ante

¹¹ Mänömaï beyæ munitö, Doyedê ìīmaï ingatimpa, ante pönëedäni. Ood-eoidi ìnömö ònompoca æmontaique èö togæināni inte nāmanque ante edæ, “Nê èö togæimöni ìmönipa,” ante pemonte bai apænëdänipa. Wæætê munitö ood-eomīni ìnāmaï nê èñagaimīni ìñömīnite, “Bagāamīni ìminipææ,” ante mänināni pīwënäni wægāmīnimpa. Ìninque munitö mänifedê æbānö ingaimīni ìnömīni, ante yewæmömö ate pönëedäni. ¹² Mänifedê edæ mönö Codito nempo quëwënāmaï ingaimīni inte munitö möni idægocabo nempo adobai edæ quëwënāmaï inte nänënë quëwëngāmīnimpa. Ìninque Wængongui, Ìīmaï cōwê pönö cæcæboimpa, ante nänö angainö ante mönitö godongāmæ Ao ante èñente quëwëñömönite munitö wæætê gobæ nänënë quëwëningque Wængongui nänö angainö ante edæ ænāmaï ingāmīnimpa. Watapæ bacæimpa, ante mönitö pönênö ante munitö ìñömö nänënë quëwente aedö cæte watapæ pönente toquimīni. Gobæ quëwëningque munitö Wængongui nempo edæ quëwënāmaï ingāmīnimpa. ¹³ Incæte munitö gobæ nê quëwënömīni ìñömīnite Itota Codito nämä wepæ godonte æninque munitö ìminite ænte nämongä eyequei pōni pōninque munitö ñowo tömengä nempo quëwëminipa.

¹⁴ Wëenënedê mönitö tönö munitö guëadö guëa cædömö ingaimö inte mönö, Nänënë incæmīnimpa, ante wææ cæ impa tæcæguedê wææ gōnonte bai cægāmöimpa. Codito ìñömö nê piyænê cædongä inte, Wææ cæ impa, mönö ānompā bæ tate wido

cæte bai cædinque mönö ìmonte äänömonque badongä bamöimpa. Ìninque tömengä mīmönê nê piyænê cæte entawënogä ingä beyænque mönö adobai gänê pönëmompā. ¹⁵ Edæ Wængongui, Ìīmaï cæedäni, ante wade wade ante nänö wææ angainö ante èñëningque dodäni godömenque wææ angadänimpa. Mönö Codito ìñömö inguipoga pōninque mänine ante tömänö ante èñente cæte quëwëngacäimpa. Ayæ, Idæwaa wææ ante impa, ante bai cædinque tömengä mänine ante nämä baonga mongænte wæningque tee moncate bai cægacäimpa.

Mänömaï cædinque tömengä, Minitö mencaboga inte nänënë quëwëmini incæte ñowo piyænê cæte botö nempo godongāmæ quëwëncæmīnimpa, ante cædinque mönö ìmonte ænte wempo cægacäimpa. Ìninque mönö edæ piyænê cæte quëwënguinque edæ äänömonque bagamöimpa. ¹⁶ Itota Codito ingante awāa timpodäni wængä ìninque tömengä mönö guëadö guëa pīinte cægaimāmo ante ænte mongænte wido cæte bai wængä beyænque mönö piyænê cæmö bagamöimpa. Ayæ ado tömengä awāa nänö wængainö beyænque mönö tömāmö adocabomö bamö adinque Wængongui wæætê piyænê cædinque mönö ìmonte Ao äninque ængacäimpa. ¹⁷ Minitö guiquënë gobæ nänënë quëwëñömönite mönitö guiquënë Wængongui weca eyequei quëwëñömönite Codito ìñömö inguipoga pōninque mönö tömāmö ìmonte apænëdinque, Piyænê cæte gänê pönente quëwëedäni, ante pönö apænecä èñentamompā. ¹⁸ Tömengä nänö pönö cægainö beyænque möni oodeocabo adobai munitö wamīni adobai mönö tömāmö Wængongui Òñowoca adowocaque ingante èwocamö inte mönö Wæmpocä weca tömāmö do pömompā.

¹⁹ Ìninque mönitö Wængongui quimöni do bagaimöni inte Wængongui nempo quëwëmöni ingaimöni bai Codito nänö pönö cægainö beyænque munitö adobai mönitö tönö adocabomöni do badinque edæ Wængongui nempo quëwëminipi. Ìninque munitö ñowo idæwaa wamīni ingāmīnimpa. Wīī wabæca quëwente bai edæ tömëmini oncönê ponte owote bai munitö ñowo Wængongui nempo quëwëminipa. ²⁰ Wadäni dica tano gōnōninque tånocaa wænömënæca mænönāni bai Wængongui adobai cædinque Itota Codito ingante tano gōnongä ongōñongante tömengäa godö mænonte bai cædinque mönö ìmonte ìīmaï cædinque pönö gōnongä gongæmompā. Codito nänö nê da gōdongaimöni tönö tömengä beyæ nê apænëmöni tönö ìñömönite Wængongui mönitö ìmönite æninque wænömënæca gōnongä gongæñömönite wadäni ìnānite gä æænö

tæi mænonte bai gōnongā gongænanīpa.
²¹ Codito nempo quēwēñōmōnite Wængongui mōnitō imōnite adocooga gō cæte bai pōnō tæi mænongā ate mōnitō æicō bai bacō bai bamōnīpa. Edæ Wængongui Tæiyæ Waēmō Ōnōwoca ingante āanque bai ēwocadinque mōnitō godongāmæ Awēñē tæiyæ waēmō oncō bai bamōnīpa. ²² Bayōmōnite mīnitō adobai tōmengā nempo ongōñōmīnite Wængongui mīnitō imīnite ænīnque mōnitō tōnō godongāmæ māmō adocooga gō cæte tæi mænonte bai cædinque, Mīnitō botō Ōnōwoca tōnō āawocaque bai ēwocadinque botō owoquincō bai bamīnīpa, ante pōnō badongacāīmpa.

3

Oodeoidi ināmai ināni inānite apæneccā gotabopa, ante

¹ Mānīnō beyæ īīmai ante apænebopa. Botō Pabodobo īñōmō Codito beyæ ante oodeomīni ināmai imīni imīnite apæneccæte ante cæyōmote botō imote edæ tee mōnedāni wædōmo inte yewæmōmōpa.

² Mīnitō oodeomīni ināmai imīni īñōmō īīmai ante wabānō ēñēmīnitawo. Wængongui pōnō angā ēñēnīnque botō mīnitō beyæ tōmengā nānō waadete cædōnō ante nē apænequēnēmo batabopa. ³ Mānīnō ante botō, Wængongui awēmō nānō cægāinō ante botō imote edonque odōmongā atabopa, ante do wædænque yewæmōmo amīnitawo. Edæ adodō ante nōwo yewæmōmōpa.

⁴ Inīnque mānōmaiñō ante botō do yewæmōnīnta adīnque mīnitō, Mōnō Codito awēmō nānō cægāinō ante Pabodo do ate bai ēñengampa, ante ēñēmāimīnīpa.

⁵ Mōnitō wæmæīdi nāni quēwēñedē nē quēwengānāni īñōmō, Mōnō Codito īncayæ ate pōnīnque æbānō awēmō cæquingāā, ante ēñēnāmai inte wægadānīpa. Nōwo guīquēñē Codito beyæ nē apænedāni tōnō mōnitō tōmengā nānō nē da godōnīmōni tæiyæ waēmō bamōni īñōmōnite Wængongui Ōnōwoca mānīnō ante edonque odōmōnte apæneccā ēñēmōnīpa.

⁶ īīmai ante īmpa. Mōnitō Wængongui nānō pōnongūncoo nē ænguīmōni īñōmōnite mīnitō oodeoidi ināmai imīni inte mōnitō tōnō adocabomīni badīnque edæ mōnitō tōnō godongāmæ nē ænguīmīni adobai bamīnīpa. Ayæ, Itota Codito tōnō pōnō cædinque Wængongui nānō, Cōwē cæcæboīmpa, ante angāinō do cægacāīmpa, ante watapæ pōnēnīnque mīnitō mōnitō tōnō edæ godongāmæ quēwēncæmīnīpa.

⁷ Wængongui nē tæi piñænongā inte waadete pōnō nanguī cæcā adīnque edæ tōmengā beyæ nē cæbo badīnque botō Codito ingantedō ante nē watapæ apænebo batabopa. ⁸ Mōnō tōmāmō Wængongui

quīmō īñōmōnte botō īñōmō wāmīni bai wīl īmpa. Botō adoboque wædāmo pōni imo incæte Wængongui waadete cædinque pōnō angā ēñēmo inte botō mīnitō imīnite nē apænebo batabopa. Codito nānō pōnō cægāinō ante æpodō ī, ante mōnō ædō cæte tee mante ēñengūī. Incæte Wængongui waadete pōnō cæcā beyænque botō īñōmō Codito waa pōni nānō pōnō cægāinō ante edæ oodeo ināmai imīni imīnite nē apænequēnēmo batabopa. ⁹ Ayæ Wængongui tōmancoo nē badongāingā inte wēēñēñedē nānanque entawēnīnque awēmō nānō wē wodongāinō ante botō imote odōmōnte apæneccantapa. Ayæ, Pabodo mānīnō ante edonque odōmōnte apænequēnēngā ingampa, ante tōmānāni ēñēncædānīpa, ante pōnō apæneccā æntabopa.

¹⁰ Codito ingante mōnō godongāmæ pōnēncabo īñōmōnte tōmengā wadō wadō ante tōmānō ante nē ēñēngāingā inte mōnō tōnō godongāmæ cæcampa. Mōnō tōnō mānōmai cædinque tōmengā, Botō wadō wadō ante tōmānō ante botō ēñēngāinō ante adīnque oōnædē quēwēñāni awēñēdi tōnō mānīñōmō nē ānāni tōnō wæcædānīpa, ante cægacāīmpa. ¹¹ Wēēñēñedē pedæmāmo īñōnte Wængongui, Cæbo ate awēñēdi incæ wæcædānīpa, ante cōwē pōnēngacāīmpa. Nōwo īñōmō tōmengā mānīnō ante nānō pōnēngāinō ante tōmengā mōnō Awēñē Itota Codito tōnō godongāmæ cædinque do cægacāīmpa. ¹² Codito nempo nē quēwēmō inte mōnō tōmengā ingante wede mōnō pōnēñō beyænque guīñēnāmai inte Wængongui weca do pōnīnque apænemōmōpa. ¹³ Mānōmai īmpa, ante edæ mīnitō do ēñēmīnīpa. Inīnque botō mīnitō beyæ ante cædinque botō caate wædō ante pōnēnīnque mīnitō wæætē wædāmai īedāni. Wæætē, Mōnitō godōmenque nāō bai ēmōncæmōnīpa, ante Pabodo caate wæcampa, ante pōnēnīnque mīnitō wædāmai incēmīnīpa āmōpa.

Codito nānō pōnēñō ante

¹⁴ Mānīnō beyæ mōnō Awēñē Itota Codito Wæmpocā īñōngante botō tōmengā ōnōwaca inō da guīcapodīnque apænebopa.

¹⁵ Tōmengā īñōmō edæ adocanque nāwā Wæmpocā ingampa. Inīnque inguīpoga quēwēmō incæ oōnædē quēwēñāni incæ tōmengā ingante, Mæmpo, ante nē tedemō īñōmō mōnō tōmengā tōnō mōnō wæmpocabo bai īmpa.

¹⁶ Inīnque mōnō Wæmpocā ingante apæneđīnque botō mīnitō beyæ ante īīmai ante apænebopa. Wængongui bitō nē nāō bai entawēmi inōmi inte bitō Tæiyæ Waēmō Ōnōwoca ingante epeteoidi inānite da pōnōmi ænīnque tōmēñāni wæætē edæ

mimō tæi piñænte entawencædānimpa, ante apænebopa. ¹⁷ Ayæ, Mōnō Codito adobai mīnitō weca pōñongante mīnitō mimōnē wede pōnēninque tōmengā ingante ædæmō entawencæmīnimpa, ante mōnō Wæmpocā ingante apænebopa. Ayæ, Awæ ædæmō guiwa inte tōmēmæ āwæate pæwæ bai cædinque mīnitō iñōmō adobai tōmengā nānō waadete pōnēmāmo entawēninque edæ mīmōnē tæi ongōmīni bacæmīnimpa. ¹⁸ Ayæ mōnitō Wængongui quimōni tōnō mīnitō adocabomīni inte tæi piñæmīni badinque, Itota Codito nānō waadete pōnēnō ante ægancadō owoo, ante ēñencædānimpa, āmopa. Ayæ, Tōmengā nānō waadete pōnēnō iñōmō edæ yepanca pōni owopa, oopānō pōni owopa, æibæ pōni owopa, wincamō pōni owopa, ante ēñencædānimpa, ante apænebopa. ¹⁹ Ayæ edæ, Mōnō Codito waadete nānō pōnēnō æbānō gomonga pōni owoo, ante mōnō ædō cæte ēñenguī, ante mōnō wædō incæte mīnitō mānīnō ante ēñencæmīnimpa. Ayæ edæ, Mānīnō ante ēñēmīni inte mīnitō Wængongui nānō nanguī entawēnō edæ eyepæ pōni entawencæmīnimpa, ante botō mōnō Wæmpocā ingante apænebopa.

²⁰ Mōnō ānō ante ayæ mōnō pōnēnō ante eyepæ cædongā inte Wængongui iñōmō mōnō imonte tæi piñænte nānō cæpāmo ganca cædinque nanguī gomonga cæcā ingampa. Ininque ñōwo iñōmō mōnō Wængongui ingante waa ate pōnente apænecæimpa. ²¹ Edæ do wænte ægaināni tōnō ayæ ate ēñate quēwenguīnāni tōnō mōnō tōmāmō Codito ingante godongāmæ mōnō pōnencabo iñōmō inte Itota Codito ingante ēwocadinque mōnō godongāmæ apænecæimpa. Mæmpo Wængongui ēñēmi. Bitō adobique ñāō ēmongaimi inōmi imipa, ante mōnō ñimpo cædāmai inte cōwē waa ate apænecæimpa. Mānōmai impa, ante botō, Amēē, āmopa.

4

Codito nempo quēwēninque adocabomō imopa

¹ Waa cæte quēwencæmīnimpa, ante Wængongui aa pecantapa, ante ēñēmīni inte mīnitō tōmengā nānō ānonque ante ēñente cædinque quēwencæmīnimpa. Botō mōnō Awēnē beyæ tee mōnete wæcōmo incæ āmo ēñēdāni. ² Mīnitō nāmā ængō cædāmai inte, Ōnōmoque bai imopa, ante pōnēninque wadāni inānite edæ ædæmō cæedāni. Æiquedō waa cæquināni, ante wædāmai inte edæ piyænē cæte quēwēdāni. Ayæ wadāni mīnitō imīnite wēnæ wēnæ cædāni wædinque tōmēnāni inānite wæætē piñāmai inte ædæmō waadete cæedāni. ³ Mīnitō, Mōnō pōnencabo piyænē cædinque cōwē adodō ante pōnente edæ Wængongui

Ōnōwoca tōnō ānque bai ee ēwocæimpa, ante nanguī cædinque wacā ingā wacā ingā edæ waa cæedāni.

⁴ Mōnō Awēnē pōnō cæcā ate watapæ bacæimpa, ante mīnitō adodeque ante pōnente tocæmīnimpa, ante Wængongui mīnitō imīnite edæ adodeque ante aa pegacæimpa. Ininque mānīne, Watapæ bacæimpa, ante mīni pōnēne adodeque i bai Wængongui Ōnōwoca edæ adobai adowocaque inte quēwengampa. Tōmengā adowocaque nempo quēwēnōmō inte mōnō adobai edæ adocabomonque iñōmō imopa. ⁵ Mōnō Awēnē edæ adocanque pōni inongā iñongante tōmengā ingante mōnō wede pōnēnō adobai adodeque pōni inepa. Ayæ adodō ante pōnēninque æpænē guidinque mōnō adopænēnque guite bai guitamompa. ⁶ Wængongui adocanque pōni inongā inte tōmengā tōmāmō Wæmpocā adocanque ingampa. Tōmengā iñōmō edæ Tæiyæ Awēnē pōni inongā inte tōmāmō imonte nē aacā ingampa. Tōmengā adocanque pōni nempo quēwēñōmonte tōmengā wæætē mōnō tōmāmō mīmōnē quēwengampa.

⁷ Incæte mōnō Codito, Mīmōnē bitō entawenganca ænte cæe, ante tee mante bai cædinque adocanque ingante waadete pōnō cædinque wacā ingante waadete pōnō cædinque edæ tōmāmō imonte tōmengā nānō pōnō cæcōo eyepæ pōngā ænīnque entawēmompa. ⁸ Codito mānōmai cæcæcæimpa, ante pōnēninque awēnē Dabii wodi iīmai ante yewæmongacæimpa.

“Tōmengā æibæ æicæ cædinque wadāni inānite bæi ongonte ñā cæyænte tōmengā miñæ ænte mæicā æigadānimpa.

Ayæ æidinque tōmengā mōnō waocabo iñōmonte, Mīnitō entawenguīnō, ante eyepæ pædæ pōngā ænte entawengamōimpa,”

ante Dabii nānō yewæmonte angainō bai impa.

⁹ Mānīne, “Æigacæimpa,” ante nāni angaine iñōmō quīnante yewæmongatīi. Edæ, Tōmengā inguipoga tadōmengadæ do wææningā inte æigacæimpa, ante odōmoncæte ante yewæmongatimpa. ¹⁰ Nē wæængaingā inongā iñōmō adocā do ōnædē gōmoga æidinque inguipoga tōmāo ōnædē tōmāo tōmāo iñōmō edæ godōmenque æibæ pōni quēwengā inongā ingampa. ¹¹ Tōmengā tōmancoo nē ēnempocā inongā inte adocā mōnō waomō imonte pōnō angā ænte entawēninque mōnō iīmai cæmō bamōimpa. Pancamōniya imōnite tōmengā angā ēñēninque tōmengā nānō nē da godongaimōni batamōnīpa. Pancamōniya guiquēnē Wængongui waa pōni nānō pōnō

cægainō ante nē apænemōni batamōnīpa. Pancamōniya guiquēnē Wængonguī beyæ nē apænemōni batamōnīpa. Pancadāniya guiquēnē nē aadāni badānitapa. Ayæ pancadāniya guiquēnē nē odōmonte apænēdāni badānitapa. ¹² Mānōmai pōnō cædinque mōnō Codito mōnō ocamō bai īnongā inte, Botō baō bai adoyonque bai īnāni īñōmō ñancæ āate bai tæi piñænāni ēwocacædānīmpa, ante pōnō cægacāīmpa. Mōnō īmonte tōmengā, Mīnitō Wængonguī quīmīni īnōmīni inte tōmānāni īnānite nē cæmīni inte godō cæcæmīnīmpa, ante pōnō cægacāīmpa.

¹³ Mīni wede pōnēnō ante mīnitō tōmāmīni adoyōmō ante pōncæcæmīnīmpa, ante mōnō Codito pōnō cægacāīmpa. Ayæ, Botō Wængonguī Wēmo īñōmote mīnitō botō īmote ate bai pōncæcæmīnīmpa, ante tōmengā pōnō cæcampa. Ayæ æmæwo pæmīni bai mīni baquinque mīnitō botō entawēnō ædæmō entawencæmīnīmpa, ante Codito edæ da pōnongā eyepæ æmōmpa. ¹⁴ Īnīnque æmæwo pædimō inte wēñæmō īnāmai īmō īnīnque mōnō edæ oda cædāmai īngæīmpa. Wadāni guiquēnē mā pōnēnīnque, Ēbānō cæmō ate oda cæquināni, ante edæ nāmāneque tedewēnānīpa. Tōmēnāni īñōmō edæ babæ cæcæte ante cædinque waa cæte bai cædāni ataqeedāni. Woboyæ ædæ go ædæ go pæmænte bai cædinque tōmēnāni wadō ante odōmonte tedewēnānīpa. Mānōmai wido piñænte bai cædāni incæte mōnō īñōmō Codito nānō entawēnoncoo ænte entawēnīnque āā mæñāmai īngæīmpa.

¹⁵ Wæætē Wængonguī, Nāwangā pōnī impa, ante nānō apænægāinō ante mōnō tōmānāni īnānite waadete pōnēnīnque apænecæīmpa. Mānōmai cædinque mōnō Codito baō bai īñōmonte tōmengā nē Ocamō bai inte pōnō angā beyænque mōnō ñancæ āadinque godōmenque picæmō bamōmpa. ¹⁶ Mōnō baonga wepæ eyepæ ēñadinque ñancæ āadinque tæi piñænte pæte quēwēmōmpa. Adobai mōnō Codito baō tōnō adoyonque bai īnōmō inte mōnō tōmengā nānō apænēdō ante ēñēnōmo inte ñancæ āate pæte bai quēwēmōmpa. Ayæ wæætē ocai encamō inte mōnō pæ pagængūnīnque wangō tēnāmai guīncāi bamē impa. Ayæ adobai mōnō Codito nānō waadete pōnēnō ante mīmōnē entawēmō inte mōnō wacā īngā wacā īngā godō aamō inte mōnō pōncæcabo incæ edæ tæi piñænte entawēmōmpa.

Codito nempo mōnō īmaī quēwēmōmpa, ante

¹⁷ Īnīnque mōnō Awēnē nempo quēwēnōmo inte botō nō āmo ēñēdāni. Wadāni nē ēñēnāmai īnāni ōnonquedō ante pōnēnīnque quēwēnānīpa. Mīnitō

guiquēnē adobai quēwengāimīni inte ñōwo wæætē ñimpo cædinque mānōmai cædāmai īnguēnē quēwēmīni. ¹⁸ Tōmēnāni guiquēnē mīmō ēñēnānīpa diyæ Wængonguī weca pōnguīnāni. Mīmō ōmædēnāni inte tōmēnāni ocai ēñēnāmai badāni beyænque Wængonguī weca pōnāmai īnānīpa. Edæ wentamō mongænīnque tōmēnāni ocai wēmō encadāni inte idiquībæ ante pōnēnānīpa. ¹⁹ Īnāni īñōmō tōmēnāni nāni cæquēnēnō ante ñimpo cædinque ñōwo wæætē guīñēnāmai inte baō nāni towēinēnō ante cæcæte ante nāmā pædæ godonte bai edæ cædānīpa. Edæ, Quīēmē wīwa cæquīl, ante mānīnonque cæcæte ante godōmenque cæinente wædānīpa.

²⁰ Wæætē mīnitō guiquēnē, Mōnō Codito æbānō īngāā, ante pōnēnīnque edæ wīl tōmēnāni nāni cæinēwēnō bai mīni cæquinque edæ pōnēmīnitapa. ²¹ Tōmengā apænecā edæ wīl ēñēmīnitawo. Īñæmpa, Wængonguī nō pōnī nānō apænægāinō ēñēnīnque Ītota īñōmō mīmōnē entawengampa, ante mīnitō tōmengā nempo quēwēñōmīnīte tōmengā mānōmāinō ante adodō ante edæ do odōmonte apænecā ēñēmīnitapa. ²² Mīnitō wēēnēdē mīni cæte quēwengāinō ante tōmengā īmaī ante odōmonte apænægacāīmpa. Babæ pōnente mīni cæinente wæwēnō beyæ mīnitō mīmōnē wentamō mongænte wæwēmīni inte do mīni entawengāinō ante edæ wido cæedāni, ante odōmonte apænægacāīmpa. ²³ Edæ mempoga ēñagāimīni inte mīnitō ēñēnō do mīl pōnī encamīni inte mīlīnonque ante pōncæcæmīnīmpa, ante odōmonte apænecā ēñēmīnitapa. ²⁴ Ayæ, Botō pōnō badōmo ate mīnitō botō bai tæiyæ wæmō ēwocadinque nō pōnī cæte quēwencæmīnīmpa, ante Wængonguī pōnō badongā ate mīnitō mīmīni bagamīnīmpa. Īnīnque tōmengā, Mānīnō Wængonguī nō pōnī nānō entawēnō ænīnque mīnitō ædæmō entawencæmīnīmpa, ante odōmonte apænecā do ēñēmīnitapa.

²⁵ Mānōmai beyæ mīnitō tōmāmīni, Mōnō adocabomō īmōmpa, ante adīnque babæ mīni tedewēnīnō ante adīnque cædinque wacā īngante wacā īngante nāwangā ante apænēdāni.

²⁶ Āngūl bamīni incæte mīnitō piyænē cædinque wacā īngante wēnæ wēnæ cædāmai ee aedāni. Edæ gāwædecæ ganca nanguī pīnīnque edæ mīni wæquinque īmaīmpa. ²⁷ Mānōmai cædinque mīnitō, Wēnæ incæ pōnō cæcā ate botō ængūl batābopa, ante pōnente wædinque ñōwo wæætē, Wēnæ botō weca pōnāmai incæcāīmpa, ante nāmā wææ cæedāni.

²⁸ Nē awēmō ænīngā īñōmō ñōwo edæ ee cædinque awēmō æñāmai incæcāīmpa.

Wæætē, Botō ōnompoca nanguī cædinque ænte quēwēninque nē ænguēnēnāni inānite adobaī godōmo æncædānimpā, ante cæcæcāimpā.

²⁹ Mīnitō nāmā ōnōne wææ aadinque wīwa ante tededāmaī iedāni. Wæætē edæ, Wadāni æbānō ante ēñguēnēnāni inānii, ante pōnēninque mīnitō, Tōmēnāni tæī piñænte entawencædānimpā, ante cædinque nē ēñēnāni beyænque ante waadete godō cædinque apæneedāni. ³⁰ Wængonguī Tæiyæ Waēmō Ōnōwoca iñōmō mīnitonga pō guidinque, Botō æmo beyænque mīnitō iñcayæ ate æmæwo abæ tawænnte gote baī quēwencæmīnimpā, ante odōmoncæte ante yewæmonte baī cægacāimpā. Inique mīnitō, Wēnæ wēnæ mōni cædō beyæ ante Wængonguī Ōnōwoca wæwente badāmaī incæcāimpā, ante wææ cædinque edæ ēñente cæedāni.

³¹ Ayæ, Wīi waēmō awædō, ante mīni pīwēnīnō ante edæ ñimpo cæedāni. Āimō ante mīni pōnēwēmāmo adobaī ñimpo cædinque ænguī pōni mīni badimāmo edæ ñimpo cæedāni. Yæ ante mīni piñte ogæ tedewēmāmo, wacā ingante ante mīni piñte tedewēmāmo edæ ñimpo cæedāni. Ayæ piñte cæquinque ante mīni entawēnīnō ante tōmānō edæ wido cæedāni. ³² Wæætē godongāmæ waadete cædinque wacā caate wæcā adinque mīnitō godongāmæ Ca ca wæcæmīnimpā. Ayæ Codito ængā beyænque Wængonguī mīnitō imīnite pōnō ñimpo cæcampa cæmīnii. Tōmgē ñimpo cæcā quēwēmīni baī mīnitō adobaī cædinque wadāni wēnæ wēnæ cæyōnānite wacā ingā wacā ingā ñimpo cæmīni quēwēnāni.

5

Wængonguī wēmīni, iīmaī cæte quēwēedāni, ante

¹ Inique Wængonguī wēmīni iñōmō mīnitō tōmgē nānō nē waademīni inōmīni inte Wæmpocā nānō cæi baī ante cōwā adinque adobaī cæedāni. ² Baō, Wængonguī quī, ante godōninque, Oguī wacæīmpā, ante iya tānāni baī cædinque Codito mōnō imonte waadete pōnēninque edæ adobaī cægacāimpā. Tōmgē iñōmō, Botō Wængonguī quīmo imopa, ante nāmā wepæ pædæ godōninque mōnō imonte wæætē ængacāimpā. Inique tōmgē nānō waadete pōnēnō baī mīnitō adobaī waadete pōnēninque quēwēedāni.

³ Wæætē edæ mīni pōnencabo iñōmīnite waocā adocanque incæ nānōogængā ināmaī iñongante godō guēa mōnāmaī iedāni. Wentamō mongæ wæcæ wæ, ante edæ wīwa cædāmaī iedāni. Nanguī māincoo ante æñente wædāmaī iedāni. Mānīnō tōmānō cædāmaī imīni inte mānīnō ante edæ adopoque incæ tededāmaī imæwedāni.

Edæ Wængonguī quīmīni tæiyæ waēmō entawēmīni inte mīnitō mānīnō tōmānō cædāmaī incæmīnimpā. ⁴ Wentamō ante nāni pōnēwēnō baī mīnitō wæætē adobainō ante pōnēnāmaī iedāni. Ōnonque ante nāni tedewēnō baī mīnitō wæætē adobaī tededāmaī iedāni. Wēnæ wēnæ ante pōnente nāni badete towēnō baī mīnitō wæætē adobaī badete todāmaī iedāni. Iñæmpā Wængonguī quīmīni inōmīni inte mīnitō mānīnō ante wīi pōnenguēnēmīni imīnimpā. Wæætē Wængonguī ingante waa ate pōnēninque apænequēnēmīni imīnimpā.

⁵ Awēnē Odeye Wængonguī nempo ayæ Awēnē Odeye Codito nempo edæ ædānīdō nē guīte ænguīnāni inānii. Nānōogængā ināmaī iñongante nē towēnāni tōnō wentamō pōnente nē cædāni iñōmō tōmēnāni edæ dicæ guīte ænguīnāniyaa. Ayæ māincoo ante wacā quī nē æñente wæwēnāni iñōmō edæ, Māincoo incæ mōnitō wængonguī impā, ante baī cædāni inōnāni inte tōmēnāni adobaī edæ guīte ænāmaī incædānimpā. Ante āmo ēñēedāni. ⁶ Wadāni, Mīnitō oda cæcæmīnimpā, ante ōnonquedō ante tedete cæyōnānite mīnitō wæætē tōmēnāni nāni tededō ante edæ ēñēnāmaī iedāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badinque tōmēnāni inānite pancæcāimpā. ⁷ Inique mīnitō gooque gomō adinque tōmēnāni tōnō godongāmæ cædāmaī iedāni.

⁸ Mīnitō iñōmō wēnēñedē wentamō mongæmīni ingaimīni inte ñōwo wæætē edæ mōnō Awēnē nempo quēwēninque edæ ñāō baī entawēmīnimpā. Inique Mæmpo nānō ñāō ēmōnō baī entawēmīni inte mīnitō ñāō iñōmō cægonte baī edæ waa quēwēedāni. ⁹ Edæ waiwæ waincate baī cædinque mōnō wadāni inānite godō waa cæquinque mōnō edæ ñāō iñōmō quēwēmompā. Ayæ nō pōni mōnō cæquinque nāwangā pōni ante mōnō apænequinque edæ ñāō iñōmō quēwēmompā. ¹⁰ Ayæ, Ēbānō cæmō ate mōnō Awēnē, Waa cæmīni abopa, ante apænequingā, ante ēñencæte ante cædinque do ēñēnīmi inte tōmgē nānō waa adonque cæedāni. ¹¹ Wadāni wēmo iñōmō ōnonque nāni cædō ante adinque mīnitō iñōmō edæ gooque gomō aedāni. Ayæ tica ēnente baī cædinque, Tōmēnāni nāni cædō wēnæ wēnæ impā, ante edonque odōmōmīni acædānimpā. ¹² Awēmō nāni cædō beyæ guingo imonte wæquēnēnāni iñōnāni mōnō iñōmō edæ guīñēnete wædinque mānīnō ante edæ tededāmaī ingæīmpā. ¹³ Wæætē edæ, Awēmō iñōmō æbānō cædāni, ante tōmānō ante edæ tica ēnente edonque acæīmpā. ¹⁴ Nāō beyænque edæ edonque amompā. Mānōmaī i beyæ iīmaī ante āmotamīni ante baī apænedānimpā.

“Bitō wangæ möimi inte ñāni ömæmonte ængæ gantie.

Edæ ængæ gantiyömite

Codito incæ pönö tica ënente bai cæcä ate ñāo entawencæbiimpa,” ante apænedänipa.

¹⁵ Mänömaï beyæ munitö ocai ömæcamini inämaï inömini inte wæætë ocai në encamini inte cædinque, Æbänö waa cæte quëwenguimo, ante nämä waa ate waa cæedäni. ¹⁶ Wadäni ñöwo incæ godömenque wiwa cædänipa cæminii. Eyepæ ifonte mini cæquënenonque ante edæ do cæedäni. ¹⁷ Edæ wëñænäni owempote cædäni bai munitö adobai cædämaï iedäni. Wæætë, Wængongui æbänö angantawo, ante ëñëninque mäninonque ante ëñente cæedäni. ¹⁸ Woadäni biinömx näni ämæ bedinque dowænte badinque godömenque pönënamai cædinque tömënanäi näni ewente wæwenguinque bewënanipa. Inique munitö inömo bete dowænte badämaï iedäni. Wæætë Wængongui Önowoca ingante ædæmö ewocate quëwëedäni. ¹⁹ Ämotamini ante bai godongämæ watapæ ante tedeedäni. Awënë Dabii wodi nänö ämotamini angaintaa adinque edæ adodö äedäni. Ayæ munitö nämä mä pönëninque, Iïmai Wængongui beyæ mönö ämotamini angæimpa, ante adodö äedäni. Wængongui Önowoca angä ëñente ewocadinque tömengä ämotamini nänö änönö ante adodö äedäni. Mimöno ämotamini ante bai pönëninque munitö mönö Awënë ingante watapæ pönente äedäni. ²⁰ Æbämë bayonte munitö tömänö beyæ ante edæ Mæmpo Wængongui ingante cöwë waa ate pönëninque mönö Awënë Codito emöwo ante apæneedäni.

Mæmpoidi näni wencabo Iïmai quëwencædänimpa

²¹ Mönö Codito ingante guiñente wædinque munitö wii nämä mini pönënonque bai cædinque wæætë edæ, Në änanäi æbänö änanii, ante Ao ate nöinö ante cæedäni.

²² Onquiyæmini ëñëedäni. Minitö, Mönö Awënë nänö angainö bai mönö ëñente cæcæimpa, ante tömëmini nänöögænäni inänite Ao ante ëñente cæedäni. ²³ Edæ Codito ingante mönö godongämæ pönencabo inömonte mönö Codito adocä inömo, Quëwencæminimpa, ante në Engaingä inongä ingampa. Tömengä tönö mönö adoyonque bai inömonte tömengä inömo mönö Ocamö bai inongä ingampa. Ayæ onquiyængä tönö onguiñængä adobai adoyonque bai inönote onguiñængä inömo në ocamö bai inongä ingampa. ²⁴ Inique Codito ingante mönö godongämæ pönencabo incæ tömengä ingante Ao ante ëñente cæmö bai onquiyænäni adobai tömënanäi

nänöögænäni inänite cöwë edæ Ao ante ëñente cæquënenäni inänipa.

²⁵ Wæætë onguiñæmini ëñëedäni. Minitö Codito nänö waadete pönëno bai tömëmini nänöögænäni inänite adobai waadete pönëedäni. Tömengä ingante mönö godongämæ pönencabo inömonte tömengä inömo mönö imonte waadete pönëninque mönö imonte æncæte ante pönö cædinque nämä wepæ godongacäimpa. ²⁶ Ayæ, Wængongui nänö apænedö waëmömx imæ bai inönte munitö inömo mäninö ante ëñëninque tæiyæ waëmö ewocate quëwencæminimpa, ante mönö Codito adocä mönö imonte edæ ñä mënongate bai cægacäimpa. ²⁷ Mänömaï tæiyæ waëmö badinque mönö wentamö mongænämaï inte Codito ingante mönö pönencabo adocabomö inömonte tömengä inömo edæ nänöögængä ænte bai cædinque mönö pönencabo imonte, Bitö, ante apænegacäimpa. Ayæ mönö cabo inömonte tömengä, Bitö idiquibæ entawënamai inömite ædö cæte bitö imite piinte anguii, ante pönö cægacäimpa. Ayæ wæætë edæ, Nä mënongate bai tæiyæ waëmö ëmömi inique mönö edæ guëä ñāo apäte bai ëmongæimpa, ante Codito nänöögængä ænte bai mönö imonte pönö ængacäimpa.

²⁸ Onguiñænäni inömo adobai tömënanäi, Botö baö, ante näni pönë bai tömënanäi nänöögænäni inänite adobai waadete edæ pönenguënenäni inänipa. Æcänö tömengä nänöögængä ingante waadete pönëna inömo tömengä nämä baö ante waadete pönente bai edæ cæcampa. ²⁹ Inæmpa waocä nämä baö cöwë piinämaï ingampa. Wæætë, Botö baö, ante edæ pæ gompodique pönö aacampa. Ayæ adobai Codito ingante mönö godongämæ pönencabo inömonte edæ tömengä adobai, Botö baö, ante bai cædinque mönö imonte wææ gompodique pönö aacampa. ³⁰ Edæ mönö Codito në Ocamö bai inongä inte në angä inöngante mönö wæætë tömengä tönö adoyonque bai inte ëñente quëwëmompä. ³¹ “Mänömaï beyæ onguiñængä mæmpo tönö badä inate emö cæte godinque onquiyængä ingante, Botö nänöögængä, ante æmæwo monte quëwencæcäimpa. Mënaa inina incæ tömëna wæætë näna gæncaya badinque adocanque bai bacædaimpa,” ante yewæmongatimpa.

³² Mänömainö ante näni yewæmongainö ante edæ wë wodonte bai i inönte wii tömänö ante ëñëmompä. Incæte, Codito ingante mönö godongämæ pönencabo inömonte mönö tömengä tönö adocanque bai imöimpa, ante munitö ëñencæminimpa, ante botö apænetabopa. ³³ Incæte onguiñæmi nämä bitö waadete pönënonganca tömëmi nänöögængä ingante edæ adoganca

waadete pöncæbiiimpa. Onquiyæmi adobaï, Botó nânöogængä ingampa, ante adinque edæ ëñente cæcæbiiimpa.

6

¹ Wëñæmîni guiquënë ëñeedäni. Mînitö mönö Awënë nempo quëwënomîni inte tömëmîni mæmpoidi inänite edæ ædæmö ëñente cæedäni. Æcänö edæ mänömaï cædaa tömengä edæ nö pöni cæcampa.

² “Wæmpocä ingante wäänä inante waa adinque tömëna inate godö waadete cæe,” ante Wængonguï incæ wææ angacäimpa. Tömengä wade nänö wææ angainö äninque, Mîni waa quëwënguinqe cæcæmînimpa, ante apænedämaï ingaingä inte ñöwo iine ante wææ äninque, Mîni waa quëwënguinqe cæcæmînimpa, ante mä apænegacäimpa. ³ Edæ iine ante wææ äninque tömengä, “Mänömaï cæmîni iinque mînitö watapæ quëwëninque iimæca wantæpiyæ quëwëncæmînimpa,” ante mä apænegacäimpa.

⁴ Wæmpomîni guiquënë ëñeedäni. Mînitö wëñäni wîi äinäni bacædänimpa, ante wææ cædinque mînitö tömënäni inänite piinte cædämaï ledäni. Wæætë, Mönö Awënë wææ aadinque mönö imonte päninque odömönte apænegacampa, ante adinque mînitö tömengä nänö cæi bai adobaï cædinque wëñæñäni inänite ædæmö wææ aadinque mönö Awënë nänö apænedö ante odömönte apænemîni ate tömënäni waa pæcædänimpa.

⁵ Waadäni mînitö imînite ö æñäni inte tömënäni beyænque cæte nê quëwëmîni iñöminite apænebo ëñeedäni. Iimæca mînitö awënëidi inänite mînitö waa adinque guñente wædinque tömënäni nani äno ante ëñente cæedäni. Mînitö Codito angä ëñente mîmönê nö pönente cæmînitawo. Iinque edæ iimæca awënë angä ëñente edæ adobaï mîmönê nö pönente cæedäni. ⁶ Mînitö edæ, Awënë botö imote waa acæcäimpa, ante tömengä ayongante ëñente cæmînitawo. Iñæmpa awënë dæ goyongante adobaï cöwë ëñente cæedäni. Codito botö imote nê godonte Ængaingä ingante nê cæte quëwëmö imopma, ante pönëninque mînitö edæ Wængonguï nänö äñönö ante mîmönöque pönente cæedäni.

⁷ Mînitö mîmönö piyænê cædinque iimäi ante pönente cæedäni. Iimæca awënë ingante cædinque botö wîi waocä beyænque ante cæbopa. Wæætë Wængonguï Awënë beyænque ante botö iimæca awënë ingante cæbopa, ante pönëninque pæ piñænte bai cæedäni. ⁸ Mînitö iimäi ante edæ do ëñëmînipa. Mînitö wacä nänö ö æñimîni inte tömengä beyænque nê cæte quëwëmîni incæ abæ tawænte ee gote bai nämä beyænque cæte quëwëmîni incæ mînitö imînite mönö

Awënë iñömö, Bitö ægancadö waa cæbii, ante adinque wæætë eyepæ pöni pædæ pönongä ænguimîni imînipa.

⁹ Waocä ingante nê ö æmîni guiquënë ëñeedäni. Mîni nê ö ængainäni inänite adobaï waa cæedäni. Tömëmîni Awënë incæ tömënäni Awënë adocä inongä inte öönædê owocampa cæmîni. Tömengä iñömö wacä ingante wadö wacä ingante wadö ate pönente cædämaï ingampa. Mänömainö ante do ëñëmîni inte mînitö beyænque cæte nê quëwëñäni inänite edæ piinte äninque edæ pæmëñänämaï ledäni.

Tæinta wëñate bai mönö tæi piñænte ëwocacæimpa

¹⁰ Nöwo iimäi yewæmöninque botö idæwaa yewæmömopa. Mînitö mönö Awënë nempo nê quëwënomîni iñöminite tömengä nänö tæi piñænö pædæ pönongä æninque tæi piñænte entawente quëwëedäni. ¹¹ Mînitö wææ caaquincoo, ante Wængonguï eyepæ pöni nänö da pönönincoo tömancoo æninque wëñate bai cædinque tæi ongödäni. Edæ mänincoo tömancoo wëñate ongöñöminîni wëñæ awënë, Oda cæcæmînimpa, ante nangui ëñente cæcä incæte mînitö wæætë oda cædämaï inte edæ tæi ongocæmînimpa.

¹² Edæ wîi waodäni inänite mönö guëadö guëa cæcæimpa. Wæætë wëñæidi awënëidi tönö wëñæidi inänite nê äñäni iñönänte mönö tömënäni inänite wæætë guëadö guëa cæcæimpa. Inguipoga wëmö iñömö tæi piñænte ënempodäni tönö öönædê iñömö wëñæcoo nê wiwa ëwocate cædäni tönö mänimpodäni mämö ti gotodoncæ cæyönänte mönö wæætë guëadö guëa cæcæimpa. ¹³ Iinque tömënäni piinte mämö nani wiwa cæönæ iinque bayonte mönö wodii winönämaï inte tömënäni inänite wæætë da godongæimpa. Ante ayæ, Tömää edæ eyepæ cæte ate mönö edæ tæ go wæænämaï inte adiyæ ongongæimpa, ante cædinque mînitö Wængonguï nänö, Wææ caaquincoo, ante tæinta bai nänö da pönönincoo edæ do eyepæ æninque tömancoo edæ da wëñæedäni.

¹⁴ Wëñadinque edæ wodii winönämaï inte edæ næ gongænte tæi ongödäni. Edæ, Tæi wææ caaquincoo, ante pönö tæi pacadeyænte bai cædinque mînitö Wængonguï nänö nö pönëno entawëninque adobaï nö entawente quëwëedäni. Tæcætawë inö tæiñeta mîni wææ wodontawëinta ante wëñate bai cædinque Wængonguï tæiyæ waëmö nänö cædö ante edæ entawente tæi cæte ongödäni. ¹⁵ Mönö Codito pönö cæcä beyænque mönö godongämæ piyænê cæcæimpa, ante watapæ mönö ëñënö beyæ pogodo gote apænegæte ante cædinque

mīnitō awæncata tæi wææ cæwainta wëwate bai cædinque gånë pönente cædāni.

¹⁶ Yabæque pōni wææ cæquinta tæinta bai næænte bai cædinque mīni wede pōnēnō ædæmō entawëninque quëwëedāni. Ìninque nē wīwa cædongā ponte gonga encado bai to piyæncate bai cædinque, Mīnitō oda cæcæmīnimpā, ante cæcā ate mīnitō mīni wede pōnēnō beyænque tōmengā wīwa nānō ānō ante edæ ëñēnāmaī incæmīnimpā.

¹⁷ Ayæ, Ocamō incainta tæinta bai impā, ante wææ wencate bai cædinque mīnitō Codito pōnō ængā beyænque mīni quëwenguīnō ante ænte entawencæmīnimpā. Mīnitō yaēmë wææ næænte bai cædinque Wængonguī Ònōwoca apænecaī ëñëninque nāni yewæmongainta ate ædæmō ëñëninque edæ cōwë entawëedāni.

¹⁸ Ayæ Wængonguī Ònōwoca ingante ëwocadinque mīnitō tōmengā ingante, Wængonguī bitō cōwë cæcæbiimpā, ante godōmenque nangui apænedinque ñine cædāmaī iedāni. Mānōmaī cæcæte ante mīnitō mīmīni ongōninque wæntæte badāmaī inte Wængonguī quīnāni tōmānāni beyæ ante cōwë apæneedāni. ¹⁹ Ayæ botō beyæ ante adobai apænemīni ëñëninque Wængonguī pōnō cæcā ate botō edonque tedecæboimpā, āmopa. Edæ Codito ingantedō ante wëñëñedë mōnō ëñëñāmaī ingāine ante botō ñōwo watapæ ëñëninque guīñënedāmaī inte apænebo ëñencædānimpā, āmopa. Mānōmaīnō ante mīnitō Wængonguī ingante apæneedāni, āmopa. ²⁰ Māñine ante botō wadāni weca nē gote apænebo beyænque ñōwo gæguincamë encaipobo inte wæbopa. Ìninque, Māñine ante nē apænequëngā inte Pabodo cōwë guīñënedāmaī inte apænecæcāimpā, ante mīnitō botō beyæ ante apæneedāni.

Waa quëwencæmīnimpā, ante

²¹ Botō Pabodo ññōmō æbānō quëwëmoo, ante, Quīnō bai cæboo, ante ëñencæte ante wæmīnitawo. Edæ Tiquico mōnō tōññacā mōnō nē waadecā ñongā inte tōmengā ñōwo pōninque mīnitō ñmīnite māñinō tōmānō ante apænecaī ëñencæmīnimpā. Tōmengā ññōmō mōnō Awënë nempo quëwëninque tōmengā beyæ nē cædongā inte cōwë nē pōngā inte ædæmō cæcā acæimpā.

²² Ìninque, Pabodoidi æbānō quëwëñāni, ante tōmengā pōnō apænecaī ëñëninque mīnitō wampo pōnëninque tæi piñænte entawencæmīnimpā. Ante cædinque botō, Ædæmō apænebi ëñencædānimpā, ante tōmengā ingante mīnitō weca da godōmo pongā aedāni.

²³ Mæmpo Wængonguī tōnō mōnō Awënë Itota Codito mīnitō ñmīnite waadete pōnō cæda ate mīnitō mīni caipæ incæ gånë entawëninque wede pōnëninque godongāmæ

edæ waadete pönencæmīnimpā, āmopa. ²⁴ Æcānō mōnō Awënë Itota Codito ingante cōwë waadete pönente ñimpo cædāmaī ña ññōmō tōmengā ingante Wængonguī pōnō waadete cæcæcāimpā, ante botō Wængonguī ingante apænebopa. Māninque ante yewæmōmopa.

Pidipenteidi inänite Pabodo nänö çadota ante yewæmongainta

Waa quëwëedäni, ante

¹ Itota Codito ingante nê cæmōna inte botō tōnō Tīmoteo guëa apænemōna ininque botō Pabodobo adoboque yewæmōmopa. Mīnitō Pidipoto iñōmō quëwëninque Wængonguī quimīni inōmīni inte Itota Codito nempo nê quëwëmīni iñōmīnite botō, Acæmīnimpa, ante yewæmōmopa. Mīni pōnencabo beyænque ante pancamīniya nê aamīni iñōmīnite pancamīniya guiquëñê nê cæmīni iñōmīnite pancamīniya guiquëñê ònōmīnique iñōmīnite botō edæ, Tōmāmīni edæ acæmīnimpa, ante yewæmōmopa. ² Mōnō Mæmpo Wængonguī mōnō Awënë Itota Codito tōnō waadete pōnō cæda ate gānê pōnëninque waa quëwëedäni, ämopa.

Nê pōnëmīni beyæ Wængonguī ingante apænebopa, ante

³ Eyedëmê mīnitō imīnite ante pōnëmo inte botō Wængonguī ingante waa ate pōnëninque apænebopa. ⁴ Ininque mīnitō beyæ ante Wængonguī ingante wantæ iñō wantæ iñō apænedinque botō, Waa quëwëmīnipa, ante watapæ todirque apænebopa. ⁵ Edæ, Botō tāno goyedê mīnitō godongāmæ cæmīnitapa. Ayæ, Mōnō Codito ingantedō ante mīnitō ñōwo ganca godōmenque watapæ apænemīnipa, ante pōnëninque botō, Wængonguī bitō pōnō cæbi ate pidipenteidi waa cædänipa, ante apænebopa. ⁶ Mīnitō botō ayōmo tæiyæ waëmō entawencæmīnimpa, ante nê mā badongaingā inongā inte Wængonguī ñōwo Itota Codito nänö ponguinganca godōmenque pōnō badōninque cōwê inque badongā ate mīnitō ædæmō pæimīni bacæmīnimpa. Mänōmaī impa, ante botō, Nāwangā impa, ante do ëñënanipa.

⁷ Mōnō Codito ingantedō ante watapæ mōni ëñëninō ante botō wææ äninque, Nāwangā impa, ante apænebopa. Māñine botō apænedê beyænque pancayedëña botō imote tee mōnedäni wæbopa. Incæte tee mōnedäni wæbo incæ, Nāwangā impa, ante wææ ämo incæ Wængonguī nänö waadete pōnō cægäinō ante ænte entawëñōmo mīnitō adobai māñinō ante æninque botō tōnō godongāmæ entawëmīnipa. Ininque, Mōnō māñinō ante äanque bai entawëmō imopma, ante mīnitō imīnite waadete pōnëninque botō, Mīnitō ædæmō pæimīni bacæmīnimpa, ante nōingā cæte pōnëmopa. ⁸ Itota Codito mōnō imonte nanguī waadete pōnengantawo. Edæ tōmengā waadete nänö pōnëno ante entawëninque botō mīnitō

imīnite waadete pōnëmopa, ante adinque Wængonguī incæ, Pabodo nāwangā mīnitō imīnite nanguī waadete pōnengampa, ante apænebaingampa.

⁹ Ininque mīnitō beyæ ante botō Wængonguī ingante iīmai ante apænebopa. Mīni waadete pōnencabo iñōmīnite Wængonguī pōnō cæcā ate godōmenque waadete pōnencæmīnimpa. Ayæ waadete pōnëmīni inte mīnitō, Quinō wënæ wënæ i, Quinō waa i, ante edonque adinque nō apænte ämīni bacæmīnimpa. ¹⁰ Mōnō æbānō cæte waa quëwënguī, ante edonque adinque mīnitō Ao ante waa quëwëninque Itota Codito nänö ponguinganca wentamō mongænāmaī inte tee tēwadāmaī imīni incæmīnimpa. ¹¹ Ayæ Itota Codito pōnō cæcā ate mīnitō nō cædinque waa quëwëmīni adinque wadāni Wængonguī ingante waa ate pōnëninque apænecædänimpa, ante botō Wængonguī ingante apænebopa. Ayæ mīnitō mänōmaī inte waa cæmīni adinque tōmānāni wæætê Wængonguī ingante apænedinque, Wængonguī ëñëmi. Bitō ñāo bai ëmōnōmi inte waa pōni cæbipa, ante apænecædänimpa, ante cædinque botō mīnitō beyæ ante Wængonguī ingante apænebopa.

Pabodo, Codito beyænque quëwëmopa, angampa

¹² Inānāni apænebo ëñëedäni. Mänōmaī cædäni botō wædō incæ wīi ònonque cætimpa. Wæætê, Codito beyænque Pabodo caate wæcampa, ante adinque wadāni godōmenque nanguī ināni Codito ingantedō ante watapæ mōni apænedō ëñëninque wede pōnënanī badänipa. ¹³ Edæ, Codito ëmōwo apæneca beyænque Pabodo ingante tee mōnedänipa, ante tededäni ëñëninque odōmāno tæiyæ awënë oncō wææ wänōnāni incæ wadāni wayōmō quëwënanī incæ tōmānāni do ëñënanīpa. ¹⁴ Mōnō Awënë nempo quëwënanī incæ, Pabodo tee mōnete wæcampa, ante wædinque wote tōmānāni godōmenque wede pōnëninque badänipa. Ininque wede pōnëninque tæi piñænte entawëninque tōmēnāni guñëñāmaī inte Wængonguī nänö apænedō ante godōmenque apænedänipa.

¹⁵ Pancadänīya, Pabodo miñæ godōmenque nanguī ināni godänipa, ante pōnō piinte adinque Codito ëmōwo ante apænedäni incæte botō imote guëadō guëa piñcæte ante apænedänīpa. Mänōmaī i incæte wadāni guiquëñê, Pabodo tōnō mōnō godongāmæ cæcæimpa, ante gānê pōnëninque Codito ëmōwo ante apænedänīpa. ¹⁶ Nê gānê pōnente apænedäni guiquëñê, Codito ingantedō ante watapæ mīni ëñëninō ante Pabodo wææ ancæcäimpa, ante botō imote godō gō cæcampa, ante do ëñënanīpa. Ininque

tömənäni botō ïmote waadete pönëninque apænedänipa. ¹⁷ Nê wæætedō wæætê tededäni guiquënë, Pabodo tee mönete wæyongante mönō apænete tomō wæcā tocæi, ante cædänipa. Tömənäni nämä beyænque ante cædäni incæte waa cæte bai cædinque Codito emōwo ante apænedänipa. ¹⁸ Incæte pancadäniya nämä beyænque ante apænedäni incæ pancadäniya nō pönente apænedäni incæ mäninäni tömänäni Codito nänō cægäinō ante näwängä ante do edæ apænedänipa. Mänömaï impa, ante pönëninque botō watapæ tobopa.

Ayæ ïmaï ante pönëninque cōwê godömenque nangui tocæboimpa. ¹⁹ Minitō Wængongui ingante botō beyæ nangui apænemini ëñëninque Itota Codito Önöwoca pönō cæcæcäimpa, ante ëñente tobopa. ïninque ñowo botō caate wædō ante edæ ïincayæ ate ñimpo cædäni ate edæ botō abæ tawænte gote quëwënguinque edæ impa, ante do ëñëninque tobopa. ²⁰ Botō wëñëñedê botō cæbo bai ñowo adobai cæinëmo ïmopa. ïintai ëñate müimō quëwëmo incæ baonque wænönäni wæmo incæ, Mönō Codito ingante waa acædänimpa, ante cædinque botō cōwê guïñënämaï inte tæi ongöninque nangui cædinque watapæ edæ bacæboimpa, ante pönëmpa. ²¹ Edæ inguipoga quëwëmo incæ botō Codito ingante entawëninque tömengä beyænque ante quëwëmpa. Wæætê wæmo incæ tömengä beyæ botō godömenque nangui entawënguïmo ïmopa.

²² Incæte, Waiwæ nangui incate bai botō cæquinque inguipoga ayæ quëwënguënëmo ïmopa, ante pönëninque botō, Æbänō angüimoo, ante ëñencæte ante wæbopa. Edæ, Wæncæboimpa, ante angüënëmo ïmoo. Wæætê, Ayæ quëwëncæboimpa, ante angüënëmo ïmoo. Edæ, Æbänō angüënëmo ïmoo, ante botō edæ ëñënämaï ïmopa. ²³ Edæ wada bæi ongote æmatæ töö æmatæ töö godöna wæcä bai wædömo inte botō, Ædönō gämænō goquïmoo, ante wæbopa. Codito weca godömenque wæmō pöni quëwëncæboimpa, ante botō wadæ goïnëmo ïmopa. ²⁴ Incæte inguipoga quëwëninque munitō beyænque ante cæquënëmo inte botō ædō cæte wayömō goquïmoo. ²⁵ Ante pönente wædinque botō, Minitō mönō pönënō ante godömenque wede pönëninque watapæ tote quëwëncæminimpa, ante cæquïmo ïmopa, ante ëñëmpa. Ayæ, Nöwo wænämaï inte botō munitō weca quëwënguïmo ïmopa, ante do ëñëmpa. ²⁶ ïninque botō müimo inte munitō weca pömo adinque munitō Itota Codito ingante waa adinque botō beyænque nangui tocæminimpa.

²⁷ Codito ingantedō ante watapæ mönō ëñëninō beyæ ante mönō waa cæquënëmō

ïmopa, ante ëñëmini inte munitō edæ waa cæte quëwëedäni. Mänömaï cæmini ïninque botō önömoncaque ëñëmo incæ munitō weca ponte abo incæ, Pidipenteidi adoyömō pönëninque tæi ongönänipa, ante tededäni ëñëninque tobaïmopa. Ayæ, Codito ingantedō ante watapæ mönō ëñëninō ante wadäni ëñencædänimpa, ante pidipenteidi ïñacabo cædinque nangui cædänipa, ante botō edæ ëñente tobaïmopa. ²⁸ Ayæ piinte cædäni incæte munitō wæætê guïñënämaï inte tæi ongöminipa, ante adinque botō tobaïmopa. Minitō mänömaï guïñënämaï inte tæi ongömini ate wædinque nê piinte änäni wæætê, Mönitō wænguinque impa, ante wæcædänimpa. Nê pönëmini mini quëwënguinque impa, ante adinque tömënäni godömenque wæcædänimpa. Edæ Wængongui ængä beyænque quëwëncæminimpa.

²⁹ Wængongui waadete pönō cæcä ate munitō Codito ingante wede pönëminitawo. Edæ adocä pönō cæcä ate munitō Codito beyænque cædinque cōwê caate wæquïmini ïminipa. ³⁰ Pabodobo doyedê Codito beyæ ante wææ ancæte ante caate wætabopa, ante aminitawo. Nöwo godömenque wææ cædinque caate wæbopa, ante önömoncaque ëñëminitawo. ïninque botō wææ äninque caate wæbo bai munitō adobai botō tönō godongämæ wææ äninque caate wæmini ïminipa.

2

Codito önonganque bayongante Wængongui da æcönongä

¹ Mönō Codito nempo quëwëninque munitō wampo pönëminitawo. Tömengä waadete pönengä beyænque gançæ pönëminitawo. Mönō Codito Önöwoca tönō äawocaque bai ewocadinque godongämæ watapæ quëwëminitawo. Nê wæcä ingante godō waadete pönëminitawo. Adocanque wæwengä adinque munitō äanque bai wæwëninque tömengä beyæ cæminitawo.

² Mänömaï ï ïninque adodonque pönëninque munitō waa waademini adinque botō watapæ pöni tobaïmopa. Tömämini äanque bai ewocadinque, Mönō adoyömō cæcæcäimpa, ante godongämæ cæmini adinque botō godömenque nangui watapæ tobaïmopa.

³ ïninque munitō namanque ante pönëninque, Botō ïmote waa acædänimpa, ante cædämaï iedäni. Yæcado ongoncæboimpa, ante cædämaï iedäni. Wæætê, Botō önömoque bai ïñömote wadäni wæætê waa pöni ïnäni, ante pönëninque wadänique inänite ængö cæedäni. ⁴ Nämä mini cæinënō ante cædinque munitō wiï mäninonque ante cædinque wæætê edæ wadäni nani cæinënō adobai ante cæedäni.

⁵ Mänömaī cædinqe mīnitō Itota Codito nānō pōnengalnō bai adodō ante pōnēdāni.

⁶ Tōmengā iñōmō cōwē nāwā Wængonguī inōngā ingampa. Incæte, Botō nāwā Wængonguīmo ingaimo inte

Mæmpo Wængonguī ganca botō ingainō ante ñimpo cædāmai incæboimpa, ante tōmengā ānāmaī ingacāimpa.

⁷ Wæætē edæ, Māninō botō ingainō incæ botō edæ ñimpo cæcæboimpa, āninqe wææš,

ōnonganque bai bagacāimpa.

Ayæ, Wængonguī ingante nē cædōmo edæ bacæboimpa, ante badinqe wææš,

tōmengā waomō mōnō ēmōnō bai nānō ēmonguinque waocā ēñagacāimpa.

⁸ Mänömaī ēñate pæte wææš tōmengā ōnonganque inte bai cæyongā Wæmpocā,

Bitō wænguinō taadō gocæbiimpa, angā ēñēninqe edæ Ao ante goyongante wææš,

tōmengā nānō guīñēñāquinque awæš ñænquedīmæš cæte māo timpodāni wææš tiwadāni ate tōmengā caate wægōninqe wææš bacaa edæ wængacāimpa.

⁹ Mänömaī cæcā adinqe Wængonguī wæætē tōmengā ingante æmōnga pōnī da æšñongacāimpa.

Ayæ wadāni ēmōwo ōnōwoque ēmōnāni bai tōmengā Tæiyæ Awēnē inōngā inte wīi adobaī ōnōwoque bai ēmoncæcāimpa, ante cædinqe Wængonguī edæ, Itota Codito ingampa, ante pōnō pemongacāimpa.

¹⁰ Edæ ōönædē quēwēnāni incæ ingui-poga quēwēnāni incæ guimōnga quēwēnāni incæ

tōmānāni edæ Itota ēmōwo ēñente waa ad-inque

da guicapocædānimpa, ante Wængonguī tōmengā ingante pōnō pemongacāimpa.

¹¹ Ayæ, Itota Codito ingante adinqe tōmānāni,

Mōnō Tæiyæ Awēnē inōngā ingampa, ante edæ Ao ancædānimpa, ante Wæmpocā cægacāimpa.

Mänömaī cæcā adinqe, Mæmpo Wængonguī waa pōnī cæcampa, ante mōnō edæ watapæ apænecæimpa.

Nēmōncoo āo āo cædote bai nōinō cæte quēwēdāni

¹² Mänömaī beyæ botō nē waademīni iñōmīnīte botō apænebo ēñēdāni. Mīnitō weca botō quēwēnēdē mīnitō do ēñente cædīmīni inte ñōwo botō wayōmō quēwēmo incæ godōmenque ēñente cæmīni abopa. Īninqe cōwē mīni ēñente cædinō bai adobaī cædinqe ñōwo mōnō watapæ quēwēnguīnō

taadonque gocæte ante cædinqe, Oda cæte wæcæ wæ, ante cōwā aquēnē quēwēmīni.

¹³ Wīi cæinente awædō, ante wæmīnitawo. Edæ Wængonguinque apænecā ēñente entawēninqe mīnitō tōmengā waa pōnī nānō ānō ante nē ēñente cæinēmīni bamīnīpa. Oda cæte awædō, ante wæmīnitawo. Adocā Wængonguinque mongæncadæ mongæncadæ cæcā ate tæi piñæmīni bate ate eyepæ cæmīnīpa.

¹⁴ Īninqe, Wīi cæinente awædō, ante ānāmaī inte mīnitō piyænē cæte mīni cæquēnēnō ante do cæedāni.

¹⁵ Edæ mänömaī cæmīni adinqe wadāni, Wentamō mongænāmāi ĩmīnīpa, ante abainānīpa. Ayæ ingui-pogaque quēwēnāni ēñēnāmāi inte idiquibæ pōnente cæyōnāni mīnitō wæætē Wængonguī wēñæmīni inōmīni inte tōmēnāni weca quēwēninqe nēmōncoo āo āo cædote bai nōingā cæte quēwēncæmīnīpa.

¹⁶ Edæ, Codito pōnō cæcā beyænque mōnō quēwēngæimpa, ante edonque apænemīni ēñencædānimpa.

Īninqe, Doyedē botō apænedō ante mīnitō nē ēñente cæmīnīpa, ante adinqe botō nangui todinqe ĩmāi ante pōnēmopa. Mīnitō beyæ pæ pagænte cædōmo incæte botō wīi ōnōnque cæboimpa.

Wæætē mōnō Codito nānō ponguīōnæ iñonte botō, Mīnitō nō apænemīnitapa, ante adinqe botō tocæboimpa.

¹⁷ Ayæ, Wængonguī qui, ante baō godōninqe waodāni baonga tepæ gao caadānīpa. Mīnitō iñōmō wede pōnēmīni inte, Wængonguī qui, ante nāmā godō cæyōmīni botō

quēwēngūimāmo incæ mīni godōnīncooga gao caate bai ba edæ waa tobaīmopa. Mīnitō tōnō godongāmæ edæ tobaīmopa.

¹⁸ Mīnitō adobaī, Pabodo mōnō beyæ cæcampa, ante tocæmīnīpa. Edæ mōnō edæ godongāmæ tocæimpa.

Tīmoteo tōnō Epapododito

¹⁹ Mīnitō æbānō quēwēmīni, ante ēñēninqe Tīmoteo wæætē apænecā ēñente tocæboimpa, ante cædinqe botō, Itota Codito Ao angā ate Tīmoteo ingante o do pōnōmo mīnitō weca poncæcāimpa, ante pōnēmopa.

²⁰ Mīnitō æbānō quēwēmīni, ante wæyōmo tōmengā adocanque mīnitō beyæ ante botō tōnō guēa wæcampa. Wadāni quiquēnē mīnitō beyæ ante wædāmāi ĩnānīpa.

²¹ Tōmānāni edæ nāmā beyænque ante cæinente wædinqe Itota Codito nānō ānōnō ante wīi cæinēnāni ĩnānīpa.

²² Cōwā ayōmīni, Tīmoteo iñōmō cōwē waa cæcampa, ante do ēñēmīnitapa. Ayæ mōnō Codito ingantedō ante watapæ apænedinqe Tīmoteo tōnō mōna wencaya bai guēa cæmōnāpa, ante do ēñēmīnitapa.

²³ Īninqe, Botō ĩmote awēnēidi æbānō apænte anguīnāni, ante ēñente ate botō Tīmoteo ingante māñīnēdē ate mīnitō weca do da pōnōmo poncæcāimpa, ante

pönēmopa. ²⁴ Ayæ mōnō Tæiyæ Awënë Ao angā ate tōmēmo do pōmaimopa.

²⁵ Ayæ Epapododito mōnō tōniñacā incæ botō tōnō guēa cæmōna imōnapa. Wadāni piinte cædāni adinque mōnatō guēa wææ cæmōnapa. Tōmengā ingante mīnitō, Pabodo beyæ ante godō cæcæbiimpa, ante do da pōnōmīni ponte cæcā æntabopa. Tōmengā ingante nōwo wæætē adodō mīnitō weca edæ da pōnōmo ponguēnengā ingampa, ante pōnēmopa. ²⁶ Adocā Epapododito iñōmō mīnitō pidipenteidi imīnite acæte ante edæ nangui wæcampa. Ayæ, Epapododito daicawo gawængampa, ante apænedāni ēñēninque pidipenteidi do wædānīpa, ante ēñente wædinque tōmengā wæætē mīnitō beyæ ante nangui wæwente bacampa. ²⁷ Nāwangā impa edæ. Tōmengā daicawo gawænte wodo wængantapa. Incæte Wængongui tōmengā ingante waadete pōnō gampocā waa bacantapa. Mānōmai cædinque Wængongui botō beyæ adobaī ante pōnēninque, Pabodo wīi godōmenque wæcæcāimpa, ante pōnengā inte edæ Epapododito ingante gampocā waa bacantapa.

²⁸ Mānōmai beyæ, Epapododito wæætē pongā adinque tocæminimpa, ante cædinque ayæ, Mīnitō tomīni adinque botō wæwēnāmai bacæboimpa, ante cædinque botō tōmengā ingante nōwo da godoncæboimpa, āmopa. ²⁹ Pongā ate mīnitō, Mōnō Awënë nempo quēwēnōmi inte pōe, āninque Epapododito ingante waa adinque godongāmæ watapæ tote cædāni. Ayæ wadāni tōmengā bai adobaī waa cædānīpa, ante adinque tōmēnāni inānite waa adinque waa cædāni. ³⁰ Mīnitō, Pabodo beyæ ædō cæte cæquimōnīi, ante, Gobæ awædō, ante wæyōmīnite Epapododito iñōmō edæ, Wæmo incæ cōwē cæcæboimpa, ante mīnitō cæquēnēnō ante cæcantapa. Codito beyæ ante cæcæte ante edæ tōmengā wodo wængantapa cæminīi. Tōmengā ingante edæ waa cædāni, āmopa.

3

Tæi piñænte cæcæimpa, ante

¹ Nōwo iñōmō botō tōniñamīni ēñēedāni. Mōnō Awënë nempo quēwēninque mīni watapæ toquinque imīnīpa. Mīnitō oda cædāmai incæminimpa, ante botō adodō adodō ante anca yewæmōmo incæte wædāmai imopa.

² Īmai āmopa. Wadāni iñōmō, Mōnō ēō togænte quēwengæimpa, ante nē ānewēnāni inte guintaidi bai wēnæ wēnæ cædinque nāmā baō ēō ēō towēnānīpa. Ante adinque mīnitō tōmēnāni inānite gomō adinque wææ cædāni. ³ Edæ tōmēnāni inānite ee adinque Wængongui mōnō imonte wæætē pōnō ēō togænte bai cædinque mōnō wentamō mongæñō do

wido cægacāimpa. Wængongui Ōnōwoca ingante ænte ēwocamō iñōmō inte mōnonque edæ, Wængongui ingampa, ante tōmengā beyæ cæmompā. Itota Codito nempo quēwēmō inte mōnonque wīi inguipoga beyænque quēwēmō imopa, ante mōnō tōmengā ingante waa ate apænemompā. ⁴ Tōmēnāni guiquēnē inguipogaque ante pōnēninque, Mōnitō cædō beyænque quēwencæmōimpa, ante pōnēwēnānīpa. Tōmēnāni nāni pōnēwēnō bai adobaī pōnente bai botō, Tōmēnāni wædænque cæyōnāni botō godōmenque nangui cædōmo imopa, ante pōnēwencædōmoimpa. Edæ, Nangui botō cædō beyænque quēwencæboimpa, ante pōnēwencædōmoimpa.

⁵ Edæ tōmēnāni nē ēō togæināni inānitawo. Botō iñōmō adobaī imopa. Tæcæ ēñayōmote ōnompō æmæmpoque go mēōnaa go adoñnæque mānimpoñnæ iñonte botō imote do ēō togæñāni wægaboimpa. Tōmēnāni idægoidi inānitawo. Botō iñōmō idægo wodi pæimo iñōmo inte tōmengā nānōmocā Beencamīnō wodi pæimo iñōmo imopa. Tōmēnāni ebedeoidi inānitawo. Botō iñōmō ebedeobo ēñægaimō inte nāwā ebedeobo iñōmo imopa. Tōmēnāni Paditeoidi inānitawogaa. Edæ botō Paditeobo iñōmo inte Mōitee wodi nānō wææ angaiñō ante mōni Paditeocabo wædō ante tōmāā ēñente cædōmo imoi aedāni. ⁶ Ayæ tōmēnāni, Wængongui beyæ nangui cæcæimpa, ante apænedānitawo. Edæ, Wængongui beyæ cæbote, ante edæ botō iñōmō doyedē Codito ingante nāni pōnengaincabo inānite ancaa togænte pancæte ante cægaboī aedāni. Ayæ oodeoidi guiquēnē, Mōnitō wææ angaiñō ante nē ēñente cædāni que nē nō cædāni inānīpa, ante ānānitawo. Botō iñōmō edæ māniñonque ante cōwē cædōmo inte wentamō mongæñāmai iñōmo imopa.

⁷ Doyedē iñōmō botō mānōmai godōmenque waa cædīmo inte, Botō toquinque waa pōni cægaboimpa, ante pōnēwentabopa. Nōwo guiquēnē botō waa cægaiñō ante, Ōnonquedō ante cægaboī, ante do ēñēmopa. ⁸ Ayæ wææ, Itota Codito botō Awënë ingante adīmo inte botō tōmengā ingante pōnēninque tōmengā tōnō godōmenque waa pōni quēwencæboimpa, ante botō, Wēēnēdēdē botō entawengaincoo botō waa agaiñōmo incæ edæ ēwenguincooque impa, ante pōnēmopa. Edæ Codito beyæ ante cæyōmo botō wēēnē māniñcoo tōmancoo edæ dæ ba wætābopa. Īninque, Codito ingante godōmenque ēwocacæboimpa, ante nangui cædinque botō, Wēēnē botō entawengaiñō ompotacoo bai impa, ante wido cæbopa.

⁹ Edæ, Īmai cædāni, ante nāni wææ angaiñō ante ēñente cæbo incæte Wængongui ayongante botō ædō cæte māniñō beyænque

nō entawēmo baquimoo. Wæætē Codito mōnō nē nō cædongā ingante wede pōnēmo inte tōmengā nempo quēwēñōmote Wængongui pōnō badongā ate nō cæbo bacæboimpa, ante nangui cæbopa. ¹⁰ Mōnō Codito ingante ate bai pōnencæboimpa, ante cæbopa. Ayæ tōmengā adocā nangui tæi piñænique ñāni òmæmongacæimpa, ante wede pōnēninque botō mānīnō tōmengā nē ñāni òmæmongaingā nānō tæi piñænō bai adobai entawencæboimpa, ante cæbopa. Ayæ adobai, Tōmengā caate nānō wængai bai botō tōmengā beyæ wæncæboimpa, ante pōnēninque botō tōmengā tōnō godongāmæ caate wænte bai tōmengā nānō ewocadō bai ewocacæboimpa, ante cæbopa. ¹¹ Mānōmai cædinque botō, Tōmengā wænte ate ñāni òmæmonte nānō quēwengai bai botō adobai wænte ate ñāni òmæmoncæboimpa, ante nangui cæbopa.

Mānōmai bacæboimpa, ante nangui cæbopa, ante

¹² Mānōmainō ante apænedinque botō, Codito nānō entawēnō bai do entawēmopa, ante dicæ apænebogaa. Picænāni bai do badinque nō cædinque oda cædāmai imopa, ante dicæ apænebogaa. Incæte Itota Codito incæ edæ, Botō ewocadō bai adobai ewocacæbiimpa, ante botō imote do bæi ongoncæimpa. Ìniquē botō wæætē, Tōmengā waa pōni nānō ewocadō bai adobai ewocacæboimpa, ante bæi ongoncæte ante nangui cæbopa. ¹³ Ìñānāni ēñēedāni. Botō Codito nānō ewocadō ante dicæ eyepæ æmogaa, ante wæbopa. Incæte, Eyepæ ænāmai imopa, ante adinque wæwēnāmai imopa. Wæætē, Ìncayæ ate Codito nānō ewocadō bai ædæmō ewocacæboimpa, ante cædinque botō mānīnō ante pōnēninque pogodo gote bai cōwē cæbopa. ¹⁴ Wængongui do, Bitō Itota Codito nempo quēwēñōmi inte eyepæ cædinque æmonga ponte æe, ante botō imote aa pegacæimpa. Ìniquē tōmengā, Pædæ pōnōmo æncæbiimpa, ante nānō angaincoo ante ænte ewocacæte ante botō gānā cæcæte ante pogodo gote bai edæ nangui cæbopa.

¹⁵ Mōnō æmæwo picæmō badōmō Ìñōmō tōmāmō adobainō ante pōnenguēñēmō imopa. Pancamūniya guiquēñē mānōmainō ante wīi pōnēmīni adinque Wængongui, Mīnitō æbānō nō pōnenguēñēmīni Ìmīni, ante pōnō odōmōngā ate ēñencæmīnīmpa. ¹⁶ Mōnō do ēñente quēwenganca māninganca mōnō cōwē nō cæte quēwengæimpa.

¹⁷ Ìñānāni ēñēedāni. Botō Pabodobō æbānō cæboo, ante adinque mīnitō botō cædō bai adobai godongāmæ cæedāni. Ayæ, Mōnitō cæmōni bai mīnitō adobai cæedāni, ante odōmōmōni bai pancadāniya adobai cæedāni adinque mīnitō Ìñōmō, Adobai

cæcæimpa, ante tōmēnāni Ìnānite cōwā æedāni. ¹⁸ Mīnitō Ìmīnite wantæ wantæ Ìñō wantæ wantæ Ìñō apænedimo inte botō ñōwo Ca ca wædinque adodō ante Ìmaī ante godōmenque apænebopa. Mōnō Codito awāa wængā incæte nangui Ìnāni tōmengā ingante Baa āninque tōmengā nānō wængaiwæ ante piñte bai cædānīpa, ante awædō. ¹⁹ Tōmēnāni nāni òmæte ewente wæquinque mānōmai cædānīpa. Cængui beyænque ante pōnente quēwēñānīpa. Wēnæ wēnæ nāni cædō beyæ guingo imonte wæquēñēñāni incæ tōmēnāni wæætē guñēñadāmai inte edæ, Waa pōni cæmōnīpa, ante nāmā incæ waa adānīpa. Edæ inguipoga beyænque ante cæinente wædānīpa.

²⁰ Mōnō Ìñōmō mempoga ēñagāimō inte mōnō òñædē òmæ do ēamō edæ imopa. Ìniquē mōnō Awēñē Itota Codito, Quēwencæmīnīmpa, ante nē Ængaingā ingante nangui āinente wædinque mōnō, Tōmengā æyedēñō òñædē edæ wææ ponguingā, ante wānō cōmōmpa. ²¹ Tōmengā Ìñōmō tæi piñænongā inte tōmancoo edæ bæ tadinque ò æninque Tæiyæ Awēñē incæcæimpa. Ìniquē, Mōnō quēwenguñāmai aquūñō ēñamōmpa, ante adinque tōmengā tæi piñænongā inte, Botō baō bai tæiñō mongæncæmīnīmpa, ante badongā ēñaquimō imopa.

4

Mōnō Awēñē nempo quēwēninque watapæ tocæimpa

¹ Wængongui botō imote poganta pōnō wencate bai cædinque, Bitō waa apænebi ēñente beyænque pidipenteidi ēñente waa cædāni abopa, angā ēñēninque botō mīnitō beyæ ante watapæ tobopa. Mīnitō Ìmīnite ædæmō waadedinque botō, Æyedēñō beē tenguimoo, ante wæbopa. Ìniquē botō nē waademīni āmo ēñēedāni. Mānīnō botō ānīnō ēñente cædinque mīnitō mōnō Awēñē nempo quēwēninque tæi ongōedāni.

² Nōwo Eodia, Tintique, mīna onquiyæncaya Ìmīnate āmo ēñēeda. Mōnō Awēñē nempo quēwēninque mīnatō piyæñē cæte adodongue ante cæbæweda, āmpa.

³ Botō mōnō Awēñē ingatedō ante watapæ apæncæte ante nangui cæyōmote Codēmente tōnō wadāni botō tōnō Ìñacabo cædānīpa. Wængongui, Nāni quēwenguinta, ante tōmengā nānō yewæmongaintaa tōmēnāni ēmōwo dobæ yewæmonte mæ òñōmpa. Tōmēnāni botō tōnō cæyōnāni Ìna onquiyæna Eodia tōnō Tintique Ìñōmō botō tōnō adobai Ìñacabo nangui cæda Ìnatapa. Ìniquē bitō cōwē botō tōnō guēa cædōmi Ìñōmite bitō Ìmite āmpa. Ìna Ìnate bitō waadete apænebi ēñēninque piyæñē cæte quēwencædāimpa.

⁴ Ayæ tōmāmīni imīnite, Mōnō Awēnē nempo quēwēninque watapæ tote quēwēdāni, āmopa. Edæ, Watapæ pōni tote quēwēdāni, ante adodō ante āmo ēñēdāni.

⁵ Mōnō Awēnē edæ oo pōni poncæcāimpa cæmīni. Ee ædæmō cæte quēwēñōmīni tōmānāni waadete mīni cædōnō ante edonque acædānimpa.

⁶ Ayæ, Quiēmē bacæ wæ, ante mīni wædō ante guiñente wædāmaī iedāni. Wængonguinque ingante apæneedāni. Apænedinque, Wængongui, bitō pōnō cæbi ate eyepæ inte quēwencæmōnimpa, ante quiēmē mīni æncæ wædō incæ ante apæncæmīnimpa. Ayæ tōmengā pōnō cæcā adinque mīnitō, Bitō pōnō cæbi waa æmōnīpa, ante Wængongui ingante wæætē waa ate pōnente apæneedāni.

⁷ Ayæ, Wængongui piyænē cædinque pōnō aacā beyæ mīnitō Itota Codito nempo quēwēninque piyænē cædinque mīmōnē wædāmaī inte nō pōnēninque quēwencæmīnimpa. Edæ mōnō, Æbāmē cæte Wængongui pōnō piyænē cæte aacā, ante mōnō waocabo ēñēnāmaī imō incæte tōmengā cōwē godōmenque aacā ate wædāmaī inte quēwēmōmpa.

Quiñō waa ī, ante mānīnonque ante pōnēē cōedāni, ante

⁸ Iñānāni ēñēdāni. Mīnitō æbānō ante pōnēē conguēnēmīni imīnīpa, ante yewæmōninque botō ñōwo æmæwo pōni yewæmōmōi aedāni. Nāwangā nāni apænedō ante pōnēē cōedāni. Æbānō waa cæquiī, æbānō nō cæquiī, ante pōnēē cōedāni. Quiñō nō ī, ante mānīnō ante pōnēē cōedāni. Mōnō æbānō waadete pōnenguī, ante pōnēninque mōnō waa adoncoo ante adobaī pōnēē cōedāni. Wadāni waa nāni cædinō ante pōnēē cōedāni. Mānōmaī cædāni ate wadāni waa adānitawo. Iñinque tōmēnāni nāni waa adīnō ante mīnitō mānīnō ante pōnēē cōedāni. Iñinque, Quiēmē waa pōni ī, ante adinque mānīnonque ante pōnēē cōedāni.

⁹ Botō odōmonte apænebo ēñēmīnitawo. Iñinque botō pōnō apænebo ēñēninque mīni ēñēnīnō baī tōmānō ante edæ cæedāni. Botō pædæ pōnōmo æmīnitawo. Iñinque botō pædæ pōnōmo mīni ænīnō incæ ee mæedāni. Botō entawēnō ante, Æbānō entawēmoo, ante edonque amīnitawo. Iñinque botō entawēnō mīni adīnō baī mīnitō adobaī entawēninque edæ waa cæedāni. Mānōmaī cæmīni adinque Wængongui nē gānē pōnēnongā inte mīnitō tōnō godongāmæ quēwēninque pōnō cæcā ate mīnitō wæætē gānē pōnēmīni bacæmīnimpa.

Pidipenteidi mīni pōnōni waa æntabopa, Pabodo angampa

¹⁰ Botō wædō ante mīnitō doyedē pōnō cædīmīni inte ñōwo wæætē tæcæ pōnente wædinque wæætē pōnō cæmīni æninque botō, Mōnō Awēnē beyænque pōnō cæmīnīpa, ante adinque nangui waa tobopa. Edæ botō wædō ante cōwē waadete pōnēmīni incæte mīnitō da pōnōncæ cæyōmīnite wææ cæte ī æiquedō da pōnonguīmīni.

¹¹ Incæte mānōmaī apænedinque botō wīl ænguēnēmo inte apænetabopa. Edæ wædænque éabo incæ nangui éabo incæ quiēmē éabo incæ botō, Æbānō quēwenguī, ante do ēñēmo inte edæ piyænē cæte wædāmaī cōwē quēwēmōpa. ¹² Ōmæpobo wædīmo inte botō, Ōmaadāni æbānō quēwēnāni, ante do ēñēmōpa. Adobaī nangui éate quēwēnīmo inte botō, Nanguī éadāni æbānō quēwēnāni, ante do ēñēmōpa. Edæ tōmo cæmo incæ, gæwænte wæbo incæ, nangui éabo incæ, ōmæpobo incæ mānīnō tōmānō ante wægāimo inte botō mānōmaī ingāimo beyænque ēñente batabopa. Iñinque æyōmōmē quēwēmō incæ quiēmē baī quēwēmō incæ piyænē cæte wædāmaī quēwēmōpa. ¹³ Edæ quiēmē beyæ wæbo incæ mōnō Codito pōnō cæcā ate botō wæætē edæ eyepæ entawēninque tōmāā edæ cæbopa.

¹⁴ Incæte botō ōmæpobo inte wæyōmote mīnitō pōnō cæmīni waa æntabopa. ¹⁵ Ayæ adobaī mōnō Codito ingantedō ante watapæ mōni apænedō ante tæcæ ēñēmīni ate botō Māatedōniabæ iñinque apænedinque wadæ goyōmote wadāni Codito ingante nāni godongāmæ pōnencabo pōnōnāmaī iñōnānite mīnitō adomīninque da pōnōmīni æntabopa, ante mīnitō pidipenteidi do ēñēmīnīpa. ¹⁶ Edæ, Tetadōnica nāni quēwēñōmō quēwēninque Pabodo ōmæpocā bacampa, ante dededāni ēñente wædinque mīnitō wīl adopoque wæætē wæætē da pōnōmīni æntabopa.

¹⁷ Botō dicæ botō æncæ wædō ante apænetabopa. Wæætē, Pidipenteidi wadāni inānite nē godōnāni inānīpa, ante adinque Wængongui wæætē mīnitō imīnite godōmenque pōnongā æncæmīnimpa, ante apænetabopa. ¹⁸ Iñinque botō iñōmō idæwaa æntabopa. Botō ænguēnēnō æninque godōmenque nangui ænte éabopa. Edæ, Pabodo qui, ante mīni da pōnōnincoo Epapododito wæætē botō imote pædæ pōnongā æninque botō eyepæ pōni éate quēwēmōpa. Mīnitō, Wængongui qui, ante ogui waqui baī pōnō iya tante baī cædinque, Pabodo qui, ante da pōnōmīni adinque, Waa pōni pōnōmīnīpa, ante Wængongui incæ waa acampa. ¹⁹ Botō Wængongui ñāō baī entawēninque tæī émongā inongā inte tōmengā nānō éadoncoo iñōmō edæ bacoo pōni ongōmpa. Iñinque, Mīnitō ænguēnēmīni

īmīnīpa, ante adīnque tōmengā Itota Codito beyænque cædīnque eyepæ pōnī edæ da pōnongā æncæmīnīpa.

²⁰ Mōnō Wængonguī mōnō Mæmpo īñongante, Bitō waēmō pōnī inōmī īmīpa, ante mōnō cōwē watapæ apæncæīmpa. Edæ ñōwopāmo incæ mūmāmo incæ mōnō cōwē mānōmaī apæncæīmpa. Mānōmaī impa, ānīnque botō, Amēē, āmopa.

Mānīnque ante yewæmōmopa, ante

²¹ Wængonguī quīnānī Itota Codito nempo quēwēnōnānī īñōnānīte mīnitō, Waa quēwēncæmīnīpa, ante botō beyæ ancæmīnīpa. Ayæ botō tōnō godongāmæ ongōnānī incæ, Mīnitō æbānō quēwēmīnī, ante wædānīpa. ²² Edæ Tæiyæ Awēnē Tetædo oncōnē quēwēnānī tōnō wadānī Odōmā īñōmō wayōmō quēwēnānī tōnō Wængonguī quīnānī incæ tōmānānī adobaī mīnitō īmīnīte, Waa quēwēncæmīnīpa, ānānīpa.

²³ Mōnō Awēnē Itota Codito mīnitō īmīnīte waadete pōnō cæcæcāīmpa, āmopa. Mānīnque ante yewæmōmopa.

Codotenteidi inānite Pabodo nānō cadota ante yewæmongainta

Waa quēwencæminimpa, ante

¹ Wængongui angā ēñēninque Itota Codito botō imote da godongā gogaīmo inte botō Pabodobo inōmo inte yewæmōmopa. Mōnō tōniñacā Timoteo tōnō guēa tedete ate botō, Acæminimpa, ante yewæmōmopa. ² Mōnitō tōniñamini ēñēedāni. Codota iñōmō quēwēninque Wængongui quimīni inte mīnitō mōnō Codito nempo quēwēninque ædæmō cæte pōnēmīni iñōmīnite botō iīmai ante yewæmōmopa. Mōnō Mæmpo Wængongui tōnō mōnō Awēnē Itota Codito waadete pōnō cæda ænte entwēninque mīnitō gānē pōnēninque watapæ quēwencæminimpa, āmopa.

Nē pōnēnāni beyæ Pabodo Wængongui ingante apænecā

³ Mōnō Awēnē Itota Codito Wæmpocā iñongante mōnitō mīnitō beyæ ante apænedinque Wængongui ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni iīmīni, ante do ēñēmōnīpa. Ayæ, Wængongui quīnāni inānite tōmānāni inānite mīnitō waadete pōnēmīni, ante mōnitō do ēñēmōnīpa. ⁵ Edæ, Ōōnædē æidinque mīnitō watapæ quēwēnguinque impa, ante edæ Codito do badongampa. Mānōmainō ante, Nāwangā impa, ante watapæ mīni ēñēnō ante mīnitō godōmenque wede pōnēmīni badinque godongāmæ waadete pōnēmīni iīmīni. Ininque, Mīnitō mānōmai iīmīni, ante adinque mōnitō wæætē Wængongui ingante waa ate pōnēninque apænemōnīpa.

⁶ Doyedē mīnitō weca ponte apænedinque mōnitō, Mōnō Codito ingantedō ante watapæ apænemōni ēñēninque mīnitō, Wængongui nāwangā waadete pōnō cæcampa, ante do ēñēmīnitapa. Mānōmainō ante mīni ēñēniōnæ incæ mīnitō waincawæ nanguū incawæ bai tæcæ badinque ñōwo ganca nanguū apænemīni ēñēninque wadāni mīnitō weca nē pōnēnāni tæiyæñāni badāni. Ayæ tæiyæñāni badāni bai mōnō pōnencabo adobai tōmāmæca tæiyæmō pōni bamopma. ⁷ Epapada mōni nē waadedongā incæ, Codito waa pōni nānō pōnō cægālnō ante do odōmonte apænecā ēñēmīnitapa. Tōmengā iñōmō Itota Codito beyæ nē cæcā iñongā inte mōnō imōnite pōnēninque ædæmō cæcā ingampa. ⁸ Ayæ mōnitō imōnite apænedinque tōmengā, Codotenteidi iñōmō Wængongui Ōnōwoca nempo quēwēninque nē waadete pōnēnāni ināni, ante do apænecā ēñētāmōnīpa.

⁹ Mānōmai beyæ mōnitō, Mīnitō æbānō imīni, ante tæcæ ēñēninque mīnitō beyæ ante Wængongui ingante apænedinque ñimpo cædāmai inte cōwē apænemōnīpa. Edæ, Wængongui æbānō angā, ante mīnitō ēñente ēwocæminimpa, ante mōnitō, Wængongui ēñēmi. Bitō ēñēnō ante apænebi ēñente ēwocadinque Codotenteidi wæætē, Æbānō waa cæte quēwēngui, ante ēñēncædāni, ante apænemōnīpa. ¹⁰ Wængongui apænecā ēñēninque mīnitō, Mōnō Awēnē tocæcāimpa, ante cædinque tōmengā nānō waa cædō bai mīnitō adobai waa pōni cæcæminimpa, ante apænemōnīpa. Ayæ Wængongui ingante mīnitō doyedē æmæ ate bai æmæ pōnēmīni inte ñōwo wæætē ædæmō ate bai ædæmō pōnencæminimpa. Ayæ waa incawæ bai mīnitō adobai bate cædinque nō mīni waa cæquēnēnonque cæcæminimpa, ante apænemōnīpa. ¹¹ Wængongui ñāō ēmōninque tæ piñænongā inte pōnō cæcā ate mīnitō edæ tōmengā nānō tæi piñænō bai adobai tæi piñæmīni ēwocæminimpa, ante apænemōnīpa. Ayæ, Tōmengā mānōmai pōnō cæcā ænte ēwocamīni inte mīnitō wæntæye badāmai inte ee cædinque piyænē cæte ee cæcæminimpa, ante āmōnīpa. Ayæ watapæ todinque, ¹² mīnitō mōnō Mæmpo ingante waa ate pōnēninque apænecæminimpa, ante mōnitō Wængongui ingante apænemōnīpa.

Edæ Wængongui quimōni imōni bai tōmengā mīnitō imīnite pōnō badongā ate mīnitō tōmengā quimīni do bamīni. Ininque mīnitō tōmengā ñāō ēmōmāmodē mōnitō tōnō godongāmæ pōñōmīnite tōmengā nanguū pōni pōnongā æninque mīnitō mōnitō tōnō godongāmæ nē ēamīni incæminimpa. ¹³ Edæ nē wēmō ēnempodongā nempo wæwēñōmonte Wængongui wæætē mōnō imōnte gā pe æmpote ō æninque, Botō Wengā botō nē Waadedongā iñōmō nē Awēnē Odeye iñongante mīnitō tōmengā nempo quēwencæminimpa, ante māmongā pongamōnīpa. ¹⁴ Tōmengā Wengā nāmā wepæ petæ petæ wææ beyæneque mōnō wēnæ wēnæ cægālnō ante Wængongui pōnō ñimpo cæcā æninque mōnō abæ tawænte bai quēwēmopma.

Codito wengā beyæneque Wængongui piyænē cæcampa

¹⁵ Mōnō adāmai ingaingā Wængongui æbānō emongā, ante adāmai iñōmonte Wængongui Wengā iñōmō Mæmpocā bai nē emongā inte mōnō weca pōninque, Mæmpocā æbānō emongā, ante do odōmongacāimpa. Wēēñēdē Wængongui nānō badōnāmai ingāñedē adocā incæ Bamoncadengā bai iñongā inte do quēwengacāimpa. ¹⁶ Ininque Mæmpocā pōnō angā ēñēninque tōmengā

Wengä incæ tómancoo edæ badongacäimpa. Mönö nê adincoo incæ mönö adämaï incoo awëmö ongoncoo incæ adocä tómancoo badongacäimpa. Awënëidi incæ nê änäni incæ, awënëidi näni ênempodö incæ nê tæï piñænäni incæ, öönædê owodönäni incæ inguipoga quëwënönäni incæ mäninäni edæ tómanäni inänite Mæmpocä pönö angä êñëningue Wængongui Wengä iñömö badongacäimpa. Badöñongante Wæmpocä, Bitö qui bacäimpa, angä Ao ante badongacäimpa. ¹⁷ Adocä Wængongui Wengä incæ Tānocä quëwengaingä ingampa. Tömengä pönö angä beyænque tömengä nānō badongāncoo iñömö adoyömo pönente bai cædinque tömengä nempo godongāmæ gongænte cægompa.

¹⁸ Ayæ tömengä nê Önoncamö bai nê angä iñongante mönö tömengä ingante mönö godongāmæ pönencabo wæætê tömengä tönö adoyonque bai inömö imompa. Adocä tömengä nānō Tæiyæ Awënê baquinque nê badongaingä inongä inte tānocä pōni ingacäimpa. Ayæ æmonga pōni nānō ongonquinque tömengä wæente ate tānocä nê ñāni ömæmongaingä inongä ingampa. ¹⁹ Edæ, Botö entawënö incæ botö Wengä tōmānō entawencæcäimpa, ante pönö cædinque Mæmpocä iñömö nanguï togacäimpa. ²⁰ Ayæ tömengä Wengä wepæ awāa gowete wædinque wængä beyænque Wængongui mönö tōmāmō beyæ pönö cædinque piyænê cægacäimpa. Tömengä Wengä tönö mänömaï pönö cæcä beyænque mönö inguipoga tōmāo quëwëmö tönö öönædê tōmāo quëwënäni tönö tömengä ingante Ao äninque tömengä tönö godongāmæ piyænê cæte quëwëmö adinque Wængongui iñömö nanguï togacäimpa.

²¹ Ayæ mīnitö quiquënë Wængongui ingante nāwæ pämwæte gogaimini inte wiwa cædimini inte ocaidê nê piinte bagaimini iñöminite, ²² Wængongui wæætê, Adocä Codito tömengä baö ewëente wængä beyænque mīnitö botö quimini badinque botö ayömo tæiyæ wæmō entawencæminimpa, ante cæcampa. İninque tömengä ñā mēnongacä ate mīnitö tömengä ayongä wentamö mongæñāmaï imini adinque, Wēnæ wēnæ cæbitapa, ante ædö cæte piinte angui. ²³ Edæ mīnitö tæï mænonte bai ongöningue do müni wede pönënonque ante cōwê godōmenque pönëmini ininque tömengä weca ponte ongōmaïminipa. Mōnitö mönö Codito ingantedö ante mönö pönëno beyæ mönö watapæ bacäimpa, ante apænemōni êñëminitawo. Mänine ante ñimpo cædāmaï imini inte mīnitö tömengä weca cōwê ongōmaïminipa. Mänine müni êñënine ante mōnitö ñōwo inguipoga tōmāo quëwënäni inänite apænemōni êñënanipa.

Mänine beyænque ante botö Pabodobo nê cæbo batabopa.

Mönö pönencabo beyæ botö nê cæbo batabopa, ante

²⁴ Mīnitö beyæ nanguï cædinque nantate wædimö incæte botö nanguï tobopa. Ayæ Codito beyæ ante godōmenque wæquënëmo inte botö tömengä tönö guëa baonque nantate wæbopa. Codito mönö Önoncamö bai nê angä iñongante mönö tömengä ingante mönö godongāmæ pönencabo iñömö tömengä tönö adoyonque bai imompa. Botö iñömö edæ mönö cabo beyænque caate wæbopa. ²⁵ Ayæ, Codito ingante nê pönënanäni beyæ bitö nê cæbi badinque botö angaine ante adodö adodö ante tōmānō ante edonque pōni apænëbi êñëncædänimpa, ante Wængongui angä êñëningue botö mīnitö beyæ nê cæquënëmo do bagaboimipa.

²⁶ Mänine Wængongui nānō angaine ante wantæpiyæ wê wodonte bai iñonte mönö mæmæidi cōwê êñëñāmaï ingadänimpa. Ñōwo quiquënë Wængongui tömengä quimö iñömöte mänine ante edonque pōni odömöte apænecä êñëmpompa. ²⁷ İninque mōnitö imōnite äninque, Waa pōni botö angaine ante müni waocabo wëñëñedê müni êñëñāmaï ingaine ante mīnitö ñōwo tæcæ êñëmini inte odoeidi ināmaï inäni inänite odömöte apænemini êñëncædänimpa, ante Wængongui cæcampa. Mänömaï beyæ mänine ante apænemōni êñëninque müni waa pōni ñāö bai entawenguinque êñëncæminimpa. Edæ, Mīnitö mönö Codito ingante êwocadinque müni ñāö emämödê æiyömini watapæ bacäimpa, ante mönö pönëno ante mänineque impa.

²⁸ Mönö Codito tömengä nānō êñëno ante entawëninque mōnitö adocä ingante mönö Codito ingante ante apænemōnipa. Tömengä nempo quëwëninque mīnitö picænäni bai nê êñëmini bayöminite Wængongui mīnitö iminite waa acæcäimpa, ante mōnitö tōmānāni inänite waadete odömöte apænemōnipa. Ayæ, Êñënguënë quëwëedäni, ante tōmānāni inänite wææ ante apænemōnipa. ²⁹ Mönö Codito nānō tæï piñænö pönongä ænte entawëninque botö, Nê êñëmini bacæminimpa, ante cædinque tæï pæ pagænte cōwê nanguï cæbo imopa.

2

¹ Botö mīnitö beyæ nanguï cædinque Daoditea iñömö quëwënäni beyæ adobai nanguï cæbo aedäni. Ayæ wadäni botö awinca adāmaï inäni beyæ adobai tæï pæ pagænte cædinque nanguï cæbopa, ante apænëbo êñëedäni. ² Botö, Tōmānāni wæwënāmaï inte wampo pönëninque godongāmæ waadete pönëninque adocabodäni bai bacædänimpa, ante ædæmō

cæbopa. Edæ, Mänömaï badinque tömënäni Codito nänö ëñënö ædæmō pōni nāni entawenguinque impa, ante pōnëninque cæbopa. Ayæ, Mänömaï badinque tömënäni Wængongui nänö nē wē wodongaingä ingante Codito ingante edonque acedänimpa, ante botō mänömaï beyæ ante ædæmō pōni odōmonte apænebopa. ³ Edæ, Æbänö i, ante, Æbänö waa cæquii, ante Wængonguinque nänö nō pōnënö incæ mönō Codito mäninö tömänö ante ëñëninque waëmō pōni incoo bai wē wodonte mante bai entawengampa. ⁴ Mänömainö ante apænedinque botō, Minitō oda cædämaï incæminimpa, ante yewæmonte apænebopa. Edæ wadäni waa pōni tededäni incæ babæ wapiticæ odōmoncæte ante tededäni inäni adinque ëñënämaï iedäni, ante wææ ämopa. ⁵ Edæ wayömō quëwëmo incæ minitō weca owote bai botō önöwoca pōnëmopa. Inique botō ayōmo minitō mönō Codito ingante wede pōnente tæi piñænte ongōninque iñacabo cædinque töingä pōni cæminipa, ante pōnëmopa. Mänömaï iminipa, ante ate bai adinque botō nanguï tobopa.

Codito nempo quëwëninque mïmō quëwëmōmpa, ante

⁶ Mänömaï beyæ botō iïmaï ämopa. Minitō Itota Codito ingante mönō Awënë ingante Ao ante do æminitawo. Inique tömengä ingante do Ao ante ænimini inte minitō ñowo adobaï tömengä ingante cōwë Ao ante tömengä nempo quëwëedäni. ⁷ Minitō waomini incæ awæ tæimōwæ ædæmō guiwate pæwæ bai Codito nempo quëwëninque cōwë godōmenque picæmini bacæminimpa. Ayæ mönitō odōmonte apænemōni mïni ëñënö bai cædinque godōmenque wede pōnëninque tæi piñænte ongödäni. Ayæ Wængongui ingante waa ate pōnëninque watapæ apæneedäni.

⁸ Wadäni mä pōnente önonquedō ante apænedäni ëñente wædinque minitō, Mönō imonte ö æncæte ante babæ apænedänipa, äninque wææ cæedäni. Edæ tömënäni dicæ Codito nänö odōmonte apænegainö ante apænedäniyaa. Wæætë waodänique nāni odōmonte apænegainonque ante Ao äninque tömënäni inguipogaque ante nē pōnënäni nāni pōnënö baiñonque ante cædänipa töö.

⁹ Edæ Wængongui tömengä nänö entawënoncoo incæ mönō Codito Waocä nē ëñagaingä inongä inte mänincoo tömancoo entawëninque nāmā baonga ëñacampa. ¹⁰ Öönædë awënëidi incæ nanguï inguipoga awënëidi incæ nanguï inäni iñönäni mönō Codito adocanque Nænængä pōni inongä inte Tæiyæ Awënë inongä ingampa. Incæte tömengä nempo quëwëmini inte minitō tömengä nänö entawëno incæ ædæmō entawëminipa. ¹¹ Inique tömengä nempo

quëwëninque minitō wao önompoca ëö togænämaï imini incæte mönō Codito iñömō ëö togænte bai cædinque minitō baonque ante mïni wiwa cægainö ante wido cæcä ate minitō tæiyæ waëmō entawente quëwëminipa. ¹² Wængongui nē tæi piñænongä inte Itota ingante angä ñāni ömæmongacäimpa, ante wede pōnëmini inte minitō, Itota tönö godongämæ nāñe wænte bai imompä, ante æpænë guiminitapa. Ayæ adobaï adocä nē tæi piñænongä ingante wede pōnëninque minitō æpænë guidinque Itota tönö ñāni ömæmonte godongämæ tao gongænte quëwëminipa.

¹³ Doyedë ëñënämaï cædinque do wængüenëmini ingaimini inte minitō inguipogaque ante mïni cæinewëno ante ee mongæñöminite Wængongui angä ate minitō Itota tönö ñāni ömæmonte quëwëngaminimpa. Edæ wënæ wënæ mïni cægainö ante adinque Wængongui pönö ñumo cæcä quëwëminipa. ¹⁴ Minitō pante wæquinque ëñënämaï cæminipa, ante Wængongui wade wade ante wææ angä ëñëninque dodäni adodö adodö ante yewæmönäni ate wægämömpa. Mänömaï mönō imonte ancaa wææ änäni wæmō adinque Codito iñömō mäninecoo mönō wægäinecoo ante wëä godonte bai cæcä ate dæ batimpa. Edæ awæ timpodäni wæninqe Itota Codito mäninö ante do teëmente mongæ mäo wido cægacäimpa. ¹⁵ Ayæ mäniwäa wæninqe adocä tæi ëmongä inte wënëidi awënëidi tönö nē änäni nāni wænonguëncacoo gä pe æmpote ö æninque tömengä, Wænnoncaincoo nææminipa wænonguimïni, ante bai wadäni ayönänite badete tote bai cægacäimpa.

Öönædë mönō entawëno ante æncæte ante cæedäni, ante

¹⁶ Mönō ee aquënëno incæ bitō quimæ cæmii, Quimæ bebii, ante pönö apænte piinte änänitawo. Wængongui beyæ ante æætmæ cæcäimpa, ante apænte ancæ piñänitawo. Wacä mämō i ate becäimpa, ante wææ änänitawo. Guëmanguiönæ incæ quimæ cæbii, ante minitō iminite apænte pancæ cædänitawo. Edæ æcämenque mänömainö ante apænte ancæ cæyönänite minitō wæætë, Tömënäni nāni wææ äninö ante Codito wëä godonte bai cægacäimpa, ante pōnëninque guñente wædämaï incæminimpa. ¹⁷ Cængui cænte bai bequï bete bai mönō önöwoca beyæ Codito incæ mönō guëmanguiämä bai inongä ingampa. Inique Codito ingante ænte entawëninque mönō æbänö cænte bai guëmante bai quëwëngui, ante odōmoncæte ante cædinque dodäni iñömō öwocodenganque odōmonte bai cædinque wææ angadänimpa.

Mänōmaī beyænque tōmēnāni, Īīmaī cædēdāni, Īīmaī beedāni, Īīmaī guēmædāni, ante wææ angadānīmpa.

¹⁸ Pancadāniya mā pōnēninque, Ōnōmonque bai ĩnōmō inte mōnō anquedoidi ĩnānite waa adinque waa cæcæīmpa, ante babæ ante wææ ānewēnāniya. Ayæ mōnitō ānō bai cædāmaī ĩnīnque edæ mīnitō ænte entwawēnō ænāmaī inte wæbaīmīnīpa, ante ānewēñōnāni mīnitō wæætē guīñente wædāmaī ĩedāni. Edæ, Mōnitō ate bai do adīmōni inte āmōni ēñēdēdāni, ante tōmēnāni Codito Ōnōwoca ingante ēwocadāmaī ĩnāni inte mā pōnēninque ānewēnāniya. Edæ, Nāmāneque ante pōnēninque tōmēnāni, Mōnitō adomōnique waa cæmōni ĩmōnīpa, ante nāmā waa adānīpa. ¹⁹ Mōnō ocai encamō inte cænguī cæninque mōnō baonga wepæmē tōmāo gogadinque pæmōmpa. Ayæ adobaī mōnō ocai encadinque oguēmē tōnō baō beyæ cōñe pō cōñe pō cæmōmpa. Mōnō pōnencabo adobaī Codito tōnō adoyonque bai ĩñōmonte tōmengā Ōnoncamō bai ĩnongā inte nē angā ingampa. Mōnō mænōmaī ĩmō incæte tōmēnāni wæætē nē Ōnoncamō bai ĩnongā ingante Baa ānīnque nāmā wido tote wææñō bai edæ wadæ godānīpa. ĩnīnque wææñō bai ĩnāni incæ mīnitō ĩmīnite wææ ānāni apa quēwēmīnī.

²⁰ Wēēñēdē inguipogaque ante nāni wææ angainō ante nē ēñēgaīmīni incæte ñōwo wæætē Codito tōnō godongāmæ wænīmīni inte mīnitō wænte bai ĩmīni inte māñine ante ædō cæte ēñēnguīmīnī. Inguipogaque quēwēmīni ĩmīnīpa diyæ māñine ante ēñēnte cæquēñēmīni ĩnguīmīnī. ²¹ “Gampodāmaī, Yædæ bedāmaī, Bæi ongōnāmaī,” ante tōmēnāni nāni wææ ānewēnō ante quīnante ēñēnte cæmīnī. ²² Īñæmpa woadānīque edæ, Gampodāmaī, ante nāni ānoncoo ĩñōmō tæcæ ænte cæyōmīni edæ dobæ wote ba apa ēñēwēmīnī. Inguipogaque quēwēnāni nāni ānewēngainō ante ēñēninque tōmēnāni wææ ānānīpa. Dodāni nāni odōmonte apænegainō ante ēñēninque wææ ānānīpa. ²³ Tōmēnāni, Ōnōmonque bai ĩnōmō inte mōnō anquedoidi ĩnānite waa adinque waa cæcæīmpa, ante wææ ānewēnāniya. Ayæ mā pōnēninque, Cædāmaī, Cædāmaī, ante nāmā baō incæ pānānīpa. Īñāni ocai encadōnāni inte wææ ānānīpa, ante pōnēninque wadāni edæ wæætē oda cædānīpa. Īñæmpa, Cædāmaī, Cædāmaī, ante nāni wææ ānewēnō wī eyepæ ĩ ĩnīnque nē ēñēnāni ĩnguipogaque nāni cæñēwēnō ante godōmenque wīwa cædānīpa, ante āmo ēñēmaīmīnīpa.

3

¹ ĩnīnque mōnō Codito nē ñāni ōmæmongaingā tōnō nē ñāni ōmæmongaīmīni

inte mīnitō æmōnga ongoncoo edæ æñēnente pōñēdāni. Codito ñōwo Mæmpo Wængonguī tōmēmængā ĩnō æi tæ contate ongonampa, ante pōnēninque edæ mīnitō, Æmōnga pōni nē quēwēngā tōmengā nānō entwawēnō bai adobaī entawēngæīmpa, ante æñēnente wædinque quēwēdāni. ² Inguipogaque mōnō quēwēmāmo ante edæ wædāmaī inte wæætē æmōnga mōnō quēwēnguīnō ante cōwē pōñente quēwēdāni. ³ Edæ do wænte bai ĩngāīmīni inte mīnitō ñōwo Codito tōnō Wængonguī nempo awēmō quēwēñōmīnite mīnitō quēwēnguīnō ante wī edonque acæīmpa. ⁴ Mōnō Codito mīnitō quēwēnguīnō ante nē pōnongaingā inte ponte a ongōñongā māñīfēdē tōmengā ñāō entwawēninque nānō tæi ēmōmāmodē mīnitō adobaī tōmengā tōnō a ongōmīni acæīmpa.

Inguipogaque ante wægaīmō inte mōnō mīmō quēwēmō

⁵ Mænōmaī ĩmpa, ante wædinque mīnitō ĩnguipogaque ante mīni cæñēwēnō ante wænōnte bai æmæwo wido cædāni. Nānōogængā ĩnāmaī ĩñongante godō mōnāmaī ee aedāni. Wīwa mīni pōñēwēnō ante æmæwo wido cædāni. Wacā ingante mīni tōñente wædō ante æmæwo wido cædāni. Wīwa mīni cæñēwēnō ante æmæwo wido cædinque ee ate quēwēdāni. Mīni māincooque ante æñēwēnō ante æmæwo wido cæte ñūmpo cædāni. Edæ māincoo ante æñēnente nē wæcā ĩñōmō tōmengā, Māincoo incæ botō wængonguī ĩmpa, ante bai wæcā apa cæmīnī. ⁶ Nē ēñēnāmaī cædāni ĩnguipogaque nāni cæñēwēnonque ante cæyōñānite Wængonguī nānō pīnguīmāmo oo ponguīnō anguēñē. ⁷ Mīnitō incæ doyedē ĩnguipogaque ante quēwēninque adobaī mīni cæñēwēnonque ante cægaīmīni ĩmīnīpa. ⁸ Ñōwo guīquēñē ænguī badāmaī ĩedāni. Āīmīni badāmaī ĩedāni. Pīñte cædāmaī ĩedāni. Babæ godō wēnæ wēnæ ānewēnāmaī ĩedāni. Wīwa apænedāmaī ĩedāni. Wæætē, Idæwaa wēnæ wēnæ cæte awædō, ante māñinō tōmānō ñūmpo cæte ee aedāni. ⁹ Wēēñēdē mīni entwawēngāīmāmo ante wido cædinque māñīfēdē mīni cægaīmō ante adobaī nē wido cædīmīni inte ñōwo ĩñōmō edæ wacā ĩngā wacā ĩngā babæ wapiticæ apænedāmaī ĩedāni.

¹⁰ Wæætē mīmīni edæ quēwēncæmīnīmpa, ante Wængonguī do pōnō badongā entwawēnīpa. Ayæ māñinō ante nē Badongaingā ĩñōmō cōwē pōnō odōmonte apæñecā ēñēninque mīnitō mīmīni quēwēmīni inte tōmengā nānō entwawēnō bai godōmenque godōmenque adobaī entwawēnīni bāmīnīpa. ¹¹ Mōnō Codito nempo adoyōmō pōni ĩnōmō inte mōnō guidiegoidi incæ oodeoidi incæ

adomō inōmō imompa. Nē ēō togæināni incæ bagaadāni incæ adomō inōmō imompa. Waodāni incæ cowodēidi incæ adomō inōmō imompa. Wacā beyæneque nē cæte quēwēnāni incæ abæ tawænte ee gote bai nāmā beyæneque nē cæmōni incæ mōnō tōmāmō adomō pōni inōmō imompa. Edæ mōnō tōmāmō Codito adocanque nempo quēwēninque tōmengā adocanque ingante nē ēwocamō imompa.

¹² Wængonguī, Minitō botō quīmīni badinque tæiyæ waēmō bacæminimpa, ante mīnitō imīnite waadete pōnēninque do apænte ængacāimpa. Īninque tōmengā nānō nē apænte ængaimīni inte mīnitō wadāni inānite waadete pōnente godō waa cæedāni. Nāmā ōnōmoque bai imopa, ante pōnēedāni. Wadāni inānite ædæmō cæedāni. Æiquedō waa cæquīnāni, ante wædāmaī inte piyænē cæte quēwēedāni. ¹³ Ayæ wacā nānō cæinēnō ante cæcā adinque mīnitō piīnāmaī ee amīni cæcæedāni. Wacā adobai mīnitō imīnite wīwa cæcā ate wædinque mīnitō godō ñimpo cæmīni quēwencæcāimpa. Edæ mōnō imonte mōnō Awēnē nānō ñimpo cægāi bai mīnitō adobai piīnāmaī inte godō ñimpo cæedāni. ¹⁴ Ayæ, Adocabomō mōnō baquinque mōnō waadete pōnengæimpa, ante pōnēninque mīnitō tāno wadāni inānite waadete pōnēninque ayæ tōmēnāni inānite mīni godōmence cæquēnēnō ante cæedāni. ¹⁵ Minitō adocabomīni badinque piyænē cæte quēwencæmīnimpa, ante Wængonguī mīnitō imīnite aa pegacāimpa cæmīni. Mōnō Awēnē Codito nānō piyænē cædō pōnongā æninque mīnitō piyænē cæte quēwēedāni. Ayæ Wængonguī ingante cōwē waa ate pōnente quēwēedāni.

¹⁶ Mōnō Codito nānō apæneganō ante ēñēninque mīnitō ædæmō entawēninque nangui ēñente baedāni. Īninque nangui ēñēmīni badinque mīni cabo incæ wacā ingā wacā ingā godongāmæ odōmote apæneedāni. Ayæ nangui ēñēmīni inte mīnitō wacā ingā wacā ingā waadete pōnēninque, Īmaī cæcæimpa, ante apæneedāni. Ayæ dodāni Wængonguī ingante waa adinque āmotamīni ante nāni yewæmongainta adinque mīnitō wæætē adodō tee empote æedāni. Ayæ Itota Codito nānō cægāinō ante pōnēninque āmotamīni æedāni. Ayæ adobai Wængonguī Ōnōwoca pōnō apænecā ēñente ēwocadinque mīnitō āmotamīni ante adodō tee empote æedāni. Mānōmaī āmotamīni āninque Wængonguī ingante cōwē waa ate pōnēninque æedāni. ¹⁷ Ayæ æbānenque ante apænēmīni incæ æbānenque cæmīni incæ mīnitō, Mōnō Awēnē Itota ēmōwo beyæ impa, ante tōmāā cæedāni. Ayæ tōmengā pōnō cæcā beyænque mīnitō eyepæ inte Mæmpo Wængonguī weca pōninque tōmengā

ingante waa ate pōnēninque apæneedāni.

Mōnō godongāmæ quēwencabo ĩmaī cæte quēwengæimpa

¹⁸ Onquiyæmīni ēñēedāni. Mōnō Awēnē nempo quēwēninque mōnō ēñente cæcæimpa, ante wædinque mīnitō nānōogænāni inānite Ao ante ēñente cæedāni. ¹⁹ Onguīñæmīni ēñēedāni. Minitō nānōogænāni inānite ædæmō waadete pōnēninque tōmēnāni inānite piīnte cædāmaī iedāni.

²⁰ Wēñæmīni ēñēedāni. Minitō mæmpoidi inānite ædæmō ēñente cæedāni. Edæ mānōmaī cæmīni adinque mōnō Awēnē, Waa pōni cæbi abopa, ancæcāimpa. ²¹ Wæmpomīni ēñēedāni. Minitō, Ancaa āmo bai botō wēñængā ænguī badinque guingo imonte wæquēnengā, ante pōnente wædinque wæætē wēñænāni inānite nangui ānāmaī inte waadete pōnō cæedāni.

²² Wacā nānō nē ō ænimīni inte tōmengā beyæneque nē cæte quēwēmīni ĩñōmō ēñēedāni. Minitō imīnite nē ō ængaingā ingante nē cæmīni inte mīnitō tōmengā nānō ā bai tōmāā ēñente cæedāni. Edæ, Awēnē Wængonguī incæ botō imote cōwē acampa diyæ, ante guīñente wædinque mīnitō imīnite nē ō ængaingā nānō ayedē incæ tōmengā nānō adāmaī ĩñedē incæ cōwē ēñente cæedāni. Waodānique botō imote waa acædānimpa, ante pōnēnāmaī inte mīnitō nō pōnēninque cōwē ēñente cæedāni. ²³ Æbānenque cædinque mīnitō, Wīi waocā beyænque ante cædinque botō Wængonguī Awēnē beyænque ante cæcæboimpa, ante pōnēninque tæi ēwocadinque ee cæedāni. ²⁴ Mōnō Awēnē ĩñōmō tōmengā do nānō angāinō bai cædinque mīnitō cægāinō beyæ ante eyepæ pōni pōnongā æncæmīnimpa. Mānōmaīnō ante pōnente cæedāni. Edæ, Mōnō Awēnē Codito ingante adocanque ingante nē cæmīni imīnipa, ante āmo ēñēmaimīnipa. ²⁵ Nē wēnæ wēnæ cæcā guiquēnē tōmengā nānō wēnæ wēnæ cægāinganca eyepæ æncæcāimpa. Edæ Wængonguī ĩñōmō wacā ingante wadō wacā ingante wadō ate pōnēnāmaī inte tōmāmō imonte apænte āninque pōnō nō pōni paga cæcæcāimpa.

4

¹ Awēnēidi ēñēedāni. Minitō waocā ingante nē ō ænimīni inte ēñēedāni āmopa. Edæ mīnitō Awēnēidi imīni bai mīnitō imīnite nē Ængaingā incæ adobai mīnitō Awēnē inongā inte dōnædē quēwengampa cæmīni. Minitō beyænque cæte nē quēwēnāni inānite mīnitō nōingā cædinque tōmēnāni nāni ænguēnēnō ante adinque eyepæ pædæ godōmīni æncædānimpa.

² Wængongui ingante cōwē apænedinque, Tömengä æbänō cæcää, ante cōwä adinque tömengä ingante waa ate pönëninque apæneedäni. ³ Codito æbänō cæcää, ante dodäni nāni ëñënamāi ingaine incæ botō mänine ante do ëñëñimo inte apænebo beyænque botō ïmote tee mönedäni wæbopa. Incæte mönitō mänine ante apæneyömöni munitō wæætē mönitō beyæ ante Wængongui ingante apænedinque ïimai ante apæneedäni ämopa. Wængongui ëñëmi. Bitō wi ænete bai cæbi ate Pabodoidi nāni apæneade wadäni mïmönē guicæïmpa, ante apæneedäni. ⁴ Codito æbänō cæcää, ante botō edonque apænequënëmo ïmopa. Ìninqe munitō botō beyæ ante apænedinque, Pabodo edonque apæneccäïmpa, ante Wængongui ingante apæneedäni ämopa. ⁵ Wadäni inänite bee téninque munitō ocai encamini inte ëñente cædäni. Pönënamāi inäni do ëñencædänimpa, ante waa apænete cædäni. ⁶ Ayæ Wængongui waadete pönō apæneccä ëñëninque munitō adobaï wadäni inänite waadete pönō apænedinque waa pönï apæneedäni. Wadäni, Æbänō ïi, ante ëñencæte ante wæyönänite munitō wæætē nō pönï ëñëmini inte nöingä apænemini ëñencædänimpa.

Waa quëwencæminimpa, änäniipa

⁷ Botō Pabodobo æbänō quëwëmo, ante nē ëñëningä inte Tiquico ñowo munitō weca pöninque mäninō ante apæneccä ëñencæminimpa. Tömengä mönō tönñicä bai ïñongante mönitō tömengä ingante waa waadete pönëmönipa. Tömengä mönō Awënë nempo quëwëninque mönitō tönō godongämæ cæcä ïongä inte mönō pönencabo tömämō ïmote pönëninque mönō beyæ cōwē ædæmō cæcä ingampa. ⁸ Munitō, Pabodoidi æbänō quëwënanii, ante ëñencæte ante wæminitawo. Edæ, Tiquico mäninō ante apænedinque munitō iminite ædæmō apæneccä ëñëninque munitō wampo pönencæminimpa, ante cædinque botō ñowo tömengä ingante munitō weca da godōmo pongä aedäni. ⁹ Tiquico goyongä tömengä tönō Önetimo mïni cabo nē ïongä incæ guëa gocæcäimpa. Önetimo cōwē ædæmō cæte nē pönengä ingampa, ante adinque mönitō tömengä ingante waadete pönëmönipa. Ìninqe tömëna ïñömō, Pabodoidi weca æbänō cædäni, ante tömänō ante apæneda ëñencæminimpa.

¹⁰ Botō tönō guëa tee mönete ongongå Aditadoco ïñömō tömengä munitō iminite, Waa quëwëedäni, angampa. Ayæ Bedënabee nänō wænquicä Mäadoco adobaï, Waa quëwencæminimpa, angampa. Tömengä ingante æbänō waa cæquii, ante do ämo ëñëminitapa. Ìninqe tömengä pongä adinque

waa cædäni. ¹¹ Ayæ wacä Itota Yoto nāni änogä adobaï, Waa quëwencæminimpa, angampa. Botō Wængongui Awënë Odeye nempo quëwënanii beyæ cæyōmo oodeoidi incæ wadäni cædämai ïñönänite mäninänique botō tönō godongämæ cædinque pönō ædæmō cædäni æninque botō wampo pönentabopa.

¹² Ayæ mïni cabo ïongä inte Epapada ïñömō tömengä Itota Codito ingante nē cædongä inte adobaï, Waa quëwëedäni, angampa. Tömengä Wængongui ingante nangui apænedinque, Codotenteidi inänite bitō godō cæbi ate tömënanii picænäni bai bacædänimpa. Ayæ bitō angainō tömänō ante ëñente cædäni inte tömënanii tæi piñænte ëwocacædänimpa, ante tömengä munitō beyæ ante cōwē apæneccampa. ¹³ Munitō beyæ tömengä nangui cæcampa. Daoditea ïñömō nāni pönencabo beyæ adobaï Yedapodi ïñömō nāni pönencabo beyæ adobaï tömengä nangui cæcampa, ante botō näwangä apænebo ëñëedäni. ¹⁴ Ayæ, Waa bacædänimpa, ante mönō nē cædongä tömengä ëmōwo Odoca tömengä ïñömō mönō nē waadecä ingampa. Tömengä tönō Deëma, Waa quëwencæminimpa, ante adobaï änapa. ¹⁵ Ayæ botō Pabodobo beyæ ante wæætē Daoditea ïñömō mönō tönñicäni inänite munitō, Waa quëwëedäni, äedäni. Diimpa inante, Waa quëwëedä, äedäni. Ayæ Codito ingante nāni pönencabo tömëna oncönē godongämæ ponte apæneyönänite munitō wæætē botō beyæ apænedinque, Pabodo, Waa quëwëedäni, angampa, äedäni.

¹⁶ Ayæ iinta botō cadota ante yewæmōinta ïinque adinque munitō, Daoditea ïñömō Codito ingante nāni godongämæ pönencabo adobaï acædänimpa, ante cædinque da godōmini ænte acædänimpa. Ayæ daoditeaidi inänite botō cadota ante yewæmöninta adobaï ämïni da pönönäni æninque aedäni.

¹⁷ Ayæ Adoquipo ingante apænedinque, Bitō mönō Awënë pönō angä ëñëniimi inte bitō cæquëñenō ante tömää ædæmō cæe, äedäni. ¹⁸ Botō Pabodobo tömëmo önopoca yewæmöninque, Waa quëwëedäni, ante tömëmo ëmōwo ante yewæmömopa. Botō æbänō yæguincamē encapote wæboi, ante pönëninque munitō Wængongui ingante apæneedäni ämopa. Wængongui waadete nänō pönō cædō ænte entawencæminimpa, ante mäninque ante yewæmömopa.

1 Tetadönitenteidi inänite **Pabodo cadota ante** tänota **nänö yewæmongainta**

Pabodo, Waa quëwëedäni, ante apæneccäimpa

¹ Botö Pabodobo inömo imopa. Mönö töninäda Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëningue minitö Tetadönica inömö quëwëningue Codito ingante godongämæ mïni pönencabo ëñëedäni. Mönö Wængongui waadete pönö cæcä ate minitö gänë entawencæmïnïmpa, ante yewæmömönïpa.

Tetadönitenteidi näni wede pönëno

² Mönitö möni apæneyedë minitö tönämïni beyæ ante Wængongui ingante cöwë waa ate pönëningue apænemönïpa. ³ Minitö Itota ingante æbänö wede pönente cæmïni imïnïpa, ante ayæ tömengä ingante waadete pönëningue æbänö cæmïni imïnïpa, ante cöwë apænemönïpa. Ayæ minitö wæwëmïni incæ, Mönö Awënë Itota Codito pongä ate watapæ bacæïmpa, ante pönëningue æbänö wæntæye inämai ee cæmïni imïnïpa, ante adingue mönitö Wængongui mönö Mæmpo weca æyedëmë ponte apænedinque cöwë mäninö ante pönëningue apænemönïpa. ⁴ Mönitö tönïflamïni, minitö Wængongui nänö në waademïni inömöni inte ëñëedäni. Tömengä minitö imïnite apænte ængacäïmpa, ante do ëñëmönïpa. ⁵ Edæ Itota ingantedö ante mönitö watapæ möni apænedö ante wïi önonquedö ante apænetamönïpa. Wæzetë Wængongui nämä tæi piñænte në angä beyænque mönitö minitö imïnite apænedinque Awënë inte bai apænetamönïpa. Wængongui Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëningue apænetamönïpa. Mänömai apænemöni ëñëmïni adingue mönitö, Wængongui minitö imïnite apænte ængacäïmpa, ante do ëñëmönïpa. Ayæ minitö weca quëwëningue mönitö æbänö minitö beyæ ante quëwentamönïi, ante do ëñëmïnïpa.

⁶ Wængongui Önöwoca watapæ nänö topämo ante pönongä ænimïni inte minitö nanguï caate wæmïni incæte Wængongui nänö angainö ante ëñëningue Ao ante æmïnitapa. Mönitö æbänö cæmönïi, ante adingue Awënë Itota Codito æbänö cæcäa, ante adingue minitö adobai möni cæbai cæmïni bamïnitapa. ⁷ Inique Mäatedöniabæ quëwënäni tönö Acayabæ quëwënäni

inömö Itota Codito ingante në pönënäni inönäni inte tönënäni tönänäni mïni cædi adingue mïni cæbai adobai cædänitapa. ⁸ Minitö wede pönëningue apænemïni beyænque Wængongui nänö angainö ante Mäatedöniabæ quëwënäni tönö Acayabæ quëwënäni ëñënäni incæte wïi mänïi mëñömongaque inömö quëwënäni ëñënäni. Wæzetë ædömë quëwënäni inönänite wadäni minitö Wængongui ingante mïni wede pönëmämo ante tededäni do ëñënäni.

Inique mönitö mänïi beyæ quïnante godömenque apænequï. ⁹ Edæ, Mönitö minitö weca ëñacæ pöninque apænemöni ëñëningue minitö æbänö watapæ ëñëmïnitapa, ante mäninäni në pönënäni incæ apænedäni ëñëmönïpa. Ayæ adodäni minitö imïnitödö ante iïmai ante apænedänïpa. Minitö, Mönitö wængonguïdi impa, ante mïni cönönincacoo incæ ëmö cæte wadæ pöninque mönö Wængongui gämæñö pömïnitapa, ante apænedäni ëñëmönïpa. Ayæ, Näwä Wængongui në Quëwëngä ingante ëñente cæcæmönïmpa, ante pömïnitapa, ante apænedäni ëñëmönïpa. ¹⁰ Ayæ tömengä Wengä öönædë në quëwëngä inte ocæ ëmænte poncæcäïmpa, ante minitö wänö cömïni imïnïpa, ante apænedäni ëñëmönïpa. Tömengä do wængaingä inöngante Wængongui, Näni ömæmöe, angä në näni ömæmongaingä ingampa. Inique Wængongui mönö imonte nänö piinte panguimämo ante wæyömonte tömengä Wengä inömö ængä beyænque quëwëngüimö imoppa.

2

Pabodo Tetadönica inömö nänö cædö

¹ Mönitö tönïflamïni ëñëedäni. Mönitö minitö weca möni ëñacæ pöñedë möni cædïnö wïi önonque impa, ante minitö do ëñëmïnïmpa. ² Mönitö do mïni ëñëñinö bai mönitö wëenëñedë Pidipoto inömö quëwëñömönite mänïñömö quëwënäni mönitö imönite wænæ wænæ cædäni beyænque wæwente intamönïpa. Adodäni mönitö imönite, Minitö wænæ wænæ cæmïni imïnïpa, ante tedewënäni ëñëningue wætamönïpa, ante minitö adobai ëñëminïpa. Ayæ minitö weca ponte quëwëñömönite woadäni tæiyæñäni mönitö imönite Baa ante, Minitö apænedämai incæmïnïmpa, ante wææ änäni incæte Wængongui mönitö tönö godongämæ cæcä beyænque tömengä ingantedö ante watapæ möni apænedö ante minitö imïnite guïñëñämai apænetamönïpa.

³ Edæ mönitö, Wængongui ingante pönëmïni inique waa imaimpa, ante minitö imïnite nanguï apænemöni inte wïi babæ wapiticæ pönëningue apænemönïpa. Wïi wentamö entawëningue pönente

apænemōnipa cæminii. Ayæ adobai, Minitō oda cæcæminimpa, ante cædāmai inte mōnitō wīi wapiticæ apænemōnipa. ⁴ Wæætē Wængongui mōnitō imōnite apænedinque, Waa cæmini abopa, āninque, Minitō Itota ingantedō ante botō watapæ apænedō ante nē apænemōni ēñencædānimpa, ante angā ēñēninque mōnitō nē apænemōni imōnipa. Mōnitō, Waodāni mōnitō imōnite waa acædānimpa, ante cædāmai inte wæætē, Wængonguinque mōnitō imōnite waa acæcāimpa, ante cædinque apænemōnipa. Edæ tōmengā, Æbānō entawēmīni, ante mōnō entawēñōmō ante nē acā ingampa. ⁵ Wadāni nāmā beyænque ante, Waa tedemōni ēñēninque mōnitō imōnite wæætē pōnō cæcædānimpa, ante babæ cædāni bai mōnitō iñōmō dicæ mōnōmainō ante mīnitō imīnite babæ cætāmōniyaa. Mānōmainō ante do ēñēmīnipa. Ayæ, Mōnitō wīi mīnitō godonte æinta ante beyæ apænetāmōnipa, ante do ēñēmīnipa. Æbānō cætāmōnipa, ante Wængongui nē acā ingampa. ⁶ Waodāni mōnitō imōnite waa acædānimpa, ante mōnitō dicæ āmōnitawogaa.

Ayæ, Minitō incæ wadāni incæ mōnitō imōnite waa acædānimpa, ante dicæ āmōnitawogaa. ⁷ Edæ, Itota Codito nānō da godongaimōni inōmōni inte mōnitō mīnitō imīnite, Pōnōmīni æninque quēwencæmōnimpa, āmōni bai waa incædōnimpa. Wæætē mīnitō weca quēwēninque mōnitō wānā nānō wēñænāni guiyānāni inānite ædæmō cædā bai adobai mīnitō imīnite cætāmōnipa. ⁸ Minitō imīnite nanguī pōni waadete pōnemōni inte mōnitō, Itota ingantedō ante Wængongui nānō watapæ apænedō ante mīnitō imīnite apænedinque watapæ totāmōnipa. Ayæ mīnitō nō mōni nē waademīni iñōmīnite mōnitō mīnitō beyæ quēwentāmōnipa. Ayæ mīnitō beyæ wæmōni incæ adobai watapæ tobaīmōnipa. ⁹ Mōnitō tōniñamīni ēñēdāni. Nanguī pōni mōni cædinō ante mīnitō do ēñēmīnipa. Itota ingantedō ante Wængongui nānō watapæ apænedō ante mōnitō mīnitō weca quēwente apænedinque, Mōni quēwengāimpa, ante wīi eyepæ godō wædō ante dicæ antāmōniyaa. Wæætē edæ, Minitō wædāmā incæmīnimpa, ante mōnitō itædē incæ woyowotæ incæ tōmēmōni nanguī cædinque ænte quēwentāmōnipa.

¹⁰ Minitō nē wede pōnemīni weca quēwēninque mōnitō tæiyæ waēmō ewocamōni inte nō cæte quēwēñōmōnite mīnitō, Wēnæ wēnæ cæminipa, ante ædō cæte anguimīni. Wæætē mōnitō cædinō adinque mīnitō, Mōnitō æbānō quēwēmōni imōni, ante do amīni inte nē apænemīni imīnipa. Wængongui adobai ante do acā ingampa. ¹¹ Edæ waocā mæmpocā tōmengā wēñænāni iñōnānte tōmengā,

Minitō ēñenguimīni, ante odōmongā bai mōnitō adobai mīnitō tōmāmīni iñōmīnite adocanque adocanque ingante, Bitō ēñenguimīni, ante odōmonte apænetāmōnipa. Mānōmai cætāmōnipa, ante mīnitō do ēñēmīnipa. ¹² Mīni quēwēnō adinque Wængongui tocæcāimpa, ante cædinque mīnitō tæiyæ waēmō quēwencæmīnimpa, ante mōnitō nanguī apænetāmōnipa. Ayæ, mīnitō mānōmai cæte quēwencæmīnimpa, ante waadete apænetāmōnipa. Ayæ adobai mōnitō wæætē wæætē apænedinque mīnitō imīnite adodō ante ancaā apænetāmōnipa. Wængongui iñōmō, Botō Awēñē Od-eye nempo quēwēninque mīnitō botō ñāō emōñōmō botō tōnō godongāmæ quēwencæmīnimpa, ante tōmengā mīnitō imīnite aa pedinque apænte ængampa.

¹³ Ayæ adobai mōnitō Wængongui nānō angainō ante mīnitō imīnite apænemōni ēñēninque mīnitō ō ænte do pōnemīnitapa. Nāwangā Wængongui nānō angainō impa, ante adinque mīnitō, Wīi waodāni nāni angainō impa, ante pōnēninque wæætē, Nāwangā Wængongui nānō angainō impa, ante pōnēninque ō æmīnitapa. Īninque mīnitō nē wede pōnemīni inte Wængongui nānō angainō entawēmīni beyænque nanguī cæminī imīnipa, ante ēñēninque mōnitō Wængongui ingante cōwē waa ate pōnente apænemōnipa. ¹⁴ Oodeabæ iñōmō Wængongui ingante godongāmæ nāni pōnencabo iñōmō tōmengā nempo quēwēñōnānite oodeoidi tōmēnāni inānite togænte pānāni wadāni bai mīnitō mōnitō tōniñamīni iñōmīni mīnitō ōmæ iñōmō nē quēwēnāni incæ mīnitō imīnite adobai cædāni wæmīnitapa. Mānōmai cædāni wædinque mīnitō Oodeabæ iñōmō Wængongui ingante godongāmæ nāni pōnencabo wædāni bai adobai wæmīni bamīnitapa.

¹⁵ Oodeoidi iñōmō Wængongui beyæ nē apæneganāni inānite wæñōnāni wængadānimpa. Ayæ ate tōmēnāni pæñāni iñōmō Itota Codito ingante wæñōnāni wængacāimpa. Ayæ ñōwodāni adocabodāni incæ mōnitō imōnite adobai togænte wido cædānitapa. Māñāni nāni cædinō adinque Wængongui tōmēnāni inānite ædō cæte waa aquingāā. Adodāni incæ waodāni tōmānāni inānite piñte quēwēñōnānimpa tōō. ¹⁶ Edæ oodeoidi ināmai ināni inānite, Codito ængā beyænque mīnitō quēwencæmīnimpa, ante apænedāmāi incæmīnimpa, ante cæcæte ante māñāni oodeoidi incæ mōnitō imōnite Baa āninque wææ cædānipa tōō. Mānōmai cōwē wēnæ wēnæ cædinque tōmēnāni wæætē wæætē nāni wēnæ wēnæ cædincoo idæwaa cædānipa. Idæwaa ĩ ĩninque Wængongui nānō ænguī bate pīimāmo

tömēnaniya do pongatimpa.

Tetadönitenteidi weca Pabodo ēñacæ pöinente Wæcampa

¹⁷ Incæte mōnitō tōniñamini ēñēdāni. Tömēnāni ānāni beyæ mōnitō mīnitō imīnite emō cæte godinque wīi wantæpiyæ ante gotamōnipa. Godinque mīnitō imīnite adāmai imōni incæte mōnitō mīnitō beyæ ante cōwē pōnentamōnipa. Mīnitō imīnite nanguī ainente wæmōni inte mōnitō, Æbānō cæte goquimōnii, ante pōnēninque nanguī cætamōnipa. ¹⁸ Edæ mīnitō weca pōinente wætamōnipa. Botō Pabodobo inōmo inte wæætē wæætē nō pōinēmo intabopa. Mōnitō pōinēmōni incæte Tatāna wæætē mōnitō imōnite wææ cæcā wætamōnipa. ¹⁹ Mōnō Itota Codito nānō ponguōnæ tōmengā weca ongōninque mōnitō æbānō ante beyæ watapæ bacæimipa, ante pōnēmōni imōnii. Wīi mīnitō beyænque toquimōnii. Edæ nē pōnēmīni inōmīni inte mīnitō do mōni nē watapæ todōmīni imīnitapa. Ayæ waodāni tæi emonte gānā cædinque poganta ænte todāni bai mīnitō beyænque ante mōnitō nē toquimōni imōnipa. ²⁰ Nāwangā impa. Waa pōni cæmīni inique mīnitō mōni nē waa amīni inōmīni inte mōni nē watapæ todōmīni imīnipa.

3

¹ Mānōmai beyæ mōnitō, Mīnitō imīnite adāmai inte awædō, āninque, Ædō cæte godōmenque wānō cōmōni inguimōnii, ante pōnēninque mōnatō adomōnaque Atēna iñōmō ongonguēnēmōna imōnapa, ante pōnente wætamōnapa. ² Ayæ Tīmoteo nē mōnō tōniñacā ingante mīnitō weca ante da pōnōmōna pongantapa. Tōmengā iñōmō Wængongui tōnō godongāmæ cædongā iñongante Itota mōnō Codito ingantedō ante mōnō watapæ apænedō ante ēñencædānimpa, ante odōmonte apænedongā ingampa. Tōmengā mīnitō imīnite, Mīni wede pōnēnō ante tæi ongonte quēwēdāni, ante ayæ, Wampo pōnēninque tæi piñænte cæedāni, ante ædæmō apæncæcæimipa, ante mōnatō tōmengā ingante da pōnōmōna pongantapa. ³ Wadāni mīnitō imīnite quiēmē cædāni caate wæmīni incæte tōmāmīni wadō pōnēnāmai inte iñimo cædāmai incæmīnimpa, ante cædinque Tīmoteo ingante da pōnōmōna pongantapa. Mōnō imonte cōwē mānōmai cædāni caate wæquēnēmō imōmpa, ante mīnitō do edonque pōni ēñēmīnipa. ⁴ Ayæ mīnitō weca mōni quēwēfēdē mōnitō mīnitō imīnite apænedinque,

Mōnō imonte quiēmē bai togænte pan-guinānidō anguēnē, ante wæætē wæætē apænetamōnipa. Edæ mīnitō ēñēnō bai mānīnō do batimpa. ⁵ Mānōmai beyæ

botō, Ædō cæte godōmenque wānō cōmo inguimoo, ante, Mīni wede pōnēnō æbānō impa, ante botō ēñencæboimipa, ante Tīmoteo ingante da pōnōmo pongantapa. Wēnæ awēnē, Oda cæe, ante nē ānēwēnongā iñōmō mīnitō imīnite, Oda cæedāni, angā ēñēninque mīnitō wabānō ēñēmīnimpa, ante botō ancaī guñente wætabopa. Mānōmai ēñente cæmīni inique mōnitō cædinō wo ewente babaimpa, ante pōnentabopa.

⁶ Incæte Tīmoteo mīnitō weca quēwēninque iñōwoque mōnitō weca ocæ emænte pongantapa. Mīni wede pōnēnō ante apænedinque tōmengā, Wede pōnēnānipa, angantapa. Ayæ, Nē waadete pōnēnāni inānipa, ante apæncæcā ēñentamōnapa. Mīnitō mōnatō beyæ cōwē waa pōnēmīni imīnipa, ante tōmengā apæncæcā ēñentamōnapa. Ayæ mōnatō mīnitō imīnite ainēmōna inte wæmōna bai mīnitō adobai mōnatō imōnate ainēmīni inte wæmīni imīnipa, angantapa. ⁷ Mānōmai beyæ mōnitō tōniñamini ēñēdāni. Quiēmē beyæ wæmōna incæ ayæ mōnatō imōnate togænte pānāni wæwēmōna incæte mōnatō mīni wede pōnēnō beyænque wæætē wampo pōnente batamōnapa. ⁸ Mīnitō mōnō Awēnē ingante iñimo cædāmai pōnēmīni beyænque mōnatō iñōwo wampo pōnente bai quēwēmōna imōnapa. ⁹ Mōnatō mōnō Mæmpo Wængongui weca ongōninque mīnitō beyæ nanguī watapæ tomōna inte wæætē apænemōnapa. Incæte mīnitō beyæ ante Wængongui ingante ædō cæte waa ate pōnente eyepæ apænequimōnaa. ¹⁰ Mīnitō mīni wede pōnēnō ante æbānō ayæ wīi eyepæ pōnēmīnii, ante wæmōnipa. Inique, Mīnitō imīnite wæætē adinque mōnitō odōmonte apænemōni ēñēninque mīnitō eyepæ pōncæmīnimpa, ante cædinque mōnitō woyowotæ itædē Wængongui ingante nō nanguī pōni apænemōni imōnipa.

¹¹ Wængongui mōnō Mæmpo incæ mōnō Awēnē Itota Codito tōnō mōni goquīnō ante tōinō pinonte bai cæda ate mīnitō weca gocæmōnimpa. ¹² Mōnitō mīnitō imīnite godōmenque waadete pōnēmōni bai mōnō Awēnē Itota pōnō cæcā ate mīnitō adobai mīnitō weca wacā ingā wacā ingā godōmenque godōmenque waadete pōncæmīnimpa, āmōnipa. Ayæ waodāni tōmānāni inānite godōmenque waadete pōncæmīnimpa, āmōnipa. ¹³ Tōmengā pōnō cæcā beyænque mīnitō tæiimō entawente incæmīnimpa, āmōnipa. Edæ mōnō Awēnē Itota quīnāni nē tæiyæ wæmō ewocadāni tōmānāni tōmengā tōnō godongāmæ poncædānimpa. Tömēnāni nāni pōñedē mīnitō iñōmō Wængongui mōnō Mæmpo weca pōmīni adinque tōmengā ædō cæte, Wēnæ wēnæ cæmīni imīnipa, ante anguingāā. Mīnitō tæiyæ wæmō ewocamīni

incæminimpa, ämönipa.

4

Wængongui waa acæcäimpa, ante mönō quëwëno ante

¹ Mönitō tōniñamini ëñëedäni. Adodeque ayæ apænequimōni imönipa. Mini quëwëno ante Wængongui waa acæcäimpa, ante mönitō, ĩmaï quëwëdäni, ante do wææ odömōnte apænemōni ëñëeminitawo. ĩninqwe munitō Ao ante quëwënomini iminipa. Nōwo ĩñōmō mönitō Awënë Itota ëmōwo ante apænedinque munitō iminite, Mäninonque ante gomonga cæte quëwencæminimpa, ante ancaa apænemönipa.

² Awënë Itota nänō äno ante ëñente cædinque mönitō munitō iminite wææ äninque, ĩmaï cæedäni, antamönipa. Mäninō möni wææ ante odömōnte apænedō ante munitō do ëñëimimipa. ³ Wængongui nänō äno ĩñōmō ĩmaï impa. Munitō ĩñōmō tæiyæ waëmō ewocate quëwenguëñëmini iminipa. Wacä nänöögæ ingante godō towente cædämaï inte edæ ononque mīni nänöögænque quëwenguëñëmini iminipa. ⁴ Onguiñæmīni tōmämīni ĩñōmō, Botō moncæboimpa, ante cædinque munitō, Æbänō cæte nänöögæ æmo ate Wængongui tönō woadäni waa aquināni, ante ëñenguëñëmini iminipa. Munitō, Tæiyæ waëmō ewocadinque ængæimpa, ante ëñenguëñëmini iminipa. ⁵ Wīi wadäni bai, Wængongui ingante æbänō ingaingä ingäa, ante ëñënamāi ināni bai onquiyænque ante nāni towënonque ante pönënamāi quëwencæminimpa. ⁶ Mäninō ante nē pönengä ĩñōmō, Botō tōniñacä nänöögængä ingampa, ante pönëninque tōmengä nänöögæ ingante towente cædämaï ĩninqwe tōmengä ingante wënæ wënæ cædämaï incæcäimpa.

ĩmaï wënæ wënæ cædäni inānite Awënë Itota pancæcäimpa. Wëëñëñedë mäninō ante munitō iminite apænedinque do wææ angamönipa. ⁷ Edæ Wængongui mönō imonte wīi, Towencæminimpa, ante apænte ængacäimpa. Wæætë, Munitō tæiyæ waëmō ewocate quëwencæminimpa, ante tōmengä mönō imonte apænte ængacäimpa. ⁸ Mänōmaï beyæ æcänō mäninō ante Pabodo nänō, ĩmaï cæedäni, ante nänō wææ odömōnte apænedō ëñëninque Baa äna ĩñōmō tōmengä wīi woadänique inānite ëñënamāi inte Baa angä ingampa. Wæætë Wængongui munitō iminite nänō Tæiyæ Waëmō Öñowoca nē pönongä ingante ëñënamāi inte Baa angä apa quëwëminii.

⁹ Mīni pönencabo mīni tōniñadäni ĩñönänite mīni waadete pönëno ante mönitō quīnante yewæmonguimōni. Edæ munitō tōmëmīni iminite, Wacä ingä wacä ingä waadete

pönencæminimpa, ante Wængongui odömōnte apæncä ëñëminitapa tōö. ¹⁰ Nō impa. Mäatedöniabæ tōmämæ ĩñōmō mönō pönencabo mönō tōniñadäni tōmänäni inānite do waadete pönëmini iminipa. Incæte möni tōniñamini, Munitō mäninō ante gomonga cæte quëwencæminimpa, ante ancaa apænemönipa. ¹¹ Munitō piyænë cæte quëwencæminimpa. Wadäni, Æbänō cæquëñëñäni ināni, ante cōwë änamāi incæminimpa. Ayæ, Wæntæye ināmaï inte mīni onompoca cæte quëwencæminimpa. Mäninō do möni apænedō bai munitō, Cæñëmönipa, ante cæcæminimpa, ämönipa. ¹² Mänōmaï cæmīni bai ĩmō ĩñō ĩmō ĩñō mīni quëwëno adinque wadäni nē pönënamāi ināni wæætë munitō iminite waa acædänimpa. Ayæ adobai munitō woadäni inānite, Pönömīni æncæmönimpa, ante änewënamāi quëwencæminimpa.

Mönō Awënë Itota nänō ocæ ëmænte ponguionæ

¹³ Mönitō tōniñamini ëñëedäni. Nē æmæwo wængaināni ĩñōmō æbänō baquināni, ante munitō ëñencæminimpa, ante yewæmōmönipa. Wadäni, Mönō nāni omæmongæimpa, ante pönënamāi ināni inte wæwëñäni bai munitō wīi adobai wæwëmini incæminimpa, ante yewæmōmönipa. ¹⁴ Itota æmæwo wæningä incæ nāni omæmōnte ĩnongäimpa, ante pönëmō ĩmōmpa. Itota ingante pönente nē wængaināni ĩñönänite Wængongui ĩñōmō mänināni inānite Itota tönō tōmengä weca ænte mämongä poncædänimpa, ante adobai pönëmōmpa.

¹⁵ Wængongui nänō apænedō bai mönitō ĩmaï ante munitō iminite apænemönipa. Awënë Itota nänō ponguionæ mönō nē mīimō quëwëmō inte ayæ ongōmō ĩñōmō mönō wīi tano tōmengä weca gocæmōimpa. Wæætë tōmengä ingante pönëninque nē æmæwo wængaināni inte mänināni ĩñōmō tano goquīnānidō angüënë. ¹⁶ Edæ mönō Awënë Wængongui nänō wææ änonque ante yedæ äñongä Wængongui anquedoidi tæiyæ awënë aa pecæcäimpa. Wængongui todompeta nāni ancadecca adocanque we we ðoncæ cæyongä mönō Awënë Codito incæ öönædë quëwente pō wææncæcäimpa. Pō wææñongä tōmengä ingante nē pönente wængaināni tōmëñäni tano nāni omæmoncædänimpa. ¹⁷ Ayæ ate Wængongui cæcä beyænque mönō nē mīimō quëwëmō inte ayæ ongōmō ĩñōmō mönō tōmëñäni tönō godongamæ boguimancodë æicæmōimpa. Boguimancodë æidinque mönō Awënë öönædë inō wææ pōñongante mönō tōmengä ingante bee tencæmōimpa. ĩninqwe cōwë Awënë weca quëwencæmōimpa. ¹⁸ Mänōmaï beyæ, Mönō Awënë Codito

incæ ðönæðe quëwente pö wææncæcäimpa, ante pönëninque wampo pönencæðänimpa, ante cæðinque mïnitö wacä ingä wacä ingä æðæmö apæneedäni.

5

1 Nöwo mönitö tönïñamïni ëñëedäni. Æönæðö mänïlï baquïlï, ante mïnitö ïmïnite æðö cæte yewæmonguïmönïi. 2 Edæ mönö Awënë Itota nänö ponguïönæ ïñömö nê awëmö ængä woyowotæ ïñontobæ pö guicä bai ïñontobæ baquïnö anguënë, ante mïnitö tömëmïni waa ëñëmïnïpa edæ. 3 Waodäni, Mönö piyænë cæte guïñenämäi quëwëmompä, ante nänï tedeyedë ënengä ïñontobæ wëñæ nantate wæcä bai tömënäni adobäi ïñontobæ nänï ömæe ewenguiñö baquïnö anguënë. Ìnïnque æðö cæte wodïi wïñonguïñänïi.

4 Incæte mïnitö mönitö tönïñamïni ëñëedäni. Mänïönæ nänï wæwente eönæ nê awëmö ænongä pö guicä bai ïñontobæ ïnque bayonte mïnitö wïl wëmö ïñömö quëwëmïni inte guïñenämäi incæmïnimpa. 5 Mïnitö Wængonguï wëñæmïni ïmïni ïnque ñäö ïñömö tömämïni quëwëmïni ïmïnïpa. Mönö cöwë wentamö ïñömö cæðönäni bai wïl ïmöimpa. 6 Mänömai beyæ mönö wïl wadäni mö ñönäni bai mongæimpa. Wæætë mönö ñänï ömæmöninque nämä wææ ante quëwëmö ingæimpa. 7 Edæ tömënäni nê mönänï ïñömö woyowotæ mönänï ïnänïpa. Ayæ wadäni ti nämæ bedinque nê quidi quidi dowænte ïnänï ïñömö woyowotæ bete badänïpa. 8 Incæte mönö ñäö ïñömö cægömö inte nämä wææ ante quëwëmö ingæimpa. Tæñïnetä wææ wëñate bai cæðinque Itota ingante mönö wede pönënö ante mönö waadete pönënö ante mönö entawente quëwengæimpa. Tæñïnetä ocabogata wææ encate bai cæðinque mönö edæ, Wængonguï ængä beyænque quëwencæmöimpa, ante pönënö ante mönö ewocate quëwengæimpa. 9 Edæ Wængonguï nänö ængui bate pïnguïmämo ante tömengä, Wïl wæwencæmïnimpa, ante mönö ïmonte apænte ængacäimpa. Wæætë mönö Awënë Itota beyæ tömengä mönö ïmonte ængä beyænque quëwencæmöimpa. 10 Tömengä, Botö tönö quëwencæmïnimpa, ante mönö beyæ wængacäimpa. Ìnïnque mü ïmö incæ wænte ïmö incæ mönö cöwë tömengä wæcä quëwencæmöimpa. 11 Mänömai beyæ mïnitö ïñömö do cæmïni bai gomonga cæedäni. Wampo pönencæðänimpa, ante cæðinque mïnitö wacä ingä wacä ingä æðæmö apænedinque, Æmæwo pægälmïni inte tæi piñænte cæedäni, ante odömonte apæneedäni.

Mönö tönïñadäni ïnänite Pabodo nänö änö

12 Nöwo mönitö tönïñamïni ëñëedäni. Mïnitö ïmïnite ïlmäi apænemönïpa. Mïnitö wecä nê nangui odömonte apænedäni ïñönänite mïnitö tömënäni ïnänite waa acæmïnimpa, ämönïpa. Edæ Awënë Itota apænte nänö ænïnänï inte tömënäni, Mïnitö ïlmäi waa quëwëedäni, ante mïnitö ïmïnite nê aadäni ïnänïpa. 13 Tömënäni nänï cæðö beyænque mïnitö tömënäni ïnänite godömenque nangui waa amïni inte waadete pönëedäni. Mïnitö wacä ingä wacä ingä piyænë cæte quëwëedäni.

14 Mönitö tönïñamïni ëñëedäni. Mïnitö ïmïnite ïlmäi ante ancaä ämönïpa. Wæntæye ïnänï ïnänite wææ ante apæneedäni. Guïñente ïnänï wampo pönencæðänimpa, ante tömënäni ïnänite æðæmö apæneedäni. Æmæ pönënäni tönö godongämæ cæedäni. Wadäni tömänäni ïnänite mïnitö waadete ee cæedäni ämönïpa.

15 Æcämënque ingante wadäni wënæ wënæ cæðäni adinque mïnitö Baa ämïni beyænque mänïnänï wæætëðö wæætë näämæ wënæ wënæ cæðämai incæðänimpa. Wæætë wacä ingä wacä ingä cöwë waa cæcæmönimpa, ante pönëninque cæedäni. Ayæ wadäni tömänäni ïnänite adobäi cæedäni.

16 Mïnitö cöwë watapæ tote quëwëedäni. 17 Wængonguï ingante woyowotæ itæðe apænete quëwëedäni. 18 Mïni quëwenganca quïëmë bai ba incæte mïnitö cöwë Wængonguï ingante waa ate pönëninque apæneedäni. Edæ Itota Codito nempo nê quëwëmïni inte mänïnö ante mïnitö beyæ ante Wængonguï nänö änö impa.

19 Wængonguï Öñöwoca nänö cæinö adinque mïnitö tömengä ingante æðö cæte, Cæðämai ïe, ante wææ anguïmïni. 20 Wængonguï beyæ nê apænedäni nänï apænedö ëñëninque mïnitö badete todämäi quëwëedäni. 21 Wæætë waodäni nänï apænedö tömännö ante ëñëninque, Æbännö ï, ante edonque ëñengæimpa, ante cæðinque mïnitö, Nö nänï änö ï, Babæ nänï änö ï, ante pönëninque do ëñencæmïnimpa. Waa änö impa, ante ëñëninque mïnitö mänïnö ante ö ænte bai quëwëedäni. 22 Quïëmë wënæ wënæ cæquïlï, ante adinque mïnitö Baa ante gomö aedäni.

23 Wængonguï incæ nê piyænë cæðongä inte pönö cæcä beyænque æðæmö tæiyæ wæmö entawëmïni incæmïnimpa. Awënë Itota mönö Codito tömengä nänö ponguïnganca mïnitö ïñömö Wængonguï pönö cæcä ate mïnitö mïmö incæ öñöwoca incæ baonga incæ wënæ wënæ cæðämai incæmïnimpa. 24 Wængonguï nänö nê apænte ænïmïni ïñömïnite tömengä mïnitö ïmïnite cöwë pönëninque tömengä nänö änö bai æðæmö cæcæcäimpa.

*Pabodo, Waa quëwencæminimpa,
angampa*

²⁵ Mönitö tönĩñamĩni iñömö ëñëedäni.
Minitö mönitö beyæ ante Wængongui
ingante apæneedäni. ²⁶ Minitö
pönencabo iñöminite mönitö tömämĩni
waa quëwencæminimpa, ante waadete
pönëningue ämönipa. ²⁷ Edæ Awënë
Itota ëñëñongä botö munitö iminite wææ
ante, İi yewæmointa adinque munitö mĩni
pönencabo iñöminite adocanque ingante
ämĩni tömånäni ëñëñönäni tömengä adotaa
adinque apænecä ëñencædanimpa, ämopa.
²⁸ Awënë Itota mönö Codito munitö iminite
waadete pönö cæcæcäimpa, ante botö
mäninque ante yewæmömopa.

2 Tetadönitenteidi inänite Pabodo cadota ante ayänta nänö yewæmongainta

*Pabodo, Waa quëwëdäni, ante
apæncampa*

¹ Botö Pabodobo inömo imopa. Mönö tönināda Tidibānō tönō Timoteo tönō godongāmæ apænete ate yewæmōmo aedāni. Tetadönica inömo quëwëmini inte Codito ingante godongāmæ mīni pönencabo inömini inte eñëedāni. Minitö monö Mæmpo Wængongui nempo ayæ monö Awënë Itota Codito nempo quëwëmini iminipa. ² Mönö Mæmpo Wængongui tönö monö Awënë Itota Codito waadete pönö cæda ate munitö gänë entawencæminipa, ante yewæmömönipa.

*Itota Codito pongä ate Wængongui apænte
pancæcäimpa*

³ Mönitö tönināmīni eñëedāni. Mīni wede pönëno godomenque pæte bai impa, ante ayæ tōmāmīni wacä ingä wacä ingä mīni waadete pönëno waa pōni pæte bai iminipa. Mänōmai beyæ mōnitö munitö beyæ ante Wængongui ingante cōwë waa ate pönëninque apænequënëmōni imōnipa. ⁴ Wadāni munitö iminite quïëmë togæwëninque wënæ wënæ cædāni caate wæmīni incæ quïëmë beyæ wæwëmini incæ munitö wæntæye ināmāi inte ee cæminipa. Mänōmai beyæ Wængongui ingante godongāmæ nāni pönencabo wayōmō wayōmō quëwëñōnānite mōnitö incæ mīni cæinō ante waa adinque cōwë apænemōnipa. Ayæ mīni wede pönëno ante cōwë apænemōnipa. ⁵ Mäninō ante beyæ Wængongui apænte nänö panguinō ante, Tömengä cōwë nō panguingāno anguënë, ante do eñëmōmpa. Mänōmai beyæ munitö Wængongui Awënë Odeye nempo guicæte ante eyepæ waa pōni bacæminipa. Minitö do mäninō Wængongui nempo mīni öönædë quëwënguino beyæ wæwente quëwëminipa.

⁶ Wængongui nē nō cædongä ingampa. Edæ wadāni munitö iminite wënæ wënæ cædāni ate wæwëmini inömini tōmengä wæætë tōmënāni inänite wënæ wënæ cæcä ate wæwencædānipa. ⁷ Ayæ munitö nē wæwëmini inöminite pönö cædinque tōmengä mōnitö imōnite adobai pönö cæcä ate tōmāmō mōnō wæwënāmai baquimō imōmpa.

Mönö Awënë Itota tönö tōmengä anquedoidi nē tæi piñænte cædāni tönö öönædë ongonte pō gonga bæcote bai godongāmæ wææññōnāni tōmāmō ayōmō mänōmai bacæimpa. ⁸ Mönö Awënë Itota ingantedö ante mōnō watapæ apænedö ante nē eñënāmai cædāni inömo,

Wængongui æbānō ingaingä ingä, ante eñënāmai ināni inñōnānite tōmengä mänināni inänite pante cæcæcäimpa. ⁹ Wængongui adodāni inänite pāninque æmæwo wo ewencæcäimpa. Tömënāni inömo Awënë Itota weca tōmengä nänö tæi piñæmāmo wæmō pōni nänö emōñōmō mäninōmō pō guidāmai incædānipa, ante Wængongui wææ cæcæcäimpa. ¹⁰ Awënë Itota nänö ponguionæ Wængongui mänōmai cæcæcäimpa. Mänionæ Itota quināni inömo nē tæiyæ wæmō ewocate quëwënāni inte tōmengä ingante waa acædānipa, ante poncæcäimpa. Ayæ tōmengä nē pönënāni weca pōñongante tōmënāni tōmānāni, Tömengä waa pōni cæcä amōnipa, ante watapæ ancædānipa, ante cæcæte ante poncæcäimpa. Ayæ munitö adobai mōnitö apænedö ante eñëninque pönëmīni inte tōmengä quimīni inömo mōnitö tönö adobai cæcæminipa, ante cæcæte ante poncæcäimpa.

¹¹ Mänōmai beyæ mōnitö munitö beyæ ante woyowotæ itædë Wængongui ingante apænemōnipa. Wængongui, Mīni quëwënguino ante quëwencæminipa, ante munitö iminite apænte ængä ininque mōnitö, Minitö eyepæ waa pōni bacæminipa, ante mōnō Mæmpo Wængongui ingante apænemōnipa. Minitö, Mōnitö waa cæcæmōnipa, ante mīni änō bai tōmānō ante Wængongui nänö tæi piñæmāmo inte ininque cæcæcäimpa, ante apænemōnipa. Ayæ mīni wede pönëno beyæ munitö cæquino tōmānō ante tōmengä adobai ininque cæcæcäimpa. ¹² Mönö Awënë Itota pönö cæcä beyænque munitö waa pōni cæmīni adinque wadāni tōmengä emōwo ante waa ate apænecædānipa. Ayæ tōmengä mänōmai cæcä beyænque wadāni, Minitö waa quëwëmini iminipa, ante munitö iminite waa acædānipa. Mönö Mæmpo Wængongui tönö mōnō Awënë Itota waadete pönö cæda bai mänōmai bacæimpa, ante mōnitö mäninō ante Wængongui ingante apænemōnipa.

2

*Mönö Awënë Itota nänö ponguionæ
æbānō baquï, ante*

¹ Mönitö tönināmīni eñëedāni. Mönö Awënë Itota Codito nänö ponguino ante amōnipa. Ayæ tōmengä æbānō, Botö weca pōedāni, ante gæcä goquimō imōmpa, ante apænedinque munitö iminite imāi amōnipa. ² Minitö weca quëwënāni pancadāniya inömo, Mönö Awënë nänö ponguionæ do batimpa, ante änāni eñëninque munitö idiquibæ pönënāmai bacæminipa, amōnipa. Edæ mōnitö Wængongui beyæ nē apænemōni inte mōni apæneyedë

incæ möni odömte apæneyedē incæ möni yewæmōntaa yewæmōñedē incæ æyedemē incæ apænemōnipa, ante mänināni iñōmō mōnitō imōñitedō ante apænedinque, Pabododīi mäninō ante apænedāni inānipa, ante tededāni eñēninque mīnitō guñēnte wædāmaī iedāni ämōnipa. ³Æcāmenque angā æbāmē nānō äñō eñēninque mīnitō oda cæte godāmaī iedāni.

Edæ waodāni tæiyæñāni Wængonguī ingante Baa ante wadæ godāni ate wacā nē wīwa cæcā inte pongā acæīmpa. Ayæ tōmengā pongā ate mōnō Awēñē nānō ponguionæ bacæīmpa. Māningā nē wīwa cædongā iñōmō Wængonguī æmæwo nānō nē wo ewengingā ingampa. ⁴Æcāmenque ingante, Wængonguī ingampa, ante waodāni waa adinque ædæ wææñinque apænedāni incæ ayæ quīemē adinque, Wængonguī impa, ante waa adinque apænedāni incæ māningā nē wīwa cædongā iñōmō wængonguīdi nāni nē äñōñāni tōmāñāni inānite Baa äñinque nāmā ængō cæte bai cæcā inongampa. Wængonguī oncō tæiyæ waemō oncōñē adocā pō guite tæ contadinque, Botō tōmēmo wængonguīmo iñōmo imopa, angā ingampa.

⁵Botō mīnitō weca quēwēñedē mäninō ante mīnitō imīnite apænetabopa. Wīi eñēmīnitawo. ⁶Adocā nē wīwa cædongā iñōmō Wængonguī nānō äñnæ mänionæque edonque pongā acædānipa. Ininque quīnō beyæ ante māningā ayæ pōñāmaī ingāā, ante mīnitō ñowo do eñēmīnipa. ⁷Adocā awēmō nānō wīwa cæpāmo incæ do eñēnte cædāni inte waodāni tæiyæñāni quīemē wīwa i, ante do cædānipa. Incæte tōmēñāni inānite, Wīwa cædāmaī iedāni, ante nē wææ cædongā iñōmō adodō ante godōmenque wææ cæcā ingampa. Nē wææ cæcā ingante guiquēñē wacā wæætē, Māninganca idæwaa, äñinque ö ængā wadæ gocæcāmpa. ⁸Māñiñedē nē wīwa cædongā iñōmō edonque pongā acædānipa. Incæte Awēñē Itota pōninque tōmengā nānō öo guēmāmāmo inte māningā ingante wæñongā wænguingā ingampa. Tōmengā ñāo apāite emōñongā inte pongā adinque nē wīwa cædongā guiquēñē æmæwo wo ewente bacæcāmpa. ⁹Wīwa cædongā ingante Tatāna nānō tæi pīñæmāmo inte da pōñongā ponguingā ingampa. Tōmengā nānō mā cæ bai quīemē bamōñengæ cæcā adinque waodāni, Æbāñō cæcāā, ante oda cæte gocædānipa. ¹⁰Ayæ quīemē wēñæ wēñæ nānō cæpāmo beyæ nē æmæwo wo ewente baquīñāni iñōmō oda cæte godānipa. Edæ Wængonguī nāwangā nānō angainō ante waadete pōñēñāmaī iñōñānite Wængonguī tōmēñāni inānite, Quēwencæmīnipa, ante ædō cæte ænguingāā. Māñōmaī beyæ

tōmēñāni æmæwo wo ewente bacædānipa.

¹¹Māñōmaī beyæ, Tōmēñāni nē wīwa cædongā wapiticæ nānō angainō ante pōñencædānipa, ante cædinque Wængonguī tæi pīñænte cæcā beyænque tōmēñāni babæ ante pōñente oda cædānipa. ¹²Edæ Wængonguī nāwangā nānō angainō ante nē pōñēñāmaī ināñāni inte wæætē, Mōñō wentamō mongæmāmo incæ waa impa, ante watapæ todināni iñōñānite Wængonguī mänināni tōmāñāni inānite apænte ante pancæte ante māñōmaī cæcampa.

Wængonguī, Quēwencæmīnipa, ante nē apænte æñināni

¹³Mōñitō tōñiñāmiñi mīnitō mōñō Awēñē Itota nānō nē waademīni inte eñēñedāni. Inguipoga badōñāmaī iñedē Wængonguī mīnitō imīnite do, Quēwencæmīnipa, ante apænte ængacāmpa, ante mōñitō mīnitō beyæ ante tōmengā ingante waa ate pōñēninque cōwē apænequēñēmōni imōnipa. Tōmengā iñōmō, Botō Öñowoca pōñō cæcā ate tæiyæ waemō ewocamīni inte mīnitō nāwangā botō angainō ante pōñēmīni beyæ quēwencæmīnipa, ante mīnitō imīnite ængacāmpa. ¹⁴Itota ingant-edō ante mōñitō watapæ apæñedō beyæ Wængonguī, Quēwencæmīnipa, ante mīnitō imīnite apænte ængacāmpa. Tōmengā, Awēñē Itota Codito ñāo nānō emōñō bai mīnitō adobai ñāo bai entawencæmīnipa, ante cædinque mīnitō imīnite apænte ængacāmpa.

¹⁵Mōñitō tōñiñāmiñi eñēñedāni. Māñōmaī beyæ tæi ongonte quēwēñedāni. Edæ mōñitō öñone inte tedomōni eñēñimīni incæ yewæmōntaa yewæmōmōni adinque eñēñimīni incæ mīnitō mōñitō odömte apæñedinō ante ñimpo cædāmaī quēwēñedāni. ¹⁶Mōñō Mæmpo Wængonguī mōñō imonte nē waadecā inte pōñō ædæmō cæcā ate mōñō, Tōmengā weca cōwē quēwenguiñō imopa, ante pōñēninque wampo pōñēmō inte quēwēñompa. Ayæ, Waa bacæīmpa, ante mōñō pōñēñompa. Ininque tōmengā tōñō mōñō Awēñē Itota Codito, Iñāmaī cæcædāmpa, ante ämōnipa. ¹⁷Tōmēna ædæmō apæñeda beyænque mīnitō wampo pōñēninque tæi ongonte quēwencæmīnipa. Ayæ tōmēna cæda beyænque mīnitō æmæwo pægaimīni inte tōmāā mīni waa cædō ante mīni waa äñō ante tæi pīñænte cæcæmīnipa.

3

Mīnitō mōñitō beyæ ante Wængonguī ingante apæñeedāni

¹Adodeque ante ñinque yewæmōmōñipa. Mōñitō tōñiñāmiñi eñēñedāni. Mīnitō mōñitō beyæ ante Wængonguī ingante Iñāmaī apæñeedāni. Mōñitō wayōmō wayōmō gote möni apæneyōmō mōñō Awēñē nānō angainō ante nangui ināni quingæ eñencædānipa, ante apæñeedāni. Ayæ,

Minitö bai wadäni adobaï iï änö ante Wængongui ingante waa ate pönëninque æncædäniipa, ante mäninö ante Wængongui ingante apæneedäni. ² Wadäni në wënæ wënæ cædäni inte wiwa cædäni iñömö tömënanäni mönitö imönite wënæ wënæ cædämaï, ante mänüi beyæ ante munitö adobaï Wængongui ingante apæneedäni. Edæ wü waodäni tömänäni pönënanäni inäniipa.

³ Incæte mönö Awënë cöwë ædæmö aacä inongä ingampa. Tömengä pönö cæcä ate munitö æmæwo pægaimini inte tæi piñænte cæcæminipa. Ayæ, Tatäna munitö iminite wënæ wënæ cædämaï incæcäimipa, ante Wængongui adobaï aacä incæcäimipa. ⁴ Minitö iminite möni wææ änö ante ëñëninque do cæmini incæ godömenque adodö cæcæminipa, ante Wængongui pönö cæcæcäimipa, ante mönitö do pönëmönipa. ⁵ Wængongui nänö waadete pönëno ante ëñencæminipa, ante mönö Awënë taadö ëñente odömönte bai pönö odömöngä ate munitö mimönë ëñencæminipa. Itota Codito pönö cæcä beyænque munitö wæntæye inämaï inte ee cæcæminipa.

Cæcæte ante mönö cæquëñenö

⁶ Minitö töniñamini ëñëdäni. Minitö mönö Awënë Itota Codito ëmöwo ante munitö iminite wææ ämönipa. Mönö töniñadäni pancadäniya wæntæye inäni adinque ayæ möni odömönte apæneedö möni ëñente æninö bai quëwënamäi inäni adinque munitö iñömö mäninäni tömänäni inänite gomö aedäni.

⁷ Minitö cægäi bai munitö æbänö adobaï cæquëñëmini iminipa, ante edæ tömëmini do ëñëmïnipa. Minitö munitö weca quëwëñedë wæntæye inämaï quëwentamönipa. ⁸ Ayæ adobaï æcämenque cængui ante nani pönöni æninque mönitö önonque ænämaï inte wæætë paga cæte cæntamönipa. Ayæ, Minitö cænguinque ante pönëninque wædämaï incæminipa, ante mönitö, Tömëmöni cængui cæncæmönipa, ante woyowotæ itædë nangui cædinque quëwentamönipa. ⁹ Minitö munitö iminite, Möni quëwengæimipa, ante, Cængui tönö mönitö owoquincö pönömïni æncæmönipa, ante änämaï intamönipa. Minitö mänömaï ante bai waa incædönimipa. Wæætë æbänö mönitö cætamönii, ante adinque munitö adobaï cæcæminipa, ante cætamönipa. ¹⁰ Edæ möni munitö weca quëwëñedë incæ mönitö munitö iminite, Iïmaï cædäni, ante wææ antamönipa. Adocanque në mönö cæquëñenö ante, Wüi cæinëmo, angä iñongante munitö tömengä ingante cængui godönämaï inguëñëmini iminipa.

¹¹ Minitö weca pancadäniya önonque cædämaï a ongönte quëwënanäni inäniipa, ante änäni ëñëmönipa. Adodäni në Baa äninque cædämaï inäni inte wæætë, Wadäni

æbänö quëwënanäni, ante godö wæntæ godö wæntæ tededäni inäniipa. ¹² Minitö mäninäni inänite mönö Awënë Itota Codito ëmöwo äninque, Minitö iïmö iñö iïmö iñö nangui cæte quëwëdäni, ante wææ ämönipa. Tömëmini cæte beyænque munitö cængui ænte cæncæminipa, ante ancaa apæñemöni imönipa.

¹³ Minitö töniñamini munitö guiquëne, Quiëmë waa impa, ante wæntædämaï inte cöwë cædäni. ¹⁴ Minitö munitö iminite iï yewæmönitaa möni yewæmongainö ate adocanque ëñënamäi cæcä ininque, Tömengä æcänö ingää, ante aedäni. Ayæ tömengä guingo imonte wæcæcäimipa, ante tömengä ingante gomö aedäni. ¹⁵ Minitö adocä ingante, Wüi wacä ingampa, ante pönëninque wæætë tömëmini biwiidi inänite ante bai tömengä ingante wææ ämini ëñencæcäimipa.

Waa quëwencæminipa, ante Pabodo angampa

¹⁶ Mönö Awënë Itota në piyænë cædongä incæ tömengä pönö cæcä ate munitö æbämenque hamini incæ cöwë piyænë cæte quëwencæminipa. Mönö Awënë munitö tömämini weca a ongoncæcäimipa, ämopa. ¹⁷ Botö Pabodobo ñöwo tömëmo önonpoca yewæmöninque, Minitö iminite waa pönëmopa, ante yewæmömö aedäni. Pabodo nänö yewæmöninta impa, ante ëñencæminipa, ante cædinque botö tömanta yewæmöninque mänömaï bai yewæmömopa. ¹⁸ Mönö Awënë Itota Codito munitö iminite waadete pönö cæcæcäimipa, ante botö mäninque ante yewæmömopa.

1 Timoteo ingante Pabodo cadota ante tānota nānō yewæmongainta

Timoteo ingante Pabodo yewæmongampa

¹ Botō Pabodobo inōmo imopa. Itota Codito nānō nē da godongaīmo imopa. Itota Codito waa pōni nānō inō bai mōnō adobaī bacæmōimpa, ante pōnēmompā. Inique Itota Codito mōnō nē pōnēnongā tōnō Wængonguī mōnō imonte nē Ængaingā tōnō botō imote āna ēñēñōmote da godōna godīmo imopa. ² Timoteo ēñēmi, Bitō acæbiimpa, ante bitō imite yewæmōmopa. Edæ mōnō wede pōnēnō ante apænebo nē ēñēniimi inte bitō Itota Codito quīmi badinque nāwā botō wēmi bai inōmi imipa. Inique botō, Mæmpo Wængonguī tōnō Awēnē Itota mōnō Codito tōnō bitō imite waadete pōnō waa cæda ate bitō gānē entawencæbiimpa, āmopa.

Wadāni wapiticæ nāni odōmonte apænedō

³ Botō Māatedōniabæ iñōmō pōninque bitō imite, Epeto iñōmō ee ongōe, nangū antabopa. Māniñōmō wadāni babæ wapiticæ nāni odōmonte apænedō ante nē odōmonte apænedōnāni inānite bitō, Minitō godōmenque māninō ante odōmonte apænedāmāi iedāni, ante āmi ēñencædānimpa. Mānōmāinō ante do botō āninō bai nōwo adodō ante bitō imite āmopa. ⁴ Ayæ, Dodāni ōnonque ante nāni tedegainō ante pōnēnāmāi quēwēdāni, ante bitō ancæbiimpa. Ayæ adobaī tōmēnāni wæmæidi tæiyæñāni ante pōnēninque, Æmōnānidō ingaināni, ante ancaā ānewēñōnāni bitō tōmēnāni inānite, Minitō māninō ante pōnēnāmāi iedāni, ancæbiimpa. Edæ māninō nāni tedewēnō beyæ tōmēnāni, Æbānō i, ante nangū wæætēdō wæætē ānewēnāni tōō. Wæætē edæ, Wængonguī nānō cædō ante wede pōnēninque mōnō cæquēñēnō guiquēñē tōmēnāni nāni tedewēnō beyæ pōnōmenque cætimpa.

⁵ Mānōmāinō ante āninque botō, Tōmēnāni mīmō iūmāi entawēninque waadete pōnencædānimpa, ante āmopa. Edæ mīmō waēmō pōni entawēninque tōmēnāni Wængonguī ingante wede nāni pōnēnō beyæ waadete pōnencædānimpa. Ayæ adobaī nāmā apænte adinque wentamō mongæñāmāi entawēnāni inte tōmēnāni waadete pōnencædānimpa. ⁶ Inæmpa pancadāniya māninō ante ēñēninque Baa ante nimpō cæte wadæ godinque ōnonque ante quēwēnāni. ⁷ Mōitee wodi nānō wææ yewæmongainō ante odōmonte

apæneinēmōnīpa, ante nē ānāni incæ tōmēnāni nāni odōmonte apæneyedē quīnō apænedāni, ante ēñēnāmāi ināni tōō. Adobaī quīēmē ante apænedinque tōmēnāni, iūmāi impa, iūmāi impa, ante apænedāni incæte ēñēnāmāi ināni inte apænedāni.

⁸ Mōitee wodi nānō wææ yewæmongainō ante adinque nōingā cæmō inique māninō tōmēngā nānō wææ angainō iñōmō waa ante imaimpa, ante do ēñēmompā. ⁹ Mōitee wodi nānō wææ yewæmongainō ante Wængonguī wīi nē nō cædāni beyæ pōnō wææ angacāimpa. Wæætē nē ēñēnāmāi cædāni tōnō wadāni māninō ante ēñēnāni incæ nē godōmenque wēnæ wēnæ cædāni tōnō tōmēnāni beyæ pōnō wææ angacāimpa, ante do ēñēmompā. Ayæ adobaī Wængonguī ingante Baa ante nē quēwēnāni tōnō wēnæ wēnæ cædāni beyæ wææ angatimpa. Nē tæiyæ waēmō entawēnāmāi inōnāni beyæ ayæ adobaī Wængonguī ingante nē badete todōnāni beyæ wææ angatimpa. Mæmpocā ingante wānā inante nē wænōnāni beyæ ayæ adobaī waocā ingante nē pīnte wænōnāni beyæ wææ angatimpa. ¹⁰ Nānōogængā ināmāi iñongante nē towēnāni beyæ ayæ adobaī onguīñæñāni nāna onguīñæncaya guēa towēnāni beyæ wææ angatimpa. Nē cæte quēwēngā bacæcāimpa, ante waocā ingante nē godonte ænāni beyæ ayæ adobaī nē babæ ānāni beyæ wææ angatimpa. Wadāni inānite, Nō āmōnīpa ēñēdāni, ante nē babæ ānewēnāni beyæ ayæ adobaī nō odōmonte apænedō incæ nē wadō ante cædāni beyæ wææ angatimpa. Mānināni tōmānāni ēñencædānimpa, ante Wængonguī māninō ante pōnō wææ angacāimpa, ante ēñēmompā.

¹¹ Edæ Wængonguī nāō apāite ēmongampa, ante odōmonte apænecæbiimpa, ante tōmēngā nē waa inongā inte edæ tōmēngā watapæ nānō apænedō ante pōnongā æntabopa. Ayæ nō nānō odōmonte apænedō ante Wængonguī nānō pōnō angainō ante adodō ānō impa.

Wængonguī waadete nānō pōnō cædō ante

¹² Itota Codito mōnō Awēnē pōnō cæcā beyænque botō tæi ēwocabo batapopa. Tōmēngā iñōmō botō imote waa adinque, Bitō nē pōnēmi inte cōwē ædæmō cæbi imipa. Inique bitō botō beyæ wadāni inānite nē cæbi bacæbiimpa, ante pōnō cægacāimpa. Mānōmāi beyæ botō tōmēngā ingante waa ate pōnente apænebopa. ¹³ Botō wēēñēñedē Itota Codito ingante nē godō babæ ante ānewengāimō imopa. Tōmēngā ingante nē pōnēnāni inānite wēnæ wēnæ cæquīmo, ante nē togæñōmo inte botō nē pīnte quēwēngāimō imopa. Incæte botō nē

pönēnāmaī inōmo inte, Quinō cæquīl, ante ēñēnāmaī inte cæbo adinque Wængonguī, Quēwencæbiimpa, ante pönō waadete waa cægacāimpa. ¹⁴ Mönō Awēnē botō imo nanguī waadete pönō cæcā adinque botō Itota Codito nempo quēwēninque nē wede pönēmo badinque nē waadete pönēmo bagaboimpa.

¹⁵ Iīmaī ante nō pōni nāni ānō nāwangā ante impa, ante āmo ēñēmaīminipa. Itota Codito iñōmō, Wēnæ wēnæ cæmini iñinite æmo beyænque quēwenguīmini, ante inguipoga wææ pongacāimpa. Tömengā mǎnōmaī cæcā incæte wadāni wēnæ wēnæ cædāni iñōnāni botō tōmēmoque godōmenque wēnæ wēnæ nē cægāimo iropa. ¹⁶ Mǎnōmaī beyænque tōmēmoque godōmenque wēnæ wēnæ cægāimo iñōmote Itota Codito pönō waadete angā beyænque quēwengaboimpa. Wēēnēñedē botō bai nē wēnæ wēnæ cægāināni inānite adinque Itota Codito, Botō weca cōwē wantæpiyæ nāni quēwenguinque pancadāniya botō imote pōnenguīnāni inānipa, ante do ēñengacāimpa. Ininque tōmengā, Botō nē waadete cædinque ee abo iropa, ante tōmēnāni inānite odōmoncæte ante cædinque tōmengā botō Pabodobo imote mǎnōmaī pönō waadete waa cægacāimpa.

¹⁷ Mönō Wængonguī iñōmō cōwē wænāmaī nē quēwengaingā inongā inte tōmengā iñcayæ ate adobaī cōwē wænāmaī inte Awēnē Odeye inongā ingampa. Tömengā awēmō iñōmō quēwēnongā iñongante mōnō waocabo tōmengā ingante ædō cæte aquīl. Tömengā wæætē tōmāā nē ēñengaingā inongā ingampa. Ininque tōmengā adocanque Wængonguī inongā iñongante mōnō tōmengā ingante cōwē waa aquimō anguēnē. Tömengā ingante, Bitō ñāō bai ēmōmi inōmi imipa, ante apænedinque mōnō ñine cædāmaī inte cōwē watapæ angæimpa. Cōwē iīmaī babaiimpa, ante Amēē, āmopa.

¹⁸ Timoteo, botō wēmi ēñēmi. Nē pönēnāni wēēnēñedē Wængonguī beyæ apænedinque bitō imitedō ante nāni angainō bai adobainō ante apænedinque botō iīmaī āmopa. Edæ tōmēnāni nāni angainō ante ēñente cædinque bitō tontadoidi nāni cæbaī adobaī bitō cæquēnēnō ante guīñēnāmaī inte wæætē tæī ēwocate nanguī cæcæbiimpa. ¹⁹ Wængonguī ingante cōwē wede pōnente incæbiimpa. Adobaī mīmō entawēmi inte nāmā apænte pönēninque wentamō mongæñāmaī inte bitō cōwē quēwencæbiimpa. Edæ mīni pōnencabo iñōmīnīte pancadāniya nāmā apænte ānāmaī ināni inte Codito ingante nāni pönēnīnō ante dobæ ñimpo cæte wadæ godānipa. ²⁰ Iīmēneo tōnō Adecantodo adobaī Wængonguī ingante ñimpo cædinque wadæ godatapa. Ininque, Tömēna, Wængonguī ingante mōnō wēnæ wēnæ ante babæ

ānāmaī ingæimpa, ante ēñencædaimpa, ante cædinque tōmēna inate Tatāna nempo pædæ godontabopa.

2

Wængonguī ingante mōnō iīmaī apænecæimpa

¹ Mīni pōnencabo iñōmīnīte botō tāno iīmaī āmopa. Wængonguī ingante mīni apæneyedē quīēmē mīni æīnēnō ante apænecæmīnīpa. Tömengā ingante waa ate pōnente apænedinque waodāni tōmānāni beyæ ante apænecæmīnīpa āmopa. ² Awēnē odeyeidi incæ pönōmenque awēñēidi tōmānāni incæ mōnō imonte waa aayōnāni mōnō piyænē cæte quēwengæimpa, ante cædinque mīnitō tōmēnāni beyæ ante Wængonguī ingante apænecæmīnīpa. Edæ Wængonguī ingante mōnō cæquēnēnō ante ayæ waodāni inānite mōnō cæquēnēnō ante mōnō waa cæte quēwencæmōimpa, ante Wængonguī ingante awēñēidi beyæ ante apænecæmīnīpa. ³ Mǎnōmaīnō ante mōnō apænedō iñōmō waa impa. Wængonguī mōnō imonte nē Ængāingā inongā inte mǎnīnō mōnō apænedō ante waa acampa. ⁴ Waodāni tōmānāni nāwangā botō angainō ante ēñencædānipa, ante Wængonguī pönō ængā beyænque quēwencædānipa, ante nē waa cæīnēnongā ingampa.

⁵ Edæ adocanque Wængonguī inongā ingacāimpa. Tömengā waodāni inānite adinque, Wadāni bai inānipa, ante nānēnē quēwengacāimpa. Ininque Itota Codito nē Waocā ēñangāingā inte tæcæguedē adocanque nē pongā inte, Waodāni Wængonguī guīdēnāni badinque adoyōmō bee tente godongāmæ quēwencædānipa, ante pönō cægacāimpa. ⁶ Tömengā iñōmō mōnō imonte ante godonte æncæte ante cædinque nāmā wepæ incæ godoncæte ante nē pongā ingacāimpa. Wængonguī, Iñonæ, ante nānō angaiōnæ incæ iñque bayonte mǎnīnō Codito nānō cægāinō ante, Nō impa, ante tōmānāni inānite nē odōmongā ingacāimpa. ⁷ Mǎnīnō ante bitō nē apænebi bacæbiimpa, ante Wængonguī botō imote angā ēñēninque botō tōmengā nānō nē da godōmo batabopa, ante nāwangā āmopa. Edæ babæ ānāmaī imopa. Ayæ nāwangā mōnō pönēnō ante Wængonguī, Wadāni oodeidi ināmaī ināni adobaī pōnencædānipa, ante cædinque botō imote angā ēñēninque botō tōmengā nānō nē odōmote apænedōmo imopa.

⁸ Wayōmō wayōmō godongāmæ mīni pōnencabo ongonte mīnitō onguīñæmīni iñōmō nē piñnāmaī imīni inte Wængonguī ingante apænemīni adinque botō waa tobaiimpa. Wadāni inānite nē piñte wæætēdō wæætē ānāmaī inte wæætē tæiyæ waēmō entawēmīni inte Wængonguī ingante

pædæ æmpote apæneccæmīnīmpa, ante ainēmopa.

⁹ Ayæ onquiyæmīni iñōmō waēmō weocoo mongæmīni incæte mīnitō, Botō waēmō weocoo mongæmo adinque wadāni botō imote waa acædānīmpa, ante ānāmaī inte nāmā baō ante guīñēñate pōnēnīnque weocoo ædæmō wēñate mongæccæmīnīmpa. Mīnitō ocaguī que que cæmīni incæte oodo badōi tōnō pededamō nāni āmō wente cædāmaī incæmīnīmpa. Waëmoncoo nāni nanguī godonte ænīncoo nāni waa acoo ante mīnitō mongæñāmaī incæmīnīmpa. ¹⁰ Wæætē edæ Wængonguī ingante, Bitō Wængonguī Awēñē imidō anguēñē, ante nē watapæ apænemīni imīni inīnque mīnitō mīni apæñēi bai cædinque mīni waa cæquēñō ante pōnecæmīnīmpa. Mānōmaīnō ante pōnente quēwencæmīnīmpa, ante adobaī ainēmopa. ¹¹ Wadāni apæneyōnāni mīnitō onquiyæmīni tededāmaī inte ēamonca ongonte ēñencæmīnīmpa. Ayæ nē āmōni mōni ānō ante ēñēnīnque wadō pōnēnāmaī inte do ēñente cæcæmīnīmpa, āmopa.

¹² Godongāmæ mīni pōnencabo weca ongonte mīnitō onquiyæmīni iñōmō odōmonte apænedāmaī incæmīnīmpa, ante botō wææ āmopa. Ayæ adobaī onguīñæmīni imīnite onquiyæmīni iñōmō, īīmaī cæedāni, ante ānāmaī incæmīnīmpa, ante wææ āmopa. Wæætē tededāmaī ēñencæmīnīmpa. ¹³ Wængonguī edæ onguīñægā Adāō ingante tāno badōnīnque ayæ onquiyægā Eba ingante badongacāīmpa. ¹⁴ Ayæ Tatāna wīī Adāō ingante wapiticæ māocā oda cægacāī. Wæætē Eba ingante æpiticæmē māocā oda cædinque do wēnæ wēnæ cæcā bagacāīmpa. ¹⁵ Incæte onquiyæñāni Wængonguī ingante godōmenque pōnēnīnque cōwē waadete pōnēnāni inōnāni inte nē nō pōnente tæiyæ waēmō entawēñāni inīnque tōmēñāni wēñæñāni inānite māñōñānīte Wængonguī wææ aacā beyænque quēwencædānīmpa, āmopa.

3

Godongāmæ mōnō pōnencabo iñōmonte nē aadāni

¹ īīmaī ante nāni ānō nō pōni ante impa. Godongāmæ mōnō pōnencabo iñōmonte, Aacæboīmpa, ante nē angā iñōmō tōmēngā waa cæquīnō ante pōnō cæīngā ingampa. ² Incæte wadāni, Wēnæ wēnæ cæcā ingampa, ante ānāmaī incædānīmpa, ante cædinque nē aacā wæætē waa quēwenguēñægā ingampa. Edæ tōmēngā nānōogæñā adodanque nē manguīwēngā incæcāīmpa. Tōmēngā tōō pōnente nō quēwēngā incæcāīmpa. Nōīnō cæcæīmpa, ante pōnēnīnque nāmā wææ

ante nē cæcā incæcāīmpa. Waodāni botō imote waa acædānīmpa, ante cædinque waa quēwencæcāīmpa. Waodāni inānite, Botō oncōñē pō cæedāni, ante cōwē nē watapæ angā incæcāīmpa. Ayæ tōmēngā nē waa odōmonte apæneccā incæcāīmpa. ³ Nē aacā tī nāmæ bete beyæ quidi quidi dowænāmaī quēwenguēñægā ingampa. Wacā ingā do pīinte cædāmaī inōngā inte wæætē ædæmō cæcā inte quēwencæcāīmpa. ⁵ Edæ piyæñē cæcā incæcāīmpa. Tōmēngā godonte nāni æīnta ante waadete pōnente wædāmaī incæcāīmpa āmopa.

⁴ Nē aacā tōnō godongāmæ quēwēñāni inānite tōmēngā waa aaquēñægā ingampa. Tōmēngā wēñæñāni inānite ædæmō aacā beyæ tōmēñāni wæætē tōmēngā ingante waa adinque tōmēngā nānō ānō ante ēñente cæte quēwencædānīmpa. ⁵ Edæ nē aacā tōnō godongāmæ quēwēñāni inānite tōmēngā wīī waa aacā inīnque Codito ingante godongāmæ mōnō pōnencabo iñōmonte ædō cæte waa aacā inguīgāā.

⁶ Itota Codito ingante ñōwo tæcæ pōnēñægā wīī nē aacā baquēñægā ingampa. Edæ mānōmaī inōngā iñōngante mīnitō, Nē aabi imipa, āmīni inīnque tōmēngā nāmā incæ, Adoboque waa cæbo imopa, ante pōnēngā imaingampa. Wēnæ awēñē mānōmaī pōnēngā beyænque Wængonguī tōmēngā ingante apænte nānō panguiñō bai nē aacā ingante adobaī apænte pāmaingampa. ⁷ Ayæ adobaī Itota Codito ingante nē pōnēñāmaī ināni nē aacā ingante adinque, Tōmēngā nē waa cæcā ingampa, ante acædānīmpa, ante cædinque tōmēngā waa quēwenguēñægā ingampa. Tōmēngā waa cædāmaī ingā adinque tōmēñāni wæætē, Tōmēngā wēnæ wēnæ cæcā ingampa, ante pīīmañānīpa. Tōmēngā waa cædāmaī ingā pīīñāni inīnque wēnæ awēñē iñōmō, Tōmēngā oda cæcæcāīmpa, ante godō cæcā ate tōmēngā do wēnæ wēnæ cæcā babaingampa.

Mōnō pōnencabo tōnō godongāmæ nē cædāni

⁸ Mōnō pōnencabo tōnō godongāmæ nē cædāni iñōmō adobaī, Mōnō eyepæ cæte quēwēmō inīnque wadāni mōnō imonte waa acædānīmpa, ante cædinque waa quēwenguēñēñāni inānīpa. Nē cædāni nāmā nāni ānō bai ante nō cæcædānīmpa. Tōmēñāni yowepæ wædænque tī nāmæ bīīnōmæ nāni āmæ wīī nanguī becædānīmpa. Babæ cæmōni incæte godonte nāni æīnta cōwē godōmenque æncæmōnīmpa, ante wadāni nāni pōnēwēnonque ante iñāni wæætē māñīnō ante pōnēñāmaī incædānīmpa. ⁹ Edæ nāmā apænte pōnēnīnque wentamō mongæñāmaī entawēñāni inte tōmēñāni Wængonguī nānō

wē wodonte angainō ante tæcæ ēñēninque tōmēnāni, Nō pōni mōnō pōnēnō impa, ante cōwē wede pōnenguēñēnāni inānipa. ¹⁰ Ayæ mānināni inānite mīnitō, Quinō cæmīni imīnii, ante ēñencæte ante cōwā acæmīnimpa. Ayōmīni tōmēnāni cōwē waa cæte quēwēnāni adinque mīnitō wæætē tōmēnāni inānite, Mīnitō mōnō pōnencabo tōnō godongāmæ nē cæmīni bacæmīnimpa, ante āmīni bacædānimpa.

¹¹ Tōmēnāni nānōogæidi inānite wadāni waa acædānimpa, ante cædinque adobai eyepæ cæte waa quēwenguēñēnāni inānipa. Mānināni iñōmō wadāni inānitēdō ante babæ ānāmai incædānimpa. Wæætē adodāni cōwē tōō pōnente nō quēwēnāni incædānimpa. Tōmēnāni cōwē pōnēninque, Īmai cæcæmōnimpa, ante nāni ānīnō bai ædæmō cæcædānimpa. ¹² Mōnō pōnencabo tōnō godongāmæ nē cæcā iñōmō tōmēngā nānōogæñā adodanque nē manguiwengā incæcāimpa. Tōmēngā wēñæñāni inānite ayæ tōmēngā tōnō godongāmæ quēwēnāni inānite tōmēngā nē waa aaquēnengā ingampa. ¹³ Mōnō pōnencabo tōnō godongāmæ nē cædāni iñōmō, Nē waa cædināni inānipa, ante adinque mōnō tōmēnāni inānite waa āmōmpa. Ayæ mānōmai waa cædināni inte mānināni, Itota Codito ingante pōnēedāni, ante guñēnāmai apæñecædānimpa.

Wē wodonte nāni angainō edonque pōni batimpa, ante

¹⁴ Quingæ bitō weca acæ poncæboimpa, ante pōnēmo incæte botō, Īmai cæe, ante bitō imite yewæmōmopa. ¹⁵ Botō wæætē wī quingæ pōmo ĩnque bitō, Mōnō Wængonguī tōnō godongāmæ quēwencabo inōmō inte mōnō æbānō cæquīi, ante bitō ēñencæbiimpa, ante yewæmōmopa. Edæ Wængonguī nē Quēwengāngā quimō inōmō inte mōnō Codito ingante godongāmæ mōnō pōnencabo iñōmō mōnō cobacadewæ tæi ongō bai tōmēngā nō nānō angainō ante ĩmpo cædāmai inte wæætē wææ cæmō ĩmōmpa. ¹⁶ Īmai ante nō pōni impa. Wængonguī ayongā mōnō æbānō waa cæte quēwenguīi, ante Wængonguī wē wodonte nō nānō angainō incæ ñōwoyedē edonque pōni mōnō ēñēnō iñōmō waa pōni impa. Īmai impa. Wængonguī inguipoga iñōmō ponte ēñadinque Waocā bacā agadānimpa. Tōmēngā ingantedō ante Wængonguī Ōnōwoca, Māningā waēmō quēwēnōngā ingampa, angacāimpa. Tōmēngā ingante Wængonguī anquedoidi do agadānimpa.

Wabæca wabæca nāni quēwencabo inānite Itota nānō cægainō ante apænegatimpa.

Tōmāmæ quēwēnāni pancadāniya tōmēngā ingante pōnente bagadānimpa.

Ayæ tōmēngā ñāō bai ēmōninque oōnædē iñōmō ocæ ēmænte gogacāimpa. Mānōmaiñō ante nāni āmotamīni ānō bai impa.

4

Nē pōnēnāni pancadāniya wadæ go-quināni inānipa, ante

¹ Wængonguī Ōnōwoca ĩmai ante edonque pōni apæñecampa. ĩnque iñōnæidi bay-onte Codito ingante nē pōnēnāni incæ pancadāniya ĩmpo cæte tōmēngā ingante pōnēnāmai bacædānimpa. ĩnque ōnōwocaidi incæ nē, Wapiticæ oda cæcædānimpa, ante nē wēnæ wēnæ cædōnāni mīñæ tee empo gocædānimpa. Goyōnāni wēnæidi nāni odōmōnte apæñewēnō ēñente cæquināni inānipa. ² Nē babæ ānāni nē wadō tedete wadō cædāni iñōmō tōmēnāni māninō wēnæidi nāni odōmōnte apæñewēnō ante nē odōmōnte apæñedāni inānipa. ĩnāni guiquēñē tōmēnāni nāmā nāni apænte pōnēnō ante ōmætawēnāni inte wēnæ wēnæ nāni cædinō ante wædāmai quēwēnānipa. ³ Mānināni iñōmō wadāni inānite wææ āninque, Mīnitō, Botō nānōogængā, ante onquiyængā ingante mōnāmai ĩedāni, ānānipa. Ayæ adobai mōnō waa cængui adinque panca ante, Cæñāmai ĩedāni, ante wææ ānānipa. ĩñæmpa Wængonguī edæ tōmāā cængui badongacāimpa. Tōmēngā, Botō imote waa ate pōnente apænedinque nē pōnēnāni iñōmō botō nō angainō ante ēñēñōnāni inte cængui ænte cæncædānimpa, angampa.

⁴ Edæ Wængonguī nānō badongaincoo tōmancoo waa pōni iñōnte mōnō Wængonguī ingante waa ate pōnente apænedinque tōmāā cængui æmō ĩnque panca ante ædō cæte Baa ante æñāmai inguīi. ⁵ ĩñæmpa Wængonguī nānō angainō beyænque ayæ tōmēngā ingante waa ate pōnente apæñemō beyænque tōmāā cængui iñōmō tæiyæ waēmō cængui bapa.

Itota Codito ingante nē waa cæcā

⁶ Bitō godongāmæ mīni pōnencabo iñōmīnite bitō māninō botō ānō ēñēninque bitō tōniñadāni inānite wæætē odōmōmi ĩnque Itota Codito beyæ nē waa cæquīmi incæbiimpa. Ayæ Wængonguī nānō angainō ante mōnō pōnēnō ante ēñente quēwēninque bitō waa mōnō odōmōnte apæñedō ante nē ēñente cædimi inte edæ tōmo cænte bai nē nō cæbi incæbiimpa.

⁷ Babæidi bai nē tedewēnāni inānite ēñēnāmai inte bitō onquiyæñāni picæñāni incæ ōnonquedō ante nāni tedewēñinō ante ēñēñāmai incæbiimpa. Wæætē, Wængonguī ayongā mōnō waa cæte quēwencæte ante cædinque bitō iñōmō tæi ēwocabo badinque

cæcæboimpa, ante godömenque godömenque cæcæbiimpa. ⁸ Mönö baö tææmö bacæimpa, ante cædinque mönö ñimpo cædämaï inte adodö adodö cæmompä. Mäninonque ante mönö cædö guiquenê wædænque waa impä. Wæætê Wængongui ayongä mönö waa cæte quëwëmö ñinque mönö ñöwoyedê waa quëwëninque adobai ñincayæ ate waa quëwenguimö incæmömöimpa. Ñinque mäninö ante mönö cæquino ññömö tömäâ beyæ nö waa pöni i ñinque, Mönö tæi êwocaquimö, ante cædinque mönö ñimpo cædämaï inte adodö adodö cæcæimpa.

⁹ Mänömainö ante nö pöni nani äno näwängä ante impä, ante ämo êñemaïminipa. ¹⁰ Mänömaï beyæ tæi piñæninque nangui cæmö imompä. Edæ, Wængongui nê Quëwengängä beyænque mönö watapæ quëwengæimpa, ante pönengalmö imompä. Tömengä ññömö mönö waocabo tömäâmö imonte, Quëwenguimöni, ante nê Ængängä incæ tömengä ingante nê pönëmö ññömönte nö ængä beyænque mönö quëwengæimpa.

¹¹ Mäninö botö äno ante bitö tömënäni inänite, ñimäi cædäni, ante odömönte apænecæbiimpa, ämopa. ¹² Bitö wii picæmi incæte æcämenque ññongante bitö, Botö imote piñte adämaï incæcäimpa, ante pönente quëwencæbiimpa. Wæætê edæ bitö Wængongui ingante nê pönënäni beyæ ante, Botö cæbai tömënäni adobai cæcædänimpa, ante ñimäi cæcæbiimpa. Apænebi incæ waa cæte quëwëmi incæ waadete pönëmi incæ wede pönëmi ñimäi incæ nö pönente waa cæbi incæ bitö, Botö bai bacædänimpa, ante cædinque bitö cædö ante odömömi adinque tömënäni adobai cæcædänimpa. ¹³ Botö pönämaï inguinganca bitö ongoñömö ññömö Wængongui angä êñente nani yewæmongainö adinque adodö ante ædæmö apænebi êñencædänimpa. Ayæ Wængongui ingantedö ante apænëbi inte odömönte apænëbi êñencædänimpa. Mäninonque cæte ongoncæbiimpa. ¹⁴ Mäni pönencabo ññöminite nê aadäni nani Picæncabo ññömö bitonga gampo cædinque Wængongui beyæ apænëdineque bitö imite, Bitö nê aabi badinque nê odömönte apænëbi bacæbiimpa, ante pönö apænëdänitapa. Ñinque bitö do nê aabi badinque nê odömönte apænëbi bagaimi inte godömenque godömenque cæcæbiimpa.

¹⁵ Edæ waodäni tömäñäni bitö æbänö godömenque waa cæbi ñimäi adinque êñencædänimpa, ante cædinque bitö mäninonque ante pönëninque godömenque godömenque cæcæbiimpa. ¹⁶ Bitö quëwënö ante, Æbänö quëwëmoo, ante nämä wææ aacæbiimpa. Ayæ bitö odömönte apænëdö ante, Botö nö pönëninque odömönte apænecæboimpa, ante wææ cæcæbiimpa.

Edæ mänömaï cæte wæntædämaï inte cöwê cæcæbiimpa. Bitö mänömaï cæbi ñinque tömëmi nämä incæ wantæpiyæ quëwencæbiimpa. Bitö odömönte apænëyömi nê êñënäni ññömö adobai bitö cædö beyænque wantæpiyæ quëwencædänimpa.

5

Nê pönënäni inänite æbänö cæcæbiimpa, ante

¹ Onguiñængä picængä wënæ wënæ cæcä incæte tömengä ingante piñte änämaï incæbiimpa. Wæætê tömëmi mæmpocä ingante ante bai tömengä ingante waadete ämi êñencæcäimpa. Edënänäni ññömö tömëmi biwüidi inänite ante bai tömënäni inänite waadete ämi êñencædänimpa. ² Onquiyænäni picænäni ññömö tömëmi wäänä inante ante bai bitö tömënäni inänite adobai waadete ämi êñencædänimpa. Ayæ baquedäni ññömö tömëmi biwinqueidi inänite ante bai tömënäni inänite waëmö mimmönê waadete ancæbiimpa.

³ Owæmpoinäni nê näwängä ömæpodäni inte quëwënänipa, ante tömënäni inänite waa adinque pönö cæcæbiimpa. ⁴ Incæte owæmpoingä wëñænäni næængä ñinque nänömöidi næængä ñinque mäninäni wæætê tömengä beyæ cæquëñänäni. Edæ mäninäni täno tömënäni tönö godongämæ quëwënäni inänite waa adinque näëmæ nani cæquëñenö ante, Æbänö cæquüi, ante êñente cæcædänimpa. Mänömaï cædinque tömënäni mæmpoidi tönö mæmæidi tömënäni inänite waadete nani cædi bai ñinäni adobai mæmpoidi tönö mæmæidi inänite näëmæ waadete cæcædänimpa. Edæ mänömaï cædäni adinque Wængongui waa acæcäimpa. ⁵ Nê nö ömæpocä ñongä inte adodanque quëwängä ñinque tömengä nê owæmpoingä ñongä inte Wængongui beyænque watapæ quëwengæimpa, ante pönengä ingampa. Itædê incæ woyowotæ incæ tömengä ñimpo cædämaï inte, Botö beyæ cæquümi, ante Wængongui ingante apænëte quëwengampa. ⁶ Wæætê owæmpoingä tote quëwengæimpa, ante nämanque pönente nê quëwënongå guiquenê tömengä müi quëwängä incæte do wænte bai ingampa töö.

⁷ Tömënäni inänitedö ante wënæ wënæ änämaï incædänimpa, ante wææ cædinque bitö mäninö botö äno ante adodö ante ämi êñencædänimpa. ⁸ Æcänö guidënäni inänite pönö cædämaï ñnaa ayæ tömengä nani wencabo inänite pönö cædämaï ñnaa tömengä ññömö Wængongui nänö angainö mönö pönënö ante do Baa äninque wii êñente cæcampa. Ayæ nê pönëñämaï ingä wënæ wënæ cæcä ññongante mäningä ññömö godömenque wënæ wënæ cæcä ingampa töö.

⁹ Owæmpoinā do tetenta wadepo ganca godōmenque nē picænā inōnā inte tōmēnā nānōogængā wodi ingante nē mōninanque quēwēnā ingadāimpa, ante adinque bitō, Wængongui qui, ante mōnō godonte æninta mānīnā owæmpoinā nē ænguīnā incædāimpa, ante tōmēnā ēmōwo ante yewæmoncæbiimpa. ¹⁰ Edæ tōmēnā wēñænāni inānite waa cædā pædāni inānitawo. Wadāni inānite tōmēnā, Botō oncōnē pō beedāni, ante waa apænedā inantawo. Wængongui quīnāni iñōnānite tōmēnā nāmā pōnēnāmāi inte waa cædantawo. Nē wæwēnāni inānite adinque tōmēnā tōmēnāni tōnō godongāmæ cædantawo. Ayæ, Quiēmē waa cæcæiimpa, ante māninonque ante pōnēninque cæte quēwēnantawo. Mānōmāi quēwēnā adinque waodāni, Mānīnā nōīnā waa cædā inōnampa, ante do ēñēnāni inānitawo, ante adinque bitō wæætē tōmēnā ēmōwo ante yewæmoncæbiimpa. Ayæ wadāni mānīnā bai iñōnānite bitō, Wængongui qui, ante mōnō godonte æninta mānimpodānique nē ænguīnāni incædāniimpa, ante tōmēnāni ēmōwo ante yewæmoncæbiimpa.

¹¹ Wæætē edæ owæmpoināni wīi picænāni iñōnānite bitō tōmēnāni ēmōwo ante yewæmōnāmāi inte Baa ancæbiimpa. Ayæ tōinente wæwēninque Codito ingante ñimpo cæte wadæ godinque wæætē, Wacā nānōogængā ingante mōinēmopa, ante quēwēnāni. ¹² Edæ tōmēnāni Codito ingante, Botō bitō beyæneque cæcæboiimpa, ante tāno nāni angaiñō ante ñimpo cædāni beyæ Wængongui apænte pangā wæcædāniimpa. ¹³ Ayæ godōmenque iīmāi cædāni. Tōmēnāni cædāmāi inte wæntæye badinque adobaī wacōnē wacōnē acæte ante ōnonque godāni inānipta tōō. Ayæ wīi ōnonque wæntæyedānique badinque tōmēnāni, Wadāni æbānō cædāni, ante gote adinque wadāni nāni cædōnō ante godō wæntæ godō wæntæ tededāni inānipta. Edæ wīi nāni anguēnēnō ante do ānewēnānipta. ¹⁴ Mānōmāi beyæ botō owæmpoināni wīi picænāni inānite iīmāi āmopa. Mīnitō wæætē mōninque wēñænāni māedāni. Ayæ oncōnē mīni cæquēnēnō ante cædāni. Wadāni edæ mōnō imontedō ante wēnæ wēnæ nāni tedewēnō ante tededāmāi incædāniimpa, ante mīnitō mānōmāi cæte waa quēwēdāni, āmopa. ¹⁵ Iñæmpa owæmpoināni pancadāniya do Itota Codito ingante ēmō cæte godinque Tatāna miñæ tee empocæ godānitapa tōō.

¹⁶ Onquiyængā nē pōngæ iñōmō tōmēngā guiddēnāni owæmpoināni næængā iñinque tōmēngā tōmēnāni beyæ cæcæcāimpa. Codito ingante godongāmæ mīni pōnencabo iñōmīnite tōmēngā, Botō guiddēnāni inānite godōmīni æncædāniimpa, ante ānāmāi

incæcāimpa. Mānōmāi cædinque Codito ingante mīni godongāmæ pōnencabo wæætē, Owæmpoināni nāwangā ōmæpodāni inānipta, ante adinque tōmēnāni inānite godōmīni æncædāniimpa, āmopa.

¹⁷ Wængongui ingante godongāmæ mīni pōnencabo iñōmīnite nē aadāni nāni Picæncabo iñōmō nō waa aadāni iñōnānite mīnitō tōmēnāni inānite waa aquēnēmīni iñinipa. Mānīnāni Wængongui nānō angaiñō ante nē apænedāni inte ayæ nē odōmonte apænedāni iñōnānite mīnitō godōmenque nanguī waa acæmīniimpa. ¹⁸ Edæ Wængongui iīmāinō ante apæncæcā ēñēninque yewæmongadāniimpa. “Wagada onguīnængā nē cæcā inte tōmentapo æ yacæiimpa, ante āmi pinā pinā gāwate cægōñongā bitō tōmēngā ōnōne wææ wodōnedāmāi inte ee abi cæncæcāimpa,” ante yewæmongatimpa. Ayæ godōmenque iīmāi ante impa. “Nē cæcā iñōmō tōmēngā nānō cædinō beyæ ante nē ænguēnængā ingampa.” Mānōmāi yewæmongadāniimpa.

¹⁹ Godongāmæ mīni pōnencabo iñōmīni waocā adocanque iñōmō bitō imite apænedinque, Māningā nē aacā Picængā iñōmō wēnæ wēnæ cæcantapa tōō, ante āñongante bitō ēñēnāmāi incæbiimpa. Wæætē waoda mēnaa nē babæ wapiticæ ānāmāi ina inte bitō imite apænedinque, Tōmēngā nē wēnæ wēnæ cæcantapa, ante adodō apænedā ēñēninque bitō nē āna inate ēñēncæbiimpa. Ayæ waodāni mēngāa go adocanque adobaī adodō apænedāni ēñēninque bitō nē ānāni inānite ēñēncæbiimpa.

²⁰ Nē wēnæ wēnæ cædōnāni incæ ñimpo cædāmāi inānipta, ante adinque bitō wæætē godongāmæ ongōnāni ēñēñōnāni mānīnāni inānite nanguī ancæbiimpa. Godongāmæ ongōnāni ēñēñōnāni bitō mānōmāi āmi iñinque tōmēnāni wæætē guīñēninque, Wēnæ wēnæ mōnō cæquīnō ante cædāmāi incæmōiimpa, ante pōnencædāniimpa.

²¹ Mōnō Wængongui ayongā Itota Codito ayongā Wængongui nānō apænte ænīnāni anquedoidi ayōnāni botō iīmāi āmopa. Mānīnō botō ānīnō ante ēñēnte cædinque bitō, Adoyōmō pōnī inānipta, ante tōmānāni inānite adoyōmō godō cæbi incæbiimpa. Wīi adocanque ingante, Botō nē waa adīmi iñinipa, ante tōmēngā ingante wadō cædāmāi incæbiimpa. ²² Ācāmenque ingante, Mōnō pōnencabo beyæ bitō nē cæbi baquīmi, ante pōnēmi inte bitō tōmēngāa quingæ gampo cædāmāi iē. Edæ quingæ gampo cæbi nē cæcā badinque edæ tōmēngā wēnæ wēnæ cæcā iñinque bitō adobaī tōmēngā tōnō wēnæ wēnæ cæbi baquēnēmīnipta. Bitō tōmēmīque godōmenque wēnæ wēnæ nāni cæpāmo ante tōmānō ante Baa ante waa cæte quēwē.

²³ Bitō cæinca cædente wæbitawo. Ayæ wantæ wantæ iñō wantæ wantæ iñō wënæ wënæ inte wæbitawo. Ininque wii æpænque bee ämopa. Wæætê biinómæ wædænque bete quëwencæbiimpa.

²⁴ Wængongui nânō apænte anguiōnæ badāmai iñedê incæ waodāni pancadāniya wënæ wënæ nāni cægainō do edonque pōni impa. Wadāni guiquēnē wënæ wënæ nāni cægainō wë wodonte i incæ mǎniñedē edonque pōni baquino anguēnē. ²⁵ Ayæ adobaī waodāni waa nāni cægainō do edonque pōni impa. Ayæ ñowoyedē pancaa waa nāni cægainō wii edonque pōni i incæte wii cōwē wë wodonte ingæimpa. Wæætê edonque pōni aquino anguēnē.

6

¹ Waodāni awēnēidi nāni nē ō ænināni inte awēnēidi beyænque cæte ñā cæyænte baī nē quëwēnāni iñōmō tōmēnāni tōmānāni awēnēidi inānite waa ēñente cæcædāniimpa. Iñæmpa tōmēnāni nē pōnēnāni inte wii waa ēñente cædāni baī wadāni wæætê Wængongui ēmōwo ante wënæ wënæ ante babæ anguēnēnāniimpa. Adobaī mōnō odōmonte apænedinō ante, Wënæ wënæ impa, ante anguēnēnāniimpa. ² Tōmēnāni awēnēidi iñōmō nē pōnēnāni ināni beyænque nē cædāni iñōmō, Botō tōniñacanque inongā inte botō awēnē iñōmō ōnonganque ingā awædō, ante piināmai incædāniimpa. Wæætê edæ nē cædāni iñōmō, Botō cæbo nē ængā iñōmō nē pōnengā inongā inte Wængongui nānō nē waadecā ingampa, ante adinque tōmēnāni awēnēidi inānite godōmenque waa ēñente cæcædāniimpa.

Nāwā mǎincoo ante

Ininque Timoteo ēñēmī. Māninō ante tōmēnāni inānite odōmonte apænedinque bitō adodō adodō ante ancaa ancæbiimpa, ämopa. ³ Pancadāniya wadō ante odōmonte apænedinque mōnō Awēnē Itota Codito nō pōni nānō angainō ante Baa ānāniya. Ayæ mōnō odōmonte apænedō ante tōmēnāni Wængongui ayongā mōnō waa cæte quëwenguēnēnō ante Baa ānāniya. Ininque æcānō mǎnōmai Baa āna iñōmō ⁴ tōmengā nāmā incæ, Botō gomonga waa ēñēmopa, ante nē pōnēnongā ingā incæte tōmāā ēñēnāmaingā ingampa. Tōmengā nāmanque nānō pōnēwēnō ante wæætēdō wæætē tededinque, Ædedō i, ante wacā tōnō guëadō guëa āinēwente wæcampa. Tōmengā mǎnōmai tedecā beyænque wadāni nē gomonga ēñengā ingante godō piinte adāniya. Godongāmæ wadodō wadō piinte tedewēnāniya. Wacā ingā wacā ingā, Bitō wënæ wënæ cæbi imipa, ante ānewēnāniya. Nāmā nāni wënæ wënæ pōnēnonque ante, Wadāni wënæ wënæ

cædāniya, ante pōnēwēnāniya. ⁵ Ayæ ocaidē pōnente wentamō encadāni inte tōmēnāni Wængongui nāwangā nānō angainō incæ ēñēnāmai badāniya. Ininque nāni cabo incæ wacā ingā wacā ingā guëadō guëa apænete nāni piincabo ināniya. Ayæ mǎnināni adobaī, Wængongui ayongā waa cæte quëwēmō beyænque nanguī ēate baquimō, ante pōnēwēnāniya.

⁶ Iñæmpa mǎincoo quincōmē ēcā incæte, Māninque ēabopa, ante piyænē cæte quëwēnongā iñōmō tōmengā Wængongui ayongā waa cæte quëwengā beyænque watapæ quëwēnongā inte nō nanguī ēcā ingampa. ⁷ Edæ mōnō i inguipoga iñōmō ōmaamō pontamōmpa. Adobaī ōmaamō inte tao goquimō imōmpa. ⁸ Incæte mōnō cængui tōnō weocō ēamō inte mǎninque beyæ mōnō watapæ quëwenguinque imōmpa. ⁹ Wadāni guiquēnē, Mǎincoo nanguī ēainēmōniya, ante quëwēnāni inte tōmēnāni wënæ wënæ nāni cæinēmāmo badinque oda cæte goquianidō anguēnē. Mǎnōmai cædinque tōmēnāni, Quinō ōnonque impa, ante æinente badāniya. Ayæ wënæ wënæ nāni baquinque edæ æinēwēnāni inte quēmē incæ tōmēnāni æmæwo ōmāe nāni ēwenguinonque gocædāniimpa. ¹⁰ Waodāni nāni godonte æinta waadete pōnente nāni wædō beyæ wadō wadō nāni wënæ wënæ cæpāmo pōmpa. Edæ pancadāniya, Mōnō godonte ænguinta ængæimpa, ante pōnēninque tōmēnāni nāni wede pōnenguēnēnō ñimpo cæte wadæ godinque nāmā nāni cædō beyænque nanguī wæwente badānitapa.

Mōnō wede pōnēnō ante mōnō tæi ēwocate cæcæimpa

¹¹ Bitō guiquēnē Wængonguinque ingante nē cædōmi inte māninō tōmānō ante ñimpo cæte wodiī gote baī quëwencæbiimpa, ämopa. Wæætê mōnō nō cæquēnēnō ante cæte quëwencæbiimpa. Wængongui ayongā mōnō waa cæte quëwengæimpa, ante cæcæbiimpa. Mōnō wede pōnēmāmo, ante godōmenque pōnente quëwencæbiimpa. Waodāni inānite godōmenque waadete pōnencæte ante cæcæbiimpa. Ayæ tæi piñænte entawēninque wæntæye badāmai inte ee cæcæbiimpa. Cōwē ædæmō cæte quëwencæbiimpa. ¹² Wængongui ingante mōnō wede pōnēnō ante mōnō cæquēnēnō ante bitō tæi ēwocate cæcæbiimpa. Mōnō wæñāmai quëwenguinō goquimō, ante pōnente ñimpo cædāmai incæbiimpa. Edæ waodāni tæiyænāni ēñēñōnāni, bitō, Wængongui ingante wede pōnente babopa, ante āñōmi Wængongui edæ, Māninō quëwenguinō gocæbiimpa, ante bitō imite apænte aa pecantapa. ¹³ Wængongui pōnō cæcā beyænque quingāmenque incæ tōmānāni quëwēnāni

īnānīpa. Itota Codito īñōmō Pontio Pidato ingante apænedinque. Quīnō nō impa, ante edonque pōnī apænegaingā ingampa. Edæ Wængonguī tōnō Itota Codito mǎnōmǎlnō ingaina īñōna botō tōmēna ayōna bitō ĩmite, ĩmaī cæe, āmopa. ¹⁴ Mōnō Awēnē Itota Codito nānō ocæ ēmænte ponguinganca bitō mǎnīnō botō wææ ānō tōmānō ante waa ēñente cæcæbiimpa, āmopa. Bitō ēñente cædō adinque wadāni ædō cæte, Wēnæ wēnæ impa, ante anguinānī, ante pōnente cōwē waa pōnī cæcæbiimpa. Mǎnōmaī ante āmopa.

¹⁵ Wængonguī nānō ainenguīōnæ bayonte Itota ocæ ēmænte poncæcāimpa. Mōnō Awēnē Wængonguī īñōmō tōmengā adocanque Wængonguinque ingaingā inte nē waa pōnī inongā ingampa. Tōmēnāni awēnē odeyeidi īñōnānite tōmengā Tæiyæ Awēnē Odeye inongā ingampa. Ayæ tōmengā īñōmō awēnēidi tōmānāni Awēnē inongā ingampa. ¹⁶ Tōmengā adocanque nē wantæpiyæ wænāmaī inongā inte nē Quēwengā ingaingā ingampa. Tōmengā tōmāā nāō īñōmō quēwēnongā īñongante waodāni ædō cæte tōmengā weca goquinānī. Tōmengā mōnō waocabo mōnō nē adāmaī ingaingā ingampa. Edæ tōmengā ingante mōnō ædō cæte aquīī. Tōmenganque ingante waodāni tōmānāni waa aquīnānidō anguēnē. Tōmenganque cōwē nē tæī piñænongā inte quingāmenque quēwēnāni īñōnānite tōmengā tōmānāni Awēnē inguingānō anguēnē. Mǎnōmaī babaiimpa, ante, Amēē, āmopa.

¹⁷ Inguipogaque mǎincoo nē nangui ēadāni īnānite bitō ĩmaī ancæbiimpa. Nanguī ēamōni inte mōnitō godōmenque waa pōnī ĩmōnīpa, ante pōnēnāmaī ĩedāni. ĩñæmpa mǎincoo mōnō ēadincoo īñōmō quingæ dæ ā apa quēwēnānī. ĩnīnque mīni mǎincooque ante wīī mǎincooque ante pōnēedāni. Wæætē, Wængonguinque beyænque watapæ quēwengæimpa, ante pōnēedāni, ancæbiimpa, āmopa. Edæ, Mōnō quī quīnō dæ ā, ante wæmō adinque tōmengā mōnō ĩmonte, Mīni watapæ quēwenguinque, ante tōmāā nē pōnongā ænguīmō ĩmopa. ¹⁸ Mǎnīnāni nē nangui ēadāni ĩnānite bitō, Mīnitō quīnō waa cæquīī, ante mǎnīnonque cæcæmīnīmpa, ancæbiimpa. Waa mīni cæquīnō ante mīnitō nangui cæte quēwēncæmīnīmpa. Ayæ do Ao ante mīnitō mǎincoo mīni ēadincoo pancacooga pædæ godōmīni æncædānie, ancæbiimpa, āmopa. ¹⁹ Mǎnīnō baī nē cædōnānique, Mōnō nāmā beyæ ēaquincoo, ante oōnædē īñōmō do cō cæte baī cædānīpa. Mǎnōmaī cædinque tōmēnāni, Nō pōnī mōnō quēwenguinque impa, ante ĩncayæ ate æncædānīmpa.

²⁰ Tímoteo ēñēmi. Wængonguī, Wææ aacæbiimpa, ante bitō ĩmite quīnō pōnongā bitō ō ænīnō ante wææ ae. Tæiyæ waēmō ēwocadāmaī inte wadāni ōnonquedō ante nāni ānōnō ante ēñēnāmaī ĩe. Adobaī wadāni, Mōnitō ēñente ate nangui encaīmōnī ĩmōnīpa, ante nē babæ ānāni īñōnānite bitō wadodō wadō nāni ānewēnō ante ēñēnāmaī ĩe. ²¹ Tōmēnāni nāni ānewēnō ante pōnēninque waodāni pancadāniya Wængonguī ingante nāni pōnēnīnō ante do ĩimpo cædinque wadæ godīnāni ĩnānīpa.

Wængonguī bitō ĩmite waadete pōnō cæcæcāimpa, ante botō mǎinque ante yewæmōmopa.

2 Timoteo ingante Pabodo cadota ante ayenta nānō yewæmongainta

Timoteo ingante Pabodo yewæmongampa

¹ Botō Pabodobo inōmo imopa. Wængongui nānō ānō bai Itota Codito nānō nē da godongaimo imopa. Itota Codito nēmo quēwēnōnāni iñōnānite Wængongui, Minitō wantæpiyæ mīni quēwenguinō ante pōnōmo ænguimīni imīnīpa, angacāimpa. Mānōmaī beyæ tōmengā botō imo, Māninō ante apænebi ēñencādānīpa, angā ēñēninque botō tōmengā nānō nē da godongaimo imopa. ² Timoteo ēñēmi. Bitō botō wēmi bai inōmi inte botō nē waadebi inōmi imīpa. Bitō acæbiimīpa, ante bitō imite yewæmōmopa. Mōnō Mæmpo Wængongui tōnō Awēnē Itota mōnō Codito tōnō bitō imite waadete pōnō waa cæate ate bitō gānē entawencæbiimīpa, āmopa.

Itota Codito waa pōni nānō ingainō ante

³ Wēēnēdē botō wæmæidi nāni cægāi bai botō adobaī nāmā apænte pōnente adinque wentamō mongænāmāi entawēmo inte Wængongui beyæ nē cæbo imopa. Botō itædē incæ woyowotæ incæ bitō beyæ ante māningā Wængongui ingante botō apæneyedē adocā ingante cōwē waa ate pōnente apænebopa. ⁴ Botō bitō æbānō wēñapæ tamōmitapa, ante pōnēninque, Botō watapæ tocæboimīpa, ante bitō imite ānente imopa. ⁵ Bitō Wængongui ingante nō wede pōnēmi imīpa, ante adīmō inte botō adodō ante wæætē pōnēmopa. Edæ bitō ñæñæ Doida bitō wāānā Eōnita tōnō tōmēna tāno Wængongui ingante nō wede pōnente nāna ingai bai bitō iñōmō ñowo adobaī imīpa, ante do ēñēmopa.

⁶ Mānōmaī beyæ bitō imite iīmāi āmopa. Wængongui nānō cædōnō ante bitō cæcæbiimīpa, ante botō bitonga gampo cæyōmo Wængongui pōnō cæcā æninque ēwocabi imīpa. Ininque māninō bitō ēwocadō beyænque bitō godōmenque godōmenque cæcæbiimīpa. ⁷ Wængongui tōmengā Tæiyæ Waēmō Ōnōwoca ingante mōnō imonte pōnongā æmō ininque mōnō wīi tōmengā beyæ guifente ēwocamōmopa. Wæætē māniwoca beyæ tæi ēwocamō imōmopa. Ayæ adowoca ingante ēwocadinque waodāni inānite waadete pōnēmō imōmopa. Adowoca beyæ mōnō, Nōinō cæcæimīpa, ante pōnēninque nāmā wææ ante cæmō imōmopa.

⁸ Mōnō Awēnē Itota Codito nānō ingainō bitō ēñēninō ante bitō guingo imōnāmāi inte apænecæbiimīpa. Botō adobaī, Tōmengā nānō angainō botō ēñēninō ante botō apænebo beyæ botō imote tee mōnedāni

wæyōmote bitō māninō adinque guingo imōnāmāi inte apænecæbiimīpa. Wæætē botō tōnō Itota ingantedō ante mōna watapæ apænedō ante apænedinque bitō Wængongui nānō tæi piñæmāmo ante ēwocadinque botō tōnō adobaī guēa caate wæcæbiimīpa. ⁹ Wængongui, Quēwencæmīnīpa, ante mōnō imonte æninque, Mīnitō tæiyæ waēmō entawente quēwencæmīnīpa, ante mōnō imonte aa pegacāimpa. Mānōmaī cædinque tōmengā wīi mōnō waa cædinō beyænque wæætē tōmengā nānō āinēnō ante cægacāimpa. Ayæ wēēnēdē inguipoga badōnāmāi iñedē tōmengā, Itota Codito beyænque, ante pōnēninque mōnō imonte waadete pōnō cægacāimpa. Māninō nānō waadete pōnō cægāinō beyænque tōmengā mōnō imonte æninque aa pegacāimpa. ¹⁰ Incæte ñōwoyedē mōnō imonte, Quēwenguimīni, ante nē Ængaingā Itota Codito pongā ininque tōmengā waadete nānō pōnō cægāinō ante edonque odōmongantapa. Ayæ Itota ingantedō ante mōnō watapæ apænedō beyæ tōmengā, Mīnitō mempoga wænāmāi incæmīnīpa, ante cædinque wantæpiyæ wænāmāi mōnō quēwenguimāmo ante edonque odōmongacāimpa.

¹¹ Wængongui botō imote apænedinque, Itota ingantedō ante watapæ botō apænedō ante bitō apænebi ēñencādānīpa, angantapa. Angā ēñēninque botō adobaī tōmengā nānō nē da godōmo imo inte ayæ nē odōmote apænebo imopa. ¹² Mānīi beyæ botō mānōmaī wæwente quēwēmpopa. Incæte, Æcānō ingante nē wede pōnēmo imopa, ante do ēñēmo inte botō guingo imōnāmāi imopa. Edæ botō quīnō tōmengā ingante godōnīmo incæ tōmengā māninō æninque nangui tæi ēwocacā inongā inte tōmengā nānō apænte anguiōnæ ganca wææ cæcæcāimpa. Māninō ante botō ædæmō ēñēmopa.

¹³ Botō bitō imite odōmote apænebo bitō ēñēninō ante bitō ñimpo cædāmāi ee nææncæbiimīpa. Wæætē, Māninō nō ante mōnō adodō adodō ante odōmote apænedō impa, ante bitō adobaī adodō ante odōmote apænecæbiimīpa. Mōnō Itota Codito nēmo quēwēmi inte wede pōnēninque waadete pōnente odōmote apænecæbiimīpa. ¹⁴ Wængongui, Wææ acæbiimīpa, ante bitō imite pōnongā ænīmi inte bitō tōmengā waa pōni nānō pōnongāinō ante wææ aacæbiimīpa. Edæ mōnō Wængongui Ōnōwoca tōnō ēwocate quēwēmpopa. Ininque bitō tōmengā tōnō cædinque wææ aacæbiimīpa.

¹⁵ Atiabæ quēwēnāni iñōmō tōmānāni botō imote emō cæte godānitapa, ante bitō do ēñēmīpa. Edæ Piguēdo tōnō Edōmogænxæ incæ tōmēnāni tōnō botō imote emō cæte godatapa. ¹⁶ Ōnetipodo

guiquenē botō wæwēmo adinque tōmengā wæætē wæætē pōnō cæcā beyænque botō wampo pōnentabopa. Ayæ adobai botō imote yæguincamē inte ñā cæyænte tee mōnedāni wæyōmote tōmengā guingo imōnāmai ingacāimpa. Ininque tōmengā tōnō godongāmæ quēwēnāni inānite mōnō Awēnē Itota Codito waadete pōnō waa cæcæcāimpa, āmopa. ¹⁷ Edæ Odōmā nāni quēwēñōmō iñōmō pōninque Onetipodo botō imo ante nanguī diqui diqui mīninque ate ate linque mingacāimpa. ¹⁸ Botō Epeto nāni quēwēñōmō māniñōmō quēwēñōmote tōmengā æbānō botō beyæ pōnō nanguī cæcantapa, ante bitō do ædæmō ēñēmipa. Mānōmai beyæ botō linque baquiōnæ iñonte Wængongui tōmengā ingante pōnō waadete waa cæcæcāimpa, āmopa.

2

Itota Codito beyæ waa tontado bai cæcæcāimpa

¹ Ayæ bitō botō wēmi bai inōmi inte ēñēmi. Itota Codito nempo quēwēñōmote tōmengā waadete pōnō cæcā beyænque bitō tæi ewocabi incæbiimpa, āmopa. ² Waodāni tæiyænāni ēñēñōnāni botō æbānō ante apænebo bitō ēñēniñō ante bitō wæætē wadāni nē pōnēnāni inte cōwē ædæmō cædāni iñōnānite adodō ante odōmote apænebi ēñencædāniimpa. ēñēninque tōmēnāni nē nō cædōnāni inte adobai wadāni inānite odōmote apænequīnāni inānipa, ante tōmēnāni inānite āni gocædāniimpa.

³ Bitō Itota Codito beyæ waa tontado bai inōmi inte bitō wæwēmi incæ ee ongonde godōmenque cæcæbiimpa, āmopa.

⁴ Waocā tontado badinque nānō cæyedē tōmengā, Botō awēnē botō imote waa acæcāimpa, ante tōmengā nānō ānonque ante ēñente cæcæboimpa, āninque wadāni tontado ināmai ināni nāni cæbai cædāmai inongā ingampa. ⁵ Gānā cæcæte ante nē owempocā iñōmō, Cōwē nāni cægai bai owempodāni, ante nāni wææ angaiñō ante ēñente cæcā ininque tōmenganque godōmenque waa owempodinque gānā cædinque poganta æmaingampa. ⁶ Amiña bayedē pancamonga pancamonga æññōnāni gōnea ante nē nanguī cæcā iñōmō tōmengā tāno ænguēnengā ingampa. ⁷ Māniñō imæca quēwēnāni nāni cæ bai ante mēnea go adodeque botō āniñō ante pōnēñōmi mōnō Awēnē edæ bitō imite odōmongā ēñēninque bitō edonque pōni ēñencæbiimpa.

⁸ Itota Codito awēnē Dabii wodi nānō pæingā inongā inte do wæninque nē ñāni omæmongaingā ingante ante pōnencæbiimpa. Māniñō ante watapæ botō apænedō impa. ⁹ Māniñe beyænque botō

caate wæwēmo imopa. Edæ nē wēnæ wēnæ cæcā ingante tee mōnecōnē ñā cæyænāni bai botō imote adobai māniñe botō apænedō beyænque ñā cædāni wæbopa. Incæte Wængongui nānō angaiñō ædō cæte ñā cæyænte inguii. ¹⁰ Mānōmai beyæ Wængongui nānō apænte æniñāni beyænque ante cæyōmote wadāni ancaa wēnæ wēnæ cædāni wæbo incæte botō ñimpo cædāmai inte godōmenque cæbopa. Edæ Wængongui nānō ñāō apāiyōmō nāni cōwē quēwenguinque māniñāni Itota Codito ængā beyænque tōmengā nempo quēwēncædāniimpa, ante cædinque botō wæwēmo incæte godōmenque cæbopa.

¹¹ Iīmai ante nāni ānō nāwangā ante impa. Mōnō Itota Codito tōnō godongāmæ wængaiñō inte adobai tōmengā tōnō cōwē wæñāmai quēwēncæmōiimpa.

¹² Mōnō tōmengā tōnō ñimpo cædāmai inte ee cæte wæwēmo inte adobai tōmengā tōnō nē awēñēdi badinque godongāmæ aacæmōiimpa.

Mōnō, Tōmengā ingā dicæ abogaa, āmō ininque tōmengā adobai nāēmæ mōnō imonte, Dicæ abogaa, āmaingampa.

¹³ Mōnō wede pōnēnō ante cædæmō cædāmai imō incæte tōmengā guiquenē mōnō imonte cōwē pōnēninque cōwē ædæmō cædongā ingampa.

Iñæmpa tōmengā iñōmō nāmā nānō ingaiñō ante ñimpo cædāmai inongā inte tōmengā wadō ante pōnēnāmai ingampa.

Wængongui bitō imi, Waa cæbi abopa, anguingā, ante

¹⁴ Waodāni inānite apænedinque bitō, Māniñō ante pōnēdāni, ante wæætē wæætē ancæbiimpa. Mōnō Wængongui ayongā iīmai ante wææ ante nanguī apænebi ēñencædāniimpa. Minitō, Ædedō i, ante wadodō wadō ante pūinte tededāmai incæmīniimpa. Iñæmpa mānōmai bai āninque mōnō ānō iñōmō ōnonque ante impa. Ayæ mānōmai ante tedemō ēñēninque nē ēñēnāni iñōmō æmæ pōnente babaiñānipa, ante bitō wææ ancæbiimpa, āmopa. ¹⁵ Bitō Wængongui ayongā, Botō nē waa cæbo incæboimpa, ante nanguī cæcæbiimpa. Nē cæbo inte guingo imōnāmai incæboimpa, ante cædinque Wængongui nō nānō angaiñō ante tōmēmi nē ædæmō ēñente entawēninque māniñonque ante tōiñō ante wadāni inānite waa odōmote apænecæbiimpa. ¹⁶ Tæiyæ waemō ewocadāmai inte wadāni ōnonquedō ante tedeyōnāni bitō tōmēnāni inānite ēñēnāmai inte nānēnē wadæ goe. Edæ māniñāni Wængongui ingante emō cædinque cōwē godōmenque wīwa nāni cæquinque wadæ godānipa. ¹⁷ Baō ñōmæiñōmō aca podinque nanguī godōmenque baayō

baī mānīnāni nāni odōmonte apænewēnō adobaī wodo wodo go īnīnque wadāni tæiyæñāni ēñēninque oda cæcædānīmpa.

Mānīnāni nāni tedewencabo iñōnāni īimēno tōnō Pideto adodaque īnāpa. ¹⁸ Tōmēna Wængonguī nāwangā nānō angainō ante ñīmpo cæte wadæ godīna īnāpa. Ayæ, Mōnō ñāni ōmæmōnō iñōmō īnīnque bagatīmpa, ante tedewēna ēñēninque wadāni pancadāniya nāni wede pōnēnō incæ wido cæte baī quēwēnāni. ¹⁹ Incæte Wængonguī nāwangā nānō angainō mōnō pōnēnō iñōmō tæī gōnonte baī cōwē ongōmpa. Mānīnō ante mēnea ante īīmaī yewæwōmonte baī ongōmpa. Edæ Wængonguī Awēnē tōmēngā quīnāni ædānidō īnānī, ante do ēñēngāmpa. Ayæ tōmēngā ēmōwo ante, Botō Awēnē īnongā īngāmpa, ante nē ānāni iñōmō tōmēnāni tōmānāni, Mōnō wīwa cædimāmo ante wæte wædinque wadæ goquēñēnāni īnānīpa.

²⁰ Nē ēacā oncōnē ñæñæncōnē tōmēngā nānō waa waa cō cæincade iñōmō oodo inte padata inte nāni badōincade mæ ongōmpa. Adobaī wacade awæmpaincade daicade incade mæ ongōmpa. Panca-cadea iñōmō wæmoncooque da wēincade incadepa. Wacade guīquēñē ōmæpocooque da wēincade incadepa. ²¹ Waocā wēnæ wēnæ nānō entawēnō ante ñīmpo cædinque nāmā ñā mēnongate baī quēwēngā īnīnque tōmēngā iñōmō wæmoncooque da wēincade baī īnongā inte Wængonguī beyæ waa cæcā īmaingāmpa. Tōmēngā tæiyæwæ wæmō ēwocate quēwēngā babaingāmpa. Īnīnque tōmēngā Awēnē nānō ānō ante do cæcā īmaingāmpa. Ayæ, Quīnō waa cæquīnō ī, ante tōmēngā do cæcā īmaingāmpa.

²² Edēñīnāni wīwa nāni cæīnēnō ante bitō ñīmpo cæte wodīi gote baī quēwēncæbiīmpa. Wæætē waodāni mīmō ñā mēnongate entawēnāni inte Wængonguī īngante nē apænedāni tōnō bitō nō cæquēñēnō ante cæte quēwēncæbiīmpa. Mōnō wede pōnēnō ante godōmenque pōnente quēwēncæbiīmpa. Waodāni īnānite godōmenque waadete pōnencæte ante cæcæcāmpa. Ayæ mōnō piyæñē cæte quēwēnguīmāmo ante pōnēninque cæcæbiīmpa. ²³ Ōnonquedō ante apænedīnque nē, Ædedō ī, ante wacā tōnō guēadō guēa tedewēngā mānōmaī tedecā beyæñque wadodō wadō pīnte tedewēnāni, ante do ēñēmīpa. Īnīnque tōmēnāni nē pōnēnāmaī īnāni inte ōnonquedō ante apæneyōnāni bitō tōmēnāni tōnō godongāmæ apænedāmaī incæbiīmpa.

²⁴ Mōnō Awēnē īngante nē cæcā iñōmō tōmēngā wadāni tōnō wadodō wadō pīnte tededāmaī incæcāmpa. Wæætē tōmānāni īnānite ædæmō cæcæcāmpa. Ayæ wadāni tōmēngā īngante wēnæ wēnæ cædāni

adīnque tōmēngā wæætē pīnāmaī inte piyæñē cæcæcāmpa. Ayæ tōmēngā nē waa odōmonte apæñecā incæcāmpa. ²⁵ Tōmēngā apæñecā ēñēninque nē ēñēñāni iñōmō Baa ante wadō ānāni īnānite tōmēngā ædæmō cæte, īīmaī īmpa, ante odōmonte apæñecā ēñēncædānīmpa. Edæ Wængonguī pōnō cæcā ate tōmēnāni nāmā incæ, Wēnæ wēnæ cæmō awædō, ante wædinque tōmēngā nāwangā nānō angainō ante ēñēncædānīmpa, ante pōnente cæcæcāmpa. ²⁶ Ayæ tōmēnāni ēñēñāmaī encadāni incæ nē ēñēnguīnāni wæætē bacædānīmpa, ante pōnente cæcæcāmpa. Wēnæ iñōmō tōmēnāni īnānite bæi ongōninque tōmēngā, Botō ānō ēñēnte quēwēncæmīnīmpa, ante godō cæcā ate tōmēngā nānō nē bæi ongōnāni wæætē aamō cæte wodīi gōcædānīmpa, ante adobaī pōnente cæcæcāmpa.

3

Īnīnque bayedē waodāni cæbānō quēwēnguīnāni, ante

¹ Timoteo ēñēmī. Īnīnque ēōnæ bacæ cæyedē wēnæ wēnæ ba wæquīnō anguēñē. ² Māñīñedē edæ waodāni nāmanque waadete pōnēnguīnāni īnānīpa. Tōmēnāni nāni godonte ænīnta waadete pōnente nāni wædō ante quēwēnguīnāni īnānīpa. Tōmēnāni nāmanque, Botō gomonga waa cæbo īmpa, ante pōnēnguīnāni īnānīpa. Wængonguī īngante godō wēnæ wēnæ ante babæ anguīnāni īnānīpa. Wadāni īnānite badete toquīnāni īnānīpa. Wēñæñāni incæ wæmpoda īnate ēñēñāmaī cæquīnāni īnānīpa. Wadāni pōnō waa cædāni incæte tōmēnāni nē waa cædāni īnānite wæætē waa cædāmaī īnguīnāni īnānīpa. Ayæ tæiyæ wæmō entawēñāmaī īnguīnānīmpa. ³ Adobaī waadete pōnēñāmaī quēwēnguīnāni īnānīpa. Mānīnāni īnānite wēnæ wēnæ cædāni adīnque tōmēnāni wæætē pīnīnque ñīmpo cædāmaī inte wēnæ wēnæ cæquīnāni īnānīpa. Wadāni īnānitedō ante babæ ante ānewēnguīnāni īnānīpa. Tōmēnāni nāni cæīnēwēnō ante nāmā wææ ānāmaī inte do cæquīnāni īnānīpa. Ayæ wadāni īnānite ædæmō cædāmaī inte pīnte cæquīnāni īnānīpa. Wadāni, Quīnō waa īmpa, ante pīnguīnāni īnānīpa. ⁴ Tōmēnāni nāni guīdēñāni incæ, Wēnæ wēnæ bate wæcædānīmpa, ante godō odōmonguīnāni īnānīpa. Tōmēnāni pōnēñāmaī inte do wēnæ wēnæ cæquīnāni īnānīpa. Tōmēnāni nāmā incæ, Botō gomonga waa ēñēmōpa, ante pōñēwēnguīnāni īnānīpa. Wængonguī īngante waadete pōnēñāmaī īnguīnāni inte wæætē tote quēwēngæīmpa, ante nāmanque waadete pōnēnguīnāni īnānīpa. ⁵ Tōmēnāni Wængonguī ayongā waa cæte quēwēñāni baī adobaī cædāni incæte Wængonguī nānō

tæi piñæmāmo piūwēninque nāmanque cæte quēwēnānīpa tōō.

Īnīnque bitō mānīnāni Īnānite gomō ae. ⁶ Mānōmaī baī cædāni Īñōmō waa apænedīnque waodāni oncōnē wāānē guīdānīpa. Onquīyæñāni wīī tæīmō entawēnāni inte tōmēnāni nāni wēnæ wēnæ cædi teēmēmō mongænte baī Īnāni Īñōnānite oncōnē nē guīdāni Īñōmō, Onquīyæñāni mōnitō apænedō ante ēñente cæcædānīmpa, ante cædāni ate onquīyæñāni wæætē oda cæte godānīpa. Mānīnāni onquīyæñāni Īñōmō, Quīēmē nāni wēnæ wēnæ cæinēmāmo, ante wadō gote wadō gote oda cædānīpa. ⁷ Tōmēnāni cōwē ēñencæte ante cædāni incæte wapiti wapiti cædāni Īnīnque Wængonguī nāwangā nānō angāinō ante cōwē ēñente badāmaī Īnānīpa. ⁸ Wēēnēñedē Mōitee wodi Equitobæ tæiyæ awēnē ingante apæneyongā Aānee tōnō Aāmōdee nē Īdōna inte Mōitee ingante piūnīnque, Ōnonque angampa, āna ingadāimpa. Īnīnque bayedē nē wēnæ wēnæ cædāni guīquēnē Īna Īnōna nāna cægāī baī adobaī cædinque Wængonguī nāwangā nānō angāinō ante Baa ante wadō ānāni Īnānīpa. Tōmēnāni ocāidē pōnente wentamō encadāni inte oda cæte godānīpa. Īnīnque Wængonguī ingante mōnō pōnēmāmo incæ dicæ pōnēnānīyaa. Wængonguī tōmēnāni Īnānite Baa ancæcāimpa. ⁹ Īñæmpa ædō cæte godōmenque cæquīnānī. Mānīna nē Īdōna nāna ōnonque cægāinō ante edonque agadāni baī tōmēnāni nāni ōnonque cædinō ante waodāni tōmānāni adobaī edonque pōnī acædānīmpa.

Timoteo ingante Pabodo ĩnque wææ angampa

¹⁰ Bitō Īñōmō, Æbānō botō odōmonte apæneboo, ante, Æbānō waa quēwēmoo, ante, Æbānō pōnente ante, Īmaī cæcæboimpa, ante cæboo, ante bitō tōmānō ante do ēñēmīpa. Ayæ Wængonguī ingante botō pōnēmāmo ante waodāni Īnānite botō ee cæpāmo ante botō waadete pōnēmāmo ante botō wæntædāmaī inte cæpāmo ante bitō adobaī do ēñēmīpa. ¹¹ Ayæ botō ĩmote togænte pānāni botō wæpāmo ante ayæ botō wæwēmāmo ante bitō do ēñēmīpa. Wadāni quīēmē wēnæ wēnæ cæcæte ante botō ĩmote togænte pānāni wæbo incæ botō wæntæye ĩnāmaī intabopa. Antioquīya Īñōmō Īcōnio Īñōmō adobaī Ditada nāni quēwēñōmō mānīñōmō wēnæ wēnæ cædāni wæbo incæte mōnō Awēnē ō ængā beyænque ayæ quēwēmō ĩmopa. ¹² Nō ante ĩmpa. Æcānō, Botō Itota Codito nempo quēwēmō inte Wængonguī ayongā waa cæte quēwencæboimpa, ante āna tōmēngā ingante togæwēnīnque wēnæ wēnæ cædāni wæquīngā ingampa. ¹³ Waodāni wēnæ

wēnæ cædāni tōnō, Oda cæcædānīmpa, ante nē cædāni Īñōmō tōmēnāni nē wēnæ wēnæ cædināni inte godōmenque wēnæ wēnæ cæquīnāni Īnānīpa. Edæ mānīnāni Īnānite wapiticæ māodāni oda cæte cædināni inte tōmēnāni wæætē wadāni Īnānite adodō, Æpiticæmē oda cæquīnānidō, ante cæcædānīmpa.

¹⁴ Bitō guīquēnē æbānō ēñēnīmi inte, Nō ĩmpa, ante pōnēnīnque cōwē ĩmpo cædāmaī incæbiimpa. Edæ bitō ĩmi ædānidō odōmonte apænedānī, ante do ēñēmīpa. ¹⁵ Wængonguī angā ēñente tæiyæ waēmō nāni yewæmongainō ante bitō wēnæmīyedē mā ēñēnīnque fōwo ganca do ēñēmitawo. Mānīnō ante nāni yewæmongainta ate ēñēnīnque bitō Itota Codito ingante pōnēñōmi tōmēngā ængā beyænque quēwencæbiimpa.

¹⁶ Wængonguī pōnō apænecā ēñēnīnque waodāni tōmēnāni nāni ēñēnonque ante Wængonguī beyæ yewæmongadānīmpa. Tōmēnāni Wængonguī nānō odōmonte apænegainō ante nāni yewæmongainta adinque mōnō, Æbānō waa ĩmpa, ante ēñēnīnque mōnō odōmonte apænecæĳimpa. Wængonguī angā ēñente nāni yewæmongainta adinque, Quīnō mōnō wēnæ wēnæ cædinō ĩī, ante mōnō do ēñēnīnque nē wēnæ wēnæ cæcā ingante mōnō wææ angæĳimpa. Ayæ Wængonguī angā ēñente nāni yewæmongainta adinque nē oda cæte wæcā ingante, Mōnō nōinō cæquēnēñō ĩīmaī ĩmpa, ante mōnō odōmonte apænecæĳimpa. Nō cæte quēwencæmīnīmpa, ante odōmonte apænete ongō ate mōnō ēñēnō ante mōnō waodāni Īnānite odōmonte apænecæĳimpa. ¹⁷ Edæ Wængonguī beyæ nē odōmonte apænecā Īñōmō eyepæ ēñēngā inte tōmēngā nānō waa cæquīmāmo tōmāmāmo ante cæcæcāimpa, ante odōmonte apænecæte ante yewæmongadānīmpa.

4

¹ Waodāni mīīnāni quēwēnāni incæ do wængāināni incæ tōmānāni Īnānite mōnō Itota Codito nē apænte anguīngā inte tōmēngā Awēnē Odeye badīnque ponte a ongongā acæĳimpa. Tōmēngā ayongā ayæ mōnō Mæmpo Wængonguī ayongā botō bitō ĩmīte, ĩīmaī cæe, āmopa. ² Wængonguī nānō angāinō ante apænebi ēñencædānīmpa. Waodāni Ao ante, Īñēinēmōni ante ānāni incæ Baa ante ēñēnāmaī Īnāni incæ bitō cōwē apænebi ēñēnāni. Wængonguī nānō angāinō ante oda cæte wædāni adinque bitō, Mōnō nōinō cæquēnēñō ante cæcæmīnīmpa, ancæbiimpa. Wēnæ wēnæ cædāni Īnānite, Ædō cæte mānōmaī cæmīnīi, ante nanguī ancæbiimpa. Ayæ adobaī, Wampo pōnencædānīmpa, ante ædæmō

apænebi eñencæðanimpa. Mäninö tömånö cæðinque nanguï waadete ee cæðinque adodö adodö ante odömonte apænebi eñencæðanimpa.

³ Incayæ ate nõ odömonte mönö apænedö ante waodäni Baa anguinäni inäni. Mäninö ante eñenämäi incæmönimpa, ante änäni inte tömænäni wæætê, Mönö eñeñenonque ante odömonte apæneedäni, ante nõ odömonte apænedönäni nanguï inäni inänite diqui diqui minte acæðänimpa. Mäninuedö ante eñencæmönimpa, ante anguinäni inäni. ⁴ Mäninäni näwangä angainö ante eñenämäi inte wadæ godinque wæætê önonquedö ante dodäni näni angainö ante eñente cæquinäni inäni. ⁵ Bitö guiquenê tömëmi quëwenganca æbämê baquï incæ godömenque cæcæbiimpa. Caate wæbi incæte bitö ñimpo cæðämäi inte godömenque cæcæbiimpa. Wængonguï waa põni nånö apænedö ante apænebi eñencæðanimpa. Bitö cæquënê tömää ñinque cæcæbiimpa.

⁶ Wængonguï quï, ante näni godönö bai botö adobai iñömete wantæ iñonte wænönäni wæncæboimpa. Edæ botö wænguionæ oo põniimpa. ⁷ Botö tæi ewocabo inte Awënë Itota beyæ botö cæquënênö waa põni ñinque cætabopa. Gänä cæcæte ante nõ pogodo godäni næ gongænämäi näni ñinque goganca godäni bai botö adobai tömëmo quëwenganca wæntæye inämäi inte ñinque cætabopa. Mönö wede põnenö ante botö ñimpo cæðämäi inte cöwê põnentabopa. ⁸ Mönö Awënë nõ apænte anguingä iñömö tömengä nånö apænte anguionæ iñonte tömengä, Bitö nõ põnente waa cæðimi inte bitö waa cæðinta ante poganta æncæbiimpa, ante botö imote põnggä æncæboimpa. Wüi botö adoboque iñömete põnggä æncæboimpa. Wadäni adobai tömengä nånö pongä aquionæ ante nanguï ainente nõ wånö cönäni inäni adinque tömengä, Minitö nõ cæte quëwënimini inte munitö waa cæðinta ante poganta æncæmünimpa, ante tömænäni tömånäni inänite põnggä æncæðänimpa.

Timoteo quinö cæcæcäimpa, ante

⁹ Bitö eyepæ inte botö weca quingæ pöe, ämopa. ¹⁰ Deëma iñömö inguipogaque ante botö imote emö cæte Tetadönica näni quëwëñömö gocantapa. Ayæ Quedetente iñömö Gadatiabæ iñömö gocantapa. Adobai Tito Dadämatiabæ iñömö gocantapa. ¹¹ Odoca adocanque botö weca ongongampa. Mäadoco ingante adinque tömengä ingante botö weca ænte mämömi pongäi. Edæ botö cæquënênö ante cæyömote tömengä botö tönö guëa nanguï cæcä ingampa. ¹² Ayæ Tiquico ingante botö Epeto iñömö da godömo gocantapa. ¹³ Botö yacoo

ocoi ä weocoo Todoa iñömö Cadopo oncönê botö emö cæte põnincoo bitö ponte ate ænte pöe. Adobai botö dibodocoo ænte mämömi æmoe. Botö tæinetacoo yewæmointacoo, ante godömenque wæbopa. Mäninta cöwê mämömi æncæboimpa, ämopa.

¹⁴ Adecantodo tæineta nõ badongä inongä iñömö botö imote nanguï wënæ wënæ cæcä wætabopa. Mänömai cæcä adinque Wængonguï edæ tömengä nånö wënæ wënæ cæðinganca mäninganca tömengä ingante wæætê pancæcäimpa, ämopa. ¹⁵ Mäningä bitö imite adobai wënæ wënæ cæðämäi incæcäimpa, ante bitö adobai wææ cæcæbiimpa. Edæ mönö odömonte apænedö ante tömengä cöwê Baa ante wadö ante quëwënggä ingampa.

¹⁶ Botö imote nõ apænte ängongä weca ænte mäodäni gote ongöninque botö nämä incæ wææ ancæte ante mä apæneyömo æcänö botö tönö godongämæ äna edæ dæ änäni wætabopa. Tömånäni edæ botö imote emö cæte wadæ godänitapa. Mänömai näni cæðinö beyæ Wængonguï tömænäni inänite pünämäi incæcäimpa, ämopa. ¹⁷ Incæte, Wadäni wüi oodeoidi inäni tömämæ quëwëñäni Wængonguï waa põni nånö apænedö ante eñencæðanimpa, ante cæðinque mönö Awënë iñömö botö gäänê ongöninque botö tönö godongämæ cæcä beyænque tæi ewocabo inte apænetabopa. ñimæca awënë nempo wæwente quëwëñömote mönö Awënë wæætê gä pe æmpote ö ængä beyænque quëwëmpopa. ¹⁸ Mänömai bai cæðinque botö imote quïemê wënæ wënæ cæðäni wæbo incæ mönö Awënë Odeye botö imote ænguingä beyænque quëwëncæboimpa. Adobai tömengä öönæðê nånö aayömö botö imote adimongä ænte mæcäcä æite goquimo imopa. Wængonguï nää apäite bai emönongä ingante mönö cöwê waa acæimpa, ämopa. Mänömai babaimpa, ante Amëe, ante ämopa.

Timoteo ingante Pabodo, Waa quëwëncæbiimpa, angampa

¹⁹ Pidica tönö Aquida nänä gæncaya waa quëwëncæðäimpa, ämopa. Bitö tömëna inate adodö apænebi eñenæ. Adobai Önetipodo tönö godongämæ quëwëñäni waa quëwëncæðänimpa, ämopa. Bitö tömænäni inänite adodö apænebi eñenänie. ²⁰ Edaato Coodinto iñömö ayæ a ongongantapa. Ayæ Todopimo nõ wënæ wënæ iñongä botö tömengä ingante Müdeto iñömö emö cæte gotabopa. ²¹ Bitö eyepæ inte cöönædepo badämäi iñedê botö weca quingæ pöe, ämopa. Eobodo iñömö tömengä, Bitö waa quëwëncæbiimpa, angä eñëninque botö bitö imite adodö ämo eñëe. Podænta tönö Diino ayæ Codaodia tönö möni põnencabo

tömämöni bitö ïmite, Waa quëwencæbiimpa,
ämönipa.

²² Mönö Awënë Itota Codito bitö tönö on-
gonte incæcäimpa, ämopa. Ayæ Wængongui
bitö ïmite waadete pönö cæcæcäimpa, ante
mäinque ante yewæmömopa.

Tito ingante Pabodo cadota ante nänö yewæmongainta

Tito ingante Pabodo yewæmongampa

¹ Botö Pabodobo inömo imopa. Wængongui ingante nê cæbo iñömote Itota Codito, Bitö Wængongui nänö nê apænte æninäni inänite apænebi êñencædänimpa, ante da godongä ate botö tömengä nänö nê da godongäimo imopa. Tömengä, Tömëni botö imote nani wede pönëno ante godömenque wede pönencædänimpa, ante cæcæbiimpa, ante da godongä gotabopa. Ayæ, Wængongui nāwängä nänö angainö ante êñente entawëninque tömëni tömengä ayongä waa cæte quëwencædänimpa, ante cædinque Itota Codito botö imote da godongä godimo imopa. ² Edæ, Iincayæ ate mönö wænāmai quëwenguinö gocæmöimpa, ante êñëninque pönencædänimpa, ante Wængongui nê babæ änāmai inongä inte wëñëñedë inguipoga badönāmai iñedë iñmai angacäimpa. Mīni wænāmai quëwenguimāmo ante pönömo æninque mīnitö wæætë wantæpiyæ cōwë quëwencæminimpa, ante cægacäimpa. ³ Mänömai cædinque tömengä, iñedë cæcæboimpa, ante nänö angaiñedë iñque bayedë tömengä nänö angainö ante edonque pöni odömonte apænecacäimpa. Edæ, Quëwencæminimpa, ante mönö imonte nê Ængängä inte Wængongui mäninö nänö angainö ante, Bitö odömonte apænebi êñencædänimpa, ante botö imote angä êñëñömote da godongä godimo imopa.

⁴ Tito êñëmi. Bitö cæcæbiimpa, ante yewæmömopa. Edæ godongämæ mönö wede pönëno ante apænebo nê êñëmi inte bitö Itota Codito quimi badinque botö nāwä wëmi bai inömi imipa. Iñique botö, Mæmpo Wængongui tönö Itota Codito mönö imonte nê Ængängä tönö waadete pönö cæda ate bitö gänë entawencæbiimpa, ämopa.

Cædeta nani änöwænë iñömö Tito nänö cædö ante

⁵ Cædeta nani änöwænë iñömö botö cæquëñenö ante wii eyepæ cæbo adinque botö, Bitö godömenque quëwëninque tömännö iñque cæcæbiimpa, ante botö bitö imite ëmö cæte gotabopa. Adobai wayömö wayömö nani quëwëñömö godinque bitö botö äñinö bai cædinque, Mīni pönencabo iñöminite iñäni nê aadāni Picænāni bacædänimpa, ante cæcæbiimpa, ante cædinque botö bitö imite mäninömö ëmö cæte gotabopa. ⁶ Wadāni, Nê aacä Picængä wënæ wënæ cæcä ingampa, ante änāmai incædänimpa, ante wææ cædinque nê aacä Picængä wæætë waa

quëwenguëngä ingampa. Edæ tömengä nänöogænä adodanque nê manguiwengä incæcäimpa. Tömengä wëñænāni Itota Codito ingante nê pönëni incædänimpa. Ayæ tömëni inänite adinque, Babæidi bai quëwëni inänipa, ante ayæ, Êñëñāmai cæte quëwëni inänipa, ante wadāni änāmai incædänimpa, ante nê aacä Picængä iñömö wææ aacæcäimpa.

⁷ Mönö pönencabo iñömote nê aacä ingante Wængongui, Botö cædö ante cæcæbiimpa, ante pönö angä êñëninque tömengä Wængongui beyæ ante nê cæcä ingampa. Iñique wadāni, Nê aacä wënæ wënæ cæcä ingampa, ante änāmai incædänimpa, ante wææ cædinque nê aacä wæætë cōwë waa quëwenguëngä ingampa. Wadāni tömengä ingante apænëdäni incæ tömengä wæætë, Botö ædö cæte êñënguimoo, ante änāmai incæcäimpa. Tömengä wii quingæ piinte bacæcäimpa. Tömengä ti nāmæ nê nangui bewengä ināmai incæcäimpa. Tömengä piyænë cæcä incæcäimpa. Babæ cōmo incæte godonte nani æinta cōwë godömenque æncæboimpa, ante wadāni nani pönëwënonque ante nê aacä iñömö mäninö ante pönëñāmai incæcäimpa. ⁸ Wadāni inänite, Botö oncönë pö cædäni, ante cōwë nê watapæ angä incæcäimpa. Ayæ, Quinö waa impa, ante mäninonque cæinengä incæcäimpa. Nöinö cæcæiimpa, ante pönëninque nāmä wææ ante cæcä incæcäimpa. Wængongui nänö cædö ante cōwë cædongä inte nê aacä wæætë nāmä wææ äñinque nāmä nänö cæinëwëno ante cædāmai incæcäimpa.

⁹ Ayæ adobai Wængongui nö pöni nänö angainö ante möni odömonte apænëgainö bai adobai entawëninque tömengä iñmopo cædāmai quëwenguëngä ingampa. Edæ mönö pönencabo iñömote tömengä ædæmö apænëdinque nö pöni mönö odömonte apænëdö ante odömonte apænecæcäimpa. Tömengä odömonte apænecä êñëninque pancadāniya, Baa ante wadö änāni incæ tömengä wæætë tömëni inänite, Mäninö ante mīni odömonte apænëdinö wapiticæ i apa quëwëminii, ante nê aacä inongä inte wææ ancæcäimpa, ämopa.

¹⁰ Edæ nê odömonte apænëdäni inänite, Mönitö êñëñāmai cæinëmönipa, ante nê änāni tæiyænāni inänipa. Tömëni iñömö önonquedö ante tedewëñöni inte, Wadāni oda cæcædänimpa, ante nê cædönäni inänipa töö. Pancadāniya, Mönö ëö togænte quëwengæiimpa, ante nê pönëni nani cæcabo iñömö godömenque nangui pöni mänömai babæ cæte quëwëni inäni. ¹¹ Tömëni, Babæ cæmöni incæte mönitö odömonte apænëdö beyænque godonte nani æinta cōwë æncæmönimpa, ante pönente

cædānīpa. Mōnō odōmonte apænedāmai inguēnēnō ante odōmonte apænedāni ēñēnīnque nē ēñēnāni pancadāniya tōmēnāni nāni godongāmæ quēwencabo tōnō oda cæte wædānīpa cæbīi. Edæ mānīnō tōmēnāni babæ cæte nāni odōmonte apænewēnō ante odōmonte apænedāmai incædānīmpa, ante bitō, Apocænē inguēnē quēwēedāni, ante wææ ante cæquēnēmi īmīpa.

¹² Edæ Cædetabæ īñōmō nāni quēwencabo incæ adocanque tōmēnāni wængonguīidi beyæ nē apænecā īñōmō īlīmai ante apænecācīmpa. “Cædetabæ quēwēnāni īñōmō cōwē babæ ante quēwēnāni inte babæidi bai wīwa cædānīpa. Tōmēnāni wæntæye īnāni incæ cæwæwōdāni inte cænānīpa tōō.” ¹³ Mānīnō ante tōmengā nānō angaiñō nāwāngā ante impa. Īnīnque Itota ingante nē pōnēnāni incæ oda cæte wædāni adīnque bitō, Nō pōnēnāni incædānīmpa, ante tōmēnāni īnānite nānguī ancæbīi. ¹⁴ Ayæ, Odeoidi dodāni nāni ōnonquedō ante angaiñō ante pōnēnāmai incædānīmpa, ante bitō tōmēnāni īnānite nānguī ancæbīi. Ayæ wadāni Wængonguī nāwāngā nānō angaiñō ante Baa ante ēñēnāmai īñōnāni incæ wadō ante wææ ānewēñōnāni bitō wæætē nē pōnēnāni īnānite, Mānīnō tōmēnāni nāni wææ ānewēnō ante mīnitō ēñente cædāmai īedāni, ante nānguī ancæbīi, āmōpa.

¹⁵ Edæ nē wæmō entawente quēwēnāni īnīnque edæ tōmēnāni ayōnāni quīncoomē ī incæ tōmancoo edæ wæmoncoo īmāi. Wadāni guīquēnē nē wentamō entawente quēwēnāni inte Itota ingante pōnēnāmai īnāni īnīnque edæ tōmēnāni ayōnāni quīncoomē ī incæ tōmāancoo edæ wī wæmoncoo īmāi. Īñæmpa adodāni nāmā nāni apænte pōnēnō incæ wentamō entawente quēwēnāni inte tōmēnāni nāni ocaidē pōnēnō adobai wentamō encadāni īnānīpa tōō. ¹⁶ Īnāni īñōmō Wængonguī ingante, ate bai pōnēmōni īmōnīpa, ante ānāni incæte tōmēnāni cædō beyænque, Īnāni Wængonguī ingante nē Baa ānāni īnānīpa, ante edonque pōnī bapa. Mānīnāni Wængonguī ingante ēñēnāmai cædōnāni inte edæ mōnō waa cæquēnēnō ante ædō cæte cæquīnānīi. Īnīnque tōmēnāni mōnō nē baacā bai īñōnāni īnānīpa.

2

Nō pōnī mōnō odōmonte apænedō

¹ Bitō wæætē nō pōnī mōnō odōmonte apænedō ante odōmonte apænecæbīi. ² Onguīñænāni picænāni īnānite īlīmai ante odōmonte apænebi ēñencædānīmpa. Tōmēnāni tī nāmæ nānguī bete quīdi quīdi dowænte badāmai incædānīmpa. Waodāni mōnitō īmōnite waa acædānīmpa,

ante onguīñænāni picænāni īñōmō nē eyepæ cæte quēwenguēñēnānīmpa. Nōīnō cæcæīmpa, ante pōnēnīnque nāmā wææ ante cæte quēwencædānīmpa. Itota ingante mōnō pōnēnō ante waodāni īnānite mōnō waadete pōnēnō ante tōmēnāni nōingā cædinque quēwencædānīmpa. Wæntædāmai inte ee mōnō cædō ante tōmēnāni adobai nōingā cædinque quēwēnāni incædānīmpa, ante bitō odōmonte apænebi ēñencædānīmpa, āmōpa.

³ Ayæ onquiyænāni picænāni īnānite adobai īlīmai ante odōmonte apænebi ēñencædānīmpa. Tōmēnāni, Wængonguī nānō angaiñō bai mōnō tæiyæ wæmō entawengæīmpa, ante quēwencædānīmpa. Wadāni īnānitēdō ante babæ ānāmai incædānīmpa. Wadāni nānguī yowepæ wædænque tī nāmæ bīñōmæ nāni āmæ ante, Beboe beboe, ante nē bedāni bai īñāni īñōmō adobai cæte quēwēnāmai incædānīmpa. Adodāni, Quīnō waa impa, ante mānīnō ante odōmonte apænecædānīmpa, ante bitō onquiyænāni picænāni īnānite odōmonte apænebi ēñencædānīmpa, āmōpa.

⁴ Mānōmai cæte quēwēnāni inte tōmēnāni wæætē onquiyænāni wī picænāni īnānite, īlīmai cæedāni, ante ānīnque, Mīnitō nānōgæīdi īnānite waadete pōnēnīnque mīnitō wēñænāni īnānite adobai waadete pōnente quēwēedāni, ante odōmonte apænedāni ēñencædānīmpa. ⁵ Ayæ adobai onquiyænāni wī picænāni īnānite odōmonte apænedīnque, Nōīnō cæcæīmpa, ante pōnēnīnque mīnitō nāmā wææ ante cæte quēwencæmīnīmpa. Mīnitō oncōnē mīni cæquēnēnō cōwē cædinque wadāni īnānite ædæmō cæte quēwencæmīnīmpa. Ayæ, Mīnitō nānōgæīdi nāni ānō ante ēñente cæedāni, āmi ēñente odōmonte apænecædānīmpa. Edæ onquiyænāni picænāni māñōmānō ante odōmonte apænedāni ēñēnīnque onquiyænāni wī picænāni wæætē waa cæte quēwēnāni adīnque wadāni Wængonguī nānō angaiñō ante ædō cæte, Wēnæ wēnæ impa, ante babæ anguīñānīi.

⁶ Onguīñænāni wī picænāni īnāni īñōmō adobai tōmēnāni, Nōīnō cæcæīmpa, ante pōnēnīnque nāmā wææ ante cæte quēwencædānīmpa, ante ædæmō apænebi ēñencædānīmpa. ⁷ Bitō tōmēnāni beyæ ante, Botō cæbai tōmēnāni adobai cæcædānīmpa, ante bitō quīēmē cæbi incæ cōwē waa cæe. Ayæ bitō odōmonte apænedō incæ nōingā ante odōmonte apænedīnque bitō ōnōneque ānāmai incæbīi. ⁸ Ayæ bitō īmite nē Baa ante wadō ānāni wæætē mōnō īmonte ante apænedīnque, Mōnitō ædō cæte wēnæ wēnæ anguīñōnīi, ante wædinque

edæ guingo imonte wæcædānīmpa, ante cædīnque bitō tōmēnāni inānite nōingā ante odōmonte apæneceabiīmpa. Edæ mǎnōmaī nōinō odōmonte apænebi ēñēnīnque nē ēñēnāni wæætē, Wēnæ wēnæ odōmonte apænedinō impa, ante ānāmaī incædānīmpa.

⁹ Waodāni inānite ō ænāni ate awēnēidi beyænque cæte nē quēwēnāni bate wæyōnānite bitō tōmēnāni inānite īīmaī ante odōmonte apænebi ēñencædānīmpa. Edæ tōmēnāni awēnēidi nāni ānō ante tōmānō ēñente cæcædānīmpa. Adobaī tōmēnāni, Mōnitō īmōnite adīnque awēnēidi tocædānīmpa, ante cæcædānīmpa. Ayæ tōmēnāni awēnēidi ānāni ēñēnīnque wæætēdō wæætē ānāmaī incædānīmpa. ¹⁰ Adodāni īñōmō awēmō ænāmaī quēwēnāni inte wæætē, Mōnitō cōwē nō ēñente cæmōni īmōnīpa, ante adīnque mōnitō awēnēidi wæætē, Waa cæmīni īmīnīpa, ante pōnencædānīpa, ante nē cædāni īñōmō waa cæcædānīmpa. Tōmēnāni quīēmē cædāni incæ cōwē waa cædāni adīnque wadāni Wængonguī mōnō imonte nē Ængaingā ingante nāni odōmonte apænegainō waa impa, ante pōnencædānīmpa, ante bitō nē cædāni inānite mǎnōmaīnō ante odōmonte apæneceabiīmpa, āmopa.

¹¹ Edæ waodāni quīnānidō īnāni incæte mōnō Mæmpo Wængonguī tōmānāni inānite waadete pōnō cædīnque, Botō æmo beyænque quēwenguīmīni, ante odōmongā īnīnque edonque pōni ba agadānīmpa. ¹² Tōmengā nānō waadete pōnō cædōnō ante edonque pōni adīnque mōnō īīmaī ante ēñēmō īmōmpa. Wængonguī ingante wapiticæ pōnēnīnque mōnō cædō ante mōnō Baa ante fīmpo cæte quēwengæīmpa. Ingūpoga ante nāni wēnæ wēnæ cæinēwēnō ante mōnō Baa ante fīmpo cæte quēwengæīmpa. Nōwoyedē mōnō, Nōinō cæcæīmpa, ante pōnēnīnque nāmā wææ ante cæte quēwengæīmpa. Wængonguī ayongā waa cæte quēwēnīnque ¹³ mōnō Itota Codito nānō pōnāne watapæ mōnō toquīōnæ ante wānō cōmō īmōmpa. Edæ Itota Codito adocā mōnō Wængonguī mōnō nē tæī pīñænongā īnongā inte mōnō imonte nē Ængaingā ingacāīmpa. Tōmengā īñōmō nē nāō apāite baī ēmōnongā inte poncæcāīmpa, ante wānō cōmōmpa. ¹⁴ Mōnō wīwa cægāinō tōmānō adīnque tōmengā īñōmō, Botō æmo beyænque quēwenguīmīni, ante nāmā wepæ godōnīnque wængacāīmpa. Ayæ tōmengā, Botō tōmēmō beyæ ante mīnitō īmīnīte nā mēnongate baī cæyōmote mīnitō botō quīmīni badīnque, Quīnō waa impa, ante cæinente bacæmīnīmpa, ante cægacāīmpa.

¹⁵ Ayæ mǎnīnonque ante odōmonte apænedīnque bitō waodāni inānite, ædæmō apænebi ēñencædānīmpa. Wadāni wēnæ wēnæ cædāni īñōnānite tōmēnāni inānite,

Ædō cæte mǎnōmaī cæmīnīi, ante nan-guī ānīnque awēnē baī inte apænebi ēñencædānīmpa. Bitō īmite, Ædō cæte awēnē baī cæbīi, ante pīnte anguīnānīi, ante pōnente quēwengæabiīmpa.

3

Nē pōnēmō, Quīnō waa impa, ante mōnō cæquēnēnō

¹ Bitō weca nē pōnēnāni īñōnānite do mōnitō angāinō nāni ēñēnīnō incæ bitō tōmēnāni inānite adodō ante apænebi ēñencædānīmpa. Nē aadāni tōnō gobiedōno beyæ nē ānāni inānite ēñēnīnque mīnitō tōmēnāni nāni ānō ante ēñente cæcæmīnīmpa, ante apænebi ēñencædānīmpa. Ayæ, Quīnō waa ī, ante mǎnīnō do cæcæmīnīmpa, ante apænebi ēñencædānīmpa. ² Ayæ æcāmenque ingante wēnæ wēnæ ante babæ ānāmaī incæmīnīmpa. Piyænē cæte quēwēnīnque mīnitō wadāni tōnō wadodō wadō tedete pīnāmaī incæmīnīmpa. Waodāni tōmānāni inānite mīnitō ædæmō cæte quēwengæmīnīmpa, ante bitō mǎnōmaīnō ante apænebi ēñencædānīmpa.

³ Edæ wēēnēñedē mōnō adobaī ocāi ōmædæca ingāimō inte ēñēnāmaī cæte quēwengamōīmpa. Mōnō wapiticæ pōnēnīnque oda cæte quēwengamōīmpa. Quīēmē mōnō wēnæ wēnæ cæinēnō ante cæte quēwengamōīmpa. Quīēmē āmānque pōnente, Waa tote quēwengæīmpa, ante cædīnque mōnō cōwē fīmpo cædāmaī inte quēwengamōīmpa. Waodāni inānite cōwē wīwa pōnente quēwengamōīmpa. Wadāni godōmenque ēadāni adīnque godō pīnte agamōīmpa. Wadāni mōnō imonte pīñōnāni mōnō wacā ingā wacā ingā pīnte quēwengamōīmpa. ⁴ Incæte mōnō Wængonguī mōnō imonte, Quēwenguīmīni, ante nē Ængaingā pōnīnque tōmengā nānō waadete pōnēmāmo ante ayæ tōmengā nānō ædæmō cædōmāmo ante do odōmongacāīmpa. ⁵ Tōmengā wīī mōnō nō cægāinō beyænque, Quēwenguīmīni, ante mōnō imonte ængacāīmpa. Wæætē tōmengā nānō waadete pōnō waa cæinēnō beyænque mōnō imonte, Quēwenguīmīni, ante ængacāīmpa. Mīnitō mēmpoga ēñacæmīnīmpa, ante Wængonguī mōnō mīmō mēnongacā entawēmōmpa. Ayæ Wængonguī mōnō imonte æñongā tōmengā Tæiyæ Waēmō Ōnōwoca pōnō cæcā beyænque mōnō mīmō entawente quēwēmōmpa. ⁶ Itota Codito mōnō imonte, Quēwenguīmīni, ante nē Ængaingā beyænque Wængonguī īñōmō mōnō imonte eyepæ pōni pōnō cædīnque tōmengā Ōnōwoca ingante angā pō guicā ate entawente quēwēmōmpa. ⁷ Īnīnque Wængonguī waadete pōnō cæcā ate mōnō

tömengä ayongä nö cæte quëwengaimö imopa. Ayæ tömengä nänö waadete pönö cægainö beyænque nē ænguimö inte mönö, Wænāmai quëwengæimpa, ante ee pönente quëwëmompa.

⁸ Mänömainö ante nö ante impa. Edæ Wængongui ingante do pönänäni iñömö, Quinö waa i, ante nani pönënonque cōwë cæcædänimpa, ante bitö mäninö ante wæætë wæætë adodö ante apænebi ëñencædänimpa, ämopa. Mäninö ante waa pöni i ïinque tömänäni beyæ adodö ante waa ingæimpa. ⁹ Wæætë, Æbänö i, ante nangui wæætedö wæætë önonquedö ante tedewänäni bai bitö iñömö tömënäni bai tededämai incæbiimpa. Dodäni, Æmönänidö ingainäni, ante ancaa nani änewënö ante pönänämai incæbiimpa. Ayæ wæætë godö wæætë godö tedewänäni ëñëninque bitö wæætë tededämai incæbiimpa. Ayæ idægoidi nani wææ angainö ante godongämæ wadodö wadö piinte tedewëñönäni bitö iñömö iinäni tönö tededämai incæbiimpa. Edæ mänömai nani tededö iñömö önonque tedete i ïinque edæ æcämenque beyæ waa impa, ante dæ ampa cæbii.

¹⁰ Mini pönencabo incæ adocanque mänömai tedewengä beyænque wadäni nänëneto nänënë godinque wacabo wacabo badäni adinque bitö wæætë nē tedewënongä ingante adopoque wææ ämi ëñencæcäimpa. Adopoque wææ ämi ate tömengä ëñënämai inte gomonga adobai cæte tedewengä adinque bitö tömengä ingante wæætë wææ ämi wæcæcäimpa. Mänömai mempoga wææ ämi ëñëninque tömengä fimpö cædämai inte gomonga tedewengä ate wædinque bitö tömengä ingante Baa äninque gomö æ. ¹¹ Edæ mänömai cædongä iñömö tömengä idiquibæ pönënongä inte nē wënæ wënæ cæcä ingampa. Tömengä nämä nänö apænte panguinque mänömai cæcampa, ante do ëñëmipa.

Tito quinö cæcæcäimpa, ante

¹² Botö cöönædepo iñonte Nincopodi nani quëwëñömö quëwencæboimpa, ante pönentabopa. ïinque Adotëma incæ Tiquico incæ æcänö bitö weca goquinäa, ante pönëninque botö adocanque ingante ämo go pöñongä bitö eyepæ inte botö weca quingæ pöe, ämopa. ¹³ Abogado inte nē cæcä Teëna tönö Apodo gocæ cæyönate tömëna nana goquinö ante nana ænguënönö wii eyepæ éada adinque bitö pædæ godömi ænte godæ. ¹⁴ Mönö tönö godongämæ nē pönänäni iñömö wii önonque cæte quëwencædänimpa. Wæætë edæ wadäni wii eyepæ éadäni adinque tömënäni pædæ godönäni æncædänimpa, ante cædinque bitö apænebi ëñëninque tömënäni wæætë, Quinö

waa i, ante adinque mäninonque ante cæte quëwencædänimpa.

Waa quëwencæmïnimpa, ante Pabodo yewæmongampa

¹⁵ Botö tönö nē ongönäni tömänäni bitö imite, Waa quëwencæbiimpa, ante apænedänipa, ante botö, Bitö acæbiimpa, ante yewæmömopa. Mönitö imönite nē waadete pönänäni Inänite bitö, Waa quëwencæmïnimpa, ante mönitö beyæ ante apænebi ëñencædänimpa. Wængongui munitö tömämiini iminute waadete pönö cæcæcäimpa, ante mäninque ante botö yewæmömopa.

Pidemöö ingante Pabodo cadota ante nänö yewæmongainta

Pidemöö ingante Pabodo yewæmongampa

¹ Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaïmo ïmopa. Mönö tönñacä Timoteo tönö yewæmömönäpa. Pidemöö möna nê waadebi inömi inte mönatö tönö godongämæ cæðömi iñömite mönatö, Bitö acæbiimpa, ante yewæmömönäpa. ² Bitö oncönê iñömo Itota Codito ingante mïni pönencabo godongämæ pöñöminite mönatö mïnitö imïnite adobai yewæmömöna acæmïnimpa. Ayæ mönö mäengä Apia tönö Aduquipo mönitö tönö godongämæ nê tontado bai cædongä tönö tömëna acædaïmpa, ante yewæmömönäpa. ³ Mönö Mæmpo Wængonguï tönö Awënë Itota Codito tönö godongämæ waadete pönö cæda ate mïnitö gänê entawencæmïnimpa, ämönäpa.

Pidemöö nê waadete pönengä inte wede pönengä ingä

⁴⁻⁵ Bitö Awënë Itota ingante wede pönëmi ïmpa, ante tömengä quïnäni inönäni inänite waadete pönëmi ïmpa, ante bitö imitedö ante änäni êñënimö inte botö bitö beyæ ante Wængonguï ingante botö apæneyedê adocä ingante cöwê waa ate pönente apænebo. ⁶ Mänïnö Itota Codito ingante bitö wede pönënö ante wadäni inänite cöwê apænebi êñëninque tömënäni, Mönö tömengä waa pönï nänö entawënoncöo incæ quincodö entawëmö imöö, ante ædæmö êñente bacædänimpa, ante nanguï cæcæbiimpa, ante botö bitö beyæ ante Wængonguï ingante apænebo. ⁷ Botö tönñabi êñëmi. Itota Codito quïnäni inönäni inänite bitö waadete pönente cæbi ate tömënäni gancæ entawente todänitapa, ante apænedäni êñëninque botö nanguï watapæ todingue wampo pönentabopa.

Pabodo Önetïmo beyæ ante Pidemöö ingante angampa

⁸ Mänömai beyæ mönö Awënë Codito botö imote angä êñëninque botö awënë bai äninque bitö cæquënëñö ante, ïmái cæe, ante guïñënamai inte bitö imite wææ ämo bai waa incæðönimpa. ⁹ Incæte botö wææ änämai inte wæætê mönö waadete pönëmämo beyænque cæquënëñö apænebo. Botö Pabodobo inömo inte nê picæmo ïmopa. Ayæ ñöwo botö Itota Codito ingantedö ante apænebo beyænque botö imote tee mönedäni tee mönegaïmo inte ämopa. ¹⁰ Ìnïnque botö wengä onguïñängä Önetïmo beyæ ante

bitö imite ædæmö apænebo. Edæ tee mönecönê botö quëwëñedê Önetïmo ingante apænebo êñëninque tömengä nê pönengä badinque botö wengä bai bacä æntabopa cæbii.

¹¹ Wëenëñedê tömengä bitö beyæ waa cæðämai inte önonque quëwengacäimpa. Incæte tömengä ñöwo iñömo bitö beyæ incæ botö beyæ incæ nê waa cæcä bacäimpa. ¹² Tömengä botö nê waadecä ingä incæte tömengä ingante botö bitö weca ocæ emænte da godömo poncæcäimpa. ¹³ Itota ingantedö ante mönö watapæ apænedö beyænque botö imote tee mönedäni ongöninque botö, Pidemöö dæ äñönte Önetïmo iñömo tömengä beyæ botö weca ongöninque botö tönö guëa cæcæcäimpa, ante pönëninque äinentabopa. ¹⁴ Incæte æbämenque pönö waa cæbi incæ wïi botö wææ änö beyænque cæcæbiimpa. Wæætê tömëmique pönente cæcæbiimpa, ante cætabopa. Bitö êñënamai inte Ao änämai iñömite botö ædö cæte Önetïmo ingante, Bitö botö weca ongoncæbiimpa, ante anguïmo. ¹⁵ Önetïmo bitö imite wantæyö wodii godingä inte ñöwo adodö pöñongante bitö tömengä ingante wæætê æñömi tömengä cöwê bitö tönö quëwëncæcäimpa. Wabänö mänïi ante beyænque wantæyö wodii gocantawo. ¹⁶ Tömengä ingante bitö godonte ænte mämi ate tömengä bitö beyænque cæte nê quëwëningä ingä incæte tömengä ñöwo wïi nê cæte quëwëñänique bai inongä ingampa. Wæætê edæ Itota Codito ingante pönengä badinque tömengä ñöwo godömenque bitö tönñacä inongä inte bitö nê waadecä ingampa. Edæ tömengä botö nê nanguï waadecä ingampa. Ayæ wïi bitö nê cædonganque inongä inte tömengä wæætê mönö Awënë quingä ingampa. Mänömai beyæ tömengä godömenque bitö nê waadecä inongä ingampa.

¹⁷ Ìnïnque bitö, Pabodo tönö guëa cæmöna ïmönäpa, ante pönëmi ïnïnque bitö botö imote æmi bai Önetïmo ingante adobai æmäimpa. ¹⁸ Bitö imite wënæ wënæ cæcantawo. Bitö ïmi quïëmê ante ænïnque wæætê pönönämai ingantawo. Ìnïnque tömengä nänö pönönämai ïnïnö ante bitö botö imote wæætê, Pönömi æmoe, ämi êñëninque botö pædæ pönömo æmäimpa. ¹⁹ Botö Pabodobo inömo inte tömëmö önonpoca inte ïmäinö ante yewæmömöpa. Tömengä quïnö nänö pönönämai ïnïnö ante botö wæætê tömäno pönömo æncæbiimpa. Botö edæ bitö imite wïi Itota Codito ingantedö ante odömonte apænebo bai bitö ayæ pönënamai inte quëwëncæðömiimpa. Ìnïnque botö apænedö beyæ bitö botö imote wæætê pönönämai ingä bai inömi ïmpa. Incæte botö mänömai beyæ bitö imite wïi ancæboimpa. ²⁰ Botö tönñabi êñëmi. Mönö Awënë beyænque bitö

botō beyæ pönō cædinqe Önetimo ingante waadete pönencæbiimpa, ante wæbopa. Edæ mōnō Codito nempo quēwēmōna īninqe bitō waadete pönente cæbi ate botō gancæ entawente tocæboimpa, āmopa.

²¹ Bitō cōwē ēñente cæquīmi īmipa, ante do ēñēnīmo inte botō, Bitō acæbiimpa, ante yewæmōmopa. Edæ botō ānō ēñente cædinqe bitō godōmenque cæquīmi īmipa, ante ēñēmopa. ²² Īninqe adodeque ayæ āinēmopa. Minitō botō beyæ ante Wængonguī ingante mīni apænedō beyæ botō īmote ņimpo cædāni ate bitō weca acæ poncæboimpa, ante pōnēmopa. Īninqe bitō oncōnē adocōnē botō owoquincō ante tōmāā ædæmō cō cæquīmi, āmopa.

Pidemöö ingante Pabodo, Waa quēwencæbiimpa, angā

²³ Epapada botō bai adobai Itota Codito beyænque nāni nē tee mōnegaingā īñōmō tōmengā botō īmote, Pidemöö waa quēwencæcāimpa, ante angā ēñēninqe botō bitō īmite yewæmōmopa. ²⁴ Māadoco tōnō Aditadoco ayæ Deēma tōnō Odoca botō tōnō godongāmæ cædāni īñōmō adobai botō īmote, Pidemöö waa quēwencæcāimpa, ante ānāni ēñēninqe botō bitō īmite yewæmōmopa.

²⁵ Mōnō Awēnē Itota Codito bitō īmite waadete pōnō cæcæcāimpa. Māninqe ante botō yewæmōmopa.

Ebedeoidi inānite cadota ante nāni yewæmongainta

*Wængonguī beyæ tōmengā Wengā pōnō
apænegacāimpa*

¹ Wængonguī wēēnēñedē wantæ wantæ iñō apænedinque wantæ iñō wadō bai cædinque tōmengā beyæ nē apænedāni inānite tæmpo pōnō apænecā ēñengadānimpā. Ēñēninque tōmēnāni wæætē adodō ante mōnō mæmæidi inānite tæmpo apænegadānimpā.

² Nōwo guiquēnē māninō ante Wængonguī dodāni inānite nānō apænegañōnē idæwaa bayonte tōmengā apænecā ēñēninque tōmengā Wengā wæætē mōnō imonte pōnō apænegacāimpa. Wēēnē pōni inguipoga dæ ii ēmōnæ dæ āñonte Wæmpocā tōmengā Wengā ingante, Badōe, angā ēñente cæyongā tōmengā nānō cædō beyæ Wæmpocā tōmancoo badongacāimpa. Mānōmāi beyæ nē badongā iñongante Mæmpo Wængonguī wæætē, Tōmancoo nē ænguingā iñōmō botō Wengā adocanque nē ænguingā ingampa āmopa, angacāimpa. ³ Mæmpocā nē tæi ēmōnongā inte ñāō ēmongā iñongā tōmengā Wengā iñōmō adobaī nē tæi ēmōnongā inte ñāō ēmongā ingampa. Īninque, Wængonguī Wengā nō pōni entawēninque nānō quēwengainō bai Mæmpocā iñōmō edæ adobaī pōni entawēnongā inte edæ nōingā cæte quēwengā ingampa, ante mōnō edonque ēñengæimpa. Īnguipo incæ ii ēmōnæ incæ a ongoncoo incæ awēmō iñōmō ongoncoo incæ tōmengā Wengā adocā tæi piñænte nānō angāinō beyænque tōmancoo edæ ñōwo ganca cōwē ongoncoo incoopa. Ayæ nāmā wepæ godonte wæninque adocā iñōmō wēnæ wēnæ mōnō cæpāmo ante ñā mēnongagacāimpa. Mānōmāi nē ñā mēnongaingā inongā inte tōmengā dō æidinque Wængonguī nē tæi ēmongā tōmēmængā inō tæ contadinque ongongampa.

*Tōmengā ñæncængā iñongā anquedoidi
pōnōmenque ināni*

⁴ Mānōmāi æi contadinque tōmengā nē ñæncængā iñongante Wængonguī iñōmō, Bitō ēmōwo bitō cōwē ænguēnengaiwo, ante pemongacāimpa. Wængonguī anquedoidi guiquēnē wīi adobaī ñæncænāni iñōnānite Wængonguī tōmēnāni inānite adobaī ante pemōnāmāi ingacāimpa. ⁵ Edæ anquedoidi iñōnānite æcāmenque ingante Wængonguī dicæ,

“Botō Wēmi inōmi ĩmipa.

Ñōwoñæ bitō Mæmpobo babopa,”

Ante angantawogaa. Ayæ adobaī,
“Botō tōmengā Mæmpobo incæboimpa.

Īninque tōmengā botō Wengā incæcāimpa,”
ante anquedo ingante ānāmāi
ingacāimpa.

⁶ Wæætē tōmengā Wengā Tānocā iñongante inguipoga da pōnōninque Wængonguī,
“Botō anquedoidi tōmānāni iñgā ñōwā inō
ædæ wææninque, Bitō Wængonguī
Wēmi imidō anguēnē, ante wat-
apæ apænecadānimpā,” ante
apænegacāimpa.

⁷ Ayæ wæætē anquedoidi inānitēdō ante
apænedinque,

“Tōmengā godō cæcā ate tōmengā anque-
doidi iñōmō woboyæ nangui pæmæ
bai quingæ pōni cæcædānimpā.

Ayæ tōmengā godō cæcā ate tōmengā
beyæ nē waa cædāni iñōmō
gonga bæcoguēnēwate bai nangui
cæcædānimpā.”

⁸ Ante apænedinque tōmengā Wengā in-
gante guiquēnē Wængonguī incæ ĩmāi an-
gacāimpa.

“Bitō nē Wængonguī inōmi inte ēñēmi.
Awēnē Odeye badinque Awēnē
contaimpaa tæ contagaiimi inte bitō
ñimpo cædāmāi inte cōwē Awēnē
Odeyebi inōmi inte ongoncæbiimpā.

Īninque Awēnē Odeyebi inōmi inte bitō
nempo quēwēnāni inānite nō pōni
cæte aadinque yaēmē tōēmē pōni
næænte bai nē āmi incæbiimpā.

⁹ Nē Wængonguīmo inōmo inte botō
iñōmō bitō Awēnē Wængonguīmo
imopa. Īninque botō, Nō cæte mōnō
quēwengūnō ante nē waadebi inōmi
inte bitō ēñēnāmāi nāni cæinō ante
edæ wīi ainēmi ĩmipa.

Mānōmāi ĩmi ante adinque botō ĩmāi
pōnō cæbopa. Bitō tōnō godongāmæ
ongōnāni Awēnē badinque bitō
watapæ tocæbiimpā, ante cædinque
botō,

oguinguipæ pōnō gao caate bai nangui
cægaboimpa.”

¹⁰ Ante Mæmpo Wængonguī angacāimpa.
Ayæ adobaī tōmengā Wengā ingante
apænedinque,

“Bitō Tæiyæ Awēnē inōmi inte wēēnēñedē
pōni inguipo mā cō cæte bai cædinque
tōmēmi badongabiimpā, angacāimpa.

Ayæ ñōnædē ongoncoo adobaī tōmēmi
bitō ñonmpoca badongaincoo inte
ongoncoopa.

¹¹ Mānincoo guiquēnē ĩncayæ ate wido cæte
bai bayonte

Bitō guiquēnē cōwē ongonguīmi ĩmipa.

Mānincoo guiquēnē mōnō weocoo pedæncōo
woincoo bai bayonte,

12 waocā yacooque æninque topo cæcā bai cædinque bitō wæætē bitō badongaincoo ænte topo cæte bai cæcæbiimpa.

Wæætē mīncoo wēñacā bai cædinque bitō wæætē tōmancoo mīncoo badōmi on-gongæimpa.

Bitō iñōmō do bitō ingai bai adobai cōwē inguīmi ĩmipa.

Bitō quēwenguīmāmo cōwē inguīnō anguēnē.”

13 Āninque Wængonguī tōmengā Wengā ingante ĩmāi angacāimpa.

“Botō tōmēmæ inō tæ contate ongōñōmite, botō bitō ĩmite nē piñte cædāni ĩnānite bæ tabo tæ wæænāni ate bitō tæi ěmōmi inte pinā gāwate bai godō cæbi wæcædānimpa,” angacāimpa.

Tōmengā Wengā ingante mǎnōmāinō ante nē angaingā inte Wængonguī dicæ anquedoidi ĩnānite adobai angantawogaa. 14 ĩñæmpa Wængonguī anquedoidi iñōmō baō ōmaadāni inte Wængonguī beyæ nē waa cædāni ĩnānipa. Mǎnōmāi iñōnānite tōmengā, Botō æmo beyænque nē quēwēnāni beyæ mīnitō godō cæcæmīnimpa, ante da pōnongā pōninque tōmēnāni mōnō beyæ pōnō waa cædānipa.

2

Wængonguī cængā beyænque quēwēmōmpa, ante

1 Mǎnōmāi beyæ mōnō Awēnē apænecā ěñēninque mōnō ěñengainō ante mōnō ĩmpo cædāmai inguinque ante mōnō wede pōnente ædæmō ěñente cæcæsiimpa.

2 Edæ anquedoidi incæ Wængonguī beyæ apæneyōnāni tōmēnāni nāni ānō ante dodāni wæætē nē ěñente cæquēñēnāni ingadānimpa. ĩninque æcānō wīi ěñēninque wapiti cæda tōmengā nē tente wæquēñengā ĩñongante dodāni nō cædinque pangadānimpa.

3 ĩñānāni ěñēdāni. Wængonguī nānō, Quēwencæmīnimpa, ante angainō ante æcānō mōnō ĩmonte tāno apænecantawo, ante pōñēdāni. Wængonguī Awēnē ĩnongā incæ tānocā apænegaingā inte, Botō tōmēmō æmo beyænque quēwencæmīnimpa, ante apænegaçāimpa. Ayæ Wængonguī nānō apænegañō ěñente Ao āninque wadāni godōmenque mōnō ĩmonte, Nāwangā ĩmpa, ante apænēdāni ěñēñimō inte mōnō ædæmō ěñengæsiimpa. Edæ ěñēñāmāi inte bai ĩmpo cæmō ĩninque Wængonguī dicæ pānāmāi inte ata cæpocampa quēwenguīmōō.

4 ĩninque, Quēwencæmīnimpa, ante nāwangā botō ānō ante ěñēncædānimpa, ante cædinque Wængonguī godōmenque cægacāimpa. Tōmengā, Ēcānō tōnō cæquīmoo, ante, Ēyōmōnō cæquīmoo, ante, Ēyedēnō cæquīmoo, ante nāmā nānō angainō bai cædinque ĩmāi pōnō cægacāimpa.

Tōmengā, Botō mā cæbo ate waodāni ěñēncædānimpa, ante nangui cægacāimpa. Ayæ, Ēbānō cæcāā, ante wæcædānimpa, ante tæi piñæninque wadō wadō cædinque bamōnengæ edæ nangui cægacāimpa. Tōmengā Ōñōwoca ingante da pōnongā pōninque tōmengā wæætē Wængonguī nānō angaināni ĩnānite pōnō cæcā æninque tōmēnāni tōmānāni Wængonguī Ōñōwoca nānō pōnongā ænganca cægadānimpa. ĩninque Wængonguī mǎnōmāi pōnō cæcā adimō incæ mōnō ěñēñāmāi cæmō bai tōmengā wæætē mōnō ĩmonte ædō cæte ata cæpoquēñengāā.

Itota Codito tōmengā tōññadāni bai adobai bagacāimpa

5 Ayæ mīnguipoga Awēnē nempo mōnō quēwenguīmāmo ante apænēmōnipa. ĩninque mīnguipoga mōni ānonguipoga Wængonguī, Ēcāmenque ingante āmo awēnē baquingā, ante cædinque, Anquedoidi incæ awēñēdi bacædānimpa, ante dicæ angantawogaa. 6 Wacā wataa yewæmōninque ĩmāi ante Wængonguī ingante āmotamīni ante bai yewæmongacāimpa.

“Wængonguī ěñēmi. Waomōni ōñōmōninque ĩñōmōnite bitō ædō cæte waadete cæbii.

Wao wēmōni ěñagaimōni ĩñōmōnite bitō ædō cæte pōnō waadete cæbii.

7 Anquedoidi ĩnānite æmonga ææntodōninque bitō waocā ingante gao wæñō gō cæbi ate tōmengā wantæ ĩñō pōñōmenque ongongantapa.

Ayæ, Waocā nē tæi ěmōnongā inte ñāō ěmōñongante wadāni tōmengā ingante waa acædānimpa, ante pōnō badongabiimpa.

8 Edæ bitō badongaincoo tōmancoo waocā nempo pōñōmi æninque

waocā tæi ěmōngā inte nē angā bagacāimpa.” Ante nānō yewæmongaine bai cædinque Wængonguī tōmengā nānō badongaincoo tōmancoo Waocā nempo pōnongā æninque Waocā nē angā bayongā wacoo wayōmō ongoncoo edæ dæ ampa. Incæte, Tōmengā nempo tōmancoo do ongōmpa, ante mōnō ñōwo ganca ayæ adāmāi ĩmōmpa. 9 Doyedē mōnō waocabo ĩñōmonte Wængonguī waadete pōnō cædinque Itota ingante angā ěñēninque tōmengā wæætē mōnō tōmāmō wænguīmāmo beyæ ante cōwē wæwocate wæquingā bagacāimpa. Mǎnōmāi cædinque Wængonguī anquedoidi ĩnānite æmonga ææntodōninque, Itota wæætē caate wæncæcāimpa, ante cædinque tōmengā ingante gao wæñō ĩñōmō gōnongā on-gongacāimpa. Incæte Itota caate wængā beyæ Wængonguī poganta tæiyæ waēmō da wencate bai cædinque, Itota nē tæi ěmōnongā inte ñāō ěmōngā adinque wadāni tōmengā ingante waa acædānimpa, ante pōnō

cægacäimpa. Ìninqe Itota Tæiyæ Awënë wencate ongongå ingante do amompa.

¹⁰ Tömancoo nê badongaingä ìnongä inte Wængonguï tömancoo nê ênempondongä inte ìimai angacäimpa. Botö Wëmi êñëmi. Wadäni incæ botö wënäni nangui ìnäni quëwencädänimpa, ante nê badömi bitö baquinque caate wæcæbiimpa. Mänömaï caate bitö wædö beyænque ædæmö picæmi bate nê êñëni inte bitö botö wënäni ìnänite ñäo ìñömö ænte mämömi poncädänimpa. Pöningque tömënäni botö ñäo êmömo bai adobai ñäo êmoncädänimpa, ante Wængonguï nò pöni cægacäimpa. ¹¹ Itota mönö ìmonte, Tæiyæ waëmö êwocate quëwencæminimpa, ante nê badongä ìnongä mönö tömengä tönö adomö mönö cabo ìmomba. Mänömaï ìmö beyæ tömengä mönö ìmonte ante apænedinque, Botö tönïñamini ìminipa, ante guïñenedämaï tedecampa. ¹² Ìimai ante apænecampa.

“Wængonguï êñëmi. Bitö êmowo ante botö tönïñadäni ìnänite apænebo êñencädänimpa.

Tömënäni godongämæ ongonthe êñëñönäni botö, Wængonguï ìñömö Tæiyæ Waëmö ìnongä inte waa pöni cæcä abopa, ante ämotamini ante bai ancæboimpa.”

¹³ Ayæ adobai apænedinque,

“Wængonguï ingante botö wede pönente quëwencæboimpa,” angacäimpa.

Ayæ wæætë adobai apænedinque,

“Wængonguï botö ìmote apænedinque, Bitö wënäni, ante pönongä ænömö inte botö, Möni wencabo mæ ongömöni aedäni, ämopa.”

Itota incæ Wængonguï beyæ näni yewæmongainö bai adobai apænecampa.

¹⁴ Mönö wænguimämo ante wënæ awënë incæ nê angä ìnongante Itota, Botö nãñe wæninqe tömengä ingante edæ ömæe êwencæboimpa, ante ìimai cægacäimpa. Mönö Itota wëñæmö ìnömö inte mönö baö tönö wepæ ñömænguïñö êñamö bai tömengä nänö wænguinque adobai ñömænguïñö êñagacäimpa. Ìninqe tömengä nãmä nänö wænö beyænque wënæ awënë ingante bæ tacä ate tömengä wæætë piñænämaï aquii bate nê angä ìnãmä ingampa. ¹⁵ Ayæ wënæ awënë nempo ñä cæyænte bai quëwëninque mönö wænguimämo ante guïñente wæyömönte Itota mönö beyæ ante wæætë wæninqe mönö ìmonte gä pe æmpote ö ængä beyænque quëwëmomba.

¹⁶ Edæ wii anquedoidi ìnänite ænte pæ mancæte ante cædinque tömengä wæætë Abadäo wodi pæimö ìñömönte mönö ìmonte pönö æninqe pæ mangampa. ¹⁷ Mäninö beyæ Wængonguï, Bitö tönïñadäni bai adobai badinque bitö, Wængonguï qui, ante nê nö

Pönömi Ñænæmi pöni incæbiimpa. Ayæ bitö tönïñadäni ìnänite cöwë pönëninque waadete pönö waa cædinque ædæmö aacæbiimpa, ante tömengä ingante da pönongä pon-gacäimpa. Ayæ adobai, Bitö tömënäni wënæ wënæ näni cædö beyæ nãmä wepæ godoncæbiimpa, ante cædinque Wængonguï Itota ingante da pönongä pöninqe tömengä mönö êñamö bai adobai êñadinque waomö mönö ìnömö bai adobai badinque Waocä ìnongä ingacäimpa. ¹⁸ Mönö inguipoga quëwëninque wënæ wënæ mönö cæinënö beyæ wæwëmomba. Wënæ awënë, Itota oda cædinque Wængonguï ingante êñëñamäi cæcæcäimpa, ante cæyongä Itota ìñömö mönö wæwënë bai adobai wæwengä incæte oda cædämaï ingacäimpa. Ìninqe wënæ wënæ cæinente wæwëñömönte tömengä adobai do wægaingä inte, Minitö tæï piñænte ongöningue oda cædämaï incæminimpa, ante pönö töö æmænte cæcampa.

3

Itota Ñænængä ìnongä Möitee wodi wædangä ingacäimpa

¹ Mönitö ìmönite aa pedinque Wængonguï minitö ìminite adobai aa pedinque, Tæiyæ waëmö entwencæminimpa, ante badongacäimpa. Ìninqe botö tönïñamini êñëedäni. Itota ìñömö Wængonguï nänö nê da pönongaingä ingacäimpa, ante mönö pönënë ante mönö, Nawangä impa, ante apænemomba. Ayæ, Wængonguï qui, ante nê Godongä Ñænængä pöni ìñömö Itota adocä ingampa, ante mönö pönënë ante, Nawangä impa, ante apænemomba. Ìninqe minitö guiquënë, Itota æbänö ingacäimpa, ante önowënenque pönente quëwënguëñëmini ìminipa. ² Wængonguï angä êñëninque Möitee wodi guiquënë tömengä ingante cöwë pönente cædinque Wængonguï tönö näni godongämæ quëwencabo ìnänite ædæmö cæte aagacäimpa. Tömengä nò cæte nänö aagai bai adobai cædinque Itota ìñömö Wængonguï angä êñëninque tömengä ingante cöwë pönente cædinque tömengä tönö mönö godongämæ quëwencabo ìmonte ædæmö cæte aacantapa.

³ Edæ, Oncö waa ongompa, ante waa amö incæ mönö oncö nê badöningä ingante godömenque waa ate apænecæimpa. Adobai, Möitee wodi nê waa aacä ingacäimpa, ante tömengä ingante waa amö incæ mönö edæ Itota nê badongaingä ingante godömenque nangui waa ate apænecæimpa. ⁴ Waocä oncö guiquënë wii tömenque ongompa. Edæ waocä mæñongä ate oncö edæ ongö aminipa. Inguipo incæ adobai öönæde ongoncoo adobai wii tömenque ongoncoopa. Mänincoo tömancoo

Wængongui nāno badongaincooque ongoncoo acæimpa. ⁵ Mōitee wodi guiquēnē Awēnē Wængongui ingante nē cæcā Inongā inte tōmengā tōnō nāni godongāmæ quēwencabo inānite cōwē pōnēninque ædæmō cæte aagacæimpa. Mānōmai cædinque tōmengā, Wængongui æbānō iincayæ ate apænequingā, ante odōmōninque, Nāwangā impa, ante apænegacæimpa. ⁶ Mōnō Codito guiquēnē Wæmpocā Wengā Onguiŋængā Inongā inte Wæmpocā tōnō nāni godongāmæ quēwencabo inānite cōwē pōnente nōingā pōni cæte pōnō aacampa. Edæ mōnō guiquēnē, Codito waa pōni pōnō cæcā beyænque watapæ bacæimpa, ante mōnō pōnēnō ante wadāni ēñēñōnāni waa tote apænemompa. Ininque mōnō guīñēnāmai inte māniñō mōnō pōnēnō ante ædæmō entawēninque iinque baganca ŋimpo cædāmai imō ininque tōmengā tōnō mōnō godongāmæ quēwencabo imaimompa.

Wængongui quīnāni nāni guēmanguimāmo ante

⁷ Mānōmai beyæ Wængongui Tæiyæ Waēmō Ōnōwoca nānō angainō ante mōnō ēñente cæcæimpa. Tōmengā nānō apænegainō ante iimainō ante yewæmongatimpa.

“Nōwoōnæ incæ tōmengā apæneccā ēñēninque,

⁸ mīnitō, Mīmō ōmædē bawēnāmai incæmōnimpa, ante cædinque Baa ānāmai iedāni.

Dodāni iñōmō, Wido cæcæimpa, ante nāni ōnōmæca quēwente cæyedē, Wængongui ingampa diyæ panguingā, ante pōnēninque wiwa cægadānimpa. Mānōmai cædinque tōmēnāni Baa ante mīmō ōmædēnāni nāni bawengai bai mīnitō adobai bawēnāmai iedāni.

⁹ Mīnitō mæmæidi māniñōmō quēwēninque botō imote wiwa cædāni wægaboimpa. Incæte botō māniñedē coadenta wadepo iñonte waa cæbo agadānimpa.

¹⁰ Māniñedē quēwēnāni mānōmai cædāni beyæ botō tōmēnāni inānite piūninque iimāi angaboimpa.

‘Botō taadō goquēñēnāni incæ taadō cōwē adāmai Ināni inte

tōmēnāni ancaa oda cædinque mīmō ōmædēnāni inte bai wadō godānipa.’

¹¹ Āninque botō ængui badinque, Botō nē Quēwēmo ingaimo inte nōingā āmopa, āninque,

Guēmædāni, ante botō angaiñōmō tōmēnāni cōwē guite guēmānāmai incædānimpa, angaboimpa.”

Ante Wængongui nānō angainō ante yewæmongadānimpa.

¹² Iñānāni ēñēdāni. Mīni pōnencabo iñōmīnite mīnitō wacā ingā wacā ingā waa adinque adocanque incæ mīmō ōmædengā badāmai incæcæimpa, ante wææ aadāni. Ayæ adocanque incæ wēnæ wēnæ entawengā badinque wiya æmænte Wængongui nē Quēwengā ingante ēmō cæte godāmai incæcæimpa, ante wææ aadāni. ¹³ Nōwoōnæ, ante nē angā nānō angaiñōnæ iñōmō ayæ nōwo ganca ēōnæpa. Ininque mīnitō nōwoōnæ incæ wacā ingā wacā ingā ædæmō apænedinque, Æcāmenque incæ wiwa nāni cædō beyænque oda cæte wædinque mīmō ōmædengā badāmai incæcæimpa, ante cædinque iimō iñō iimō iñō godongāmæ iñacabo cædinque tæi ongōdāni. ¹⁴ Edæ mōnō wēēñēdē wede pōnengamōimpa. Nōwo adobai pōnēninque iinque baganca wede pōnēmō ininque mōnō Codito nempo godongāmæ quēwēmaimompa.

¹⁵ Ininque adode ante pōnente cæcæimpa.

“Nōwoōnæ incæ tōmengā apæneccā ēñēninque mīnitō, Mōnitō mīmō ōmædēmōni bawēnāmai incæmōnimpa, ante wææ cædinque Baa ānāmai iedāni.

Edæ dodāni, Wido cæcæimpa, ante cædinque edæ Baa ante mīmō ōmædēnāni nāni bawengai bai mīnitō adobai bawēnāmai iedāni.”

¹⁶ Wængongui angā ōnōmoncaque ēñēninque, Wido cæcæimpa, ante ædānidō cægadāni. Edæ Mōitee wodi Equitobæ nānō nē ænte gogaināni adodāni incæ, Wido cæcæimpa, ante cægadānimpa. ¹⁷ Ayæ adobai Wængongui coadenta wadepo iñonte ædānidō inānite piūninque ængui bagacāi. Edæ nē ēñēnāmai inte wēnæ wēnæ cædāni inānite Wængongui piunte ængui bacā ate tōmēnāni baō ingai ōnōmæca yabæque wæænte ōñongatimpa. ¹⁸ Ayæ, Pō guite guēmædāni, ante botō angaiñōmō cōwē guite guēmānāmai incædānimpa, ante Wængongui, Botō nē Quēwēmo inōmo inte nōingā angaboimpa, angacæimpa. Edæ ædānidō inānite mānōmai angacāi. Edæ nē ēñēnāmai cædāni inānite mānōmai angacæimpa. ¹⁹ Ininque nē pōnēnāmai ināni inte tōmēnāni nāni pōnēnāmai inō beyænque guidāmai ingadānimpa.

4

¹ Botō nempo guidindque guēmancæmīnimpa, ante wēēñēdē nānō angainō ante Wængongui nōwo incæ adodō ante cōwē angampa. Mānōmai beyæ mīni pōnencabo tōmāmīni tōmengā nempo guidindque guēmanguēnēmīni iñōmīnite adocanque incæ oda cædāmai incæcæimpa, ante cædinque mōnō godongāmæ waa adinque

wææ aacæïmpa. ² Edæ dodāni inānite Wængongui ingantedō ante watapæ nāni apænegainō bai mōnō imonte adobaï ante watapæ apænedāni ēñēmōmpa. Incæte dodāni guiquēnē ōnōmoncaque ēñēninque wede pōnēnāni beyænuque guēmānāmaï inte wægadānimpa. ³ Mōnō nē wede pōnēmō imō guiquēnē Wængongui nempo guidinqwe mīmōnē do guēmāmōmpa. Edæ Wængongui nempo mōnō guēmanguēnēnō ante botō āninta adotaa iimainō ante yewæmonte ongō bai batimpa.

“Botō ængui badingque, Botō nē Quēwēmo ingaimo inte āmopa, āninque, Pō guite guēmæedāni, ante botō angaiñōmō tōmēnāni cōwē guidāmaï incædānimpa, angaboïmpa.”

Ante Wængongui beyæ ante yewæmongadānimpa. Incæte doyedē inguipoga iï ēmōnæ badōninque Wængongui tōmengā nānō cæquēnēnō ante iinque badōninque, Idæwaa, angacāïmpa. ⁴ Wængongui ōnomo æmæmpoque go adōonæque iñonte iinque cædinque iimō wæiyō nānō guēmangaiōnæ ingatimpa, ante iimāi ante wataa yewæmonte ongōmpa.

“Ōnomo æmæmpoque go adōonæque iñonte iinque cædinque iimō wæiyō ñimpo cædinque Wængongui guēmangacāïmpa.”

⁵ Ayæ botō āninta adotaa iimāi ante yewæmonte ongōmpa.

“Pō guite guēmæedāni, ante botō añōmō tōmēnāni cōwē guidāmaï incædānimpa,” angampa, ante yewæmongatimpa.

⁶ Iinque Wængongui nānō pōnō cædō ante watapæ ante apæneçā ēñēninque dodāni iñōmō ōnōmoncaque ēñēnāni inte tōmēnāni nāni ēñēnāmaï cægaiñō beyæ guidāmaï ingadānimpa. Iinque, Wængongui tōmengā nānō angaiñō iinque cæcæïmpa, ante cædinque iincayæ quēwēnāni pancadāniya cōwē guiquēnēnāni inōnānimpa. ⁷ Mānōmaï beyæ, Æōnædō ēñenguēnēmīni iimīni, ante odōmoncæte ante cædinque Wængongui, “Ñōwoōnæ,” ante awēnē Dabii ingante wantæpiyæ ate apæneçā ēñengacāïmpa. Iinque māninō botō do ante yewæmōmō mīni adinō bai ante Dabii wodi iimainō ante yewæmongacāïmpa.

“Ñōwoōnæ incæ tōmengā apæneçā ēñēninque mīnitō, Mīmō ōmædēmōni bawēnāmaï incæmōnimpa, ante cædinque Baa ānāmaï ledāni,” ante yewæmongacāïmpa.

⁸ Edæ docā Ootowee wodi tōmēnāni inānite doyedē manguicā guidinqwe Cānaāmæ quēwengadānimpa. Incæte tōmēnāni māñiōmæ do guidīnāni inte nāwangā guēmānāni bai Wængongui

iincayæ ate, Ñōwoōnæ guēmancæmīnimpa, ante wæætē ānāmaï incædongāïmpa.

⁹ Iinque mōnō Wængongui quimō iñōmō edæ guēmanguiōnæ guēmante bai mōnō tōmengā nempo quēwēninque mīmōnē guēmāninque cætawente wædāmaï ingæïmpa. ¹⁰ Wængongui iinque badōninque tōmengā nānō cæquēnēnō tōmāā cædinque ñimpo cædinque guēmangacāïmpa. Tōmengā nānō ñimpo cæte guēmangāi bai waocā iñōmō Wængongui nempo guidinqwe nē guēmangā iñōmō adobaï tōmengā nānō cæquēnēnō ante, Tōmānō do cætimpa, ante adinqwe ñimpo cædinque guēmangampa.

¹¹ Dodāni nāni ēñēnāmaï cægāi bai ñōwodāni adobaï cædāni iinque tōmēnāni nāni tæ go wæænguinque cæbainānīpa. Mānōmaï pāninque, Adocanque incæ mānōmaï cæte tæ go wææñāmaï incæcāïmpa, ante wææ cædinque mōnō tōmāmō, Wængongui nempo guite mīmōnē guēmangæïmpa, ante nangui cæcæïmpa.

¹² Wængongui nānō ānō iñōmō mīine quēwēne inte tæi piyænē ēnepa. Edæ yaēmē yægāmē tipængaa engamē bamencaā guuibæ watii co bai Wængongui nānō ānō iñōmō adobaï cædinque mōnō ōnōwoca incæ do cote bai guiipa. Ayæ bamē tadōmengadæmē tæi guinænte bamii edonque a bai Wængongui nānō ānō iñōmō adobaï mōnō mīmō incæ tadōmengadæ tæi guinænte bai cædinque mōnō pōnēnō ante mōnō cæinēnō ante do edonque ba adinque adode incæ apænte bai ampa. ¹³ Wængongui nē apænte ānongā iñongante mōnō nāmā incæ, Æbānō cægāmōnii, ante tōmengā ingante tōingā apænequēnēmō imōmpa. Edæ, Wængongui ayongā tōmengā nānō badongaincoo tōmancoo edæ gā ængate ōmægacoo bai inte wodōnāmaï ongōmpa.

Wængongui ingante nē Godongā Ñænængā Itota ingampa

¹⁴ Mōnō beyæ, Wængongui quī, ante nē Godongā Ñænængā pōni iñōmō Wængongui Wengā Itota ingampa. Tōmengā iñōmō nāmā wepæ godonte do wængaingā inte ñāni ōmæmōninque oōnædē æite ongongampa. Iinque mōnō, Tōmengā ingante wede pōnēmōnīpa, ante nē apænemō inte mōnō wede pōnēnō ante ædæmō pæ mangæïmpa. ¹⁵ Wængongui quī, ante mōnō beyæ nē Godongā Ñænængā pōni inongā iñōmō wēnæ wēnæ cædāmaï ingacāïmpa. Incæte aquīi imō inte wæmō adinqwe tōmengā wæætē, Botō Waobo ēñadingque aquīi bate wægāimo inte, Aquīi mīni wædō æbānō i, ante do edæ ēñēmopa, angampa. Edæ wēnæ awēnē tōmengā ingante, Wēnæ wēnæ cæe, angā do wægāingā inte tōmengā mōnō wēnæ wēnæ cæinēnō, Æbānō i, ante do ēñengampa. ¹⁶ Iinque mōnō Awēnē

iñömō nangui waadete pönengä inte Awënē contaimpaa ongongampa cæmöö. Mönō wënæ wënæ cædinō ante tōmengä pönō ñimpo cæcæcäimpa, ante cædinque mönō tōmengä weca ponte apænecæimpa. Mönō caate wæyedē tōmengä pönō tōō æmænte cæcæcäimpa, ante mönō tōmengä weca ponte apænecæimpa. Mänōmai Awënē ongompaa gäänē pōninque mönō guññēnāmai inte apænemō ēñēninque tōmengä waadete pönō waa cæcä ængæimpa.

5

¹ Wængongui quī, ante bitō botō imote nē pönōmi ñænæmi pōni bacæbiimpa, ante æcänō ingante Wængongui angä bacää.

Edæ waocä adocanque ingante apænte æninque Wængongui angä ate tōmengä iñömō nē waocä inongä inte waodäni beyæ Wængongui weca cæcampa. Ìninque waodäni ñingä weca pōninque, Wængongui quī, ante pædæ pönōnāni æninque tōmengä wæætē Wængongui ingante godongampa. Ayæ, Wënæ wënæ cæmōni incæte Wængongui waadete pönō ñimpo cæcæcäimpa, ante cædinque waodäni, Wængongui quī, ante cæningä ænte pōninque pædæ pönōnāni ængampa. Æninque nē godongä ñænængä iñömō nē waocä inongä incæte cæningä ingante ænte wænōninque nē ænte pönāni nāni wënæ wënæ cædinō beyæ ante baō iya tangampa. ² Ìninque wadäni, Æbämē impa, ante ēñēnāmai nāni wædō ante nē godongä ñænængä iñömō nē waocä inongä inte adobaï pancaa ēñēnāmai inte wæcampa. Ayæ oda cæte nāni wædō ante tōmengä adobaï oda cæte wæcampa. Ìninque wadäni bai aqüingä inongä inte tōmengä gänē pönēninque wadäni inānite ædæmō cæte odōmongä adānipa. ³ Mänōmai inongä inte tōmengä wadäni wënæ wënæ nāni cædinō beyæ ante, Wængongui quī, ante iya tæninque adobaï, Botō nāmā wënæ wënæ cædinō beyæ godōmopa, ante iya tante Wængongui ingante godongampa.

⁴ Waocä nāmā incæ, Botō, Wængongui quī, ante nē godōmo ñænæmo bayōmote wadäni botō imote waa acædānimpā, ante ædō cæte anguingä. Ìñæmpa Wængongui angä beyænque Aadōō wodi nē godongä ñænængä bacä bai wadäni adobaï Wængongui angä beyænque nē godōnāni ñænænāni badānipa. ⁵ Codito incæ, Nē godōmo ñænæmo badinque nē tæi emōmo inte ñāō emōmo acædānimpā, ante nāmā ante wīi angacäimpa. Wængongui incæ tōmengä ingante,

“Bitō botō Wēmi inōmi ñimpa.

Ñōwoðnæ bitō Wæmpobo babopa.”

⁶ Angacäimpa. Ayæ godōmenque Wængongui nānō angainō ante wataa yewæmongatimpa.

“Wængongui quī, ante nē pönongä Mēequitedeco nānō cōwē ingai bai, bitō adobaï ñimpo cædāmai inte nē Pönōmi cōwē incæbiimpa,” ante Codito ingante angacäimpa.

⁷ Codito iñömō Waocä ēñate quēwēninque Ca ca wædinque Yæ yæ æninque Wængongui ingante nangui apænecæimpa. Wængongui bitō adobique eyepæ ñmi inte wææ ämi ñinque botō wænāmai ñaimopa, angacäimpa. Incæte, Bitō, Wæe, ämi ate botō wæncæboimpa, ante nānō Ao äñinō beyænque Wængongui tōmengä ingante do ēñengacäimpa. ⁸ Wæmpocä Wēñængä inongä incæte Itota nānō caate wæwēmāmo beyænque Wængongui nānō äñō ante ædæmō ēñente cædinque picængä bagacäimpa. ⁹ Tōmengä nānō äñō ante nē ēñente cædōmō iñōmonte tōmengä ædæmō ēñēninque picængä bagaingä inte edæ mönō imonte ængä beyænque mönō cōwē wænāmai inte quēwēmoppa. ¹⁰ Tōmengä ingante Wængongui apænte æninque, Mēequitedeco nē pönongä ñænængä pōni nānō ingai bai bitō adobaï botō imote nē Pönōmi ñænæmi pōni inōmi ñimpa, angacäimpa.

Mönō wede pönēnō ante Baa äñāmai ingæimpa, ante

¹¹ Mäninō ante botō mīnitō imīnite godōmenque nangui apænequēñēmo ñmopa. Incæte, Æiquedō ēñenguimīni, ante pōnente wædinque botō, Æbānō cæte apænebo ēñenguimīni, ante wæbopa. ¹² Ìñæmpa mīnitō doyedē mīni ēñengainō ante ñōwo nē odōmōmīni baquēñēmīni imīnipa. Incæte wacä wæætē mīnitō imīnite Wængongui nānō angainō ante adodeque adodeque ante odōmonte apænecä ēñenguēñēmīni adodō bamīni awædō. Edæ wēñænāni nē goōmæ gänāni bai wæætē bamīni iñōmīnite botō ædō cæte tæēmō cængui godonte bai apænebo ēñenguimīni. ¹³ Goōmæ nē gangä bai ingä iñömō tōmengä wēñængä bai ñingante mōnitō, Æbānō nō cæquī, ante odōmonte apænemōni incæte tōmengä iñömō cōwē ēñēnāmai ingampa. ¹⁴ Wæætē æcänō cōwē waa cæda ñna iñömō tōmengä, Quinō waa ñi, ante, Quinō wënæ wënæ ñi, ante wæætē wæætē ante cædinque do ēñente badinque picængä bai bacampa. Ìninque ædæmō picænāni nē badāni beyænque mōni nō odōmonte apænedō iñömō cængui tæēmō bai ongompā.

6

¹ Mönō Codito inguipoga quēwēninque æbānō cægacäi, ante do ēñēmoppa. Mönō wænguñō goquinque wënæ wënæ

cæmompā, ante wædinque, Idæwaa wænæ wænæ cætabopa, ante mōnō Wængonguī gāmænō æbānō cæte ocaē ēmænte ponguūī, ante do ēñēmompā. Tōmengā ingante æbānō cæte pōnenguūī, ante do ēñēmompā. Īnque mānīnō tōmānō ante do ēñēnīnō inte mōnō mānīnō ante Idæwaa tēdetamompā. Wæætē, Æbānō cæte godōmenque picæmō baī ēñēnte baquūī, ante mōnō ñōwo apænecæīmpā. ² Adobaī, Æpænē quīnante guīquūī, ante, Ōnompoca quīnante godō gampoquūī, ante do ēñēmō inte mōnō mānīnō ante godōmenque tēdedāmaī ingæīmpā. Ayæ, Wænte ate ñāni mōnō ōmæmongæīmpā, ante do ēñēmō ĩnque, Wængonguī cōwē apænte ancæcæīmpā, ante do ēñēmō ĩnque mōnō mānīnō ante ñōwo godōmenque tēdedāmaī ingæīmpā. ³ Īnque Wængonguī Ao angā ate botō mānīnō mīnitō do ēñēnīnō ante tēdedāmaī incæboīmpā. Mīnitō ēñēnāmaī ĩnīnō ante wæætē nanguī apænebo ēñencæmīnīmpā.

⁴ Wængonguī mōnō mīmōnē pōnō tīca ēnente baī cædinque edonque odōmonte apænecā ēñēnīnque mōnō ñāō baī entawēmompā. Tōmengā ōōnædē waa pōnī nānō da pōnongaincoo do ænte quēwēmompā. Ayæ tōmengā Tæjyæ Wæmō Ōnōwoca ingante da pōnongā ænīnque mōnō tōmengā tōnō āanque baī ēwocamompā. Mānōmaī ēwocamō incæte pancadāniya wadæ godāni inte edæ ædō cæte, Wænæ wænæ cæte awædō, ante ocaē ēmænte ponguūnānī. ⁵ Tōmēnāni ĩñōmō, Wængonguī nānō ānō waa pōnī ĩmpā, ante do ēñēnīnāni inte ayæ, Wængonguī mīnguīnque nānō badōñedē mānīñedē mīmāmoque ba ate tæī piñænte cæcæīmpā, ante do ēñēnānīpā. ⁶ Incæte mānīnō nāni wede pōnēnīnō ante Baa ante wadæ godāni baī tōmēnāni edæ ædō cæte ĩncayæ ate, Idæwaa wænæ wænæ cæte awædō, ante ocaē ēmænte ponguūnānī. Īñæmpā dodāni Wængonguī Wengā ingante awæ timpote wænōnāni baī cædinque ĩnāni wæætē tōmengā ingante adodō wænōnte baī cædānīpā. Ayæ tōmēnāni nāni æmæwo ēwente wæquinque tōmānāni ayōnāni Wængonguī Wengā ingante badete tote baī cædānīpā.

⁷ Edæ cōōnæ wantæ wantæ cæ ate waodāni cōñe ĩnguīpoga tōmēmō quiyadāni wææ pæte incapa. Incate amīmō ba ate nē quiyadināni nanguī tā pete eyepæ ænāni ĩnque Wængonguī wæætē onguīpo tōmenguīpo waa pæ ate adinque, Waa pæguīpo abopa, angampā. Adobaī tōmengā nānō ānō ante wantæ wantæ ĩñō apænedāni ēñēnīnque waodāni gānē pōnēnāni badīnque wadāni ĩnānite waadete cædāni ate Wængonguī mānīnāni ĩnānite, Mīnitō waa ēñēnte cæmīni abopa, ante pōnō

waa cæcampa. ⁸ Ōmentacooque pæguīpo daacamenque pæguīpo guīquēnē nānō æmæwo tante ēwengūnque ōnonguīpoque ĩmpā. Māninguīpo iya tanguī baī waocā adobaī Wængonguī nānō ānō ante nē Baa angā ĩñōmō tōmengā nānō æmæwo ēwengūnque Baa angampā.

Watapæ bacæīmpā, ante pōnēnīnque tæī ongōmompā

⁹ Īñānāni ēñēdāni. Wadāni mānōmaī ĩnānīpā, ante yewæmōmōni incæte mōnitō ayōmōni mīnitō wīl tōmēnāni baī ĩmīni amōnīpā. Wæætē Codito ængā beyænque nē quēwengūmīni ĩnōmīni inte mīnitō cōwē waa cæmīni ĩmīni amōnīpā. ¹⁰ Edæ mīnitō cōwē waa cædinque Wængonguī ingante waadete pōnēnīnque tōmengā quīnāni beyæ godō waa cægāimīni inte ñōwo godōmenque cæmīnīpā, ante adingā inte Wængonguī dicæ mīni cædō ante pōnēnāmaī ĩnguīgāā. Wæætē nē nō cædongā inte tōmengā mīni cædō ante cōwē pōnengampā. ¹¹ Codito beyænque watapæ bacæīmpā, ante mīnitō wede pōnēnīnīpā. Īnque mīnitō mānīnō mīni wede pōnēnō ante ĩnque baganca wede pōnencæte ante cædinque mīni waadete pōnō cægāinō baī adobaī ĩnque baganca cōwē cædāni, amōnīpā. ¹² Edæ nē wede pōnēnāni wæntæye ĩnāmaī ĩnāni ĩñōmō edæ Wængonguī, Pōnōmo ædāni, ante nānō angaincoo cōwē æncædānīpā. Mīnitō ĩñōmō, Tōmēnāni æbānō cædānī, ante adinque tōmēnāni nāni cædō baī adobaī cædinque wæntæye ĩnāmaī inte Wængonguī nānō angaincoo adobaī æncæmīnīmpā, amōnīpā.

¹³ Wængonguī, Botō ānō baī cōwē cæcæboīmpā, ante Abadāō wodi ingante angacāīmpā. Mānōmainō ante nāwangā ĩmpā, ante Abadāō ēñencæcāīmpā, ante cædinque tōmengā, Wacā ēmōwo godōmenque tæī piñængā ēmōwo ante apænebo ēñēnīnque do ēñencæcāīmpā, ante cæyongante wacā nē tæī piñængā guīquēnē edæ dæ angacāīmpā. Īnque Wængonguī ĩñōmō nānā ēmōwo ante apænedīnque, Wængonguīmo nē Quēwēmo inte nōingā ante āmo ēñē, ānīnque ĩmaī angacāīmpā. ¹⁴ “Botō bitō ĩmite pōnō waa cæbo ate bitō pæīnāni nanguī yebānīnque bacoo bacædānīmpā. Botō Wængonguīmo nē Quēwēmo inte āmopa.” ¹⁵ Ante do angā ēñengaīgā inte Abadāō wodi wantæpiyæ ænāmaī inte wānō cōñongante Wængonguī tōmengā nānō angāinō baī pōnō cæcā ængacāīmpā.

¹⁶ Waodāni guīquēnē, Nāwangā āmopa, ante ēñencædānīmpā, ante cædinque wacā ēmōwo godōmenque tæī piñængā ēmōwo apænedīnque ānānīpā. Mānōmaī cædinque waocā, Botō godōmenque nē tæī piñængā tōnō guæa cæte baī ānīmo inte ædō cæte

babæ ante wadō cæquimoo, ante bai apæneyongante wacā Ao angā ate tōmēna nāna guēa cæcaya badapa.

¹⁷ Wængonguī iñōmō, Botō wadō bai ānāmai iñōmo inte māniī botō angaiñō bai cōwē cæcæboimpa, angacāimpa. Ayæ, Mānōmai impa, ante botō angaincoo nē ænguīnāni ædæmō ēñencædānimpa, ante cædinque Wængonguī nāmā ēmōwo apænedinque, Botō Wængonguīmo nē Quēwēnōmo inte nāwangā āmopa, angacāimpa. ¹⁸ Tōmengā, Botō pōnō cæbo beyænque watapæ bacæimpa, ante nānō angaiñō ante æncæte ante mōnō Wængonguī gāmænō do wodii winonte pōmōimpa. Inique tōmengā weca do pōnimō iñōmonte tōmengā wæætē, Mēnea beyæ mōnō watapæ bacæimpa, angampa. Ayæ, Mīnitō wampo pōnēninque edæ botō tōnō edæ godōmenque cæcæmīnimpa, ante tōmengā ædæmō apænecampa. Mēnea ante apænebo ēñēedāni. Botō Wængonguīmo iñōmo inte nāmā Wængonguī ēmōwo apænebo beyæ nē ēñēmīni inte mīnitō mānīne beyæ pōnencæmīnimpa. Ayæ godōmenque wade ante, Wængonguī incæ ædō cæte babæ wapiticæ anguingāā, ante pōnencæmīnimpa. Mānōmai Wængonguī mēnea ante cæggacāimpa.

¹⁹ Inique wipo gæguincamē inte tæiī ñānoncadodāni ate wāi wocæ bai mōnō iñōmō edæ, Mānīne mēnea beyæ watapæ bacæimpa, ante mōnō wede pōnēnō beyæ tæiī ongōmō inte mōnō ædō cæte wadæ goquū. Mōnō wede pōnēnō beyænque edæ Wængonguī oncōnē weocoo wææ owoyōmo tadōmengadæncōnē guīi oōnædē ñā cæte bai i inique mōnō ōnōwoca iñōmō edæ tæiī ongonte bai ēwocamōmpa. ²⁰ Itota iñōmō tāno beyænte oōnædē æidinque mōnō beyæ ante mānincōnē do wāānē guīgacāimpa. Inique Mēequitedeco nē godongā ñænængā nānō ingai bai badinque Itota, Wængonguī quī, ante nāmā wepæ nē Godongā Ñænængā pōni inongā inte edæ cōwē ongongampa.

7

Mēequitedeco bai Itota nē Godongā Ñænængā ingampa

¹ Mēequitedeco guiquēnē Tadēē nāni āñōmō quēwēnāni awēnē odeye inongā inte tōmengā, Wængonguī Æibæ pōni nē Quēwēngā quī, ante nē godongā ingacāimpa. Iñongante Abadāō wodi wadāni awēnē odeyēidi inānite wænonte pōñongante Mēequitedeco eyepæ pō bee tēninque, Abadāō ēñēmi, angantapa. Bitō imite Wængonguī pōnō waa cæcæcāimpa. ² Ante pōnō waa apæneyongante Abadāō iñōmō awēnēidi wodi nāni mangaincoo tōmengā nānō ō ænincoo bacoo pōni incoo adinque

ōnōmpo tipæmpoga mānimpcato cabo tū gæte cō cædinque, Wængonguī quī, āninque Mēequitedeco ingante adocatoque pædæ godongā ængacāimpa.

Mēequitedeco nē awēnē odeye iñongante tōmengā ēmōwo pemonte bai cædinque wadāni, “Awēnē inongā inte tōmengā nē nō cæcā ingampa,” ante angadānimpa. Ayæ, Tadēē “Gānē pōnēñōmō” nāni angaiñōmō quēwēnāni awēnē odeye ingampa, ante pōnēninque tōmēnāni, “Awēnē odeye inongā inte tōmengā nē gānē pōnēngā ingampa,” ante wawo pemongadānimpa. ³ Tōmengā badā ōmaacā ingā bai, tōmengā wæmpocā ōmaacā ingā bai, tōmengā nānō ēñagailōnæ ōmaacā ingā bai, tōmengā nānō wængailōnæ ōmaacā ingā bai ante dodāni tōmengā ingantedō ante yewæmōngadānimpa. Mānōmai i inique mōnō, Wængonguī Wengā nānō cōwē ingai bai Mēequitedeco adobai, Wængonguī quī, ante nē cōwē godongā ingampa, ante pōngæmōimpa.

⁴ Tōmengā ñænængā pōni ingacāimpa, ante botō iūmai ante apænebo pōnēedāni. Wængonguī quī, ante nē godongā ñænængā pōni Mēequitedeco ingampa, ante pōnēninque mōnō wæmæ Abadāō wodi incæ tōmengā nānō ō ænincoo ōnōmpo tipæmpoga mānimpcato ongō adinque adocatoque æninque Mēequitedeco ñænængā ingante pædæ godongā ængacāimpa. ⁵ Mōnō Abadāō wodi pæimō iñōmō tōmancabomō inōmō incæte adocabodāniya mōnō tōniñadāni Debīdi pancadāniya guiquēnē, Wængonguī quī, ante nē godōnāni bagadānimpa. Bayōnānite Mōitee wodi tōmēnāni inānite iūmai angacāimpa. Mīnitō tōniñadāni inānite āmīni ēñēninque tōmēnāni wæætē tōmēnāni nāni ænincoo ōnōmpo tipæmpoga mānimpcato ongō adinque adocatoque pædæ pōnōnāni æncæmīnimpa, ante wææ angā ēñēninque tōmēnānique, Wængonguī quī bacæimpa, ante nē ænāni inānipa. ⁶ Mēequitedeco guiquēnē Debīi wodi pæingā ināmai ingaingā incæte adocatoque angā ēñēninque Abadāō wodi pædæ godongā ængacāimpa. Do iñōmō Wængonguī incæ Abadāō ingante apænedinque, Bitō quī, ante botō cōwē pōnōmo æncæbiimpa, angacāimpa. Incæte wantæpiyæ ate Wængonguī nānō nē angaingā iñongante Abadāō ingante apænedinque Mēequitedeco iñōmō, Wængonguī bitō imite pōnō waa cæcæcāimpa, ante pōnō waa apænegacāimpa.

⁷ Mōnō ayōmō guiquēnē, Ñænænāni inōnāni iñōmō tōmēnānique ōnōnānique inānite nē godō waa apænedāni inānipa, ante do ēñēniimo inte mōnō wadō ante ædō cæte pōnenguī. Inique, Abadāō wodi ōnonganque iñongante Mēequitedeco nē ñænængā ingā inte edæ mānōmai

waa apænégacäimpa, ante mönö edonque ëñëmompä. ⁸Mäninäni Debiidi guiquënë nê ñömæintai ëñadäni inänipa. Incæte tömënnäni inänite wadäni, Wængongui qui bacæimpa, ante adocatoque cöwë pönönäni ænänipa. Ìngä Mëequitedeco guiquënë ñömæintai ëñadämai bai ingaingä inte nê quëwengä ingampa, ante yewæmongatimpa. Tömengä mänömai nê quëwengä bai ìñongante Abadäo wodi tömengä ingante, Wængongui qui, ante adocatoque godongä ængacäimpa.

⁹Mänömai impa, ante pönëninque botö, Ëñencæminimpa, ante ñöwo godömenque yewæmömo aedäni. Tömënnäni nänäni æñinö ömopo tipæmpoga ganca mänimpocato ongö adinque, Wængongui qui, ante adocatoque pædæ godöñönäni Debii nänäni pæincabo incæ nê ænänäni inönänimpa. Incæte Debii wodi wæmpocoo ingaingä ìngongä inte Abadäo wodi adocatoque do godongä ìninqwe tömengä pæingä inguingä Debii ìñömö wæmpocoo tönö ãanque bai adocatoque do godonte bai ayæ ate ëñate quëwengacäimpa. ¹⁰Edæ Abadäo wodi nänö pæinänäni Debiidi inänipa. Ìninqwe Debii ayæ ëñadämai ìñongante tömengä wæmpocoo Abadäo wodi ingante Mëequitedeco pö bee tente adocatoque æninque Debii nänö ænguënnecoo incæ pancacooga adobai ængacäimpa.

¹¹Wængongui doyedë angä ëñëninque Debiidi pancadäniya, Wængongui qui, ante nê godönäni bagadänimpa. Ayæ Wængongui, Ìimai cæedäni, ante angä ëñente yewæmöninque Debiidi wæætë wadäni inänite odömonte apænëdäni ëñengadänimpa. Incæte Debiidi, Wængongui qui, ante nänäni godönö beyænque mönö Wængongui ayongä mönö ædæmö pædäni bai edæ dicæ entwawente bamongæ. Ìñæmpa mäninäni nänäni godönö beyænque nê picænänäni bai bamö bai ñöwo wacä nê Godongä ingante Wængongui da pönönämai incædongäimpa. Ayæ, Wængongui qui, ante nê Pönongä incæcäimpa, ante Codito ingante da pönöninque Wængongui, Debii wodi pæingä Aadö nänö pönongai bai Codito adobai pönoncæcäimpa, ante änämai inte wæætë, Mëequitedeco nänö pönongai bai cædinque Codito pönongä beyænque waodäni botö ayömö nê nö cædäni bacædänimpa, angacäimpa. ¹²Ayæ, Wængongui qui, ante nänäni godoncabo ìñönänite Wængongui, Idæwaa cæminipa, äninque wacä ingante, Bitö wæætë botö ìmote nê Pönömi bacæbiimpa, angacäimpa. Ayæ wacä mänömai nê Godongä bacä beyæ Wængongui, Ìimai cæedäni, ante nänö wææ angainö ante wëä godonte bai cædinque wadë äninque wææ angä ingacäimpa.

¹³Ìninqwe Wængongui ñöwo, Nê Pönömi

bacæbiimpa, ante nänö nê angaingä ìñömö Debiidi nänäni cabo inämai inte wæætë wacabocä ìngongä ingampa. Incæte ñöwocä Codito guidënnäni ìñömö, Wængongui qui, ante nänäni iya täimpaa cöwë godönämai inönänimpa. ¹⁴Edæ, Wængongui qui, ante oodaaidi nänäni cabo nê godönäni incædänimpa, ante Möitee wodi dicæ angacäiñaa. Incæte, Mönö Awënë ìñömö Oodaa wodi pæingä ingacäimpa, ante edonque acæimpa. ¹⁵Ìninqwe Mëequitedeco nänö ingai bai wacä wæætë, Wængongui qui, ante nê Godongä bacä adimö inte mönö godömenque edonque ëñengæimpa. ¹⁶Edæ Ñöwocä tömengä mæmæidi wii nê godönäni ingadänimpa. Ìninqwe, Bitö mæmæidi nänäni godongai bai bitö adobai godonte ëñëe, ante ædö cæte anguii. Wii tömengä mæmæidi nänäni cægai bai cædinque tömengä nê Godongä bagacäimpa. Wæætë cöwë nê wænämai Quëwenguingä inte tömengä nämä nänö tæi piñænö beyænque nê Godongä bagacäimpa. ¹⁷Edæ tömengä ingante apænëdäni Wængongui, “Mëequitedeco, Wængongui qui, ante nê pönongä cöwë nänö ingai bai, bitö adobai ñimpo cædämai inte nê Pönömi cöwë incæbiimpa,” ante apænégacäimpa.

¹⁸Ìninqwe, Ìimai cæedäni, ante Möitee wodi wëenëñedë nänö wææ angaine incæ aquiline inte önöneque bai ìñonte wëä godonte bai bagatimpa. ¹⁹Edæ Möitee wodi, Ìimai cæedäni, ante nänö wææ angainö ëñente beyænque mönö Wængongui ayongä ædæmö pædäni bai dicæ entwawente baquimö. Wængongui wæætë, Codito pönö cæcä beyænque watapæ quëwencæminiipa, ante ñöwo pönö apænégacäimpa. Ìninqwe, Mänömai impa, ante pönëninque mönö Wængongui weca pömpa.

²⁰Wængongui wii önöneque angacäimpa. Wæætë tömengä nämä ëmöwo apænëdäni, Botö Wængongui mö nê Quëwënömo inte näwangä ämopa, äninque Codito ingante angä ate tömengä wæætë, Wængongui qui, ante nê Godongä bagacäimpa. Wæætë wadäni inänite guiquënë tömengä wii nämä ëmöwo apænëdäni, Näwangä ämopa, ante änämai ingä incæte tömënnäni önöneque, Wængongui qui, ante nê godönäni bagadänimpa. ²¹Codito ingante guiquënë Wængongui Ìimai ante apænégacäimpa.

“Bitö ñimpo cædämai inte, Wængongui qui, ante nê Pönömi cöwë incæbiimpa.

Ante botö nê Tæiyæ Awënë inömo inte nöingä äninque

ïincayæ ate wadö ante cöwë änämai incæboimpa.”

22 Wængongui, Itota botō imote nē Pōnongā inongā inte mīnitō beyæ cæcā ate mīnitō Ao āmīni ininque mōnō godongāmæ waa cæcæimpa, āninque Wængongui mōnō imonte nōwo godōmenque waa pōni apænecacāimpa. Ininque Wængongui māmōmai nāmā emōwo apænedinque, Nāwangā āmopa, āninque Itota nānō nē angāingā iñongante mōnō Itota ingante pōnēninque, Wængongui nānō angainō bai cōwē cæcæcāimpa, ante do ēñēmompā.

23 Mānīnāni guiquēnē nē nōmæintai ēñagāināni inte ædō cæte nīmpo cædāmai inte Wængongui ingante nē godōnāni cōwē inguināni. Ininque wīi adocanque nē godongā ingacāimpa. Wacā wacā nē godōnāni bagadānimpā. 24 Itota iñōmō nē wænāmai quēwēnongā inte tōmengā, Wængongui qui, ante nē Godongā inongā inte cōwē quēwengampā. 25 Edæ tōmengā nē wænāmai Quēwēnongā inte Wængongui ingante mōnō beyæ ante cōwē apænedinque, Botō bitō gāmæñnō nē māmōmo pōnāni inānite bitō pōnō waa cæcæbiimpā, ante nīmpo cædāmai inte cōwē apænecampā. Wængongui ingante cōwē apænecā inongā inte tōmengā cōwē quēwēninque ædæmō pōnō ængā beyænque mōnō wæætē cōwē wænāmai quēwēngūimō inompā.

26 Wadāni nāni ēñēnāmai cæcabo bai wīi inongā inte Itota iñōmō tæiyæ waemō inongā ingampā. Wentamō mongænāmai inongā iñongante tōmengā ingante ædō cæte piinte apænte anguināni. Mānōmai ingā adinque Wængongui tōmengā ingante oōnædē æmonga pōni ængō cæcā on-gongampā. Ininque tōmengā adocanque pōni, Wængongui qui, ante nē nō Godongā Nænængā pōni inongā inte mōnō wædō ante eyepæ pōni pōnō cæcampā. 27 Wadāni nē godōnāni nænænāni pōni ināni guiquēnē tōmēnāni tāno godōninque nāmā nāni wēnæ wēnæ cædō beyæ ante, Wængongui botō imote waa acæcāimpa, ante cæningā wepæ iimō iñō iimō iñō godōnānimpā. Ayæ ate wadāni nāni wēnæ wēnæ cædō beyæ adobai godōnānimpā. Itota guiquēnē wēnæ wēnæ nāni cædō bai cædāmai inongā inte nāmā beyænque godōnāmai ingacāimpa. Ayæ wamō mōnō wēnæ wēnæ cædō beyæ wæætē wæætē godōnāmai inte tōmengā eyepæ inongā inte adoque pōni godongacāimpa. Ininque tōmengā nāmā wepæ godōninque eyepæ pōni godongā adinque Wængongui wæætē mōnō imote waa acampā.

28 Mōitee wodi nānō wææ angainō ante ēñente cædinque woadāni aquīi ināni nāni cabo iñōnānite pancadāniya inānite ānāni Wængongui ingante nē godōnāni nænænāni do badānimpā. Wængongui guiquēnē iincayæ

ate nāmā emōwo apænedinque, Botō Wengā ædæmō Picængā nē ēñengā bagaingā ingante āmo ate tōmengā nē Pōnongā Nænængā bacæcāimpa. Botō Wængonguimo nē Quēwēnōmo inte nāwangā āmopa, angacāimpa.

8

Wængongui nōwo nānō angainō ante Itota inque cæcā

1 Māmōmainō ante quīnante yewæmōmōnii, Edæ, Mōnō wædō beyæ ante, Wængongui qui, ante nē Godongā Nænængā pōni inte ongongampā, ante, Nāwangā impā, ante edonque ēñencæminimpā, ante yewæmōmōnimpā. Tōmengā iñōmō oōnædē æidinque Awēnē Wængongui tōmēmængā inō tæ contadinque Tæiyæ Awēnē inte ongongampā, ante yewæmōmōni adinque ēñencæminimpā. 2 Māmōmai inongā inte tōmengā wīi waocā nānō mænongaincōnē cæcampā. Wæætē Wængongui, Owocæboimpā, ante tæiyæ waemō nānō mænongaincōnē Itota iñōmō mōnō beyæ ante, Wængongui qui, ante nē Godongā Nænængā pōni inte cæcampā.

3 Inguipoga quēwēnāni guiquēnē adocanque ingante, Wængongui qui, ante bitō nē godōmi nænæmi pōni bacæbiimpā, ānāni badinque tōmengā nē tā nē tā cædinque māincoo cōwē godonguēnengā ingampā. Ininque māningā Itota guiquēnē adobai nē Godongā Nænængā pōni inongā inte adobai godonguēnengā ingampā. 4 Edæ, iincocque godoncæminimpā, ante Mōitee wodi wææ angā ēñente cædinque inguipoga nē godōnāni guiquēnē do eyepæ pōni godōnāni inānimpā. Ininque tōmēnāni nāni godō bai Itota iñōmō ædō cæte godonguēnengā inguingā. Inguipogaque quēwengā inte bai tōmengā iñōmō edæ Wængongui ingante nē godongā ināmai incedongāimpā.

5 Tōmēnāni guiquēnē, Wængongui oōnædē nānō owocō cōwē ongō bai inguipoga adobai mænonte mānincō owocodenganque bai iñonte acæcāimpā, ante adobai pōni mænongadānimpā. Māmōmai mænōninque tōmēnāni mānincōnenque, Wængongui qui, ante nē godōnāni inte cædānimpā. Ininque Wængongui, Adobai pōni mænōincō ongongæimpā, ante cædinque Mōitee wodi nē mænonguingā ingante doyedē angacāimpā. “Mōitee ēñēmi. Bitō, Æbānō mænonguīi, ante, Æbānō badonguīi, ante botō onquiyabo iñōmō bee tente odōmōmo adinque badoncæbiimpā. Bitō cōwā adinque botō odōmōnō bai iincō adobai mænōninque iincōnē ongoncoo tōmancoo adobai pōni badoncæbiimpā,” angacāimpā. 6 Wængongui, Botō Mōitee tōnō wææ āninque, iimāi

cæedāni, āmo ate Ao āmīni īninque mōnō godongāmæ waa cæte quēwengæimpa, ante wēēnēñedē nānō angaiñō wædænque waa ingatimpa. Nōwo guiquēnē tōmengā, Itota ængā beyænque quēwēmīni inte Ao āmīni īninque mīnitō botō tōnō godongāmæ waa cæte quēwengæmīnīmpa, ante nānō ānō īñōmō godōmenque waa pōnī impa. Edæ Wængonguī nānō ānō īnque bacæimpa, ante Itota incæ nō cægacāimpa. Ayæ adobai māninō nē godōnāni nāni cædō guiquēnē wædænque waa īñonte Itota nānō nō cædō guiquēnē godōmenque waa pōnī impa.

⁷ Mānīne edæ, Mōnō godongāmæ waa cæte quēwengæimpa, ante Wængonguī wēēnēñedē nānō angaiñe īñōmō mōnō quēwenguīnō ante eyepæ i bai Wængonguī ñōwo wade ante ānāmai incædongāimpa.

⁸ Incæte waodāni wentamō mongæñāni adinque Wængonguī doyedē apænedinque, “Botō pōnō cæbo ate mīnitō Ao āmīni īninque mōnō godongāmæ waa cæte quēwengæimpa,

Ante botō nē Awēnē īñōmo inte idægoidi īnānite oodaaidi īnānite īncayæ ate mūine ante mā pōnī apænenæcæboimpa.

⁹ Mæmæidi doyedē Equitobæ quēwēñōñānite botō tōō æmænte ænte poncæte ante cædinque,

tōmēnāni īnānite, Mōnō godongāmæ waa cæcæimpa, āñōmote tōmēnāni wæætē pango cæte gogadānīmpa.

Pango cæte godāni ate botō wæætē dadi ēmæmonte tōmēnāni īnānite adāmai ingaboimpa.

Mānōmai beyæ botō wēēnēñedē botō angaiñō bai

ñōwo wæætē adobainō ante ānāmai incæboimpa, ante botō nē Awēnēmo īñōmo inte āmopa.

¹⁰ Māniñedē ate edæ idægoidi īnānite botō, īlīmai pōnō cæbo ate mīnitō Ao āmīni īninque mōnō godongāmæ waa cæte quēwengæimpa, āninque edæ īlīmai cæcæboimpa.

īlīmai cæedāni, ante botō wææ ānō ante godō apænebo ēñēñinque

mānīne ante mīmōnē yewæmonte bai entawēninque

tōmēnāni nē wede pōnēnāni incædānīmpa.

Tōmēmo tōmēnāni Wængonguīmo īñōmote tōmēnāni wæætē botō quīnāni incædānīmpa.

¹¹ Māniñedē botō angaiñedē ba ate edæ waocā tōmengā guīdengā ingante ayæ wacā ingante odōmonte apænedinque, Bitō Wængonguī ingante ate bai pōnenæcæbiimpā, ante quīnante anguīngā.

īñæmpa māniñedē ate guīyanga pōnī īnongā incæ ñæñængā pōnī īnongā incæ

tōmēnāni tōmēnāni botō īmote do adinque pōnenædānīmpa.

¹² Edæ tōmēnāni ēñēñāmai nāni cædō ante botō pānāmai inte waadete godō ñīmpo cæcæboimpa.

Ayæ tōmēnāni wēnæ wēnæ nāni cægaiñō ante adāmai inte bai botō pōnēñāmai incæboimpa,” ante Wængonguī apænegacāimpa.

¹³ Āninque ñōwo, Āmo beyænque quēwēmīni inte mīnitō Ao āmīni īninque mōnō godongāmæ waa cæte quēwengæimpa, ante mā pōnī āninque Wængonguī wēēnēñedē, īlīmai cæedāni, ante nānō wææ angaiñe ante, Woīne inte eyepæ īñāmai ingaiñe ēnepa, ante bai cæcampa. Woīne īñōmō oo dæ baquīne ēnepa.

9

Wængonguī Tæiyæ Waēmō oncō bai cæmontaicō impa

¹ Wængonguī wēēnēñedē dodāni īnānite, Botō pōnō cæbo ate mīnitō Ao āmīni īninque mōnō godongāmæ waa cæte quēwengæimpa, angacāimpa. Īninque tōmengā nānō wææ angaiñō bai cædinque tōmēnāni, Wængonguī ingampa, ante tōmengā beyæ cæquēnēñāni ingadānīmpa.

Ayæ inguipoga tōmengā owoquincō tæiyæ waēmō oncō mænōninque tōmengā weca pōninque cæquēnēñāni ingadānīmpa.

² Angā ēñēninque dodāni, Wængonguī nānō owoquincō, ante cæmontaicō badōninque weocoo odemontai wodōnedinque mencōnea badongadānīmpa. Yabæcōnē, Tæiyæ Waēmō Oncō impa, ante nāni ancōnē īñōmō māniñōmō gongapæncade doyæncade tæiyæ ti wodōnoquī encadocade ongongatimpa. Ayæ awæmpaa badōninque tōmēnāni, Wængonguī beyæ tæiyæ waēmō pāō ōñongæimpa, ante cædinque mānīmpaa pāō ñō cædāni ōñongatimpa.

³ Weocoo wacoo nāni guīmongademō wodōiñōmō guīmongacō īñōmō Tæiyæ Waēmōncō Pōnī nāni angaiñō ingatimpa.

⁴ Mānincōnē oguī wacæimpa, ante cædinque, Oguī waquī iya tangæimpa, ante awæmpa oodo nāni pōnō tee bæimpa badonte cō cædāni ongongatimpa. Ayæ, Mōnō godongāmæ waa cæcæimpa, ante wææ āninque Wængonguī nānō yewæmongainca Tæiyæ Waēmōncōnē Pōnī ongongæimpa, ante cædinque awæmpa badōninque oodo yabæpa tee baadinque cæncadempa adobai tee baate nāni cōnōmpa ongongatimpa. Ayæ oodo æninque aca podonte wamoncade bai bædinque tōmēnāni ōñōmæca nāni cængaiñō Mānāā nāni angaiñō æninque oodo nāni bædincadedē da wēninque mānincade wæætē oodo ēmōmpaa cæncadē īnō da wente cō cæte mangadānīmpa. Ayæ

adobai Aadöo wodi nanö ongonto tä boca-
gainto æninque ado oodo emompaa cæncadê
inö da wente ñö cædäni öñongatimpa.
Ayæ Wængongui dicaboga nanö, Ìimai
cædäni, ante yewæmongaine adoyömö
ongongæimpa, ante cædinque mäninca
æninque ado oodo emompaa cæncadê inö da
wëninque cö cædäni ongongatimpa.

⁵ Mänimpaa yædopaa waomini müni wënæ
wënæ cædö beyæ wepæ godonte impa,
ante Wængongui, Botö pönö waadeimpa
impaa, angacäimpa. Ayæ Wængongui
nê ñäö emongä weca nê owoda inöömö
adobai ñäö bai emöna inönate tömëna nana
emönö bai dodäni adobai badonte oodo
emompaa æmatæ æmatæ tæi goncædäni
ongongatimpa. Ayæ tömëna öömä tiyæmäa
pömæna gänê inöömö Wængongui, Botö
pönö waadeimpa, ante nanö angaiimpa
öñongatimpa. Mänimpacoo æbänö impaa,
ante mäninque ñöwo yewæmömönipa.

⁶ Tömancoo mänömai cöo cædäni
ongöñonte, Wængongui qui, ante nê
godönäni que iimö inö iimö inö yabæcönê
pö guidindue, Wængongui ingampa, ante
cægadänimpa. ⁷ Guimongacönê guiquênê
nê godongä ñænængä inöömö wadepo inö
adopoque wadepo inö adopoque pö guid-
indue tömengä adocanque guidongäimpa.
Incæte tömengä nê godongä ñænængä pöni
inongä incæ wepæ næænämäi inte ædö cæte
guiquingä. Edæ wepæ cöwê ænte guid-
indue tömengä nämä beyæ godö pipo pipo
cædinque, Wadäni ëñënamäi inte nani wënæ
wënæ cægainö incæ ñä mënongacæimpa,
ante tömënanäi beyæ adobai godö pipo
pipo cædongäimpa. ⁸ Mänincö æmontaicö
ayæ ongöñedê Tæiyæ Waëmoncönê Pöni
wii önonque guigadänimpa. Wængongui
nanö owodö æidö mänincedê adobai wii
edonque ingatimpa, ante odömoncæte ante
Wængongui Tæiyæ Waëmö Önöwoca angä
guidämäi ingadänimpa.

⁹ Mänömainö ante odömöninque tömengä
mönö ñöwomö imonte wæætê, Ìimai ante
ëñencæminimpa, ante cægacäimpa. Waocä,
Wentamö mongænte awædö, ante nê
wædongä inte waëmö inöömö pöninque,
Wængongui qui, ante baö iya tangui tönö
bequi cængui godongampa. Mänömai ancaa
godongä incæte tömengä mímö nämä nanö
apænte entawënö ñä mënongadämäi inte
wentamö ayæ mongænte entawënongäimpa.
¹⁰ Mänömai cænguinque bequinque ante
wææ äninque, Æbänö cæte godongui, ante
ayæ, Apænenque æbänö cæte mënongaquii,
ante dodäni mänincooque ante nani wææ
angainö ante ëñente cægadänimpa. Ìininque,
Waguipo iinque bayonte önöwoca ædæmö
mënongate quëwengæimpa, ante münguipo

iinque bagancaque tömënanäi mänincooque
ante cædönänimpa.

¹¹ Wapämo müni waa quëwenguinque
pömämo, ante badoncæte ante mönö
Codito inöömö, Wængongui qui, ante nê
Godongä ñænængä pöni inongä inte do
pongacäimpa. Pöninque tömengä waodäni
önompoca nani mænongaincönê guidämäi
inte Wængongui nanö badongainguipoga
cædämäi ingacäimpa. Wæætê adodö go
æidindue tömengä öönædê Wængongui nanö
owocönê ñænæncönê guidindue näwä
owocönê cægacäimpa. ¹² Caboda wepæ
næænte guidämäi inte wagada wê wepæ
næænte guidämäi inte mönö Codito inöömö
edæ nämä wepæ godöninque öönædê Tæiyæ
Waëmoncönê Pöni æmæwo guigacäimpa.
Ìininque tömengä ængä beyænque mönö
æmæwo pöni abæ tawænte bai cöwê
quëwëmompaa.

¹³ Nömæi incæ gampodindue, do
wæningä baö incæ gampodindue waocä
näate bai wædongä inte edæ Wængongui
weca ædö cæte ponguingä. Wæætê,
Tömengä waiñacä bate poncæcäimpa,
ante cædinque, Wængongui qui, ante nê
godönäni inöömö caboda wepæ tönö wagada
onguiñængä wepæ æninque nê näadingä
baonga pipo pipo cædänipa. Ayæ wagada
baquécä ingante wænonte nê täninque
gönaique adobai æninque tömengä baonga
pipo pipo cædinque, Bitö nê näadimi inte
waiñabi babipa, ante cægadänimpa.

¹⁴ Mönö Codito guiquênê Tæiyæ Waëmö
inongä inte nê cöwê Quëwengä Önöwoca
tönö guëa cædinque Wængongui ingante,
Bitö quimo imopa, ante nämä wepæ
godongacäimpa. Tömengä wepæ inöömö
wii cæningä wepæ bai inte godömenque
eyepæ pöni wepæ imæmpaa. Ìininque
mönö wænguinque wënæ wënæ cæyömönte
tömengä, Minitö mímö entawëmini inte ñä
mënongate entawente nämä apænte pönente
quëwæcæminimpa, ante nämä wepæ do
godongacäimpa. Ayæ mönö wënæ wënæ
cægainö ante wadæ cædinque godömenque
pönö cæcä ate mönö Wængongui nê
Quëwengä ingante nê cæmö badinque
cæmompaa.

¹⁵ Wængongui müne ante apænedindue,
Mönö godongämæ waa cæte quëwengæimpa,
äñongante mönö waocabo wæætê ëñënamäi
inte wënæ wënæ cæmö adinque Codito
inöömö mönö wënæ wënæ cægainö beyæ
ante wæætê wængä beyænque mönö abæ
tawænte bai quëwëmompaa. Nöwo inöömö
Wængongui müne ante apænedindue,
Botö pönö cæbo ate minitö Ao ämini
ininque müni ænguincoo æmæwo æninque
minitö cöwê mante quëwencæminimpa, ante
aa pecä pongamönimpa. Ìininque mönö

Codito wæætē, Wængongui nānō angaincoo æncæminimpa, ante cædinque iinque cæcā ate mōnō nē pōnimō inte do ænte quēwēmompā.

¹⁶ Waocā, Nāñe wæmo adinque botō māincoo ini iinānique æncædānimpā, ante emōwo emōwo yewæmōngā adinque wadāni wæætē, Nāwangā æmæwo wængāimpā, ante ēñente ate, Nē wængaingā nānō ante yewæmongainō bai bacæimpā, ante iinque cædānimpā. ¹⁷ Iñæmpā, Iñāni quī bacæimpā, ante yewæmongā incæte nē yewæmōningā mīngā quēwēñongante tōmengā māincoo ædō cæte tōmēnāni quī baquī. Wæætē tōmengā æmæwo wængā ate māñifedē ate tōmengā nānō yewæmongā bai iinque cædānimpā.

¹⁸ Mānōmai beyæ wēēñēñedē Wængongui, Mōnō godongāmæ waa cæcæimpā, ante yewæmongā ate dodāni cæningā wænonte ate wepæ gowete ate godongāmæ Ao āninqe iinque cægadānimpā. ¹⁹ Wængongui, Iīmai cædāni, nānō wææ angainō tōmanta adinque Mōitee wodi iñōmō tōmānāni inānite apæñecā ēñēñāni ate wepæ gowete ate cægacāimpā. Wagada wēñāni wepæ tōnō caboda wepæ æninqe æpæ tōnō ænte wempo cædēninqe iitopowæ nāni āwæ yæpængō æninqe obeга ocagui opatawæmæ nāni guipæningui ænte pæ dadinque wepæ nāni wempo cædēnimæñē bee podonte Mōitee iñōmō, Māninta adinque ēñēngæimpā, ante cædinque mānintaa wepæ pipo pipo cægacāimpā. Ayæ nē ēñēñāni tōmānāni baonga wepæ pipo pipo cædinque tōmengā iīmai angacāimpā. ²⁰ “Wængongui, Botō pōnō āmo ēñēñinqe mīnitō Ao ante ēñente cæmīni iinque mōnō godongāmæ waa cæcæimpā, ante nānō wææ angainō beyænque iī wepæ impā. Iinque iī wepæ emontaa adinque mōnō Ao ante māñine ante ēñente cæcæimpā,” ante Mōitee wodi apænegacāimpā. ²¹ Ayæ æmontaiconga wepæ pipo pipo cædinque tōmengā mānincōñē Wængongui beyæ nāni cæincooga wepæ pipo pipo cægacāimpā. ²² Ayæ wodo tōmancooga ante Wængongui, Wepæ tōnō ñā mēnongacæimpā, āninqe wææ angā cægadānimpā.

Iñæmpā wepæ gowedāmāi iñonte mōnō wēñæ wēñæ cæmō adinque Wængongui nē panguēñengā inte ædō cæte pōnō ata cæpoqingāā.

Codito wepæ beyænque mōnō mīmō mēnongacæimpā

²³ Öönædē ongoncoo bai ingui-poga nāni adobaī badongaincoo incæ cæningā wænonte ate wepæ tōnō ñā mēnongaquēñēñāni ingadānimpā. Wæætē nāwā öönædē Wængongui weca gote mōnō ongonquinque mōnō adocanque nē waēmō pōni inongā wepæ beyænque ñā mēnongaquēñēmō imopā. ²⁴ Edæ

öönædē Wængongui nānō owocōñē bai ante waodāni önompoca nāni tæiyæ waēmō pōni badongaincōñē mōnō Codito guidāmāi ingacāimpā. Wæætē öönædē incæ ædinque tōmengā mōnō beyæ ante Wængongui weca guidinque a ongoncampā.

²⁵ Wængongui quī, ante ingui-poga nē godongā ñæñængā pōni inongā guiquēñē wīi nāmā wepæ ænte pōninqe cæningā wepæ incæ ænte pōninqe wadepo iñō adopoque wadepo iñō adopoque Tæiyæ Waēmōncōñē Pōni guicampā. Mōnō Codito guiquēñē ingui-poga nē quēwēngā bai wīi adobaī inongā inte wīi wæætē wæætē godoncæte ante öönædē æi guigacāimpā. Wæætē öönædē adopoque æi guidinque tōmengā nāmā wepæ adopoque godongacāimpā. ²⁶ Edæ ingui-poga nē quēwēñāni nāni cæi bai cæcā bai tōmengā Wængongui ingui-poga nānō badōñedē mā caate wædinque wantæ wantæ iñō cædinque ñōwo ganca tæmpo caate wæcædongāimpā. Wæætē mōnō waocabo tōmāmō pedænguipoga mōnō quēwēñō wodo iinque bayonte tōmengā ñōwo pōni adopoque pōni pōninqe wēñæ wēñæ mōnō cædō ante æmæwo wido cæcæte ante nāmā wepæ godongacāimpā.

²⁷ Mōnō waocabo guiquēñē nē wænguimō inōmo inte adopoque wænte ate Wængongui weca pō gongæñōmonte tōmengā apænte ancæcāimpā. ²⁸ Mōnō waocabo nangui imō iñōmonte mōnō Codito iñōmō wēñæ wēñæ mōnō cædō ante mongæninque adopoque nāmā godōninque wængacāimpā. Ayæ wæætē pōninqe tōmengā wīi mōnō wēñæ wēñæ cædō mongæncæte ante poncæcāimpā. Wæætē tōmengā nānō pōnguñō ante nē wānō cōmō iñōmonte tōmengā, Quēwēncæminimpā, ante mōnō imonte æncæte ante poncæcāimpā.

10

¹ Iñcayæ ate nē Pōnguñgā iñōmō, Wængongui quī, ante nāmā wepæ eyepæ godoncæcāimpā, ante odōmoncæte ante cædinque Wængongui, Iīmai cæte cæningā wepæ pōñōedāni, ante do wææ angacāimpā. Incæte māñi wepæ Wængongui nānō wææ angaimæ iñōmō wīi eyepæ godongui ængui impā. Iinque māñimæ tōmengā nānō wææ angaimæ beyænque waocā ædō cæte ædæmō ēñente picængā bai baquingāā. Iñæmpā idægoidi iñōmō wadepo iñō wadepo iñō wepæ anca godōninque Wængongui weca pō ædæ wææninqe, Bitō Tæiyæ Waēmō imidō angūñē, ante apæñecæte ante pōñāni incæte tōmēñāni tōmengā nānō wææ angainō beyænque picæñāni bai dicæ badāniyaa. ² Tōmengā nānō wææ angainō eyepæ i bai tōmēñāni adopoque godōninque idæwaa godoncædōñānimpā.

Edæ, Wængongui ingampa, ante nē cædāni iñōmō māninqe godōninque ædæmō ñā mēnongate bacædōnānimpā. Ayæ iincayæ ate tōmēnāni, Wentamō entawente wængui wæ, ante nāmā apænte wædāmāi incædōnānimpā.

³ Edæ wii mānōmāi impā. Wæætē, Botō wēnæ wēnæ cæte awædō, ante wæætē wæætē nāni pōnente wæquinque tōmēnāni wadepo iñō godōnōnānimpā.

⁴ Edæ, Mōni wēnæ wēnæ cægāinō ante mēnongacæimpā, ante godōñōnāni wagada onguinæ wepæ tōnō caboda wepæ eyepæ iñæmpa diyæ mēnongaquii.

⁵ Cæningā wepæ wii eyepæ impā, ante wædinque Codito inguipoga pōninque iimāi ante apænegacæimpā.

“Wængongui ēñēmi. Cæningā baō nāni wæñonte pōnōnō tōnō cængui bequii nāni, Wængongui quii, ante pōnōnō adinque bitō edæ wii æinēmi ingabiimpā.

Wæætē botō Waobo baquinque bitō botō baō ante badongabiimpā.

⁶ Waodāni, Wængongui quii, ante iya tāmōni ate Wængongui waa acæcæimpā, ante tāñōnāni bitō wii tobi ingabiimpā. Tōmēnāni, Wēnæ wēnæ mōni cædō ante Wængongui pōnō wido cæcæcæimpā, ante pōnōñōnānite bitō Baa angabiimpā.

⁷ Ante adinque botō, ‘Wængongui ēñēmi. Dodāni botō imotedō ante yewæmōninque, Tōmēngā inguipoga pōninque iimāi cæcæcæimpā,

ante nāni yewæmongainō bai cædinque botō bitō ānō ēñente cæcæte ante pōninque a ongōmōi ae,’ antabopa,”

⁸ Mōitee wodi guiquēnē, Cænināni iñānite wæñōninque mīnitō, Wængongui quii, ante pædæ godōninque cængui tōnō bequii godoncæmīnimpā, ante wææ angacæimpā. Incæte mōnō Codito Mæmpocā ingante tāno apænedinque, Waodāni cæningā nāni wæñonte pōnōnō tōnō cængui bequii nāni, Wængongui quii, ante pōnōnō adinque bitō wii æinēmi ingabiimpā. Wængongui quii, ante iya tāmōni ate Wængongui waa acæcæimpā, ante ayæ, Wēnæ wēnæ mōni cædō ante Wængongui pōnō wido cæcæcæimpā, ante pōnō tāñōnāni bitō Baa ante wii tobi ingabiimpā, ante Codito apænegacæimpā. ⁹ Ayæ, “Bitō ānō cæcæte ante pōninque a ongōmōi ae,” angacæimpā. Āninque tōmēngā, Īne botō angainō iñōmō ædæmō ēñēnguine bate onongaēimpā, ante cædinque Mōitee wodi wēñēñedē nānō angainē ante da godonte bai cægacæimpā.

¹⁰ Ayæ Wængongui nānō ānō ante nē ēñente cæcā inte Itota Codito, Wængongui quii, ante baonga ēñadinque adopoque wæñinque

nāmā wepæ eyepæ godongā beyænque mōnō wæætē Wængongui ayongā tæiyæ waēmō ewocamō bate quēwēmompā.

¹¹ Wængongui quii, ante nē godōnāni guiquēnē tōmānāni iimō iñō iimō iñō adiyæ gongænte Wængongui beyæ ante cædānimpā. Mānōmāi wæætē wæætē godōninque ado ado godōnāni beyænque tōmēnāni wēnæ wēnæ nāni cædō ante ædō cæte wido cæte baquii. ¹² Māningā mōnō beyæ nē nō Godongaingā guiquēnē adopoque godōninque iinque baganca eyepæ pōni godōninque Wængongui tōmēmēngā iñō æi tæi contate onongaimpā. ¹³ Mānōmāi ongōninque, Botō imote piinte cædāni iñānite Wængongui æyedēnō botō nempo pōnongā æninque botō tæi ēmōmō inte nē āmo baquimoo, ante Codito ñōwo ganca wānō congampa. ¹⁴ Edæ tōmēngā pōnō badongā ate mōnō tæiyæ waēmō ewocate quēwēmō bayōmonte tōmēngā adoque pōni nānō godongainō beyænque, Edæmō picæmīni bacæmīnimpā, ante do badongaēimpā.

¹⁵ Mānīnō ante Wængongui Tæiyæ Waēmō Ōnōwoca mōnō imonte adobai apænecampa. Tōmēngā tāno apænegacæimpā.

¹⁶ “Mōnō Awēnē iimāi angacæimpā. Māniñedē ate iincayæ ate,

botō pōnō cæbo ate Ao ānāni iinque mōnō godongāmæ waa cæte quēwēngæimpā,

ante iinque cæcæte ante iimāi cæcæboimpā, angacæimpā.

Botō pōnō apænebo ēñēninque tōmēnāni, iimāi cædāni, ante botō wææ angainō incæ mīmōnē entawencædānimpā.

Botō pōnō apænebo ēñēninque mānīne ante ocai encate ēñencædānimpā.

¹⁷ Ayæ, Wēnæ wēnæ nāni cædō ante ñimpo cædinque botō pōnēnāmāi incæboimpā. Ēñēnāmāi nāni cædō ante botō wæætē wæætē ānāmāi incæboimpā,” angampa.

¹⁸ Īninque tōmēngā pōnō ñimpo cæcā ate mōnō edæ, Wēnæ wēnæ mōnō cædō beyæ pānāmāi incæcæimpā, ante quīnante godōmenque godonguii. Īñæmpa tōmēngā do bæ ñimpo cægacæimpā.

Mōnō Wængongui weca pongæimpā, ante

¹⁹ Īñānāni ēñēdāni. Tæiyæ Waēmō Pōni Oncōnē pō guite bai mōnō Itota wepæ beyænque guīñēnāmāi inte Wængongui weca do guiquēnēmō imompā. ²⁰ Weocoo mānīncōnē nāni wææ cægaincoo wægo tē bai Itota baō adobai wangō cote ingatimpā. Mānōmāi beyæ odemō mīnēmō wi ænete bai i adinque mōnō quēwēnguīnemō guīdinque Wængongui weca edæ do guīimompā. ²¹ Wængongui nānō godongāmæ owocabo iñōmonte, Wængongui quii, ante nē Godongā

Ñænængä pōni inongä iñōmō adocā Itota iñōmō mōnō imonte nē aacā inongä ingampa.²² Mānōmai beyæ mōnō Wængongui weca pō guicæimpa. Wēēñēñedē wentamō mōnō entawēnō ante Itota nāmā wepæ inte ñā mēnongacā ate mōnō nāmā apænte nō cæinēmō inte guicæimpa. Ayæ mōnō baō waēmōmæ åate bai ēmōmō iñinque mōnō, Wængongui tōmēngā nānō ānō bai cōwē ædæmō cæcæcāimpa, ante wede pōñēninque mōnō guiñēñāmai inte tōmēngā weca do guicæimpa.²³ Botō cōwē pōnō cæcæboimpa, ante nē angaingā iñōmō nē ædæmō cæcā ingampa, ante adinque mōnō, Tōmēngā nānō ānō bai cæcā beyænque watapæ bacæimpa, ante mōnō pōñēnō ante cōwē wido cædāmai inte mōnō pōñēngæimpa.

²⁴ Ayæ, Mōnō pōñencabo tōmāmō waadete pōñēninque waa cæte quēwēngæimpa, ante cæcæte ante pōñente adinque mōnō wacā ingā wacā ingā iñmai godō cæcæimpa.²⁵ Pancadāniya Wængongui ingante godongāmæ apæñecæte ante pōñāmai inte wadæ godāni incæte tōmēñāni nāni cæi bai mōnō adobai cædāmai ingæimpa. Wæætē, Codito nānō ponguionæ oo pōni impa, ate pōñente wædinque mōnō pōñencabo iñōmōnte mōnō wacā ingā wacā ingā edæ waadete apæñedinque, Wængongui gāmæñō pōninque watapæ quēwēmīni incæmīnimpa, ante apæñecæimpa.

²⁶ Wængongui nō nānō ānō ante do ēñēñimō inte mōnō, Wīi ēñēñēwædō, āninque godōmenque wēñæ wēñæ cæmō iñinque edæ wēñæ wēñæ mōnō cædō ante mēnongaquimæ ante edæ wepæ dæ ā bai babaimpa.²⁷ Wæætē māñōmai ancaa ēñēñāmai cæmō iñinque mōnō Wængongui nānō apænte ante panguimāmoque ante guiñēnte wæcōmāimompa. Edæ mōnō Baa ante godōmenque wēñæ wēñæ cæmō iñinque Wængongui ingante nē piñāni nāni gonte wænguimāmoque ante, Mōnō adobai gonte wæncæ wæ, ante guiñēnte wæcōmāimompa.²⁸ Mōitee wodi nānō wææ angainō ante, Wīi ēñēñēwædō, ante adocanque nē angā iñongante Waoda mēnaa ina incæ waodāni mēngā go adocanque iñāni incæ, Māñōmainō ante apæñecā ēñētāmōnipa, ante apæñedāni ēñēninque nē āningā ingante waadedāmai inte godō wæñnongadānimpa.

²⁹ Iñinque adocanque Wængongui Wēngā ingante piñā gāwate bai cædinque Baa angā adinque tōmēngā ingante Wængongui ædō cæte pāñāmai inguingāā. Wængongui, Botō pōnō æmo ate mīnitō Ao āmīni iñinque mōnō godongāmæ waa cæte quēwēngæimpa, ante nānō angainō iñinque bacæimpa, ante cædinque Itota nāmā wepæ inte mōnō imonte ñā mēnongacā beyæ tōmēngā ayongā

tæiyæ waēmō ēwocamō bagamōimpa. Incæte adocanque Itota nānō nē ñā mēnongadingā inongā inte, Itota wepæ wīi waēmō i awædō, ante piñgā adinque Wængongui ædō cæte apænte ante pāñāmai inguingāā. Ayæ Wængongui Ōñōwoca nē waadete pōnō cædongā iñongante adocanque badete tocā adinque Wængongui tōmēngā ingante ædō cæte pāñāmai inguingāā. Edæ Mōitee wodi nānō wææ angainō ante Baa āñāni iñānite wædænque pāninque Wængongui iñāni iñānite godōmenque nangui pōni pancæcāimpa, ante pōñēñiniyaa.

³⁰ Wængongui, “Botō tōmēmō nē panguimo imopa. Wiwa nāni cædinō beyæ eyepæ pōni godō pāmo wæcædānimpa,” angacæimpa. Ayæ, “Botō nē Awēñē inōmo inte botō quīñāni iñānite apænte ancæboimpa,” angacæimpa. Mōnō iñōmō, Māñōmainō ante nē apænte pancæ angaingā ingante æbānō ingāā, ante do ēñēmompa.³¹ Edæ Wængongui nē Quēwēngā inongā inte edæ ænguī badinque bæi ongonte pangā wæcæ wæ, ante mōnō nangui guiñēñate wæcæimpa.

³² Wēēñēñedē Wængongui apæñecā ēñēmīni inte mīnitō tæcæ ñāō bai entawēmīni ate wadāni pō piinte guēadō guēa cæyōñāni mīnitō mīni caate wæquinque tæi ongōninque godōmenque cæmīnitapa. Māñōmai mīni cædinō ante ñōwo pōñēdāni.³³ Pancayedēña iñōmō nē piinte cædāni tōmāñāni ayōñāni mīnitō imīnite badete todinque pāñānitapa. Pancayedēña guiquēñē mīnitō tōñiñadāni adobai caate wæyōñānite mīnitō, Adocabomōni imōnipa, ante bai cædinque nē caate wædāni tōnō godongāmæ ongōmīnitapa.³⁴ Wadāni iñānite tee mōñedāni adinque mīnitō tōmēñāni tee mōñete nāni wædō ante pōñēninque tōmēñāni tōnō godongāmæ wæmīnitapa. Ayæ, Mōnō māincoo oñædē godōmenque waa pōni ongōncoo inte cōwē ongongæimpa, ante ēñēmīni iñōmīnite wadāni inguiipoga mīnitō ēadincoo ō æñāni adinque mīnitō wædāmai inte watapæ tomīnitapa.³⁵ Iñinque, Mōnō wede pōñēnō beyænque eyepæ pōni ænguimō imompa, ante ēñēninque māñiñō mīni wede pōñēnō ante wido cædāmai iedāni.³⁶ Ayæ, Wængongui nānō ānō ante ēñēnte cæmōni ate tōmēngā, Pōñōmo æncæmīnimpa, ante nānō angaincoo ante cōwē pōñongā æncæmōnimpa, ante cædinque mīnitō wæñtædāmai inte ee cæquēñēmīni imīnipa.³⁷ Edæ Wængongui beyæ ante do yewæmongatimpa.

“Wantæ wantæ ate nē Ponguingā mōnō ānongā iñōmō do poncæcāimpa. Edæ tōmēngā nānō angaiñōnæ iñinque bayonte tōmēngā eyepæ pōni poncæcāimpa.

³⁸ Nē nō cæte quēwēnongā incæ tōmengā nānō wede pōnēnō beyænque quēwencæcāimpa.

Adocā wæætē guīñente wædinque wodii wīnongā adinque,

botō tōmengā ingante adinque wīi to-bairopa,” ante Wængonguī beyæ yewæmongatimpa.

³⁹ Mōnō guīquēnē tōmēnāni nāni cæi bai cædāmai īnōmō inte wīi guīñente wædōmō inte wodii wīnōnāmai īmōmpa. Edæ wodii wīnōnte bai mōnō æmæwo ēwente baquēnēmō īmōmpa. Wæætē edæ tōmengā ængā beyænque mōnō quēwenguinque tōmengā ingante wede pōnēmō īmōmpa.

11

Mōnō wede pōnēnō ante

¹ Wængonguī pōnō cæcā ate watapæ bacæimpa, ante mōnō pōnēnō ante mōnō, Wængonguī ayæ cædāmai ingā incæte cōwē cæquingā ingampa, ante wede pōnēmōmpa. Awınca adāmai ēmōmō incæ mōnō mīmōno wede pōnēninque awınca do ate ēmonte bai ēwocamō inte mōnō, Nāwangā bacæimpa, ante do ēñēmō īmōmpa. ² Dodāni wede pōnēnāni īñōnānite Wængonguī, Mīni wede pōnēnō beyænque botō mīnitō īmīnite waa abopa, ante apænecacāimpa.

³ Wængonguī inguipo tōnō īmōnæ tōmāo badoncæte ante cæyongā quīēmē impa ænte badonguingāā. Īñæmpa dæ angatimpa. Īnque mōnō nē acoo dæ āñōnte mānincoo ænāmai inte tōmengā wæætē mā pōnēninque angā beyænque mōnō nē acoo do bagatimpa. Mānōmai ingatimpa, ante wede pōnēninque mōnō Ao āmōmpa.

Dodāni nāni wede pōnēngāinō

Abedo wodi

⁴ Abedo wodi īñōmō Wængonguī nānō angāinō ante wede pōnēninque, Wængonguī quī, ante nō cæte godōninque Caīnō wodi wæætē ōnōmonque nānō godōnō bai wīi godongacāimpa. Tōmengā mānōmai wede pōnente cæcā adinque Wængonguī, Abedo bitō nō cæte pōnōmi æmōpa, ante apænecacāimpa. Īnque do wænte gogaingā īnongā incæte Abedo wodi, Botō wede pōnente cægāi bai adobaī wede pōnente cæedāni, ante ñowo ganca ayæ apænete bai apænecampa.

Ēnoco wodi

⁵ Ēnoco wodi guīquēnē nē wede pōnengā īñongante Wængonguī, Ēnoco ēñēmi. Bitō botō nē waa adōmi inte bitō wænguēnēmāmo ante wædāmai inte pōe, āninque inque īñongante ō ænte wo ææntodongā æigacāimpa. Æite gocā ate wadāni ancaā diquī diquī mīninque Wængonguī nānō nē

wo æntodongā ingante adāmai ingadānimpā. Edæ tōmengā ingante Wængonguī ayæ ææntodōnāmai īñongante wadāni, Ēnoco wede pōnengā ingante Wængonguī waa acampa, ante do ēñēnōnānimpā. ⁶ Edæ Wængonguī weca poncæte ante cædinque waocā, Wængonguī nē Quēwengā ingampa, ante wede pōnenguēnengā ingampa. Ayæ adobaī, Wængonguī ingante nē diquī diquī mīmō īñōmonte tōmengā, Pōe, āninque pōnō waa cæcampa, ante wede pōnēninque nē poncæ cæcā pongampa. Mānōmainō ante nē wede pōnēnāninque Wængonguī weca pōnānimpā. Mānīnō ante nē wede pōnēnāmai ingā guīquēnē tōmengā ingante Wængonguī ædō cæte waa aquingāā. Edæ waa adāmai ingampa.

Docā Nōwee wodi

⁷ Nōwee wodi Docā nāni ānongā guīquēnē, Æbānō baquīi, ante adāmai īñongante Wængonguī, Nōwee ēñēmi. Bitō adāmai imāmo oo pongæimpa cæbii. Angā ēñente guīñente wædinque nē wede pōnengā inte tōmengā nāni wencabo nāni guīte quēwenguinque wipo ñænængade impo incæ ñænæ oncō bai badongā ate guīte quēwengadānimpā. Nē wede pōnēnāninque nāni nō entawēnō bai adobaī nō nānō entawenguinque Nōwee wodi wede pōnente cægacāimpa. Īnque tōmengā adocangque wede pōnēninque mānōmai cædingā īñongante wadāni guīquēnē nāni apænte wænguinque Baa angadānimpā.

Abadāo wodi

⁸ Abadāo wodi guīquēnē tōmengā wede pōnengā īñongante Wængonguī, Abadāo ēñēmi. Botō pōnōmo bitō ænguīmæ ante botō odōmōmo goe. Angā ēñēninque, Æbæmē impa, ante adāmai īnongā inte Abadāo wede pōnēninque ēñente cædinque do gogacāimpa. ⁹ Mānōmai wede pōnēninque wadāni nēmæ gote wacā īnongā inte wantæ īñō quēwengā bai inte æmontaicōnē owogacāimpa. Ayæ Wængonguī nānō angāimæ nē ænguīna īnōna inte tōmengā wengā Itæca wodi adobaī tōmengā wengā Aacobo wodi adobaī wantæ īñō quēwente bai æmontaicōnēnque owote quēwengadāimpa. ¹⁰ Wængonguī doyedē pōni, Waodāni nāni ōonædē quēwenguīñōmō ante botō īmai badoncæboimpā, ante nāmā nānō pōnēnō bai tæi gōnōnte māñongacāimpa. Abadāo īñōmō, Botō mānīi īñōmō owocæboimpā, ante nē wædongā inte wede pōnēninque piyæñē cædinque æmontaicōnēnque owote inguipoga quēwengacāimpa.

¹¹ Mōnō imonte pōnēninque nē ædæmō aacā īnongā inte Wængonguī īñōmō tōmengā nānō ānīnō bai cōwē cæcæcāimpa, ante nē wede pōnēnā īñōmō Tada wodi ingadāimpa. Mānōmai beyæ tōmēnā owæntadā īñōnante

Wængongui pönö cæcä æninque tömëna picængadedä inönä inte tæi piñæninque yædëmadä bate wëñængä mangadäimpa. ¹² Abadäo wodi wede pönëninque tæi piñænte tapæicä ate wëñængä ëñagacäimpa. Ìninque adocanque picængadecä inte nê wænte bai inongä inte wede pönengä beyænque mönö tömengä nänö pæimö yebæninque nëmoncoo öönædë owocoo nangui pöni i bai mönö iñömö adobai nangui pöni imompa. Ëmönaicoo gäwapæ yæwedeca öñoncoo nangui pöni i bai mönö tömengä pæimö imö adobai nangui pöni iñömönte mönö, Mänimpomö imompa, ante ædö cæte anguii.

¹³ Mäninäni tömänäni wede pönente quëwëñönäni inte wængadänimpa. Wængongui nänö, Pönö cæcæboimpa, angaincoo ayæ ænämaï inäni inte tömëni gobæ ongoncoo gomö ate bai, Cöwë æncæmönimpa, ante wede pönente piyænë cæte quëwengadänimpa. Wadäni nëmæ wabæca quëwente bai quëwëninque tömëni, Wii mönitö ömæ iñonte mönitö wamöni inte quëwëmönipa, ante ingui-poga owogadänimpa. ¹⁴ Mänömainö ante nê änäni iñömö, Tömëmöni ömæ ante diqui diqui mëmöni imönipa, ante quëwëñänipa. ¹⁵ Dodäni iñömö do nani ëmö cæte pongaimæ ante pönente wædäni inte bai tömëni do adodö gocædönänimpa. ¹⁶ Wæætë adodö mäniömæ nani quëwengaimæ wii goinëninque tömëni, Mönö öönædë godömenque wæömöæ pöni gote quëwengæimpa, ante goinente wægadänimpa. Ìninque wadäni Wængongui ingante, Bitö nê wæömöæ goinente wædäni tömëni Wængonguimi imipa cæbii, ante änäni incæ tömengä wæætë, Ìñæmpa nê wædönäni tömëni quëwenguiñömö nani wædö ante botö do eyepæ mænongaboimpa, äninque guññënamäi inte nangui tocampa.

Abadäo tönö Itæca

¹⁷ Wængongui, Abadäo æbänö botö imote ëñente cæquiringä, ante acæte ante angä ëñëninque Abadäo wodi nê wede pönëngä inte tömengä wengä Itæca ingante, Wængongui qui, ante godongacäimpa. Edæ Abadäo ingante doyedë apænedinque Wængongui, Bitö pæinäni nangui inäni inte iimæ æncædänimpa, ante do angä ëñengacäimpa. Incæte Wængongui mänömainö angä ante nê ëñëningä incæ tömengä wengä adocanque pöni inongä inte Abadäo, Wængongui quingä ingampa, ante godoncæ cægacäimpa. ¹⁸ Adocä tömengä wengä ingantedö ante Wængongui doyedë Abadäo ingante apænedinque, Bitö wengä Itæca pæinänique inänitedö ante botö, Abadäo pæinäni inänipa, angacäimpa.

¹⁹ Incæte Itæca wodi adocanque pöni iñongante Abadäo wodi, Botö wengä do wengä incæte Wængongui, Nani ömæmöe, angä ininque do nani ömæmömaingampa, ante wede pönëninque godoncæ cægacäimpa. Wængongui guiquënë, Ee ae, ante wææ angä beyænque tömengä wengä ingante wænönämaï ingacäimpa. Ìninque Itæca wodi do wæningä inte bai nani ömæmonte bai ayæ quëwengacäimpa.

Itæca, Aacobo, Ootee

²⁰ Itæca wodi adobai, Wængongui æbänö cæquiringä, ante wede nänö pönëno beyænque ëñëningä inte edæ picængadecä badinque Aacobo wodi tönö Etawoo wodi inate apænedinque, Wængongui minatö iminate iimäi pönö waa cæcæcäimpa, ante waa apænegacäimpa.

²¹ Aacobo wodi iñömö, Wængongui æbänö cæquiringä, ante wede nänö pönëno beyænque do ëñëningä inte wæncæ cæte öñöninque tömengä nänömoda Ootee wodi wëna inate, Minatö iminate Wængongui pönö waa cæcæcäimpa, ante waa apænegacäimpa. Ayæ ongontoca da cæte ongote ædæ wææninque, Wængongui bitö wæömö pöni inömi inte cæquimido angüënë, ante watapæ apænegacäimpa.

²² Ootee wodi guiquënë, Wantæ iñö wæncæboimpa, äninque, Mönö idægocabo mönö pæinäni incæ Equitobæ wantæpiyæ quëwëñäni inte Wængongui ænte mäocä wadæ gocædänimpa, ante tömengä nänö wede pönëno beyænque ëñëninque iimäi angacäimpa. Godinque botö bayetoca ingäi ee ænte næænte godinque da wæncæminimpa, angacäimpa.

Möitee wodi

²³ Möitee wodi mæmpoda guiquënë wëñængä ëñacä ate, Wii önonganque ingampa. Wæömö wëñængä awædö, ante adinque iimäi cægadäimpa. Mänifedë Equitobæ awënë odeye iñömö, Onguiñængä ëñacä adinque do wæñongæimpa, angä incæte tömëna guññënamäi inte tömëna wede nana pönëno beyænque wëñængä Möitee ingante apäicä mengäa go adocanque mämönque wë wodonte mangadäimpa.

²⁴ Möitee wodi guiquënë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængongui ingante nê wede pönëngä inte edæ Baa angacäimpa. ²⁵ Wæætë edæ, Botö caate wæquinqe botö Wængongui quinäni tönö godongämæ cæcæboimpa, ante cædinque Möitee wodi, Equitoidi nani wiwa cæte töinö adinque botö wantæ iñö incæ wii toinente awædö, ante wido cægacäimpa. ²⁶ Wængongui iincayæ ate eyepæ pöni pönongä æncæboimpa, ante wede pönëninque

tömengä mäninö ante mimöno gomö ate bai pönengacäimpa. Ayæ Equitobæ quëwënnäi wæmoncoo pönï nänï mäincoo ante adinque, Önconcooquë ëwenguincooquë i awædö, ante Möitee edæ Baa angacäimpa. Wæætë edæ piinte badete todäni wæcä incæte tömengä, Codigo beyænque impa, ante pönëninque godömenque waa pönï togacäimpa.

²⁷ Tömengä iñömö, Awënë odeye Padaönö ængui badinque piingä wæcæ wæ, ante guifente wædämaï inte wæætë wede pönëninque Equitobæ ëmö cæte gogacäimpa. Ayæ Wængongui nê Quëwengä mönö awinca adämaï inongä ingante Möitee wodi iñömö nê awinca gomö acä bai ëmongä inte wæntæye badämaï inte godömenque cægacäimpa. ²⁸ Ayæ, Bamoncadë ëñadäni inänite nê ëwëngä incæ godö wænoncæcäimpa, ante Wængongui angä ëñëninque Möitee wodi wæætë, Nê ëwëngä nänö wodo pänta goqui ingæimpa, ante wede pönëninque cægacäimpa. Tömengä wadäni idægoidi tönö Patowa ææmæ mönö cæmæ bai mä cængacäimpa. Ayæ, Nê ëwëngä incæ mönö idægocabo bamoncadë ëñadäni inänite wænönämaï incæcäimpa, ante wææ cæcæte ante cædinque Möitee nê wede pönëngä inte wadäni tönö godongämæ odemompaa wepæ öni paagacäimpa.

²⁹ Idægoidi guiquënë wede pönëninque gäwapæ Opatawæmæ nänï ämæ goyæ go næ gongæmæ ate tæcæguedëmæ pönï tao gogadäimpa. Equitoidi guiquënë, Taadö bapa, mönö taocæwæmpa, ante cæyönänite æpæmpo becadote wængadäimpa.

Adacaba wodi

³⁰ Idægoidi nänï wede pönëno beyænque Eedicoo nänï quëwëñömö yabæque nänï wææ cægainca incæ näwæ cabænte wæængatimpa. Edæ idægoidi önonpo æmæmpoque go mëönaa mänimpoönæ iñonte yabæque godongämæ cægonte godäni ate cabænte wæængatimpa. ³¹ Onquiyængä Adacaba iñömö mäincoo beyæ ante nê towente nê quëwengä inongä incæte tömengä wede nänö pönëno beyænque iimaï cæte müingä quëwengacäimpa. Idægoda mënaa, Eedicoo iñömö æbänö quëwënnäni, ante acæte ante awëmö pö guida adinque Adacaba wodi, Ee pöda, angä beyænque idægoidi wæætë ëñëñämaï inänï inänite wænöninque tömengä ingante ata cæpodäni quëwengacäimpa.

Wadäni nänï wede pönengainö

³² Quinante godömenque ante apænequimoo. Iñänï nê wede pönënnäni nänï cægainö ante botö æiquedö apænequimoo. Guedeönö wodi tönö Badaco wodi ingadäimpa. Ayæ wææ Tantö wodi tönö Yepetee wodi ingadäimpa. Ayæ wææ Awënë Dabii wodi tönö Tämoedo wodi ingadäimpa. Mäninänï

tönö Wængongui beyæ nê apænegainäni wodi tömänäni wede nänï pönëno beyænque iimaï cædinque nanguï cægadänimpa.

³³ Nê wede pönënnäni iñömö tæi ëmonte badinque wabæca awënë odeyeidi nempo quëwënnäni inänite bæe tadinque wido cægadänimpa. Pancadäniya wede pönëninque wadäni beyæ wææ äninque nö cægadänimpa. Wacä, Cæcæboimpa, äninque do cæquëngä incæ wii cæcä iñinque nö pönënnäni pancadäniya, Bitö äno cæcæbiimpa, änäni ëñëninque do cægacäimpa. Pancadäniya nänï wede pönëno beyænque mëñeidi incæ ecadämaï inänï bagadänimpa. ³⁴ Gongä nanguï wo bæco adinque pancadäniya wede nänï pönëno beyænque mönæ ëmongatimpa. Wadäni yaëmenca tamencacæ cædäni wædinque nê pönënnäni pancadäniya aamö cædinque münnäni quëwengadänimpa. Aquii pönï inänï inte nê wede pönënnäni pancadäniya tæi piñante bagadänimpa. Wabæca tontadoidi wænoncæ pönäni adinque nê pönënnäni pancadäniya wæætë tæi piñëninque wido cædäni gogadänimpa. ³⁵ Tömënnäni guidënnäni näñe wænäni ate onquiyænäni wede nänï pönëno beyænque do wænünäni quëwënnäni ate wængadänimpa.

Näni caate wægainö

Ayæ adobai nê pönënnäni inänite wiwa cædäni caate wæyönänite wacä, Ata cæpobo goquimi, angä incæte nê caate wædönäni pancadäniya wæætë, Ee abi caate wæwëmoe, äñänitapa. Tömënnäni, Botö iñcayæ ate ñäni ömæmöninque caate botö wædö beyænque godömenque waa quëwëncæboimpa, ante wææ äninque Ao änämaï ingadänimpa. ³⁶ Tömënnäni nänï wede pönëno beyæ pancadäniya inänite wadäni badete togadänimpa. Wadäni inänite wæætë tæi pängadänimpa. Wadäni inänite wæætë tæi yæmëngö ñä cæyæninque tee mönedäni wægadänimpa. ³⁷ Pancadäniya inänite dicaca tacadäni wængadänimpa. Pancadäniya inänite ta wiyænäni wængadänimpa. Pancadäniya inänite yaëmenca yedäni wængadänimpa. Pancadäniya obega æmontai tönö caboda æmontai badöninque mäninque wëñate mongæninque ömæpodäni inte wæyönänite wadäni togænte päninque wiwa cægadänimpa. ³⁸ Tömënnäni nê wede pönënnäni inte waa pönï inänï iñönänite inguipogaque quëwënnäni wæætë wii tömënnäni bai inänï inte wënæ wënæ cægadänimpa. Nê pönënnäni iñömö pancadäniya, Äyömömë gote quëwënguimoo, ante pönente wædinque wodi winonte önomæca wayömö godinque änanquidi wayömö godinque oncontatodë guidinque pancadäniya wë womöñönäni pancadäniya onguipodë ææ wote wë womongadänimpa.

³⁹ Ìnínque Wængonguì tòmènáni ìnánite, Wede míni pònénò adínque botò waa tobopa, ante apænégacáimpa. Incæte tòmengá nánò, Pónò waa cæcæboimpa, angainò ante tòmènáni máníñfèdè ayæ ænámái ingadánimpa. ⁴⁰ Edæ tòmènáni adodánique wíi æncædánimpa, angacáimpa. Wæætè Codito godómenque pónongá ænínque mónò watapæ quèwèñómonte tòmènáni mónò tónò godongámæ ænínque ædæmò picænáni baí bacædánimpa, ante Wængonguì mónò ìmonte waa cædínque tòmènáni beyæ adobaí waa cægacáimpa.

12

Itota ingante mónò cówè adínque quèwengæimpa, ante

¹ Ìnínque boguimá bacoo owo baí máníñáni ìñómò, Wængonguì cówè pónò cæcæcáimpa, ante nè wede pónengáináni ìñómò adobaí bacoo ongónánipa. Edæ, Mónitò wede pónente móni cægáí baí mìnítò adobaí wede pónénínque ìmái cædáni, ante a ongonte baí apænédánipa cæmò. Tòmènáni quingæ pogodo gocæte ante cædáni teémencoo gá áadáni baí cædínque mónò adobaí oda caate mónò wædoncoo ante ñimpo cæcæáimpa. Wènæ wènæ mónò cægaincoo ante, Ancaa cæte awædò, áninque mónò wido cæcæáimpa. Ayæ taadò ante Itota nánò odómongainonque ante mónò edæ wæntædámái inte tæí píñænínque pogodo gocæáimpa. ² Mónò wede pónente æite godò taadò ante tòmengá ìñómò nè táno beyænte gogaingá ingampa. Tòmengá adocá incæ mónò wede pònénò ante, Cówè mánómái bacæáimpa, ante ædæmò badongaingá ingampa. Tòmengá ìñómò wadáni tòmengá ingante awæ timpodáni wæyongante badete todáni adínque tòmengá, Mánómái cædáni botò caate wædò beyænque botò ìincayæ ate watapæ tocæboimpa, ante nè èñèningá inte piyænè cædínque caate wædínque wængacáimpa. Tòmengá ñówo ìñómò ñáni òmæmte æite godínque Awènè Wængonguì nánò contaimpaa tòmémengá ìnò tæ contate Awènè bate ongóñongá mónò adocá Itota ingante æmò ate baí pónénínque edæ tòmengá míñæ tee empote pogodo gocæáimpa.

³ Tòmengá ìñómò nè wíwa cædáni nanguì píinte cædáni wæcá incæte piyænè cægacáimpa. Ìnínque mìnítò ìñómò, Wæntædámái inte míimò nangæ batawènámai ingæáimpa, ante cædínque, Tòmengá æbánò cægacáí, ante pónèedáni. ⁴ Nówò ganca mìnítò wènæ wènæ míni cæínente wædò ante wido cæcæte ante mìnítò wænguì beyæ wepæ dicæ gowete cæmíniyaa. ⁵ Ayæ Wængonguì mónò wampo pónécæmòimpa, ante mónò ìmonte, Botò

wémíni godómenque cæcæmínimpa, ante æbánò pónò angacáí, ante mìnítò dicæ pónémíniyaa. Ìmái angacáimpa, ante yewæmongatimpa.

“Botò wémíni èñèmi. Mónò Awènè bitò ìmite, Èñente cæcæbiimpa, ante pangá wædínque,

bitò wæætè badete todámái incæbiimpa.

Bitò ìmite, Èñenguèné quèwèe, angá èñente wædínque wæwènámai incæbiimpa.

⁶ Ìñæmpa tòmengá nánò nè waadete pónénínque ìnánite pánínque mónò Awènè ìñómò, Èñencæmínimpa, ante cæcampa.

Botò wémíni, ante nánò nè ængáinánique ìnánite tòmengá pangampa.”

⁷ Ante yewæmongatimpa cæmínii. Mìnítò caate wémíni ìmínitawo. Ìñæmpa wèñænáni ìnánite wæmpoidi dicæ pánámái ìnguínániyaa. Mæmpo Wængonguì ìñómò adobaí, Botò wémíni ìmínipa, ante edonque acæáimpa, ante nanguì áninque pangá caate wémínipa. Ìnínque tòmengá pangá wædínque mìnítò wæætè, Mónò èñente quèwengínque ante Mæmpo Wængonguì pangampa, ante piyænè cæte ee amíni pancæcáimpa. ⁸ Tòmengá wèñæmò ìñómonte tòmengá tòmámò ìmonte edæ nanguì pante angampa. Incæte mìnítò pancamíniya ìmínite tòmengá pante ánámái ingantawo. Ìnínque mìnítò, Wíi Wængonguì wémóni ìmónipa. Wacá wémóni ìmónipa, ante wæquènémíni ìmínipa.

⁹ Mónò mæmpoidi waodánique ìnónáni inte nanguì áninque pánáni adínque mónò, Mæmpocá ìnongá inte tòmengá nánò cæquènénonque cædínque mónò ìmonte waa cæte pangantapa, ante tòmènáni ìnánite waa atamompa. Mónò Mæmpo Wængonguì adobaí mónò ìmonte nanguì áninque pangá adínque mónò quèwengínque mónò tòmengá ingante godómenque Ao ante èñente cæcæáimpa. ¹⁰ Mónò mæmpoidi guiquèné, Æbánò pónò waa cæquímoo, ante pónente ate mónò ìmonte edæ, Èñencæmínimpa, ante wantæ ìño nanguì ánáni èñente cætamompa. Wængonguì ìñómò edæ, Tæiyæ waémò botò èwocabo baí mìnítò adobaí tæiyæ waémò èwocadínque watapæ quèwèncæmínimpa, ante cædínque mónò waa quèwengínque ante pónò pangampa. ¹¹ Æcámenque mónò ìmonte nanguì áninque pána incæ tòmengá pangá ate mónò caate wædínque dicæ quingæ watapæ tomongaa. Ìñæmpa, Caate awædò, ante cówè ámompaa. Wæætè ìincayæ ate edæ doyedè náni pánò beyænque mónò nè èñente badómo ate mónò nó cæmò badínque gánè pónente entawémompaa.

Mónò wæquínque Wængonguì apænecá èñènámai ìmompaa

¹² Ìninque mìnìtò guepænte wæðimìni inte edæ tæi piñæninque wæntæðämaì inte nanguì cæedäni. Ònoncapo nanguì guecapote wæðimìni inte edæ guecapodämaì inte ængæ gantite pogodo gote bai nanguì cæedäni. ¹³ Mönö pogonguinö, ante mìnìtö taadö ante enga womìni mæmömö ba ate nè podä cædinäni incæ podä cæðämaì inte tömënäni nāni waa baquinque mäninönö töinö gote waa ægoncæðänimpa, ante godö waadete cæedäni.

¹⁴ Mönö godongämæ piyæne cæte quëwengæimpa, ante mìnìtö nanguì tæi piñæninque waodäni tömänäni inänite gänë pönente cæedäni. Ayæ, Æcänö tæiyæ waëmö ëwocadämaì ingää tömengä ìñömö mönö Awënë ingante cöwë adämaì incæcäimpa, ante pönente wædinque mìnìtö, Mönö tömämö Wængongui ayongä tæiyæ waëmö ëwocate quëwengæimpa, ante nanguì cæedäni. ¹⁵ Wængongui pönö waadete nänö cæðö ante mönö tömämö ænte entawengæimpa, ante cædinque mìnìtö cöwä adinque, Adocanque incæ ömætawengä inämaì incæcäimpa, ante wææ cæedäni. Adocanque wæwente nänö quëwënö beyæ piinte bate tedecä ëñëninque mìnìtö, Wadäni nāni wentamö mongænguinque adobai piinte badämaì incæðänimpa, ante wææ cædinque nè piingä ingante godö wææ æedäni. ¹⁶ Ayæ mīni cabo incæ, Nänöogængä inämaì ìñongante adocanque incæ godö mönāmaì incæcäimpa, ante cöwä adinque wææ cæedäni.

Etawoo wodi ìñömö tömengä bamoncadengä ìngongä inte nänö nanguì ænguëncoco ante piinte bai cædinque cænguinque æncæte ante tömancoo godonte beyæ adopoque ænte cængacäimpa. Mìnìtö guiquënë, Inguipogaque ante ænte to wæðö, ante Etawoo wodi nänö pönëwente cægainö bai adocanque incæ cæðämaì incæcäimpa, ante edæ wææ cæedäni. ¹⁷ Bamoncadengä inte nänö ænguëncoco ante do piinte bai godöningä inte Etawoo wodi ìncayæ ate, Pönömi æmoe, ãñongante mæmpocä wæætë Baa angacäimpa, ante do ëñëminipa. Edæ Ca ca wædinque tömengä, Æbänö cæte ænguimoo, ante anca angä incæte mæmpocä do Baa äningä inte ñowo wæætë wadö ante æðö cæte anguingä.

¹⁸ Onquiyabo Wængongui nänö gonga tänongä bæcobo ñænoque dodäni ponte godongämæ ongonte cægonäni bai mìnìtö wii onquiyabo ñænoque pöminipa. Tömënäni wëmö mæ mämönte bai ìñömö wini cai pæmæmämö ìñömö nāni ponte wægainömö bai mìnìtö wii pöminipa. ¹⁹ Todompeta nāni ancadeca nanguì we öömämö dodäni nāni ëñente wægaïmämö bai mìnìtö wii adopämo ëñëminipa. Wængongui

wææ ante nänö tedepämo tömënäni nāni ëñente wægaïmämö bai mìnìtö wii adopämo ëñëminipa. Mänimämö ëñente guñente wædinque tömënäni, Idæwaa ämipa. Æðö cæte godömenque ëñenguimöni, ante wægadänimpa. ²⁰ Edæ “Cæningä incæ onquiyaboga ponte cængongä adinque mìnìtö tæi tacamini wæncæcäimpa,” ante wææ ãñongante tömënäni ancai guñente wædinque, Wængongui nänö wææ angainö ante mönìtö æðö cæte æðæmö ëñente cæquimöni, ante wægadänimpa. ²¹ Onquiyaboga nāni ate guñëmämö adinque Möitee wodi incæ, “Ancai guñente botö do do wäate bai wæbopa,” angacäimpa.

²² Mìnìtö guiquënë Tiñoquidi nāni änonquidi do ponte bai ëwocänimpa. Edæ Wængongui nè Quëwengä öönæðë Eedotadëë bai nänö waëmö pöni owoyömö mìnìtö mänìñömö do ponte bai ëwocänimpa. Wængongui anquedoidi æpodö mīido ganca inönäni inte nanguì pöni inäni godongämæ pö bee tente tömënäni nāni watapæ ongöñömö mìnìtö mänìñömö do ponte bai ëwocänimpa. ²³ Mönö Codito ingante godongämæ mönö pönencabo ìñömö bamoncadëni nè ænguimö bayömönte mönö ëmöwo ante öönæðë yewæmointaa do yewæmonte ongompa. Ìninque mìnìtö adocabomini badinque Wængongui weca mönö waocabo tömämö imonte nè apænte anguingä weca do pömini iminipa. Nè nõ cæte quëwengänäni wænte goyönänite Wængongui ìnque badongä ate do æðæmö picänäni bai badänipa. Tömënäni önöwoca weca mìnìtö do ponte bai ëwocänimpa. ²⁴ Wængongui, Botö pönö cæbo ate mìnìtö Ao ämini ìninque mönö godongämæ waa cæte quëwengæimpa, ante nänö angainö ante Itota, ìnque bacæimpa, ante æðæmö badongacäimpa. Mìnìtö ìñömö nè badongaingä weca do pömini iminipa. Abedo wodi wepæ onguipoiya gowecä adinque Wængongui wæætë nè wænönëngä ingante, Botö weca ongönāmaì gobæwe, angacäimpa. Itota wepæ wii Abedo wodi wepæ bai imæ adinque Wængongui wæætë, Itota wepæ petæ petæ gowedimæ beyænque botö weca pöedäni, ante cængacäimpa. Mänimæ Itota wepæ nänö petæ petæ gowegainömö mìnìtö do ponte bai ëwocänimpa.

²⁵ Mänömai waëmö pöni ìñömö do pömini inte mìnìtö nè apæncä ingante Baa änämaì ìedäni. Onquiyabo godongämæ ongönäni guiquënë inguipoga wææ angaingä ingante Baa äninäni ìñönänite tömengä ata cæpodämaì inte pangacäimpa cæminii. Öönæðë ongonte nè wææ angaingä ingante ëñënamäi inte dadi ëmænte wadæ gomö bai mönö godömenque pante wæquënëmö ìñömönte tömengä cöwë ata cæpodämaì

incæcâimpa.

²⁶ Mânîfêdê tîmêngâ nânô tedepâmo beyænque inguipo wancæ wancæ cægatimpa. Nôwo îñômô tîmêngâ, “Botô ïncayæ ate inguipo adopoque pônî wancæ wancæ cædinque ôônædê adobaî wancæ wancæ edæ cæcæboimpa,” angacâimpa.

²⁷ Tîmêngâ, “Ïncayæ ate adopoque pônî cæcæboimpa,” angacâimpa, ante pônêninque mînonô ïimâi ante êñengæimpa. Tîmêngâ adopoque wancæ wancæ cæcâ ate tîmêngâ nânô badongaincoo oo pônî ongoncoo îñômô tîmancoo adoyedê ewente bacæimpa. Quincodoo oo ongônâmai tæî ongoncoo î mânincooque ayæ a ongoncæimpa, ²⁸ Ïnînque mînonô Awênê Odeye nempo quëwêmô îñômô wancæ wancæ cædâmai inte tæî ongonguimô imopma, ante pônêninque mînonô Wængonguî ingante waa ate pônente apænecæimpa. Mânômai cædinque Wængonguî ñâo baî nânô tæî êmômâmo ate guîñente wædinque tîmêngâ beyæ cæcæimpa. ²⁹ Edæ mînonô Wængonguî îñômô edæ gonga wo bæcoqui baî ingânô anguênê, ante âmo êñêmâimînipa.

13

Ïimâi cæmô adinque Wængonguî waa tocæcâimpa, ante

¹ Mînitô îñômô, Mînonô caipæ imopma, ante mîni waadete pônênô baî cædinque cîwê godongâmæ waadete pônente cæedâni.

² Tîmânîni îñânite edæ, Pîedâni, ante waadete cæedâni. Mânômai cædinque pancadâniya, Botô weca ædânidô êñacæ pônâni, ante êñênâmai îñâni incæte do waa cædâni ate edæ, Æ, Wængonguî nânô da pônônâni anquedoidi incæ botô weca pônânitapa, ante tæcæ abopa, ante todâni.

³ Tee mînete ongônâni tînonô botô godongâmæ tee mînete wæcîmo baî imopa, ante pônêninque mînitô tîmênâni îñânite ante cîwê pônêedâni. Pancadâniya îñânite wadâni wîwa godô cædâni ate caate wæwêñônâni mînitô adobaî pônêninque, Mînonô baô adobaî êñâmô inte tîmênâni tînonô godongâmæ caate wæmô baî imopma, ante tîmênâni îñânite cîwê pônêedâni.

⁴ Nânôgængâ îñâmai îñongante waocâ nè godô guêa mongâ tînonô nè godô wîwa towênâni îñônânite Wængonguî mânînâni tîmânâni îñânite do apænte ante pancæcâimpa cæmîni. Mîna gæncaya adomînaque guêa moncæmînaimpa. Ayæ ñânônâni mînoninque nâna gæncaya quëwêna ate, Waa impa, ante mînonô waa acæimpa.

⁵ Wængonguî incæ, “Mînitô imînite cîwê êmô cæte godâmai inte botô cîwê aacæboimpa,” angacâimpa. Mânômai beyæ mînitô godonte æinta ante æinente wædâmai inte mîni êadincooque êadinque piyænê cæte

quëwêedâni. ⁶ Ïnînque Wængonguî beyæ ïimâi ante nâni yewæmôngainô baî ante mînonô wede pônente apænemopma.

“Mînonô Awênê botô tînonô godongâmæ cæcâ adinque botô,

Waocâ ædô cæte botô imote wênæ wênæ cæquiringâ, ante êñêmo inte guîñênâmai incæboimpa.”

⁷ Nê aadâni îñômô mînitô imînite Wængonguî nânô ânô ante nè apænédâni îñânite ante pônêninque mînitô, Tîmênâni îñômô waa cædinque edæ watapæ quëwênâni, ante pônêedâni. Ayæ tîmênâni nâni wede pônênô baî adobaî wede pônêedâni.

⁸ Itota Codito îñômô wêênêñedê nânô ingâ baî ingâ ñôwoônæ adobaî ingâ inte tîmêngâ adocâ ïncayæ ate cîwê adobaî incæcâimpa.

⁹ Wadâni, Wacâ taadô odômote apænêbo êñêe, aîñônânite tîmênâni mîñæ godâmai iedâni. Ïñæmpa tîmênâni cænguinque ante, Æbânô waa pônî cî cæquîlî, ante wææ ânâni incæte mânîlî cænguincoo beyæ tîmênâni wîl godômenque watapæ quëwênâni. Ïnînque mânincoo cænte beyæ mînonô mîmô ædô cæte tæî piñænte entawenguî. Wæætê edæ Wængonguî nânô waadete pônô cædô beyænque mînonô tæî piñænte entawengæimpa. ¹⁰ Æmontaicônê cædinque, Wængonguî qui, ante nè godônâni îñômô tîmênâni nâni iya tâimppa godôninque pancaa cænguî ænte nè cænguênênâni îñônâni incæte tîmênâni mînonô Codito mînonô beyæ nâmâ nânô wepæ godongainô guiquênê ædô cæte ænguîñâni.

¹¹ Cæninâni îñânite wænônâni ate nè godongâ ñænængâ pônî inongâ îñômô wepænque æninque, Wênæ wênæ mîni cædinô ante Wængonguî pônô ñâ mênongacæcâimpa, ante cædinque Tæiyæ Wæmô Pônî Oncônê wâânê guidinque godongampa. Godongâ ate baionque, Wentamô mongænte awædô, ante æninque tîmênâni nâni quëwêñômô yabæque mæo iya tangadânimpa. ¹² Itota adobaî, Botô wepæ pônô mênongabo ate botô quîmîni îñômô tæiyæ wæmô êwocate quëwencæmînimpa, ante cædinque wentamô mînonô entawênô ænte teemê mongænte godinque tîmênâni quëwêñômô wææ cædinemô tao godinque yabæque pônî guîñêñate wædinque caate wængacâimpa cæmîno. ¹³ Tîmêngâ yabæque pônî guîñêñate wædinque nânô tao gogai baî mînonô adoyômô tîmêngâ weca tao gote ado guîñêñate wæcæimpa. ¹⁴ Ïñæmpa inguipoga mînonô quëwêñômô tæî ongompa diyæ wantæpiyæ quëwenguî. Wæætê ôônædê ïncayæ ate edæ mînonô cîwê quëwenguîñômô ante æinente wædinque wânô cîmopma.

¹⁵ Īninqe, Wængonguī qui, ante cænguī godōnāni bai cædinque mōnō ĩñōmō edæ, Itota ěmōwo beyæncque quĕwĕmōnīpa, ante nē apænemō inte tōmengā ěmōwo ante Wængonguī ingante apænedinque, Bitō tæī ěmōmi inte waa pōnī cæbīpa, ante watapæ apænecæīmpa. ¹⁶ Ayæ ĩmpo cædāmaī inte mīnitō wadāni ĩnānite cōwĕ waa cæedāni. Ayæ wadāni ĩnānite mīni mānīncōo godō nēnempomīni æncædānīmpa. Mīnitō mānōmaī, Wængonguī qui, ante godonte bai cædinque nēnempomīni adinque Wængonguī mīni godōnō ante waa acampa. ¹⁷ Mīnitō, Mōnō ĩmonte nē ānāni ĩnānite mōnō Ao ante ěñengæīmpa, ante pōnēnīncque nē aadāni ĩnānite cōwĕ ěñente cæedāni. Tōmēnāni, Ēbānō cæboo, ante adinque Wængonguī apænte ancæcāīmpa, ante ěñēnīncque guīñente wædāni inte nō cædinque aadānīpa cæmīnī. Tōmēnāni mānōmaī aadinque watapæ tote quĕwencædānīmpa, ante mīnitō wæætē tōmēnāni nāni ānōnō ante ěñente cæedāni. Mīnitō wæætē ěñēnāmaī ĩmīni adinque tōmēnāni wæætē edæ, Ēdō cæte aaquīmōnī, ante wæwente badāni ĩnīncque mīnitō adobai todāmaī ĩmaīmīnīpa.

¹⁸ Mōnitō beyæ ante Wængonguī ingante apæneedāni. Mōnitō mīmō entawēmōni inte wentamō entawēnāmaī ĩmōnīpa, ante nāmā apænte pōnēmōnīpa. Edæ, Quiēmē cæmō incæ mōnō cōwĕ nō cæte quĕwengæīmpa, ante cæmōnīpa. ¹⁹ Botō mīnitō weca ocæ ěmænte pōĩnēmōpa. ĩnīncque mīnitō Wængonguī ingante apænedinque, Wængonguī, bitō pōnō cæbī ate Pa-bodo mōnitō weca poncæcāīmpa, ante apæneedāni, ante nangūī āmōpa.

Mīnitō ĩmīnite Wængonguī waa cæcæcāīmpa, ante

²⁰ Wængonguī inguīpoga nānō badōnāmaī ĩñedē wēēñedē pōnī ānīncque edæ, Mōnō godongāmæ waa cæte quĕwengæīmpa, ante tōmengā nānō angāīnō bai cōwĕ nē badongāīngā inte ĩmaī pōnō cægacāīmpa. Edæ mōnō obegaidi bai ĩñōmonte Awēnē Itota ĩñōmō mōnō ĩmonte nē Aacā ĩñænēngā ĩngā inte tōmengā wepæ gowegāīmæ eyepæ pōnī godongā ate Wængonguī tōmengā ingante, Eyepæ ĩ, ānīncque, Nāni ōmæmōe, angā ĩñāni ōmæmongacāīmpa. Mānōmaī gānē pōnente nē cægāīngā inte Wængonguī ĩñōmō, ²¹ waa pōnī pōnongā ænte eyepæ entawēnīncque mīnitō ĩñōmō tōmengā nānō ānō bai cæcæmīnīmpa. Tōmengā Itota Codito tōnō godongāmæ cædinque pōnō cæcā ænīncque mōnō tōmengā nānō waa adoncooque entawengæīmpa, āmōpa. Itota Codito ĩñōmō ĩñōwopāmo incæ ĩncayāmāmo incæ cōwĕ nē tæī ěmōnongā inte ĩñāo ěmongā amōnīpa, ante mōnō tōmengā ingante

cōwĕ watapæ apænecæīmpa. Mānōmaī ingæīmpa, ante botō, Amĕē, āmōpa.

²² ĩñānāni ěñēedāni. Botō mānīnō tōmānō ante apænecæte ante wædænque pōnī yewæmōmōpa. ĩnīncque mānīnō botō ædæmō apænēdīnō ante mīnitō piyænē cædinque ěñēedāni, āmōpa. ²³ Mōnō tōnīñacā Tīmoteo tee mōnete wæyongante ĩñōwo ĩmpo cædāni gocantapa, ante apænebo ěñēedāni. Tōmengā botō weca quīngæ pongā ĩnīncque botō tōmengā tōnō guĕa mīnitō weca ěñacæ pōmaīmōnāpa. ²⁴ Mōnitō beyæ apænedinque mīnitō ĩmīnite nē aadāni ĩnānite, Waa quĕwencæmīnīmpa, ante apæneedāni. Ayæ adobai Wængonguī quīnāni tōmānāni ĩnānite, Waa quĕwencæmīnīmpa, ante mōnitō beyæ æedāni. Ayæ, Mīnitō ĩmīnite ante apænedinque Itadiabæ quĕwēnāni adobai, Mīnitō waa quĕwencæmīnīmpa, ante apænēdānīpa, ante āmo ěñēedāni. ²⁵ Mīnitō tōmāīnī ĩmīnite Wængonguī pōnō waadete cæcæcāīmpa. Mānīncque ante yewæmōmōpa.

Tantiago cadota ante nāno yewæmongainta

Tantiago iimāi yewæmongacāimpa

¹ Botō Tantiagobo iñōmō Mæmpo Wængonguī tōnō mōnō Awēnē Itota Codito inate nē cædōmo imopa. Idægoidi mīni cæbo tipæmpoga go mencabomīniya inte wabæca nāni quēwencabo wabæca nāni quēwencabo weca pangocæte godīmīni iñōmīnite botō waa pōnēmo inte iī yewæmōintaa yewæmōmopa.

Wængonguī nāno ēñēmāmo ante mōnō cængcāimpa, ante

² Botō tōniñamīni ēñēedāni. Quiēmē beyæ wæwente bamīni incæ mīnitō æyedēmē mānōmāi bamīni iñinque edæ māniñedē incæ cōwē, Mōnō watapæ toquinque impa, ante pōnēedāni. ³ Mīni wede pōnēnō æbānō i, ante edonque acāimpa, ante cædāni ate caate wæmīni incæte mīnitō, Mōnō caate wædō beyænque mōnō godōmenque pædinque wæntæye iñāmaī inte ee cæquimō imopa, ante do ēñēmīni. ⁴ Iñinque, Mōnō æmæwo pæcæimpa, ante cædinque mīnitō wæntæye iñāmaī inte ee cædāni. Mānōmāi cæte pæmīni iñinque, Mīni cædimāmo æbānō cæmīni iñinī, ante adinque edæ, Tōmānō waēmō cæmīni iñinīpa, ante abaimpa.

⁵ Mīnitō weca æcānō nānō ēñēmāmo wīi eyepæ ina adinque tōmengā, Pōnōmi ēñēmoe, ante Wængonguī ingante apænequēnengampa. Apæneyongā Wængonguī wæætē pōnō cæcā æncæcāimpa. Edæ Wængonguī iñōmō nē, Pōnōmi æmoe, ante ānongā ingante wæætē piinte ānāmaī inte godōnongā ingampa. Ayæ tōmānāni inānite pōnō cædinque tōmāā godōnongā ingampa. ⁶ Iñæmpa nē angā iñōmō wede pōnenguēnengā inte wīi æmæ pōnēninque apæncæcāimpa. Edæ nē æmæ pōnengā iñōmō gāwapæ æpæ woboyæ pæmāninque mæ conta mæ conta gopæ ocæmæ pō cæpæ nānō cægaimæ bai tōmengā adobai gocā ingampa. ⁷ Māningā iñōmō Wængonguī pōnongā æncæboimpa, ante ædō cæte iimāi ante pōnenguīgāā. Wængonguī edæ tōmengā ingante tōmāā godōnāmaī incæcāimpa. ⁸ Tōmengā mēnongā pōnente quēwengā ingampa. Æbānō cæcāā, ante ēñēnāmaī inongā inte ædō cæte waa cæquingāā.

⁹ Adocanque mōnō tōniñacā incæ imæca quēwēnāni nāni ēadincōo nē wīi eyepæ ēacā incæte tōmengā Wængonguī pōnō cæcā beyænque, Æbānō ēaboo, ante pōnēninque watapæ toquēnengā ingampa. ¹⁰ Wacā mōnō tōniñacā guiquēnē imæca quēwēnāni nāni ēadincōo nē ēacā incæte

tōmengā wæætē, Botō ōnōmoque imopa, ante pōnēninque watapæ toquēnengā ingampa. Edæ ongai ōnonque pododinique guīñē wæmpa bai tōmengā adobai wæncæcāimpa. ¹¹ Edæ nænque tamō tī nāwāñonte awæ guingo icate to aminte æmæwo wæmpa. Ongai yædōi gæuo odote wænīnque nānō waēmō ēnodī wo ēwente bapa bai nē ēacā iñōmō adobai ingampa. Tōmengā godonte æ godonte æ tæcæ cædinque quingæ wænīnque edæ dæ anguingā.

Mōnō caate wæpāmo

¹² Wængonguī ingante nē waadedāni inānite tōmengā wæætē, Mīni cōwē quēwenguinta, ante poganta bai mīnitō iimīnite pōnōmo æncæmīnimpā, ante angacāimpa. Māninta Wængonguī weca cōwē mōnō quēwenguinō impa. Iñinque waocā caate wæcā incæte tōmengā wæntæye badāmaī ingā iñōmō tōmengā nānō toquinque. Wæntæye iñāmaī inte ee cæcā adinque Wængonguī, Mīni cōwē quēwenguinta, ante tōmengā nānō angaiñō bai māningā ingante pōnongā æncæcāimpa. ¹³ Waocā nānō cæinēwente wædō beyæ, Wēnæ wēnæ cæboe, ante cædinque tōmengā, Wængonguī botō imote, Wēnæ wēnæ cæcæbiimpā, ante ingampa, ante wīi anguēnengā ingampa. Edæ Wængonguī ingante, Wēnæ wēnæ cæcæbiimpā, ante waocā ædō cæte anguingāā. Wængonguī wæætē wadāni inānite, Wēnæ wēnæ cæcæmīnimpā, ante ānāmaī inongā ingampa cæmīni. ¹⁴ Æcāmenque incæ, Wēnæ wēnæ botō cæinente wædō incæ ante waēmō impa, ante pōnēninque tōmengā do wēnæ wēnæ mōnō cæinente wædō beyænque wēnæ wēnæ cæinengā ingampa. ¹⁵ Yædēmadā wēñængā pæcā adinque ēñāquingā bai mōnō cæinēwente wæpāmo adobai entawente pætawēmō iñinque mōnō do wēnæ wēnæ cæmompā. Ayæ wēnæ wēnæ mōnō cæpāmo beyæ mōnō æmæwo wænguinque impa.

¹⁶ Botō nē waadete tōniñamīni ēñēedāni. Mīnitō nāmā incæ oda cædāmaī incæmīnimpā. ¹⁷ Ōnonque mōnō ænō ante mōnō waēmō ñāo ēmōnoncōo tōmancōo incæ mōnō Mæmpo Wængonguī ōnædē owote nē pōnōnongā ingampa. Mæmpo Wængonguī ōnædē owodinique apāidāni ināni badongacāimpa. Adocā nænque wēmō cæbāi wayōmō wayōmō go bai entawēnāmaingā ingampa. Tōmengā wæætē adodonque ingaingā ingampa. ¹⁸ Botō cæinēmopa, ante nē angaingā inte Wængonguī, Nāwangā botō angaiñō beyænque mīnitō botō wēñæmīni bacæmīnimpā, ante wāānā mangā bai cædinque mōnō imote pōnō badongacāimpa. Tōmengā nānō badongaincōo tōmancōo iñonte mōnō tānōmō inōmō imopa.

Wængonguī ingante mōnō nō ēñente cædō

¹⁹ Botō nē waadete tōniñamīni ēñēedāni. Wacā ñingā mīnitō tōmāmīni quingæ ēñgūēnēmīni imīnīpa. Mīnitō wæætē quingæ apænedāmaī inte adobaī quingæ piinte ināmaī ingūēnēmīni imīnīpa. ²⁰ Wængonguī, Nō cæte quēwēedāni, ante waa nānō cæinēmāmo ante waocā nānō pīimāmo beyæ wīi edæ cæcampa. ²¹ Mānōmaī beyæ mīnitō wentamō entawēninque mīni wīwa cædō tōmāā ñimpo cæedāni. Adobaī quiēmē mīni wēnæ wēnæ cæpāmo tōmāmāmo ñimpo cæte iedāni. Ayæ Wængonguī nānō angainō ante mīnitō mīmōnē nānō mingainō ante Ao ante gānē pōnente æncæmīnīpa. Edæ īi angainō beyænque mīnitō quēwēncæmīnīpa.

²² Mīnitō, Nāmā incæ oda cædāmaī ingæimpa, ante cædinque Wængonguī nānō angainō ante wīi ōnonque ēñēmīnīque inte wæætē, Ebānō ante ī, ante ēñente cæedāni. ²³⁻²⁴ Waocā nāmā awinca awocawæntaa adinque nāmā ate ate wadæ godinque, Quīnō baī intawo, ante nānō adinca do oda cæte wæcampa. Mānōmaī oda cæte wæcā baī Wængonguī nānō angainō ante nē ēñenganque wīi ēñente cæcā īñōmō tōmengā adobaī oda cæte wæcā ingampa. ²⁵ Wængonguī nōingā nānō wææ angainō ante nāni yewæmongainō ante nē ædæmō cōwē acā guiquēnē tōmengā īñōmō nānō ēñēnīnō ante wīi pōnente badāmaī inte wæætē cōwē ēñente cæcā īninque tōmengā mānōmaī cædinque nānō toquinque cæcampa. Wængonguī nōingā nānō wææ angainō beyænque waocā ñimpo cæte quēwengā ingampa.

²⁶ Wængonguī ingante botō nē ēñente cæbo imopa, ante pōnengā incæte tōmengā ōnonguēnēwa ñā cæguēnēwate baī cædāmaī inte wæætē wīwa tedecā īninque tōmengā nāmā incæ oda cæte gobaingampa. Ayæ Wængonguī ingante botō ēñente cæbo imopa, ante tōmengā nānō ānō ante ōnonque angā īmaingampa. ²⁷ Nōwadāni tōnō owæmpōināni nāni wæwēñedē mōnō tōmēnāni tōnō godongāmæ cæcæimpa. Ayæ adobaī īmæcaque ante quēwēnāni nāni wēnæ wēnæ cædimāmo baī mōnō, Wentamō badāmaī ingæimpa, ante wææ cæcæimpa. Mānōmaī cæmō īninque mōnō Mæmpo Wængonguī ayongante mōnō wapiticæ cædāmaī inte wæætē nō ēñente cæmō imopma.

2

Wacā ingante wadō wadō ate pōnente cædāmaī ingæimpa

¹ Botō tōniñamīni ēñēedāni. Mōnō Awēnē Itota Codito ñāō ēmonte nē apāigaingā ingante nē pōnēmīni inte waodāni inānite wadō wadō ate pōnente cædāmaī iedāni. ² Īmaī nāni cæbaī ante ōnōwēnence

pōnēedāni. Edæ onguīñængā nē ēacā īñōmō tōmengā nānō ōnongompo timpoi oodo badōī wempocā īninque waēmoncoo mongængā inte mīni a ongōñōmō guīi pongampa. Ayæ onguīñængā nē wīi eyepæ ēacā īñōmō pedæncoo mongængā inte mīni a ongōñōmō adobaī pongampa. ³ Adinque mīnitō waēmoncoo mongængā ingante, “Bitō īñōmō waa tæ contaimpaa tæ contae,” ante apænēmīni imīnitawo. Wæætē wīi eyepæ ēacā ingante, “Bitō māniñōmō adiyæ ongōe. Botō ōnōwa īñōmō tepataa tæ contae,” ante apænēmīni imīnitawo. ⁴ Mānōmaī apænēdinque mīnitō weca wīi godongāmæ wadō wadō ate pōnente cæbaīmīnitawo. Ayæ wēnæ wēnæ pōnēninque apænte āmīni babaiīmīnitawo.

⁵ Botō nē waadete tōniñamīni ēñēedāni. Wængonguī Awēnē Odeye ingante nē waadedāni inānite tōmengā, Botō pōnō cæbo ate mīnitō botō nempo cōwē quēwēncæmīnīpa, angacāimpa. Īmæca quēwēnāni weca māincoo wīi eyepæ ēadāni īñōnānite tōmengā, Mīni wede pōnēnō nangui ēwocadinque mīnitō botō angainō baī botō nempo quēwēncæmīnīpa, ante tōmēnāni inānite wīi apænte ægantawo. ⁶ Mīnitō wæætē wīi eyepæ ēacā ingante piinte tedemīni ate tōmengā guingo imonte badingā ingampa. Īñæmpa nē ēadāni guiquēnē mīnitō imīnite nāni wēnæ wēnæ cædinō beyænque wīi wæmīnitawo. Ayæ adodāni mīnitō imīnite apænte anguiñāni weca godoncæte ante wīi ænte godānitawo. ⁷ Ayæ mīnitō, Coditoidi imōnīpa, ante Codito waa pōni ēmōwo ante ēmōmīni īñōmīnite tōmēnāni adodāni incæ māniwo ante babæ āninque nē wēnæ wēnæ ānāni wīi inānitawo.

⁸ Wængonguī angā ēñēninque nāni yewæmongainō ante adinque mīnitō waa pōni Awēnē nānō wææ angainō ante nō ēñente cæmīni īninque waa cæbaīmīni imīnīpa. Īmaī ante yewæmonte impa. “Bitō nāmā ante pōnente, Nāmā waadebo imopa, ante nāmā bitō waadete pōnenganca wadāni inānite adonganca waadete pōnēe.” ⁹ Mānōmaī cædinque mīnitō māincoo ēacā ingante waa cæmīni incæte wīi eyepæ ēacā ingante wadō wadō ate pōnēmīni inte wīwa āmīni īninque wēnæ wēnæ cæmīni īmaīmīnīpa. Ayæ Wængonguī nānō wææ angainō ōnonque wido cæte baī cædimīni inte mīnitō wentamō mongæmīni īmaīmīnīpa. ¹⁰ Wængonguī beyæ Mōitee wodi nānō wææ yewæmongainō ante tōmānō ante æcāmenque nē ēñente cæcā incæte māniñō adodonque pōni incæ ēñēnāmaī cæcā inte tōmengā māniñō tōmānō ante ōnonque wido cæte baī cædingā inte wentamō mongængā ingampa. ¹¹ Edæ Wængonguī, “Nānōogæ īnāmaī īñongante godō guēa mōnāmaī iedāni,”

ante nē angaingā inte tōmengā adocā godōmenque īlmaī angacāimpa, “Wacā ingā wæñōnāmaī īedāni.” Minitō wacā nānōogæ īñongante godō guēa mōnāmaī īmīni incæte wacā ingante wæñōmīni īninque mīnitō Wængonguī nānō wææ angainō ōnonque wido cæte bai cædimīni inte wentamō mongæmīni īmaimīnīpa.

¹² Wængonguī nānō apænte anguiōnæ mōnō īmonte tōmengā nānō wææ angainō bai cæcæcāimpa. Māninō nānō wææ angainō beyænque waocā űimpo cæte quēwengā ingampa. Īninque mīnitō tedemīni incæ cæmīni incæ, Cōwē mānōmaī impa, ante pōnēninque tedecæmīnīpa. Adobaī ante cæcæmīnīpa. ¹³ Wadāni wæwēnāni īñōnānite æcāmenque wīl waadete godō waa cædingā ingāā, ante Wængonguī wæætē tōmengā ingante godō waadete waa cædāmaī inte apænte āninque pancæcāimpa. Wadāni wæwēnāni īnānite æcāmenque guiquēnē nē godō waadete waa cædingā īñongante Wængonguī wæætē tōmengā ingante nānō apænte anguiōnæ godō waadete waa cæcæcāimpa.

Wængonguī ingante pōnēninque mōnō cæquēnēnō

¹⁴ Botō tōniñamīni ēñēedāni. Waocā, Botō Wængonguī ingante wede pōnēmo īmopa, angā incæte tōmengā nānō waa cædinō wæætē dæ ā īninque tōmengā māninō, Wede pōnēmpoa, ante nānō ānō beyænque ædō cæte wæñāmaī quēwenguiñgāā. ¹⁵ Īlmaī nāni cæbaī ante ōnōwēnenque pōñēedāni. Wængonguī ingante wede pōnengā īñōmō onguiñgā ingæ onquiñgā ingæ æcāmenque incæ tōmengā weocoo tōnō cænguī ōmaacā ingampa, ¹⁶ adinque mīnitō weca adocanque tōmengā ingante, “Waa goe, āmopa. Bitō, Yoguidāmaī, ante weocoo wēñæe, cænguī eyepæ æninque cæte,” ante angā incæte nē ōmaacā nānō ænguēnēnō ante edæ tōmengā ingante godōnāmaī īninque tōmengā waa cæcantawogaa. ¹⁷ Adobaī īlmaī impa. Mōnō waa cædinō dæ ā īninque Wængonguī ingante mōnō wede pōnēnō incæ ōnonque bapa.

¹⁸ Incæte wacā īlmaī anguingā. “Bitō Wængonguī ingante tōmēmi wede pōnēnō ēabi īmipa. Botō guiquēnē tōmēmo waa cædinō ēabo īmopa,” ante āñongā botō wæætē, Bitō nē cædāmaī īnōmi inte Wængonguī ingante bitō wede pōnēnō ante botō īmote odōmōmi aboe, āmopa. Odōmōmi adinque botō guiquēnē botō cædinō ante odōmōmo adinque bitō wæætē botō wede pōnēnō edonque pōni abaiimpā. ¹⁹ Wængonguī nāwangā adocanque ingaingā ingampa. Bitō mānōmaīnō ante pōnēmi inte waa pōni pōnēmi īmipa. Wēnæidi diyæ adodō ante pōnēnānīpa tōō. Incæte ancaī

guiñente do do wæate wædānīpa. ²⁰ Bitō mānōmaīnō ante nē ōnonque tedebi īmi ēñēe. Botō, Mōnō waa cædāmaī īmō īninque Wængonguī ingante mōnō wede pōnēnō incæ ōnonque īmaimpā, ante odōmōmo ate bitō edæ Ao ante ēñenguiñmīyaa. ²¹ Edæ mōnō docā Abadāō wodi Wængonguī nānō āmaī cædinque tōmengā wengā onguiñgā Itæca ingante æninque iya tāimoga cōnōninque wænoncæ cæyongante Wængonguī adinque, Bitō nō cæte entawēmi āmopa, ante apænegacāimpa. Abadāō wodi nānō cædinō beyænque Wængonguī mānōmaī angacāimpa. ²² Bitō ēñēnāmaī īmitawo. Abadāō wodi edæ Wængonguī ingante wede pōnēninque ēñente cægacāimpa. Wīl ēñente cægaingā inte bai tōmengā Wængonguī ingante nānō wede pōnengainō ōnonque pōnēmaingā incægacāimpa. Ayæ waa nānō cægainō beyæ Abadāō wodi nānō wede pōnengainō eyepæ pōni bagatimpā. ²³ Wængonguī angā ēñente nāni yewæwæmōngainō bai īninque batimpā. Īlmaī ante impa. “Abadāō īñōmō Wængonguī, Botō īlmaī pōnō cæcæboimpā, ante nānō angainō ante pōnengacāimpa. Īninque Wængonguī, Mānōmaī pōnēmi beyæ bitō botō ayōmo nō cæte entawēmi īmipa,” ante tōmengā ingante wæætē pōnō angacāimpa. Ayæ Abadāō, Wængonguī æmigo ingampa, ante angadānīpa.

²⁴ Bitō ēñēnāmaī īmitawo. Waocā Wængonguī ingante wīl nānō wede pōnēnō beyænque wæætē, Tōmengā æbānō waa cæcāā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa īnate da godōnāni gote pōñōnate Adacaba wodi nē towente quēwengā incæ, Botō oncōnē guieda, ante tōmēna īnate wē wodongacāimpa. Ayæ, Wadāni tōmēna īnate bæi ongōnāmaī incædānīpa, ante, Wadō taadō goeda, ante da godongā gogadāimpa. Mānōmaī cæcā adinque Wængonguī, Bitō cædinō beyænque bitō botō ayōmo nō cæte entawēmi īmipa, ante Adacaba ingante adobaīnō ante pōnō angacāimpa. ²⁶ Mōnō baō ōmæwocacā inte do wænte ī bai Wængonguī ingante mōnō waa cædāmaī wede pōnēnō adobaī do wæningā bai inte edæ ōnonque impa.

3

Mōnō ōnonquēnēwa

¹ Botō tōniñamīni ēñēedāni. Mīnitō weca wīl tæiyæñāni, Nē odōmonte apænemōni bacæmōnīpa, ante baiñente wæquēnēnāni incædānīpa. Edæ wadāni īnānite pōnōmenque apænte āninque Wængonguī wæætē mōnō nē odōmonte apænemō īñōmonte, Æbānō odōmonte apænemūni, ante mōnō īmonte godōmenque apænte

äninque pancæcäimpa. Mīnitō do ēñēmīnīpa.
² Mōnō tōmāmō nanguī ægodawate tæi go
 wæninque bai oda cæmō īmōmpa. Nē tedecā
 iñōmō tōmengā, Æbānō ante tedebōo, ante
 tōmengā ōnonguēñēwa cōwē wææ aadinque
 tōmengā wēnæ wēnæ ānāmaī īninque nōingā
 cæbaingā ingampa. Ayæ wēnæ wēnæ
 cædāmaī incæboimpa, ante nāmā baonga
 tōmāo wææ aate quēwēnongā ingampa.

³ Cabayo mōnō īmonte ēñente cæcæcäimpa,
 ante tæinta badōinta ōnōne da wēnemō
 ate, Cabayo baō tōmāñō incæ iñāimæ
 iñāimæ gocæcäimpa, ante cæmō īninque
 cabayo do ēñente gocampa. ⁴ Īmaīnō
 ante ñænængade wipo ante adobaī ante

pōñeedāni. Ñænængade pōñi wipo incæ
 woboyæ nanguī pæmænte gopa incæte
 wipo nē dadongā nānō cæinēnō bai, Ædōnō
 dadiimæ ædōnō dadiimæ wiyate goquīī,
 ante guiyā awæmpa inte wiyate cæcā gopa.
⁵ Ayæ adobaī mōnō baō tōmāo ēñayōmō
 mōnō ōnonguēñēwa guiyā enguēñēwamō
 īmōmpa. Incæte mōnō ōnonguēñēwa inte
 tededinque, Mōnō nanguī cæmōmpa, ante
 tedewēmōmpa. Ñænængade pōñi ōmædē
 incæ amīmō bayedē guiyā gonga beyæ
 ōmædē tōmāo gonga bæcodote bapa. ⁶ Ayæ
 mōnō ōnonguēñēwa adobaī gonga bæcodote
 bai tedepa. Mōnō baō tōmāo ēñayōmō mōnō
 ōnonguēñēwa tōmāo mōnō wīwa tedewen-
 guinque wēnæ wēnæ enguēñēwamō īmōmpa.
 Waomō incæ māninguēñēwa beyænque
 mōnō baō tōmāo inte ēñēnāmaī cæmōmpa.
 Ayæ gonga wacæ tæñōmonte bæcododāni bai
 ado ōnonguēñēwa beyæ mōnō quēwenganca
 tōmanganca wo ēwente īmōmpa. Edæ īi gonga
 tadōmengadēnguipodē ōñonte ō ænte wacæ
 tæñōmonte bæcodote bai cædinque wēnæ
 incæ mōnō īmonte cæcā beyænque mōnō
 wīwa tedewēmō īmōmpa.

⁷ Babæidi incæ ōōmā ēadāni incæ
 tæntæidi incæ æpæñē quēwēnāni incæ
 quingāñōidi incæ tōmāñāni īnānite waocā,
 Botō pæpogate cæñināni bæcæminimpa,
 ante cæcā ingampa. Waocā doyedē
 nānō cægai beyænque cæñināni bate
 quēwengadānimpa. ⁸ Īñæmpa æcānō, Mōnō
 ōnonguēñēwa pæpogate bai bæcæimpa, ante
 cædaa edæ dæ angampa. Edæ, Babæidi cōwē
 incæmōnimpa, ante cæñināni badāmaī īnāni
 bai mōnō ōnonguēñēwa adobaī wēnæ wēnæ
 ī īninque ædō cæte waa tedemōō. Wæætē
 mōnō ōnonguēñēwa nanguī wænguimæ
 enguēñēwamō bai īmōmpa.

⁹ Māninguēñēwa inte mōnō Mæmpo
 Wængongui ingante, Bitō tæiyæ waēmō
 imidō anguēñē, ante waa apænemōmpa.
 Wæætē waodāni Wængongui tōmengā nānō
 ingai bai nānō nē badongaināni iñōñānite
 tōmēnāni īnānite ante mōnō adoguēñēwa
 inte wēnæ wēnæ apænemōmpa. ¹⁰ Ado

ōnōne incæ wade wade ante mēnea ante
 apænemōmpa. Adodeque ante waa impa.
 Adodeque ante wēnæ wēnæ impa. Botō
 tōñiñamīni ēñēedāni. Māninō bai mōnō
 edæ wīi cæquēñēmō ingæimpa. ¹¹ Æpæ
 tayōmō ado tayōmō ædō cæte waēmōmæ
 wentamōmæ āññōmonque ta goquimææ.
¹² Botō tōñiñamīni ēñēedāni. Igowæ nāni
 āwæ incayō odibomō nāni āñōmō ædō cæte
 incaquīī. Yowewæ incayō īigo mæñēca ædō
 cæte incaquīī. Adobaī ado tayōmō ædō
 cæte waēmōmæ wentamōmæ āññōmonque
 ta goquimææ.

Mōnō nō ēñēmāmo

¹³ Mīnitō weca æcānō nō ēñengā in-
 gantawo. Tōmengā iñōmō, Nō ēñēmo
 īmōpa, ante wadāni ēñencædānimpa, ante
 cædinque tōmengā nānō waa quēwēnō
 inte odōmoncæcäimpa. Ayæ tōmengā
 nō ēñengā incæ, Botō ōñōmōque īmōpa,
 ante pōñēninque tōmengā nānō cædinō
 beyæ odōmongā acædānimpa. ¹⁴ Mīnitō
 guiquēñē wacā quincōo adinque piinte
 entawēmīni ayæ nāmanque ante, Mōnō
 ñænæmō badinque waa quēwengæimpa,
 ante pōñente entawēmīni īninque mīnitō nō
 ēñēmīni incæ, Mōnō waa cæmōmpa, ante
 ædō cæte anguimīni. Ayæ māñōmaī bai
 godōmenque entawēmīni īninque nāwangā
 mīni anguēñēnō ante edæ Baa ānāmaī īedāni.
¹⁵ Māninō ēñēmāmo wīi Wængongui nānō nō
 ēñēmāmo ī. Wæætē īi inguipogaque ante
 quēwengā inte waocā mā pōñēninque wēnæ
 nānō ēñēmāmo ante entawengā ingampa.
¹⁶ Edæ waocā æyedēmē wacā quincōo
 adinque piinte entawengā ayæ nāmanque
 ante, Botō ñænæmō badinque waa
 quēwencæboimpa, ante pōñente entawengā
 iñōmō tōmengā ædō cæte tōingā pōñente
 cæcāā. Īñæmpa quēmē nāni wēnæ wēnæ
 cæpāmo ante cæcampa.

¹⁷ Waocā Wængongui nānō nō ēñēmāmo
 ante nē entawengā guiquēñē waēmō
 entawengā ingampa. Ayæ wacā ingante
 cōwē piyæñē cæte quēwēnongā ingampa.
 Tōmengā nē waadete pōnengā inte wacā
 ingante waa ēñēnongā ingampa. Wacā
 ingante ēñente cædongā ingampa. Tōmengā,
 Wæwēñāmaī incæbimpa, ante wacā ingante
 godō waadete waa cædongā ingampa.
 Ayæ, Quinō waa inguīī, ante māñinō ante
 cædongā ingampa. Nē waodāni īnānite
 wadō wadō ate pōñente cædāmaī inte
 tōmengā nō pōñente quēwēnongā ingampa.
¹⁸ Wadāni īnānite, Botō piyæñē cæcæboimpa,
 ante nē cæcā iñōmō tōmengā nānō piyæñē
 cædinō beyæ tōmēmō nē mīnongā bai
 ingampa. Tōmengā nānō piyæñē cædinō
 beyæ waodāni wæætē, Quinō nō cæte impa,
 ante cædāni īninque tōmengā edæ amīñayedē
 tōmēmō tā pete ængā bai incæcäimpa.

4

Inguipoga nāni quincōo ante pōnēnāmaī inccēmōmpa

¹ Mīni cabo quīnō beyæ ante guēa wæætēdō wæætē pīinīnque wæætē godō wæætē godō ānewēmīnitawo. Mīnitō nāmā wadō wadō mīni cæinēnō ante entawente guēa cæte quēwēmīni beyænque cōwē godongāmæ mīni pīinte quēwēngīnque īmīnīpa tōō. ² Mīnitō æīnente wæmīni incæte ænāmāī īmīnīpa. Īnīnque nē ēacā ingante wæñōmīni incæ tōmēngā nānō quincōo ante æīnēmīni incæte mīni æīnēnō, ante ænāmāī īmīnīpa. Mānōmaī beyæ mīnitō wæætē godō wæætē godō ānewēnīnque guēa wæætēdō wæætē pīinīnque guēadō guēa cæte quēwēmīni īmīnīpa. Mīni ānō ante mīnitō, Pōnōmī æmōnie, ante mīnitō Wængonguī ingante apænedāmāī īmīni inte mīni ænāmāī quēwēngīnque īmpa. ³ Mīnitō Wængonguī ingante mīni ānō ante apænēmīni incæte wēnæ wēnæ ante pōnēnīnque apænēmīni beyæ ænāmāī īmīnīpa. Edæ Wængonguī nānō pōnōnī ænīnque mōnō edæ nāmanque pōnente tote quēwēngæīmpa, ante æīnente wæmīni inte ænāmāī īmīnīpa tōō.

⁴ Waocā nānōogæ ingante wido cæcā bai mīnitō adobai Wængonguī ingante wido cæmīni īmīnīpa. Mīnitō ēñēnāmāī īmīnitawo. Inguipoga nāni quincōo ante mōnō pōnēnō beyæ mōnō Wængonguī ingante pīnte īmōmpa. Incæte, Inguipoga nāni quincōo ante nē pōnencæboīmpa, ante æcānō angā Wængonguī ingante pīnte bacæcāīmpa. ⁵ Wængonguī angā ēñēnīnque nāni yewæmōngainō īīmaī ante ōnonquedō ante intawogaa. “Wængonguī cæcā beyænque mōnō tōmēngā Ōnōwoca ingante ēwocate quēwēmō īmōmpa. Īnīnque mānīwoca mōnō īmōnte waadete pōnēnīnque, Botō imote waadete pōnēngēnēmīni īmīnīpa, ante wæætē edæ godō pīinte acā ingampa.” ⁶ Incæte tōmēngā mōnō īmōnte godōmenque waadete pōnō cædinque mōnō tōnō godongāmæ cædongā ingampa. Mānōmaī beyæ Wængonguī angā ēñēnte nāni yewæmōngainō īīmaī ante īmpa. “Nāmanque ante, Mōnitō gomōnga waa cæmōnī īmōnīpa, ante nē pōnēnāni īnānite Wængonguī Baa angampa. Wæætē edæ, Mōnitō ōnōmōnīque bai īmōnīpa, ante nē ānāni īnānite tōmēngā pōnō waadete cæcampa.”

⁷ Mānōmaī beyæ mīnitō Wængonguī ingante ēñēnte cædāni. Wēnæ ingante Baa ante quēwēdāni. Baa āmīni īnīnque tōmēngā nānēnē wodīi winōmaīngampa. ⁸ Wængonguī gāmæñō pōedāni. Pōmīni ate tōmēngā wæætē mīnitō weca poncæcāīmpa. Mīnitō wēnæ wēnæ cæmīni īnōmīni inte ōnōmpo mempote bai waēmō pōnī quēwēdāni. Ayæ,

Wængonguī ingante waadete pōnēmōpa, ante āmīni incæ adobai inguipoga nāni quincōo pōnēmīni inte mīnitō mēnōnga ante pōnente quēwēnōmīni īmīnīpa. Īnīnque edæ mīmō nā mēnōngate bai cædinque tōīngā pōnente entawēmīni baedāni. ⁹ Mīni nāmā wēnæ wēnæ cædinō ante pōnēnīnque mīnitō, Ancaa wæwente awædō, ante wæedāni. Mīnitō Ca ca tote quēwēnō nīmpo cædinque Ca ca wædinque edæ wæwente quēwēdāni. ¹⁰ Mīnitō incæ, Wēnæ wēnæ cæmōnīpa, ante ōnōmōnīque īmōnīpa, ante Wængonguī ingante āñōmīni tōmēngā wæætē, Wadāni mīnitō īmīnite waa acædānīmpa, ante mīnitō īmīnite ængō cæte bai cæquīngānō angūēnē.

Mōnō tōnīñacā ingante apænte ānāmāī inccēmōmpa

¹¹ Botō tōnīñamīni ēñēdāni. Mīnitō wacā ingā wacā ingā wēnæ wēnæ ante apænedāmāī īedāni. Æcānō tōmēngā tōnīñacā ingantedō ante wēnæ wēnæ āna ayæ tōmēngā ingante, Wēnæ wēnæ cæbīpa, ante æcānō apænte āna īna mānīngā Wængonguī nānō wææ angāinō incæ wēnæ wēnæ ante apænecampa. Ayæ Wængonguī nānō wææ angāinō ante wēnæ wēnæ īmpa, ante apænte angampa. Wīī tōmēngā nānō ēñēnte cæquinque Wængonguī nānō wææ angāinō ante apænte angampa. Wæætē edæ, Mānīnō ante nē apænte āmo īmōpa, ante bai cæcampa. ¹² Wængonguī tōmenganque nānō wææ angāinō ante nē angāingā ingampa. Mānōmaī beyæ tōmēngā adocanque nē apænte angūingā īnōngāīmpa. Adocā pōnō cæcā beyænque, Botō æmo beyænque quēwēngūnāni, ante cædongā ingampa. Adobai tōmēngā apænte angā beyænque, Wadāni wo ēwente bacædānīmpa, ante cædongā ingampa. Bitō guīquēnē nē angāīmi īmpa diyæ wacā ingante apænte angūēnēmi īmīi.

Baānæ ate æbānō baquīī, ante Wængongūnque ēñēngā

¹³ Mīnitō nōwo botō imote ēñēdāni. Mīnitō nē īīmaī ante tedēmīni īmīnīpa. “Nōwoōnæ incæ baānæ ate incæ mōnitō īī wadāni quēwēñōmō goquīmōni īmōnīpa, ante mānīñōmō godīnque adoque wadepo īñōnte mōnitō godōnte ængūinta æncæte ante cæquīmōni īmōnīpa,” ante āmīni īmīnīpa. ¹⁴ Īñæmpa, Baānæ ate æbānō bacæīmpa, ante tōmāā ēñēnāmāī īmīnīpa. Cōwē quēwēngūīmōmpa diyæ ēñēngūīmōō. Awæñæcaque owo bogūīmā nænque tamōnīnque quīngæ dæ ba bai mōnō quēwēnō adobai do dæ bacæīmpa. ¹⁵ Mīnitō guīquēnē īīmaī ante angūēnēmīni īmīnīpa. “Wængonguī Ao angā īnīnque mōnitō quēwēngūīmōni īmōnīpa. Ayæ Ao angā īnīnque mōnitō īī waa cæquī cæcæmōnīmpa.”

16 *Iñæmpa* munitō, Tōmēmōnique āninqe cæcæmōnimpā, ante pōnēninque tedete quēwēnōmīni imīnīpā. Mānīnō ante tōmānō wēnæ wēnæ impā. 17 *Waocā*, *Æbānō* wāa impā, ante ēñengā incæte cædāmaī ingā inte māningā wēnæ wēnæ cæcā ingampā.

5

Māincoo nē ēadāni nāni pōnenguēnēnō

1 Munitō māincoo nē ēamīni iñōmō ñōwo ēñēedāni. Munitō nanguī Ca ca wæedāni. Edæ, Mōnō caate wæquinque nanguī ingæimpā, ante tedecōninque Ca ca wæcæmīnimpā. 2 Munitō māincoo ēadīncoo do wote batimpā. Ayæ munitō wæmoncoo tōmancoo cayæ ade cænimpā. 3 Munitō oodo tōnō padata tæinta to tamōninque bai batimpā. Mānī to tamōnī beyæ mīni wēnæ wēnæ cædinō edonque pōnī odōmonte ingæimpā. Ayæ quincōomē gonga bæcodōñōmō concædinque æmæwo gonte ba bai munitō īi to tamōnī beyæ mīni baō incæ adobaī æmæwo gonte ba bai bacæimpā. *Iñæmpa* iimæca wodo iinque bayedē incæ tōmēmīni māincoo ēadīncoo do wote bæquincoo gæte da wente cæmīnipææ.

4 *Aedāni*. Wadāni edæ tōmēmīni quēwencodēncoo cædināni iñōnānite munitō, Paga, ante mīni godonguēnenta pæ gom-podinque godōnāmaī imīnitapā. Iinque ænāmaī ināni munitō imīnitedō ante piinte wædinque, Nē ēadāni iñōmō, Mōnītō cædinō beyæ ante dicæ pōnōnāni æntamōniyaa, ante wædōnānimpā. Mōnō Awēnē nē adocanque Tōmāā Cægaingā iñōmō nē cædināni nāni wædinō do ēñēningā ingampā. 5 Iimæca quēwēñedē munitō quincōo wæmoncoo tōmancoo mante quēwēmīni inte munitō cōwē, Nāmā mōni watapæ tote quēwægæimpā, ante quēwēñimīni imīnīpā. *Waocā* nānō wænongā wænguionæ iñonte cæningā nānō wænguinque oguīmo pōnī ba bai munitō cæningā bai adobaī oguīmo pōnī bamīni imīnitapā tōō. Mānīōnæ edæ do batimpā. 6 Wadāni nō cæte quēwēnāni munitō imīnite Baa ānāmaī iñōnānite munitō iñōmō, Mīni pante wæquinque wēnæ wēnæ cædānīpā, ante wapiticæ apænte āmīni inte tōmēnāni inānite wænōmīni wænānitapā.

Mōnō ee cæpāmo ayæ Wængonguī ingante mōnō apænedō

7 Mānōmaī beyæ botō tōnīfamīni ēñēedāni. Munitō mōnō Awēnē nānō pōnguinganca ante wæntædāmaī inte ee cæte wānō cōnōedāni. Aedāni, Nē quiyacā tōmēmō wæænte ate onguipo cōñe ba ate, Tā bocate pæquī, ante cōōnæ tedænque ee ongongampā. Cōōnæ tedæ iinque baganca amiña bayedē wæmō pōnī nānō tōmēmoncoo tā pete gæcæte ante wīi ee ongongantawo. 8 Mōnō Awēnē nānō

pōnguionæ oo pōnī impā, ante munitō adobaī ee cæte wānō cōnōedāni.

9 Botō tōnīfamīni ēñēedāni. Munitō wacā ingā wacā ingā wæætedō wææte, Wīwa cæcampā, ante godō ānāmaī iedāni. Munitō mānōmaī cæmīni iinque Wængonguī wææte munitō imīnite apænte ante pāmaingampā. Edæ mōnō Apænte Angu-ingā oo poncæcāimpā cæmīnī. 10 Botō tōnīfamīni ēñēedāni. Wēñēñedē Wængonguī beyæ nē apænegaināni iñōmō tōmengā ēmōwo apænedinque wæwēnāni incæte wæntædāmaī inte ee cæte quēwengadānimpā, ante pōnēninque munitō tōmēnāni nāni cægaī bai adobaī cæedāni. 11 Wadāni wæwēnāni incæte wæntæye ināmaī inte ee cædāni iinque nāni toquinque impā, ante mōnō pōnēnō ante do ēñēmīnīpā. Docā Cōba wodi iñōmō tōmengā nanguī pōnī wæwengā incæte wæntædāmaī inte piināmaī ingacāimpā. Mānīnō ante do ēñēmīnīni inte ayæ tōmengā nānō wæwēñedē iinque ba ate Wængonguī æbānō tōmengā ingante nanguī godongā ængaingā ingacāimpā, ante adobaī ēñēmīnitawo. Edæ waodāni wæwēnāni iñōnānite mōnō Awēnē Wængonguī ædæmō waadete wāa cædongā ingampā.

12 Botō tōnīfamīni ēñēedāni. Wadō mīni pōnēnō ante pōnōmenque pōnēninque munitō iimāi ante godōmenque pōnēedāni. Munitō ānō nāwāngā impā, ante wadāni pōnecædānimpā, ante cædinque, Botō ānō nōingā baquinō anguēnē, ante ānāmaī iedāni. Edæ, Ōōnæ beyænque iimæca beyænque quēmē beyænque mōnō apænemōnō nāwāngā baquinō anguēnē, ante tōmānō ante edæ apænedāmaī iedāni. Munitō wææte Ao ānēmīni inte “Ao” ante māninque æedāni. Ayæ munitō Baa ānēmīni inte “Baa” ante māninque æedāni. Edæ wīi mānōmaī cæmīni iinque Wængonguī wææte munitō imīnite apænte ante pāmaingampā.

13 Munitō wæwēmīni iinque Wængonguī ingante apænequēnēmīni imīnīpā. Munitō watapæ tomīni iinque Wængonguī ingante, Bitō tæiyæ wæmō imidō anguēnē, ante āmotamīni ancæmīnimpā. 14 *Æcānō* munitō weca wēnæ wēnæ ina iñōmō tōmengā Codito ingante mīni godongāmæ pōnencabo iñōmīnite nē aadāni nāni Picæncabo mīni ānāni inānite, Pōedāni, ante aa pequēnengā ingampā. Aa pecā pōnāni ate tōmēnāni Awēnē Itota ēmōwo ante apænedinque wædænque oguī wapæ æninque nē wēnæ wēnæ inongā ingante oo paacædānimpā. Ayæ adoyedē wēnæ wēnæ inongā ingante nāni oo paayedē tōmengā beyæ ante Wængonguī ingante apænecædānimpā. 15 Ayæ, Wængonguī ingante apæneyōmonte tōmengā ēñengampā, ante wede pōnēninque apænemō beyænque waocā nē wēnæ

wēnæ iningā incæ edæ gancaæ bacæcäimpa. Wængongui tömengä ingante pönö cæcä ate waa ba ñäni ömæmoncæcäimpa. Ayæ adocä nänö wēnæ wēnæ cædinö beyæ wēnæ wēnæ ingä inique Wængongui tömengä nänö wēnæ wēnæ cædinö adinque ñimpo cæcä quëwëmaingampa. ¹⁶ Mänömaï beyæ minitö wacä ingante wacä ingante apænedinque, Botö wiwa cædimö inte wæbopa, ante æedäni. Mänömaï cædinque minitö, Gancaæ bacæmönimpa, ante wacä beyæ ante wacä beyæ ante Wængongui ingante apæneedäni. Waocä nē nō cæte quëwënongå iñömö Wængongui ingante apænedinque edæ tæi piñænte apænecä ingampa. Mäningä nänö apænedö beyænque Wængongui cæcæcäimpa. ¹⁷ Ediya wodi mönö waomö imö bai tömengä adobai ingacäimpa. Incæte tömengä Wængongui ingante, Cöönæ ämi cædämaï ingæimpa, ante ædæmö apænecä ate mēa go adoque tæcæ wadepo ganca edæ cöönæ cædämaï ingatimpa. ¹⁸ Ayæ ate tömengä, Cöönæ ämi cæcæcäimpa, ante Wængongui ingante wæætë apænegacäimpa. Apænecä ate öönædë inö wææ cöönæ cægatimpa. Cöönæ wææ cæ ate onguipoga tömëmö do tä bocate pægatimpa.

¹⁹ Botö tönifiamini ëñeedäni. Minitö weca æcämenque nō taadö oda cæte gocä adinque wacä tömengä ingante ocæ ëmænte mämongä ponguënengä ingampa. ²⁰ Iïmaï pönëedäni. Nē wēnæ wēnæ cæcä wapiticæ taadö gocä adinque æcämenque tömengä ingante nō taadö inö ocæ ëmænte nē mämongä ingää tömengä mämongä beyænque nē wapiticæ gocä iñömö æmæwo nänö wænguënënö ñimpo cæte edæ quëwencæcäimpa. Ayæ nangui pönï nänö wēnæ wēnæ cædinö incæ wadæ cæte ingæimpa, ämopa. Mäninque ante yewæmömopa.

1 Pegodo cadota ante nānō tānōta yewæmongainta

Waa quēwencæmininpa, ante

¹ Botō Pegodobo Itota Codito nānō nē da godongaimo inōmo inte nē yewæmōmo imopa. Minitō iñōmō tōmēmīni ōmæ quēwēnāmaī imīni inte nāwæ godinque wadāni nēmæ ponte quēwēmīni inte pancamīniya Pontobæ quēwēñōmīni wamīni guiquēnē Gadatiabæ quēwēmīnīpa. Wamīni Capadotiabæ quēwēñōmīni wamīni guiquēnē Atiabæ quēwēmīnīpa. Wamīni guiquēnē Bitīniabæ quēwēmīnīpa. Mānōmaī wayōmō wayōmō quēwēmīni iñōmīnite botō, Acæmininpa, ante yewæmōmopa. ² Mæmpo Wængongui iñōmō mīnitō imīnite wēēñēñedē pōni do adinque, Minitō Itota Codito ingante nē ēñente cæmīni bacæmininpa, ante apænte ængacæmpa. Ayæ, Botō ayōmo mīnitō tæiyæ waēmō ēwocamīni bacæmininpa, ante cædinque Wængongui Ōnōwoca incæ Itota wepæ inte pōnō ñā mēnongacæmpa. Mānōmaī cæcā bagaimīni iñōmīnite botō ñōwo iñōmō edæ, Wængongui nangui waadete pōnō cæcā ate mīnitō nē gānē pōnēmīni bacæmininpa, ante yewæmōmopa.

Watapæ bacæmpa, ante pōnēninque quēwēmōmpa, ante

³ Itota Codito Wæmpocā iñongante Itota incæ, Botō Wængonguīmi inōmi imipa, ante Wængongui ingante waa apænecampa. Adocā iñōmō mōnō Awēnē Itota Codito wænte ōñōñongante, Nāni ōmæmōe, angā ñāni ōmæmongacæmpa. Tōmēngā ñāni ōmæmongā beyænque Wængongui mōnō imonte adobaī pōnō cæcā ate mōnō mem-poga ēñate baī inōmō inte edæ, Mōnō mūimō quēwēninque watapæ quēwengæmpa, ante pōnente quēwēmōmpa. Ininque mōnō iñōmō Wængongui ingante apænedinque, Bitō tæi ēmōnōmi inte waa pōni cæbi æmōnīpa, ante edæ watapæ apænecæmpa.

⁴ Ayæ Wængongui, Incayæ ate mīni ænguīncoo, ante ōōnædē do edæ cō cæte mangampa. Mānīncoo iñōmō ñōmāadāmaī incoo ininque cōwē wentamō badāmaī incoo inte edæ wodāmaī inuīncoo ingæmpa.

⁵ Inguīpo pedænguīpo ininque bayedē edæ Wængongui pōnō ængā beyænque mōnō cōwē quēwenguīnō ante edonque pōni acæmpa. Ininque mīnitō wede pōnēmīni beyænque mīnitō quēwenguīmāmo ininque baquinganca Wængongui nē tæi piñænongā inte edæ mīnitō imīnite wææ gompcampa.

⁶ Mīnitō ñōwo wantæ iñō incæ quiēmē beyænque wēnæ wēnæ bate wæmīni incæte

Wængongui pōnō wææ gompcā beyænque edæ watapæ tomīni imīnīpa. ⁷ Oodo waēmō bamongæmpa, ante waodāni gongapamō godō aca podōnāni ate odoque badinque waēmōnca pōni ongoncāpa. Incæte oodo iñōmō Incayæ ate ōmæte ēwente ate edæ dæ bacæmpa. Oodo mīni æinēnonca waēmōnca i iñonte mīni wede pōnēnō iñōmō edæ godōmenque waēmō pōni impa. Ininque mīni wede pōnēnō iñōmō wīi wido cæqui impa. Cōwē edæ ongongæmpa. Wæætē, Mīni wentamō entawēñinō edæ dæ go ate mīni wede pōnēnonque edæ waēmō pōni entawencæmininpa, ante cædinque Wængongui pōnō angā ate mīnitō gonga gonte caate baī wæminīpa. Mānōmaī mīni caate wædō beyænque edæ godōmenque wede pōnēmīni bamīnīpa. Ininque Itota Codito mōnō weca ponte a ongōñongante mīnitō cōwē wede pōnēmīni inte tōmēngā ōnōwa gāānē ædæ wæante apænedinque, Nē tæi ēmōnōmi inte bitō waa pōni cæbi æmōnīpa, ante watapæ apænecæmininpa, ante Wængongui cæcampa.

⁸ Itota Codito ingante mīnitō awinca adāmaī inīmīni incæte tōmēngā ingante cōwē waadete pōnēmīnīpa. Edæ ñōwo ganca adāmaī inīmīni inte mīnitō tōmēngā ingante wede pōnēninque mīni ñāō baī entawenguīnque watapæ todinque æbāmē ante tomīni imīnīpa. ⁹ Ōnōwoca mīni ēwocate quēwenguīnō ante æncæte ante wede pōnēmīni inte mīnitō ñōwo iñōmō edæ do æmīni imīnīpa.

¹⁰ Wængongui beyæ nē apænegaināni iñōmō, Incayæ ate quēwenguīnāni inānite Wængongui pōnō cæcā beyænque quēwencædānīpa, ante ñōwomīni imīnitedō ante apænegadānīpa. Mānōmaīnō ante apænedāni incæte tōmēnāni, Edānidō inānite ante Wængongui apænecā, ante ēñēnāmaī inte ēñencæte ante nangui cægadānīpa. ¹¹ Codito Ōnōwoca tōmēnāni ōnōwoca quēwēninque pōnō apænedinque, Incayæ ate Codito nangui caate wæcæcæmpa, angacæmpa. Ayæ, Caate wædingā inte tōmēngā wæætē ñāō baī entawēngā inte tæi ēmōngā edæ bacæcæmpa, ante pōnō apænecā ēñēninque tōmēnāni wæætē adodō ante apænegadānīpa. Incæte tōmēnāni, Æyedēnō Codito mānōmaī cæquingāā, ante ēñencæte ante wægadānīpa. Æbānō ba ate mānōmaī cæquingāā, ante ēñencæte ante edæ nangui cægadānīpa.

¹² Nōwo iñōmō Wængongui ōōnædē quēwēninque tōmēngā Tæiyæ Waēmō Ōnōwoca ingante mōnitonga da pōnongā pōninque apænecā ēñēninque mōnitō wæætē Codito ingantedō ante mīnitō imīnite watapæ apænemōni ēñēmīnitapa.

Mänine adode ante Wængongui beyæ nê apænegainäni iñômö, Codito waa cæcæcäimpa, ante apænegadänimpa. Incæte Wængongui tömënäni inänite apænedinque, Wii tömëmini beyæ ante apæneminipa, angacäimpa. Ìncayæ ate quëwënäni beyæ ante apæneminipa, ante tömënäni inänite angacäimpa. Mäninö ante Wængongui beyæ ante æbänö apænedäni, ante ëñënamäi inäni inte Wængongui anquedoidi incæ, Waodäni beyæ Wængongui æbämë waa pöni cæcäa, ante ëñëinente wædänipa.

Wængongui, Tæiyæ waëmö ewocadäni, angampa

¹³ Mänömaï beyæ minitö, Mönö nanguï cæcäimpa, ante edæ täno pönente ate cæedäni. Nämä wææ gompotawente bai ëfente cæedäni. Itota Codito ponte a ongöninque mönö imonte waadete pönö cæcä ate watapæ bacæimpa, ante edæ mäninonque ante cöwë pönente cæedäni. ¹⁴ Wëñænäni wæmpoidi inänite näni ëfente cæbai edæ minitö adobai ëfente cæedäni. Minitö ëñënamäi iñedë mïni cæinëwënö ante do cægaminipa. Nöwo iñômö nê ëñëmini badinque mïni ëñënamäi iñedë mïni cæinëwënö ante edæ cædämaï iedäni. ¹⁵ Minitö iminite nê apænte aa pegaingä iñômö edæ tæiyæ waëmö ewocadongä ingampa cæminii. Quiëmë cædinque edæ tömengä bai adobai tæiyæ waëmö ewocadinque edæ tömäa cæedäni. ¹⁶ Wængongui incæ, “Botö tæiyæ waëmö ewocabo imopa cæminii. Botö ewocabo bai minitö adobai edæ tæiyæ waëmö ewocacæminipa,” angampa, ante yewæmongatimpa.

¹⁷ Tömämö imonte adoyömö pöni cædinque mönö Mæmpo iñômö mönö cædinö ante cöwä adinque nöingä pöni ante apænte angampa. Ìninqe, Botö Wæmpo, ante nê apænemïni inöminï inte minitö iñômö edæ nê nöingä ante apænte angä ingante edæ guñente wædinque quëwëedäni. Inguipoga quëwëninque minitö, Wabæca bai ongonte awædö, äninque, Wængongui weca edæ mönö ömæ ingæimpa, ante pönente quëwëedäni. ¹⁸ Edæ, Dodäni näni quëwengai bai adobai quëwengæimpa, ante änanï ëñëninque minitö Ao ante önonque pöni cæte quëwengaminipa. Mänömaï quëwëñöminite Codito wæætë, Minitö abæ tawænte bai quëwencæminipa, ante cædinque edæ, Quinö godongantawo, ante minitö do ëñëminipa. Ìñæmpa oodo incæ padata incæ mönö, Woquincoo, ancoo iñonte tömengä dicæ mänincooque godongantawogaa.

¹⁹ Wæætë quipi wë, Codotedo, näni änogä iñômö quenta mongænämaï wentamö ëñadämaï imäi Codito adobai inongä inte edæ tömengä nämä wepæ tæiyæ

waëmö wepæ godonte ængä beyænque quëwëminipa. ²⁰ Inguipoga badoncæte ante cædinque Wængongui ayæ gö cædämaï ingäñedë wëëñënedë pöni incæ Codito ingante edæ, Mänömaï cæcæbiimpa, ante do apænte ængacäimpa. Codito minitö beyæ ante edæ ñöwo pöni incæ inguipoga pöninque ongongantapa. ²¹ Inguipoga pöninque tömengä do wænte öñöñongante Wængongui, Nänï ömæmöe, angä ñäni ömæmongacäimpa. Ayæ tömengä ingante godömenque godö ææntodongä ate tömengä ñäo entawënongä inte tömengä nänö tæi ëmonguinque edæ æite gogacäimpa. Wængongui mänömaï nê cægäingä iñongante Codito minitö iminite pönö cæcä beyænque minitö wæætë Wængongui ingante pönëminitapa. Mänömaï beyæ minitö, Wængongui pönö cæcä beyænque watapæ bacæimpa, ante pönëninque tömengä ingante wede pönëminï baminitapa.

²² Wængongui nö nänö äno ante ëfente cædinque minitö mïmö ñä mënongate bai badinque minitö tönïñadäni inänite nê waadete pönëminï bagaminipa. Nöwo iñômö mïmöno nö pönëninque minitö godongämæ ædæmö waadete pönëninque wacä ingä wacä ingä godö waa cæedäni. ²³ Edæ waömö mönö yate pöniwoca wæwocaqui iñonte wii mäninö beyænque mempoga ëñagaminipa. Wæætë Wængongui nänö änonö mü quëwënguino iñômö edæ wodämaï inte cöwë ongongæimpa. Mäninö Wængongui nänö änonö beyænque minitö mempoga ëñagaminipa. ²⁴ Edæ, “Waömö gaguimænque bai iñömonte gaguimæ do to aminca bai mönö adobai aquii pöni inömo inte wæwocamompa.

Waëmö pöni mönö ëmöno iñômö edæ ongai waëmö ængado bai iñonte ongai edæ do guñë wæno bai mönö ëmöno adobai bacæimpa.

²⁵ Incæte Wængongui nänö äno iñômö edæ cöwë wodämaï ongongæimpa.”

Ante edæ ämotamini ante bai Wængongui beyæ näni yewæmongainö bai impa. Mäninö Wængongui nänö änonö ante minitö iminite do watapæ apænemöni ëñëminitapa.

2

¹ Mäninö beyæ minitö piinte mïni pönëwënö edæ ñimpo cæedäni. Wacä adämaï iñongante babæ mïni cædö ante edæ cædämaï ñimpo cæedäni. Minitö wadö apænete wadö mïni cædö ante ñimpo cæedäni. Mänömaï cæte mïni quëwëninö ante edæ æmæwo ñimpo cæedäni. Wacä gomonga ængä ingante godö piinte adämaï iedäni. Wacä ingantedö ante babæ ante mïni piinte änewënö ante edæ ñimpo

cædāni. ² Wēñænāni tæcæ ēñadināni inte goömæ gālnete wædāni bai mīnitō adobai Wængongui nānō apænedonque ante ēñencæte ante wæedāni. Edæ tōmengā ængā beyænque mīnitō nē quēwēmīni inte mīnitō ōñowoca ædæmō picæmīni mīni pæquinque edæ tōmengā nānō apænedō ante edæ goömæ waēmōmæ beinente bai ēñencæte ante wæedāni. ³ Waēmepæ impa, ante adinque wēñængā goömæ wæætē wæætē becā bai mīnitō adobai, Mōnō Awēnē waingā pōni ingampa, ante do adīmīni inte tōmengā weca wæætē wæætē ponte bete bai edæ ēñeedāni.

Nē quēwengā inongā inte Codito wainca bai ingampa, ante

⁴ Oncō dicaca mænoncæte ante cædinque waodāni, Wīwa inca awædō, ante pancacaa wido cædāni bai waodāni pancadāniya mōnō Awēnē ingante adobai wido cædāniya. Wængongui guiquēnē mōnō Awēnē nē quēwengā ingante waa adinque, Botō owocō mænonguinca wainca pōni bai tōmengā ingampa, ante tōmengā ingante apænte æninque ee mangampa. Inique mīnitō iñōmō tōmengā weca pōñōmīnite tōmengā, ⁵ Mīnitō mīmīni quēwēñōmīni Wængongui mīnitō imīnite ænte cabo tingæte adoconque mænonne bai cædinque edæ, Botō Ōñowoca owoquincō, ante badongā quēwēmīnīpa. Quēwēñōmīnite godōmenque tæiyæ waēmō badongā badīmīni inte edæ mīnitō iñōmō edæ Wængongui Ōñowoca tōnō āawocaque bai ēwocadinque, Wængongui quī, ante nē godōmīni bamīnīpa. Inique mīnitō Itota Codito emōwo ante apænedinque, Wængongui quī, ante godōmīni ate tōmengā edæ waa ængampa. ⁶ Edæ Wængongui apænecā ēñēninque iīmai ante do yewæmongadānīmpa.

“Tiñoquidi dæguimonga mænoncæte ante cædinque dica tånoca gō cæte bai cædinque,

Botō nē waa adongā ingante ænte pōnō Tānocā pōni gōnōmo gongæncæcāmpa.

Tōmengā ingante nē wede pōngēngā ingante wadāni ædō cæte bæ taquināni guingo imonte wæquingāā,” angacāmpa.

⁷ Mīni pōnecabo iñōmō, Tānocā nē ongongā iñōmō waingā pōni ingampa, ante adinque tōmengā ingante æninque ee māmīnīpa. Wīi pōnēnāni guiquēnē tōmengā ingante Baa ānānīpa.

“Nē mæñōnāni nāni wido cædinca incæ ñænænca pōni gōñōnīca bate tånoca inte tæi gongæncapa,”

ante Wængongui beyæ nāni yewæmongainō bai cædānīpa. ⁸ Ayæ adobai,

“Dicaa nē tao tencawa tæ go wæængā bai ināni inte

tōmēnāni nē Tānocā ingante piinte adinque tæ go wæænte bai oda cædānīpa.”

Ante yewæmongatīmpa. Tōmengā nānō angainō ante ēñēnāmai nāni cædō beyæ oda cædinque tæ edæ go wæænānīpa. Tōmēnāni edæ māmīnonque cædinque nē tæ go wæænguēñēnāni cōwē ingadānīmpa.

⁹ Wængongui nānō nē apænte ængaimīni guiquēnē wēmō iñōmō quēwēñōmīnite tōmengā aa pedinque, Botō weca botō waēmō pōni ñāō emōñōmō pōedāni, ante cægacāmpa. Māñōmainō cægāingā iñongante mīnitō, Bitō Wængongui Waēmō pōni emōñōmīni inte waa pōni cæbi edæ æmōnīpa, ante anguēñēmīni imīnīpa. Māñōmainō ante watapæ ancæmīnīmpa, ante cædinque tōmengā mīnitō imīnite do apænte ængacāmpa. Inique mīnitō Awēnē wēmīni inōmīni inte, Wængongui quī, ante mīnicabo nē godōmīni bai bamīnīpa. Wængongui, Botō quīmīni imīnīpa, āninque tæiyæ waēmō badongā bagaimīni inte mīnitō Wængongui nempo nē quēwēmīni imīnīpa. ¹⁰ Mīnitō wēēñēñedē adocabomīni ināmai ingamīnīmpa. Nōwo guiquēnē Wængongui tōnō godongāmæ quēwēmīni inte edæ adocabomīni imīnīpa. Wēēñēñedē guiquēnē tōmengā mīnitō imīnite pōnō waadete cædāmai ingacāmpa. Nōwo guiquēnē tōmengā pōnō waadete waa cæcā ate quēwēmīnīpa.

Wængongui ingante nē cæmō imōmpa, ante quēwēedāni

¹¹ Botō nē waademīni edæ ēñeedāni. Mīnitō inguipoga quēwēmīni incæte inguipo wīi tōmēmīni omæ bai impa. Wæætē wabæca quēwente bai quēwēmīni inte mīnitō ōñowoca wentamō mongænāmai ingæīmpa, ante edæ wææ cædinque mīnitō baonque ante mīni cæinēwēnō ante ñimpo cædinque edæ cædāmai ledāni āmopa. ¹² Nē ēñēnāmai ināni weca quēwēninque mīnitō wæætē waa cæte quēwēedāni. Tōmēnāni guiquēnē mīnitō imīnite piīninque, Wēnæ wēnæ cæmīnīpa, ante babæ ānānitawo. Incæte mīnitō waa cæmīni inique tōmēnāni, Waa cæcampa, ante do abainānīpa. Inique Wængongui Awēnē nānō apænte āñedē tōmēnāni do agāināni inte Wængongui ingante, Bitō ñāō bai emōmīni inte cæbi ate bitō wēnāni waa cædāni amōnīpa, āmainānīpa. Inique tōmēnāni waa adinque waa apænecædānīmpa, ante cædinque mīnitō ñōwo incæ waa cæte quēwēedāni.

¹³ Waodāni inānite wadāni edæ, Awēñēidi inānīpa, ante godō gōñōnāni ongōnānīpa. Æcāmē ingante ānāni bayōnānite mīnitō wæætē Wængongui Awēñē beyænque ante cædinque tōmēnāni inānite edæ ēñente

Ao ante cædæni. Adocanque ingante, Awënë Odeye, åninqe godö gönönåni ate munitö iñömö, Tömengå tæiyæ awënë inte nê angå inongå ingampa, ante adinque tömengå ingante eñente cædæni. ¹⁴ Ayæ pancabaa awënëidi gobedönadodoidi mini ånönåni inånite godö gönöninge awënë odeye wæætê iimaï angampa. Minitö wënæ wënæ cædåni inånite edæ godö pædåni. Ayæ waa cædåni adinque munitö, Waa cæmini iminipa, åninqe edæ godö waa cædåni, ante gobedönadodoidi inånite godö gönongå ongönånipa cæminii. Minitö tömënåni inånite adobaï eñente cædåni. ¹⁵ Eñenåmaï inåni wïwa tedeyönånite munitö waa cæmini ate wædinque tömënåni ædö cæte godömenque wïwa tedequinåni. Ininque, Tömënåni pæ wëenedinque tededåmaï incædånimpa, ante cædinque munitö iñömö edæ waa cæte quëwëedåni, ante edæ Wængonguï angampa cæminii.

¹⁶ Tömengå ñimpo cæcå quëwëmini inte munitö, Wacå wææ ånåmaï iñongante botö æbånö cæte waa quëwenguïmoo, ante adinque nånå wææ ante cædåni. Incæte munitö wacå wææ ånåmaï ingå beyænque awëmö wënæ wënæ cæminitawo. Edæ cædåmaï iedåni. Wæætê Wængonguï ñimpo cæcå quëwëmini inte munitö tömengå ingante nê cæmini inte edæ eñente cæte quëwëedåni. ¹⁷ Tömånåni inånite munitö, Waodåni inånipa, ante edæ waa aedåni. Mini pönencabo iñöminite edæ godongåmæ waadete pönëedåni. Wængonguï ingante, Wængonguï ingampa, ante guñente wæedåni. Awënë odeye ingante, Tæiyæ awënë ingampa, ante edæ waa aedåni.

Codito æbånö caate wægacåi, ante pönëedåni, ante

¹⁸ Pancamåniya imånite wadåni ö ænåni wædimini inte munitö tömënåni beyænque cæmini bamånipa. Ininque nê ö ænåni iñömö pönö waa cædåni incæ pönö piinte cædåni incæ munitö wæætê, Botö awënë ingampa, ante piyænê cædinque tömënåni nåni anganque edæ eñente cædåni. ¹⁹ Edæ waocå wënæ wënæ cædåmaï inongå inte quiemê beyænque wæwente caate wæcå incæte tömengå, Wængonguï acampa, ante pönëninge nangæ batawënåmaï ingå ininque edæ waa imaimpa.

²⁰ Wæætê munitö wënæ wënæ cæmini beyæ pånåni ate munitö piyænê cæmini ininque Wængonguï måninö beyænque dicæ waa aquingå. Waa adåmaï imaingampa. Wæætê waa cæmini beyænque pånåni caate wædinque munitö piyænê cæte eæ cæmini adinque Wængonguï edæ, Waa cæbipa, åmaingampa. ²¹ Botö caate wædönö adodö taadö tee empote pöedåni, åninqe munitö beyæ Codito caate wægacåimpa cæminii.

Botö caate cængainö adodonque cægonte wæcæminimpa, ante munitö iminitö ate pecå pongaminimpa. ²² Tömengå iñömö edæ cöwê wënæ wënæ cædåmaï ingacåimpa. Ayæ cöwå ayönåni tömengå dicæ babæ ante cæcå agadåniyaa. ²³ Tömengå ingante piinte badete toyönåni tömengå wæætêdö wæætê piinåmaï ingacåimpa. Caate wædinque tömengå wæætê piinte ånåmaï ingacåimpa. Wæætê, Nê nö apænte ånongå Wængonguï incæ botö beyæ cæcæcåimpa, ante pönëninge piyænê edæ cægacåimpa. ²⁴ Minitö wënæ wënæ mini cægaincoo ante Baa åninqe mongænåmaï inte nö pönï cæte quëwæcæminimpa, ante cædinque tömengå nånå baonga teemê mongæñongante tömengå ingante awåa timpodåni edæ wængacåimpa. Ininque tömengå mongænte nånö wængainö beyæ mönö wæætê måninö wënæ wënæ mönö cægainö ante wænte bai inömö inte nö pönï cæcæte ante quëwëmö inguëñemö imompa. Tömengå ingante tæi pånåni nånö åmogate wægainö beyænque munitö wæætê gancæ bamånipa. ²⁵ Edæ obegaidi pämænte godåni bai ingaimini inte munitö ñowo nê aacå weca adodö ocæ emænte pömini adinque tömengå iñömö edæ munitö önöwoca beyæ ante wææ aacå ewocaminipa.

3

Mina gæncaya iimaï quëwæcæminaimpa, ante

¹ Onquiyæmini eñëedåni. Minitö nånöogænåni nåni ånonque ante Ao ante eñente cædåni. Mini nånöogænåni pancadåniya Wængonguï nånö ånö ante pönënåmaï inånitawo. Månömaï i ininque munitö iñömö, Wïi mönitö tededö beyæ pönåni inte tömënåni wæætê eñente möni cædinö ante adinque Wængonguï gämænö poncædånimpa, ante cædinque piyænê cæte edæ tömënåni inånite eñente cædåni. ² Minitö Wængonguï ingante guñente wædinque waëmö entawëmini inte eñente cæte waa quëwëmini adinque tömënåni wæætê Wængonguï ingante Ao ante pömaånånipa. ³ Minitö, Waëmö pönï bacæboimpa, ante cædinque ocaguï waa pönï wao wincate oodo mongænte wamoncoo mongænte weocoo waëmoncoo wëñate mongæminitawo. Iñæmpa månömaï cæmini beyænque munitö dicæ waimini bamåniyaa. ⁴ Wæætê tömëmmini waa entawënö beyænque waimini pönï baquëñëmini iminipa. Minitö önöwoca gånê pönëninge ædæmö cæmini beyæ mini waa entawënö edæ wodåmaï inte godömenque waëmö pönï ongongæimpa. Måninö mini waëmö entawënö bai ante æncæte ante edæ quiemê impa diyæ godonte ænguü. Incæte Wængonguï måninö

ante adinque, Waemō pōni entawēmi abopa, ante nanguī tocampa.

⁵ Dodāni pōni mōnō wængānāidi iñōmō, Wængonguī pōnō cæcā beyænque waa bacæimpa, ante wede pōnēninque tæiyæ waemō entawegadānimpa. Tōmēnāni waemō pōni bacæte ante tōmēnāni ōnōwoca gānē pōnēninque ædæmō waadete cægadānimpa. Tōmēnāni nānōogæidi nāni ānonque ante ēñēninque Ao ante cægadānimpa. ⁶ Dodā ñæñæñā Tada wodi iñōmō Abadāo wodi ingante ēñente cædinque tōmengā ingante, Nē āmi iimpa, angacāimpa. Minitō iñōmō tōmēnā nānā cægāi bai waa cædinque mīni guiñente wæpāmo æbāmē ba incæte guiñente wædāmai iimīni iinque nāwangā nō tōmēnā nānōmomīni babaīmīnīpa.

⁷ Onguiñæmīni guiquēnē ēñēdāni. Minitō gæñāni tōnō quēwēninque tōmēnāni beyæ ante cōwē pōnēninque waa cædāni. Botō gængā onquiyaengā inongā inte aqūingā ingā incæte mōna guēa cæcaya iñōnāpa, ante ēñente wædinque mīnitō gæñāni inānite edæ cōwē waa aedāni. Ayæ, Mōna gæncaya Wængonguī ingante apæneyōmōna tōmengā do ēñencæcāimpa, ante cædinque iimāi pōnente cædāni. Wængonguī iñōmō, Mīna quēwenguimāmo, ante waadete pōnō cæcā beyænque mōna guēa ængucaya iñōnāpa, ante edæ ēñente cædāni.

Mīni waa cædō beyænque caate wæquimīni, ante

⁸ Tōmāmīni guiquēnē ēñēdāni. Minitō adoyōmō pōnēninque Ao ante cædāni. Nē Ca ca wæcā tōnō edæ adoyōmō Ca ca pōnente wædāni. Mōnō pōnencabo iimōpa, ante cædinque godongāmæ waadete pōnēdāni. Wacā caate wæcā adinque mīnitō tōmengā tōnō guēa wæte bai pōnēdāni. Nāmā ængō cædāmai iimīni inte mīnitō wæætē edæ, Ōnōmonque bai iñōmō iimōpa, ante piyænē cæte quēwēdāni. ⁹ Wænæ wænæ cædāni wæmīni incæte, Botō wæætē wænæ wænæ cæbo wæcā tocæi, ante cædāmai iedāni. Wiwa ānāni wæmīni inte, Botō wæætē wiwa āmo wæcā tocæi, ante cædāmai iedāni. Wæætē edæ, Tōmēnāni waa quēwencædānimpa, ante cædinque mīnitō tōmēnāni inānite waa apænedinque godō waa cædāni. Mānōmai cæcæmīnimpa, ante Wængonguī mīnitō iimīnite waa cædinque pōnō aa pegacāimpa cæmīnī. ¹⁰ Edæ iimāi ante Wængonguī beyæ ante yewæmongatimpa,

“Wacā tōmengā nānō quēwenguimāmo ante nanguī æinente wædinque,

Tæōnæ waa quēwente tocæi, ante nē angā iñōmō

tōmengā iñōmō wænæ wænæ tededāmai inte babæ wapiticæ ānāmai inte tæōnæ quēwente tocæcāimpa.

¹¹ Tæōnæ quēwencæte ante cædinque tōmengā wænæ wænæ nānō cæinō ante ēmō cædinque dadi ēmæninque waa edæ cæquēnengā ingampa.

Ayæ tōmengā piyænē cædinque, Mōnō tōmāmō godongāmæ gānē pōnente quēwengæimpa, ante nanguī cæquēnengā ingampa.

¹² Mōnō Awēnē awinca ēmongā inte nē nō cædāni gāmæñō adinque tōmēnāni inānite cōwē aacampa.

Ayæ, Botō imote æbānō ante apænedānī, ante tōmengā ēamonca ongonte cōwē ēñengampa.

Wænæ wænæ cædāni inānite guiquēnē tōmengā piinque awincaque acampa,”

ante yewæmongatimpa cæmīnī.

¹³ Minitō waa cæcæte ante edæ nanguī cæinēmīni bamīni adinque æcānō wæætē mīnitō iimīnite wænæ wænæ cæquingā.

¹⁴ Incæte mīnitō nō pōni mīni cædō beyænque caate wæmīni iinque edæ mīni waa quēwente toquinque iimāimpa. Iinque iimāi ante nāni yewæmongainō bai cædāni. Tōmēnāni nāni guiñente wæpāmo beyæ ante mīnitō iñōmō edæ guiñente wædāmai iedāni. Edæ guiñēnate wædāmai iedāni.

¹⁵ Wæætē, Tæiyæ Waemō Awēnē Inongā ingampa, ante wede pōnēninque edæ Codito ingante mīmōno entawēdāni. Ayæ, Watapæ bacæimpa, ante mīnitō quīnante pōnēmīnī, ante ēñencæte ante wadāni āñōnānite mīnitō wæætē a ongōnāmai inte iinonque ante edæ do apænemīni incæmīnimpa. Codito mōnitō Awēnē pōnō cæcā beyænque mōnitō, Watapæ bacæimpa, ante wede pōnēmōnīpa, ante mānīnonque ante do apænemīni edæ ēñencædānimpa. ¹⁶ Iināni iñōmō ēñencæte ante ānānīpa, ante pōnēninque mīnitō, Botō wentamō entawēnāmai incæboimpa, ante nāmā apænte cædinque guiñente wædinque tōmēnāni inānite ædæmō apænemīni ēñencædānimpa. Mānōmai cæyōmīni wadāni guiquēnē mīnitō Codito nempo quēwēninque mīni waa cædōnō ante piinque babæ ante todānitawo. Iinque mīnitō wentamō entawēnāmai inte ædæmō apænemīni adinque tōmēnāni wæætē, Mōnitō babæ ante tedetamōnīpa, ante ēñēninque guiñēnete wæcædānimpa.

¹⁷ Minitō wænæ wænæ cæmīni beyæ caate wæmīni iinque ōnonque iimāimpa. Wæætē, Wængonguī, Caate wæcæmīnimpa, angā iinque mīnitō waa pōni mīni cædō beyænque caate wæmīni iinque edæ godōmenque waa iimāimpa. ¹⁸ Minitō

nō cædāmaī iñōmīnīte Codito iñōmō mōnō nē nō cædongā inte mīnitō iñīnīte Wængonguī weca ænte poncæte ante cædinque wēnæ wēnæ mīni cædō beyænque adofoque caate wængacāimpa. Tōmengā baō ēñayongante tōmengā ingante wæñōnāni wængā ate Wængonguī Ōñowoca angā ate ñāni ōmæmonte edæ mīngā quēwengampa. ¹⁹ Ayæ adobaī Wængonguī Ōñowoca tōmengā ingante ænte māocā godinque tōmengā nē wænte gogalnāni ōñowocao tee mōnete ongoncoo weca gote apæneccā ēñengadānīmpa. ²⁰ Mānināni nē tee mōnete ongōnāni inānīte Nōwee wodi Docā ñāni ānongā doyedē ancaa apæneccā incæte tōmēnāni ēñēnāmaī inte cægadānīmpa. Mānināni nē ēñēnāmaī cægālnāni iñōnānīte Codito ñōwo tōmēnāni weca gote apænegacāimpa. Wængonguī iñōmō, Wipo ñænængade pōni impo incæ oncō baī mænoncæbiimpa, ante Nōwee ingante do angaingā inte, iñque mænoncæcāimpa, ante ee wānto congacāimpa. Incæte mānināni ēñēnāmaī cæyōnāni ocho ganca ināni mānimpodānīque æpæno yædopāa wogaa gote quēwengadānīmpa.

²¹ Māñmæno edæ wogaa godinque tōmēnāni nāni quēwengā baī mīnitō adobaī æpænē guidinque quēwēminīpa. Incæte wīi baonque mēnongate beyæ quēwēminīpa. Wæætē mīnitō, Wængonguī ayongā botō mīmō ñā mēnongate entawēmo inte quēwēmopa, ante nāmā apænte pōnēnīnque æpænē guimīnīpa. Edæ guidinque mīni ængæ gantidō baī Itota Codito ñāni ōmæmonte quēwengā beyænque mīnitō adobaī ñāni ōmæmonte quēwēminīpa. ²² Tōmengā iñōmō do ōönædē æite Awēnē badinque Wængonguī tōmēmængā inō edæ tæ contayongante anquedoidi incæ nē ānāni incæ nē tæī pīñænte cædāni incæ tōmēnāni tōmānāni edæ tōmengā nānō ānō ante ēñente cædānīpa cæmīnīi.

4

Wængonguī nānō pōnō cæganca mōnō cæcāimpa

¹ Nē caate wædingā iñōmō, Botō idæwaa wēnæ wēnæ cæte awædō, ante tōmengā wīwa nānō cædinō ante do wido cæcampa. Iñique mīnitō, Codito incæ baonga quēwēnīnque caate wægacāimpa, ante pōnēnīnque, Botō baonga caate wædinque ēñente badinque botō wēnæ wēnæ cædinō ante wido cæcæboimpa, ante piyænē cæte tæī ongōedāni. ² Edæ nē caate wædingā iñōmō, Mōnō waocabo baonque ante mōnō cæinēwēnō ante botō iñōmō cædāmaī incæboimpa, ante pōnēnīnque edæ ñimpo cædinque inguipoga tōmengā nānō quēwenguinganca Wængonguī nānō

ānōnonque ante ēñente quēwengampa. ³ Ēñēnāmaī ināni cæinente wæwente nāni ānōnō ante ēñente mīnitō wēñēñedē adobaī quingāmē baī cæte quēwengamīnīmpa. Edæ baonque ante mīni tōinente wæwēnonque ante do cædinque mīnitō tōmēnāni nāni cæī baī cædinque edæ tī nāmæ bete quidi quidi dowæñinque beowæso inte cæowæso inte Yæ yæ angamīnīmpa. Ayæ mīnitō tōmēmīni badōnīnca incæ adinque, Mōnitō wængonguī ingampa, ante ædæ wænte tedewengamīnīmpa. Ñōwo iñōmō mīnitō mānōmaī cæte idæwaa cæmīni awædō.

⁴ Tōmēnāni iñōmō baonque ante nāni godō tōinēwēnō ante cæcæte ante pogodo gote baī cædinque mīnitō iñīnīte, Ponguēñē quēwēnānīi, ante ancaa ānānīpa. Mīnitō gomō adinque tōmēnāni tōnō godongāmæ godāmaī iñīni adinque tōmēnāni wæætē, Quimæ awincaque gomō awēmīnīi, ante edæ piinte ānewēnānīpa. ⁵ Incæte mōnō waocabo mīmō quēwēmō incæ do wænte gogalnāni incæ tōmāmō imonte nē oo apænte anguingā iñōmō edæ Wængonguī inongā ingampa. Iñique tōmengā, Ēbānō cægāmīnīi, ante angā ēñente wædinque mānōmaī cægālnāni wæætē aamō cædāmaī inte tōmēnāni nāni cægālnō ante edæ do apænequināni inānīpa. ⁶ Mānōmaī beyæ do wængālnāni inānīte mōnō Codito ingantedō ante watapæ apænegatīmpa. Tōmēnāni baō ēñate quēwēñōnānīte waodāni apænte ānīnque pānāni incæte Wængonguī wæætē, Tōmēnāni ōñowoca ēwocadinque quēwēncædānīmpa, ante tōmengā waa pōni nānō cægālnō beyænque nāni quēwengūnō ante godō apæneccā ēñengadānīmpa.

⁷ Nōwo iñōmō tōmancoo edæ oo iñque baquīnō anguēñē. Mānōmaī impa, ante ēñente wæmīni inte mīnitō, Mōnō tōingā pōnente Wængonguī ingante apæneccāimpa, ante cædinque nāmā wææ aadinque ocaī encate pōnēedāni. ⁸ Wēnæ wēnæ cæmō incæte waadete pōnēmō iñque mōnō waadete cædō beyænque wadāni piyænē cæte pīlnāmaī inānīpa. Mānōmaī impa, ante pōnēnīnque mīnitō nē wede pōnēmīni iñōmīni inte cōwē waadete pōnente cædāni. ⁹ Edæ wadāni inānīte, Pōedāni, ānīnque wacā ingā wacā ingā pædæ godōnīnque edæ, Tōmēmō quī impa, ante wædāmaī iedāni.

¹⁰ Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cædāni, ante adocanque ingante wadō wacā ingante wadō pōnō waadete cæcā incæ ēwocāmīnīpa. Iñique mīnitō tōmāmīni mīni ænte ēwocaganca cædinque mīni pōnencabo beyæ godongāmæ waa cæquēñēmīni iñīnīpa. ¹¹ Wængonguī pōnō cæcā ænīnque æcānō nānō apænequinganca ēwocacā tōmengā

Wængongui nānō apænedonque ante apænequēnengā ingampa. Æcānō wadāni beyæ ante nānō nē cæquinganca ēwocacā tōmengā Wængongui nānō tæi piñænonque entawēninque waa cæquēnengā ingampa. Mānōmaī cædinque mīnitō waa cæmīni adinque mōnō tōmāmō Itota Codito ēmōwo apænedinque Wængongui ingante, Bitō waēmō pōni inōmi inte waa cæbipa, ante apænecæimpa. Tōmengā iñōmō nē tæi ēmōnongā inte ñāō ēmōninque nē nanguī cædongā ingampa, ante mōnō pedænguipoga quēwēmō incæ iñcayæ ponte mīnguipoga quēwēmō incæ cōwē watapæ pōni apænecæimpa. Mānōmaī baquīnō anguēnē, ante botō, Amēē, āmopa.

Codito nempo quēwēninque caate wæccæmīnīmpa, ante

¹² Botō nē waademīni ēñēedāni. Mīnitō ñōwo incæ gonga gonte caate bai wæmīni incæte, Quiēmē beyæ mānōmaī caate wæboī, ante guñēte wædāmaī iedāni. Edæ wīi ōnonque caate wæmīnīpa. ¹³ Wæætē, Codito nānō caate wægainonque godongāmæ ñōwo caate wæmōnīpa, ante pōnēninque watapæ toedāni. Mānōmaī caate wædinque tomīni iñinque Codito ñāō apāite bai nānō pōñedē godōmenque gomonga watapæ toquīmīni iñmāimīnīpa. ¹⁴ Mīnitō iñinīte wadāni piinte āninque, Codito ēmōwo ōnonquedō waa adinque wæcantedō abi, ante badete todāni iñinque Wængongui wæætē, Watapæ quēwencæmīnīmpa, ante pōnongā æninque mīnitō tōmengā Ōnōwoca nē ñāō ēmōnongā ingante ēwocamīni beyæ toquēnēmīni iñinīpa. ¹⁵ Wacā ingante nē godō wænonongā ingante do pānāni wæcampa. Wacā qui nē awēmō ængā ingante nē wēnæ wēnæ cæcā ingante adobaī pānāni wæcampa. Adocanque nē cæquēnengā inte ānāmaī iñongante wacā iñontobæ godō ōnonque cæcā ate nē ōnonque cæcā ingante pānāni wæcampa. Mīnitō wæætē nāmā wææ aadinque tōmēnāni nāni cædō bai cædāmaī iñinī iñinque caate wæmīni incæte ædō cæte mīni wīwa cædō beyæ pānāni caate wæquēnēmīnī. Edæ dæ anguēnē.

¹⁶ Wæætē wadāni mīnitō iñinīte, Wææ, Codito ēmīñæmi iñipææ, ante piinte cædāni caate wæmīni incæte mīnitō guingo imonte wædāmaī iedāni. Wæætē edæ Wængongui ingante apænedinque edæ, Bitō ñāō ēmōmi inte pōnō pemonte bai cæbi æninque mōnitō Codito ēmōwo ēmonte bai adobaī ēmōmōnīpa, ante waa apæneedāni.

¹⁷ Edæ iñmaī impa. Wængongui tōnō mōnō godongāmæ owocabo iñōmonte tōmengā oo apænte ancæcāimpa. Iñinque mōnō imonte tāno apænte angā iñinque tōmengā wadāni iñānite guiquēnē æbānō cæquingāā. Tōmengā ingantedō ante watapæ apænedāni ate nē

ēñēte cædāmaī iñāni iñānite apænte āninque Wængongui quingāmē bai nanguī pangā wæquīnāni. ¹⁸ Ayæ Wængongui beyæ nāni yewæmongainō bai impa. Nē nō cæcā wodo wænguēnengā iñongante Wængongui tingæ ængā beyænque quēwēnongā Wængongui ingante ēñēnāmaī ingā guiquēnē tōmengā ædō cæte quēwenguingāā. Nē wēnæ wēnæ cæcā adobaī edæ ædō cæte quēwenguingāā. ¹⁹ Mīnitō iñōmō Wængongui nānō ānīnō beyænque caate wæmīnitawo. Iñinque mānōmaī beyænque mīnitō, Mōnō imonte nē badongaingā cōwē pōnēninque ædæmō aauqingā ingampa, ante pōnēninque nāmā mīnitō ōnōwoca tōmengā nempo godōninque piyænē cæte godōmenque waa cæquēnēmīni iñinīpa.

5

Mini pōnencabo æbānō cæte quēwengæimpa, ante

¹ Mīni pōnencabo iñōmīnite pancamīniya nē aamīni Picæmīni mōnō āmīni iñinīpa. Botō iñōmō adobaī nē aabo Picæmo iñōmo inte, Mōnō nē Picæncabo, ante mīnitō iñinīte ædæmō apænedinque āmopa. Codito caate wæcā nē agaīmo inte botō edæ waadete āmopa. Ayæ Codito ñāō bai nānō ēmōnō edonque pōni nānō odōmonguīnō ante botō tōmengā tōnō ñāō bai entawēmo iñōmo inte edæ, Eñencæmīnīmpa, ante nanguī āmopa. ² Codito ingante nē pōnēnāni iñōmō mīnitō nempo cænināni bai ongōñōnānite mīnitō tōmēnāni iñānite nē aamīni iñinīpa. Wængongui, Nē pōnēnāni iñānite aacæmīnīmpa, angā ēñēninque mīnitō wæætē Baa āmōni iñinque Wængongui pangā wææcæ wæ, ante guñēte wæmīnitawo. Iñæmpa wīi guñēte beyænque aacæmīnīmpa. Wæætē Wængongui, Mīnitō do Ao ante aacæmīnīmpa, ante tōmengā nānō ānōnonque ante edæ ēñēte cæte edæ tōmēnāni iñānite ædæmō aadedāni. Ayæ edæ godonte æinta ante æīnente wæmīnitawo. Iñæmpa wīi æncæte ante wædinque mīnitō edæ, Nē pōnēnāni beyænque nanguī cæinente wædinque cæcæboimpa, ante piyænē cæte aadedāni. ³ Waodāni nē cænināni bai mīnitō nempo ongōñōnānite mīnitō wæætē iñmæca awēnēidi nāni piinte āmaī wīi adobaī piinte æedāni. Wæætē edæ, Mōnō waa cæte quēwēmō adinque tōmēnāni mōnō bai adobaī waa cæte quēwencædānīmpa, ante cædinque edæ waa cæedāni.

⁴ Mānōmaī cæmīni iñinque mōnō nē Aadongā Ñænægā pōni iñongā iñōmō iñcayæ ponte a ongōninque poganta ñāō ēmonta cōwē wodāmaī inta pædæ pōnonte bai cædinque mīnitō iñinīte, Mīnitō nē aamīni

inte botō ñāō ēmonte ongōñōmō ponte quēwencæminimpa, ancæcāimpa.

⁵ Tæcæ æmæwo pæimīni guiquēnē ēñēdāni. Godōmenque picænāni nāni ānīnō ēñēnīnque edæ Ao ante cæedāni. Ayæ gānē entawente pōnēnīnque, Ōnōmōnīque bai mōnitō imōnīpa, ante pōnēnīnque wacā nānō ānīnō ante ēñēnīnque Ao ante cæedāni. Edæ iūmai ante yewæmonte ongōmpa.

“Nāmanque ante, Mōnitō gomonga waa cæmōni imōnīpa, ante nē pōnēnāni inānite edæ Wængonguī Baa angampa. Wæætē edæ, Mōnitō ōnōmōnīque bai imōnīpa, ante nē ānāni inānite tōmengā pōnō waadete cæcampa.”

⁶ Ante yewæmongatimpa cæminīi. Īncayæ ate eyepæ pōni bayonte Wængonguī incæ mōnitō imōnīte ængō cæcā ongoncæmōnīpa, ante cædinque mīnitō ñōwo iñōmō nē tæi piñængā ōnōnempo ongōnīnque nāmā ængō cædāmāi iedāni. ⁷ Codito mōnō imonte waadete pōnente cæcampa, ante ēñente wædinque mīnitō guīñente mīni wædō ante tōmengāa wo cæmīni mongængā ate mīnitō guīñēnāmāi īnīnque wæætē guēmancæminimpa.

⁸ Nāmā incæ edæ wææ aadedāni. Wēnæidi awēnē iñōmō edæ mēñebo nē piinte angā bai inongā inte, Æcānō ingante ecate cænguimoo, ante nē piinte cædongā inte awēmō diqui diqui mingampa cæminīi. Ee aedāni. ⁹ Mīnitō caate wæmīni incæte, Mōnō tōniñadāni inguipoga tōmāmæ quēwēnīnque adobai edæ caate wædānīpa, ante do ēñēmīni inte Codito ingante wede pōnēnīnque adiyæ næ gongæñīnque wēnæ awēnē ingante cōwē Baa aedāni. ¹⁰ Mānōmai cædinque wantæ iñō caate wæmīni ate Wængonguī nē waadete pōnō cædongā inte mīnitō imīnite pōnō cæcā ate edæ ganca bacæminimpa. Ayæ godōmenque pōnō cædinque tōmengā mīnitō imīnite pōnō tæi gōnongā ate mīnitō tæi piñænte entawēnīnque wæntædāmāi inte edæ cōwē tæi ongoncæminimpa. Tōmengā adocā iñōmō ñāō bai cōwē emōnongā inte mīnitō imīnite aa pedīnque, Mīnitō Codito nempo nē quēwēnōmīni inte botō ñāō ēmonte ongōñōmō pō guite quēwēedāni, angacāimpa. ¹¹ Tōmengā iñōmō cōwē tæi emōnīnque nē nanguī cædongā ingampa, ante mōnō pedænguipoga quēwēmō incæ īncayæ ponte mīnguipoga quēwēmō incæ cōwē watapæ pōni apænecæimpa. Mānōmai baquīnō angūēnē, ante botō, Amēē, āmopa.

Waa quēwencæminimpa, ante

¹² Botō tōniñacā bai inongā inte Tidibānō iñōmō cōwē pōnēnīnque ædæmō cæcā ingampa, ante adīnque botō tōmengā tōnō godongāmæ cædinque, Mīnitō acæminimpa,

ante cadota ante ocanta yewæmōmopa. Īi cadota adīnque mīnitō ganca pōnēnīnque nanguī cæcæminimpa, ante cædinque botō Pegodobo iñōmō, Wængonguī nāwangā mānōmai pōnō waadete cæcampa, ante yewæmōmopa cæminīi. Tōmengā nānō waadete cædonque ante entawēnīnque edæ mīnitō adiyæ tæi gongænte ongōedāni, āmopa.

¹³ Mīnitō imīnite apænte ænīnque Codito iñōmō Babidōnia iñōmō tōmengā ingante nāni godongāmæ pōnencabo inānite adobai apænte ængacāimpa. Tōmēnāni iñōmō mīnitō imīnite, Waa quēwencæminimpa, ante apænēdānīpa. Botō wengā bai inongā inte Māadoco adobai, Waa quēwencæminimpa, angampa. ¹⁴ Mīni pōnencabo adobai godongāmæ waadete pōnēnīnque, Wængonguī bitō imite waa cæcæcāimpa, ante wacā ingā wacā ingā apænēdāni.

Codito nempo quēwēmīni inte tōmāmīni gānē pōnente quēwencæminimpa, ante botō Pegodobo imo yewæmōmopa.

2 Pegodo cadota ante nānō ayænta yewæmongainta

*Wængongui mīnitō īmīnite waa
cæcæcāimpa, ante*

¹ Botō Timōnō Pegodo inōmo inte Itota Codito ingante nē cædōmō īñōmote tōmengā botō imote da godongā godinque botō tōmengā beyæ nē apænebo bagaboimpa. Mōnō Wængongui inongā inte Itota Codito īñōmō mōnō imonte, Quēwencæminīmpa, ante nē Ængaingā ingampa. Tōmengā īñōmō mōnitō imōnite pōnō cædinque, Mīni wede pōnēnō ante waa pōni entawencæminīmpa, ante pōnongā ænimōni inte entawēmōnīpa. Ayæ adobai tōmengā nē nō pōni cædongā inte mīnitō imīnite pōnongā æninque mīnitō mōnitō entawēnō bai ado mīni wede pōnēnō ante edæ waa pōni entawēmīnīpa. Īninque mīnitō imīnite botō, Acæminīmpa, ante yewæmōmopa. ² Mīnitō Wængongui ingante pōnēninque Itota Codito mōnō Awēnē ingante adobai pōnēninque tōmēna ĩnate edæ ate bai pōnencæminīmpa, āmopa. Ayæ tōmēna godōmenque pōnō cæda ate mīnitō tōmēna nāna gānē pōnēnō ante edæ eyepæ pōni entawencæminīmpa, ante botō yewæmōmopa.

*Codito nānō nē emīñcēmō inte mōnō īmaī
entawēmōmpa*

³ Itota Codito īñōmō, Nē waa cæbo inte botō ñāō emōmo īñōmote pōedāni, ante mōnō imonte do aa pecā pōmōmpa. Mānōmaī Itota Codito weca pōñōmonte tōmengā Wængongui nānō tæi piñæmāmo entawēnongā inte, Quēwēedāni, āninque eyepæ pōnō cæcā ænte quēwēninque mōnō tōmengā awinca ate bai pōnēninque tōmengā nānō waa cædō bai edæ adobai mōnō waa cæmō hamōmpa. ⁴ Tōmengā nē waa cædongā inte edæ ñāō bai emōninque, Botō godōmenque nanguī cædinque waa pōni edæ pōnō cæcæboimpa, ante edæ wæætē wæætē angacāimpa. Īninque mīnitō īñōmō tōmengā nānō angāinō ante wede pōnēñōmīnite Wængongui tōmengā nānō entawēnō pōnongā æninque mīnitō Wængongui nānō entawēnō bai adobai entawencæminīmpa. Ayæ mānīne ante wede pōnēninque mīnitō inguipoga quēwēninque wēnæ wēnæ mōnō cæinente wægāinō ante, Ñōmænte bacæ wæ, ante wædinque Baa ante edæ aamō cæcæminīmpa.

⁵ Codito mānōmaī pōnō cæcā beyæ mīnitō wede pōnēminī inte nē waa cæminī bacæte ante cōwē edæ pæ pagænte cæedāni. Ayæ wæætē nē waa cæminī badinque Æbānō cæte

nō cæquīi, ante ēñēmīni bacæte ante nanguī cæedāni. ⁶ Ayæ wæætē mānōmaī ante mīnitō nē ēñēmīni badinque godōmenque nanguī cædinque nāmā wææ aamīni bacæte ante cæedāni. Ayæ wæætē nāmā wææ aamīni badinque wæætē nē wæntædāmaī inte ee cæminī bacæte ante cæedāni. Ayæ wæætē nē wæntædāmaī inte ee cæminī badinque mīnitō wæætē Wængongui nānō ante entawēnō bai entawēninque tōmengā nānō cædō cæte quēwencæte ante cæedāni. ⁷ Ayæ wæætē Wængongui nānō cædō bai cæte quēwēminī badinque mīnitō ayæ, Mōnō caipæ, ante godongāmæ mīni waa cæcabo bacæte ante cæedāni. Ayæ wæætē mīni godongāmæ waa cæcabo bamīni inte mīnitō ayæ woadāni tōmānāni ĩnānite waadete pōnēninque godō waa cæminī bacæte ante cæedāni.

⁸ Mānōmaī wede pōnēninque tæi ongōninque waadete pōnēninque Wængongui nānō cædō ante godōmenque godōmenque entawente cæminī ĩninque mīnitō mōnō Awēnē Itota Codito ingante ate bai nē pōnēmīni inte edæ tōmengā beyæ mīni cæquēnēnō ante oda cæte wædāmaī ĩmaīminīpa. Wæætē edæ awæ nanguī inca bai mīnitō adobai mīni cæquēnēnō ante do cæcæminīmpa. ⁹ Wæætē mānīnō tōmānō ante entawēnāmaī ingā guiquēnē tōmengā mōwoyata bai emōnongā inte inguipogaque waa adinque oōnædē ĩñōmō gobæ i ædō cæte aquingāā. Tōmengā nānō wēnæ wēnæ cægāinō ñā do mēnongate ĩmpa, ante pōnēnāmaī inte oñonque quēwengampa. ¹⁰ ĩñānāni ēñēedāni. Wængongui mīnitō imīnite do apænte æninque aa pegacāimpa cæminīi. Mīnitō, Wængongui nānō ānōnonque ante ēñente entawēninque mōnō cōwē tæi gongænte ongongæimpa, ante nanguī cæedāni. Edæ mānōmaīnonque ante cæminī inte mīnitō oda cædāmaī inte tæi ongongæminīmpa. ¹¹ Ayæ ĩncayæ ate nāñe wæmīni ate mōnō Awēnē Odeye Itota Codito ĩñōmō mīnitō imīnite ææntodongā goyōmīnite tōmengā, Pō guīdāni, ante watapæ æmæwo manguiçā guīte cōwē quēwencæminīmpa.

¹² Mīnitō mānīnō ante do ēñēninque mīni nō pōni ēñēnō ante æædēmō entawente tæi ongōmīni incæte botō, Godōmenque cōwē pōnencæminīmpa, ante cædinque adodō adodō ante apænebo ēñencæminīmpa. ¹³ Edæ botō, Mīnitō oda cædāmaī inte cōwē pōnencæminīmpa, ante cædinque botō baonga botō quēwenganca wæætē wæætē apænedinque nō cæte apænebopa, ante pōnēmōpa. ¹⁴ Edæ mōnō Awēnē Itota Codito botō imote edonque apænedinque, Bitō oo pōni wæninque botō weca ææ poncæbiimpā, angacāimpa. ¹⁵ Angā ēñengāimo inte botō, Nōwo botō

yewæmōninō ante adinque entawēmīni inte mīnitō iñōmō botō gobo ate cōwē pōnencæmīnīmpa, ante cædinque ñōwo incæ tæi piñænīnque nanguī cæcæboīmpa.

Itota Codito Tæiyæ Awēnē nānō ěmōnō atamōnīpa

¹⁶ Mōnō Awēnē Itota Codito iñōmō tæi piñængā ingā inte oo poncæcāīmpa, ante mīnitō iñīnīte apænedīnque mōnitō dicæ wadāni nāni mā apænewēnō ante apænetamōnīyaa. Wæætē edæ, Tōmengā nē Awēnē inongā inte mōnō Tæiyæ Awēnē nānō ěmōnō incæ ěmongāmpa, ante nē agāīmōni inte mōnitō, Nāwangā agamōnīmpa, ante apænemōni ěñēmīnitapa. ¹⁷ Edæ Awēnē nānō ñāō apāite bai ongoñōmō ongonte apænedīnque Mæmpo Wængonguī incæ, “īngā botō Wengā inongā inte botō nē waadecā ingāmpa. Tōmengā ingante adinque botō waa tobopa,” ante apænegacāīmpa. Ayæ Itota ingante waa adinque tōmengā nē ñāō ěmongā ingante odōmongā agamōnīpa. ¹⁸ Ānanquidi tōmengā tæiyæ waēmō ěmōnte nānō ongoñōmō godongāmæ ongoñīnque mōnitō mānīnō ante Wængonguī oōnædē tedecā ěñentamōnīpa.

¹⁹ Wængonguī beyæ nē apænegāināni nāni yewæmongāinō bai mōnitō adobai edonque agāīmōni inte, Nāwangā iñonte yewæmongadānīmpa, ante apænemōni ěñenguēñēmīni iñīnīpa. Mānīnō nāni angāinō wēmō iñōmō ñāō apāite tica ěnente bai i apa quēwēmīnī. Oque pōnente iñonte, Wadaamō æængæīmpa, ante wānō cōnāni bai mīnitō adobai mīni ñāō entawenguīnque ante Itota Codito nānō ponguīōnæ ante edæ wānō cōnīnque wede pōnēmīni iñīnque waa īmāīmpa. ²⁰ Iñānāni ěñēdāni. Dodāni Wængonguī beyæ nē apænegāināni incæ, Wængonguī æbānō ante apænegā ěñente yewæmonguīmoo, ante pōnēnīnque dicæ mā pōnēnīnque adodeque incæ yewæmongadānīyaa. ²¹ Wīi nāmanque pōnēnīnque yewæmongadānīmpa. Wæætē Wængonguī Tæiyæ Waēmō Ōnōwoca nempo quēwēñōnānīte tōmengā pōnō apænegā ěñēnīnque Wængonguī nānō apænedonque ante apænegadānīmpa, ante āmo ěñēmāīmīnīpa.

2

Nē babæ odōmōnte apænedāni īmāi cædānīpa, ante

¹ Doyedē pancadānīya, Wængonguī beyæ apænebopa, ānīnque babæ apænegadānīmpa. Ñōwo iñōmō wadāni adobai awēmō cædinque, Mīni cabo oda cæte ěwente wæcæmīnīmpa, ante cædinque babæ ante odōmōnte apænequīnāni mīnitō

weca do ongoñānīpa. Mōnō Tæiyæ Awēnē incæ tōmēnāni inānīte æncæte ante nāmā wepæ nē godongaingā iñongante tōmēnāni wæætē nāni quīngæ ōmæte ěwenguīnque edæ Baa ānānīpa cæmīnī. ² Pancamīnīya nanguī iñīni incæ mīni guīñente wæquinque tōmēnāni nāni wentamō mongænte goquīnō incæ tee empote goquīmīni iñīnīpa, ante awædō. Mānīnō godīnque mōnō nōīngā ěñēñōnō ante plīnte cæyōmīni wadāni adobai mānīi taadō nōīnō iñonte godō babæ ānīnque wēnæ wēnæ ānāni baquīnānīmpa, ante awædō. ³ Nē babæ odōmōnte apænedāni iñōmō mīnitō mīncōo ante ō æīnēwente wæwēnāni inte nāmāneque nāni pōnēwēnō ante tededāni ěñēnīnque mīnitō do oda cæyōmīnīte tōmēnāni wæætē ō æmāīnānīpa, ante awædō. Mōnō nē pangā ōnoncadopo do ongongāināni iñānīpa. Mōnō nē pangā iñōmō, Ōo nāni ěwenguīnque mānōmāi cædānīpa, ante apænte ancæte ante plīnīnque edæ mōwo mōnāmāi mīīngā inte a ongongāmpa.

⁴ Anquedoidi incæ ěñēnāmāi cædāni ate Wængonguī ata cæpodāmāi ingacāīmpa. Wæætē, Tōmēnāni nāni apænte tente wæquīngāncā ontatodē wēmō mæ māmonte bai iñōmō guīi tee mōnete ongoncædānīmpa, ante cædinque tōmengā angā ěñente tōmēnāni nāni owogāiñōmō tadōmengadæ pōnī dobæ go guīgadānīmpa. ⁵ Ayæ doyedē tōmengā nānō nē badongāināni inguīpoga quēwēñōnānīte Wængonguī tōmēnāni inānīte ata cæpodāmāi inte angā ate nē ěñēnāmāi iñāni iñōmō edæ æpæmpo bete wængadānīmpa. Wæætē Nōwee wodi Docā nāni ānongā guīquēnē, Mōnō nō cæte quēwængæīmpa, ante nē apænegāingā iñongante Wængonguī tōmengā tōnō tiæte ganca ināni mānīmpodānīnque inānīte wææ aacā quēwængadānīmpa. ⁶ Ayæ, Todōmā tōnō Gōmoda iñōmō quēwēnāni iñānīte, Mīni apænte wido cæquinque, ante tōmēnāni quēwēñōmō iya tānīnque wido cæcā gōnāiboque bate contagatīmpa. Mānōmāi cædinque Wængonguī, Botō imote ěñēnāmāi iñīni mīni adobai tente wæquinque cæmīnīpa, ante wadāni inānīte odōmōncæte ante cægacāīmpa. ⁷ Ayæ ěñēnāmāi inte cædāni baonque towente quēwēnāni adinque Dooto wodi iñōmō nē nō cægāingā inte, Wentamō pōnī mongænte quēwēnāni awædō, ante wædongā inte adoyōmō quēwēñongante Wængonguī tōmengā ingante tōō æmænte ō ængā beyænque quēwængacāīmpa.

⁸ Tōmengā waa cæquinque nō entawēnongā inte tōmēnāni weca quēwente ayongā īīmō iñō īīmō iñō ěñēnāmāi cædāni adinque tōmengā, Ancaā ate awædō, Ancaā ěñente awædō, ante wæwēñongante Wængonguī tōmengā ingante do ō ængā beyænque

quëwengacäimpa. ⁹ Mänömai cædinque Wængongui, Botö miñæ nê pönäni caate wædäni adinque botö do ëñente cædinque æmo ate quëwënanäipa. Wæætê wiwa cædäni inänite botö apænte angüönæ ganca mö ongonte bai mäningue ñowo incæ wæætê wæætê pämo wædänäipa, ante Wængongui cæcampa. Ìninqe, Nö ëñente Wængongui cæcampa, ante monö edonque ëñengæimpa. ¹⁰ Mänü babæ ante nê odömönte apænewënanäni iñömö tömënanäni baonque ante towëinente nänäi entawëmämo ante nê cædäni inönäni inte edæ awëñëidi inänite, Wü ëñëinê wædö, ante piñänäipa. Mänömainö ante nê piinte anäni inänite godömenque pancæte ante Wængongui mö ongonte bai mangampa. Tömënanäni iñömö nämä ængö cædinque guiñenedämaï inte edæ nê ñäo entawente tæi ëmönäni inänite godö wënæ wënæ apænedinque edæ babæ ante tedewënanäipa. ¹¹ Ìñæmpa anquedoidi tæi piñænäni inte godömenque ñænænäni inönäni incæ Wængongui ayongante guiñënete wædinque nê ñäo entawente tæi ëmönäni inänite piinte apænte änamäi inäni.

¹² Nê babæ ante odömönäni guiquënë tömënanäni nänäi nê adämaï inö ante mä pönëninque wënæ wënæ apænedinque babæ ante tedewënanäipa. Babæidi ömæwocadäni inte nänäi togænte ecate ëwenguinque önonque pönü cægönäni bai nê babæ odömönäni iñömö edæ adobaï ëñënamäi inäni inte tömënanäni nänäi wænguinque babæ cædinque quingämê bai quëwënanäipa. ¹³ Tömënanäni wädäni inänite godö wiwa cædäni ininque inäni wæætê näëmæ godö cædäni wæcædänäipa. Tömënanäni iñömö, Itädê incæ monö baonque pönente towengæimpa, ante cædänäipa. Minitö waadete pönëninque godongämæ cæñömüni tömënanäni adoyömö pöninque cæowæo incædö beowæo incædö inte cæyönäni wentamö nänäi mongænö beyænque müni cabo wæætê baate bai ëñamüni badinque wentamö tæ encaa tæ encaa ëmonte bamüni awædö.

¹⁴ Wacä onquiyaengä awinca adinque cöwê godö towëinente wædäni inte tömënanäni iñömö ñimpo cædämaï cöwê wiwa cæinente wædänäipa. Wacä aquü piñænämaï ingä adinque tömënanäni, Mönitö tönö godongämæ ponte wënæ wënæ cæcæcäimpa, ante cædinque godö waa cæte bai babæ cædänäipa. Botö qui botö qui, ante nê æinente wædäni iñönänite Wængongui iñömö, Tömënanäni nänäi wæwocaincabo inäni, ante piinte angampa. ¹⁵ Taadö töinö oda cædinque edæ docä Beodo wodi wengä Badäo wodi miñæ tömënanäni tee empote godänäipa. Tömengä Badäo iñömö, Nö cædämaï imo

incæte botö mäincooque ænte tobote, ante bai cægacäimpa. ¹⁶ Tömengä Wængongui beyæ nê apæncä incæ ocai ömæcacä bai inte wapiticæ ëñënamäi cæyongante babetadecä iningä incæ bodo incæ iñontobæ wao bai tededinque Badäo ingante wææ angacäimpa.

¹⁷ Mänü ñowodäni nê babæ odömönäni iñömö æpæ taquënëñömö æpæ dæ ä bai edæ önonäni que inte odömönäni. Boguimancoo wüni cai mongænte önonque ænte poncoo bai tömënanäni adobaï inäni inte önonque cædänäipa. Mänömai cædäni beyæ Wængongui, Tömënanäni nänäi ongonte wæquüñömö, ante mæ mämonte bai iñömö badongacäimpa.

¹⁸ Edæ tömënanäni ogæ tededinque, Botö godömenque waa pönü cæbo aedäni, ante önonquedö ante tedewënanäipa. Wädäni wapiticæ cæte quëwënanäni nempo adocanque wodo aamö cæyongante mäniñäni nê babæ odömönäni iñömö, Bitö mönitö miñæ wæætê pöninque baonque bitö cæinewënö ante guiñëñadämaï inte cæte tocæbiimpa, ante waa cæte bai godö babæ cædänäipa. ¹⁹ Müni ædämö aamö cæte mönedämaï quëwënguinque mönitö miñæ pöedäni, ante babæ änewënanäipa. Incæte nê babæ odömönäni incæ tömënanäni nänäi wiwa cædonque beyænque cæte quëwënanäni beyænque näëmæ ñä cæyænte bai inte wædänäipa. Edæ guiëmenque ante waocä ëñente cæcää tömengä mäniñö nänö ëñente cædö beyænque nê cæte quëwëngongä inte näëmæ ñäo cæyænte bai inte wæcampa.

²⁰ Inguipoga ñömænguëñëmämo beyæ tee mönëte bai quëwëñinäni inte tömënanäni mönö Awënë Itota Codito mönö imonte nê Ængaingä ingante do ate bai pönëninque edæ abæ tawænäni inänitapa. Mänömai abæ tawænte godinäni inte tömënanäni inguipoga ante nänäi cæinente wæpämö beyænque wæætê adodö go goyo cæte ægodawate wæ wææntodonte bai wædäni ininque tömënanäni godömenque nänäi wënæ wënæ wæwenguinque imäimpa. ²¹ Nöinö taadö do adinäni inte tömënanäni nänäi godömenque wæwenguinque emö cæte godänäipa. Wængongui tæiyæ wæmö nänö wææ angainö ante odömönäni nänäi do ëñëñinö ante Baa ante wadæ godäni iñömö godömenque wënæ wënæ nänäi wæquinque impa. Ìninqe mäniñö taadö ante tömënanäni cöwê adämaï inäni inte bai tömënanäni beyæ godömenque waa incædönäipa. ²² Tömënanäni nöinö taadö emö cæte godinäni nänäi cædö bai ante imainö ante näwangä ante badete todänäipa. “Guinta awæ wëningä adodö cængampa. Odæ wængänä iñömö æpæ pantate ate onguipoipæ wëngo wëango nangampa.”

3

Mönö Awënë wæætē adodō poncæcäimpa, ante

¹ Botö nē waadedömini ēñēdāni. Minitö möwo mönāmaī inte nöngä ante pönencæminimpa, ante botö, Mänömaī impa, ante mentaa yewæmöninque adodö adodö ante yewæmömo aedāni. ² Tæiyæ waemö entawēnāni Wængongui beyæ ante apænedinque nāni yewæmongainö ante nē adimīni inte minitö wæætē pönencæminimpa, ante cæbopa. Mönö Awënë mönö imonte nē Ængaingä inte adobai ante wææ angacäimpa. Tömengä nänö da godongaimöni iñömö tömengä nänö wææ angainö ante apænemöni ēñēmīni inte minitö wæætē adodö ante pönencæminimpa, ante cædinque yewæmömopa.

³ Iīmaī ante tāno apænebo ēñencæminimpa. Mönö waocabo inguipoga mönö quēwēmāmo wodo iinque bayonte nē badete todāni cōwē poncædänimpa. Pöninque tömēnāni badete todinque nāmā nāni wēnæ wēnæ cæinēnō ante edæ do cæquināni inānipa. ⁴ Tömēnāni iīmaī ante badete tocædänimpa. “Codito nänö ponguinque impa, ante wædānitēdö abi. Iñæmpa Wængongui nänö badongäñedē inguipo nänö cægai bai mæmæidi wodi wænte godāni ate ñöwo ganca adobai inte cæ apa guifēwēmīni,” ante badete toquināni inte poncædänimpa. Apænebo ēñēdāni. ⁵ Wængongui iñæmpa adodeque angä beyænque öönædē owocoo edæ do bagatimpa. Adodeque angä beyænque onguipo æpæ tæcæpæno odæ yate ongōñonte tömengä æpæ tönö badongä ongompa. Mänömaī impa, ante edonque i incæte tömēnāni, Mönö Baa angæimpa, ante beyænque adāmaī inte bai pönēnāmaī inānipa. ⁶ Ado æpæ inguipoga mæ ä beyænque Nöwee wodi quēwängäñedē māninguipo nänö ingai dæ badinque waguipo bai bagatimpa, ante edæ ñöwodāni iñömö adobai pönēnāmaī inānipa. ⁷ Ayæ adobai Wængongui adodeque angä beyænque öönædē owocoo tönö iinguipo ñöwo mīni cægonguipo edæ iya tanguinque ongompa. Tömengä, Botö imote nē Baa ānāni inānite botö apænte pante wido cæquiönæ ganca māni öönæ tönö iinguipo ongompa, angampa.

⁸ Botö nē waademīni edæ ēñēdāni. Mönö Awënë ayongante adoönæque incæ edæ, Mido ganca wadepo bai impa, ante acampa. Mido ganca wadepo iñonte mönö Awënë ayongante, Adoönæque bai impa, ante acampa. Mänömainö ante adodeque incæ minitö cōwē ēñente pönēdāni, ämopa. ⁹ Mönö Awënë, Cōwē pönö cæbo æncæminimpa, ante nänö angainö

ante pancadāniya, Æiquedö mönö Awënë cæquiringä, ante wædänipa. Mönö Awënë iñæmpa wii wæntæye ingampa. Wæætē, Adocanque wæñāmaī incæcäimpa. Wæætē tömānāni, Idæwaa wēnæ wēnæ cæte awædö, ante botö gämænö poncædänimpa, ante cædinque tömengä māniñö beyænque ee cædāmaī ingampa. Iñinque tömengä, Minitö wæætē botö gämænö æiquedö ponguimīni, ante wänö cöninque edæ ee pönāmaī ingampa.

¹⁰ Incæte nē awēmö ö ængä iñontobæ nänö pōmaī mönö Awënë nänö poncæ cæönæ iñömö adobai iñontobæ ponguinö angüenē. Nangui tæi tæi tēninque öönædē owocoo incæ iñontobæ dæ goquinö angüenē. Gongā nāni angä nangui pōni bæco iñinque edæ Wængongui nänö badongaincöo tömancöo edæ aca podinque edæ ewente bacæimpa. Inguipoga tömāo ongoncöo dæ ba iñinque inguipo öönömæca pōni baquinö angüenē. ¹¹ Tömancöo edæ mānōmaī ewenguincooqwe impa, ante adinque edæ minitö iñömö, Æbāno quēwengui, ante pönēmīni. Wængongui nänö cædö bai cōwē cædinque tæiyæ waemö quēwengüenmö imompa. ¹² Wængongui nänö ponguiönæ iñömö edæ æyedenö pongui, ante wänö cöninque, Quingæ pōni pongæimpa, ante mönö nangui cæcæimpa. Māniönæ iñonte edæ öönæ incæ gongā bæcote ewente bayonte Wængongui nänö badongaincöo incæ nangui ocoi āninque tömancöo aca podinque ewente baquinö angüenē. ¹³ Picæönæ tönö pedænguipo ömæxe ewēninque Wængongui wæætē, Botö miüönæque tönö müinguipoque pönö badoncæboimpa, ante nänö angainö bai do badoncæcäimpa. Iñinque mönö iñömö, Miüönæ tönö müinguipo iñömö mönö nö pōni cæte quēwängæimpa, ante nangui aīnente wæmompā.

¹⁴ Botö nē waadedömini ēñēdāni. Mänömaī bacæimpa, ante nē aīnente wæmīni inte minitö iñömö edæ, Mönö māniñedē wentamö entawēnāmaī imö adinque Wængongui piñāmaī incæcäimpa, ante nangui cædinque edæ nāmā wææ aedāni. Ayæ tömengä, Botö ayömo waemö ewocamīni iñinque edæ mönö godongāmæ piyænē cæte quēwängæimpa, ante pönö cæcæcäimpa, ante edæ nangui cædāni. ¹⁵ Mönö quēwenguinque ante mönö Awënë edæ ee ongonte pönāmaī ingampa, ante pönēdāni. Wængongui pönö cæcä ate ocai nē encacā bate pönēninque mönö tönñicā Pabodo mönö nē waadecā inte adobainö ante minitö iminite edæ, Acæminimpa, ante yewæmongantapa. ¹⁶ Wængongui mönö quēwenguinque ante ee pönāmaī ingampa, ante cadota ante yewæmöninque Pabodo adobainö ante edæ cōwē yewæmongampa.

Tömengä nänö yewæmöninta pancataa wī edonque i adinque nē ēñēnāmaī ināni tönö aquī pīñænāmaī ināni iñömö edæ oda cædinque wapiticæ odömönānīpa. Tömēnāni edæ Wængonguī angā ēñente nāni yewæmongainta tōmantaa adobaī adinque tōmēnāni nāni æmæwo ewenguinque edæ wapiticæ odömönānīpa.

¹⁷ Botö nē waademīni ēñēedāni. Mänōmaī impa, ante do ēñēmīni iñömīnite Wængonguī nänö wææ angainö ante ēñēnāmaī cædāni ināni guiquēnē mīnitō imīnite tōō æmænte wapiticæ ænte gocæ cædāni ate wædinque mīnitō wæætē tōmēnāni mīñæ godāmaī iedāni. Wæætē edæ Tæiyæ Awēnē nempo quēwēmīni inte, Tæi gowæænāmaī incæboimpa, ante nāmā wææ aadāni.

¹⁸ Mönö Tæiyæ Awēnē Itota Codito ængā beyænque mönö quēwēmōmpa. İnīnque tōmengä waadete pönö cæcā ate mīnitō tōmengä ingante ate bai pönēnīnque wadāni inānite godōmenque waadete godō cæmīni baedāni. Tömengä iñömö edæ ñōwopāmo iñonte wapāmo mīlmāmo iñonte edæ cōwē tæi emongä inongä inte ñāō apāite bai emongampa, ante adinque mönö ñimpo cædāmaī inte tōmengä ingante cōwē waa acæimpa. Mänōmaī baquīnō anguēnē, ante botö, Amēē, ämōpa.

1 Wäo cadota ante nänō tānota yewæmongainta

Mini quëwenguinō ante nē pōnongā

¹ Æcānō wēēnēñedē Wængonguī nānō badongaiñedē do ingacāimpa, ante māninō ante apænemōnipa. Wængonguī nānō Angaiñō ante nē ãmongaingā iñōmō Itota adocā, Mini quëwenguinō ante nē pōnongā ingacāimpa. Mōnitō iñōmō māningā apænecā ēñēningque tōmengā ingante awinca inte nē adimōni imōnipa. Adocā ingante cōwā adinque mōnitō tōmengā ingante nē gampodimōni imōnipa. Ìninquē mōni nē ēñēningā ingante ante, awinca inte mōni nē adingā ingante ante, mōni nē cōwā adingā ingante ante, mōni nē gampodingā ingantedō ante apænemōnipa. ² Edæ Itota nē quëwengaingā iñōmō edonque pōni a ongongacāimpa. Mōnitō tōmengā ingante nē adimōni imōnipa. Māningā ingante ante, Nāwangā quëwengaingā ingampa, ante apænemōni imōnipa. Ayæ mōnō Mæmpo Wængonguī tōnō guëa cōwē quëwengaingā iñōmō tōmengā mōnō weca ponte a ongongā atamōnipa. Ìninquē mīnitō imīnite māningā ingante ante apænemōni ēñencæminimpa. ³ Ayæ mōnō Mæmpo Wængonguī tōnō tōmengā Wengā onguīñægā Itota Codito tōnō mōnitō godongāmæ cæmōni imōnipa. Ìninquē, Mīnitō adobaī mōnitō tōnō godongāmæ cæcæminimpa, ante cædinque mōnitō mōni nē adingā ingante ante, mōni nē ēñēningā ingante ante mīnitō imīnite apænemōni ēñencæminimpa. ⁴ Mōnō eyepæ watapæ toquinque ante māninō ante mīnitō imīnite yewæmōmōnipa.

Wængonguī ñäo apāite bai ñongā ingampa

⁵ Tōmengā nānō angaiñō mōni ēñēninō æbānō i, ante mōnitō iīmai ante mīnitō imīnite apænemōni ēñencæminimpa. Wængonguī ñäo apāite bai ñongā ingampa. Ìninquē tōmengā wentamō nānō entawēnō edæ dæ ampa. ⁶ Wentamō iñōmō nē cægōmō ñinque mōnō, Tōmengā tōnō godongāmæ cæmōnipa, ante ämō ñinque mōnō edæ nē babæ ämō ñaimompa tōō. Ayæ mānōmai cæmō ñinque mōnō, Quinō nōingā impa, ante cædāmai ñaimompa. ⁷ Wængonguī ñäo apāiyōmō māniñōmō ongongā bai mōnō adobaī ñäo iñōmō cægōmō ñinque mōnō wacā ingā wacā ingā godongāmæ cæbaimompa. Ayæ ñäo iñōmō cægōmō ñinque mōnō wēnæ wēnæ cægaiñō tōmāā adinque tōmengā Wengā Itota nāmā wepæ inte mōnō imonte mēnongacā ate mēnongate ñaimompa.

⁸ Mōnō, Botō wēnæ wēnæ cæpāmo dæ ampa, ante ämō ñinque mōnō nāmā incæ oda cæte wapiticæ go bai cæbaimompa. Ayæ mānōmai ñinque mōnō, Quinō nōingā i, ante ewocadāmai quëwëmailompa tōō. ⁹ Wæætē edæ Wængonguī mōnō imonte cōwē pōnēningque nē ædæmō cæcā ñongā ingampa. Ayæ nē nō cæcā ñiongante mōnō tōmengā ingante, Botō nāmā wēnæ wēnæ cædimō inte awædō, ante ämō ēñēningque tōmengā wæætē pīnāmai inte mōnō imonte pōnō ñimpo cæcā quëwencæmōimpa. Ayæ wīwa mōnō cæte quëwēnō tōmāā adinque tōmengā wæætē mōnō imonte mēnongacæcāimpa. ¹⁰ Mōnō, Botō cōwē wēnæ wēnæ cædāmai ingaimo imopa, ante ämō ñinque Wængonguī ingantedō ante, Babæ änongā ingānō, ante ämailompa. Ayæ mānōmai ämō ñinque tōmengā nānō angaiñō ewocadāmai quëwëmailompa tōō.

2

Mōnō Codito wææ angā beyænque mōnō quëwenguinque

¹ Botō wēñæmīni bai imīni ēñēedāni. Mīnitō wēnæ wēnæ cædāmai incæminimpa, ante iīmai ante cædinque yewæmōmopa. Incæte adocanque wēnæ wēnæ cæcantawo. Tōmengā beyæ wacā, Mæmpo Wængonguī pānāmai incæcāimpa, ante mōnō nē wææ änongā incæ mæ ongongampa. Māningā iñōmō nē Nō Cæcā ñongā inte Itota Codito ñongā ingampa. ² Ayæ idægoidi, Mōnō wēnæ wēnæ cægaiñō ante mōnō imō Wængonguī pīnāmai incæcāimpa, ante cædinque cæningā wæñōñāni nānō wængai bai māninganque adobaī mōnō wēnæ wēnæ cægai beyæ wængacāimpa. Ayæ wīl ñononque mōnō wēnæ wēnæ cægaiñonque beyænque wæætē tōmāmæ quëwēñāni nāni wēnæ wēnæ cægai beyæ adobaī wængacāimpa.

³ Mōnō Wængonguī ingaingā ingante ate bai pōnēmōō, ante æbānō cæte ēñenguī. Edæ, Iīmai cæedāni, ante Wængonguī nānō wææ angaiñō ante ēñente cæmō ñinque mōnō edæ, Wængonguī ingante ate bai nē pōnēmō imopa, ante do ædæmō ēñëmailompa. ⁴ Waocā iñōmō, Wængonguī ingaingā ingante ate bai pōnēmō imopa, ante nē angā incæte tōmengā Wængonguī nānō, Iīmai cæedāni, ante wææ nānō angaiñō ante ēñēñāmai cæcā ñinque māningā nē babæ änongā ingampa. Ayæ Wængonguī nōingā nānō angaiñō ante ewocadāmai quëwengampa tōō. ⁵ Wæætē, Wængonguī nānō angaiñō ante æcānō ēñente cæda iñōmō māningā ingante Wængonguī pōnō cæcā beyænque tōmengā Wængonguī waadete nānō pōnēnō ante eyepæ entawente quëwengampa. Ìninquē Wængonguī nānō angaiñō ante ēñente cæmō inte mōnō, Tōmengā nempo

quēwēmō īmōmpa, ante ædæmō ēñēmōmpa. ⁶ Īnīnque æcāmenque, Botō tōmēngā nēmpo nē quēwēmō īmōpa, ante nē angā īñōmō tōmēngā Itota nānō quēwente cægōnī bai adobaī quēwente cægonguēnē ingampa.

Itota, Īmaī cæedāni, ante ñōwo nānō wææ ānō

⁷ Botō nē waademīni ēñēedāni. Mīnitō īmīnite, Īmaī cæedāni, ante wīī botō tōmēmō wææ ānō ante ñōwo yewæmōmōpa. Wæætē Itota do nānō wææ angainō ante wēēñēdē mīni ēñēte ængainō ante adodō ante yewæmōmo aedāni. Īī tōmēngā do nānō wææ angainō īñōmō mīnitō īmīnite mōni apænedō mīni ēñēnīnō impa. ⁸ Incæte mīnitō īmīnite Itota, Īmaī cæedāni, ante ñōwo nānō wææ ānō yewæmōmōpa. Tōmēngā tōnō mīnitō quēwente cædinō beyænque, Māninō nō pōnī impa, ante edonque pōnī acæīmpa. Edæ mōnō wēmō īñōmō wodēmāa tæcæ bacæ cæyō nō ñāō īñōmō tatodonte do apāite impa.

⁹ Botō ñāō īñōmō quēwēmō īmōpa, ante nē angā incæte tōmēngā nānō tōñīñacā ingante nē pīingā ingā Īnīnque tōmēngā wēmō īñōmō ayæ quēwēngampa. ¹⁰ Æcānō guīquēnē nānō tōñīñacā ingante nē waadete pōngēgā tōmēngā ñāō īñōmō nē quēwēngā ingampa. Tōmēngā ñāō īñōmō quēwēnīnque quīēmē beyænque edæ tēwate goquingā. Edæ dæ ampā. ¹¹ Wæætē æcānō nānō tōñīñacā ingante nē pīingā wēmō īñōmō quēwēngampa. Tōmēngā wēmō īñōmō cægongā inte compocæ compocæ gocā ingampa. Wēmō īñōmō quēwēnīnque habetamongā bagaingā inte tōmēngā ædōnō gocāā, ante ēñēnāmaī ingampa.

¹² Wēñæmīni ēñēedāni. Edæ Itota Codito emōwo beyænque mīni wēnæ wēnæ cægainō ante ĩmpo cæte quēwēmīni īmīnīpa, ante adīnque botō mīnitō īmīnite yewæmōmōpa. ¹³ Mæmpomīni ēñēedāni. Mīnitō edæ, Wēēñēdē nē ingaingā ingante do ate bai pōngaimīni īmīni beyænque botō mīnitō īmīnite yewæmōmōpa. Onguīñæmīni tæcæ pæmīni ēñēedāni. Mīnitō edæ godōmenque tæī emōmīni īmīni inte wēnæ awēnē ingante Baa ante gānā cæmīni beyænque botō mīnitō īmīnite yewæmōmōpa. Wēñæmīni ēñēedāni. Mīnitō edæ mōnō Mæmpo Wængonguī ingante do ate bai pōngaimīni īmīni beyænque botō mīnitō īmīnite yewæmōmōpa.

¹⁴ Mæmpomīni ēñēedāni. Mīnitō edæ wēēñēdē nē ingaingā ingante do ate bai pōngaimīni īmīni beyænque botō mīnitō īmīnite yewæmōmōpa. Onguīñæmīni tæcæ pæmīni ēñēedāni. Mīnitō edæ tæī emōmīni inte ayæ Wængonguī nānō angainō cōwē ewocate quēwēmīni īmīnīpa. Adobaī mīnitō edæ wēnæ ingante godōmenque tæī emōmīni

inte Baa ante gānā cæmīnīpa. Māñōmaī beyæ botō mīnitō īmīnite yewæmōmōpa.

¹⁵ Inguipogaque ante nāni quēwēmāmo ante waadete pōñēnāmaī iedāni. Inguipoga quēwēnāni quīēmē wēnæ wēnæ nāni cæpāmo ante tōmāmāmo ante adobaī waadete pōñēnāmaī iedāni. Ayæ æcānō Īī inguipogaque ante nāni quēwēmāmo ante waadete pōñēte ina māningā mōnō Mæmpo Wængonguī nānō waadete pōñēnō ewocadāmaī quēwēngā ingampa. ¹⁶ Īī inguipoga īñōmō æbānō Ī, ante acæīmpa. Edæ wēnæ wēnæ cædāni quīēmē beyæ nāni æīnēte wædō Ī, awīnca inte adīnque nāni æīnēte wædō Ī, ante wīī mōnō Mæmpo Wængonguī pōnō cæcā ate æīnēnānīpa. Tōmēnāni, Māīncoo nanguī ēamōnī īmōnī aedāni, ante cædānīpa. Ayæ, Nanguī cæmōnī aedāni, ante cædānīpa. Incæte tōmāā māñīī nāni æīnēnō wīī mōnō Mæmpo Wængonguī pōnō cæcā ate æīnēte badānīpa. Wæætē inguipoga īñōmō nē mā cædāni inte quīēmē wēnæ wēnæ nāni cæpāmo ante adīnque wadāni dobæ wēnæ wēnæ cæīnēnāni badānīpa. ¹⁷ Inguipoga mōnō quēwēñōmō incæ māninguipogaque ante quēwēnāni nāni cæīnēnō incæ oo pōnī dæ baquīnō anguēnē. Wæætē waocā, Wængonguī nānō angainō ante nē ēñēte cæcā inte wantæpiyæ wāñnāmaī quēwēncæcāīmpa.

Quīnō nōingā ante impa, quīnō babæ ante impa

¹⁸ Wēñæmīni ēñēedāni. Īīnque baquīōnæ mōnō āōnæ oo batīmpa. Māñīōnæ īñōnte Codito ingante wacā nē pīinte cæcā īñōmō, Botō Codito īmōpa, ante nē ānewēnongā ponguingā, ante ēñēmīnitapa. Edæ māñīnō mīni ēñēnīnō bai ñōwōōnæ incæ nanguī īnāni Codito ingante nē pīinte cædāni īñōmō, Botō Codito īmōpa, ante nē ānewēñōnāni inte edæ do pōñānitapa. Māñōmaī Ī ĩnīnque edæ, Īīnque baquīōnæ do bapa, ante mōnō ēñēngæīmpa. ¹⁹ Māñīnāni īñōmō mōnō īmōnte emō cæte godānitapa. Incæte tōmēnāni wīī nō mōnō pōñencabo adocabo īnāmaī īñānitapa. Edæ mōnō pōñencabo adocobodāni īñīnāni inte bai tōmēnāni edæ wadæ godāmaī inte mōnō tōnō ayæ a ongoncædōñānīpa. Wæætē do godāni adīnque mōnō, Māñīnāni tōmāñāni mōnō cabo īñāmaī īñānitapa, ante edonque pōnī acæīmpa.

²⁰ Edæ oguī wapæ gadoncadāni encadāni bai mōnō Tæiyæ Waēmō īnongā īñōmō edæ tōmēngā Ōñōwoca ingante mīnitonga angā pō guīcā ate mīnitō tōmāmīni tōmēngā ingante entawēnīnque, Quīnō nō Ī, ante ēñēmīnīpa. ²¹ Mīnitō īmīnite yewæmōnīnque botō dicæ, Mīnitō, Quīnō nō Ī, ante ēñēnāmaī īmīnīpa, ante yewæmōmogaa. Wæætē edæ, Mīnitō, Quīnō nō Ī, ante ēñēmīnīpa, ante adīnque

3

botō mänōmai beyæ ante yewæmōmopa. Ayæ babæ nāni āninō tōnō Wængonguī nōingā nānō angainō tōnō ædō cæte guëa inguīnaa, ante eñēmīni adinque botō mänōmai beyæ ante yewæmōmopa. ²² Babæ ante nē ānewēnongā æcānō ingantawo. Edæ Itota incæ wīi mōnō Codito ingaingā ingampa, ante nē angā iñōmō tōmengā nē babæ ānewēnongā ingampa. Māningā wæætē, Botō Codito inōmo Imopa, ante Codito ingante nē piinte cæcā ingampa. Tōmengā edæ mōnō Mæmpo Wængonguī tōnō tōmengā Wengā Itota Codito nāna Mæmpocaya inate Baa angampa. ²³ Ii Wengā onguīñængā ingante Baa āninque, Itota incæ wīi mōnō Codito ingaingā ingampa, ante nē ānāni iñōmō ædō cæte Mæmpo Wængonguī nempo quēwēnōnāni inguīñāni. Wæætē tōmengā Wengā ingante æcānō Ao āninque, Itota mōnō Codito ingaingā ingampa, ante nē angā guiquēnē tōmengā Mæmpo Wængonguī nempo nē quēwēnongā ingampa.

²⁴ Minitō guiquēnē, Quinō angainō, ante wēnēñedē mīni eñengainō ante fīwo godōmenque mīnitō mīmōnē entawente quēwēedāni. Māninō ante godōmenque entawēmīni inte mīnitō Itota Codito tōmengā Mæmpo Wængonguī nāna Mæmpocaya tōmēna nempo cōwē quēwēnguīmīni imīnīpa. ²⁵ Mōnō imonte Wængonguī, Cōwē cæcæboimpa, ante cædinque iīmai angacāimpa. Mīnitō wantæpiyæ cōwē wēnānāmai quēwēncæmīnīpa.

²⁶ Wadāni, Mīnitō incæ odā cæcæmīnīpa, ante nē cædāni iñōnānite botō mīnitō imīnite māninō ante yewæmōmopa. ²⁷ Codito tōmengā Ōnōwoca ingante do pōnongā ewocamīnīpa. Tōmengā ingante cōwē ewocamīni iñōmīnite wacā ædō cæte mīnitō imīnite odōmonte apænequingāā. Tōmengā Ōnōwoca incæ tōmānō ante odōmonte apænecā eñencæmīnīpa. Ayæ tōmengā nānō odōmonte apænedō iñōmō nō pōni i inique edæ wīi babæ āninō impa. Inique mīnitō tōmengā mänōmai nānō odōmonte apænedinō bai cædinque godōmenque mōnō Itota Codito nempo quēwēedāni.

²⁸ Mānōmai beyæ botō wēñæmīni bai imīni eñēedāni. Tōmengā nempo godōmenque quēwēedāni. Edæ, Tōmengā pongā mōnō aquīōnæ mōnō guīñēnāmai ingæimpa, ante cædinque ayæ, Tōmengā ponguīōnæ mōnō tōmengā weca ongōninque guingo imōnāmai ingæimpa, ante cædinque godōmenque tōmengā nempo quēwēedāni. ²⁹ Edæ mīnitō, Itota Codito nō nānō cæte ingainō ante eñēmīni inique edæ mīnitō iīmai ante adobai do eñēmai mīnīpa. Quinō waa impa, ante nē cædōnāni tōmānāni mempoga eñagāināni inte Wængonguī wēnāni inānīpa.

Wængonguī wēnāni

¹ Mōnō Mæmpo Wængonguī incæ æbānō mōnō imonte nangui pōni nē waadete pōnēnongā inte cægacāimpa, ante apænebo eñēedāni. Edæ mōnō imonte, Botō wēmīni imīni āmopa, ante angacāimpa. Inique nāwangā mānimōnō imopa. Inguipogaque quēwēnāni iñōmō, Mōnō Mæmpo Wængonguī ingante wīi adinque pōnēnāmai inānitapa. Mānōmai beyæ mōnō imonte adobai adāmai ināni inte bai pōnēnāmai inānīpa. ² Botō nē waademīni eñēedāni. Nōwoyedē Wængonguī wēmō inōmō inte mōnō ayæ ate æbānō baquimōō, ante ayæ wīi edonque amompa. Wæætē, tōmengā nānō pōōnæ mōnō aquīōnæ tōmengā nānō ingai bai mōnō adobai bacæimpa, ante ædæmō eñēmompa. Edæ tōmengā æbānō ingaingā ingāā, ante mōnō edonque acæimpa. ³ Edæ, Tōmengā beyæneque mānōmai bacæimpa, ante nē pōnente todāni tōmānāni, Itota Codito tæiyæ waēmō nānō ingai bai mōnō adobai tæiyæ waēmō bacæimpa, ante nāmā incæ cædānīpa.

⁴ Nē wēnæ wēnæ cædāni tōmānāni Wængonguī nānō, Iīmai cæedāni, ante nāni yewæmongainō ante Baa ante nē eñēnāmai cædāni inānīpa. Edæ wēnæ wēnæ nāni cægāinō incæ Wængonguinque ingante Baa ante nāni angainō impa. Māninō ante nō ante impa. ⁵ Mīnitō do eñēmīnīpa. Tōmengā edæ mōnō wēnæ wēnæ cægāinō ante mōnō imonte, Nīmpo cæbo quēwēnguīmīni, ante cæcæte ante cædinque eñagacāimpa. Ayæ tōmengā wēnæ wēnæ cædō entawēnāmaingā ingampa. ⁶ Ayæ edæ tōmengā nempo nē quēwēnōnāni tōmānāni wīi godōmenque wēnæ wēnæ cædāni inānīpa. Godōmenque nē wēnæ wēnæ cædōnāni guiquēnē tōmengā ingante adāmai inōnāni inte pōnēnāmai inīnāni inānīpa tōō. ⁷ Wēñæmīni eñēedāni. Wacā mīnitō imīnite, Wapiticæ gote oda cæquīmīni, ante nē māocæ cæcā ingante gomō aedāni. Wæætē, Quinō waa impa, ante nē cæcā guiquēnē tōmengā Itota Codito nō nānō cæte ingai bai adobai nō cædongā inongampa. ⁸ Nē wēnæ wēnæ cæcā guiquēnē wēnæ pæingā bai inte adocā nempo quēwēngampa. Edæ wēnēñedē wēnæ awēnē nānō wēnæ wēnæ cægāi bai cōwē wēnæ wēnæ cæcampa. Mānōmai beyæ Wængonguī Wengā iñōmō wēnæ awēnē nānō wēnæ wēnæ cægāinō ante wo ewencæte ante inguipoga ponte eñagacāimpa.

⁹ Wængonguī wēnāni tōmānāni wīi godōmenque wēnæ wēnæ cæquīnāni inānīpa. Edæ tōmēmō guīdimō bai mīnte bai cædinque Wængonguī nānō quēwēnō ante da pōnongā æninque tōmēnāni cōwē entawente quēwēnānīpa. Tōmēnāni edæ Wængonguī

wënäni inte ædö cæte godömenque wënæ wënæ cæquinänii. ¹⁰ Æcänö, Quinö waa impa, ante nö cædämaï inaa tömengä wii Wængongui wengä ingampa. Ayæ æcänö tömengä nänö tönifacä ingante nē waadete pönēnāmaï inaa tömengä adobaï wii Wængongui wengä ingampa. Wængongui wënäni ædänidö inänii, ante ayæ, Wënæ wënäni ædänidö inänii, ante mönö mänömaï beyænque edonque pöni ëñēmōmpa.

Wacä ingä wacä ingä mönö waadete pönengæimpa, ante

¹¹ Minitö mä mini pönēñedē mini ëñengainö iimaï ante impa. Wacä ingä wacä ingä mönö waadete pönengæimpa. ¹² Minitö Cäinö wodi bai wii iedäni. Mäningä edæ wënæ nänö pæingä bai ingaingä inte tömengä nänö tönifacä ingante näēmæ wænongä wængacäimpa. Ayæ quinate tömengä ingante wænongacäi. Edæ tömengä nämä nänö cæinö wënæ wënæ cæinonque iñonte, Tömengä tönifacä nänö cæinö wæætē nö cæinonque i, ante adinque mänömaï beyænque Cäinö wodi tömengä nänö tönifacä ingante wænongacäimpa.

¹³ Botö tönifamini ëñēedäni. Ingui-pogaque quëwënäni minitö iminite ancaa piinani adinque minitö wæætē, Quinate piinani, ante wædämaï iedäni. ¹⁴ Mönö tönifadäni inänite nē waadete pönēmö beyænque, Mönö nē wænguënemö inte mönö wæætē müi quëwëmö imōmpa, ante edonque ëñēmōmpa. Nē waadete pönēnāmaï ingä guiquēnē tömengä iñömö mönö wænguënēmāmo cōwē emö cædämaï ingampa töö. ¹⁵ Æcänö tömengä tönifacä ingante piina tömengä iñömö nē wænongä bai ingampa töö. Ayæ, Nē wænongä inongä inte tömengä nänö wantæpiyæ wænāmaï quëwenguimāmo ante ædö cæte entawente quëwenguingä, ante do ëñēmīnīpa. ¹⁶ Näwangä waadete pönēninque æbänö cæquii, ante mönö iimaï ante ëñengæimpa. Edæ, Itota Codito nämä incæ mönö beyænque wængacäimpa, ante adinque mönö, Mänömaï waadete pönente cæqui impa, ante ëñēmōmpa. Ininque mönö adobaï mönö tönifadäni beyænque ante mönö nämä incæ Ao äninque wænguënemö imōmpa. ¹⁷ Mäincoo nē ëacä iñömö tömengä tönifacä nänö quëwenguinö ante wii eyepæ ëacä acä incæte tömengä ingante waadete cædämaï ingantawo. Edæ nē ëacä incæ ædö cæte Wængongui nänö waadete pönēnō entawengä ingantawogaa. ¹⁸ Wëñämīni ëñēedäni. Mönö, Waodäni inänite botö waadete pönēmō imōpa, ante tedemö incæte wii mäninö önöne mönö tededö beyæ mönö nöingä cæte waadete pönēmö imōmpa. Wæætē edæ waodäni beyæ godö cædinque mönö nöingä waadete pönengæimpa.

Wængongui weca ongonte mönö guifñēnāmaï ingæimpa

¹⁹ Mänömaï cæmōmpa, ante adinque mönö, Wængongui nöingä nänö angainö bai quëwëmö imōmpa, ante do ëñēmōmpa. Ayæ adobaï, Tömengä weca mönö a ongöñedē nämä guifñēnāmaï incæmōimpā, ante ëñēmōmpa. ²⁰ Botö pante wæquinque wënæ wënæ cæbopa, ante mimönē nämä apænte ämō incæte iimaï ante adobaï ëñēmōmpa. Wængongui edæ wii mönö mimönē ëñēnō bai inongä inte tömengä godömenque nē ëñēnongä ingampa. Ayæ tömengä tömää ëñengaingä ingampa.

²¹ Botö nē waademini ëñēedäni. Botö pante wæquinque wënæ wënæ cæbopa, ante mimönē nämä apænte änāmaï imö ininque mönö Wængongui weca ongöninque guifñēnāmaï imaimōmpa. ²² Ayæ tömengä, iimaï cæedäni, ante nänö wææ angainö ante ëñente cæmō ininque ayæ, Cæmō adinque tömengä tocæcäimpa, ante cæmō ininque tömengä ingante quiemē beyæ ante ämō tömengä wæætē pönö cæcä æmaimōmpa. ²³ Tömengä nänö wææ angainö iimaï impa. Botö Wengä Itota Codito emōwo ante pönēedäni. Ayæ tömengä mönö imonte, Botö wææ angainö bai wacä ingä wacä ingä waadete pönēedäni. ²⁴ Mänömainö ante Wængongui nänö wææ angainö ante nē ëñente cædäni iñömö tömēnāni tömengä nempo quëwënönāni inänīpa. Ayæ adobaï tömēnāni tömengä ingante entawēnānīpa. Wængongui tömengä Önöwoca ingante pönongä ænimö inte mönö mäningä tömengä nänö pönongaiwoca beyæ, Wængongui ingante entawēmö imōmpa, ante do ëñēmōmpa.

4

Æcänö önöwoca ingante ewocadäni, ante

¹ Botö nē waademini ëñēedäni. Wadäni, Wængongui Önöwoca incæ mönitonga pö guicä ininque ewocamöni imönīpa, ante nē änāni incæte minitö wii tömēnāni nāni äno pönēedäni. Wæætē, Tömēnāni önöwoca Wængongui weca owodinque pöwocacantawo, ante ëñencæte ante apænte aedäni. Edæ Wængongui beyænque nē apænemönīpa, ante nē babæ änewēnönāni nangui ināni imæca quëwënāni weca godänīpa. ² Minitö edæ, Mäniwoca näwangä Wængongui Önöwoca ingantawoo, ante ëñencæte ante iimaï ante edonque pöni ëñencæminīmpa. Edæ, Itota Codito Waocä ëñate pongaingä ingacäimpa, ante änāni adinque minitö, Tömēnāni tömānāni Wængongui weca nē pöwocacä ingante nē ewocadäni inänīpa, ante ëñencæminīmpa. ³ Wæætē Itota ingantedö ante adodö ante nē änāmaï ināni guiquēnē tömēnāni tömānāni

edæ Wængongui weca pöwocäcä ingante ewocadämaï inäniþa. Tömënanï nänï në ewocadongä iñömö tömengä, Itota Codito Waocä ëñate pongaingä ingacäimþa, ante änanäi ingampa. Männingä iñömö Codito ingante në piinte cædongä iñömö tömengä poncæcäimþa, ante mini në ëñëningä ingampa. Nöwoönæ incæ tömengä do inguipoga mönö quëwëñömö iñömö pongä ataquëedäni.

⁴ Wëñämïni ëñëedäni. Wadäni, Codito ingante në piinte cædönäni iñönänite munitö Wængongui quimïni imïni inte godömenque tæi ëmömïni imïniþa. Edæ Wængongui Önöwoca mini në ewocadongä iñömö tömengä godömenque nangui tæi ëmongä iñongante wënæ inguipogaque quëwëñäni nänï në ewocadongä guiquëñë wædænque tæi ëmongä ingampa. Inique munitö mäninäni në babæ änewëñönäni inänite Baa ante cædinque godömenque tæi ëmömïni inte gänä cædimïni imïniþa. ⁵ Mäninäni inguipoga beyænque quëwëñäni nänï pönente äno bai tededäni iñönänite inguipogaque ante quëwëñäni adodäni inte tömënanï inänite ëñëñäniþa töö. ⁶ Mönitö Wængongui quimöni imöni iñömönite, Wængongui ingante në ate pönengä iñömö tömengä mönitö imönite ëñengampa. Wæætë Wængongui wengä inämaï inongä guiquëñë tömengä mönö imonte ëñëñämaï ingampa. Mänömaï i inique edæ waocä adocanque önöwoca nöingä angä ingante ewocadongä incæ wacä önöwoca babæ angä ingante ewocadongä incæ mönö mäninö beyænque, Æwocadö ii, ante edonque pönï ëñëmompä.

Wængongui waadete pönengaingä inte

⁷ Botö në waademïni ëñëedäni. Mönö wacä ingä wacä ingä waadete pönengæimþa. Edæ mönö waadete pönëno incæ Wængongui nänö da pönongainö impä. Tömänäni, Në waadete pönënanï iñömö Wængongui wëñëñäni nänï mempoga ëñagaincabo inönäni inte Wængongui ingaingä ingante ate bai pönënanïþa. ⁸ Wæætë në waadete pönëñämaï inäni guiquëñë tömënanï Wængongui ingante wii ate bai pönëñäni inäniþa. Edæ Wængongui në waadete pönengaingä ingampa. ⁹ Mönö imonte Wængongui nänö waadete pönënamö iimaï cæte odömongacäimþa. Tömengä edæ, Botö Wengä beyænque quëwëncæminimþa, ante cædinque tömengä Wengä adocanque ingante inguipoga mönö quëwëñömö da pönongä pongacäimþa. ¹⁰ Æbanö waadete pönenguü, ante iimaï impä. Mönö wii Wængongui ingante waadete pönënimö imompä. Wæætë tömengä mönö imonte waadete pönengä ingaingä ingampa. Ayæ, Mönö wënæ wënæ cægainö ante mönö

imonte Wængongui pünämaï incæcäimþa, ante idægoidi cæningä ingante wænönänï nänö wængai bai Wængongui adobai mönö wënæ wënæ cægainö beyænque tömengä Wengä ingante da pönongä pöninque mönö beyæ wæætë wængacäimþa.

¹¹ Botö në waademïni ëñëedäni. Wængongui edæ mönö imonte mänömaï në waadete pönengaingä ingampa, ante adinque mönö adobai wacä ingä wacä ingä waadete pönenguëñëmö imompä. ¹² Mönö waocabo tömämo Wængongui ingante cöwë adämaï imompä. Incæte mönö wacä ingä wacä ingä waadete pönëmö inique Wængongui ingante entawente quëwëmaïmompä. Ayæ adobai wacä ingä wacä ingä waadete pönëmö inique tömengä pönö cæcä beyænque mönö tömengä nänö waadete pönëno ante eyepæ entawente quëwëmompä. ¹³ Mönö tömengä nempo quëwëmö inte tömengä ingante adobai mönö entawente quëwëmompä. Wængongui tömengä Önöwoca ingante mönö imonte pönongä ængamöimþa. Mänömaï beyæ mönö mäninö ante do ëñëmompä. ¹⁴ Mæmpo Wængongui tömengä Wengä ingante äninque, Inguipoga quëwëñäni tömänäni inänite bitö æmi beyænque quëwëñäni, ante cæcæbiimþa, ante da pönongä pongantapa. Pongä adinque mönitö në adimöni inte wadäni inänite mäninö ante apænemöni ëñëncædänimþa. ¹⁵ Æcänö, Itota Codito Wængongui Wengä ingaingä ingampa, ante äna iñömö tömengä Wængongui ingante entawente quëwëngampa. Tömengä adobai Wængongui nempo quëwëngä ingampa.

¹⁶ Ayæ mänii beyæ Wængongui mönö imonte waadete pönengampa, ante mönö në ëñëñömö inte edæ ædæmö pönëmö imompä. Wængongui iñömö në waadete pönengaingä ingampa. Tömänäni në waadete pönente quëwëñäni iñömö tömënanï Wængongui nempo quëwëñäniþa. Wængongui ingante adobai tömënanï entawente quëwëñäniþa. ¹⁷ Wængongui nänö waadete pönëno ante ædæmö entawëmö inique mönö godongämæ waadete pönëmö beyæ tömengä apænte angüionæ iñonte guñëñämaï inguimö imompä. Edæ Mæmpo Wængongui nempo Itota nänö quëwëngai bai mönö imæca quëwëñinque adobai quëwëmö inte mäninëdë guñëñämaï inguimö imompä. ¹⁸ Në waadete pönengä iñömö tömengä guñëñämaï ingampa. Wæætë edæ tömengä nänö waadete pönëno æmæwo pæte bai eyepæ ba inique tömengä në waadete pönengä inongä inte ædö cæte guñëñingä. Në guñëngä guiquëñë tömengä nänö pante wæwëñuñö incæ do pante bai wæwëngä ingampa. Tömengä nänö waadete pönëno ante wii eyepæ ba inique tömengä æmæwo

pædämaï bai ingampa.

¹⁹ Wængongui edæ mönō imonte täno waadete pönengacäimpa. Mänōmaï beyæ mönō wæætē waadete pönēmō imompa. ²⁰ Botō Wængongui ingante nē waadete pönēmō imopa, ante nē angä iñōmō tömängä wæætē tömängä tönifacä ingante nē piinte ingä inique tömängä babæ anewēnongä ingampa. Edæ mäningä nänō tönifacä ingante nē adingä incæ tömängä ingante waadete pönēnāmaï ingä incæte adocä Wængongui ingante nē adāmaï iningä incæ ædō cæte tömängä ingante waadete pönengugä. ²¹ Ayæ, Iimaï cæedäni, ante Itota Codito mönō imonte Iimaï angacäimpa. Tömämīni Wængongui ingante nē waadete pönēmīni inte munitō tönifadäni inänite adobaï waadete pönenguēnēmīni iminipa.

5

Inguipogaque nāni quēwēnō ante mönō Baa angcäimpa

¹ Tömānāni Itota ingantedō ante, Mönō Codito ingaingä ingampa, ante nē pönēnāni inte Wængongui wēnāni nāni mempoga ēñagaincabo inänipa. Ayæ tömānāni Mæmpocä ingante nē waadete pönēnāni iñōmō tömēnāni adobaï tömängä Wengä ingante waadete pönēnānipa. ² Mönō Wængongui wēnāni inänite waadete pönēmō imō, ante ēñencæte ante Iimaï ante do ēñēmompa. Wængongui ingante waadete pönēmō inique ayæ tömängä, Iimaï cæedäni, ante nänō wææ angainō ante ēñente cæmō inique mönō, Nē waadete pönēmō imompa, ante ēñēmaïmompa. ³ Wængongui ingante mönō waadete pönēnō iñōmō Iimaï ante impa. Wængongui, Iimaï cæedäni, ante nänō wææ angainō ante mönō ēñente cæcæimpa. Edæ mäninō ante, Iimaï cæedäni, ante nänō wææ angainō ante ēñente cædinque mönō wīl teēmē mongænte bai baquinque cæmompā. ⁴ Edæ Wængongui wēmō mempoga mönō ēñagaincabo iñōmō mönō tömāmō inguipogaque ante nāni quēwēnō ante Baa āninue godōmenque tæï emonte gānā cæmompā. Inguipogaque ante nāni quēwēnō ante mönō godōmenque tæï emōmāmo iñōmō Iimaï ante impa. Wængongui ingante mönō wede pönēnō beyænque mönō godōmenque tæï emōmō inte gānā cæmompā. ⁵ Inguipogaque ante nāni quēwēnō ante Baa ancæte ante æcānō godōmenque tæï emongä inte gānā cæcantawoo. Edæ Itota Wængongui Wengä ingaingä ingampa, ante nē pönenganque tömängä godōmenque tæï emōnongä ingampa.

Wængongui Wengä ingantedō ante nō ante impa

⁶ Nē æpænē guite pongaingä iñōmō nāmā wepæ petæ petæ wæænte nē gogaingä iñōmō mäningä iñōmō Itota Codito inongä ingacäimpa. Tömängä wīl æpænēnque inte pongacäi wæætē æpænē inte ayæ nāmā wepæ inte pongacäimpa. Ayæ Wængongui Önōwoca incæ tömenganque mäninō ante, Nō ante impa, ante nē apæñecä ingacäimpa. Edæ Wængongui Önōwoca nē nōingä inongä ingampa. ⁷ Edæ mēa go adoque ināni mänimpodāni, Nō impa, ante apæñete bai nē ānāni inänipa. ⁸ Edæ Wængongui Önōwoca incæ æpæ incæ wepæ incæ mēa go adoque mänimpodāni incæ, Nō impa, ante nē apæñedāni mæ oñompa. Mänimpodāni iñōmō quiēmē āninue adodō ante nē apæñedāni inänipa. ⁹ Quiēmē ante waocä incæ, Nō impa, ante nänō apæñedinō ante do ēñēmompa. Quiēmē ante, Nō impa, ante Wængongui nänō apæñegainō guiquēnē godōmenque waa pōni impa. Edæ Wængongui tömenganque nänō apæñegainō impa. Edæ tömängä Wengä ingantedō ante Wængongui, Nō pōni impa, ante nänō apæñegainō impa töō. ¹⁰ Æcānō Wængongui Wengä onguifængä ingante nē wede pönēna iñōmō tömängä, Nō impa, ante Wængongui nänō apæñegainō ante entawente quēwengampa. Wæætē edæ æcānō Wængongui nänō apæñegainō ante wīl pönēna guiquēnē tömängä Wængongui ingantedō ante, Babæ ānongä ingānō, ante nē angä ingampa. Edæ Wængongui tömängä Wengä ingantedō ante, Nō impa, ante nänō apæñegainō ante mäningä iñōmō pönēnāmaï ingampa töō. ¹¹ Ayæ mäninō ante tömängä, Nō impa, ante nänō apæñegainō ante Iimaï ante impa. Mönō imonte Wængongui, Mini wantæpiyæ cōwē quēwenguinō, ante pönongä æntamompa. Mäninō mönō quēwenguinō ante tömängä Wengä nē quēwēnongä inte mönō imonte pönongä ænīmō inte entawente quēwēmompa. ¹² Tömängä Wengä nempo nē quēwängä iñōmō tömängä wantæpiyæ nänō quēwenguinō do entawente quēwengampa. Wængongui Wengä nempo nē quēwēnāmaï ingä guiquēnē tömängä wæætē wantæpiyæ nänō quēwenguinō ænāmaï ingampa.

Wäö inque nänō angainō

¹³ Munitō Wængongui Wengä emōwo ante nē pönēmīni iñōminite botō mäninō ante yewæmōmo aedāni. Munitō edæ wantæpiyæ cōwē mini quēwenguinō do entawente quēwēmīni iñōminite botō, Eñencæminimpa, ante yewæmōmopa.

¹⁴ Iimaï beyænque Wængongui weca guifñēnāmaï pōmō imompa. Mönō quiēmē æncæte ante tömängä ingante apæñedinque tömängä nänō ānō bai ante apæñemō inique tömängä mönō imonte ēñēmaingampa.

¹⁵ Ayæ, Mönö imonte në ëñëongä ingampa, ante ëñëmö ininque mönö, Quiëmë ante apænemö ëñëninque tömengä mäninö mönö äninö ante do pönongä æmö imompa, ante ëñëmaimompa.

¹⁶ Minitö mïni tönïñacä wënæ wënæ cæcä incæ wïi tömengä nänö æmæwo wænguinque wënæ wënæ cæcä aminitawo. Mänömaï cæyongante në adingä iñömö mäningä beyæ ante Wængongui ingante apænecæcäimpa. Apænecä ëñëninque Wængongui tömengä ingante wantæpiyæ nänö quëwenguinö pönongä æncæcäimpa. Edæ pancadäniya wënæ wënæ nani cædincoo mongænäni incæ wïi tömënäni nani æmæwo wænguinque wënæ wënæ cædänipa, ante botö mäninänique inänitedö ante apænebopa. Wæætë edæ waocä Wængongui Tæiyæ Waëmö Önöwoca ingante ancaa Baa Baa äninque tömengä nänö æmæwo wænguinque në wënæ wënæ cæcä ingampa. Ininque botö, Mänömaï Baa äninque në wënæ wënæ cædingä beyæ ante Wængongui ingante apænecæcäimpa, ante änämaï imopa. ¹⁷ Quiëmë wiwa cæmö mäninö tömänö wënæ wënæ mönö cædö impa. Wæætë wënæ wënæ cæmö incæte wïi tömänö mönö wënæ wënæ cædö beyæ mönö në wænguënëmö bamompa. Pancaa beyænque në wænguënëmö bamompa.

¹⁸ Wængongui wënäni nani mempoga ëñagaincabo iñömö godömenque wënæ wënæ cædämaï inänipa, ante ëñëmompa. Edæ Wængongui Wengä ëñagaingä inte tömënäni inänite wææ cædongä ingampa. Ayæ wënæ incæ tömënäni inänite gampodämaï inongä ingampa. ¹⁹ Wængongui wëmö imö imompa, ante ëñëmompa. Wæætë wadäni edæ inguipogaque ante në quëwënäni guiquënë tömënäni tömänäni wënæ awënë nempo quëwënänipa, ante ëñëmompa. ²⁰ Wængongui Wengä do pongä ingacäimpa. Ayæ Wængongui në nöingä ingaingä ingante ate bai pönencæminimpa, ante cædinque tömengä mönö imö pönö odömongä ate ëñëmompa. Tömengä mänömaï cæcampa, ante adobai ëñëmompa. Ayæ tömengä në nöingä ingaingä iñongante mönö tömengä Wengä Itota Codito nempo quëwëmompa. Itota Codito nö Wængongui ingaingä ingampa. Ayæ tömengä wantæpiyæ cöwë në quëwengä ingaingä inte pönö cæcä beyænque mönö adobai wantæpiyæ quëwëmö imompa. ²¹ Botö wëñæmïni bai imïni ëñëedäni. Wadäni, Mönitö wængonguïdi impa, ante nani cönönincoo weca godämaï ïedäni, ämopa. Mäninque ante yewæmömopa.

2 Wäo cadota ante nänö ayänta yewæmongainta

Nöinö mönō äno ante ayæ mönō waadete pönēno ante

¹ Minitō Wængonguī ingante mīni pönencabo iñōmīnite botō nē aabo Picæmo mīni äno mo inte yewæmōmopa. Minitō badā nāni wencabo bai iñōmīnite tömengā mīnitō imīnite apænte ængacāimpa. Botō mīnitō imīnite nō waadete pönēmopa. Wīi botonque waadete pönēmīni inte wæætē mönō Codito nöingā nänō waa pōni angaiñō ante nē ēñēnāni adobai tömēnāni tömānāni nāni nē waadete pönēmīni iñōmīnite yewæmōmo aedāni. ² Edæ mönō nē Nöingā nänō waa pōni angaiñō ante entawente quēwēmō inte mönō cōwē ñimpo cædāmai entawencæmōimpa. ³ Nē Mæmpocā Wengā Itota Codito tönō Mæmpo Wængonguī tömēna godongāmæ waadete pönō cædinque, Quēwencæmīnīmpa, ante mönō ñmonte waadete waa cæda beyænque mönō gänē entawencæmōimpa. Ñinque mönō nē nō pönēmō inte māniñō ante cōwē entawente quēwēnōmo inte mönō wacā ingā wacā ingā waadete pönēmō incæmōimpa.

⁴ Mæmpo Wængonguī mönō ñmonte nänō, ñimai cæedāni, ante nänō wææ angaiñō bai ēñente cædinque mīni pönencabo iñōmīni botō, Pancadāniya nöinō cægonte bai quēwēnāni, ante ēñēni mo inte nanguī tobopa. ⁵ Nōwo iñōmō mīnitō imīnite ämo ēñēedāni. Minitō Wængonguī ingante mīni pönencabo iñōmō wacā ingā wacā ingā waadete pönēedāni ämopa. Botō ñōwo mānōmai äniñque wīi tömēmo wææ äno ante yewæmōmopa. Wæætē Awēnē do wææ nänō angaiñō ante wēēñēñedē mönō ēñente ængaiñō ante adodō ante yewæmōmo aedāni. ⁶ Nē pönēnāni inānite mönō waadete pönēno ñimai impa. Mönō Codito, ñimai cæedāni, ante nänō wææ angaiñō ante ēñente cædinque mönō quēwengæimpa. Minitō wēēñēñedē do mīni ēñēniñō bai wææ äniñque tömengā, Minitō cōwē waadete pönente quēwēedāni, angacāimpa.

Waadāni oda cæcæedānīmpa, ante nē cædāni

⁷ Waodāni edæ oda cæcæedānīmpa, ante nē cædāni nanguī ināni ñmæca quēwēnāni weca gote mæ ongōnānīmpa. Māniñāni iñōmō Itota Codito Waocā ēñate pongaingā ingampa, ante änāmai nē ināni ināni. Æcānō tömēnāni bai nē ingā, Waodāni edæ nāni oda cæquinque, ante nē cæcā ingampa. Ayæ, Botō Codito ñmopa, ante Codito ingante

pūinte cædongā ingampa. ⁸ Minitō iñōmō nāmā wææ aedāni. Quiēmē cæcæte ante mīni cædinō ante mīnitō, Wē womōnāmāi ingæimpa, ante cædinque wææ cæedāni. Wæætē mīni cædinō beyæ Wængonguī nänō pönonguincōo tömancōo eyepæ pönongā æncæte ante cæedāni.

⁹ Nē pönengā Itota Codito nänō odōmonte apænegaiñō ante nē ēñēningā incæ wīi godōmenque ēñente cædinque wadō ante wadæ gocā iñōmō tömengā ædō cæte Wængonguī tönō godongāmæ quēwenguingā. Wæætē Itota Codito nänō odōmonte apænegaiñō ante godōmenque nē ēñente cædongā iñōmō tömengā iñōmō Mæmpocā tönō ayæ tömengā Wengā tönō godongāmæ quēwengampa. ¹⁰ Wacā mīnitō weca pöninque māniñō Codito odōmonte apænediñō ante odōmonte apænedāmai ingampa, ante adinque mīnitō tömengā ingante, Botō oncōnē pō guie, ante änāmai iedāni. Ayæ, Waa quēwente pōmi, ante änāmai iedāni. ¹¹ Edæ adocā ingante æcānō, Waa quēwente pōmi, ante äna tömengā māningā wēnæ wēnæ cæyongante tömengā tönō guēa cæte bai cæcampa.

Wäo ñinque nänō angaiñō

¹² Botō mīnitō imīnite godōmenque nanguī äñente wæbo incæte mincayonta inte wentamōmæ yewæmōimæ inte wīi yewæmōinēmopa. Wæætē mīnitō weca ēñacæ pōinēmo ñmopa. Ayæ mīnitō tönō awincadō awinca adinque botō apæñēñēmo ñmopa. Mānōmai cædinque botō, Mönō godongāmæ eyepæ pōni watapæ tocæmōimpa, ante cæbopa. ¹³ Mōnitō tōniñamīni ēñēedāni. Wængonguī ingante mōni pönencabo tömengā nänō nē ængalmōni inte mōnitō iñōmō mīni pönencabo iñōmīnite, Waa quēwēedāni, ämōni, ante yewæmōmopa.

3 Wäo cadota ante nänö tömanta yewæmongainta

Gayo ingante Wäo nänö waa apænedö

¹ Gayo botö nê waadebi êñëmi. Bitö botö nê nõ waadete pönëmi iñömite botö nê aabo Picæmo mîni ânömo inte, Acæbiimpa, ante yewæmömopa.

² Botö nê waadebi êñëmi. Tömëmi önöwoca incæ waa êwocate quëwëmi bai bitö baonga adobai waa êñabi quëwencæbiimpa, äninque ayæ, Bitö quëwenguinö ante bitö cöwë waa pöni quëwencæbiimpa, ämopa.

³ Mönö tönîñadäni pancadäniya iñömö pöningue, Gayo iñömö Itota Codito nõ pöni nänö angainö ante cöwë nõ pönëningue cæcampa, ante apænedänitapa. Ayæ, Gayo ñöwo godömenque nöinö cægonte bai quëwengä ingampa, ante apænedäni êñëningue nangui pöni totabopa. ⁴ Botö wëmîni bai imîni imînitädö ante, Itota Codito nõ pöni nänö angainö bai tömënanî nöinö cægonte bai quëwënanî inänipa, ante apænedäni êñëningue botö godömenque watapæ toquinque impa.

⁵ Botö nê waadebi êñëmi. Mönö tönîñadäni incæ bitö nê tæcæ adinänî inäni incæte bitö quinö tömënanî beyæ ante cædinque cöwë pönëningue ædæmö cæbi imipa. ⁶ Codito ingante godongämæ möni pönencabo iñömönite mäninänî wæætë, Gayo nê waadete pönengä ingampa, ante mönitö imönite apænedäni êñentamönipa. Tömënanî Wængongui ingante nê cædäni inänipa cæbii. Bitö tömënanî inänite godö cæbi æninque gomonga godäni ininque waa imaimpa. ⁷ Edæ tömënanî iñömö Itota emöwo beyænque tao godänitapa. Mänömaï goyönänite nê êñënamäi cædäni dicæ pönönänî ænänitawogaa. ⁸ Mänömaï beyæ mönö Wængongui nöingä nänö angainö ante tömënanî tönö godongämæ cæcæimpä, ante cædinque mäninänî bai inäni mönö oncö pönäni adinque mönö, Pö guuite cænte möedäni, angüenëmö imompa.

Diotedepeto tönö Deëmetedio

⁹ Codito ingante mîni pönencabo iñömönite botö mînitö imînite do yewæmontabopa. Incæte Diotedepeto iñömö, Botö nê awënë imopa, ante nê cæinënongä inte mönitö imönite Baa äninque nänënë cæcä ingampa.

¹⁰ Mînitö weca botö pöningue tömengä quinö nänö cædö ante edonque pöni apænebo êñencæmînimpa. Edæ tömengä mönitö imönitädö ante önönquedö ante wënæ wënæ apænecampa. Ayæ mäninö ante wîi eyepæ impa, ante pönente ingä ininque tömengä edæ mönö tönîñadäni pönäni adinque, Pö

guuite cænte möedäni, änämaï ingampa töö. Wädäni guiquënë, Pö guuite cænte möedäni, ancæte ante nê cæinënänî inänite tömengä adobai, Cædämaï iedäni, ante wææ angä ingampa. Ayæ mänömaï cædäni adinque tömengä, Mönitö Codito ingante möni godongämæ pönencabo iñömönite mînitö gobæwedäni, angampa cæbii.

¹¹ Botö nê waadebi êñëmi. Quinö wënæ wënæ i adinque bitö adodö cædämaï ie. Wæætë quinö waa i adinque adodö cæe. Quinö waa impa, ante nê cædäni iñömö Wængongui wënäni inänipa. Quinö wënæ wënæ impa, ante nê cædäni guiquënë Wængongui ingante adämaï inänipa.

¹² Deëmetedio ingantedö ante tömänäni waa apænedänipa. Wængongui nöingä nänö quëwënö bai Deëmetedio adobai nöinö cæte quëwëngä ingampa, ante acæimpä. Mönitö adobai tömengä ingante ante waa apænemöni imönipa. Ayæ tömengä ingantedö mönö äninö nõ impa, ante do êñëmpa.

Wäo ünque nänö yewæmongainö

¹³ Mînitö imînite godömenque nangui äinente wæbo incæ yewæmöingö inte wentamömæ yewæmöimæ inte wîi yewæmöinëmopa. ¹⁴ Wæætë bitö weca wantæ iñö pöningue botö ainëmo imopa. Pömo ate botö bitö tönö awincadö awinca adinque apænecæmönaimpa.

¹⁵ Bitö piyænë cæte quëwencæbiimpa, ämopa. Mönö æmigoidi iñömö quëwënanî bitö imite, Waa quëwencæbiimpa, ante apænedänimpa. Mönö æmigoidi bitö weca quëwënanî tömänäni inänite wæætë bitö adocanque ingante adocanque ingante apænedinque, Waa quëwencæbiimpa, ante botö beyæ apænebi êñencædänimpa, ämopa. Mäninque ante yewæmömopa.

Codaa cadota ante nānō yewæmongainta

*Waa quēwencæmīnīmpa, ante Codaa
yewæmongampa*

¹ Botō Itota Codito ingante nē cædōmo inte Tantiago tōnīñabo Codaabo īnōmo īmopa. Mæmpo Wængonguī mīnitō īmīnite waadete pōnēnīnque aa pecā pōmīni īnīnque mīnitō Itota Codito nempo nē ongmōmīni īñōmīnite botō, Acæmīnīmpa, ante yewæmōmopa. ² Wængonguī waadete pōnō piyænē cæcā īnīnque mīnitō tōmēngā nānō gānē entawēnō ædæmō entawēnīnque nanguī waadete pōnente waa cæte quēwencæmīnīmpa, ante yewæmōmopa.

*Babæ ante nē odōmonte apçenedāni
(2 Pegodo 2.1-7)*

³ Botō nē waadedōmīni ēñēedāni. Botō, Codito ængā beyænque mōnō quēwēmāmō æbānō ī, ante quīngæ yewæmoncæte ante cæyōmote wadāni wēnæ wēnæ cædāni ate wædīnque botō, Mīnitō wææ cæedāni, ante yewæmonguēnēmo batabopa. Wængonguī quīmō īñōmonte tōmēngā īñōmō, Wede mīni pōnēnō ante pōnōmo ænīnque mīnitō cōwē wææ aaedāni, ante æmæwo pōnī pædæ pōnongā ænte entawēmōmpa. Īnīnque botō wæætē, Wede mīni pōnēnō ante wææ cæcæmīnīmpa, ante yewæmonguēnēmo intabopa. ⁴ Wængonguī, Botō īmote nē Baa ānāni nāni pante wæquīnque wentamō mongæñānīpa, ante tōmēnāni īnānite apænte ānīnque pīngampa, ante do yewæmongatīmpa. Tōmēnāni īñōmō mīnitō weca do awēmō pōnānīpa cæmīnīi. Wængonguī pōnō waadete nānō cægāinō ante tōmēnāni wapitīcæ cædīnque, Mīnitō baonque towenque mīni cæīnēnō ante ōnonque cæcæmīnīmpa, ante cædīnque Wængonguī waadete pōnō cæcampa, ante babæ ante odōmonte apçenedānīpa. Ayæ Itota Codito adocanque mōnō Tæiyæ Awēnē īñongante tōmēnāni īñōmō tōmēngā ingante Baa ānānīpa.

⁵ Mīnitō wæætē tōmānō ante ēñēnīmīni īñōmīnite botō, Do mīni ēñēnīnō ante wæætē wæætē adodō ante pōnencæmīnīmpa, ante cædīnque adodō ante yewæmoncæ cæbo aedāni. Dodāni Equitobæ quēwēñōnānite mōnō Awēnē ænte māocā godāni ate tōmēngā nē wede pōnēnāmāi īnāni īnānite edæ, Ōmæ, ante capo wænongā wængadānīmpa. ⁶ Ayæ anquedoidi nē awēnēidi īnōnāni incæ pancadāniya tōmēnāni nāni aagāinō incæ ūmpo cædīnque tōmēnāni nāni quēwēngāīñōmō emō cædīnque wadæ gogadānīmpa. Adīnque Wængonguī, Botō

apænte anguīōnæ īnīnque bayonte tōmēnāni īnānite botō pancæboīmpa, ante ūwo īñōmō gæguīncamenca wodāmāi īnguīmenca tæi goti wīnīnque tōmēnāni īnānite wēmō īñōmō mangui tee mōnete wææ cæcampa. ⁷ Ayæ Todōmā īñōmō quēwēngāīnāni tōnō Gōmoda īñōmō quēwēngāīnāni eyequei godongāmæ nāni quēwēngāīncabo nāni quēwēngāīncabo tōnō adobai wēnæ wēnæ cædīnque nānōogængā īnāmāi īñongante godō mōnīnque ayæ godōmenque quīngāmē bai wīwa tote quēwēngadānīmpa. Mānōmāi cæte quēwēnāni ate Wængonguī angā gonga wææ tī wocæno gonte æmæwo wængadānīmpa. Mānōmāi godō pangā nāni wængāi bai ante odōmōnīnque Wængonguī, Nē wēnæ wēnæ cædāni adobai gonga cōwē yædæ yædæ bæcōyōmō caate wæquīnānidō anguēnē, ante mōnō īmonte odōmoncæte ante cægacāīmpa.

⁸ Ayæ wīlīmonte bai mā pōnente nē odōmonte apçenedāni īñōmō ūwo mīnitō weca pōnīnque dodāni nāni cægāi bai adobai pōnī cædānīpa. Wīwa cædīnque tōmēnāni wentamō mongænte bai edæ baō ūmængūi ēñadānīpa. Awēnēidi īnānite edæ Baa ānānīpa. Ayæ anquedoidi ōōnædē ūō īñōmō quēwēnāni īnānite edæ babæ ānīnque wēnæ wēnæ ante tedewēnānīpa. ⁹ Incæte anquedo awēnē Mīguedo incæ tōmēnāni pīnte nāni tedewēnō bai adobai tededāmāi īngacāīmpa. Mōītee wodi baō īnī adīnque anquedo Mīguedo tōnō wēnæ awēnē īñōmō edæ, Æbānō cæquīi, ante guēadō guēa angadāīmpa. Āñōnate Mīguedo īñōmō, Botō nē apænte anguēnēmo īmopa diyæ anguīmoo, ante pōnēnīnque guīñente wædīnque wēnæ awēnē īngante, Wēnæ wēnæ cæbīpa tōō, ante pīnte ānāmāi īngacāīmpa. Wæætē, “Wængonguī incæ bitō īmite Baa angā ēñencæbīīmpa,” angacāīmpa. ¹⁰ Nōwodāni īñōmō tōmēnāni adāmāi inte nāni ēñēnāmāi īñōnō ante edæ pīnīnque do wīwa tedewēnānīpa. Wæætē babæidi nāni ēñēnonque ante ēñēnīnque tōmēnāni mānīnonque ante nāni cædō beyæ wænte nāni ūmængūīnque godōmenque quīngāmē bai cædānīpa.

¹¹ Tōmēnāni edæ nāni Ca ca wæquīnque baquīnō anguēnē. Cāīnō wodi nānō gogāinō incæ edæ do godānīpa. Ayæ Badāō wodi, Nanguī æncæboīmpa, ante cædīnque tōmēngā nānō oda cægāinō incæ tōmēnāni īñōmō adodō ante pogodo godīnque, Godōmenque nanguī æncæboīmpa, ante oda cædānīpa. Ayæ Codee wodi, Awēnēidi īnānite wido cæcæīmpa, ante nānō cægāinō bai cædīnque ūwodāni nāni wængūīnque adobai cædānīpa.

¹² Mīnitō waadete pōnēnīnque godongāmæ ponte cæñōmīni īnāni īñōmō guīñēnāmāi inte adoyōmō ponte cæñānīpa. Mīnitō

tönö godongämæ ongönäni beyænque mīni cabo wentamō baate bai emōmīni awædō. Tömēnāni, Nē aawēmōni imōnīpa, ante babæ apænedīnque nē cæmīnāni bai ināni inānite pædæ godōnāmaī ināni inte tōmēnānīque ade cæte bai cædinque wīi nōinō ante odōmonte apænedānīpa tōō. Ayæ waodāni, Cōōnæ cæ tobaimpa, ante wæyōnānite boguimancoo cōōnæye emōñonte woboyæ pō wido cæ bai cædinque tōmēnāni nāni, Pōnōmōni æncæmīnīpa, ānīnō ante pōnōnāmaī inte edæ babæ cædānīpa. Ayæ awæ incayedē ōmæcawæ i adinque do bæ wite mempoga wænīwæ bai ināni inte tōmēnāni mempoga wænte bai ināni inte, Pōnōmōni cæncæmīnīpa, ante nē babæ ānewēnāni inānīpa. ¹³ Ayæ gāwapæno tadōmēngadæ ompota ōñōñō mængonta mængonta cædinque ompota yabæ tayōnōi edonque ōñō ai bai tōmēnāni wīwa cæyōnāni wentamō nāni entawēnō adobaī edonque pōnī ongō acæīmpa. Ayæ nēmō adodonque goquēnē incæ oo tobæ wæænte wēmō ba bai tōmēnāni adobaī oda cæte wapiticæ godāni inte edæ tōmēnāni nāni cōwē tadāmaī wæwēngūinque mæ māmōnte bai iñōmō edæ godāni inānīpa.

¹⁴ Ayæ Adāō wodi nānō mōmōidi wææ nānō mōmōidi wææ nānō mōmocā ingaingā inte Ēnoco iñōmō tōmēngā Wængonguī beyæ apænedīnque dodāni babæ ante nē odōmonte apænedāni inānītedō ante iīmāinō ante apænegacāīmpa. “Mōnō Awēnē pongā apa quēwēnāni. Ayæ tōmēngā quīnāni tæiyæ waēmō ināni adobaī mīdo ganca mānīmpodāni pōñōnānite adopo adopo edæ pō pō cædinque ōnōmpo tipæmpoga mānīmpoga pōnāni inte bacoo ināni mōnō Awēnē tōnō godongāmæ poncædānīpa. ¹⁵ Tōmēngā mānōmaī pōnīnque edæ tōmāmō imōnte apænte ancæcāīpa. Wængonguī ingante nē Baa ānāni inānite tōmēngā, Mīnitō mīni wæwente baquinque botō imote Baa ānīnque edæ ēñēnāmaī cæmīnīpa tōō, ancæcāīpa. Ayæ, Mīni nē Baa ānōncabo inōmīni inte mīnitō mīni wæwente baquinque edæ botō imote pīinte ānīnque wīwa āmīnīpa. Āmo ēñēmāimīnīpa, ante edonque apæneccæte ante mōnō Awēnē poncæcāīmpa.” Mānōmāinō ante Ēnoco wodi wēñēñedē pōnī angacāīmpa. ¹⁶ Nōwodāni æbāmē cædāni incæ nē babæ ante odōmonte apænedāni iñōmō, Quīmæ quēwēē, ante pīinīnque piyænē cædāmaī inānīpa. Taadō ante tōmēnāni nāmā nāni cæinēwēnonque ante tee empote godānīpa. Botō godōmēnque waa pōnī cæbo aedāni, ante nāmā ængō cædinque tedewēnānīpa. Ayæ, Wadāni mōnītō wædō ante pōnō cæcædānīpa, ante babæ cædinque tōmēnāni wadāni inānite waa ate bai tēdinque waa pōnī cæte bai godō

apænedānīpa cæmīnīni.

Nē pōnēmīni iñōmō iīmāi cæccæmīnīpa, ante

¹⁷ Mīnitō guiquēnē botō nē waademīni ēñēdāni. Mōnō Awēnē Itota Codito nānō nē da godongaināni incæ, Ēbānō baquīi, ante nāni apænegainō ante iīmāinō ante pōnēdāni. ¹⁸ Tōmēnāni iñōmō mīnitō imīnite apænedīnque, “Wodo iīmæca iñque bayōnte edæ wadāni nāmā nāni toinēwente godōnō ante goquīnāni incæ Wængonguī ingante Baa ante badete toquīnāni inōnāni inte edæ do poncædānīpa,” ante apænedāni ēñēmīnitapa. ¹⁹ Ināni nē badete todāni iñōmō Wængonguī Ōnōwoca ingante ēwocadāmaī ināni inte edæ nāmā nāni cæinēnō ante ēñente cædānīpa. Mīnitō adocabomīni iñōmīnite tōmēnāni, Nānēneto nānēnē gocæmīnīpa, ante cædinque pā cæte bai cædāni inānīpa.

²⁰ Botō nē waadedōmīni edæ iīmāi cæedāni. Mīnitō mōnō Tæiyæ Waēmō pōnī inōngā ingante wede pōnēmīni inte mānīnō mīni wede pōnēnō incæ dica tæī gō cæte ongonca bai impa. Ante adinque mīnitō oncō dicaboga mænonte bai edæ tæī pīñænīnque godōmēnque cæedāni. Ayæ Wængonguī Tæiyæ Waēmō Ōnōwoca ingante ēwocadinque mīnitō, Tōmēngā æbānō angāā, ante ēñēnīnque mānīnonque ante Wængonguī ingante apæneedāni. ²¹ Mīnitō, Mōnō Awēnē Itota Codito pōnō waadete waa cæcā beyænque mōnō wænāmaī inte cōwē wantæpiyæ quēwēngæīmpa, ante æncæte ante wānō cōmīnitawo. Inīnque Wængonguī nē waadete pōnēngā nempo cōwē waadete pōnēnīnque ongōedāni.

²² Pancadānīya guiquēnē, Wabānō quēwēngūimoo, ante guīñente wæyōnānite mīnitō tōmēnāni inānite pīinte adāmaī inte godō waadete waa cæedāni. ²³ Pancadānīya guiquēnē gonga hācōyōmō oo goquīnāni iīmāi impa, ante adinque mīnitō wæætē, Quēwēncædānīpa, ante odōmonte apænedīnque tōmēnāni inānite ō æmīni beyænque quēwēncædānīpa. Wadāni guiquēnē wīwa cædāni inte nāmā baō wentamō mongænte bai ēñayōnānite mīnitō, Nāate wæcæ wæe, ante guīñente wædinque tōmēnāni weocco hāni nāadīncoo incæ gampodāmaī inte tōmēnāni beyæ wæætē waadete godō waa cæedāni.

Wængonguī waēmō pōnī emōnōngā ingampa, ante

²⁴ Mīnitō tæ go wæænte bai oda cædāmaī incæmīnīpa, ante Wængongūinque eyepæ pōnī inōngā inte tōō æmængā ate mīnitō adiyæ ongonca bai wede pōnēncæmīnīpa. Ayæ tōmēngā adocanque eyepæ pōnī cædongā inte pōnō badongā ate mīnitō

waimīni bamīni īnīnque mīnītō nangūi pōnī
 mīni watapæ toquinque tōmengā nānō
 ñāō ēmōñōmō ænte mæicā æicæminīmpa.
²⁵ Wængongūi adocanque pōnī īnongā inte
 mōnō īmonte, Quēwencæminīmpa, ante nē
 Ængaingā ingampa. Īnīnque Itota Codito
 mōnō Awēnē nānō cægainō beyænque eyepæ
 bate quēwēmō īñōmō mōnō īimainō ante
 apæncæīmpa. Wængongūi ēñēmi. Bitō
 badongaincoo dæ āñonte wēēnē īmāmoque
 īñonte ñōwopāmo īñonte wapāmo mīmāmo
 īnīnque bayonte bitō adobique cōwē ñāō
 entawente tæi ēmōnīnque Awēnē nē tæi
 pīñæmi īnōmi inte tōmāo īñōmō quēwēnāni
 īnānite nē Ānōmi īmidō anguēnē, ante mōnō
 apæncæīmpa. Mānōmaī baquīnō anguēnē,
 ante botō, Amēē, āmopa.

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenëñedë quïnö wë wodonte bai ingatimpa, ante Itota Codito nänö odömongainö ante yewæmante impa. Wængongui iñömö, Wantæ iñonte quïnö bai baquüi, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pönongå ponte odömongä atabopa. ² Botö Wäömo guiqüenë, Quïnö botö adinö tömänö incæ nõ impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobai wüimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante iñ yewæmöintaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cædäni nani toquinque. Edæ iimai baquüönæ wantæ iñö nõ baquïnö angüenë.

Godongämë nani pönencabo tiæte ganca inäni beyæ Wäo yewæmongampa

⁴ Botö Wäömo inömo imopa. Atiabæ iñömö wayömö wayömö incæ Codito ingante godongämë mini pönencabo önonpo æmæmpoque go mencabomüniya acæminimpa, ante botö yewæmömopa.

Mönö Mæmpo Wængongui wëenëñedë në quëwengängä inte ñowo quëwängä incæ ayæ wantæpiyæ quëwencæcäimpa. Tömengä Öñowoca incæ önonpo æmæmpoque go mëwoga öñowocaidi bai ëwocadongä inte Wængongui nänö aacæ tæë contayömö tæcætawë inö në ongongampa. Ininque Mæmpocä tönö tömengä Öñowoca waadete pönö cæda ate münitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pönü apænedongä inte wængä ate täno ñäni ömæmongaingä ingampa. Tömengä tömämæ awënë odayeidi nani Tæiyæ Awënë Odeye inongä ingampa. Tömengä adobai mönö imonte në waadete pönënongå inte mönö wënæ wënæ cægäinö adinque tömengä wepæ inte mënoncäcäimpa. Tömengä adobai waadete pönö cæcä ate münitö gänë entawencæminimpa, ämopa. ⁶ Ayæ Itota, Botö Awënë Odeyebö nempo quëwëninque münitö botö tönö godongämë

aamüni bacæminimpa, ante pönö badon-gacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui quü, ante në godömö bagaimö imopaa. Tömengä ñäö bai ëmönöngante mönö waocabo tömenganque ingante waa acæimpa. Tömengänque cöwë në tæi piñænongå inte quingämenque quëwënäni iñönänite tömengä tömänäni Awënë inongä ingampa, ante mönö cöwë angæimpa, ante Amëë, ante ämopa.

⁷ Eñëedäni, tömengä edæ boguimancodë wææñongante,

tömänäni tömengä ingante acædänimpa.

Tömengä ingä në timpogainäni incæ adobai tömengä ingante acædänimpa.

Ayæ tömämæ quëwënäni tömänäni tömengä ingante adinque Ca ca wæcædänimpa.

Mänömai baquïnö angüenë, ante botö, Amëë, ämopa.

⁸ Wængongui Awënë adocanque Tömää në Cægäingä inte iimai angampa. “Botö Tänobö ingaimö inte Tömämo inguimo imopa.” Mänömainö ante në angä iñömö tömengä wëenëñedë do quëwengängä inte ñowo quëwängä incæ ayæ wantæpiyæ quëwencæcäimpa.

Itota Codito në ñäö bai ëmongängä ingante Wäo nänö adö

⁹ Botö Wäömo inömo imopa. Münitö tönüñabö inte botö münitö tönö Awënë Odeye Itota nempo quëwëninque mönö tömengä tönö godongämë aamö inömo imopaa. Botö münitö tönö godongämë wæwëmö imö incæte mönö wæntæye inämai inte ee cæmopaa. Wængongui nänö angainö ante apænedinque ayæ, Itota mönö Codito inongä ingampa, ante, Nö impa, ante botö apænedö beyænque botö wää tæiwænë Patömoto iñömö tee mönete bai quëwentabopa.

¹⁰ Wængongui Awënë itädë iñonte Wængongui Tæiyæ Waëmö Öñowoca incæ botö imote bæi ongante bai cæyongä botö öñönabæ inö adocanque tedepämo todompeta nani ancadeca we öonte bai yedæ të ëñentabopa. ¹¹ Iimai angantapa. “Bitö quïnö wüimonte bai abii, ante yewæmöintaa yewæmöe. Yewæmöninque wayömö wayömö incæ Codito ingante godongämë nani pönencabo önonpo æmæmpoque go mencabodäniya iñönänite tömënäni inänite da godöe,” ante angantapa. “Epeto quëwëñömö quëwënäni Ätämidöna quëwëñömö quëwënäni Pedegämo quëwëñömö quëwënäni Tiatida quëwëñömö quëwënäni Tadoditi quëwëñömö quëwënäni Pidadedepia quëwëñömö quëwënäni ayæ Daoditea quëwëñömö quëwënäni Codito ingante godongämë nani pönencabo nani cabo nani cabo iñönänite bitö tömënäni

inänite iī bitö yewæmöninta da godömi æncædänimpa.”

¹² Äñongante botö, Æcänö äna ëñëmoo, ante dadi ëmænte atabopa. Dadi ëmæññómote yædo concædi tī wodönoincade oodo inte badöincade önonpo æmæmpoque go mēa ganca ongoncade atabopa. ¹³ Ayæ yædo concædi tī wodönoincade ongöññómö adoyömö tæcæguedë adocanque nē Waocä ëñagaingä bai inte ongongä atabopa. Tömengä doyaencoo önöwa ganca incoo mongæninque ayæ tæcæenëmæ inö pacadeyænta oodo inte badöi ëenëmængä ingantapa. ¹⁴ Tömengä ocabo tönö ocagui iñömö dayö näämænta pöni ëmö bai adobai encadinque yoguimö ñäö pöni ëmö bai adobai ñäö bai encacä ingantapa. Ayæ tömengä awinca incæ gonga wo bæcote bai ëmongä ingantapa. ¹⁵ Tömengä önöwa incæ yaëmenta bodonte nāni äñö gongapamö guii ocoi äñonte ñäö ëmö bai tömengä adobai ëwacä ingantapa. Tömengä tedeyongä æpæ mæ conta goyonte æpæ tē bai adobai tē ëñentabopa. ¹⁶ Tömengä önönempo tömempo incæ nēmöidi æmæmpoque go mēa ganca næængantapa. Ayæ tömengä önöne inö yaëmé tipængaa waingamë engamë ënedinque yædæ tadete ongongantapa. Ayæ tömengä awinca incæ nænque nangui tamonte bai ñäö bai ëmongantapa.

¹⁷ Tömengä ingä adinque botö tömengä önöwa inö wænte bai tæ gowææntabopa. Tæ gowææññómö tömengä önonpo tömempo inte botö ïmote gampodinque “Bitö guññenāmai incæbiimpa,” ante äninque edæ, “Tömää badönāmai iñedë botö Do Quëwengaimö imopa. Ayæ tömää iinque bayedë incæ botö Ayæ Pöni nē Quëwëmo incæboimpa,” ante angantapa. ¹⁸ Edæ “Botö nē Quëwengaimö inömo inte nē wænimo incæ ñāni ömæmonte cöwë wantæpiyæ quëwëmo inömo imopa. Waodāni nē wænte godināni nāni wænte ongöññómö ongöññönānite botö, Cöwë wænāmai quëwencæminimpa, ante botö tæi piñæmāmo inte nē æmo imopa.

¹⁹ “Mänömai beyæ bitö wīlmonte bai bitö adinö ante quñö ñöwo i, ante quñö iincayæ ate baquii, ante yewæmoe ämopa. ²⁰ Mänii nēmöidi önonpo æmæmpoque go mēa ganca botö önönempo tömempo incæ mæ öñoncoo bitö adincoo ante, Æbänö i, ante bitö ëñenāmai inönö ante botö edonque pöni apænebo ëñencæbiimpa. Botö ïmote godongämæ nāni pönencabo önonpo æmæmpoque go mencabodāniya iñönānite tömēnāni inānite nē aadāni bai nēmöidi inānipa. Ayæ yædo concædi tī wodönoincade oodo inte badöincade önonpo æmæmpoque go mēa ganca ongoncadecoo bitö adincoo ante, Quñö bai ināni, ante botö adobai bitö ïmote edonque pöni apænebo ate nē ëñemi bacæbiimpa. Wayömo wayömo incæ botö

ïmote godongämæ nāni pönencabo önonpo æmæmpoque go mencabodāniya iñömö tömēnāni yædo concædi tī wodönoincade bai adobai inānipa,” ante Waocä nē ëñagaingä iñömö botö ïmote apænegacäimpa.

2

Godongämæ nāni pönencabo tiæte ganca ināni inānite Itota nänö äñö

Epeto iñömö quëwēnāni inānite Itota nänö äñö

¹ Ayæ adocä godömenque apænecantapa. “Epeto iñömö Wængongui ingante godongämæ nāni pönencabo inānite nē aacä acæcäimpa, ante botö äñö ante iimāi yewæmoe ämopa. ‘Botö edæ nēmöidi önonpo æmæmpoque go mēa ganca botö önönempo tömempo nē nææmo imo inte botö adobai yædo concædi tī wodönoincade oodo inte badöincade önonpo æmæmpoque go mencadea incade ongöññómö adoyömö tæcæguedë nē cægömo imopa.

² “ Minitö æbänö cæminii, ante do ëñëmopa. Edæ nangui pöni cædinque munitö wæntæye ināmai inte ee cæminipa. Minitö wiwa cædāni inānite Baa ante quëwëminipa, ante do ëñëmopa. Ayæ Wængongui nänö nē da godongaimöni imönipa, ante nē äñāni incæte ināmai iñönānite munitö, Nāwangä ināni, ante ëñencæte ante apænte adinque, Tömēnāni babæ äñānipa, ante ëñente wæminitapa. ³ Minitö wæntæye ināmai inte ee cæmini iminipa. Ayæ botö ëmöwo apænete beyænque wæwëmini incæte godömenque godömenque cædinque munitö mīmönë nangæ badāmai iminipa, ante do ëñëmopa.

⁴ “ Incæte adoque pöni mini cædinö wīi waa abopa. Minitö edæ wīi wëñëñedë bai ædæmö waadete pönëmini iminipa, ante awædö. ⁵ Edæ munitö waa cædimini imini incæte ñöwo wæætë wënæ wënæ cæmini bamini awædö. Mäninö ante pönëedāni. Mänii mini wënæ wënæ cædinö ante, Ancaa wæwente awædö, ante pönente ñimpo cædinque munitö wëñëñedë mini waa cægai bai adobai cæte quëwëedāni ämopa. Amo ëñeninque munitö mini wënæ wënæ cædinö ante wædāmai imini adinque botö munitö weca pömaimopa. Pöninque mini yædo concædi tī wodönoincade nänö ongöññómö ongöññönite botö ö ænguimodö angüenë. ⁶ Incæte adoque mini cædinö guiquëñë waa abopa. Minitö edæ Nincodaitaidi nāni äñāni nāni cædö ante adinque piinte iminipa. Botö adobai tömēnāni nāni cædö ante adinque piinte imopa.

⁷ “ Wayömo wayömo incæ botö ïmote godongämæ nāni pönencabo inānite

Wængongui Ōnōwoca quīnō angāā, ante tōmengā nānō ānō ante nē ēamonca īmini inte ēñēedāni. Wængongui waa gōnea īñōmō māniñōmō adowænque quēwenguīwæ pædiwæ iwæmpa. Tæi emonte nē gānā cædāni inānite botō īñōmō, Māniwæ inca cæncæminimpa, ante pædæ godoncæboimpa, ante mānīnque āmopa,” ante Waocā nē ēñagaingā īñōmō botō īmote apænegacāimpa.

Ētāmidōna īñōmō quēwēnāni inānite Itota nānō ānō

⁸ Ayæ adocā godōmenque apænecantapa.

“Ētāmidōna īñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante īlmaī yewæmōe āmopa. Tōmāā badōnāmaī īñedē botō Do Quēwengaiñō īmopa. Ayæ tōmāā īnque bayedē incæ botō Ayæ Pōni nē Quēwēmo incæboimpa. Botō nē wæñimo incæ nōwo wæætē nāni ōmæmongaiñō īmopa.

⁹ “ Mīnitō wæwēmīni inte adobāi ōmæpomīni īminipa, ante botō do ēñēmopa. Incæte mīnitō nō ēamīni īminipa. Ood-eoidi pancadāniya, Mōnitō Wængongui ingante mōni pōnencabo īmōnīpa, ante nē ānāni incæte wīi mānōmaī inānīpa. Tōmēnāni mīnitō īminite ancaa piinte babæ ānewēnāni inānīpa, ante botō do ēñēmopa. Māniñāni īñōmō Tatāna ingante nāni ēñencabo inte mānōmaī cædānīpa tōō. ¹⁰ Mīnitō quīnō beyæ wæwencæ cæmīni īmini incæte guīñēnāmaī īedāni. Tatāna incæ, Ēbānō cæmīni, ante acæte ante cæcā beyænque woadāni pancamīniya īminite tee mōncædānīpa. Ōnōmpo tipæmpoga ēōnæ īñonte wæwenguīmīni īminīpa. Inīnque mīnitō mīni wængūnque wæmīni incæ cōwē pōnēnīnque ædæmō cæedāni. Mānōmaī nē cæmīni īnīnque botō, Mīni cōwē quēwengūnta, ante poganta bāi mīnitō īminite pōnōmo æmaīminīpa.

¹¹ “ Wayōmō wayōmō incæ botō īmote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca īmini inte ēñēedāni. Wadāni adopoque wæñinque nāni mempoga wænguīmāmo bāi tæi emonte nē gānā cædāni īñōmō wæætē mempoga wæñnāmaī incædānīpa, ante mānīnque āmopa,” ante Waocā nē ēñagaingā īñōmō botō īmote apænegacāimpa.

Pedegāmo īñōmō quēwēnāni inānite Itota nānō ānō

¹² Ayæ adocā godōmenque apænecantapa.

“Pedegāmo īñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante

īlmaī yewæmōe āmopa. ‘Botō edæ yaēmē tipængaa waingamē engamē nææmo īmopa.

¹³ “ ‘Ēdōnō quēwēmīni, ante botō do ēñēmopa. Tatāna contaimpa ongonte nānō aayōmō adoyōmō mīnitō quēwēmīni īmini incæte botō īmo edæ nīmpo cædāmaī quēwēmīni īminīpa. Mīni quēwēñōmō Tatāna adoyōmō quēwengā īnīnque, Antipato edæ botō ānō ante cōwē pōnēnīnque ædæmō apænedongā īñongante māniñōmō quēwēnāni tōmengā ingante wæñnōnāni wængantapa. Tōmengā wæñnedē incæ mīnitō botō īmote edæ, Dicæ pōnēmogaa, ānāmaī īminīpa.

¹⁴ “ ‘Incæte pancaa mīni cædinō wīi waa abopa. Edæ pancamīniya docā Badāo nānō odōmonte apænegaiñō ante ēñēwēmīni awædō. Tōmengā īñōmō, Badaco godō cæcā beyænque idægoidi tee tēwate bāi oda cæcædānīmpa, ante cædinque adocā Badaco ingante odōmonte apænecā ēñente cægacāimpa. Wadāni, Mōnitō wængongui cænguī impa, ante nāni cōnōni ante, Mīnitō cæedāni, ante Badaco īñōmō idægoidi inānite odōmonte apænegacāimpa. Ayæ onquiyæñāni tōnō godō towente cæedāni, ante odōmonte apænegacāimpa. ¹⁵ Ayæ pancamīniya adobāi Nīncodaitaidi nāni odōmonte apænedō ante ēñēwēmīni awædō. ¹⁶ Mānōmaī beyæ mīni wēnæ wēnæ cædinō ante, Ancaa wæwente awædō, ante pōnente nīmpo cæedāni. Mīnitō mīni wēnæ wēnæ cædinō ante wædāmaī īmini adīnque botō wantæ īñonte mīnitō weca pōmaīmopa. Pōnīnque tōmēnāni nāni odōmonte apænedō ante nē ēñēwēnāni īñōnānite botō ōnōne incæ yaēmē ēnedīnque yædæ tadedīnque guēadō guēa cæcæboimpa.

¹⁷ “ Wayōmō wayōmō incæ botō īmote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca īmini inte ēñēedāni. Tæi emonte nē gānā cædāni inānite cænguī mānāā nāni angaiñō botō wē wodōni cænguī īñonte godōmo ænte cæncædānīmpa. Adodāni inānite adobāi dica nāāmæntaca godōmo æncædānīmpa. Wa emōwo ante pemōnīnque mānīncaa yewæmonte ingæimpa. Nē ænānīnque māniwo ēñēnāni inānīpa, ante mānīnque āmopa,” ante Waocā nē ēñagaingā īñōmō botō īmote apænegacāimpa.

Tiatīda īñōmō quēwēnāni inānite Itota nānō ānō

¹⁸ Ayæ adocā godōmenque apænecantapa.

“Tiatīda īñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante īlmaī

yewæmōe āmopa. ‘Botō edæ Wængongui Wēmo inōmo īmopa. Botō awinca incæ gonga wo bæcote bai nē ēmōmo īmopa. Botō ōnōwa incæ yaēmenta bodonte nāni ānō bai nāō bai nē ēwabo īmopa.

19 “ ‘Mīnitō æbānō cæmīni, ante mīni waadete pōnēnō ante mīni wede pōnēnō ante wadāni inānite mīni waa cædō ante botō do ēñēmopa. Mīnitō wæntæye ināmai inte ee cædinque godongāmæ cæmīni īminipa, ante ayæ, Wēēñēdē do waa cædimīni inte nōwo godōmenque waa cæmīni īminipa, ante adobai do ēñēmopa. 20 Incæte adoque pōni mīni cædinō wī waa abopa. Onquiyængā Etabete nē ēmogā iñōmō edæ, Wængongui beyæ nē apænebo, ante nāmā incæ nē angā ingante wido cædāmai īmīni inte wæætē tōmengā ingante ayæ godōmenque Ao āminipa tōō. Iñæmpa tōmengā iñōmō botō imote nē cædāni inānite nānō odōmonte apænedō beyænque oda cæte gocædānīpa, ante cæcā beyæ tōmēnāni onquiyæñāni tōnō godō towente cædānīpa. Wadāni, Mōnitō wængongui cængui īmpa, ante nāni cōnōni cæñānīpa tōō. Mānōmai cæcædānīpa, ante māningā onquiyængā odōmonte apænecāīpa.

21 “ ‘Tōmengā nānō towente cædimāmo ante, Botō wēnæ wēnæ cæbo inte ancaa wæwente awædō, ante pōnente wabānō nīmpo cæquingā, ante botō tōmengā ingante ee pānāmai intabopa. Incæte tōmengā nānō wēnæ wēnæ cædō ante wædāmai quēwengā ingampa. 22 Īnīnque botō, Tōmengā ingante cæbo beyænque wēnæ wēnæ bate wæwencæcāīpa, ante cæcæboīpa. Ayæ tōmengā nānō odōmonte apænedinō bai nē ēñente cædāni iñōmō tōmengā tōnō nāni guēa godō mōwēñinō ante, Mōnitō wēnæ wēnæ cæmōni inte ancaa wæwente awædō, ante pōnente nīmpo cædāmai ināni īnīnque tōmēnāni inānite adobai botō cæbo beyænque nangui wēnæ wēnæ bate wæwēmañānīpa. 23 Tōmengā wēnāni inānite wæñōmo wæncædānīpa. Īnīnque wayōmō wayōmō incæ botō imote godongāmæ nāni pōnencabo tōmancabodāniya iñōmō, Botō incæ tōmēnāni nāni mīmōno tōnō ocadē, Æbānō pōnēnāni, ante nē ēñēmo inōmo īmopa, ante ēñencædānīpa. Ayæ mīnitō cædi bai ante adīnque botō wæætē adobai mīnitō tōmāmīni īmīnite cæcæboīpa.

24 “ ‘Wamīni pancamīniya guiquēnē Tiatida iñōmō quēwēmīni inte māningā onquiyængā nānō odōmonte apænedō ante mīnitō nē pōnēnāmai īminīpa. Ayæ Tatāna wē wodonte nānō angainō ante ēñēnāmai īmīnitapa. Īnīnque botō mīnitō

īmīnite īlīmai āmopa. Mīnitō teēmē mongæncōo mongænte gote bai wædāmai incæmīnīpa, ante wadō ante ānāmai incæboīpa. 25 Wæætē botō ocæ ēmænte wæænganca mīnitō edæ do mīni pōnēnō ante nīmpo cædāmai iedāni. Mānīnque āmopa.

26 “ ‘Inguipoga īnīnque baganca ædānidō botō ānō nē cædōnāni inte tæi ēmote nē gānā cædāni inānite botō pōnō cæbo ate tōmēnāni nāmā tæi pīñænāni badīnque tōmāmæ quēwēnāni inānite nē ānāni bacædānīpa. 27 Botō Mæmpo botō imote pōnō cæcā beyænque Awēñē badīnque nāmā tæi pīñænte inte nē āmo bai botō adobai tōmēnāni inānite pōnō cæbo beyænque awēñēdi badīnque aacædānīpa. Tæiyæ awēñē tōmengā nempō quēwēnāni inānite aacā bai tōmengā iñōmō tōmāmæ quēwēnāni inānite, Īlīmai cædāni, ante aacæcāīpa. Dai inte bæte cængæmō tæi ænacā nancate bai cædinque tōmengā adobai wabæca wabæca quēwēnāni inānite nangui pante cæcæcāīpa. 28 Mānīnāni inānite botō adobai wadaamō nāō bayonte apāimō incæ godōmo æncædānīpa.

29 “ ‘Wayōmō wayōmō incæ botō imote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca īmīni inte ēñēedāni, ante mānīnque āmopa,” ante Waocā nē ēñagaingā iñōmō botō imote apænegacāīpa.

3

Tadoditiidi inānite Itota nānō ānō

1 Ayæ adocā godōmenque apænecantapa. “Tadoditi iñōmō Wængongui ingante godongāmæ nāni pōnencabo inānite nē aacā acæcāīpa, ante botō ānō ante īlīmai yewæmōe āmopa. ‘Wængongui Ōnōwoca incæ ōnmpo æmæmpoque go mēwoga ōñōwocaidi ēwocadongā ingampa. Botō iñōmō tōmengā ingante nē ēwocate quēwengāīmo inte nēmōidi ōnmpo æmæmpoque go mēa ganca ināni nē næænte ingāīmo īmopa.

“ ‘Īnīnque, Mīnitō æbānō cæmīni, ante do ēñēmopa. Mīnitō mīlīmīni quēwēmīnīpa, ante wadāni apænedāni incæte mīnitō wī waa cæte quēwēmīni inte do wængaināni bai īminīpa tōō. 2 Edæ, Botō Wængongui ayongā mīni cædinō wī eyepæ cæmīnīpa, ante adīnque botō, Nāni ōmæmōedāni, ante āmopa. Nāni ōmæmōnīnque mīnitō, Ayæ mīlīnāni quēwēnāni incæ nē wæncæ cædāni bai badāni incæte tōmēnāni wæñāmai inte wæætē tæimō bacædānīpa, ante cædāni. 3 Mānōmai beyæ, Quiēmē do ænīmīni bai īmīni,

quēmē ante do ēñēmīni, ante māniñō ante wæætē adodō ante pōnēdāni. Pōnēnque mīnitō māniñō ante ēñente cædāni. Ayæ mīni wēnæ wēnæ cædiñō ante, Anca wæwente awædō, ante pōnente ñimpo cædāni. Wæætē mīnitō wīlī ñāni òmæmōnte bai imīni ate wædinque botō incæ mīnitō weca awēmō nē ængā bai pōmaimopa. Ayæ, Awēmō nē ængā æyedēnō ponguingāā, ante ēñēnāmaī ināni bai botō adobai mīnitō ēñēnāmaī iñōmīni mīnitō weca awēmō ponguimo apa quēwēmīni.

⁴ “ ‘Incæte Tadoditi iñōmō mīni quēwencabo iñōmīnite pancadāniya tōmēnāni wecoco wentamō nāmōnāmaī bai iñāni inte nē waa cæte quēwēnāniya. Māniñāni waa cæte quēwēnāni beyæ eyepæ inōnāni inte wecoco nāmæntacoo mongænte botō miñæ gocædānimpa. ⁵ Nē tæi ēmōnte gānā cædāni iñōmō adobai wecoco nāmæntacoo mongæncædānimpa. Ayæ, Quēwenguinta, ante Wængongui nānō yewæmongaintaa māniñāni emōwo do yewæmōi iñinque botō cōwē wadæ cædāmaī incæboimpa. Wæætē botō Mæmpo Wængongui weca ayæ tōmengā anquedoidi weca botō, iñāni botō miñæ gogaiñāni ināniya, ancæboimpa.

⁶ “ ‘Wayōmō wayōmō incæ botō imote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca imīni inte ēñēdāni,’ ante māniñque āmopa,” ante Waocā nē ēñagaingā iñōmō botō imote apænegacāimpa.

Pidadedepiaidi inānite Itota nānō ānō

⁷ Ayæ adocā godōmenque apænecantapa. “Pidadedepia iñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante iīmaī yewæmōe āmopa. ‘Botō edæ nē Tæiyæ Waēmō ingaīmo imopa. Nō ante cægaīmo inte botō docā Awēñē Dabii nānō wi ænequi nē næængaīmo imopa. Iñinque quīnō odemō botō wi ænebo incæ māniñemō wacā ædō cæte tee mōnequingāā. Ayæ quīnō odemō botō tee mōnebo incæ māniñemō wacā ædō cæte wi ænequingāā.

⁸ “ ‘Mīnitō æbānō cæmīni, ante do ēñēmopa. Mīnitō cæcæmīnimpa, ante botō odemō wi ænete bai cæbo aedāni. Æcānō māniñemō wæætē tee mōnequingāā. Edæ dæ angampa. Mīnitō wīlī tæi piñæmīni imīni incæte botō angaiñō ante ēñente cæmīni inte botō emōwo ante, Dicæ ēñēmōniyaa, ante ānāmaī inīmīni imīniya. Botō do ēñēmopa. ⁹ Mōni oodeocabo imōni incæ pancadāniya,

Mōnitō Wængongui ingante mōni ēñencabo imōniya, ānāni incæte ināmaī ināniya. Wæætē tōmēnāni iñōmō babæ ānewēnāni ināniya. Tatāna ingante nāni ēñencabo ināniya tōō. Botō godō cæbo ate adodāni mīnitō weca ponte mīnitō ōnōwa gāānē ædæ wææncædānimpa. Ayæ, Botō mīnitō imīnite nē waadete pōnengāimo imopa, ante botō godō odōmōmo ēñencædānimpa. ¹⁰ Mīnitō imīnite, Ee cædinque wæntæye ināmaī iedāni, ante botō angaiñō ante ēñente nē cædimīni imīni adinque botō wæætē mīnitō imīnite wææ aacæboimpa. Inguipoga quēwēnāni tōmēnāni nāni wæwenguiāmō anca baquīnō anguēnē. Edæ Tatāna, Æbānō quēwēnāni, ante acæte ante cæcā ate nāni wæwēñedē botō iñōmō, Mīnitō wæwēnāmaī incæmīnimpa, ante mīnitō imīnite wææ aacæboimpa.

¹¹ “ ‘Botō oo ocæ ēmænte ponguimo imopa. Wængongui poganta nānō godonguinta, ante mīnitō imīnite godongā æncæmīnimpa. Māniñāni mīni ænguinta iñōmō wacā ænāmaī incæcāimpa, ante mīnitō mīni entawēnō ante godōmenque godōmenque ñimpo cædāmaī iedāni. ¹² Botō cæbo ate waodāni tæi ēmōnte nē gānā cædāni iñōmō tōmēmo Wængongui tæiyæ waēmō oncōnē wantæpiyæ quēwenguiñānidō anguēnē. Tōmēnāni Wængongui weca cōwē quēwente taodāmaī incædānimpa. Tōmēnāniya botō Wængongui emōwo yewæmoncæboimpa. Mīi Eedotadēē nāni āñōmō iñōmō botō Wængongui nānō quēwēñōmō iñōnte māniñ tōmengā nānō quēwēñōmō incæ ōnōnædē inō da pōnongā wæængæimpa. Māniñ Wængongui nānō quēwēñōmō emōwo botō adobai tōmēnāniya yewæmoncæboimpa. Ayæ botō wawo botō ñōwo pemongaīwo adobai tōmēnāniya yewæmoncæboimpa.

¹³ “ ‘Wayōmō wayōmō incæ botō imote godongāmæ nāni pōnencabo inānite Wængongui Ōnōwoca quīnō angāā, ante tōmengā nānō ānō ante nē ēamonca imīni inte ēñēdāni,’ ante māniñque āmopa,” ante Waocā nē ēñagaingā iñōmō botō imote apænegacāimpa.

Daoditeaidi inānite Itota nānō ānō

¹⁴ Ayæ adocā godōmenque apænecantapa. “Daoditea iñōmō Wængongui ingante godongāmæ nāni pōnencabo inānite nē aacā acæcāimpa, ante botō ānō ante iīmaī yewæmōe āmopa. ‘Botō emōwo Amēē, ante pemongaīmo inte botō cōwē, Nāwangā impa, ante nē cōwē ædæmō apænegāimo imopa. Wēñēñedē Wængongui nānō badongāñedē māniñedē botō tōmengā tōnō godongāmæ badongāimo beyænque

tömengä nänö badongaincoo tömancoo Awënë badinque botö nê ämo ïmopa.

15 “ Minitö æbänö cæminii, ante do ëñëmopa. Yoguiþæ bai inämaï ïmini incæte ocoi ämæ bai adobaï inämaï ïminipa töö. Ìñæmpa yoguiþæ bai ïminipa diyæ waa aquimoo. Edæ ocoi ämæ bai ïminipa diyæ waa aquimoo. 16 Minitö yoguiþæ bai inämaï ïmini incæte ocoi ämæ bai inämaï ïmini inte wæætê wï eyepæ cæminii inte gänê ämæ bai ïminipa töö. Mänömaï beyæ botö edæ tömëmo önönê towæ tãnonte bai minitö ïminite adobaï wido cæcæ cæbo apa quëwëmïni. 17 Minitö, Mönitö nanguï ëamöni ïmönipa, ante äminipa. Edæ, Tömëmöni mäincoo gæte da wëninque eyepæ ëamönipa, ante äminipa. Ìñæmpa mäninö ante wapiticæ pönente äminipa. Minitö mïni wæwëno incæ ëñënämaï ïminipa töö. Minitö æbänö bate cæminii, ante adinque wadäni, Minitö wodi, ancædänimpa. Ömæpodäni bai ïmini inte minitö babetamönäni bai ïmini inte ömaadäni bai ïmini incæte, Mänömaï ïmönipa, ante ëñëmïniyaa.

18 “ Mänömaï beyæ botö, Ìmaï cæedäni, ante waadete ämopa. Botö pönö cæbo beyænque minitö wæætê waa bate bai nanguï cæcæminimpa, ämopa. Mäninö botö pönö cædö ïñömö oodo gongapamö aca podonte ate wæmö oodo bate bai ïmpa. Ìninque minitö, Mönitö nanguï ëamöni bacæmönimpa, ante cædinque botö weca ponte tömëmo oodo ante godonte æedäni. Ayæ, Ömaamöni inämaï incæmönimpa, ante guingo ïmönämaï incæmönimpa, ante minitö botö weocoo näämæntacoo godonte ænte mongæedäni. Ayæ minitö, Awinca waa acæßimpa, ante cædinque tömëmo awinca cönömöimæ godonte æninque cönömöedäni.

19 “ Botö nê waadete pönënanï inänite botö piinte ämo inte adobaï pante cæbo ïmopa cæminii. Minitö nanguï cædinque mïni wënæ wënæ cædinö ante, Ancaa wæwente awædö, ante pönente ñimpo cæedäni. 20 Ëamonca ëñëedäni. Botö incæ odemö yabæ inö ongonte bai waomïni mimöno a ongöninque, Wi ænequi, ante aa peyömo waocä æcämenque incæ ëñëninque odemö wi ænete botö imo, Pö guïie, angä ïninque botö ïñömö edæ tömengä mimönê pö guïicæboimpa. Tömengä mimö botö oncö bai ïñonte botö tömengä tönö cænte bai cöwê quëwëncæboimpa. Ayæ tömengä wæætê botö tönö cænte bai cöwê quëwëncæcäimpa. 21 Botö tæßi ëmonte nê gänä cægäimo inte botö Mæmpo nänö aacæ tæ containpaa tömengä tönö guëa tæ contagäimo bai nê tæßi ëmonte nê gänä cædäni ïñömö adobaï botö tömëmo aacæ

tæ contayömo botö tönö godongämæ tæ contacædänimpa, ante ämo adopaa tæ contaquinäni.

22 “ Wayömo wayömo incæ botö ïmote godongämæ nänï pönencabo inänite Wængongui Önöwoca quïno angää, ante tömengä nänö äno ante tömënanï nê ëamonca ïmini inte ëñëedäni, ante mäninque ämopa,” ante Waocä nê ëñagaingä ïñömö botö ïmote apænegacäimpa.

4

Öönædê ïñömö Wængongui ingante wat-apæ apænedäni

1 Botö Wäomo inömo inte ayæ ate æmö ayömote öönædê inö odemö wi ænete atabopa. Todompeta nänï ancadeca we öonte yedæ tê bai tedepämo täno botö ëñëninö ïñömö ñowo wæætê adopämo botö ïmote ïmaï äninque, “ Ìñömö pö æe. Æñömite botö, Ayæ ate quïno baquënë inguïi, ante bitö ïmite edonque odömömo acæßimpa,” angantapa.

2 Mäninö ante äñongä Wængongui Önöwoca incæ botö ïmote bæi ongonte bai cæyongä botö wïimonte bai adinque ïmaï atabopa. Öönædê inö Awënë tæ containpa ayömo adocanque mäniñömö tæ contacä atabopa. 3 Mäningä adoyömo nê tæ contadongä ïñömö dica ñäo bai ëmonca bai adobaï ëmongä ingantapa. Aatape nänï äninca bai codönadina nänï äninca bai mäinca mencaa ñäo bai inca bai tömengä adobaï ëmongä ingantapa. Awënë tæ containpa ïñömö daimê dica bai etëmedada nänï äninca ëmonca bai inte æädämæ waimê pönï gongæmënimpa. 4 Mänimpa Awënë nänö aacæ tæ containpa waïmpacoo bæinticoatodo ganca mänimpopacoo mäniñömö godämæ a ongompapa. Adopacoo ïñömö nê aadäni nê Picænäni bæinticoatodo ganca mänimpodäni tæ contadinque näämæntacoo mongæninque poganta oodo inte badöinta da wencate a ongönänitapa. 5 Awënë tæ containpa inö näinte yædæ yædæ ta gote detæbo tæi tæi tê tēñonte yedæ pönï änimpa. Ayæ Awënë tæ contayömo tæcætawê inö ti wodönoincade öonmpo æmæmpoque go mencadea wocædöincadecoo a ongönimpa. Wængongui Önöwoca incæ öonmpo æmæmpoque go mëwoga önöwocaidi bai ëwocadongä inte mäinincadecoo bai ingampa.

6 Ayæ Awënë tæ containpaa tæcætawê inö adobaï gäwapæntibæ bai ïñonte awocawænta bai ïmipa. Ayæ Awënë tæ containpa ïñömö müinäni quëwënanï mënaa go mënaa inäni godämæ a ongönänitapa. Mäninäni ïñömö tæcætawê inö önöñabæ inö tömäo awinca ëmönäni atabopa. 7 Tänäcä

mūingā quēwengā botō adingā īñōmō nēōō bai ēmongampa. Ayæ wacā mūingā quēwengā botō adingā īñōmō wagada mæmpo bai ēmongampa. Wacā mūingā quēwengā botō adingā īñōmō tōmengā awinca waocā awinca bai ēmongampa. Ayæ tōmangā mūingā quēwengā botō adingā īñōmō guingāmōwæ pao pao gocā bai atabopa. ⁸ Mēa go mēa mūināni quēwēnāni incæ adocanque adocanque ōnompo æmæmpoque go adoguēnepænque ēmænte quēwēnāni inānīpa. Ayæ adodāni inte tōmēnāni baonga godāmæ tōmanga nangui pōnī awinca ēmonte ænōmengadænguēnepæ incæ awinca adobai ēmōnānīpa. Mānīnāni edæ itædē woyowotæ nīmpo cædāmai inte īlmai ante āmotamīni ānānīpa.

“Bitō Tæiyæ Waēmō Awēnē imidō, bitō Tæiyæ Waēmō Awēnē imidō, ante āmōnīpa.

Wængonguī Awēnē bitō adobique Tōmāā nē Cæbi inte

wēēnēnēdē do nē quēwengāimi īmi nōwobi adobi īnōmi inte ayæ wantæpiyæ cōwē quēwēncæbiīmpa.”

Ante āmotamīni ante cōwē ānānīpa.

⁹ Awēnē tæ containpaa nē tæ contadongā inte nē wantæpiyæ cōwē quēwengāingā ingante apænedinque mēa go mēa mūināni quēwēnāni īñōmō īlmai ante apænedānīpa. Bitō nāō ēmōmi īmīpa, ante apænedinque tōmēnāni, Bitō īmite waa amōnīpa. Mōnitō bitō īmi waa ate pōnente apænemōnīpa, ante apænedānīpa. ¹⁰ Mānōmai ante apæneyōnāni nē aadāni nē Picænāni īñōmō bæinticoatodo ganca mānimpodāni Awēnē tæ containpaa nē tæ contadongā inte nē wantæpiyæ cōwē quēwengāingā weca ædæ wææninque tōmengā ingante, Bitō Wængonguī Awēnē imidō anguēnē, ante watapæ apænedinque tōmēnāni poganta gā æncadinque Awēnē tæ containpaa gāānē cō cædinque īlmai ante āmotamīni ante ānānīpa.

¹¹ “Bitō īñōmō mōnitō Wængonguī Awēnē imidō, āmōnīpa. Bitō badōinēnō, ante pōnente ingāimi inte ōōnædē ongōnāni tōnō inguipoga ongōnāni tōnō tōmānāni inānite badongāimi īmīpa.

Bitō wīī badōmi bai tōmānāni badongāināni quēwēnāmai dæ ancædōnānīmpa.

Mānōmai beyæ bitō eyepæ īnōmi īñōmite, Bitō nāō ēmōmidō anguēnē, ante mōnitō bitō īmite waa amōnīpa.

Bitō nāmā tæī piñænte nē cæbi imidō, ante bitō īmite āmōnīpa.”

ante āmotamīni ante ānānīpa.

5

Wængonguī Codotedo yewæmōinta wi æmpocampa

¹ Ayæ Awēnē nānō aacæ tæ containpaa nē tæ contacā īñōmō tōmengā ōnōnempo tōmempo incæ yewæmōinta dadi ompointa næængā atabopa. Mānīnta tipāataa yewæmōinta impa. Adotaa yæwedeta īñōmō guīfēnca bai inte tee bædīnta ōnompo æmæmpoque go mentaa īnīmpa. ² Ayæ Wængonguī anquedo adocanque nē tæī ēmongāingā inte yedæ aa pecā atabopa. “Mānīnta dadi ompointa wi æmpoquī, ante æcānō nō waa pōnī inongā inte eyepæ inte tee bædedīnta wāa wāa ænete wi æmpoquingāā,” angantapa. ³ Ayæ ōōnædē incæ inguipoga incæ tadōmengadænga incæ cōwā ayōnāni, Æcānō mānīnta wi æmpoquingāā, cæncadenta īnō æcānō aquingāā, ante edæ dæ angantapa. ⁴ Æcānō nō waa pōnī inongā inte eyepæ inte dadi ompointaa wi æmpoquingāā īñōmō edæ dæ angampa. Cæncadenta īnō æcānō aquingāā ante dæ angampa, ante adinque nangui pōnī Ca ca wætabopa. ⁵ Ca ca wæbo adinque nē aadāni nē Picænāni īñōnāni adocanque nē Picængā incæ botō īmo, “Wædāmai īe. Wæætē cōwā æ, angantapa. Adocanque ongūīnængā īñōmō mānīnta wi æmpoquingā a ongongampa. Awēnē Dabīi Pæingā incæ tōmengā īñōmō docā Oodaa pæīnāni nāni cabo īñonte nē nēōō bai tæī ēmōnongā inte nē gānā cæcā ingāingā ingampa. Tōmengā īñōmō edæ eyepæ inte tee bædedīnta ōnompo æmæmpoque go mentaa wi æmpodīnque dadi ompointa wi æmpocæcāīmpa,” angantapa.

⁶ Ayæ Wængonguī Codotedo nāni wæñōnāni nē wæningā bai ingā atabopa. Tōmengā Awēnē Wængonguī nānō aacæ tæ contayōmō tæcæguedē ongōñongā mūināni quēwēnāni mēnaa go mēnaa ināni tōnō nē aadāni nē Picænāni godāmæ a ongōnāni atabopa. Tōmengā īñōmō ōnōmoncawæncōo ōnompo æmæmpoque go mēwāa ēmoncadinque awinca ōnompo æmæmpoque go mēmonga ēmongacāīmpa. Edæ Wængonguī Ōñōwoca incæ ōnompo æmæmpoque go mēwoga ōñōwocaidi bai nānō ēwocadō bai mānīī awincacōo inānīpa. Adodāni ōñōwocaidi inānite inguipoga da pōnongā pōninque tōmēnāni inguipoga tōmāmæ gote cæwodāni inānīpa. ⁷ Ayæ Wængonguī Codotedo īñōmō Awēnē tæ contayōmō pōninque nē tæ contadongā ōnōnempo tōmempo īnō dadi ompointa nānō nææñīnta ō ængantapa. ⁸ Tōmengā mānīnta ō ængā ate mēa go mēa mūināni quēwēnāni tōnō nē aadāni nē Picænāni bæinticoatodo ganca mānimpodāni Wængonguī Codotedo weca ponte ædæ wææñānīta. Ināni tōmānāni ampoquī adapa nāni ānō nææñīnque owæta oodo inte nāni badōīnta oguī waaquī eyede enga nææñānīta. Wængonguī quīnāni tōmengā ingante nāni

apænedö iñömö mänii ogui waaqui bai impa. ⁹ Tömënanäi mä äninque iimaï ante ämotamini ante änanitapa.

“Bitö imite wænönäni nê wænümi inte bitö nö waa põni inömi imipa.

Iñinque bitö eyepæ inte dadi ompointaa ænte tee bædedinta waa waa ænete wi æmpoquimi imipa.

Waadäni näni cabo waodäni näni cabo incæ wadö näni tedecabo wadö näni tedecabo incæ

wacä awënë näni cabo wacä awënë näni cabo incæ wabæca näni quëwencabo wabæca näni quëwencabo incæ waodäni inänite bitö,

Wængongui quimüni bacæminimpa, ante cædinque nämä wepæ godonte ængabiimpa.

¹⁰ Bitö nempo quëwëninge tömënanäi bitö tönö godongamæ aadäni bacædänimpa, ante badongabiimpa.

Mönö Wængongui ingante cæcædänimpa, ante bitö põnö cæbi ate tömënanäi,

Mönö Awënë Odeye Wængongui qui, ante nê godönäni bagainäni inänipa.

Mäninäni edæ awënëidi badinque inguipoga quëwënanäi inänite aacædänimpa.” ante ämotamini änanitapa.

¹¹ Ayæ ayömo Wængongui anquedoidi iñömö bacoo inäni inte ämotamini änanäi eñëninge, Tömënanäi æpodö müdo ganca inäni, ante botö ædö cæte tee mampote eñënguimoo. Edæ müinäni quëwënanäi tönö nê aadäni nê Picænäni tönö Awënë tæ contaimpa gäänê tæcæguedê ongöñönänte Wængongui anquedoidi iñömö yabæque godamæ gongænte ongönänitapa. ¹² Mäniiñömö godamæ ongöninque tömënanäi yedæ äninque iimaï ante ämotamini änanitapa.

“Wængongui Codotedo ingante wænönäni nê wæningä inte tömengä nö waa põni inongä inte eyepæ ingampa.

Tömengä edæ tæi piñængä ingänö anguënë. Tömengä quincodö incæ tömancoo nê êacä inte tömänö ante eñënongå ingänö anguënë.

Tömengä tæi piñænte inte tömää nänö cæinënö cædongä ingampa.

Tömengä ingante, Bitö imite waa amönipa. Bitö ñäö emömidö anguënë, ante bitö imite watapæ apænemönipa,” änanitapa.

¹³ Ayæ Wængongui nänö badongainäni öönæde quëwënanäi incæ inguipoga quëwënanäi incæ tadömengadæ quëwënanäi incæ gäwapæntibæde quëwënanäi incæ tömänäni adoyedê iimaï ante ämotamini ante änanäi eñëntabopa.

“Awënë tæ contaimpa nê tæ contadongä ingante ayæ Wængongui Codotedo ingante tömëna inate iimaï amönipa.

Minatö iminate watapæ amönipa. Minatö iminate waa amönipa.

Minatö ñäö emöminadö anguënë. Minatö tæi piñæmüna iminadö anguënë.

Wantæpiyæ iñonte mäninö ante cöwê ancæmönimpa,” ante änanitapa.

¹⁴ Ante äñönäni mäa go mäa müinäni quëwënanäi adobai, “Iimaï baquinö anguënë,” ante, “Amëe,” änanitapa. Ayæ nê aadäni nê Picænäni iñömö ædæ wææninge watapæ änanitapa.

6

Tee bædinta önompo æmæmpoque go mentaa

¹ Ayæ Wængongui Codotedo iñömö tee bædinta önompo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mäa go mäa müinäni quëwënanäi incæ adocanque iñömö tömengä nänö tedepämo detæbo tê bai inte botö imote, “Pöe,” ante yedæ angä eñëntabopa. ² Tæcæ ayömo cabayo näämænta eñacä do a ongongä atabopa. Cabayo inte nê tæ contacä iñömö to piyæncaimpa næængantapa. Tömengä iñömö wadäni inänite guëadö guëa cæte tæi emongä inte gänä cædongä iñongante Awënë poganta põnonäni æninque tömengä wæætê guëadö guëa cæcæte ante cabayo mongænte gocantapa.

³ Ayæ Wængongui Codotedo wæætê tee bædedinta wataa wi æmpoyongante mäa go mäa müinäni quëwënanäi incæ wacä iñömö botö imote, “Pöe,” angä eñëntabopa.

⁴ Ayæ wacä cabayo opatawæ gonga emö bai eñacä pongantapa. Waodäni incæ wacä ingä wacä ingä wænönædänimpa, ante cædinque Wængongui godö angä beyænque cabayo inte nê tæ contacä iñömö, Inguipoga quëwënanäi piyænê cædämaï incædänimpa, ante nê cæcä bacantapa. Ayæ, tömengä ingante ñænæ yaemê bai põnonäni ængantapa.

⁵ Ayæ Wængongui Codotedo wæætê tee bædedinta wataa wi æmpoyongante mäa go mäa müinäni quëwënanäi incæ ayængä iñömö botö imote, “Pöe,” angä eñëntabopa. Tæcæ ayömo cabayo wentamö eñacä do a ongongä atabopa. Cabayo inte nê tæ contacä iñömö tee mangui önonempo næængä ingantapa.

⁶ Ayæ mäa go mäa müinäni quëwënanäi weca tedepämo bai eñëñömo, “Todigomö tönö tebadamö näni cængüimö, ante nangui näni godonte æimö impa, ancæte ante iimaï angä eñëntabopa. Tömää itæde cædäni ate näni cæganca beyæ todigomö mäa diboda põni tee mangui ganca mäninque godonte

æncædānīmpa. Adobaī tōmāā itædē cædāni ate nāni cæganca beyæ tebadamō ōnompō æmæmpoqwe go adoque diboda tee mangui ganca mānīnque godonte æncædānīmpa. Ayæ oginguipæ ante odibomō nāni āmō eyepæ pæcæīmpa, ante ee aedāni. Bīnōmæ ante yowe eyepæ pæcæīmpa, ante ee aedāni.”

7 Ayæ Wængongui Codotedo wæætē tee bædedinta wataa wi æmpoyongante mēa go mēa mīnāni quēwēnāni incæ tōmangā īfōmō botō imote, “Pōe,” angā ēñentabopa. 8 Tæcæ ayōmō cabayo nāmēnāa ēñacā do a ongongā atabopa. Cabayo inte nē tæ contacā īfōmō tōmēngā ēmōwo, Nē Wæñōinēngā, ante pemonte ēmongantapa. Waodāni nāni wænte ongōfōmō awēnē tōmēngā mīñæ tee empo pongantapa. Wængongui Codotedo pōnō cæcā beyænque tōmēnaa inguipoga quēwēnāni inānite adīnque mēnaa go mēnaa īfōnānite adocanque ingante wæñōinque ayæ wadāni mēnaa go mēnaa īfōnānite adocanque ingante wæñōinque nanguī ināni inānite nē wæñōna badatapa. Tōmēna pancadāniya inānite yaēmenca nē wæñōna badatapa. Ayæ tōmēna godō cæda beyænque waodāni pancadāniya gue ænente nāni wænguīmāmo pō wæncædānīmpa. Ayæ tōmēna godō cæda beyænque pancadāniya quingæ wodonte nāni wænguīmāmo pō wæncædānīmpa. Ayæ tōmēna godō cæda beyænque pancadāniya babæidi wæñōnāni beyæ wæncædānīmpa.

9 Ayæ Wængongui Codotedo wæætē tee bædedinta wataa wi æmpoyongante botō, Wængongui quī, ante nāni wēmonca iya tāimoga æñōmēngadæ īnō waodāni ōnōwocaidi owodāni atabopa. Mānīnāni Wængongui nānō angaīnō ante nē ēñente cædāni inte, Itota mōnō Codito īnongā ingampa, ante, Nō ante impa, ante apænedāni beyæ tōmēnāni inānite wæñōnāni wængānāni īnānitapa. 10 Adodāni yedæ ānīnque īmaī ānānitapa, “Awēnē Wængongui bitō tōmānāni inānite nē Aabi īnōmi īmpa. Edæ tæiyæ waēmō īnōmi inte bitō nē nō ante apænebi īmpa. Īnīnque inguipoga quēwēnāni mōnitō īmōnite nē wæñōnīnāni inānite æiqedō apænte anguīmii. Ayæ mōnitō wepæ mōni gowepæ beyæ ante tōmēnāni inānite æiqedō pangūmii āmōnīpa.” 11 Mānīnāni tōmānāni inānite tōmēngā doycæncō nāāmæntacoo pōnongā æñānitapa. Æñōnānite, “Wædænque ayæ ee ongōedāni,” ānīnque tōmēngā, “Mīnitō īmīnite do wæñōnāni wæmīni baī wadāni mīni tōnīnadāni ayæ mīnāni quēwēnāni inte mīnitō tōnō Wængongui ingante nē cædōnāni inānite wæñoncædānīmpa. Īnāni inānite wæñonguēnēnāni īnānīpa, ante Wængongui nānō ānō baī tōmēnāni inānite īnīnque nāni

wæñonganca ee ongōedāni,” āmopa, ante angantapa.

12 Ayæ Wængongui Codotedo wæætē tee bædedinta wataa wi æmpoyongā atabopa. Mānīñedē tæīmō goinque ocæ ocæ gotīmā. Waodāni tōmēnāni guīdēngā wængā ate wæwente beyænque wentamoncoo mongæñāni baī nænque īfōntobæ adobaī wentamō pōnī ēmō batīmpa. Apāicā pæibo īñedē incæ wepæ baī opatawæ ēmō batīmpa. 13 Ayæ nēmoncoo ōōnædē īnō owocoo īfōmō wææ tæ ayæ waa wææ tæ ayæ waa wææ tæ inguipoga īfōmō tæ wæñōinque īgowæmō ayæ icadāmaī īfōnte nanguī woboyæ pæmæñōnte woga woga cædinque tæ wæwente baī adobaī tæ wæñōnānitapa. 14 Ayæ ōōnæ incæ mīncayōnta dadi ompote baī dæ ā batīmpa. Ayæ tōmanquidi tōmāā wāā tēiwæñē īfōntobæ wayōmō gote dæ ā baī īnīmpa.

15 Ayæ awēnē odeyēidi incæ ñænænāni inte nē cædōnāni incæ tontadōidi awēñēidi incæ nē nanguī ēadāni incæ tæī pīñænte cædāni incæ tōmēnāni guīñente badānitapa. Ayæ awēnē nē godonte ænīngā beyænque nē cæte quēwēnāni incæ nāmanque cæte quēwēnāni incæ tōmēnāni tōmānāni guīñente badānitapa. Guīñente badīnque tōmēnāni ānanquidi æite ontatodē īfōmō wē womōnānitapa. Ayæ onquiyaboga dicabocodē tæcæguedē go guīite wē womōnānitapa. 16 Ayæ waodāni inānite aa pete baī tōmēnāni, “Onquiyabōidi ēñēedāni, dicabōidi ēñēedāni, Awēnē tæ contāmpaa nē tæ contadongā mōnitō īmōnite adāmaī incæcāīmpa, ante cædinque mīnitō mōnitonga tæ wæwente beocaedāni,” ante aa pedānitapa. Ayæ, “Wængongui Codotedo ængui badīnque mōnitō īmōnite pānāmaī incæcāīmpa, ante cædinque tæ wæwente beocaedāni,” ante aa pedānitapa. 17 “Edæ tōmēna nāna nanguī pōnī ængui baquīōnæ do ba īnīnque cæcānō ayæ quēwēngūngāā. Edæ dæ ā inguīnō anguēñē,” ante wædānitapa.

7

Wængongui anquedo nānō nē yewæmōīnāni

1 Ayæ ate Wængongui anquedōidi mēnaa go mēnaa ongōnāni atabopa. Adocanque yædæcapæ īnō ongōfōngante wacā yæwainō ongōfōngante wacā īmatæ betamonca īnō ongōfōngante tōmangā æmatæ betamonca īnō a ongongantapa. Īnīnque, Woboyæ mēa go mēa īfōnte mōnō a ongōnō īnō inguipoga go pæmæñāmaī, ante cædinque cædānitapa. Tōmēnāni ōmaa īfōmō incæ gāwapæntībæ īfōmō incæ adobaī tōmāo awæncōo pæyōmō incæ woboyæ pæmæñāmaī īngæīmpa, ante cædānitapa. 2 Wacā anquedo nænque tamōnō īnō pongā atabopa.

Tömengä Wængongui nē Quëwengängä nänö yewæmōingō næænte pongä atabopa. Wængongui anquedoidi mēnaa go mēnaa ināni iñōmō inguiopoga incæ gāwapæntibæ incæ wo ewente cæcædānimpā, ante cædinque Wængongui godō cæcā beyænque tæi piñænāni badānitapa. Mānīnāni inānite Wængongui anquedo ñōwo pōningā yedæ aa pecantapa. ³ “Ee ongōedāni. Edæ mīnitō inguiopoga incæ gāwapæntibæ incæ awæncōo incæ ee wo ewēnāmaī iñōmīnite mōnitō Wængongui ingante nē cædāni nāni önōnemō iñō tömengä nänö yewæmōi ante tāno yewæmoncæmōnimpā. Yewæmōmōni ate mīnitō māniñedē ate wo ewente cædāni.”

⁴ Ayæ yewæmōināni æpodānidō badānitapa, ante apænecā eñentabopa. Tōmānāni yewæmōināni inte tiento coadenta i coatodo mūido ganca inānitapa. Idægoidi nāni cabo tipæmpoga go men-cabodāniya iñōnānite iimaī yewæmōināni badānitapa.

⁵ Wēēnēnedē Oodaa wodi pæināni nāni cabo iñōnānite nē yewæmōināni iñōmō tipæmpoga go mēa mūido ganca inānitapa.

Ayæ Odobeē wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Ayæ Gado wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

⁶ Ayæ Atedo wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Ayæ Nempatadii wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Ayæ Mānatee wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

⁷ Ayæ Timeōnō wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Ayæ Debii wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Ayæ Itacado wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

⁸ Ayæ Tabodōo wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Ayæ Ootee wodi pæināni nāni cabo iñōnānite nē yewæmōināni wææ

tipæmpoga go mēa mūido ganca inānitapa.

Ayæ adobai Beencaminō wodi pæināni nāni cabo iñōnānite nē yewæmōināni wææ tipæmpoga go mēa mūido ganca inānitapa.

Tæiyænāni nāamæntacoo mongænte a ongōninque

⁹ Ayæ ate wæætē ayōmō tæiyænāni ināni a ongōnāni atabopa. Æpodānidō ināni, ante æcānō tee mampote anguingā. Mānīnāni wabæca nāni quëwencabo wabæca nāni quëwencabo inte tæiyænāni incæ waodāni nāni cabo waodāni nāni cabo inte tæiyænāni incæ wacā awēnē nāni cabo wacā awēnē nāni cabo inte tæiyænāni incæ wadō nāni tedecabo wadō nāni tedecabo inte tæiyænāni incæ mānōmaī inōnāni inte ongōnānitapa. Iñāni iñōmō nāamænta weocoo doyæncōo mongænāni inte yædēmæmāa önōnempo nææninque Awēnē nänö aacæ tæ contaimpa gāānē ongōninque Wængongui Codotedo weca a ongōnānitapa. ¹⁰ Ayæ tōmēnāni yedæ āninque iimaī ānānitapa.

“Mōnō Wængongui iñōmō tömengä nänö aacæ tæ contaimpaa nē tæ contacā inongā inte

tömengä adocā mōnō imonte, Quëwencæminimpā, ante nē Ængā inongā ingampa.

Ayæ Wængongui Codotedo adobai mōnō imonte, Quëwencæminimpā, ante nē Ængā inongā ingampa,” ānānitapa.

¹¹ Nē aadāni nē Picænāni tōnō mēa go mēa mūināni quëwēnāni Awēnē tæ contaimpa gāānē ongōñōnānite Wængongui anquedoidi tōmānāni iñōmō yabæ iñō godāmæ ongōnānitapa. Wængongui nänö aacæ tæ contayōmō gāānē guidōmæmæ ædæ wææninque tōmēnāni Wængongui ingante, Bitō Wængongui Awēnē imidō anguēnē, ante watapæ apænēdānitapa. ¹² Ayæ ānānitapa.

“Amēē. Mōnō Wængongui ingante watapæ apænēmōnīpa.

Ayæ tömengä ñāō emongānō anguēnē. Tömengä tōmānō ante eñēnongā ingānō anguēnē.

Tömengä ingante waa adinque mōnitō tömengä ingante waa ate pōnente apænēmōnīpa.

Ayæ tömengä tæi piñængä ingānō anguēnē. Tömengä tæi piñængä inte tōmāā nänö cæinēnō cædongā ingampa.

Wantæpiyæ iñonte cōwē mānīnō ante ancæmōnīpa.

Mānōmaī baquīnō anguēnē, ante, Amēē,” ānānitapa.

¹³ Ayæ nē aadāni nē Picænāni incæ adocanque botō imo āninque, “Iñāni nāamæntacoo doyæncōo nē mongænāni iñōmō æmōnānidō inānitawo. Edæ ædōnō

quëwëninäni inte pönänitawo,” angantapa.
¹⁴ Äñongante botö tömengä ingante, “Awënë bitö tömëmi do ëñëmipa,” antabopa. Äñömote tömengä wæætë, “Mäninäni nangui näni wæwengaimämo inque baganca incæ ayæ münnäni quëwënanäni inänpa. Edæ tömënanäni weocoo doyæncoo, Waëmö pöni bacæimpa, ante Wængongui Codotedo wepænë yamongainäni inänipa,” ante nê aacä nê Picængä apænecantapa.

¹⁵ Ayæ adocä godömenque apænecantapa. “Mänömaï beyæ Wængongui nänö aacæ tæ contaimpa gäänë a ongöninque tömënanäni itädë incæ woyowotæ incæ Wængongui oncö tæiyæ waëmö oncönë tömengä ingante cöwë cædänipa.

Ininque oncontai bai tömënanäni wænömënaeca wo cæcä bai cædinque mänimpaa nê tæ contadongä iñömö tömënanäni inänite ante wææ aacæcäimpa.

¹⁶ Tömënanäni cöwë gue æñënamäi tepæ gæwæñämäi incædänimpa.

Nænque tömënanäniya ti näwänämäi i ininque tömënanäni göñämäi incædänimpa.

Quiëmë ocoi ä beyænque tömënanäni gonte inämäi inguinäniidö angüenë.

¹⁷ Edæ Wængongui Codotedo Wængongui nänö aacæ tæ contayömö gäänë nê a ongongä iñömö

tömengä iñömö mäninäni näämæntacoo nê mongænäni inänite nê aacä incæcäimpa.

Tömengä edæ tömënanäni inänite quëwënguimæ tapæñömö iñömö ænte mäocä goquinäni.

Ayæ Wængongui tömënanäni wëñapæ näni tamonte wædi tömämæ wadæ cæmoncæcäimpa,” angantapa.

8

Tee bædedinta tömanta wi æmpocampa

¹ Ayæ Wængongui Codotedo tee bædedinta tömanta wi æmpoyongante öönædë iñömö mëedia ooda ganca nöwæ ongonte batimpa.

² Ayæ anquedoidi önonpo æmæmpoque go mëa ganca inäni Wængongui weca nê a ongönäni inänite atabopa. Mäninäni inänite tömengä todompeta näni ancæde önonpo æmæmpoque go mencadea ganca pædæ godongä æñänitapa. ³ Ayæ wacä anquedo iñömö ogui waaquï iya täincade oodo inte näni badöincade nææñinque, Wængongui quï, ante näni iya täimpa gäänë ponte a ongongantapa. Mänimpa oodo inte näni badöimpa Wængongui nänö aacæ tæ contaimpa gäänë ongönimpa. Ayæ, Wængongui quinäni tömengä ingante apæneyönäni bitö ogui waaquï tancæbiimpa, ante cædinque adocä anquedo ingante wacä pöninque nanguï ogui waaquï godongä ængantapa.

⁴ Ænte önonpo næænte ogui waaquï iya tangä ininque tëëmämämo Wængongui weca æipämoyedë Wængongui quinäni tömengä ingante näni apænepämo guëa adoyömö æipämotimpa. ⁵ Ayæ adocä anquedo iñömö ogui waaquï iya täincade æñinque iya täimoga gonga ænte eyede wëninque inguipoga iñömö wææntodongantapa. Wææntodongä ate detæbo tæi tæi tæ goyö yedæ pöni änimpa. Yædæ yædæ nänimpa. Ayæ goinque gotimpa.

Todompeta näni ancæde

⁶ Ayæ Wængongui anquedoidi önonpo æmæmpoque go mëa ganca inäni todompeta näni ancæde önonpo æmæmpoque go mencadea ganca nê nææñinäni inte todompeta öñone gö cædedinque we we öoncæ cædänitapa.

⁷ Wængongui anquedo tänocä iñömö tömengä todompeta inte we we öongä ate yoguica gonga tönö wepæ adoyömö wempodente bai inguipoga iñömö tæ tæ wææñimpa. Tæ tæ wææt ate inguipoga iñömö pancabaa nangui ömæ iñömö gonte batimpa. Awæncoo iñömö pancacooga incæ adobai nangui incoo gonte wænimpa. Gaguimæncoo iñömö tömancoo gonte batimpa.

⁸ Wængongui anquedo ayængä iñömö tömengä todompeta inte we we öongä ate ñænæ onquiyabo ëmö bai gonga bæcodote bai iñonte wææntodönäni gawapæntibæ tæi tæi guitimpa. Tæi tæi guui ate gawapæntibæ iñömö pancatibaa incæ nangui pöni æpæ iñömö wepæ batimpa. ⁹ Ayæ gawapæntibæ cæcadëmæ inö quëwënanäni iñömö pancadäniya incæ nangui inäni wænänitapa. Ayæ ñænæ wipocoo pancacooga incæ nangui wo cæwodincoo iñömö wo ëwente guitimpa.

¹⁰ Wængongui anquedo ayængä iñömö tömengä todompeta inte we we öongä ate ñænæ nëmö iñömö cadentato tica wodönote bai öönædë inö owodëmö incæ tæ wææñinque önoncooga iñömö pancacooga incæ nangui æpænë iñömö tæi tæi guitimpa. Æpæ tayömö adobai cæcadëmæ inö tæi tæi guitimpa. ¹¹ Mäninëmö ëmowo iñömö, Ti Nänëmö, ante näni äñëmö impa. Nëmö tæi guiyonte nangui æpæ iñömö moncapæ bai ti nämæ batimpa. Waodäni tæiyænäni iñömö imæ ti nämæ bagaimæ bete wænänitapa.

¹² Wængongui anquedo ayængä iñömö tömengä todompeta inte we we öongä ate nænque pancayömonga tente ba ate apäicä adobai pancayömonga tente ba adinque näna apäidinö iñömö pancaa wëmö batimpa. Nëmöncoo iñömö pancadäniya incæ nangui inäni wo ëwente badäni ate näni apäidinö iñömö pancaa wëmö batimpa. Itädë iñonte

tipæmpoga go mēa ooda ganca iñō mēa go mēa ooda ganca nænque ñāō apāidāmaī iñimpa. Ayæ woyowotæ iñonte tipæmpoga go mēa ooda ganca iñō mēa go mēa ooda ganca apāicā tönō nēmoncoo apāidāmaī iñānitapa.

¹³ Ayæ ayōmte guingāmōwæ öönædē gāmæñō pao pao godinque iīmaī ante aa pecā ēñentabopa. “Inguipoga quēwēnāni nāni wæquinque. Nāni wæquinque. Nāni wæquinque impa, angantapa. Edæ Wængonguī anquedoidi mēnaa go adocanque iñāni inte tōmēnāni todompeta inte we we öoncæ cædāni beyænque inguipoga quēwēnāni iñōmō nanguī pōni wæwenguīnāni bacædānimpa,” ante guingāmōwæ angantapa.

9

¹ Wængonguī anquedo ayængä iñōmō tōmengä todompeta inte we we öongä ate wa nēmō öönædē iñō owodique inguipoga tæ wæængainēmō ongō atabopa. Mānii nēmō ingante tadōmengadænguipo ontatodē wi ænequī godonte iñimpa. ² Wi ænequī æninque ontatodē wi ænecā ate tēēmancoo ta æitimpa. Mānii tēēmancoo ñænæ gongapamō tēēmancoo bai iñimpa. Iñinque iī tēēmancoo tadōmengadænguipo ontatodē ta æiyonte nænque tönō öönæ wentamō pōni badaimpa. ³ Tēēmancodē iñō ñāwāi ta pōninque inguipoga iñōmō wææñōnānite wacā godō cæcā beyænque tōmēnāni tæimō badinque emēñe inguipoga quēwēnāni bai tæ guidāni badānitapa. ⁴ Ayæ tōmēnāni iñānite, Inguipoga gaguimæncōo incæ gæpæñabocoo incæ awæncōo incæ pæcōo wo ewēnāmaī iedāni. Wæætē waodānique öönōnemō iñō Wængonguī nānō yewæmōi inte nē yewæmōnāmaī ingaināni iñānite adinque mīnitō tōmēnāni iñānite godō cæmīni beyænque nantate wæcædānimpa, ante wacā angantapa. ⁵ Ayæ ñāwāiidi iñānite edæ, Wænōedāni, ānāmaī ingä inte tōmengä, Mīnitō wæætē tōmēnāni iñānite öonmpo æmæmpoqe apāicā ganca cæmīni beyæ nanguī pōni wæwæncædānimpa, angantapa. Iñinque emēñe tæ guīi waocā nantate wæcā bai tōmēnāni nanguī pōni nantate wæwēnāni iñānitapa.

⁶ Māniñedē waodāni, Æbānō cæte wænguimōo, ante ancaa cædinque wæñāmaī incædānimpa. Wæñinēmōnīpa, ante ānāni incæte ædō cæte wæmāināni.

⁷ Ayæ ñāwāiidi iñōmō tontadoidi cabayoidi guēadō guēa cæte nē godāni bai adobaī emōnānitapa. Tōmēnāni ocaboga awēñē poganta oodo inte badōninta bai wencadānitapa. Ayæ mānināni awinca iñōmō waodāni awinca bai emōnānitapa. ⁸ Tōmēnāni ocaguī iñōmō onquiyængä

ocaguī bai encadinque tōmēnāni bagacoo iñōmō nēōō бага bai engadānitapa. ⁹ Tōmēnāni tæcætawē iñō tæñineta inte badōinta bai wææ mongænānitapa. Ayæ tontadoidi guēadō guēa wænoncæte ante cædinque ānāni ate cabayoidi pogodo gote awoto bai wēa pōnonte nanguī pōni ā bai ñāwāiidi iñōmō adobaī öonnguēnepæ pao pao godinque āmæ godānitapa. ¹⁰ Tōmēnāni öñōmīñæ incæ emēñe öñōmīñæmpa bai emīñænānitapa. Tōmēnāni nāni tæi pīñæmāmo öñōmīñæ iñō emīñænāni inte öonmpo æmæmpoqe apāicā ganca godō cædāni beyæ waodāni nanguī pōni wæwēnānitapa. ¹¹ Mānii ñāwāiidi iñōmō awēñē odeye ingante ēñente quēwēnānitapa. Māningä tōmēnāni awēñē iñōmō tadōmengadænguipo iñōmō quēwēnāni iñānite nē aacā anquedo iñongä inte tōmengä emōwo ebedeo tededō, Abadoō, nāni äwo i ayæ, Nē Wo Ewengä, ante emongä iñinque guidiego tededō, Apodiōō, ante pemōnāniipa.

¹² Täno nāni wæquinque do iñinque batimpa. Incæte godōmenque mempoga ganca nanguī pōni nāni wæquinque ayæ baquinō anguēñe.

¹³ Wængonguī anquedo ayængä iñōmō tōmengä todompeta inte we we öongä ate tedepāmo tēñō ēñentabopa. Oguī waquī iya tāimpa oodo inte badōimpa Wængonguī weca mæ ongompa. Mānimoga öñōmoncawæ bai mēa go mēa mæ ongōñōmō māniñōmō tedepāmo tēñō ēñentabopa. ¹⁴ Wængonguī anquedo ayængä todompeta nē næængä ingante iīmaī angantapa. “Ñænæ öonnga Eopadatedō nāni ānonga iñōmō anquedoidi mēnaa go mēnaa iñāni iñōmō nē ñā cæyænīnāni iñānite bitō iñimpo cæe,” angantapa. ¹⁵ Edæ mānināni anquedoidi mēnaa go mēnaa iñāni iñōmō tōmēnāni mānīnēpō iñinque ba ate mānii apāicā iñonte māniñōnæ incæ mānii ooda iñonte do bæ nāni cæquinque ante a ongōñōnānite iīmaī angantapa. Waodāni tōmānāni iñōmō mencabodāniya go adocabodānique quēwēñōnāni adocabodānique iñānite mīnitō wænoncæmīnimpa, angantapa. Ayæ ñōwo tōmēnāni iñānite iñimpo cæcā ate tōmēnāni wænoncæte ante tao godānitapa. ¹⁶ Ayæ tontadoidi iñōmō cabayo mongænāni iñāni æpodānidō iñāni, ante tee mampote doo-tiento miñōō ganca iñānitapa. Mānimpodāni iñāni, ante ēñentabopa.

¹⁷ Botō wīlmonte bai ayōmo cabayoidi tönō nē mongænāni iñōmō iīmaī emōnāni atabopa. Cabayo nē mongænāni iñōmō tæcætawē iñō tæñineta nāni wææ mongæntacoo pancataa opatawæ gonga gonte bai emontapa. Pancataa wentamō emontapa. Pancataa atopode nāni ā bai wiñadæ emō bai emontapa. Cabayoidi

ocabo iñömö nëöo ocabo bai encadänitapa. Tömänäni önöne inö gonga tönö tëemä tönö atopode näni öo waadö tadedänitapa. ¹⁸ Mänii gonga tönö tëemä tönö atopode iñömö mëmämoque go adopämoque näni wänönämocoo në tadedäni inte cabayoidi iñömö waodäni tömänäni mencabodäniya go adocabodänique quëwëñönäni adocabodänique inänite wänönäni wänänitapa. ¹⁹ Mäninäni cabayoidi tömänäni önöne inte tæi piñänte wänöninque adobai tömänäni önömiñæ inte tæi piñänte wänönänipa. Edæ tömänäni önömiñæ iñömö tæntæ ocabo bai emiñænäni inte waodäni inänite pocænäni wänänitapa.

²⁰ Mänimämo wodonte näni wængaimämocoo beyæ ayæ wänämai quëwënäni inte wëwënäni incæte tömänäni näni wënæ wënæ cægainö ante, Ancaa wæwente awædö, ante pönënamäi inäni inte ñimpo cædämai inänitapa. Wæætë oodo inte padata inte bodonte inte dica inte awæmpa inte tömänäni näni badonte cönönincoo iñömö adämai incoo incæte ëñënamäi incoo incæte dao dao godämai incoo incæte tömänäni, Mönitö wængongulidi inänipa, ante ædæ wæænte apænedinque ñimpo cædämai inänitapa. Ayæ adobai wënæidi inänite ædæ wææninque, Mönitö mönitö wængongulidi imiñidö angüënë, ante ñimpo cædämai inte apænedänitapa. ²¹ Ayæ mäninäni godömenque waodäni inänite piñte wänönäni inte tömänäni müi bete yewänäni inänipa. Nänöogængä inämai iñongante towente cædönäni inte tömänäni awëmö ö ænänäni inänipa. Mänömai godömenque cædinque tömänäni näni wënæ wënæ cægainö ante, Ancaa wæwente awædö, ante pönënamäi inäni inte ñimpo cædämai inänitapa.

10

Wængongui anquedo dadi ompointa guiyanta næængä

¹ Ayæ wacä anquedo në tæi ëmongä inte öönædë inö wæængä atabopa. Tömengä weocoo mongænte bai boguimancodë pöninque tömengä ocaboga tæcædæca inö daimë godämæ owotapa. Tömengä awinca incæ nænque bai apäidinque tömengä önömënë incæ cobacadewæx gonga gonte ëmö bai ëmënëngä ingantapa. ² Tömengä önönempo inö dadi ompointa ininta näni wi æmpodinta guiyanta næængä ingantapa. Tömengä önöwa tömëwa gäwapæntibaa cö cæwadinque tömengä dipëwa guiquënë ömaa cö cæwacantapa. ³ Mänömai cö cæwadinque tömengä nëöo ii pepa bai nangui pöni yedæ aa pecantapa. Aa peyongä detæbo önönempo æmæmpoque go mëa ganca wæætë tæi téninque tededänitapa. ⁴ Detæbo önönempo

æmæmpoque go mëa ganca inäni iñömö tededäni ëñëninque botö yewæmoncæ cætabopa. Tæcæ yewæmoncæ cæyömo öönædë inö tedepämo iñäi ante tedecä ëñentabopa. “Iñæmpa önönempo æmæmpoque go mëa detæbo näni tededö æbänö ante tededäni, ante wii ëñingue i iñinque bitö yewæmonämäi ïe,” angantapa.

⁵ Wængongui anquedo botö adingä iñömö gäwapæntibaa tönö ömaa në a ongongä iñömö tömengä önönempo tömengä öönædë inö pædæ æmpocantapa. ⁶ Tömengä tömengä pædæ æmpodinque, Wængongui ëñëñongä botö äno ante nöingä baquino angüënë, ante iñäi angantapa. Edæ në wantæpiyæ cöwë quëwëngängä inte öönædë tömäa inguipoga tömäa gäwapæntibæ tömäa badöninque tömengä adobai öönædë owodäni tömänäni inguipoga quëwënäni tömänäni gäwapäa quingänö owodäni tömänäni inänite në badongängä inte tömengä ëmöwo apænedinque, Botö apænedö nöingä baquino angüënë, ante në apænegä iñömö, “Mönö ee ongöñedë do iñinque batimpa, angantapa. ⁷ Edæ Wængongui anquedo tömangä pöni iñömö tömengä todompeta we we öoncæ cæyongante Wængongui näni cæinënë ante wë wodonte bai näni angainö ante ñöwo iñinque cæcæcäimpa. Wængongui ingante në cægainäni tömengä beyæ në apænegainäni iñönäni mäninö näni cæinënë ante do apænegängä inte Wængongui mäninö bai ñöwo iñinque cæcæcäimpa,” angantapa.

⁸ Ayæ öönædë inö tedepämo adopämo do botö ëñënë ñöwo wæætë botö imote iñäi angä ëñentabopa. “Wængongui anquedo në gäwapæntibaa tönö ömaa iñömö a ongongä weca godinque bitö tömengä önönempo dadi ompointa ininta näni wi æmpodinta näni nææininta æe,” angantapa. ⁹ Angä ëñëninque Wængongui anquedo weca godinque botö tömengä ingante, Dadi ompointa guiyanta pönömi æmoe, ante iñömo tömengä wæætë botö imo, “Æe. Æininque cæe. Bitö önöne da wëneyömi guñëmæx bai wæeme pöni ingæimpa. Incæte yo mongænte ate cæncadë guidinque ti nä bacæimpa. Iñinque cædente wæcæbiimpa,” angä ëñentabopa.

¹⁰ Wængongui anquedo önönempo dadi ompointa guiyanta æninque botö ade cæntabopa. Önöne guñëmæx bai wæeme pöni i incæte yo mongænte ate cæncadë guidinque ti nä badinque cædente wætabopa. ¹¹ Ayæ botö imote angantapa. “Wacä awënë näni cabo wacä awënë näni cabo incæ wabæca näni quëwencabo wabæca näni quëwencabo incæ wadö näni tedecabo wadö näni tedecabo incæ wabæca wabæca näni awënë odeye cabo iñönänite bitö,

Mānināni inānite æbānō baquīi, ante wæætē Wængongui beyæ apæñecæbiimpa,” ante angantapa.

11

Wængongui æbānō cæcāā, ante mēnaa apænedapa

¹ Wacā botō imote, Tee manguimpa impa, ante cæwipa bai pædæ pōnōninque ayæ botō imote, “Goe, angantapa. Wængongui oncō tæiyæ waēmō oncōnē godinque mānincō tōnō, Wængongui quī, ante nāni iya tāimpa tee mæe. Ayæ waodāni adoyōmō ædæ wæænīnque Wængongui ingante, Bitō Wængongui Awēnē imidō anguēnē, ante watapæ apænedāni iñōmō æpodānidō ināni, ante tee mampote cæe. ² Wængongui oncō tæiyæ waēmō oncōnē tee mānīnque yacō boyāa iñōmō tee mānāmaī ie. Edæ mānincō boyāa wadāni oodeoidi ināmaī ināni inānite go dōnte intapa. Mānināni edæ coadenta i doo apāicā ganca mānimpoga iñonte Wængongui nānō tæiyæ waēmō quēwēñōmō incæ wo ewente cæcædānīmpa. ³ Ayæ botō imotedō ante, Botō æbānō cæboo, ante nē, Nō ante impa, ante apæñeda iñōnate botō godō cæquimo beyænque tōmēna tæi piñænte badinque mūdo dootiento tetenta eōnæ mānimpoōnæ iñonte botō beyæ apæñecædānīmpa. Waodāni wæwente beyænque gōmæ ēmoncoo mongæñāni bai tōmēna adobai gōmæ ēmoncoo mongæñinque apæñecædānīmpa,” ante apæñecæ ēñentabopa.

⁴ Wængongui æbānō cæcāā, ante nē, Nō ante impa, ante apæñeda iñōmō tōmēna iñōmō Wængongui inguipoga Awēnē iñongante tōmengā weca odibowæ nāni āwæ mēwāa ongōwæ bai inapa. Ayæ tōmengā weca yædo concædi tī wodōnoincade mencadea ongoncade bai mānīna iñōmō adobai inōna inapa. ⁵ Wadāni, Tōmēna inate wēnæ wēnæ cæinēmopa, ante cædāni iñinque tōmēna wæætē nē piñte cædāni inānite gonga wo tadete bai cædinque wæñōna wæncædānīmpa. Edæ, Tōmēna inate wēnæ wēnæ cæinēmōnīpa, ante nē cædāni tōmānāni mānōmaī wæncædānīmpa. ⁶ Wængongui godō cæcā beyænque tōmēna tæi piñæna badinque, Wængongui beyæ mōna apæneyedē cōōnæ cædāmaī ingæiropa, ante cædinque oōnædē tee mōnete bai cæcædānīmpa. Ayæ tæi piñæna inōna inte tōmēna æyedēmē cæinēna incæ wæætē wæætē cæyōnate æpæncōo tōmancoo wepænque bacæiropa. Adobai inguipoga tōmānæ quēwēñāni inānite tōmēna cæda ate quīēmē wæñōmāmocoo incæ pō wēnæ wēnæ bacædānīmpa.

⁷ Ayæ tōmēna, Wængongui æbānō cæcāā, ante iñinque apæñeda ate babæcā bai mōnō

guīñēnongā inte tadōmengadænguipo inō tadinque tōmēna inate guēadō guæ cædinque tæi ēmongā inte gānā cædinque wæñongā wæncædānīmpa. ⁸ Wæna ate tōmēna baonque ñæñængade nāni quēwēñōmō taadō iñōmō oñoncædānīmpa. Edæ Todōmā iñōmō quēwēñāni wiwa cædāni bai ayæ Equitobæ quēwēñāni wēnæ wēnæ cædāni bai māniñi ñæñængade nāni quēwēñōmō nē quēwēñāni iñōmō adobai wēnæ wēnæ cædānīpa. Māniñi quēwēñōmō adoyōmō tōmēna Awēnē ingante awāa timpote wæñōnāni wængacāiropa. ⁹ Mēōnaa go adōōnæque go tæcæ itædē iñōnte tōmēna bāō iñi acæte ante pōnīnque wacā awēnē nāni cabo wacā awēnē nāni cabo incæ waodāni nāni cabo waodāni nāni cabo incæ wadō nāni tedecabo wadō nāni tedecabo incæ wabæca wabæca nāni quēwēncabo incæ waodāni nanguī ināni ponte tōmēna bāō acædānīmpa. Ayæ, Da wēnāmaī ingæiropa, ante wææ cæcædānīmpa. ¹⁰ Tōmēna iñōmō Wængongui beyæ nē apæñedāna inōna inte inguipoga quēwēñāni inānite nanguī āna wædināni inte tōmēnāni ñōwo wæætē watapæ tocædānīmpa. Iñinque tōmēna mānōmaī wænte oñōna ate tōmēnāni nanguī Yæ yæ todinque wacā ingā wacā ingā, Ōnonque æe, ante pædæ godōnāni æncædānīmpa.

¹¹ Mēōnaa go adōōnæque go tæcæ itædē iñinque go ate Wængongui edæ, Quēwēncæmīna, ante tōmengā nānō guēmāmāmo quēwēngui māmo woo ōngacā ate tōmēna iñōmō wæætē mīlna badinque ængæ ganticædānīmpa. Ængæ gantiyōna nē adāni guiquēnē ancai guīñente wæcædānīmpa. ¹² Ancai guīñente ayōnāni tōmēna oōnædē inō tedepāmo yedæ ante ēñæcædānīmpa. “Iñōmō pō æda,” angā ēñēnīnque tōmēna oōnædē inō boguimāncodē æiyōna tōmēna inate nē piñte cædināni edonque acædānīmpa. ¹³ Tōmēna æiyedē māniñedē goinque nanguī ocæ ocæ goquimpa. Tōmēnāni nāni quēwēñōmō onconcoo bacoo iñonte pancaconga incæ nanguī onconcoo acapowate bogocæ tæ gowæænguimpa. Ado goinque goyedē waodāni tiæte mūdo ganca wæncædānīmpa. Ayæ mūnāni quēwēñāni ancai guīñēnīnque, Wængongui oōnædē nē quēwēmi imi inte bitō nō tæi piñænte imidō anguēnē, ante wæcædānīmpa.

¹⁴ Ayæ mempoga nāni wæquinque do iñinque batimpa. Incæte godōmenque adopoque nanguī pōni nāni wæquinque oo pōni bacæiropa.

Todompeta æmæwoya

¹⁵ Wængongui anquedo tōmengā iñōmō tōmengā todompeta we we ōngā ate

öönädë inö wadäni nani tedepämo yedæ tededinque ïmai änanitapa.

“Mönö Awënë Wængongui tömengä Codito tönö

inguipoga Tæiyæ Awënë Odeyeda badinque wantæpiyæ cöwë aacædaimpa,” änanitapa.

¹⁶ Nè aadäni nè Picænäni ïñömö bæinticoatodo ganca ïnani mänimpodäni ïñömö Wængongui weca tömënäni awënë tæ contaimpaa nè tæ contädäni inte ñowo guidömëmæ ædæ wææninque Wængongui ingante, Bitö Awënë Wængongui imidö angüenë, ante watapæ apænedänitapa.

¹⁷ Ayæ ïmai apænedinque,

“Awënë Wængongui bitö adobique Tömää nè Cædömi inte

wëñëñedë do nè quëwengäimi ïmi ñowobi ïnömi ïmipa.

Bitö nämä tæi piñæmi inte ñowo ædæmö nè aabi ïnömi ïmipa,

ante adinque bitö ïmite waa ate pönente apænemönipa.

¹⁸ Wabæca wabæca nani quëwencabo incæ tömänäni quëwënäni ængui badänitapa.

Ayæ bitö ængui babi ïninque

nè wængainäni ïnänite bitö apænte pan-guionæ do batimpa.

Ayæ bitö beyæ nè apænedönäni ïñömö bitö ïmite nè cædönäni ïñönänite

tömënäni ïnänite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ bitö quinäni ïñönänite bitö emöwo ante bitö ïmite nè eñente cædönäni ïñönänite

awënë bai ïnani incæ önönänique ïnani incæ tömänäni ïnänite bitö, Minitö cædi beyæ paga cæbo æncæminimpa, ante bitö godonguiönæ dobæ batimpa.

Ayæ inguipoga quëwënäni ïnänite wadäni nè wo ewente cædönäni ïñönänite bitö wo ewente cæquiönæ do batimpa.”

¹⁹ Ayæ öönädë inö Wængongui tæiyæ waëmö oncö odemö wibænetapa. Wibæneyö Wængongui, Woadäni æbänö cæte hotö tönö godongämæ waa cæte quëwencædänimpa, ante odömoncæte ante nänö yewæmongainca nani da wencaincade ïñömö mänincönë mæ ongoncade atabopa. Ayömote yædæ yædæ näinimpa. Yedæ pönäni änimpa. Detæbo tæi tæi tönö yedæ pönäni änimpa. Goinque gotimpa. Ayæ yoguica cöönæ bai nangui cæte wææninimpa.

12

Onquiyængä tönö dadagöö nani änongå

¹ Wængongui, Mä pönäni odömömo adinque eñencædänimpa, ante cædinque öönädë inö waëmö pönäni badongä a owo atabopa.

Edæ onquiyængä ïñömö nænque inte weocoo wëñate bai mongæñongä apäcäcämo incæ tömengä cæncadëwa æñömengadæwa inö impa. Tömengä, Awënë poganta, ante tipæmpoga go mëa nëmöidi inte godämæ badöinta wencacantapa. ² Mäningä onquiyængä yædëmadä ënengä ïñongante wëñængä eñacæ cæcä wæte wædinque wëñæ nantate Yæ yæ wæcantapa.

³ ïninque Yæ yæ wæyongante öönädë inö mä pönäni Wængongui nänö badöi wadö bai badöi a owo atabopa. Edæ ñæñængade obe bai dadagöö nani änongå opatawæ eñacä inte tömengä ocabocoo önömpo æmæmpoque go mencaa encacä inte mänii ocabocooa awënë pogantacoo önömpo æmæmpoque go mentaa wencacä ingantapa. Tömengä önömoncawæ adobai önömpo tipæmpoga ocabocooa encacä ingantapa. ⁴ Tömengä önöncaimiñænca picæ cæmiñænninge öönädë owodäni nëmöidi incæ pancadäniya incæ nangui ïnani ïnänite wææntodongä inguipoga tæ wæænänitapa. Onquiyængä oo pönäni ïñongante dadagöö, Wëñængä eñacä ate cæncæboimpa, ante tömengä weca a ongongantapa.

⁵ Onquiyængä wëñængä onguinængä ingante mangä ïninque tömengä ïñömö nänö Awënë baquinque pæcantapa. Tömengä ïñömö tæiyæ awënë tömengä nempo quëwënäni ïnänite aacä bai adobai tömämæ quëwënäni ïnänite, ïmai cædäni, ante aacæcäimpa. Mäningä onquiyængä wëñængä ingante wacä ö ænte Wængongui weca ayæ tömengä nänö aacæ tæ contayömö mäniiñömö ænte mäicä æicantapa. ⁶ Mäninö bayonte wäänä ïñömö önömæca ïñömö wodii gocantapa. Tömengä beyæ ante Wængongui nänö eyepæ cæyömö mäniiñömö wodii gocantapa. Mäniiñömö mido dootiento tetenta eönæ mänimpoönæ ïñonte tömengä quëwente beyæ cængui eyepæ pönönäni cæncæcäimpa, ante Wængongui tömengä nänö owoyömö ante do badongan-tapa.

⁷ Mäniiñedë edæ öönädë ïñömö guädö guëa cæte wæñönänitapa. Wængongui anquedo Miiguedo nani angaingä ïñömö tömengä wadäni anquedoidi awënë inongä ingampa. Tömengä tömënäni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæætëdö wæætë guëa cædäni incæte ⁸ tömënäni ædö cæte gänä cæquinänii. Edæ ædö cæte öönädë ïñömö ayæ quëwenguinänii, ante tömënäni ïnänite wido cædänitapa. ⁹ Tömënäni ïñömö ñænængade dadagöö ingante wido cæte wææntodönänitapa. Mäningä dadagöö ïñömö wëñëñedë tæntæ ingaingä inte tömengä emöwo Wënæ Tatäna mëwoga

ëmongä ingampa. Adocä, Inguipoga quëwënanî tòmänänî oda cæcædänîmpa, ante nê wapiticæ ænte mäocä ingampa. Tömengä ingante ayæ tömengä anque-doidi inänite inguipoga iñömö wido cæte wææntodönänitapa.

¹⁰ Ayæ ate öönædê inö tedepämo yedæ ante iïmai ä ëñentabopa.

“Ñöwoönæ mönö Wængongui mönö imonte, Minitö botö æmæwo æmo beyænque quëwenguimîni, ante tömengä nänö cæönæ batîmpa.

Ayæ tömengä nänö tæi piñænö ñöwoönæ ba ïnîque

tömengä adobai Tæiyæ Awënë Odeye ñöwoönæ bacäîmpa.

Ayæ tömengä nänö apænte ængaingä mönö Codito adobai nämä tæi piñænongå inte nê angä bacäîmpa.

Wënæ guiquënë mönö tönîñadäni inänitedö ante, Wënæ wënæ cædänidö angüënë, ante wapiticæ apænete änewënongå ingampa.

Woyowotæ incæ itædê incæ mönö Wængongui weca a ongöinque

tömengä mänînanî inänitedö ante nê wapiticæ änewënongå iñongante tömengä ingante inguipoga iñömö wææntodönänî wæængantapa.

¹¹ Wængongui Codotodo wepæ tömengä nänö wænte godongaimæ beyænque tæi ëmönänî badinque

mönö tönîñadäni iñömö wënæ ingante gänä cædänitapa.

Ayæ, Wængongui æbänö cæcää, ante tömënanî nänî apænedö beyænque tömënanî tæi ëmönänî badinque wënæ ingante gänä cædänitapa.

Wadäni tömënanî inänite Wængongui beyæ wænoncæ cæyönänî tömënanî,

Mönitö guïñënamai wæncæmönîmpa, ante nê änanî inänitapa.

¹² Mänömai beyæ minitö öönædê iñömö nê quëwëmîni inte watapæ tocæmînimpa.

Wamîni guiquënë inguipoga iñömö æpæntibædê iñömö nê quëwëmîni inte mîni wæquingue ingæîmpa.

Edæ wënæ minitö weca wææ pö quëwëngäîmpa.

Tömengä nänö wo ëwenguïnö oo pönî impa, ante ëñente beyænque äingä pönî bacampa.

Mänömai beyæ minitö guïñenguïmämö baquingue impa.”

Mänömai ante yedæ angä ëñentabopa.

¹³ Ayæ dadagöö, Botö imote inguipoga iñömö wido cæte wææntodönänî adi wædö, ante wædinque onquiyængä ingante wëñængä onguïñængä nê mäningä ingante bæi ongoncæte ante togængantapa. ¹⁴ Incæte Wængongui, Önömæca iñömö bitö beyæ botö

cæyömö pao pao gocæbiimpa, ante cædinque ñænængade guingämöwæ önungüenepæ bai tipænguënepäa pönö badongä engüenepænte bai onquiyængä bacantapa. ïnîque onquiyængä, Tæntæ botö imote bæi ongönämai incæcäîmpa, ante Wængongui önömæca tömengä beyæ nänö cæyömö pao pao gocantapa. Mëa go adoque tæcæ wadepo iñonte tömengä mänîñömö quëwente beyæ nänö cænguï eyepæ ænte cænguïñömö gocantapa. ¹⁵ Ayæ, Onquiyængä ingante æpæ quingæ mangui bai bæ ta tæi guicæcäîmpa, ante cædinque dadagöö tömengä önöne inö önö bai æpæ towæ tadonte bai tao godecantapa. ¹⁶ Dadagöö towæ tadonte bai nänö tao godepæ quingæ pönö onguipo incæ onquiyængä beyæ ante cædinque wi ænete cæyö ada guipæntapa. ¹⁷ Ada guipæ adinque dadagöö iñömö onquiyængä ingante godömenque ænguï badinque wadæ godinque, Mäningä onquiyængä wënänî incæ wadäni inänite guëa cæte wænonguimo, ante gocantapa. Tömënanî Wængongui nänö, iïmai cædäni, ante wææ angainö ante nê ëñente quëwënanî inte, Itota æbänö cæcää, ante nê apænete quëwënanî inönänî iñömö mänînanî mäningä onquiyængä wënänî iñönänite dadagöö, Wænoncæboimpa, ante gocantapa.

13

Mënaa mönö guïñënonä

¹ Ayæ dadagöö æpæntibæ yæwedeca ëmönaiya iñömö ponte a ongongantapa.

Ayæ babæcä bai nê guïñënongå iñömö æpæntibædê quëwente ta pönongä atabopa. Mönö guïñënongå tömengä ocabocoo önompo æmæmpoque go mencaa encacä inte tömengä önömoncawæ önompo tipæmpoga ocabocoo inö encacä ingantapa. Awënë pogantacoo tipæmpoga ganca tömengä önömoncawäa da da wencate encacantapa. Ayæ Wængongui ëmöwo incæ wîwa babæ wapiticæ ante äniwoi tömengä ocabocoo tömancoo inö yewæwente encacä ingantapa. ² Mäningä mönö guïñënongå botö nê adingä iñömö mëne bai ëmönongä incæte tömengä önöwa oto önöwa bai ëwacä inte tömengä önöne nëö önöne bai ënecä atabopa. Ayæ dadagöö nämä nänö tæi piñænö ante mönö guïñënongå ingante pædæ godöinque tömengä nänö aacæ tæ contaimpa pædæ godongä ænte tæ contadinque mönö guïñënongå nê awënë badinque, iïmai cædäni, ante nanguï angä bacantapa. ³ Ayæ mönö guïñënongå adoque ocaboga ämocate wæncæ cæcä bai ingaingä incæte gämæ cæcate ingantapa.

Tömämæ quëwënanî mönö guïñënongå ingante adinque ancai guïñëninque tömänänî tömengä miñæ godänitapa. ⁴ Dadagöö godö

cæcä beyænque mönö guifñenongä iñömö awënë badinque dadagöö bai në angä do bacä impa, ante adinque tömänäni dadagöö ingante, Bitö Awënë Wængongui bai imidö angüënë, ante apænedänitapa. Adobai mönö guifñenongä ingante, Bitö Awënë Wængongui bai imidö angüënë, ante apænedänitapa töö. Mäninö ante godömenque iñmai äninque, “Æcänö mönö guifñenongä bai ingä iñömö edæ dæ angampa. Æcänö tömengä ingante guëadö guëa cædinque tæi emonte gänä cæqingää.”

⁵ Dadagöö godö cæcä beyænque mönö guifñenongä iñömö nämanque pönente änewënongä badinque Wængongui ingantedö ante babæ wapiticæ ante änewëninque, Botö Wængongui bai imopa cæminii, änewënongantapa. Ayæ awënë badinque në angä badingä inte mönö guifñenongä iñömö coadenta i doo apäicäa mänimpoga iñonte, iñmai cæedäni, ante aacantapa. ⁶ Ayæ tömengä mäniñedë Wængongui ingantedö ante wënæ wënæ babæ wapiticæ ante änewënongä inte Wængongui emöwo ante tömengä nänö quëwëñömö ante babæ wapiticæ ante änewënongantapa. Tömënanii öönädë në quëwënanii inänitedö ante adobai babæ wapiticæ ante änewënongantapa. ⁷ Tömengä Wængongui quinäni inänite guëadö guëa cæcæcäimpa, ante cædinque dadagöö godö cæcä beyænque tömengä nämä tæi piñængä badinque tömënanii inänite tæi emongä inte gänä cæcantapa. Ayæ dadagöö godö cæcä beyænque mönö guifñenongä iñömö waodäni nänii cabo waodäni nänii cabo incæ wacä awënë nänii cabo wadö nänii tedecabo wadö nänii tedecabo incæ wabæca nänii quëwëncabo wabæca nänii quëwëncabo iñönänite tömengä tömänäni awënë badinque tömënanii inänite, iñmai cæedäni, ante në angä bacantapa.

⁸ Mänömai beyæ tömämæ quëwënanii iñömö tömengä ingante, Bitö Awënë Wængongui bai imidö angüënë, ante apænecädänimpa. Wængongui inguipoga nänö badöñedë, Botö Codotedo ingante do wænönäni wænecäimpa, ante do angacäimpa. Iñgä Codotedo, Nänii quëwënguinta, ante nänö yewæmongaintaa ædänidö emöwo yewæmönämai inäni iñömö tömënanii mönö guifñenongä ingante, Bitö Awënë Wængongui bai imidö angüënë, ante apænecädänimpa.

⁹ Në ämonca iñini inte eñëedäni.

¹⁰ “Æcämenque ingante ante apænedinque Wængongui, Ao bæi ongonte tee mönete bai cæedäni, angä iñinque tömengä ingante do bæi ongonte tee mönecädänimpa.

Æcämenque ingante ante apænedinque Wængongui, Ao yaëmenca wænömöini wænecäcäimpa, angä iñinque

tömengä ingante do yaëmenca wænönäni wænecäcäimpa.”

Mänömai beyæ minitö Wængongui quimöni iñömö wëntæye inämai inte ee cæcæminimpa. Edæ tömengä ingante godömenque wede pönencæminimpa.

¹¹ Ayæ ate wacä babæcä bai në guifñenongä guiquënë onguipodë quëwente ta pöñongä atabopa. Codotetoidi önömoncawæ mëwäa nänii emoncadö bai tömengä adobai encacä ingantapa. Incæte tömengä dadagöö bai tedecantapa. ¹² Mönö guifñenongä tänocä pöningä nänö äno beyænque ayængä pöningä iñömö awënë badinque tänocä beyænque äninque, iñmai cæedäni, ante në aacä ingantapa. Tänocä pöningä mönö guifñenongä ämocate beyæ në wænca cæcä incæ wæætë gämæ cæcadinçä iñongante ayængä pöningä iñömö tömämæ quëwënanii inänite angä eñëninque tömänäni tänocä pöningä ingante, Bitö Awënë Wængongui bai imidö angüënë, ante apænedänitapa. ¹³ Mäningä mönö guifñenongä ayængä pöningä, Mä pöni cæbo adinque eñencædänimpa, ante cædinque badongampa. Ayæ godömenque mä pöni cæcä beyænque waodäni edonque pöni ayönäni öönädë inö incæ gonga inguipoga wææ adänitapa.

¹⁴ Mönö guifñenongä tänocä pöningä nänö äno beyænque tömengä weca mä cædinque ayængä pöningä iñömö tömämæ quëwënanii inänite oda cæte nänii goquino ante mäocä godänitapa. Edæ tömënanii inänite äninque, Mönö guifñenongä yaëmenca guiyömö wæætë gämæ cæcate në miingä quëwëngä nänö emönö bai adobai badöedäni, angä eñente badonte concaädänitapa. ¹⁵ Mönö guifñenongä ayængä pöningä iñömö eyepæ cædinque mönö guifñenongä tänocä pöningä nänö emönö bai nänii badöninca incæ, Tedecäcäimpa, ante cæcä äte mäninca incæ oo guëmangantapa. Tömënanii nänii badöninca ante waodäni Baa äninque, Bitö Awënë Wængongui bai imidö angüënë, ante apænedämai inäni inänite mäninca incæ ä beyænque wænönäni wænänitapa.

¹⁶ Ayæ awënëidi bai inäni incæ önönäni incæ mäincoo eädäni incæ mäincoo ömæpodäni incæ wacä godonte æningä beyænque në cæte quëwënanii incæ nämanque cæte quëwënanii incæ mäninäni tömänäni inänite tömengä nänö äno beyænque önompo tömempo inö yewæmönäni badänitapa. Wæætë önompo tömempo inö yewæmönämai inäni inte tömënanii önönemö inö yewæmönäni badänitapa. ¹⁷ Tömengä nänö yewæmöi

yewæmönämaï inäni guiquenë tömënäni mäincoo ædö cæte godonte ænguïnänii. Ædö cæte godonte ænänii weca gote tömënäni mäincoo inï godonte ænguïnänii. Ayæ mäninö ante yewæmöi iñömö mönö guïñëngä tänocä pöningä ëmowo impa. Wïi tömengä ëmowo yewæmonte i bai tömengä ëmowo ante beyæ, Æpodö i, ante yewæmonte impa.

¹⁸ Mäninö ante ëñencæte ante nani ëñënö ante eyepæ encadäni inte ëñencädänimpa. Ocai në encacä ininque, Mönö guïñëngä tänocä pöningä nänö, Æpodö i, ante ëñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

14

144.000 ganca inäni nani ämotamini äinö

¹ Ayæ botö ayömote Wængongui Codotedo änanquidi iñömö Tiño nani anquidi mänñömö a ongongä atabopa. Tömengä weca waodäni tiento coadenta i coatodo müido ganca inäni inte Wængongui Codotedo ëmowo adobai tömengä Mæmpo Wængongui ëmowo nani önönemö inö në yewæmöinäni inte a ongönäni atabopa. ² Ayæ botö ëñëñömote öönæde inö tedepämo ante ñænæ tēñabo ante bai detæbo eyequei tē bai ëñëñinque adobai waodäni nani adapate nani ampoque inte tæiyænäni ampoyönäni ante bai tedepämo tē ëñentabopa. ³ Tiento coadenta i coatodo müido ganca inäni iñömö mä äninque waa ämotamini ante änanitapa. Wængongui nänö aacæ tæ containpa gäänë ämotamini äñönäni müinäni quëwënäni mäa go mäa ganca inäni në aadäni në Picænäni tönö ëñëñänitapa. Tiento coadenta i coatodo müido ganca inäni inguipoga quëwënäni tönö adoyömö quëwëñönäni, Godonte æmo beyænque quëwenguimäni, ante Wængongui nänö në æninäni que i ämotamini äinö ante ëñente ancädänimpa. Wadäni guiquenë ædö cæte ëñente ænguïnänii.

⁴ Inäni iñömö Wængongui ingante ante waëmö quëwencæmönimpa, ante cædinque, Onquiyængä, ante në towënamäi ingainäni inänipa. Ininque tömënäni Wængongui Codotedo ædönö gocä tömengä miñæ cöwë godänipa. Tömënäni waodäni tönö adoyömö quëwëñönäni Itota, Botö wepæ beyænque quëwenguimäni, ante tömënäni inänite ængacäimpa. Täno amiña bayedë tä pedinque munitö, Wængongui qui baquimpa, ante müni cönöni bai mäninäni adobai Wængongui quinäni badinque Wængongui Codotedo quinäni inänipa. ⁵ Adodäni cöwë babæ änamäi inäni ininque wadäni ædö cæte tömënäni inänitedö ante, Babæ änanipa, ante

ænguïnänii. Tömënäni edæ cöwë wënæ wënæ cædamäi inänipa töö.

Wængongui anquedoidi mänaa go adocanque nani äinö

⁶ Ayæ Wængongui anquedo wacä iñömö öönæde inö pö pao pao gocä atabopa. Inguipoga në quëwënäni inänite wabæca nani quëwencabo wabæca nani quëwencabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wacä awënë nani cabo wacä awënë nani cabo iñönäni anquedo tömänäni inänite Wængongui wantæpiyæ cöwë nänö watapæ apænëdö ante ëñencädänimpa, ante apænecæte ante pongantapa. ⁷ Mäningä Wængongui anquedo iñömö yedæ iimäi äninque, “Wængongui apænte nänö ænguïönæ do inque bayonte mäniönæ tömämüni müni cægäinö ante tömengä apænte ancæcäimpa. Ininque tömengä ingante guïñëninque ee aedäni. Adobai tömengä ingante waa aedäni. Tömengä edæ öönæde incæ inguipoga incæ æpæntibæ incæ æpæ tayömö incæ tömäa në badongaingä ingante munitö, Bitö Awënë Wængongui imidö ænguënë, ante ædæ wææninque watapæ apænëedäni. Mäninque ämopa,” angantapa.

⁸ Mäningä Wængongui anquedo gocä ate wacä Wængongui anquedo ayængä pöninque iimäi angantapa. “Babidönia nani äñömö do wo ewente batimpa. Babidönia nani waëmö quëwëñömö i incæte do wo ewente ba aedäni. Mänñömö në quëwënäni wënæ wënæ cædinäni iñömö onquiyængä në towengä bai cædinque biñömæ bete quidi quidi dowæninque towencädänimpa, ante tï nämæ godonte bai cædänipa. Tömënäni mänömaï godö cædäni beyænque wabæca nani quëwencabo wabæca nani quëwencabo wæætë wënæ wënæ cædänitapa. Mäninque ämopa,” angantapa.

⁹⁻¹⁰ Ayæ mäningä Wængongui anquedo gocä ate wacä Wængongui anquedo tömengä pöninque yedæ iimäi angantapa. “Mönö guïñëngä tänocä pöningä ingante æcänö, Bitö Awënë Wængongui bai imidö ænguënë, ante apænecäa. Ayæ tömengä nänö ëmönö bai nani badöninca gäänë ædæ wææninque æcänö apænecäa. Wængongui tömënäni inänite nanguï piincæcäimpa. Tömënäni önompö incæ önönemö incæ mönö guïñëngä nänö yewæmöi në yewæmöinäni adinque Wængongui adobai tömënäni inänite nanguï piincæcäimpa.” Äninque Wængongui anquedo godömenque apænecantapa. “Mäninäni Wængongui biñömæ nänö piimæ becädänimpa. Mänimænque æninque tömengä nänö piinte owætadë pe fiñængantapa. Mänimænque në bete bai inäni iñömö nanguï pöni

wæwencæðänimpa. Wængongui tæiyæ waëmö anquedoidi weca ayæ Wængongui Codotedo weca gonga bæcoyömö atopode nāni öö wadö gonga bæcoyömö öö wayömö māniñömö iñāni æmæwo gonte ba bai nangui wæwencæðänimpa,” angantapa.

¹¹ “Ayæ tōmēnāni gonga bæcoyömö māniñömö wæwēñōnāni nāni wæwēmāmo tēmā bai cōwē æicōmpa. Woyowotæ incæ itadē incæ māniñāni edæ guēmānāmai incæðänimpa. Tōmēnāni iñōmō, Mōnō guññēnongā tānocā pōningā weca ædæ wææñinque, Bitō Awēnē Wængongui bai imidö angūēnē, ante nē apænedāni iñānipa. Ayæ tōmēngā nānō ēmōnō nāni badōinca gāānē ædæ wææñinque nē apænedāni adobai tōmēngā ēmōwo nānō yewæmōi nē yewæmōināni inte māniñāni tōmānāni wantæpiyæ mānōmai guēmānāmai inte wæwencæðänimpa. Māniñque āmopa,” angantapa.

¹² Mānōmai beyæ mīnitō Wængongui quimīni iñōmō tōmēngā nānō, iīmai cæðāni, ante nānō wææ angainō ante ēñente cæðōmīni inte ayæ Itota ingante godōmenque wede pōnēmīni inte mīnitō wæntæye iñāmai inte ee cæcæmīnimpa.

¹³ Ayæ ate botō öönædē inō tedepāmo iīmai ante ēñentabopa. “Bitō iīmai yewæmōe,” angantapa. “Nōwo ganca ayæ ate Awēnē Itota ingante pōnente nē wænāni inte tōmēnāni nāni toquinque.”

Ante āñongā Wængongui Tæiyæ Waëmō Önōwoca, “Ao āmopa, angampa. Nāni toquinque ingæimpa. Tōmēnāni nāni nangui cægainō ñimpo cæte guēmāncæðänimpa. Edæ tōmēnāni nāni waa cægainō öönædē iñōmō edonque pōni acæimpa,” ante angantapa.

Inguipoga quēwēnāni beyæ amiña bai bacæimpa

¹⁴ Ayæ botō ayōmo nāāmænta boguimā mæ owo atabopa. Adocanque Waocā ēñagainā ingā bai iñōmō māniñ boguimāa tæ contacā atabopa. Tōmēngā ocaboga awēnē poganta oodo inte badōinta encacā inte tōmēngā nānō önōnempo yaēmē bai waingamē idāmæ engamē næængā atabopa.

¹⁵ Ayæ ate wacā anquedo Wængongui oncō tæiyæ waëmō oncōnē ta pōninque boguimāa nē tæ contacā ingante iīmai yedæ ante aa pecantapa. “Inguipoga quēwēnāni botō imote nē wede pōnente waa cæðōnāni iñōmō nē minte pæmō bai iñāni inte tōmēnāni nāni to amiña bayedē bai impa. Wadæ wadæ pinōninque nāni ö æñedē bai do bayonte bitō yaēmē bai bitō nææi ænte gote māniñāni iñānite wadæ wadæ pinonte bai cæðinque ö æe.” ¹⁶ Angā ēñēninque boguimāa nē tæ contacā gote inguipoga iñōmō tōmēngā yaēmē bai nānō nææi inte wadæ wadæ pinonte bai cæðinque

tōmānāni nē minte pæmō bai iñāni iñānite ö ængantapa.

¹⁷ Ayæ öönædē iñōmō Wængongui oncō tæiyæ waëmō oncōnē ongonte ta pōninque wacā anquedo adobai yaēmē bai waingamē idāmæ engamē næænte pongantapa.

¹⁸ Tōmēngā pongā ate Wængongui anquedo wacā pongantapa. Wængongui oncō tæiyæ waëmō oncōnē, Wængongui quī, ante iya tæe, ante nē ānongā inte nāni iya tāimoga gāānē ongōninque ta pōninque yaēmē bai waingamē idāmæ nē engamē næængā ingante iīmai yedæ apæncantapa. “Inguipoga tōmāo nē wænæ wænæ cæðāni iñōmō yowecoo bai iñānipa. Māniñāni yowe ite bayedē bai iñāni adinque bitō yaēmē bai bitō nææi ænte gote yowecoo wangō tadampote gæte bai cæðinque tōmēnāni iñānite cæe.”

¹⁹ Angā ēñēninque Wængongui anquedo inguipoga iñōmō tōmēngā yaēmē bai nānō nææi inte wangō tadampote cæðinque yowecoo gæðāni bai tōmēngā nē wænæ wænæ cæðāni iñānite adobai cæcantapa. Ayæ yowepæ ante ñænængade nāni pinā pinā gāwate cæincadedē yowecoo wææntodonte bai cæðinque tōmēngā wænæ wænæ cæðāni iñānite Wængongui plinte nānō pāiñōmō wido cæcantapa. ²⁰ Māniñ tōmēnāni yowecoo ænte pinā pinā gāwate cæincade iñōmō tōmēnāni nāni quēwēñōmō yabæca ongompa. Māniñōmō tōmēnāni iñānite pinā pinā gāwate bai cæðānitapa. Cæyōnāni tōmēnāni wepæ nangui pōni gotimpa. Cabayo goto winediñōmō æi ganca tōmēnāni wepæ māninganca æi godinque todee tiento quidōmetodo ganca māninganca nangui pōni wepæ gotimpa.

15

Tiæte ganca nāni wæwenguimāmo pompa

¹ Ayæ botō ayōmote Wængongui ñōwo wæætē mā pōni odōmōmo adinque ēñencæðänimpa, ante cæðinque öönædē inō bamōnengæ pōni badongā a owo atabopa. Wængongui anquedoidi öonmpo æmæmpoque go mēnaa iñāni iñōmō öönædē ongōñōnānte tōmēnāni iñānite, Mīnitō cæmīni beyænque waodāni nāni wæwenguimāmocoo öonmpo æmæmpoque go mempoga pongæimpa, angā ēñente ænte pōnānitapa. Māniñ wæwēmāmocoo æmæwo ba adinque Wængongui nānō ængui panguimāmo eyepæ bapa.

² Ayæ æpæntibæ iñōmō awocawænta emō bai adinque botō māniñtibæ tōnō gonga guæa wempodente bæco atabopa. Adotibæ yæwedeca waodāni mæ ongōnānipa. Māniñāni iñōmō mōnō guññēnongā ayæ pōningā ingante ante ayæ tōmēngā nānō emōnō bai nāni badōinca ante Baa āninque

tömänäni tæi emonte gänä cædäni inänitapa. Adodäni tömengä emöwo ante, Æpodö i, ante Baa ante yewæmönämaï inäni atabopa. Wængongui tömännäni inänite adapate nani ampoqui godongä ænte næænte a ongönäni. ³ Tömännäni a ongöninque Wængongui ingante nê cægäingä Möitee wodi ämotamini nänö angainö ante ayæ Wængongui Codotedo ämotamini nänö againö ante iïmaï ämotamini ännäni.

“Awënë Wængongui bitö adobique Tömää Cægäimi inte

bitö mä cædö iñömö waëmö pöni inönö angüenê.

Bitö tömämæ quëwännäni Tæiyæ Awënë Odeyebi imidö angüenê.

Quiëmê cædinque bitö nê nö cæbi imipa.

⁴ Awënë eñëmi, Æcämê bitö imite guiñënnämaï ingüingää.

Ayæ bitö emöwo ante pönente æcämê waa adämaï ingüingää.

Edæ bitö adobique tæiyæ waëmö imipa.

Tömää bitö nö cædinö edonque pöni ba adinque

wabæca wabæca nani quëwencabo tömännäni bitö weca ponte ædæ wææninque

bitö imi, Bitö Awënë Wængongui imidö angüenê, ante ancædänimpa.”

⁵ Ayæ ate botö ayömote öönædê iñömö Wængongui tæiyæ waëmö oncö incæ æmontaicö bai inte tömengä nänö nänênê owocö iñömö wi ænete bayö atabopa. ⁶ Wængongui anquedoidi önonpo æmæmpoque go mënaa inäni mänincönê ongonte ta pönänitapa. Tömännäni cædäni ate waodäni nani wæwenguimämo iñömö önonpo æmæmpoque go mem-poga pongæimpa. Tömännäni weocoo waëmoncoo nïno nani ancoo nïäo bai ëmoncoo mongænnäni inänipa. Tömännäni tæcætawê inö pacadeyænta oodo inte nani badöinta mongæënëmæinänäni inänipa.

⁷ Ayæ mïnnäni quëwännäni mënaa go mënaa iñönäni adocanque Wængongui anquedoidi önonpo æmæmpoque go mënaa inäni iñönänite owætacoo adotaque adotaque pædæ godongä ænnänitapa. Mänintacoo önonpo æmæmpoque go mentacoo iñömö oodo inte nani badöintacoo inte Wængongui nê wantæpiyæ cöwê quëwengäingä ingä nänö ængui pämmäno eyedê ënentapa. ⁸ Wængongui nänö nïäo apäidö beyæ ayæ tömengä nänö tæi piñæmmäno beyæ tömengä tæiyæ waëmö oncönê iñömö tæëmämämo eyedê mæ ongompa. Ayæ Wængongui anquedoidi önonpo æmæmpoque go mënaa inäni cædäni ate waodäni nani wæwenguimämo ante önonpo æmæmpoque go mem-poga nani wæwengüinganca iinque baganca æcämenque incæ Wængongui tæiyæ waëmö oncönê guidämaï incædänimpa.

16

Wængongui nänö ængui panguintacoo

¹ Ayæ ate Wængongui tæiyæ waëmö oncönê inö tedepämo yedæ tê ëñentabopa. Nê angä iñömö Wængongui anquedoidi önonpo æmæmpoque go mënaa inäni inänite, “Goedäni, äninque, Wængongui owætacoo nänö ængui panguintacoo önonpo æmæmpoque go mënaa ganca incoo næænte gote inguipoga iñömö gao cædäni,” angä ëñentabopa.

² Wængongui anquedo tänocä godinque tömengä owætadê ënê incæ inguipoga gao cæcantapa. Gao cæcä ate mönö guiñëngä ayæ pöningä nänö yewæmöi nê yewæmöinäni inte tömengä nänö emönö bai nani badöinca gäänê ædæ wææninque apænedäni iñönänite tömännäni ayaa nantai nömæi tömäo baadinque nantate wædänitapa.

³ Wængongui anquedo ayæ nê gocä tömengä owætadê ënê incæ æpæntibæ cæncadëmæ gao cæcä ate mänimæ iñömö do wænnäni wepæ bai bayonte mänintibædê quëwännäni tömännäni wænnänitapa töö.

⁴ Wængongui anquedo ayæ nê gocä tömengä owætadê ënê incæ æpænê tömänonga gao cædinque æpæ tayömö tömäñömö gao cæcä ate mänimæ tömämæ wepæ batimpa. ⁵ Ayæ ate Wængongui anquedo æpæ tömämæ beyæ nê angä inte iïmaï apæncä ëñentabopa.

“Mönö Tæiyæ Waëmö inömi eñëmi, bitö wëñëñedê do nê quëwengäimi imi nïwobi adobi inömi imipa.

Mänömaï tömännäni inänite apænte ante päninque bitö nö cædinque apænte päniimi imipa.

⁶ Edæ bitö quinnäni tönö bitö beyæ nê apænegainäni inänite wænnönäni ate tömännäni nê wænnäni wepæ näate bagadänimpa.

Bitö wæætê nê wænonnte näate badäni nani cægäi beyæ

wepæ godömi begadänimpa,” angantapa.

⁷ Ayæ Wængongui qui, ante nani iya täimoga inö tedepämo tê ëñentabopa. “Ao ämopa. Awënë Wængongui bitö adobique Tömää Cægäimi inte, iïmaï pancæboimpa, ante bitö apænte angainö bai cædinque tömännäni inänite päninque bitö cöwê nö cæte waa päimipa.”

⁸ Wængongui anquedo ayæ nê gocä tömengä owætadê ënê incæ nænque mæ owoyömö mäninñömö gao cæcantapa. Ayæ waodäni æmontaiya montæ gongate wæcædänimpa, ante cædinque nê godö angä beyænque nænque nangui tï näwä batimpa.

⁹ Mänii nangui tï näwante beyæ waodäni montæ gongate badäni incæte tömännäni nani wænæ wænæ cædinö ante, Ancaa

wæwente awædö, ante ayæ pönēnāmai ināni inte ñimpo cædāmai inte Wængongui ingante waa adāmai inānitapa. Tömēnāni, Wængongui cæcā beyænque mōnō wæwēmāmocoo pōnimpa, ante wædinque Wængongui ingante pīinque tōmengä emōwo ante wēnæ wēnæ babæ ante tedewēnānitapa.

¹⁰ Wængongui anquedo ayæ nē gocā tōmengä owætadē enē incæ mōnō guññēngä tānocā pōningä nānō aacæ tæ contaimpaa gao cæcā ate tōmengä awēnē odeye inongä inte nānō aayōmō mæ māmōnte bai batimpa. Waodāni nantate wædinque ōnonguēnēwa æo pocænguēnwate wædānitapa. ¹¹ Mānōmai wædāni incæte tōmēnāni nāni wēnæ wēnæ cædīnō ante, Ancaa wæwente awædö, ante godōmenque pönēnāmai ināni inte ñimpo cædāmai inānitapa. Wæwētē nantai baate nantate wædinque Wængongui ōönædē quēwēnongä ingante piinte badinque wēnæ wēnæ babæ ante tedewēnānitapa.

¹² Wængongui anquedo ayæ nē gocā tōmengä owætadē enē incæ ñænæ ōnonga Eopadatedö nāni ānonga mānīnonga gao cæcā ate awēnē odeyeidi nænque tamōnō quēwente nāni pōnguñō taadö ante ōnō tōmāo amīmō batimpa.

¹³ Ayæ wēnæidi wentamō nāni ēwocacabo mēnaa go adocanque ināni iñōmō weque bai ināni ta pōnāni atabopa. Dadagōō ōnōnē inō adocanque wēnæ ta pōngantapa. Mōnō guññēngä tānocā pōningä ōnōnē inō wacā wēnæ ta pōngantapa. Ayæ Wængongui beyæ nē apænedōmō imopa, ante nē babæ apænedongä ōnōnē inō wacā wēnæ pōngantapa. ¹⁴ Mānīnāni wēnæidi ōnōwocaidi ināni inte mā cædāni inānīpa. Iñāni iñōmō tōmāmæ awēnē odeyeidi weca āñecæ godinque tōmēnāni inānite apænedinque, Awēnē Wængongui adocanque Tōmāā nē Cægāingä inte nānō apænte anguiōnæ iñōnte mīnitō godongāmæ ponte guēadö guēa cæcæmīnīpa, ante cædānīpa.

¹⁵ “Mōnō Awēnē nāmā incæ Iīmāi angantapa. Aedāni. Nē awēmō ængä iñōntobæ pōngä bai botö adobai ānāmai inte poncæboimpa. Æyedēnō pōnguingä, ante nē mōnāmai ongongä iñōmō tōmengä wānō cōnongä bai inongä inte nānō toquinque. Edæ tōmengä, Ōmaabo ināmai incæboimpa, ante ayæ, Guññēñate wædāmai incæboimpa, ante tōmengä weocoo tōmē weca ee mangä inongä ingampa,” angantapa.

¹⁶ Māñī wēnæidi ōnōwocaidi tōmāmæ awēnē odeyeidi inānite āñecæ gote ānāni ēñēnīnque awēnē odeyeidi iñōmō tōmēnāni tontadoidi tōnō Adāmaquedoō ebēdeo tededö nāni āñōmō adoyōmō godongāmæ pōnānitapa.

¹⁷ Ayæ Wængongui anquedo tōmengä nē gocā tōmengä owætadē enē incæ woboyæ owoyōmō māñīñōmō gao cæcā ate ōönædē inō Wængongui tæiyæ waēmō oncōnē tōmengä nānō aacæ tæ contayōmō māñīñōmō tedepāmo yedæ tededinque, “Nōwo iñique batimpa,” angantapa.

¹⁸ Ayæ ate yædæ yædæ nānīmpa. Detæbo tæi tæi tē goyō yedæ pōñi ānīmpa. Ayæ goinque nangui pōñi ocæ ocæ gotimpa. Waodāni inguipoga nāni quēwenganca tōmanganca māñī goinque bai wa goinque cōwē godāmai inīmpa. ¹⁹ Goinque ocæ ocæ goyōnte tōmēnāni nāni ñænæ quēwēñōmō incæ tænguimæ tænguimæ godinque mēñōmōnga go adoyōmonque batimpa. Ayæ wabæca nāni quēwencabo wabæca nāni quēwencabo incæ tōmāo nāni quēwēñōmō onconcoo acapowate bogocæ tæ gowæænīmpa. Wængongui adobai, Babidōnia nāni waēmō quēwēñōmō quēwēnāni wēnæ wēnæ cædānīpa, ante pōnente wædinque ænguī badinque, Mīni wæwengūnīmpa, ante owæta biñōmæ nānō pīimæ eyede enē godōnte bai cædinque tōmēnāni inānite nangui pīinīnque pangantapa. ²⁰ Tōmāā wāā tēiwæñē iñōmō yogæ guitimpā. Ayæ onquiyabocoo adobai dæ hibitapæ batimpā. ²¹ Ayæ ōönædē inō yoguica cōönæ bai waodāniya tæi tæi wæænīmpa. Mānīnca tæi tæi wæænīnca adocaque incæ wodo tiēē diboda tee mā ganca enca impa. Yoguica wēnæ wēnæ incapa, ante adinque waodāni, Mānīnca mōnō wēnæ wēnæ wæwēmāmo impa, ānīnque Wængongui ingante piinte badinque wēnæ wēnæ babæ ante tedewēnānitapa.

17

Onquiyængä māincoo beyæ nē towente quēwēnongä

¹ Wængongui anquedoidi ōnōmpo æmæmpoque go mēa ganca ināni ōnōmpo æmæmpoque go mēa ganca owætacoo nē næænāni iñōnānite adocanque botö weca ponte, “Pōe, angantapa. Onquiyængä māincoo beyæ nē towente quēwēnongä iñōmō æpæncoo yædopāa nē tæ contactā apænte nānō panguinō ante botö odōmōmo acæbiimpā. ² Inguipoga awēnē odeyeidi incæ tōmengä tōnō towengadānīpa. Waodāni inguipoga quēwēnāni incæ adobai tōmengä towēñēnō beyæ tōmengä biñōmæ bete bai quidi quidi dowænte bai pönēnāmai cægadānīpa,” ante apæñecæ ēñentabopa.

³ Wængongui Ōnōwoca incæ botonga pō guiyongä botö wīlmonē bai iīmāi atabopa. Wængongui anquedo adocā iñōmō botö imote ō ænte māo ōnōmæca iñōmō cōnongä ongōntabopa. Māñīñōmō ongōnīnque botö

onquiyängä babæcä bai në guiññenongä mongænte a ongongä atabopa.

Mäningä mönö guiññenongä opatawæ ãñadongä inte emöwocoo tömengä baonga godämæ tömengä yewæmõi ãñacä ingantapa. Mäniwocoo Wængongui ingantedö ante wænæ wænæ babæ wapiticæ aniwocoo inönimpa. Mäningä mönö guiññenongä nänö ocabocoo önonpo æmæmpoque go mäa encacä inte tömengä nänö önömoncawæncoo önonpo tipæmpoga emoncacä ingantapa.

⁴ Onquiyängä iñömö tömengä weocoo awënëidi waemoncoo nani mongæncoo tönö opatawæ emoncoo mongængantapa. Tömengä, Botö waemö incæboimpa, ante oodo badöincoo tönö dicamö nani nangui godonte ænincoo tönö pededamö nani ämö mänimoncoo mongænte ingantapa. Tömengä önönempe owætadë oodo inte badöintadë quimæmë baapæ bai i eyede engapæ næængantapa. Mäningä onquiyängä quiëmë nänö wænæ wænæ cæpæmo nänö towente quëwëno bai mänintadë næængantapa.

⁵ Adocä onquiyängä tömengä önönemö inö emöwo yewæmõi emongä ingantapa. Mäniwo wë wodonte bai i incæte iimaï ante impa. “Babidönia nani waemö quëwëñömö i incæte onquiyängä në towengä bai impa. Waodäni në godö towëñäni wäänä bai mäningä onquiyängä ingampa. Ayæ adobai inguipoga quëwëñäni wiwa nani cæñinö ante në cædäni wäänä bai adocä onquiyängä ingampa.”

Mänömaï tömengä önönemö inö yewæmonte emongantapa. ⁶ Wængongui quinäni ingainäni tönö Itota ingante ante apænedäni beyæ në wængainäni tömëñäni wepæ bete bai mäningä onquiyängä quidi quidi dowænte bai ingä botö atabopa. Tömengä ingante adinque botö ancai guiññente wætabopa.

⁷ Ancai guiññente wæyöмотe Wængongui anquedo botö imote iimaï angantapa. “Quinante ancai guiññente wæbii. Mönö guiññenongä iñömö tömengä ocabocoo önonpo æmæmpoque go mencaa encacä inte tömengä önömoncawæncoo önonpo tipæmpoga emoncacä inongä inte onquiyängä ingante në mongængä ingampa. Onquiyängä ingante në mongængä mönö guiññenongä tönö onquiyängä tömëna nana wë wodonte inï æbänö i, ante apænebo ëñëe.

⁸ Adocä mönö guiññenongä bitö adingä iñömö wëñëñedë quëwëngaingä inte ñowo dæ angä incæte ayæ ate tadömengadænguipodë inö ææ ta poncæcäimpa. Ta pöningue tömengä nänö æmæwo ömäe ewënguinqe ingæimpa. Wængongui, Quëwëngainta, ante inguipoga badönämaï iñedë nänö yewæmongaintaa inguipoga quëwëñäni tömëñäni emöwo në yewæmönämaï inäni iñömö tömëñäni iñömö mönö guiññenongä do quëwëngaingä ñowo dæ

angä incæte ayæ ate pongä adinque ancai guiññente wæcædäniimpa,” ante Wængongui anquedo apænecantapa.

⁹ Ayæ tömengä wæætë apænecantapa. “Mäniñö ante ëñencæte ante ocäi ëñëno në encacä inte ëñencæcäimpa. Mönö guiññenongä tömengä önonpo æmæmpoque go mäa ocabocoo iñömö önonpo æmæmpoque go mäa änanquidi bai inäni. Mänii änanquidiboga onquiyängä tæ contacä ingampa. Mänii ocabocoo adobai önonpo æmæmpoque go mäa awënë odeyeidi bai inäni. ¹⁰ Mänimpodäni iñönänite önonpo æmæmpoque awënë odeyeidi inänite wido cædäniimpa. Adocanque awënë odeye iñömö ñowo aacä ingampa. Wacä awënë odeye ayæ pönämaï ingä incæte tömengä pöningue wantæ iñö ongonte aacæcäimpa. ¹¹ Önonpo æmæmpoque go mäa ganca awënë odeyeidi nani cabo iñönänite mönö guiññenongä adocä inongä incæte tömëñäni beyæ ponguingä ingampa. Tömengä iñömö wëñëñedë në quëwëngaingä incæ ñowo dæ angä inongä inte tömengä nänö æmæwo ömäe ewënguinqe poncæcäimpa,” ante Wængongui anquedo apænecantapa.

¹² Ayæ tömengä wæætë apænecantapa. “Ayæ önonpo tipæmpoga önömoncawæncoo bitö adimoncawæncoo iñömö önonpo tipæmpoga awënë odeyeidi bai inäni incæte ayæ aadämaï inäni. Incæte ayæ ate tömëñäni inänite äñäni ate awënë odeyeidi badinque tömëñäni, iimaï cædäni, ante äñäni bacædäniimpa. Ayæ mönö guiññenongä tönö tömëñäni adoqe ooda ganca godongämæ aacædäniimpa. ¹³ Tömëñäni adodö ante pönëñäni inte, Mönö tæi piñænö ante guiññenongä ingante godömö æncæcäimpa. Ayæ awënë odeyeidi inömö inte mönö, iimaï cædäni, ante në ämö imö bai mönö tömengä ingante ämö në angä bacæcäimpa.

¹⁴ “Mäninäni Wængongui Codotedo ingante guëadö guëa cæcædäniimpa. Incæte tömengä iñömö awënëidi tömëñäni Awënë inongä ingampa. Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Iñinque tömengä tæi emönongä inte tömëñäni inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedinque apænte nänö në ængainäni inte tömengä miñæ cöwë ædæmö cæte tee empo godäni inäni. Mäninäni adobai tömengä tönö godongämæ guëadö guëa cæte wæñonguinäni inte tæi emonte gänä cæcædäniimpa,” ante Wængongui anquedo apænecantapa.

¹⁵ Ayæ tömengä wæætë botö imote iimaï apænecantapa. “Onquiyängä mäincoo beyæ towente quëwëñongä inte æpæncoo

yædopāa tæš contacā abitapa. Mānīi æpæncoo iñōmō tæiyæñāni waodāni bai inānīpa. Wabæca nāni quēwencabo wabæca nāni quēwencabo incæ wadō nāni tedecabo wadō nāni tedecabo incæ waodāni tæiyæñāni inānīpa. Mānīnāni tōmānāni mānīi æpæncoo bai inānīpa. ¹⁶ Ayæ ōnompō tipæmpoga ōnōmoncawæncōo bai awēnē odeyēidi tōnō mōnō guīñēnōngā iñōmō tōmēnāni bitō nē adīnāni inōnāni inte onquiyængā māincoo beyæ nē towente quēwēnōngā ingante piīncædānīmpa. Piīnīnque, Tōmēngā ingante æmæwo ōmæ ēwēngæīmpa, ante cæcædānīmpa. Tōmēngā māincoo tōmancoo ō æñāni ate ōmaacā inte wæyongante tōmēngā baō cænīnque tōmēngā ingante æmæwo iya tancædānīmpa. ¹⁷ Wængonguī, Botō angai bai iñque baganca tōmēnāni botō pōnēnō ante cæcædānīmpa, ante godō cæcā beyænque mānīnāni awēnē odeyēidi nāni mīmōnē adodō ante pōnēnānīpa. Pōnēnīnque tōmēnāni godongāmæ Ao ānīnque, Mōnō guīñēnōngā aacæcāīmpa, ante tōmēngā ingante, Mōnō tæi piīñēnō ante godōmō ænguingā, ante godōnāni ængantapa.

¹⁸ “Māningā onquiyængā bitō adīngā bai Babidōnīa nāni waēmō quēwēñōmō adobaī impa. Māniñōmō awēnēidi iñōmō tōmāmæ awēnē odeyēidi inānīte nē aadāni inānīpa,” ante Wængonguī anquedo apænecantapa.

18

Babidōnīa nāni quēwēñōmō do wo ēwente batīmpa

¹ Ayæ ate Wængonguī anquedo wacā inte ōōnædē iñō wææ pongā atabopa. Tōmēngā tæi piīñēngā inte nanguī angā ingā inte nāmā nānō nāō apāite ēmōnō inte inguipoga iñōmō nāō apāicā atabopa. ² Tōmēngā nānō tedepāmo inte iīmaī yedæ aa pedīnque, “Babidōnīa nāni āñōmō do wo ēwente batīmpa. Babidōnīa nāni waēmō quēwēñōmō ī incæte do wo ēwente ba aedāni.

Badīnque wēnæidi nāni owoyōmō batīmpa. Wēnæidi wentamō ēwocadāni tōmānāni māniñōmō tee mōnīncōnē bai quēwēnānīpa.

Ayamōidi baacāidi tōmānāni adobaī māniñōmō wææ cæte bai owodānīpa.

³ Wabæca nāni quēwencabo wabæca nāni quēwencabo incæ tōmānāni

babidōnīaidi wīwa nāni towēinēnō beyæ tōmēnāni biīnōmæ bete quidi quidi dowænte bai wædānīpa.

Inguipoga awēnē odeyēidi incæ babidōnīaidi tōnō towēnānīpa.

Babidōnīa iñōmō quēwēnāni nāmanque ante pōnente tocæte ante māincoo nanguī pōni ænte ēadāni beyænque

inguipoga nē godonte æñāni iñōmō māincoo nanguī pōni ēadāni badānīpa,” ante Wængonguī anquedo aa pecantapa.

⁴ Ayæ ōōnædē iñō wacā tedepāmo tedecā ēñentabopa.

“Botō guīdēmīni ēñēedāni. Mīnitō tōmēnāni weca quēwēmīni incæte,

Tōmēnāni tōnō godongāmæ wēnæ wēnæ cædāmaī incæmōnīmpa, ante cædinque wadæ tao pōedāni.

Ayæ, Wængonguī tōmēnāni inānīte pānīnque mōnitō imōnīte pānāmaī incæcāīmpa, ante pōnente wædinque wodīi wīnōnte pōedāni.

⁵ Tōmēnāni wēnæ wēnæ cædīmāmo iñōmō cabo tī gæte cōnōnīnque bacoo pōni ongompa.

Incæte Wængonguī mānīnāni nāni wīwa cædīmāmo cōwē pōnente wæcampa.

⁶ Tōmēnāni nāni pōnōni bai mīnitō tōmēnāni inānīte adobaī godoncæmīnīmpa.

Tōmēnāni nāni pōnō cædinō beyæ mīnitō wæætē adopo godō cædinque mempoga ganca godōmenque godō cæmīni wæcædānīmpa.

Tī nāmæ godōnāni bete bai wædānitawo. Mīnitō wæætē tōmēnāni owætadē tī nāmæ adopopæ pe fiñænte wempo cædēnīnque,

mempoga pe fiñænte wempo cædente bai cædinque godōmenque tī nāmæ godōmīni bete wæcædānīmpa, angantapa.

⁷ Edæ tōmēnāni nāmā incæ, Mōnō fiñæsmō imōmpa, ante pōnente nanguī waēmō māincoo ēate quēwēnāni iñōnānīte mīnitō wæætē, Tōmēnāni ægancadō waēmō quēwēnānī, ante adīnque

tōmēnāni inānīte adoganca piīnte cæmīni nantate wædinque tōmēnāni wæwente quēwēncædānīmpa.

Mānīnāni iñōmō, ‘Awēnē odeye nānōogængā bai contate ongōmōmpa. Edæ watapæ quēwēmō imōmpa.

Wīi owæmpoingā bai iñōmō inte wæwēnāmaī cōwē incæmōīmpa,’ ante ōnōwēnēnque pōnente ānewēnānīpa.

⁸ Mānōmainō ante nē ānāni inte adoque itædē iñōnte tōmēnāni nāni wæwēmāmo iñontobæ pō ate nanguī wæcædānīmpa.

Māniñōnæ tōmēnāni nāni wænguīmāmo nāni wæwenguīmāmo nāni gue ænenguīmāmo pō wæcædānīmpa tōō.

Tōmēnāni onconcoo gonga bæcodocæīmpa.

Edæ Wængonguī Awēnē iñōmō Babidōnīa iñōmō quēwēnāni inānīte nē apænte ante pangā iñōmō edæ tōmēngā tōmāā cægaingā ingampa,” ante apænecantapa.

⁹ Inguipoga awēnē odeyēidi incæ Babidōnīa quēwēnāni tōnō towēnāni inte

tōmēnāni adobaī Babidōnia quēwēnāni tōnō nanguī waēmō māincoo godongāmæ ænte ēate quēwēnānīpa. Inique Babidōnia nāni quēwēñōmō gonga bæcododīnque tēēmancoo baca baca æi adīnque tōmēnāni wæwente Ca ca wæcædānīpa. ¹⁰ Babidōnia iñōmō quēwēnāni nanguī pōnī nāni wæwēnō adīnque awēnē odeyeidi ancaī guīñēnīnque, Mānīnāni tōnō godongāmæ wæwēnāmāi incæmōnīpa, ante gomonga a ongōnīnque wæcædānīpa.

“Babidōnia mīni waēmō quēwēñōmō nē quēwēmīni mīni wæquinque ingæīpa.

Mānīñōmō quēwēmīni māincoo nanguī ēate iñīmīni inte mīni wæquinque.

Wēnæ wēnæ cæmīni iñōmīnite adoque ooda iñonte Babidōnia mīni quēwēñōmō do apænte pante wō ewente batīpa.” ante wæcædānīpa.

¹¹ Inguipoga māincoo ænte mante nē godonte ænāni iñōmō, Edæ æcānō mōnō godonguēncoo godonte ænguīnaa. Nōwo dæ ā, ante wæwente Ca ca wæcædānīpa.

¹² Iñcoo iñōmō nāni godonguēncoo impa. Oodo tōnō padata, dica nāni nanguī godonte ænincacoo tōnō pededamō nāni āmoncoo mæ ongoncoopa. Adobaī wæmoncoo nīno nāni ancoo tōnō awēnēidi waēmoncoo nāni mongæncoo ayæ teda nāni ancoo tōnō opatawæncoo mæ ongoncoopa. Quiwæmē oguī wawæneque i māniwæ mæ ongoncoopa. Edepante бага inte nāni badōnīncoo tōnō awænque nāni nanguī godonte æniwæ inte nāni badōnīncoo mæ ongoncoopa. Yaēmenta bodonte nāni āni inte nāni badōnīncoo tōnō iædo nāni āni inte nāni badōnīncoo tōnō mānōmodo nāni anca inte nāni badōnīncoo iñōmō mānīncoo tōmancoo mæ ongoncoopa, ante wæcædānīpa. ¹³ Cāneda nāni antapo tōnō oguī waa ōni pæcaqui, oguī waqui nāni iya tāimō tōnō tī nā ōni pæqui ayæ oguī wapæ ōni pæquimæ, biñōmæ tōnō oguinguipæ, waēmō ædīna tōnō todigomō mānīncoo mæ ongoncoopa. Cæningāidi tōnō obegaidi cabayoidi tōnō cabayo inte nā cæte nāni wēā godō awotocoo mæ ongoncoopa. Mānīncoo tōmancoo mæ ongoncoopa, ante wæcædānīpa. Ayæ adobaī, Waodāni incæ nē cæte quēwencædānīpa, ante cæningāidi bai godonguēnēmō intamōmpa, ante wæcædānīpa. ¹⁴ Mānīnāni Babidōnia quēwēnāni iñānite iīmāi ancædānīpa.

“Quincamē ante beinente wæmīni incæ mānīnca tōmanca mīnitō weca nōwo dæ ancapa.

Mīni ēadīncoo tōnō quīnō waēmō mīni māincoo iñōmō mānīncoo tōmancoo nōwo dæ ā iñīnque mīnitō

ōmæpomīni inte cōwē wæætē ænāmāi incæmīnīpa,” ante ancædānīpa.

¹⁵ Tōmēnāni māniñōmō quēwēnāni iñānite mānīncoo nāni godōnīncoo beyæ nē ænīnāni inte nē nanguī ēadīnāni incæ Babidōnia iñōmō quēwēnāni nāni wæwēnō adīnque, Mānīnāni tōnō godongāmæ wæwēnāmāi incæmōnīpa, ante gomonga a ongōnīnque ancaī guīñencædānīpa. Ayæ wæwente Ca ca wæcædānīpa. ¹⁶ Ayæ iīmāi yedæ ancædānīpa.

“Babidōnia mīni waēmō quēwēñōmō nē quēwēmīni incæ mīni wæquinque ingæīpa.

Edæ māniñōmō quēwēmīni tōmēmīni weo-coo waēmoncoo nīno nāni ancoo tōnō awēnēidi waēmoncoo nāni mongæncoo tōnō opatawæncoo mānīncooque mongæmīni imīnitapa.

Mīnitō, Mōnō waēmō incæmōmpa, ante oodo inte badōnīncoo tōnō dicamō nāni nanguī godonte ænīncoo tōnō pededamō nāni āmō mānīmoncoo mongæmīni imīnitapa.

¹⁷ Incæte adoque ooda iñonte mānīncoo mīni ēadīncoo incæ edæ æmæwo ōmæ ewente batīpa, ante nē ænte godōnāni edæ wæcædānīpa,” ante angantapa.

Æpæntibædo wipocoo nē tōō tōō cædōnāni tōnō, Wipodē nē godāni, wipodē nē cædōnāni tōnō, Wipo inte mānīncoo godonte ængæīpa, ante nē māo godāni tōmānāni mānīnāni gomonga a ongoncædānīpa. ¹⁸ Babidōnia nāni quēwēñōmō gonga bæcododīnque tēēmancoo baca baca æi adīnque iīmāi yedæ ancædānīpa, “Ii Babidōnia nāni waēmō quēwēñōmō bai wayōmō nāni waēmō quēwēñōmō edæ dæ ampa, ante wæcædānīpa,” ante angantapa. ¹⁹ Nē wæwēnāni inte nāni cæi bai onguipo guidīmō ænte ocaboga wo ææntodonte wææ guicadīnque Ca ca wædīnque iīmāi yedæ ancædānīpa,

“Babidōnia nāni waēmō quēwēñōmō nē quēwēnāni nāni wæquinque ingæīpa.

Māniñōmō æpæntibædo wipocoo nē ēadāni inte

tōmēnāni nāni godōnīncoo māniñōmō quēwēnāni iñānite godonte ænīnque tōmānāni nanguī ēadāni badānitapa.

Ayæ adoque ooda iñonte Babidōnia nāni quēwēñōmō tōmāo æmæwo ōmæ ewente batīpa, ante ancædānīpa,” angantapa.

²⁰ Mānīnō ante ānāni ate, Tōmāmīni ōōnædē iñōmō quēwēmīni māniñōmō wo ewente i adīnque watapæ tocæmīnīpa.

Wængonguī quīmīni adobaī

Itota nānō nē da godongaimīni tōnō

Wængonguī beyæ nē apænēmīni tōnō

münitö tömämüni mäniñömö wo ewente i ad-
inque watapæ tocæminimpa.

Edæ, Minitö imünite æbänö wënæ wënæ
cædänii, ante adinque

Wængongüi tömënäni nani quëwëñömö
quëwëñäni inänite apænte äninque
pangä ate tocæminimpa, ante angan-
tapa.

²¹ Ayæ Wængongüi anquedo nê tæi emongä
iñömö dicabo nani mö mö equinca bai
ñænængade dicabo æninque æpæntibæ
cæncadëmæ wo guitudöninque iimaï angan-
tapa.

“Mäninca æpæntibæ cæncadëmæ tæi wo gui-
itodömo guii bai

Babidönia nani waëmö quëwëñömö
wo ewente dæ ba ate cöwë adämaï
incædänimpa.

²² İninque, Adapate nani ampogainö incæ
ämotamüni nani angainö incæ

ööña bai nani we we öongainö incæ
todompeta nani ancadeca nani we
we öongainö incæ mäniñömö cöwë
ëñänämaï ingæimpä.

Quiëmë badönäni incæ nê badongainäni
mäniñömö cöwë dæ ancædänimpa.

Tömënäni nani dicabo mö mö equinca
inte cæyönäni dicabo dadi dadi
cæyedë ä bai mäniñömö cöwë wü
ëñgüinänidö angüenë.

²³ Do nani ti wodönoincade mäniñömö cöwë
tica ëñänämaï ingæimpä.

Onquiyængä ingante nê monguingä
mäniñömö cöwë dæ ä mönämaï
inguinänidö angüenë.

Mäniñömö mäincoo ænte mante nê godonte
æñäni iñömö inguipoga ñænæñäni
inte ongongadänimpa.

Ayæ idöidi yewænte bai cædinque mäniñömö
quëwëñäni, Waëmö mäincoo, ante
wapiticæ änewëñäni beyænque
wabæca nani quëwëncabo wabæca
nani quëwëncabo incæ tömänäni nani
quëwëncabo oda cæte gogadänimpa,”
angantapa.

²⁴ Wængongüi beyæ nê apæneganäni
inänite wænöninque mäniñömö quëwëñäni
incæ Wængongüi quinäni inänite
godömenque wænönäni wængadänimpa.
Edæ inguipoga wænönäni nê wængainäni
tömänäni mäniñömö wænönäni wænte bai
ingadänimpa.

19

¹ Babidönia wo ewente ba ate öönædë
iñömö waodäni tæiyænäni adotedæ ogæ
tededäni bai ëñentabopa.

“Mönö Awënë ingante watapæ apænecæimpä, Onquiyængä tömengä ingante monguingä
ante, Adedoya, äninque,

Mönö Wængongüi mönö imonte, Quëwëncæminimpa,
ante nê Ængä inongä ingampa.

Tömengä ñäö emongä inongä ingampa.
Ayæ tömengä tæi piñængä inongä
ingampa.

² Edæ, Wængongüi, İimaï pancæboimpa,
ante nänö apænte angainö bai
cædinque tömengä cöwë nö cæte waa
pangampa.

Babidönia iñömö onquiyængä mäincoo beyæ
nê towente quëwëncogä bai impä.
Mäniñömö quëwëñäni nê wüwa cædäni
beyænque

inguipoga quëwëñäni wæætë nê wüwa
cædäni badäni adinque

Wængongüi mäniñömö quëwëñäni inänite
apænte pangantapa.

Wængongüi ingante nê cædinäni inänite
adodäni wænönäni adinque tömengä
wæætë tömënäni inänite wængongä
wænänitapa,” ante äñänitapa.

³ Ayæ wæætë ogæ tededinque,

“Adedoya,” äñänipa.

“Mäniñömö tæemancoo cöwë baca baca
æicöompa,” ante äñänitapa.

⁴ Mäniñedë Wængongüi nänö tæ con-
taimpaa tæ contayongante nê aadäni nê
Picænäni bæinticoatodo ganca inäni tönö
müinäni quëwëñäni mënaa go mënaa inäni
iñömö ædæ wæænninge, Bitö Wængongüi
Awënë imidö angüenë, äninque “Amëë,
Adedoya,” ante aa pedänitapa. ⁵ Wængongüi
nänö tæ contaimpa inö tedepämo iimaï
tededinque,

“Wængongüi ingante nê cæmüni inte
tömengä ingante nê guifente ëñente cæmüni
iñömö

nê awënëidi imüni incæ önöminique incæ
münitö tömämüni,

Mönö Wængongüi ingante watapæ
apænecæimpä, ante apænecædäni,”
angantapa.

Wængongüi Codotedo monguingä ææmæ

⁶ Ayæ adobai waodäni tæiyænäni
adotedæ ogæ tededäni bai ëñentabopa.
Ñænæ tēñabo ä bai detæbo eyequei tē bai
ëñentabopa.

“Adedoya,

Mönö Wængongüi Awënë Tömää nê Cægaïmi
inte

bitö nê Awënë badinque aabipa.

⁷ Mönö watapæ pöni entawëninque waa
tocæimpä.

Edæ tömengä ingante apænedinque
mönö, Bitö ñäö emömi imipa, ante
angæimpä.

Edæ Wængongüi Codotedo nänö mongüinö
oo bæcæ cæpa cæmüni.

Edæ Wængongüi Codotedo nänö mongüinö
iñömö, Botö nänöögængä inguingä oo
poncæcäimpa, ante nämä incæ eyepæ
cæte a ongongampa.

⁸ Tömengä ingante weocoo nino nani ancoo waemö näamæntacoo nänö wēñaquincoo, ante pönönäni ængä ingampa.

Wængongui quinäni nani nö cægaincoo incæ nino nani ancoo waemö näamæntacoo bai impa."

⁹ Ayæ Wængongui anquedo botö imote angantapa. "Iimaï ante yewæmōe. 'Wængongui Codotedo monguingä ææmæ pö becædänimpa, ante wente ængä nē ponguinäni nani toquinque.' " Tömengä ayæ godömenque äninque, "Mäninö Wængongui nänö nö angainö impa," ante angantapa.

¹⁰ Ante äñongä botö tömängä önöwa inö ædæ wææninque tömängä ingante watapæ apæneçæte ante cæyömote tömängä wæætē, "Mänömaï cædämaï imæwe, angantapa. Botö önönque bitö bai Wængongui ingante nē cæbo imopa. Edæ bitö töninädäni Itota nänö apænegainö nē äñente cædäni bai botö adobai Wængongui ingante nē cæbo imopa cæbii. Edæ Wængonguinque ingante ædæ wææninque, Bitö Wængongui Awënë imidö anguënē, ante apænee," ante angantapa.

Itota godö odömongä beyænque Wængongui beyæ nē apænedäni inömö tömängä nänö apænegainö ante ewocadinque apænedänipa.

Näämænta cabayoga nē tæ contacä mongænte pongampa

¹¹ Botö ayæ ayömote öönædē wi ænete bai bayö cabayo näämænta äñacä a ongongä atabopa. Cabayo nē tæ contacä mongænte pongä inongante, Tömängä cöwē pönëninque nē Ädæmö Cædongä inte, Näwangä impa, ante nē Apænegaingä ingampa, ante pemonte ingampa. Wænæ wænæ cædäni inänite tömängä nö apænte ante pänongä ingampa. Ayæ guëadö guëa cædinque tömängä nē nö cædongä ingampa. ¹² Tömängä awinca gonga bæcodote bai emongä inte tömängä ocaboga pogantacoo encacä ingampa. Tömängäa emöwo yewæmōte ii incæte mäninwo tömenganque nänö äñewo impa. Wadäni ædö cæte äñenguinäni. ¹³ Tömängä weocoo yacoo wepænē guipænenente mongængampa. Tömängä emöwo inömö, Wængongui nänö Angainö, ante pemonte ingampa.

¹⁴ Öönædē inömö tontadoidi tömängä miñæ tee empote godänipa. Tömänäni nino nani ancoo waemö näamæntacoo mongæninque cabayoidi näämænta äñadäni yabæ tæ contate mongænte godänipa. ¹⁵ Cabayoga nē tæ contacä inömö wabæca nani quëwencabo wabæca nani quëwencabo incæ waodäni inänite yaëmenca pancæte ante äninque tömängä önönē inö yaémē tipængaa waingamē engamē ënedinque yædæ tadete ongongantapa. Tömängä

inömö nē tæiyæ awënë tömängä nempo quëwänäni inänite aacä bai adobai tömämæ quëwänäni inänite, Iimaï cædäni, ante aacæcäimpa. Yowepæ ante yowecoo nani pinä pinä gäwate cæincadedē pinä pinä gäwate bai cædinque cabayoga nē tæ contacä Wængongui ængui nänö angainö beyænque inömö tömänäni inänite piinte pancæcäimpa. Wængongui adocanque Tömää nē Cægaingä ingampa. ¹⁶ Cabayoga nē tæ contacä inömö weocoo yacoo adobai tömängä önontiya ii emöwo yewæmōte äñacampa. "Ayæ waodäni awënë odeyeidi inönänite tömängä Tæiyæ Awënë Odeyde inongä ingampa. Tömängä inömö awënëidi tömänäni Awënë inongä ingampa," ante pemonte ingampa.

¹⁷ Ayæ wacä Wængongui anquedo nænque cæncædémö inö a ongongä atabopa. Tömängä öönædē gämænö nē cæwodäni tömänäni inänite yedæ ante aa pedinque, "Adoyömo godongämæ pödäni. Edæ Wængongui tæiyæ ææmæ ante pö cæedäni. ¹⁸ Awënë odeyeidi incæ tontado capitäoidi incæ onguinænäni tæi piñænäni incæ cabayoidi incæ cabayocooga inte nē tæ contate godäni incæ iinäni tömänäni wænäni ate tömänäni baö cæncæte ante pödäni. Waodäni awënë beyænque nē cæte quëwänäni incæ nē nämä cæte quëwänäni incæ awënëidi incæ önönänique incæ tömänäni baö pö cæedäni," ante aa pecantapa.

¹⁹ Ayæ botö ayömö mönö guinönongä tönö inguipoga awënë odeyeidi tönö tömänäni tontadoidi tönö adoyömo godongämæ pöninque, Cabayoga nē tæ contacä ingante ayæ tömängä tontadoidi inänite mönö guëadö guëa cæcäimpa, ante cædäni atabopa. ²⁰ Incæte guëadö guëa cæyönänite tömänäni näëmæ mönö guinönongä ingante bæi ongöninque, Wængongui beyæ nē apænebo, ante nē babæ äningä ingante adobai bæi ongönäntapa. Nē babæ änongä inömö mönö guinönongä beyænque mä pöni cæcä inongäimpa. Ininque mönö guinönongä tömängä nänö yewæmōi nē yewæmōinäni inömö tömängä nänö emönö bai nani badöninca gäänē ædæ wææninque nē apænedäni inte tömänäni nē babæ änongä nänö mä cædö ädinque guinente wædinque oda cædönänipa. Ininque mönö guinönongä tönö nē babæ änongä ayæ müna quëwëñonate atopode nani änotitbæ gonga bai nani bæcodotibæ cæncædëmæ wido cædänitapa. ²¹ Tömäna miñæ pönäni inänite guinente cabayoga nē tæ contacä tömängä önönē inö yaëmenca yædæ tadete ongöninque do wænongä wænänitapa. Ininque nē cæwodäni baö ade cænänique tömänäni nē wænänäni baö tömö pöni cæwëñönäni inänitapa.

20

Miido wadepo iñonte cebänö baquü

1 Wængongui anquedo wacä iñömö tadömgadænguiipo ontatodemö wi ænequü tönö ñänömencaimë ñænæmë önönempe næængä inte öönæde inö ta wæængä atabopa. 2 Ta wææninqe tömgä dadagöo ingante bæi ongöninque tömgä nänö miido wadepo ganca ñä cæyænte ongonguinque ante ñä cæyængantapa. Mäningä dadagöo wënenëde täntæ në ingaingä inte wënæ awënë Tatäna ingacäimpa. 3 Mäningä ingante ñä cæyæninqe tadömgadænguiipodë wido cædinque ontatodemö wi ænequü inte tee mönedinque tömgä dæca ontatodemö ædæmö tee moncacantapa. Waodäni wabæca nani quëwencabo ayæ wabæca nani quëwencabo iñönänite tömgä, Oda cæte gocædänimpa, ante miido wadepo ganca cædämai incæcäimpa, ante Wængongui anquedo dadagöo ingante wido cæcantapa. Mänimpodepo iinque ba ate tömgä ingante, Wantæ iñö ñimpo cæte goquingä, ante ñimpo cæcä gocæcäimpa.

4 Ayæ awënëidi tæ contaimpacoö botö atabopa. Wængongui Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinque Wængongui nänö angainö ante apænedäni beyænque tömënanäni inänite wangö tamencadäni wængadänimpa. Wangö tamencadäni wængainäni nani önöwocaidi botö ñöwo atabopa. Mäninäni iñömö mönö guiñëngä ayæ pöningä ingante adinque, Bitö Wængongui Awënë bai imidö angüenë, ante apænedämai inte ayæ tömgä nänö emönö bai nani badönicca gäänë ædæ wæænte apænedämai ingadänimpa. Ayæ tömënanäni nani önönemö inö nani önönempe inö mönö guiñëngä ayæ pöningä nänö yewæmöi yewæmönämai ingadänimpa. Adodäni ñäni ömæmöninque adoque miido wadepo ganca Itota Codito tönö godongämæ aadänitapa.

5 Mäninäni täno ñäni ömæmönäni incæte wadäni guiquënë në wængainäni incæ miido wadepo iinque go ate ñäni ömæmoncædänimpa. 6 Täno ñäni ömæmönäni iñömö në tæiyæ waëmö inäni inte nani toquinque. Edæ wadäni në wængainäni mempoga ganca nani wænguimämo iñonte mäninäni iñömö wænämai incædänimpa. Wæætë, Wængongui quü, ante në godönäni bai tömënanäni adobai, Wængongui beyæ, ante ayæ, Itota Codito beyæ, ante cæcædänimpa. Ayæ miido wadepo iñonte Itota Codito tönö godongämæ aacædänimpa.

Tatäna nänö æmæwo ömæ ewengüinö ante

7 Tadömgadænguiipodë tömgä nänö tee möneönë ñä cæyænte quëwëngä iñongante Tatäna ingante miido wadepo iinque go ate ñä cæyænäni ta gocæcäimpa. 8 Ta godinque tömgä inguipoga æmatæ go æmatæ go godinque Gogobæ nani ämæ ganca go Mäogobæ nani ämæ ganca gocæcäimpa. Inguipoga tömæo godinque tömgä, Wabæca nani quëwencabo ayæ wabæca nani quëwencabo nani oda cæte goquimämo ante cædinque tömënanäni inänite, Mönö guëadö guëa cæquinque gocæcäimpa, ante, Adoyömö godongämæ pöedäni, ante ancæcäimpa. Æpodänidö inänii, ante tömënanäni æpæ wedeca emönai bai tæiyænäni inguinänidö angüenë.

9 Mäninäni bogænæ tömæo godäni bai tömënanäni adobai inguipoga tömæo gocædänimpa. Wængongui nänö waadete quëwëñömö tömgä quinäni quëwëñömö godämæ gocædänimpa. Goyönäni öönæde inö gonga bæcodote gao wææñönte gonte wæncædänimpa. 10 Ayæ wënæ tömënanäni inänite, Oda cæte gocædänimpa, ante në cægaingä ingante Wængongui bæi ongonte atopode nani änotibæ gonga bai nani bæcodotibæ cæncædämæ wido cæcæcäimpa. Edæ mönö guiñëngä tönö, Wængongui beyæ në apænebo, ante në babæ äningä tönö tömëna do bæ mänifömö wido cæte ingadäimpa. Iinque mäninäni itæde woyowotæ mänifömö quëwente cöwë wantæpiyæ nani wæwenguimämo ingæimpa.

Wængongui Awënë tæ contaimpa näämæntapa

11 Ayæ awënë tæ contaimpa ñænæmpa näämæntapa adinque botö mänimpaa në tæ contacä ingä adobai atabopa. Inguipoga tönö öönæ iñömö tömgä ingante ate bai cædinque wodi godinque näna ongöñömö edæ ædömë gote dæ änimpa.

12 Ayæ në wængainäni tömännäni awënëidi incæ önönänique incæ mänimpa gäänë a ongönäni atabopa. A ongöñönäni mincayontacoö wataa wataa wi æmpote ongoncoopa. Ayæ mincayonta wataa Wængongui, Quëwenguinta, ante tömgä yewæmongaintaa wi æmpote acantapa. Mänii mincayontacoö iñömö, Në wængainäni tömännäni æbänö cægainäni inänii, ante Wængongui mänintacoö nänö yewæmongainö ante wataa wataa tömanta adinque në wængainäni nani cægai ganca, ante tömënanäni inänite adoganca apænte ante pangantapa. 13 Ayæ æpæntibæ cæncædämæ do wængainäni wæætë ta pönänitapa. Æmæwo wængainäni incæ ta pönänitapa. Tömënanäni nani wænte ongöñömö në ongongainäni inte wadæ ta pönänitapa. Ta pönäni ate, Æbänö cægainäni inänii, ante

adinque Wængongui adocanque adocanque nänö cægaŋ ganca, ante tömengä ingante adoganca apænte ante pangantapa.

¹⁴ Mänifedē ganca ayæ baganca wænāmai quēwencädänimpa, ante ayæ, Wængaināni nāni ongöñömö adobai dæ bacæimpa, ante cædinque mönō Awēnē wængaināni æmæwo nāni wængaimāmo tönō nāni wænte ongöñömö æpæntibæ gonga bai nāni bæcodotibæ cæncadēmæ wido cæcantapa. Mänintibæ mempoga ganca æmæwo nāni wænguimāmo bai impa.

¹⁵ Wængongui, Quēwenguinta, ante nänö yewæmongaintaa adinque, Æcänō emōwo mänintaa yewæmönāmai i, ante adinque nē yewæmönāmai ingaināni inänite mänintibæ cæncadēmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobai dæ änimpa. ² Ayæ godömenque botö ayömote Wængongui nänö tæiyæ waemö quēwëñömö mü Eedotadē nāni äñömö öönædē inö ta wææ atabopa. Onquiyængä nē moncæ cæcä iñömö, Botö nänöogængä inguingä waa acæcäimpa, ante waemö weocoo nē mongængä bai i quēwëñömö adobai waemö pöni emö inte ta wææ atabopa.

³ Ayæ Awēnē tæ containpa inö tedepāmo yedæ ä eñentabopa. “Nöwo Wængongui nänö owoquincö waodāni weca ongö iinque tömengä tömēnāni tönö quēwenguingä ingampa. Tömēnāni tömengä guiidēnāni bacädänimpa. Ayæ Wængongui incæ, Botö tömēmo minitö Wængonguimo incæboimpa, ante tömēnāni weca ongoncæcäimpa.

⁴ Tömēnāni wēñapæ tamonte wædi tömāmæ Wængongui wadæ cæmoncæcäimpa. Mänifedē æmæwo mönō wænīmāmo incæ mönō wæwēnimāmo incæ Ca ca mönō wædimāmo incæ nantate mönō wædimāmo incæ tömää mänimāmo dæ angæimpa. Edæ wēñēñedē inimāmo incæ iinque batimpa,” angantapa.

⁵ Ayæ Awēnē tæ containpaa nē tæ contacä iimāi angantapa. “Tömää inimāmo botö ñowo mü cæcæboimpa,” angantapa. Ayæ, “Mänömainö ante botö äñinö edæ nö pöni i iinque mäninö ante wede pönengæimpa. Mänömai beyæ bitö iimāi ante yewæmōe,” angantapa.

⁶ Ayæ tömengä wæætē botö imote iimāi äninque, “Dobæ iinque batimpa. Botö Tānobo ingaimo inte Tömāmo inguimo imopa. Wēñēñedē tömää nē Badongaimo inte tömää nē iinque Cæbo incæboimpa. Edæ nē gæwæñāni, Æpæ beinēmōnipa, ante nē

änāni inänite botö æpæ tapæ quēwenguiæ önonque godömo becädänimpa. ⁷ Tæi emonte nē gänä cædāni inänite botö mänincoo botö nē godonguincö godömo æncädänimpa. Ayæ botö incæ tömēnāni Wængonguimo incæboimpa. Tömēnāni wæætē botö wēñæñāni bacädänimpa. ⁸ Wæætē guñente awædö, ante nē änāni tönö nē pönēnāmai ināni guiquēnē, nē wiwa cædāni tönö wacä ingante nē wænönāni guiquēnē, nē towente quēwēñāni tönö idöidi nē ināni guiquēnē, Wængongui impa, ante nāni badöninca gäänē ædæ wææninque nē apænedāni tönö nē babæ änāni tömānāni guiquēnē, mänināni iñönänite atopode nāni änantibæ gonga bai nāni bæcodotibæ incæ tömēnāni nāni wæcöñömö bacæimpa. Mänii nāni wænguimāmo iñömö mempoga ganca nāni æmæwo wænguimāmo impa,” angantapa.

Mü Eedotadē quēwëñömö

⁹ Wængongui anquedoidi önonpo æmæmpoque go mēa ganca ināni önonpo æmæmpoque go mēa ganca owætacoo waodāni iinque nāni wænguimāmocoo eyede engate intacoo nē nææñāni iñönänite adocanque botö weca pöninque, “Pöe,” angantapa. “Wængongui Codotedo nänöogængä nē baqingä nē monguingä iñongante botö bitö imite odömömo acæbiimpa,” angantapa. ¹⁰ Ayæ Wængongui Öñowoca incæ botö imote bæi ongonte bai cæyongante botö wiimonte bai iimāi atabopa. Wængongui anquedo botö imote ö ænte mäo onquiyaboga tæcædæca pöni cönongä ongonte ayömo Wængongui tæiyæ waemö nänö quēwëñömö Eedotadē nāni äñömö öönædē inö ta wææñonte tömengä botö imote odömongä atabopa.

¹¹ Mänii quēwëñömö Wængongui ñäö emönongä bai apäitimpaa. Ayæ dica aatapeca nāni anca emö bai awocawænta bai waëmonca inimpa. Waodāni nāni nangui godonte æninca bai ñäö apäite bai Eedotadē inimpa. ¹² Mänii quēwëñömö godämæ tæimö wææ cædi æñöwæmö ongönimpa. Ayæ wææ cædi odemoncoo iñömö önonpo tipæmpoga go mēnemonga wææ cædinemö inimpa. Önonpo tipæmpoga go mēa ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önonpo tipæmpoga go mēa ganca ongönänitapa. Mäninemö önonpo tipæmpoga go mēnemonga odemoncooga idægoidi nāni cabo tipæmpoga go mēncabodāniya iñönänite tömēnāni emöwocoo yewæmonte inimpa. Wayömö odemonga adocaboque emöwo wayömö odemonga adocaboque emöwo yewæmonte inimpa. ¹³ Nænque tamönö inö mēa go adoque odemö inimpa.

Nænque wæidö inö mäa go adoque odemö inimpa. Betamonca inö mäa go adoque odemö inimpa. Adobai æmatæ inö mäa go adoque odemö inimpa. ¹⁴ Mänii quëwëñömö wænömënæca mænonte wææ cæqui, ante nani ñönönincacoo iñömö önompo tipæmpoga go mencaa inimpa. Mänincacoo önompo tipæmpoga go mencaa incæ Wængongui Codotedo nänö da godongainäni önompo tipæmpoga go mënnaa inäni tömënäni ëmówo incæ adocanque ëmówo wacaa adocanque ëmówo wacaa yewæmante ëñacaimpa.

¹⁵ Wængongui anquedo botö imote në apænëdingä iñömö tee manguimpa odo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa næængantapa. ¹⁶ Mänii quëwëñömö æmatæ adoganca æmatæ adoganca mænonte inimpa. Doyæ inö betamonca inö adoganca inimpa. Tömengä mänii quëwëñömö tee manguimpa inte tee mante doyæ inö ænówæmö inö doo müido dootiento quidömetodo ganca inimpa. Ayæ betamonca iñömö adobai doo müido dootiento quidömetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæïnebo inö tetenta i coatodo mëetodo ganca inimpa.

¹⁸ Mänii wææ cædi aatapeca nani änonca inte mænöni impa. Mänii quëwëñömö guiquënë odo inte awocawænta bai waëmö inte mænöni impa. ¹⁹ Mänii quëwëñömö wænömënæca mænonte wææ cæqui, ante ñönönincacoo iñömö, Waëmö ëmongæimpa, ante tömënäni quincacoo nani nangui godonte ænincacoo ænte mämö ñönönincacooa bewodö bewodö cædänitapa. Tænoca ñönöninca aatapeca nani anca inimpa. Waca ñönöninca guiquënë tapidoca nani anca inimpa.

Waca ñönöninca guiquënë aagataca nani anca inimpa.

Waca ñönöninca guiquënë etemënaotaca nani anca inimpa.

²⁰ Waca ñönöninca guiquënë oöninteca nani anca inimpa.

Waca ñönöninca guiquënë codönadinaca nani anca inimpa.

Waca ñönöninca guiquënë coditooditoca nani anca inimpa.

Waca ñönöninca guiquënë bedidoca nani anca inimpa.

Waca ñönöninca guiquënë topatioca nani anca inimpa.

Waca ñönöninca guiquënë coditopadataca nani anca inimpa.

Waca ñönöninca guiquënë aatintoca nani anca inimpa.

Waca tömanca guiquënë amatitaca nani anca inimpa.

Mänimpoca inimpa.

²¹ Mänii wææ cædinemö iñömö önompo tipæmpoga go mënemonga iñömö pededamö nani ämö önompo tipæmpoga go mëmonga inte mænonte inimpa. Wææ cædinemö incæ wææ cædinemö incæ pededamö adomonque adomonque inte mænöninemö inimpa. Mänii quëwëñömö taadö ñænænö godö odo inte mænöwate taadö awocawænta bai waëmö inimpa.

²² Mönö Wængongui Awënë adocanque Tömää në Cægaingä tönö Wængongui Codotedo tönö mäniiñömö cówë ongöna inique godongämæ quëwëñäni guiquënë, Mönö Wængongui oncönë guicæimpa, ante quinänte anguinäni. Edæ Wængongui tæiyæ waëmö oncö mäniiñömö dæ ä atabopa. ²³ Wængongui në ñäö bai ëmönongä inte ñäö apäiquingä bai inongäimpa. Ayæ Wængongui Codotedo iñömö nani ti wodönoincade bai i inique mänii quëwëñömö iñömö nænque incæ apäicä incæ quinänte godömenque ñäö apäiquii. ²⁴ Wabæca nani quëwencabo ayæ wabæca nani quëwencabo inänite Wængongui ængä beyænque në quëwëñäni inte mäninänique mänii ñäö apäiyömö cægoncædänimpa. Adobai inguiipoga awënë odeyëidi waëmoncoo nani ëadincoo mäniiñömö ænte poncædänimpa.

²⁵ Mänii quëwëñömö woyowotæ inämai ingæimpa. Inique mäniiñömö wææ cædinemoncoo iimö iñö iimö iñö iñönte cówë tee mönedämai ingæimpa. ²⁶ Wabæca nani quëwencabo ayæ wabæca nani quëwencabo incæ tömënäni waëmoncoo nani ëadincoo mäniiñömö ænte poncædänimpa. Mänii quëwëñömö waa quëwëñömö impa, ante waa ate apænecædänimpa. ²⁷ Quiëmë wënæ wënæ i mäniiñömö cówë guidämai ingæimpa. Në wiwa cædäni incæ në babæ änäni incæ mänii quëwëñömö guidämai inguinänidö angüënë. Wæætë Wængongui Codotedo, Quëwenguintaa, ante nänö yewæmointaa në yewæmönäni guiquënë tömënänique guicædänimpa.

22

¹ Ayæ Wængongui anquedo botö imote önö quëwenguiämæ odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ contaimpa inö tapæmpa. ² Mäniiñömö tadinque mänii quëwëñömö taadö ñænænö godö tæcæguedë inö ta gopæmpa. Mäninö æmæ wædeca incæ imæ wædeca incæ awæ quëwenguiwæ pæwæ atabopa. Mäniwæ iñömö tömenca wacä apäicä iñönte wacä apäicä iñönte incapa. Inique adoque

wadepo iñedē ōnopmo tipæmpoga go mēa ganca mānimpoga māniwæ incayedē impa. Wabæca nāni quēwencabo ayæ wabæca nāni quēwencabo incæ mānimæca quēwēnāni tōmānāni māniwæ ōñabocoo beyæ ganca bæcædānimpa, ante ēñabocoo. ³ Wængongui pante nānō angaiñō beyæncque quincoomē wēnæ wēnæ bagatū māniñō māniñedē dæ angæimpa. Wængongui tōnō Wængongui Codotedo nāna aacæ tæ containpa māni quēwēñōmō mæ ongoncæpaimpa. Tōmengā ingante nē cædōnāni iñōmō tōmengā ingante watapæ apænedinque tōmengā ingante cæcædānimpa. ⁴ Tōmengā awinca acædānimpa. Ayæ tōmengā ēmōwo tōmēnāni ōñōnemō iñō yewæmōte incædānimpa. ⁵ Māniñōmō woyowotæ ināmai ingæimpa. Edæ māniñōmō quēwēnāni beyæ Wængongui Awēnē nē ñāō ēmōnongā inte apāiquingā iñongampa. Ininque nænque ñāō apāidō incæ ti wodōnoincade ēñēnō incæ quīnante ayæ apāiquī. Ayæ māniñōmō quēwēnāni adodāni cōwē wantæpiyæ aacædānimpa.

Itota Codito oo poncæcāimpa

⁶ Ayæ Wængongui anquedo botō imote apænedinque, “Māniñō bitō ēñēnō nō pōni i iñinque māniñō ante wede pōnengæimpa. Wængongui beyæ nē apænedōnāni tōmengā Ōñōwoca ingante ēwocadinque apænedānipa. Tōmēnāni nāni nē ēwocadongā Wængongui Awēnē iñōmō tōmengā anquedo ingante apænedinque, Bitō botō imote nē cædōnāni weca godinque, Æbānō oo pōni baquimpa, ante odōmōmi acædānimpa, ante da pōnongā pongantapa,” ante botō imote apænecantapa.

⁷ Itota Codito, “Aedāni. Botō oo ocæ ēmænte ponguimo imopa. Ii mincayontaa Wængongui beyæ apænedinque nāni yewæmōte angaiñō ante nē ēñente cædāni iñōmō nāni toquinque,” ante apænecantapa.

⁸ Botō Wāōmo iñōmo imopa. Māniñō Wængongui anquedo nānō āniñō ante nē ēñēniimo inte botō māni tōmengā nānō odōmōniñō ante nē adimo iñōmo imopa. Wængongui anquedo angā ēñēnincque ayæ odōmongā adinque botō nē odōmōningā ōñōwa iñō ædæ wæænte tōmengā ingante watapæ apænecate ante cætābopa. ⁹ Cæyōmote tōmengā wæætē, “Mānōmai cædāmai imāwe, angantapa. Botō ōnonque bitō bai Wængongui ingante nē cæbo imopa. Ayæ bitō tōniñadāni Wængongui beyæ nē apænedōnāni tōnō ii yewæmōntaa nāni angaiñō ante nē ēñente cædāni tōnō botō tōmēnāni bai adobai Wængongui ingante nē cæbo imopa cæbii. Edæ Wængonguinque ingante ædæ wææninque, Bitō Wængongui

Awēnē adobique imidō anguēnē, ante apænee,” angantapa.

¹⁰ Wængongui anquedo godōmenque botō imote iūmai angantapa. “Edæ mānōmai baquionæ oo pōni ingæimpa cæbii. Ii yewæmōntaa Wængongui beyæ apænedinque nāni angaiñō ante bitō wē wodōnāmai inte do apænee. ¹¹ Nē wēnæ wēnæ cædōnāni inānite ee abi godōmenque wēnæ wēnæ cæcædānimpa. Tōmēnāni nāni pōnēnō wentamō bai nē entawēnāni inānite ee abi godōmenque nāni pōnēnō wentamō bai entawencædānimpa. Nē nō cædāni inānite ee abi godōmenque nō cæte quēwencædānimpa. Nē tæiyæ waēmō entawēnāni inānite ee abi godōmenque tæiyæ waēmō entawencædānimpa.”

¹² Itota Codito, “Aedāni. Botō oo ocæ ēmænte ponguimo imopa. Ocæ ēmænte pōninque botō tōmēmo godōmo nāni ænguincōo, ante næænte ponguimo imopa. Tōmānāni æbānō cædāni, ante adinque botō tōmēnāni nāni cægaī ganca ante adoganca godōmo æncædānimpa. ¹³ Botō Tānobo ingaimo inte Tōmāmo inguimo imopa. Tōmāā badōnāmai iñedē botō Do Quēwēngaimo imopa. Ayæ tōmāā iñinque bayedē incæ botō Ayæ Pōni nē Quēwēmo incæboimpa. Wēēnēñedē tōmāā nē Badongaimo inte tōmāā nē iñinque Cæbo incæboimpa.”

¹⁴ Wæocoo yamonte bai mīmōnē nē mēnongate ināni iñōmō tōmēnāni nāni toquinque edæ māni quēwēñōmō wææ cædinemō iñōmō go guiquināni inānipa. Go guidinque tōmēnāni quēwēnguiwæ quēwēnguinca bequīnāni inānipa. ¹⁵ Wiwa cædāni guiquēnē māni quēwēñōmō yabæque iñōmō ongonte wæquīnāni inānipa. Idōidi nē ināni, nē towente quēwēnāni, wacā ingante nē wæñōnāni yabæque ongōnānipa. Wængongui impa, ante nāni badōninca gāānē ædæ wææninque nē apænedāni, nē babæ ānāni tōnō, Babæ āinēmōnipa, ante nē ānāni tōnō tōmēnāni tōmānāni māni quēwēñōmō yabæque iñōmō quēwēnguināni inānipa.

¹⁶ “Botō Itotabo ingaimo imopa. Māniñō botō angaiñō ante nō impa, ante botō imote godongāmæ nāni pōnecabodāni tōmānāni inānite apænecā ēñencædānimpa, ante cædinque botō do botō anquedo ingante mīnitō weca da pōnōmo pongantapa. Botō docā Awēnē Dabii nānō Wæmæncōo ingaimo inte adobai nānō Pæimo iñōmo imopa. Botō wadaamō bai ñāō bayō apāimō bai imopa.”

¹⁷ Wængongui Tæiyæ Waēmō Ōñōwoca tōnō Wængongui Codotedo nānōogængā nāni ānongā, “Pōedāni,” ānapa. Añōna tōmēnāni tōmēna inate nē ēñēnāni inte adobai, “Pōedāni,” ancædānimpa, āmopa. Nē gæwænte ināni tōmānāni pō becædānimpa, āmopa. Nē beinēnāni iñōnānite, Mīnitō

quēwenguimæ, ante ōnonque pōnonguimæ incæ pō ænte becæminimpa, ante āmopa.

¹⁸ Ī yewæmōintaa Wængonguī beyæ nē apænedāni nāni angainō ante nē ēñēnāni tōmānāni inānite, Ee aedāni, botō wææ āmopa. Edæ mānīnō nāni angainō ante godōmenque wadō ānāni inānite Wængonguī pancæcāimpa. Ī yewæmōintaa quiēmē nāni pante wæwenguincoo, ante yewæmonte adinque Wængonguī nē wadō ānāni inānite mānincoo bai godōmenque pancæcāimpa.

¹⁹ Ayæ Ī yewæmōintaa Wængonguī beyæ nē apænedāni nāni angainō incæ pancadea æninqe nē wēā godonte bai cædāni inānite Wængonguī quēwenguīwæ quēwenguinca

godōnāmai incæcāimpa. Tōmengā adobai, Botō tæiyæ waēmō quēwēñōmō māniñōmō guiidāmai incæminimpa, ante ancæcāimpa. Māniī quēwenguīwæ ante māniī quēwēñōmō ante Ī yewæmōintaa yewæmonte impa.

²⁰ Mānīnō ante, Nō impa, ante nē apæneca ĩñōmō tōmengā ĩñōmō, “Ao, botō oo ocæ ēmænte ponguīmo ĩmopa,” angantapa. Āñongante botō,

Mānōmai baquinō anguēnē, ante, Amēē, āninqe, Awēnē Itota pōe, āmopa.

²¹ Awēnē Itota Wængonguī nānō guidēnāni inānite waadete godō cæcæcāimpa. Mānōmai baquinō anguēnē, ante botō, Amēē, ante māninqe āmopa.